



**Vanuvei Eo e sepinien Vatlongos na
mol-Vatimol xil niutestamen e rute
te oltestamen**

Southeast Ambrym Bible portions

Contents

Rut	1
Siona	7
Matiu	10
Mak	81
Luk	123
Sion	196
Polien	250
Rom	315
1 Korin	346
2 Korin	375
Kalesia	396
Efeses	408
Pilipae	420
Kolose	428
1 Tesalonaeka	436
2 Tesalonaeka	444
1 Timoti	448
2 Timoti	457
Taetas	463
Filimon	468
Hibru	471
Temis	495
1 Pita	504
2 Pita	514
1 Sion	520
2 Sion	528
3 Sion	530
Siud	532
Revelesen	536



**Vanuvei Eo e sepinien Vatlongos na mol-Vatimol xil
niutestamen e rute te oltestamen**

Portions of the Holy Bible in the Southeast Ambrym Language of Vanuatu

Des portions de la Sainte Bible dans le Sud-Est Ambrym Langue de Vanuatu

Language: Southeast Ambrym (Ambrym, Southeast)

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2015 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-06-27 from source files dated 2017-06-26.

d6322831-f65b-57c1-8673-8099ea7771d7

ISBN: 978-1-5313-0665-6

Rut

Sakpisien xil xa nggeih bemei e meulien na ate-Isrel tei

Rut 1:1-5

1¹⁻²Tetiamu, Iahova tesa vat xil mei latetutou ni mol-Isrel xil, vengon xa suv toto nae tehe tovuol tamu tangan valaxat xil mu valepis rin nae xil. E melele nen ak, mae kekaten tei xa eilep tekapis e tan xa mol-Isrel lateti en. Re-itin, us tamus ti aveti xil holu e misak ni anien tovuol e mae di nggat moletin xil. Misak ni, moletin tei te metimal te hal Betlehem e tan na mol-Sudah xil, xi tehe kantri te hal Moab, hisen Elimelek,* e xi texo vatimol xa mahulong na Efrat. Xi teha tetel atou nan, hisen Noume, e tetel horamue lu nalu, hisealu Malon xal Kilion. E xil ba lateti e tan na mol-Moab xil haram vahis.³ E melele xa lateti rute ak, Elimelek temat, ma Noume teta tasen tang tetel horamue nan xalu.⁴ Di, horamue nan xalu ak luteteli mi atou lu te hal Moab, hisealu Oripa e Rut. Melele xa haram he xalu (10) mei tetavi,⁵ Malon xal Kilion mun lutelel. Ma, Noume tetat temak tang, tiramue nan e horamue nan xalu mun latehe tovuol.

Noume dilomun be metimal te hal Betlehem del havnahnin Rut

Rut 1:6-22

⁶Aveti vahis mei mitavi, e Noume milongong ni xa Hi di duxol xat moletin nan xil nggo rin xa di misak ni anien sae xil di meul bos rilomun. Misak ni, Noume bue xat xi tangan ihe reling kantri te hal Moab itel havnahnin xalu.⁷ Xatel vus latobituei latoba tangan latotilomun latohe tan na mol-Sudah xil. E melele xa di latoba,⁸ Noume biteni mi

xalu bit, “Multilomun mun tang mulihe visal ninemil xati xalu e multit itel xalu. Inou nasis tangan Hi ipisen hosien mi xamil ixoni ngan taxa mutepisen ni minou tetel horamue navan xalu xa lulel tuei.⁹ Nasisi mun xa Hi ipol ni xamil mulkila muliteli rilomun e mulikamet hosien itel tiramue hu namil xalu.”

Di, Noume po xat xalu tangan istokovein xalu laliha. E xalu di lumuis¹⁰ e lubiteni mi Noume lubit, “!Masakras li malhe relinguk! Xamel malhusiluk, ratiha ratti vituei itel moletin nam xil.”

¹¹E Noume bit rilomun ni mi xalu bit, “Havuxahin xalu, bos mak mu xa multilomun muliha. ?Veneh ma mubit mulhusil inou? ?Munemi mubit inou nikila niling horamue lu mun tangan muliteli mun itel xalu? ¹²!E-e! !Muliha! Inou nabe tovolih pupu tangan nateli rilomun. ?Tave ti neta xosxa inou nanemi namit nakila niteli mun xosali tang, e niling horamue lu mun,¹³ xamil mukila multatil xalu ha vuma ... lalimatu lalipin ni tetelien? E-e, ngan ak misakras vastal vamak. Havuxahin xalu, xos mukila mulikamet hosien mu e meulien namil, e inou nasakras. Mulnahusil nou ti. E meulien navan, napus longpangasien holu vengon xa he Iahova di nggeih da xat inou.”

¹⁴Xalu lumuis vatei mun. Di, Oripa maheah xat avu sasa nan, misep lingi, e ba tangan vatilomun vahe visal vatimol nan xil. E Rut, xi miteli en nggeih, ien ti tavei vahe reling Noume.¹⁵ Ma Noume biteni mini bit, “?Rut, pus ti? Tumahin di dilomun tangan vahe visal moletin nan xil e hi nan xil. Xouk mun uhusili muliha ha upus vatimol nam xil.”

¹⁶E Rut bit rilomun ni mini bit, “!Onasil nou ti tangan name relinguk! Umaen nou li nihusiluk. !Rute xave xa uha en, inou mun niha en! !Rute xave

*1:1-2 Elimelek, koute te hisen be ‘Hi be suv toto.’

xa uta en, inou mun nita en! Moletin nam xil, lihe moletin navan xil mun. E Hi nam, ihe Hi navan mun.¹⁷ Rute xave xa umat en, inou mun nimat en, e liti-hin nou e rute ak. Nasakras namaen neta tova vahur rat nou ra xouk ha vuma ... tei ralu imat. !Ngan ak be hitxatien navan e Iahova isa pangasien te xeih mei iti xat nou xosxa nihur xotehi!”

¹⁸ Melele xa Noume pus kila xa Rut, nenemien nan nggeih tangan ihusili, xi tasak ti mun tangan vasila vahe relingi.

¹⁹ Ma xalu lukakao vuma ... ba luduxoh metimal te hal Betlehem. E melele xa be lustal en, moletin xil vus te rute ak latemanin ni xalu. E atou xil lamesep pupu labit, “?Noume mak xiak?”

²⁰ E Noume bit rilomun ni mi xil bit, “Munakes nou ti mun ni ‘Noume’ e mukes nou ni ‘Mara’ vengan xa Iahova pol ni meulien navan mei mikon ni long-pangasien.”[†] ²¹ Melele xa natehe reling rute ak, heok xalu tepolu ni hosien, e tax-eak, Hi nggur rilomun ni nou mei nabe heok hon tang. ?Veneh ma mukes nou ni Noume vengan xa Hi te Xeihen tepol ni texeih pupu minou e tesa longpangasien minou?”

²² Nggo sexien ak, Noume nggo kantri te hal Moab e dilomun bemei e tan te hal Isrel del havnahin Rut, xa be ate-Moab. E melele xa mei lustal e metimal te hal Betlehem, **bale**[‡] mun tehe temetu e naho sa mol-Isrel xil.

Rut ba pol e naho sa moletin hos tei

Rut 2:1-23

2 E metimal te hal Betlehem, eilep tei da en xa holesok nan holu, hisen Boas. Xi nggo vatimol xati na Elimelek,

tiramue na Noume. ² Vatei, Rut misis Noume bit, “Umaen nou nihe naho tova tangan nileh viton bale xil xa moletin te polien xil laki rasi di nga tangan mei ihe anien aralu. Xos nikila nikamet moletin tova xa imaen nou nipol e naho san.”[¶]

Ma Noume maen ni bit, “Havuxahin, bos tang, ha upol ni.”

³ Ma Rut ba be naho tei e di pol dutou ni moletin te polien xil e di mileh viton bale xil. Rut ba mileh rut bale xa xil laki rasi di nga. E Rut, xi takil ti xa naho xa di pol en sa Boas xa nggo vatimol xati na Elimelek, tiramue na Noume. ⁴ Tavehi ti, Boas nggo metimal te hal Betlehem e mei mistal mi moletin te polien nan xil e miki ba ni xil bit, “!Iahova iti mi xamim!”

Ma xil labit rilomun ni mini labit, “!Iahova ituxol xatuk mun!”

⁵ Di, Boas misis vat te polien nan bit, “?Atul maxoe xai be na visi?”

⁶ Ma vat ak bit rilomun ni mini bit, “Atou xai be te hal Moab, e be xal Noume iaxa lumei. ⁷ Xi misis nou tangan nimaen ni iha ti ihusil moletin te polien xil e ti ileh viton bale xil xa laki rasi di nga. Xi temei makoe roroh tamu e di ni polien duxoh taxeak. Xi ba mingel vuteili tang pe horao iaxor.”

⁸ Di, Boas ba misepin del Rut bit, “Ei, atuli. Uteong ni nou, ieok bei tangan upol e naho savan sangas visal atou te polien navan xil. Onaha ti mun naho na mosav tangan oleh viton bale en. ⁹ Rute xave xa xil ti lipol en, xouk mun utat visal xil. Nasep xol moletin navan xil tuei tangan linapol ti nasa minuk. E xosxa meruru iatuk, ma uha umu ti oei e valoei xa langgutuhi tuei di.”

[†]1:20 Noume, koute teni be ‘hosien,’ e Mara, koute teni be ‘mikon.’

[‡]1:22 Bale be anien tei xa meul nggoni utuol, e anien nen be vanute e langga ni nggoni raes.

[¶]2:2 Dut 24:19 bit bos xos mol-Isrel xil limaen ngan halesav xil itel tunau xil tangan mei lileh viton rut bale mu uit xa laki rasi di nga.

¹⁰ Melele xa Rut milonge mak, miteingiril e valnaon ba duxoh tan. Xi bit rilomun ni mini bit, “?Veneh ma di onexo ve nou? ?Veneh ma di opol ni bos minou xa nabe ngan halesav tei tang?”

¹¹ Boas bit rilomun ni mini bit, “Inou nalongeong ni sexien hos xil xa otepisen ni mi avu sasa nam melele xa tiramue nam temat. Nakila xa xouk otehe reling tamom e ninom e kantri xati nam tenggan mei odi mi moletin xil xa otnakil ti xil tetiamu. ¹² Nasis mi Iahova tangan isa xoles hosien xa otepisen ni mini. Reitin, Iahova, Hi na mol-Isrel xil, isa sanien tei xa ihos pupu minuk venggan xa xouk oteping nenesien nam en tangan ilaxatuk e isikoe xol meulien nam.”

¹³ Di, Rut bit rilomun ni mini bit, “O eilep navan, xouk opol ni bos pupu minou li. Neta sav xa inou natapin ti tenggan name atou te polien tei nam, xouk osepini kuhi minou e odal rat nenemien navan.”

¹⁴ E pinia, melele xa moletin te polien xil di langganien, Boas biteni mi Rut bit, “Amei visal xamem, a ti beret e usa ni ihe uan xa mikon xiak.” Ma xi dotan del moletin te polien xil, e Boas misa rut bale xa ladin ni meses mini. Xi ngganien pipin e miserev kuh anien an xa ngga lingi ba di. ¹⁵ Melele xa Rut dilomun ba tangan vapal, Boas misel xat moletin te polien nan xil bit, “Mumaen ni ileh viton bale e rute xil vus xa ien bei. Tave ti neta xosxa ileh rerati ra vanute xil xa mubar viton ni ngamu di, munasep xole ti. ¹⁶ E tei mun, bos xa muleh rerat ti bale ra vanute xil e muso ni ihe tan tenggan atou ak mei ti ilehi.”

¹⁷ Ma Rut mileh viton **bale** e naho ak ba duxoh mahis. E melele xa bas rerat utute, mikameti xa utut bale xil vus xa milehi, kilo nen be lu e le tei (12 kg). ¹⁸ Mileh utut bale xil ak dilomun be tim

e ba pisen ni mi avu sasa nan. Di, rut anien xa teserev kuhi, ngan ak mun, Rut misa ni mini.

¹⁹ Melele xa Noume pusi, mitemanin e misisi bit, “?Xosali, oleh viton utut bale xil ak ingga xave? ?Naho sasi vari iaxa xouk otepol en? Tuxolxatien na Hi iti mi moletin xa pusuk e pol bos minuk mak.”

Ma Rut biteni mi Noume bit, “Natepol e naho sa moletin tei xa hisen Boas.”

²⁰ Noume miki nggeih bit, “!Tuxolxatien na Iahova iti mini! Iahova di pisen hosien nan mi ralu xa rumeul rudi e mi tiramue naralu xalu xa lulel ngamu. Moletin xai nggo vatimol xati na tiramue naralu xalu. E nggusil sexien na mol-Isrel xil, xi iaxa ilaxat kuh rin naralu.”^a

²¹ Ma Rut bit, “E ngan bos mak mu, xi biteni minou bit tit nileh viton bale itel moletin te polien nan xil ha ituxoh melele xa lileh vuol ni bale ra naho san xil.”

²² Noume biteni mi Rut bit, “O havuxahin, bos mak mu xa xouk tit upol itel atou xil xa di lapol e naho sa Boas. Venggan xosxa upol e naho sa mosav, vahit moletin tova vapal vasa minuk.”

²³ Ma Rut pol del xat atou te polien xil na Boas ba vuma ... duxoh melele xa laleh vuol ni bale, e dutou, laleh uit mun ra naho san xil vus. E Rut nggulehi dat visal tova nan.

Noume pol ni suse tangan Rut vahur rilomun ni tiramue tova

Rut 3:1-18

3 Vatei, Noume biteni mi Rut bit, “Havuxahin, bos xa nikamet tiramue tova tangan muliteli e ilaxat kuh xouk. ² ?Onem xat Boas, moletin xa di otepol tetel atou te polien nan xil? Xi nggo vatimol na tiramue naralu xalu. Ma uteong kuhi ni sepinien navan. Xosali mahis, xi iha ihas rerat utut **bale** ra valite. ³ Ma

^a2:20 Lev 25:25

xouk uha uxul, using ihos, e uhas ti vokon e xouk. Ti, uhe von polien nan, e onapol ni ti xa xi nakila xa xouk ode rute ak. Utatil melele xa xi ianien e imu ti uaen ivus ⁴e upus xat kuh rute xa xi ha ipat en. Melele xa xi ipor vovong, uha ulat kutei man e ha upat uting xat kaelen tangan ipisen ni xa usisi tangan ilaxat kuh rin nam xil. Ti, xi sung ihit naha xa xouk upol ni.”

⁵Rut bit rilomun ni mini bit, “Inou nipol vuol ni neta xil vus xa obiteni minou tangan nipol ni.”

⁶Ma Rut be von polien na Boas, e pol ni nggoni ngan xa tova nan tehiteni mini. ⁷Melele xa Boas ngganien e mu uaen bus, xi milonge bos. Di, be visal seri tatit bale xa mitihu di e ba pat. Melele xa xi por vovong, Rut mika merou ba, milat kutei man e ba pat miting xat kaelen.

⁸E hilaep te vongien, Boas mitemanin ni neta tei. E melele xa mea biles, pusi xa atou tei di pat e di miting xat kaelen.

⁹Ma misisi bit, “?Ei, xouk visi xiak?”

E Rut bit rilomun ni mini bit, “Inou Rut li tang, atou te polien nam. Suv, xouk obe tei e vatimol na tiramue navan xa mat tuei. Misak ni, nggusil sexien namim xil, xouk iaxa ulaxat kuh rin xil navan, e ukila uhur nou mei nihe atou nam.”

¹⁰E Boas bit rilomun ni mini bit, “Rut, Iahova ituxol xatuk. Di opisen sexien xa bos mi vatimol namem xil xa be eilep mak mu mili naha xa di opisen ni mi tova nam xa be tunau namem. Xouk, vongite xa ova olang ni tiram maxoe sav tova ngamu, ngan xa holesok nan holu mu ngan xa holesok nan tovuol, e xouk otapol ni ti. ¹¹Ma xouk onanem ti nahe holu usil naha xa istal. Inou nipol vuol ni holesok xil xa otesis nou ven tangan nilaxat rin nam xil vengan xa xouk

obe atou tei xa moletin xil vus lapus kil hosien nam. ¹²Reitin mak xa inou nabe ngan xa ilaxat kuh rin nam xil vengan xa nabe vatimol xati na tiramue nam xa temat e nakila nihuruk e nilaxatuk. E moletin tei mun de vatimol namem xa xi mak mu be sangas ni tiramue nam, e xi mikila itiamu ni nou tangan ihuruk e ilaxat rin xil nam.^b E xos ien ti navei, ma inou sung nipol ni. ¹³E vongien ak, bos xa uta tak. Ti, sangas ut ilan, ma ralikameti e ralikila xa xi ien ihei tangan ilaxatuk mu ien ti navei. Xos ien ihei, ma bos, e xos ien ti navei, ma inou nabiteni reitin pe met Iahova xa inou sung, nihuruk e ti nilaxatuk. E xosali vongien, upat uta tak ituxoh makoe.”

¹⁴Ma Rut pat miting xat kaelen duxoh makoe. E makoe roroh tamu, xi mitamea tangan vaha, vengan xa Boas ien ti tavei tangan moletin xil lakila xa atou tei teme tepat e von polien nan. ¹⁵E diamu xa bit vaha, Boas biteni mini bit, “Hur rat kot nam e uten ni itak.” Melele xa Rut miten ni, Boas mirang utut bale xa kilo nen duxoh hanutap tei e he xalu mun (30 kg) ba en. Di, dutou ni po rati de vatuvun e Rut poe dilomun be tim. E Boas, xi be metimal.

¹⁶Melele xa Rut duxoh tim, tova nan misisi bit, “?Havuxahin midep?”

Ma Rut bit vuol ni holesok xil xa Boas biteni mini. ¹⁷E Rut biteni mun mini bit, “E xi ien ti tavei xa heok vaka hon melele xa nadilomun namei tim mei napusuk, ma misa utut bale xil ak xa kilo nen be hanutap tei e he xalu mun (30 kg) minou.”

¹⁸Noume bit rilomun ni mini bit, “Onanexo ti. Utatili tangan upus ti xa rin ak istal itep, vengan xa Boas misakras vangel ha vuma ... imal ni rin xil vus nam.”

^b3:12 Lev 25:25; Rut 2:20

Boas nggur Rut be atou nan

Rut 4:1-12

4 E makoe ak, Boas ba dotan e von totanen xa de sangas visal puiteh te vioh te metimal te hal Betlehem. Di, Boas pus moletin xa di tesep usili bit xi be sangas mu ni tiramue na Rut. Melele xa Boas pusi xa di mikakao tangan vali, mikesi bit, “Tua navan, amei mu, totan ti inggaxalei.” Ma moletin ak bemei dotan visali. ²Di, Boas ba mikamet eilep xil labe he xalu (10) tangan limei liteong ni rin nalu. Melele xa xil vus lamei vituei, ³Boas biteni mi tua nan ak bit, “Noume xa dilomun nggo kantri te hal Moab bemei, xi ien bei tangan vapos ni tan xil na tiramue nan Elimelek iha mi vatimol tei nan xa tehe vatimol naralu. ⁴E inou nanemi momal xa nisepe kila minuk. Ma xosxa xouk iem ihei, ma ukila uxale pe met ngan xil xa ladotan ladi xiak. E xosxa iem ti navei, ma uhiteni, vengon xa xouk obe sangas mu mi tiramue na Noume mili nou e ukila uxal rat tan ak itiamu. E xosxa onaxale ti, ma inou sung nixale.”

E moletin ak bit, “E-e, inou nixale.”

⁵Di, Boas biteni mini bit, “Bos pupu. E melengien xa uxal rat tan ak ra Noume, uhur tunau Rut mun xa be ate-Moab. Ixo suse ak, ma muimol namil ikila ihur tan e holesok sav xil na tiramue na Rut xa mat tuei tangan vatimol nan navop ti.”

⁶Melele xa moletin ak milonge mak, bit rilomun ni mini bit, “Ve rin ak, inou ninaxal ti tan ak, vengon xa inou nasakras nasa rati mi horamue xati navan xil vahe nae. Itep, ma xouk tang uxale, inou ieok ti tavei mun.”

⁷(E melele nen ak, sexien na moletin xil mak: melele xa labit lapos ni tan tei mu neta sav tova, ma moletin xa tan nan ileh rerat sandel tei nan, e isa ni mi ngan xa ixale. Sexien ak ipisen ni xa lasep maen ni ngamu tangan lixal rat tan ak.)^c

⁸Ma melele xa moletin ak maen tan ak mi Boas tangan vaxale, xi mileh rat sandel nan e misa ni mini. ⁹Di, Boas di bithiteni mi eilep xil e ngan tesav xil mun bit, “Xamim vus mupus rin xa mistal xosali xa inou nanggal rat holesok xil vus ra he Noume xa tehe na Elimelek del horamue nan xalu xa hisealu tehe Kilion e Malon. ¹⁰E rin tei mun, nihur Rut mun, ate-Moab xa teteli tetel Malon tetiamu, mei ihe atou navan. Nggoni sexien nar, muimol namel xa ihe malohos ikila ihur xat holesok xil vus xa vahe na Malon.^d Ngan ak isak ni vatimol xil na Elimelek navop ti, xil lixulehi liti visal xir e melengien xil xa ti imei. Xamim vus mupus naha xa mistal taxeak.”

¹¹Eilep xil e moletin sav xil mun labiteni mini labit, “Io, xamem mapus holesok xil xa mistal xosali. Xamem musis mi Iahova tangan ipol ni atou ak xa mei iti e tim sam mei ixoni **Resel** xal Leah, xa lutepes horamue xil holu na avu Siekob xa mei labe vatimol xil xa mahulong te hal **Isrel**. E, e rin nam, musis mun tangan Iahova ipol ni xouk uhe eilep tei xa moletin xil xa langgo vatimol na Efrat limerere ni. Reitin, xi isa his tei minuk xa ihe eilep e metimal nar te hal Betlehem.^e ¹²Musis xa Iahova isa horamue xil minuk ixo ate maxoe ak xa lisak ni vatimol nam mei ihe mahulong ixoni vatimol na Peres, nat Sudah xa Tamar telingi.”⁸

⁸4:12 Tamar mun, moletin nan temat, e Sudah tehuri sung tangan vasak ni vatimol na moletin ak navop ti. Misak ni, Tamar teti ni tuvava e tehur Peres xa mei tehe eilep mak mu e vatimol xa mahulong na Sudah (Sen 38:27-30).

^c4:7 Dut 25:9 ^d4:10 Dut 25:5-6 ^e4:11 Sen 35:22-26

**Ngan xil xa lastal langgo
vatimol na Boas**

Rut 4:13-22

¹³Ma Boas nggur Rut mei be atou nan e Iahova duxol xati. Ma xi di ni tuvava tei, e milingi be malohos. ¹⁴Atou xil labiteni mi Noume labit, “!Rapet rat his lahova! Xosali, xi misa havmali tei tenggan ti ilaxat kuh xouk. Masis tangan horamue ak mei ihe eilep tei e kantri te hal Isrel. ¹⁵Havmahin, eheien nan eilep pupu e xouk. Holesok xil vus xa pol ni minuk bos mak mu mili xosxa natumali xil latehe lu e he sav (7). Horamue xa Rut tehuri xiak isak ni meulien nam ihe neta hu rilomun, vengan xa melele xa umei uhe tovolih kuhi, xi ikila ilaxatuk.” ¹⁶Ma Noume po rat tuvava ak, bulu xati e di milaxati.

¹⁷Atou xil xa ladi sangas mi xil mei laling his tuvava ak be ‘Obed.’ Labiteni mi moletin xil vus labit, “Tutut horamue tei, Noume nggur xao ni be nan.”

Melele xa mei matu, Obed mei be tame **Tiese**, xa mei be tame suv toto **Deved**.

¹⁸E ngan ak be vatimol xa testal texo Peres:

Peres tehe tame Hesron.

¹⁹Hesron tehe tame Ram xa tehe tame Aminatap.

²⁰Aminatap tehe tame Nason xa tehe tame Salmon.

²¹Salmon tehe tame Boas xa tehe tame Obed.

²²E Obed tehe tame Tiese xa tehe tame suv toto Deved.

Siona

Iahova misil provet Siona tengan vassel xat mol-Nineva xil, e Siona ien ti tavei vaha

Siona 1:1-17

1 E tan te hal Isrel, provet tei da en, hisen *Siona*, nat Amitai. Vatei, Iahova misa sepinien tei mini bit, ²“Utemanon uhe taon xa mahulong te hal *Nineva*, e usel xat moletin xil xa ladi en. Uhiteni mi xil xa sexien nae xil pupuru pupu pe metok.”

³E Siona, ien ti tavei vahusil suse xa be ist tangan ha vasa sepinien na Iahova mi mol-Nineva** xil xa ladi e kantri tei xa de ist. Mak, ma xi biles be wes e suse sav tangan valesae rani. Siona ba duxoh pasis e taon te hal Siopa, e mikamet tuturil tei xa di labue xat xi tangan vahe Spen, kantri tei xa be sotin pilei mak e rin xa wes. Ma xi minggal suse nan e be tuturil ak del boskru xil teni. Di, tuturil ak miloh tangan vahe Spen del Siona xa di milesae ra Iahova.

⁴Melele xa tuturil ak di miloh ba, Iahova pol ni votiang mu e tas misa xa misa, e sangas tuturil ak vamahoe lel. ⁵Boskru xil ulixil mikan pupu, e xil kekes di ladakes hi nae xil tangan lasa tutouen mi xil. Di, laleh rat holesok xil xa ladi vangit tuturil e laso ni be tas tangan vapol ni tuturil ak vameit mu.

E melele xa holesok xil ak di mistal, Siona dit por sae e vangit tuturil ak. ⁶E melele xa vatihos te tuturil ak be vangit, mikamet Siona e biteni mini bit, “!Ei! ?Veneh ma di opat mak? !Utamea, e usis mi hi nam ve tutouen! Xos xi iaxa mikila ien isae e xir e iteh meulien e xir.”

⁷Di, boskru xil lamei vituei e laling nenemien nae tangan lilihi hisexil ten-

gan lakameti xa visi e xil di milih an tesa ak ba xat xil. E melele xa lapol ni, lal- ihi his Siona. ⁸Ma ba lasepin mini labit, “?Ei, uhiteni mi xamem, veneh ma an tesa ak di bas xir? ?Polien eah iaxa xouk di opol ni? ?Xouk onngo kantri xave e moletin nam xil labe hisit moletin eah?”

⁹Ma Siona biteni mi xil bit, “Inou nabe ngan Isrel tei e di namot mi Iahova, Hi te ut nesao xa tepol ni tan e tas.” ¹⁰Di, Siona bit rat xi mi xil bit xi di milesae ra Iahova.

Melele xa boskru xil lalonge mak, ulixil mikan pupu ma lasel mini labit, “?Veneh ma otepol ni tesaen ak?” ¹¹E melele xa lapusi xa votiang di be- mei nggeih pilei mu, lasis Siona labit, “?Uhiteni mi xamem, mupol ni itep ten- gan isak ni an tesa ak ihe tan?”

¹²Ma Siona bit rilomun ni mi xil bit, “Mupo nou e muso nou nihe tas. Melele xa mupol ni imak, ma tas mei ihos rilomun. Nakila xa votiang ak bas xir mak venou vari.”

¹³E boskru xil iexil ti tavei tangan laso Siona vahe tas. Misak ni xil lasak tangan lavalis ni tuturil ak vahe ut, e lasakras vengon xa tahe xil mei labe tellep mu e votiang mei nggeih pilei sung. ¹⁴Ma di, xil ladakes Iahova labit, “O Iahova, masis minuk li xa onasa pangasien ti mi xamem ve maten na moletin xai. Reitin, onahas xamem ti li vengon xa xouk, Iahova, otepol ni holesok xil ak testal texo hem e tehusil lingxatien nam kestang.” ¹⁵Di, lapo rat Siona e laso ni be tas. E vatakes, tas mei bos rilomun. ¹⁶Melele xa boskru xil lapusi mak, lamerere ni Iahova himetu. Ma lasa sanien eo tei te memesien mini e xil kekes lapol ni hitxatien nae xil dela.

¹⁷E Siona tamat ti. Iahova misil meseo tei xa mahulong mei miromi e Siona

**1:3 Nineva be taon tei na mol-Asiria xil xa labe elu mi mol-Isrel xil.

meul tang de vang meseo ak melengien tol.^f

**E vang meseo, Siona di
misis mi Iahova**

Siona 2:1-10

2 Melele xa *Siona* de vang meseo ak, xi misis mi Iahova, Hi nan, bit,
²“O Iahova, melele xa longpangasien navan mei mahulong pupu natekei tehat minuk li,

e xouk oteteong ni nou e otetutou ni nou. Melele xa natenemi natehit di nabe von maten, natetakesuk,
e xouk oteteong ni nou li.

³Xouk oteso nou natehe mesavuol e natemerir natehe huinep te tas. E inggak, tas teta xol nou e tahe xil mun latekillkiles ni nou.

⁴Natenemi natehit otesil rat nou natehe relinguk,
e ninapus ti mun Nim Eo nam.

⁵Tas teta xol nou, natemerir natehe tan e lulum te tas tevar xat vatuk.

⁶Natehe tan teha vuma ... natetuxoh vatit hu xil xa ladi pe tas,
e natelonge lehit ngan xa natetuxoh von maten e nateta tuok.

E xouk Iahova, Hi navan, otemei sung otehur rat nou ra pe tas ak tangan nameul rilomun.

⁷O Iahova, melele xa natelonge texoni ngan xa meulien navan sangas vavus,
natenem rilomun ni xouk.

Natesis tehat minuk,
e otelong nou e Nim Eo nam.

⁸Ngan xil xa di lamot mi nanao votei xil, xil di lastokovein xouk xa obe vatit hosien nae.

⁹E inou, ti nikikei minuk itel memesien, e nisa sanien eo tei ihat minuk.

Naha xa natehit xati minuk tangan nipol ni, nipol sen ni.

O Iahova, xouk keatang di oteh meulien e moletin xil.”

¹⁰Melele xa Siona misis bus, Iahova misemae ni meseo ak tangan vahe ut. Ma meseo ak ba, miluh rat Siona be suhon.

**Siona milong xat Iahova e ba misel
xat moletin xil te hal Nineva**

Siona 3:1-10

3 Iahova misepin vatei mun mi *Siona* bit, ²“Uhe taon xa mahulong te hal Nineva, e uhit mesen sepinien xa nisa ni minuk mi xil.”

³Ma Siona milong xat Iahova e ba be *Nineva*. Taon te hal Nineva be mahulong pupu. Xosxa moletin de rin tei e minemi bit vahe rin sav, xi ikakao melengien ihe tol vari. ⁴Ma Siona ba be taon ak e mikakao en melengien tei. Di, melele xa de hilaep te taon ak, Siona miki be nesao ba mi moletin xil bit, “Melengien be hanutap lu (40) sutang di tangan Hi ihu len vari ni taon ak te hal Nineva.”

⁵Melele xa moletin xil te hal Nineva lalonge mak, lake reitin e sepinien na Iahova. Ma labithiteni mi moletin xil vus, ngan xil xa latellep ba latuxoh ngan xil xa latereli, tangan lihal ni anien e lising ni talmusu xil tangan lipisen ni xa lalonge misa ve tesaen nae xil.⁸

⁶Melele xa suv toto te hal Nineva milongeong ni usil naha xa Siona tehithiteni, xi mun milonge misa pupu. Ma mitamea ra hor nan e mileh rat eising hos nan xil. Di, mising ni talmusu xil tang e ba dotan de husupang xil. ⁷Di, misemae ni tangan latis mesen rae nan ak iha mi mol-Nineva xil vus tangan ti lihusili. Rae xa bit:

“Ngan ak be rae na suv toto del eilep nan xil. Moletin xil vus itel vongoro sae xil mun linakar pis ti

^f1:17 Mat 12:40; Luk 11:29 ⁸3:5 Mat 12:41; Luk 11:32

anien e linamu ti oei. ⁸Moletin xil vus itel vongoro sae xil mun lising ni talmusu xil e ti litakes Hi ve esaeen nan. Xil lihiles ra tutuen nae xil e sexien tesa nae xil mun. ⁹Melele xa ripol ni imak, ma xos Hi nasa ti mun pangasien namei xat xir. Xos xi ikila ihiles nenemien nan e nahas vin xir ti natel ekaten nan xa nggeih pupu.”

¹⁰Melele xa Hi pus naha xa latepol ni, e pusi xa latehiles ra sexien tesa nae xil, xi biles nenemien nan e tasa pangasien ti mun mi xil vaxoni ngan xa tehiteni.

Siona ien mikat Iahova vengan xa xi pisen esaeen mi elu xil na mol-Isrel xil

Siona 4:1-11

4 Melele xa *Siona* pusi xa Iahova ien misae e moletin xil te hal Nineva, xi milonge misa e ien mikat pupu. ²Ma misis mi Iahova bit, “O Iahova, melele xa nada tamu e tim savan, nakila ngamu xa xouk upol ni imak. Ve rin ak vari iaxa natelesae natehe Spen. Natekila xa xouk obe hisit Hi tei xa di opisen eheien e esaeen mi moletin xil. Xouk di ong-gur xat ekaten nam e di opisen hosien nam mi moletin xil. Vehakut di obiles nenemien nam tangan onasa pangasien ti mi moletin xil. ^{h3}!O Iahova, taxeak, uhur rat meulien navan! !Vahit namat vahos mak mu vali ngan taxa nameul nada xiak!” ⁱ

⁴E Iahova bit rilomun ni mini bit, “?Onemi obit momal tang tangan ti iem vakat vamak?” E Siona tavit rilomun ni ti sepinien mini.

⁵Di, Siona be reling taon ak e ba dotan e rute tei xa be ist xa mikila vapus taon

te hal Nineva. E inggak, xi pet horao tei e dotan de paen vengan xa bit vapus ti mu naha iaxa vaxul taon ak.

⁶Di, Iahova misak ni uval tei meul katen nggusil horao xa Siona tepeti tangan vasak ni ut vamerir vuteili tangan vatutou ni Siona. E melele xa Siona pusi, besi xi pupu ven. ⁷E visuvong nen, melele xa ut milan, Hi misa vueang tei mei mingas uval ak xa misak ni mei bue e mat. ⁸E melele xa eai bemei nesao, Hi misa votiang tei nggo ist xa mitin pupu. Eai minggasil xat vat Siona ma ven memel. Misak ni, ien bei maten e biteni bit, “!Vahit namat vahos mak mu vali ngan xa nameul nada xiak!”

⁹E Hi biteni mini bit, “?Onemi obit momal tang tangan ti iem vakat vamak ve uval ak?”

E Siona bit rilomun ni bit, “!Io! Momal tang tangan nalonge mak. !leok mikat pupu ve rin ak! !E vahit namat, vahos mak mu!”

¹⁰Ma Iahova biteni mini bit, “Uval ak meul bemei nesao e vongien tei tang, di, mat e vongien sav. Xouk otapol ni ti neta ven, e tave xouk ti iaxa opol ni vameul. Tave ti neta xa mak, e xouk di odesi e odang ve maten nan. ¹¹?Ma midep? ?!Tamal ti tangan inou nipisen esaeen navan mi moletin xil te hal *Nineva!*? !Ngan xil xa di lameul e taon ak lali taosen be handred tei e hanutap tei mun (120,000) xa latakil ti vari neta xa bos e neta xa misa! E vongoro xil mun xa ladi en labe holu xa labe holu pupu. Siona, momal tevi tangan leok isae ve meulien na moletin xil ak.”

Sepinien xa diamu te

Matiu

?Visi iaxa tetis vanuvei ak?

Melele xa Iesu tepol kokot ni pispisien nan xil e di tetal rerat mesien ra moletin xil hao, moletin xil holu di latehusili. E melele nen ak, Iesu di tekakao e taon te hal Kapaniam, e tepus Siu tei xa di teleh takis ra Siu sav xil tangan vasa ni vaha mi kavmen te hal Rom, hisen Matiu Livae.^j Matiu tetis vanuvei ak usil meulien na Iesu e huraam 63 AD (huraam 63 tetutou ni poten na Iesu).

?Visi iaxa tevuli vanuvei ak tetiamu?

Matiu tetis vanuvei ak teha mi mol-Isrel xil vengam holu e xil latake reitin ti xa Iesu iaxa be xi xa Hi tehit xati tetiamu tangan isa ni imei. Misak ni, Matiu ien tehei tangan vapisen ni xa holesok xil xa provet xil te Vanuvei Eo Matu latehit lelen ni usil rin te meien, meulien, e mea rilomunen na Iesu mei tehe reitin.

?Matiu tetis vanuvei ak veneh?

Matiu ien tehei tangan vapisen ni xa meien na Iesu tehusil xat naha xa Hi tehit xati usil meien na suv toto xa isa ni imei tangan vatutou ni mol-Isrel xil - Matiu tetis kuh holesok xil xa testal e meulien na Iesu e tepisen ni xa di nggusil naha xa provet xil tetiamu di latehit lelen ni e Vanuvei Ei Matu:

Iesu texo vatimol na Ebrahim^k tangan “vatimol nan xil lihe suse te tuxolxatien na Hi iha mi vanut moletin xil vus te ut etan.”

Iesu texo vatimol na suv toto Deved^l tangan “lelaxatien na ngan xil xa listal e vatimol nan iha vuma ... hoxalite teni ihe tovuol.”

Iesu, ninen tehe atul maxoe tei xa takil ti mu tiramue^m

Iesu, tepot e metimal te hal Betlehemⁿ Eilep tatei xil xa latehur kilakilen texo suse na hitu xil latexo ist e latemei e Isrel tangan lalang ves “tuvava xa latpesi be suv toto na Siu xil”^o

Tuvava Iesu teha tete kantri te hal Isip vuteili^p

Sion Baptis mei misak mesen suse na Iesu^q

Iesu tepisen ni xa xi pipin tangan vahur polien na Hi texo sexien xa temaen Sion tebaptaes ni.^r Hi tepisen ni xa temaal pupu ven, e tetutou ni ngan ak, Iesu teha tepol kokot ni polien nan xil.

Melele xa Iesu tehur sakkpisien xil texo he Temat,^s tepisen ni xa Iesu tenamot ti e tesaen, e tesoh kat tetel sepinien na Hi.

Matiu ien tehei tangan vapisen ni xa Iesu bemei tangan vapispisi mi moletin xil usil naha istal e meulien nae melele xa Hi mei ihe suv toto nae - Matiu teling pispisien xil na Iesu ladi e vanut pispisien lim (5):

E hu tei, Iesu tepispisi mi moletin xil usil sexien xil xa momal tangan moletin xil lihuri melele xa Hi mei ihe suv toto e meulien nae.^t

Iesu tepispisi ni xa sakkpurunien xil e melengien xil te xeih ti imei e

^j1:0 Mat 9:9; Pol 2:4,43

^k1:0 Mat 1:1; Sen 22:18

^l1:0 Mat 1:1; 2Saml 7:13

^m1:0 Mat 1:18; Aes 7:14

ⁿ1:0 Mat 2:1; Maek 5:2

^o1:0 Mat 2:2; Nam 24:17

^p1:0 Mat 2:14-15; Hos 11:1

^q1:0 Mat 3:1-3; Aes

40:3 ^r1:0 Mat 3:16-17

^s1:0 Mat 4:1-11

^t1:0 Mat 5:1-7:29

meulien na ngan xil xa Hi mei be suv toto nae.^u

Iesu tepispisi ni mi moletin xil usil sexien xa Hi mei ihe suv toto na moletin xil.^v

Iesu tepispisi usil visi iaxa be eilep mak mu e ngan xil xa Hi be suv toto nae.^w

Iesu tepispisi usil sakpurunien e melengien xil te xeih xa ti imei mi ngan xil xa Hi be suv toto nae.^x

Matiu ien tehei tangan vapisen ni xa Iesu tehur xeihen texo Hi xa mili xeihen savsav xil e ut etan - Matiu tetisi xa Iesu “tetal rerat mesien xil vus ra moletin xil.”^y

Iesu tehur xeihen teli mesien leporsi;^z

Iesu tehur xeihen tangan vahol rerat ninin tesa xil vahe reling moletin xil.^a

Iesu tehur xeihen tangan vasak ni voti-ang e oei lalolong xat raen.^b

Iesu tehur xeihen tangan vasak ni ngan xil xa lamat, mei lamea rilomun ra maten.^c

Iesu tehur xeihen tangan vasak ni ngan xil xa vurangexil bon, mei lalongeong rilomun, e ngan xil xa labe vut, mei lasepin.^d

Iesu tehur xeihen tangan vasak ni ngan xil xa metexil tevar mei laketeh rilomun.^e

Iesu tehur xeihen tangan vasa anien mi moletin xil holu vatel anien xa hokorong tang.^f

Iesu tehur xeihen tangan vakakao e ramut oei.^g

Iesu tehur xeihen tangan vasa halesil vaha ni neta ngan.^h

Matiu ien tehei tangan vapisen ni xa vat xil na mol-Isrel xil latesin pispisien xil na Iesu e iexil ti tenavei laling neketen nae en e lavusil xati - Melele xa Iesu tepol kokot ni polien nan xil, mol-Isrel xil latemaal ven. E melele xa di tepol teha vuma, vat xil na mol-Isrel xil latesin ni e latepol ni texeih mini.

Vat xil na mol-Isrel xil latehit tamal ti melele xa Iesu tesepin e rin na Hi tehiti Hi naketeh ti mun nasa mi moletin xil ve tesaen nae xil.ⁱ

Vat xil na mol-Isrel xil latehit tamal ti xa Iesu di teanien tetel moletin tesa xil.^j

Vat xil na mol-Isrel xil latehit tamal ti xa moletin xil holu latemaal pupu ve holesok xil xa Iesu di tepol ni.^k

Vat xil na mol-Isrel xil latehit tamal ti xa Iesu tenahusil xat sexien matu nae xil ti.^l

Vat xil na mol-Isrel xil latehit xeihen na Iesu texo Temat.^m

Vat xil na mol-Isrel xil latehit tamal ti xa Iesu di tesel xat xil ve sexien nae xil.ⁿ

Matiu ien tehei tangan vapisen ni xa sakpurunien xil e maten na Iesu tehupil xat naha xa Hi tehiti xati tangan istal - Matiu tetis kuh holesok xil xa testal e sakpurunien e maten xa Iesu tehuri. Xi tepisen ni xa holesok xil ak tehupil xat naha xa Hi tehiti usili texo provet xil tetiamu e Vanuvei Eo Matu.

^u1:0 Mat 10:1-42 ^v1:0 Mat 13:1-52 ^w1:0 Mat 18:1-35

^x1:0 Mat 24:1-25:46 ^y1:0 Mat 4:23; Aes 53:4; Mat 8:17

^z1:0 Mat 8:3; Mat 8:13; 9:6; Mat 8:15; Mat 8:16; 9:22,35; 12:13,15; 14:36

^a1:0 Mat 8:16,33; 9:33; 12:22; 15:28; 17:18 ^b1:0 Mat 8:27 ^c1:0 Mat 9:25

^d1:0 Mat 9:29,33; 12:22 ^e1:0 Mat 21:34 ^f1:0 Mat 14:25; 15:36

^g1:0 Mat 14:25 ^h1:0 Mat 21:19 ⁱ1:0 Mat 9:3 ^j1:0 Mat 9:11

^k1:0 Mat 9:34 ^l1:0 Mat 9:14; 12:2,14; 15:2 ^m1:0 Mat 12:24; 16:1

ⁿ1:0 Mat 19:3; 21:23,46; 22:15,23,35; 23:1-39

Hi tehit xati^o
 Hi tehit xati^p
 Hi tehit xati^q
 Hi tehit xati^r
 Hi tehit xati^s
 Hi tehit xati^t
 Hi tehit xati^u
 Hi tehit xati^v
 Hi tehit xati^w
 Hi tehit xati^x
 Hi tehit xati^y
 Hi tehit xati^z
 Hi tehit xati^a
 Hi tehit xati^b
 Hi tehit xati^c
 Hi tehit xati^d

Vatit nenemien tei te vanuvei ak de Matiu 5:17

Iesu pispisi mi moletin xil bit, “Munanemi ti munahit inou namei tangan naso rerat rae xil na Mosis del pispisien xil na provet xil vaha. !E-e, tamak ti! Natamei ti tangan naso rerat xil. E inou namei tangan nisak ni naha xa rae xil ak di lasep usili mei istal ihe reitin.”

?Naha iaxa di e vanuvei ak?

1. Meien na Iesu nggusil xat naha xa Hi tehit xati. (Mat 1:1–4:11)
E provins te hal Kaleli

2. Iesu pol kokot ni polien nan e bit usil sexien xa Hi mei ihe suv toto na moletin xil. (Mat 4:12–7:29)

3. Iesu pisen xeihen na Hi xa mei ihe suv toto na moletin xil. (Mat 8:1–11:1)

4. Moletin xil lasin ni tangan Hi mei vahe suv toto nae. (Mat 11:2–16:12)

E suse vahe Serusalem

5. Iesu bue xat moletin nan xil ve melele te xeih xil xa ti imei e xil. (Mat 16:13–20:34)

E Serusalem

6. Moletin xil lasin Iesu e iexil ti tavei tangan lavusili. (Mat 21:1–23:39)

7. Iesu pispisi mi moletin nan xil usil mea rilomunen nan e sakpurunien xil xa ti imei e xil. (Mat 24:1–25:46)

8. Vat na mol-Isrel xil lapol ni suse tangan Iesu vamat vaxo en. (Mat 26:1-75)

9. Maten na Iesu. (Mat 27:1-66)

10. Iesu mea rilomun ra maten e be ut nesao. (Mat 28:1-20)

Vatimol na Iesu, Mesaea na Hi

1 Ngan ak be vatimol xil na Iesu Kristo,^e

²Ebrahim, xi tehe tame *Aesak*,^f xa tehe tame *Siekob*,^g

xa tehe tame Sudah tetel tuneli xil.^h

³Sudah, xi tehe tame Peres xal Siera, xa ninexalu Tamar.ⁱ

E Peres, xi tehe tame Hesron,^j xa tehe tame Ram.^k

⁴Ram, xi tehe tame Aminatap,^l xa tehe tame Nashon,^m

^o1:0 Sam 118:22-23; Mat 21:42 ^p1:0 Aes 6:9-10; Sam 78:2; Mat 13:13,34

^q1:0 Sak 9:9; Sam 118:26; Mat 21:4-11 ^r1:0 Sam 41:9; Mat 26:23-24

^s1:0 Sak 11:12-13; Ser 19:1-13; 32:6-9; Mat 26:15; 27:3

^t1:0 Sak 13:7; Mat 26:31 ^u1:0 Aes 53:8; Mat 27:1-2 ^v1:0 Aes 53:7; Mat 27:12

^w1:0 Aes 50:6; Mat 26:67; 27:30 ^x1:0 Sam 22:14-18; Mat 27:35

^y1:0 Sam 69:21; Mat 27:34 ^z1:0 Sam 22:7-8; Mat 27:40 ^a1:0 Aes 53:12; Mat

27:38 ^b1:0 Sam 22:11; Mat 27:46 ^c1:0 Aes 53:9; Mat 27:60

^d1:0 Sam 16:10; Mat 28:6 ^e1:1 Luk 3:23-38; Luk 3:23-38 ^f1:2 Sen 21:3

^g1:2 Sen 25:26 ^h1:2 Sen 35:22-26 ⁱ1:3 Sen 38:29-30 ^j1:3 1Kron 2:5

^k1:3 1Kron 2:9 ^l1:4 Rut 4:19 ^m1:4 Rut 4:20

xa tehe tame Salmon.ⁿ

⁵ Salmon, xi tehe tame Boas,^o
E Boas tehe tame Obed,^p e ninen Rut.

E Obed tehe tame **Tiese**,^q

⁶ xa tehe tame suv toto Deved.^r

Suv toto Deved, xi tehe tame **Solomon**,^s

⁷ Solomon, xi tehe tame Rehoboam,^t

xa tehe tame Abitsa,^u

xa tehe tame Asa.^v

⁸ Asa, xi tehe tame Sehosavat,^w

xa tehe tame Sehoram,

xa tehe tame Usaea.

⁹ Usaea, xi tehe tame Siotam,^x

xa tehe tame Ehas,

xa tehe tame Hesekaea.

¹⁰ Hesekaea, xi tehe tame Manase,^y

xa tehe tame Amon

xa tehe tame Sosaea.

¹¹ E Sosaea, xi tehe tame Sekonaea e
tuneli xil.

E melele nen ak, mol-Babilon xil mei
latehas tan ni mol-Isrel xil e lateleh
rerat xil latehe kantri te hal **Babilon**.

¹² Ngan xil sung ak, xil labe avu xil
xa latemei tetutou ni melele xa
mol-Isrel xil latehe reling kantri te
hal Babilon:

Sekonaea, xi tehe tame Seltiel,^z

xa tehe tame Serubabel.^a

¹³ Serubabel, xi tehe tame Apiut,

xa tehe tame Eliakim,

xa tehe tame Asor.

¹⁴ Asor, xi tehe tame Sadok,

xa tehe tame Akim,

xa tehe tame Eliud.

¹⁵ Eliud, xi tehe tame Eliesar,

xa tehe tame Matan,

xa tehe tame **Siekob**.

¹⁶ Siekob, xi tehe tame Siosep,

xa tehe tiramue na Meri,

xa tehe nine Iesu,

xa latekesi ni Mesaea xa Hi tehit xati
tehit isa ni imei.^b

¹⁷ Mak, ma melele xa labuli vatit avu
xil xa lateti e vatimol na Iesu, Ebra-
ham tetuxoh suv toto Deved, lakameti
xa latehe hat e le tei (14). E lakameti
xa Deved tetuxoh melele xa mol-Isrel
xil latehe kantri te hal Babilon, vatit
avu xil ak latehe hat e le tei (14). E
melele xa mol-Isrel latehe reling hal Ba-
bilon tetuxoh melele xa Mesaea tepot e
ut etan, vatit avu xil ak mun latehe hat
e le tei (14).

Iesu Kristo tepot e ut etan

Luk 2:1-7

¹⁸ Ngan ak be tumulen usil naha xa
testal tetiamu ni poten na Iesu xa tehe
Mesaea na Hi. Meri xa ihe nine Iesu, late-
sikoe xole ngamu tangan mei ihe atou
na Siosep. E melele xa lutnati vituei ti
mu, latekameti xa Meri teti tuei ni tu-
vava texo xeihen na **Ninin Eo**.^c ¹⁹ Ven-
gan xa Siosep, tiramue na Meri, sexien
nan xil momal pe met Hi, xi tenemi tehit
isil rati. E xi ien ti tavei vapol ni Meri
vahe unoun pe met moletin xil. Ma xi bit
xalu lalitasil e suse xa moletin xil linakil
ti.

²⁰ E melele xa Siosep di tamu minem
usil rin ak, **masxaxa** tei na Hi Suv mei
mistal mini e metuveen tei e biteni mini
bit, “Siosep, vatimol na suv toto Deved
tetiamu, ulum nakan ti tangan uhur Meri
ihe atou nam, vengam xa tuvava xa di
ni nggo xeihen na Ninin Eo. ²¹ Meri il-
ing horamue ak, e xouk uling hisen ihe
‘Iesu’ xa koute teni be ‘Iahova di miteh

ⁿ1:4 Rut 4:20 ^o1:5 Rut 4:21; Sos 6:25 ^p1:5 Rut 4:21 ^q1:5 Rut 4:22

^r1:6 Rut 4:22 ^s1:6 2Saml 12:24; 2Saml 12:15 ^t1:7 1King 11:43

^u1:7 1King 12:31; 1Kron 3:10 ^v1:7 1King 12:31; 1Kron 3:10

^w1:8 1Kron 3:10-11 ^x1:9 1Kron 3:12-13 ^y1:10 1Kron 3:13-14

^z1:12 1Kron 3:17 ^a1:12 Esra 3:2 ^b1:16 Mat 27:17,22 ^c1:18 Luk 1:27; 1:35

meulien,' vengon xa xi iteh meulien e moletin nan xil ra **tesaen** nae xil."^d

²²Holesok xil ak mei mistal tangan vapol ni sepinien xa Hi Suv tehit lelen ni texo **provet** nan mei vahe reitin xa tehit,
²³“*!Muteong kuhi! Atul maxoe tei xa takil ti mu tiramue,*
xi di ni tuvava tei.

Ti, ilingi ihe malohos e liling hisen ihe 'Imanuel'

xa koute teni be 'Hi di mi xir.'” (Aes 7:14)

²⁴Melele xa Siosep milale, xi pol nggusil naha xa masxaxa na Hi Suv tese-mae ni mini. Ma xi nggur Meri mei be atou nan e ludi vituei. ²⁵E xi tapat ti vatela ba duxoh melele xa Meri miling horamue nan. E melele xa miling horamue ak, Siosep miling hisen be Iesu.^e

Eilep xil lamei tangan lamerere ni Iesu Kristo nggoni suv toto na Siu xil

2 Iesu tepot e metimal te hal Betlehem^f E dutou ni poten na Iesu, rut eilep xil langgo ist e lamei e taon te hal **Serusalem**. Eilep xil ak langgur kilakilen tangan lipus kil naha xa istal e ut etan nggo suse na hitu xil. ²E melele xa lastal e hal Serusalem, lasis moletin xil labit, “?Tuvava xa tepot be suv toto na **Siu** xil da xave? Vengon melele xa mateti tamu e ut samem e ist, matepus kokot ni xa hitu nan^g testal. Ve rin ak, mamei tax-eak tangan masa merereen mini.”

³Melele xa suv toto Herod xa Mahulong milongeong ni, xi minexo pupu del moletin xil vus te hal Serusalem.^{††} ⁴Ma Herod mikes viton **vat xil na pris xil** del

titsa xil te rae na Mosis e misis xil bit, “?Mesaea xa Hi tehit xati mi Siu xil, ipot ingga xave?”

⁵Xil labit rilomun ni mini labit, “Ipot e metimal te hal Betlehem e provins te hal Sudea, vengon xa Hi tese-pin texo tisen na **provet** tei nan tehit,^h

⁶“*Tave ti neta xa metimal te hal Betlehem be hokorong mak mu ni metimal savsav xil vus na mol-Sudah xil,*
e nisak ni suv toto tei mei istal ixo en.

Xi ilaxat kuh mol-Isrel xil vus ixoni moletin tei xa di milaxat kuh sipsip san xil.” (Maek 5:2)

⁷Melele xa suv toto Herod xa Mahulong milonge mak, mikes xuxus ni eilep xil ak tangan lamei visali. Di, misis pilei xil tangan lihiteni mini melengien xati vari xa xil latepus rohon ni xa hitu ak testal. ⁸Di, Herod misil xil labe Betlehem e biteni mi xil bit, “Muha mulang kuhi ni horamue ak. E melele xa mukameti, mutilomun mei muhiteni minou tangan xa inou mun niha nimot mini.”

⁹⁻¹⁰Melele xa eilep xil ak lalong sepinien na suv toto, laba tangan lalang ni horamue ak. E melele xa di langgusil suse nae laba, hituⁱ xa latepusi tetiamu melele xa lateti tamu e ist mistal rilomun. E melele xa lapus hitu ak, labesi xil pupu. Hitu ak diamu ni xil e ba da kat e rute vari xa horamue ak da en. ¹¹Ma melele xa labe nim, lapus horamue del ninen Meri ludi. E melele xa lapus horamue ak, latingeiril e lasa merereen nae mini. Di, laleh rerat sanien hos nae xil e lasa ni mini. Xil lasa gol, **forangkansen**,

^{††}**2:3** Herod xa mahulong minexo vengon ien ti tavei tangan moletin ti namei naxolesi, e di mu vin ngan xil xa di lanem usili. Xosxa Herod minemi xa mol-Isrel xil labit lixolesi e liling suv toto tova nae, ma xi mikila ihu lelen mol-Isrel xil vus.

^d**1:21** Mat 1:25; Luk 1:31; 2:21; Pol 4:12 ^e**1:25** Mat 1:21; Luk 1:31; 2:21

^f**2:1** Luk 2:4-7; Luk 1:5; 3:1 ^g**2:2** Nam 24:17; Mat 2:9 ^h**2:5** Sion 7:42

ⁱ**2:9-10** Mat 2:2

e *mir*.^{‡‡} ^{j12}E vongien, Hi misep xol xil nggo metuveen tei xa linatilomun ti mun linave visal Herod. Ma xil langgusil suse sav ladiplomun labe tim sae.^k

**Hi pol ni suse tangan horamue Iesu
ilesae ihe Isip tangan ngan xil xa
labit lavasi linatal xati ti**

¹³Melele xa eilep xil ak ladiplomun laba, *masxaxa* tei na Hi Suv mei mistal mi Siosep nggo metuveen tei e biteni mini bit, “!Tamea! !Temanon, hur horamue xal ninen, e mutilesae mutihe *Isip!* Mutiti rute ak ituxol melele xa inou nihit mutilomun en. Upol ni imak vengana xa, navehi ti, Herod ilang ves horamue ak tangan vahas vini.”¹

¹⁴Misak ni, e vongien nen tak, Siosep mea po xat horamue e, del ninen, latlesae latbe kantri te hal Isip. ¹⁵Latodi rute ak ba duxoh melele xa suv toto Herod xa Mahulong mat. Ngan ak mistal tangan vapol ni sepinien na Hi Suv xa tehit lelen ni texo provet Hosea mei mistal be reitin xa tehit, “*Nakes natuxoli tangan imea ra hal Isip.*” (*Hos 11:1*)

¹⁶Melele xa Herod minem kila xa eilep xil te hal ist lateluvosi, ien mikat pupu. Ma, misemae ni moletin te vaeen nan xil tangan lihe metimal te hal Betlehem e ut xil mun xa di sangas tangan ha lihas malohos xil ngasen xa hura nae lu e be tan. Herod pol ni mak nggusil melele xati xa eilep xil te hal ist latehiteni mini xa latepus rohon ni hitu ak testal. ¹⁷Ngan ak mistal tangan vapol ni sepinien xa Hi

Suv tehiteni texo provet *Seremaea* mei mistal be reitin xa tehit,

¹⁸“*Moletin xil te hal Rama*”^{¶¶} *lalong neta tei,*

lalong tangan tei xa nggeih di mistal.

Resel di muis pupu ve horamue nan xil xa lalal.

Ien ti tave tangan moletin ti napet rat neni emien nan,

vengana xa horamue nan xil latovuol mun.”

(*Ser 31:15*)

**Hi pol ni suse tangan Iesu
itilomun ra kantri te hal Isip**

¹⁹Melele xa xatel latodi tamu e kantri te hal Isip, Herod xa Mahulong mat. Ma *masxaxa* tei mei mistal mi Siosep nggo metuveen tei^m ²⁰e biteni mini bit, “!Tamea! Utel horamue xal ninen muttilomun mutihe tan na mol-Isrel xil, vengana xa ngan xil xa latehit lihas vin horamue ak, lalal tuei.”ⁿ ²¹Ma, Siosep mitamea, del horamue xal ninen latdilomun latbe Isrel.

²²E melele xa Siosep milongeong ni xa Arkelaos nggur vonine tamen, Herod xa Mahulong, mei be suv toto te provins te hal Sudea, xi ulin mikan tangan latohe rute ak. E Hi mun mike xati nggo metuveen tei^o tangan latnava ti Sudea. Ma latbe provins te hal Kaleli ²³e latdi rute ak e taon te hal Nasaret.^p Ngan ak misak ni naha xa Hi Suv tehit lelen ni texo provet xil mei mistal be reitin xa tehit, “*Likesi ni ngan Nasaret tei.*”^{§§}

^{‡‡}**2:11** Gol be hat tei xa minehin pupu xa, tetiamu, latepol ni mei tehe mani. Forangkansen e mir lube vokon lu xa lapol ni ni tut vatiei. Mani te xatel vus be nesao e latehe sanien xa momal tangan lasa ni mi suv toto tei.

^{¶¶}**2:18** Rama be rute tei xa be sangas ni metimal te hal Betlehem, e lanemi labit latetihin Resel, atou na Siekob, en.

^{§§}**2:23** Latakil ti xa sepinien ak texo provet xave.

^j**2:11** Luk 2:16; Sam 72:10-11,15; Aes 60:6 ^k**2:12** Mat 2:22

^l**2:13** Mat 1:20; 2:19 ^m**2:19** Mat 1:20; 2:12 ⁿ**2:20** Eks 4:19

^o**2:22** Mat 2:12 ^p**2:23** Mak 1:9; Luk 1:26; 2:39; Sion 1:45-46

Sion Baptis misak mesen suse na Iesu

Mak 1:1-8; Luk 3:1-18; Sion 1:19-28

3 Huram xil holu mei mitavi, e moletin tei ba de uruvuol e provins te hal Sudea, hisen Sion. Xi di **baptaes** ni moletin xil e di bithiteni bit, ²“!Muhiles ra tesaen namim xil, vengana xa Hi Suv dat sangas visal xamim e bit mei vahe suv toto e meulien namim!”^q ³Xi vari be ngan xa Hi tesep usili texo **provet** Aesea melele xa tehit,

*“Lalong rae tei di miki e uruvuol xa bit,
‘!Musak mesen suse na Suv!*

!Mupol ni suse nan imal!” (Aes 40:3)

⁴Sion, eising nan lapol ni ni hili **kamel** e mituatu ni mavulut hilbe buluk. Anien an be kelmenamen xil del hani. ^{*} ^{r5}Moletin xil hao di lateha tangan lateong ni. Rute langgo taon te hal **Serusalem** e rute sav xil mun langgo ut sav xil e provins te hal Sudea. E ngan tesav xil mun, langgo rute xil sangas ni Oeisal Sodan. ⁶E melele xa lapusi, labit rerat **tesaen** nae xil mini, e Sion **baptaes** ni xil e Oeisal Sodan.

⁷**Farasi** e **Satusi** xil holu mun lamei visal Sion tangan vabaptaes ni xil. E melele xa Sion pus xil, misepin nggeih mi xil bit, “!Xamim munggoni vanut tetal sasa xil xa di langas vin moletin xil ni vulongexil! ?Visi misel xat xamim tangan mulesae ra longpangasien xa Hi isa ni mi moletin xil te ut etan?^s ⁸Bos mak mu xa itiamu, mupol ni sexien xil xa ipisen ni xa mubiles ra tesaen namim xil ngamu. ⁹E munanemi ti munahit mu-

tit ihos vengana xa **Ebrahim** be vatit avu namim.^t !E-e! Nabiteni reitin mi xamim, Hi ikila isak ni hat xil ak mei lihe moletin xil xa labe vatimol na avu Ebrahim. ¹⁰Taxeak, akis mese tuei ve vatit vatiee xil vus. E ngan xil xa latahur huit hosien ti, lite rat xil e liso ni ihe upang.^u

¹¹“Inou nabaptaes ni xamim ni oei tang tangan vapisen ni xa mubiles ra tesaen namim, e ngan xa itutou ni nou, xi ibaptaes ni xamim itel xat **Ninin Eo**^v e upang. Xeihen nan mili navan, e natapin ti tangan name slev nan e naleh rat sandel nan. ¹²Xi bue xat xi ngamu tangan vaseti moletin xil vus. Xi ipol ni ixoni moletin tei xa po savel nan e di miso rerat utut **uit** ra valite. Utut uit xil xa labos, ileh viton ni ha ilingi e nim nen, e valite xa misa, itin ni ni upang tei xa mahulong xa misakras vamat.”^w

Sion baptaes ni Iesu

Mak 1:9-11; Luk 3:21-22

¹³E melele nen ak, Iesu nggo provins te hal Kaleli e xi mun bemei e Oeisal Sodan tangan Sion vabaptaes ni. ¹⁴E melele xa Sion pusi, misak pisi tangan vahiles nenemien na Iesu, ma biteni bit, “!E-e! ?Xouk di omei visal nou veneh? Momal tangan xouk ubaptaes ni nou vengana xouk obe eilep mak mu oli nou.”

¹⁵E Iesu bit rilomun ni mini bit, “Bos xa ubaptaes ni nou taxeak. Vengana xa, imak, ti ralipol ni holesok xil vus xa imal pe met Hi.” Misak ni, Sion maen ni, e baptaes ni Iesu.

^{*}3:4 2King 1:8 biteni xa Sion mising nggoni provet Ilaetsa tetiamu. Kelmenamen be hisit grashopa tei xa eilep xa lakila lava ni, e hani be oei tei xa mikas xa sukabug xil di lapol ni.

^q3:2 Mat 4:17; 10:7; Mak 1:15

^t3:4 2King 1:8 ^s3:7 Mat 12:34; 23:33; Luk 3:7; Mat 23:33; Luk 21:23; Rom 1:18; 2:5; 5:9; Efes 5:6; Kol 3:6; 1Tes 1:10; Rev 6:16-17

^u3:9 Sion 8:33,37,39; Rom 4:12 ^v3:10 Mat 7:19; Luk 13:7,9; Sion 15:6

^w3:11 Sion 1:26,31,33; Pol 1:5; 11:16; 13:24; 19:4 ^w3:12 Mat 13:30

¹⁶E melele xa Sion baptaes ni Iesu bus, Iesu mea ra oei. Vatei takes, tilang hat misaha, e xi pus **Ninin** na Hi mingga merou nggoni mae e mei dotan en.^x ¹⁷E rae tei mistal nggo ut nesao bit, “Ngan ak be Natuxoli reitin xa eheien navan di en. Inou nabesi nou pupu ven.”^y

Temat misak pis Iesu

Mak 1:12-13; Luk 4:1-13

4 Melele xa Iesu baptaes bus, **Ninin** **Eo** dela be uruvuol tangan vahur sakpisien vaxo he **Temat**.^z ²Ba de uruvuol e di bal ni anien. Melengien hanutap lu (40) mei mitavi,^a e mae nggati tova tang. ³Di, Temat xa di misak pis moletin xil bemei visali. Xi biteni mi Iesu bit, “Xosxa reitin xa obe Nat Hi,^b ma use-mae ni hat xil ak tangan lihiles mei lihe beret am.”

⁴E Iesu bit rilomun ni mini bit, “!E-e! Ninapol ni ti, vengam xa Vanuvei Eo biteni bit, *‘Moletin misakras vameul e anien kestang. Xi di meul e sepinien xil vus xa mistal nggo vulonge Hi.’*” (*Dut 8:3*)

⁵Di, Temat nggur Iesu lube Serusalem, taon eo na Hi.^c Xi miling Iesu misoh e ramut **Nim Eo** xa be nesao pupu. ⁶E melele xa ludi nesao, Temat biteni mini bit, “Xosxa obe nat Hi reitin,^d hut he tan. Vengam xa Vanuvei Eo na Hi biteni bit, *‘Iahova isemae ni masxaxa nan xil tangan lilaxat kuh xouk. Xil lipo xatuk ni hexil, tangan xouk onatun lem ti e hat.’*” (*Sam 91:11-12*)

⁷E Iesu bit rilomun ni mini bit, “!E-e, ninapol ni ti! Vengam xa Vanuvei Eo biteni mun bit,

‘Munasak pis Iahova ti xa be Hi namim tangan mukameti xa xi di mi xamim.’” (*Dut 6:16*)^e

⁸Di, Temat nggur Iesu lube vathu tei xa be nesao xa be nesao. E rute ak, pisen kantri xil vus te ut etan mini e neta xil xa bos di en. ⁹Xi biteni mini bit, “Holesok xil vus ak, nisa lelatien te xil minuk xosxa utingeiril tang e umot minou.”^f

¹⁰E Iesu bit rilomun ni mini bit, “!**Setan**, he reling nou! Ninapol ni ti vengam xa Vanuvei Eo biteni bit, *‘!Mumot mi Iahova xa be Hi namim e muteong xat xi kestang!’*” (*Dut 6:13*)

¹¹Di, Temat be relingi, e masxaxa xil mei ladutou ni.

Iesu pol kokot ni polien nan e provins te hal Kaleli

Mak 1:14-15; Luk 4:14-15

¹²Melele xa Iesu di tamu e uruvuol, milongeong ni xa Herod Antipas, xa be suv toto te provins te hal Kaleli, xi tetal xat Sion Baptis e teso ni tehe nim te xeih.^g Ma, Iesu dilomun be provins te hal Kaleli. ¹³E xi tava ti mun e metimal te hal Nasaret, xi ba sung di taon te hal Kapaniam^h xa be sangas ni Oei Kaleli. Taon ak de tan na vatimol na Sebiulon xal Navtali tetiamu. ¹⁴Ngan ak mistal tangan vapol ni naha xa Hi tehiti lelen ni texo **provot** Aesea mei mistal be reitin xa tehiti,

¹⁵“Nanggur longeongen tei ba mi moletin xil xa ladi e tan na vatimol xil na Sebiulon e tan na vatimol xil na Navtali.

Longeongen ak iha mi ngan xil xa ladi sangas ni Oei Kaleli xa de ist ni Oeisal Sodan.

^x3:16 Sion 1:32 ^y3:17 Sen 22:2; Sam 2:7; Aes 42:1; Mat 12:18; 17:5; Mak 9:7; Luk 9:35; 2Pit 1:17 ^z4:1 Hib 2:18; 4:15 ^a4:2 Eks 34:28

^b4:3 Mat 4:6; 27:40 ^c4:5 Neh 11:1; Mat 27:53; Rev 11:2; 21:2,10; 22:19 ^d4:6 Mat 4:3; 27:40 ^e4:7 1Kor 10:9 ^f4:9 Eks 20:3; Dan 3:5,10,15; Rev 13:4

^g4:12 Mat 14:3; Mak 6:17; Luk 3:20; Sion 3:24 ^h4:13 Sion 2:12

Reitin, iha mi moletin xil te hal Kaleli, e rute xil xa ngan xil xa latave Siu ti lapolu en.

¹⁶ *Ngan xil xa ladi e maluxoluku te tesaen, xil lipus miehen na Hi xa mahulong.ⁱ*

Reitin, moletin xil xa lalonge, tetiamu lateti pe mamel te maten,

e taxeak, xil lipusi xa ut milan sung xiak.”

(Aes 9:1-2)

¹⁷ E melele nen ak ba, Iesu ba di bithiteni mi moletin xil bit, “!Muhiles ra tesaen namim xil, vengon xa Hi Suv dat sangas visal xamim e bit mei vahe suv toto e meulien namim!”^j

Iesu mikes moletin hat te sar meseo en tetengan lathusili

Mak 1:16-20; Luk 5:1-11

¹⁸ Vatei, Iesu mikakao nggusil seri Oei Kaleli. E melele xa mikakao ba, pus timue lu xa di luso net nalu be oei. Hisealu Saemon (xa laling hisen tei mun be Pita) e Andru (xa be tunali),^k e lube moletin te sar meseo en. ¹⁹ E Iesu biteni mi xalu bit, “Lumei luhusil nou. Xosali di mulihi meseo xil tang, e inou nisak ni xamil ti mulihi moletin xil.”

²⁰ Vatei takes, lustokovein net xil nalu e lunggusili.

²¹ E melele xa latkakao latoba, Iesu pus timue lu mun, hisealu Temis xal Sion, xa lube nat Sepeti. Ludi bot del tamealu e di latdil pilei net natel xil. E melele xa Iesu mikes xalu, ²² vatei takes, lube reling bot e tamealu, e lunggusil Iesu.

Iesu pol ni polien na Hi e provins te hal Kaleli

Luk 6:17-19

²³ Melele xa Iesu mikes moletin hat (4) ak, xatel latnggusili e labe rute xil holu

e provins te hal Kaleli. E rute xil vus xa laba en, Iesu pispisi mi moletin xil e **nim te pispisienna** Siu xil. Xi di bithiteni longeongen hos xa Hi di bemei tetengan vahe suv toto na moletin nan xil, e di dal rerat moletin xil ra mesien nae xil vus.¹

²⁴ E longeongen usili mikapis e provins te hal Siria mun. Misak ni, moletin xil te rute ak laleh ngenexil xa lamesei ni mesien savsav xil: ngan xil xa tenbexil pangas, ngan xil xa ninin tesa xil ladi e xil, ngan xil xa di lamemat, e ngan xil mun xa rut tenbexil mat. Laleh xil lamei visal Iesu e xi midal rerat xil vus ra mesien nae xil.^m ²⁵ E melele xa Iesu di mikakao, vanut moletin xil holu di langgusili.ⁿ Xil langgo provins te hal Kaleli e provins te hal Sudea. Langgo taon te hal **Serusalem**, e provins te hal Dekapolis. E langgo ut xil mun xa ladi ist te Oeisal Sodan.

E hu tei, Iesu pispisi usil sexien xil xa momal pe met Hi

5¹⁻² Melele xa Iesu pus tatit moletin xil xa eilep xiak, xi be nesao e hu tei del **moletin nan xil** e dotan tetengan vaspispisi mi xil.

Pispisien usil hisit moletin eah iaxa Hi ituxol xati

³ Iesu biteni mi xil bit, “Tuxolxatien iti mi ngan xil xa lamei visal Hi be he hon tang, vengon xa xi mei ihe suv toto nae e ilaxat kuh hisit moletin xil xa lamak.^o

⁴ Tuxolxatien iti mi ngan xil xa di ladang, vengon xa Hi ipet rat nenemien na hisit moletin xil xa lamak.^p

⁵ Tuxolxatien iti mi ngan xil xa labe hanmerou e nenemien nae be tan,

ⁱ4:16 Luk 1:79 ^j4:17 Mat 3:2; 10:7 ^k4:18 Sion 1:40-41

^l4:23 Mat 9:35; Mak 1:39 ^m4:24 Mak 6:55-56 ⁿ4:25 Mak 3:7-8

^o5:3 Luk 6:20-23 ^p5:4 Aes 61:2-3

vengan xa Hi isa rute xil vus e ut etan ihe na hisit moletin xil xa lamak.^q

⁶Tuxolxatien iti mi ngan xil xa iexil bei pupu ni tengan limal pe met Hi,

vengan xa xosxa imak, ma xi ipol ni mei ihe reitin e meulien nae.

⁷Tuxolxatien iti mi ngan xil xa esaen nae di e mosav xil,

vengan Hi ipisen sexien te esaen mi hisit moletin xil xa lamak.^r

⁸Tuxolxatien iti mi ngan xil xa langgusil xat Hi del nenemien xa memese,^s

vengan xa hisit moletin xil xa lamak lipus kuh Hi sung ni metexil.

⁹Tuxolxatien iti mi ngan xil xa di laling tomat di mi moletin xil,^t

vengan xa likes hisit moletin xil xa lamak ni horamue xil na Hi.

¹⁰Tuxolxatien iti mi ngan xil xa di langgur longpangasien vengana xa di lapol ni naha xa momal pe met Hi,^u

vengan xa Hi mei ihe suv toto na hisit moletin xil xa lamak e ilaxat kuh xil.

¹¹“Tuxolxatien iti mi xamim melele xa moletin xil di lasep xar ba ni xamim, di lasa pangasien mi xamim, e di lasep usil xamim ni luvosan xil hao xa misa pupu vengana xa di munggusil xat nou.^v ¹²Reitin, texo sexien nen xil tak, latesa pangasien teha mi **provet** xil xa lateti teti-amu ni xamim.^w E muhesi xamim tang vengana muhur huita teni sung xa ihe eilep e ut nesao.”

Pispisien usil rin xa moletin xil na Hi langgoni sol e laet e ut etan

Mak 9:50; Luk 14:34-35

¹³Iesu misepin rilomun bit, “Xamim munggoni sol xa lalingi del xat moletin xil te ut etan. ?E xosxa neta xa di misak ni sol ak bos be relingi, ma lipol ni mei ihos rilomun itep?^r !Lasakras lapol ni va-mak! Sol xa tavos ti, lasakras lapol ni ti neta ni. Bos tengan liso ni iha e moletin xil ti lihes tan tang en.

¹⁴“Xamim munggoni laet tei xa di mileluv ba mi moletin xil e ut etan.^x E nggoni ngan taxa taon tei xa de nesao e hu tei misakras vaxus, neketen namim mun, moletin xil ti lipus kila. ¹⁵Moletin tovuol xa vasahan laet, ti, vaha vaso xati ni pesin tova. !E-e! Xi di misoxolen ni de nesao tengan ti ileluv kuhi e vangit nim ve moletin xil xa ladi en.^y ¹⁶Nggusil sexien nen tak, laet te neketen namim ileluv kuhi iha mi moletin xil.^z Imak, ma melele xa moletin xil lipus sexien hos xil namim, xil ti lipet rat his Hi Tamemim xa de ut nesao.”

Pispisien usil rae xil na Hi

¹⁷Iesu pispisi mi moletin xil bit, “Munanemi ti munahit inou namei tengan naso rerat **rae xil na Mosis** del pispisien xil na provet xil vaha. !E-e, tamak ti! Natamei ti tengan naso rerat xil. E inou namei tengan nisak ni naha xa rae xil ak di lasep usili mei istal ihe reitin.^a ¹⁸E nabiteni reitin mi xamim xa holesok xil vus xa di e rae xil na Hi, mavulut sepinien xil vus xa latetisi teti en mis-

^r5:13 Sol xa tetiamu tenaxoni ngan xil ti te xosali, tenamese ti. Tesak ni melele xa temer vuteili, ma neta xa tesak ni sol ak tehos tehe reling.

^q5:5 Sam 37:11 ^r5:7 Mat 18:33; Tem 2:13 ^s5:8 Sam 24:3-4

^t5:9 Hib 12:14; Tem 3:18 ^u5:10 1Pit 3:14 ^v5:11 Mat 10:22; 1Pit 4:14

^w5:12 2Kron 36:16; Mat 23:30,37; Pol 7:52; Hib 11:32-38; Tem 5:10

^x5:14 Sion 8:12; 9:5; Plp 2:15 ^y5:15 Mak 4:21; Luk 8:16; 11:33

^z5:16 Efes 5:8-9; 1Pit 2:12 ^a5:17 Mat 3:15; Rom 3:31

akras vakesae. Vatova, ut nesao e ut etan lalikesae, e sepinien xil na Hi misakras vakesae ituxoh melele vari xa ipol vuol ni polien xil teni.^b ¹⁹ Mak, ma ngan xil xa di langgur xoteh rae tei takes^c na Hi xa hokorong tang e lapispisi ni mi moletin sav xil tengen lipol ihusili, ma, e melele xa Hi te ut nesao mei ihe suv toto na moletin xil, xil mei lihe neta sav tang. E ngan xil xa di lalong xat rae xil na Hi e di lapispisi ni mi moletin sav xil tengen lipol ihusili, xil mei lihe eilep mak mu e moletin xil na Hi Suv. ²⁰ Vengan nabiteni mi xamim, xosxa momalen namim pe met Hi nali ti momalen na *titsa* xil te rae na Mosis e momalen na *Farasi* xil mun, ma misakras mupus ti rute xa Hi be suv toto en.”

Pispisien usil tesaen te ekaten

²¹ Iesu biteni mun mi xil bit, “Xamim mutelonge xa Mosis tesa rae ak mi avu namim xil tetiamu tehit, ‘*Munahas vin ti moletin,*’ (Eks 20:13)^d e moletin xa ipol ni imak ha lilepisi e lisa pangasien mini. ²² E inou nabiteni mi xamim xa moletin xil vus xa ti iexil iat tua nae xil, Hi ilepis xil e isa pangasien mi xil.^e Reitin, xosxa moletin tei biteni mi tuneli bit, ‘vatum tovuol,’ lihur moletin ak ha lilepisi e koten na Siu xil e lisa pangasien mini. E xosxa moletin tei biteni mi tuneli bit, ‘otalang,’ xi di nggusil suse tengen ha ihe Upang xa misakras vamat.

²³ “Mak, ma xosxa xouk uha tengen osa sanien eo nam mi Hi e *hor te sanien*, e, e rute ak, onem rilomun ni neta tei xa moletin sav bit otepol ni mini xa tenamal ti, ²⁴ ustokovein sanien nam iti nga e rute ak sangas ni hor te sanien eo. Ti,

uha mu userev rin nam itela. E melele xa userev xamil ivus, utilomun uha e usa sanien nam sung mi Hi.

²⁵ “E xosxa moletin tei bit vahuruk ove kot ve neta ngan xa xi bit otepol ni mini, ma utemanon ha userev rin nam itela melele xa di tamu munggusil suse tengen mulihe von koten. Maxani, xosxa onapol ni ti, melele xa multuxoh kot, xi ilinguk e he moletin te lepisien. Ma moletin ak mikila ilinguk e he polis, e polis mikila ilinguk e nim te xeih.^f ²⁶ Reitin li nabiteni minuk, xouk utat rute ak e osakras ovaha vem vamase vatuxoh melele xa uxal rat vuol ni faen xa lalingi di xatuk.”

Pispisien usil sexien te kanen ni atou mu tiramue na mosav

²⁷ E Iesu pispisi mun mi xil bit, “Xamim mutelonge xa Mosis tesa rae ak mi avu namim xil tetiamu tehit, ‘*Munakan ni atou mu tiramue na mosav ti.*’ (Eks 20:14)^g ²⁸ E inou nabiteni mi xamim xa melele xa moletin tei xa miteli ngampus atou tei e ngguri e nenemien nang, e pe met Hi, nggoni ngan xa mikan ni ngamu vengang pol misa tuei dela e nenemien nan.

²⁹ “Xosxa metomu metu isak ni xouk umot e tesaen, ukis rati e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.^h ³⁰ E xosxa hem metu isak ni xouk umot e tesaen, uta xotehi e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.”ⁱ

^b5:18 Luk 16:17; 21:33 ^c5:19 Tem 2:10

^d5:21 Dut 5:17; Mat 19:18; Mak 10:19; Luk 18:20; Rom 13:9; Tem 2:11

^e5:22 1Sion 3:15 ^f5:25 Mat 18:34-35; Luk 12:58-59

^g5:27 Dut 5:18; Mat 19:18; Mak 10:19; Luk 18:20; Rom 13:9; Tem 2:11

^h5:29 Mat 18:8-9; Mak 9:43-47 ⁱ5:30 Mat 19:9; Mak 10:11-12; Luk 16:18

Pispisien usil sexien xa moletin miteli, di, mistokovein atou nan

³¹ Iesu pispisi mun mi moletin xil bit, “Xamim mutelonge xa Mosis tesa rae tei mi avu nar xil tetiamu tehit, ‘*Moletin xa bit vastokovein atou nan, ha ipus moletin te lepisien xa ipol kuh Setifiket te Silaen nalu. Ti, mikila istokovein ni sung.*’ (Dut 24:1)^j ³² E inou nabiteni mi xamim xa melele xa tiramue tei miteli del atou tei lunastokovein xalu ti pe met Hi.^k E xosxa tiramue tei mistokovein atou nan, xa tamaen xi ti mi tiramue sav, tiramue ak di pol ni tesaen pe met Hi. Vengan naha xa tiramue ak di pol ni isak ni atou ak ha ihur moletin sav xa be tesaen pe met Hi. E moletin xa nggur atou ak, pe met Hi nggoni ngan taxa di mikan ni atou na tiramue ak.”

Pispisien usil sexien xa moletin di pol ni hitxatien tei

³³ Iesu pispisi mun mi moletin xil bit, “Xamim mutelonge xa Mosis tesa rae tei mi avu nar xil tetiamu tehit, ‘*Munaluvos ni his Hi ti e sepinien xil namim, e mupol vuol ni naha xa mutehit xati pe met Hi tengan mupol ni.*’ (Nam 30:2)^l ³⁴ E inou nabiteni mi xamim xa munasuv xat hitxatien namim xil ti natel his ut nesao, venggan xa rute ak be vontoen na Hi.^m ³⁵ E munasuv xati ti mun natel his ut etan venggan xa be von kaele Hi. E munasuv xati ti mun ni his *Serusalem*, venggan be taon na Hi xa be suv toto.ⁿ ³⁶ E munasuv xati ti mun ni vatummim venggan musakras muviles hilimim tei takes mei vamieh mu vamaaluxoluk. ³⁷ Mak, ma melele xa mubit neta tei, muhiteni tang muhit, ‘Io,

be reitin,’ mu, ‘E-e, tave reitin ti.’ Venggan xosxa musuv xat sepinien namim ni neta tei, ma sexien ak nggo Temat vari tang.”^o

Pispisien usil sexien xa moletin di misa rilomun ni pangasien mi mosav tei xa pol misa mini

Luk 6:29-30

³⁸ Iesu pispisi mun mi moletin xil bit, “Xamim mutelonge xa Mosis tesa rae tei mi avu nar xil tetiamu tehit, ‘*Xosxa moletin tei purun met moletin sav, ma ngan xil te lepisien lipurun meten. E xosxa moletin tei diroh luh moletin sav, ma xi mun, litiroh luhon.*’ (Eks 21:24)^p ³⁹ E inou nabiteni mi xamim xa munasa rilomun ni ti sexien tesa mi moletin tei xa pol misa mi xamim. Mak, ma xosxa moletin tei mei mileves vim metu, umaen ni mun ileves vim meil.^q ⁴⁰ E xosxa moletin tei milinguk e kot ve kaon nam, e nggeih xatuk tenggan usa eising nam mini ixo kaon nam, ma umaen ni ihur kot nam te masoh mun.^r ⁴¹ Xosxa moletin tei te vaeen nggeih xatuk tenggan upo ateli nan ha ituxoh kilomita tei, xouk upoe sung ha ituxoh kilomita ihe lu. ⁴² E xosxa moletin tei dakesuk ve neta ngan, usa ni mini. E melele xa moletin tei ien bei tenggan vahur neta tei nam vahe vuteili tang, onakenin ni ti, e umaen ni tang mini.”^s

Pispisien usil sexien te eheien xa moletin ipisen ni mi elu nan xil

Luk 6:27-28,32-36

⁴³ Iesu pispisi mun mi xil bit, “Xamim mutelonge xa Mosis tesa rae ak mi avu namim xil tetiamu tehit, ‘*Temim ihei tuemim xil.*’ (Lev 19:18)^t E, ‘*Temim iat elu*

^j5:31 Mat 19:7; Mak 10:4 ^k5:32 1Kor 7:10-11 ^l5:33 Lev 19:12; Dut 23:21

^m5:34 Aes 66:1; Mat 23:22; Pol 7:49; Tem 5:12 ⁿ5:35 Aes 66:1; Pol 7:49; Tem

5:12; Sam 48:2 ^o5:37 Tem 5:12; 2Kor 1:17 ^p5:38 Lev 24:20; Dut 19:21

^q5:39 Sion 18:22 ^r5:40 1Kor 6:7 ^s5:42 Luk 6:30

^t5:43 Mat 19:19; 22:39; Mak 12:31; Luk 10:27; Rom 13:9; Kal 5:14; Tem 2:8

namim xil.[†] ⁴⁴E inou nabiteni mi xamim xa iemim ti ihei elu namim xil e ti musis ve ngan xil xa di lapurun xamim.^u ⁴⁵Ixo sexien ak, mupisen ni xa mube horamue xil na Tamemim xa de ut nesao.^v Vengan xa xi iaxa di pol ni eai misinasin xat moletin tesa xil del ngan xil mun xa labos. E misak ni us mus tengan vakas naho sa ngan xil xa lamal pe meten e ngan xil mun xa latamal ti. ⁴⁶?Xosxa eheien nam di mi ngan xil kestang xa eheien nae di e xouk, onemi obit Hi isa sanien tova minuk ven? !E-e, tamak ti! !Vengan ngan xil mun xa di laleh *takis* xil di lapisen eheien mi tua nae xil!⁴⁷ ?E xosxa di onggur pilei tumali xil kestang, sexien ak ihos ili sexien na mosav xil itep? Vengan ngan xil mun xa latakil ti Hi di lapol ni sexien ak.

⁴⁸“E xamim, bos xa mumal tevi ixoni ngan taxa Tamemim xa de ut nesao mo-mal tevi.”^w

Pispisien usil sexien xa lasa tutouen mi hoeo xil

6 Iesu pispisi mi moletin xil bit, “Melele xa mupol ni sexien xil xa Hi di biteni bit lamal pe meten, mulaxat kuh xamim tengan munapol ni ti pe met moletin xil tengan limerere ni xamim ven.^x Vengan xa xosxa mupol ni imak, ma Tamemim xa de ut nesao nasa ti huite teni mi xamim.

²“Mak, ma melele xa musa neta ngan mi hoeo tei, munapol ni ti naxoni ngan xil xa lamese nggo hilibexil tang. Vengan melele xa di lasak mesen xil tengan lasa neta tei, xil labe *nim te pispisien*mu labe suse xil xa mahulong, e di lapol ni moletin te polien nae xil labui amaru tengan

likes viton moletin xil limei e mei lipus naha xa xil lipol ni e lisa merereen mi xil. Nabiteni reitin mi xamim, xil di tuei langgur huite ve naha xa lapol ni xiak, e linahur ti mun huite teni e ut nesao.³ E melele xa mututou ni hoeo xil, mupol xusus ni tang e suse xa tua hos namim xil linakil ti vari. ⁴Imak, ma moletin xil linakil ti tutouen xa di musa ni mi mosav xil. E Tamemim xa di pus naha xa moletin xil di lapol xusus ni, xi vari iaxa isa huite teni mi xamim.”

Pispisien usil sexien te sisen

Luk 11:2-4

⁵Iesu pispisi mi moletin xil mun bit, “Melele xa musis, munapol ni ti naxoni ngan xil xa di lapol ni nggo hilibexil tang. Vengan iexil bei tang tengan lasoh e lasis e nim te pispisien xil mu e seri suse xil xa mahulong tengan moletin xil holu lipus naha xa di lapol ni.^y Nabiteni reitin mi xamim, xil di tuei langgur huite ve naha xa lapol ni xiak. ⁶E melele xa musis mi Hi, ihos mak mu tengan muhe nim, mukoe xol puiteh, e musis mi Hi Tamemim xa moletin xil lasakras lapusi. E Tamemim xa di pus naha xa moletin xil di lapol xusus ni, xi vari isa huite teni mi xamim.

⁷“E melele xa di musis, munasepin ni sepinien xil ti nahe holu xa be neta sav tang naxoni ngan xil xa latakil ti Hi reitin. Vengan xa ngan xil ak di lanemi labit hi nae xil liteong ni sisen nae xil melele xa limangang eilep ni sepinien xil holu. ⁸Reitin, munapol ni ti naxoni xil, vengan melele xa mutasis ti mu, e Tamemim mikil vuol ni ngamu naha xa mube tamure ni.^z

[†]5:43 Latakil ti xa sepinien xati ak texo xave, e Sam 139:21-22 di biteni bit, “*Ien mikat ngan xil ak e labe elu minou.*”

^u5:44 Eks 23:4-5; Pro 25:21; Rom 12:20; Luk 23:34; Pol 7:60; Rom 12:14; 1Kor 4:12 ^v5:45 Efes 5:1 ^w5:48 Lev 19:2; Dut 18:13 ^x6:1 Mat 23:5

^y6:5 Mat 6:16; 23:5 ^z6:8 Mat 6:32; Luk 12:30

⁹“Mak, ma melele xa musis, muhiteni imak,

‘Hi Tamemim xa ode ut nesao, hisom be eo e momal tangan musa mer-ereen minuk.^a

¹⁰Masis tangan mei uhe suv toto namem e ulaxat kuh xamem.

E nenemien xil vus nam istal ihe reitin e ut etan ixoni ngan xa testal ngamu e ut nesao.^b

¹¹Usa anien li mi xamem ipin te melengien xil vus.

¹²Onaketeh ti mun nasa mi xamem ve holesok xil xa di mapol ni xa tamal ti.

Upol ni ixoni ngan xa xamem mun di maketeh bos rilomun mi ngan xil xa di lapol misa mi xamem.^c

¹³Onamaen sakpisien xil te xeih ti namei e xamem,^d

e usikoe xol xamem ra he Temat.^e

¹⁴“Xosxa mosav tei pol misa mi xamim e muketeh bos rilomun mini, ma Hi Tamemim mun xa de ut nesao iketeh ihos ni xamim ve naha xa mupol ni.^e ¹⁵E xosxa munaketeh ti navos mi mosav xil, ma Hi Tamemim mun naketeh ti navos mi xamim.”^f

Pispisien usil sexien te halen ni anien ve sisen

¹⁶Iesu pispisi mi moletin xil mun bit, “Melele xa mubal ni anien ve sisen, munapol ni ti naxoni ngan xil xa di lapol ni nggo hilibexil tang. Vengan xa melele xa labal ni anien, xil di lapol ni valnaoxil

mikenu tangan moletin xil lipus kila xa mae nggat pangas xil.^g Inou nabiteni reitin mi xamim xa xil langgur huite teni ngamu. ¹⁷E melele xa mubal ni anien ve sisen, bos mak mu tangan mukas valnaomim e musak kuh hilemim ixoni ngan taxa di mupol vehakut ni. ¹⁸Imak, ma mosav xil linapus kil ti xa di mubal ni anien. E Hi Tamemim xa moletin xil lasakras lapusi, xi kestang ipus kila. Reitin, Hi Tamemim xa di pus kil naha xa moletin xil di lapol xusus ni, xi vari iaxa isa huite teni mi xamim.”

Pispisien usil nenexoen ve holesok xil te ut etan

Luk 12:33-34; Mat 16:13; 12:22-31

¹⁹Iesu pispisi mi moletin xil mun bit, “Munaserev holesok namim xil ti nahe holu e ut etan. Vengan holesok xil te ut etan ak, pipei xil e turara likila lipangei,^h e moletin te kanen mun mikila ihe nim e ha ikan ni. ²⁰E ihos mak mu tangan muserev holesok namim xil ihe holu e ut nesao.ⁱ Vengan xa, e rute ak, pipei xil e turara lasakras lapangei, e moletin te kanen mun misakras vahe nim e ha vakan ni. ²¹Vengan nenemien namim iti e rute xa di muserev holesok namim xil iti en.

²²“Metemim nggoni laet te tenbemim. Xosxa metemim bos, ma muti e miehen e tenbemim mikila ipol ni sexien xil xa bos. ²³E xosxa metemim isa, ma muti e maluxoluken e ti mupol ni sexien tesa xil. E xosxa miehen xa vate xouk ihe

6:13 Tetiamu, melele xa moletin xil latetis rilomun ni vanuvei na Matiu, lateso rin ni sepinien ak xa bit, “Ve lelatatien, xeihen e minehinen xa de xouk vehakut misakras vavus. Reitin.”

^a6:9 Esek 36:23 ^b6:10 Mat 26:42; Luk 22:42 ^c6:12 Mat 18:32-33

^d6:13 Mat 26:41; Luk 22:40; Sion 17:15; 2Tes 3:3; 2Tim 4:18 ^e6:14 Mak 11:25;

Efes 4:32; Kol 3:13 ^f6:15 Mat 18:35 ^g6:16 Aes 58:5; Mat 6:5; 23:5

^h6:19 Tem 5:2-3 ⁱ6:20 Mat 19:21; Mak 10:21; Luk 18:22; Kol 3:1-2

tovuol, ma maluxoluken xa ite meulien nam ihe eilep pupu.”[§]

²⁴E Iesu biteni bit, “Moletin tei misakras vapol mi masta vahe lu (2). Maxani, ien iat tei e ien ihei ngan tesav; mu nenemien nan iti tei ixeh, e isin ni ngan tesav. Ve rin ak, musakras muhusil xat Hi vatel mani.”^j

²⁵“Ma vengon rin ak be reitin, bos tengon munanexo ti ve naha xa mua ni mu naha xa mumu ni, mu naha xa musing xol tenbemim ni.”^k ?Midep, meulien nar be te anien en tang? ?Mu tenbexir be tengon taxa ti rasing xole? !E-e, tamak ti! Meulien xa di e xamim bos mili anien e naha xa di musing ni. ²⁶Mupus pis tuman xil xa di langga xolol. Xil latalih ti neta, e lataserev ti anien ae vati e povah mae xil. E tave ti neta xa latapol ni ti, e Tamemim xa de ut nesao iaxa di bangan xil. E pe met Hi, xamim mubos mak mu muleli tuman xil ak.^l Ma mukil kuhi xa xi ilaxat kuh xamim. ²⁷Nenexoen ve neta ngan misakras vaso rin ni haoa tei mun vate meulien namim.

²⁸“?Mak, ma veneh iaxa di munexo ve rin te eising? Munem pis hungovae xil xa di lameul. Xil latapol ti e latatil ti eising nae. ²⁹E nabiteni mi xamim xa suv toto **Solomon** tetiamu,^m eising nan xil tehos xa tehos, e hungovae xil ak, lasing xol xil bos mak mu laleli. ³⁰Hi mising xol hungovae xil ak bos xa bos, tave ti neta xa di lameul usil suse melengien tei takes, di, e melengien sav nen, lameles e lakiri. Di, ladaveas viton ni e laso ni be upang. ?E xosxa Hi di mising xol xil mak, ma munemi mubit misakras vasing

xol xamim vamak? !Ei, neketen namim hokorong tova tang!

³¹“Ma munanexo ti ve naha xa mua ni, ve naha xa mumu ni, mu ve naha xa musing ni. ³²Vengan hisit nenexoen xil xa mak be na ngan xil xa latakil ti Hi reitin. Vengan Hi Tamemim mikil vuol ni holesok xil vus xa mube tamure ni e meulien namim.”ⁿ ³³E ngan xa eilep mak mu iaxa mumaen Hi mei ihe suv toto e meulien namim e mupol ni naha xa momal pe meten. Melele xa mupol ni imak, holesok xil mun te meulien, Hi isa ni mi xamim.^o ³⁴Ma munanexo ti mun ve neta xil xa mulehi visuvong, vengon mukila munem usili sung visuvong. Vengan melele te xeih xil xa di mubisu ni xosali, pipin te xosali tang.^p Munaleh nenexoen xil te visuvong ti namei nave te xosali.”

Pispisien usil rin xa linalepis mosav xil ti

Luk 6:37-42

7 Iesu pispisi mun mi moletin xil bit, “Onalepis moletin sav ti tengon opisen tesaen nan xil. Vengan xosxa upol ni imak, ma Hi mun ilepis xouk tengon ipisen tesaen nam xil.”^q ²Vengan Hi ilepis xouk ixo hisit sexien taxa xouk di opol ni mi moletin sav. Ixo sexien xa di olepis mosav xil, Hi iaxa ilepis xouk ihusili.^r

³“?Veneh ma di opus kil saxut liei tei xa hokorong tang xa de met tumali, e otapus kil ti vari merut liei xa mahulong xa da xat metom?*** ⁴?Veneh ma di osis tumali obit, ‘Tua li, maen nou namur rat saxut liei xai ra metom,’ melele xa merut liei tei xa mahulong dat e metom? ⁵Xouk

[§]6:23 Miehen e maluxoluken lube vole usil sexien nar xil. Melele xa rapol ni sexien xil xa bos, ngan ak di pisen ni xa radi e miehen na Hi. E melele xa di rapol ni sexien xil xa misa, ngan ak di pisen ni xa radi e maluxoluken.

**7:3 Route te liei xalu ak be tesaen.

^j6:24 Luk 16:9 ^k6:25 Plp 4:6 ^l6:26 Mat 10:31; Luk 12:7,24

^m6:29 1King 10; 2Kron 9 ⁿ6:32 Mat 6:8; Luk 12:30 ^o6:33 Sam 37:4

^p6:34 Eks 16:4 ^q7:1 Rom 2:1; 14:4,10; 1Kor 5:12; Tem 4:11 ^r7:2 Mak 4:24

di opol ni sexien hos xil nggo hilibom tang. Bos mak mu tangan upo rat merut liei xa da xat metom, ti, uketeh kuhi sung tangan ukila uhur rat saxut liei ra met tumali.

⁶“Holesok eo na Hi, munasa ni ti mi kuli xil, maxani, lihiles e lingas rilomun ni xamim. Reitin, munaso holesok xil ti xa bos mi vueili xil vengan lihe tan tang en.”^{††}

Pispisien usil sexien xa rasis Hi ve neta ngan

Luk 11:9-13

⁷Iesu pispisi mi moletin xil mun bit, “Xosxa iem ihei neta ra Hi, usisi, ma isa ni minuk. Reitin, xosxa ulang vesi, ma ukameti. Sisen nam ixoni ngan taxa ti urei puiteh na Hi, ma xi isaha minuk.”^s
⁸Vengan moletin xil vus xa di lasisi ve neta ngan, xil di langguri; ngan xil xa di lalang ves neta ngan, lakameti; e puiteh di misaha mi ngan xil xa di laerei.

⁹“?Visi e xamim tata xil mikila vasa meralihat tei mi horamue nan melele xa misisi ve anien? ¹⁰?Mu vasa tetal sasa tei mini melele xa misisi ve meseo? ¹¹Ma, tave ti neta xa mube moletin tesa xil, e mukil kuh sexien mak xa ti musa sanien xa bos mi horamue namim xil. ?E midep ni sexien na Hi Tamemim xa bos pupu xa de ut nesao? Sexien nan bos mili sexien namim, e isa holesok xil xa bos mi ngan xil xa ti lisisi.”^t

Pispisien usil suse xa moletin ihusili tangan ihe ut nesao

Luk 13:24

¹²E Iesu biteni mun mi moletin xil bit, “E holesok xil vus xa di mupol ni, mupol ni mi moletin sav xil ixoni ngan taxa iemim bei tangan xil lipol rilomun ni mi xamim.”^u Vengan xa nenemien ak be vatite te **rae xil na Mosis** e Tisen na **provet** xil tetiamu.”

¹³Di, Iesu biteni bit, “Xamim, suse tangan muve ut nesao tave temale ti. Bos tangan muxo puiteh te suse xa hokorong tang. Vengan puiteh tei mun xalu xa eilep da, e moletin xil holu iaxa di langgo en e di langgusil suse nen xa be temale tang. E e hoxalit suse ak, xil likamet longpangasien xa mahulong pupu. ¹⁴E puiteh xa be te suse xa nggeih xa hoxalite teni be meulien sal, puiteh ak hokorong tang. Moletin xil di lalang vesi, e vahis tang likameti e lixo en.”^v

Pispisien usil rin xa itep iaxa lipus kil provet te luvoson xil

Luk 6:43-44; 13:25-27

¹⁵Iesu misel xat moletin xil bit, “Muxalaxat kuh xamim tangan **provet** xil te luvoson mei linaluvos xamim ti.”^w Vengan xil langgoni sipsip xil xa labos e lamerou nggo hilibexil tang. E e tinexil, xil langgoni kuli reran xil xa lasa xa di langas purun moletin xil. ¹⁶Xamim mupus kil xil ixo huite te meulien nae. Moletin misakras valeh huit tavu ra vatit ai, mu huit

^{††}7:6 Nggo vole ak, Iesu di pispisi ni xa melele xa di osa nenemien eo xil na Hi xa bos pupu mi ngan xil xa latamase ti pe met Hi, xil linem male ni tang e lihiles lipurun xouk mun tang.

^s7:7 Mak 11:24; Sion 14:13-14; 15:7; 16:23-24; Tem 1:5; 1Sion 3:22; 5:14-15

^t7:11 Tem 1:17 ^u7:12 Mat 22:40; Rom 13:8-10

^v7:14 Pol 14:22 ^w7:15 Mat 24:11,24; Luk 6:26; 2Pit 2:1; 1Sion 4:1; Rev 16:13; Esek 22:27; Mat 10:16; Sion 10:12; Pol 20:29

manggo ra vatit vilu.[‡] ^{x17} Usil rin ak, vatiei xil vus xa bos di laso huite xil xa bos, e vatiei xil xa misa di laso huite xil xa misa.^y ¹⁸ Vatiei xil xa bos, lasakras laso huite xil xa misa, e vatiei xa misa lasakras laso huite xil xa bos. ¹⁹ E vatiei xil vus xa lataso huite ti vahos, lite rat xil e ha liso xil lihe upang.^z ²⁰ Usil sexien ak vari, mupus kil provet te luvozen xil ak ixo huite te meulien nae.^a

²¹ “Moletin xil hao xa, takeak, di lakes nou ni ‘suv,’ xil linava ti rute xa Hi te ut nesao be suv toto en. Ngan xil kestang xa di lapol ni naha xa Tata navan e ut nesao ien bei tangan xil ti lipol ni, xil iaxa ha liti visali.^b ²² E Melengien te Lepisien,^c ²³ Ti, inou nihiteni mi xil kekes nihit, ‘!Muhe reling nou xamim xa di mupol misa! !Natakil ti vari xamim!’”^d

Pispisien usil rin xa meulien nar ihusil sepinien na Hi itep

Luk 6:47-49

²⁴ Di, Iesu misepin kor mi moletin xil nggo vole tei bit, “Xosxa xamim mulong sepinien navan xil ak e ha mupol ihusili,^e ma xamim munggoni moletin tei xa be metisou xa mikili ni nim man de tan tei xa nggeih. ²⁵ Us mus, oei mileh be eilep, e votiang bas nim ak, e tameru ti vengam misoh e tan xa nggeih. ²⁶ E xamim xa di mulong sepinien navan xil ak e di mutahusili ti,^f munggoni unu tei xa mikili ni nim man dat suhon tang. ²⁷ Us mus, oei mileh be eilep, e votiang bas nim ak. !Ma nim man meru e mikiri lel vari tang!”

[‡]**7:16** Sepinien xati teni bit, “moletin misakras valeh huit grep ra vatiei xa sanute di en, mu huit fik ra vatiei mun xa misa.”

^x**7:16** Tem 3:12 ^y**7:17** Mat 12:33,35

^z**7:19** Mat 3:10; Luk 3:9; 13:6-9; Sion 15:6 ^a**7:20** Mat 7:16; 12:33

^b**7:21** Luk 6:46; Mat 21:31; Rom 2:13; Tem 1:22,25; 1Sion 2:17

^c**7:22** Rev 20:11-15; Ser 14:14; 27:15; Mak 9:38; Luk 9:49

^d**7:23** Mat 10:33; 2Tim 2:12; Sam 6:8; Mat 13:41-42; 25:41 ^e**7:24** Tem 1:22

^f**7:26** Tem 1:23 ^g**7:28** Mak 1:22; Luk 4:32

^h**8:4** Mat 9:30; 12:16; Mak 7:36; Lev 14:1-32; Luk 17:14

²⁸ Melele xa Iesu pispisi mi tatit moletin xil ak bus, xil lamesep pupu ve pispisien nan xil.^g ²⁹ Vengan xa xi pispisi mi xil nggoni ngan xa pispisien nan xil nggo vulonge Hi vari tang. Pispisien nan xil taxoni na *titsa* xil te rae na Mosis ti xa dit labit rilomun ni sepinien na titsa sav xil tang.

Iesu dal rat moletin tei ra mesien leporsi

Mak 1:40-45; Luk 5:12-16

8 Melele xa Iesu pispisi mi moletin xil bus, xi bemei etan ra hu ak, e tatit moletin xil langgusili. ² Di, latemanin e moletin tei xa mesien *leporsi* da en bemei e hilaep te xil, mitingeiril pe met Iesu, e biteni mini bit, “Suv, xosxa iem bei li, xouk ukila upol ni hilbeok mei imese rilomun.”

³ Ma, Iesu mite hen duxoli e biteni mini bit, “Bos, ieok bei tangan napol ni. !Umese rilomun!” Vatei takes, moletin ak, mesien nan be relingi e hilben mei memese rilomun. ⁴ Di, Iesu biteni mini bit, “!Uteong ni nou! Onahiteni ti mi moletin tova naha xa mistal ni xouk.^h Sexien nam xil ak ipisen ni mi xil xa tenbom bos ngamu e omese rilomun.”

Iesu nggur rat mesien ra slev tei na vat na moletin te vaeen xil te hal Rom

Luk 7:1-10

⁵ Iesu mikakao be taon te hal Kaparniam. E melele xa mistal en, vat na moletin xil te vaeen te hal Rom bemei visali

e misis tutouen¹ mini bit, ⁶“Suv li, slev tei navan de tim e di milong pangas xi holu. Rin tei mat e da nga voninen.”

⁷Ma Iesu biteni mini bit, “Niha nihur rat mesien nan ihe relingi.”

⁸E vat ak bit rilomun ni mini bit, “O suv, onanexo pupu ti venou vengan xa natapin ti tangan mei ove tim savan. E nakila xa xosxa usepin tang, ma slev navan ilonge ihos rilomun. ⁹Vengan xa eilep navan da, e inou mun nabe vat na moletin xil te vaen. Misak ni, melele xa nabiteni mi tei e xil nabit, ‘He inggaxor,’ ma xi ba. E melele xa nabit, ‘Amei,’ xi bemei. E melele nabiteni mi slev navan nabit, ‘Upol ni netak,’ ma pol ni.”

¹⁰Melele xa Iesu milong sepinien nan, mitemanin ni e biteni mi ngan xil xa di langgusili bit, “Reitin mak, nabiteni mi xamim xa, e rin na mol-Isrel xil, natakameti mu moletin tova xa neketen nan nggeih nggoni ngan Rom ak.^j ¹¹E rute xa Hi be suv toto en, xi ipol ni anien tei xa mahulong itel moletin nan xil. E melele nen ak, moletin xil holu xa latave Siu ti mei lianien vituei itel **Ebrahim, Aesak e Siekob**, avu nar xatel tetiamu.^k ¹²E holu e mol-Isrel xil xa Hi tehosei moletin nae xil tangan mei lave nan, xi iso rerat xil lihe hale e rute tei xa maluxoluk, e xil ti limuis, e ti lingas luhexil ve longpangasien nae xil.”^l

¹³Di, Iesu biles e biteni mi vat ak bit, “Utilomun uhe tim sam. Holesok xil istal ixoni ngan taxa di oneket en.”^m E melele nen ak vari, slev na vat ak, tenben bemei bos rilomun.

Iesu mileh rerat mesien ra moletin xil holu

Mak 1:29-34; Luk 4:38-41

¹⁴Melele xa Iesu duxoh tim sa Pita, be nim e pusi xa avu kokon nanⁿ di pat de voninen, ven nggan. ¹⁵Melele xa pusi mak, Iesu mite hen duxol he tovolih ak. E melele xa duxoli, mesien nan be relingi e mitamea. Di, tovolih ak nggur rut anien tei e misa ni mi Iesu.

¹⁶Melele xa meteneai be tan, moletin xil laleh ngan xil xa **ninin tesa** xil di xat xil, e Iesu nggol rerat ninin tesa xil ak labe reling xil nggo sepinien nan kestang. E ngan xil xa lamesei, xi dal rat xil vus ra mesien nae. ¹⁷Iesu pol ni mak tangan vasak ni naha xa Hi tehiteni texo **provet** Aesea mei ihe reitin xa tehit, “*Xi mileh rerat mesien nar xil e po rat longpangasien nar xil mun.*” (*Aes 53:4*)

Iesu misel xat ngan xil xa labit lavusil xati tangan linem kuhi mu

Luk 9:57-62

¹⁸E melele xa Iesu pusi xa tatit moletin xa mahulong ladi xorelisi, xi misemae ni moletin nan xil tangan livue xat bot tei tangan lihe ri Oei Kaleli. ¹⁹E melele xa Iesu e moletin nan xil di laba, **titsa** tei te rae na Mosis bemei visali e bit, “Titsa, ut xave xa uha en, inou nihusiluk.”

²⁰E Iesu bit rilomun ni mini bit, “Asu xil,^q vale mae xil di, e tuman xil mun, nunu mae xil di. E Nat Moletin, tim san xati te pat en tovuol.”^o

²¹E moletin tei mun xa di nggusil Iesu biteni mini bit, “Suv, ieok bei tangan namusiluk. E itiamu, umaen nou nitilo-

^q8:20 Sepinien xati teni bit, “*fokis*” xa langgoni kuli reran xil xa di lapol ni vale mae xil e tan nggoni ngan xa asu xil di lapol ni.

ⁱ8:5 Sion 4:46-47 ^j8:10 Mat 15:28 ^k8:11 Luk 13:28-29

^l8:12 Mat 13:42,50; 22:13; 24:51; 25:30; Luk 13:28

^m8:13 Mat 9:29; 15:28; Sion 4:50-51 ⁿ8:14 1Kor 9:5 ^o8:20 2Kor 8:9

mun nihe tim savan e nilaxat tata navan ituxoh melele xa imat e nitihin ni.”

²² E Iesu biteni mini bit, “Xouk uhusil xat nou xosali,^p e uling ngan xil xa lamat tangan ti lithin ngenexil xa lamat.”

Iesu misemae ni votiang del oei tangan lalihe tan, e lulong xat raen

Mak 4:35-41; Luk 8:22-25

²³ Melele xa Iesu misepin bus, xi be bot e **moletin nan xil** langgusil xati tangan lave ri Oei Kaleli. ²⁴ E melele xa di lalis laba, Iesu por sae. E tavehi ti, latemanin ni votiang tei xa mea e mu nggeih. Ngan ak misak ni oei nggelial holu, e tahe be-mei e bot, sangas vamerir. E Iesu, xi por povong. ²⁵ E moletin nan xil laba lasiasi ni labit, “!Suv, ututou ni xamem li! !Ramat xi tak!”

²⁶ Iesu bit rilomun ni mi xil bit, “?Ulimim di mikan veneh? !Neketen namim hokorong tova tang!”^q Di, mitamea e misemae ni votiang e oei bit, “!Luhe tan!” E vatei takes, xalu lube tan e an mei bos rilomun.

²⁷ Melele xa moletin nan xil lapusi mak, latemanin e lasis pilei xil mun tang labit, “?Moletin ak be hisit moletin eah? !Neta sav xa votiang e oei, xalu mun di lulong xat raen!”

Iesu nggol rerat ninin tesa xil labe reling moletin lu

Mak 5:1-20; Luk 8:26-39

²⁸ Melele xa lamei ut e ri oei, Iesu del moletin nan xil laduxoh tan te hal Kadara. Vatei takes, moletin lu lunggo vangihat xil xa be von tehinen e lumei visal Iesu. Moletin xalu ak, ninin tesa xil ladi e xalu e lasak ni xalu di lubas purun moletin xil vus xa lamei sangas e rute ak. Misak ni moletin xil lasakras laka pas rute xa ludi en. ²⁹ Melele xa lamei

sangas, lukei nggeih ba ni Iesu lubit, “!Nat Hi! ?!Upol ni naha mi xamem!? ?Omei inggak tangan osa pangasien mi xamem?^r ?Onatatil ti melengien xati teni xa ti imei?”

³⁰ Tave sotin ti ra rute xa ladi en, tatit vueili xil holu di lasu. ³¹ Ma ninin tesa xil ak ladakes Iesu labit, “Xosxa uhit uhol rerat xamem, ma umaen xamem muhe vueili xil xor.”

³² Ma Iesu biteni mi xil bit, “!Muha!” Ma ninin tesa xil ak labe xat vueili xil. E vatei takes, tatit vueili xil ak laloh ba lakiri labe meteh etan, e ba lamerir e Oei Kaleli, e xil vus laloh. ³³ Ngan xil xa di lalaxat vueili xil ak, ulixil mikan, ma laloh labe taon. E taon, latumul usil naha xil xa latepusi e naha xa testal mi moletin xalu xa ninin tesa xil lateti xat xalu. ³⁴ Misak ni moletin xil vus te taon ak laba tangan lapus ti Iesu. E melele xa lapusi, ladakesi tangan vahe reling ut sae.

Iesu misak ni moletin tei xa rin tei mat mei bos rilomun

Mak 2:1-12; Luk 5:17-26

9 Iesu del moletin nan xil labe bot e langgur xoteh Oei Kaleli ladilomun labe Kapaniam, taon xati nan. ² Melele xa laduxoh taon, rut moletin xil lapo moletin tei del vet man tang e lamei ve Iesu vengon xa ri moletin ak mat. E melele xa Iesu pus kila xa neketen nae di, xi biteni mi moletin xa rin tei mat bit, “Natuxoli, umaal. Ninaketeh ti mun nasa minuk ve **tesaen** nam xil.”^s

³ Rut **titsa** xil te rae na Mosis ladi sangas e lalonge. Ma labiteni mi xil mun tang labit, “!Ei, moletin ak di misep xar ni Hi, vengon xa di misepin nggoni ngan taxa lehit xi be Hi vari tang!”

⁴ E Iesu mikil naha xa di lanem usili.^t Ma biteni mi xil bit, “?Veneh ma mung-

^p8:22 Mat 9:9; Sion 1:43; 21:19 ^q8:26 Mat 14:31

^r8:29 Mak 1:24; Luk 4:34 ^s9:2 Luk 7:48 ^t9:4 Mat 12:25

gur xat nenemien tesa xil ak di e tine-namim? ⁵?Midep, sepinien eah iaxa be temale mak mu tangan namiteni: namit, 'Ninaketeh ti mun nasa minuk ve tesaen nam xil,' mu namit, 'Utamea e ukakao'? ⁶E tangan xamim mupus kila xa Nat Moletin nggur xeihen e ut etan tangan vaketeh vahos rilomun mi moletin xil, mupus ngan ak ..." E Iesu biles, pus moletin xa rin tei mat e biteni mini bit, "Utamea, uvulun vet mam, e upoe utilomun uhe tim sam!"^u ⁷Vatei takes, moletin ak mea e mikakao rilomun be tim san. ⁸Melele xa moletin xil lapusi mak, latemanin ni e ulixil mikan. Xil lapet rat his Hi xa misa hisit xeihen ak mi moletin tei tangan vapol ni sexien xil ak.

Iesu mikes Matiu tangan ihusili

Mak 2:13-17; Luk 5:27-32

⁹E melele xa Iesu be reling rute ak e mikakao ba, xi pus moletin tei di dotan de nim te polien nan xa hokorong, hisen **Matiu**. Xi di mileh takis ra Siu xil tangan vasa ni vaha mi kavmen te hal Rom. E melele xa Iesu pusi, mikesi bit, "Amei! Uhusil xat nou^v e mei uhe moletin tei navan!" Ma Matiu mea, mistokovein polien nan xil, e nggusil xat Iesu.

¹⁰Ma Matiu del Iesu e **moletin nan xil** labe tim san. Xi pol ni anien tei e melele xa ladotan e di langganien, moletin hau te **takis** e moletin sav xil mun xa lasa pe met Siu xil lamei e langganien vituei del Iesu e moletin nan xil.^w ¹¹Melele xa **Farasi** xil lapusi mak, lasis moletin xil na Iesu labit, "?Veneh ma titsa namim di ngganien vituei del moletin xil te takis e moletin tesa xil mun?"

¹²E melele xa Iesu milonge, biteni mi xil bit, "Moletin xil xa latamesei ti

labit linakil ti tokta. E ngan xil kestang xa lamesei iexil bei tangan lapus tokta. ¹³E xamim, muha mulang ves koute te sepinien ak xa de Vanuvei Eo na Hi xa bit,

'Teok ti tavei sanien eo xil kestang namim, e ieok bei mak mu tangan iemim isae e moletin sav xil.' (Hos 6:6)^x

Vengan xa natamei ti tangan nakes moletin xil xa lamal ngamu pe met Hi tangan lihiles lihusil nou. E-e, namei tangan nakes ngan xil xa lapol ni **tesaen** tangan mei lihiles ra tesaen nae xil e lihusil nou."

Iesu biteni xa pispisien hu nan xil misakras vahusil xat sexien matu xil na Siu xil

Mak 2:18-22; Luk 5:33-39

¹⁴Di, moletin xil na Sion Baptis lamei visal Iesu e lasisi labit, "Melengien xil holu, xamem del Farasi xil mun di mabal ni anien tangan masi^y e mapisen ni xa malonge misa ve tesaen namem xil. E mapusi xa moletin nam xil latapol ni ti sexien ak. ?Veneh vari?"

¹⁵Iesu dei vole ak mi xil bit, "Melele xa moletin tei miteli, ngan xil xa lamei ve anien nen ak, labesi xil.^z ?Xamim munemi xa lilonge isa e lipol ni sexien xil te tangan melele xa moletin ak di tamu visal xil? !E-e, lasakras! E melengien tei di bemei xa moletin xil mei lihur rat moletin nen ak ra xil. E melengien ak vari, xil lilonge isa e lihal ni anien."

¹⁶Di, Iesu dei vole tei mun mi xil bit, "Moletin tovuol xa vatil xol eising matu tei vatel saxut kaliko tei xa be neta hu. Vengan xa melele xa ikasi, kaliko xa be neta hu mei ileten pupu, ma ital papas eising matu ak e mei imeseh mak mu.

^u9:6 Pol 9:33-35 ^v9:9 Mat 8:22; Luk 9:59; Sion 1:43; 21:19

^w9:10 Mat 11:19; Luk 7:34; 15:1-2; 19:7 ^x9:13 Mat 12:7

^y9:14 Mat 11:18; Luk 18:12 ^z9:15 Sion 3:29

¹⁷“Nggusil suse nen tak, moletin tovuol xa vateh uaen hu vahe valite matu tei xa lapol ni ni hilbe sipsip vengang nggeih ngamu. Vengan xa xosxa ipol ni, ma uaen hu ak ikaio e valite teni imeseh. Maxani, valite ak isa e uaen imie ihe tan. Misak ni, moletin xil ti litech uaen hu ihe valite xa be neta hu vengang memerou tamu, mikila ikaio. Imak, ma valite teni ihos e uaen mun xa di en ihos.”^{§§}

Iesu dal rat atou tei ra mesien nan del atuli tei ra maten

Mak 5:21-43; Luk 8:40-56

¹⁸Melele xa Iesu di tamu misepin usil holesok xil ak, vat tei na Siu xil bemei visali, mitingeiril mini e biteni mini bit, “Natuxahin mat taxeak tang. Amei li, mei uling hem en,^a ma imeul rilomun.”
¹⁹Ma Iesu mea e nggusil vat ak del moletin nan xil laba.

²⁰Melele xa di lakakao laba, atou tei nggo pe tou Iesu bemei e duxol seri eising nan. Atou ak, mesien na atou xil basi huram lu e le tei (12) e misakras vavus.^b

²¹Xi duxoli vengang minemi bit, “Xosxa nituxol seri eising nan tang, ma nilonge ihos rilomun.”^c

²²Melele xa atou ak duxol eising nan, Iesu biles, pusi e biteni mini bit, “Atou li, umaal. Nggo neketen nam, mesien nam be relinguk ngamu.”^d E melele nen ak vari, mesien be relingi.

²³Di, lakakao laba e laduxoh tim sa vat ak. E melele xa labe nim, Iesu pus rut moletin xil di lapol ni kikeien tei te maten, e vanut moletin tei xa mahulong

lase vangit nim e di ladang ve atuli ak.
²⁴E Iesu biteni mi xil bit, “!Mustal! Atuli ak tamat ti, xi di pat tang.”^e E moletin xil lamem pepamen ni.
²⁵E melele xa lasil rerat moletin xil labe hale, Iesu be vangit nim. Xi ba pus atuli, e dal xat hen.^f Melele xa dal xati, atuli ak meul mun, milale e mitamea.
²⁶Longeongen usil naha xa Iesu tepol ni mikapis e ut xil vus e rute ak.

Iesu pol ni metevar lu del moletin tei xa be vut mei labos rilomun

²⁷E melele xa Iesu be reling tim sa vat ak e di nggusil suse ba, metevar lu lumei visali e lunggusili.^g Xalu lukei nggeih ba ni lubit, “!Ei, xoux xa ostal onngo vatimol na suv toto *Deved!*”^{*} !Iem isae li e xamel!”

²⁸Lunggusili duxoh melele xa Iesu be nim tei. Metevar xalu ak mun lunggusili lube vangit nim ak e Iesu misis xalu bit, “?Midep? ?Xamil muke reitin xa inou nikila nisak ni xamil muliketeh rilomun?”

E lubit rilomun ni mini lubit, “O suv, make reitin xa ukila upol ni.”

²⁹Di, Iesu mite hen duxoh metealu e biteni bit, “Holesok xil istal ixoni ngan taxa di muneket en.”^h ³⁰E metealu mei bos e luketeh rilomun. E Iesu misep xol xalu nggeih bit, “!Mulnahit naha ti xa napol ni mi xamil xiak mi moletin ti!”ⁱ

³¹E melele xa lube relingi, ba lubithiten naha xa Iesu tepol ni mi xalu, ma longeongen teni mikapis e ut xil vus e rute ak.

§§9:17 E vole xalu ak, Iesu di biteni xa pispisien hu xil nan di nggusil sexien hu xil tang, misakras vahusil xat sexien matu xil na Siu xil.

***9:27** Siu xil lake reitin xa Mesaea istal ixo vatimol na suv toto Deved, misak ni lakes Mesaea ni ‘nat Deved.’

^a9:18 Mat 8:3; Mak 6:5; 7:32; 8:23,25; Luk 13:13 **^b9:20** Lev 15:25

^c9:21 Mat 14:36; Mak 6:56 **^d9:22** Mak 10:52; Luk 7:50; 17:19; Pol 3:16

^e9:24 Sion 11:11 **^f9:25** Mak 1:31; 9:27 **^g9:27** Mat 20:29-31

^h9:29 Mat 8:13; 15:28 **ⁱ9:30** Mak 7:36

³² Melele xa moletin xalu ak lube hale, rut moletin xil lamei visal Iesu e ladel moletin tei xa be vut. Moletin ak misakras vasepin vengan xa ninin tesa tei da en.^j ³³ E melele xa Iesu nggol rat ninin tesa ak be relingi, moletin ak misepin rilomun. Melele xa rut moletin xil ak lapusi mak, latemanin ni e labiteni mi xil mun tang labit, “!Ei termali, xir mol-Isrel xil ratapus ti mu neta tova vamak!”^k

³⁴ E Farasi xil labit, “Moletin ak nggur xeihen nan nggo Temat tangan vahol rerat ninin tesa xil vengan Temat be suv nae.”^l

Iesu ien misae e moletin xil e misis tangan Hi isa moletin lihe holu mu mei lipol itel xil

³⁵ Dutou ni ngan ak, Iesu mikakao mikapis e taon e metimal xil vus mun e rute ak. Melele xa be rute tei, xi pispisi mi moletin xil e *nim te pispisienna* Siu xil, di bithiten longeongen hos xa Hi mei ihe suv toto na moletin xil, e di midal rerat mesien ra moletin xil vus xa lamesei.^m ³⁶ Melele xa xi pus tatit moletin xil ak xa labe holu pupu, xi polu ni esaenⁿ ³⁷ Misak ni, xi biteni mi moletin nan xil bit, “Anien holu temetu di tuei e naho,^o e moletin xil te polien labe vuteili tang tangan ha lalehi vamei. ³⁸ Ma musis Suv te naho tangan isa ti moletin xil te polien lihe holu mu mei lileh anien xa di naho nan.”^p

Iesu misil lelen moletin nan xil xa labe lu e le tei (12) tangan ha lipol

Mak 3:13-19; Mat 6:7-13;

Luk 6:12-16; 9:1-6

10 Iesu mikes viton *moletin nan xil* xa labe lu e le tei (12). Melele xa lamei visali, misa xeihen mi xil tangan likila lihol rerat *ninin tesa* xil e lital rerat mesien ihe reling ngan xil xa lamesei ni mesien savsav xil.^q

² E ngan ak be his na *eloheoh* xil xa labe lu e le tei (12) na Iesu:^r

Ngan xa diamu, Saemon (xa hisen tei mun be Pita)

e Andru (xa tuneli Pita).

Temis (nat Sepeti)

e Sion (xa tuneli Temis).

³ Pilip,

Batalomiu,

Tomas,

Matiu (xa teleh *takis*),

Temis (nat Alveas),

e Tatios.

⁴ Saemon (xa temos e vanut moletin tei

xa iexil bei pupu tangan lameluv ra he mol-Rom xil),

e Sudas Eskariot (xa tesa rat Iesu tehe he moletin tesa xil).^s

⁵ Moletin lu e le tei (12) nen ak, Iesu misil lelen xil tangan ha lipol itel xat sepinien ak xa bit, “Xamim munava ti visal ngan xil xa latave Siu ti, mu ngan xil xa ladi taon xil na mol-Sameria xil.

⁶ Muha visal mol-Isrel xil kestang xa langgoni sipsip xil xa lakesae.^t ⁷ E melele xa di muba, muhithiten longeongen hos ak mi xil muhit, ‘!Hi di bemei tangan mei vahe suv toto na moletin xil!’ ⁸ Muleh

^j9:32 Mat 12:22; Mak 7:32,35; 9:17,25; Luk 11:14 ^k9:33 Mak 2:12 ^l9:34 Mat 12:24; Mak 3:22; Luk 11:15 ^m9:35 Mat 4:23; Mak 1:39; Mat 10:1; Mak 1:34; Luk 7:21 ⁿ9:36 Mat 14:14; 15:32; Mak 6:34; 1King 22:17; 2Kron 18:16; Esek 34:5; Sak 10:2; Mak 6:34 ^o9:37 Sion 4:35 ^p9:38 Luk 10:2
^q10:1 Mak 6:7; Luk 9:1 ^r10:2 Sion 1:40-51 ^s10:4 Mat 26:25; 27:3; Mak 14:44; Sion 6:64; 12:4; 13:11; 18:2,5 ^t10:6 Ser 50:6; Mat 15:24

rerat mesien xil ihe reling moletin xil xa lamesei, e ngan xil xa lamat, mutal rerat xil ra maten. Ngan xil xa langgur mesien **leporsi**, mupol ni hilbexil mei imese rilo-mun, e muhol rerat ninin tesa ihe reling moletin xil. E melele xa ti mututou ni moletin xil, xil linaxal xamim ti, vengan xa holesok xil vus xa xamim mungguri, mutaxale ti ra Hi. ⁹E kakaoen namim, munahur ti **mani** ¹⁰mu ateli. Munahur ti mun eising, sandel mu eitingil. Nabiteni mak vengan xa momal tangan moletin te polien xil lianien ixo he ngan xil xa lapol mi xil.^u

¹¹“Melele xa mumei e taon mu metimal tei, mukamet moletin tei xa momal pe met Hi tangan vahur pilei xamim. Muti kat mutit tim san ituxoh melele xa muhe reling rute ak. ¹²E melele xa muba tangan muti e tim tei, itiamu, musa tuxolxatien tei mi ngan xil xa ladi en muhit, “Tomat na Hi iti mi xamim.”^v ¹³Xosxa moletin xil te tim ak lamal pe met Hi, ma mupus kila xa tomat namim iti mi xil. E xosxa xil mupus kila xa latamal ti pe met Hi, ma tomat namim itilomun imei mi xamim, e muhe reling xil. ¹⁴E xosxa moletin tovuol xa ien vahei tangan vahur pilei xamim mu valong sepinien namim, muhe reling xil. E melele xa mumea ra tim sae mu taon nae, muhas rerat meas te rute ak ra lemim pe met xil. Ngan ak ipisen ni mi xil xa lapol misa pe met Hi.^w ¹⁵Reitin mak nabiteni mi xamim, e Melengien te Lepisien, pangasien xa Hi isa ni mi moletin xil xa ladi e taon ak ixeh mak mu ili ngan xa isa ni mi ngan xil xa lateti e taon te hal **Sodom e Komorah** tetiamu.”^x

Iesu misel xat moletin nan xil bit melengien xil te xeih di bemei

Mak 13:9-13; Luk 21:12-17; 12:2-9; 12:51-53; 14:26-27; Mak 9:41

¹⁶Iesu misel xat moletin nan xil bit, “!Muteong ni nou! Inou di nasil lelen xamim tangan muha e muxoni sipsip xil xa di mube hilaep te kuli reran xil.^y Ma xamim muxouxou kuhi tangan sexien namim imese kuhi. ¹⁷Reitin, muxouxou kuhi ve xamim vengan xa vat xil na Siu xil lital xat xamim e liling xamim musoh e von lepisien nae. E xil limeas pangas xamim ni ao te xeih xil e **nim te pispisiennae** xil.^z ¹⁸E vengan xa di munggusil xat nou, lipol ni xamim ha musoh pe met vat xil te kavmen, e pe met suv toto xil mun. Imak, ma mukila muhithiten longeongen hos mi xil e mi ngan xil mun xa latave Siu ti. ¹⁹E melele xa xil lital xat xamim, munanexo ti ve naha xa ti muviteni mi xil mu ti musa sepinien mi xil itep. Vengan xa, e melele nen ak, Ninin Eo iaxa isa naha xa mukila muhithiteni.^a ²⁰Reitin, nave xamim ti xa ti musepin, e ihe **Ninin Eo** na Tamemim iaxa isepin ixo xamim.

²¹“Moletin xil limaen tuexil tangan ha lihas vin xil, e tata xil mun ti lipol ni imak tang mi horamue nae xil. E horamue xil mun lihiles ni tamexil e ninexil mun, e limaen xil lihe he ngan xil xa lihas vin xil.^b ²²Moletin xil vus iexil iat xamim vengan di munggusil xat nou.^c E xamim xa musoh ixeh ituxoh hoxalite te sakpurunien xil ak, ma Hi iteh meulien e xamim. ²³Melele xa moletin xil ti lipurun xamim e metimal tei, ha mulesae muhe metimal sav. Reitin mak nabiteni

^u10:10 Nam 18:31; Luk 10:4,7; 1Kor 9:14; 1Tim 5:18 ^v10:12 Luk 10:5-6

^w10:14 Luk 10:10-12; Pol 13:51 ^x10:15 Mat 11:24; Luk 10:12; Sen 18:20-19:28; 2Pit 2:6; Siud 7 ^y10:16 Luk 10:3; Sion 10:12; Pol 20:29; Rom 16:19

^z10:17 Mak 13:9; Luk 21:12-13; Mat 24:14 ^a10:19 Mak 13:11-13; Luk 12:11-12; Luk 21:14-19 ^b10:21 Maek 7:6 ^c10:22 Mat 24:9; 24:13

mi xamim xa munahe taon xil vus ti mu te hal Isrel, e Nat Moletin itilomun imei.^d

²⁴“Moletin tei xa nggur pispisien nggo titsa tei, xi nanemi ti nahit xi be eilep mak mu mili titsa nan. E suse nen ak, slev tei nanemi ti nahit xi be eilep mak mu mili suv nan.”^e ²⁵Ma xamim xa di munggur pispisien xil navan, muhesi xamim tangan mumei muxoni inou, titsa namim. Reitin, xamim xa munggoni slev navan, mumaal tangan mei muxoni nou, suv namim. E xosxa lakes inou, suv namim, ni ‘Belsepul,’[†] his tei xa misa, ma mukila xa likes xamim ni his xil mun xa isa mak mu vengan xa mube navan.

²⁶“Misak ni, ulimim nakan ni xil ti. Holesok xil xa moletin tei bit vakutaxole, Hi isak ni mei iti kesao. Reitin, neta ngan xa miling xusus ni, Hi ileh rerati imei e valkesao tangan moletin xil lipus kila.^f

²⁷Holesok xil xa inou di nabiteni mi xamim melele xa ut maluxoluk, xamim ti muhit lelen ni mi moletin xil e miehen. E neta xa di nabit xusus ni mi xamim, ha muhithiteni pe met moletin xil holu.

²⁸“Ulimim nakan ni ngan xil ti xa lak-ila lavas vin tiei namim e lasakras lavas vin ninin namim. Ulimim ikan ni Hi keatang, vengan xa xi mikila ihas vin moletin tei, e nggo xeihen mun tangan iso ninin nan mun^g ihe Upang xa misakras vamat. ²⁹Munem usil tutut tuman xil ak. Mukila muxal lu ni mani tei xa be hokorong tang. E xosxa Hi Tamemim namaen ni ti, ma ti e xil misakras vamat vamat. ³⁰E xamim, Hi buli sen hilumim xil vus xa di e vatummim.^h ³¹Misak ni, ulimim nakan ti vengan xa, pe met Hi, meulien

namim be eilep mak mu mili meulien na tutut tuman xil ak.ⁱ

³²“Moletin xa bit rati xa xi be moletin navan pe met moletin sav xil, ma inou mun, nihit rati xa xi be moletin navan pe met Tata navan xa de ut nesao.^j ³³E ngan xa di bit rati pe met moletin xil xa xi misin nou, inou mun, nihit rati pe met Tata navan xa de ut nesao xa nasin moletin ak.^k

³⁴“Munanemi ti munahit inou namei tangan niling tomat e ut etan. E-e. Natamei ti tangan niling tomat, e namei tangan nisak ni moletin xil ti livae mi xil mun tang. ³⁵Ngoni ngan taxa Vanuvei Eo na Hi di biteni, inou namei tangan nisak ni ...

‘tiramue xil lihiles livae itel tamexil, atuli xil lihiles livae itel ninexil, e havnahin xil lihiles livae itel avu sasa atou nae xil.

³⁶*Reitin, moletin ihe elu mi ngan xil xa ladi vituei dela e tim san xati.’ (Maek 7:6)*

³⁷“Ngan xil xa eheien nae di e tamexil mu ninexil mak mu mili nou, ma latapin ti tangan mei lave moletin navan xil. E ngan xil xa eheien nae di e horamue mu atuli nae xil mak mu mili nou, ma xil mun latapin ti tangan mei lave moletin navan xil. ³⁸Ngan xil xa latapo eivave te longpangasien nae ti tangan lavusil xat nou, xil latapin ti tangan mei lave moletin navan xil.^l ³⁹Ngan xil xa di lasak pisi tangan lakenin meulien nae ve xil tang, ma meulien nae ikesae reling xil. E ngan xil xa ti limaen meulien nae ikesae vengan di langgusil xat nou, ma, e ut nesao, xil likamet meulien sal.^m

[†]**10:25** ‘Belsepul’ be his tei te xaren xa Siu xil di lakes Temat ni, xa koute teni be ‘Suv na angelu xil.’

^d**10:23** Mat 16:27-28; 24:27,30,37,44; 25:31; 26:64; Mak 13:26; 14:62; Luk 9:26; 17:30; 18:8; 21:27 ^e**10:24** Luk 6:40; Sion 13:16; 15:20 ^f**10:26** Mak 4:22; Luk 8:17 ^g**10:28** Tem 4:12 ^h**10:30** Pol 27:34 ⁱ**10:31** Mat 6:26; 12:12 ^j**10:32** Rev 3:5 ^k**10:33** Mak 8:38; Luk 9:26; 2Tim 2:12 ^l**10:38** Mat 16:24; Mak 8:34; Luk 9:23 ^m**10:39** Mat 16:25; Mak 8:35; Luk 9:24; 17:33; Sion 12:25

⁴⁰“E kakaoen namim, ngan xil xa ti lihur pilei xamim, ixoni ngan taxa ti lihur pilei nou. E ngan xil xa ti lihur pilei nou, ixoni ngan xa ti lihur pilei Tata navan xa misil nou namei.ⁿ ⁴¹Reitin, moletin xa ihur pilei **provet** tei na Hi vengan xa mikila xa be provet tei, Hi isa huite teni mini ixoni ngan xa xi mun be provet tei nan.^o E moletin xa ihur pilei moletin xa momal vengan mikila xi momal pe met Hi, Hi isa huite teni mini ixoni ngan xa xi mun momal pe meten. ⁴²E moletin xa misa tutouen mi moletin tei navan xa be hokorong tang pe met moletin sav xil vengan mikila xi di nggusil xat inou, tave ti neta xosxa be oei te merir tang, reitin li nabiteni mi xamim, e ut nesao, moletin ak ihur sen huite teni.”^p

Iesu misep usil Sion Baptis

Luk 7:18-35

11 Melele xa Iesu misel xat **moletin nan xil** xa labe lu e le tei (12) bus, xi misil rerat xil laba. E xi mun be reling rute ak e ba be taon sav xil e provins te hal Kaleli. E melele xa di mikakao ba, di pispisi mi moletin xil e di bithiten longeongen hos na Hi mi xil.

²E melele nen ak, Sion Baptis teta tamu e nim te xeih.[‡] “Xi milongeong usil holesok xil xa Iesu di pol ni. Ma misil rut moletin nan xil tangan liha visal Iesu e lisis pilei usil polien nan. ³Misak ni, xil lamei visal Iesu e lasisi labit, “Xouk iaxa obe Mesaea xa Hi tehiti xat xa isila imei,^r mu mutatil tova tesav?”

⁴E Iesu bit rilomun ni mi xil bit, “Mutilomun muha e muhiteni mi Sion naha xa di mulonge e di mupusi. ⁵Ngan xil

xa mete tevar, di laketeh; ngan xil xa latesakras lakakao, di lakakao; ngan xil latehur mesien **leporsi**, hilibexil mei bos; ngan xil vurangexil tevon, vurangexil metal; ngan xil latemat, lameul rilomun; e ngan xil xa latehe hoeo di langgur longeongen hos na Hi.^s ⁶E Hi ituxol xat ngan xil xa tine nasoh ti ve pispisien mu sexien xil navan.”^t

⁷Melele xa moletin xil na Sion Baptis di laba, Iesu misep usili mi vanut moletin xil bit, “Melele xa mutehe uruvuol tangan mupus Sion Baptis,^u mutenemi mutehit ti mupus hisit moletin eah? Muteha tangan mupus moletin tei xa taxeih ti nggoni husmunae tei xa teviei xa misakras vasomal melele xa votiang di buhi? E-e. ⁸?Ma muteha tangan mupus naha? Moletin tova xa mising ni eising xil xa bos pupu? E-e. Vengan xa moletin xil xa di lasing mak ladi e nim xil xa mahulong ma suv toto xil. ⁹?Muhiteni minou, muteha tangan mupus naha vari? **Provet** tova? !Reitin! Nabiteni mi xamim xa moletin ak be eilep mak mu mili provet sav xil.^v ¹⁰Vengan Sion be xi xa Vanuvei Eo na Hi di misep usili bit,

‘Upusi. Inou nisil eloheoh navan itiamu ni xouk.

Xi iaxa iha tangan isak mesen suse ve meien nam.’ (Mal 3:1)^w

¹¹“Reitin li nabiteni mi xamim, moletin sav tovuol xa latepesi e ut etan xa be eilep mak mu mili Sion. E xosxa moletin votei tei imaen Hi te ut nesao mei ihe suv toto nan, ma xi ihe eilep mak mu ili Sion pe met Hi. ¹²E melele xa Sion di tehithiten sepinien na

[‡]**11:2** Suv toto Herod miso Sion be nim te xeih e Mat 4:12.

ⁿ**10:40** Mat 18:5; Mak 9:37; Luk 10:16; Sion 12:44; 13:20; Kal 4:14

^o**10:41** 1King 17:9-24; 2King 4:8-37 ^p**10:42** Mak 9:41 ^q**11:2** Mat 14:3

^r**11:3** Mal 3:1; Mat 3:11; Sion 1:15,27; 6:14; Pol 19:4; Hib 10:37; Rev 1:4,8

^s**11:5** Aes 35:5-6; 42:18; 61:1 ^t**11:6** Rev 3:21; 12:11; 14:12 ^u**11:7** Mat 3:5

^v**11:9** Mat 14:5; 21:26; Luk 1:76 ^w**11:10** Mak 1:2; Luk 1:76; 7:27; Sion 3:28

Hi duxoh xosali, Hi di pol nggeih tangan vasak ni haxot te lelatiatien nan mei vahe eilep mu, e ngan xil xa nenemien nae nggeih di lamos en.^x ¹³ Vengan xa tisen xil na provet xil vus tetiamu tetel **rae xil na Mosis** teha tetuxoh Sion latesep usil melele xa Hi mei ihe suv toto na moletin xil. ¹⁴ E xosxa xamim mubesi xamim tangan muke reitin en, ma Sion be **Ilaetsa** xa Hi tehit xati tehit isila imei.^y ¹⁵ Xosxa vurangemim di, muteong kuhi ni naha xa di nabiteni.^z

¹⁶ “?Xamim, moletin xil te xosali, munggoni naha? Xamim munggoni tutut horamue xil xa di ladotan sangas ni von posen e di lake xat xil mun tang labit,

¹⁷ ‘Melele xa xamem di mapol ni nggoni ngan xa di mabas kitar e sien, iemim ti tavei tangan muvol vatel xamem.

E melele xa di mapol ni nggoni ngan xa di madang, iemim ti tavei tangan mutang vatel xamem.’

¹⁸ Xamim munggoni tutut xil ak vengan xa iemim ti tavei nou mu Sion mun. Melele xa Sion Baptis bemei, xi di bal ni anien ve sisen e tamu ti uaen, e xamim iemim ti tavei mubit, ‘!Sion, ninin tesa tei da en!’^a ¹⁹ Di, melele xa inou, Nat Moletin, namei, nangganien e namu uaen. E xamim iemim ti tavei nou mubit, ‘!Pus ti moletin ak! Xi di ngga vin xi ni anien e di mumun tova tang. E xi di mikes moletin xil te **takis** e moletin tesa sav xil ni timue.’^b E sexien nar kekes ipisen ni xa visi e xir di nggusil metisouen na Hi.”

Iesu misepin nggeih xat moletin xil xa lasin ni

Luk 10:13-15

²⁰ Di, Iesu misepin nggeih xat moletin xil te taon xil xa xi teha tepol ni merekel xil holu en. Vengan neta sav xa latepusi, latnaviles ti ra sexien tesa xil nae. ²¹ Xi biteni bit, “!Aue li! !Isa pupu mi xamim, Siu xil te hal Korasin! !E isa pupu mun mi xamim, Siu xil te hal Betsaeta! Vengan xamim mutesin merekel xil xa natepol ni pe metemim, Hi isa pangasien ihe holu mi xamim. Vengan xa vahit moletin xil te hal Taer e Saedon^c ²² Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ix-eih mak mu ili ngan xa isa ni mi ngan xil xa lateti e taon xalu te hal Taer e Saedon. ²³ ?E xamim, Siu xil te hal Kapaniam, munemi xa Hi ipet rat xamim muhe ut nesao? !E-e! !Xi iso xamim muhe etan e Upang xa misakras vamat! Vengan xa vahit moletin xil te hal **Sodom**^d lapus merekel xil vaxoni ngan xa natepol ni tetel xeihen pe metemim, taon ak vata tang vatuxoh xosali. ²⁴ Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ix-eih mak mu ili ngan xa isa ni mi ngan xil xa lateti e taon te hal Sodom ili xamim.”^e

Iesu misa memesien mi Hi ve movotei xil xa laneket en

Luk 10:21-22

²⁵ E melele nen ak, Iesu misis bit, “Tata, xouk obe Suv te ut nesao e ut etan. Namesuk holu vengan xa di oling xuxus ni holesok xil ak ra ngan xil xa labe metisou e lakilakil kuhi. E di ipisen koute

^x11:12 Luk 16:16 ^y11:14 Mal 4:5; Mat 17:10-13; Mak 9:11-13; Luk 1:17; Sion 1:21 ^z11:15 Mat 13:9,43; Mak 4:9,23; Luk 8:8; 14:35; Rev 2:7; 13:9

^a11:18 Mat 3:4; 9:14 ^b11:19 Mat 9:14; 9:11; Luk 15:1-2; 19:7

^c11:21 Aes 23:1-8; Soel 3:4-8; Amos 1:9-10; Sak 9:2-4; Esta 4:1; Rev 18:19

^d11:23 Sen 19:24-28; 2Pit 2:6; Siud 1:7 ^e11:24 Mat 10:15; Luk 10:12

teni mi ngan xil xa langgoni tutut horamue xil xa latasukul kuhi ti.^f 26 Tata, ngan ak be reitin vengan xa nggusil naha xa xouk iem bei tangan vastal. Reitin.”

27 Di, Iesu misepin mi moletin xil bit, “Tata navan miling holesok xil vus di e heok.^g

28 “Mumei visal nou, xamim xa di mulong pangas xamim ve holesok xil xa meas xa di mupoe e meulien namim, e inou nisa ngengelen mi xamim.^h 29 Mu-teong ni nou e muhusil xat nou, vengan xa inou nabe hanmerou e nenemien navan be tan. Imak, ma mukamet ngengelen e meulien namim. 30 Ve pispisien navan xil taxeih ti e holesok xil xa nilingi e xamim tangan mupol ni memeit tang.”ⁱ

Iesu pispisi usil Sabat

Mak 2:23–3:6; Luk 6:1–11

12 Vatei, e *Sabat*, Iesu e *moletin nan xil* di lakakao langgur xoteh naho tei te *uit*. E melele xa di lakakao laba, moletin nan xil, mae nggat xil, ma laki xoteh utut uit xil e di langga ni.^j 2 E melele xa *Farasi* xil lapusi, lasepin mi Iesu labit, “Pus ti mu. Naha xa moletin nam xil di lapol ni di langgur xoteh *rae na Mosis* usil Sabat.”^k

3 E Iesu bit rilomun ni mi xil bit, “?Midep? ?Xamim mutavuli ti naha xa suv toto *Deved* e moletin nan xil latepol ni melele xa mae teat xil?^l 4 Deved tehe vangit Nim Tavolin na Hi e tehur beret eo xa *pris* xil kestang lakila lava ni. E Deved del moletin nan xil latea beret ak, neta sav xa latehur xoteh rae tei na Mo-

sis.^m 5 ?Midep? ?E ut sav, mutavuli ti xa e Sabat xil vus, pris xil xa di lapol e *Nim Eo* di langgur xoteh *rae na Mosis* usil Sabat, e pe met Hi, latapol ni ti tesaen?ⁿ 6 E xosali, moletin tei mistal xa be eilep mak mu mili Nim Eo na Hi.^o 7 Vanuvei Eo na Hi di biteni bit, ‘*Teok ti tavei sanien eo namim xil kestang, e ieok bei mak mu tangan iemim isae e moletin sav xil.*’ (Hos 6:6) Xosxa mukil koute te sepinien ak, ma munasa ti sepinien te xeih ak mi ngan xil xa latapol ni ti neta vasa. 8 Moletin navan xil latapol ni ti neta vasa vengan xa xil di langgusil xat nou, Nat Moletin. E inou nabe eilep mak mu nali Sabat.”

9 Di, Iesu e moletin nan xil labe reling rute ak e labe *nim te pispisienna* Farasi xil ak. 10 E moletin tei xa hen mikavui da. E rut moletin xil mun ladi xa iexil bei tangan liso sepinien tova iha xat Iesu ve neta ngan. Misak ni, xil lasisi labit, “Hiteni mi xamem. ?Rae xil na Mosis maen ni tangan lapol ni moletin tei mei bos rilomun e Sabat?”^p

11 Iesu bit rilomun ni mi xil bit, “?Midep? ?Xosxa tei e xamim, sipsip tei san mot be vul e Sabat, ma ipol ni naha mini? Xi ha ipo rati ra vul ak.^q 12 E moletin tei bos mak mu mili sipsip tei. Ma rae nar xil maen xir ti ripol ni sexien hos xil e Sabat.”^r

13 Di, xi biteni mi moletin xa hen mikavui bit, “Te momal ni hem.” Ma melele xa miso hen momal, mei bos rilomun nggoni hen tei mun tesav.

14 E Farasi xil lastal e di lasep ves suse tova tangan lihas vin Iesu ixo en.^s

^f11:25 1Kor 1:26-29 ^g11:27 Mat 28:18; Sion 3:35; 13:3; 17:2; Plp 2:9; Sion 1:18;

10:15 ^h11:28 Hib 4:1,10-11 ⁱ11:30 1Sion 5:3 ^j12:1 Dut 23:24-25

^k12:2 Eks 20:10; Dut 5:14 ^l12:3 1Saml 21:1-6 ^m12:4 Lev 24:5-8; 24:9

ⁿ12:5 Nam 28:9-10 ^o12:6 Mat 12:41-42; Luk 11:31-32

^p12:10 Luk 14:3 ^q12:11 Luk 14:5 ^r12:12 Mat 6:26; 10:31; Luk 12:7,24; 13:16;

Sion 5:9; 7:23; 9:14 ^s12:14 Mat 27:1; Mak 11:18; Luk 19:47; Sion 5:16,18

**Iesu pisen ni xa xi iaxa be
moletin te polien xa Hi tehosei**

¹⁵ E Iesu mikila xa Farasi xil ak iexil bei tangan lihas vini, ma xi be reling rute ak. E tatit moletin xil holu langgusil Iesu e xi midal rerat mesien ra ngan xil vus xa lamesei.^t ¹⁶ E melele xa di pol ni, di misep xol xil tangan linavit ti mi moletin sav usil naha xa xi di tepol ni mi xil.^u ¹⁷ E holesok xil ak testal tangan vasak ni naha xa Hi tesep lelen ni texo **provet** Ae-sea mei ihe reitin xa tehit,

¹⁸ “Ngan ak be moletin te polien navan xa natehosei,

eheien navan di en e nabesi nou ven.

Nise xati ni Ninin navan,

e xi ihithiteni mi moletin xil te ut etan xa latave Siu ti xa Hi ipol ni naha xa momal mi xil.

¹⁹ *Xi nangor ti natel mosav xil e nameun votei ti.*

Io, moletin ti nalong raen nave nesao usil suse xil.

²⁰ *Ve esaeen nan di e ngan xil xa lataxeih ti,*

xi napol ni ti neta naxeih mi xil.

E ngan xil xa lamerou tang,

xi napangei xil ti.

Xi ipol ni imak ituxoh

melele xa isak ni sexien xil xa momal pe meten mei ili sexien xil xa tamal ti.

²¹ *E moletin xil te ut etan*

mei liling nenesien nae e hisen.” (Aes 42:1-4)

Farasi xil Lakes Iesu ni Temat

Mak 3:20-30; Luk 11:14-23; 6:43-45

²² Di, rut moletin xil ladel moletin tei bemei visal Iesu. Moletin ak, meten bar

e misakras vasepin vengan ninin tesa tei da en. Ma Iesu misak ni moletin ak mei miketeh e misepin rilomun.^v ²³ Ngan xil xa lapusi, latemanin ni labit, “?Midep? ?Moletin ak be ngan xa istal ixo vatimol na suv toto Deved xa Hi tehiti xati tangan isa ni imei?”

²⁴ E melele xa Farasi xil lalong sepinien na moletin xil ak, labiteni mi xil labit, “!E-e! Moletin ak mikila vahol rerat ninin tesa xil tang vengan di pol del xeihen xa Belsepul,^f suv toto na ninin tesa xil, di misa ni mini.”^w

²⁵ E Iesu mikil nenemien nae, ma biteni mi xil bit, “Xosxa moletin xil na suv toto tei di labae mi xil mun tang, ma xeihen na suv toto ak mei ihe neta sav tang. E xosxa moletin xil xa ladi vituei e metimal mu vatimol tei di labae mi xil mun tang, ma his metimal mu vatimol ak ikesae. ²⁶ Ma xosxa Belsepul di minggol rerat ninin tesa nan xil, ma xi di bae mi xi mun tang. Xosxa imak, ma xeihen te lelaxatien nan ilesae relingi. ²⁷ ?E xosxa Belsepul di misa xeihen minou tangan nahol rerat ninin tesa nan xil, ma midep mi moletin namim xil? ?Xil langgol rerat ninin tesa xil ra moletin xil del xeihen na visi? Xil iaxa di lapisen ni xa neta xa di musep usili tamal ti. ²⁸ E xosxa inou di nanggol rerat ninin tesa xil ra moletin xil nggo xeihen xa Ninin na Hi di misa ni minou, ma ngan ak di pisen ni xa relaxatien na Hi xa be suv toto di mistal tuei mi xamim.^x

²⁹ “Nihit kila mi xamim ixo vole tei. Moletin tei misakras vahe nim ma silixin tei tangan vakan ni holesok nan xil melele xa xi da tamu e tim san. Itiamu,

^f12:24 ‘Belsepul’ be his tei xa Siu xil di lakes Temat ni, xa koute teni be ‘Suv na angelu xil.’

^t12:15 Mak 3:7-10; Luk 6:17-19 ^u12:16 Mat 8:4; 9:30; Mak 3:12; 5:43; 7:36

^v12:22 Mat 9:32-33 ^w12:24 Mat 9:34 ^x12:28 Pol 10:38

ha ivar xat silixin ak. Ti, ikila ihe nim man e ileh vuol ni holesok nan xil vus.[§]

³⁰“Ngan xil xa latamos ti vatel nou, xil di labae del nou.^y E ngan xil xa latatutou ni nou ti tengan maleh viton moletin xil vaxoni sipsip xil, xil di langgol rerat xil e di laloh tetasil.³¹ E nabiteni mi xamim, Hi mikila vaketeh vama rilomun mi ngan xil xa lapol ni hisit *tesaen* savsav xil mu lasep purun his Hi mu his moletin sav.^z E moletin xa misep purun his Ninin Eo, Hi misakras vaketeh vahos rilomun mini.³² Reitin, ngan xil xa di lasepin misa minou, Nat Moletin, Hi mikila vaketeh vahos rilomun mi xil. E ngan xil xa lasepin misa mi *Ninin Eo*, Hi naketeh ti navos rilomun mi xil, xosali mu melele xa ti imei.^{**}

³³“Xosxa vatiei tei bos, ma huite teni mun ihos. E xosxa vatiei tei misa, ma huite teni mun isa. Huiei iaxa di pisen ni xa vatiei tei bos mu misa.^a ³⁴!E xamim munggoni vanut tetal sasa xil xa di langas vin moletin xil ni vulongexil!^b ?Xamim mukila musep usil holesok xil xa bos itep? !Musakras! Vengan xa moletin xil di lasep usil naha xa di e iexil, e xamim mube moletin tesa xil.³⁵ Moletin hos tei, ien polu ni nenemien hos xil, ma di misepin usil holesok xil xa bos. E moletin tesa tei, ien polu ni nenemien tesa xil, ma xi di misepin usil holesok xil xa misa.^c ³⁶Nabiteni mi xamim, e Melengien te Lepisien, Hi ilepis sepinien talang namim xil vus xa di muso ni, e isa pangasien mi xamim ven.³⁷ Reitin, itel sepinien namim xil tang, Hi ipus kila xa

mumal mu mukavui, e isa naha xa imal mi xamim vus ihusili.”

Titsa xil te rae na Mosis del Farasi xil lasis Iesu tengan vapol ni neta tova xa eilep tengan like reitin en

Luk 11:24-26,29-32

³⁸Di, rut *titsa* xil te rae na Mosis del Farasi xil mun lamei visal Iesu e labiteni mini labit, “Titsa, iemem bei tengan upol ni neta tova xa eilep tengan mapus kila xa be reitin xa xouk onngo visal Hi.”^d

³⁹E Iesu bit rilomun ni mi xil bit, “Xamim, moletin xil te xosali ak, mukavui e mustokovein Hi nggoni atou xa mistokovein tiramue xati nan tengan vahur tiramue sav tova. Ve rin ak, iemim bei tengan mupus neta tova xa eilep tengan muke reitin xa natexo visal Hi namei. E ninapol ni ti neta xa eilep ve xamim. Mupus neta tei takes xa ixoni ngan xa testal mi provet *Siona* tetiamu.^e

⁴⁰Vengan provet Siona tete vang meseo melengien e vongien tol (3).^f Nggusil sexien nen tak, inou mun, Nat Moletin, nite pe huitan te maten melengien e vongien ihe tol (3). ⁴¹E Melengien te Lepisien, mol-Nineva xil lisoh e lisepin iha xat sexien na moletin xil te xosali. Reitin, xil lisepin iha xat xamim vengan xa melele xa xil latehe elu mi Siu xil, latelong sepinien na Hi xa provet Siona tehithiteni mi xil, xil latehiles ra sexien tesa nae xil. E xosali, tei xa be eilep mak mu mili Siona dak ngamu.^g ⁴²Reitin, e Melengien te Lepisien, suv toto te hal Seba tetiamu xa tehe atou, xi isoh e

§12:29 E vole ak, Iesu be moletin xa be nim ma Temat tengan vavar xati. Ve rin ak, xi mikila vahol rerat ninin tesa nan xil e di midal rat moletin xi ra mesien nae xil.

**12:32 Iesu di misepin mak vengan xi di pol nggo xeihen na Ninin Eo, e Farasi xil labilesi labit xeihen nan nggo Temat.

^y12:30 Mak 9:40; Luk 9:50 ^z12:31 1Tim 1:13 ^a12:33 Mat 7:16-20

^b12:34 Mat 3:7; 23:33; Luk 3:7 ^c12:35 Mat 15:18; Mak 7:21

^d12:38 Mat 16:1; Mak 8:11; Luk 11:16; Sion 6:30; 1Kor 1:22

^e12:39 Mat 16:4 ^f12:40 Siona 1:17 ^g12:41 Siona 3:5,8

isepin iha xat moletin xil te xosali. Vengan xi texo sotin pupu tetengan mei valong metisouen na suv toto **Solomon**.^h E xosali, tei xa be eilep mak mu mili Solomon dak ngamu.

⁴³ “Melele xa **ninin tesa** tei be reling moletin tei ba, di mikapis e uruvuol tetengan vakamet ut tova xa bos te ngenge-len. E melele xa takameti, ⁴⁴ ihiteni mi xi mun tang ihit, ‘Nitolomun nihe nim mavan xa natehe relingi natemei.’ E melele xa itilomun imei, ma ikameti xa ladaveas tui e nim ak, laling pilei holesok xil, e ninin tesav tovuol en. ⁴⁵ Isak ni, xi iha e ileh **ninin** lu e he sav (7) xa lasa mak mu lali xi. E xil lihe nim, ha liti en. Nim ak be moletin tei, e lisak ni meulien na moletin ak isa mak mu ili ngan xa teti en tetiamu.ⁱ Ngan istal mi xamim, moletin tesa xil te xosali ak.”

Iesu bit lelen ni xa visi iaxa be ninen e tuneli xil

Mak 3:31-35; Luk 8:19-21

⁴⁶ Melele xa Iesu di tamu misepin mi vanut moletin xa mahulong xiak, ninen e tuneli xil lamei.^j Lamei lasoh ladi nga e hale e labit lisepin mini. ⁴⁷ Ma moletin tei bemei visal Iesu e bit mesen ni mini bit, “Ninom e tumali xil lasoh ladi nga hale iaxor, e labit lasepin minuk.”

⁴⁸ E Iesu bit rilomun ni mini bit, “?Visi iaxa be nana navan? ?Visi iaxa be tua navan xil?” ⁴⁹ Di, miti mikapis e moletin nan xil e biteni bit, “?Mupusi? Ngan xil ak labe nana navan xil e tua navan xil. ⁵⁰ Vengan ngan xil xa di lapol ni naha xa Tata navan xa de ut nesao ien bei tetengan ti lipol ni, xil iaxa labe nana navan xil, tuxoli xil, e hinoxoli xil mun.”

Iesu pispisi usil rin xa Hi mei ihe suv toto na moletin nan xil

Iesu dei vole tei usil utiei xil xa di meul e hisit tan sav xil

Mak 4:1-20; Luk 8:4-15

13 E melengien nen tak, Iesu be reling nim ak e ba dotan de seri Oei Kaleli. ² E vengam xa vanut moletin xil labe holu pupu xa di lakapis xole, Iesu but be bot tei e ba dotan da en. E moletin xil lasoh ladi nga ut. ³ Di, xi dei vole xil holu mi xil bit, “!Muteong kuhi! Vatei, moletin tei be naho tetengan vaso utiei en. ⁴ E melele xa miso ni, rut utiei xil lakiri e suse xa tan nen nggeih, e tuman xil mei lada rerati. ⁵ Rut utiei xil lakiri e tan xa hat xil holu di en e tan nen mahin tang. E inggak, utiei xil ak lateh manon vengam xa tan nen mahin. ⁶ E melele xa eai bemei nesao, ngga vin ngan xil xa lateteh, e lameles lamat. Lamat vengam xa amulite xil tave tan pupu ti. ⁷ Rut utiei xil mun lamot e tan xa munae tesa di meul en. E melele xa lateh, munae tesa xil ak lameul xol vin xil. ⁸ E rut utiei xil ak, lamot e tan xa bos. Ma xil lameul bos, e laba ni huite xil. Ngan xil, laba ni huite xil holu; ngan xil mun laba ni huite xil holu mak mu; e ngan tesav xil mun, xil iaxa ladaxao xa ladaxao ni huite xil.^{††} ⁹ !Xosxa vurangemim di, muteong kuhi ni naha xa di nabiteni!”^k

¹⁰ Melele xa Iesu misepin bus, **moletin nan xil** lamei visali e lasisi labit, “?Veneh ma xouk di odei vole xil mi moletin xil?”

¹¹ E Iesu bit rilomun ni mi xil bit, “Xamim iaxa Hi tehosei xamim tetengan mukil kuh koute tei sepinien xuxus usil

^{††} **13:8** Sepinien xati teni bit, “*uit xil ak ladaxao ni huite xa be 30, 60 e 100.*”

^h **12:42** 1King 10:1-10; 2Kron 9:1-12; Mat 12:6 ⁱ **12:45** 2Pit 2:20

^j **12:46** Mat 13:55; Mak 6:3; Sion 2:12; Pol 1:14

^k **13:9** Mat 11:15; 13:43; Mak 4:23; Luk 14:35; Rev 2:7; 13:9

itep iaxa xi mei ihe suv toto na moletin nan xil.¹ E moletin sav xil, Hi tenahosei xil ti tangan lakila.¹² Ngan xil xa lakil kuh koute te sepinien xil ak, ma Hi isak ni xil likilakil pilei mak mu ha vuma ... lipolu ni kilakilen nan. E ngan xil xa latakil ti koute xil teni, ma hokorong xa di langguri, Hi ihur rati ra xil.^m¹³ Inou di nasepin mi xil nggo vole xil tangan, tave ti neta xa di lapus neta ngan, e xil latapus kil ti koute teni. Reitin, tave ti neta xa di lalong neta ngan, e xil lalong kil ti.¹⁴ Sexien nae di misak ni sepinien na provet Aesea tetiamu mei be reitin xa bit,

'Xamim muteong vuma ... e munalong kil ti neta.

Muketeh vuma ... e munapus kil ti neta.

¹⁵ *Tine moletin xil ak xa nggeih mei nggeih pilei sung,
e di laki xol vurangexil e di label xat metexil.*

*Xil lapol ni mak vengan iexil ti tavei tangan lapus kil neta ngan ni metexil,
mu lalong kil neta ngan ni vurangexil.*

*Vengan xosxa linamak ti, ma xil likil kuh koute te sepinien navan,
tinexil mei imerou e lihiles meulien nae,
e inou mei nital rat xil ra mesien nae xil.'*

(Aes 6:9-10)ⁿ

¹⁶ "E tuxolxatien na Hi di tuei e xamim, moletin navan xil, vengan melele xa mupus neta tei ni metemim, mupus kila. E melele xa mulong neta ngan ni vurangemim, mulong kila.^o

¹⁷ Reitin li nabiteni mi xamim, tetiamu, **provet** xil holu e moletin sav xil xa latemal pe met Hi, iexil tehei mak mu tangan lapus naha xa xamim di mupusi xiak, e xil latnapus ti. Io, iexil

tehei tangan lalong naha xa xamim di mulonge xiak, e xil latnalong ti.

¹⁸ "Muteong kuhi ni koute te vole xa natehiteni usil moletin xa milih kon e hisit tan tesav xil.¹⁹ Utut kon ngan xil xa lakiri e suse xa tan nen nggeih, xil langgoni moletin tei xa milong sepinien usil rin xa Hi mei ihe suv toto e meulien na moletin xil. E melele xa milonge, xi talong kil ti koute teni. E Temat mite-manon bemei, nggur rat sepinien xa mot de tinen.²⁰ Utut kon ngan xil xa lakiri e tan xa hat xil holu di en, xil langgoni moletin xa milong sepinien na Hi e, vatei takes, ngguri del sien.²¹ E venggan xa amulite xil te neketen nan tameul ti mu, moletin ak misoh e neketen nan be terume tang. E melele xa sakpurunien xil e melengien te xeih xil bemei ni ve sepinien ak, vatei takes, xi mot e neketen nan.²² E utut kon ngan xil xa lakiri e tan xa munae tesa di meul en, xil langgoni moletin tei xa milong sepinien na Hi e minexo pupu ve holesok xil te ut etan e eheien nan di e mani mak mu holu.^p Ma holesok xil ak lameul xol vin sepinien na Hi xa ngguri, ma tava ni ti huite e meulien nan.²³ E utut kon xil xa lakiri e tan xa bos, xil langgoni moletin xa milong sepinien na Hi e milong kila. E meulien nan, sepinien nen ak ba ni huite. E meulien na rut moletin xil, ba ni huite xil holu; e ngan tesav xil, ba ni huite xil holu mak mu; e ngan tesav xil mun, sepinien ak daxao xa daxao ni huite xil e meulien nae."^{‡‡}

Iesu dei vole usil munae tesa xil

²⁴ E Iesu dei vole tei mun mi vanut moletin xil bit, "Suse xa Hi mei ihe suv toto te meulien na moletin xil ixoni mo-

^{‡‡}**13:23** Sepinien xati teni bit, "... huite xa be 30, 60 e 100."

^l**13:11** 1Kor 4:1; Efes 3:3-4; 6:19; Kol 2:2; 4:3 ^m**13:12** Mat 25:29; Mak 4:25; Luk 8:18; 19:26 ⁿ**13:15** Sion 12:40; Pol 28:26-27 ^o**13:16** Luk 10:23-24

^p**13:22** 1Tim 6:9-10,17

letin tei xa milih utut uit e naho san.
²⁵E melele xa moletin xil vus ba lapat, elu tei na moletin ak bemei e naho san e miso utut munae tesa xil mun ba lamosos del *uit* xil ak. Di, milesae ba. ²⁶Misak ni, melele xa uit xil ak lateh, lameul lamei nesao e langgur vei, munae tesa xil mun lameul vituei tang del xil.

²⁷“Melele xa moletin xil te polien laba tangan lapus naho sa masta nae, lapus kil munae tesa xil en. Ma ladiplomun ba labiteni mini labit, ‘!Masta! ?Midep? ?Utut uit xil xa oteso xil e naho sam latehos mu latesa tang? ?Vengan xosxa latehos, ma munae tesa xil ak latexo xave latemei?’

²⁸“E masta nae bit rilomun ni mi xil bit, ‘!E-e! Elu tei navan iaxa tepol ni.’

“Ma moletin te polien nan xil lasisi labit, ‘?Ma midep? ?Iem bei tangan mava maput rerat munae tesa xil ak?’

²⁹“E masta nae bit rilomun ni mi xil bit, ‘E-e. Muling xil limeul liti nga, maxani mutnaput rerat uit xil xa labos melele xa di muput rerat munae tesa xil ak. ³⁰Muling uit e munae tesa xil tit lalimeul vituei tang ituxoh melele te leh anien en. E melele xa moletin xil ti limei tangan lileh anien, nihiteni mi xil tangan ha lileh rerat munae tesa xil ak itiamu, e livar viton xil lihe vanute xil. Ti, nimeis niso munae tesa xil ak lihe upang.^q Ti, moletin xil ak litilomun ha lileh uit xil e ha liserev kuh xil liti e povah navan.”

**Iesu dei vole lu usil suse xa Hi
 mei ihe suv toto e meulien
 na moletin xil ixo en**

Mak 4:30-34; Luk 13:18-21

³¹E Iesu dei vole tei mun mi vanut moletin xil bit, “Suse xa Hi mei ihe suv toto e meulien na moletin xil ixoni utut *mas-tad* xa moletin tei ngguri e ba milih e

naho nan. ³²Tave ti neta xa utut mastad hokorong mak mu ni utiei sav xil, e melele xa meul, di meul tepiei be nesao ba vuma ... mei mahulong pupu mili holesok sav xil xa di lalih xil e naho. E melele xa matu, xi mei be holie tei xa mahulong xa pipin tangan tuman xil limei lipol ni nunu mae xil e halite xil.”^r

³³Iesu dei vole tei mun tesav mi xil bit, “Suse xa Hi mei ihe suv toto e meulien na moletin xil ixoni is vutei xa atou tei milehi e bilesi del pulaoa xa mahulong. E tave ti neta xa miso is be hokorong tang en, is ak pol ni pulaoa mikaio ba vuma ... mei be mahulong xa mahulong.”^s

³⁴E holesok xil xa Iesu misep usili mi vanut moletin xil, xi di misa ni mi xil nggo vole kestang. Xi tenavit kil ti koute nen mi xil. ³⁵Iesu pol ni mak tangan vasak ni sepinien xa Hi tesa ni mi provet tei mei vahe reitin xa bit,

“Inou nitei vole xil.

*Reitin, nggo vole xil, nihithiten usil holesok
 xil xa di texus*

*e melele xa Hi tepeas ni ut etan, e minggus
 duxoh xosali.” (Sam 78:2)*

**Iesu bit kil koute te vole
 usil munae tesa xil**

³⁶Melele xa Iesu misepin mi vanut moletin xil bus, be reling xil e dilomun be nim xa da en. Moletin nan xil langgusili lamei visali, e lasisi labit, “?Vole usil munae tesa xil, ukila uhit kil koute teni mi xamem?”

³⁷Ma Iesu biteni mi xil bit, “Koute teni mak. Inou, Nat Moletin, nabe moletin xa naso utut uit xa bos. ³⁸Naho ak be ut etan, e utut uit xil xa lameul bos labe moletin xil xa Hi be suv toto nae. E munae tesa xil labe moletin xil xa Temat be suv toto nae.^t ³⁹Elu na moletin xa teso xil be *Temat*. Melele te leh anien en be hox-

^q13:30 Mat 3:12 ^r13:32 Sam 104:12

^t13:38 Sion 8:44; 1Sion 3:10

^s13:33 Luk 13:20-21

alite te melengien xil xa radi en. E moletín xil xa mei lileh anien labe *masxaxa* xil.

⁴⁰ “Nggoni ngan xa laput rerat munae tesa xil e laso xil labe upang,^u lipol ni imak e hoxalite te melengien xil xa radi en. ⁴¹ Reitin, e melele nen ak, inou, Nat Moletín, nisil *masxaxa* navan xil tangan ha lihe ut xil vus xa di nalaxati, e liput rerat ngan xil xa di lapol misa e holesok sav xil mun xa di misak ni moletín xil di lamot e tesaen.^v ⁴² Ti, *masxaxa* xil ha liso moletín tesa xil ak lihe upang xa mahulong, e, e rute ak, xil ti limuis e ti lingas luhexil ve longpangasien nae xil.^w ⁴³ Ti, ngan xil xa lamal pe met Hi, liminehin^x ixoni eai e rute xa Tamexil be suv toto en. !Xosxa vurangemim di, muteong kuhi ni naha xa di nabiteni!”

**Iesu dei vole usil sien na
ngan xil xa lamaen Hi mei
be suv toto e meulien nae**

⁴⁴ Iesu misepin rilomun mi moletín nan xil bit, “?Melele xa Hi mei be suv toto e meulien na moletín tei, ngan ak nggoni naha? Ixoni bokis tei xa holesok holu xa bos di en xa moletín tei teling xuxus ni tete naho tei. Bokis ak da vuma ... moletín sav tei ba mikameti. E melele xa pusi, milonge bos xa bos ven. Ma miling xuxus rilomun ni da ngga. Di, dilomun be tim san e pos ni holesok xil vus nan e mileh mani nen ba nggal rat tan xa bokis ak da en be nan.

⁴⁵ “?Reitin, melele xa Hi mei be suv toto e meulien na moletín tei, ngan ak nggoni naha? Ixoni moletín tei te bisnis xa di milang ves valit vatiei hos xil te tas. ⁴⁶ E melele xa mikamet valit vatiei hos tei te tas xa mani teni mahulong, xi mite-

manin. Ma dilomun be tim san, e pos ni holesok nan xil vus. Di, mileh mani nen e ba nggal valit vatiei te tas ak be nan.

⁴⁷ “?Vatei mun, melele xa Hi mei be suv toto e meulien na moletín tei nggoni naha? Ixoni melele xa laso net tangan laleh meseo xil. Melele xa laso ni be tas, laleh hisit meseo sav xil holu. ⁴⁸ Melele xa net polu ni meseo xil, lalihi be ut. Di, moletín xil te meseo ladotan xorelisi e laso viton kuh meseo xil xa bos labe valeat xil. E meseo xil xa lasa, laso xil laba. ⁴⁹ Imak vari e hoxalite te melengien xil xa radi en. *Masxaxa* xil mei lilepis moletín xil te ut etan ihusil suse nen tak. Xil lileh rerat moletín xil xa lasa ra ngan xil xa lamal pe met Hi, ⁵⁰ e ha liso moletín xil ak lihe upang xa mahulong. E rute ak, xil ti limuis e ti liat luhexil ve longpangasien nae xil.

⁵¹ “?Midep, xamim mukil kuh koute te holesok xil ak, mu ...?”

E moletín nan xil labit rilomun ni mini labit, “Io, makila.”

⁵² Iesu biteni mi xil bit, “Nggusil nenenemien ak, *titsa* xil vus te rae na Mosis xa lamaen Hi mei be suv toto e meulien nae tangan lihusil kuh pispisien nan xil, xil langgoni eilep tei xa holesok nan xil holu. Ma xi mikila ihe nim man e ileh rerat holesok xil xa bos pupu, ngan xil xa be te nousav, e ngan xil mun xa be neta hu.”^{¶¶}

**Iesu ba mi vatimol
nan xati, e xil lasin ni**

Mak 6:1-6; Luk 4:16-30

⁵³ Melele xa Iesu dei vole xil ak bus, xi be reling rute ak ⁵⁴ e ba be Nasaret, metimal xati nan. E rute ak, Iesu be *nim te pispisien*, dotan e di pispisi mi moletín

^{¶¶}13:52 Sepinien nen ak di misep usil pispisien xil te nousav xa di oltestamen, e pispisien hu xil na Iesu xa di e niutestamen.

^u13:40 Mat 3:10; 7:19; Sion 15:6 ^v13:41 Sef 1:3

^w13:42 Mat 13:50; 8:12; 13:50; 22:13; 24:51; 25:30; Luk 13:28 ^x13:43 Dan 12:3

xil. E melele xa lalong pispisien nan xil, latemanin ni e labiteni mi xil mun tang labit, “?Moletin ak nggur kilakilen e xeihen ak nggo xave?^y ⁵⁵?Tave nat moletin ti taxa di tepol ni nim xil tang? Nana nan be Meri. E tuneli xil labe Temis, Sioses, Saemon e Sudas tang. ⁵⁶Hineli xil vus ladi visal xir e rute ak. !Moletin ak be tei e xir tang! ?Mak, ma xi nggur holesok xil ak nggo xave?” ⁵⁷Ve rin ak, moletin xil tine misoh e lanem male ni Iesu.

E Iesu biteni mi xil bit, “Moletin xil vus di lamerere ni provet tei na Hi. E moletin xil te metimal xati nan e vatimol xati nan mun, xil tit lanem male ni.”^z

⁵⁸Misak ni, e rute ak, Iesu tapol ni ti merekel xil vahe holu vengana xa neketen nae tovuol en.

Maten na Sion Baptis

Mak 6:14-29; Luk 9:7-9

14 E melele nen ak, suv toto *Herod* Antipas xa milaxat provins te hal Kaleli milongong ni holesok xil xa Iesu di pol ni. ²Ma Herod biteni mi moletin te polien nan xil bit, “Iesu ak be Sion Baptis vari. Tave ti neta xa xi mat, e temea rilomun ra maten. Ve rin ak iaxa nggur xeihen tengana vapol ni merekel xil.”

³⁻⁴Suv toto Herod Antipas minexo pupu mak vengana xi vari tesa raen tengana moletin te vaeen nan xil ha lital xat Sion, livar xati, e liso ni ihe nim te xeih. Xi tepol ni temak vengana xa Sion tesepepin texeih teha xati tehit, “Herod, sexien nam xil tamal ti vengana oteli del Herodias, atou na tumali Pilip. Naha xa di opol ni nggur xoteh *rae na Hi*.”^a ⁵E tave ti neta xa Herod bit vahasa Sion vamat, xi tenapol ni ti vengana ulin tekana ni ekatena moletin xil vengana xil di latenemi latehit Sion Baptis tehe *provet* tei.^b

⁶Di, vatei, latepol ni anien ve melengien xa latepes suv toto Herod en. E melengien ak, atuli na Herodias tehoh pe met moletin xil vus e tesak ni Herod tehesi xi pupu ven. ⁷Misak ni, xi pol ni hitxatien tei te xeih mi atuli ak xa isa naha vari xa xi ien bei mini. ⁸Ma atuli ak be visal ninen e misepin mini. Di, dilomun ba pus suv toto Herod e biteni mini bit, “Taxeak, ieok bei tengana uhas vin Sion Baptis, uta xoteh vatin, e usa ni minou ite tre tova.”⁹ Melele Herod milongong mak, xi milongong misa pupu. E neta sav xa milongong mak, xi misemae ni moletin nan xil tengana ha lipol ni, vengana ien ti tavei vahur xoteh hitxatien nan pe met moletin xil. ¹⁰Ma moletin te vaeen nan xil labe nim te xeih, e lada xoteh vat Sion ra tiei nan. ¹¹Di, laling vatin de tre tei e lapoe ba lasa ni mi atuli ak. E xi sung, ngguri ba misa ni mi ninen. ¹²Melele xa moletin xil na Sion lalongong ni xa xi mat, lamei e lapo tiei nan, ba ladihin ni. Di, ba labit mesen ni mi Iesu.

Iesu misa anien mi moletin xil xa lali taosen lim (5000)

Mak 6:30-44; Luk 9:10-17; Sion 6:1-14

¹³Melele xa Iesu milongong ni xa Sion mat, xi but be bot del moletin nan xil e labalis labe ri oei e rute xa moletin xil latovuol en. E melele xa moletin xil lalonge, xil langgong taona nae xil e ba langgusili. ¹⁴Ma melele xa Iesu but be reling bot, xi pus vanut moletin xil xa mahulong di ladatili tuei. E melele xa pus xil, ien misae e xil e midal rat ngana xil xa lamesei ra mesien nae xil.^c

¹⁵E melele xa eai minua, *moletin nan xil* lamei visali e labiteni mini labit, “Rute ak be toun ut e da be vongien tuei xiak. Bos xa usil rerat vanut moletin xil

^y13:54 Sion 7:15 ^z13:57 Sion 4:44 ^a14:3-4 Luk 3:19-20; Lev 18:16; 20:21

^b14:5 Mat 11:9; 21:26; Luk 1:76; 7:26 ^c14:14 Mat 9:36; 15:32

ak liha tangan ha lihe metimal xil e lixal ti anien ae.”^d

¹⁶ E Iesu biteni mi moletin nan xil bit, “Rinasil rerat xil ti linaha. Xamim tang musa anien mi xil tangan lia ni.”

¹⁷ E xil labit rilomun ni mini labit, “!Ei! ?Mupol ni itep, vengon xa anien ar tapin ti? Pusi xiak, beret be lim e meseo mun be lu tang.”

¹⁸ Iesu biteni mi xil bit, “Musa ni vamei minou.” ¹⁹ Di, xi biteni mi vanut moletin xil tangan litotan e rute tei xa bos xa husmunae di en. Melele xa ladotan bus, mileh beret lim (5) del meseo lu (2), miketeh be nesao e misa memesien ba mi Hi ven. Di, bul papas beret xil e misa ni mi moletin nan xil tangan liseti beret ak itel meseo mun mi vanut moletin xil. ²⁰ Moletin xil vus langganien kuhi e vange polu. E melele xa moletin xil na Iesu laba mun tangan laleh saxut anien xil, lase ni be valeat lu e le tei (12) ba vuma ... xil vus lapolu.^e

²¹ E melele nen ak, tiramue xil xa langganien duxoh taosen lim (5000). E atou e horamue xil, latavuli xil ti.

Iesu mikakao e ramut oei

Mak 6:45-52; Sion 6:15-21

²² Melele xa langganien bus, Iesu biteni mi moletin nan xil tangan litiamu ni lihe ri Oei Kaleli. E xi kestang ita tangan isil rerat vanut moletin xil lihaha. ²³ Melele xa misil rerat moletin xil bus, xi mika sen tang be nesao e vathu tei tangan ha vasis.^f E inggak Iesu da tasen ba duxoh vongien.

²⁴ E melele nen ak, moletin xil na Iesu ladi e bot nae e Oei Kaleli, sotin ra ut. E xil di lakameti nggeih tangan lavalis

vengan labisu ni votiang tei xa nggeih e tahe xil mun mei di bas bot nae.

²⁵ E makoe roroh, ut taluv pilei ti mu, Iesu bemei visal xil e di mikakao e ramut oei nggoni ngan taxa di mikakao e tan tang. ²⁶ E melele xa moletin nan xil lapusi xa di mikakao e ramut oei, ulixil mikan tova tang e lameun be nesao labit, “!Aue li! !Ninin tei!”^g

²⁷ E vatei takes, Iesu misepin mi xil bit, “!Ulimim nakan ti! !Inou tang! Tinemim namulul ti.”

²⁸ E Pita bit rilomun ni mini bit, “!Suv, xosxa be xouk reitin, usemae ni tangan nikila nikakao e ramut oei e nihah visaluk!”

²⁹ Ma Iesu biteni mini bit, “!Amei!”

Misak ni Pita but reling bot e di mikakao e ramut oei ba ni Iesu. ³⁰ E melele xa Pita pusi xa votiang di bemei nggeih, ulin mikan, ma da merir be tan e oei. Melele xa pusi mak, miki be nesao bit, “!O suv, ututou ni nou li!”

³¹ Vatei takes, Iesu misa hen e dal xati bit, “!Neketen nam hokorong pupu!^h ?Veneh ma otanesi ti e nou?”

³² E melele taxa lube bot, votiang be tan.ⁱ ³³ Melele xa lapusi mak, moletin xil xa ladi e bot lamot mi Iesu e labiteni mini labit, “!O reitin mak, xouk vari iaxa obe Nat Hi!”^j

³⁴ Di, langgur xoteh Oei Kaleli ba vuma ... laduxoh ut e tan te hal Kene-saret. ³⁵ E melele xa moletin xil te rute ak lapus kila xa be Iesu, lasa sepinien ba mikapis rute xil vus xa di sangas. Misak ni, moletin xil holu laleh ngenexil xa di lamesei lamei lapus Iesu. ³⁶ E ladakesi tangan imaen xil lituxol seri eising nan tang.^k E xil vus xa laduxoli, mesien nae be reling xil.

^d14:15 Mat 15:32; Mak 8:3 ^e14:20 2King 4:43-44 ^f14:23 Luk 6:12; 9:28

^g14:26 Luk 24:37 ^h14:31 Mat 8:26 ⁱ14:32 Mak 4:39

^j14:33 Mat 16:16; 26:63; 27:54; Mak 14:61; 15:39; Luk 22:70; Sion 1:49

^k14:36 Mat 9:20-21; Mak 5:27-28; Luk 8:44

**Iesu pispisi usil naha xa misak
ni moletin xil lamease mu
latamese ti pe met Hi**

Mak 7:1-23

15 Vatei, *Farasi* xil e *titsa* xil te rae na Mosis langgo *Serusalem*, lamei visal Iesu e lasisi labit, ²“?Veneh ma moletin nam xil latahusil xat ti sexien xil xa elda nar xil tetiamu latesa ni mi xir? Vengan moletin nam xil di latakas he xil ti mu vamese, ti, lavanien sung.”¹

³Iesu bit rilomun ni mi xil bit, “?E veneh vari xamim di munggur xoteh rae xil na Hi tangan muhusil kuh pispisien namim xil tang? ⁴Vengan Hi biteni bit, ‘*Mumerere ni tamemim e ninemim xil.*’ (*Eks 20:12*)^m ⁵E xamim di mupispisi mi moletin xil xa likila lihiteni mi tamexil e ninexil lihit, ‘Holesok xil navan xa nakila nitutou ni xamil ni, ngan xil ak nasikoe xole ngamu tangan nisa ni mi Hi kestang.’ ⁶Nggo rin ak, di mupispisi mi moletin xil xa linamerere ti mun ni tamexil e ninexil natel holesok nae xil. Ma pispisien namim xil di pol ni sepinien xil na Hi mei be neta sav tang. ⁷!Xamim mumese nggot hilibemim tang! Naha xa Hi tehit lelen ni usil xamim texo provet Aesea momal xa tehit,

⁸*‘Moletin xil ak di lamerere ni nou del sepinien nae xil kestang, e tine di sotin ra nou.*

⁹*Tave ti neta xa di lamot minou, inou nabit ninakil ti.*

Vengan xil di lasa pispisien xil xa be na moletin xil tang, e di labiteni xa inou iaxa ieok bei tangan lihusili.’” (*Aes 29:13*)

¹⁰Di, Iesu biles e mikes vanut moletin xil lamei visali e biteni mi xil bit, “!Muteong kuhi tangan mukila! ¹¹Tave holesok xil ti xa moletin tei ngguri nggo vulongen be tinen iaxa di misak ni mei tamese ti pe met Hi. !E-e, tamak ti! E sepinien xa mistal nggo vulongen iaxa mikila vasak ni moletin ak mei namese ti pe meten.”ⁿ

¹²Melele xa Iesu be reling vanut moletin xil, *moletin nan xil* labiteni mini labit, “?Xouk okila xa Farasi xil tine tesoh melele xa latelong sepinien nam?”

¹³E Iesu bit rilomun ni mi xil bit, “Farasi xil ak langgoni vatiei xil xa Tata navan xa de ut nesao tenalih xil ti. E limei liput rat xil itel lite xil. ¹⁴Mustokovein xil liti nga. Xil labe metevar, e di lasak pisi tangan ti litiamu ni metevar sav xil mun. E xosxa metevar tei di diamu ni metevar tei mun, ma xalu vus lalikiri lalihe vul tei.”^o

¹⁵E Pita biteni mini bit, “Hit kil koute te vole ak mi xamem li.”^p

¹⁶Di, Iesu misis xil bit, “?!Midep, xamim mutakil ti mu!? ¹⁷?Mutakil ti xa holesok xil xa mungga ni nggo vulongomim ba be vangemim tang? Ma di, mistal be reling tiei namim, e ba be tisok tang. ¹⁸E holesok xil xa di tinemim e musepin ni nggo vulongomim, xi vari iaxa di pol ni xamim mutamese ti pe met Hi.^q ¹⁹Vengan melele xa tine moletin tei misa, xi di pol ni hisit sexien tesa xil ak: minem usil holesok xil xa misa, bas vin moletin xil, mikan ni atou na mosav xil, di pat vituei del mosav melele xa lutateli ti mu, di mikan ni neta na mosav xil, di miluvos ni his mosav xil e kot, e di misep purun his mosav xil mun. ²⁰Sexien xil

¹15:2 Luk 11:38 ^m15:4 Dut 5:16; Mat 19:19; Mak 10:19; Luk 18:20; Efes 6:2; Lev 20:9 ⁿ15:11 Mat 12:34 ^o15:14 Mat 23:16,24; Luk 6:39; Rom 2:19

^p15:15 Mat 13:36; Mak 4:10; 7:17; Luk 8:9

^q15:18 Mat 12:34 ^r15:19 Rom 1:29-31; 1Kor 5:10-11; 6:9-10; Kal 5:19-21; Efes 5:3-5; Kol 3:5,8; 1Tim 1:9-10; 2Tim 3:2-4; 1Pit 4:3; Rev 21:8; 22:15

ak di lapol ni moletin xil latamese ti pe met Hi. E xosxa moletin tei takas hen ti mu vamese, ti, vanien sung, ngan ak misakras vapol ni xa moletin tei namese ti.”

**Atou tei xa tave Siu ti
mineket e xeihen na Iesu**

Mak 7:24-30

²¹ Di, Iesu be reling rute ak e ba be rute sav tei xa be sngas ni metimal xalu te hal Taer e Saedon. ²² E *ate-Kenan* tei xa de rute ak bemei visal Iesu e dakesi bit, “!O suv li, xoux xa ostal ongggo vatimol na suv toto *Deved!*^s !Iem isae e nou li! Ninin tesa tei da xat atuli navan e di pangei tova tang.”

²³ E Iesu tasa ti sepinien tova mini. Ma moletin nan xil lamei visal Iesu e labiteni mini labit, “Usil rat atou ak iha vengan di miki nggeih bemei mi xir.”

²⁴ Misak ni, xi biles e biteni mi atou ak bit, “Hi misil nou tangan namei ve mol-Isrel xil kestang xa langgoni sipsip xil san xa lakesae.”^t

²⁵ E ate-Kenan ak bemei e mitingeiril pe meten e dakesi nggeih bit, “!O suv! !Tutou ni nou li!”

²⁶ E xi bit rilomun ni mini bit, “Tamal ti xa namur anien ae e naso ni tang vaha mi kuli xil.”

²⁷ E atou bit rilomun ni mini bit, “Suv, ngan ak be reitin. E kuli xil mun xa ladi xorelis von anien en lakila lava saxut anien xil xa suv nae di ngga lingi.”

²⁸ Di, Iesu biteni mini bit, “!Atou li, neketen nam mahulong tova tang! Naha xa di osis nou ni mei istal ihe reitin.”^u E vatei takes, atuli nan mei bos rilomun.

**Iesu misa anien mi moletin xil
xa lali taosen hat (4000)**

Mak 8:1-10

²⁹ Melele xa Iesu be reling tan te hal Kenesaret, xi del moletin nan xil langgusil seri Oei Kaleli. Di, labe hu tei e ba ladotan ladi en. ³⁰ Di, vanut moletin xil holu lamei tangan lapus Iesu e laleh ngan nae xil xa lamesei: ngan xil xa lasakras lakakao, ngan xil xa mete bar, ngan xil xa le mikavui, ngan xil xa labe vut, e holu mun xa langgur hisit mesien savsav xil. Laling kekes ni xil pe met Iesu, e xi pol ni xil vus mei labos rilomun. ³¹ E melele xa moletin xil lapus naha xa Iesu pol ni, latemanin pupu venggan xa ngan xil xa labe vut, di lasepin; ngan xil xa le xil mikavui, le mei momal; ngan xil xa lasakras lakakao, di lakakao; e ngan xil xa labe metevar, di laketeh. Melele xa lapusi mak, lapet rat his Hi na mol-Isrel xil ven.

³² Di, Iesu mikes viton moletin nan xil e biteni mi xil bit, “!eok misae li e moletin xil ak vengan ladi visal xir melengien tol ngamu e anien ae tovuol. !eok ti tave tangan nasil rerat xil latilomun lave tim sae xil melele xa mae dit nggat xil. Maxani, vexil namal e mete xil namaluxoluk e suse.”^v

³³ E moletin nan xil lasisi labit, “!Inggak be uruvuol! ?Rikamet anien e rute xave tangan rakila risa ni mi vanut moletin xil xa mahulong xiak?”^w

³⁴ E Iesu misi xil bit, “?Beret vahis mungguri?”

Labit rilomun ni mini labit, “Beret lu e he sav (7) tang e tutut meseo vahis.”

³⁵ Ma Iesu misemae mi vanut moletin xil tangan litotan e tan. ³⁶ Melele xa ladotan bus, Iesu nggur beret lu e he sav

^s15:22 Mat 9:27; 20:30,31; Mak 10:47,48; Luk 18:38,39 ^t15:24 Mat 10:6

^u15:28 Mat 8:10,13; 9:29 ^v15:32 Mat 14:15; Mak 6:36; Luk 9:12

^w15:33 Mak 6:37; Sion 6:5

(7) e meseo vahis e misa memesien ba mi Hi ven. Di, bul papasi e misa ni mi moletin nan xil tangan ha liseti mi moletin xil. ³⁷ Moletin xil vus langganien e vange polu. E melele xa moletin xil na Iesu laba mun tangan laleh viton saxut anien xil, lase valeat lu e he sav (7) ba vuma ... xil vus polu. ³⁸ Tiramue xil xa langganien e melengien ak laduxoh taosen hat (4000). E atou xil del horamue nae xil latavuli xil ti.^x ³⁹ E melele xa Iesu misil rerat vanut moletin xil ak labaha, xi del moletin nan xil labe bot e ba labe rute tei xa lakesi ni Makatan.

Rut eilep xil na Siu xil lasis Iesu tangan vapol ni neta tova xa eilep xa vapisen ni xa xi texo visal Hi reitin

Mak 8:11-13; Luk 12:54-56

16 Vatei, *Farasi* e *Satusi* xil lamei visal Iesu tangan lasak pisi. Ma lasisi tangan vapol ni neta tova xa eilep xa vapisen ni xa xi texo visal Hi reitin.^y

² E Iesu bit rilomun ni mi xil bit, “Melele xa eai minu, xamim mubiteni mubit, ‘?Mupusi? Tilang hat pili. Ngan ak pisen ni xa an ihos visuvong.’ ³ E melele xa ut milan, mubiteni mubit, ‘Tilang hat pili. Ngan ak pisen ni xa an isa xosali.’ Xamim mupus kil naha xa di mistal e tilang hat, e musakras mupus kil naha xa eilep xa Hi di pol ni xosali. ⁴ Xamim moletin xil te xosali ak, mubit mupus ti neta tova xa eilep xa vapisen ni xa natexo visal Hi reitin. Di mubit mupusi venggan xa meulien namim mikavui e munggoni atou tei xa be na Hi, e di maen xi mi ngan tesav xil mun. E ninapol

ni ti neta tova xa eilep tangan mupusi. Ti mupus neta tei takes xa ixoni ngan xa testal mi provet *Siona* tetiamu.”^z Di, Iesu biles e be reling xil.

Iesu misel xat moletin nan xil tangan liketeh kuhi ve pispisien xil na Farasi e Satusi xil

Mak 8:14-21

⁵ Di, Iesu del *moletin nan xil* langgur xoteh Oei Kaleli. E melele xa laduxoh rin, moletin nan xil lanem rilomun ni xa iexil bovorong ni beret ae. ⁶ E melele xa laba, Iesu biteni mi xil bit, “Muketeh kuhi ve ‘is’ na Farasi e Satusi xil.”^a

⁷ Melele xa lalong sepinien nan, lasep usili del xil mun tang labit, “Xi misepin mak mi xir venggan xa rataleh ti beret ar.”

⁸ E Iesu milong kil naha xa di lasep usili. Ma ba biteni mi xil bit, “!Neketen namim hokorong pupu! ?Veneh ma di musep usil beret xa ar tovuol? ⁹?!Mutakil ti mu!/?Iemim bovorong ni ngamu xa natehangan tiramue xil latehe taosen lim (5000) tetel beret lim (5) tang? ?E valeat vahis polu ni rut anien xil xa muteleh viton ni?^b ¹⁰ E munem usil melele xa natehangan moletin latehe taosen hat (4000) tetel beret lu e he sav (7) tang. ?E valeat vahis polu ni rut anien xil xa muteleh viton ni?^c ¹¹ ?Ma veneh ma mutakil ti mu xa inou natasep usil beret ti? E muketeh kuhi ve ‘is’ na Farasi e Satusi xil.” ¹² Ma xil lanem kila sung xa xi taviteni ti tangan liketeh kuhi ve is te beret, e ve pispisien xil na Farasi e Satusi xil.^{§§}

§§16:12 Pispisien xil na Farasi e Satusi xil nggoni ‘is’ e rin xa di laso rin ni pispisien xil holu xa tamal pupu ti del xat sepinien xil na Hi, e pispisien nae xil di duxoh mol-Isrel xil vus.

^x15:38 Mat 14:21; Mak 6:44 ^y16:1 Mat 19:3; 12:38; Luk 11:16; Sion 6:30; 1Kor 1:22 ^z16:4 Mat 12:39; Luk 11:29 ^a16:6 Luk 12:1 ^b16:9 Mat 14:13-21; Mak 6:34-44; Luk 9:11-17; Sion 6:1-13 ^c16:10 Mat 15:32-38; Mak 8:1-9

**Pita bit rati xa Iesu be Mesaea xa Hi
tehit xati tangan isa ni imei**

Mak 8:27-30; Luk 9:18-21

¹³ Iesu e moletin nan xil lakakao laba, laduxoh rute tei sangas ni taon te hal Seseria-Filipae. E inggak, xi misis moletin nan xil bit, “?Moletin xil labiteni xa inou, Nat Moletin,^d nabe visi vari?”

¹⁴ E labit rilomun ni mini labit, “Rut moletin xil labit obe Sion Baptis.^e E rute ngan xil labit obe *provet Ilaetsa*. E rute sav xil mun labit xouk obe provet *Sere-maea* tetiamu mu provet sav tei.”

¹⁵ E xi misis xil bit, “?E xamim, ma midep? ?Mubit inou nabe visi vari?”

¹⁶ E Saemon Pita mitamea bit, “Xouk obe Mesaea. Reitin, obe Nat Hi xa meul da.”^f

¹⁷ E Iesu biteni mini bit, “Saemon, nat Siona, tuxolxatien na Hi di minuk ngamu. Vengan xa tave moletin ti xa vahit rat ngan ak minuk. Tata navan xa de ut nesao, xi vari bit rati minuk.^g ¹⁸ E nabiteni minuk xa obe ‘Pita’ xa koute teni be ‘vatihat.’^h E vatihat ak, nikili ni Sias navan. E xeihen xil vus na Temat e maten lasakras mei lapurun ni. ¹⁹ Nisak ni xouk mei uhe vat na moletin navan xil. Ve rin ak, naha xa uhit xole e ut etan ak, Hi mun ihit xole. E naha xa umaen ni e ut etan, Hi mun imaen ni.”ⁱ ²⁰ Di, Iesu misep xol moletin nan xil tangan linavit rati ti mi moletin tova xa xi be Mesaea xa Hi tehit xati tangan imei.^j

**Iesu misep usil longpangasien,
maten e mea rilomunen nan**

Mak 8:31–9:1; Luk 9:22-27

²¹ E melele nen ak ba, Iesu misep kila mi moletin nan xil xa ihe *Serusalem*. E melele xa ituxoh Serusalem, xi ihur longpangasien ihe holu ixo he elda xil, *vat xil na pris xil*, e *titsa* xil te rae na Mosis. Xi bit mesen ni xa xil lihas vini. Ti, e melengien tol nen, imea rilomun ra maten.

²² Melele xa Iesu biteni mak, Pita dela be rin, e misepin nggeih xati bit, “!Suv, onasepin ti namak! !Holesok xil ak misakras vastal minuk!”

²³ E Iesu biles, pus Pita e biteni mini bit, “!*Temat*, he reling nou! Nenemien ak be neta tei xa di misak pisi tangan ipol ni nou nisavut e suse navan. Vengan xouk di onggusil xat nenemien na moletin xil te ut etan, e otahusil nenemien na Hi ti.”

²⁴ Di, Iesu biteni mi moletin nan xil bit, “Xosxa moletin tova ien bei tangan ihusil nou, ma istokovein holesok xil te meulien nan, ti, ipo eivave te maten nan e ihusil xat nou.^k ²⁵ Vengan xa ngan xil xa di lasak pisi tangan likenin meulien nae ve xil tang, ma meulien nae ikesae reling xil. E ngan xil xa lamaen meulien nae ikesae vengas di langgusil xat nou, ma, e ut nesao, xil likamet meulien sal.^l ²⁶ ?Naha tova bos mi moletin xa di mileh holesok xil vus te ut etan ak, e di misa rat meulien nan tangan valehi?^m !Neta tovuol vari! Vengan xi misakras vasa neta tova tangan vahur rilomun ni meulien nan.

²⁷ “Nave nousav ti, inou, Nat Moletin, nitilomun itel xeihen xa tellep xa Tata

^d16:13 Dan 7:13 ^e16:14 Mak 6:14-15; Luk 9:7-8

^f16:16 Mat 16:16; Mak 14:61 ^g16:17 Mat 17:5; Kal 1:15-16

^h16:18 Sion 1:42; Efes 2:20 ⁱ16:19 Mat 18:18; Sion 20:23

^j16:20 Mat 17:9; Mak 9:9 ^k16:24 Mat 10:38; Luk 14:27

^l16:25 Mat 10:39; Luk 17:33; Sion 12:25 ^m16:26 Mat 4:8-9

navan isa ni minou e itel *masxaxa* nan xil. E melele nen ak, nisa kekes ni huit polien mi moletin xil vus ihusil naha xa xil di latepol ni.ⁿ ²⁸Reitin nabiteni mi xamim, rut xamim xa di lasoh del nou xosali, linamat ti mu e lipus melele xa inou, Nat Moletin, nimei tangan mei nihe suv toto na moletin xil vus.”^o

**Minehinen te xeihen
na Hi bemei e Iesu**

Mak 9:2-13; Luk 9:28-36

17 Melele xa melengien tei e he sav (6) mei mitavi, Iesu nggur Pita, Temis del Sion (xa be tua na Temis) e del xatel latobe nesao e vathu tei tangan xatel ak kestang latiti vituei en. ²E inggak, latopus tenbe Iesu biles. Valnaon mihinehin nggoni eai, e eising nan xil mei mieh pupu e mihinehin nggoni laet.^p ³Vatei takes, latpus **Mosis** e **Ilaetsa** lustal e ba lusepin del Iesu.

⁴Melele xa Pita pus xalu, biteni mi Iesu bit, “!Suv, bos xa xametel matodi inggak! Xosxa iem bei, ma matikili ni horao ihe tol: tei ihe mam, tei ihe ma Mosis, e tei ihe ma Ilaetsa.”

⁵Melele xa di tamu misepin, momah tei xa mihinehin pupu mei mikutaxol xatel. E latlong rae tei mistal nggo en xa bit, “Ngan ak be Natuxoli reitin xa eheien navan di en.^q

⁶Melele xa Pita xatel latlong rae ak, uli xatel mikan pupu, e latomot latobe tan. ⁷Melele xa ladi tamu e tan, Iesu bemei e duxol xatel bit, “Totamea. Ulimitel nakan ti mun.” ⁸E melele xa latpet rat metexatel, lattapus ti mun moletin xalu ak, Iesu kestang de visal xatel.

⁹Melele xa di latsuvul ra vathu ak, Iesu misep xol xatel bit, “Mutnahiteni

ti mi moletin tova usil naha xa mute-pusi ituxoh melele xa inou, Nat Moletin, nimea rilomun ra maten.”

¹⁰E moletin nan xatel latsisi latbit, “?Veneh ma **titsa** xil te rae na Mosis labiteni xa Ilaetsa imei itiamu ni Mesaea xa Hi tehiti xati?”^r

¹¹E Iesu bit rilomun ni bit, “Reitin xa Ilaetsa imei tangan ipol ni holesok xil vus mei imal rilomun. ¹²E nabiteni mi xamitel xa Ilaetsa temei ngamu^s e moletin xil latnapus kil ti. Xil latepol tesa mini texoni ngan xa iexil tehei. E ixo suse nen tak, nave nousav ti, inou mun, Nat Moletin, nihur longpangasien ixo hexil.”

¹³Melele xa Iesu biteni mak, ma latlong kila sung xa xi di bit usil Sion Baptis.

**Iesu pol ni horamue tei xa ninin tesa
tei da en mei bos rilomun**

Mak 9:14-29; Luk 9:37-43

¹⁴Melele xa Iesu xatel latsuvul ra vathu ak, latbisu mi vanut moletin xil. E moletin tei bemei visal Iesu, mitingeiril pe meten, ¹⁵e biteni mini bit, “O suv, iem isae li e natuxoli, vangan xa xi di memmat e milong pangas xi pupu ven. Melengien holu, xi di mot be upang mu oei. ¹⁶Natehuri temei visal moletin nam xil, e xil lasakras lapol ni mei vahos rilomun.”

¹⁷Melele xa Iesu milonge mak, biteni bit, “!Iva! !Xamim moletin xil te xosali ak, mukavui e neketen namim tovuol vari!^t ?Niti visal xamim ituxoh vilieh? Veok buol ni xamim xa neketen namim tovuol. Muhur horamue ak vamei visal nou inggak.” ¹⁸E melele xa Iesu pus horamue ak, minggol rat ninin tesa be relingi, e vatei takes, horamue ak mei bos rilomun.

ⁿ16:27 Mat 25:31; Sam 28:4; 62:12; Pro 24:12; Rom 2:6; Rev 22:12

^o16:28 Mat 10:23 ^p17:2 2Pit 1:16-18

^q17:5 Sam 2:7; Mat 3:17; 12:18; Mak 1:11; Luk 3:22; 2Pit 1:17; Dut 18:15; Pol 3:22

^r17:10 Mal 4:5-6 ^s17:12 Mat 11:14; Luk 1:17 ^t17:17 Dut 32:5,20

¹⁹Dutou ni melele nen ak, melele xa Iesu ba da sen tang, **moletin nan xil** lamei visali e lasisi labit, “?Veneh ma xamem matesakras mavol rerat ninin tesa ak?”

²⁰E Iesu bit rilomun ni mi xil bit, “Vengan xa neketen namim hokorong pupu. Reitin nabiteni mi xamim, xosxa munggur neketen xa hokorong nggoni utut **mastad**, mukila muviteni mi vathu ak muvit, ‘Umea ra rute ak, e uha xor,’ ma iha xor. Xosxa neketen namim di, ma neta tovuol vaxeih tangan mupol ni.” ²¹*

²²Di, lamea reling rute ak e lakakao labe provins te hal Kaleli. E melele xa di lakakao laba, Iesu biteni mi xil bit, “Nave nousav ti, inou, Nat Moletin, li-maen ni nou ihe he moletin xil te ut etan. ²³Xil lihas vin nou. E, e melengien tol nen, nimea rilomun ra maten.”^u Melele xa moletin nan xil lalonge mak, lanexo pupu.

Iesu nggal takis te Nim Eo nggo merekel tei

²⁴Vatei, Iesu del moletin nan xil di lakakao e lamei e taon te hal Kapaniam. Inggak, moletin xil xa laleh **mani** te takis te Nim Eo[†] lamei visal Pita e lasisi labit, “?Midep? ?Titsa nam di nggal takis te Nim Eo, mu taxali ti?”^v

²⁵E Pita bit rilomun ni mi xil bit, “Io, xi di nggale.”

Di, Pita dilomun be tim. Xi tasepin ti mu, e Iesu misis bit, “?Saemon Pita, onemi midep? ?Suv toto xil te ut etan

di laleh **takis** e duti[‡] ra moletin si xil? ?Lalehi ra horamue nae xati, mu ra moletin sav xil tang?”

²⁶E Pita bit rilomun ni mini bit, “Lalehi ra moletin sav xil.”

Iesu biteni mini bit, “Imak, ma horamue nae xati xil linaxal ti takis. ²⁷E tave ti neta xa Hi xa be suv toto te holesok xil vus be Tata naralu, ralixal takis te Nim Eo nan vengan xa tavos ti xa ralosak ni moletin xil ak tine vasoh xat ralu. Ma ha, uhe Oei Kaleli e uso huk. Meseo xa usare itiamu, usah vulongen, e ukamet mani tei xa ipin tangan uxal rat takis naralu ni. Ti, uhuri e ha usa ni mi moletin xil ak.”

Iesu pispisi usil visi iaxa be eilep mak mu pe met Hi

Mak 9:33-37; Luk 9:46-48

18 E melele nen ak, **moletin xil na** Iesu lamei visali e lasisi labit, “?Visi iaxa be eilep mak mu e ngan xil xa Hi be suv toto nae?”^w

²Iesu mikes tutut horamue tei e pol ni mei misoh pe metexil.^x ³Di, biteni mi xil bit, “Reitin li nabiteni mi xamim, xosxa munaviles nenemien namim ti tangan mei muxoni horamue ak, ma musakras muve rute xa Hi be suv toto en. ⁴Misak ni, ngan xil xa lapol ni nenemien nae be tan^y nggoni horamue ak, xil lihe eilep mak mu e rute xa Hi be suv toto en. ⁵E moletin tei xa nggur pilei horamue tei nggoni ngan ak e hisok, ma nggoni ngan xa di nggur pilei nou.^z

***17:21** Rut vanuvei xil na Matiu lateling sepinien ak teti en xa bit, “*Moletin mikila vahol rerat hisit ninin tesa ak melele xa misis e di bal ni anien.*”

†**17:24** Takis te Nim Eo tehe drakma lu na tiramue xil kekes xa texoni vatu taosen lu (2000 vatu).

‡**17:25** Duti nggoni vat, takis xa lalingi da xat praes te holesok xil xa langguri ra ut sav xil.

^u**17:23** Mat 16:21 ^v**17:24** Eks 30:13; 38:26 ^w**18:1** Luk 22:24

^x**18:2** Mat 19:14; Mak 10:15; Luk 18:17 ^y**18:4** Mat 20:26-27; Mak 10:43-44; Luk 22:26 ^z**18:5** Mat 10:40; Luk 10:16; Sion 13:20

⁶“E xosxa moletin tova isak ni moletin tei xa nggusil xat nou nggoni horamue ak tangan imot e tesaen, ma Hi isa pangasien xa isa mak mu mini. Bos mak mu xosxa lavar xat hat tova xa mahulong pupu vate huraaen, e laso ni ha vamerir e huinep te tas. ⁷Reitin xa holesok xil xa di lasak pis moletin tei tangan vamot e tesaen di bemei. !E isa mak mu mi ngan xil xa labe suse te tesaen xil ak!

⁸“!Nggusil nenemien ak, xosxa hem mu lem misak ni xouk di omot e tesaen, ma uta xotehi e uso ni iha! Ihos mak mu xa rut tenbom tang isa e uhur meulien sal, ili ngan xa hem xalu e lem xalu lihos tang laliti e liso xouk uhe Upang xa misakras vamat.^a ⁹Xosxa metom tei misak ni xouk di omot e tesaen, ukis rati e uso ni iha. Ihos mak mu xa metom tei ikesae e uhur meulien sal, ili ngan xa metom xalu vus laliti tang e liso xouk uhe Upang xa misakras vamat.”

Iesu dei vole usil sipsip xa mikesae

Luk 15:3-7

¹⁰Melele xa horamue ak di tamu misomal pe metexil, Iesu biteni mi moletin nan xil bit, “Muxuxou kuhi tangan munanem male ni moletin xil ti xa di langgusil xat nou nggoni horamue ak. Reitin li nabiteni mi xamim xa **maxaxa** nae^b xil ladit pe met Tata navan e ut nesao. E xil lihit mesen ni xosxa moletin tei di pangei xil. ¹¹¶

¹²“?Xamim munemi midep? ?Xosxa moletin tei, sipsip san xil duxoh handred tei (100) e tei e xil mikesae, ma xi ipol ni itep? ?Munemi mubit xi ihe reling sipsip sav san xil xa labe hanutap hat e hat e le tei mun (99) liti e seri hu tei ten-

gan ha ilang ves ngan xa mikesae? !Io!
¹³E reitin li nabiteni mi xamim xa, xosxa ikameti, ma ihesi xi pupu ven, ili sipsip sav san xil xa latakasae ti. ¹⁴Nggusil rin ak, Tamemim xa de ut nesao ien ti tavei tangan moletin ti xa di nggusil xat nou nggoni horamue ak vakesae.”

Iesu pispisi usil sexien xa moletin ti imal ni tunali xa pol misa mini

¹⁵Iesu dit ni ngan taxa di misepin mi moletin nan xil usil ngan xil xa di lapol misa mi mosav xil bit, “Xosxa tumali tei pol misa minuk, xouk tasom uhe visali e upisen naha xa xi tepol ni xa tenamal ti minuk. Xosxa iteong kuhi ni xouk e mulimal ni xamil, ma uhesi xouk vengan muliti ihos rilomun.^c ¹⁶E xosxa xi nateong ni sepinien nam ti, utilomun uhe visali itel moletin sav tei mu lu mun. Xalu mun lalipusi e lalisepin mini e rin nam xa be reitin xa otesak pisi tangan umal ni xamil.^d ¹⁷E xosxa tumali ien ti tavei tangan vateong ni xamitel, ma ha mutihit mesen ni pe met vanut moletin xil te Sias na Hi. E xosxa moletin ak ien ti tavei tangan vateong ni ngan xil te Sias mun, ma mupusi ixoni ngan taxa xi takil ti Hi mu be moletin tesa tei nggoni ngan xil xa di laleh **takis**.

¹⁸“Reitin li nabiteni mi xamim, naha xa xamim di musep xole e ut etan, ixoni ngan xa Hi mun xa de ut nesao di misep xole. E naha xa di mumaen ni e ut etan, ma ixoni ngan xa Hi mun xa de ut nesao di maen ni.^e

¹⁹“Reitin li nabiteni mi xamim xa xosxa xamil lu xa mudi e ut etan ak mulimei e nenemien tei usil neta ngan e mulisis ven, ma Tata navan xa de ut

¶**18:11** Rut vanuvei matu xil te Matiu lateling sepinien ak teti en xa bit, “*Inou, Nat Moletin, namei tangan nalang ves hisit moletin xil xa lakesae tangan niteh meulien e xil.*”

^a**18:8** Mat 5:30 ^b**18:10** Hib 1:14 ^c**18:15** Lev 19:17; Luk 17:3

^d**18:16** Dut 19:15; Sion 8:17; 2Kor 13:1; 1Tim 5:19

^e**18:18** Mat 16:19; Sion 20:23

nesao isa huit sisen namil.^f ²⁰ Vengan xa melele xa moletin lu mu tol latomei vituei e hisok, inou mun nite visal xatel e rute ak.”^g

Iesu dei vole usil longpangasien xa istal mi ngan xil xa iexil ti tavei tangan laketeh vahos rilomun mi mosav xil

²¹ Di, Pita bemei visal Iesu e misisi bit, “?Suv, xosxa tua navan pol misa minou, niketeh ihos rilomun mini ihe vahis?^h ?Ituxoh lu e he sav (7)?”

²² Iesu bit rilomun ni mini bit, “E-e, tave lu e he sav (7) ti. Uketeh ihos rilomun mini ihe valu e he sav (7), ti, upol ni ihe valu e he sav (7) mun, ti, upol ni ihe valu e he sav mun (7) ha vuma ... osakras ovuli mun.”[§]

²³ “Nihit kil sexien ak ni vole tei. Melele xa Hi mei ihe suv toto e meulien na moletin xil, ngan ak ixoni suv toto tei xa ien bei tangan imal ni kaon xa moletin te polien nan xil latepol ni tetela. ²⁴ E melele xa xi di momal ni kaon xil ak, ladel moletin tei xa kaon nan mili gol mani** xa be milian he xalu (10,000,000). ²⁵ E vengan xa suse tovuol tangan moletin ak vaxal rat kaon nan, suv toto nan misemae ni tangan lipos ni xi, atou nan, e horamue nalu xil vus mei lihe slev xil, e lipos ni holesok xil vus nan mun. Ixo suse ak, suv toto bit mani nen mei ixal rat kaon xil vus nan.

²⁶ “Melele xa moletin ak milonge mak, mitingeiril pe met suv toto e dakesi bit, ‘!Aue li! !Usa mesal tova mun xa hoko-

rong minou li, e nixal rat holesok xil vus xa di kaon navan!’ ²⁷ Melele xa suv toto ak milonge mak, ien misae en. Ma misil len kaon nan e maen ni ba ven mase.ⁱ

²⁸ “E melele xa moletin ak mistal, mikamet moletin te polien sav tei xa kaon nan dela be gol *mani* vahis tang. E melele xa pusi, miki xat hurae e biteni mini bit, ‘!Uxal rat mani xil vus xa otehuri ranou!’

²⁹ “E moletin te polien ak mitingeiril pe meten e dakesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’

³⁰ “E moletin ak ien ti tavei vasa mesal mini. E ba sung, miso moletin ak be nim te xeih tangan ita en ituxoh melele xa ixal rat kaon nan xil vus. ³¹ E melele xa moletin te polien sav xil lapus naha xa testal, xil lalonge misa pupu e ba labit mesen ni mi suv toto nae.

³² “Di, suv toto mikes moletin ak bemei visali e misepin nggeih mini bit, ‘!Xouk xa obe moletin tei navan di opol misa xa misa! Melele xa otetakes nou tangan ieok isae e xouk, ma natesil len kaon nam e natemaen xouk ba vem temase. ³³ ?Misak ni, veneh ma xouk iem tasae ti moletin te polien sav navan vaxoni ngan xa inou natepol ni minuk?’ ³⁴ Suv toto ien mikat, ma misa rat moletin nan ak ba tangan ihur pangasien ixo he moletin xil e nim te xeih ituxoh melele xa ixal rat kaon nan xil vus.^j

³⁵ “E Tata navan xa de ut nesao mun ipol ni imak tang mi xamim vus xosxa

[§]18:22 Sepinien xati teni bit, “*upol ni ihe valu e he sav, e upol ni imak ituxoh hanutap tol e he xalu mun (7 x 70).*”

**18:24 Gol mani tei takes nggoni 1000 vatu. Ngan ak be mani tei xa eilep pupu xa moletin tei misakras vaxal rati.

^f18:19 Mat 7:7; 21:22; Mak 11:24; Sion 15:7; 16:23; Tem 1:5; 1Sion 3:22; 5:14-15 [§]18:20 Mat 28:20; Sion 14:23 ^h18:21 Luk 17:3-4

ⁱ18:27 Luk 7:42 ^j18:34 Mat 5:25-26; Luk 12:58-59

munaketeh ti navos rilomun mi tua namim xil ixo tinemim tevi.”^k

Iesu pispisi xa moletin xa miteli nastokovein atou nan ti

Mak 10:1-12

19 Melele xa Iesu misepin usil rin xil ak bus, xi be reling provins te hal Kaleli del moletin nan xil. Ma xil labe rute tei xa mili Oeisal Sodan e provins te hal Sudea. ² Vanut moletin xil holu langgusili labe rute ak, e xi pol ni xil vus mei labos rilomun.

³ E melele nen ak, rut **Farasi** xil lamei visali tangan ti lisak pisi.¹ Misak ni, lasisi labit, “Uhit pisi mi xamem. ?**Rae** nar xil di maen ni tangan moletin tei ikila istokovein atou nan ve nenemien xil vus tang?”

⁴ E Iesu bit rilomun ni mi xil bit, “?Midep? ?Xamim mutavuli ti Vanuvei Eo na Hi? Vengan xi di biteni xa, teti-amu, e melele xa Hi tepol ni holesok xil e ut etan, ‘*Hi pol ni moletin, tei pol ni be malohos, e tei mun, pol ni be atou.*’ (Sen 1:27) ⁵ E biteni mun bit, ‘*Ve rin ak, tiramue imea reling tamen xal ninen, e ihisti itel atou nan, e xalu mei lalihe tei takes.*’ (Sen 2:24)^m ⁶ Misak ni xalu lutave lu ti mu, e mei lube tei takes. Ma naha xa Hi tehistin ni, moletin tovuol mikila vaseti xalu mun.”

⁷ E Farasi xil lasisi labit, “Vahit vamak, veneh ma **Mosis** ma tesemae ni xir tehiti, ‘*Moletin xa bit vastokovein atou nan, isa Setifiket te Silaen mini. Ti, mikila istokovein ni sung.*’” (Dut 24:1)

⁸ E Iesu bit rilomun ni bit, “Mosis temaen xamim tangan mustokovein atou namim xil vengan xa vatumim nggeih pupu. E sexien ak tovuol e melele xa Hi

tepol kokot ni holesok xil. ⁹ E nabiteni mi xamim xa xosxa moletin tei mistokovein atou nan e melele xa atou ak tapol ni ti vasa vatel tiramue sav, xi di pol ni neta xa misa pe met Hi. E xosxa, moletin ak mea e miteli rilomun del atou sav, pe met Hi, nggoni ngan xa xi di pol misa del atou ak.”ⁿ

¹⁰ Melele xa misepin mi xil bus, **moletin nan xil** mei labiteni mini labit, “Vahit vamak mi tiramue del atou nan, ma bos mak mu tangan tiramue tei ita tasen tang e nateli ti.”

¹¹ E Iesu bit rilomun ni mi xil bit, “Tave moletin xil vus ti iaxa lakila lavusil pispisien ak. E rut moletin ngan xil, Hi di misa xeihen mi xil tangan lihusili.^o ¹² Vengan rut moletin xil lasakras lateli vengan ut eo nae misa melele xa latepes xil. E ngan tesav xil lasakras lateli vengan xa moletin sav tepangei ut eo nae. E rute moletin sav xil mun lapol ni nenemien nae xa linateli ti tangan lipol mi Hi xa be suv toto nae. Ngan xil xa lakila lavusil sexien ak, ma bos tangan lihusili.”

Iesu misa tuxolxatien mi horamue xil

Mak 10:13-16; Luk 18:15-17

¹³ Di, moletin xil laleh tutut horamue nae xil lamei visal Iesu tangan xi valing hen e xil e vatuxol xat xil. E melele xa moletin nan xil lapus xil, labul xat xil.

¹⁴ E Iesu misepin mi xil bit, “Mumaen tutut horamue xil ak lamei visal nou, e munasikoe xol xil ti. Vengan xa Hi be suv toto na hisit moletin xil mun xa langgoni xil.”^p ¹⁵ Ma melele xa lamei visali, Iesu miling hen e xil e misa tuxolxatien mi xil. Di, Iesu del moletin nan xil labe reling rute ak.

^k18:35 Mat 6:15; Mak 11:25; Efes 4:32; Kol 3:13 ^l19:3 Mat 16:1

^m19:5 Efes 5:31; 1Kor 6:16 ⁿ19:9 Mat 5:32; 1Kor 7:10-11

^o19:11 1Kor 7:1-2,7,9,17 ^p19:14 Mat 18:2-3

**Tiram maxoe tei pusi xa nggeih pupu
tengan vastokovein mani
nan tangan vahusil xat Iesu**

Mak 10:17-31; Luk 18:18-30

¹⁶ Melele xa Iesu nggusil suse ba, moletin tei bemei visali e misisi bit, “?Titsa, nipol ni naha xa bos tangan nikila nihur meulien sal?”^q

¹⁷ Iesu bit rilomun ni mini bit, “?Veneh ma di osis nou usil naha xa bos? Hi kestang bos. E xosxa iem bei ovur meulien sal, ma uteong xat rae nan xil vus.”^r

¹⁸ Di, moletin ak misisi bit, “?E rae xave vari e xil tangan nihusili?”

E Iesu bit rilomun ni mini bit,
“*Munahas vin ti moletin.
Munakan ni atou mu tiramue na mosav ti.
Munakan ni ti neta na mosav xil.
Munaluvos ni his mosav xil ti.*

¹⁹ *Mumerere ni tamemim e ninemim xil.’*
(Eks 20:12-16)^s

E,
*‘Iemim ihei moletin sav xil ixoni ngan taxa
xamim vus di iemim bei xamim mun
tang.’”* (Lev 19:18)^t

²⁰ E tiram maxoe ak bit rilomun ni mi Iesu bit, “Inou di nanggusil xat rae xil vus ak. ?Naha mun iaxa natapol ni ti?”

²¹ Ma Iesu biteni mini bit, “Xosxa xoux iem bei tangan mei omal tevi, ma ha upos ni holesok xil vus nam e usa mani nen mi ngan xil xa holesok nae tovuol.^u Ti, utilomun e uhusil xat nou.”

²² E melele xa tiram maxoe ak milong sepinien nan, xi milonge misa e be relingi vengan xa holesok nan xil labe holu e ien ti tave tangan vastokovein ni.^v

²³ Di, Iesu biteni mi moletin nan xil bit, “Reitin li nabiteni mi xamim, nggeih tova tang tangan moletin xa holesok nan holu vamaen Hi mei vahe suv toto e meulien nan. ²⁴ ?Munemi xa **kamel** tei xa be mahulong mikila vakital vaxo met nitil tei xa hokorong xa hokorong pupu? E-e, misakras. E moletin tei xa holesok nan xil holu, nggeih mak mu mili ngan ak tangan imaen Hi mei ihe suv toto e meulien nan.”

²⁵ Melele xa moletin xil na Iesu lalonge mak, latemanin pupu e lasisi labit, “?Imak, ma Hi mikila vateh meulien e visi vari?”

²⁶ Iesu miketeh kapis e xil e bit, “!Iaxai vari! Moletin misakras vapol ni, e Hi kestang mikila ipol ni holesok xil vus.”^w

²⁷ Di, Pita biteni mini bit, “?Opusi? Xamem mastokovein holesok xil vus namem tangan mavusiluk. ?Xos imak, ma Hi isa naha mi xamem?”

²⁸ E Iesu biteni mi xil bit, “Reitin li nabiteni mi xamim, e melele xa Hi ipol pilei ni holesok xil vus te ut etan mei ihe neta hu, inou, Nat Moletin,^x nitotan e von lelataxien navan itel minehinen te xeihen navan. E melele nen ak, xamim kekes mun ti mutotan itel nou e von xeihen namim xa ihe lu e le tei (12). Ti, mulepis mol-Isrel xil vus xa langgo vati-mol lu e le tei (12) xa mahulong nae. ²⁹ E moletin xil vus xa di lastokovein tim sae, mu tua nae xil, mu hinexil, mu tamexil, mu ninexil, mu horamue nae xil, mu naho sae xil venou, ma Hi isa rilomun ni mi xil huite teni xa ihe handred tei (100) ili ngan xa latestokovein ni. E xil lihur meulien sal mun.^y ³⁰ E moletin holu xa

^q19:16 Luk 10:25

^r19:17 Lev 18:5; Luk 10:28 ^s19:19 Dut 5:16-20; Rom 13:9 ^t19:19 Mat 22:39; Mak 5:43; Luk 10:27; Rom 13:9 ^u19:21 Luk 12:33; Pol 2:45; 4:34-37; Mat 6:20

^v19:22 Mat 6:24; Luk 16:13 ^w19:26 Sen 18:14; Siob 42:2; Sak 8:6

^x19:28 Dan 7:9-10; Mat 25:31; 20:21; Mak 10:37; Rev 3:21; Luk 22:30

^y19:29 Mat 19:16; Luk 10:25

labe eilep xil xosali ak, xil mei lihe neta sav tang. E holu xa labe movotei xil xosali, xil mei lihe eilep xil sung.”^z

Iesu dei vole usil midexp iaxa moletin vus lapin tang pe met Hi

20 Melele xa Iesu di misepin del moletin nan xil, xi dei vole ak mi xil bit, “Suse xa Hi mei ihe suv toto e meulien na moletin xil ixoni hortan tei xa ba makoe roroh tamu tangan valeh viton moletin te polien xil tangan mei lapol e urvatiei san. ²Melele xa ba misepin mi xil, xil lamaen ni tangan lipol mini ve *mani* tei xa imal te melengien tei. Di, misil xil laba tangan lava lapol e urvatiei san.

³“Melele xa meteneai bemei nesao vuteili, hortan ak dilomun ba, e pus moletin sav xil xa dit laborang votei tang e von posen, e latapol ni ti neta. ⁴Ma xi biteni mi xil bit, ‘Ei, xamim mun ha mupol e urvatiei savan, e nixal xamim ni naha xa imal.’ ⁵Ma xil mun laba lapol.

“E piniae, xi dilomun ba, e pol ni nggoni ngan taxa tepol ni ngamu. Di, ba pol ni mun e melele xa meteneai da be tan vuteili. ⁶E melele xa meteneai ba sangas tangan vanu, xi dilomun ba e pus rut moletin xil mun dit lasoh votei tang. Ma xi misis xil bit, ‘?Veneh ma di musoh votei mak, e mutapol ni ti neta e makoe mei duxoh mahis xiak?’

⁷“Ma xil labit rilomun ni mini labit, ‘Vengan moletin ti tamei tangan valeh xamem mava mapol mini.’

“Ma hortan ak biteni mi xil bit, ‘Xamim mun muha mupol e urvatiei savan.’

⁸“Melele xa meteneai ba minu, hortan te urvatiei ak ba biteni mi vat na moletin te polien xil bit, ‘Ukes viton moletin xil te polien limei, e usa huit polien nae mi

xil.^a Itiamu, usa ni mi ngan xil xa lamei dutou iha vuma ... ituxoh ngan xil xa latemei tetiamu.’

⁹“Ma, ngan xil xa lamei e melele xa meteneai ba sangas tangan vanu, vat te polien misa huit polien nae momal ni ngan te melengien tevi tei. ¹⁰Misak ni, melele xa ngan xil xa latemei tetiamu lapusi mak, xil di lanemi labit xil lihuri ihe eilep mak mu. E melele xa lamei, xil mun langgur huit polien nae momal ni ngan te melengien tevi tei tang. ¹¹E melele xa langguri, xil laseputut ba xat hortan ak ¹²labit, ‘Ngan xil xa lamei dutou tang, e melele xa meteneai ba sangas tangan vanu, xil lapol haoa tei takes, e ongal xil nggoni xamem tang xa makon ni polien, mapo vetin, e eai ngga pangas tenbemem.’

¹³“E hortan ak bit rilomun ni mi xil bit, ‘Tua navan xil, inou natapol ti vasa mi xamim. Xamim mumaen ni tangan mupol minou ve huit polien xa momal te melengien tevi tei. ¹⁴Ma muleh mani namim muha. Inou ieok bei tangan nixal ngan xil xa latemei tetutou ipin ni ngan taxa xamim mungguri. ¹⁵Ngan ak be mani navan, e nikila nipol ni ixoni ngan xa ieok bei ni. ?Mu midexp? ?Xamim di munem misa ni xil vengan di nasa tutouen mi xil?’

¹⁶“Ma, usil sexien xil ak vari, moletin holu xa labe movotei xil tang xosali ak, xil mei lihe eilep xil. E holu e ngan xil xa labe eilep xil xosali ak, xil mei lihe neta sav tang.”^b

Iesu misep usil maten e mea rilomunen nan vatei mun

Mak 10:32-34; Luk 18:31-34

¹⁷Melele xa Iesu di mikakao ba tangan vahe *Serusalem*, xi mileh *moletin nan xil* xa labe lu e le tei (12) ba laka se xil

^a19:30 Mat 20:16; Luk 13:30 ^a20:8 Lev 19:13; Dut 24:15

^b20:16 Mat 19:30; Mak 10:31; Luk 13:30

vuteili e biteni mi xil bit, ¹⁸“?Mupusi? Taxeak di raba ve Serusalem xiak. E rute ak, xil limaen nou, Nat Moletin, ha nihe he *vat xil na pris xil e titsa* xil te rae na Mosis. Ivus ti, xil lihur nou nihe kot e limaen rat meulien navan tangan ha nimat.^c ¹⁹Ti, lisa rat nou ha nihe he moletin xil xa latave Siu ti, e xil lipol pepamen ni nou, limeas pangas nou ni ao te xeih xil xa sanute di en, e liti xat nou e eivave. E melele xa melengien tol mei itavi, inou nimea rilomun ra maten.”^d

Iesu pispisi usil sexien te tutouen mi moletin nan xil

Mak 10:35-45

²⁰Di, nine Temis xal Sion, nat Sepeti xalu, del xalu latomei tangan latopus Iesu. Xi mitingeiril pe meten tangan vasis neta tova mini.

²¹Iesu misisi bit, “?Atou li, iem bei neh?”

Ma xi bit rilomun ni mini bit, “!eok bei li tangan umaen horamue navan xalu ak ha lalitotan sangas visaluk e melele xa mei uhe suv toto. Tei ite rim metu, e tei ite rim meil.”^e

²²Ma Iesu biles miketeh pus natneli xalu e misis xalu bit, “Xamil mutakil ti naha xa di musis nou ni. ?Midep? ?Xamil mukila tamak mulihur sakpurunien xil e pangasien xil ixoni ngan taxa inou ha nihuri?”^f

E lubit rilomun ni mini lubit, “!Io, makila!”

²³Di, Iesu biteni mi xalu bit, “Reitin, xamil mulihur sakpurunien xil e pangasien xil ixoni ngan xa inou nihuri. E tave ti neta xa imak, nave nou ti iaxa nihosei visi tangan mei itotan e riuk metu mu e riuk meil. Vontoen xalu ak xa tellep

xiak be na ngan xalu xa Tata navan bosei xalu ngamu tangan lalihuri.”

²⁴E melele xa moletin sav xil na Iesu xa labe he xalu (10) lalongeong usili, iexil nggat xalu. ²⁵Ma Iesu mikes viton xil vus lamei visali e biteni mi xil bit, “Mukila xa vat na moletin xil xa latave Siu ti iexil bei mak mu tangan lisak ni moletin nae xil lipus kila xa xil mak mu labe tellep lali xil. E suv nae xil mun di lapol ni nggeih mi ngan xil xa ladi pe hexil. ²⁶E xamim, sexien namim namak ti. Xosxa tei e xamim ihit mei ihe eilep mak mu ili xamim, xi mei ipol mi xamim ixoni moletin te polien tei namim.^g ²⁷E xosxa tei e xamim ien bei tangan vatiamu ni xamim, xi mei ihe moletin te tutouen namim ixoni slev tei. ²⁸Vengan inou mun xa nabe Nat Moletin, natamei ti tangan moletin xil ti latutou ni nou. !E-e! Inou namei tangan nitutou ni mosav xil^h

Iesu pol ni moletin lu xa metealu bar mei luketeh rilomun

Mak 10:46-52; Luk 18:35-43

²⁹Iesu del moletin nan xil ba laka pas taon te hal Seriko. E melele xa di laba, vanut moletin tei xa eilep di langgusili. ³⁰E rute ak, moletin lu xa metealu barⁱ ludotan ludi seri suse e lulonge xa Iesu mikakao mei mitavi ba. Ma xalu lukei ba ni lubit, “!Suv! !Xouk xa ostal onngo vatimol na suv toto *Deved!* !Iem isae li e xamel!”

³¹E vanut moletin xil ak labul xat xalu tangan lalotit votei. E tave ti neta xa mak, xalu lukei nggeih pilei sung lubit, “!Suv! !Xouk xa ostal onngo vatimol na suv toto *Deved!* !Iem isae li e xamel!”

^c20:18 Mat 16:21; 17:22-23; Luk 9:22

^d20:19 Mat 16:21; 17:23; Luk 9:22; 24:7,46; Pol 10:40; 1Kor 15:4 ^e20:21 Mat 19:28; Luk 22:30 ^f20:22 Mat 26:39; Sion 18:11 ^g20:26 Mat 23:11; Mak 9:35; Luk 9:48 ^h20:28 Luk 22:27; Plp 2:7; 1Tim 2:6 ⁱ20:30 Mat 9:27

³² Melele xa Iesu milonge, misoh e mikes xalu tangan lalomei visali. Di, misis xalu bit, “?Iemil bei tangan napol ni naha mi xamil?”

³³ Ma xalu lubit rilomun ni mini lubit, “Suv li, iemel bei tangan upol ni metemel ihos rilomun.”

³⁴ E melele xa Iesu pus xalu, ien polu ni esaeen ve xalu. Ma misasa duxol metealu, e vatei takes, xalu vus luketeh rilomun e lunggusil Iesu luba.

Iesu ba mistal e Serusalem e moletin xil lasa merereen mini

Mak 11:1-11; Luk 19:28-40; Sion 12:12-19

21 Melele xa Iesu del *moletin nan xil* lamei sangas ni *Serusalem*, xil mei lastal e metimal te hal Betfas xa de sangas ni Vathu te Urvatiei te *Olip*. E rute ak, Iesu misil moletin nan lu ² del sepinien ak bit, “Mulihe metimal xa da iaxor. E melele xa ha mulistal en, mulikamet dongki tei xa labar xati del tuten. Mullal rat xalu e mulitel xalu lalime i visal nou. ³ E xosxa moletin tei isak pisi tangan vasikoe xol xamil, mulhiteni mini mulihit, ‘Suv iaxa ien bei xalu,’ ma vatei takes, xi imaen xalu mi xamil.”

⁴ Ngan ak testal tangan vasak ni naha xa Hi tehit lelen ni texo *provet* nan mei ihe reitin xa tehit,

⁵ “*Uhiteni mi moletin xil xa ladi e taon te hal Serusalem uhit,*
!Mupus ti! Suv toto namim bemei tangan valaxat xamim.

Xi be hanmerou tang e di miloh nggo dongki tei tang di bemei.

Reitin, xi dotan de sulut dongki tei tang e di bemei.” (Sak 9:9)

⁶ Ma moletin na Iesu xalu ak luba e lupol ni nggoni ngan taxa xi tehiteni mi xalu. ⁷ Xalu ludel dongki ak del tuten latomei. Di, luden kot nalu da xol tei

xalu e Iesu dotan en. ⁸ Vanut moletin xil xa mahulong mei lasak mesen suse tangan Iesu mei iloh ixo en. Laden kot nae xil e suse nan, e rute ngan xil la dei anguit liei xil xa ute di en e laling kuhi di suse. ⁹ Holu e vanut moletin xil ak xa di ladiamu ni Iesu del ngan xil xa di langgusili ladutou di lakei nggeih labit, “!Ripet rat xi xa mistal nggo vatimol na suv toto *Deved!*

!Tuxolxatien iti mi ngan xa di bemei e his Iahova!” (Sam 118:26) ^j

!Ripet rat his Hi xa de ut nesao!”

¹⁰ E melele xa Iesu ba duxoh Serusalem, longeongen usili ba mikapis e ut xil vus e taon, e mol-Serusalem xil latemanin e di latumul usili labit, “?Visi iaxa bemei xiak?”

¹¹ E vanut moletin xil labit rilomun ni labit, “Ngan ak be Iesu, provet tei te hal Nasaret xa de provins te hal Kaleli.”

Iesu minggol rerat moletin holu xa latamerere ni Hi ti ra Nim Eo

Mak 11:15-19; Luk 19:45-48; Sion 2:13-22

¹² Melele xa laduxoh Serusalem, Iesu be vangit vloh te Nim Eo na Hi. Melele xa pusi xa moletin xil di lapos ni holesok xil holu en, ien mikat e nggol rerat xil. Xi midivin rerat tep na ngan xil xa di laso papas mani e von totanen na ngan xil xa di lapos ni mae xil te sanien eo na Hi. ¹³ E melele xa di pol ni mak, xi bul xat xil bit, “E Vanuvei Eo na Hi, latetisi latehit, ‘*Lakes nim mavan ni nim te sisen.*’ (Aes 56:7) E xamim mupol ni sung mei be ‘*Nim mavati kanen xil.*’” (Ser 7:11)

¹⁴ E melele xa Iesu da tamu e vangit vloh te Nim Eo, moletin xil xa metexil bar del ngan xil xa lasakras lakakao lamei visali, e xi pol ni xil mei labos rilomun.

¹⁵E melele nen mun tak, tutut horamue xil di lakekei e vangit vloh te Nim Eo labit, “!Ripet rat xi xa mistal nggo vatimol na suv toto Deved!”^k

E melele xa **vat xil na pris xil** del **titsa** xil te rae na Mosis lapus merekel xil e holesok sav xil xa tellep xa Iesu di pol ni e lalong naha xa horamue xil di lakekei ni, iexil mikat xa mikat. ¹⁶Ma lasis Iesu labit, “?Di olong naha xa tutut horamue xil di lakekei ni iaxai?”

E Iesu bit rilomun ni mi xil bit, “Io, nalonge. ?E midep? ?Xamim di mutavuli ti e Vanuvei Eo na Hi? Vengan misepin ni bit,

‘Hi, xouk osak mesen suse tangan uteong ni memesien xil xa ihat visaluk, ico tutut horamue xil e tuvava xil mun.’”
(Sam 8:2)

¹⁷Di, Iesu mistokovein xil e be reling taon te hal Serusalem. Xi be taon te hal Betani del moletin nan xil, e ba lapat en.

Iesu misa halesil tei ba xat vatit fik tei

Mak 11:12-14,20-24

¹⁸E makoe roroh, melele xa Iesu di mikakao tangan vatilomun vahe Serusalem, mae nggati e suse. ¹⁹Ma miketeh e pus vatit **fik** tei xa dat seri suse. E melele xa be sangas visali, xi mikameti xa huite tovuol, e be ute xil tang.¹ Misak ni, Iesu biteni mi vatit fik ak bit, “!Onataxao ti mun!” Vatei takes, ut fik xil ak mei lameles e vatite mingguxu.

²⁰Melele xa moletin nan xil lapusi, latemanin e lasisi labit, “?Vatit fik ak mei meles e mingguxu vari nga tang midep?”

²¹E Iesu bit rilomun ni mi xil bit, “Reitin li nabiteni mi xamim, xosxa neketen namim di e mutanem male ni ti naha xa

di musisi, xamim mun mukila mupol ni naha xa inou napol ni mi vatit fik ak. E tave ngan ak ti kestang, mukila mun musemae ni vathu ak muhit, ‘Umea uhe reling voninom e uha uso xouk uhe tas,’ ma istal ihe reitin.^m ²²Xosxa uke reitin xa neta tei mei istal, neta xil vus xa usis Hi ven imei istal ihe reitin.”ⁿ

Vat xil na Siu xil lasis Iesu tangan ihit kila xa di pol e his visi

Mak 11:27-33; Luk 20:1-8

²³Melele xa laduxoh Serusalem, Iesu be vangit vloh te Nim Eo. E melele xa di pispisi mi moletin xil, vat xil na pris xil del elda xil na Siu xil lamei visali e lasisi labit, “?Xouk di opol ni holesok xil ak e his visi? ?Visi vari maen xouk tangan opol ni?”

²⁴Ma Iesu bit rilomun ni mi xil bit, “Inou mun nisis xamim ni neta tei. Xosxa muhit rilomun ni minou, ma inou mun nihit kila mi xamim xa di napol ni holesok xil ak e his visi. ²⁵?Muhit pisi minou, Sion tebaptaes ni moletin xil e di tepol ni e his visi? ?Hi mu moletin tova tang?”^o

Xil laba, di lasep usili mi xil mun tang labit, “?Rihit naha? Xosxa rihiteni rihit, ‘Sion di tepol e his Hi,’ ma xi ihiteni mi xir ihit, ‘?Xosxa temak, veneh ma mutnake reitin ti e sepinien nan?’^p ²⁶E xosxa rihiteni rihit, ‘xi di tepol e his moletin tang,’ ulixir mikan ni vanut moletin xil xa eilep xiak vengan xa xil vus lanemi labit Sion Baptis tehe provet tei na Hi.”^q ²⁷Ma xil labit rilomun ni mi Iesu labit, “Xamem matakil ti xa xi di tepol e his visi.”

Ma Iesu biteni mi xil bit, “Xosxa imak, ma inou mun ninaviteni ti xa inou di napol ni holesok xil ak e his visi.”

^k21:15 Mat 21:9 ^l21:19 Luk 13:6 ^m21:21 Mat 17:20; Luk 17:6; 1Kor 13:2

ⁿ21:22 Mat 7:7-11; 18:19; Sion 14:13-14 ^o21:25 Sion 1:6,33

^p21:25 Mat 21:32; Luk 7:30 ^q21:26 Mat 14:5; 21:46

Iesu dei vole tei usil longxatien na horamue lu

²⁸ Di, Iesu dei vole ak mi vat xil na Siu xil bit, “?Xamim munemi midep? Moletin tei, natneli lube lu. Vatei, moletin ak ba pus ngan xa be muimol e biteni mini bit, ‘Natuxoli, xosali, ha upol e urvatiei saratel.’

²⁹ “E horamue ak bit rilomun ni mini bit, ‘Ieok ti tavei nama.’ E dutou ni, xi biles nenemien nan e ba pol.

³⁰ “Di, tamealu ba pus ngan xa dutou e bit sepinien taxa tehiteni tetiamu mi muimol nan. Ma horamue ak bit rilomun ni mi tamen bit, ‘Bos ngamu tata, niha.’ E xi tava ti.

³¹ “?Visi e xalu iaxa pol ni naha xa tamealu ien bei?”

E xil labit, “Ngan xa diamu.”

Ma Iesu biteni mi xil bit, “Reitin nabiteni mi xamim xa ngan xil xa di laleh viton mani te **takis** del hoeaso xil, Hi mei ihe suv toto e meulien nae itiamu ni xamim. ³² Vengan Sion temei tangan vapisen suse xa momal pe met Hi mi xamim tangan ti muvusili. E xamim mutake reitin ti e sepinien nan. E ngan xil xa laleh mani te takis e hoeaso xil lalonge e lake reitin e sepinien nan. E tave ti neta xa mupus holesok xil xa lapol ni, mutaviles ti ra tesaen namim e mutake reitin ti e sepinien nan.”^r

Iesu dei vole usil longrasien na moletin xil xa di lalaxat urvatiei tei

Mak 12:1-12; Luk 20:9-19

³³ Di, Iesu dei vole tei mun mi vat xil na Siu xil bit, “Vatei, hortan tei milihi urvatiei te **grep** tei san. ^sXi pol ni viov mikapis xole, e minggil vul tei da en xa ti lipel kikis huit grep xil en tangan lihur rat sute. Di, mikili ni vet tei xa be nesao tangan ti liketeh xole en. Melele xa pol

vuol ni holesok xil ak, xi maen moletin sav xil tangan mei lilaxati. E xil labit xati mini xa lisa ti huit grep mini melele xa limen. Di, hortan ak mikakao ba de kantri sav tei.

³⁴ “Melengien hao mei mitavi, huit grep xil ak mei men. Ma hortan ak misil rut slev nan xil tangan ha lisis ngan xil xa di lalaxat urvatiei te grep san e lisa ti huite san xil mini. ³⁵ E melele xa laduxoh urvatiei ak, moletin xil xa di lalaxati ladal xat slev nan xil ak: labas purun tei; tei mun, lamu vini; tei mun xatel, langgove.^t ³⁶ Di, hortan ak misil rut slev xil mun xa lali ngan xil xa tesil xil tetiamu. E moletin xil xa lalaxat urvatiei ak lapol ni mi xil nggoni ngan taxa latepol ni tetiamu. ³⁷ Ma di, hortan ak misil natneli xati be visal xil vengan minemi bit, ‘Xil limerere ni natuxoli xati.’

³⁸ “E melele xa ngan xil xa di lalaxat urvatiei ak lapus natneli bemei, labiteni mi xil mun tang labit, ‘!Ei, nat hortan xati iaxa di bemei iaxor! Xi vari ihur urvatiei ak melele xa tamen imat. !Mumei, rava ravas vini! !Imak, ma holesok nan xil mei ihe nar sung!’ ³⁹ Ma xil laba, ladal xati, lakuvun rati ra urvatiei ak, e labas vini.”^u

⁴⁰ Di, Iesu misis vat xil na Siu xil xa di lateong ni vole ak bit, “?Ma midep? ?Melele xa hortan te urvatiei itilomun imei, ma ipol ni naha mi moletin xil ak?”

⁴¹ Ma xil labit rilomun ni mini labit, “Xi isa rilomun ni maten xa isa pupu mi moletin tesa xil ak. Ti, imaen urvatiei san mi moletin sav xil xa ti lisa rut huit grep xil mini e melele xa limen kuhi.”

⁴² Di, Iesu biteni mi xil bit, “?Midep? ?Xamim di mutavuli ti Vanuvei Eo? Vengan xa xi biteni bit,

‘Pos xa moletin te polien xil di lasin ni, xi vari iaxa mei be seteman xati te nim e mili sen pos nen xil vus.

^r21:32 Luk 7:29-30

^s21:33 Aes 5:1-2

^t21:35 Mat 22:6

^u21:39 Hib 13:12

*Ngan ak, Hi vari pol ni,
e rapusi xa naha xa xi tepol ni bos pupu.'*
(Sam 118:22-23)^v

⁴³“Ma, nabiteni mi xamim, hosien na Hi xa be suv toto xa di e xamim taxeak, Hi ileh rerati reling xamim Siu xil. E isa ni sung mi moletin xil te kantri sav xil xa likila lilong xat raen e lipisen huit hosien teni e meulien nae. ⁴⁴Ngan xil xa lasin seteman ak, xosxa imot ita xat tei e xil, sin xil imavul ivus.^w

⁴⁵Melele xa vat xil na pris xil del **Farasi** xil lalong vole xil xa Iesu dei, lak-ila sung xa di misep usil xil. ⁴⁶Ma di lalang ni suse tangan lital xati. E ulixil mikan ni vanut moletin xil xa eilep xiak xa di lanemi labit Iesu be provet tei.^x

Iesu dei vole tei usil suv toto tei xa misilasil ni moletin xil tangan lave anien te tetelien na natneli

Luk 14:15-24

22 Melele xa Iesu da tamu e vangit vloh te Nim Eo, xi dei vole ak mun mi moletin xil bit, ²“Hi xa be suv toto e meulien na moletin nan xil nggoni suv toto tei xa, vatei, misak mesen anien te tetelien tei na natneli. ³Xi misil slev nan xil laba tangan lakes ngan xil xa suv toto ak tesilasil ve xil ngamu tangan limei e anien ak. E moletin xil ak labit linamei ti.

⁴“Ma suv toto ak misil slev sav nan xil e biteni mi xil bit, ‘Ha muhiteni mi ngan xil xa natesilasil ve xil muhit, “!Mumei! Inou nasak mesen anien holu ngamu. Labas buluk savan xil e sulut buluk xil mun xa lakaio kuhi be te anien ak. Reitin, holesok xil vus te anien te tetelien ak mese tuei di. Ma mutemanon mumei.”

⁵“E moletin xil ak lanem male ni raen tang, e laba sung di lapol ni polien nae xil. Tei be naho nan, e tei mun ba pol e sitoa nan. ⁶E moletin tesav xil ladal xat slev nan xil ak, labas purun xil e lamu vin xil. ⁷E melele xa suv toto ak milonggeong usili, ien mikat xa mikat. Misak ni, misil moletin te vaeen nan xil laba lamu vuol ni ngan xil xa latehas vin slev nan xil, e ladin taon nae.

⁸“Di, suv toto ak biteni mi slev sav nan xil bit, ‘Anien te tetelien meses tuei di. E ngan xil xa natesilasil ve xil, meulien nae tapin ti tangan lamei lava ni. ⁹Ma ha muhe suse xil te taon e musilasil ni moletin xil vus xa mukamet xil tangan mei lia anien te tetelien ak.’ ¹⁰Misak ni xil labe suse xil e lakes viton moletin xil vus xa lakamet xil, ngan xil xa labos e ngan xil xa lasa. E nim xa anien te tetelien da en polu kuhi ni moletin xil.

¹¹“Ngan xil xa lamei e tetelien ak, lasing kuhi ni eising xil te tetelien. E melele xa suv toto bemei tangan vapus ti ngan xil xa lamei, xi miketeh e mikamet moletin tei xa tasing ni ti eising te tetelien. ¹²Ma suv toto ak be visali e misisi bit, ‘?Tuxoli, omei e nim ak middep vari xa otasing ni ti eising te tetelien?’ E moletin ak dat votei, e takil ti naha xa ihiteni.

¹³“Misak ni, suv toto biles e misemae ni moletin te polien nan xil bit, ‘Muvar viton hen e len xil, e mukuvun rati ihe hale e ha ita nga e ut te maluxoluk. E rute ak moletin xil ti limuis e ti lingas luhexil ve longpangasien nae xil.”^y

¹⁴Di, Iesu misep kor usil vole ak bit, “Reitin, Hi misilasil ve moletin xil holu tangan lamei visali, e xil vahis tang iaxa bosei xil tangan liti visali.”

^v21:42 Pol 4:11; 1Pit 2:7 ^w21:44 Aes 8:14; Dan 2:34-35,44-45

^x21:46 Mat 14:5; 16:14; 21:11,26; Luk 7:16; 24:19; Sion 4:19; 9:17

^y22:13 Mat 8:12; 13:42,50; 24:51; 25:30; Luk 13:28

Farasi xil lasis Iesu usil rin te takis

Mak 12:13-17; Luk 20:20-26

¹⁵ Melele xa **Farasi** xil lalong vole xil xa Iesu di biteni ba xat xil, xil laba di lalang ni mesal tova xa likila lital xati ixo en ve sepinien nan xil. ¹⁶ Misak ni, lasil rut moletin nae xil del rut Siu sav xil mun xa ladi rin na suv toto **Herod** Antipas laba. Xil labe visal Iesu e labiteni mini labit, “Titsa, xamem makila xa xouk obe hisit moletin tei xa moletin sav xil lik-ila liling nenesien nae iti en. E makila mun xa xouk di opispisi mi moletin xil ni suse te reitinen xa Hi ien bei tangan **moletin nan xil** lihusili. Xouk di osepini mi moletin xil vus nggoni ngan xa xil vus lapin tang, tave ti neta xa labe eilep xil mu movotei xil tang. ¹⁷ Ma, usa ti nene-mien nam mi xamem usil rin ak. **?Rae na Mosis** maen ni tangan Siu xil ti lixal **takis** iha mi **suv toto te hal Rom**, mu tamaen ni ti?”

¹⁸ E Iesu pus kil nenemien tesa nae e bit rilomun ni mi xil bit, “!Xamim mubos nggot hilibemim tang! ?Veneh ma di musak pis nou? ¹⁹ Musa **mani** tova xa di langgal takis ni.” Melele xa lasa ni mini ²⁰ xi misis xil bit, “?Valnao visi vari iaxa da en? ?E his visi iaxa de mani ak?”††

²¹ Xil labit rilomun ni mini labit, “Neta xalu vus xa ludi en be na Sisa, suv toto xa mahulong te hal Rom.”

Ma Iesu biteni mi xil bit, “Xosxa mak, ma momal tang tangan musa naha xa be na Sisa mini, e naha xa be na Hi, musa ni mini.”^z

²² E melele xa lalong sepinien nan, latemanin pupu ni. Ma, labe relingi e laba.

Satusi xil lasis Iesu usil melele xa moletin xil limea rilomun ra maten

Mak 12:18-27; Luk 20:27-40

²³ E melengien xati nen tak, **Satusi** xil xa labit moletin misakras vamea rilomun ra maten^a labe visal Iesu, e lasisi labit, ²⁴ “Titsa, **Mosis** tetis rae ak tehe nar xa tehiti, ‘*Xosxa moletin tei mat e mistokovein atou nan e horamue nalu tovuol, ma tunali sav ihur mei iteli itel tunau nan. Imak, ma isa horamue mini xa ihur his tunali xa mat ngamu.*’ (Dut 25:5) ²⁵ Ma vatei, tua tatei xil latehe lu e he sav (7) lateti visal xamem. Ngan xa tehe muimol teteli tetel atou tei. Di, xi temat e horamue nalu tehe tovuol. Misak ni, tuneli xa tetutou ni mei tehur tunau nan. E xi mun temat, e tuvava nalu tehe tovuol. ²⁶ Di, sexien nen tak testal mun mi tuneli xa tetutou ni. Ma di, testal mun mi ngan xa tehe tol nen e dit temak tang teha vuma ... tetuxoh ngan xa tehe tasite e tua xil ak. ²⁷ E tetutou ni holesok xil ak, atou ak mun temat. ²⁸ ?Ma xosxa mea rilomunen be reitin, melele xa moletin xil vus limea rilomun ra maten, ngan xave e tua xil xa labe lu e he sav (7) xiak iaxa ihur atou ak ihe nan xati, vengan xil vus lateteli tetela?”

²⁹ Iesu bit rilomun ni mi xil bit, “Xamim di mule ras suse namim venggan xa mutakil kuh ti Vanuvei Eo na Hi mu xeihen nan. ³⁰ Vengan e melele xa moletin xil limea rilomun ra maten, xil mei lixoni **maxaxa** xil xa ladi ut nesao, e sexien te tetelien ihe tovuol mun. ³¹ ?E veneh ma mutake reitin ti xa moletin xil likila limea rilomun ra maten? ?Mutavuli ti mu naha xa Hi tesepin ni mi xamim? Vengan xi tehiti, ³² ‘*Inou nabe Hi na Ebrahim, Hi na Aesak, e Hi na Siekob.*’ (Eks 3:6) ?Mulonge? Xi **be** Hi na ngan xil

††22:20 Mani ak, valnao suv toto te hal Rom iaxa da en e ladis en labit, “Ngan ak be nat Okastas xa be Hi.”

^z22:21 Rom 13:6-7 ^a22:23 Pol 23:8

xa lameul tamu ladi, e tave na ngan xil ti xa labe tovuol ngamu.”^{‡‡}

³³E melele xa vanut moletin xil xa eilep xiak lalong pispisien nan xil, xil latemanin ni.^b

Iesu pispisi usil rae xave iaxa be eilep mak mu mili sen rae sav xil

Mak 12:28-34; Luk 10:25-28

³⁴Melele xa Farasi xil lalongeong ni xa Iesu bas vin upang na Satusi xil, xil mei labe vituei e laba lapus Iesu. ³⁵Tei e xil xa be titsa tei te rae na Mosis be-mei tangan vasak pis Iesu ni sepinien nan xil. ³⁶Misak ni, xi misisi bit, “?Titsa, **rae** xave vari iaxa be eilep mak mu mili sen rae xil vus?”

³⁷E Iesu bit rilomun ni mini bit, “*Iemim ihei Iahova xa be Hi namim ixo tinemim tevi, ixo meulien tevi namim, e ixo nenemien tevi namim.*” (*Dut 6:5*)^c ³⁸Rae ak iaxa be eilep mak mu mili sen rae sav xil.

³⁹E tei mun xa nggoni tang xa be lu nen di biteni bit, “*Eheien namim iti e moletin sav xil ixoni ngan taxa eheien namim di e xamim mun tang.*” (*Lev 19:18*)^d ⁴⁰Holesok xil vus xa di e rae xil na Mosis del Tisen xil na **provet** xil tetiamu di ngamu e rae xalu ak.”^e

Iesu misep usil Mesaea xa Hi tehosei

Mak 12:35-37; Luk 20:41-44

⁴¹E melele xa Farasi xil ladi vituei tamu dela, Iesu misis xil sung bit,

⁴²“?Xamim munemi midep usil Mesaea? ?Xi istal ixo vatimol na visi?”

E xil labit rilomun ni mini labit, “Xi istal ixo vatimol na suv toto **Deved** tetiamu.”^f

⁴³Ma Iesu biteni mi xil bit, “?Xosxa ngan ak be reitin, veneh ma **Ninin** na Hi tesa nenemien mi Deved tangan ikes Mesaea ak ni ‘Suv’? Vengan xa xi tehiteni tehit,

⁴⁴*‘Iahova biteni mi Suv navan bit, ‘Utotan inggak e riuk metu, ituxoh melele xa niling elu nam xil e hem.’”*

(*Sam 110:1*)^g

⁴⁵Suv toto Deved vari tekes Mesaea ni ‘Suv nan.’ ?E vengan xa tata tei misakras vakes natneli ni ‘suv,’ Mesaea istal ixo vatimol na Deved itep?”^{¶¶} ⁴⁶E moletin xil lasakras lasa rilomun ni sepinien nan. Ma e melele nen ak ba, moletin xil ulixil mikan tangan lasis ti mun neta mini.^h

Iesu misel xat titsa xil te rae na Mosis del Farasi xil

Mak 12:38-39; Luk 11:43,46; 20:45-46

23 Melele xa Iesu da tamu e vangit vloh te Nim Eo na Hi, misepin mi vanut moletin xil del **moletin nan xil** mun bit, ²“**Titsa** xil te rae na Mosis del **Farasi** xil ladi tangan laxoles Mosis e lavit kil rae xil na Hi mi moletin xil. ³Ma bos xa xamim mulong xat xil e muhusil holesok xil vus xa di labiteni mi xamim tangan mupol ni. E xamim, munapol ni ti sexien xil naxoni ngan xa xil di lapol

^{‡‡}**22:32** Neta sav xa Ebrahim, Aesak e Siekob lattemat nousav ngamu e melele xa Hi di tehit sepinien ak mi Mosis, Hi tehiteni xa xi **be** Hi natel. Xi tenaviteni ti xa **tehe** Hi natel. Ma Iesu bit ngan ak pisen ni xa latomeul tamu latodi.

^{¶¶}**22:45** Reitin xa Mesaea ixo vatimol na suv toto Deved, e vengan xa xi tekes Mesaea ni suv, di pisen ni xa Mesaea be eilep mak mu mili, e xos, Mesaea ak teta ngamu tetiamu ni.

^b**22:33** Mat 7:28; 13:54; Mak 11:18 ^c**22:37** Sos 22:5

^d**22:39** Mat 5:43; 19:19; Rom 13:9; Kal 5:14; Tem 2:8

^e**22:40** Rom 13:10; Mat 7:12 ^f**22:42** Sion 7:42

^g**22:44** Pol 2:34-35; 1Kor 15:25; Hib 1:13 ^h**22:46** Mak 12:34; Luk 20:40

ni, vengan xil latahusil kuh ti pispisien xil xa di lapispisi ni mi mosav xil.^{i 4} Xil di laling rae xil hao xa meas da xat mar moletin xil. E xil, iexil ti tavei tangan lasa hexil vatutou ni xil tangan lapoe.

⁵“Ngan xil ak, holesok xil vus xa di lapol ni, lapol ni tangan taxa moletin xil ti lapusi e ti lasa merereen mi xil ven.^j Xosxa mosav xil di labar xat tutut bokis tei di he xa sepinien na Hi da en, ma xil sung lapol ni nae eilep mak mu mili.^{§§} Xosxa mosav xil di laling ao xil xa tepepiei di murur e kusut eising nae, xil sung di lapol ni ao nae xil latepiei pilei mu mili.^{*} ⁶E anien xil xa tellep, e *nim te pispisien*xil mun, xil di lalepis vontoen xil xa bos xa be na ngan xil kestang xa lapo his xil xa latellep.^{k 7} E von posen xil mun, xil iexil bei pupu tangan moletin xil lisemin xil itel merereen e likes xil ni ‘titsa.’

⁸“E xamim, linakes xamim ni titsa xil ti vengan titsa namim tei takes, e xamim vus mube tua xil tang. ⁹E munakes ti moletin e ut etan ak ni ‘tata’ vengan Tata namim tei takes tang, ngan xa de ut nesao. ¹⁰E linakes ti mun xamim ni ‘suv’ vengan suv namim tei takes, xi be Mesaea. ¹¹Ngan xa di misa tutouen mi xamim nggoni slev namim, xi iaxa mei ihe eilep mak mu ni xamim.^{1 12} Vengan

ngan xil xa di lapol ni nenemien nae be nesao, Hi ipol ni xil lihe tan. E ngan xil xa di lapol ni nenemien nae be tan, Hi ipet rat hisexil ihe nesao.^m

¹³“!Isa pupu mi xamim, titsa xil te rae na Mosis del Farasi xil xa di mung-gusil Hi nggot hilibemim tang! Hi isa pangasien mi xamim vengan xamim iemim ti tavei tangan mupol ni Hi mei vahe suv toto e meulien namim. E melele xa mosav xil iexil bei tangan Hi mei vahe suv toto nae, xamim di musikoe xol xil.^{14 †}

¹⁵“!Isa pupu mi xamim, titsa xil te rae na Mosis del Farasi xil xa di mung-gusil Hi nggot hilibemim tang! Hi isa pangasien mi xamim vengan di mung-gur xoteh tas e tan tangan taxa mukamet moletin ngan e muviles nenemien nan tangan vahusil xamim. E melele xa biles e nggusil pispisien xil namim, xamim mupol ni mei misa pilei sung mili xamim. E momal tang tangan xi mun ihur pangasien itel xamim e Upang xa misakras vamat.

¹⁶“!Isa pupu mi xamim xa di musak tangan ti mutiamu ni moletin xil, tave ti neta xa metemim xil bar!ⁿ Pangasien xa muhuri ihe eilep pupu vengan di mupispisi mi moletin xil mubit, ‘Xosxa moletin tei pol ni hitxatien tei nan e his

§§**23:5** Siu xil vus xa labe malohos di laling sepinien hat (4) xa nggo Vanuvei Eo na Hi di e vangit bokis tei xa hokorong: Eks 13:1-10; 13:11-16; Dut 6:4-9; 11:13-21. Di, labare di vatixil mu hexil melele xa laba tangan lasis. Ngan ak nggusil rae tei na Mosis xa de Dut 6:8.

***23:5** Siu xil vus xa labe malohos di laso rin ni ao xil xa tepepiei e di lalingi murur e kusut eising nae tangan isak ni xil linem xati xa di langgusil xat Hi kestang ixoni ngan xa rae na Mosis xa de Nam 15:37-41 di misep usili.

†**23:14** Rut uvei na Matiu lateling sepinien ak mun xa de Luk 20:47 e Mak 12:40 xa bit, “!Isa pupu mi xamim, titsa xil te rae na Mosis del Farasi xil xa di mung-gusil Hi nggo hilibemim tang! Ve hokanen namim, di muleh holesok xil holu ra tunau xil, e pe met moletin xil, di mupol ni sisen xil xa tepiei. !Ve rin ak, Hi isa pangasien xil xa isa pupu iha xat xamim!”

ⁱ**23:3** Mal 2:7-8 ^j**23:5** Mat 6:1,5 ^k**23:6** Luk 14:7 ^l**23:11** Mat 20:26-27; Mak 9:35; 10:43-44; Luk 9:48; 22:26 ^m**23:12** Siob 22:29; Pro 29:23; Esek 21:26; Luk 14:11; 18:14 ⁿ**23:16** Mat 15:14; 23:24; Rom 2:19

Nim Eo, hitxatien nan be neta sav tang. E xosxa xi pol ni hitxatien nen e his gol xa di Nim Eo, ma ihur xat hitxatien ak ixeh. ¹⁷ !Metemim bar e mutalang tova tang! ?Ngan xave be eilep mak mu, gol te Nim Eo, mu Nim Eo na Hi vari xa di misak ni gol ak be eo? ¹⁸ E di mupispisi mi moletin xil mun mubit, 'Xosxa moletin tei pol ni hitxatien tei nan e his **hor te sanien**, hitxatien nan be neta sav tang. E xosxa xi pol ni e his sanien xa lalingi di xati, ma ihur xat hitxatien ak ixeh. ¹⁹ !O, metemim li bar tova tang! ?Ngan xave be eilep mak mu, sanien mu hor te sanien xa di misak ni sanien ak mei be eo? ²⁰ Ma moletin xa di pol ni hitxatien nan e his hor te sanien di pol ni mun e his holesok xil vus xa di xati. ²¹ E moletin xa pol ni hitxatien nan e his Nim Eo, xi di pol ni e his Hi xa da en. ²² E moletin xa di pol ni hitxatien nan e his ut nesao, xi di pol ni e his vontoen te xeihen na Hi e e his ngan xa di dotan da en.^p

²³ "Isa pupu mi xamim, titsa xil te **rae na Mosis** del Farasi xil xa di munggul Hi nggot hilibemim tang! Hi isa pangasien mi xamim vengan di muteong xat tutut rae xil nggoni sexien xa musa taet^q Vahos mak mu vahit muteong xat rae xil xa latellep vatel ngan xil xa labe tereli mun. ²⁴ !Tave ti neta xa metemim bar,^r e di musak tangan mutiamu ni mosav xil! Xamim di musev kuh oei mamim tangan munamu ti tutut anon tova xa tamese ti, e mutamea sung murom tevi **kamel** tei xa mahulung xa misa mak mu mili.

²⁵ "Isa pupu mi xamim, titsa xil te rae na Mosis del Farasi xil xa di munggul Hi nggot hilibemim tang! Hi isa pangasien mi xamim vengan munggoni kap e pelet xa di lakas moten ni e hale

tang,^s e vangite mumu nggoni tinemim xa polu ni nenemien te hokanen e holesok sav xil xa lasa. ²⁶ !Metemim bar tova tang!^t Itiamu, mukas moten vangit meulien namim. Imak, ma hale mun imese.

²⁷ "Isa pupu mi xamim, titsa xil te rae na Mosis del Farasi xil xa di munggul Hi nggot hilibemim tang! Xamim munggoni von tehinen xil xa lapol kuhi ni e lapen kuhi ni mieh.^u Ut xa hale, lapusi bos xa bos. E vangite xil polu ni si moletin xil e neta sav xil mun xa misa xa misa pupu. ²⁸ Usil sexien ak, xamim mumal nggot hilibemim tang, e tinemim, mupolu ni luvosen e sexien tesa xil.^v

²⁹ "Isa pupu mi xamim, titsa xil te rae na Mosis del Farasi xil xa di munggul Hi nggot hilibemim tang! Pangasien namim isa mak mu vengan xa mupol pilei ni von tehinen na **provet** xil e di mupilas kuhi ni von tehinen na ngan xil xa lamal pe met Hi. ³⁰ E di mubiteni mubit, 'Vahit mateti e melengien na avu namem xil tetiamu, xamem manamos ti natel xil e melele xa latehas vin provet xil ak.' ³¹ !Iaxai vari! Nggo sepinien xati namim, di mubiteni reitin xa mube vatimol xati na ngan xil xa latehas vin provet xil.^w ³² E melele xil namim sung, xamim ti mupol vuol ni naha xa avu namim xil tetiamu latepol kokot ni.

³³ "Xamim mube tetal sasa xil! Reitin, mube vanut tetal sosomen xil xa di mungas vin moletin xil ni vulongomim.^x ?Mulesae reling pangasien te Upang xa misakras vamat itep vari? !Musakras! ³⁴ Misak ni, nisil provet xil, ngan xil xa lakilakil kuhi, e titsa xil mun ha lisel xat xamim tangan muhiles ra tesaen xil namim. E xamim, muhas vin rute xil e

^o23:21 1King 8:13; Sam 26:8 ^p23:22 Aes 66:1; Mat 5:34; Pol 7:49

^q23:23 Lev 27:30; Maek 6:8 ^r23:24 Mat 15:14; 23:16; Rom 2:19

^s23:25 Mak 7:4 ^t23:26 Sion 9:40 ^u23:27 Pol 23:3 ^v23:28 Luk 16:15

^w23:31 Pol 7:52 ^x23:33 Mat 3:7; 12:34; Luk 3:7

muti xat xil e eivave xil. E rute ngan xil mun, mumeas purun xil ni ao te xeih xil xa sanute di en e nim te pispisien xil namim.^y Muhol xil ha mutal xat xil e taon namim xil e e taon sav xil mun.³⁵ Isak ni, pangasien ve maten na moletin xil vus xa lamal pe met Hi iti e hemim. Reitin, maten na *Ebel*^z xa temal pe met Hi xa avu namim tetiamu tehas rohon ni temat teloh teha tetuxoh maten na provet Sakaraea, nat Berekae, xa avu namim xil latehov vini e hilaep te Nim Eo e hor te sanien, maten nae xil vus iti xat xamim.³⁶ Reitin li nabiteni mi xamim, Hi isa pangasien ve maten xil ak iha xat xamim te xosali ak.

³⁷“!O moletin xil te hal *Serusalem!* Xamim iaxa mutehas vin provet xil e mutehov vin eloheoh xil xa Hi tesil xil latemei ve xamim.^a Melengien xil holu, ieok bei pupu tangan nakes viton xamim e nasikoe xol xamim vaxoni toatou tei xa mikes viton tuten xil e muhin xol xil ni aveoun. E xamim iemim ti tavei.³⁸ !Ma xamim mupus ti sung! Hi nasikoe xol xamim ti mun, e imaen Nim Eo namim mei ita hon tang, moletin ti mun nava en.^b ³⁹Nabiteni mi xamim, taxeak iha, munapus ti mun nou ituxoh melele xa muhiteni muhit, *‘!Tuxolxatien iti mi ngan xa di bemei e his Iahova!’*” (Sam 118:26)^c

Iesu misep usil sakpurunien xil del melele te xeih xil xa ti imei

Mak 13:1-31; Luk 21:5-33

24 Melele xa Iesu del *moletin nan xil* di labe reling vangit vioh te *Nim Eo*, moletin nan xil di lati nim xil xa bos te Nim Eo mini.² Ma Iesu biteni

mi xil bit, “?Xamim di mupus holesok xil vus ak? Reitin li nabiteni mi xamim, melengien tei di bemei xa hat xil ak xa latepol ni Nim Eo ak ni navistin xil ti mun. Moletin xil mei lihu lenen xil vus ihe tan.”^d

³Di, Iesu be nesao e Vathu te Urvatiei te *Olip* del moletin nan xil. E melele xa ba dotan, xil kestang lamei visali e lasisi labit, “?Uhiteni mi xamem, holesok xil ak usil Nim Eo istal vilieh vari? ?E naha vari ipisen ni xa xouk umei, e hoxalite te melengien xil xa radi en di bemei sangas?”^e

⁴Iesu bit rilomun ni mi xil bit, “Muxouxou kuhi ve xamim, e munamaen ti moletin mei naluvos xamim.⁵ Vengan moletin xil holu limei e hisok e lihiteni lihit, ‘!Inou nabe Mesaea!’ Ma liluvos moletin xil holu.^f ⁶Mulongeong ni xa vaeen xil xa tellep di bemei, e muhur longeongen mun usil vaeen xil xa di rute xil xa be sotin. E munatemanin ni ti. Holesok xil ak iaxa mei istal itiamu, e nave hoxalite te ut etan ti mu.⁷ Ut tei ivae itel ut tei mun, e kantri xil lihas tan ni kantri sav xil.⁸ Ut xil hao e ut etan, mae kekaten ihas moletin xil e lul holu ilil.⁸ E tave ti neta xa holesok xil ak mei isa itiamu ni melele xa Hi mei ihe suv toto na moletin xil, ngan ak nave hoxalite ti mu. Ixoni melele xa atou tei milong rohon ni mar pangasien xa di pisen ni xa, nave nousav ti, iling tuvava nan.

⁹“Ti, xil mei lital xat xamim e lisa rat xamim muha tangan ha lisa pangasien mi xamim e lihas vin xamim.^h Moletin xil te kantri xil vus iexil iat pangas xamim vengan di munggusil xat nou.

^y23:34 Pol 7:52; 1Tes 2:15; Mat 10:23 ^z23:35 Sen 4:8; Hib 11:4

^a23:37 Pol 7:59; 1Tes 2:15 ^b23:38 1King 9:7-8; Ser 12:7; 22:5

^c23:39 Mat 21:9; Mak 11:10; Luk 19:38 ^d24:2 Luk 19:44

^e24:3 Mat 24:27,37,39; 13:39,40,49; 28:20

^f24:5 Mat 24:11,23-24; Sion 5:43; 1Sion 2:18 ^g24:7 2Kron 15:6; Aes 19:2

^h24:9 Mat 10:17,23; Sion 16:2; Mat 10:22; Sion 15:18

¹⁰ E melele nen ak, moletin xil hao likavitou ra neketen nae e limaen rat tua nae xil lihe he elu nae xil e iexil ti iat xil mun tang. ¹¹ E **provet** te luvošen xil hao mei listal e liluvos moletin xil holu.ⁱ ¹² E vengān sexien te tesaen mei ihe holu mak mu, eheien na moletin xil holu nati ti mun e mosav. ¹³ E ngan xil xa lisoh ixeh e neketen nae ituxoh hoxalite te holesok xil vus ak, Hi iteh meulien e xil.^j ¹⁴ E melele xa longeongen usil Hi xa mei ihe suv toto na moletin xil ha ituxoh rute xil vus e ut etan tēgan moletin xil vus lakilakil ni,^k e melele nen ak vari, ihe hoxalite te holesok xil vus.

¹⁵ “Xamim mupus sepinien na Hi xa texo **provet** Daniel mei istal ihe reitin xa bit, ‘Xil liso neta tei xa be muis pupu ite vangit Nim Eo xa isak ni namese ti mun pe met Hi.’ (Dan 11:31) (Xouk xa di obuli sepinien ak, bos tēgan ukil kuh koute teni.) ¹⁶ E melele xa mupusi, ngan xil xa ladi Sudea litemanon lilesae ha lixus liti e vathu xil. ¹⁷ Xosxa moletin tova di mingel e hale, mesal ihe tovuol tēgan vatilomun vahe nim e vahur neta tova nan.¹ ¹⁸ E xosxa moletin tei di pol e naho, xi nava ti mun tim tēgan vahur eising tova nan. ¹⁹ E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil. ²⁰ Musis mi Hi tēgan melengien xa ti mulesae en nave an tesa ti mu nave **Sabat** ti, ²¹ vengān longpangāsien xil te melengien tesa xil ak isa ili melengien sav xil vus te ut etan: e melele xa Hi tepeas ni ut etan miloh mei duxoh xosali. E hisit melengien xil ak ihe tovuol mun

e melengien xil mun xa ti imei itutou.^m ²² E Hi teta xoteh melengien tesa xil ak mei be tamure mu vengān xi di minem usil ngan xil xa tehosei xil labe nan. Vengān vahit napol ni ti namak, moletin ti mun nameul.

²³ “E melele nen ak, xil lihiteni lihit, ‘!Mupus ti! !Ngan ak be Mesaea xa Hi tehosei!’ Mu lihiteni lihit, ‘!Mupus ti mu! !Xi iaxa da iaxor!’ E xamim, munake reitin ti e sepinien xil ak.ⁿ ²⁴ Vengān Mesaea te luvošen xil e provet te luvošen xil mun limei. E melele xa limei, lipol ni merekel xil e holesok xil xa tellep xa isak ni moletin xil limesep pupu ven. Xil lipol ni tēgan liluvos moletin xil holu lihusil xil.^o Nahe di lisak tēgan lalihi rerat ngan xil mun xa Hi tehosei xil labe nan. ²⁵ Ma muteong kuhi ni sepinien xil ak, vengān, inou, nabit usil holesok xil hao ngamu mi xamim xa mei istal.

²⁶ “Ma xosxa moletin tei mei ihiteni mi xamim ihit, ‘Mesaea da nga xor e uruvuol,’ munaha ti rute ak. E xosxa lihiteni mi xamim lihit, ‘Mesaea xi tak, dat vangit nim ak,’ munake reitin ti en.^p ²⁷ Vengān, melele xa inou, Nat Moletin, nitilomun nime, moletin xil vus lipus kila^q ixoni melele xa lapus an milangas e miehen teni nggur vuol ni tilang hat nggo rin tei e ist ba duxoh rin mun e wes. ²⁸ Moletin xil vus lipus kil rute xa Nat Moletin itilomun en vengān xa imei itel pangāsien holu. Reitin, lipus kila ixo hisit sexien xa di lale kil rute xa neta tei mat da en e melele xa lapus vanut angelu xil ladi ut tei.^{‡ r}

[‡]24:28 Sepinien xati teni bit, “*voltsa*,” tuman tei xa mahulong xa di langga lakapis xol neta tei xa mat.

ⁱ24:11 Mat 24:5,24 ^j24:13 Mat 10:22; Rev 7:14 ^k24:14 Mat 28:19; 10:18

^l24:17 Luk 17:31 ^m24:21 Dan 12:1; Soel 2:2; Rev 7:14 ⁿ24:23 Mat 24:5,11; 1Sion 2:18 ^o24:24 Dut 13:1-3; 2Tes 2:9-10; Rev 13:13-14

^p24:26 Luk 17:23-24 ^q24:27 Mat 24:37,39; 1Kor 15:23; 1Tes 2:19; 3:13; 4:15; 5:23; 2Tes 2:1,8; Tem 5:7,8; 2Pit 3:4,12; 1Sion 2:28 ^r24:28 Luk 17:37

²⁹“E melele xati xa melengien tesa xil ak ivus,
‘Eai imei imaluxoluk
e aveti namem ti mun.’ (Aes 13:10)^s
‘Hitu xil likiri ra tilang hat,
e holesok xil mun xa di nesao,
Hi imulul ni xil.’ (Aes 34:4)^t

³⁰“Reitin, e melele xati nen ak, neta tei istal e tilang hat xa ipisen ni xa inou, Nat Moletin, di namei. E moletin xil vus te ut etan ti lites xil mun tang melele xa lipusi. Xil lipus ‘Nat Moletin imei etan itel momah xil te tilang hat.’ (Dan 7:13)^u Xi imei itel xeihen, e minehinen te xeihen nan ihe eilep. ³¹Xi ihui amaru nan ixeih tenggan vasa rerat **masxaxa** nan xil. E xil lihe rute xil vus e ut etan, lixo rin tei ha lihe rin tei mun, e lileh viton moletin xil vus xa Hi tehosei xil labe nan.^v

³²“Xamim muhur pispisien ixo vatit **fik**. Melele xa lite xil miso rohon ni ute xil xa be neta hu, xamim mukila xa melele te an te tin di bemei. ³³Usil sexien nen tak, melele xa mupus holesok xil ak mei istal, mukila xa mei rilomunen navan di bemei sangas. Reitin, da ngamu e puiteh. ³⁴Reitin li nabiteni mi xamim, holesok xil ak mei istal e melele xa moletin xil te xosali ak limeul tamu liti.^w ³⁵Nabiteni reitin venggan xa neta sav xa ut etan itel tilang hat mun lalikesae e melengien tei, sepinien navan misakras vakesae vatova.”^x

Iesu pispisi ni xa moletin tovuol xa vakil melengien xa Nat Moletin itilomun en

Mak 13:32-37; Luk 17:26-36; 12:41-48

³⁶Iesu biteni mi moletin nan xil bit, “Moletin tovuol xa vakil melengien xati xa inou, Nat Moletin, nitilomun en.^y Reitin, masxaxa xil xa ladi ut nesao, e inou mun, Nat Moletin, matakil ti. Hi Tamer kestang mikil haoa xati teni. ³⁷Mei rilomunen navan, Nat Moletin, ixoni melengien xil na **Noah** tetiamu.^z ³⁸Venggan, e melele nen xil ak, tetiamu ni ngan xa oei xa mahulong temei, moletin xil di lateanien e di latemun, tiramue xil e atou xil di lateteli ba tetuxoh melele xa Noah tehe vangit tuturil.^a ³⁹Xil latnakil ti vari naha xa mei istal ba tetuxoh melele xati xa oei xa eilep temei e mei tehas xil vus latelel. Ixo rin tak, moletin xil litemanin ni mei rilomunen navan, Nat Moletin.^b ⁴⁰E melele nen ak, moletin lu ti lalipol e naho tei takes, e Hi mei ihur rat tei xalu ihe visali e ut nesao, e teimun isin ni e ilingi ita. ⁴¹Reitin, atou lu ti lalipol ni anien, e Hi ihur rat tei xalu iha visali e ut nesao, e teimun isin ni e ilingi ita.

⁴²“Ma, muxuxou kuhi ve xamim, venggan mutakil ti melengien eah iaxa Suv namim itilomun en.^c ⁴³E mukila xa xosxa moletin tei, xa nim man da, mikil melele xati xa moletin te kanen imei en, xi mikila ita nga e iketeh xole tenggan moletin te kanen namei ti e nim man.^d ⁴⁴Ma muvue xat xamim. Venggan, usil sexien nen tak, inou, Nat Moletin, nitilomun

^s24:29 Esek 32:7; Soel 2:10,31; 3:15; Rev 6:12 ^t24:29 Hag 2:6,21; Rev 6:13

^u24:30 Sak 12:10,14; Rev 1:7; Mat 16:27; 26:64

^v24:31 Mat 13:41; Aes 27:13; 1Kor 15:52; 1Tes 4:16; Dut 30:4; Sak 2:6 ^w24:34

Mat 16:28 ^x24:35 Mat 5:18; Luk 16:17 ^y24:36 Pol 1:7; 1Tes 5:1,2 ^z24:37

Sen 6:9-12 ^a24:38 Sen 6:13-7:24; 2Pit 3:6 ^b24:39 Mat 24:27,37; 1Kor 15:23;

1Tes 2:19; 3:13; 4:15; 5:23; 2Tes 2:1,8; Tem 5:7,8; 2Pit 3:4,12; 1Sion 2:28

^c24:42 Mat 25:13 ^d24:43 Luk 12:39-40; 1Tes 5:2; 2Pit 3:10; Rev 3:3; 16:15

nimei e melele tei xa moletin xil linakil ti ixoni moletin te kanen.

⁴⁵“?Visi iaxa be moletin te polien xa be metisou kuhi e di miteong xat rae na suv nan? Xi be ngan xa suv nan milingi be vat na moletin te polien sav xil e tim san tangan ti isa anien mi xil e melele xati teni. ⁴⁶Tuxolxatien iti mi moletin te polien xa, melele xa suv nan itilomun imei, ikameti xa xi di pol ni polien nan xil. ⁴⁷Reitin li nabiteni mi xamim xa suv nan ipet rat moletin te polien ak ihe nesao tangan ti ilaxat holesok sav nan xil mun.”^e

⁴⁸“E xosxa moletin te polien ak, vatin isa, ma ti ihiteni mi xi mun tang ihit, ‘Suv navan namei ti mok.’ ⁴⁹Ma iha ti ihas pangas moletin te polien sav xil mun, e ti ianien e ti imun itel vat munien xil. ⁵⁰E suv nan itilomun imei e melele tei xa moletin te polien ak nakil ti. ⁵¹E melele xa suv nan imei, ihas pangasi, e ikuvun rati ha ite von longpangasien itel ngan xil xa di langgusil Hi nggot hilibexil tang. E xil ti limuis e ti lingas luhexil ve longpangasien nae xil.”^f

**Iesu dei vole tei usil rut atul
maxoe xil xa latavue xat
xil ti ve meien na suv nae**

25 Melele xa Iesu di tamu misepin mi moletin nan xil usil rin xa ti livue xat xil ve meien nan, xi dei vole ak mi xil bit, “Melele xa Hi mei ihe suv toto na moletin xil imak: Vatei, atul maxoe he xalu (10) laba tangan lapus tetelien tei. E melele xa ut da maluxoluk, laleh laet nae xil e laba tangan lavisu mi tiramue xa iteli e lihusili lihe rute xa tetelien ita en.”^g ²Xil lim (5), vatixil tovuol, e xil lim

(5) iaxa langgur vati. ³Ngan xil xa vatixil tovuol laleh laet nae, e latahur ti mun oel vatel xat xil. ⁴E ngan xil xa langgur vatixil, xil vus lapin e valihe xil xa oel di en del xat laet nae xil. ⁵E vengan xa tiramue xa iteli tamei ti mu vamanon, atul maxoe xil ak, vexil memel, ma lapat.

⁶“Maxani, e hilaep te vongien, xil lalong moletin xil di lakekei ni labit, ‘!Xi bemei! !Ngan xa iteli di bemei! !Mei rava ravisu mini e rihusili riha!

⁷“Melele xa atul maxoe xil ak lalonge, latamea e lapol kuhi ni laet nae xil. ⁸E ngan xil xa vatixil tovuol labiles lasis ngan xil xa langgur vatixil labit, ‘Musa ti oel li mi xamem, vengan laet namem sangas vamat xiak.’

⁹“E ngan xil xa langgur vatixil labit, ‘E-e, masakras li. Vengan xa oel namem tapin ti tangan vahe laet namim, ti, e vahe namem mun. Muha tang e sitoan en, e ha muxal ti namim.’

¹⁰“E melele xa rut atul maxoe xil ak laba tangan laxal ti oel nae, tiramue xa iteli mei mistal. Ma atul maxoe xil xa latavue xat kuh xil langgusili ba labe nim xa anien te tetelien^h da en. Di, lakoe xol puiteh teni.

¹¹“E dutou ni, atul maxoe sav xil ak mun mei lastal. Xil lamei visal nim te tetelien e lakei be nesao labit, ‘!Suv, suv! !Sah puiteh li mi xamem!’ⁱ

¹²“E tiramue xa miteli bemei e bit rilomun ni mi xil bit, ‘Nabiteni reitin li, inou natakil ti vari xamim.’”^j

¹³Di, Iesu misepin kor e vole ak bit, “Ma, muvue xat kuh xamim e munapat ti, vengan mutakil ti melele xati xa inou nitilomun en.”^k

^e24:47 Mat 25:21,23 ^f24:51 Mat 8:12; 13:42,50; 22:13; 25:30; Luk 13:28

^g25:1 Luk 12:35-36 ^h25:10 Rev 19:7,9 ⁱ25:11 Luk 13:25,27

^j25:12 Mat 7:23 ^k25:13 Mat 24:42; Mak 13:35; Luk 12:40

**Iesu dei vole usil eilep tei xa miling
nenesien nan de moletin te polien
nan tol (3) tangan lilaxat
kuh naha xa tesa ni mi xatel**

Luk 19:11-27

¹⁴Iesu de vole te mun mi moletin nan xil bit, “Melele xa Hi mei ihe suv toto na moletin xil imak: Vatei, eilep tei misak xat holesok nan xil tangan vahe rute tei xa be sotin.¹ Di, mikes viton moletin te polien nan tol (3) e miling xatel tangan latilaxat holesok nan xil ¹⁵pipin ni metisouen natel. Mi tei, eilep ak miling gol mani be taosen lim (5000) di e hen. Mi tei mun, miling gol mani be taosen lu (2000) di e hen. E mi ngan xa be tol nen, miling gol mani be taosen tei (1000) di e hen.⁶ Bus di, eilep ak ba sung.

¹⁶“Melele xa eilep ak ba, vatei takes, ngan xa nggur gol mani be taosen lim (5000) ba pol sorin ni mani ak ba vuma ... bas xoles gol mani taosen lim (5000) mun mei del xat ngan xa da ngamu. ¹⁷Usil sexien tak, ngan xa tehur gol mani tehe taosen lu (2000), xi mun ba pol sorin ni e bas xoles gol mani be taosen lu (2000) mun. ¹⁸E moletin te polien xa tehur gol mani xa tehe taosen tei (1000), xi ba, minggil vul, e midihin sosen mani na suv nan di en.

¹⁹“Melengien xil hao mei mitavi, e eilep natel dilomun e mikes viton xatel tangan valong kuhi xa latepol ni naha tetel mani xil xa telingi teti heatel.^m ²⁰Moletin te polien nan xa tehur gol mani tehe taosen lim (5000) bemei del xat taosen lim (5000) mun e biteni bit, ‘Suv, oteling gol mani tehe taosen lim (5000) teti e heok. E taxeak, pus ti.

Natepol sorin ni e natehas xoles taosen lim (5000) mun mei del xati.’

²¹“Melele xa suv nan pusi, biteni mini bit, ‘!Bos pupu! Xouk obe moletin tei te polien xa bos e nenesien navan di e xouk. E vengan xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’ⁿ

²²“Di, moletin te polien nan xa tehur gol mani tehe taosen lu (2000) bemei e biteni bit, ‘Suv, oteling gol mani tehe taosen lu (2000) teti e heok. E taxeak, pus ti. Natepol sorin ni e natehas xoles taosen lu (2000) mun mei del xati.’

²³“Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengan xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’^o

²⁴“Di, moletin te polien nan xa tehur gol mani tehe taosen tei bemei visali e biteni mini bit, ‘Suv, inou nakila li xa xouk obe moletin te xeih tei xa di oleh huiei xil ra vatiei xil xa tave xouk ti olihi, e di oleh anien mun xa mosav xil tang latelihi teti e naho sam xil. ²⁵Uluk mikan ni xouk, ma ba nadihin mani nam de vul tei. Pus ti mu, mani xil vus nam xiak.’

²⁶“Melele xa suv nan pusi mak, misepin nggeih mini bit, ‘!Xouk obe moletin te polien tesa tei xa obe mah tova tang! Xouk okil kuhi xa inou nabe moletin te xeih tei xa di naleh huiei xil ra vatiei xil xa tave nou ti nalihi, e di naleh anien mun xa mosav xil tang latelihi teti e naho savan xil. ²⁷Ma, vahit vahos mak mu xa ova oling mani navan vate bangk tova tangan, melele xa natilomun namei,

^f25:15 Gol mani ak, tei nggoni 1000 vatu.

^l25:14 Mak 13:34; Luk 19:12-13 ^m25:19 Mat 18:23

ⁿ25:21 Mat 25:23; Luk 16:10; Mat 24:47

^o25:23 Mat 25:21; Luk 16:10; Mat 24:47

nakila ma namur rat rilomun ni e vatin vata xati.’

²⁸“Di, eilep ak biles pus moletin te polien sav nan e biteni mini bit, ‘Hur rat gol mani ra moletin te polien xai, e ha ulingi ite he ngan xa nggur gol mani taosen he xalu (10,000) ngamu. ²⁹Vengan ngan xil xa di lapol del xat naha xa de hexil ngamu, lisa ti mun mi xil tenggan isak ni hexil mei ipolu mu. E ngan xil xa latapol ni ti neta ni ngan xa de hexil ngamu, tave ti neta xa holesok nae tereli tang, lileh rerati ihe reling xil.^p ³⁰Ma ha mukuvun rat moletin te polien tesa ak ihe hale, ha ite rute xa maluxoluk itel xat ngan xil xa ti limuis e ti lingas luhexil ve longpangasien nae xil.’”^q

Iesu misep usil Melengien te Lepisien

³¹Iesu biteni mun mi moletin nan xil bit, “Melele xa Nat Moletin^s itilomun en, minehinen te xeihen istal en e imei itel xat *masxaxa* xil vus. Ti, itotan e voninen te xeihen e ilepis moletin xil.^r ³²E melele nen ak, moletin xil te kantri xil vus mei lihe vituei e rute tei takes. Xil mei lisoh pe meten, e xi iseti xil lihe vanute lu. Xi ipol ni ixoni moletin tei xa di milaxat sipsip xil xa di miseti nani xil reling sipsip san xil.^s ³³Ngan xil xa langgoni sipsip xil, iling xil liti e rin metu. E ngan xil xa langgoni nani xil ha liti e rin meil.

³⁴“Ti, xi isepin mi xil nggoni suv toto nae. Ihiteni mi ngan xil xa ladi e rin metu ihit, ‘!Mumei, xamim xa tuxolxatien na Tata navan di e xamim!^t ³⁵Vengan xa melele xa mae teat nou, mutesa anien minou; melele xa meruru teat nou, mutesa oei minou natemu ni; e melele

xa natemei natexoni ngan halesav tei, mutehur pilei nou natemei e tim samim xil.^u ³⁶Reitin, melele xa eising navan tehe tovuol, xamim mutesing xol nou; melele xa natemesei, xamim mutelaxat kuh nou; e melele xa natete nim te xeih, xamim mei mutesa ni nou.’

³⁷“Ti, ngan xil xa lamal pe met Hi xa liti e rin metu lihith rilomun ni mini lihith, ‘?Suv, vilieh vari iaxa matepusuk xa mae teatuk e matesa anien minuk; mu meruru teatuk e matesa oei minuk tenggan omu ni? ³⁸?Vilieh vari iaxa matepusuk otexoni ngan halesav tei e matehur pilei xouk otemei e tim samem; mu eising nam tehe tovuol e matesing xolok? ³⁹?E vilieh mun iaxa matepusuk otemesei e matelaxatuk; mu otete nim te xeih e matehat matesao ni xouk?’

⁴⁰“Ma, suv toto ak ihiteni mi xil ihit, ‘Reitin li nabiteni mi xamim, holesok xil vus xa mutepol ni mi tuak xil ak, tave ti neta xa xi tehe movotei tei tang, e pe metok, lehit ngan xa mutepol ni minou vari tang.’^v

⁴¹“Ti, ihiteni mi ngan xil xa liti e rin meil ihit, ‘!Xamim, ngan xil xa Hi tesa halesil mi xamim, muhe reling nou! !Ha muhe Upang xa misakras vamat vatova xa Hi tesak mesen ni ngamu tenggan ihe vonine *Temat* itel masxaxa nan xil!^w

⁴²Vengan melele xa mae teat nou, mutnasa ti anien minou; melele xa meruru teat nou, mutnasa ti oei minou namu ni; ⁴³e melele xa natemei natexoni ngan halesav tei, mutnahur pilei nou ti namat e tim samim xil. E melele xa eising navan tehe tovuol, mutnasing xol nou ti; melele xa natemesei, xamim mutnalaxat

§25:31 Nat Moletin be his tei xa Iesu tehuri tenggan vasep usil meien nan.

ᵖ25:29 Mat 13:12; Mak 4:25; Luk 8:18

ᵍ25:30 Mat 8:12; 13:42,50; 22:13; 24:51; Luk 13:28 ᵇ25:31 Dut 33:2; Sak 14:5; Mat 16:27; Siud 14; Mat 19:28; Rev 3:21; 20:11 ᵇ25:32 Esek 34:17

ᵇ25:34 Luk 22:30; Luk 12:32 ᵇ25:35 Aes 58:7 ᵇ25:40 Pro 19:17; Mat 10:42; 18:5; Mak 9:41 ᵇ25:41 Mat 7:23; Mak 9:48; Siud 1:7; Rev 20:10

kuh nou ti; e melele xa natete nim te xeih, xamim mutnasao ni nou ti.’

⁴⁴“Ti, moletin xil ak lisisi lihit, ‘?Suv, vilieh vari iaxa matepusuk xa mae mu meruru teatuk, mu otemei texoni ngan halesav tei, mu eising nam tehe tovuol, mu otemesei, mu otete nim te xeih e matnatutou ni xoux ti?’

⁴⁵“Ma, xi ihiteni mi xil ihit, ‘Reitin li nabiteni mi xamim, holesok xil vus ak, xosxa mutnapol ni ti mi tuak xil ak, tave ti neta xa xi tehe movotei tei tang, e pe metok, lehit ngan xa mutnapol ni ti minou vari tang.’

⁴⁶“Ma xil vus xa latamal ti pe meten, Nat Moletin iso rerat xil vus ha liti rute xa longpangasien nae xil misakras vavus vatova. E ngan xil xa lamal pe meten ha lihur meulien sal.”^x

Vat na Siu xil lalang ves suse tengan lavas vin Iesu vaxo en

Mak 14:1-2; Luk 22:1-2; Sion 11:45-53

26 Melele xa Iesu pispisi ni holesok xil ak mi *moletin nan xil* bus, xi biteni mi xil bit, ²“Ngoni ngan taxa mukila ngamu, melengien lu sutang di, ti, ripol ni *Anien te Tavien*.^y

³E melele taxa Iesu di misepin, e tim xa eilep sa Kaeafas xa be vatixar na pris xil, *vat xil na pris xil* del elda na Siu xil lamei vituei. ⁴Xil di lalang ves suse tenggan latal xat xuxus ni Iesu e lavasi vamat vaxo en. ⁵Ma labiteni labit, “Rinapol ni ti e melengien te Anien te Tavien venggan, maxani, moletin xil linavae mi xil mun tang.”

Iesu ba ni anien tei e atou tei pisen merereen mini

Mak 14:3-9; Sion 12:1-8

⁶E melele xa Iesu da tamu e metimal te hal Betani, xi ba di ngganien e tim sa

Saemon xa, tetiamu, mesien *leporsi* teat tenben. ⁷Di, atou tei bemei nim e nggur valit vokon tei xa lapol ni valite ni hat hos tei xa lakesi ni alabasta. Vokon ak, von bos xa bos e mani teni mun nggeih. E xi bemei visal Iesu e rute xa dotan da en, e mideh vokon ak ba xat vatin tenggan vapisen merereen nan mini.^z

⁸E melele xa moletin na Iesu xil lapusi, iexil nggati e laseputut ni labit, “?!Veneh ma di purun vokon ak mak!? ⁹Vahos mak mu vahit vaha vapos ni ni mani tova xa eilep. Ti, mani nen mikila vatutou ni hoeo xil.”

¹⁰E Iesu mikil naha xa di lasep usili, ma biteni mi xil bit, “?Xamim di mubul xat atou ak veneh? Xi pol ni neta tei xa bos pupu minou. ¹¹Vengan hoeo xil liti visal xamim vehakut, e inou, nasakras nate visal xamim vahehi. ¹²Melele xa mideh vokon ak ba xat tiei navan, xi di misak mesen nou ve tehinen navan. ¹³Reitin li nabiteni mi xamim, e rute xil vus xa lihithiten longgeongen hos usil nou en, xil lihit usil naha xa atou ak tepol ni minou. E isak ni moletin xil linem xati ven.”

Sudas maen ni tangan isa rat Iesu mi vat xil na pris xil

Mak 14:10-11; Luk 22:3-6

¹⁴Di, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil. ¹⁵Xi misis xil bit, “?Xosxa nisa rat Iesu mei ite hemim, ma musa naha minou?” Ma xil labuli silva mani ba

^x25:46 Dan 12:2; Sion 5:29 ^y26:2 Eks 12:1-27; Mat 20:18-19; 27:26; 15:15; Luk 24:7,20; Sion 19:16 ^z26:7 Luk 7:36-38

duxoh hanutap tei e he xalu mun (30)**
tengan lisa ni mini.^a ¹⁶Ma Sudas maen
ni. Di, e melele nen ak ba, xi milang ves
suse tangan isa rat Iesu ha ihe hexil ixo
en.

Iesu ngga Anien te Tavien del moletin nan xil

*Mak 14:12-21; Luk
22:7-13,21-23; Sion 13:21-30*

¹⁷E melengien kokot te Melengien xil
te Beret xa Is Tovuol En, moletin na Iesu
xil lamei visali e lasisi labit, “?Rute xave
iaxa iem bei tangan masak mesen Anien
te Tavien en?”^b

¹⁸Iesu bit rilomun ni mi xil bit, “Muhe
taon te hal Serusalem xa da iaxor, e
mukamet moletin tei e rute ak. Muhiteni
mini muhit, “Titsa bit, “Melengien na-
van bemei sangas. E inou mei nia Anien
te Tavien e tim sam itel moletin na-
van xil.””^c ¹⁹Ma moletin nan xil laba e
lapol ni nggoni ngan taxa Iesu tehiteni
mi xil. E rute ak, xil lasak mesen Anien
te Tavien en.

²⁰E melele xa meteneai ba minu, Iesu
bemei e dotan e von anien en del moletin
nan xil xa labe lu e le tei (12). ²¹E melele
xa di langganien, Iesu bit lelen ni mi xil
bit, “Reitin li nabiteni mi xamim, tei e
xamim iaxa isa rat nou nihe he elu navan
xil.”

²²Melele xa lalonge mak, xil lalonge
misa pupu, ma xil kekes di lasis Iesu
labit, “?Suv midep li, onemi obit inou?”

²³Iesu bit rilomun ni mi xil bit, “Re-
itin, tei e xamim vari xa di mungganien
vituei del nou iaxa isa rat nou niha.”^{††}

²⁴E be reitin xa inou, Nat Moletin, nimat
ixoni ngan xa Vanuvei Eo di misepin ni.^c
!E isa pupu mi ngan xa isa rat nou! Mo-
letin ak, vahos mak mu vahit linapesi ti
vengan pangasien xa Hi isa ni mini ihe
eilep pupu.”

²⁵Di, Sudas xa isa rati iha misisi bit,
“?Titsa midep, onemi obit inou?”

Ma Iesu bit rilomun ni mini bit, “Ixon
ngan taxa xouk obiteni.”

²⁶E melele xa di langganien, Iesu ng-
gur beret e memes Hi ven.^d Di, bul pasi,
e melele xa di miseti mi moletin nan xil,
xi biteni bit, “Muhuri mua ni. Ngan ak
be tiei navan.”

²⁷Di, Iesu nggur kap xa uae ba en,
memes Hi ven, e melele xa misa ni mi
xil, xi biteni bit, “Xamim vus mumu ni.

²⁸Uae ak be ra navan xa isak ni **hitxa-
tien hu te xeih** na Hi mei istal e ihe re-
itin.^{‡‡} Reok xa ileh ve moletin xil holu
ihe sanien tei iha mi Hi tangan naketeh
ti mun nasa mi xil ve **tesaen** nae xil.^e

²⁹Nabiteni mi xamim, ninamu ti mun
uae ak ituxoh melele xa nimu uae hu
itel xamim e rute xa Tata navan be suv
toto en.”

³⁰Melele xa langganien e lakikei ni
sisien tei bus, xil lastal e ba labe Vathu
te Urvatiei te **Olip**.^f

**26:15 Sak 11:12-13di tesepe usil 30 silva mani ak xa texoni 30,000 vatu.

††26:23 Ngan ak isak ni naha xa Sam 41:9 tehiteni tangan istal mei ihe reitin.

‡‡26:28 E Eks 24:6-8, Mosis mitah re buluk e hor te sanien tangan vasak ni hitxatien
matu te xeih xa Hi tepol ni tetel mol-Isrel xil mei istal e ihe reitin. Usil sexien nen
tak, re Iesu pol ni hitxatien hu te xeih mei istal e ihe reitin xa Hi iteh meulien na
moletin xil te ut etan.

^a26:15 Eks 21:32; Sak 11:12 ^b26:17 Eks 12:14-20 ^c26:24 Sam 22:7,8,16-18;

Aes 53:9 ^d26:26 Mat 14:19; 15:36; Mak 6:41; 8:6; Luk 9:16; 1Kor 10:16

^e26:28 Ser 31:31; Sak 9:11; Hib 9:20 ^f26:30 Sam 113-118; Luk 22:39

Iesu bit lelen ni xa moletin nan xil lilesae relingi

*Mak 14:27-31; Luk
22:31-34; Sion 13:36-38*

³¹ Melele xa laduxoh Vathu te Urvatiei te Olip, Iesu biteni mi moletin nan xil bit, “E vongien tak, xamim vus mulesae reling nou⁸ ixoni ngan xa Hi tese pin ni e Vanuvei Eo xa bit,

‘Inou nihas moletin xa di milaxat sipsip xil, e sipsip san xil liletsil relingi.’ (Sak 13:7)

³² E melele xa nimea rilomun ra maten, inou nitiamu ni xamim ha nite Kaleli.”^h

³³ E Pita mitamea e biteni mini bit, “!Tave ti neta xa moletin sav xil lilesae relinguk, inou ninave relinguk ti vatova!”

³⁴ Ma Iesu bit rilomun ni mini bit, “Reitin li nabiteni minuk, e vongien tak, melele xa ut nalan ti mu e tuto xil linakorati ti mu, e xouk uhiteni ihe vatol ngamu xa otakil ti nou.”ⁱ

³⁵ E Pita biteni nggeih pilei sung bit, “!E-e, namak ti! !Tave ti neta xa nimat itelak, inou nisakras namiteni xa natakil ti xouk!” E ngan tesav xil mun labiteni nggoni tang.^j

Iesu misis e ut Ketsemani e miling meulien nan e he Hi

Mak 14:32-42; Luk 22:39-46

³⁶ Di, Iesu be rute tei xa lakesi ni Ketsemani del moletin nan xil.^k Melele xa laduxoh rute ak, xi biteni mi xil bit, “Mutotan muti tak e ti mutatil nou. Inou nitiamu niha nisis inggaxor.” ³⁷ Xi nggur Pita del nat Sepeti xalu latonggusili.

E melele xa latoba, nenemien na Iesu basi holu e milonge misa pupu.¹ ³⁸ Ma xi biteni mi xatel bit, “Tinok li polu ni nenexoen, e nalonge lehit ngan xa bit va-has vin nou. Muti tak, e ti mutiketeh itel nou.”^m

³⁹ Di, Iesu mikakao reling xatel vuteili tang, mitingeiril be tan e misis mi Hi bit, “Tata li, xosxa suse sav tova mun da tamu, uhur rat longpangasien ak ihe reling nou li. E onapol ni ti naxoni ngan xa ieok bei, e upol ni ixoni ngan kestang xa xouk iem bei.”ⁿ

⁴⁰ Di, xi dilomun be visal xatel e mikameti xa di latopat. Ma xi biteni mi Pita bit, “?Midep xiak? ?Mutsakras mutketeh vatel nou vahe haoa tei takes?”

⁴¹ Mutketeh e ti mutisis tangan mutnamot ti e melele xa sakkisien xil imei e xamitel. E tinemitel, iemitel bei tangan mutipol ni neta tei xa momal, e vemitel memel.”^o

⁴² Di, Iesu dilomun ba e misis bit, “Tata li, xosxa suse sav tovuol e be tangan xa nihur vuol ni longpangasien xil ak, ma upol ni ixoni ngan kestang xa xouk iem bei.”^p

⁴³ E melele xa Iesu dilomun, mikameti xa termali latopat mun vengan lasakras latohur xat metenoh natel. ⁴⁴ Ma xi be reling termali mun, e ba misis be vatol nen ni sisen nan xati tang.^q

⁴⁵ E melele xa Iesu dilomun bemei visal termali, biteni mi xatel bit, “?Di tamu mutopat? ?Di tamu mutongel? !Topus ti! Taxeak be melele xati^r ⁴⁶ !Tomea, ratoha! Moletin xa isa rat nou, xi tu xa di bemei iaxor.”^s

⁸26:31 Mat 26:56; Sion 16:32 ^h26:32 Mat 28:7,16 ⁱ26:34 Mat 26:69-75; Mak 14:66-72; Luk 22:56-62; Sion 18:25-27 ^j26:35 Sion 11:16

^k26:36 Sion 18:1 ^l26:37 Mat 17:1; Mak 5:37; 14:33; Luk 8:51; 9:28

^m26:38 Sam 42:5,11; 43:5; Sion 12:27; 4:9 ⁿ26:39 Hib 5:7-8

^o26:41 Mat 6:13; Luk 11:4 ^p26:42 Mat 6:10 ^q26:44 2Kor 12:8

^r26:45 Sion 12:23; 13:1; 17:1; Mat 17:22; Mak 9:31; 10:33; Luk 9:44; 24:7

^s26:46 Sion 14:31

Ladal xat Iesu

*Mak 14:43-50; Luk
22:47-53; Sion 18:3-12*

⁴⁷ Melele xa Iesu di tamu misepin, Sudas, tei e xil xa labe lu e le (12) nan, mistal. Xi bemei del xat vanut moletin xil xa di laleh xat tiei del homenda xil te vaeen. Xil lamei langgusil nenemien na vat xil na pris xil del elda xil na Siu xil. ⁴⁸ Sudas xa tehein xati tangan isa rat Iesu teling xati tehit, “Moletin xa nipesum ni vin, xi vari iaxa be ngan xa iemim bei. Mumei mutal xati.” ⁴⁹ Ma Sudas mika mal be visal Iesu, pesum ni vin e bit, “Titsa, bos vongien li.”

⁵⁰ E Iesu bit rilomun ni mini bit, “Tuxoli, pol ni tang vaxoni ngan xa xouk omei ven.”

Di, vanut moletin xil ak lamei ladal xat Iesu. ⁵¹ E moletin tei na Iesu milih rat tiei te vaeen nan e da xoteh vurang slev tei na vatixar na pris xil.^t

⁵² E Iesu misel mini bit, “Singin xat tiei nam mun vate voninen, vangan ngan xil xa di labae del tiei, tiei na mosav xil lihas vini.” ⁵³ Vahit ngan xa ieok vahei, inou nakila nasis Tata navan, ma vatei takes, vasa vanut *masxaxa* te vaeen xil lali lu e le (12) xa mahulong tangan mei livae e rin navan.[¶] ⁵⁴ ?E vahit napol ni, ma Vanuvei Eo xa bit xati xa holesok xil ak istal imak mei ihe reitin itep?”

⁵⁵ Di, Iesu biles pus vanut moletin xil ak e biteni mi xil bit, “?Veneh ma di muleh tiei e homenda xil te vaeen tangan mei mutal xat nou? ?Munemi mubit inou di nadiamu ni moletin xil tangan ha mavae vatel kavmen nar? !E-e! Me-lengien xil ngasen nadotan nade vangit

vioh te *Nim Eo* e di nispisi mi moletin xil e mutamei ti tangan mutal xat nou.^v ⁵⁶ E holesok xil vus ak mei mistal tangan vasak ni naha xa *provet* tetis usili e Vanuvei Eo mei vastal vahe reitin.” E melele xa ladal xati, moletin nan xil vus lalesae relingi.^w

Langgur Iesu be kot na vat xil na Siu xil

*Mak 14:53-65; Luk 22:54-55,63-71;
Sion 18:13-14,19-24*

⁵⁷ Ngan xil xa ladal xat Iesu ladela labe tim sa Kaeafas, xa be vatixar na pris xil. E rute ak, *titsa* xil te rae na Mosis del elda xil na Siu xil labe vituei ngamu ladi. ⁵⁸ E Pita di mika xus e di nggusil vanut moletin xil xa di ladel Iesu laba vuma ... laduxoh vioh te tim sa vatixar ak. E rute ak, Pita be vangit vioh e ba dotan del mereteketeh xil te nim ak tangan vapus ti xa lipol ni naha mi Iesu.

⁵⁹ Vat xil na pris xil del eilep sav xil mun na Siu xil di lalang ni moletin tova xa mei iluvos xa Iesu pol ni tesaen tei xa likila lihasi imat ven. ⁶⁰ E tave ti neta xa moletin holu lapol ni luvozen ba xat Iesu, latakamet ti neta xa lakila lasa rati ha vamat ven.

Di, moletin lu mei lusoh ⁶¹ e lusepin mi kaonsel ak lubit, “Xamel matelonge xa moletin ak tehit, ‘Inou nikila nihi len *Nim Eo* na Hi. Ti, nikili ni mun e me-lengien tol tang.”^x

⁶² Ma vatixar mitamea e misis Iesu bit, “?Ma midep? Xouk di olong sepinien xa di laso ni ba xatuk. ?Neta tovuol xa obit oviteni?” ⁶³ E Iesu dat votei tang.^y

Ma vatixar misisi mun bit, “E pe met Hi xa meul, inou nasemae ni xouk ten-

[¶]26:53 E melele nen ak, moletin te vaeen xil te hal Rom labe 6000 xa ladi e vanute tei. Ma Iesu bit masxaxa te vaeen xil ak lili 72,000 xa mikila vakes xil.

^t26:51 Sion 18:26 ^u26:52 Sen 9:6; Rev 13:10 ^v26:55 Luk 19:47; 21:37; Sion 18:20 ^w26:56 Sak 13:7; Mat 26:31; Sion 16:32 ^x26:61 Mat 27:40; Sion 2:19; Pol 6:14 ^y26:63 Aes 53:7; Mat 27:12,14; Luk 23:9; Sion 19:9

gan usepin ni reitinen. ?Reitin xa xouk obe Mesaea, Nat Hi?”^z

⁶⁴ Iesu bit rilomun ni mini bit, “Nggoni ngan xa di obiteni. E nabiteni mi xamim xa taxeak iha, mupus ...

‘Nat Moletin itotan

ite ri metu na Hi Suv te Xeihen.

!E mupusi imei e ut etan

ixo momah xil te tilang hat!’” (Sam 110:1;

Dan 7:13)

⁶⁵ Melele xa vatixar milong sepinien nan, ien mikat xa mikat, dal papas eising nan e miki nggeih bit, “?!Mulonge!? !Xi misep purun his Hi vari? !Veneh ma di ralang ni sepinien tova mun tangan vaha xati? !Xamim vus mulonge xa di misep purun his Hi!^a ⁶⁶ ?Munemi midep vari?”

Xil vus labit rilomun ni labit, “!Momal tang tangan imat!”

⁶⁷ Di, xil lakusah ba xat valnaon e ladi. E rute ngan xil mun lalevesi^b ⁶⁸ e labit, “?!Xosxa obit obe Mesaea xati, uhit pisi, visi iaxa diuk!?”

Pita biteni be vatol xa takil ti Iesu

Mak 14:66-72; Luk 22:56-62;

Sion 18:15-18,25-27

⁶⁹ Melele xa Pita di tamu dotan e vangit vloh te nim ma vatixar na pris xil, atuli tei te polien bemei visali e biteni mini bit, “Xouk mun di otehusil Iesu te hal Kaleli.”

⁷⁰ E Pita muun xole pe met moletin xil bit, “!Tave reitin ti! Inou natakil ti naha xa di obiteni iaxai.”

⁷¹ Di, Pita mitamea e mikakao ba ve puiteh te vloh. E rute ak, atuli te polien tei mun pusi, ma biteni mi moletin xil bit, “!Moletin ak mun be tei e xil xa di latehusil Iesu te hal Nasaret!”

⁷² Ma vatei mun, Pita muun xole e bit, “!Pe met Hi, nabiteni reitin xa natakil ti moletin ak vari!”

⁷³ Tavehi, moletin xil xa dit lasoh lamei visal Pita e labiteni mini labit, “Xouk vari obe moletin tei nan venggan sepinien nam nggoni ngan Kaleli xil tang.”

⁷⁴ E Pita misepin nggeih bit, “!Natakil ti moletin xai vari xa di musep usili iaxai! !Hi isa halesil iha xat nou xosxa sepinien navan be luvosen!”

Vatei takes, tuto tei mikorat. ⁷⁵ E melele xa milonge, Pita minem rilomun ni naha xa Iesu tehiteni mini tehit, “Ut nalan ti mu e tuto xil linakorat ti mu, e xouk uhiteni ihe vatol xa xouk otakil ti inou.”^c Ma milonge misa xa misa e be reling vangit vloh ak, ba di muis nggeih.

Sudas ba misar hiraen venggan xa milonge misa ve naha xa tepol ni mi Iesu

Mak 15:1; Luk 23:1-2; Sion 18:28-32

27 E makoe roroh, ***vat xil na pris xil*** del elda xil na Siu xil lamei e nenemien tei takes tangan lakin maten mi Iesu.^d ² Ma labar xati e ladela be visal Paelet xa be vat te kavmen te rute ak tangan lasa rati vaha mini.^e

³ Melele xa Sudas xa tesa rat Iesu pusi xa lamaen ni tangan Iesu vaha vamat, xi biles nenemien nan e misak tangan vasa rilomun ni silva mani xa be hanutap tei e he xalu mun (30) vaha mi vat xil na pris xil del elda xil.^f ⁴ Xi bit rati bit, “Inou napol misa pupu, venggan natesa rat moletin ak xa tenapol ni ti neta vasa tangan ha vamat ven.”

E xil labit rilomun ni mini labit, “Xamem mabit munakil ti. Ngan xai be nam sung.”

^z26:63 Mat 16:16-17 ^a26:65 Lev 24:16; Sion 19:7 ^b26:67 Aes 50:6; 53:5

^c26:75 Mat 26:34; Mak 14:30; Luk 22:34; Sion 13:38

^d27:1 Mat 12:14; Mak 3:6 ^e27:2 Aes 53:8 ^f27:3 Mat 26:14-15

⁵Ma Sudas mirang lelen mani ak be tan e vangit vloh te **Nim Eo**, e milesae. Di, ba nggur ao tei e misar xoteh hiraen ni.⁸

⁶Melele xa ba, vat xil na pris xil ba lale viton silva mani xil ak e labiteni labit, “Mani ak tamese ti vengang xa latexal rat meulien na moletin tei ni. Ma usil **rae** nar xil, tamal ti tangan raso ni vahe ateli te **Nim Eo**.” ⁷Lasep usili, ma lamae e nenemien tei. Ma laleh mani xil ak e ba lapus moletin tei xa di pol ni holesok xil ni tan te pili. Del mani ak, xil langgal rat mavulut tan tei rani tangan mei ihe von tehinen tova xa ti litihin ngan halesav xil en. ⁸Ve rin ak, lakes rute ak ni “Tan te Ra’ duxoh xosali. ⁹Ma naha xa Hi tehit lelen ni texo **provet Seremaea** mei be reitin xa bit, “Xil laleh silva mani hanutap tei e he xalu mun (30), xa momal ni mani xa mol-Isrel xil lateling xati tangan lixal rat meulien nan ni. ¹⁰E del mani ak, xil langgal rat mavulut tan tei ra moletin tei xa di pol ni holesok xil ni tan te pili, nggoni ngan xa Hi Suv tesemae ni minou.” (Sak 11:12-13; Ser 19:1-13; 32:6-9)

Ladel Iesu ba misoh pe met Suv Paelet tangan lihas vini

Mak 15:2-5; Luk 23:3-5; Sion 18:33-38

¹¹E melele xati xa Sudas di misar hiraen, Iesu ba misoh pe met suv Paelet xa be vat te kavmen tete hal Sudea. Di, Paelet misisi bit, “?Midep? ?Be reitin xa xouk obe suv toto na **Siu** xil?”^h

Iesu bit rilomun ni mini bit, “Nggoni ngan taxa xouk obiteni.”

¹²E melele xa vat xil na pris xil del elda xil na Siu xil lasepin ba xati, xi tavit ti neta tangan vatutou ni rin nan.ⁱ ¹³Ma Paelet misisi bit, “?Otalong ti sepinien

xil xa di labiteni ba xatuk iaxai?” ¹⁴E Iesu dat votei tang, e tavit rilomun ni ti sepinien nae. Melele xa suv Paelet pus sexien nan, mesep pupu ven.

¹⁵Be sexien matu tei na suv Paelet xa, e melengien xati te Anien te Taviyen, xi di maen moletin tei xa moletin xil labosei tangan ha ven imase ra nim te xeih. ¹⁶E melele nen ak, vatxeih tei tete nim te xeih, hisen Barabas xa moletin xil lakil kuhi mak ve sexien tesa xil xa xi di tepol ni. ¹⁷Ma melele xa suv Paelet pusi xa vanut moletin xil ak mei ladi vituei, misis xil bit, “?Ngan xave iaxa iemim bei tangan nimaen ni ha ven imase: Barabas mu Iesu xa lakesi ni Mesaea?” ¹⁸Xi misis xil mak vengang xa pus kila xa vat xil na pris xil latesa rat Iesu mini vengang di lanem misa ni tang.

¹⁹E melele xa suv Paelet di tamu dotan e von koten nan, atou nan misa sepinien tei mini bit, “Onapol ni ti neta naha xat moletin ak, vengang xi momal tevi. Xosali, nanexo pupu ve metuveen tei xa natepusi usili.”

²⁰E vat xil na pris xil del elda xil na Siu xil lasi petine vanut moletin xil ak tangan lasis Paelet vamaen Barabas ha ven imase e ihas Iesu imat.

²¹Paelet ba misisi vanut moletin xil ak vatei mun bit, “?Ngan xave e xalu iaxa iemim bei tangan nimaen ni ha ven imase?”

Ma xil vus lakei ba ni labit, “!Barabas!”^j

²²Ma Paelet misisi xil mun bit, “?Xosxa imaxai, ma nipol ni naha mi Iesu xa lakesi ni Mesaea?”

E xil vus lakei be nesao labit, “!Ti xati e eivave!”^k

⁸27:5 Pol 1:18-19 ^h27:11 Mat 2:2; 27:29,37; Mak 15:9,12,18,26; Luk 23:37,38; Sion 18:39; 19:3,19,21

ⁱ27:12 Aes 53:7; Mat 26:63; 27:14; Luk 23:9; Sion 19:9 ^j27:21 Pol 3:14

^k27:22 Pol 3:13; 13:28

²³Di, Paelet misis xil mun bit, “?Veneh? ?Xi pol ni naha misa?”

E lakei ngegeh pilei sung labit, “!Ti xati e eivave!”

²⁴Melele xa Paelet pusi xa misakras vahiles nenemien nae e sangas lapol ni vaeen, xi po oei e mikas hen pe met moletin xil vus. E melele xa di pol ni, xi biteni mi xil bit, “Taxeak, nakas rat ra te maten na moletin ak ra heok, vengon napusi xa xi tapol ni ti neta vasa tangan ha vamat ven. !Ma xosxa imat, ren iti e hemim sung!”¹

²⁵E vanut moletin xil ak labit rilomun ni mini labit, “!Bos tang, ren iti e hemem itel horamue namem xil mun!”^m

²⁶Ma, nggusil eheien nae, Paelet maen Barabas ba ven mase. E mi Iesu, xi mis-emaen ni tangan moletin te vaeen nan xil ha limeas pangasi ni ao te xeih xa sanute di en, ti, litela ha liti xati e eivave.

Moletin te vaeen xil lapol pepamen ni Iesu

Mak 15:16-20; Sion 19:2-3

²⁷Melele xa lameas pangas Iesu bus, moletin te vaeen xil na Paelet ladela labe vangit vloh te nim mae xa mahulong e lakes viton moletin te vaeen sav xil vus xa ladi vituei tangan lamei. ²⁸Xil ladal rat eising na Iesu e lasing xole ni kaliko tei xa pili nggoni ngan na suv toto xil.ⁿ ²⁹Di, lapol pepamen ni nggoni ngan xa be suv toto tei. Langgil xat vatlu-voluv tei ni ao tei xa sanute xil tepiei di en, e lasili xol vatin. Laling liei tei de hen metu, e di latingeiril pepamen pe meten nggoni ngan xa di lasa merereen nae mini. E melele xa di lapol ni, labiteni mini labit, “!O suv toto na Siu

xil, xamem di mamerere ni xouk!”^o ³⁰Di, lakusah ba xati, lalihi rat eitingil ak rani, e labas vatin ni.^p ³¹Melele xa lapol pepamen ni bus, langgur rat kaliko te pili ak be relingi, e lasing xole ni eising nan mun. Di, ladela ba tangan ha liti xati e eivave.

Ladi xat Iesu e eivave

*Mak 15:21-32; Luk
23:26-43; Sion 19:17-27*

³²Melele xa moletin te vaeen xil ladel Iesu laba, xil labisu ni moletin tei e suse, hisen Saemon te hal Saerin. Lamei visali e langgeih xati tangan vapo eivave na Iesu. ³³Di, ladel Iesu ba labe nesao e Vathu Kolkota, xa koute teni be ‘Valvat Moletin.’ ³⁴E rute ak, lasa uaeen mi Iesu xa labilesi del neta tei xa mikon.^q E melele xa Iesu mu pisi, misin ni. ³⁵Di, moletin te vaeen xil ak ladi xati e eivave. E melele xa murur da en, xil di laso daes tangan vapisen ni xa visi e xil iaxa ileh mavulut eising xil na Iesu.^r ³⁶E rute ak, xil ladotan e di laketeh xole. ³⁷E eivave nan, ladi xat tisen tei de nesao ni vatin xa bit mesen rin xa ladi xati ven. Tisen ak ladisi labit, ‘Ngan ak be Iesu, suv toto na Siu xil.’^s ³⁸E melele nen ak, lateti xat moletin lu xa lutepol tesa luteti e eivave lu mun. Tei tete rin metu, e tei tete rin meil.^t

³⁹Melele xa Iesu murur de eivave, moletin xil xa di lakakao langgo visali di lakuvun vatixil e di langue xati^u ⁴⁰labit, “!Ei, xouk xa otehiteni otehit uhu len Nim Eo na Hi, ti, ukili ni mun e melengien tol tang, bos mak mu tangan uteh meulien e xouk mun tang! !Xosxa

¹27:24 Dut 21:6-9; Sam 26:6 ^m27:25 Esek 33:5; Pol 5:28

ⁿ27:28 Luk 23:11 ^o27:29 Mat 2:2; 27:11,37; Mak 15:9,12,18,26; Luk 23:37,38; Sion 18:39; 19:3,19,21 ^p27:30 Aes 50:6 ^q27:34 Sam 69:21

^r27:35 Sam 22:18 ^s27:37 Mat 2:2; 27:11,29; Mak 15:9,12,18,26; Luk 23:37,38; Sion 18:39; 19:3,19,21 ^t27:38 Aes 53:12 ^u27:39 Sam 22:7; 109:25; Tang 2:15

obe Nat Hi reitin, amei etan reling eivave xai!”^{§§ v}

⁴¹ Usil sexien nen xil tak, vat xil na pris xil, *titsa* xil te rae na Mosis, del elda na Siu xil mun lapol pepamen ni Iesu. ⁴² Xil labiteni mini labit, “!Mupus ti mu! Xi di teteu meulien e moletin sav xil, e misakras vateu meulien e xi mun tang. !Xosxa be reitin xa xi be suv toto na mol-Isrel xil,^w bos xa, taxeak tang, imei etan ra eivave ak! Xosxa imak, ma xamem muke reitin en sung. ⁴³ Xi miling nenesien nan e Hi e tehiteni tehit, ‘Inou nabe Nat Hi.’ Ma bos, xosxa Hi ien bei moletin xai, ma mei ihur rati.”^x ⁴⁴ E usil sexien nen tak, moletin tesa xalu xa lateti xat xalu luteti e rin, xalu mun lusep pepamen ba ni.

Maten na Iesu

Mak 15:33-41; Luk 23:44-49; Sion 19:28-30

⁴⁵ E piniae, maluxolukuken mei da xol ut xil ngasen e dat mak duxoh haoa tol (3).^y ⁴⁶ E melele xa haoa xatel ak mei lattavi, Iesu mikei nggeih nggo sepinien xati nan xa be Arameak bit, “!*llae! !llae! ?Lama sabaktani?*” (*Sam 22:1*) Koute te sepinien ak be, ‘!Hi navan! !Hi navan! ?!Veneh ma ostokovein nou!?’

⁴⁷ Melele xa rut moletin xil xa lasoh ladi lalonge, xil labit, “?Mulonge? Xi di mikes provet *llaetsa* iaxai.”

⁴⁸ Vatei takes, tei e xil miloh ba, nggur mavulut kaliko tei, e miterir ni be uaeu xa mikon. Di, milingi de kusut liei tei e mei misa ni be nesao tangan Iesu vavisi.^z ⁴⁹ E rute ngan xil mun labiteni labit, “Veter mu, ratiluvoluv tamu e rapus ti.

?llaetsa imei etan mei iteh meulien en, mu namei ti?”

⁵⁰ Di, Iesu mikei nggeih vatei mun, milihni kor ni votiang, di, mat.

⁵¹ E melele nen ak vari, kaliko xa metel xa lalihi dakoe xol ut eo tei e Nim Eo, mesel be rin lu,^a nggo kusute nesao bemei duxoh kusute etan. E lul tei milil, hat xil mahoe ⁵² e misak ni von tehinen xil lamahoe e mangang dit mak. E moletin na Hi xil holu xa latelele lateti en, xil lamea rilomun ra maten.^b ⁵³ Xil labe reling von tehinen nae xil e lakakao. (E melele xa Iesu temea rilomun ra maten, moletin xil holu latepus moletin xil ak e hal Serusalem xa be taon eo na Hi.)

⁵⁴ Melele xa vat na moletin xil te vaeu del moletin nan xil xa di lateketeh xol Iesu lalong lul ak e lapus holesok xil ak testal, ulixil mikan pupu. Xil labiteni labit, “!Reitin li, ngan ak tehe Nat Hi vari tang!”

⁵⁵ E tatit atou vutei xil lasoh ladi nga sotin vuteili ra eivave, e di lapus holesok xil xa di mistal. Tatit atou xil^c ak di latetutou ni Iesu e Kaleli e latehusili mun latemei e Serusalem. ⁵⁶ E xatel tol xa latemos e atou xil ak tehe Meri te hal Makdela; Meri, nine Temis xal Siosep; e nine horamue na Sepeti xalu.

Laling tiei na Iesu de vangihat te tehinen tei

Mak 15:42-47; Luk 23:50-56; Sion 19:38-42

⁵⁷ Sangas ut vamauluxoluk e Sabat mun di bemei sangas.^d Ma moletin tei be visal suv Paelet, hisen Siosep. Xi te metimal te hal Aramatea e holesok nan holu. Xi mun be tei e xil xa di tehusul xat Iesu.

§§27:40 Ngan ak misak ni naha xa Sam 22:7-8 tehiteni mei mistal be reitin.

^v27:40 Mat 26:61; Mak 14:58; Sion 2:19-20; Mat 4:3,6; 26:63; Luk 4:3,9

^w27:42 Sion 1:49; 12:13 ^x27:43 Sam 22:8; Sion 5:18; 10:36; 19:7

^y27:45 Amos 8:9 ^z27:48 Sam 69:21 ^a27:51 Eks 26:31-35; Hib 10:20

^b27:52 Esek 37:12 ^c27:55 Luk 8:2-3 ^d27:57 Dut 21:22-23

⁵⁸ Melele xa ba misoh pe met Paelet, xi misisi tangan vamaen tiei na Iesu mini. Ma Paelet misemae ni moletin nan xil te vaeen tangan ha lipo rati e lisa ni mini. ⁵⁹ Ma Siosepe ba poe e pis xole ni kaliko te mieh tei xa memese. ⁶⁰ Di, poe e ba milingi de vangihat te tehinen nan xati xa lateseh moten rohon ni tang.^e Di, midivin hat tei xa eilep mei dakoe xol puiteh te vangihat ak e be relingi ba. ⁶¹ Meri te hal Makdela del Meri tei mun ludotan ludi nga sotin vuteili ra rute ak, momal ni puiteh te vangihat ak.^f

**Moletin te vaeen xil laketeh xol
vangihat te tehinen
xa tiei na Iesu da en**

⁶² Melele xa ut milan e Sabat, vat xil na pris xil del *Farasi* xil ba lapus suv Paelet. ⁶³ Xil lamei visali e labiteni mini labit, “Suv, manem xati xa melele xa vat luvošen ak temeul tamu teta, xi tehiteni tehit, ‘Melengien tol mei itavi, e inou nimea rilomun ra maten.’^g ⁶⁴ Ma usemae ni moletin te vaeen nam xil ha liketeh xol kuh vangihat te tehinen nan ha ituxoh melele xa melengien tol ak mei itavi. Vengan xosxa onapol ni ti, *moletin nan xil* likila ha likan ni tiei nan. Ti, likila lihithiteni xa xi mea rilomun ra maten. E xosxa holesok xil ak mei istal, ma luvošen kor ak mei isa pilei sung ili luvošen xa tetiamu melele xa xi tehit xi be Mesaea na Hi.”

⁶⁵ Melele xa Paelet milonge mak, xi maen ni e biteni bit, “Bos ngamu. Muleh tatit moletin tova te vaeen, e ha liketeh xol vangihat ak ihusil sexien xa xamim

iemim bei.” ⁶⁶ Ma laba vituei del moletin te vaeen xil ak, e labilit xol hat xa mahulong xa dakoe xol puiteh teni ni tan tepili. Di, laling tatit moletin te vaeen xil ak tangan xil liketeh xole.

Iesu mea rilomun ra maten

Mak 16:1-10; Luk 24:1-12; Sion 20:1-10

28 *Sabat* bus. Di, ut milan e Sande, Meri te hal Makdela del Meri sav mun^h luba tangan ha lalosao ni vangihat te tehinen na Iesu.

² Vatei takes, lul tei milil nggeih venggan masxaxa tei na Hi Suv nggo ut nesao bemei etan. Xi mei midivin rat hat xa tetakoe xol puiteh, e dotan da en.ⁱ ³ Masxaxa ak, tenben minehin pupu nggoni an xa milangas, e eising nan xil mieh xa mieh.^j ⁴ Melele xa moletin te vaeen xil lapusi, ulixil mikan pupu e lexil malili. Lakiri labe tan e iexil bon pupu, lasakras mun lapol ni ti neta.

⁵ E masxaxa ak biteni mi atou xalu ak bit, “!Ulimil nakan ti! Nakila xa di mulang ni Iesu xa lateti xati e eivave. ⁶ E xi tara ti mun inggak. Reitin, xi temea rilomun ngamu ra maten nggoni ngan taxa tehiteni.^k Lumei ha lupus ti rute xa lateling tiei nan teta en. ⁷ Taxeak tang, multemanon ha mulhiteni mi *moletin nan xil* mulhit, ‘Iesu mea rilomun tuei ra maten e xi itiamu ni xamim ha ite Kaleli.^l Xamim ha mupusi e rute ak.’ Ngan ak be sepinien xa Hi misil nou tangan mei nihiteni mi xamil.”

⁸ Ma rumali lube reling vangihat e lulo temanon luba tangan ha lalihithiteni mi moletin xil na Iesu. Ulixalu mikan,

^e27:60 Aes 53:9; Pol 13:29

^f27:61 Mat 27:56; 28:1; Mak 15:40,47; 16:1; Luk 24:10; Sion 19:25 ^g27:63 Mat 12:40; 16:21; 17:23; 20:19; Mak 8:31; 9:31; 10:34; Luk 9:22; 18:33; 24:7 ^h28:1 Mat 27:56,61; Mak 15:40,47; Sion 19:25 ⁱ28:2 Mat 27:51; 27:60; Mak 15:46

^j28:3 Mat 17:2; Mak 9:3; Luk 9:29; Pol 1:10 ^k28:6 Mat 12:40; 16:21; 17:23; 20:19; Mak 8:31; 9:31; 10:34; Luk 9:22; 18:33; 24:7

^l28:7 Mat 26:32; 28:10,16; Mak 14:28; Sion 21:1-23

e tave ti neta xa mak, iexalu polu ni sien. ⁹Melele xa di tamu luba, vatakes, Iesu bisu mi xalu e biteni mi xalu bit, “!Bos makoe! Tomat na Hi iti mi xamil.” Melele xa lupusi, lumei visali, lumot ludal xat len xalu, e lusa merereen nalu mini. ¹⁰Di, Iesu biteni mi xalu bit, “Ulimil nakan ti. Ha mulhiteni mi tua navan xil e neketen tangan lihe Kaleli, e ha lipus nou en.”^m

Moletin te vaeen xil laluvos labit moletin na Iesu xil mei lakan ni tiei nan

¹¹Melele xa atou xalu ak di tamu luba, rut moletin te vaeen xil xa di latekete xol vangihat ak ladilomun labe Serusalem e ba labit vuol ni holesok xil xa testal mi *vat xil na pris xil*. ¹²Ma vat xil na pris xil lasepin del elda xil na Siu xil e lamei e nenemien tei. Ma langgal moletin te vaeen xil ak ni mani tei xa eilep ¹³e labiteni mi xil labit, “Xamim ha muhithiteni muhit, ‘Melele xa matepat vovong, moletin na Iesu xil latemei e hilaep te vongien, e mei latekan ni tiei nan.”ⁿ ¹⁴Ma xosxa longeongen teni ituxoh suv Paelet, xamem iaxa musepin e rin namim tangan musikoe xol xamim

e xi nasa ti pangasien mi xamim ven.” ¹⁵Ma moletin te vaeen xil ak laleh mani e ba lapol ni nggoni ngan xa xil latehiteni mi xil. Ma longeongen ak mikapis e rute xil vus xa *Siu* xil ladi en e miloh bemei duxoh xosali.

Iesu mei mistal mi moletin nan xil

Mak 16:14-18; Luk 24:36-49; Sion 20:19-23; Pol 1:6-8

¹⁶Ma moletin na Iesu xil xa labe tei e le tei (11) xa lateti, xil labe Kaleli e ba labe vathu tei xa Iesu tehiteni ngamu mi xil. ¹⁷E rute ak, iaxa xil lapus Iesu. E melele xa lapusi, lamot mini. E rut moletin nan xil latake reitin kuhi ti mu en. ¹⁸Di, Iesu bemei visal xil e biteni mi xil bit, “Tata navan miling holesok xil vus xa di ut nesao e ut etan di e heok.”^o ¹⁹Ma muha ve moletin xil te kantri xil vus e mupol ni xil mun mei lihe moletin navan xil. E melele xa mei lihusil nou, xamim mubaptaes ni xil e his Hi Tamer, e his Hi Natneli, e his Hi *Ninin Eo*.^p ²⁰E mupispisi mi xil tangan lilong xat holesok xil vus xa natesemae ni mi xamim. E inou, nite visal xamim vehakut^q ha ituxoh hoxalite te melengien xil xa radi en.”

^m28:10 Mat 28:7,16; Mak 14:28; Sion 20:17; 21:1-23 ⁿ28:13 Mat 27:64

^o28:18 Dan 7:14; Mat 11:27; Sion 3:35; 13:3; 17:2; Efes 1:20-22; Plp 2:9-10

^p28:19 Pol 1:8 ^q28:20 Hag 1:13; Mat 18:20; Sion 14:23

Sepinien xa diamu te

Mak

?Visi iaxa tetis vanuvei ak?

Moletin xa tetis vanuvei ak, hisen tehe Sion Mak. Xi tenave moletin lu e le tei (12) na Iesu ti. Moletin holu lanemi labit Mak ak be horam maxoe xa telesae melele xa mereketeh xil te Nim Eo lamei tangan ladal xat Iesu e hal Ketsemani e huram 33 AD (huram xil tetutou poten na Iesu).^f

Mak tetis vanuvei ak melele xa teti e taon te hal Rom sangas ni huram 56 AD. E vahit Pita teti tetela e melele nen ak vengon xa sepinien holu xa tetisi be tumulen xil na Pita. Lanemi labit Mak tetis vanuvei ak usil meulien e polien na Iesu tetiamu ni vanuvei xatel xa Matiu, Luk e Sion lattetisi.

?Visi iaxa tevuli vanuvei ak tetiamu?

Mak tetis vanuvei ak e hal Rom tangan vahit kila mi Kristin xil e rute ak xa Iesu be Nat Hi reitin e be Mesaea xa Hi tehit xati tangan isa ni imei. Misak ni, tetis sepinien holu usil merekel xil xa Iesu tepol ni xa tepisen ni xa xi texo ut nesao reitin.

?Mak tetis vanuvei ak veneh?

Mak ien tehei tangan vapisen reitinen xa Iesu be Nat Hi - Merekel xil a Mak tetis usili latehe holu mak mu mili naha xa di e vanuvei sav xil e Vanuvei Eo. Iesu tepisen ni xa tehur xeihen teli mesien,^g

Merekel xil ak latepisen reitinen xa Iesu be Nat Hi xa di nggur keihen.

Mak ien tehei tangan vapisen ni xa Iesu misel xat vat xil na Siu xil e lasin ni - Mak tepisen ni xa tetep iaxa Iesu tesak pisi tangan vapispis kuhi ni vat xil na Siu xil xa xi be Nat Hi reitin e Mesaea nan. E tesak pisi tangan vasel xat xil laviles ra tesaen nae e lihusil xat Hi e sexien xa momal. E neta sav xa mak, lasin ni e lamu vini.^t

Mak ien tehei tangan vapisen ni xa longeongen hos usil Iesu Kristo di ba mi Siu xil del ngan xil mun xa latave Siu xil ti - Reitin xa melele xa Iesu teti e ut etan, tepol holu tetel Siu xil. E Mak tepisen ni xa Iesu teha tepol tetel ngan xil mun xa latave Siu ti.^u

Vatit nenemien tei te vanuvei ak de Mak 10:45

Iesu biteni bit, “Vengan inou mun xa nabe Nat Moletin, natamei ti tangan moletin xil ti latutou ni nou. !E-e! Inou namei tangan nitutou ni mosav xil e nisa meulien navan tangan nixal rat moletin xil holu mei limeluv ra pangasien te tesaen nae xil.”

?Naha iaxa di e vanuvei ak?

1. Midep Iesu misak mese tangan ha ipol ni polien nan. (1:1-13)

2. Sepinien e polien na Iesu. (1:14–13:37)

a. Iesu pol e rute xil e provins te hal Kaleli. (1:14–7:23)

b. Iesu pol e rute savsav xil. (7:24–10:52)

^f1:0 Mak 14:51-52; Mak 13:5,13; Mak 15:39; Kol 4:10; Flm 1:24; 1Pit 5:13 ^g1:0 Mak 1:29,40; 2:1; 3:1; 5:21; 6:53; 7:24; 7:31; 8:22; Mak 1:21; 5:1; 9:14; Mak 4:35; 6:30; 6:44; 8:1; Mak 5:21; 16:1 ^t1:0 Mak 14:61

^u1:0 Mak 3:6; 5:1; 7:24,30; 15:39; Mak 16:15-16

c. Iesu pol e taon te hal Serusalem.
(11:1–13:37)

3. Iesu mat e meul rilomun ra maten.
(14:1–16:20)

Sion Baptis misak mesen suse ve Iesu

1 Ngan ak be longeongen hos na Iesu Kristo, Nat Hi.^v ²Longeongen ak temeji rohon mi xir texoni ngan xa tisen na **provet** Aesea tehiteni melele xa Hi tesepin mi Mesaea tehiti,

“!Uteong kuhi! Inou nisa eloheoh tei navan tangan isak mesen suse nam.

³*Laleng rae tei xa di miki e uruvuol xa bit,*

“!Musak mesen suse na Suv!

!Mupol ni suse nan imal!” (Aes 40:3)^w

⁴Eloheoh xa Aesea di tehiti usili, hisen Sion. Moletin ak tete uruvuol e latekesi ni Sion Baptis vengam tebaptaes ni moletin xil holu tehiti, *“!Muhiles ra tesaen namim xil! Ti, mumei minou e nibaptaes ni xamim tangan vapisen xa Hi di miketeh bos rilomun mi xamim.”*^x ⁵Ma moletin xil holu xa holu pupu latexo provins te hal Sudea tetel taon te hal **Serusalem** latemei visal Sion. Labit rerat tesaen nae xil mini e Sion **baptaes** ni xil e Oeisal Sodan. ⁶Xi teting ni eising xa latepol ni ni hili **kamel** e tetuatu ni mavulut hilbe buluk. Anien an tehe kelmenamen del hani^{*} xa di mikameti e uruvuol.^y ⁷E xi biteni mi moletin xil bit, *“Itutou ni nou, moletin tei xa eilep pupu imei. Xi be eilep mak mu mili nou e natapin ti tangan name slev nan xa ti valeh rat sandel nan.”*^z ⁸Inou di nabap-

taes ni xamim ni oei tang, e xi ibaptaes ni xamim ni **Ninin Eo.**”

Melele xa labaptaes ni Iesu bus, Ninin Eo dela be uruvuol tangan vaha vahur saksipien xil

Mat 3:13–4:11; Luk 3:21–22; 4:1–13

⁹E melele xa Sion di baptaes ni moletin xil mak, Iesu nggo Nasaret e provins te hal Kaleli e bemei visali. Di, Sion baptaes ni Iesu e Oeisal Sodan. ¹⁰E melele xa Iesu mea ra oei, miketeh be nesao e pus tilang hat misaha, e **Ninin Eo** mei dotan en nggoni mae tei. ¹¹E Hi misepin mini nggo ut nesao bit, *“Xouk obe Natuxoli, ngan xa eheien navan da en. E nabesi nou pupu ve xouk.”*^a

¹²Di, e melele nen ak vari, Ninin Eo misak ni Iesu ba be uruvuol. ¹³Iesu de rute ak melengien hanutap lu (40) del vuran xil e di nggur saksipien xil nggo he **Temat**. E melele xa melengien xil ak bus, **masxaxa** xil mei ladutou ni.

Iesu pol kokot ni polien nan e mikes moletin hat (4) tangan lavusili

Mat 4:12–22; Luk 4:14–15; 5:1–11

¹⁴Dutou ni ngan ak, Iesu milongeong ni xa lateso Sion tehe nim te xeih. Di, Iesu dilomun be provins te hal Kaleli e bithiteni longeongen hos na Hi mi moletin xil bit,^b ¹⁵*“!Taxeak be melengien xa momal tangan lelaxatien na Hi imei iti visal xir! !Misak ni muhiles meulien namim ra tesaen xil namim, e muling neketen namim iti e longeongen hos nan!”*^c

^{*}**1:6** Kelmenamen be hisit grashopa tei xa eilep xa lakila lava ni, e hani be oei tei xa mikas xa sukabug xil di lapol ni.

^v**1:1** Mat 3:1–12; Luk 3:1–18; Sion 1:19–28 ^w**1:3** Eks 23:20; Mal 3:1; Mat 11:10;

Luk 1:76; 7:27 ^x**1:4** Pol 13:24; 19:4 ^y**1:6** 2Kings 1:8; Sak 13:4

^z**1:7** Pol 13:25 ^a**1:11** Sen 22:2; Sam 2:7; Aes 42:1; Mat 12:18; 17:5; Mak 9:7; Luk 9:35; 2Pit 1:17 ^b**1:14** Mak 6:17–18; Sion 3:24

^c**1:15** Kal 4:4; Efes 1:10; Mat 3:2

¹⁶Vatei, melele xa Iesu mikakao ngusil seri Oei Kaleli, pus moletin lu te sar meseo en, hisealu Saemon xal Andru xa be tuneli. Pusi xa di luso net nalu be oei. ¹⁷E Iesu mei biteni mi xalu bit, “Lumei luhusil inou. Xosali di mulihi meseo xil tang, e inou nisak ni xamil mulihi moletin xil sung.” ¹⁸Vatei takes, lustokovein net xil nalu di, e lunggusil xat Iesu.

¹⁹E melele xa latkakao latoba vuteili, Iesu pus timue lu mun, hisealu Temis xal Sion, xa lube nat Sepeti. Ludi bot del tamealu e di latdil pilei net nattel xil.^d ²⁰Melele xa pus xalu, vatakes, Iesu mikes xalu tengan lalohusili. Ma, lube reling tamealu e bot del moletin te polien sav xil, e lunggusil Iesu.

Iesu nggol rat ninin tesa ra moletin tei

Luk 2:31-37

²¹Iesu mikakao del moletin nan xil labe taon te hal Kapaniam. E **Sabat**, labe **nim te pispisienna** Siu xil e Iesu di pispisi mi moletin xil en.^e ²²Xil vus xa lalong sepinien nan lamesep, vengan xa sexien te pispisien nan misav ni **titsa** xil te rae na Mosis. Vengan xa melele xa misetu, biteni momal ni xil del xeihen.^f

²³E melele xa Iesu di tamu pispisi, moletin tei xa **ninin tesa** da en be vangit nim te pispisien ak. Xi mikei nggeih xat Iesu bit,^g ²⁴“!Iesu te hal Nasaret! ?!Usak ni naha mi xamem!? ?Omei inggak tengan umu vin xamem? !Inou nakilak, xouk obe Moletin Eo na Hi!”^h

²⁵Iesu mike xat ninin tesa ak bit, “!Utat votei, e uhe reling moletin ak!”

²⁶Di, ninin tesa ak bas tan ni moletin ak, muis kei, di, be relingi.ⁱ

²⁷Ngan xil vus xa lapusi lamesep pupu ni. E di labiteni mi xil mun tang labit, “?Hisit pispisien eah xiak? Moletin ak di misepin del xeihen. E melele xa misemae ni ninin tesa xil tengan lave reling moletin xil, vatakes lalong xati.” ²⁸E tave nousav ti, longeongen usil naha xa Iesu di pol ni mikapis ba duxoh rute xil vus e provins te hal Kaleli.^j

Iesu dal rat moletin xil holu ra mesien nae xil e taon te hal Kapaniam

Mat 8:14-17; Luk 4:38-41

²⁹E melele xa Iesu be reling nim te pispisien, del Temis xal Sion, latobe tim sa Saemon Pita xal Andru. ³⁰Melele xa laduxoh tim, labit mesen ni mi Iesu xa avu atou kokon na Saemon Pita, mesei dat vet man, ven minggan pupu. ³¹Ma Iesu be visali, dal xat hen e dutou ni mitamea. Vatakes, mesien nan be relingi, milonge bos, e ba pol ni anien ae.^k

³²E vongien nen ak, melele xa eai minu e Sabat bus, moletin xil holu laleh ngan xil xa lamesei del ngan xil xa ninin tesa di e xil lamei visal Iesu.^l ³³Lamei, lamei ba vuma ... moletin xil vus te metimal ak mei langgonaxon pupu e puiteh te nim xa xi da en. ³⁴E Iesu dal rat moletin xil holu ra mesien nae xil, e ngan tesav xil mun, nggol rerat ninin tesa ra xil. E tamaen ninin tesa xil ti tengan lasepin vengan xa lakila xa xi be Mesaea xa Hi tehosei.^m

Iesu be rute sav xil mun tengan vahit longeongen hos mi moletin xil

Luk 4:42-44

³⁵E makoe roroh, melele xa ut bovoli tamu, Iesu mitamea e be rute tei

^d1:19 Mat 10:2; Mak 3:17; Mat 10:35; Luk 5:10

^e1:21 Mak 6:2; Luk 4:16; 6:6; 13:10 ^f1:22 Mat 7:28-29 ^g1:23 Mak 5:2

^h1:24 Mat 8:29; Mak 5:7; Luk 4:34; 8:28; Sion 6:69 ⁱ1:26 Mak 9:26

^j1:28 Mat 4:24 ^k1:31 Mat 9:25; Mak 5:41; 9:27; Luk 8:54 ^l1:32 Mat 4:24

^m1:34 Mak 3:12

xa mikila vatasen en e di misis.ⁿ ³⁶E melele xa Saemon Pita del ngan tesav xil lamea, di lalang ves Iesu. ³⁷Lalang vesi ba vuma ... lakameti e labiteni mini labit, “!Moletin xil vus te metimal ak di lalang vesuk!”

³⁸E Iesu biteni mi xil bit, “Rave metimal sav xil mun xa ladi sangas ni rute ak, vengang namei vari tengang niha nisetu ni longeongen hos na Hi mi moletin xil vus.” ³⁹Ma, lakapis e rute xil vus e provins te hal Kaleli. E xi di misetu mi moletin xil e nim te pispisien na Siu xil e di nggol rerat ninin tesa xil ra moletin xil.^o

Iesu dal rat moletin tei ra mesien leporsi

Mat 8:1-4; Luk 5:12-16

⁴⁰Melele xa Iesu di tamu mikapis e provins te hal Kaleli, moletin tei xa mesien **leporsi** di bas purun tenben xil mei mitingeiril pe met Iesu e dakesi bit, “Xosxa iem bei li, ma ukila upol ni tenbeok mei imese rilomun.”

⁴¹Melele xa Iesu pusi, ien misae en. Ma misa hen ba duxoli e biteni mini bit, “Namaen ni. !Nasak ni tenbom mei memese ngamu!” ⁴²E melele nen ak vari tang, mesien ak be relingi e tenben mei memese rilomun.

⁴³Di, Iesu misemae mini bit, ⁴⁴“Onahit rat naha ti xa natepol ni minuk mi moletin tova. E uhe Nim Eo kestang tengang uhit rat rin nam mi **pris** tei, e usa sanien eo nam mi Hi ixoni ngan xa **Mosis** tehiteni.^p Imak, ma ngan xil xa lilepis tenbom lipus kila xa xouk omese tevi.” Di, Iesu misil moletin ak ba.

⁴⁵E melele xa moletin ak be reling Iesu, xi mikapis e rute xil vus e buhu raen holu bit usil naha xa Iesu tepol ni

mini. Mak, ma vengang xa vanut moletin xil mei labe mahulong pupu, Iesu misakras mun vahe metimal xil. E neta sav xa Iesu da nga ut xil xa labe sotin ra metimal xil, moletin xil lakakao langgo rute xil vus tengang mei lapusi.

Iesu pol ni moletin tei xa misakras vakakao mei mikakao

Mat 9:1-8; Luk 5:17-26

2 Melengien vahis mei mitavi, e Iesu dilomun be taon te hal Kapaniam. E moletin xil te rute ak lalongeong ni xa de tim. ²Ma moletin xil holu mei lapolu e nim ak, e moletin xil holu mun dit lasoh e hale. E Iesu di misetu ni sepinien na Hi mi xil. ³Melele xa Iesu di tamu misetu, moletin hat (4) lamei e lapo moletin tei xa misakras vakakao de suon man tengang lalingi pe met Iesu. ⁴E vengang xa moletin xil langgonaxon pupu, lapusi xa lasakras lave sangas visal Iesu. Ve rin ak, xil lapeou labe hilim nesao, ladal rerat rut hilim ak momal ni rute xa Iesu da en, e lapol ni mei be mesal tei. Di, lasae ni moletin ak de suon man be tan e rute xa Iesu da en. ⁵E melele xa Iesu pus naha xa xil lapol ni, pus kil neketen nae e biteni mi moletin ak bit, “Tuxoli, xosali, inou naserev rin nam ra **tesaen** nam xil pe met Hi.”^q

⁶E melele xa **titsa** xil te rae na Mosis xa ladotan inggak lalong sepinien xa Iesu biteni, laseputut ni nggo nenemien nae labit, ⁷“?Veneh ma moletin xai di misa hisit sepinien ak ba xat Hi? !Xi di pet rat tasen ni xi bit xi pipin ni Hi vari! Vengang xa Hi kestang mikila vaserev rin na moletin xil ra tesaen nae xil pe meten.”^r

⁸Melele xa di lanem usil holesok xil ak, Iesu mikil nenemien nae, ma biteni mi xil bit, “?Veneh ma di munem mak?”^s

ⁿ1:35 Mat 14:23; Mak 6:46; Luk 5:16; 6:12 ^o1:39 Mat 4:23; 9:35

^p1:44 Mat 9:30; Lev 14:2-32 ^q2:5 Luk 7:48

^r2:7 Sam 103:3; Aes 43:25; 1Sion 1:9 ^s2:8 Mat 16:8

⁹Temale tang tangan namiteni mi moletin ak xa misakras vakakao namit, 'Naserev rin nam ra tesaen nam xil pe met Hi' vengang xa musakras mupusi xosxa nanggur xeihen tangan nipol ni. E nggeih tangan namiteni mini namit, 'Utamea, uvulun suon mam, e ukakao uha,' vengang xa xamim ti mupus kila xosxa nanggur xeihen tangan nipol ni. ¹⁰E tangan xamim mupus kila xa Nat Moletin nggur xeihen e ut etan tangan vaserev rin na moletin xil ra tesaen nae xil e tangan vasak ni moletin xil mei vahos rilomun, mupus ngan ak ..." Di, Iesu biles, pus moletin xa misakras vakakao e biteni mini bit, ¹¹"!Nabiteni minuk, utamea, uvulun suon mam, e utilomun uhe tim!"

¹²Vatakes, pe met moletin xil, moletin ak mitamea, bulun suon man e poe ba be reling xil. Melele xa moletin xil lapusi mak, latemanin e lapet rat his Hi labit, "Ueee la la li! !Ratapus ti mu neta tova xa vamak!"^t

Iesu mikes Matiu Livae tangan ihusili

Mat 9:33

¹³Di, Iesu be reling rute ak e mikakao ba be seri Oei Kaleli. Moletin holu mei lakapis xole e xi di pispisi mi xil. ¹⁴E melele xa Iesu di mikakao ba, xi pus moletin tei xa dotan de nim te polien nan xa hokorong, hisen **Matiu** Livae, nat Alveas. Xi di mileh takis ra Siu xil tangan vasa ni sung vaha mi kavmen te hal Rom. E melele xa Iesu pusi, mikesi bit, "Amei! !Uhusil xat inou e mei uhe moletin tei navan!" Ma Matiu Livae mea, mistokovein polien nan xil, e nggusil xat Iesu.^u

¹⁵Dutou ni, Iesu del **moletin nan xil** labe tim sa Matiu Livae e ladotan del moletin hao te **takis** e moletin sav xil

mun xa lasa pe met Siu xil xa latehusil Iesu latehe nim ak. E melele xa Iesu del moletin nan xil ladotan e di langganien vituei, rut moletin tesa sav xil ak di langganien vituei del xil. ¹⁶Rut titsa xil te rae na Mosis, xa labe **Farasi** xil mun, lapusi xa Iesu di ngganien del moletin xil te takis del moletin tesa sav xil. Misak ni, xil lasis moletin xil na Iesu labit, "?Veneh ma titsa namim di ngganien del hisit moletin tesa xil xa lamak?"^v

¹⁷E melele xa Iesu milonge, biteni mi xil bit, "Moletin xil xa lanemi labit lamal ngamu iexil ti tavei tangan lava lapus tokta. E ngan xil kestang xa lakila xa lamesei iexil bei tangan lapus tokta. Ma inou natamei ti tangan nakes moletin xil xa lanemi labit lamal ngamu tangan lihiles e lihusil inou. E-e, namei tangan nakes ngan xil xa lapus kil mesien te **tesaen** nae xil tangan lihiles meulien nae e lihusil nou."

Sexien te pispisien hu na Iesu misav ni sexien matu na Siu xil

Mat 9:14-17; Luk 5:33-39

¹⁸Vatei, e melele xa moletin xil na Sion Baptis del Farasi xil di labal ni anien, rut moletin xil mei lasis Iesu labit, "Moletin na Sion xil del Farasi xil di labal ni anien tangan lasis. E mapusi xa moletin nam xil latapol ni ti sexien ak. ?Veneh vari?"

¹⁹Ma, Iesu dei vole ak mi xil bit, "Melele xa moletin tei miteli, ngan xil xa lamei ve anien nen ak, labesi xil, ma lasakras laval ni anien e melele xa xi da tamu visal xil. ²⁰E melengien xil ti imei xa moletin xil mei lihur rat ngan xa miteli ihe reling xil. E melengien ak vari, xil lilonge isa ven e lihal ni anien sung."

²¹Di, Iesu dei vole tei mun mi xil bit, "Moletin tovuol xa vatil xol eising matu

^t2:12 Mat 9:9-13; Luk 5:27-32 ^u2:14 Mat 8:22; 19:21; Mak 10:21; Luk 9:59; 18:22; Sion 1:43; 21:19,22; Mat 4:20,22 ^v2:16 Mat 11:19; Luk 7:34; 15:1-2

tei vatel saxut kaliko tei xa be neta hu. Vengan melele xa ikasi, kaliko xa be neta hu mei ileten pupu, ma ital papas eising matu ak e mei imeseh mak mu. ²²E suse nen ak, moletin tovuol vateh uen hu vahe valite matu tei xa lapol ni ni hilbe sipsip vengan nggeih ngamu. Vengan xa xosxa ipol ni, ma uen hu ak isak ni valite teni ikaio e imahoe. Maxani, valite ak isa, e uen imie ihe tan. Misak ni, moletin xil ti litech uen hu ihe valite xa be neta hu vengan xa memerou tamu e mikila ikaio. Imak, ma valite teni ihos e uen mun xa di en ihos.”[†]

Iesu misa pispisien tei usil Sabat

Mat 12:1-8; Luk 6:1-5

²³E **Sabat** tei, Iesu del moletin nan xil langgur xoteh naho tei te **uit**. E melele xa di lakakao laba, mae nggat moletin nan xil, ma di laki xoteh utut uit xil e di langga ni. ²⁴E melele xa Farasi xil lapusi, lasepin mi Iesu labit, “Pus ti mu. Moletin nam xil di lapol ni polien tei xa nggur xoteh **rae na Mosis** usil Sabat.”^w

²⁵E Iesu bit rilomun ni mi xil bit, “Midep? ?Xamim mutavuli ti naha xa suv toto **Deved** e moletin nan xil latepol ni melele xa mae teat xil e iexil tehei pupu tangan lavanien ti?^x ²⁶Deved tehe vangit Nim Tavolin na Hi e tehur beret eo teni. Ngan ak testal e melele xa Abiatar tehe **vatixar na pris xil**. E xi temaen suv toto Deved tangan vahur beret ak, neta sav xa pris xil kestang lakila lava ni, e Deved tesa ni sung mi moletin nan xil tangan lava ni.”

²⁷Di, Iesu bit kil koute te sepinien nan mi xil bit, “Hi tepol ni Sabat ten-

gan vatutou ni moletin xil. Tenapol ni moletin xil ti tangan latutou ni Sabat.^y ²⁸Mak iaxa, Nat Moletin be Suv te holesok xil vus, e te Sabat mun.”

Iesu pol ni he moletin tei mei bos rilomun e Sabat

Mat 12:9-14; Luk 6:6-11

3 Iesu dilomun be **nim te pispisien**. E moletin tei de rute ak xa hen misa. ²E rut moletin xil mun ladi xa iexil bei tangan lalang ves neta tova xa misa xa Iesu pol ni. Ma, di lale mah xat Iesu tangan lapus pisi xos ipol ni he moletin ak mei ihos rilomun e **Sabat**. ³Misak ni, Iesu mikes moletin ak tangan mei vasoh pe met moletin xil. ⁴Di, misis moletin sav xil bit, “**Rae na Mosis** di maen xir tangan rakila rapol ni naha e Sabat? ?Tangan ritutou ni moletin, mu ripurun ni? ?Tangan riteh meulien en, mu rihas vini?” E xil latavit ti neta mini.^z

⁵E melele xa Iesu miketeh mikapis xol xil, ien nggat xil. E melele nen mun tak, ien misae e xil vengan xa nenemien nae bon pupu. Di, Iesu biles biteni mi moletin xa hen misa bit, “!Tei momal ni hem!” E melele xa dei momal ni, hen mei bos rilomun.^a ⁶E melele xa **Farasi** xil lapusi, lastal e, vatakes, ba lamos del rut Siu xil xa di lasuv xat lelatatien na suv toto **Herod**, e lasep ves suse tova tangan lavas vin Iesu vaxo en.^b

Moletin holu langgusil Iesu

⁷Iesu del **moletin nan xil** labe Oei Kaleli, e moletin holu mun langgusili: ngan xil te provins te hal Kaleli, Sudea,^c ⁸e Itumea; e ngan xil te taon te hal

[†]2:22 E vole xalu ak, Iesu di biteni xa pispisien hu nan xil di nggusil sexien hu xil tang, e misakras vahusil xat pispisien e sexien matu xil na Siu xil.

^w2:24 Dut 23:25 ^x2:25 1Saml 21:1-6; 2Saml 15:35; Lev 24:5-9

^y2:27 Eks 20:8-10; Dut 5:12-14 ^z3:4 Luk 14:3

^a3:5 Mak 6:52; 8:17; Sion 12:40; Rom 11:25; Efes 4:18

^b3:6 Mat 22:15-16; Mak 12:13 ^c3:7 Mat 4:25

Serusalem, Taer e Saedon; e ngan xil mun xa langgo rin sav te Oeisal Sodan. Moletin xil vus ak lamei visal Iesu veng-an xa lalongeong ni naha xa xi di pol ni. ⁹E veng-an xa xil labe holu mak e di langgonaxon pupu, Iesu biteni mi moletin nan xil bit ha lisak mesen bot tei xa ikila itotan e teng-an moletin xil linat-ing xati ti. ^d¹⁰Ngan xil xa lamesei lating mak veng-an xa lapusi xa Iesu di pol ni moletin xil holu ngamu mei labos rilo-mun, e labit lituxoli teng-an xi isak ni mesien nae ihe reling xil. ^e¹¹E melele xa ngan xil xa **ninin tesa** di e xil lapusi, xil mei latingeiril mini, e lamuis kei labit, “!Xouk obe Nat Hi!”^f ¹²E Iesu mike xat ninin tesa xil ak nggeih bit linavit rati ti mun xa xi be visi.

Iesu bosei moletin lu e le tei (12) teng-an mei lihe eloheoh nan xil

Mat 10:1-4; Luk 6:12-16

¹³Di, Iesu be nesao e hu tei e mikes vi-ton moletin xil xa ien bei teng-an lihusili, e lamei visali. ¹⁴Di, bosei lu e le tei (12) e xil teng-an mei lihe **eloheoh** nan xil, li-husil xati, e ha lihithiten longeongen hos mi mosav xil, ¹⁵e lihol rerat ninin tesa xil ra moletin xil ixo xeihen te hisen.

¹⁶E ngan ak be his na eloheoh xil xa labe lu e le tei (12) xa Iesu bosei xil: Saemon (xa Iesu miling hisen tei mun be Pita);^g ¹⁷Temis del tuneli Sion xa Iesu tekes xalu ni ‘nat veta xalu’ (xa tamealu Sepeti);^h ¹⁸Andru, Pilip, Batalomiu, **Matiu**, Tomas, Temis (nat Alveas), Tatisos[‡], Saemon (xa temos e vanut moletin tei xa iexil bei pupu ten-

gan lameluv ra he mol-Rom xil); ¹⁹e Suda-s Eskariot xa tesa rat Iesu tehe he moletin tesa xil.ⁱ

Farasi xil lakes Iesu ni Temat

Mat 12:22-32; Luk 11:14-23; 12:10

²⁰Melele xa Iesu bosei eloheoh nan xil bus, labe nim tei e taon te hal Kapaniam, e moletin xil holu lamei teng-an lapusi. Misak ni, mesal tovuol mun teng-an Iesu e moletin nan xil lavanien.^j ²¹E melele xa ninen e tua na Iesu xil lalongeong ni xa moletin xil di labiteni xa Iesu di pol talang, xil laba teng-an lasep xole e ladal xati.^k

²²E **titsa** xil te rae na Mosis latexo Serusalem, e mei laso sepinien ba xat Iesu labit, “Belsepul^l di mise xat moletin ak. Veng-an xi be suv toto na ninin tesa xil, e di misa xeihen mini teng-an vahol rerat ninin tesa xil ra moletin xil.”¹

²³Misak ni, Iesu mikes Farasi xil lamei visali e misepin mi xil nggo vole xil ak bit, “?Temat mikila ihol rat xi mun tang itep? ²⁴Xosxa moletin xil na suv toto tei di labae mi xil mun tang, ma xeihen na suv toto ak mei ihe neta sav tang. ²⁵E xosxa vatimol tei di labae del xil mun tang, ma his vatimol ak ikesae. ²⁶Ma xosxa Temat di minggol rerat ninin tesa nan xil, ma xi di bae mi xi mun tang. Xosxa imak, ma xeihen nan ihe relingi mei ihe neta sav tang.

²⁷“Nihit kila mi xamim ixo vole tei. Moletin tei misakras vahe nim ma silixin tei teng-an valeh rerat holesok nan xil melele xa xi di tamu miketeh xole. Iti-amu, ha ivar xat silixin ak. Ti, ikila ihe

[‡]3:18 Hisen tei mun tehe Sudas, nat Temis.

^l3:22 ‘Belsepul’ be his tei xa Siu xil di lakes Temat ni, xa koute teni be ‘Suv na angelu xil.’

^d3:9 Mak 4:1; Luk 5:3 ^e3:10 Mat 14:36; Mak 6:56

^f3:11 Mak 1:34; Luk 4:41 ^g3:16 Mat 16:17-18; Sion 1:42 ^h3:17 Luk 9:54

ⁱ3:19 Mat 26:25; 27:3; Sion 18:2,5 ^j3:20 Mak 6:31 ^k3:21 Sion 10:20

^l3:22 Mat 9:34

nim man e ileh vuol ni holesok nan xil vus.[§]

²⁸“Reitin li nabiteni mi xamim, Hi mikila iketeh ihos rilomun mi ngan xil xa lapol ni hisit *tesaen* xil holu, mu lasep purun his Hi mun tang. ²⁹E moletin xil xa lasep purun *Ninin Eo* e polien nan, Hi misakras vaketeh vahos rilomun mi xil. Tesaen ak iti xat rin nae iha vuma ... hoxalite teni ihe tovuol.”^m ³⁰Iesu biteni mak vengon xa Farasi xil latehit xi di pol nggo xeihen na ninin tesa tei xa da en.ⁿ

Iesu bit usil visi iaxa be ninen e tuneli xil

Mat 12:46-50; Luk 8:19-21

³¹Ma di, nine Iesu del tuneli xil lamei, e lasoh ladinga hale e nim xa da en. E lasa sepinien be nim tangan Iesu mei vapus xil.^o ³²E melele nen ak, moletin holu di ladotan lakapis xol Iesu, e xil labiteni mini labit, “Pus ti mu. Ninom e tumali xil ladi nga hale, e labit lapusuk.”

³³E Iesu misis xil bit, “?Ninok be visi? ?E tuxoli xil labe visi?” ³⁴Di, miketeh mikapis xol moletin xil xa di ladotan xorelisi e biteni mi xil bit, “Mupus ti, ngan xil ak labe nana navan xil e ngan xil ak labe tuxoli xil. ³⁵Ngan xil xa di lapol ni naha xa Hi ien bei, xil labe nana navan xil del tuxoli e hinoxoli xil.”^p

Iesu dei vole usil utiei xil xa di meul e hisit tan savsav xil

Mat 13:1-23; Luk 8:4-15

4 Di, Iesu ba mun e seri Oei Kaleli, e pispisi mi moletin xil inggak. E

vengon xa vanut moletin xil holu pupu lakapis xole, Iesu be bot tei e ladivin rati vuteili ra ut. E vanut moletin xil lasoh ladi nga ut.^q

²Di, Iesu dei vole xil holu mi xil tangan vapispisi mi xil bit,^r ³“!Muteong kuhi! Vatei, moletin tei be naho tangan vaso utiei xil en. ⁴E melele xa di miso ni, rut utiei xil lamot e suse xa tan nen nggeih, e tuman xil mei langga ni. ⁵Rut utiei xil lamot e tan xa hat xil holu di en e tan nen mehin tang. E inggak, utiei xil ak lateh manon vengon xa tan mehin. ⁶E melele xa eai bemei nesao, ngga vin ngan xil xa lateteh, e lameles lamat. Lamat vengon xa amulite xil tave tan pupu ti. ⁷Rut utiei xil mun lamot e tan xa munae tesa xil di lameul en. E melele xa lateh, munae tesa xil ak lameul xol vin xil. Misak ni, lataso huite ti. ⁸E rut utiei xil ak lamot e tan xa bos. Ma xil lameul bos, e laba ni huite xil. Ngan xil, laba ni huite xil holu; ngan xil mun laba ni huite xil holu mak mu; e ngan tesav xil mun, xil iaxa ladaxao xa ladaxao ni huite xil.”^{**}

⁹Di, Iesu biteni mi xil bit, “!Xosxa vurangemim di, muteong kuhi ni naha xa di nabiteni!”^s

¹⁰Melele xa Iesu ba da tasen, rut moletin xil del moletin lu e le tei (12) nan lamei visali e lasisi tangan ihit kil koute te vole xil ak mi xil.^t ¹¹Ma, xi biteni mi xil bit, “Xamim iaxa Hi tehosei xamim tangan mukil koute te sepinien xuxus usil itep xa xi mei ihe suv toto na moletin nan xil. E moletin sav xil xa Hi tave

[§]3:27 E vole ak, nim ak be ut etan e silixin xa di en be Temat. E melele xa Iesu bemei e ut etan del xeihen, nggoni ngan xa bar xat Temat e ileh rerat moletin xil ra xeihen nan e na ninin tesa nan xil.

^{**}4:8 Sepinien xati teni bit, “... *uit xil ak ladaxao ni huite xil xa labe 30, 60 e 100.*”

^m3:29 1Sion 5:16 ⁿ3:30 Sion 7:20; 8:48,52; 10:20 ^o3:31 Mak 6:3; Sion 2:12; Pol 1:14 ^p3:35 Sion 7:17; 9:31 ^q4:1 Mak 3:7-9; Luk 5:1-3

^r4:2 Mat 13:34; Mak 4:33-34 ^s4:9 Mat 11:15; 13:43; Mak 4:23; Luk 14:35; Rev 2:7,11,17,29; 3:6,13,22 ^t4:10 Mat 15:15; Mak 7:17

suv toto nae ti, xil lalong sepinien nan nggo vole xil kestang xa latalong kil ti.
¹²Hi tesep usili tehit,

*'Xil liteong vuma ... e linalong kil ti neta.
 Liketeh vuma ... e linapus kil ti neta.*

*Vengan xosxa linamak ti, ma lihiles
 meulien nae,
 e Hi iketeh ihos rilomun mi xil.'* (Aes 6:9-10)^u

¹³Di, Iesu biteni mi xil bit, “?Reitin xa xamim mutakil ti koute te vole ak? ?Imak, ma mikila mukil koute te vole sav xil itep? ¹⁴Ma, vole ak, moletin ak miso utiei xil xa be sepinien na Hi. ¹⁵Rut moletin xil, tinexil nggoni suse xa tan nen nggeih xa utiei xil ak lakiri en. E melele xa lalong sepinien na Hi, **Temat** mite-manon bemei e nggur rat sepinien xa mot de tinexil. ¹⁶E rute sav xil, tinexil nggoni tan xa hat xil holu di en. E melele xa lalong sepinien na Hi, vatakes, langguri del sien. ¹⁷E vengam xa amulit neketen nae tameul ti mu, lasoh vuteili e neketen nae. E melele xa labisu ni sakpurunien mu melengien xil te xeih ve sepinien ak, vatei takes, lamot e neketen nae.^v ¹⁸Moletin sav xil, tinexil nggoni tan xa munae tesa xil di lameul en. Lalong sepinien na Hi, ¹⁹e lanexo pupu ve holesok xil te ut etan e eheien nae di e mani mak mu mili. Ma holesok xil ak di lameul xol vin sepinien na Hi xa langguri, ma tava ni ti huite e meulien nae.^w ²⁰E moletin sav xil mun, tinexil nggoni tan xa bos. E melele xa lalong sepinien na Hi, lalong kila e langgur xati be nae. Ma, e meulien nae, sepinien nen ak ba ni huite. E meulien na rut moletin xil, ba ni huite xil holu; e ngan tesav xil, ba

ni huite xil holu mak mu; e ngan tesav xil mun, sepinien ak daxao xa daxao ni huite xil e meulien nae.”^{††}

Iesu dei vole usil laet xa pili

Luk 8:16-18

²¹Iesu dei vole tei mun mi xil bit, “Moletin tovuol tamu xa vasahan laet nan, ti, vaha vaso xati ni pesin mu vaha valingit vate pe vet man. E-e. Vehakut, melele xa moletin tei misahan laet bus, misoxolen ni de nesao e voninen.^x ²²Nggorin ak, holesok xil xa di minggus mu di lasepin xusus ni, Hi isak ni imei kesao tangan moletin xil vus likila.^y ²³Xosxa vurangemim di, muteong kuhi ni naha xa di nabiteni.”^z

²⁴Di Iesu biteni mun mi xil bit, “Muteong kuhi ni neta xil vus xa nabiteni mi xamim. Vengan Hi isa kilakilen teni mi xamim ipin ni longxatien namim. Ma xosxa mulong xati, ma isa kilakilen te sepinien nan mak mu mi xamim.^a ²⁵Ma ngan xil xa langgur sepinien navan xil e langgusili, Hi ipol ni xil likilakil kuhi mu. E ngan xil xa latahusil ti neta xa langguri, hokorong xa langguri ngamu, Hi ileh rat sen ni ra xil.”^b

Iesu dei vole usil utiei xa meul

²⁶Ma di, Iesu dei vole teimun mi xil bit, “Lelaxatien na Hi nggoni utiei xil xa moletin tei miso ni e naho san. ²⁷E tave ti neta xa moletin ak di pat e vongien, e di bovarang e melengien, utiei xil ak di lateh e lameul. E moletin ak takil ti xa di lameul midep.^c ²⁸Be tan tang iaxa di pol ni utiei xil lameul. Reitin, lateh, lameul labe nesao, e mei laso huite xil.

^{††}4:20 Sepinien xati teni bit, “... huite xil xa labe 30, 60 e 100.”

^u4:12 Sion 12:40; Pol 28:26-27 ^v4:17 Mat 26:31; Mak 14:27

^w4:19 Mat 19:23-24; Mak 10:23-24; Luk 12:15-21; 18:24-25

^x4:21 Mat 5:15; Luk 11:33 ^y4:22 Mat 10:26; Luk 12:2

^z4:23 Mat 11:15; 13:43; Mak 4:9; Luk 14:35; Rev 2:7,11,17,29; 3:6,13,22

^a4:24 Mat 7:2; Luk 6:38 ^b4:25 Mat 13:12; 25:29; Luk 19:26 ^c4:27 Tem 5:7

²⁹E melele xa huite xil men, moletin te naho ba midei e milehi be tim.”^d

Iesu dei vole usil utut vaak^{‡‡}

Mat 13:31-32,34; Luk 13:18-19

³⁰E Iesu misis moletin xil bit, “?Lelaxatien na Hi nggoni naha vari? ?Nihit kila mi xamim ixo vole eah? ³¹Lelaxatien nan nggoni utut vaak tei xa be hokorong mak mu ni utiei sav xil xa di lameul e tan.”^e ³²E melele xa matu, xi mei be vatiei tei xa eilep mak mu mili vatiei savsav xil xa halite xil mahulong pupu, pipin tengan tuman xil mei lipol ni nunum mae xil en.”^f

³³Nggo vole xil xa lamak, Iesu misa sepinien na Hi mi moletin xil, pipin ni naha xa lakila lavuri. ³⁴Mi vanut moletin xil, Iesu misepin nggo vole xil kestang. E melele xa da tasen del eloheoh nan xil, ma misep kil koute te vole xil ak mi xil.

Iesu misemae ni votiang e oei tangan lalihe tan, e lulong xat raen

Mat 8:23-27; Luk 8:22-25

³⁵E melengien nen ak, melele xa ut mei maluxoluk, Iesu biteni mi moletin nan xil bit, “Rava ravur xoteh Oei Kaleli ak.” ³⁶Misak ni, labe reling moletin sav xil ladi, e eloheoh xil labe bot xa Iesu di dotan en. Di, langgur xoteh Oei Kaleli e rut moletin sav xil mun langgusil Iesu langgo bot nae xil.

³⁷⁻³⁸E melele xa di lalis laba, Iesu por sae e vangit bot. E tavehi ti, latemanin, votiang te xeih tei mea. Ngan ak misak ni oei nggelial holu, e tahe xil bemei e bot e di mise vangite. E Iesu milung de pilo tei e por vovong. Melele xa moletin nan xil lapus naha xa mistal, ulixil mikan

pupu e ba lasiasi ni labit, “!Titsa, sangas mamat xiak! ?!Otanem ti xamem!?”

³⁹Ma Iesu mitamea, e mike xat votiang xal oei bit, “!Luhe tan!” Vatakes, xalu vus lube tan, e an mei bos rilo-mun. ⁴⁰Di, biteni mi moletin nan xil bit, “?Veneh ma ulimim mikan mak? ?Neketen namim tovuol tamu?”

⁴¹Melele xa moletin nan xil lapusi mak, latemanin e lasis pilei xil mun tang labit, “?Moletin ak be hisit moletin eah? Neta sav xa votiang e oei, xalu mun di lulong xat raen.”

Iesu nggol rerat ninin tesa xil ra moletin tei

Mat 8:28-34; Luk 8:26-39

5 Iesu del moletin nan xil lamei ut e ri Oei Kaleli, e tan na moletin xil te metimal te hal Kerasa.^g ²E melele xa Iesu mea reling bot, moletin tei xa **ninin tesa** da en nggo vangihat xil xa be von tehinen bemei visali.^h ³Moletin ak di pat e vangihat te tehinen xil ak. Moletin xil latesak pisi tangan lavar xati ni sen xil te xeih, e lasakrasi. ⁴Vengan xa melele xil vus xa latevar xat hen e len, xi tetal xoteh sen xil xa latevar xat hen xalu ni, e teti xoteh aean xa di dakoe xol len xalu. E moletin ti taxeih vapin tangan vatal xati. ⁵Melengien e vongien xil, moletin ak di mikapis e von tehinen e hu xil xa di sangas. E vehakut, di muis kei nggeih e di dasap tenben ni hat xil xa mikan.

⁶Melele xa moletin ak pus Iesu da tamu sotin, miloh ba ni e mitingeiril pe valnaon. ⁷Di, muis kei bit, “?Iesu, Nat Hi xa be eilep mak mu mili, obit upol ni naha minou? !Uhit xati minou li e his Hi xa onasa longpangasien minou ti!”ⁱ ⁸Biteni mak vengan xa Iesu tesemae ni

^{‡‡}4:29 Sepinien xati teni be “utut mastad.”

^d4:29 Soel 3:13; Rev 14:15 ^e4:31 Mat 17:20; Luk 17:6

^f4:32 Esek 17:23; 31:6; Dan 4:12,21 ^g5:1 Mat 8:28-34; Luk 8:26-39

^h5:2 Mak 1:23 ⁱ5:7 1King 17:18; Mak 1:24; Luk 4:34; 1:32; 6:35; Mat 26:63

ninin tesa ngamu tangan ihe reling moletin ak.

⁹Misak ni, Iesu misisi bit, “?Hisom visi?”

E moletin ak bit rilomun ni mini bit, “!Hisok Vanute! Vengan xa mabe vanut ninin tesa xil holu iaxa madi xat moletin ak.”¹⁰ Xi midakes Iesu tangan nasil rerat xil ti linave reling tan xa ladi en.

¹¹Sangas ni rute ak, vueili xil holu di langganien e seri hu. ¹²Misak ni, ninin tesa xil ak ladakes Iesu labit, “Maen xamem mava xat vueili xil xa iaxor.”

¹³Ma Iesu maen ni tangan lava. Ma ninin tesa xil ak, labe reling moletin ak, e laba xat vueili xil ak sung. E vueili xil xa sangas lave taosen lu (2000) laloh laba lakiri langgo meteh labe oei. E xil vus lamerir lalél.

¹⁴Melele xa moletin xil xa di lalaxat vueili xil ak lapus neta xa mistal, late-manon laba, labithiteni e taon e rute sav xil mun xa ladi sangas. Di, moletin xil xa lalongeong ni laba labit lapus ti naha xa testal xiak. ¹⁵Ma laba labe visal Iesu, e lapus moletin xa vanut ninin tesa xil latehe relingi. Nenemien nan mei bos ngamu, mising ni eising, e di dotan visal Iesu. Ma melele xa lapus kila xa be xi xa vanut ninin tesa xil lateti en, moletin xil ak ulixil mikan pupu. ¹⁶E ngan xil xa latepus naha xa testal e rin te moletin xa ninin tesa xil lateti en, e rin te maten na vueili xil mun, xil di latumul usili mi moletin sav xil. ¹⁷Misak ni, moletin xil ladakes Iesu tangan vahe reling tan nae.^f

¹⁸Misak ni, Iesu ba mun be bot tangan vahe reling xil. E moletin xa ninin tesa xil lateti xati be visal Iesu e dakesi

tangan vahusili. ¹⁹E Iesu tamaen ni ti. E biteni mini bit, “Utilomun uhe tim sam e upus timue nam xil. Ti, uhithiteni mi xil naha xa Hi Suv tepol ni e meulien nam, e tetep iaxa tepisen esaeen nan minuk.”^j ²⁰Ma moletin ak ba mikapis e rute xil vus te taon he xalu (10) xa lakes xil ni Dekapolis e di misep usil sexien hos xa Iesu tepol ni mini. E ngan xil vus xa lalonge lamesep pupu.

Iesu dal rat atou tei ra mesien nan del atuli tei ra maten

Mat 9:18-26; Luk 8:40-56

²¹Melele xa Iesu nggur xoteh Oei Kaleli vatei mun, vanut moletin tei xa mahulong ladatili ladi e ut, e mei lakapis xole. ²²Di, moletin tei bemei e mitingeiril pe le Iesu, hisen Saeros. Xi be vat tei te *nim te pispisienna* Siu xil. ²³E mei di dakes Iesu tangan vatutou ni bit, “Atuli navan sangas li vamat xiak. Ieok bei mei uling hem en tangan mei ihos rilomun e imeul.”^k ²⁴Misak ni, Iesu nggusili luba.

E melele xa Iesu di ba, moletin xil labe holu pupu xa di langgusili e langgonaxon e rin xil vus. ²⁵Di, latakil ti, e atou tei xa temos e vanut moletin xil ak bemei sangas visali. Xi temesei huram lu e le tei (12) ni mesien na atou xil xa misakras vavus. ²⁶Atou ak teha tepus tokta xil holu xa latepol ni holesok hao mini tangan vatal rati ra mesien nan, e late-sakrasi. Xi tesa sen mani nan xil mi tokta xil ak, e talonge ti vahos. Mesien nan mei misa pilei sung. ²⁷Atou ak telongeong usil Iesu, ma bemei pe tou Iesu del vanut moletin sav xil, misa hen e duxoh eising nan.^l ²⁸Atou ak pol ni mak ven-

^f5:17 Moletin holu te hal rute ak latave Siu ti, e vengan xa lakila xa Siu xil iexil ti tavei vueili xil, ulixil mikan ni Iesu vengan xa lanemi labit isak ni vueili sae xil vus mei lilel. Lanem usil mani nae mili pispisien e merekel xil na Iesu.

^j5:19 Mat 9:6; Mak 8:26; Luk 5:24; 8:39 ^k5:23 Mat 8:3; Mak 6:5; 7:32; 8:23,25; Luk 4:40; 13:13; Pol 9:12,17; 28:8 ^l5:27 Mat 14:36; Mak 6:56

gan xa minemi bit, “Xos xa nituxoh eising nan tang, ma nilonge ihos vari.”²⁹ E melele xa duxoli, vatakes, mesien nan bus relingi. E milong kila xa tenben mei bos rilomun.

³⁰ E melele nen tak, Iesu mikila xa xeihen xa di en tepol ni neta ngan mi moletin. Ma biles, pus vanut moletin xil ak e misis xil bit, “?Visi iaxa duxoh eising navan?”^m

³¹ Eloheoh nan xil labiteni mini labit, “?Opusi? Vanut moletin xil ak di langgonaxon pupu e di laduxoluk e rim xil vus. ?Misak ni, veneh ma di olang ves moletin xa duxoluk?”³² E neta sav xa mak, Iesu nggulehi di milang ves ngan xa duxoli.

³³ Atou ak milong kila xa tenben mei bos rilomun, ma bemei visal Iesu, len mulul, e miteingiril pe valnaon. Di, bit rat sen tumulen te mesien nan mini.³⁴ E Iesu biteni mini bit, “Hinoxoli, neketen nam misak ni mei olonge bos e omese ra mesien nam. !Bos! Uha, e tomat iti minuk.”ⁿ

³⁵ Melele xa Iesu di tamu misepin, rut moletin xil langgo tim sa Saeros lamei, e labiteni mini labit, “Atuli nam mikesae ngamu. Ma onasis ti mun titsa xai tangan nakon namei.”

³⁶ Iesu milong naha xa xil labiteni e xi biteni mi Saeros bit, “Ulum nakan ti. Uneket tang.”³⁷ Xi nggur Pita, Temis del Sion (xa be tuneli Temis) e tamaen ti mun mosav xil tangan lavusili.^o ³⁸ Melele xa laduxoh tim sa Saeros, lapus moletin xil di latangal pupu. Di lamuis e di ladang ve atuli ak.³⁹ Di, Iesu be vloh te nim ak e biteni mi xil bit, “?Veneh ma di mutangal e di mudang mak? Atuli ak

tamat ti, di pat tang.”^p ⁴⁰ E moletin xil langue xati. Misak ni, Iesu misil rat xil ra vangit nim, e nggur tame atuli ak xal ninen kestang del moletin nan tol labe rute xa laling atuli ak da en.⁴¹ Di, Iesu misasa dal xat hen e biteni mini nggo sepinien nae bit, “!Talita koum!” xa koute teni bit, “!Tutut atuli, tamea!”^q ⁴² Vatakes, atuli ak mitamea e mikakao (huras nan tehe lu e le tei (12) ngamu). Ngan xil xa lapusi xa meul mak, iexil bon.⁴³ E Iesu mike xat xatel tangan latnavit rat ti naha xa xi tepol ni mi moletin sav xil. Di, biteni mi tamen e ninen ak tangan lalisa ti anien mi atuli nalu.^f

Iesu ba mi moletin nan xil, e xil lasin ni

Mat 13:53-58; Luk 4:16-30

6 Iesu be reling rute ak e dilomun be metimal nan xati te hal Nasaret, del xat eloheoh nan xil.² E **Sabat**, Iesu be **nim te pispisientengan** vapispisi ni sepinien na Hi en. Moletin holu lamei, e melele xa lalonge pispisien nan xil late-manin ni. E lasis xil mun tang labit, “?Moletin ak nggur kilakilen e metisouen ak nggo xave? ?E mupus merekel eah xil iaxa di mistal nggo hen xalu?”^s

³ Di, labiteni labit, “?E tave moletin xai ti iaxa di tepol pilei ni holesok xil te nim? Ngan xai nat Meri tang. E tuneli xil labe Temis, Sioses, Sudas e Saemon. Tunehin xil vus ladi visal xir e rute ak. !Moletin ak be tei e xir tang!” Ve rin ak, moletin xil tine misoh e lanem male ni Iesu.^t

⁴ E Iesu biteni mi xil bit, “Moletin xil vus lamerere ni **provet** tei na Hi. E mo-

^m5:30 Luk 6:19

ⁿ5:34 Mak 10:52; Luk 7:50; 17:19; 1Saml 1:17; 20:42; 2Saml 15:9; 2King 5:19; Luk 7:50; Pol 16:36; Tem 2:16 ^o5:37 Mat 10:2; 17:1; Mak 1:29; 3:16-17; 9:2; 13:3; 14:33; Luk 6:14; 9:28; Pol 1:13 ^p5:39 Sion 11:11 ^q5:41 Luk 7:14

^r5:43 Mak 1:44; 7:36 ^s6:2 Sion 7:15 ^t6:3 Sion 6:42; Mak 3:31

letin xil te metimal xati nan e vatimol xati nan mun, xil lanem male ni vari.”^u

⁵Misak ni, e rute ak, Iesu tapol ni ti merekel xil vahe holu. Miling hen e rut moletin xil tang e dal rat xil ra mesien nae xil.^v ⁶E mesep pupu xa moletin nan xati xil lataling ti neketen nae en.

**Iesu misil lelen eloheoh lu e
le tei (12) nan tangan ha
lihithiten longeongen hos**

Mat 10:5-15; Luk 9:1-6

Di, Iesu ba mikapis e metimal xil xa ladi rute ak, e pispisi mi moletin xil en. ⁷Di, mikes viton eloheoh lu e le tei (12) nan tangan vasil lelen xil lave lulu. Melele xa lamei visali, misa xeiheon mi xil tangan lakila lihol rerat *ninin tesa* xil ra moletin xil.^w ⁸E misemae ni mi xil bit, “E kakaoen namim, munaleh ti neta natel xat xamim, muleh eitingil namim kestang. Reitin, munaleh ti anien, mu ateli, mu mani. ⁹Muhes sandel namim tang, e munaleh ti mun eising.”

¹⁰Di, biteni mun mi xil bit, “Melele xa mumei e rute tei, xosxa moletin tei nggur pilei xamim e nim man, ma muti kat en ituxoh melele xa muling rute ak. ¹¹E xosxa moletin xil latahur pilei xamim ti e rute tei mu iexil ti tavei tangan lalong sepinien namim, ma melele xa muheling rute ak, muhas rerat meas te rute ak ra lemim pe metexil. Ngan ak ihe selxatien mi xil xa Hi pus sexien nae e isa rilomun ni mi xil.”

¹²Misak ni, eloheoh nan xil laba e labithiteni mi moletin xil xa momal tangan lihiles ra tesaen nae xil e limei visal Hi. ¹³Langgol rerat ninin tesa xil holu ra moletin xil. E mi ngan xil xa lamesei,

laduxol xil ni oel te *olip* e xil mei labos rilomun.^x

Maten na Sion Baptis

Mat 14:1-12; Luk 9:7-9

¹⁴E melele nen ak, suv toto *Herod* Antipas nggur longeongen usil holesok xil xa Iesu di pol ni. Milonge xa rut moletin xil di labiteni labit, “Xos xi be Sion Baptis xa temeana rilomun ra maten. Ve rin ak iaxa nggur xeiheon tangan vapol ni merekel xil.”^y

¹⁵Rut moletin xil mun labit, “Ngan ak be provet *Ilaetsa*.”

E rute sav xil labit, “Xi be provet hu tei, e nggoni provet xil tetiamu.”

¹⁶E melele xa suv toto Herod milong usil Iesu, xi minemi bit, “!Ngan ak be Sion Baptis vari! !Tave ti neta xa inou natesemae ni tangan lita xoteh vatin, e xi temeana rilomun ra maten!” ¹⁷⁻¹⁸Suv toto Herod Antipas minexo pupu mak venggan xa xi vari tesa raen tangan moletin te vaen nan xil ha lital xat Sion, livar xati, e liso ni ihe nim te xeih. Xi tepol ni temak venggan xa Sion tesepin texeih teha xati tehit, “Herod, sexien nam xil tamal ti venggan di onggur Herodias xa tehe atou na tumali Pilip mei be atou nam. Naha xa di opol ni nggur xoteh *rae na Hi*.”^z

¹⁹Ve rin ak, Herodias ien teat Sion, e ien tehei tangan lavas vini, e Herod tenamaen ni ti. ²⁰Herod tesikoe xol Sion venggan xa temerere ni e tekila xa xi tehe moletin eo na Hi xa momal pe meten. E Herod ien bei tangan vaha valong sepinien na Sion, tave ti neta xa tesak ni nenemien nan tehas pupu ni.

^u6:4 Sion 4:44

^v6:5 Mat 14:14; Mak 6:13; Mat 9:18; Mak 5:23; 7:32; 8:23,25; Luk 4:40; 13:13; Pol 9:12,17; 28:8 ^w6:7 Luk 10:1; 10:4; 10:7; 10:11; Pol 13:51; Mat 8:4; 10:18; Mak 1:44; 13:9; Luk 5:14 ^x6:13 Tem 5:14; Mat 14:14; Mak 6:5

^y6:14 Mat 16:14; Mak 8:28; Luk 9:19 ^z6:17-18 Luk 3:19-20; Lev 20:21

²¹ Di, vatei, Herodias pus mesal tangan vahas vin Sion. E melele nen ak, di latepol ni anien ve melengien xa latepes suv toto Herod en. Ma, latekes viton eilep xil vus te kavmen, vat xil na moletin te vaeen xil, e moletin sav xil mun te provins te hal Kaleli xa latellep tangan limei. ²² E melengien ak, atuli na Herodias tehoh pe met Herod tetel moletin xil e tesak ni xil vus latehesi xil tehe holu ven. Misak ni, Herod tehiteni mi atuli ak tehiti, “!Naha xa iem bei tangan ovuri, inou nisa vari ni minuk!” ²³ Di, tepol ni hitxatien te xeih mini pe met moletin xil tehiti, “Nabiteni reitin xa neta tova xa usisi, nisa ni minuk. Ninakenin ni ti.”^a

²⁴ Misak ni, atuli ak tetamea, ba tesis ninen tehiti, “?Nisisi ni naha vari?”

E ninen tehiteni mini tehiti, “Ha usisi tangan isa vat Sion Baptis minuk.”

²⁵ Ma, atuli ak teloh temanon tetilomun tehe visal Herod e tesis tehiti, “Taxeak tang, ieok bei tangan usa vat Sion Baptis minou ite tre tova.”

²⁶ Melele xa Herod milonge mak, xi milonge misa pupu. E vangan xa tepol ni hitxatien te xeih tei mini pe met eilep xil ak, misakras vasin raen. ²⁷ Misak ni, tesemae ni merketeh nan tei tangan iha e itilomun itel vat Sion. Ma, tehe nim te xeih e teta xoteh vatin ra tiei nan. ²⁸ Di, teling vatin tete tre tei e tehuri ba tesa ni mi atuli ak. E atuli ak sung, tehuri ba tesa ni mi ninen. ²⁹ Melele xa moletin xil na Sion latelongeong ni xa xi mat, latepei e latepo tiei nan, ba latetihin ni.^b

Iesu misa anien mi moletin xil xa lali taosen lim (5000)

Mat 14:13-21; Luk 9:10-17; Sion 6:1-14

³⁰ Melele xa *moletin xil na Iesu* lapol bus, ladihomun lamei visal Iesu. Di, latumul mini usil holesok xil xa latepol ni e latepispisi ni.^c ³¹ E Iesu pusi xa moletin xil holu lamei visali, e di misak ni xi del moletin nan xil lasakras lavanien mu langel vuteili. Misak ni, Iesu biteni mi xil bit, “Riha rihe rute tova xa moletin xil latovuol en tangan xir rikila ringel en vuteili.”^d ³² Ma, labe bien ba labe bot tei. Di, labe ri oei e rute tei xa moletin xil latovuol en.

³³ E melele xa laba, moletin xil holu lapus xil e bot e lale kil xil. Misak ni, langgo metimal nae xil e ba langgusil xil. Laloh ladiamu ba laduxoh rute xa Iesu del moletin nan xil di laba ven. ³⁴ Ma, melele xa Iesu be ut, pus vanut moletin xil xa mahulong di ladiatili tuei. Pus xil langgoni sipsip xil xa moletin tovuol valaxat xil, e ien misae e xil. Misak ni, nggur pilei xil e pispisi mi xil ni holesok xil holu.^e

³⁵ E melele xa eai ba minu, eloheoh nan xil lamei visal Iesu e labiteni mini labit, “Rute ak be toun ut tei e be vongien tuei xiak.”^f ³⁶ Bos xa usil rerat vanut moletin xil ak liha tangan ha lihe metimal xil e rute sav xil xa ladi sangas e lixal ti anien ae.”

³⁷ E Iesu biteni mi moletin nan xil bit, “E-e, xamim tang musa anien mi xil lia ni.”

E labit rilomun ni mini labit, “!Ei! Vahit mavur *mani* vapi ni melengien handred lu (200) te polien, ma ngan ak

^a6:23 Esta 5:3,6; 7:2 ^b6:29 Mat 27:59-60; Luk 23:52-53; Sion 19:38,41

^c6:30 Luk 10:17 ^d6:31 Mak 3:20

^e6:34 Mat 9:36; 15:32; Mak 8:2; Nam 27:17; 1King 22:17; 2Kron 18:16; Esek 34:8; Sak 10:2; Mat 9:36 ^f6:35 Mat 15:32-38; Mak 8:1-9

napin ti mu tangan maxal beret a moletin xil ak.”

³⁸ E Iesu misis xil bit, “?Beret vahis iaxa mulehi? Ha mupus pisi mu.”

E melele xa lakameti, labiteni mini labit, “Beret lim tang del meseo lu mun.”

³⁹ Di, Iesu biteni mi eloheoh nan xil tangan lihiteni mi moletin xil litotan e rute tei xa bos xa husmunae di en. ⁴⁰ Misak ni, laseti moletin xil ladotan e vanute xil xa moletin xil labe hanutap lu e he xalu mun (50) e vanute xil xa moletin handred tei (100) ladi en. ⁴¹ Melele xa ladotan, Iesu mileh beret xa be lim xiak del meseo lu, miketeh be nesao e memes Hi ven. Di, bul pas beret ak e misa ni mi eloheoh nan xil tangan laseti mi moletin xil. E lapol ni mun del meseo.

⁴² Moletin xil vus langganien e vange polu kuhi. ⁴³ E melele xa eloheoh xil laba mun tangan laleh saxut beret e meseo xil, lase ni be valeat lu e le tei (12) ba vuma ... xil vus lapolu. ⁴⁴ E melele nen ak, tiramue xil xa langganien laduxoh taosen lim (5000).

Iesu mikakao e ramut oei

Mat 14:22-33; Sion 6:15-21

⁴⁵ Melele xa langganien bus, vatakes Iesu misemae ni eloheoh nan xil tangan lave bot e litiamu ni lihe Betsaeta, xa de ri Oei Kaleli. E xi kestang ita tangan isil rerat vanut moletin xil lihaha. ⁴⁶ Ma melele xa laba, Iesu misep ling moletin xil e be nesao e vathu tei tangan vasis.⁸

⁴⁷ Di, e hilaep te vongien, Iesu mika sen be seri oei e miketeh pus bot xa de hilaep te Oei Kaleli. ⁴⁸ E pusi xa eloheoh nan xil di lakameti nggeih tangan lavalis vengan xa di labisu ni votiang tei xa nggeih. Ma, e makoe roroh, ut taluv pilei ti mu, Iesu bemei visal xil e di mikakao e

ramut oei nggoni ngan taxa di mikakao e tan tang. E pol ni nggoni ngan xa itavi e xil iha.

⁴⁹⁻⁵⁰ E melele xa moletin nan xil lapus Iesu di mikakao e ramut oei mak, ulixil mikan tova tang e lameun be nesao labit, “!Aue li! !Temat tei!”^h

E vatakes, Iesu misepin mi xil bit, “!Ulimim nakan ti! !Inou tang! Tinemim namulul ti.” ⁵¹ Di, Iesu ba be bot del xil. E melele taxa be bot, votiang be tan e moletin nan xil latemanin pupu ni.ⁱ ⁵² Latemanin ni vengan latanem kil ti xeihen nan, tave ti neta xa latepusi tetep iaxa tesa anien mi moletin xil xa lateli taosen lim (5000). Nenemien nae bon tamu e latanem kil ti koute te merekel ak.^j

Iesu dal rat ngan xil te hal Kenesaret ra mesien nae xil

Mat 14:34-36

⁵³ Melele xa langgur xoteh Oei Kaleli e mei laduxoh tan na mol-Kenesaret xil, labe ut e labar bot nae. ⁵⁴ Melele xa labe reling bot nae, vatakes, moletin xil lapus xil e lapus kil Iesu. ⁵⁵ Ma, moletin xil laloh ba lakapis e rute xil vus xa di sangas tangan lavit usil meien nan. Misak ni, moletin xil holu laleh ngenexil xa di lamesei ladi suon mae xil labe rute xa lalongeong ni xa Iesu da en. ⁵⁶ E rute xil vus xa Iesu ba en, neta sav xos be metimal xil, mu taon xil, mu rute xa moletin vahis tova ladi en, moletin xil laleh ngan xil xa lamesei e labe von vitueien nae xil. E ladakes Iesu tangan ital rat ngan xil xa lamesei ra mesien nae xil mu imaen ngan xil xa lamesei tangan lituxol kusut eising nan. E xil vus xa laduxoli, mesien nae be reling xil.^k

⁸6:46 Mak 1:35; Luk 5:16; 6:12; 9:28 ^h6:49-50 Luk 24:37 ⁱ6:51 Mak 4:39

^j6:52 Mak 8:17 ^k6:56 Mat 9:20; Mak 5:27; Luk 8:44

**Pispisien usil naha xa di
misak ni moletin xil lamese
mu latamese ti pe met Hi**

Mat 15:1-20

7 Vatei, *Farasi* xil e *titsa* xil te rae na Mosis langgo *Serusalem*, lamei visal Iesu e lakapis xole. ²Xil lapusi xa eloheoh nan xil di langganien del hexil xa tamese ti vahusil sexien te kekasen na Siu xil.¹ ³Vengan xa Farasi xil del *Siu* xil vus mun di langgusil kuh sexien metu te kekasen xa bit, e melele te anien en, itiamu, moletin xil likas kuh hexil. Avu nae xil tetiamu latepispisi ni sexien ak mi xil tangan linave muis ti pe met Hi. ⁴E melele xa langgal anien e ut te posen, xil lakas moten ni mu, ma di, langga ni. E langgusil hisit sexien sav xil holu na Siu xil, nggoni hisit sexien tei takes xa di lakas kap e sospen nae xil en del ketel nae xil mun xa lapol ni ni aean xa be brons.^m

⁵Misak ni, Farasi xil del titsa xil te rae na Mosis lasis Iesu labit, “?Veneh ma moletin nam xil latahusil xat ti sexien xil xa avu nar xil tetiamu latepispisi ni mi xir? Vengan moletin nam xil latakas hexil ti mu vaxo sexien nar, e di langganien tang.”

⁶Iesu bit rilomun ni mi xil bit, “Naha xa Hi tehiteni texo provet Aesea usil xamim xa di munggul Hi nggo hilbemim tang momal xa bit, *‘Moletin xil ak di lamerere ni nou del sepinien nae xil kestang, e tinexil di sotin ra nou.*

⁷Tave ti neta xa di lamot minou, nabit ninakil ti.

Vengan xil di lasa pispisien xil xa be na moletin xil tang,

e di labiteni xa inou iaxa natehiteni natehit xil lihusili.’ (Aes 29:13)

⁸Xamim di munggur xoteh rae xil na Hi tangan muhusil kuh pispisien namim xil tang.”

⁹Di, Iesu misepin rilomun mi xil bit, “Reitin, xamim mube metisou tova tang e rin xa di muling rae xil na Hi di nga tangan mukila muvusil pispisien namim xil tang. ¹⁰Vengan **Mosis** tesemae ni tehit, *‘Mumerere ni tamemim e ninemim xil.’ (Eks 20:12)ⁿ* ¹¹E xamim di mupispisi mi moletin xil xa likila lihiteni mi tamexil e ninexil lihit, ‘Holesok navan xil xa nakila nitutou ni xamil ni, di nakenin ni vengan xa nate pol ni hitxatien tei tuei tangan nisikoe xole ihe na Hi kestang.’ ¹²Nggo sexien ak, di mupispisi mi moletin xil ni suse xa likila lisikoe xol holesok nae xil ixo en tangan linatutou ni ti mun tamexil e ninexil ni. ¹³Mak, ma pispisien namim xil di pol ni sepinien xil na Hi mei be neta sav tang. E di mupol ni holesok xil holu xa lamak.”

¹⁴Di, Iesu biles e mikes rilomun ni vanut moletin xil tangan lamei visali e biteni mi xil bit, “!Xamim vus muteong kuhi ni sepinien navan tangan mukila! ¹⁵Tave holesok xil ti xa moletin tei ngguri nggo vulongen be tinen iaxa di misak ni mei tamese ti pe met Hi. !E-e, tamak ti! E sepinien xa mistal nggo vulongen iaxa mikila vasak ni moletin ak mei namese ti pe meten.” ¹⁶§§

¹⁷Melele xa be reling vanut moletin xil e be nim, eloheoh nan xil lasisi tangan vahit kil koute te sepinien nan mi xil.^o

¹⁸Ma Iesu biteni bit, “?!Midep, xamim mutakil ti mu!? ?Mutakil ti xa holesok xil xa mungguri nggo vulongomim misakras vapol ni xamim mei munamese ti

§§7:16 Rut tisen xil na Mak miling sepinien ak xa bit, “!Xosxa vurangemim di, muteong kuhi ni naha xa di nabiteni!”

^l7:2 Luk 11:38 ^m7:4 Mat 23:25; Luk 11:39 ⁿ7:10 Dut 5:16; Mak 10:19; Efes 6:2; Lev 20:9 ^o7:17 Mat 13:36; Mak 4:10; Luk 8:9

pe met Hi? ¹⁹Vengan xa be vangemim tang e, di, mistal be reling tenbemim, ba be tisok tang.” Nggo sepinien ak, Iesu misep kila xa anien xil vus bos te anien en.

²⁰Di, biteni mun bit, “Be holesok xil xa di tine moletin, xa di misepin ni nggo vulongen, iaxa di pol ni moletin mei tamese ti pe met Hi. Holesok xil kestang xa mistal nggo xoux iaxa pol ni xoux otamese ti. ²¹Vengan melele xa tine moletin tei misa, xi di pol ni hisit sexien tesa xil ak: di pat vituei del mosav melele xa lutateli ti mu, di mikan ni neta na mosav xil, e di bas vin moletin xil.^p ²²Xi di mikan ni atou na mosav, be hokan, di minem usil holesok xil xa misa, di miluvos ni mosav xil, e di minem usil sexien xil holu te suse. Di minem misa ni mosav xil, di misep usil mosav xil, be koai, e di nggusil sexien na unu xil tang. ²³Reitin, sexien xil vus ak vari langgo tine moletin, e xil iaxa di lapol ni moletin tei mei tamese ti pe met Hi.”

**Atou tei xa tave Siu ti
mineket e xeihen na Iesu**

Mat 15:21-28

²⁴Di, Iesu be reling rute ak e ba be rute sav tei xa be sangas ni taon te hal Taer. Xi be vangit nim tei e ien ti tavei tangan moletin tova vakil rute xa xi da en. E misakras vaxus. ²⁵E melele nen ak, atou tei da xa **ninin tesa** tei ba de tutut atuli nan. E melele xa milonggeong ni xa Iesu de sangas, vatakes, bemei visal Iesu e mitingeiril mini. ²⁶Atou ak tave Siu ti, xi be ate-Siria tei te provins te hal Fonesia. Xi dakes Iesu tangan vahol rat ninin tesa vahe reling atuli nan.

²⁷E Iesu biteni mini bit, “Namei tangan nilaxat horamue navan xil mu xa

labe Siu. Vengan tamal ti xa namur anien ae e naso ni tang vaha mi kuli xil.”

²⁸E atou ak bit rilomun ni mini bit, “Suv, ngan ak be reitin. E kuli xil mun xa ladi xorelis von anien en lakila lava saxut anien xil xa horamue xil di langga lingi.”

²⁹Di, Iesu biteni mini bit, “!Reitin li, sepinien nam di pisen ni xa neketen nam mahulong! Misak ni, ve rin ak, utilomun uhe tim vengas xa ninin tesa be reling atuli nam ngamu.”

³⁰E melele xa atou ak duxoh tim, mikameti xa atuli nan de vet man, e ninin tesa tehe relingi ngamu.

**Iesu pol ni moletin tei xa vurangen
bon e takil ti vasepin mei bos rilomun**

³¹Melele xa Iesu be reling tan te hal Taer, ba mika pas tan te hal Saedon e be rute tei sangas visal Oei Kaleli xa lakesi ni Dekapolis. ³²E rute ak, moletin xil ladel tiramue tei xa vurangen bon e misakras vasepin kuhi bemei visali e ladakes Iesu tangan valing hen en tangan mei vahos rilomun.^q ³³Ma, Iesu dela be sotin vuteili ra vanut moletin xil. Di, miling vakuhen de vurang moletin ak. E dutou ni, mikusah, e miduxol me tiramue ak.^f

³⁴Di, Iesu miketeh be nesao, misehseh, e biteni mi tiramue ak e sepinien na Siu xil bit, “Epapata,” xa koute teni be ‘metal.’^s

³⁵Vatakes, vurang tiramue ak metal, e mikila valong holesok xil vaxo en. E men mei bos e mei misepin kuhi sung.

³⁶Di, Iesu misep xol moletin xil tangan linaviteni ti mi moletin tova naha xa tepol ni. E tave ti neta xa biteni vatei mun mi xil, xil ba labithiteni mi mosav

^{p7:21} Rom 1:29-31; 1Kor 5:11; 6:9-10; Kal 5:19-21; Efes 5:3-4; Kol 3:5; 1Tim 1:9-10; 2Tim 3:2-4; 4:3; 1Pit 4:3; Rev 21:8; 22:15 ^{q7:32} Mat 9:18; Mak 5:23; 8:23,25; Luk 4:40; 13:13; Pol 9:12,17; 28:8 ^{f7:33} Mak 8:23 ^{s7:34} Mat 14:19; Mak 6:41

xil.^t ³⁷E moletin xil vus xa lalong usili lamesep labit, “Holesok xil vus xa Iesu di pol ni bos xa bos. Tave ti neta xos vurang moletin bon, xi misak ni mei milonggeong kuhi; mu moletin xa misakras vasepin, ma misak ni mei misepin.”^u

**Iesu misa anien mi
moletin taosen hat (4000)**

Mat 15:32-39

8 E melele sav mun, vanut moletin xil holu lamei vituei tangan lapus Iesu. E melele xa anien ae bus, Iesu mikes eloheoh nan xil lamei visali e biteni mi xil bit, ²“Ieok di misae e moletin xil ak vengan xa ladi visal nou melengien tol (3) ngamu e anien ae tovuol mun. ³Ieok ti tavei tangan nasil rerat xil latilomun lave tim sae xil melele xa mae dit nggat xil. Maxani, vexil namal e metexil namaluxoluk e suse, vengan rute xil langgo sotin lamei.”

⁴E eloheoh nan xil lasisi labit, “!Inggak be uruvuol! ?Rikamet anien e rute xave tangan rakila risa anien mi vanut moletin xil xa mahulong xiak?”

⁵Ma Iesu misi xil bit, “?Beret vahis iaxa mulehi?”

Labit rilomun ni mini labit, “Beret lu e he sav (7) tang.”

⁶Di, Iesu biteni mi vanut moletin xil tangan latotan e tan. Melele xa ladotan bus, Iesu nggur beret lu e he sav (7) e misa memesien ba mi Hi ven. Di, bul papasi e misa ni mi eloheoh nan xil tangan ha liseti mi moletin xil, ma xil lapol ni. ⁷E laleh meseo vahis mun bemei mi Iesu. E melele xa memes Hi ven bus, misemae ni moletin nan xil tangan ha laseti. ⁸Moletin xil vus langganien e vange polu. E melele xa moletin xil na Iesu laba mun tangan laleh saxut anien xil, lase valeat

lu e he sav (7) ba vuma ... xil vus lapolu. ⁹Moletin xil xa langganien e melengien ak laduxoh taosen hat (4000). Melele xa langganien bus, Iesu misil rerat xil ladilomun labe tim sae xil. ¹⁰E melele xa Iesu misil rerat vanut moletin xil ak labaha bus, vatakes, xi del *moletin nan xil* labe bot e labe rute tei xa lakesi ni Dalmanuta.

**Farasi xil lasis Iesu tangan vapol ni
neta tova xa eilep tangan vapisen
ni xa xi texo visal Hi reitin**

Mat 16:1-4

¹¹Vatei, *Farasi* xil lamei visal Iesu tangan lasak pisi. Ma, mei langor dela e lasisi tangan vapol ni neta tova xa eilep vaxo ut nesao tangan vapisen ni xa xi texo visal Hi reitin.^v

¹²Melele xa lasisi mak, Iesu milonge misa e biteni mi xil bit, “?Veneh ma xamim, moletin xil te xosali ak, mubit mupus ti neta tova xa eilep tangan vapisen ni xa natexo visal Hi reitin? !E nabiteni reitin mi xamim xa ninapol ni ti neta tangan mupus reitinen usil inou vaxo en!”^w

¹³Di, Iesu mea, be reling xil, e ba be bot. Di, del moletin nan xil, langgur xoteh Oei Kaleli labe rin.

**Iesu misel xat moletin nan xil
tangan lixouxou kuhi**

Mat 16:5-12

¹⁴Melele xa Iesu del moletin nan xil ladi tamu e bot, moletin nan xil lanem rilomun ni xa iexil bovorong ni tangan laleh beret ae vapin ni xil. Latehur beret tei takes temei e bot nae.

¹⁵E melele xa laba, Iesu misel xat xil bit, “Muxouxou kuhi ve ‘is’ na Farasi xil e ‘is’ na suv toto *Herod*.”^x

¹⁶ Melele xa lalong sepinien nan, lasep usili del xil mun tang labit, “Xos xi di bit usil is vengan xa xir rataleh ti beret ar.”

¹⁷ E Iesu minem kil naha xa di lasep usili. Ma misis xil bit, “?Veneh ma di musep usil beret ar xa tovuol? ?!Mutakil ti mu!? ?Be reitin xa nenemien namim bon?^y ¹⁸Metemim di, e mutapus kil ti neta. Vurangemim di, e mutalong kil ti neta. ?Iemim bovorong ni?^z ¹⁹melele xa natehul papas beret lim (5) tang tangan nasa ni mi moletin taosen lim (5000)? ?E valeat vahis iaxa polu ni rut anien xil xa muteleh viton ni?”^a

Labit, “Valeat lu e le tei (12).”

²⁰ E Iesu bit rilomun ni bit, “?E melele xa natehul papas beret lu e he sav (7) tang tangan nasa ni mi moletin taosen hat (4000), valeat vahis iaxa polu ni rut anien xil xa muteleh viton ni?”^b

Labit, “Valeat lu e he sav (7).”

²¹ Di, misis xil bit, “?Ma, veneh ma xamim mutakil ti mu koute te holesok xil ak?”

Iesu pol ni moletin tei te hal Betsaeta xa meten bar mei bos rilomun

²² Melele xa Iesu bemei e metimal te hal Betsaeta del moletin nan xil, rute moletin xil ladel moletin tei xa meten bar bemei visal Iesu e ladakesi tangan vatuxoli.^c ²³ Iesu dal xat he moletin ak e dela be reling metimal. Di, Iesu miling kusahen nan e met moletin ak, e miling hen en. Di, misisi bit, “?Taxeak, mikila opus kil neta tova?”^d

²⁴ Ma moletin ak miketeh xorelis xi e biteni bit, “Napus kil moletin xil, e napusi xa langgoni vatiei xil xa di lakakao.”

²⁵ Di, Iesu miling hen e meten xalu vatei mun. Di, melele xa moletin ak miketeh pisi mun, meten xalu mei bos e pus kil holesok xil vus. ²⁶ Di, Iesu misemaie ni bit, “Onaha ti mun e metimal, e uhe tim vari.”

Pita bit rati xa Iesu be Mesaea xa Hi tehiti xati tangan isa ni imei

Mat 16:13-20; Luk 9:18-21

²⁷ Melele xa Iesu e moletin nan xil lakakao laba, laduxoh rute tei sangas visal taon te hal Seseria-Filipae. E inggak, xi misis moletin nan xil bit, “?Moletin xil labit inou nabe visi vari?”

²⁸ Xil labit rilomun ni labit, “Rut moletin xil labit obe Sion Baptis. E rute ngan xil labit xouk obe *provet Ilaetsa*. E rute sav xil mun labit xouk obe tei e provet sav xil tetiamu.”^e

²⁹ E xi misis xil bit, “?E xamim, ma midep? ?Mubit inou nabe visi vari?”^f

E Pita mitamea e bit rilomun ni mini bit, “Xouk obe Mesaea xa Hi tehiti xati tangan isa ni imei.”

³⁰ Di, Iesu misep xol moletin nan xil tangan linaviteni ti mi moletin tova xa xi be Mesaea.^g

Iesu bit lelen longpangasien, maten e mea rilomun nan

Mat 16:21-23; Luk 9:22

³¹ E melele nen ak ba, Iesu bit lelen ni mi moletin nan xil xa xi, Nat Moletin, iha ihur longpangasien holu, e elda xil, *vat xil na pris xil*, e *titsa* xil te rae na Mosis lisin ni. Ti, lihas vini. E melele xa melengien tol (3) mei itavi, xi imea rilomun ra maten.^h ³² Iesu bit kil holesok xil vus ak mei memese kuhi mi xil.

^y8:17 Mak 6:52 ^z8:18 Ser 5:21; Esek 12:2; Mak 4:12; Pol 28:26

^a8:19 Mat 14:15-21; Mak 6:35-44; Luk 9:12-17; Sion 6:5-13

^b8:20 Mat 15:32-38; Mak 8:1-9 ^c8:22 Mak 7:32-33 ^d8:23 Sion 9:6

^e8:28 Mak 6:14-15; Luk 9:7-8 ^f8:29 Sion 6:69 ^g8:30 Mak 9:9

^h8:31 Mat 17:12; Mak 9:12; Luk 17:25

E Pita dela be rin e misepin nggeih xati tangan nasepin ti namak. ³³E melele xa Iesu biles pus moletin nan xil, xi misepin nggeih mi Pita bit, “!**Temat**, uhe reling nou! Nenemien nam ak di nggusil xat nenemien na moletin xil te ut etan, e tahusil nenemien na Hi ti.”

³⁴Di, Iesu mikes viton eloheoh nan xil del vanut moletin xil xa ladi sotin vuteili tangan lamei visali. Di, biteni mi xil bit, “Xosxa moletin tova ien bei tangan ihusil nou, ma istokovein holesok xil te meulien nan, ti, ipo eivave te maten nan e ihusil xat nou.¹ ³⁵Vengan xa ngan xil xa lasak pisi tangan likenin meulien nae ve xil tang, ma meulien nae ikesae ra xil. E ngan xil xa lamaen meulien nae ikesae vengon di langgusil xat inou del longongen hos, ma, e ut nesao, xil likamet meulien sal.^j ³⁶?Naha ihos xosxa moletin te ileh holesok xil vus te ut etan ak, e istokovein meulien sal nan tangan ileh holesok xil ak? !Navos ti vari! ³⁷Vengan xa xi misakras vasa neta ngan tangan vahur rilomun ni meulien sal nan. ³⁸Moletin xil te xosali ak, sexien nae mikavui tang e latave reitin ti mi Hi. Langgoni atou tei xa mikila be na tiramue tei, e ba, di maen xi mi ngan tesav mun. E ngan xil xa labe unoun tangan lavit rati xa di langgusil inou mu sepinien navan pe met moletin xil ak, inou mun, Nat Moletin, nihe unoun tangan nihit rati xa labe moletin navan xil melele xa nitilomun nime i tel **masxaxa** xil na Tata navan e itel minehinen te xeihen xa xi isa ni minou.”^k

9 Di, Iesu biteni bit, “Nabiteni reitin mi xamim xa rut xamim xa di lasoh del nou xosali, ti lipus neta tei mei istal e melele xa lameul tamu ladi xa ipisen

ni xa xeihen te lelatxatien na Hi bemei ngamu.”¹

Minehinen te xeihen na Hi bemei e Iesu

Mat 17:1-13; Luk 9:28-36

²Melele xa melengien tei e he sav (6) mei mitavi, Iesu nggur Pita, Temis del Sion e del xatel latobe nesao e vathu tei tangan xatel ak kestang latoti vituei en. E melele xa latodi rute ak, latpus tenbe Iesu biles.^m ³Eising nan xil mei mieh xa mieh nggoni laet. ⁴E di, latpus **Mosis** e provet **Ilaetsa** lustal e ba lusepin del Iesu.

⁵Melele xa Pita pus xalu, biteni mi Iesu bit, “!**Titsa**, bos xa matdi inggak! Xosxa iem bei, ma matikili ni horao ihe tol: tei ihe mam, tei ihe ma Mosis, e tei ihe ma Ilaetsa.” ⁶Xi del rumali ulixatel mikan pupu, misak ni xi takil ti xa ihit neh.

⁷Di, momah tei mei mikutaxol xatel, e latlong rae tei mistal nggo en xa biteni bit, “Ngan ak be Natuxoli, ngan xa eheien navan di en. !Muteong xat raen!”ⁿ ⁸E vatakes, melele xa latketehe be nesao, lattapus ti mun moletin xalu ak, Iesu kestang de visal xatel.

⁹Melele xa di latsuvul ra vathu ak, Iesu misep xol xatel bit, “Mutnahiteni ti mi moletin tova usil naha xa mutepusi ha ituxoh melele xa inou, Nat Moletin, nimea rilomun ra maten.”^o ¹⁰Xatel latlong xat sepinien nan, e latsis xatel mun tang usil koute te sepinien nan xa bit, ‘nimea rilomun ra maten.’

¹¹Di, latsisi latbit, “?Veneh ma **titsa** xil te rae na Mosis labiteni xa provet Ilaetsa imei itiamu ni Mesaea xa Hi tehit xati?”^p

ⁱ8:34 Mat 10:38; Luk 14:27 ^j8:35 Mat 10:39; Luk 17:33; Sion 12:25

^k8:38 Mat 10:33; Luk 12:9 ^l9:1 Mak 13:30

^m9:2 2Pit 1:17-18 ⁿ9:7 Sam 2:7; Mat 3:17; 12:18; Mak 1:11; Luk 3:22; 2Pit 1:17; Dut 18:15; Pol 3:22 ^o9:9 Mat 12:16; Mak 8:30 ^p9:11 Mal 3:1; 4:5-6

12-13 E Iesu bit rilomun ni bit, “Reitin xa latetisi e sepinien na Hi tehit Ilaetsa imei tangan ivue xat holesok xil vus mei imese. E nabiteni mi xamitel xa Ilaetsa temei ngamu e moletin xil latnapus kil ti. Xil latepol tesa mini texoni ngan xa iexil tehei. E suse nen tak, nggusil sepinien na Hi, inou mun, Nat Moletin, nihur long-pangasien holu e moletin xil lisin nou.”^q

Iesu pol ni horamue tei xa ninin tesa da en mei bos rilomun

Mat 17:14-23; Luk 9:37-45

¹⁴ Melele xa Iesu xatel latsuvul ra vathu ak, latbe rute xa eloheoh sav xil ladi en. E melele xa latduxoh xil, latpus vanut moletin xil holu di lasoh lakapis xol xil, e rut titsa te rae na Mosis di langor del xil. ¹⁵ Melele xa moletin xil lapus Iesu mei mistal, latemanin e laloh tangan lavur pilei. ¹⁶ Di, Iesu misis eloheoh nan xil bit, “?Di mungor del xil usil naha?”

¹⁷ Ma, tei e vanut moletin xil ak biteni mini bit, “Titsa, inou nanggur horamue navan bemei visaluk vengan xa **ninin tesa** tei da en xa misak ni misakras vasepin. ¹⁸ E melele xa ninin tesa ak dal xati, bas tan ni e misak ni mingas luhon, rurungon misol nggo vulongen, e tenben mei nggeih pupu. Natesis moletin nam xil tangan lavol rati, e lasakras lapol ni.”

¹⁹ Melele xa Iesu milonge mak, biteni bit, “Iva! !Xamim moletin xil te xosali ak, neketen namim tovuol vari! ?Niti visal xamim ituxoh vilieh? Veok buol ni xamim xa neketen namim tovuol. Muhur horamue xai vamei visal nou.” ²⁰ Ma ladel horamue ak ba mi Iesu. E melele xa ninin tesa ak pus Iesu, dal xat hora-

mue ak e bas tan ni. Misak ni mikilkile e rurungon misol nggo vulongen.

²¹ Di, Iesu misis tame horamue ak bit, “?Xi di pol ni mak hram vahis tuok?”

E tamen bit rilomun ni bit, “Melele xa tehe hokorong tamu. ²² Melengien holu, ninin tesa ak misak pisi tangan vahas vini vaxo suse xa misak ni di mot be upang mu oei. !E xosxa okila upol ni, ma iem isae li e xamel e ututou ni xamel!”

²³ E Iesu bit, “?Veneh ma di obiteni obit ‘xosxa okila opol ni’? Vengan Hi mikila vapol ni neta xil vus e rin na moletin tei xa neketen nan da.”^r

²⁴ Vatakes, tame horamue dakesi bit, “Neketen navan da, e tapin ti. !Tutou ni nou li tangan namur ti mun!”^s

²⁵ E melele xa Iesu pusi xa vanut moletin xil laloh lamei visal xalu, xi biteni mi **ninin tesa** ak bit, “!Nabiteni minuk ninin tesa, xouk xa di osikoe xol horamue ak tangan misakras vateong mu vasepin, uhe relingi e onamei ti mun en!”

²⁶ Melele xa biteni mak, ninin tesa ak meun be nesao ra horamue ak e misak ni mot be tan e mulul nggeih. Di, be relingi. Melele xa moletin xil lamei visal horamue ak, lapusi dat mak tang nggoni tiei votei tei e labiteni labit, “Xi mat tuei.”^t ²⁷ E Iesu dal xat hen e dutou ni mei misoh. Di, Iesu be reling xil.^u

²⁸ Dutou sung, melele xa Iesu be vangit nim xa da en e **moletin nan xil** lapusi xa be xil tang, lamei visali e lasisi labit, “?Veneh ma xamem matesakras mavol rat ninin tesa ak?”

²⁹ E Iesu bit rilomun ni mi xil bit, “Hi di misa xeihen tangan vahol rerat hisit ninin tesa ak nggo sexien te sisen.”^{*}

*9:29 Rut vanuvei matu xil te Mak laling sepinien ak xa bit, “nggo sexien te sisen e halen te anien.”

^q9:12-13 Sam 22:1-18; Aes 53:3 ^r9:23 Mat 21:21; Mak 11:23-24; Luk 17:6

^s9:24 Luk 17:5 ^t9:26 Mak 1:26

^u9:27 Mat 9:25; Mak 1:31; 5:41; Luk 8:54; Pol 3:7

³⁰Di, lamea reling taon te hal Seseria-Filipae ak e lakakao labe rute sav e provins te hal Kaleli xa moletin xil tovuol en vengang ien ti tavei moletin ti vakil rute xa ladi en. ³¹Iesu pol ni mak vengang xa ien bei tengang vapispisi mi moletin nan xil. Ma, biteni mi xil bit, “Nave nousav ti, moletin tei isa rat inou, Nat Moletin, nihe he moletin xil te ut etan e lihas vin inou. E, e melengien tol nen, nimea rilomun ra maten.”^v ³²E xil latakil ti koute te pispisien nan ak, e ulixil mikan tengang lasisi ni.

**Iesu pispisi xa visi iaxa be eilep
mak mu pe met Hi**

Mat 18:1-5; Luk 9:46-48

³³Iesu bemei e taon te hal Kapaniam del xat eloheoh nan xil e labe tim. Melele xa labe nim, Iesu misis xil bit, “?E suse, xamim di mutesep usil naha?”

³⁴E xil ladit votei vengang xa di laten-gor e suse usil visi e xil iaxa eilep mak mu mili.^w

³⁵Misak ni, Iesu dotan e mikes viton moletin lu e le tei (12) nan. Di, biteni mi xil bit, “Xosxa moletin tei ien bei tengang mei vahe eilep mak mu vali mosav xil, ma iling xi ihe tan. Imak, ma mei ihe moletin te polien na moletin xil vus.”^x

³⁶Di, Iesu midel tutut horamue tei bemei visal xil. Miso hen ngga xole pe metextil, e biteni mi xil bit, ³⁷“Moletin tei xa nggur pilei movotei tei xa nggoni horamue ak vengang xa xi di nggusil inou, nggoni ngan xa moletin ak di nggur pilei inou. E tei xa di nggur pilei nou, nggoni ngan xa di nggur pilei ngan xa tesil inou namei.”^y

**Moletin xa tavae ti vatel
Iesu, xi di mos e rin nan**

Luk 9:49-50

³⁸Sion Sepeti biteni mi Iesu bit, “Titsa, xamem mapus moletin tei di nggol rerat ninin tesa xil e hisom, ma masep xole tengang napol ni ti mun vengang xa xi tamos ti e xamem.”

³⁹E Iesu biteni mi xil bit, “Munasep xole ti vengang xa ngan xa di pol ni merekel xil nggo hisok misakras vamea sung e vasepin vasa vaha xat inou. ⁴⁰Vengang xa moletin xa di tavae ti vatel xir di mos e rin nar.^z ⁴¹Reitin li nabiteni mi xamim xa xosxa moletin tei isa oei tang mi xamim vengang xa mupol nggo hisok, Hi isa huite teni mini ven.”

⁴²E Iesu biteni mun bit, “E, e rin sav nen, xosxa moletin tova isak ni moletin tei xa nggusil xat nou nggoni horamue ak tengang imot e tesaen, ma Hi isa pangasien xa isa mak mu mini. Bos mak mu xa lavar xat hat tova xa mahulong pupu vate huraen, e laso ni vamerir e huinep te tas.

⁴³“!Nggusil nenemien ak, xosxa hem misak ni xouk di omot e tesaen, ma uta xotehi iha! Ihos mak mu xa rut tenbom isa e uhur meulien sal, ili ngan xa hem xalu lubos tang ludi e liso xouk uhe Upang xa misakras vamat.^a ⁴⁴⁴⁵!E xosxa lem misak ni xouk di omot e tesaen, ma uta xotehi iha! Ihos mak mu xa rut tenbom isa e uhur meulien sal, ili ngan xa lem xalu lubos tang ludi e liso xouk

[†]9:44 Rut vanuvei matu xil te Mak laling sepinien ak xa bit, “E rute ak, xouk ulong pangasuk vehakut xa vehakut. Tomasis xil tit lia sal ni xouk, e upang teni ia pangasuk e namat ti vatova.”

^v9:31 Mat 16:21; 20:18-19; Mak 8:31; 10:33-34; Luk 18:32-33; 24:7 ^w9:34 Luk 22:24 ^x9:35 Mat 20:26-27; 23:11; Mak 10:43-44; Luk 22:26 ^y9:37 Mat 10:40; Luk 10:16; Sion 13:20 ^z9:40 Mat 12:30; Luk 11:23 ^a9:43 Mat 5:30

uhe Upang xa misakras vamat. ⁴⁶ ⁴⁷!E xosxa metom tei misak ni xouk di omot e tesaen, ukis rati iha! Ihos mak mu xa metom tei ikesae e uhur meulien sal, ili ngan xa metom xalu vus ludi tang e liso xouk uhe Upang xa misakras vamat. ^b ⁴⁸E rute ak, xouk ulong pangasuk vehakut xa vehakut. Tomasis xil tit lia sal ni xouk, e upang teni ia pangasuk e namat ti vatova. ^c

⁴⁹“Hi di maen ni xir rihisu ni melele te xeih xil tangan vasak ni xir ramese pe meten nggoni ngan xa sol e upang di misak ni sanien eo tei mei memese. ^d

⁵⁰“Sol bos. ?E xosxa neta xa misak ni sol ak bos be relingi, ma lipol ni mei ihos rilomun itep? ^e!Lasakras! Ma, bos xa sexien namim ixoni sol xa ti isak ni vitueien namim mei ihos mak mu e muti vituei e tomat. ^e

Iesu pispisi xa moletin xa miteli nastokovein atou nan ti

Mat 19:1-12; Luk 16:18

10 Melele xa Iesu misepin mi moletin nan xil bus, xi be reling provins te hal Kaleli del moletin nan xil. E labe rute tei xa mili Oeisal Sodan e provins te hal Sudea. Vanut moletin xil holu lamei visal Iesu e, nggusil sexien metu nan, xi pispisi mi xil.

²E melele nen ak, rut **Farasi** xil lamei visali tangan lasak pisi. Misak ni, lasisi labit, “?Uhit pisi mi xamem, **rae** nar xil di maen ni tangan moletin tei istokovein atou nan?”

³E Iesu bit rilomun ni mi xil bit, “?Midep? ?**Mosis** tesa rae eah mi xamim?”

⁴Xil labiteni mini labit, “Mosis temaen ni tangan tiramue tei istokovein atou nan tehiti, *‘Moletin xa bit vastokovein atou nan, isa Setifiket te Silaen mini. Ti, mikila istokovein ni sung.’* (Dut 24:1) ^f

⁵E Iesu bit rilomun ni bit, “Mosis tetis rae ak ve xamim vengnan xa vatumim nggeih pupu. ⁶E sexien ak tehe tovuol e melele xa Hi tepol kokot ni holesok xil e ut etan. Ralonge xa, *‘Hi pol ni moletin, tei be malohos, e tei mun be atou.’* (Sen 1:27) ^g ⁷E biteni mun bit, *‘Ve rin ak, tiramue imea reling tamen xal ninen, e ihisti itel atou nan, ⁸e xalu mei lalihe tei takes.’* (Sen 2:24) ^h Misak ni xalu lutave lu ti mu, e mei lube tei takes. ⁹Ma naha xa Hi tehistin ni, moletin ti mun naseti.”

¹⁰Dutou sung, melele xa ladilomun labe tim, **moletin nan xil** lasisi usil rin ak. ¹¹Ma, biteni mi xil bit, “Xosxa moletin tei mistokovein atou nan e, di, miteli del atou sav tei, pe met Hi nggoni ngan taxa di pol misa dela e di purun atou nan xa diamu. ⁱ ¹²E nggo suse nen tak, atou xa mistokovein tiramue nan e ba miteli del tiramue sav, pe met Hi nggoni ngan xa xi pol misa dela.”

Iesu misa tuxolxatien mi horamue xil

Mat 19:13-15; Luk 18:15-17

¹³Di, moletin xil laleh tutut horamue nae xil lamei visal Iesu tangan xi valing hen e xil e vasa tuxolxatien mi xil. E

³9:46 Rut vanuvei matu xil te Mak laling sepinien ak xa bit, “E rute ak, xouk ulong pangasuk vehakut xa vehakut. Tomasis xil tit lia sal ni xouk, e upang teni ia pangasuk e namat ti vatova.”

⁴9:50 Sol xa tetiamu tenaxoni ngan xil ti te xosali, tenamese ti. Tesak ni melele xa temer vuteili, ma neta xa tesak ni sol ak tehos tehe reling.

^b9:47 Mat 5:29 ^c9:48 Aes 66:24 ^d9:49 Lev 2:13 ^e9:50 Mat 5:13; Luk 14:34; Kol 4:6; Rom 12:18; 1Tes 5:13 ^f10:4 Mat 5:31; 19:7 ^g10:6 Sen 5:2

^h10:8 Efes 5:31 ⁱ10:11 Mat 5:32; Luk 16:18; 1Kor 7:10-11

melele xa moletin nan xil lapus xil, labul xat xil.

¹⁴E melele xa Iesu pus kil naha xa di lapol ni, ien mikat e misepin mi xil bit, “Mumaen tutut horamue xil ak lamei visal nou, e munasikoe xol xil ti. Vengan xa Hi be suv toto na hisit moletin xil xa langgoni xil tang.” ¹⁵Reitin li nabiteni mi xamim, ngan xil xa lataling xil ti pe relaxatien na Hi vaxoni tutut horamue tei, Hi nave suv toto te meulien nae ti.”^j

¹⁶Di, miso hen nggaxol horamue xil ak, miling hen e xil, e misa tuxolxatien ba mi xil kekes.

Tiram maxoe tei pusi xa nggeih pupu tangan vastokovein mani nan tangan vahusil xat Iesu

Mat 19:16-30; Luk 18:18-30

¹⁷Melele xa Iesu di nggusil suse ba, moletin tei miloh bemei visali, mitingeiril mini e misisi bit, “?Titsa hos, nipol ni naha tangan nikila nihur meulien sal?”

¹⁸Iesu bit rilomun ni mini bit, “?Veneh ma okes inou obit nabos? Moletin tovuol vahos, Hi kestang bos.”

¹⁹Xouk okil naha xa rae xil labiteni.

‘Munahas vin ti moletin.

Munakan ni atou mu tiramue na mosav ti.

Munakan ni ti neta na mosav xil.

Munaluvos ni his mosav xil ti.

Munaluvos mosav xil ti tangan muvur neta tova nae.

Mumerere ni tamemim e ninemim xil.” (Eks 20:12-16)^k

²⁰E tiram maxoe ak bit rilomun ni mi Iesu bit, “Inou di nanggusil xat rae xil vus ak melele xa natehe tutut horamue tamu mei duxoh xosali ak.”

²¹Di, Iesu miketeh momal ni tiram maxoe ak e eheien nan di en. Ma, biteni

mini bit, “Neta tei takes iaxa otapol ni ti mu. Uha, upos ni holesok xil vus nam e usa mani nen mi ngan xil xa holesok nae tovuol. E xosxa upol ni imak, ma holesok nam xil e ut nesao ihe holu. Ti, utilomun e uhusil xat inou.”^l

²²E melele xa tiram maxoe ak milong sepinien nan, xi milonge misa e be reling Iesu, vengan xa holesok nan xil labe holu e ien ti tavei tangan vastokovein ni.

²³Iesu miketeh mikapis e moletin nan xil e biteni mi xil bit, “Nggeih tova tang tangan moletin xa holesok nan holu vamaen Hi mei vahe suv toto e meulien nan.”^m

²⁴Moletin nan xil latemanin ni sepinien nan. E Iesu biteni mun mi xil bit, “Reitin li, nggeih tova tang tangan moletin xil lamaen Hi mei vahe suv toto e meulien nae.” ²⁵?Munemi xa **kamel** tei xa be mahulong mikila vakital vaxo met nitil tei xa hokorong xa hokorong pupu? E-e, misakras. E moletin tei xa holesok nan xil holu, nggeih mak mu mili ngan ak tangan imaen Hi mei ihe suv toto e meulien nan.”

²⁶Melele xa moletin xil na Iesu lalonge mak, latemanin pupu e lasis xil mun tang labit, “?Imak, ma Hi mikila vateh meulien e visi vari?”

²⁷Iesu miketeh mikapis e xil e bit, “!Iaxai vari! Moletin misakras vapol ni, e Hi kestang mikila ipol ni, vengan xi mikila vapol ni holesok xil vus.”ⁿ

²⁸Di, Pita biteni mini bit, “?Imak, ma itep mi xamem? Xamem matestokovein holesok xil vus namem tangan mavusiluk.”

²⁹E Iesu bit rilomun ni bit, “Reitin li nabiteni mi xamim, moletin xil vus xa di lastokovein tim sae, mu tua nae xil, mu hinexil, mu tamexil, mu ninexil, mu

^j10:15 Mat 18:3 ^k10:19 Dut 5:16-20; 24:14; Tem 5:4

^l10:21 Mat 6:20; Luk 12:33 ^m10:23 Mak 4:19

ⁿ10:27 Sen 18:14; Siob 42:2; Sak 8:6; Mak 14:36

horamue nae xil, mu naho sae xil venou e ve longeongen hos, ³⁰ma, e ut etan ak, Hi isa rilomun ni mi xil huite teni xa ihe handred tei (100) ili ngan xa latestokovein ni. Reitin, lihur rilomun ni nim xil, tua xil, hinxil, ninexil, horamue xil, naho xil, itel sakpurunien xil mun. E, e ut nesao, xil lihur meulien sal. ³¹E moletin holu xa labe eilep xil xosali ak, xil mei lihe neta sav tang. E holu xa labe movotei xil xosali ak, xil mei lihe eilep xil sung.⁷⁰

Iesu misepin usil maten e mea rilomunen nan vatei mun

Mat 20:17-19; Luk 18:31-34

³²Melengien vahis mei mitavi, e Iesu del moletin nan xil laduxoh suse xa be **Serusalem**. Di, Iesu ba di mikakao diamu ni xil. E melele xa moletin nan xil lapusi mak, latemanin holu, e ngan tesav xil xa ladutou, ulixil di mikan pupu. Vatei mun, Iesu mileh eloheoh nan xil laka se xil vuteili, e bit lelen naha xa mei istal mini mi xil. ³³Xi biteni bit, “?Mupusi? Taxeak di raba ve Serusalem xiak. E rute ak, xil limaen nou, Nat Moletin, ha nihe he **vat xil na pris xil** e **titsa** xil te rae na Mosis. Ivus ti, xil lihur nou nihe kot e limaen rat meulien navan tengen ha nimat. Ti, lisa rat nou ha nihe he moletin xil xa latave Siu ti.^p ³⁴Xil lipol pepamen ni nou, likusah iha xat inou, limeas pangas nou ni ao te xeih xil xa sanute di en, e lihas vin nou. E melele xa melengien tol mei itavi, inou nimea rilomun ra maten.”

Iesu pispisi mi moletin nan xil tengen lipol ni sexien te tutouen

Mat 20:20-28

³⁵Di, Temis xal Sion, nat Sepeti xalu, lumei lupus Iesu, e lusisi lubit, “Titsa, xamel iemel bei tengen opol ni neta tei e rin namel.”^q

³⁶Iesu misis xalu bit, “?Naha vari?”^r

³⁷Ma lubit rilomun ni lubit, “Melele xa mei uhe suv toto e uhur xeihen nam, ma umaen xamel tengen malitotan visaluk, tei ite rim metu, e tei ite rim meil.”^s

³⁸E Iesu miketeh pus xalu e misis xalu bit, “Xamil mutakil ti naha xa di musis nou ni. ?Midep? ?Xamil mukila tamak mulihur hisit sakpurunien xil e longpangasien xil ixoni ngan taxa inou ha nihuri?”^t

³⁹E lubit rilomun ni mini lubit, “!Io, makila!”^u

Di, Iesu biteni mi xalu bit, “Reitin, xamil mulihur hisit sakpurunien e longpangasien xil ixoni ngan xa inou nihuri. ⁴⁰E tave ti neta xa imak, nave nou ti xa nihosei visi iaxa mei itotan e riuk metu mu e riuk meil. Von xeihen xalu ak be na ngan xalu xa Tata navan bosei xalu ngamu tengen lalihuri.”

⁴¹E melele xa moletin sav xil na Iesu xa labe he xalu (10) lalongeong usili, iexil nggat Temis xal Sion. ⁴²Ma Iesu mikes viton xil vus lamei visali e biteni mi xil bit, “Mukila xa suv na ngan xil xa latave Siu ti di lapet rat xil tang mei labe nesao mili ngan xil xa di lalaxat xil, e vat nae xil mun di pol ni nggeih mi ngan xil xa ladi pe he xil.^v ⁴³E xamim, sexien namim namak ti. Xosxa tei e xamim ihit

^o10:31 Mat 20:16; Luk 13:30

^p10:33 Mat 16:21; 17:22-23; Mak 8:31; 9:31; Luk 24:7

^q10:35 Mat 4:21; 10:2; 17:1; Mak 1:19,29; 3:17; 5:37; 9:2; 10:41; 13:3; 14:33; Luk 5:10; 6:14; 8:51; 9:28,54; Pol 1:13 ^r10:36 Mat 20:32; Mak 10:51; Luk 18:41

^s10:37 Mat 19:28; Luk 22:30 ^t10:38 Sion 18:11; Luk 12:50

^u10:39 Pol 12:2 ^v10:42 Luk 22:25

mei ihe eilep mak mu ili xamim, xi mei ipol mi xamim ixoni moletin te polien tei namim.^w ⁴⁴E xosxa tei e xamim ien bei tangan vatiamu ni xamim, xi mei ihe moletin te tutouen namim ixoni slev tei. ⁴⁵Vengan inou mun xa nabe Nat Moletin, natamei ti tangan moletin xil ti latutou ni nou. !E-e! Inou namei tangan nitutou ni mosav xil e nisa meulien navan tangan nixal rat moletin xil holu mei limeluv ra pengasien te tesaen nae xil.”^x

Iesu pol ni moletin tei xa meten bar mei bos rilomun

Mat 20:29-34; Luk 18:35-43

⁴⁶Iesu del moletin nan xil ba laka pas taon te hal Seriko, e vanut moletin tei xa eilep di langgusili. E melele xa di labe reling Seriko, e seri suse ak, moletin tei xa meten bar di dotan, hisen Batimeas, nat Timaes. Xi di miram ni moletin xil ve mani. ⁴⁷E melele xa milongeng ni xa be Iesu te hal Nasaret iaxa di mikakao mei mitavi ba, miki ba ni bit, “!Iesu! !Xouk xa ostal onngo vatimol na suv toto **Deved!** !Iem isae li e nou!”^y

⁴⁸Moletin xil holu labul xati tangan vatat votei. E tave ti neta xa mak, xi miki nggeih pilei sung bit, “!Xouk xa ostal onngo vatimol na suv toto Deved! !Iem isae li e nou!”

⁴⁹Melele xa Iesu milongeng, misoh kat e mikesi tangan imei visali. Ma, rut moletin xil laxes moletin xa meten bar labit, “Uhesi xouk. Mea soh. Xi di mikasuk.” ⁵⁰Ma xi mistokovein kot nan, mitamea, e bemei visal Iesu.

⁵¹Di, Iesu misisi bit, “?Xouk iem bei tangan napol ni naha minuk?”^z

E ngan xa meten bar bit rilomun mini ni bit, “Titsa, ieok bei tangan upol ni nou niketeh rilomun.”

⁵²Ma, Iesu biteni mini bit, “Neketen nam pol ni metom mei bos rilomun. Ha mun tim.” E vatakes, moletin ak miketeh rilomun e nggusil Iesu e suse nan luba.^a

Iesu ba mistal e Serusalem e moletin xil lasa merereen mini

Mat 21:1-11; Luk 19:28-40; Sion 12:12-19

11 Melele xa Iesu del **moletin nan xil** lamei sangas ni **Serusalem**, xil mei lastal e metimal xalu te hal Betfas e Betani xa ludi sangas ni Vathu te Urvatiei te **Olip**. E rute ak, Iesu misil moletin nan lu² del sepinien ak bit, “Mulihe metimal xa da iaxor. E melele xa ha mulistal en, mulkamet sulut dongki tei xa labar xati xa moletin tovuol tamu vatotan e marin. Mullal rati e multela imei visal nou inggak. ³E xosxa moletin tei isis xamil ihit, ‘?Veneh ma di mulopol ni mak?’ ma mulhiteni mini mulhit, ‘Suv iaxa ien bei tangan vapol ni neta tei vatela, e navehi ti, isa rilomun ni imei.’”

⁴Ma, rumali luba e lukamet sulut dongki tei xa de hale e ri suse, lasare de sangas visal puiteh te nim tei. E melele xa di lulal rat ao nen, ⁵rut moletin xil xa di lasoh sangas lapus naha xa di lupol ni e mei lasis xalu labit, “?Veneh ma di mulal rat ao ra sulut dongki xai?”

⁶Ma eloheoh xalu lubit rilomun ni mi xil nggoni ngan xa Iesu tehiteni mi xalu, ma moletin xil ak lamaen xalu tangan lalihur dongki ak laliha. ⁷Ma, ludel sulut dongki ak be visal Iesu, xalu luden kot nalu da xol mar dongki ak e Iesu dotan en. ⁸Melele xa Iesu di nggo dongki ba, moletin xil holu mei lasak mesen suse nan. Laden kot nae xil e suse nan, e rute ngan xil la dei anguit liei xil xa ute di en e laling pilei di suse. ⁹Holu e vanut moletin xil ak xa di ladiamu ni Iesu del ngan

^w10:43 Mat 23:11; Mak 9:35; Luk 22:26 ^x10:45 1Tim 2:5-6 ^y10:47 Mat 9:27; 15:22 ^z10:51 Mak 10:36 ^a10:52 Mat 9:22; Mak 5:34; Luk 7:50; 8:48; 17:19

xil xa di langgusili ladutou, xil di lakei nggeih labit,

“!Ripet rat his Hi!

!Tuxolxatien iti mi ngan xa di bemei e his Iahova! (Sam 118:25-26)^b

¹⁰!Hi Suv ituxol xat xi xa di bemei

tengan ilaxat xir ixoni ngan xa suv toto

Deved tetiamu tepol ni!

!Ripet rat his Hi xa de ut nesao!”^c

¹¹E melele xa Iesu ba duxoh Serusalem, ba be **Nim Eo** na Hi e miketeh mikapis e holesok xil vus. Di, vengan xa ut sangas vamauxoluk, mistal mun e dilomun be metimal te hal Betani del eloheoh lu e le tei (12) nan xil e lapat en.

Iesu misa halesil tei ba xat vatit fik tei

Mat 21:18-19

¹²Ut milan, melele xa di lakakao langgo Betani tangan latilomun lave Serusalem, mae nggat Iesu e suse. ¹³Ma miketeh be sotin vuteili e pus vatit **fik** tei da xa ute holu. Ma be sangas visali tangan valang vesi xos huit fik ti ladi en. E mikameti xa huite tovuol, be ute xil tang, vengan xa tave melele xati teni ti tangan vaso huite.^d ¹⁴Misak ni, Iesu biteni mi vatit fik ak bit, “!Moletin ti mun naxa huit xouk vatova!” E eloheoh nan xil lalong sepinien nan.^e

Iesu minggol rerat moletin holu xa latamerere ni Hi ti ra Nim Eo

Mat 21:12-17; Luk 19:45-48; Sion 2:13-22

¹⁵Melele xa laduxoh Serusalem, Iesu be vloh te Nim Eo na Hi. Melele xa pusi xa rut moletin xil holu di lapos e di langgal holesok xil holu en, ien mikat, ma nggol rerat xil. Xi midivin rerat tep na ngan xil xa di laso papas mani e von totanen

na ngan xil xa di lapos ni mae xil xa be sanien eo xil mi Hi. ¹⁶E tamaen ti vari moletin vapo neta tova e vahur xoteh vloh te Nim Eo vatela. ¹⁷Iesu pispisi mi moletin xil bit, “E Vanuvei Eo na Hi, latetisi latehit, ‘Likes *nim mavan ni nim te sisen na moletin xil te kantri xil vus.*’ (Aes 56:7) E xamim mupol ni sung mei be ‘*nim ma vati kanen xil.*’” (Ser 7:11)

¹⁸E melele xa **vat xil na pris xil** del **titsa** xil te rae na Mosis lalong sepinien nan, lalang ves suse tangan lavas vin Iesu vaxo en. Vengan ulixil mikan ni Iesu e sexien xa moletin xil vus di latemanin ni xeihen te pispisien nan xil e di langgusili.^f

¹⁹Di, melele xa ut sangas vamauxoluk, Iesu be reling Serusalem del eloheoh nan xil, e labe Betani tangan lapat en.

Iesu pispisi ni naha xa Hi mikila vapol ni melele xa moletin xil di laling neketen nae en

Mat 21:20-22

²⁰Ut milan, melele xa di langgusil suse labe Serusalem, eloheoh xil lapus vatit fik, e lakameti xa ut fik ak nesao meles e vatite etan mat tuei.^g ²¹E Pita minem rilomun ni naha xa testal e biles biteni mi Iesu bit, “!Titsa, pus ti mu! Vatit fik xa otesa halesil teha xati mingguxu ngamu.”

²²Iesu bit rilomun ni mi xil bit, “Mul-ing neketen namim e Hi. ²³Reitin li nabiteni mi xamim, xosxa tei e xamim isemae ni vathu ak ihit, ‘Umea uhe reling voninom e ha uhe tas,’ e mutanem male ni ti naha xa di musisi, ma istal ihe reitin. Hi ipol ni e rin namim.^h ²⁴Misak ni, nabiteni mi xamim xa melele xa mu-

^b11:9 Mat 21:15; 23:39 ^c11:10 Luk 1:32-33; Pol 2:29 ^d11:13 Luk 13:6

^e11:14 Mak 11:20 ^f11:18 Mak 14:1; Luk 20:19; 22:2 ^g11:20 Mak 11:14

^h11:23 Mat 17:20; Luk 17:6; 1Kor 13:2

sis ve neta ngan e muneket en xa mei muhuri reitin, ma Hi isa ni mi xamim.

²⁵“E melele xa tei e xamim di misoh e misis, e minem neta tei xa misa xa moletin sav pol ni mini, iling ekaten nan iti e iketeh ihos rilomun mi moletin ak. Imak, ma Hi Tamemim mun xa de ut nesao iketeh ihos mini ve neta tesa xa xi pol ni.”^{i 26 §}

Vat xil na Siu xil labit lakila xa Iesu di pol ni holesok xil e his visi

Mat 21:23-27; Luk 20:1-8

²⁷Iesu dilomun be Serusalem del elohoh nan xil. E melele xa labe vloh te Nim Eo, vat xil na pris xil, titsa xil te rae na Mosis, del elda xil na Siu xil lamei visal Iesu.^j ²⁸Xil lasisi labit, “?Xouk di opol ni holesok xil ak e his visi? ?Visi vari maen xouk tangan opol ni?”

²⁹Ma Iesu bit rilomun ni mi xil bit, “Inou mun nisis xamim ni neta tei. Xosxa muhit rilomun ni minou, ma inou mun nihiteni mi xamim xa di napol ni holesok xil ak e his visi. ³⁰?Xamim muhit pisi minou, Sion Baptis tebaptaes ni moletin xil e di tepol e his visi? ?Hi mu moletin tova tang?”^k

³¹Ma xil laba, di langor mi xil mun tang labit, “?Rihit naha? Xosxa rihiteni rihit, ‘Sion di tepol e his Hi,’ ma xi ihiteni mi xir ihit, ‘?Xosxa temak, veneh ma mutnake reitin ti e sepinien nan?’^l ³²E xosxa rihiteni rihit, ‘Xi di tepol e his moletin tang,’ ulixir mikan ni vanut moletin xil xa eilep xiak vengan xa xil vus lake reitin xa Sion Baptis tehe *provet* tei na Hi vari.”^m ³³Ma xil mei labit rilomun ni mi Iesu labit, “Xamem matakil ti xa xi di tepol e his visi.”

Ma Iesu biteni mi xil bit, “Xosxa imak, ma inou mun ninaviteni ti xa inou di napol ni holesok xil ak e his visi.”

Iesu dei vole usil longrasien na moletin xil xa di lalaxat urvatiei tei

Mat 21:33-46; Luk 20:9-19

12 Di, Iesu dei vole tei mi vat xil na Siu xil bit, “Vatei, moletin tei milih urvatiei te *grop* tei san. Hortan ak pol ni vloh mikapis xole, e minggil vul tei da en xa ti lipel kikis huit grep xil en tangan sute teni ileh. Di, mikili ni vet tei xa be nesao tangan ti liketeh xole en. Melele xa pol vuol ni holesok xil ak, hortan ak maen moletin sav xil tangan mei lilaxati. E xil labit xati mini xa lisa ti huit grep mini melele xa limen. Di, xi mikakao ba de kantri sav tei.ⁿ

²“Huram vahis mei mitavi, e huit grep xil ak mei men. Ma hortan ak misil slev nan tei tangan ihe visal ngan xil xa di lalaxat urvatiei te grep san e ileh ti huite e itilomun mei isa ni mini. ³E melele xa duxoh urvatiei ak, moletin xil xa di lalaxati ladal xat slev ak, labas purun ni, e lasil rati ba e taleh ti neta.

⁴“Ma, hortan ak misil slev nan teimun ba mi xil, e moletin xil xa lalaxat urvatiei ak labas vatin, lasak purun ni, e lasil rati ba. ⁵Di, hortan ak misil slev nan teimun tangan ha vapus xil, e labas vini sung. Misil slev nan holu mun e moletin xil ak lapol ni mi xil nggoni ngan taxa latepol ni tetiamu: rut slev xil labas purun xil, e rute xil mun labas vin xil vari. ⁶Hortan ak pol ni mak ba vuma ... natneli sutang da xa be siskes nan, ngan xa eheien nan di en. Ma di, hortan ak misil natneli

§11:26 Rut vanuvei matu xil te Mak laling sepinien ak xa bit, “E xosxa naketeh ti navos mi mosav xil, ma Hi Tamemim mun naketeh ti navos mini.”

11:25 Mat 6:14; 5:23; Rev 2:4,14,20

11:27 Mat 16:21; 27:41; Mak 8:31; 14:43,53; 15:1; Luk 9:22; 22:66 **11:30** Sion 1:33 **11:31** Mat 21:32; Luk 7:30 **11:32** Mat 14:5; 21:46 **12:1** Aes 5:1-2

xati be visal xil vengan minemi bit, 'Xil limerere ni natuxoli xati sung.'^o

⁷“E melele xa ngan xil xa di lalaxat urvatiei ak lapus natneli bemei, labiteni mi xil mun tang labit, ‘!Ei, nat hortan xati iaxa di bemei iaxor! Xi vari ihur urvatiei ak melele xa tata nan imat. !Mumei, rava ravas vini! !Imak, ma holesok nan xil mei ihe nar sung!’⁸ Ma xil laba, ladal xati, e labasi mat. Di, lakuvun rat tiei nan ra urvatiei ak.”^p

⁹Di, Iesu misis vat xil na Siu xil xa di lateong ni vole ak bit, “?Ma midep? ?Hortan te urvatiei ak mei ipol ni naha mi moletin xil ak? Xi, itilomun e ihas lelen ngan xil xa latelaxat urvatiei san. Ti, imaan urvatiei san mi moletin sav xil tangan ti lilaxati.¹⁰ ?Midep? ?Xamim di mutavuli ti Vanuvei Eo? Vengan di misep usili bit,

*‘Pos te nim xa moletin te polien xil di lasin ni,
xi vari iaxa mei be seteman xati te nim xa mili sen pos nen xil vus.*

¹¹*Ngan ak, Iahova vari pol ni,
e rapusi xa naha xa xi tepol ni tellep pupu.”* (Sam 118:22-23)^q

¹²Melele xa Iesu misepin bus, vat xil na Siu xil lalong kila xa Iesu di dei vole ak ba xat rin nae. Ma iexil bei tangan latal xati, e ulixil mikan ni vanut moletin xil xa mahulong xiak xa di lamerere ni. Misak ni, labe relingi laba.^f

Farasi xil lasis Iesu usil rin te takis

Mat 22:15-22; Luk 20:20-26

¹³Di, vat xil na Siu xil iexil bei tangan lalang ni mesal tova xa likila lital xat Iesu ixo en ve sepinien nan. Misak ni, lasil rut **Farasi** xil del rut Siu sav xil

mun xa lasuv xat lelatxatien na suv toto **Herod** Antipas ba lapus Iesu tangan lasisi ni rin savsav xil.^s ¹⁴Ma, xil labe visal Iesu e labiteni mini labit, “Titsa, xamem makila xa xouk obe hisit moletin tei xa, vehakut, di osepini neta xa be reitin, e otapet rat ti moletin tova vali moletin sav. Xouk di osepini mi moletin xil vus nggoni ngan xa xil vus lapin tang, e di opisipisi mi xil vus ni sexien xa lakila lavusil xat suse na Hi vaxo rin xa be reitin. Ma, usa ti nenemien nam mi xamem usil rin ak. ?**Rae na Mosis** maen ni tangan xir, Siu xil, ti rixal **takis** iha mi **suv toto te hal Rom**, mu tamaen ni ti?”

¹⁵E Iesu pus kila xa di lapol bos mini nggo hilibexil tang, e nenemien nae misa xati. Ma, bit rilomun ni mi xil bit, “?Veneh ma di musak pisi tangan muvoh xol inou? Musa **mani** tova xa di langgal takis ni mei nipus ti.”

¹⁶Melele xa lasa ni mini, misis xil bit, “?Valnao visi vari iaxa da en? ?E his visi iaxa de mani ak?”^{**}

E labit rilomun ni mini labit, “Neta xalu vus xa ludi en be na suv toto te hal Rom.”

¹⁷Ma Iesu biteni mi xil bit, “Xosxa mak, ma momal tang tangan musa naha xa be na suv toto te hal Rom mini, e naha xa be na Hi, musa ni mini.”^t

E melele xa lalong sepinien nan, late-manin pupu ni.

Satusi xil lasis Iesu usil melele xa moletin xil limea rilomun ra maten

Mat 22:23-33; Luk 20:27-40

¹⁸E melele nen ak, rut **Satusi** xil xa labit moletin misakras vamea rilomun ra maten labe visal Iesu, e lasisi labit,^u

^{**}**12:16** Mani ak, valnao suv toto te hal Rom iaxa da en e ladis en labit, “Ngan ak be nat Okastas xa be Hi.”

^o**12:6** Sen 22:2; Mat 3:17; 17:5; Mak 1:11; 9:7; Luk 3:22; 2Pit 1:17

^p**12:8** Hib 13:12 ^q**12:11** Pol 4:11; 1Pit 2:7 ^r**12:12** Mat 14:5; Luk 22:2

^s**12:13** Mak 3:6 ^t**12:17** Rom 13:7 ^u**12:18** Pol 23:8

¹⁹“Titsa, **Mosis** tetisi tehit xosxa moletin tei imat reling atou nan e horamue nalu tovuol, ma tuneli sung iteli itel tunau ak. Imak, ma melele xa lalihur horamue tei nalu, lipusi ixoni ngan xa be na tiramue xa mat.^v ²⁰Vatei, tua tatei xil latehe lu e he sav (7) lateti vituei. Ngan xa tehe muimol teteli tetel atou tei. Di, xi temat e horamue nalu tehe tovuol. ²¹Misak ni, tuneli xa tetutou ni mei tehur tunau nan. Luteti vituei teha vuma ... xi temat e horamue nalu tehe tovuol. Di, sexien nen tak testal mun mi tuneli xa tetutou ni. Ma di, testal mun mi ngan xa tehe hat nen ²²e dit mak tang teha vuma ... tetuxoh ngan xa tehe tasite e tua xil ak, e xi mun temat. E tua lu e he sav (7) ak, horamue nae tehe tovuol. E tetutou ni holesok xil ak, atou ak mun temat. ²³?Ma xosxa mea rilomunen be reitin, melele xa moletin xil vus limea rilomun ra maten, ngan xave e tua xil xa labe lu e he sav (7) xiak iaxa ihur atou ak ihe nan xati, vengang xil vus lateteli tetela?”

²⁴Iesu bit rilomun ni mi xil bit, “Xamim di mule ras suse namim vengang xa mutakil kuh ti Vanuvei Eo na Hi mu xeihen nan. ²⁵Vengang e melele xa moletin xil limea rilomun ra maten, xil mei lixoni **masxaxa** xil xa ladi ut nesao, e sexien te tetelien ihe tovuol mun. ²⁶?E veneh ma mutake reitin ti xa moletin xil likila limea rilomun ra maten? ?Mutavuli ti mu tisen na Mosis e melele xa Hi tesepin mini texo holiei tei? Vengang Hi tehit, ‘Inou **nabe** Hi na Ebrahim, Hi na Aesak, e Hi na Siekob.’ (Eks 3:6)^w ²⁷?Mulonge? Xi **be** Hi na ngan xil xa lameul tamu ladi, e tave na ngan xil ti

xa amat.^{††} Ngan ak di pisen ni xa nenemien namim tamal ti vari.”

Iesu pispisi usil rae xave iaxa be eilep mak mu mili sen rae sav xil

Mat 22:34-40; Luk 10:25-28

²⁸**Titsa** tei te rae na Mosis di miteong ni naha xa Satusi xil latesis Iesu ni e tetep xa Iesu tehit rilomun ni sepinien xa tehos mi xil. Ma xi mea, be visal Iesu e misisi bit, “?Rae xave vari iaxa be eilep mak mu mili sen rae xil vus?”

²⁹E Iesu bit rilomun ni mini bit, “Rae xa be eilep mak mu mili sen rae sav xil, xiak, ‘!Mol-Isrel xil, muteong! Iahova xa di ramot mini, xi kestang be Hi. ³⁰Iemim ihei Iahova xa be Hi namim ixo tinemim tevi, ixo meulien tevi namim, ixo nenemien tevi namim, e ixo xeihen tevi namim.’ (Dut 6:4-5) ³¹E teimun xa nggoni tang e be lu nen di biteni bit, ‘Eheien namim iti e moletin sav xil ixoni ngan taxa eheien namim di e xamim mun tang.’ (Lev 19:18)^x E rae sav xil mun tovuol xa vahe eilep mak mu vali rae xalu ak.”

³²Titsa te rae na Mosis biteni mini bit, “Titsa, sepinien nam momal tevi. Reitin mak xa Iahova kestang be Hi, e hi sav tovuol, nggoni ngan xa obiteni.^y ³³E reitin mun xa iexir ihei Iahova xa be Hi nar ixo tinexir tevi, ixo nenemien tevi nar, e ixo xeihen tevi nar. E reitin mun xa eheien nar iti e mosav xil ixoni ngan xa eheien nar di xir mun tang. Rae xalu ak lube eilep mak mu luli sanien eo xil vus xa rakila rasa ni vaha mi Hi.”^z

³⁴Melele xa Iesu miteong ni xa moletin ak misepin del metisouen, biteni

^{††}**12:27** Neta sav xa Ebrahim, Aesak e Siekob lattetat nousav ngamu e melele xa Hi di tehit sepinien ak mi Mosis, Hi tehiteni xa xi **be** Hi natel. Xi tenaviteni ti xa **tehe** Hi natel. Ma Iesu bit ngan ak pisen ni xa latomeul tamu latodi e ut nesao.

^v**12:19** Sen 38:8; Dut 25:5 ^w**12:26** Eks 3:2,15,16 ^x**12:31** Rom 13:9; Kal 5:14; Tem 2:8 ^y**12:32** Luk 20:39; Dut 6:4; 4:35; Aes 45:21 ^z**12:33** Dut 6:5; Sos 22:5; Luk 10:27; Lev 19:18; Rom 13:9; Kal 5:14; Tem 2:8; 1Saml 15:22; Hos 6:6

mini bit, “Sangas tang tangan Hi mei vahe suv toto e meulien nam.”^a

Ma, e melele nen ak ba, moletin xil utixil mikan xa lasis ti mun neta mini.

Iesu misep usil Mesaea xa Hi tehosei

Mat 22:41-46; Luk 20:41-44

³⁵ Melele xa Iesu di pispisi mi moletin xil e vloh te **Nim Eo**, misis xil bit, “?Veneh ma titsa xil te rae na Mosis di labiteni labit Mesaea mei istal ixo vatimol na suv toto **Deved**?³⁶ Vengan Deved iaxa tekesi ni ‘Suv’ e melele xa **Ninin Eo** tesa nenemien ak mini tangan ihit, ‘*Iahova biteni mi Suv navan bit, “Utotan inggak e riuk metu, ituxoh melele xa niling elu nam xil e hem.”*’”

(Sam 110:1)^b

³⁷ Suv toto Deved vari tekes Mesaea ni ‘Suv nan.’ ?E vengan xa rakila xa tata tei misakras vakes natneli ni ‘suv,’ Mesaea istal ixo vatimol na Deved itep?³⁸ Moletin xil holu di lateong ni sepinien na Iesu, di labesi xil tova tang ve pispisien nan xil.^c

Iesu bul xat titsa xil te rae na Mosis

Mat 23:1-36; Luk 20:45-47

³⁸ Melele xa Iesu di tamu pispisi mi moletin xil e vloh te Nim Eo, biteni mi xil bit, “Muxouxou kuhi ve sexien na titsa xil te rae na Mosis. Vengan xa di lapol ni sexien xil taxa mosav xil ti lipus xil e ti lisa merereen mi xil ven. Iexil bei tangan lasing ni eising hos xil xa tepiei na eilep xil, e likakao e von posen xil tangan moletin xil lipus kil xil e lisemin xil itel merereen. ³⁹E melele xa labe **nim te pispisien**xil mu anien xil xa tellep, xil di lalapis vontoen xil xa bos xa be na ngan

xil kestang xa lapo his xil xa latellep. ⁴⁰E, ve hokanen nae, titsa xil ak di laleh xuxus ni holesok xil holu ra tunau xil. E pe met moletin xil, di lapol ni sisen xil xa tepiei. !Ve rin ak, Hi isa pangasien xil xa isa pupu iha xat xil ili ngan tesav xil!”

Iesu misep usil sanien na tunau tei mi Hi e hisit sanien eah xa momal pe met Hi

Luk 21:1-4

⁴¹ Melele xa Iesu da tamu e vloh te Nim Eo na Hi, miketeh e pus moletin xil xa di lasa mani tangan vatutou ni polien te Nim Eo. Moletin holu lamei xa holesok nae xil holu, e xil di laso mani holu.^d ⁴²Di, miketeh mun e pus tunau tei xa be hoeo bemei, e xi miso selen lu (2) tang. ⁴³Ma Iesu mikes viton eloheoh nan xil e biteni mi xil bit, “Reitin li nabiteni mi xamim, tunau xa be hoeo iaxai misa sanien nan mili sen ngan tesav xil xa laso mani tangan vatutou ni Nim Eo.^e ⁴⁴Vengan xa ngan tesav xil di lasa sanien nae xa be rute tang te holesok nae xil, e eilep be nae. E tunau ak xa be hoeo tang, xi di misa vuol ni mani xa vahe te anien an.”

Iesu misep usil sakpurunien xil e melengien xil te xeih xa ti imei

Mat 24:1-35; Luk 21:5-33

13 Melele xa Iesu be reling vloh te **Nim Eo** del eloheoh nan xil, tei e xil biteni bit, “Titsa, pus ti mu nim xil xa mahulong xiak te Nim Eo xa latepol kuhi ni ni hat xil xa mahulong iaxai.”

²Ma Iesu biteni mi xil bit, “?Xamim di mupus nim hos xil ak xa mahulong mak? Reitin li nabiteni mi xamim, melengien tei di bemei xa hat xil ak navistin xil ti

³⁸12:37 Reitin xa Mesaea ixo vatimol na suv toto Deved, e vengan xa xi tekes Mesaea ni ‘Suv,’ di pisen ni xa Mesaea ihe eilep mak mu ili, e xos, Mesaea teta tetiamu ni.

^a12:34 Mat 22:46; Luk 20:40 ^b12:36 Pol 2:34-35; 1Kor 15:25; Hib 1:13

^c12:37 Luk 19:48; 21:38 ^d12:41 Sion 8:20; 2King 12:9 ^e12:43 2Kor 8:12

mun. Moletin xil mei lihu lelen xil vus ihe tan.”^f

³Di, Iesu be Vathu te Urvatiei te *Olip* e ba dotan e seri hu e di miketeh pus Nim Eo de rin. Ma, Pita, Temis, Sion, e Andru labe visali, e xatel latsisi tangan vahit kil sepinien nan latbit, ⁴“?Uhiteni mi xam-etel li, lihu lelen Nim Eo vilieh vari? ?E naha vari ipisen ni xa holesok xil ak di bemei sangas?”

⁵Di, Iesu bit rilomun ni mi xil bit, “Muxuxou kuhi ve xamim, e munamaen ti moletin mei naluvos xamim. ⁶Vengan moletin xil holu limei e hisok e lihiteni lih-hit, ‘Inou nabe Mesaea!’ Ma liluvos moletin xil holu.⁸ ⁷Ti mulongeong ni xa vaeen xil xa tellep di bemei, e muhur longeongen mun usil vaeen xil xa di rute xil xa be sotin. E munatemanin ti ven. Holesok xil ak iaxa mei istal itiamu, e nave hoxalite te ut etan ti mu. ⁸Vengan xa ut tei ivae itel ut tei mun, e kantri xil lihas tan ni kantri sav xil. E ut xil hao e ut etan, lul holu ilil e mae kekaten ihas moletin xil holu. E ngan ak nave hoxalite ti mu. Holesok xil ak mei istal ixoni melele xa atou tei xa milong rohon ni mar pangasien xa di pisen ni xa, nave nousav ti, iling tuvava nan.^h

⁹“Muketeh kuhi ve xamim. Melengien tei imei xa moletin xil mei lital xat xamim e lilepis xamim e kot nae xil e lihas purun xamim e *nim te pispisiennae* xil. E vengan xa munggusil inou, lileh xamim ha musoh pe met vat e suv toto na moletin xil. Melele ihe mesal tangan muhithiten longeongen hos na Hi mi xil.ⁱ ¹⁰Vengan, itiamu, longeongen hos na Hi ha ituxoh rute xil vus e ut etan tangan moletin xil vus likila, ti, hoxalite te holesok xil vus mei istal sung.

¹¹“E melele xa xil lital xat xamim e lileh xamim muhe kot nae, munanexo ti ve naha xa ti muviteni mi xil. Vengan xa, e melele nen ak, *Ninin Eo* isa naha xa mukila muhithiteni. Reitin, nave xamim ti xa ti musepin, e ihe Ninin Eo iaxa ti isepin ixo xamim.^j

¹²“E melele nen ak, moletin xil ti li-maen tuexil tangan ha lihas vin xil, e tata xil mun ti lipol ni imak tang mi horamue nae xil. E horamue xil mun lihiles ni tamexil e ninexil e limaen xil lihe he ngan xil xa lihas vin xil.^k ¹³Moletin xil vus iexil iat xamim vengan xa di mung-gusil xat nou. E xamim xa ti musoh ixeih ituxoh hoxalite te sakpurunien xil ak, ma Hi iteh meulien e xamim.^l

¹⁴“E melele xa mupus ‘*neta tei xa be muis pupu pe met Hi*’ (Dan 11:31)^m ite ut eo xa tamal ti tangan vata en, ma momal tangan ngan xil xa ladi e provins te hal Sudea litemanon lilesae ha lixus liti e vathu xil. (Xouk xa di obuli sepinien ak, bos tangan ukil kuh koute teni.) ¹⁵Xosxa moletin tova di mingel e hale, mesal ihe tovuol tangan vatilomun vahe nim e vahur neta tova nan.ⁿ ¹⁶E xosxa moletin tei di pol e naho, xi nava ti mun tim tangan vahur eising tova nan. ¹⁷E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil.^o ¹⁸Musis mi Hi ve holesok xil ak, tangan mei natuxoh xamim ti e melengien te an tesa. ¹⁹Vengan longpan-gasien xil te melengien tesa xil ak isa ili melengien sav xil vus te ut etan, e melele xa Hi tepeas ni ut etan mei duxoh xos-ali, mu e melengien xil mun xa ti imei.^p ²⁰E Hi Suv teta xoteh melengien tesa xil ak mei ihe tamure mu vengan xa xi di minem usil ngan xil xa tehosei xil labe

^f13:2 Luk 19:44 ^g13:6 Sion 5:43 ^h13:8 Aes 19:2; 2Kron 15:6

ⁱ13:9 Mat 10:17-18 ^j13:11 Mat 10:19-20; Luk 12:11-12 ^k13:12 Maek 7:6

^l13:13 Mat 10:22; Sion 15:18-21 ^m13:14 Dan 9:27; 12:11

ⁿ13:15 Luk 17:31 ^o13:17 Luk 23:29 ^p13:19 Dan 12:11; Rev 7:14

nan. Vengan vahit napol ni ti namak, ma moletin ti mun nameul.

²¹ “E melele nen ak, xil lihiteni lihit, ‘!Mupus ti! !Ngan ak be Mesaea xa Hi tehosei!’ Mu lihiteni lihit, ‘!Mupus ti mu! !Xi iaxa da iaxor!’ E xamim, munake reitin ti e sepinien xil ak. ²² Vengan mesaea te luvoson xil e **provet** te luvoson xil mun limei. E melele xa limei, lipol ni merekel xil e holesok xil xa tellep xa isak ni moletin xil limesep pupu ven. Xil lipol ni tangan liluvos moletin xil holu tangan mei lihusil xil. E lisak pisi tangan lilihi rerat ngan xil mun xa Hi tehosei xil labe nan xosxa lakila lapol ni.^q ²³ Ma muxouxou kuhi, e munem xati xa natehit lelen ni ngamu mi xamim holesok xil ak xa mei istal.

²⁴ “E melele xa melengien tesa xil ak ivus,

‘Eai ihiles mei imaluxoluk e aveti namem ti mun.’ (Aes 13:10)

²⁵ *‘Hitu xil likiri ra tilang hat, e holesok xil mun xa di nesao, Hi imulul ni xil.’ (Aes 34:4)^r*

²⁶ Ti, moletin xil lipus *‘Nat Moletin imei etan itel momah xil te tilang hat.’ (Dan 7:13)^s* Xi imei itel minehinen te xeihen nan xa ihe mahulong pupu. ²⁷ Xi isil **masxaxa** nan xil lihe rute xil vus e ut etan, lixo rin tei ha ituxoh rin tei mun, tangan lileh viton moletin xil vus xa Hi tehosei xil labe nan.^t

²⁸ Iesu biteni mun mi Pita xatel bit, “Momal tangan xamim muhur pispisien ixo vatit **fik**. Melele xa lite xil miso rohon ni ute xil xa be neta hu, xamim mukila xa melele te an te tin di bemei.^u

²⁹ Usil sexien nen tak, melele xa mupus holesok xil ak mei istal, mukila xa mei rilomunen navan, Nat Moletin, di be-

mei sangas. Reitin, da ngamu e puiteh. ³⁰ Reitin li nabiteni mi xamim, holesok xil ak mei istal e melele xa moletin xil te xosali ak limeul tamu liti. ³¹ Nabiteni reitin, vengan xa neta sav xa ut etan itel tilang hat mun lalikesae e melengien tei, sepinien navan misakras vakesae vatoa. Ma mukila muke reitin en.^v

³² Di, Iesu biteni mun bit, “Moletin tovuol xa wakil melengien xati xa inou, Nat Moletin, nitilomun en. Reitin, masxaxa xil xa ladi ut nesao, e inou mun, Nat Hi, matakil ti. Hi Tamer kestang mikil haoa xati teni.^w ³³ Ma, muketeh kuhi e ti muvue xat xamim, vengan xa mutakil ti melengien xa nitilomun en.^x ³⁴ Ixoni ngan xa vahit eilep tei vahe reling tim san tangan vahe rute sav tei. Ma, iling moletin te polien nan xil tangan lilaxat kuh holesok nan xil, ti lipol ni polien savsav xil xa miseti mi xil, e ngan xa be mereketeh tangan iketeh kuhi ve mei rilomunen nan.^y ³⁵ !Mak, ma muketeh kuhi! Vengan mutakil ti xa inou, eilep namim, nitilomun vilieh. Xos nimei e mahis, mu e hilaep te vongien, mu ut nalan ti mu, mu e makoe.^z ³⁶ E melele xa nistal en, munatemanin ni ti. Isa xosxa nikameti xa di mupat. ³⁷ Mak, ma sepinien xa di nabiteni mi xamim taxeak, nabiteni mun mi moletin xil vus, ‘!Muketeh kuhi!’”

Vat na Siu xil lalang ves suse tangan lavas vin Iesu vaxo en

Mat 26:1-5; Luk 22:1-2; Sion 11:45-53

14 Melengien vahis mei mitavi, e melengien lu sutang di e ihe **Melengien xil te Beret xa Is Tovuoel En**. E melengien kokot teni vari, xil lapol ni Anien te Tavien. E **vat xil na pris xil** del

^q13:22 Dut 13:1-3; Rev 13:13 ^r13:25 Pol 2:34-35; 1Kor 15:25; Hib 1:13

^s13:26 Mak 8:38; Rev 1:7 ^t13:27 Dut 30:4; Sak 2:6,10

^u13:28 Mat 21:19; Mak 11:13 ^v13:31 Mat 5:18; Luk 16:17

^w13:32 Pol 1:7 ^x13:33 Mat 25:13 ^y13:34 Mat 25:14 ^z13:35 Luk 12:36-38

titsa xil te rae na Mosis di lalang ves suse tangan latal xat xusus ni Iesu e lavasi vamat vaxo en.^a ²E labiteni labit, “Rinapol ni ti e melengien te Anien te Tavien venggan, maxani, moletin xil linavae mi xil mun tang.”

Iesu ba ve anien tei e atou tei pisen merereen nan mini

Mat 26:6-13; Sion 12:1-8

³E melele xa Iesu da tamu e metimal te hal Betani, xi ba di ngganien e tim sa Saemon xa, tetiamu, mesien **leporsi** tepurun tenben. Di, atou tei bemei nim e nggur valit vokon tei xa lapol ni valite ni hat hos tei xa lakesi ni alabasta. Vokon ak, mani teni nggeih. E xi bemei visal Iesu e rute xa dotan da en, e mideh vokon ak ba xat vatin tangan vapisen merereen nan mini.^b

⁴E melele xa rut moletin xil lapusi, iexil nggati e laseputut ni labit, “?!Veneh ma di purun vokon ak mak!?” ⁵Ma labul xati labit, “Vahos mak mu vahit ha vapos ni vokon ak ni **mani** tova xa eilep. Ti, mani nen mikila vatutou ni hoeo xil.”

⁶E Iesu biles e biteni mi xil bit, “!Ei, mustokovein ni! ?Veneh ma xamim di mubul xat atou ak? Xi pol ni neta tei xa bos pupu minou. ⁷Vengan hoeo xil liti visal xamim vehakut, e mukila musa tutouen mi xil e melengien xil vus. E inou, nasakras nate visal xamim vahehi.^c

⁸Atou ak di pol ni naha xa xi mikila vapol ni e rin navan. Vengan xa melele xa mideh vokon ak ba xat tenbeok, xi di misak mesen nou ve tehinen navan.^d

⁹Reitin li nabiteni mi xamim, e rute xil vus xa lihithiten longongen hos usil nou en, xil lihithiten naha xa atou ak tepol ni minou. E isak ni moletin xil linem xati ven.”

Sudas maen ni tangan isa rat Iesu ihe he vat xil na pris xil

Mat 26:14-16; Luk 22:3-6

¹⁰Di, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil tangan vapol ni suse xa vasa rat Iesu mi xil vaxo en. ¹¹E melele xa lalong sepinien nan, lamaal pupu e labit xati xa lixale ven. Mak, ma Sudas ba di milang ni mesal xa bos tangan isa rat Iesu ihe hexil ixo en.

Iesu ngga Anien te Tavien del moletin nan xil

Mat 26:17-29; Luk 22:7-14,21-23; Sion 13:21-30

¹²E melengien kokot te Melengien xil te Beret xa Is Tovvuol En, e melele xa di labas sulut sipsip xil ve **Anien te Tavien**, moletin na Iesu xil lamei visali e lasisi labit, “?Rute xave iaxa iem bei tangan masak mesen Anien te Tavien en?”^e

¹³Ma Iesu misil moletin nan lu del sep-kilaen ak bit, “Luha. Mulhe taon te hal Serusalem, e moletin tei xa di po valoei tei xa mahulong mei ihisu mi xamil. Mulhusili ¹⁴e mulihe nim xa xi iha en. Ti, mulsis moletin xa nim ak be man mulihit, “Titsa bit, “?Vontoen xave iaxa nitel moletin navan xil mei mua Anien te Tavien en?”” ¹⁵Xi itel xamil mulhe von toen nesao e nim man e ipisen rute tei xa mahulong xa lasak xati ngamu datil xamil. Rute ak vari iaxa mulsak mesen holesok xil vus en.”

¹⁶Ma xalu lube Serusalem, e lupus holesok xil vus nggoni ngan taxa Iesu tehiteni mi xalu. E lusak mesen Anien te Tavien en.

¹⁷E melele xa eai ba minu, Iesu bemei e dotan e von anien en del moletin lu e le tei (12) nan. ¹⁸E melele xa di lang-

^a14:1 Mak 11:18; Luk 19:47 ^b14:3 Luk 7:37-38 ^c14:7 Dut 15:11

^d14:8 Sion 19:40 ^e14:12 Eks 12:6; 14:20

ganien, Iesu bit lelen ni mi xil bit, “Reitin li nabiteni mi xamim, tei e xamim xa di ngganien vituei del inou taxek, xi iaxa isa rat nou nihe he elu navan xil.”^f

¹⁹ Melele xa lalonge mak, xil lalonge misa pupu, ma xil kekes di lasis Iesu labit, “?Suv midep li, onemi obit inou?”

²⁰ E Iesu bit rilomun ni mi xil bit, “Reitin, tei e xamim vari xa di ngganien vituei del inou iaxa isa rat nou niha.”^g

²¹ Be reitin xa inou, Nat Moletin, nimat ixoni ngan xa Vanuvei Eo di misepin ni. !E isa pupu mi ngan xa isa rat nou! Moletin ak, vahos mak mu vahit linapesi ti vengan xa pangasien xa Hi isa ni mini ihe eilep pupu.”

Anien eo na Suv

Mat 26:26-30; Luk 22:14-20; 1Kor 11:23-25

²² Melele xa di langganien, Iesu nggur beret tei e memes Hi ven. Di, bul pasi, e melele xa di miseti mi moletin nan xil, xi biteni bit, “Muhuri mua ni. Ngan ak be tenbeok.”^g

²³ Di, nggur kap xa uae di en, memes Hi ven, e melele xa misa ni mi xil, xil vus lamu ni vuteili.^h ²⁴ Di, biteni mi xil bit, “Uae ak be ra navan xa isak ni **hitxatien hu te xeih na Hi** mei istal e ihe reitin.^{§§} Reok ileh ve moletin xil holu.ⁱ ²⁵ Reitin li nabiteni mi xamim, ninamu ti mun uae ak ituxoh melele xa nimu uae hu e rute xa Tata navan be suv toto en.”

²⁶ E melele xa langganien bus, lakikei ni sisien tei e lastal labe Vathu te Urvatiei te **Olip**.^j

Iesu bit lelen ni xa moletin nan xil lilesae relingi

Mat 26:31-35; Luk 22:31-34; Sion 13:36-38

²⁷ Melele xa laduxoh Vathu te Urvatiei te Olip, Iesu biteni mi moletin nan xil bit, “Xamim vus mulesae reling nou ixoni ngan xa Hi tehiteni e Vanuvei Eo xa tehit,

‘Inou nihas moletin xa di milaxat sipsip xil, e sipsip san xil liletasil relingi.’ (Sak 13:7)^k

²⁸ E melele xa nimea rilomun ra maten, inou nitiamu ni xamim ha nite Kaleli.”^l

²⁹ E Pita mitamea e biteni mini bit, “!Tave ti neta xa moletin sav xil vus lilesae relinguk, inou ninave relinguk ti vatova!”

³⁰ Ma Iesu bit rilomun ni mini bit, “Reitin li nabiteni minuk, e vongien tak, melele xa ut nalan ti mu e tuto xil linakorat ti mu nave valu, e xouk uhiteni ihe vatol xa otakil ti nou.”

³¹ E Pita biteni nggeih pilei sung bit, “!E-e, namak ti! !Tave ti neta xa nimat itelak, inou nasakras namiteni xa natakil ti xouk!” E ngan tesav xil mun labiteni mak tang.^m

^f14:20 Ngan ak tesak ni naha xa Sam 41:9 tehiteni mei mistal be reitin.

^{§§}14:24 E Eks 24:6-8, Mosis mitah re buluk e hor te sanien tangan vasak ni hitxatien matu te xeih xa Hi tepol ni tetel mol-Isrel xil mei istal e ihe reitin. Usil sexien nen tak, re Iesu pol ni hitxatien hu te xeih mei istal e ihe reitin xa Hi iteh meulien e moletin xil te ut etan ixo en.

^f14:18 Sam 41:9 [§]14:22 Mat 14:19; 15:36; Mak 6:41; 8:6; Luk 9:16

^h14:23 1Kor 10:16 ⁱ14:24 Eks 24:8; Sak 9:11; Hib 9:20

^j14:26 Sam 113–118; Luk 22:39 ^k14:27 Mat 26:56; Mak 14:50

^l14:28 Mak 16:7 ^m14:31 Sion 11:16

Iesu misis e ut Ketsemani e miling meulien nan pe he Hi

Mat 26:36-46; Luk 22:39-46

³²Di, Iesu be rute tei xa lakesi ni Ketsemani del *moletin nan xil*. Melele xa laduxoh rute ak, xi biteni mi xil bit, “Mutotan muti tak e ti mutatil nou. Inou niha nisis inggaxor.”ⁿ ³³Xi nggur Pita, Temis e Sion latnggusili. E melele xa latoba, nenemien na Iesu basi holu e milonge misa pupu.^o ³⁴Ma xi biteni mi xat-el bit, “Tinok li meas pupu, e nalonge lehit ngan xa bit vahas vin nou. Mutti tak, e ti mutiketeh itel nou.”^p

³⁵Di, Iesu mikakao reling xatel vuteilitang, mitingeiril be tan e misis mi Hi tengang vahur rat longpangasien te melele te xeih ak xa di bisu ni vahe relingi nggusil nenemien nan. ³⁶Misak ni, xi misis bit, “Tata navan li, xosxa suse sav tova mun da tamu, uhur rat longpangasien ak ihe reling nou li. E onapol ni ti naxoni ngan xa inou ieok bei, e upol ni ixoni ngan xa xouk kestang iem bei.”^q

³⁷Di, xi dilomun be visal xatel e mikameti xa di latopat. Ma xi biteni mi Pita bit, “?Saemon Pita, veneh ma di opat mak? ?Mutsakras mutoketeh vatel inou vahe haosa tei takes? ³⁸Mutiketeh e ti mutisis tengang mutnamot ti e melele xa sakpisien xil imei e xamitel. E tinemitel, iemitel bei tengang mutopol ni neta tei xa momal, e tenbemitel memel.”^r

³⁹Di, Iesu dilomun ba e misis ni sisen taxa tesis ni tuei. ⁴⁰E melele xa Iesu dilomun, mikameti xa termali latopat mun vengang latsakras latohur xat metxeih nattel. E melele xa latlale, latbe unoun, e

lattakil ti naha xa lathitini mini. Di, Iesu be reling xatel vatei mun ba.

⁴¹E melele xa Iesu dilomun bemei visal termali vatol nen, bul xat xatel bit, “?Di tamu mutopat? ?Di tamu mutongel? !Mutopat pipin! !Topus ti! Taxeak be melele xati xa lisa rat nou, Nat Moletin, nihe he moletin tesa xil. ⁴²!Tomea, ratoha! ?Mutpusi? Moletin xa isa rat inou, xi tuei xa di bemei iaxor.”

Vat xil na Siu xil mei ladal xat Iesu

Mat 26:47-56; Luk 22:47-53; Sion 18:3-12

⁴³Melele xa Iesu di tamu misepin, Sudas xa be tei e eloheoh lu e le tei (12) nan mistal. Xi bemei del xat vanut moletin xil xa di laleh xat tiei del homenda xil te vaeen. Xil lamei langgusil nenemien na vat xil na pris xil del titsa xil te rae na Mosis e elda xil na Siu xil.^s ⁴⁴E be Sudas iaxa teling nenemien nan tengang isa rat Iesu mi elu nan xil. E tehit kil suse xa ipisen Iesu mi xil ixo en tehit, “Moletin xa nipesum ni vin, ma xi vari xiak. Mumei mutal xati e mereketeh namim xil litela iha.”

⁴⁵E melele xa lamei, Sudas mika mal be visal Iesu e bit, “Titsa, bos vongien li.” Di, mei po xati e pesum ni vin.

⁴⁶Di, vanut moletin xil ak lamei ladal xat Iesu. ⁴⁷E moletin tei xa misoh visal Iesu milihni rat tiei te vaeen nan e da xoteh vurang slev tei na vatixar na pris xil.

⁴⁸E Iesu misepin mi xil bit, “?Veneh ma di muleh tiei e homenda xil te vaeen tengang mei mutal xat nou? ?Munemi mubit inou iaxa di nadiamu ni moletin xil tengang mavae vaha xat kavmen nar?

ⁿ14:32 Sion 18:1

^o14:33 Mat 17:1; Mak 5:37; 9:2; 13:3; Luk 5:10; 6:14; 8:51; 9:28; Pol 1:13

^p14:34 Sam 42:5,11; 43:5; Sion 12:27; 4:9

^q14:36 Rom 8:15; Kal 4:6; Sion 5:30; 6:38 ^r14:38 Mat 6:13; Luk 11:4

^s14:43 Mat 16:21; 27:41; Mak 8:31; 11:27; 14:53; 15:1; Luk 9:22; 20:1

!E-e! ⁴⁹Melengien xil ngasen nateti vangit vloh te **Nim Eo** e di natepispisi mi moletin xil, e xamim mutnamei ti tangan mistal xat nou. E holesok xil vus ak mei mistal tangan vasak ni naha xa latetisi e Vanuvei Eo mei vastal vahe reitin.”^t

⁵⁰E melele xa ladal xati, moletin nan xil vus lalesae relingi.^u ⁵¹E tei xil tehe horam maxoe xa tepis xol xi ni kaliko tang. Melele xa lapo xat pisi, ⁵²xi be reling eising nan e miloh hon tang ba.

Langgur Iesu be kot na vat xil na Siu xil

*Mat 26:57-68; Luk 22:54-55,63-71;
Sion 18:13-14,19-24*

⁵³Ngan xil xa ladal xat Iesu ladela labe tim sa vatixar na pris xil. E rute ak, vat xil na pris xil, titsa xil te rae na Mosis del elda xil na Siu xil di lamei vituei.^v ⁵⁴E Pita di mika xus e di nggusil vanut moletin xil xa di ladel Iesu laba vuma ... laduxoh vloh te tim sa vatixar ak. E rute ak, Pita be vangit vloh e ba dotan del mereketeh xil sangas visal upang nae tangan vatali.

⁵⁵Vat xil na pris xil del eilep sav xil mun na Siu xil di langan ni moletin tova xa mei ihit rat neta tova xa misa xa Iesu tepol ni tangan likila lihasi imat ven. E lasakras. ⁵⁶Vengan xa, tave ti neta xa moletin holu lamei e lapol ni luvosan ba xat Iesu, sepinien nae xil vus misav ni xil.

⁵⁷Di, moletin vahis mei lasoh e laluvos ni sepinien nae ba xat Iesu mi ngan

xil e kot labit, ⁵⁸“Xamem matelonge xa moletin ak tehit, ‘Inou nihiu len **Nim Eo** na Hi xa moletin xil tang latepol ni. Ti, nikili ni teimun e melengien tol tang xa nave moletin ti napol ni.”^w ⁵⁹E sepinien ak mun, sepinien nae tamal ti.

⁶⁰Ma vatixar mitamea pe met moletin xil vus e misis Iesu bit, “?Ma midep? Xouk di olong sepinien xa di lasepin ni ba xatuk. ?Neta tovuol xa obit oviteni?”^x ⁶¹E Iesu dat votei, tavit ti sepinien vari.^y

Ma vatixar misisi mun bit, “?Reitin xa xouk obe Mesaea xa Hi tehit xati xa isa ni imei? ?Xouk obe Nat Xi xa di rapet rat Hisen?”

⁶²Iesu bit rilomun ni bit, “Inou vari. E navehi ti, xamim mupus ...

*‘Nat Moletin itotan
ite ri metu na Hi Suv te Xeihen.*

*!E mupusi imei e ut etan
ixo momah xil te tilang hat!’” (Sam 110:1;
Dan 7:13)^z*

⁶³Melele xa vatixar milong sepinien nan, ien mikat xa mikat, dal papas eising nan e miki nggeih bit, “?!Mulonge!? ?Veneh ma di ralang ni sepinien tova mun tangan vaha xati?^a ⁶⁴!Xamim vus mulonge xa di misep purun his Hi! ?Munemi xa ti ripol ni naha mini?” E xil vus lamae e nenemien tei takes xa momal tang tangan imat.^b

⁶⁵Di, rute ngan xil lakusah ba xati e labar xat meten. Di, lalevesi e labit, “?!Hit lelen neta tova mi xamem, visi iaxa diuk!?” E mereketeh xil mun labas purun ni.

^t14:49 Luk 19:47; 21:37; Sion 18:20 ^u14:50 Sak 13:7; Mat 26:31; Mak 14:27

^v14:53 Mat 16:21; 27:41; Mak 8:31; 11:27; 14:43; 15:1; Luk 9:22; 20:1

^w14:58 Mak 15:29; Sion 2:19 ^x14:60 Aes 53:7; Mak 15:4-5; Luk 23:9

^y14:61 Mat 16:16; Mak 5:7; Luk 8:28; Sion 11:27; 20:31

^z14:62 Mat 22:44; Luk 20:42; Pol 2:34; Efes 1:20; Kol 3:1; Hib 1:3,13; 10:12; 12:2; Mat 24:30; Mak 13:26; Luk 21:27; Rev 1:7; 14:14

^a14:63 Nam 14:6; Pol 14:14 ^b14:64 Lev 24:16; Sion 19:7

Pita biteni xa takil ti Iesu

Mat 26:69-75; Luk 22:52-62;

Sion 18:15-18,25-27

⁶⁶ Melele xa Pita di tamu dotan e vangit vloh te nim ma vatixar na pris xil, atuli tei te polien nan bemei sangas visali. ⁶⁷ Melele xa pus Pita di dal upang, miketeh momal ni e biteni bit, “!Xouk mun di otehusil Iesu te hal Nasaret!”

⁶⁸ E Pita muun xole bit, “!Tave reitin ti! Inou natakil ti naha xa di obiteni iaxai.”

Di, Pita mitamea e mikakao ba ve puitech te vloh. E tuto tei mikorat. ⁶⁹ Atuli te polien ak bemei e pus rilomun ni Pita. Ma, biteni vatei mun mi moletin xil xa di lasoh sangas visali bit, “!Moletin ak mun be tei e xil!” ⁷⁰ E, vatei mun, Pita muun xole.

Tavehi ti, e moletin xil xa lasoh ladi visal Pita labiteni mini labit, “Xouk vari obe tei e xil vengan sepinien nam nggoni ngan Kaleli xil tang.”

⁷¹ E Pita misepin nggeih bit, “!Natakil ti moletin xai vari xa di musep usili iaxai! !Hi isa halesil iha xat nou xosxa sepinien navan be luvoseni!”

⁷² Vatei takes, tuto mikorat be valu nen. E melele xa Pita milonge, minem rilomun ni naha xa Iesu tehiteni mini tehit, “Ut nalan ti mu e tuto xil linakorat ti mu nave valu, e xouk uhiteni ihe vatol xa otakil ti nou.”^c Ma tinen pangas e di muis nggeih.

Ladel Iesu ba misoh pe met suv Paelet tangan imaen ni ha imat

Mat 27:1-2,11-26; Luk

23:1-25; Sion 18:28-40

15 E makoe roroh, **v*at xil na pris xil*** latemanon lamei vituei del elda xil na Siu xil, **t*itsa*** xil te rae na Mosis, e ngan xil vus xa ladi e kaonsel na Siu xil. Lasep usil rin na Iesu e lamei e nenenien tei takes tangan ha imat. Ma, labar xati e ladela be visal Paelet xa be vat te kavmen te rute ak tangan lasa rati vaha mini.^{* d}

² Melele xa suv Paelet pusi, misisi bit, “?Midep? ?Be reitin xa xouk obe suv toto na **Siu** xil?”

Iesu bit rilomun ni mini bit, “Ngoni ngan taxa xouk di obiteni.”

³ Di, vat xil na pris xil lamei e labit rat holesok holu xa misa xa labit Iesu di tepol ni. ⁴ Ma Paelet misisi Iesu bit, “?Otalong ti sepinien xil xa di labiteni ba xatuk xiak? ?Sepinien nam tovuol tangan ovit rilomun ni mi xil?”^e ⁵ E Iesu dat votei tang.[†] Melele xa Paelet pus sexien nan, mesep pupu ven.

⁶ Be sexien matu tei na suv Paelet xa, e melengien xati te Anien te Tavien, xi di maen moletin tei xa moletin xil labosei tangan ha ven imase ra nim te xeih. ⁷ E melele nen ak, vatxeih tei de nim te xeih del vat vaen sav xil, hisen Barabas. Xil latehas vin moletin tei e melele xa latevae tetel kavmen te hal Rom. ⁸ Ma melele xa Paelet pusi xa vanut moletin xil ak di lamei visali tangan lasisi vamaen moletin tova ha ven vamase vahusil sexien matu nan, ⁹ misisi xil bit, “?Midep, iemim bei tangan nimaen suv

*15:1 Ngan ak misak ni naha xa Aes 53:8 tehiteni mei mistal be reitin.

†15:5 Ngan ak misak ni naha xa Aes 53:7 tehiteni mei mistal be reitin.

^c14:72 Mat 26:34; Mak 14:30; Luk 22:34; Sion 13:38

^d15:1 Luk 22:66; Mat 16:21; 27:41; Mak 8:31; 11:27; 14:43,53; Luk 9:22; 20:1

^e15:4 Aes 53:7; Mak 14:60-61; Luk 23:9

toto na Siu xil ha ven imase?" ¹⁰ Paelet misis xil mak vengan xa pus kila xa vat xil na pris xil di lasa rat Iesu mini vengan xa di lanem misa ni tang.

¹¹ E vat xil na pris xil lasi petine vanut moletin xil ak tangan lisis Paelet imaen Barabas ha ven imase, e nave Iesu ti.^f

¹² Ma, Paelet misis xil vatei mun bit, "Xosxa imaxai, ma nipol ni naha mi Iesu xa xamim mukesi ni suv toto na Siu xil?"^g

¹³ E lakei be nesao labit, "Ti xati e eivave!"

¹⁴ Paelet misis xil bit, "Veneh? Xi pol ni naha xa misa?"

E lakei nggeih pilei sung labit, "Ti xati e eivave!"

¹⁵ Paelet ien bei tangan vasak ni nenemien na vanut moletin xil ak vahe tan, ma nggusil eheien nae, xi maen Barabas ba ven mase. E mi Iesu, xi misemae ni tangan moletin te vaeen nan xil ha limeas pangasi ni ao te xeih xa sanute xil di en, ti, litela iha tangan liti xati e eivave tei.

Moletin te vaeen xil lapol pepamen ni Iesu

Mat 27:27-31; Sion 19:2-3

¹⁶ Melele xa lameas pangas Iesu bus, moletin te vaeen xil ladela labe vangit vloh te nim xa eilep ma Paelet xa be vat te kavmen te rute ak. Di, lakes viton moletin te vaeen sav xil vus xa ladi en^h tangan lamei vituei. ¹⁷ Xil lasing xol Iesu ni kaliko tei xa pili nggoni ngan na suv toto xil. Di, langgil xat vatluvoluv tei ni ao tei xa sanute xil tepiei di en,

e lasili xol vatin.^h ¹⁸ Di, lapol pepamen ni nggoni ngan xa xi be suv toto tei e labiteni mini labit, "O suv toto na Siu xil, xamem di mamerere ni xouk!" ¹⁹ Di, labasi ni liei tei di vatin e lakusah ba xati. Di, latingeiril pepamen pe meten nggoni ngan xa di lasa merereen nae mini.

²⁰ Melele xa lapol pepamen ni bus, langgur rat kaliko te pili ak be relingi, e lasing xole ni eising nan mun. Di, ladela ba tangan ha liti xati e eivave tei.

Ladi xat Iesu e eivave tei

Mat 27:32-44; Luk

23:26-43; Sion 19:17-27

²¹ Melele xa moletin te vaeen xil di ladel Iesu laba, xil labisu ni moletin tei e suse xa nggo rute sav e di bemei be Serusalem, hisen Saemon te hal Saerin, tame Aleksanda xal Rufas. Ma moletin te vaeen xil lamei visali e langgeih xati tangan vapo eivave na Iesu. ²² Di, ladel Iesu ba labe nesao e Vathu Kolkota, xa koute teni be 'Von Valvat Moletin.' ²³ E rute ak, lasa uaeen mi Iesu xa labilesi del ut *mir* xil tangan vahas tan ni pangasien nan. E xi misin ni.ⁱ

²⁴ Di, moletin te vaeen xil ak ladi xati e eivave. E melele xa murur da en, xil di laso daes tangan vapisen hisit eising eah na Iesu ihuri.^j ²⁵ Melele xa lateti xati e eivave tehe naen klok makoe. ²⁶ E lateling tisen tei xa bit mesen rin xa ladi xati ven bit, "Ngan ak suv toto na Siu xil." ²⁷ E melele nen ak, lateti xat moletin lu xa lutepol tesa luteti e eivave lu mun. Tei tete rin metu, e tei tete rin meil.^k ²⁸ §

^h15:16 Vanut moletin te vaeen xil ak sangas latehe handred tei e he sav (600).

ⁱ15:24 Ngan ak misak ni naha xa Sam 22:14-18 tehiteni mei mistal be reitin.

^j15:28 Rut vanuvei matu xil te Mak laling sepinien ak xa bit, "Ngan ak misak ni sepinien na Hi mei be reitin xa bit, 'E lasak purun ni nggoni moletin tesa xil.'" (Aes 53:12)

^f15:11 Pol 3:14 ^g15:12 Pol 3:13; 13:28 ^h15:17 Luk 23:11

ⁱ15:23 Sam 69:21 ^j15:24 Sam 22:18 ^k15:27 Mat 20:21; Mak 10:37

²⁹ Melele xa Iesu di murur de eivave, moletin xil xa di lakakao langgo visali lakuvun vatixil e di langue xati labit, “Ei, xoux iaxa otehiteni otehit uhu len **Nim Eo** na Hi, ti, ukili ni mun e melengien tol tang.¹ ³⁰!Bos mak mu tangan uteh meulien e xoux mun tang, e umei etan reling eivave xai!”**

³¹ Usil sexien nen xil tak, vat xil na pris xil del titsa xil te rae na Mosis mun lasep pepamen ni Iesu mi xil mun tang labit, “!Mupus ti mu! Xi di tete meulien e moletin sav xil, e misakras vateh meulien e xi mun tang. ³²!Xosxa be reitin xa xi be Mesaea, suv toto na mol-Isrel xil, bos xa, taxeak tang, imei etan ra eivave ak! Xosxa xamem mupusi imak, ma muke reitin en sung.” E moletin tesa xalu xa lateti xat xalu luteti rin, xalu mun lusep pepamen ni.

Maten na Iesu

Mat 27:45-56; Luk 23:44-49; Sion 19:28-30

³³ E piniae xati, maluxoluken mei da xol ut xil ngasen e dat mak duxoh haoa tol (3).^m ³⁴ E melele xa haoa xatel ak mei latavi, Iesu mikei nggeih nggo sepinien xati nan xa be Arameak bit, “!*Ilae! Ilae! ?Lama sabaktani?*” (*Sam 22:1*) Koute te sepinien ak be, “!Hi navan! !Hi navan! ?Veneh ma ostokovein nou?”

³⁵ Melele xa rut moletin xil xa lasoh ladi lalonge, xil labit, “?Mulonge? Xi di mikes provet **Ilaetsa** iaxai.”

³⁶ Ma, tei e xil miloh ba, nggur neta tei xa nggoni mavulut kaliko tei, e miterir ni be uae na mikon.ⁿ Di, milingi de kusut liei tei e mei misa ni be nesao tangan Iesu vavisi. Di, biteni bit, “Veter mu e ti ripus

pisi. ?Ilaetsa imei etan e ihur rati tamak ra eivave?”

³⁷ Di, Iesu mikei nggeih, milih kor ni votiang, di, mat. ³⁸ E melele nen tak vari, kaliko xa mettel xa lalihi dakoe xol ut eo te Nim Eo mesel be rin lu, nggo kusute nesao bemei duxoh kusute etan.^o

³⁹ Vat tei na moletin te vaen xil tesoh temal ni Iesu e xi pusi midep iaxa Iesu telihi kor ni votiang nan e mat. Ma, biteni bit, “!Reitin li, ngan ak tehe Nat Hi vari tang!”

⁴⁰⁻⁴¹ E tatit atou vutei xil mun lasoh ladi nga sotin vuteili ra eivave, e di lapus holesok xil xa di mistal. Tatit atou xil ak di latehusil Iesu e latetutou ni e Kaleli e latehusili mun melele xa Iesu tehe **Serusalem**. E xatel tol xa latemos e atou xil ak tehe Meri te hal Makdela; Meri, nine Sioses xal Temis; del Salome.^p

Laling tiei na Iesu de vanggihat te tehinen tei

Mat 27:57-61; Luk 23:50-56; Sion 19:38-42

⁴² Sangas ut ba tangan vamaaluxuluk. Ma moletin xil di labue xat kuh xil venggan xa **Sabat** mun da bemei sangas. ⁴³ E moletin tei be visal suv Paelet, hisen Siosepe te hal Aramatea. Xi tehe vat tei na Siu xil xa di tetotan e kot na Siu xil, e Siu xil lamerere ni. E xi mun di datil melengien xa Hi imei istal ihe suv toto na moletin xil. E melele xa ba misoh pe met Paelet, ulin takan ti e misisi tangan vamaen tiei na Iesu mini.

⁴⁴ Paelet mitemanin melele xa milongxe xa Iesu mat ngamu. Ma mikes vat na moletin te vaen nan xil tangan vamei. Misisi tangan vakil ti xa Iesu mat reitin mu tamat ti mu. ⁴⁵ E melele xa vat

** **15:30** Ngan ak misak ni naha xa Sam 22:7-8 tehiteni mei mistal be reitin.

¹**15:29** Sam 22:7; 109:25; Tang 2:15; Mak 14:58; Sion 2:19

^m**15:33** Amos 8:9 ⁿ**15:36** Sam 69:21; Mat 27:34; Mak 15:23; Luk 23:36

^o**15:38** Hib 10:19-20 ^p**15:40-41** Luk 8:2-3

ak bit mesen ni xa Iesu mat reitin, Paelet maen tiei nan mi Siosep.

⁴⁶Ma Siosep ba, minggal kaliko tei xa mieh. Di, ba po rat tiei na Iesu ra eivave. Xi pis xole ni kaliko te mieh tei. Di, poe ba, milingi de vangihat te tehinen tei xa lateseh moten rohon ni tang.^{††} Di, midivin hat tei xa eilep mei dakoe xol puiteh te vangihat ak e be relingi ba.[‡]

⁴⁷E Meri te hal Makdela del Meri, nine Sioses xal Temes, lunggusili e lupus rute xa miling tiei na Iesu da en.

Isu mea rilomun ra maten

Mat 28:1-8; Luk 24:1-12; Sion 20:1-10

16 Melele xa eai ba minu e **Sabat** bus, Meri te hal Makdela, Meri nine Sioses xal Temis, xatel Salome latoba latnggal vokon tatei xil tangan ha latitehi iha xat tiei na Iesu.

²Di, e Sande makoe roroh, melele xa ut di milan vuteili, atou xatel ak latkakao latoba tangan latosao ni vangihat te tehinen na Iesu. ³E melele xa di latoba, di latsis xatel latobit, “?Visi iaxa itivin rat hat xa mahulong xa dakoe xol puiteh te vangihat?” ⁴E melele xa latomei sangas, latketeh ba e latpus hat xa mahulong xiak, ladivin rati ngamu be relingi puiteh. ⁵E melele xa latbe vangite, uliatel mikan pupu vengan xa latpus horam maxoe tei dotan de riatel metu, e eising nan xil mieh xa mieh.[†]

⁶Xi biteni mi xatel bit, “Ulimitel nakan ti. Nakila xa di mutlang ni Iesu te hal Nasaret, xa lateti xati tete eivave. Xi tara ti mun inggak. Xi mea rilomun tuei ra

maten. Toketeh topus ti rute xa lateling tiei nan teta en. ⁷Ma taxeak, mutiha muthit mesen ni mi **moletin nan xil**, e mutihit xati mi Pita mak mutihit, ‘Iesu itiamu ni xamim ha ite provins te hal Kaleli. Xamim ha mupusi e rute ak ixoni ngan taxa tehiteni tuei mi xamim.’^{”s}

⁸Ma atou xatel ak latobe relingi vangihat e latoloh temanon latoba vengan xa uliatel mikan pupu e tineatel mulul. E vengan xa uliatel mikan mak, melele xa latoba latbe vut, ma latasepin ti mi moletin tova.^{‡‡}

E rut vanuvei te Mak, 16:9-20 tovuol en

Isu pisen xi mi Meri te hal Makdela

Mat 28:9-10; Sion 20:11-18

⁹E makoe roroh e Sande, melele xa Iesu mea rilomun ra maten, xi mistal kokot mi Meri te hal Makdela, ngan xa tehol rerat ninin tesa lu e he sav (7) latehe relingi. ¹⁰Di, Meri ba bit mesen ni mi moletin xil na Iesu xa di ladang e di lamuis. ¹¹E melele xa lalonge xa Meri bit pus Iesu xa mea rilomun ra maten, xil latake reitin ti en.

Isu mistal mi moletin nan lu xa di lunggusil suse lube Emeas

Luk 24:13-35

¹²Dutou ni, Iesu ba mistal mi moletin nan lu e melele xa di lukakao lube relingi taon te hal Serusalem. E lutapus kil ti vengan xa valnaon biles. ¹³E melele xa ludilomun e lubit rati mi rut moletin na Iesu xil mun, xil latake reitin ti en.

^{††}15:46 Ngan ak misak ni naha xa Aes 53:9 tehiteni mei mistal be reitin.

^{‡‡}16:8 Rut vanuvei matu xil te Mak be bus tak e vas 8. E rut vanuvei matu xil lasorin sepinien ak xa nggoni Mat 28:9-10 e Sion 20:11-18 xa bit, “Xatel lattemanon latoba e latobit mesen naha xa latpusi e latlonge mi Pita del ngan xil xa ladi visali. E dutou sung. Iesu misil rerat moletin nan xil tangan ha lihe rin xil vus te ut etan, e ti lihithiten longeongen hos xa be eo e misakras vavus. Longeongen hos ak di miteh meulien e ngan xil xa laling neketen en tengan ti lihur meulien sal ixo en.”

Iesu mei mistal mi moletin nan xil*Mat 28:16-20; Luk 24:36-49;**Sion 20:19-23; Pol 1:6-8*

¹⁴Di, Iesu mei mistal mi moletin tei e le tei (11) nan e melele xa xil ladotan e di langganien, e bul xat xil vengan xa vatixil nggeih pupu. Reitin, bul xat xil vengan xa neketen nae tapin ti e latake reitin ti e sepinien na ngan xil xa latehiteni xa latepusi temea rilomun ra maten.

¹⁵Di, Iesu biteni mi xil bit, “Ha muhe rute xil vus e ut etan e muhithiten longeongen hos na Hi mi moletin xil vus.

¹⁶Ngan xil vus xa laling neketen nae en e ba labaptaes ni xil tangan vapisen reitinen te neketen nae, ma Hi iteh meulien e xil. E ngan xil xa lataneket ti, ma Hi ihit rati xa xil lapin tangan lihur longpangasien ve tesaen nae xil.^t ¹⁷E ngan xil xa laneket e nou likila lipol ni merekel xil

xa lamak: e hisok, lihol rerat ninin tesa xil, e lisepin ni sepinien hu xil xa latnakil ti mu tetiamu.^u ¹⁸Tave ti neta xa xil lileh tetal xil mu limu hangan, linamonout ti. E xosxa xil liling hexil e ngan xil xa lame-sei, ma lital rat xil ra mesien nae e xil mei lihos rilomun.”^v

Iesu be ut nesao*Luk 24:50-53; Pol 1:9-11*

¹⁹Melele xa Suv Iesu bit sepinien ak bus, e xil dit tamu lapusi, Hi nggur rat Iesu be ut nesao, e ba dotan de ri metu na Hi.^w

²⁰E eloheoh nan xil, laba e labithiten longeongen hos na Hi e rute xil vus. E Suv Iesu dutou ni xil e misak ni merekel xil di mistal. Merekel xil ak lasak ni moletin xil mei lake reitin e sepinien nae.^x

Ngan ak be hoxalite te longeongen hos usil Iesu Kristo xa Mak tetisi. Reitin.

^t**16:16** Pol 2:38; 16:31,33

^u**16:17** Pol 8:7; 16:18; 2:4,11; 10:46; 19:6; 1Kor 2:2-4

^v**16:18** Luk 10:19; Pol 28:3-6; 4:30; 5:16; 8:7; Tem 5:14-15 ^w**16:19** 2King 2:11; Pol 1:9-11; 1Tim 3:16; Sam 110:1; Mat 22:14; 26:64; Mak 12:36; 14:62; Luk 20:42; 22:69; Pol 2:33,34; 5:31; 7:55,56; Rom 8:34; Efes 1:20; Kol 3:1; Hib 1:3,13; 8:1; 10:12; 12:2; 1Pit 3:22 ^x**16:20** Pol 14:3; Hib 2:3-4

Sepinien xa diamu te

Luk

?Visi iaxa tetis vanuvei ak?

Moletin xa tetis vanuvei ak, hisen Luk. Xi tenave moletin lu e le tei (12) na Iesu ti. Xi tehe timue tei na Pol xa lutepol vituei e rute xil holu.^y e tesukul kuhi. Tekil kuh holesok xil vus xa testal e meulien na Iesu e tetisi teti e vanuvei xalu ak te 'Luk' xal 'Polien na Eloheoh Xil.'

Luk tetis vanuvei ak sangas ni haram hanutap tol AD (haram 60 tetutou ni poten na Iesu). Xos Luk tete taon te hal Rom mu Sesaria melele xa tetis sepinien xil ak. E melele nen ak, tumulen holu usil Iesu di tekapis, e rute xil latehe reitin, e rute xil latehe luvosen tang. Tesak ni, Luk tehe telang ni moletin xil holu xa latehusil xat Iesu e melele xa teta tamu e ut etan e latepus polien nan texo metexil xati tangan xi mikila valong kuh tumulen nae xil. Di, xi tetis naha xa telong usili texo moletin xil ak. Luk ien tehei tangan vapisen ni xa Iesu tehe moletin tei xa meulien nan temal tevi e tesaen tovuol en. E ien tehei mun tangan vapisen ni xa Iesu tehe Hi reitin e rin xil vus xa di miteh meulien e moletin xil.

?Visi iaxa tevuli vanuvei ak tetiamu?

Luk tetis sepinien ak teha mi timue nan tei xa hisen Teopolis.^z Koute te hisen

ak tehe 'moletin xa eheien nan de Hi.' Reitin xa Luk tetis vanuvei ak teha mi moletin ak, e tekila xa moletin sav xil mun xa latave Siu ti livuli.

?Luk tetis vanuvei ak veneh?

Luk ien tehei tangan vapisen ni xa Iesu tehe Mesaea xa Hi tehit xati tangan isa ni - Luk tetis kuh holesok xil xa ipisen ni xa Iesu tehe Mesaea xa Hi tehit xati tangan isa ni imei.^a

Luk ien tehei tangan vasesp usil holesok xil vus xa testal e meulien na Iesu - E tumulen xil usil meulien na Iesu xa Luk tetisi, tehit usil holesok xil xa testal e melele xa Iesu tepot, e rut holesok xil xa testal mini melele xa tehe horamue tamu.^b

Luk ien tehei tangan vapisen ni xa Iesu di ien misae e hisit moletin xil xa mosav xil di lanem male ni xil - Luk tepisen ni xa eheien e esaeen na Iesu di e ngan xil xa lamesei, ngan xil xa latave Siu ti,^c Pispisien xil holu xa Luk tetisi tepisen ni xa Iesu di ien sae e moletin xil xa mosav xil di lanem male ni xil.

Luk ien tehei tangan vapisen ni xa Ninin Eo di pol e meulien na moletin xil - Luk di pisen ni xa Ninin Eo di pol holu e meulien na Iesu: e melele xa tepot,^d

Vatit nenemien tei te vanuvei ak de Luk 19:10,

Nat Moletin bemei e ut etan tangan valang ni hisit moletin xil xa lamak xa

^y1:0 Kol 4:14; 2Tim 4:11; Plp 1:24; Kol 4:14 ^z1:0 Luk 1:1; Pol 1:1 ^a1:0 Luk 2:11; 4:41; 9:20; 23:2; 24:26; Luk 1:70; 3:4; 4:17; 10:24; 13:34; 16:31; 18:31; Luk 24:25 ^b1:0 Luk 1:1-2:52; Luk 10:1-18:14; 19:1-28

^c1:0 Luk 2:32; 8:37; 10:13; 11:32; 17:16; Luk 2:22; 4:18; 7:22; 11:41; 12:33; 14:13; 16:20; 18:22; Luk 2:37; 7:13; 9:14; 18:3; 20:47; 21:3; Luk 9:42; 9:48; 18:16

^d1:0 Luk 1:11; 1:35; 1:67; 2:9; 2:27; 2:38; Luk 3:22; 4:1; Luk 4:14; 4:18; 10:21; Luk 24:4,16,31,36,51; Luk 24:49

latekesae, tangan mei vateh meulien e xil.

?Naha iaxa de vanuvei ak?

1. Iesu tepot, e temeul tetuxoh melele xa tehur kokot ni polien nan xil. (1:1–4:13)

2. Sepinien e polien xil na Iesu. (4:14–21:38)

a. Iesu tepol tekapis e rute xil vus e provins te hal Kaleli. (4:14–9:50)

b. Iesu tepol tekapis e rute xil vus e provins te hal Sudea, e provins te hal Perea. (9:51–19:27)

c. Iesu tepol e taon te hal Serusalem. (19:28–21:37)

3. Iesu temat e temea rilomun ra maten. (22:1–24:53)

Sepkilaen na Luk usil vanuvei ak

1^{1–2} Bos makoe bat minuk Teopolis,[¶] eilep navan.

Melele xa Iesu di tamu temeul e ut etan, moletin xil holu latepus holesok xil xa xi tepol ni e latehusili. Rut moletin xil mei latehe eloheoh nan xil e latesep usil holesok xil xa latepus Iesu tepol ni.^e E moletin xil holu xa latelonge latetis xat kuhi. ³E inou, Luk, natehusil kuh holesok xil vus ak, e rin te polien nan e ut etan teha tetuxoh melele xa tetilomun tehe ut nesao. Misak ni, nanemi nabit bos tangan inou mun nitis mesen holesok xil ihusil sexien xa testal en. Ve rin ak, xouk, Teopolis, eilep navan,^f ⁴uk-ila uke reitin e holesok xil xa mosav xil latepispisi minuk usili.

Masxaxa tei bit lelen suse xa Sion Baptis ipot en

⁵E melele xa **Herod** xa mahulong tehe suv toto te hal Sudea, **pris** tei teta, hisen Sakaraea. Xi tehe tei e vanut pris na Abitsa.^{§§} Atou nan, hisen Elsavet, e xi mun tehe vatimol tei na pris **Eron** tetiamu.[§] ⁶Sakaraea xal atou nan lumal pe met Hi e lunggusil vuol ni rae nan xil. ⁷Sakaraea be momatu ngamu e horamue nalu tovuol vengan xa tovolih nan be lumalum.

⁸Vatei, vanut **pris** xil xa Sakaraea mos e xil laba tangan lapol ni polien savsav nae xil e Nim Eo na Hi.^h ⁹Nggusil sexien matu na **pris** xil, xil lalihi his tangan vapisen ni xa visi e xil iaxa ihe **Nim Eo** e itin vokon e hor eo iha mi Hi. E melele xa lalihi, lalihi his Sakaraea. ¹⁰E melele xa Sakaraea de nim, ngan xil xa lamei tangan lamot mi Hi ladi nga hale e di lasis. ¹¹Vatei takes, **masxaxa** tei na Hi Suv mei mistal mi Sakaraea e misoh de ri matu te **hor** eo xa xi di din vokon xil en. ¹²E melele xa Sakaraea pus masxaxa ak, mitemanin e ulin mikan xa mikan.

¹³E masxaxa biteni mini bit, “!Sakaraea, ulum nakan ti! Hi milong sisen nam ngamu. Atou nam, Elsavet, nave nousav ti iling natumali tei, e uling hisen ihe ‘Sion.’ ¹⁴Poten nan isak ni xamil mulihesi xamil, e moletin sav xil mun lihesi xil ven. ¹⁵Natumali ihe eilep tei pe met Iahova. Ihe eo e meulien tevi nan e namu ti vari uanen mu oei te xeih. Melele xa ita tamu e vang ninen, **Ninin Eo** mei ipolu en.ⁱ ¹⁶E isak ni mol-Isrel xil holu lihiles ra

[¶]**1:1-2** Koute te hisen ‘Teopolis’ be ‘moletin xa di ba ve kilakilen tangan wakil Hi.’

^{§§}**1:5** Pris xil ngasen langgo vatimol na Eron xa tehe tua na Mosis tetiamu. Pris Eron, havneli xil latehe hantap tei e hat mun (24), e Abitsa tehe tei e xil e melele nen ak (1Kron 24:1-19).

^e**1:1-2** Sion 15:27 ^f**1:3** Pol 1:1 [§]**1:5** 1Kron 24:10 ^h**1:8** Eks 30:7

ⁱ**1:15** Nam 6:3; Sats 13:4; 1Saml 1:11

tesaen nae xil e ha lihusil Iahova, Hi nae. ¹⁷ Xeihen na Ninin Eo ita en ixoni ngan xa tete provet **Ilaetsa** tetiamu. Xi iha itiamu ni Hi Suv tangan ileh viton tata xil itel horamue nae xil liti e tomat, e isak ni ngan xil xa latalong xat Hi ti lihiles ra tesaen nae xil e lihusil metisouen na ngan xil xa lamal pe meten. Xi isak ni moletin na Hi xil livue xat xil ve meien na Suv nae.”^j

¹⁸ Ma Sakaraea biteni mi masxaxa ak bit, “Inou nabe momatu ngamu e atou navan be tovoli pupu. ?Ma, inou nikila nihur horamue itep? ?Upol ni naha tangan nikila nike reitin e sepinien nam?”^k

¹⁹ E masxaxa bit rilomun ni mini bit, “Inou Kavriel, vatixar na masxaxa xil, xa di nasoh pe met Hi vehakut. Xi vari tesil nou tangan mei nihit mesen longeongen hos ak minuk.^l ²⁰ E vengan xa otake reitin ti e neta xa natehiteni, xouk uhe vut. Osakras osepin ha ituxoh melengien xa holesok xil ak mei istal en.”^m

²¹ E melele xa Sakaraea da tamu e Nim Eo, vanut moletin xil xa di latatili lanemi labit, “?Veneh ma ba da be nousav?” ²² E melele xa Sakaraea mistal, misakras vasepin. Dit misak tangan vasepin vaxo hen vengan xa be vut. Misak ni, lapus kila xa Hi tepisen neta tei mini.

²³ Di, Sakaraea pol ni polien sav xil e Nim Eo ba duxoh melele xa polien na vanut pris nan xil bus. Pol bus e dilomun be tim. ²⁴ E melele xa Sakaraea ba pus atou nan, Elsavet mei di ni tuvava. E Elsavet dat tim ba duxoh melele xa aveti nan be lim (5). ²⁵ E melele xa dat tim, biteni mi xi tasen bit, “Iahova ien misae e nou xa nabe lumalum. Xi duxol xat nou e maen ni nou nadi ni tuvava. Reitin, xi

teleh rat unounen navan pe met moletin xil.”^m

Masxaxa tei bit lelen suse xa Iesu ipot en

²⁶ Melele xa aveti na Elsavet be tei e he sav (6), Hi misil masxaxa Kavriel be taon te hal Nasaret xa de provins te hal Kaleli. ²⁷ Kavriel nggur sepinien tei tangan ha ihit mesen ni mi ate maxoe tei, hisen Meri. Meri, latesikoe xole tuei tangan vateli vatel moletin tei, hisen Siosep, xa nggo vatimol na suv toto **Deved** tetiamu.^o ²⁸ Melele xa masxaxa ak mei mistal mi Meri, biteni mini bit, “!Tomat iti minuk! Iahova memaal ve xouk e di minuk.”

²⁹ E melele xa Meri milonge mak, minexo pupu e di minem ves koute te sepinien ak. ³⁰ Di, masxaxa biteni mi Meri bit, “Meri, ulum nakan ti. Hi besi xi pupu ve xouk. ³¹ Xouk uti ni tuvava tei e ulingi ihe horamue. Ti, uling hisen ihe ‘Iesu’ xa koute teni be ‘Hi di miteh meulien e moletin xil.’^p ³² Xi ihe eilep tei xa likesi ni ‘Nat Hi xa de ut nesao.’ E Hi Suv ipol ni mei ihe suv toto ixoni avu nan tetiamu, suv toto Deved.^q ³³ Xi ilaxat kuh mol-Isrel xil vehakut, xa latexo ra na avu **Siekob** tetiamu. E lrelaxatien nan, hoxalite teni ihe tovuol.”^r

³⁴ Meri bit rilomun ni mi masxaxa bit, “?Inou niti ni tuvava itep, vengan xa natakil ti mu tiramue?”

³⁵ Ma masxaxa biteni mi Meri bit, “Ninin Eo imei visal xouk, e xeihen na Hi isak ni xouk uti ni tuvava. Ve rin ak, horamue xa ulingi ihe eo, e likesi ni ‘Nat Hi.’^s ³⁶ ?Okil tumahin Elsavet? Xi mun iling natneli, tave ti neta xa xi be tovoli ngamu. !Reitin mak! Elsavet

^j1:17 Mat 17:11-13; Mal 4:5-6; 3:1 ^k1:18 Sen 18:11

^l1:19 Dan 8:16; 9:21; Hib 1:14 ^m1:20 Luk 1:45 ⁿ1:25 Sen 30:23 ^o1:27 Luk 2:5; Mat 1:16,18 ^p1:31 Sen 16:11; Sats 13:3; Aes 7:14; Mat 1:21-23

^q1:32 Aes 9:7; 2Saml 7:12,13,16 ^r1:33 Maek 4:7; Dan 7:14 ^s1:35 Mat 1:20

xa moletin xil labit be lumalum, taxeak, aveti nan be tei e he sav (6).³⁷ Mak, ma neta tovuol xa Hi misakras vapol ni.”^t

³⁸ Melele xa Meri milonge mak, biteni mi masxaxa bit, “Bos tang. Meulien navan de he Hi, e xi ikila ipol ni naha xa ien bei. Ipol ni minou ixoni ngan taxa xouk di obiteni.” Di, masxaxa be relingi ba.

Meri ba misao ni Elsavet

³⁹ Dutou ni melele nen ak, Meri mea e mitemanon be metimal xa Elsavet da en xa de vathu xil te provins te hal Sudea.

⁴⁰ Melele xa duxoh metimal ak, be vangit nim ma Sakaraea xalu e mikes Elsavet. ⁴¹ E melele xa Elsavet milong rae Meri, tuvava nan nggelial e vangen. Di, Ninin Eo mei mise xat Elsavet^u ⁴² xa miki be nesao bit, “!Tuxolxatien na Hi di minuk mili atou sav xil, e tuxolxatien nan di mi tuvava xa de vangom!^v ⁴³ Inou natapin ti tangan nine Suv navan mei vasao ni nou. ⁴⁴ Nalong kil holesok xil ak vangan melele xa natelong xouk otekes nou, tuvava xa de nou besi xi e nggelial.

⁴⁵ Tuxolxatien na Hi di minuk vangan xa oteneket xa sepinien nan xa holesok xil ak mei istal minuk ixoni ngan xa tehiteni minuk.”^w

⁴⁶ E Meri biteni bit,^x

“E nenemien navan, di napet rat his lahova.

⁴⁷ Namaal pupu ve Hi navan xa di miteh meulien e nou.

⁴⁸ Xi ien tabong ni nou ti, neta sav xa nabe atou votei te polien nan tang.^y Xosali iha, moletin xil vus ti lihithiteni xa Hi tetuxol xat nou.

⁴⁹ Hi te xeihen tepol ni holesok xil xa tellep minou,^z

e hisen be eo.

⁵⁰ Xi ien isae e ngan xil xa di lamerere ni,^a

ngan xil xa ladi taxeak, e ngan xil xa ti limei itutou.

⁵¹ Nggo xeihen nan, Hi tepol ni holesok xil xa latellep,^b

e di nggol rerat valkoai xil xa nenemien nae be nesao.

⁵² Xi mileh rerat suv toto xil ra von xeihen nae,^c

e di pet rat moletin votei xil sung.

⁵³ Melele xa moletin xil xa di mae nggat xil lamei visal Hi, di misa anien hos xil mi xil.^d

E melele xa ngan xil xa holesok nae holu lamei visali, misil rerat xil laba hon tang.

⁵⁴ Xi bemei misa tutouen mi mol-Isrel xil xa langgo vatit vatimol na avu Siekob tetiamu, xa tehe moletin te polien nan.^e

Xi di dutou ni xil vangan xa di minem xat hitxatien nae tangan ipisen esaen mi xil.

⁵⁵ Xi di pol nggusil hitxatien xil xa tepol ni mi avu nar xil, mi **Ebrahim** e mi vatimol nan xil xa labe mol-Isrel xil.^f Hitxatien nan ak misakras vavus.”

⁵⁶ E Meri de visal Elsavet aveti tol (3). Di, dilomun be tim san.

Poten na Sion

⁵⁷ Melengien bemei pipin tangan Elsavet valing horamue nan, ma milingi be malohos. ⁵⁸ Melele xa vatimol nan xil e moletin sav xil xa ladi sangas visali lalonge xa lahova pol ni bos pupu mini e rin xa temaen ni tehur natneli, xil labesi xil pupu. ⁵⁹ E melele xa melengien na

^t1:37 Sen 18:14 ^u1:41 Sen 25:22; Luk 1:15 ^v1:42 Sats 5:24; Dut 28:4

^w1:45 Luk 1:20 ^x1:46 1Saml 2:1-10 ^y1:48 1Saml 1:11

^z1:49 Sam 111:9 ^a1:50 Sam 103:13,17 ^b1:51 Sam 89:10; 2Saml 22:28

^c1:52 Siob 12:19; 5:11 ^d1:53 1Saml 2:5; Sam 107:9

^e1:54 Sam 98:3; Aes 41:8 ^f1:55 Maek 7:20; Sen 17:7; 22:17

tuvava ak be tol e he sav (8), nggusil sexien na Siu xil, langguri be **vexahu**. Ngan xil xa lamei tangan lapusi iexil bei tangan laling his tamen vata en xa be ‘Sakaraea.’^g ⁶⁰E Elsavet bit, “!E-e! Hisen ihe ‘Sion.’”

⁶¹E labit rilomun ni mini labit, “!Moletin tovuol tamu e vatimol nalu xa tehur his ak! !Sexien ak tamal ti!” ⁶²Misak ni, ba lasis pis tame tuvava ak nggo hexil tangan vahiteni xa ien bei tangan laling hisen vahe visi.

⁶³Ma Sakaraea misis xil tangan lasa neta te tisen mini. E midisi bit, “Hisen be Sion.” Melele xa labuli, lamesep pupu ven. ⁶⁴E melele nen tak, Sakaraea mikila vasepin rilomun, e pet rat his Hi del sepinien nan xil.

⁶⁵Melele xa vatimol nalu e ngan xil xa ladi sangas visal xalu lapus merekel xa mistal, latemanin ni. Misak ni, longongen usil holesok xil xa testal mi Sakaraea, Elsavet e tuvava nalu mikapis e metimal xil xa ladi e hu xil e provins te hal Sudea. ⁶⁶Ngan xil xa lalong usili lakila xa xeihen na Hi di e meulien na tuvava ak e lanemi labit, “?Melele xa imeul ihe eilep, mei ihur polien eah vari?”

⁶⁷E melele nen ak, Ninin Eo bemei mise xat Sakaraea ma xi bit lelen ni usil naha xa imei bit,

⁶⁸“Rimes Iahova, Hi na moletin xil te hal Isrel,^h

vengan xa xi mei misao ni moletin nan xil e di miteh meulien e xil.

⁶⁹Hi di misa moletin teteh meulien mi xir.ⁱ

Xi nggur xeihen e nggo vatimol na suv toto Deved xa tehe moletin te polien na Hi.

⁷⁰Hi tehit xati texo **provet** eo xil tetiamu ⁷¹xa moletin ak mei iteh meulien e xir ra he elu nar xil,^j

e ra xeihen na ngan xil xa di laketeh misa mi xir.

⁷²Xi tehit xati mun xa ipisen esaeen nan mi avu nar xil tetiamu,^k

e inem xat **hitxatien te xeih** nan

⁷³xa tepol ni tetel avu nar Ebrahim tetel sepinien tei xa texeih.^l

⁷⁴Hi tehit xati xa ileh rerat xir ra he elu nar xil^m

tangan rakila rimot mini e rihusil xati ixo sexien xa ulixir nakan ti mun.

⁷⁵Reitin, rakila rimot mini e melengien xil vus e meulien nae

itel meulien tei xa ihe eo e imal pe meten.”

⁷⁶Di, Sakaraea biteni mi tuvava nan bit,ⁿ

“E xouk, natuxoli, likesuk lihit obe provet tei na Hi te ut nesao.

E xouk utiamu ni Suv tangan ha usak mesen suse nan.

⁷⁷Upisen ni mi moletin nan xil xa Hi iteh meulien e xil

e naketeh ti mun nasa mi xil ve **tesaen** nae xil.

⁷⁸Hi polu ni eheien e esaeen.^o

Isa ‘moletin te teh meulien en’ mei istal mi xir,

ixoni ngan xa eai di mistal e di misa miehen mi xir.

⁷⁹Reitin, sepinien nan ixoni miehen xa ileluv xol ngan xil xa ladi e maluxoluken e ulikanen vengan xa ladi pe xeihen te maten.

Ileluv mun tangan ipisen suse te tomat mi xir tangan rihusili.” Melele xa

^g1:59 Luk 1:13; 2:21; Sen 17:12; Lev 12:3

^h1:68 Sam 41:13; 72:18; 106:48; 111:9; Luk 7:16 ⁱ1:69 Sam 18:2

^j1:71 Sam 106:10 ^k1:72 Sam 105:8-9; 106:45-46; Sen 17:7; Lev 26:42

^l1:73 Sen 22:16-17 ^m1:74 Taet 2:12 ⁿ1:76 Aes 40:3; Mal 3:1; Mat 3:3

^o1:78 Aes 9:2; 58:8; 60:1-2; Mal 4:2; Mat 4:16

misepin bus, Sakaraea xatel ladilomun labe tim.

⁸⁰Huram xil mei mitavi, e tuvava ak meul mei be horam maxoe tei. E xeihen na Ninin Eo polu en. E melele xa mei be tiramue, ba da tasen e uruvuol ba duxoh melele xa mistal mi mol-Isrel xil e pol kokot ni polien nan.^p

Iesu tepot e ut etan

Mat 1:18-25

2 E melengien xil ak xa Sion tepot en, Okastas tehe *Sisa* te hal Rom. Xi tesa rae nan teha mi eilep nan xil te kavmen tehit ha litis xat his moletin xil ngasen te ut xil vus tangan ²Ngan ak tehe pupuluenu kokot vari xa latepol ni e melele xa Karinias tehe eilep te kavmen te hal Siria xa provins te hal Sudea da en.

³Misak ni, moletin xil ngasen latetilmun latehe metimal xati na vatimol nae tangan ngan xil te kavmen lakila livuli kuh xil e lihur hisexil. ⁴Misak ni, e melele nen ak, Siosep mea, be reling metimal te hal Nasaret xa de provins te hal Kaleli. Di, nggusil suse xa teviei* ba be Betlehem xa de provins te hal Sudea. Be Betlehem vengan xa be metimal xati na suv toto *Deved*, e Siosep be vatimol tei nan.

⁵Siosep nggur Meri lukakao lube Betlehem, vengan xa tesikoe xole ngamu tangan ihuri mei ihe atou nan. Meri, navehi ti iling tuvava.^q ⁶E melele xa ludi tamu e metimal te hal Betlehem, melengien nan pipin tangan valing tuvava. ⁷Xalu luba ludi e nim ma vongoro xil vengan xa ut sav tovuol e nim tangan laloti en. E inggak, Meri miling muimol nan xa be malohos. Pis xole ni kaliko tei, di milingi pat e rute xa di laling husmunae a vongoro xil en.^r

Masxaxa xil labithiten usil poten na Iesu mi ngan xil xa di lalaxat sipsip xil

⁸E vongien nen tak, moletin tatei xil di lalaxat sipsip xil e valkesao tei sangas visal metimal te hal Betlehem. ⁹Vatei takes, *masxaxa* tei na Iahova bemei mistal mi xil, e minehinen te xeihen na Hi mileluv xol moletin xil ak. Xil latemanin e uli mikan pupu. ¹⁰E masxaxa biteni mi xil bit, “!Ulimim nakan ti! Namei del longeongen hos tei xa isak ni moletin xil ngasen mei lipolu ni sien. ¹¹Taxeak, e hal Betlehem, metimal na suv toto Deved tetiamu, *moletin te teh meulien en* pot tuei ve xamim. Xi be Mesaea xa Iahova tehit xati xa isa ni imei. ¹²Suse xa mupus kila en imak: mukamet tuvava tei xa lapis xole ni kaliko tei e lalingi pat de rute xa di laling husmunae a vongoro xil en.”

¹³Melele xa masxaxa di tamu misepin, vatei takes, vanut masxaxa tei xa mahulong pupu langgo ut nesao e mei lastal. E pe met moletin xil ak, lames Hi nggo kikeien labit,

¹⁴“Merereen mi Hi xa de ut nesao,^s e ut etan tomat iti mi moletin xil ngasen xa Hi memaal ve xil.”

¹⁵Melele xa lakikei bus, masxaxa xil labe reling xil e ladilomun labe ut nesao. Di, moletin xil xa di lalaxat sipsip xil lasem xil labit, “Rave Betlehem, rava rapus ti neta xa Iahova tehiteni mi xir.” ¹⁶Ma xil latemanon laba e lakamet rute xa Meri xal Siosep ludi en. E lapus tuvava nalu di pat de rute xa di laling husmunae a vongoro xil di en.

¹⁷Melele xa moletin xil ak lapus tuvava Iesu, labit mesen sepinien xa masxaxa tehiteni mi xil usil tuvava ak mi

*2:4 Nasaret duxol Betlehem, suse nen teviei mili kilomita handred tei (100 km), e lakakao mili wik tei tangan laduxoli.

^p1:80 Luk 2:40; Mat 3:1

^q2:5 Luk 1:27

^r2:7 Mat 1:25

^s2:14 Luk 19:38

xalu.^t ¹⁸E ngan xil vus xa lalong tumulen nae lamesep pupu ni. ¹⁹E melele xa Meri milong sepinien xil ak, miling xat kuhi e nenemien nan, e di minem usili ve-hakut.^u

²⁰E melele xa moletin te sipsip xil ladiplomun, xil lames Hi e lapet rat hisen ve holesok xil xa latelonge e latepusi. Vengan xa holesok xil ak testal texoni ngan xa masxaxa tehiteni mi xil.

**Tuvava Iesu be vexahu, laling his en,
e langguri be Nim Eo tangan
lapol ni sanien eo e rin nan**

²¹Melele xa melengien na tuvava Iesu be tol e he sav (8), nggusil sexien na Siu xil, tamen xal ninen lungguri be **vexahu**. E melele nen ak, luling hisen be 'Iesu' nggoni ngan xa masxaxa tehiteni mi Meri melele xa tenati ni tuvava ti mu.^v

²²⁻²⁴Melengien hanutap lu (40) dutou ni melele xa Iesu tepot en, Siosep xal Meri lunggur tuvava Iesu latobe **Serusalem** tangan lalopol ni sanien eo tei e rin na Meri tangan mei vamese rilomun vaxoni ngan xa **rae na Mosis** tehiteni.[†] Ma, xalu luleh mae lu be Nim Eo e lasa mae xalu ak lube sanien eo[‡] nalu mi Hi.

E melele nen ak mun, lunggur tuvava Iesu tangan ha lalipisen ni mi Iahova tangan pris tei ituxol xati ixoni ngan xa rae nan biteni xa bit, "**Muimol xil ngasen xa labe horamue, lihe horamue eo na Iahova.**" (Eks 13:2,12)

**Moletin lu lubit lelen ni xa
Iesu be Mesaea xa Hi tehiti
xati mi mol-Isrel xil**

²⁵Melele xa Meri, Siosep del Iesu latdi tamu e Nim Eo, moletin tei de rute ak, hisen Simeon. Sexien nan xil momal e eheien nan di e Hi. Di datil melengien xa Hi isa Mesaea imei isak ni mol-Isrel xil limeluv ra he kavmen sav xil. **Ninin Eo** di mi Simeon^w ²⁶e tehiteni mini xa namat ti mu ituxoh melele xa ipus Mesaea xa Iahova tehiti xati tangan isa ni imei.

²⁷E melele xa Meri xal Siosep lunggur Iesu be vloh te **Nim Eo** tangan lalikamet pris tova tangan vatuxol xat tuvava nalu vaxoni ngan xa rae na Hi biteni, **Ninin Eo** tehiteni mi Simeon tangan ihe rute ak. ²⁸E melele xa Simeon pus xatel, po xat tuvava Iesu. E melele xa di poe, xi memes Hi bit,

²⁹"Suv, inou nabe moletin te polien nam.

E taxeak, ukila umaen ni nou nimat e tomat, vengan naha xa otehit xati minou mistal ngamu.

³⁰Inou napus horamue ak tuei ni metok,^x

ngan xa iteh meulien e moletin nam xil.

³¹E upol ni moletin xil vus e ut etan lipusi.

³²Xi isak ni ngan xil xa latave Siu ti liti e miehen nam,^y

tangan xil lipus kil xouk e limerere ni xouk.

[†]**2:22-24** Nggusil sexien na Siu xil, atou xa miling tuvava tei tenamese ti pe met Hi ve ra te pesisen. Misak ni, xi itat tim ituxoh melele xa melengien hanutap lu (40) mei itavi. Ti, mei lisa sanien eo tei mi Hi e rin nan tangan mei imese rilomun pe meten (Lev 12:1-8).

[‡]**2:22-24** Rae na Mosis bit lalisa sulut sipsip tei itel mae tei. E xosxa atou ak, mani nan tapin ti, ma mikila vasa mae lu tang (Lev 5:11).

^t**2:17** Luk 2:10-12 ^u**2:19** Luk 2:51

^v**2:21** Sen 17:12; Lev 12:3; Luk 1:59; 1:31 ^w**2:25** Aes 40:1; 49:13

^x**2:30** Aes 40:5; 52:10; Luk 3:6; Taet 2:11 ^y**2:32** Aes 42:6; 49:6; 46:13

E ipet rat his mol-Isrel xil xa labe moletin nam xil.”

³³ Melele xa tame Iesu xal ninen lulong naha xa Simeon tehiteni, lumesep pupu.

³⁴ Di, Simeon misa tuxolxatien tei mi xat-e biteni mun mi Meri bit, “Tuvava nam isak ni moletin holu te hal Isrel lihusil xat Hi, e isak ni rute e xil lihiles ra ni. Tuvava ak mei ihe simelelen tei na Hi xa moletin holu lisin ni.”^z ³⁵ Isak ni nenemien xuxus xil na moletin xil limei kesao. E naha xa istal mini isak ni xoux mun ulonge isa, ixoni ngan xa tiei tei di misal vinuk.”

³⁶ E melele nen tak, **provet** tei de vloh te Nim Eo, hisen Anna. Xi be tovolih ngamu, e tamen be pris Vanuel xa nggo vatimol na pris Aser. Melele xa Anna di tamu tehe ate maxoe, teteli. E melele xa huram lu e he sav (7) tang mei tetavi, tiramue nan temat.^a ³⁷ Misak ni, tehe tunau teha vuma ... huram nan mei be hanutap hat e hat e he tei mun (84). E melengien xil ngasen, makoe ba duxoh vongien, xi di mot mi Hi e vloh te Nim Eo, e melengien hao di bal ni anien e di misis.

³⁸ E melele xa Siosep xal Meri ludi tamu e Nim Eo del tuvava Iesu, Anna be-mei visal xatel e memes Hi ve tuvava ak. E dutou ni, ba di mitumul usil tuvava ak mi moletin xil ngasen xa di ladatil melele xa Hi isa Mesaesa nan imei tangan isak ni Serusalem itel moletin nan xil limeluv ra xeihen na kantri sav xil.^b

**Melele xa Iesu mei be horamue,
moletin xil lapus kila xa polu
ni metisouen na Hi**

³⁹ Melele xa Siosep xal Meri lupol sen naha xa rae na Iahova biteni, xatel lat-dilomun latbe Nasaret, metimal natel

xati xa de provins te hal Kaleli.^c ⁴⁰ E tuvava Iesu di matu, e ven mei nggeih. E melele xa di matu mak, moletin xil lapus kila xa polu ni metisouen e tuxolxatien na Hi di en.^d

⁴¹ E huram xil vus, tame Iesu xal ninen lube Serusalem tangan lalopol ni **Anien te Tavien** en.^e ⁴² Ma, melele xa huram na Iesu be lu e le tei (12), lube anien ak nggoni ngan xa di lupol vehakut ni, e lunggur Iesu latoba. ⁴³ Melele xa Anien te Tavien mei mitavi, tame Iesu xal ninen lunggur suse tangan laltilomun lalihe tim, e lutakil ti xa Iesu da tamu e hal Serusalem. ⁴⁴ Ma xalu lukakao melengien tevi tei del vanut moletin xil vengam lunemi xa Iesu di nggusil timue tei mu moletin sav tei e vatimol nae. E melele xa ut maluxoluk, lungang vesi sung. ⁴⁵ E melele xa lutakameti ti e vanut moletin xil xa ludi en, xalu ludilomun lube Serusalem tangan lalolang vesi e rute ak.

⁴⁶ Lulang ves Iesu melengien tol (3), di lukameti sung xa dotan de vloh te Nim Eo. Xi di miteong ni pispisien na titsa xil na Siu xil e di misis pilei xil usili. ⁴⁷ Xil vus xa lalong sepinien na horamue Iesu lamesep ve kilakilen xa di pisen ni melele xa misa rilomun ni sepinien mi titsa xil.

⁴⁸ Melele xa Siosep xal Meri lukameti, lutemanin pupu. E ninen biteni mini bit, “?Natuxoli, veneh ma opol ni mak mi xamel? Opol ni xamel manexo pupu e di malang vesuk e ut ngasen.”

⁴⁹ E Iesu bit rilomun ni mi xalu bit, “?Mullang ves nou veneh? ?Mutakil ti xa inou ti nite nim ma Tata navan?”^f

⁵⁰ E xalu lutakil ti koute te sepinien nan.

⁵¹ E nine Iesu miling kuh naha xa mistal

^z2:34 Aes 8:14; 1Kor 1:23; 1Pit 2:8 ^a2:36 1Tim 5:5 ^b2:38 Aes 52:9

^c2:39 Mat 2:23 ^d2:40 Luk 2:52; 1:80 ^e2:41 Eks 12:24-27; Dut 16:1-8

^f2:49 Sion 2:16

de nenemien nan, e di minem usili ve-hakut.⁸

Di, horamue Iesu dilomun be Nasaret del xalu, e milong xat xalu.⁵² Xi matu, e mei be moletin xa polu ni metisouen. E Hi del moletin xil mun lamaal ven.^h

Sion Baptis pol kokot ni polien nan tangan vahithiten longeongen hos na Hi mi moletin xil

3 E melele xa Taeberias tehe **Sisa**^f te hal Rom huram lim e le tei (15), moletin hat (4) iaxa di latetutou ni lelatien nan: **Herod** Antipas tehe suv toto te hal Kaleli; tunali Pilip, tehe suv toto te hal Ituria tetel Trakonaetas; Lisantias tehe suv toto te hal Abilin; e Pontias Paelet tehe vat te kavmen te hal Sudea.ⁱ
² E melele nen ak, Anas xal Kaeafas lunggur polien te **vatixar na pris xil**.^j

E melele ak, Hi misa sepinien tei mi Sion, nat Sakaraea, e uruvuol.³ Ma Sion mikakao e ut xil ngasen xa ladi sangas visal Oeisal Sodan e di bithiten sepinien na Hi mi moletin xil bit, “!Muhiles ra **tesaen** namim xil! Ti, mumei minou e nibaptaes ni xamim tangan vapisen ni xa Hi di miketeh bos rilomun mi xamim.”^k

⁴ **Provet** Aesea tetis usil Sion tetiamu tehit,^l

“Lalong rae tei xa di miki e uruvuol xa bit,

‘!Musak mesen suse na Hi Suv!

!Mupol ni suse nan imal!

⁵ *Mutihin sesale xil,*

e muhil lelen hu xil mei lihe motan.

Suse xil xa lakavui, mupol ni mei limal tevi,

e mutihin suse xil xa misa.

⁶ *Ti, moletin xil vus lipusi*

xa Hi ti iteh meulien e xil itep.” (Aes 40:3-5)^m

⁷ Vanut moletin xil holu lamei tangan Sion vabaptaes ni xil. E Sion mea e misepin nggeih mi vat xil na Siu xil xa lamei mini bit, “!Ei, xamim mube vanut tetal tesa xil xa di langas vin moletin xil ni vulongomim! ?Visi iaxa tesel xat xamim tangan mulesae ra pangasien xa Hi isa ni mi xamim?ⁿ ⁸ Ihos mak mu xa, itiamu, mupol ni sexien xil xa ipisen ni xa mubiles ra tesaen namim xil reitin. E munahiteni ti munahit, ‘Xamem munahur ti pangasien vengana xa **Ebrahim** be avu namem e Hi tehosei xamem mabe nan.’ E nabiteni mi xamim xa ngan ak tave reitin ti, vengana xa Hi mikila vahosei hat xil ak tangan mei lave havneli xil e mei lave moletin nan xil xati.^o ⁹ Taxeak tang, Hi bue xat akis nan ngamu tangan itei vatiei xil ngasen xa latataxao ni ti huite xil xa bos. Reitin, itei xoteh xil e iso xil lihe upang.”^p

¹⁰ E vanut moletin xil ak lasis Sion labit, “?Ma xamem mupol ni naha vari?”

¹¹ Sion biteni mi xil bit, “Xosxa tei e xamim, eising nan lu, ma isa tei mi mosav xa nan tovuol. Xosxa anien amim di, ma musa rute mi mosav xa an tovuol.”

¹² Di, moletin xil te **takis** lamei tangan Sion vabaptaes ni xil, e xil lasisi labit, “?Titsa, xamem mupol ni naha vari tangan mei mumal pe met Hi?”^q

¹³ Ma Sion biteni mi xil bit, “Munaleh mani te takis ti nali naha xa rae te kavmen di biteni.”

^f3:1 Suv toto na moletin xil labe holu, e Sisa tehe eilep e xil vus e melele nen ak. Mol-Rom xil latenem latehit tehe hi tei vengana xa xeihen nan mahulong pupu.

^g2:51 Luk 2:19 ^h2:52 1Saml 2:26; Pro 3:4; Luk 1:80

ⁱ3:1 Mat 3:1-12; Mak 1:1-8; Sion 1:19-28 ^j3:2 Luk 1:80

^k3:3 Pol 13:24; 19:4 ^l3:4 Aes 40:3-5

^m3:6 Luk 2:30-31; Pol 28:28; Taet 2:11 ⁿ3:7 Mat 12:34; 23:33

^o3:8 Sion 8:39 ^p3:9 Mat 7:19; Sion 15:6 ^q3:12 Luk 7:29

¹⁴E moletin xil te vaeen mun lamei lasisi labit, “?E itep mi xamem? ?Xamem mupol ni naha tangan mei mumal pe met Hi?”

Ma Sion biteni mi xil bit, “Munaxeih xat moletin xil ti tangan lasa mani mi xamim. E munahur ti mani naxo suse xa muluvos mosav e kot en. Mulonge ihos tang ve mani xa di mungguri.”

¹⁵Melele xa moletin xil lalong naha xa Sion di biteni, lanem holu usili del sien e labiteni mi xil mun tang labit, “Xos Sion vari iaxa be Mesaea xa Hi tehit xati tehit isa ni imei.”

¹⁶Melele xa Sion milonge mak, bit rilomun ni mi xil bit, “Inou natave Mesaea ti. Inou di nabaptaes ni xamim ni oei tang. E tei xa imei itutou ni nou, xi iaxa ihe eilep mak mu ili nou, e inou natapin ti tangan nalal rat sandel nan. Xi vari ibaptaes ni xamim ni **Ninin Eo** e ni upang.[§] ^{r17}Xi bue xat xi tangan vaseti moletin xil ngasen ixoni moletin xa di po savel tangan vaseti utut **uit** ra valite. Utut uit xa bos, ileh xati ha ihe nim man; e valite xil teni, iso ni ihe upang xa misakras vamat.” ¹⁸E sexien nen tak, Sion misel xat moletin xil e bithiten longeon-gen hos na Hi mi xil.

¹⁹E melele xa Sion di pol ni polien nan, di misepin nggeih ba xat suv toto Herod vengan xa tehur atou na tunali tehe atou nan, hisen Herodias. E Sion di misepin ba xat Herod mun ve holesok xil vus xa di pol ni xa tamal ti.[§] ²⁰Misak ni, Herod pol ni neta tei xa misa pupu mili sexien sav nan xil. Xi misemae ni tangan moletin te vaeen nan xil iha ital xat Sion e liso ni ihe nim te xeih.

Sion baptaes ni Iesu

Mat 3:13-17; Mak 1:9-11

²¹Melele xa Sion di tamu tebaptaes ni moletin xil, Iesu mun temei mini tangan Sion vabaptaes ni. E melele xa Iesu di tesis, tilang hat tesaha ²²e Ninin Eo temei e tan texoni mae e mei tetotan en. E rae tei tekei texo ut nesao tehit, “Xoux obe natuxoli reitin xa eheien navan di e xoux, e nabesi nou pupu ve xoux.”^t

Vatimol na Iesu

Mat 1:1-17

²³Melele xa Iesu tepol kokot ni polien nan, hura nan tehe hanutap tei e he xalu mun (30). Moletin xil vus lanemi labit xi be nat Siosep.^u E avu na vatimol na Siosep xil, hisexil temak: Siosep tehe nat Heli.

²⁴E Heli tehe nat Matat,

xa tehe nat **Livae**,

xa tehe nat Melki,

xa tehe nat Sanae,

xa tehe nat Siosep.

²⁵Siosep tehe nat Matataeas,

xa tehe nat Amos,

xa tehe nat Neham,

xa tehe nat Esli,

xa tehe nat Nanggae.

²⁶Nanggae tehe nat Mahat,

xa tehe nat Matataeas,

xa tehe nat Semein,

xa tehe nat Sosek,

xa tehe nat Soda.

²⁷Soda tehe nat Soanan,

xa tehe nat Resa,

xa tehe nat Serubabel,^v

xa tehe nat Seltiel,

xa tehe nat Neri.

§3:16 Upang ak ia moten ngan xil xa langgusil xat Iesu, e ia len ngan xil xa latahusili ti.

†3:16 Pol 13:25 **§3:19** Mat 14:3-4; Mak 6:17-18

†3:22 Sion 1:32; Sen 22:2; Sam 2:7; Aes 42:1; Mat 12:18; 17:5; Mak 9:7; Luk 9:35;

2Pit 1:17 **†3:23** Luk 4:22; Sion 6:42 **†3:27** Esra 3:2

²⁸Neri tehe nat Melki,
 xa tehe nat Adi,
 xa tehe nat Kosam,
 xa tehe nat Elmadam,
 xa tehe nat Er.

²⁹Er tehe nat Sosua,
 xa tehe nat Eliesar,
 xa tehe nat Sorim,
 xa tehe nat Matat,
 xa tehe nat Livae.

³⁰Livae tehe nat Simeon,
 xa tehe nat Sudah,
 xa tehe nat Siosep,
 xa tehe nat Sonam,
 xa tehe nat Eliakim.

³¹Eliakim tehe nat Melea,
 xa tehe nat Mena,
 xa tehe nat Matataha,
 xa tehe nat Netan,
 xa tehe nat **Deved**.^w

³²E Deved tehe nat **Tiese**,^x
 xa tehe nat Obed,
 xa tehe nat Boas,
 xa tehe nat Salmon,
 xa tehe nat Nason.

³³Nason tehe nat Aminatap,
 xa tehe nat Atmin,
 xa tehe nat Ani,
 xa tehe nat Hesron,
 xa tehe nat Peres,

xa tehe nat Sudah.^y

³⁴Sudah tehe nat **Siekob**,^z
 xa tehe nat **Aesak**,^a
 xa tehe nat Ebrahim,
 xa tehe nat Terah,
 xa tehe nat Nahor.

³⁵Nahor tehe nat Seruk,
 xa tehe nat Rehu,
 xa tehe nat Pelek,
 xa tehe nat Eber,
 xa tehe nat Sela.

³⁶Sela tehe nat Kenan,^b

xa tehe nat Arpaksat,
 xa tehe nat Sem,
 xa tehe nat **Noah**,
 xa tehe nat Lamek.

³⁷Lamek tehe nat Metuselaha,
 xa tehe nat Inok,
 xa tehe nat Saret,
 xa tehe nat Mahalalil,
 xa tehe nat Kenan.

³⁸Kenan tehe nat Inos,
 xa tehe nat Set,^c
 xa tehe nat **Adam**.
 E Adam tehe nat Hi.

**Temat misak pis Iesu, e
 Iesu tamot ti e tesaen**

Mat 4:1-11; Mak 1:12-13

4 Melele xa Iesu be reling Oeisal So-
 dan, **Ninin Eo** xa da en midela be
 uruvuol. ²E rute ak, **Temat** di misak pis
 Iesu melengien be hanutap lu (40). E
 melele nen ak, Iesu taxanien ti. Ma, e
 hoxalite te melengien xil ak, mae nggat
 pupu ni.^d

³Ve rin ak, Temat mei misak pisi bit,
 “Xosxa obe Nat Hi reitin, ma usemae ni
 hat xil ak lihiles mei lihe beret am.”

⁴E Iesu bit rilomun ni mini bit, “!E-e!
 Ninapol ni ti namak vengan xa Vanuvei
 Eo na Hi biteni bit,
 ‘*Moletin misakras vameul e anien
 kestang.*’” (*Dut 8:3*)

⁵Di, Temat del Iesu be nesao e vathu
 tei, e vatei takes, pisen kantri xil vus te
 ut etan mini. ⁶E misak pisi bit, “Xeihen
 te kantri xil vus ak de heok. E inou nakila
 nasa rati mi moletin eah xa ieok bei ten-
 gan nasa ni mini. Misak ni, nakila nasa
 rat relaxatien te xil itel holesok xil vus
 xa di en minuk.^e ⁷Misak ni, xosxa umot
 minou tang, ma nisa sen holesok xil ak
 minuk.”

^w3:31 1Saml 16:1,13 ^x3:32 Rut 4:17-22 ^y3:33 Sen 35:23

^z3:34 Sen 25:26 ^a3:34 Sen 21:3 ^b3:36 Sen 4:25–5:32 ^c3:38 Sen 4:25

^d4:2 Hib 4:15 ^e4:6 Mat 28:18

⁸ E Iesu bit rilomun ni mini bit, “Inou ninapol ni ti vengan xa Vanuvei Eo na Hi biteni bit,

‘!Mumot mi Iahova xa be Hi namim, e mulong xat xi keatang!’” (Dut 6:13)

⁹ Di, Temat nggur Iesu be **Serusalem** e milingi misoh e rute tei xa be nesao pupu e taep te **Nim Eo** na Hi. E rute ak, Temat misak pisi bit, “Xosxa obe Nat Hi reitin, uhut uhe tan. ¹⁰ Vengan xa Vanuvei Eo di biteni bit,

‘Hi isemae ni masxaxa nan xil tangan mei lisikoe xolok.’” (Sam 91:11)

¹¹ E,

‘Xil lipo xatuk itel hexil tangan onasip hat ti ni lem.’” (Sam 91:12)

¹² E Iesu bit rilomun ni mini bit, “!E-e! Ninapol ni ti, vengan xa Vanuvei Eo biteni mun bit,

‘Munasak pis Iahova ti xa be Hi namim tangan mukameti xa xi di mi xamim.’” (Dut 6:16)^f

¹³ Melele xa Temat misak pis Iesu e rin xil vus, be relingi ha ituxoh melele sav xil xa pus mesal tangan vasak pisi.^g

Iesu pol kokot ni polien nan e moletin xil te hal Nasaret lasin ni

Mat 4:12-17; 13:53-58;

Mak 1:14-15; 6:1-6

¹⁴ Melele xa Iesu be reling uruvuol, xi polu ni xeihen na Ninin Eo, e dilomun be provins te hal Kaleli. Longeongen usili mikapis e ut ngasen xa di sangas visal rute ak. ¹⁵ Xi ba be **nim te pispisien** na Siu xil e di pispisi mi moletin xil en. E ngan xil vus xa lalonge lapet rat hisen.

¹⁶ Iesu mikakao ba duxoh taon te hal Nasaret, rute xa tematu en. E **Sabat**, Iesu be nim te pispisien nggoni ngan taxa di pol vehakut ni. E melele xa mea misoh tangan vavuli Vanuvei Eo na Hi, ¹⁷ xil

lasa vanuvei na **provet** Aesea mini e xi buli bit,

¹⁸ “Ninin Eo na Hi Suv di mise xat nou, vengan xi tehosei nou tangan nihit longeongen hos nan mi ngan xil xa labe hoeo.

Xi tesil inou namei tangan namitani mi moletin xil xa ladi e nim te xeih ha vexil vamase.

E nihitani mi ngan xil xa metexil bar mei liketeh rilomun.

E nihitani mi ngan xil xa ladi pe he mosav xil xa limeluv liha.

¹⁹ Xi tesil inou tangan nihithitani xa Iahova tehosei melele nen ak tangan itutou ni moletin nan xil en.” (Aes 61:1-2)^h

²⁰ Melele xa Iesu buli bus, boh xol vanuvei ak, di, misa rilomun ni ba mi moletin te tutouen, e dotan tangan vapispisi mi moletin xil. Melele xa met moletin xil vus xa lateti e nim ak da en, ²¹ Iesu biteni mi xil bit, “Vanuvei Eo na Hi xa mutelong nou natevuli, taxeak tang, sepinien xil teni mei be reitin.”

²² Moletin xil xa lalong pispisien hos xil xa di misa ni mi xil lamesep ven e lapet rati ve sepinien nan xil. E di, rute e xil lanem male ni labit, “!Ei! Xi be nat Siosep tang.”ⁱ

²³ Iesu bit rilomun ni mi xil bit, “Nakila xa muhitani minou sepinien matu xa bit, ‘Tokta, upol ni ngenom xil mu mei lilonge ihos rilomun,’ vengan xa iemim bei tangan nipol inggak, e metimal xati navan, holesok xil vus xa mutelonge xa natepol ni e taon te hal Kapaniam tangan muke reitin e nou ixo en.”^j ²⁴ E nabitani reitin mi xamim, provet tovuol tamu xa ngenen xil latehur pilei e metimal nan xati.^k ²⁵ Tetiamu, e melengien xil na provet **llaetsa**, us tenamus ti huram tehe tol e rute, e moletin xil

^f4:12 1Kor 10:9 ^g4:13 Hib 4:15 ^h4:19 Aes 58:6

ⁱ4:22 Luk 3:23; Sion 6:42 ^j4:23 Mat 4:13; Sion 2:12 ^k4:24 Sion 4:44

vus, mae teat xil.¹ E, e mol-Isrel xil, tunau xil latehe holu. ²⁶E Hi tesil Ilaetsa teha mi tunau tei xa tave te hal Isrel ti. Xi de metimal te hal Sarevat sangas visal taon te hal Saedon.^{**} ²⁷Teimun, e melengien xil na provet *Elisa*, moletin holu te hal Isrel latehur mesien *leporsi*. E Elisa tenapol ni ti tenbexil vamese, xi tepol ni *Neman* te hal Siria kestang xa tenave te hal Isrel ti tenben mei temese rilomun.^{††}

²⁸Melele xa moletin xil xa ladi nim te pispisien lalong sepinien nan, xil vus iexil mikati ven. ²⁹Ma latamea, lameru xati be reling metimal nae, e ladela labe seri meteh xa de haxot te metimal nae vengian xa labit lativin rat Iesu vamot vaha en. ³⁰E Iesu, xi biles, e mikakao nggo hilaep te vanut moletin xil ak. Di, be reling xil e nggusil suse nan ba.

Iesu nggol rerat ninin tesa ra moletin tei

Mak 1:21-28

³¹Di, Iesu be metimal te hal Kapaniam xa de provins te hal Kaleli. E Sabat, Iesu di pispisi mi moletin xil inggak.^m ³²Moletin xil lamesep ni pispisien nan xil vengian xa di bit kil koute teni mi xil nggoni ngan xa nggo Hi vari.ⁿ ³³E melele nen ak, moletin tei xa *ninin tesa* da en de vangit nim te pispisien. Xi mikei nggeih xat Iesu bit,^o ³⁴“!Ei, Iesu, ngan Nasaret! ?!Obit upol ni naha mi xamem!? ?Omei inggak tangan omu vin xamem!? !Inou nakilak, xouk obe Moletin Eo na Hi vari!”^p

³⁵Iesu mike xat ninin tesa ak bit, “!Utat votei! !E uhe reling moletin ak!” Ninin tesa bas tan ni moletin ak pe met moletin xil vus. Di, be reling moletin ak e neta ti taxula.

³⁶Moletin xil vus lamesep e di lasis xil mun tang labit, “?Hisit pispisien eah xiak? !Moletin ak di misepin del xeihen, e melele xa misepin nggeih mi ninin tesa xil, lalong xati e labe reling moletin xil!” ³⁷Ma longeongen usil Iesu mikapis ut ngasen xa de sangas visal metimal te hal Kapaniam.

Iesu mileh rerat mesien ra moletin xil holu

Mat 8:14-17; Mak 1:29-34

³⁸Melele xa Iesu be reling nim te pispisien te hal Kapaniam, be tim sa moletin tei, hisen Saemon Pita. Melele xa duxoh tim san, milonge xa avu atou kokon na Saemon Pita, ven minggan pupu. Ma lasis Iesu tangan vatal rati ra mesien nan. ³⁹Ma Iesu be visali e misemae ni mesien ak bit, “!Uhe relingi!” E, vatei takes, atou ak milonge bos, mitamea, e ba pol ni anien ae.

⁴⁰E melele xa eai minu e Sabat bus, moletin xil lakila lapol ni neta. Ma moletin xil holu laleh tua nae xil xa lamesei lamei visal Iesu. Xi miling hen e xil kekes e pol ni ngan xil vus ak mei labos. ⁴¹E melele xa Iesu nggol rerat ninin tesa xil ra moletin xil holu, lamuis kei ba mini labit, “!Xouk obe Nat Hi reitin!” E xi misep xol xil tangan linasepin ti vengian lakila xa xi be Mesaea xa Hi tehosei.
q

^{**}4:26 1King 17:8-16 biteni xa tunau ak teke reitin xa Ilaetsa tehe provet tei na Hi e tetutou ni.

^{††}4:27 2King 5:1-14 biteni xa Neman teke reitin e sepinien na Provet Elisa xa Hi ihur rati ra mesien nan.

¹4:25 Tem 5:17; 1King 16:1,7; 17:1; 18:1 ^m4:31 Mat 4:13; Sion 2:12

ⁿ4:32 Mat 7:28-29; Sion 7:46 ^o4:33 Mat 8:29; Mak 1:23-24; 5:7; Luk 8:28

^p4:34 Luk 4:41; Sion 6:69 ^q4:41 Mat 8:29; Mak 3:11; Luk 4:34; Mak 3:12

Iesu di pispisi e nim te pispisien xil

Mak 1:35-39

⁴²E visuvong nen, e makoe roroh, Iesu mika sen be uruvuol. E melele xa moletin xil latapus ti, laba tangan lalang ni. Melele xa lakameti, lasak pisi tangan ladak kesi nave reling xil ti. ⁴³E Iesu biteni mi xil bit, “Niha nihithiten longeongen hos usil lelatxatien na Hi mi moletin xil e rute sav xil mun. Vengan xa Hi tesil inou namei tangan napol ni hisit polien xil ak.”^r

⁴⁴Ma Iesu be metimal xil na Siu xil e dit bithiten longeongen hos na Hi e nim te pispisien nae xil.^s

Iesu mikes kokot ni moletin tol tangan latihusili

Mat 4:18-22; Mak 1:16-20

5 Vatei, Iesu misoh de suhon te Oei Kaleli sangas ni Kenesaret. E moletin xil labe holu pupu e mei lating xat Iesu tangan lalong ti sepinien na Hi xa di misa ni mi xil.^t ²Di, Iesu pus bot lu (2) xa moletin xil teni lateling xalu ludi e ut tangan lava lakas moten net nae xil. ³Di, Iesu be bot tei xa be na Saemon Pita, e misisi tangan vativin ni valis luvoluv vahe reling ut. Di, Iesu dotan de bot ak e di pispisi mi vanut moletin xil xa mahulong xa ladi ut.

⁴Melele xa Iesu misepin mi xil bus, biteni mi Saemon Pita bit, “Xamitel, tohalis ni bot valis vahe huinep, e mutiso net namitel inggak tangan mutisar ti meseo.”^u

⁵E Saemon Pita bit rilomun ni mi Iesu bit, “Suv, vongien duxoh makoe ak, xamem mabilao tova tang e matasar ti

meseo vari. E vengan xa xouk obiteni, ma bos tang, nisa sepinien tangan muha muso rilomun ni net namem.” ⁶E melele xa ba laso net nae xil be tan, laleh meseo xil holu xa holu pupu ... sangas langgur papas net nae xil. ⁷Ma laso hexil ba ni tua nae xil tangan lalis bot nae vamei e litoutou ni xil. Ma, melele xa laduxoh xil, lase xat bot xalu vus ni meseo ba vuma ... polu tova tang, sangas lalom-erir. ⁸⁻⁹Saemon Pita e moletin xil vus xa ladi e bot ak latemanin xa meseo xil xa lalehi labe holu xa labe holu pupu mak. E melele xa Saemon Pita pus kil naha xa mistal, be visal Iesu, mitingeiril pe meten, e biteni mini bit, “!O Suv, inou natapin ti tangan nate visaluk! Uhe reling nou vengan xa nabe moletin tesa tang.”

¹⁰E Iesu bit rilomun ni mini bit, “!Ulum nakan ti! Duxoh xosali, xouk otehihi meseo xil tang, e taxeak iha, ulihi moletin xil sung.” Moletin lu mun xa lupol vituei del Saemon Pita, hisealu Temis xal Sion xa lube nat Sepeti. Xalu mun lutepus holesok xa testal e lutemeseo ni. ¹¹Misak ni, melele xa lalihi bot nae be ut, Pita, Temis e Sion latstokovein holesok natel xil di, e latoba latonggusil Iesu.^v

Iesu pol ni tenbe moletin tei xa nggur mesien leporsi^{‡‡} mei bos rilomun

Mat 8:1-4; Mak 1:40-45

¹²Vatei, Iesu temei tehe taon tei. E rute ak, moletin tei da en xa mesien leporsi tepurun tenben. E melele xa moletin ak pus Iesu, bemei visali e mitingeiril be tan pe meten, valnaon ba duxoh tan. Di,

‡‡5:11 Leporsi be mesien xa pol ni hilbe moletin di mat, misak ni menuk xa da en bo. Siu xil labit mesien leporsi misa mak mu mili mesien sav xil. Moletin xa ngguri natuxol ti moletin sav. Lalingi da sen nga tang.

^r4:43 Luk 8:1 ^s4:44 Mat 4:23 ^u5:1 Mat 13:1-2; Mak 3:9-10; 4:1

^t5:4 Sion 21:3-8 ^v5:11 Mat 19:27

midakes Iesu bit, “!Suv, xosxa iem bei, xouk okila opol ni veok vamese!”

¹³Ma Iesu misa hen ba duxoli, e biteni mini bit, “Teok bei li tangan nipol ni. !Vem imese rilomun!” Vatei takes, mesien nan be relingi vari. ¹⁴E Iesu misepin nggeih mini bit, “!Onahit rati ti mi mosav xil! E uha mu, upisen xouk mi *pris* tova xa de Nim Eo tangan ipus kuh tenbom. Ti, usa sanien eo nam ihusil naha xa rae na *Mosis* di biteni. Ixo suse ak, moletin xil vus lipus kila xa mesien nam bus, e omese tevi.”^w

¹⁵E neta sav xa mak, longeongen usil Iesu mikapis miloh be ut sav xil mun xa be sotin. Ma, vanut moletin xil holu lamei tangan ti lilong pispisien nan xil e ti lisisi tangan ileh rerat mesien ra xil. ¹⁶E vehakut, Iesu mea be reling moletin xil tangan ita tasen tang e ti isis.^x

Iesu pol ni moletin tei xa rin tei mat mei bos rilomun

Mat 9:1-8; Mak 2:1-12

¹⁷Vatei, melele xa Iesu di pispisi mi vanut moletin xil, rut *Farasi* xil del *titsa* xil te rae na Mosis lamei ladotan sangas visali e di lataeong ni pispisien nan xil. Xil latexo metimal sav xil e provins xalu te hal Kaleli xal Sudea, e rute xil latexo taon te hal *Serusalem* mun tangan mei lapus Iesu. E Hi Suv di misa xeihe mi Iesu tangan mikila valeh rerat mesien xil ra moletin xil holu. ¹⁸E melele nen ak, rut moletin xil lamei lapo moletin tei del vet man tang e lamei ve Iesu vengana ri moletin ak mat. E melele xa lasak pisi tangan lapoe vahe nim tangan lalingi pe met Iesu, ¹⁹lasakras, vengana vanut moletin xil xa ladi e nim langgonaxon pupu. Mak toma, lapeou labe hilim nesao, e ladal rerat rut hilim ak ba. Di, lasae ni moletin ak xa da tamu e vet man be tan

e hilaep te moletin xil, momal ni rute xa Iesu da en. ²⁰Melele xa Iesu pus naha xa lapol ni e mile kil neketen nae, biteni mi moletin xa rin tei mat bit, “Tuxoli, Hi naketeh ti mun nasa minuk ve *tesaen* nam xil.”^y

²¹Melele xa Farasi xil del *titsa* xil te rae na Mosis lalonge mak, laseputut ni e nenemien nae labit, “!Ei! ?!Moletin ak minemi bit xi be visi!? !Xi di misep xar ni Hi! !Xi bit nggur xeihe nggoni Hi, vengana Hi kestang mikila valeh rat tesaen ra moletin tei!”^z

²²E Iesu mikil nenemien nae, ma biteni mi xil bit, “?Veneh ma di munemi xa natahur ti xeihe vapin tangan naleh rat tesaen ra moletin tei?^a ²³?Naha vari be temale mak mu tangan namiteni mi moletin ak? ?Tangan namit, ‘Hi naketeh ti mun nasa minuk ve tesaen nam xil,’ mu namit, ‘Utamea e ukakao?’ Temale tang tangan namiteni xa Hi naketeh ti mun nasa mini vengana xa musakras mupus kila xa mistal mu tastal ti. ²⁴E taxeak, mupus kila xa Nat Moletin nggur xeihe e ut etan tangan valeh rerat tesaen ra moletin xil pe met Hi.” Di, Iesu pus moletin xa rin tei mat e biteni mini bit, “!Utamea, uvulun vet mam, e upoe utilomun uhe tim sam!”^b

²⁵Vatei takes, moletin ak mitamea pe met moletin xil. Xi po vet man, e mikakao be tim san. E melele xa de suse misa memesien ba mi Hi. ²⁶Moletin xil vus latemanin e lanem pupu usili. Lames Hi labit, “!Xosali, xir rapus neta tei xa eilep pupu!”

Iesu mikes Livae tangan ihusili

Mat 9:9-13; Mak 2:13-17

²⁷Dutou ni melele nen ak, Iesu mistal nggo nim e mikakao ba. E kakaoen nan, pus Siu tei xa di pol mi kavmen te hal

^w5:14 Mak 7:36; Luk 8:56; Lev 14:2-32

^x5:16 Mak 1:35

^y5:20 Luk 7:48

^z5:21 Aes 43:25; Luk 7:49

^a5:22 Luk 6:8; 9:47; Mat 16:8

^b5:24 Sion 5:8

Rom, hisen *Livae*.^f Xi di dotan de von polien nan tangan valeh *takis* vaxo moletin xil tangan isa ni iha mi kavmen te hal Rom. Melele xa Iesu pusi, mikesi bit, “!Amei, uhusil nou!”²⁸ Misak ni, Livae mea, mistokovein holesok nan xil di, e ba nggusil Iesu.

²⁹ Ma Livae del Iesu e moletin nan xil labe tim san e pol ni anien tei xa mahulong ve Iesu. Ma misilasil ve vanut moletin xil holu tangan mei lavanien vituei: ngan xil xa laleh takis del rut moletin sav xil mun.^c ³⁰ Farasi xil e rut titsa te rae na Mosis di laseputut ni Iesu mi moletin xil labit, “?Veneh ma Iesu di mingganien e di mumun del moletin xil te takis e del rut moletin tesa sav xil ak?”

³¹ Iesu bit rilomun ni mi xil bit, “Moletin xil xa di lanemi labit latamesei ti, iexil ti tavei tangan ha lapus tokta. Tokta be na ngan xil kestang xa lakila labit lamesei. ³² Inou natamei ti tangan ti nikes moletin xil xa labit meulien nae momal ngamu. E-e, namei tangan ti nikes moletin tesa xil tangan ti lihiles meulien nae ra *tesaen* nae xil.”

**Iesu biteni xa pispisien hu
nan xil misakras vahusil xat
sexien matu xil na Siu xil**

Mat 9:14-17; Mak 2:18-22

³³ Melele xa Iesu da tamu e nim ma Livae, rut moletin xil mei labiteni mini labit, “Vehakut, moletin xil na Sion Baptis di lasis mi Hi e di labal ni anien ven. E moletin xil na Farasi xil mun mak tang. E xamem mapusi xa moletin nam

xil latapol ni ti vamak. Vehakut, dit langganien e di lamun. ?Veneh vari?”

³⁴ Iesu bit rilomun ni mi xil bit, “E melele te tetelien tei, moletin xil limei ve anien teni. Osakras osak ni xil laval ni anien e melele xa moletin xa miteli dat tamu visal xil.^d ³⁵ E melengien imei xa moletin tesa xil lihur rat moletin xa miteli ihe reling xil. E melele nen ak vari, xil ti lihal ni anien sung.”

³⁶ Di, Iesu dei vole mi xil bit, “Moletin tovuol xa vatal pas eising hu tei nan tangan vahur rut kaliko teni e vatil xol eising matu nan xa mahoe ni. Maxani, ipurun eising hu nan, e samulit eising hu ak tamal pupu ti ni eising matu nan. ³⁷ E moletin tovuol xa vateh uae hu vahe valite matu xa lapol ni ni hilbe sipsip vengan xa nggeih ngamu. Maxani, uae hu ikaio vuma ... isak ni valite matu iposou e imahoe. Ti, uae imie ihe tan, e valite mun isa. ³⁸ E-e, namak ti. Ihos xa uae hu ihe valite hu xa mavoh tang. ³⁹ E moletin xil xa di lamu uae matu, xil iexil ti tavei tangan lamu uae hu vengan xa lanemi labit, ‘Uae matu bos mak mu.’”^{§§}

**Iesu biteni xa meulien na moletin xil
eilep mak mu mili rae xil te ^eSabat**

6 Vatei, e *Sabat*, Iesu del *moletin nan xil* di lakakao langgo naho tatei te *uit*.^{*} E melele xa di lakakao, moletin nan xil di laki xototeh uit xil ak, langgo utute, e langga ni.^f ² Misak ni, rut *Farasi* xil mei lasisi labit, “?Veneh ma di mupol ni sexien xa *rae na Mosis* bit ti rinapol ni ti e *Sabat*?”⁸

^f5:27 Livae, his teimun be Matiu xa tetis vanuvei tei usil meulien na Iesu xa lakesi ni ‘Matiu.’

^{§§}5:39 E vole xalu ak, Iesu di biteni xa pispisien hu xil nan di nggusil sexien hu xil tang, misakras vahusil xat sexien matu xil na Siu xil.

^{*}6:1 Ladi kikis utut uit xil mei be pulaoa te beret.

^c5:29 Luk 15:1-2 ^d5:34 Sion 3:29 ^e6:0 Mat 12:1-14; Mak 2:23-3:6

^f6:1 Dut 23:25 ⁸6:2 Sion 5:10

³Iesu bit rilomun ni mi xil bit, “?Midep? ?Xamim mutakil ti naha xa suv toto **Deved** tetel moletin nan xil latepol ni e melele xa mae teat xil?^h
⁴Tave ti neta xa rae bit **pris** xil kestang lia beret eo, Deved tehe Nim Eo na Hi, tehur beret xa pris xil latesa ni tuei mi Hi e tea ni. Di, tesa rute mi moletin nan xil latea ni.”^{† i}

⁵Di, Iesu biteni mi xil bit, “Nat Moletin vari iaxa be eilep mu mili Sabat.”

⁶E Sabat teimum, Iesu ba di pispisi e **nim te pispisientei**. E rute ak, moletin tei da xa hen metu mikavui. ⁷Rut **titsa** xil te rae na Mosis del rut Farasi xil labit lipus pisi xos Iesu ipol ni he moletin ak mei ihos rilomun e Sabat. Vengan xosxa ipol ni, ma likila lisa sepinien iha xat rin nan vengan xa di nggur xoteh rae xa misikoe xol Siu xil tangan linapol ti e Sabat.^j ⁸E Iesu mikil nenemien nae, ma biteni mi moletin ak bit, “Amei. Usuh inggak visal inou.” Ma moletin ak mea, ba misoh rute ak pe met moletin xil.^k ⁹Di, Iesu biteni mi xil bit, “?Nasis xamim, rae na Mosis maen ni tangan ti ripol ni naha e Sabat? ?Ripol ihos, mu ripol isa? ?Ritoutou ni meulien na mosav, mu rihas vini?” ¹⁰Iesu miketeh mikapis e xil. Di, biteni mi moletin ak bit, “Te momal ni hem.” E melele xa pol ni, hen mei bos rilomun.

¹¹Xil iexil mikat pupu, e lasep vesi xa lipol ni naha mi Iesu.

Iesu bosei moletin lu e le tei (12) tangan mei lave moletin nan xil

Mat 10:1-4; Mak 3:13-19

¹²Vatei, Iesu be nesao e hu tei tangan ha vasis. Xi misis mi Hi e vongien nen ak

ba duxoh makoe. ¹³Melele xa ut milan, xi ba mikes moletin nan xil vus tangan lamei visali. E xi bosei moletin lu e le tei (12) tang tangan mei lave **eloheoh** nan xil.¹

¹⁴Saemon (xa Iesu miling hisen teimum be ‘Pita’) del tunali Andru;^m

Temis xal Sion;
 Pilip xal Batalomiu;

¹⁵**Matiu** e Tomas;

Temis nat Alveas;
 e Saemon (xa lakesi ni Silixin);

¹⁶Sudas[‡] nat Temis;

e Sudas Eskariot xa imaen Iesu ihe he ngan xil xa lihasi imat.

Iesu di pispisi mi moletin xil e di mileh rerat mesien nae xil

Mat 4:23-25

¹⁷Melele xa Iesu del moletin nan xil langgo vathu ak e labe tan, labe rute tei xa be motan xa vanut moletin xil holu xa di langgusil Iesu di ladatili. E Iesu pus vanut moletin savsav xil mun lamei: rute xil langgo taon te hal **Serusalem** e metimal savsav xil xa ladi e provins te hal Sudea, e rut moletin xil mun xa latave Siu xil ti langgo taon te hal Taer xal taon te hal Saedon xa ludi sangas visal Tas Medeterenia. ¹⁸Xil lamei tangan lateong ni Iesu e lasisi tangan ileh rerat mesien nae xil. Ngan xil mun xa **ninin tesa** xil di purun xil lamei, ma Iesu nggol rerat ninin tesa xil ak ra xil e pol ni xil mei labos rilomun. ¹⁹Moletin xil vus lasak tangan latuxol Iesu, vengan xeihen xa da en di mileh rerat mesien ra moletin xil ngasen e pol ni xil mei labos rilomun.

[†]**6:4** Vengan xa Hi Suv ien tenaxat Deved ti e melele xa mae teati, ma Farasi xil mun lasakras iexil vat Iesu mu moletin nan xil (1Saml 21:6).

[‡]**6:16** Sudas nat Temis, hisen teimum be Tatios (Mat 10:3).

^h**6:3** 1Saml 21:1-6 ⁱ**6:4** Lev 24:5-9 ^j**6:7** Luk 14:1 ^k**6:8** Luk 5:22; 9:47

^l**6:13** Sion 6:70 ^m**6:14** Pol 1:13

**Iesu pispisi usil sexien xil
xa momal pe met Hi**

Mat 5:1-12

²⁰ Melele xa Iesu da tamu del moletin xil ak, miketeh pus moletin nan xil e biteni bit,

“Tuxolxatien iti mi xamim xa holesok namim xil tapin ti, vengon xa holesok xil xa ladi he Hi labe namim.

²¹ Tuxolxatien iti mi xamim xa, taxeak, mae di nggat xamim,ⁿ vengon xa Hi isak ni xamim mupolu kuhi.

Tuxolxatien iti mi xamim xa, taxeak, di mudang, vengon xa Hi isak ni xamim mumen.

²² Tuxolxatien iti mi xamim melele xa moletin xil di iexil nggat xamim e di lasin xamim ve nou.^o

Reitin, tuxolxatien iti mi xamim melele xa di lasepsisil xamim e di lapurun hisemim vengon xa di munggusil xat Nat Moletin.

²³ Mumaal melele xa xil di lapol ni mak mi xamim e muhutahut itel sien,^p vengon xa Hi pusi xa mupin tangan muvur huite teni xa ihe eilep e ut nesao.

Vengon xa avu nae xil tetiamu latepurun **provet** xil tetiamu temak tang, e Hi tepus provet xil lamal pe meten.

²⁴ “E isa pupu mi xamim xa holesok namim holu taxeak,^q vengon xa mutehur sen hosien namim ngamu.

²⁵ Isa pupu mi xamim xa mupolu kuhi taxeak, vengon xa mae ti iat xamim. Isa pupu mi xamim xa di mumen taxeak, vengon xa ti mumuis e ti mutang.

²⁶ E isa pupu mi xamim melele xa moletin xil vus di lapet rat hisemim, vengon xa avu nae xil tetiamu latepol ni temak tang mi **provet** te luvosen xil.”

**Iesu pispisi usil sexien xa
momal tangan moletin xil
lipisen ni mi elu nae xil**

Mat 5:38-48; 7:12

²⁷ Di, Iesu misa sepinien ak mi moletin xil vus bit, “Nabiteni mak mi xamim vus xa di mulong sepinien navan xil ak: iemim ihei elu namim xil, mupol ni ihos mi ngan xil xa di laketeh misa mi xamim.^r ²⁸ Musis Hi tangan ituxol xat ngan xil xa di lasuhol xamim, e musis ve ngan xil xa di lapurun xamim.^s ²⁹ Xosxa moletin tei mileves vimim, musa ri vimim mun tangan ilevesi. E xosxa moletin tei misil rat kot namim, mumaen ni tangan ileh eising sav namim xil mun.^t

³⁰ Xosxa moletin tei dakes xamim ve neta tei, ma musa ni tang mini. E melele xa moletin tei nggur rat neta tei namim, munasis ti munahit nasa rilomun ni mi xamim. ³¹ Mupol ni mi mosav xil ixoni ngan xa xamim iemim bei tangan xil lipol ni minuk.^u

³² “?Xosxa iemim bei moletin xil kestang xa di iexil bei xamim mun tang, veneh ma di munemi mubit Hi ituxol xat xamim ven? !Moletin tesa xil mun di lapol ni mak! ³³ ?E xosxa xamim di mupol bos mi moletin xil kestang xa di lapol bos mi xamim, veneh ma Hi ituxol xat xamim ven? !Moletin tesa xil mun di lapol ni mak! ³⁴ ?E xosxa mumaen mani mi moletin xil kestang xa mukila mubit lisa rilomun ni mi xamim, veneh ma di munemi mubit Hi ituxol xat xamim ven?

ⁿ6:21 Ser 31:25; Sam 126:5-6; Aes 61:3; Rev 7:16-17

^o6:22 Sion 15:19; 16:2; 1Pit 4:14

^p6:23 2Kron 36:16; Mat 23:30,31; Luk 11:47 ^q6:24 Tem 5:1 ^r6:27 Pro 25:21; Rom 12:20 ^s6:28 Rom 12:14 ^t6:29 Sion 18:22-23; Pol 23:3 ^u6:31 Mat 7:12

!Moletin tesa xil mun di lamaen mani nae mi moletin tesa sav xil tangan, ti, lisa xolesi! ³⁵!E xamim, munapol ni ti namak! Eheien namim iti mi ngan xil xa di laketeh misa mi xamim e mupol ihos mi xil. Mumaen mani mi mosav xil e munanemi ti munahit lisa rilomun ni mi xamim. Xosxa mupol ni imak, ma Hi xa de ut nesao isa huite teni xa ihos pupu mi xamim e muhe horamue nan xil. Vengan Hi mun di pol ni bos mi moletin tesa xil xa lakavui e langgur votei ni holesok xil xa di misa ni mi xil.^v ³⁶Mak, ma esaeen namim iti e mosav xil, ixoni ngan xa esaeen na Hi Tamemim mun di e mosav xil.”

Iesu pispisi ni moletin xil tangan linaketeh ti nasa mi mosav xil ve tesaen nae

Mat 7:1-5; 15:14; 10:24-25

³⁷E Iesu biteni mun bit, “Munaketeh ti nasa mi mosav xil ve tesaen nae xil. Xosxa munapol ni ti, ma Hi naketeh ti nasa mi xamim ve tesaen namim xil. E munasepin ti nasa naha xat mosav xil ve sexien tesa nae. Xosxa munapol ni ti, ma Hi nasepin ti nasa naha xat xamim ve sexien tesa namim xil. E xosxa mosav tei pol misa mi xamim, muketeh ihos tang mini. Mak, ma Hi iketeh ihos mi xamim melele xa di mupol misa.^w ³⁸Melele xa musa tutouen mi mosav xil, ma Hi isa tutouen mi xamim. E melele xa xi isa tutouen mi xamim, ihe holu mu. Ixoni ngan taxa moletin tei minggutih raes amim ni kap tei xa mahulong pupu e polu ma ... dit kiri lel. Mak, ma sexien

xil xa di mupol ni mi moletin sav xil, Hi ipol ni imak tang mi xamim.”^x

³⁹Di, Iesu dei vole tei bit, “Moletin xa meten bar misakras vatel moletin teimun xa meten bar. Xosxa ipol ni imak, ma xalu vus lalikiri lalihe vul.^y ⁴⁰Moletin xa nggur pispisien nggo titsa tei, xi nanemi ti nabit xi bos mak mu mili titsa nan. E xosxa xi ihur sen sukul nan, ma mei sung ixoni titsa nan.^z

⁴¹“?Veneh ma di mupus kil saxut liei xa hokorong tang xa de met tuemim, e mutapus kil ti vari xa marut liei xa mahulong de metemim?^f ⁴²?Veneh ma di mubiteni mi tuemim mubit, ‘Tua li, umaen ni xamem muhur rat saxut liei ra metom,’ e di mutapus ti vari xa marut liei dat e metemim? !Xamim mumese e hilibemim tang! Momal tangan, itiamu, muhur rat merut liei ra metemim. Ti, mukila sung muhit rat saxut liei ra met tuemim.”

Iesu dei vole xa pisen ni xa moletin hos xil na Hi latapol ni ti sexien tesa xil

Mat 7:16-20; 12:33-35

⁴³Iesu biteni mi vanut moletin xil ak bit, “Vatiei xa bos, taso ti huite xa misa. E vatiei xa misa, taso ti huite xa bos. ⁴⁴Vatiei xil vus, lapus kila nggo huite xil xa di laso ni. Musakras muleh huit manggo ra vatit vilu, e musakras muleh huit tavu ra vatit ai.⁸ ⁴⁵Moletin xa meulien nan polu ni hosien, huit hosien di mistal nggo en. E moletin xa meulien nan polu ni tesaen, huit tesaen di mistal nggo en. Sepinien na moletin tei di pisen ni xa meulien nan polu ni naha.”

^f6:41 Koute te liei xalu ak be tesaen.

⁸6:44 Sepinien xati teni bit, “huit fik ra vatiei xa sanute di en, e huit grep ra vatiei mun xa misa.”

^v6:35 Lev 25:35-36 ^w6:37 Mat 6:14 ^x6:38 Mak 4:24

^y6:39 Mat 15:14; 23:16,24 ^z6:40 Mat 10:24-25; Sion 13:16; 15:20

^a6:44 Mat 12:33

Iesu dei vole xa pisen xi xa sexien te longxatien nggoni sexien xa moletin di mikili ni nim man

Mat 7:24-27

⁴⁶Iesu biteni mun mi moletin xil bit, “?Veneh ma di mukes nou mubit, ‘Suv, Suv,’ e mutapol ni ti naha xa nabiteni mi xamim?^b ⁴⁷Nitei vole tei usil hisit moletin xa bemei visal nou, di milong xat sepinien navan, e di pol nggusili. ⁴⁸Xi nggoni moletin tei xa di mikili ni nim man. Ma milang ves liei xil xa nggeih e mahulong tangan lihe pos xil teni. Di, mikili kuhi ni xil, e pol sen nim man.** Di, melele xa us mus e votiang nggeih bemei midep, e misakras vahu len nim man. Nim man misoh nggeih tang da. ⁴⁹E moletin xa di miteong ni sepinien navan e di tapol ti vahusili, xi nggoni moletin xa mileh votei ni liei tesa xil tang, e mikili ni nim man ni. E melele xa us mus e votiang nggeih bemei, nggu len nim man vari.”

Vat tei na moletin te vaeen xil te hal Rom miling neketen nan e Iesu mak mu mili Siu xil

Mat 8:5-13

7 Melele xa Iesu pispisi mi moletin xil bus, xi be Kapaniam. ²E taon ak, vat tei na moletin xil te vaeen te hal Rom da. E tim san, slev nan tei xa bos mak mu e nenemien nan mesei pupu, sangas vamat.^c ³E melele xa vat ak milonge xa Iesu bemei, misil rut elda xil na *Siu* xil laba tangan lasis Iesu vamei vahur rat mesien ra slev nan. ⁴Ma elda xil ak labe visal Iesu e ladakesi labit, “!Amei temanon e ututou ni vat ak li! Vengan xa xi be moletin hos tei xa xamem vus di mamerere ni. ⁵Eheien nan di e Siu xil e

xi di tetutou ni xamem melele xa matehil *nim te pispisiennamem.*”

⁶Ma Iesu be xil laba. E melele xa Iesu di be sangas ni tim san, vat ak misil rut timue nan xil laba labit mesen sepinien nan mi Iesu labit, “Suv, onakon ti ve rin navan, vengan inou natapin ti tangan xoux omei e tim savan. ⁷E natapin ti mun tangan namei visaluk. E xosxa usepin tang, neta sav xosxa ode sotin, e nakila xa slev navan ilonge ihos rilomun. ⁸Ixonon melele xa eilep navan di misa sepinien tei minou, e di napol nggusil xat raen. E melele xa inou mun nasa sepinien navan mi moletin te vaeen tei navan, xi mun di pol nggusil xat raeok. Nakila nasemae ni ngan xa de pe heok namit, ‘!Ha!’ ma xi iha. Mu namit, ‘!Amei!’ ma xi imei. E nakila nasemae ni slev tei navan namit, ‘!Pol ni netak!’ ma xi ipol ni.”

⁹Melele xa Iesu milong sepinien nan ak, mitemanin e biles pus vanut moletin xil xa di langgusili e biteni mi xil bit, “Reitin mak, e mol-Isrel xil, natapus ti mu hisit neketen xa moletin ak xa tave Siu ti di pisen ni.”

¹⁰E melele xa timue xil na vat ak ladilomun labe tim, lakameti xa slev nan milonge bos ngamu.

Iesu pol ni nat tunau tei xa mat mei meul rilomun

¹¹Dutou ni ngan ak, Iesu del *moletin nan xil* langgusil suse nae laba e laduxoh metimal te hal Naen. E vanut moletin xil holu di langgusil xil. ¹²Melele xa xil lamei sangas visal puiteh te vloh te metimal ak, xil lapus vanut moletin tei di lapo vet tei. Tiei na horam maxoe tei xa mat de vet ak e lava tangan latihin ni. Horam maxoe ak be siskes na tunau

**6:48 Sepinien xati teni bit, “*mikili ni nim man de hat,*” xa nggusil sexien na Siu xil. E mol-Vanuatou xil di lakili ni nim mae xil ni “*liei xil xa nggeih.*”

^b6:46 Mal 1:6; Mat 7:21 ^c7:2 Sion 4:47

tei.^d ¹³ Melele xa Suv Iesu pus tunau ak, ien misae en e biteni mini bit, “Onatang ti.”^e ¹⁴ Di, Iesu be visal xil e misa hen ba duxol vet xa di lapoe. Ma, xil lasoh ladit mak. Di, Iesu biteni bit, “!Horam maxoe, nabiteni minuk, meul rilomun ra maten!”^f ¹⁵ Ma horamue ak meul, mitamea, e misepin mun. Di, Iesu biteni mininen bit, “Nana, natumali xiak.”^g

¹⁶ Moletin xil vus latemanin e lapet rat his Hi labit, “!Xosali, **provet** tei xa eilep mak mu de visal xir!” E labiteni mun labit, “!Hi bemei tui tangan vatutou ni rin na moletin nan xil!”^h

¹⁷ Ma longeongen usil Iesu mikapis e ut ngasen e provins te hal Sudea del rute xil vus xa be sangas visali.

Sion Baptis ien bei tangan vakil ti xos Iesu be Mesaea reitin

Mat 11:2-19

¹⁸ Longeongen usil Iesu duxoh moletin xil na Sion Baptis, ma ba lasap usili mini.

¹⁹ Misak ni, Sion misil rumali lu luba tangan lalisis Suv Iesu lalihit, “?Xouk iaxa obe ngan xa Hi tehiti xati tehiti imei, mu mutatil tova mun tesav?”ⁱ

²⁰ Melele xa ba lupus Iesu, lusisi lubit, “Sion Baptis tesil xamel tangan mei malsisuk imak, ‘?Xouk iaxa obe ngan xa Hi tehiti xati tehiti imei, mu mutatil tova mun tesav?’”

²¹ E melele nen ak, Iesu di dal rat moletin xil ra mesien nae e misak ni ngan xil xa lalong pangas xil mei lalonge bos rilomun. E di nggol rerat **ninin tesa** xil ra ngan tesav xil. E ngan xil xa metexil bar, xi pol ni xil mei laketeh rilomun. ²² Ma Iesu bit rilomun ni mi moletin xalu na Sion bit, “Muliha mun e mulihit mesen naha xa mulonge e mupusi. Ngan xil xa

metexil tevar, lakila laketeh rilomun; e ngan xil xa latesakras latekakao, lakakao rilomun. Moletin xil xa latehur mesien **leporsi**, tenbexil mei memese rilomun; e ngan xil xa vurangexil tevon, lalongeong mun. Ngan xil xa latemat, lameul rilomun ra maten; e setutuen te longeongen hos di ba mi hoeo xil. ²³ Muliha mulihit mesen ni mi Sion mulihit ngan xil xa nenemien nae tave lu ti usil inou e holesok xil xa di napol ni, ma tuxolxatien na Hi iti mi xil.”^j

²⁴ Melele xa moletin xalu na Sion luba, Iesu misep usil Sion mi vanut moletin xil bit, “?Melele xa xamim mutehe uruvuol tangan mupus Sion, mutehe tangan mupus hisiti moletin eah? ?Muteha tangan ha mupus ngan xa taxeihi ti xa nggoni sulut vatiei tei xa misakras vasomal melele xa votiang bui nggeih? !E-e!

²⁵ ?Muteha tangan ha mupus hisiti moletin eah? ?Moletin tei xa mising kuhi ni eising xil xa bos pupu? !E-e! Ngan xil xa lasing mak, meulien nae polu ni holesok holu e ladit e tim xa mahulong na eilep xil kestang. ²⁶ ?Mak, ma muteha tangan ha mupus visi vari? ?Provet tei? !Io! Sion be provet tei, e nave provet tei kestang.”^k

²⁷ Sion be ngan xa latetis usili e Vanuvei Eo latehit,

‘Upusi. Inou nisa eloheoh navan itiamu ni xouk.

Xi iaxa iha tangan isak mesen suse ve meien nam.’ (Mal 3:1)^l

²⁸ “Reitin li nabiteni mi xamim, moletin sav tovuol xa lapesi e ut etan xa vahe eilep mu vali Sion. E xosxa moletin votei tei imaen Hi mei ihe suv toto nan, ma xi ihe eilep mak mu ili Sion pe met Hi.”^m

^d7:12 1King 17:17; Luk 8:42 ^e7:13 Luk 8:52 ^f7:14 Luk 8:54

^g7:15 1King 17:23; 2King 4:36 ^h7:16 Luk 1:68; 19:44

ⁱ7:19 Sam 40:7; Mal 3:1; Rev 1:4,8 ^j7:23 Aes 35:5-6; 61:1-2; Luk 4:18-19

^k7:26 Luk 1:76 ^l7:27 Eks 23:20 ^m7:28 Luk 1:15

²⁹ Moletin votei xil del moletin xil te **takis** xa lateong ni mak lakil reitinen te sepinien na Iesu. Vengan xa xil latelong kil suse xa momal na Hi texo pispisien na Sion, e latemaen Sion tebaptaes ni xil.ⁿ ³⁰ E **Farasi** xil del titsa xil te rae na Mosis lasin ni naha xa Hi ien bei tangan vapol ni e meulien nae vengan xa latamaen Sion ti tangan vabaptaes ni xil.

³¹ Iesu biteni mun bit, “?Moletin xil te xosali ak, langgoni naha? ?Sexien nae nggoni naha? ³² Xil langgoni tutut horamue xil xa di ladotan sangas ni von posen e di lake xat xil mun tang labit, ‘Melele xa xamem makikei e sien, e xamim mutahol ti.

Melele xa xamem di madang, e xamim mutamuis ti.’

³³ Nabiteni mak vengan xa xamim, vat xil na Siu xil, di museputut ba xat inou xamel Sion mun vengan xa matahusil sexien namim xil ti. Vengan xa melele xa Sion Baptis temei, xi di tehal ni anien ve sisen e di tamu ti uaen, e xamim museputut ba ni mubit, ‘!Sion, ninin tesa da en!’ ³⁴ Di, melele xa inou, Nat Moletin, natemei, nangganien e namumun, e xamim mubiteni museputut ba ni nou mubit, ‘!Pus ti mu moletin ak! !Be vat anienen e vat munien tang! Xi di mikes moletin te takis xil e moletin tesa xil mun ni timue nan xil.’^o ³⁵ E neta sav tang, inou nabiteni mi xamim xa ngan xil labe horamue xil na Hi lapus kil metisouen nan, e meulien nae di pisen reitinen teni.”

**Atou tei te suse mei
mikas le Iesu ni vokon**

³⁶ Dutou ni melele nen ak, Farasi tei misis Iesu tangan mei vanien vatela, hisen Saemon. Ma Iesu be tim san e

dotan tangan vanien.^p ³⁷ E rute sav tei e taon ak, atou tei te suse milonge xa Iesu bemei tangan vanien e tim sa Farasi ak. Ma, atou ak nggur valit vokon tei xa mani teni be nesao, e ba be nim ak. ³⁸ Melele xa be nim, atou ak mei misoh pe tou Iesu e di muis. Melele xa muis mak, simeten di mileh be tan e di mikas le Iesu, ma mitingeiril e misihhi len xalu ni hilin. Melele xa len xalu lumese, mideh vokon xat xalu. ³⁹ Melele xa Farasi xa tesilasil ni Iesu pus netak, misep tasen bit, “Xosxa moletin ak be provet reitin, xi vakila xa visi iaxa di duxoli e be hisit atou eah. !Xi vakila xa atou ak be atou tei te suse!”

⁴⁰ Ma Iesu biteni mi Farasi ak bit, “Saemon, ieok bei namit neta tei minuk.”

Ma Saemon bit rilomun ni mini bit, “Bos tang. Hiteni.”

⁴¹ Di, Iesu dei vole ak mini bit, “Vatei, rumali lu luleh **mani** ra eilep tei. Tei xalu nggur mani be handred taosen lim (500,000), e teimun tesav nggur mani be taosen hanutap lu e he xalu mun (50,000).^{††} ⁴² Dutou sung, rumali xalu ak lusakras lalosa xoles mani nan. Misak ni, eilep ien misae e xalu e biteni mi xalu xa ien ibong ni kaon nalu. Ma Saemon di nasisuk mak. ?Ngan xave e rumali xalu ak iaxa eheien nan iti e eilep ak ili?”

⁴³ Saemon bit rilomun ni bit, “Nanemi nabit ngan xa kaon nan mahulong mak mu xa eilep ak ien bovong ni.”

Melele xa Iesu milonge mak biteni mini bit, “Obiteni momal.” ⁴⁴ Di, Iesu biles pus atou ak e biteni mi Saemon bit, “?Xouk opus atou ak? Melele xa namei e tim sam, xouk otasa ti oei minou tangan nakas leok ni. E atou ak, tekas leok ni simeten e tesihia tevue ni

^{††}7:41 Sepinien xati teni bit, “500 denarie e 50 denarie.” E melengien xil na Iesu, denarie tei be huit polien te melengien tei.

hilin.^q ⁴⁵Xouk otapesum ni viuk ti tenggan ovur pilei nou e tim sam. E atou ak, melele kokot xa temei nim, xi tepesum ni leok xa tangal ni ti.^r ⁴⁶Xouk otasa ti oel minou tenggan naxul maxoe ni nou ni tenggan nivue xat nou ve anien ak, e atou ak mikas leok ni vokon hos.^s ⁴⁷Misak ni, nabiteni minuk mak: kaon xa mahulong te *tesaen* xil na atou ak, ieok bovong ni e ninaketeht ti mun nasa mini ven. Ve rin ak, eheien xa di pisen ni minou mahulong pupu. E ngan xa kaon te tesaen nan hokorong tang, neta sav xa ieok bovong ni kaon nan e di naketeht bos rilomun mini, eheien xa di pisen ni minou hokorong tang. E ngan ak nggoni xouk Saemon.”

⁴⁸Di, Iesu biles e biteni mi atou ak bit, “Xosali, Hi tanem ti mun tesaen nam xil, e di miketeht bos rilomun mi xouk.”^t

⁴⁹Melele xa moletin sav xil xa di langganien vituei lalong sepinien nan, labiteni mi xil mun tang labit, “?Xi minemi be visi xa mikila vahiteni xa Hi di miketeht bos rilomun e moletin xil?”

⁵⁰E Iesu biteni mi atou ak bit, “Ve neketen nam e nou, Hi di miteh meulien e xouk. Uha itel xat tomat na Hi.”^u

Atou xil xa langgusil Iesu

8 Dutou ni melele nen ak, Iesu mikapis e rut taon e metimal xil. E melele xa di mikakao ba, di misetu usil longgeongen hos xa midep iaxa Hi mei ihe suv toto te meulien na moletin nan xil. E melele nen ak, moletin lu e le tei (12) nan di langgusili.^v ²E rut atou xil mun di langgusili: ngan xil xa Iesu tehol rerat *ninin tesa* latehe reling xil; e ngan xil mun xa teleh rerat mesien tehe reling xil. Tei e xil tehe

Meri te hal Makdela xa Iesu tehol rerat ninin tesa lu e he sav (7) latehe relingi.^w ³Rut atou xil mun lateleh mani nae e latutou ni Iesu e moletin nan xil tetela: tei e xil tehe Susana, e teimun tehe Soana xa tehe atou na Xusa, vat te polien xa di milaxat holesok xil na suv toto *Herod*.

Iesu dei vole tei usil utiei xil xa di lameul e hisit tan tesav xil

Mat 13:1-23; Mak 4:1-20

⁴Vatei, moletin xil holu langgo metimal xil e lamei vituei tenggan lalong ti sepinien na Iesu. E melele xa Iesu pus xil, dei vole ak mi xil bit, ⁵“Vatei, moletin tei ba tenggan vaso utiei e naho nan. E melele xa miso lelen utiei xil be tan, rut utiei xil lamot e suse xa tan nen nggeih, e moletin xil lapel xati e tuman xil mei lada rerati. ⁶Rut utiei xil lamot e tan xa hat xil holu ladi en. Utiei xil ak lateh manon, e tavehi ti, lameles venggan xa tan mahin e oei tapin ti en. ⁷Rut utiei xil lamot e tan xa munae tesa xil di lameul en. E melele xa lateh, munae tesa xil ak mun lameul e lameul xol vin xil. ⁸E rut utiei xil lamot e tan xa bos. Ma lameul bos e ladaxao bos tenggan xil kekes laso huite holu mili hanutap lim (100).”^x

Melele xa Iesu dei vole ak bus, biteni mi moletin xil bit, “!Xosxa vurangemim di, muteong kil naha xa di nabiteni!”

⁹Dutou ni melele nen ak, *moletin xil na Iesu* lasisi tenggan vahit kil koute te vole ak mi xil. ¹⁰Ma xi bit rilomun ni mi xil bit, “Koute te sepinien xuxus usil lelatxatien na Hi, inou ti nihit kila mi xamim kestang. E mi mosav xil, di nabit usili nggo vole xil kestang tenggan, ‘*Xil liteong vuma ... e linalong kil ti neta*.

^q7:44 Sen 18:4

^r7:45 Rom 16:16; 1Kor 16:20; 2Kor 13:12; 1Tes 5:26; 1Pit 5:14

^s7:46 Sam 23:5 ^t7:48 Luk 5:20-21 ^u7:50 Luk 8:48; 17:19; 18:42

^v8:1 Luk 4:43 ^w8:2 Mat 27:55-56; Mak 15:40-41; Luk 23:49

^x8:8 Mat 11:15; 13:43; Mak 4:23; Luk 14:35

Liketeh vuma ... e linapus kil ti neta." (Aes 6:9)

¹¹Ma Iesu biteni mi xil bit, "Koute te vole ak mak: utiei xil be sepinien na Hi.^y
¹²Utiei xil xa lamot e suse xa tan nen nggeih, nggoni moletin xil xa lataeong ni sepinien na Hi, e dutou ni, **Temat** bemei e mileh rerat utut sepinien xil ak ra nenemien nae. Misak ni, lasakras laling nenesien nae en e lavur meulien sal vaxo en.^z
¹³Utiei xil xa lamot e tan xa hat xil holu ladi en nggoni moletin xil xa lalong utut sepinien na Hi, e, vatei takes, langguri del sien. E vengan xa amulit neketen nae tameul kuhi ti mu, laling neketen nae e sepinien ak vuteili tang. E melele xa sakkpisien xil lamei, xil lamot e neketen nae.
¹⁴E utiei xil xa lamot e tan xa munae tesa xil di lameul en nggoni moletin xil xa lalong utut sepinien na Hi e minexo pupu ve holesok xil te ut etan e eheien nan di e mani holu mak mu. Ma holesok xil ak di lameul xol vin sepinien na Hi xa langguri, ma tava ni ti huite e meulien nae.
¹⁵E utiei xil xa lamot e tan xa bos nggoni moletin xil xa lalong utut sepinien na Hi e laling neketen nae nggeih en del nenemien tei xa bos e momal. Sakkpisien xil te xeih lamei, e sepinien ak nggulehi di meul ba vuma ... miso huite e meulien nae."

Iesu dei vole usil laet te reitinen na Hi xa di pili e meulien na moletin nan xil

Mak 4:21-25

¹⁶Iesu dei vole teimun bit, "Moletin tovuol xa vasahan laet nan, ti, vaha vakutaxole ni pesin mu vaha valingi vate pe vet man. E-e. Vehakut, melele xa moletin xil lasahan laet bus, lasoxole ni de nesao tangan ngan xil xa lamei e vangit nim lakila lapus kil miehen teni.^a

¹⁷"Reitinen xa di minggu, Hi ipisen ni mei e valkesao. E sepinien xa latehit xuxus ni tetiamu, lihithiteni pe met moletin xil tangan likila.^b
¹⁸Misak ni, muxouxou kuhi tangan mulong kuh sepinien navan xil. Vengan moletin xa di nggur xat koute teni, Hi isa metisouen ihe holu mu mini. E moletin xa tahir kuh ti koute teni, vuteili xa xi minemi bit mikila ngamu, Hi ihur rat rani."^c

Iesu biteni xa ngan xil xa lalong xat sepinien na Hi labe ngenen xil

Mat 12:46-50; Mak 3:31-35

¹⁹E melele nen ak, nine Iesu del tunali xil latomei tangan latopusi. E latsakras latohe visali vengan xa vanut moletin xil ak labe holu e langgonaxon pupu.
²⁰Ma moletin tei ba bit mesen ni mi Iesu bit, "Ninom del tumali xatel mei latosoh latdi nga hale, e latbit latpusuk."

²¹E Iesu biteni mi xil bit, "Nana e tua navan xil labe moletin xil xa lalong sepinien na Hi e di lalong xati."

Iesu misemae ni votiang e tehe xil tangan lihe tan, e lalong xat raen

Mat 8:23-27; Mak 4:35-41

²²Vatei, Iesu biteni mi moletin nan xil bit, "Bos xa rihur xoteh Oei Kaleli rihe rin." Ma labut labe bot tei e laba.
²³E melele xa laloh e bot ak laba, Iesu ba pat.

Tavehi ti, votiang tei mistal e misak ni tehe xil milati hao, e oei bemei e vangit bot. Ngan xil xa ladi en lakameti nggeih e lapusi xa sangas tuturil nae imerir.
²⁴Misak ni labe visal Iesu, lakes rati ra paten nan, e lake xati labit, "¡Suv, suv! ¡Sangas ramerir xiak!"

Ma Iesu mitamea, e misemae ni votiang e tehe xil tangan lihe tan. Vatei takes, votiang e tehe xil lalong xat sepinien nan e labe tan, e an mei bos

^y8:11 1Pit 1:23 ^z8:12 1Kor 1:21 ^a8:16 Mat 5:15; Luk 11:33

^b8:17 Mat 10:26; Luk 12:2 ^c8:18 Mat 25:29; Luk 19:26

mun.²⁵ Di, Iesu misis moletin nan xil bit, “?Midep, neketen namim e nou tovuol tamu?”

Melele xa lapus naha xa Iesu pol ni, lamesep pupu e ulixil mikan. Lasis xil mun tang labit, “?Moletin ak be hisit moletin eah? !Tave ti neta xa votiang e tehe xil, melele xa misemae ni xil, lalong xat raen!”

**Iesu nggol rerat ninin
tesa xil ra moletin tei**

Mat 8:28-34; Mak 5:1-20

²⁶ Melele xa Iesu del moletin nan xil lade bot tei, langgur xoteh Oei Kaleli e labe ut sangas ni taon te hal Nggerasa.

²⁷ Melele xa Iesu but reling bot be ut, bisu mi moletin tei te hal Nggerasa xa ninin tesa xil ladi en. Be nousav xa moletin ak ti tenakavue ti e ti tenapat ti e nim. Dit pat e vangihat xil te tehinen. ²⁸⁻²⁹ Vehakut, **ninin tesa** ak misak ni moletin ak mitalang pupu. Moletin sav xil latetal xat pisi tangan nakakao ti mun. Latevar xat hen xalu e len xalu ni sen te xeih xil. E neta sav xa mak, tetal xoteh sen xil ak. Di, ninin tesa di tetivin moletin ak ba teta tasen tang e uruvuol. Melele xa pus Iesu, muis nggeih be nesao, bemei visali e mitingeiril mini. Di, Iesu misemae ni ninin tesa tangan vahe reling moletin ak. Misak ni, ninin tesa xa di en mike be nesao mini bit, “!Iesu, Nat Hi te ut nesao! ?!Upol ni naha minou!? !Nadakesuk tangan onasa pangasien ti li minou!”^d

³⁰ Iesu misisi bit, “?Hisom visi?”

E moletin ak bit rilomun ni bit, “!Vanute!” Biteni mak vengan xa vanut ninin tesa xil iaxa ladi xati. ³¹ Ninin tesa xil ak ladakes Iesu tangan nasil rerat xil ti linave vangavul xa hoxalite teni tovuol.^{‡‡}

³² Sangas ni rute ak, vueili xil holu di langganien e seri hu. Misak ni, ninin tesa xil ladakes Iesu tangan vamaen ni xil lava xat vueili xil ak, ma Iesu maen xil laba. ³³ Ninin tesa xil ak labe reling moletin ak laba xat vueili xil sung. E xil lasak ni vueili xil laloh laba lakiri langgo meteh labe oei, e xil vus lamerir lalel.

³⁴ Melele xa moletin xil xa di lalaxat vueili xil ak lapus naha xa mistal, late-manon laba, e labit usili e taon e rute sav xil mun xa ladi sangas. ³⁵ Di, moletin xil xa lalongeong ni laba labit lapus ti naha xa testal xiak. Ma laba labe visal Iesu, e lapus moletin xa ninin tesa xil latehe relingi. Nenemien nan mei bos rilomun, mising ni eising e di dotan visal Iesu. Melele xa lapusi, latemanin e ulixil mikan ni Iesu. ³⁶ E ngan xil xa latepus naha xa testal latumul mi moletin xil usil suse xa Iesu tesak ni moletin ak mei bos rilomun. ³⁷ Melele xa lalonge mak, moletin xil te rute ak xa ladi sangas ni metimal te hal Nggerasa lasis Iesu tangan ihe reling xil vengan xa ulixil mikan pupu.^{¶¶} Mak toma, Iesu ba mun be bot del moletin nan xil tangan lihe reling xil.

³⁸ E moletin xa ninin tesa xil lateti xati midakes Iesu tangan vamaen ni vahusil xil. E Iesu misila ba del sepinien ak bit, ³⁹ “Utilomun uhe tim sam, ti uhithiteni mi moletin sav xil naha xa Hi tepol

^{‡‡}**8:31** Vangavul xa hoxalite teni tovuol be von pangasien na ninin tesa xil del Temat e melele xa ladatil Melengien te Lepisien na Hi.

^{¶¶}**8:37** Moletin holu te hal Nggerasa latave Siu ti, e vengan xa lakila xa Siu xil iexil ti tavei vueili xil vengan xa rae nae bit linaxa ti, ulixil mikan xa Iesu isak ni vueili sae xil vus lilel. Ma lapisen ni xa di lanem usil mani nae mili pispisien e merekel xil na Iesu.

^d**8:28-29** Mat 8:29; Mak 1:23-24; Mat 5:7; Luk 4:34

ni e meulien nam.” Ma moletin ak ba mikapis e rute xil vus e taon ak e misep usil neta xa bos xa Iesu tepol ni mini.

**Iesu dal rat atou tei ra mesien
nan del atuli tei ra maten**

Mat 9:18-26; Mak 5:21-43

⁴⁰ Melele xa Iesu duxoh ri Oei Kaleli de moletin nan xil e bot tei, lamei ut sangas ni taon te hal Kapaniam. E rute ak, vanut moletin tei langgur pilei vengas xa di latatil meien nan. ⁴¹ Di, moletin tei bemei e mitingeiril momal pe valnaon, hisen Saeros. Xi be vat tei te *nim te pispisienna* Siu xil. Xi dakes Iesu tangan laloha mu e tim san, ⁴² vengas xa atuli xa be siskes nan vari xa huras nan be lu e le tei (12) tang, sangas vamat xiak.^e

E melele xa Iesu di nggusil Saeros luba, moletin xil holu di langgonaxon pupu e rin xil vus. ⁴³ E vanut moletin xil ak, atou tei da xa mesei huras lu e le tei (12) ngamu ni mesien na atou xil xa misakras vavus. Atou ak teha tepus tokta xil holu e tesa sen mani nan mi xil, e latesakras latapol ni valonge vahos mun. ⁴⁴ Misak ni, atou ak bemei pe tou Iesu e misa hen ba duxol seri eising nan. Vatei takes, mesien nan bus vari. ⁴⁵ E Iesu milong kila, ma misis moletin xil bit, “?Visi iaxa duxol nou?”

Moletin xil vus labiteni xa latatuxoli ti. E Pita biteni mini bit, “Suv, moletin xil labe holu pupu, e di langgonaxon e laduxol xouk e rim xil vus.”

⁴⁶ E Iesu bit rilomun ni mini bit, “E-e, moletin tei duxol nou, vengas xa rut xeihen be reling nou.” ⁴⁷ Melele xa atou ak pusi xa misakras mun vaxus, bemei visal Iesu. Len di mulul, e mitingeiril pe valnaon. Di, pe met moletin xil, atou ak bit rati veneh ma duxol eising na Iesu, e midep iaxa mesien nan be relingi

e melele taxa duxoli. ⁴⁸ Di, Iesu biteni mi atou ak bit, “Hinoxoli, neketen nam misak ni mei olonge bos ra mesien nam. Ma uha itel tomat na Hi e onanexo ti mun.”^f

⁴⁹ Melele xa Iesu di tamu misepin, moletin tei nggo nim ma Saeros e mei biteni mi Saeros bit, “Atuli nam mikesae ngamu. Onasis ti mun titsa xai nakon namei.”

⁵⁰ Melele taxa Iesu milong sepinien ak, biteni mi Saeros bit, “!Ulum nakan ti! Nenesien nam ixehi xa atuli nam imeul mun e mei istal ihe reitin.”

⁵¹⁻⁵³ E melele xa Iesu duxoh tim sa Saeros, lapusi xa moletin xil di latangal pupu. Di lamuis e di ladang ve atuli ak. E Iesu biteni mi xil bit, “!Xamim munatang ti! Atuli ak tamat ti, xi di pat tang.” E xil di langue xati vengas lakila xa atuli ak mat tuei. Melele xa be vangit nim e rute xa atuli da en, Iesu maen Pita, Sion, Temis, tame atuli del ninen kestang latnggusili.

⁵⁴ Di, Iesu dal xat he atuli e misepin mini bit, “!Atuli, mea!”^g ⁵⁵ Vatei takes, meulien na atuli dilomun bemei en e mea misoh. Di, Iesu biteni mi tamen e ninen tangan lalisa ti anien mi atuli nalu. ⁵⁶ Tamen e ninen lumeseppupu e Iesu misep xol xalu tangan lalnavithiteni ti mi mosav xil usil naha xa testal.^h

**Iesu misil lelen moletin lu e
le tei (12) nan tangan ha
lihithiten longegen hos**

Mat 10:5-15; Mak 6:7-13

9 Iesu mikes viton moletin nan xil xa labe lu e le tei (12). Di, misa xeihen mi xil tangan likila ti lihol rerat ninin tesa e lileh rerat mesien savsav xil ra moletin xil. ² Di, Iesu misil lelen xil laba tangan ha lisetu usil relaxatien na

^e8:42 Luk 7:12 ^f8:48 Luk 7:50; 17:19; 18:42 ^g8:54 Luk 7:14

^h8:56 Mak 7:36; Luk 5:14

Hi e meulien na moletin xil e suse xa mei ihe suv toto nae ixo en, e ha lileh rerat mesien ra moletin xil.¹³ E biteni mi xil bit, “E kakaoen namim, munaleh ti neta natel xat xamim. Reitin, munaleh ti eitingil, ateli, mu mani. Munahur ti eising mu anien. ⁴ Melele xa muhe rute tei, xosxa moletin tei nggur pilei xamim e nim man, ma muti kat en ituxoh melele xa muhe reling rute ak. ⁵ E xosxa moletin xil linahur pilei xamim ti e metimal tei, ma melele xa muheling rute ak, muhas rerat meas te rute ak ra lemim pe metexil. Ngan ak ihe selxatien mi xil xa Hi pus sexien tesa nae e isa rilomun ni mi xil.”

⁶ Melele xa Iesu misepin mi xil bus, moletin nan xil lamea laba labe metimal xil vus e di lasetu usil longeongen hos na Hi. E xil laleh rerat mesien ra moletin xil e rute xil vus xa laba en.

**Suv toto Herod ien
bei wakil ti xa Iesu be visi**

Mat 14:1-12; Mak 6:14-29

⁷ E melengien nen ak, **Herod** Antipas be suv toto te provins te hal Kaleli. Melele xa milong usil holesok xil xa Iesu di pol ni, minem holu usili vengan xa rut moletin ngan xil di latumul holu usili. Rute xil labit Iesu be Sion Baptis xa temea rilomun ra maten.^j ⁸ Rute sav xil di labiteni xa xi be **provet Ilaetsa** xa mistal rilomun xiak, e rut moletin xil mun di labiteni xa provet tei teti-
amu temea rilomun ra maten. ⁹ E Herod biteni bit, “Inou vari tang iaxa natese-
mae ni tengen lita xoteh vat Sion temese.
?E visi vari iaxa di nalongeong usili
xiak?” Ve rin ak, misak tengen vapus ti
Iesu.^k

**Iesu pol ni merekel tengen
vasa anien mi moletin xil
xa lali taosen lim (5000)**

Mat 14:13-21; Mak 6:30-44; Sion 6:1-15

¹⁰ Melele xa **moletin xil na Iesu** lapol bus, ladi lomun e lasep mesen ni mini holesok xil xa ba latepol ni. Ma Iesu mileh kes ni xil ba labe taon tei xa lakesi ni ‘Betsaeta.’ ¹¹ E melele xa vanut moletin ngan xil lalongeong ni xa Iesu ba, lamea e langgusili. E melele xa Iesu pus xil, nggur pilei xil e di misetu mi xil usil lelaxatien na Hi e meulien na moletin xil e suse xa mei ihe suv toto nae ixo en. E ngan xil xa lamesei, Iesu mileh rerat mesien ra xil.

¹² Iesu pol del moletin xil ba vuma ... eai ba minu. Ma moletin nan xil xa labe lu e le tei (12) lamei visali e labiteni mini labit, “Rute ak be toun ut e da be vongien tuei xiak. Bos xa usil rerat vanut moletin xil ak liha lihe metimal xil mu rute sav xil tengen ha likamet anien ae e ut te paten mae.”

¹³ E Iesu biteni mi moletin nan xil bit, “Xamim tang musa anien mi moletin xil tengen lia ni.”

E labit rilomun ni mini labit, “!Ei! ?Mupol ni itep? Pusi xiak, xamem maleh xat beret be lim (5) e meseo be lu (2) tang. ?Midep? ?Iem bei mava maxal ti anien vapin mi vanut moletin xa be mahulong xiak?” ¹⁴ (Tata xil vus xa ladi e melele nen ak sangas labe taosen lim (5000), e atou e horamue xil latavuli xil ti.)

Ma Iesu biteni mi **moletin nan xil** bit, “Ha museti moletin xil ha litotan e vanute xil xa moletin xil sangas lihe hanutap lu e he xalu mun (50) liti e vanute tei.”

ⁱ9:2 Luk 10:5-7; 10:10-11; Pol 13:51 ^j9:7 Mat 16:14; Mak 8:28; Luk 9:19

^k9:9 Luk 23:8

¹⁵Ma moletin nan xil lapol usil naha xa xi biteni, misak ni moletin xil vus ladotan. ¹⁶Di, Iesu mileh beret lim del meseo lu xiak, e miketeh be nesao e misa memesien mi Hi ven. Di, bul papas beret e meseo xil e misa ni mi moletin nan xil tangan ha liseti mi vanut moletin xil. ¹⁷Moletin xil vus langganien kuhi e vange polu. E melele xa moletin nan xil laleh viton rut anien xil xa moletin xil latea lingi, lase ni be valeat lu e le tei (12) xa lapolu ni.¹

**Pita bit rati xa Iesu
be Mesaea xa Hi tehiti xati**

Mat 16:13-28; Mak 8:27-9:1

¹⁸Vatei, Iesu di misis tasen tang e moletin nan xil ladit sangas. Di, Iesu biles e misis xil bit, “?Vanut moletin xil di labiteni xa inou nabe visi?”

¹⁹E labit rilomun ni mini labit, “Rut moletin xil labit obe Sion Baptis. E rute ngan xil labit obe provet Ilaetsa. E rute sav xil mun labit xouk obe provet teti-amu xa temeaa rilomun ra maten.”^m

²⁰E Iesu misis pilei xil bit, “?E xamim, ma midep? ?Mubit inou nabe visi vari?”ⁿ

E Pita mitamea e bit rati bit, “Xouk, obe Mesaea xa Hi tehiti xati tangan imei.”

²¹Di, Iesu misep xol xil tangan linavit sepinien ak ti mi moletin sav xil. ²²E biteni mi xil bit, “Hi teling xati ngamu tangan inou, Nat Moletin, ti nilong pangas inou ihe holu. E elda xil na Siu xil, **vat xil na pris xil**, e **titsa** xil te rae na Mosis, xil ngasen ti lisin nou e lihas vin nou. E melele xa melengien tol mei itavi, nimeaa rilomun ra maten.”^o

²³Di, Iesu biteni mi xil bit, “Xosxa moletin tova ien bei tangan ihusil nou, ma istokovein holesok xil te meulien nan. Ti,

e melengien xil vus, ipo eivave te maten nan e ihusil xat nou.^p ²⁴Vengan xa moletin xa misak pisi tangan ikenin meulien nan ve xi tang, ma meulien nan ikesae ra ni. E moletin xa di maen meulien nan ikesae vengan xa di nggusil xat inou, ma, e ut nesao, xi ikamet meulien sal.^q ²⁵?Naha ihos xosxa moletin tei ileh holesok xil vus te ut etan ak, e istokovein meulien sal nan tangan ileh holesok xil ak? !Navos ti vari!²⁶ Xosxa moletin tei be unoun tangan vahit rati xa di nggusil nou e pispisien navan xil, ma inou mun, Nat Moletin, nihe unoun ni e melele xa itilomun itel **maxaxa** eo xil e minehinen te xeihen navan, e itel xeihen xa Tata navan isa ni minou.^r ²⁷Reitin li nabiteni mi xamim xa rut xamim xa di lasoh del nou xosali, ti lipus neta tei mei istal e melele xa lameul tamu ladi xa ipisen ni xa xeihen te lelaxatien na Hi bemei ngamu.”

**Minehinen te xeihen
na Hi bemei e Iesu**

Mat 17:1-13; Mak 9:2-13

²⁸Melele xa melengien tol e he sav (8) mei mitavi xa Iesu tehiti kil holesok xil ak mi moletin nan xil, xi be nesao e vathu tei tangan vasis, e nggur Pita, Sion e Temis latnggusili. ²⁹⁻³²E melele nen ak, Pita, Sion e Temis, met xeihen bas xatel e ba lapat. E melele xa Iesu di misis, valnaon biles, e eising nan mei mieh xa mieh pupu nggoni laet xa milelulv nggeih. E vatakes, moletin lu mun lustal e ba lusepin dela, tei xalu be **Mosis**, e teimun be provet Ilaetsa. Xalu mun luminehin pupu. Lubit kila mi Iesu xa itep ipol sen polien nan xil e hal **Serusalem**, ti, imat.^s

¹9:17 2King 4:44 ^m9:19 Luk 9:7-8 ⁿ9:20 Sion 6:68-69

^o9:22 Mat 16:21; 20:18-19; Mak 8:31; 10:33-34 ^p9:23 Mat 10:38; Luk 14:27

^q9:24 Mat 10:39; Luk 17:33; Sion 12:25

^r9:26 Mat 10:33; Luk 12:9; 2Tim 2:12 ^s9:29-32 Sion 1:14; 2Pit 1:16

E melele xa holesok xil ak di mistal, Pita, Sion e Temis, lattamea latketeh ba, e lattemanin pupu. Latpusi xa tenbe Iesu di minehin e di misoh del moletin lu mun. ³³E latopus kila xa be Mosis xal Ilaetsa iaxa lusepin del Iesu, e sangas lalohe relingi. Ma Pita mea e biteni mi Iesu bit, “!Suv, bos mak mu xa xamem madi tak! Matikili ni horao ihe tol: tei ihe mam, tei ihe ma Mosis, e tei mun ihe ma Ilaetsa.” Pita takil ti naha xa di biteni.

³⁴E melele xa Pita di tamu misepin, momah tei xa mattel miloh bemei da xol xil, e uliatel mikan pupu. ³⁵Di, latolong rae tei nggo momah xa bit, “Ngan ak be Natuxoli xati xa natehosei xa eheien navan di en. !Muteong xat raen!”^t

³⁶Melele xa rae ak misepin bus, latta-pus ti mun rumali, Iesu kestang di misoh del xatel. E neta xa xatel latopusi, latnggur xati be natel tang. Lattavit pas ti mi moletin sav xil e melele nen xil ak.

Iesu minggol rat ninin tesa ra pol ni horamue tei

Mat 17:14-20; Mak 9:14-29

³⁷E makoe nen, Iesu xatel Pita, Sion e Temis latdilomun latnggo vat hu latomei e tan. E melele xa latomei e tan, lapus vanut moletin xil holu di ladatil Iesu. ³⁸Di, moletin tei xa de hilaep te vanut moletin xil ak miki ba ni Iesu bit, “!Titsa! Ieok bei xouk li himetu tangan mei upus ti mu natuxoli xa be siskes navan. ³⁹Vengan xa *ninin tesa* tei da en. E melele xa bemei en, misak ni di miki nggeih, malili tova tang, e pol ni rurungon mun di misol. Vehakut, ninin tesa ak di purun ni e nggeih pupu tangan vahe relingi. ⁴⁰Nadakes moletin nam xil tangan lavol rati vahe relingi, e xil lasakras.”

⁴¹Melele xa Iesu milonge mak, biteni mi moletin nan xil bit, “!Iva! !Xamim moletin xil te xosali, mukavui e neketen namim tovuol vari! ?Niti visal xamim ituxoh vilieh? Veok buol ni xamim xa neketen namim tovuol.”

Di, misemae ni tame horamue bit, “Hur horamue nam vamei inggak.” ⁴²E melele xa horamue ak di mikakao bemei visal Iesu, *ninin tesa* xa da en bas tan ni e misak ni mikilkile e tan. Di, Iesu mike xat ninin tesa, ma be reling horamue ak. Di, horamue ak milonge bos mun e Iesu mideli ba misa rilomun ni mi tamen. ⁴³Ngan xil xa ladi sangas lamesep tova tang ni xeihen na Hi xa lapusi.

Iesu bit lelen usil maten nan vatei mun

Mat 17:22-23; Mak 9:30-32

Melele xa moletin xil di labesi xil ve naha xa Iesu tepol ni, xi biteni mi moletin nan xil bit, ⁴⁴“Xamim muteong kuhi ni sepinien navan. Nave nousav ti, moletin tei isa rat nou, Nat Moletin, nihe he moletin xil te ut etan.”^u ⁴⁵E moletin nan xil latakil ti koute te sepinien nan vengan xa minggus tamu ra xil. E ulixil mikan tangan lasisi ve kout sepinien nan.^v

Iesu pispisi xa visi iaxa be eilep mak mu pe met Hi

Mat 18:1-5; Mak 9:33-40

⁴⁶Dutou ni melele nen ak, moletin xil na Iesu di langor mi xil mun tang usil visi e xil iaxa be eilep mak mu e xil.^w ⁴⁷E Iesu mikil nenemien nae. Misak ni, mideli tutut horamue tei bemei, e misak ni mei misoh e rin. ⁴⁸Di, biteni mi xil bit, “Moletin xa nggur pilei horamue tei xa mak e hisok, nggoni ngan xa di nggur pilei inou. E ngan xa di nggur pilei

^t9:35 Sam 2:7; Aes 42:1; Mat 3:17; 12:18; Mak 1:11; Luk 3:32; 2Pit 1:17

^u9:44 Luk 18:32 ^v9:45 Mak 9:32; Luk 18:34 ^w9:46 Luk 22:24

inou, nggoni ngan xa di nggur pilei ngan xa tesil nou namei. Vengan xa moletin xa be neta sav tang pe metemim, xi iaxa be eilep mak mu mili xamim vus pe met Hi.”^x

⁴⁹ E Sion biteni mi Iesu bit, “Suv, xamem matepus moletin tei xa di nggol rerat ninin tesa xil e hisom. Misak ni, xamem masep xole tangan napol ni ti mun vengana xa xi tave tei e xir ti.”

⁵⁰ E Iesu biteni mi moletin nan xil bit, “E-e. Munasep xole ti, vengana xa moletin xa di tavae ti vatel xamim, xi di mos e rin namim.”^y

Iesu misel xat moletin xil tangan linem kuhi mu xosxa labit lihusili

Mat 18:19-22

⁵¹ Melele xa melengien bemei sngas tangan Iesu ihe ut nesao, xi pol ni nenemien nan tangan vahe Serusalem.^z

⁵² Ma misil rut moletin nan xil tangan ladiamu ni laba. Xil labe metimal tei na mol-Sameria xil tangan lasak mesen holesok xil ven. ⁵³ E moletin xil te metimal ak labit Iesu nava ti visal xil vengana lakila xa Iesu di nggusil suse nan tangan vahe Serusalem.^{§§ a54} Melele xa Temis xal Sion lulong usili, iexalu mikat e luis Iesu lubit, “?Suv, midep? ?Iem bei tangan malokei ve upang vaxo ut nesao mei vaa len xil?”^b

⁵⁵ E Iesu biles e bul xat xalu. ⁵⁶ Di, Iesu del moletin nan xil laka sal labe metimal sav tei.

⁵⁷ E melele xa di laba, moletin tei bemei visal Iesu e biteni mini bit, “Ut xave uha en, inou nihusil xatuk.”

⁵⁸ E Iesu bit rilomun ni mini bit, “Asu xil* vangavul te paten mae di, e tuman xil mun nunum mae di. E inou, Nat Moletin, tim savan xati tangan ningel kuhi en tovuol.”

⁵⁹ Iesu biteni mi moletin sav tei bit, “!Husil xat inou!”

E moletin ak biteni mini bit, “Bos tang, nihusiluk. E Suv, itiamu, umaen nou nitilomun niha, e nilaxat kuh tata navan ituxoh melele xa imat e nitihin ni.”

⁶⁰ E Iesu bit rilomun ni mini bit, “Ustokovein ngan xil xa lamat e neketen nae tangan lithihin ngan xil xa lamat. E xoux iaxa umei uhithiten longeongen hos usil suse xa Hi mei ihe suv toto e meulien na moletin xil ixo en.”

⁶¹ Moletin teimun bemei e biteni mini bit, “Suv, inou nihusiluk. E itiamu, umaen nou nitilomun niha e nisep ling kor ni vatimol navan xil.”^c

⁶² E Iesu biteni mini bit, “Moletin xa nggur kokot ni polien na Hi, e dutou sung, di minem holu usil naha xa testokovein ni, ma xi tapin ti tangan vahur polien ak.”

Iesu misil vanut moletin xil labe lulu tangan ha lapol

10 Dutou ni melele nen ak, Iesu bosei moletin sav xil xa latehe

§§9:53 Melele xa Siu xil tetiamu latexo provins te hal Kaleli tangan lave taon te hal Serusalem e provins te hal Sudea, xil latekakao latehur xoteh tan na mol-Sameria xil melengien tol (3). E mol-Isrel xil lateketeh tesa mi mol-Sameria xil vengana xa mol-Sameria xil latnave hortan xil ti te kantri te hal Isrel. E, neta sav xa mak, xil latehur tan xa mahulong. Teimun, mol-Sameria xil latehit xil mun di lamot mi Hi na mol-Isrel xil. E sexien te moten nae misav ni xil. Ve rin ak, mol-Sameria xil latnamaal ti e melele xa latekila xa Iesu tehe Serusalem tangan vamot mi Hi.

***9:58** Sepinien xati teni bit, “*fokis xil*” xa langgoni kuli reran xil. E nggoni asu xil, lapol ni nunu mae e vangavul xil tang.

⁹9:48 Mat 10:40; Luk 10:16; Sion 13:20 **⁹9:50** Luk 11:23

⁹9:51 Mak 10:32 **⁹9:53** Sion 4:9 **⁹9:54** 2King 1:10,12 **⁹9:61** 1King 19:20

hanutap tol e he xalu mun (70).[†] Di, misil xil labe lu lu tangan lave metimal xil vus. Iesu biteni xa xil litiamu ni, e navehi ti, xi mun ha imos e xil.^d ²Iesu biteni mi xil bit, “Anien holu xa temetu di tuei e naho, e moletin xil te polien labe vuteili tang tangan ha lalehi vamei. Ma musis Suv te naho tangan isil moletin xil te polien lihe holu mu mei lileh anien xa di e naho nan.^e ³Taxeak muha. E muketeh kuhi vengana xa di nasil xamim nggoni ngan xa mube sulut sipsip xil xa di labe rute xa kuli reran xil labe holu en. ⁴E melele xa muba, munaleh ti holesok xil. Munaleh ti *mani*, mu ateli, mu sandel ti mun natel xat xamim. E munahas ti melengien namim natel moletin xil e suse. ⁵E melele xa mukamet moletin tei xa besi xi tangan vahur pilei xamim, ma mutit nim man. E melele xa muba rohon e nim man, muhiteni muhit, ‘Tomat na Hi iti mi xamim vus xa mudi e nim ak.’ ⁶E xosxa ngan xil xa ladi e nim ak labe moletin te tomat e di langgur pilei xamim, ma tomat na Hi xa di e xamim iti mi xil. E xosxa xil lasin xamim, ma tomat na Hi istokovein xil e itit mi xamim melele xa muhe reling xil. ⁷Muti kat tang e nim ma moletin xa nggur pilei xamim, e anien mu oei eah xa lasa ni mi xamim, muhuri tang. Vengan momal tangan moletin te polien xil lihur huit polien nae. Munalil ti e nim xil.⁸ ⁸E melele xa mube taon tei e moletin xil te rute ak langgur pilei xamim, anien eah xa lasa ni mi xamim, mua ni tang.^h ⁹Muha mutal rat mesien ra ngan

xil xa lamesei, e muhithiteni mi moletin xil te rute ak muhit, ‘Hi dat sangas visal xamim e bit vahe suv toto e meulien namim.’

¹⁰“E xosxa mube taon tei xa moletin xil teni latahur pilei xamim ti, ma muha musoh e valkesao e muhithiteni muhit,ⁱ ¹¹‘Vengan xa mutahur pilei xamel ti, di mabas rerat meas te vonemim ra lemel pe metemim. Ngan ak ihe selxatien mi xamim xa Hi pus sexien tesa namim e isa xolesi mi xamim. Mutakil ti vari xa xosali ak, Hi teme i sangas ni xamim e tehit mei ihe suv toto e meulien namim, e xamim mutesin ni.’^j ¹²Reitin li nabiteni mi xamim, e Melengien te Lepisien, pangasien xa Hi isa ni mi moletin xil xa ladi e rute ak ixeh ili pangasien xa isa ni mi moletin xil xa lateti e taon te hal *Sodom* tetiamu.”^k

¹³Xi biteni bit, “!Aue li! !Isa pupu mi xamim, Siu xil te hal Korasin!^l ¹⁴E Melengien te Lepisien, esaeen xa Hi ipisen ni mi moletin xil te hal Taer e Saedon ili ngan xa ipisen ni mi xamim. ¹⁵?E xamim, Siu xil te hal Kapaniam, munemi xa Hi ipet rat xamim muhe ut nesao? !E-e! !Xi iso xamim muhe etan e von maten vari!”^m

¹⁶Di, Iesu misil moletin xil del sepinien ak bit, “Ngan xil xa ti liteong xat sepinien namim, ixoni ngan xa di lateong xat sepinien navan. E ngan xil xa lisin xamim, ixoni ngan xa di lasin inou. E ngan xil xa lisin inou, ixoni ngan xa di lasin ngan xa tesil inou namei.” Di, Iesu misil xil labe lulu laba.ⁿ

[†]10:1 Rut vanuvei xil labit, “hanutap tol e lu e le tei mun (72).”

^d10:1 Mak 6:7 ^e10:2 Mat 9:37-38; Sion 4:35

^f10:4 Mat 10:7-14; Luk 9:3; 2King 4:29

^g10:7 Luk 9:4; 1Tim 5:18; 1Kor 9:6-14 ^h10:8 1Kor 10:27 ⁱ10:10 Luk 9:5

^j10:11 Pol 13:51; 18:6 ^k10:12 Mat 10:15; 11:24; Sen 19:24-25

^l10:13 Mat 11:21-24; Aes 23; Soel 3:4-8; Amos 1:9-10; Sak 9:2-4

^m10:15 Aes 14:13,15 ⁿ10:16 Mat 10:40; Sion 5:23; 15:23

Ngan xil xa Iesu tesil xil ba latepol ladilomun del sien

Mat 11:25-27; 13:16-17

¹⁷ Melele xa moletin hanutap tol e he xalu mun (70) xa Iesu tesil xil tangan ha lapol ladilomun, xil labesi xil holu. Labiteni mi Iesu labit, “!Suv, xamem matetal rerat mesien ra moletin xil e matepusi mun xa ninin tesa xil latelong xat xamem melele xa matesemae ni xil e hisom tangan lava!”

¹⁸ E Iesu bit rilomun ni mi xil bit, “Inou natepus **Temat** vari temot ra ut nesao e temei e ut etan texoni an xa milan-gas.^o ¹⁹!Muteong kuhi! Inou natesa xei-hen mi xamim tangan mupel xat tetal xil xa misa, skopion, e holesok sav xil mun xa ladi e xei-hen na Temat. Reitin, mupel tan ni xil e neta ti naxul xamim.^p ²⁰ E munahesi xamim ti vengan xa **ninin tesa** xil di lalong xat xamim. Bos mak mu xa ti muhesi xamim vengan xa Hi midis xat hisemim ngamu di e Vanuvei te Meulien xa de ut nesao.”^q

²¹ E melele nen ak, **Ninin Eo** misak ni Iesu mei polu ni sien e biteni bit, “Tata, xouk obe Suv te holesok xil ngasen e ut nesao e ut etan. Namesuk himetu vengan xa di ososon holesok xil ak tangan ngan xil xa langgur metisouen e kilakilen te ut etan lasakras lakil koute teni. E di opisen koute teni mi ngan xil xa langgoni tutut horamue xil xa latasukul kuhi ti. Reitin Tata, xouk di opol ni mak vengan xa di nggusil nenemien nam xa oteging xati ngamu teta.”^r

²² Di, Iesu biteni mi vanut moletin xil bit, “Tata navan teling holesok xil vus

ladi pe heok. Moletin xil latapus kil ti Nat Hi, Tamen kestang pus kila. E moletin xil latakil ti Hi Tamen, Natneli kestang mikila. E ngan xil kestang xa Natneli di ien bei tangan vapisen Tamen mi xil, xil mun iaxa likil xi.”^s

²³ Di, Iesu biles, pus **moletin nan xil** e biteni mi xil kestang bit, “Tuxolxatien na Hi di ngamu e xamim xa di mupus holesok xil xa di mistal xiak ni metemim.”^t

²⁴ Reitin li nabiteni mi xamim, e melengien xil tetiamu, **provot** xil holu e suv toto xil holu mun iexil tehei mak mu tangan lapus ti naha xa xamim di mupusi, e latnapus ti. E iexil tehei tangan lalong ti sepinien xil xa xamim di mulonge, e latnalong ti.”^u

Iesu dei vole usil moletin hos tei te hal Sameria

²⁵ E melele nen ak, titsa tei te rae na Mosis bemei visal Iesu tangan vasak pisi. Ma misis Iesu bit, “?Titsa, nipol ni naha tangan nihur meulien sal?”^v

²⁶ E Iesu bit rilomun ni mini bit, “?Rae **xil na Mosis** di bit naha? ?Xouk uhiteni minou?”

²⁷ Ma moletin ak biteni mini bit, “*Temim ihei Iahova xa be Hi namim ixo tinemim tevi, ixo meulien tevi namim, ixo polien tevi namim, e ixo nenemien tevi namim.*’ (Dut 6:5) E ‘*Eheien namim iti e moletin sav xil ixoni ngan taxa eheien namim di e xamim mun tang.*” (Lev 19:18)^w

²⁸ Iesu bit rilomun ni mini bit, “Sepinien nam momal tevi. Xosxa upol ni imak, ma uhur meulien sal.”^x

²⁹ E vengan xa moletin ak bit vapisen momalen nan pe met moletin xil, misis

^o10:18 Sion 12:31; Rev 12:8-9; Aes 14:12-17 ^p10:19 Sen 3:15; Sam 91:13; Mak 16:18 ^q10:20 Mat 7:22; Eks 32:32; Plp 4:3; Rev 3:5; 13:8; 20:12; 21:27

^r10:21 1Kor 1:26-28 ^s10:22 Sion 10:15; 3:35

^t10:23 Mat 13:16 ^u10:24 1Pit 1:10 ^v10:25 Mat 22:35; 19:16; Mak 10:17; Luk 18:18 ^w10:27 Dut 6:5; 10:12; Sos 22:5; Mat 22:37; Mak 12:33; Mat 19:19; 22:39; Mak 12:31; Rom 13:9; Kal 5:14; Tem 2:8 ^x10:28 Lev 18:5; Rom 10:5; Kal 3:12

Iesu vatei mun bit, “?E moletin si vari iaxa be tua navan?”

³⁰Ma Iesu dei vole tei mini bit, “Vatei, Siu tei mea nggo *Serusalem* e mikakao bit vahe taon te hal Seriko. E melele xa di nggusil suse nan ba, moletin tatei xil te kanen lamei ladal xati. Langgur rat eising nan e labasi. Sangas moletin ak vatam e lastokovein ni da nga. ³¹Di, bos xa *pris* tei na Siu xil di nggusil suse bemei e pusi pat da. E melele xa pusi, tava ti sangas visal e ba be seri suse e rin sav e mitavi tang ba. ³²Tave nousav ti, Siu tei xa nggo vatimol xa mahulong na *Livae* e di pol e Nim Eo na Hi nggusil suse bemei e pusi moletin ak pat da. E melele xa pusi, xi mun ba be seri suse e rin sav e mitavi tang ba. ³³Di, ngan *Sameria* tei, xa Siu xil di laketeh misa mi xil, di nggusil suse bemei e pusi moletin ak pat da. E melele xa pusi mak, ien misae pupu li en. ³⁴Misak ni, xi bemei visali, e mikas moten menuk nan xil ni uae, bas oel en, e pis xol von menuk xil. Di, po rati, miling kuhi e dongki san. Di, poe ba be nim te ngelen tei e milaxat kuhi. ³⁵E makoe nen, ngan *Sameria* misa *mani* taosen lu (2000) mi moletin xa di milaxat nim ak. Di, biteni mini bit, ‘Ulxat kuh moletin xa xiak. E xosxa mani ak tapin ti, naha mun xa upol ni e rin nan, ma nixal rati e melele xa nitilomun nimei.”

³⁶Di, Iesu misis titsa te rae na Mosis bit, “?Onemi obit naha? ?Visi e moletin xatel ak iaxa tepisen ni xa xi be tua hos tei na moletin xa moletin te kanen xil latehas purun ni?”

³⁷E xi bit rilomun ni mi Iesu bit, “Moletin xa tepisen esaeen mini.”

Ma Iesu biteni mini bit, “Bos, ma xouk mun ha upol ni imak tang.”

Iesu ba misao ni Merta xal Meri e hal Betani

³⁸Melele xa Iesu del moletin nan xil di lakakao tangan lave Serusalem, xil lamei e metimal te hal Betani. E metimal ak, atou tei da en, hisen Merta, e xi nggur pilei xil lamei e nim man.^y ³⁹Tunehin, hisen Meri. E xi bemei visal Iesu e dotan sangas visal len. Xi di miteong kuhi ni pispisien nan xil. ⁴⁰E Merta misakras vateong kuhi vengon xa xi di bilao ni polien te anien ae. E vengon xa xi di pol pupu, bemei visal Iesu e biteni mini bit, “?Suv, midep? ?Onemi obit bos tang xa tuxahin di miling polien xil ak di tangan inou tasok ti nipol ni? !Hiteni mini tangan vatamea mei vatutou ni nou!”

⁴¹E Suv biteni mini bit, “Merta, Merta, onexo pupu e nenemien nam di mikon ve holesok xil holu. ⁴²E neta tei takes momal tangan xamil mulipol ni. Meri teling nenemien nan tuei tangan vapol ni neta xa momal, e inou ninahur rati ti rani.”

Iesu pispisi mi moletin xil usil sexien te sisen

Mat 6:9-13; 7:7-11

11 Vatei, Iesu de rute tei e di misis. E melele xa misis bus, moletin nan tei misis bit, “Suv, pispisi mi xamem li usil sexien te sisen ixoni ngan taxa Sion Baptis tepispisi ni mi *moletin nan xil*.”^z

²Ma Iesu biteni mi xil bit, “Melele xa musis, muhiteni imak muhit, ‘Hi Tamemem, hisom be eo e momal tangan musa merereen minuk. Masis tangan mei uhe suv toto namem e ulaxat kuh xamem.

³Usa anien li mi xamem ipin te melengien xil vus.

⁴Onaketeh ti mun nasa mi xamem ve holesok xil xa mapol ni tamal ti.

Upol ni ixoni ngan xa xamem mun di maketeh bos rilomun mi ngan xil xa di lapol misa mi xamem.

E onamaen saksipisien xil te xeih ti namei e nasak ni xamem munamot e *tesaen*.”

⁵Di, Iesu biteni mi moletin nan xil bit, “Vahit tei e xamim vahe tim sa tuneli e hilaep te vongien e vasisi vahit, ‘?Tuak, okila osa ti anien minou? ⁶Vengan xa timue tei nggo sotin bemei e tim savan, e anien tovuol tangan nasa ni mini.’

⁷“E tuneli xa de nim vahit rilomun ni mini vahit, ‘!Ei, onasa polien ti minou! Puiteh mikoe ngamu, e inou del horamue navan xil mun di mapat ngamu madi vet namem. Ve rin ak, nasakras namea nasa neta tova minuk.”^a

⁸Nabiteni mi xamim, tave ti neta xa ien ti tavei tangan vamea vasa ti anien minuk vengan xa xouk obe tunali, e venggan xa otave unoun ti tangan osisi, osisi, osisi vuma ... xi imea e isa holesok xil vus minuk xa iem bei.^b

⁹“Misak ni, nabiteni mi xamim xa xosxa iemim bei neta ngan, ma musis Hi ven e isa ni mi xamim. Xosxa mulang ni, ma mukameti. E xosxa murei puiteh ven, ma isah puiteh mi xamim. ¹⁰Vengan xa ngan xil vus xa di lasis neta lihuri; e ngan xil xa lalang ni neta likameti; e ngan xil xa di larei puiteh, isah puiteh mi xil.

¹¹“Vahit xouk ove tata tei xa natumali misisuk tangan usa meseo tova mini vaa ni. ?Usa tetal xa misa mini? ¹²Mu vahit natumali misisuk tangan usa rel tuto tei mini. ?Usa skopion tei mini xa mikila vatil vini? !E-e, unapol ni ti namak! ¹³Misak ni, mupusi xa xamim, tata xil, mukila musa neta xa bos mi horamue namim xil, neta sav xa mube mo-

letin tesa xil te ut etan. E nabiteni mi xamim xa Tamemim e ut nesao bos mak mu mili xamim. Ve rin ak, melele xa musisi tangan vasa *Ninin Eo* mi xamim, isa ni vari.”

Rut moletin xil labit Iesu di pol del xeihen na Temat

Mat 12:22-30; Mak 3:20-27

¹⁴Vatei, Iesu pus moletin tei xa be vut venggan xa ninin tesa da en e misak ni misakras vasepin. Ma Iesu minggol rati be relingi e moletin ak mei misepin sung. E vanut moletin xil xa lapusi latemanin ni. ¹⁵E rut Farasi xil labiteni labit, “Moletin xai di nggol rerat ninin tesa xil ra moletin xil nggo xeihen xa Belsepul,[‡] suv na ninin tesa xil iaxa di misa xeihen mini.”^c

¹⁶E rut moletin sav ngan xil labit lisak pis Iesu, ma lasisi tangan vapol ni merekel tova vaxo ut nesao tangan vapisen ni xa xeihen na Hi di mini.^d ¹⁷E Iesu mikil nenemien nae e biteni mi xil bit, “Xosxa moletin xil na suv toto tei di labae mi xil mun tang, ma xeihen na suv toto ak mei ihe neta sav tang. E xosxa moletin xil te vatimol tei tang di labae mi xil mun, ma his vatimol ak ikesae. ¹⁸?E xosxa ninin tesa xil na Belsepul di labae mi xil mun tang, ma ihur xat xeihen nan itep? Nabiteni mak venggan xa xamim, Farasi xil, mubiteni mubit inou di nanggol rerat ninin tesa xil nggo xeihen xa Belsepul di misa ni minou. ¹⁹?E xosxa vamak, ma middep mi moletin namim xil? ?Xil di langgol rerat ninin tesa xil ra moletin xil del xeihen na visi? Xil vari iaxa di lapien ni xa naha xa di mubiteni tamal ti. ²⁰E xosxa di nanggol rerat ninin tesa ra moletin xil del xeihen na Hi, ma

[‡]11:15 ‘Belsepul’ be his tei te xaren xa di lakes Temat ni xa koute teni be ‘Suv na angelu xil.’

^a11:7 Mat 26:10; Luk 18:5; Kal 6:17 ^b11:8 Luk 18:5 ^c11:15 Mat 9:34

^d11:16 Mat 12:38; 16:1; Mak 8:11; 1Kor 1:22

ngan ak di pisen ni xa xeihen te relaxatien na Hi mistal tuei mi xamim.^e

²¹ “Belsepul nggoni silixin tei xa di miketeh xol nim man del holesok xil vus te vaeen nan tangan neta ti mei napangei holesok nan xil. ²² E melele xa moletin tei xa nggeih mak mu mili silixin ak mei mistal mini e bas tan ni, xi ileh rerat holesok xil te vaeen nan, itel holesok xil xa ladi e nim man. ⁴ Reitin, ileh rerat vuol ni holesok nan xil e iseti mi moletin nan xil sung.

²³ “Mak, ma ngan xil xa latamos ti vattel nou, xil di labae minou. E ngan xil xa latatutou ni nou ti tangan maleh viton moletin xil vaxoni sipsip xil, xil di langgol rerat xil laloh tasil ra nou.”^f

Iesu pispisi xa ninin tesa xa be reling moletin tei mikila mei ise xati mun

Mat 12:43-45

²⁴ Di, Iesu biteni mi vanut moletin xil bit, “Melele xa **ninin tesa** be reling moletin tei, di ba mikapis e uruvuol tangan vakamet rute tova tangan vangal kuhi en. E xosxa takamet ti, ma ihitni mi xi mun tang ihit, ‘Nitolomun nihe nim mavan xa natehe relingi natemei.’ ²⁵ E melele xa itilomun imei, ma ikameti xa ladaveas tuei e nim ak, laling pilei holesok xil, e ninin tesav tovuol en. ²⁶ Misak ni, xi iha e ileh **ninin** lu e he sav (7) xa lasa mak mu mili xi. E xil lihe nim, e

ha liti en. Nim ak be moletin tei, e lisak ni meulien na moletin ak isa mak mu ili ngan xa teti en tetiamu.”[§] ^g

Iesu pispisi xa moletin xa pol nggusil sepinien na Hi ipus tuxolxatien na Hi e meulien nan

²⁷ Melele xa Iesu di tamu misepin usil rin ak, atou tei xa de hilaep te vanut moletin xil miki ba ni bit, “Hi isa tuxolxatien mi ninom xa telinguk e relaxat kuh xouk.”^h

²⁸ E Iesu bit rilomun ni mini bit, “Hi isa tuxolxatien mi ngan xil mak mu xa di lalong sepinien na Hi e di lalong xati.”

Moletin xil lasis Iesu tangan vapol ni merekel tova xa lakila lake reitin en vaxo en

Mat 12:38-42

²⁹ Melele xa vanut moletin xil mei labe holu, Iesu misepin mi xil bit, “Moletin xil te xosali ak lasa tang. Di lasis nou tangan nipol ni merekel tova xa lakila lake reitin e nou vaxo en. E ninapol ni ti merekel tova tangan lipusi. Tei takes vari iaxa lipusi xa ihe merekel xa testal mi **Siona**.^{**} ⁱ³⁰ Merekel xa testal mi Siona tepisen ni xa sepinien xa Hi tesa ni mini tangan vahit mesen ni mi mol-Nineva xil tehe reitin. E ixo sexien ak, Hi ipol ni ixoni mi Nat Moletin tangan vapisen ni

^e11:22 Nim ak nggoni vole tei usil meulien na moletin tei xa nggoni moletin xa be vut. E melele xa Iesu bemei, misak ni mei meluv ra xeihen na Temat.

[§]11:26 Melele xa Iesu misak ni moletin tei mei meluv ra xeihen na Temat, bos xa moletin ak imaan Ninin Eo mei ise xat meulien nan e ipol ni holesok xil xa isikoe xol meulien nan. Ixoni, ivuli Vanuvei Eo na Hi, inem usili e ilong xati; isis mi Hi; e imos itel moletin xil nan Hi vehakut. Imak, ma Temat e ninin tesa nan xil lasakras mun lamei lapurun meulien na moletin ak.

^{**}11:29 E Siona 1:17 e Siona 2:10, Hi tepol ni merekel texo sexien xa tesa meseo tei xa mahulong mei terom Siona xa teti e vang meseo ak melengien tol. Di, Hi tesak ni meseo ak teluh rat Siona xa temeul teta tehe suhon. Iesu di bit usil merekel xa xi imat ihe melengien tol, e ti, Hi i sak ni imea rilomun ra maten e imeul (Luk 24:7).

^e11:20 Eks 8:19 ^f11:23 Mak 9:40; Luk 9:50 [§]11:26 Sion 5:14

^h11:27 Luk 1:28,42,48 ⁱ11:29 Mat 16:4; 1Kor 1:22

mi moletin xil te xosali ak xa sepinien nawan be reitin.

³¹ “E Melengien te Lepisien, moletin xil te xosali limea rilomun ra maten tenggan Hi ilepis rin nae xil. E melele nen ak, Kuin te hal Siba xa tave Siu ti imeul mun, e xi ihit rat sexien tesa namim xil. Ipol ni mak vangan xa xi tekakao sotin temeí tngan valong sepinien te metisouen na suv toto **Solomon** tetiamu. !E taxeak, tei xa eilep mak mu mili suv toto Solomon da xiak e xil di lasin ni!^j ³² E, e Melengien te Lepisien ak, moletin xil te hal Nineva mun xa latave Siu ti limei e lihit rat sexien tesa na moletin xil te xosali ak, vangan xa xil iaxa latehiles meulien nae melele xa latelong sepinien na Hi xa provet Siona tesa ni mi xil. !E taxeak, nabiteni reitin mi xamim xa tei xa mili provet Siona da xiak e xil latake reitin ti e sepinien nan e lataviles meulien nae ti!”^k

Iesu dei vole usil midep iaxa reitinen na Hi nggoni laet

Mat 5:15; 6:22-23

³³ Di, Iesu dei vole tei mi xil bit, “Moletin tovuol xa vasahan laet, ti, vaha vasoso ni mu vakutaxole ni pesin tova. !E-e! Melele xa misahan ni bus, poe ba misoxolen ni de kesao. Mak, ma melele xa moletin ngan xil lamei e nim lakila lapusi xa laet di mileluv e nim.^l ³⁴ Metexir mun nggoni laet te tenbexir. Xosxa metexir bos, ma nggoni ngan xa meulien nar di e miehen e rakila rapus kil naha xa be reitin. E xosxa metexir bar, ma nggoni ngan xa meulien nar di e maluxoluku e rasakras rapus kil naha xa be reitin.^{††} ³⁵ Misak ni, xamim muxuxou kuhu xa meulien namim iti e miehen, e nati ti

e maluxoluku. ³⁶ Xosxa meulien namim di e miehen, e maluxoluku tovuol en, ma meulien namim ipolu ni miehen e mupus kil holesok xil vus.”

Iesu misepin nggeih xat Farasi xil del titsa xil te rae na Mosis ve sexien nae xil

Mat 23:1-36; Mak 12:38-40

³⁷ Melele xa Iesu misepin bus, **Farasi** tei mei misisi tngan ha vaanien vatela e tim san. Ma Iesu be xalu lube tim san e dotan e vet te anien en nan.^m ³⁸ E Farasi ak mitemanin melele xa pusi xa Iesu takas hen ti e ba dotan tngan vaanien.ⁿ ³⁹ Ma Suv Iesu biteni mini bit, “O reitin, xamim Farasi xil munggoni kap e pelet xa di lakas moten ni e hale tang, e vangite mumu nggoni tinemim xa polu ni nenemien te hokanen e holesok sav xil xa lasa. ⁴⁰ !Xamim mube unu xil vari! ?Mutakil ti xa Hi xa tepol ni hale te moletin xil, xi vari iaxa tepol ni vangite mun? ⁴¹ E ihos mak mu xosxa musa oei xa de vangit kap e anien xa de vangit pelet mi ngan xil xa labe hoeo. Imak, ma meulien namim imese kuhu pe met Hi.

⁴² “Isa pupu mi xamim, Farasi xil, vangan xa pangasien xil xa imei e xamim ihe mahulong. Xamim di mungguxou kuhu tngan muhusil rae xil xa labe hokorong tang. Ve rin ak, di mubuli kuhu ni tutut uvei xil te kuk en tngan mukila muhur rat taet teni tngan musa ni mi Hi. E mutahusil ti rae xil xa labe mahulong nggoni sexien xa di mupisen eheien namim mi Hi e mi mosav xil. Momal mak mu tngan, itiamu, muhusil rae xil xa labe mahulong tngan mupisen sexien te eheien. E, itutou sung, iemim nabong ni

^{††} **11:34** Xosxa muke reitin e Iesu, ma meulien nar polu ni miehen e rapus kil reitinen na Hi. E xosxa ratake reitin ti en, ma meulien nar dit e maluxoluku.

^j **11:31** 1King 10:1-10; 2Kron 9:1-12 ^k **11:32** Sion 3:8,10

^l **11:33** Mak 4:21; Luk 8:16 ^m **11:37** Luk 7:36; 14:1 ⁿ **11:38** Mat 15:2

ti tangan muhusil rae xil xa labe hokorong mun.^o

⁴³“Isa pupu mun mi xamim, Farasi xil, vengan melele xa mube nim xil te pispisien iemim bei tangan mutotan e von merereen na eilep xil. E melele xa mube von posen mun, iemim bei tangan moletin xil ti likes kuh xamim e ti limerere ni xamim. ⁴⁴Isa pupu mi xamim, vengan xa meulien namim tamese ti. Munggoni von tehinen xil xa lataling simeleleen ti vati en, xa moletin xil di lakakao sangas visali e latakil ti xa neta vutei bo di en.”

⁴⁵Titsa tei te rae na Mosis biteni mi Iesu bit, “Titsa, melele xa di osepin mak, di osepin purun xamem mun.”

⁴⁶Ma Iesu biteni mi xil mun bit, “Isa pupu mun mi xamim titsa xil te rae na Mosis, vengan xa di muling xat rae xil holu xa meas da xat mar moletin xil. E xil lasakras lalehi. E di, iemim ti tavei tangan musa hemim vatutou ni xil tangan lalehi. ⁴⁷Isa pupu mun mi xamim, vengan xa di mupol kuhi ni tutut nim xil xa da xol von tehinen na **provet** xil, provet xil xa, tetiamu, avu namim xil vari latehas vin xil. ⁴⁸Reitin, xil latehas vin provet xil, e xamim di mupol ni nim te tehinen nae. Nggo sexien ak iaxa di mupisen ni xa mumae e nenemien na avu namim xil melele xa latehas vin xil. ⁴⁹Ngan ak nggoni naha xa Hi xa be metisou pupu tehiteni xa tehit, ‘Inou nisil provet xil e **eloheoh** navan xil liha mi moletin navan xil. E moletin navan xil lihas vin rute ngan xil e lisak purun tesav xil.’ ⁵⁰Ve rin ak, Hi isa pangasien mi xamim, moletin xil te xosali ak, vengan xa pusi xa hemim be muis ni re provet xil vus xa latehur sepinien na Hi e melele xa xi tepeas ni ut etan mei duxoh xosali, provet xil ak xa avu

namim xil iaxa latehas vin xil. ⁵¹Reitin mak nabiteni mi xamim, re moletin xil vus na Hi xa avu namim xil latehas vin xil di lasak ni hemim be muis, maten na **Ebel** ba teha vuma ... tetuxoh maten na provet Sakaraea xa latehas vini e hilaep te **hor te sanien** e Nim Eo na Hi. E Hi isa pangasien ve maten xil ngasen nae mi xamim vus te xosali ak.^p

⁵²“Isa pupu mun mi xamim titsa xil te rae na Mosis, vengan xa moletin xil labit lamei visal Hi e xamim di musoson ki te puiteh xa lakila laxo en tangan mei lakil Hi. !Xamim iemim ti tavei tangan muxo puiteh ak tangan ha mukil Hi, e di musikoe xol moletin sav xil mun xa iexil bei tangan laxo en e mei lakil Hi!”

⁵³Melele xa Iesu be reling nim te pispisien ak, **titsa** xil te rae na Mosis del Farasi xil, iexil mikat pupu ni ven. Misak ni, e melengien ak ba, xil latesak pisi tangan lasis Iesu ni holesok xil xa nggeih. ⁵⁴Xil laling nenemien nae labit lisak pis Iesu tangan isa sepinien tova mu ipol ni neta tova xa likila lital xati ven.^q

**Iesu misel xat moletin xil
tangan liketeh kuhi ve
pispisien tesa na Farasi xil**

Mat 10:26-27

12 E melele nen tak, moletin xil labe holu xa labe holu pupu xa lamei, e lating e dit lapel xat lexil tangan lapus Iesu. E Iesu biles misepin mu mi **moletin nan xil** bit, “Muketeh kuhi ve pispisien xil na **Farasi** xil xa lamese e hilibexil kestang. Nggoni is xa di pol xusus ni pulaoa mei mikaio, pispisien nae mikila vapurun xusus ni nenemien na moletin xil.^r ²E holesok xil xa moletin di mikutaxole, Hi ital rati imei valkesao. E neta xa moletin misak pisi tangan valing xusus ni, Hi ileh rerati imei e valkesao

^o11:42 Lev 27:30 ^p11:51 Sen 4:8; 2Kron 24:20-21 ^q11:54 Luk 20:20

^r12:1 Mat 16:6; Mak 8:15

tengan moletin xil vus lipus kila.^{s 3} Holesok xil vus xa di lasep usili e malux-olukun, moletin xil lilong usili e miehen tang. E holesok xil xa moletin di misep piao ni e nim man, likekei ni pe met moletin xil tengang likila.”

**Iesu pispisi mi moletin xil
tengan ulixil ikan ni Hi kestang
e nave moletin xil ti**

Mat 10:28-31

⁴ Iesu biteni mun mi moletin nan xil bit, “Nabiteni mi xamim, tuxoli xil, ulimim nakan ni ti ngan xil xa likila lihas vin tenbemim. Vengan xa, itutou ni, lasakras lapol ni ti neta mun mi xamim. ⁵ E nihit kila mi xamim visi vari ulimim ikan ni. Ulimim ikan ni Hi kestang, venggan xa xi mikila ihas vin moletin tei, e nggur xeihen mun tengang iso ni ihe Upang xa misakras vamat. !Reitin mak, ulimim ikan ni Hi kestang!

⁶ “Tuholaea xil xa latereli tang, moletin mikila vaxale vahe lim ni rut mani tei xa hokorong tang. E Hi ien tabong ni ti tova vari. ⁷ E meulien namim eilep mak mu pe met Hi mili tutut tuman xil ak e ilaxat kuh xamim. Reitin mak, Hi mikil sen hilimim kekes xa di e vatumim. Ma, munanexo ni ti neta.”^t

**Iesu pispisi mi moletin nan xil
xa linave unoun ti tengang
lihiti rati xa di langgusili**

Mat 10:32-33; 12:32; 10:19-20

⁸ Di, Iesu biteni mi moletin nan xil bit, “Nabiteni reitin mi xamim, xosxa moletin di bit rati pe met moletin xil bit di nggusil nou, ma inou, Nat Moletin, nihit rati mun pe met *masxaxa* xil na Hi nihit xi be moletin navan. ⁹ E xosxa moletin di bit rati pe met moletin xil bit di

misin nou, ma inou, Nat Moletin, nihit rati mun pe met masxaxa xil na Hi nihit di nasin ni.^u

¹⁰ “E ngan xil vus xa lasepin misa ba xat hisok xa nabe Nat Moletin, Hi ikila iketeh ihos rilomun mi xil. E ngan xil xa lasepin misa ba xat his *Ninin Eo*, ma Hi naketeh ti navos rilomun mi xil.^v

¹¹ “E melele xa moletin xil lital xat xamim e lileh xamim ha musoh pe met vat xil te *nim te pispisienna* Siu xil mu pe met eilep xil te kavmen, munanexo ti. Munanem ti nahe holu usil sepinien xa ti muhithiteni.^{w 12} Vengan xa, e melele nen ak, Ninin Eo iaxa ipispisi mi xamim ni sepinien eah xa mukila muhithiteni.”

**Iesu dei vole usil moletin tei xa
holesok nan xil labe holu e ut etan, e
naha xa eilep mak mu pe met
Hi tovuol e meulien nan**

¹³ Moletin tei xa de vanut moletin xil ak mei misis Iesu bit, “Titsa, tata navan mat. Hiteni mi tua navan tengang vaseti holesok xil na tamemel mi xamel.”

¹⁴ E Iesu bit rilomun ni mini bit, “?Tuxoli, visi iaxa teling nou tengang nilepis rin namil mu niseti holesok xil na tamemil mi xamil?”^{x 15} Di, xi biteni mi moletin xil vus bit, “Muxuxou kuhi e muketeh kuhi xol xamim tengang eheien te holesok xil nalihi nenemien namim ti. Vengan xa holesok xil te ut etan ak nave vatit meulien namim ti, neta sav xos holesok namim xil labe holu midep.”^y

¹⁶ Di, Iesu dei vole ak mi xil bit, “Vatei, moletin tei da xa holesok nan holu. E naho nan xil, anien xil labe holu xa labe holu pupu. ¹⁷ Di, nggur nenemien tei bit, ?Nipol ni itep? Ut tapin ti e nim mavan xil tengang niserev anien xil ak en. ¹⁸ !Aha nakila! Inou nipol ni imak. Nita lelen

^s12:2 Mat 10:26; Mak 4:22; Luk 8:17

^t12:7 Luk 21:18; Pol 27:34; Luk 12:24

^u12:9 Luk 9:26 ^v12:10 Mak 3:28-29

^w12:11 Mak 13:11; Luk 21:12-15

^x12:14 Eks 2:14; Pol 7:27 ^y12:15 1Tim 6:9-10

nim xil xa hokorong tang xiak, e ti, nipol ni nim xil xa lihe mahulong mak mu tenggan niserev kuh anien xil ak itel holesok sav xil navan liti en. ¹⁹ Ti, nite meulien tei xa ihos itel holesok navan xil. Ningel kuhi, nianien kuhi, nimun kuhi, e nihesi nou vehakut.”

²⁰ Di, Iesu biteni bit, “E Hi ihitini mini ihit, ‘!Xouk obe unu tova tang! E vongien nen tak, nihur rat meulien nam ra xouk. ?Imak, ma holesok nam xil ak xa di oserev kuhi, visi vari ilehi?”

²¹ Melele xa Iesu dei vole ak bus, biteni bit, “E Hi ipol ni imak mi ngan xil xa di laso viton holesok xil holu mei be nae kestang tangan lakila lalonge vahos vatela, e naha xa eilep mak mu pe met Hi tovuol e meulien nae.”^z

Iesu pispisi mi moletin nan xil tangan linanexo ti vengan xa Hi ilaxat kuh xil

Mat 6:25-34

²² Di, Iesu biteni mi moletin nan xil bit, “Vengan xa ngan ak be reitin, di nabiteni mi xamim, munanexo ti ve meulien namim: ve naha xa ti mua ni, mu ve naha xa ti musing xol tenbemim ni. ²³ Vengan xa mutahur meulien namim ti tangan muanien kestang, e mutahur tenbemim ti tangan musing xole kestang. ²⁴ Mupus ti mu tuman xil ak. Xil latapol ni ti naho tangan ti laleh anien vaxo en. Reitin, povah mae tovuol tangan laserev xat anien ae vati en. E neta sav xa mak, Hi di misa anien ae. E pe met Hi, xamim mube eilep mak mu mili tuman xil ak.^a ²⁵ Nenexoen misakras vatutou ni moletin tei tangan vasak ni meulien nan vahe teviei luvoluv mu. ²⁶ ?E xosxa nenexoen misakras vapol ni neta xa hokorong vama e meulien namim, ma veneh iaxa di

munem pupu usil holesok sav xil mun xa iemim bei?

²⁷ “Munem pisi usil hungovae xil e sexien xa di lameul en. Xil latapol ti e latatil ti eising nae. E nabiteni mi xamim, suv toto **Solomon** tetiamu, eising nan xil tehos xa tehos, e hungovae xil ak, lasing xol xil bos mak mu laleli.^b ²⁸ Reitin, Hi di mising xol kuh hungovae xil ak bos xa bos, tave ti neta xa di lameul melengien tei takes, e melengien sav tang, lameles e lakiri. Di, ladaveas viton ni e laso ni be upang. ?E xosxa Hi di mising xol xil mak, veneh ma di munexo xa nalaxat kuh xamim ti? !Ei, nenesien namim en hokorong tova tang!

²⁹ “Tavos ti xa munexo ve naha xa mua ni mu mumu ni. ³⁰ Vengan xa hisit nenexoen xil ak labe na ngan xil xa latakil ti Hi. E Hi xa be Tamemim mikil naha xa xamim mube tamure ni e meulien namim. ³¹ E bos xa musa xamim ve holesok xil xa be eilep mak mu pe met Hi xa be suv toto namim. E xi ilaxat kuh rin namim.

³² “Xamim munggoni sulut sipsip savan xil. Misak ni, ulimim nakan ti e munanexo ti vengan xa Tamemim memaal himetu tangan vasa holesok xil xa be nan mi xamim. Reitin, xamim mulaxat viton rute xil vus xa xi be suv toto en.^c ³³ Ve rin ak, ha mupos vuol ni holesok namim xil e musa **mani** teni mi hoeo xil. Imak, ma Hi ipus kil sexien xil namim e isa huite teni xa ihos xa ihos mi xamim e ut nesao, e rute xa pipei xil lasakras lapangei, e moletin te kanen xil lasakras lakan ni.^d ³⁴ Nabiteni mak vengan xa nenemien e eheien namim iti e rute xa di muserev naha xa be eilep mak mu e meulien namim di en.”

^z12:21 Mat 6:20 ^a12:24 Sam 147:9; Luk 12:7

^b12:27 1King 10:4-7; 2Kron 9:3-6 ^c12:32 Luk 22:29; Rev 1:6

^d12:33 Mat 19:21; Mak 10:21; Luk 18:22

Iesu dei vole usil slev xil xa labue xat kuh xil ve meien na suv nae

³⁵Iesu biteni mun mi moletin nan xil bit, “Vehakut, muvue xat meulien namim ve naha xa imei ixoni ngan xa di musing ni eising te polien e laet namim di pili.^e ³⁶Xamim muxoni slev xil xa di ladatil suv nae xa ba be anien te tetelien tei, e latakil ti melele eah xa imei mun en. Misak ni, xil livue xat xil vehakut tang ve melele xa suv nae imei rilomun e ikes xil. Imak, ma melele xa ikes xil, vatakes lisah puiteh ven.^f ³⁷E xosxa suv ak imei rilomun e ipusi xa slev nan xil di ladatili mak e latapat ti, ma ihesi xi ihe holu ve xil, e xil lipus hosien nan e meulien nae. Reitin li nabiteni mi xamim xa suv nae ipol ni ihos mi slev nan xil. Xi vari ising ni eising te polien, ikes slev nan xil mei lianien, e xi iaxa isa anien ae.^g ³⁸Tave ti neta xos suv nae bemei e hilaep te vongien mu e makoe roroh, hosien iti mi slev xil xa labue xat xil vehakut ve mei rilomun en na suv nae.

³⁹“Reitin, muvue xat xamim vehakut. Mukila vahit moletin tei, wakil melele xati xa moletin te kanen imei e nim man, xi mikila iketeh xole tangan moletin te kanen namei ti en.^h ⁴⁰Vengan, usil sexien nen tak, inou, Nat Moletin, nimei rilomun e melele tei xa moletin xil linakil ti ixoni moletin te kanen. Mak, ma muvue xat kuh xamim.”

Iesu dei vole usil hisit moletin te polien lu

Mat 24:45-51

⁴¹Di, Pita misis Iesu bit, “?Suv, otetei vole ak usil xamem kestang xa mabe moletin nam xil, mu usil moletin xil vus?”

⁴²Ma Suv Iesu bit rilomun ni mini nggo vole teimun bit, “?Visi iaxa be moletin te polien xa be metisou kuhi e di miteong xat rae na suv nan? Xi be ngan xa suv nan milingi be vat na moletin te polien sav xil e tim san tangan ti isa anien mi xil e melele xati teni. ⁴³E tuxolxatien iti mi moletin te polien xa, melele xa suv nan itilomun imei, ikameti xa xi di tamu pol ni polien nan xil. ⁴⁴Reitin li nabiteni mi xamim xa suv nan ipet rat moletin te polien ak ihe nesao tangan ti ilaxat holesok sav nan xil mun.ⁱ

⁴⁵“E xosxa moletin te polien ak xa suv nan telingi tehe vat te nim man di minemi bit, ‘Ei, suv navan da nousav, e tamei ti mok.’ Misak, ni di bas tiramue e atou sav xil te polien e nim ak, e di ngga vin xi e di mumun vuma mitalang. ⁴⁶E suv nan imei rilomun e melele tei xa xi tanemi ti vahit imei en. E melele xa imei rilomun, suv ak ihas purun ni e iso rati ha ite von longpangasien itel ngan tesav xil xa di lalong ras rae na suv nae.

⁴⁷“Xosxa moletin te polien tei mikil kuh naha xa suv nan ien bei tangan vapol ni, e tavue xat xi ti tangan vapol ni, ma suv nan ihas purun ni e isak ni ilong pangas pupu ni xi ven.^j ⁴⁸E xosxa moletin te polien tei takil ti naha xa suv nan ien bei tangan vapol ni, e ba pol ni neta tei xa misa, ma suv nan ihasi ihe vuteili tang e isak ni ilong pangas xi ihe hokorong tang. Vengan ngan xil xa Hi tesa holesok holu mi xil, xi ien bei tangan ipus huite holu mei ixo xil. E ngan xil xa Hi teling holesok xil holu mu teti hexil, Hi ien bei tangan ipus huite xil lihe holu mak mu mei listal lixo en.”

^e12:35 Eks 12:11; 1King 18:46; 2King 4:29; 9:1; Siob 38:3; 40:7; Pro 31:17; Ser 1:17; Efes 6:14; 1Pit 1:13; Mat 25:1,7 ^f12:36 Mak 13:35-37; Mat 25:6

^g12:37 Luk 17:7-8; Sion 13:4 ^h12:39 Mat 24:43-44 ⁱ12:44 Mat 25:21,23

^j12:47 Tem 4:17

Pispisien xil na Iesu di miseti moletin xil

Mat 10:34-35

⁴⁹ Iesu biteni mun mi moletin nan xil bit, “Inou namei tangan nasahan upang tei vaa moten ut etan. E vahit upang ak vamei ngamu, ma vahos.⁵⁰ Nave nousav ti, ha nihur longpangasien holu. E di nalong pangas nou ven ha ituxoh melele xa nipol sen polien navan xil.^{k 51} ?Xamim munemi mubit inou namei tangan niling tomat e ut etan? E-e, ninaling tomat ti mu. E nipol ni moletin xil ti liseti xil ve nou.^{1 52} Mak, ma taxeak iha, vatimol tei ti liti pas xil, e ngan xil xa ladi e vatimol tei, liketeh isa ni ngan tesav xil.⁵³ Tata xil lisel mi horamue nae xil, e horamue xil lisel mi tamexil. Nana xil lisel mi atuli nae xil, e atuli xil lisel mi ninexil. Atou xil lisel mi havnahin xil, e xil lisel mi avu sasa nae xil.”^m

Iesu pispisi xa moletin xil latapus kil ti koute te naha xa Hi di pol ni

Mat 16:2-3

⁵⁴ Iesu biteni mun mi vanut moletin xil bit, “Melele xa mupus momah xa maluxuluk bemei nggo ist e votiang xa di mukesi ni ‘toio,’ mukila xa us vamus xiak, ma mus.^{n 55} E melele xa mupus votiang xa di mistal nggo notwes xa mukesi ni ‘aru,’ mukila xa ut vavue xiak, ma ut bue.⁵⁶ !Xamim, mube vat luvosen xil tang! Melele xa mupus neta tei xa mistal e ut etan mu e tilang hat, mukil kuh koute teni. ?E veneh ma mutapus

kil ti sung koute te naha xa Hi di pol ni taxeak?

⁵⁷ “Xamim vus mukil naha xa momal tangan mupol ni, e di mutapol ni ti.⁵⁸ Xosxa moletin tei bit vahuruk ove kot ve neta ngan xa xi bit otepol ni mini, ma momal tangan utemanon ha userev rin nam itela melele xa di tamu munggusil suse tangan mulihe von koten. Maxani, xosxa onapol ni ti, melele xa multuxoh kot, xi ilinguk e he moletin te lepisien. Ma moletin ak ilinguk e he polis, e polis ilinguk e nim te xeih.⁵⁹ Reitin li nabiteni minuk, xouk utat rute ak e osakras ha vem vamase ha vuma ... uxal rat vuol ni faen xa lalingi di xatuk.”^{‡‡}

Iesu misel xat moletin xil tangan lihiles ra tesaen nae xil e lipol ni sexien xil xa bos sung

13 E melele nen ak, rut moletin xil ladi xa latumul mi Iesu usil Siu xil te hal Kaleli xa latehe Nim Eo na Hi tangan lisa sanien eo xil nae mini. E melele xa di tamu latepol ni, moletin te vaeen xil na suv Paelet mei latehas xil e rute ak. E rexil teleh tehiles tetel re vongoro xil xa latehasi tehe sanien nae xil.^{¶¶}
^{¶¶} Ma Iesu biteni mi xil bit, “?Midep? ?Munemi mubit suse xa ngan Kaleli xil ak latelel texo en di pisen ni xa **tesaen** nae tehe eilep mak mu teli ngan xa di e rin na moletin sav xil te hal Kaleli?^{p 3} !E-e, tave reitin ti! Nabiteni mi xamim, xosxa munaviles meulien namim ti ra tesaen namim, ma xamim mun mulel imak tang.[¶] ⁴ Munem usil pis usil moletin tol e le sav (18) xa latelel sangas

^{‡‡}12:59 Ngan ak nggoni holesok xil xa misa xa moletin xil di lapol ni mi Iesu. E momal xa lipol ni tomat itel Iesu tangan Hi nasa pangasien mi xil e Melengien te Lepisien.

^{¶¶}13:1 Ve rin ak, moletin xil latenemi latehit Hi iaxa tesin sanien nae xil vengas xa xos tesaen tei xa eilep pupu di xat rin nae pe meten.

^k12:50 Mak 10:38-39 ^l12:51 Luk 2:14 ^m12:53 Maek 7:6

ⁿ12:54 Mat 16:2-3; 5:25-26 ^o13:1 Pol 5:37 ^p13:2 Sion 9:2 [¶]13:3 Sam 7:12

ni rute tei xa lakesi ni Saelom e melele xa nim te keteheh xa teviei tehe nesao temot mei teta xat xil. ?Midep? ?Munemi mubit latelel vengon xa tesaen nae xil tehe tellep mak mu teli tesaen na moletin sav xil te hal **Serusalem**? ⁵!E-e, tave reitin ti! Nabiteni mi xamim, xosxa munaviles meulien namim ti ra tesaen namim xil, ma xamim mun mulel imak tang.”^r

⁶Di, Iesu dei vole tei mi moletin xil ak bit, “Vatei, moletin tei da xa di misis moletin te polien nan tangan vaha valih vatit **fik** tei vate urvatiei te **grep** san. E melele xa vatit fik ak di meul, vehakut, xi ba tangan valang ni huite. E vehakut, mikameti xa huite tovuol en.^s ⁷Ma, biteni mi moletin xa di milaxat urvatiei san bit, ‘Huram tol tuei iaxa nate-mei tangan nalang ves huite e vatit fik ak, e natakamet ti neta vari. !Ta rati vaha vengon xa dat votei e tan ak!’

⁸“E moletin xa di pol e urvatiei san bit rilomun ni mini bit, ‘Suv, lingi vata munamun mu vahe huram tova tang. Inou nihil kuh tan xa di mikapis xole mei imerou, e niso tan xa bos en tangan itutou ni mei imeul ihos.^t ⁹Xosxa iva e huram xor, ma bos. E xosxa nava ti, ma nita rati sung iha.”

Iesu pispisi xa sexien xa di radutou ni moletin sav xil be eilep mak mu mili sexien xa di ranggusil xat rae xil te Sabat

¹⁰Vatei, e **Sabat**, Iesu di pispisi mi moletin xil e **nim te pispisientei**. ¹¹E pusi xa atou tei de rute ak xa **ninin tesa** tepurun marin huram tehe tol e le sav (18) e misak ni misakras vasoh vama. ¹²Melele xa Iesu pusi, mikei ba ni

bit, “Nana, nalal ratuk omeluv ra mesien nam.” ¹³Iesu miling hen en, e vari nga atou ak misomal e memes Hi ven.

¹⁴Melele xa vat te **nim te pispisienak** pusi xa Iesu pol ni mar atou ak mei bos e Sabat, ien mikat. Ma, misel ba ni vanut moletin xil ak bit, “Melengien tei e he sav (6) iaxa moletin ikila ipol en. Xamim mukila mumei e melengien xil ak tangan lileh rerat mesien ra xamim, e nave Sabat ti.”^u

¹⁵E Iesu bit rilomun ni mini bit, “!Iva, xamim munesse e hilibemim tang! Xamim mun di mupol e Sabat. Reitin, xamim di mulal rat buluk samim xil e muleh xil ba di langganien e lamu oei e Sabat.^v ¹⁶?E midep mi atou ak xa be natnahn tei na **Ebrahim** xa **Temat** tevar xati huram be tol e le sav (18) xiak? ?Munemi mubit rasakras ralal rati vameluv ra mesien nan e Sabat?”^w ¹⁷Sepinien na Iesu misak ni moletin xil xa laketeh misa ni labe unoun. E moletin sav xil labesi xil tova tang ve polien hos xil xa Iesu di pol ni.

Iesu dei vole usil suse xa Hi mei ihe suv toto e meulien na moletin xil ixo en

Mat 13:31-32; Mak 4:30-32

¹⁸Di, Iesu biteni mi vanut moletin xil bit, “?Hi imei ihe suv toto na moletin xil itep? ?Nihit kila mi xamim itep? ¹⁹Sexien teni nggoni utut **mastad** tei xa hokorong xa hokorong xa moletin tei ngguri e milih e naho san. Neta sav xa utut mastad ak be hokorong mak, meul tepiei be nesao ba vuma ... mei be mahulong pupu mili holesok sav xil xa di lalih xil e naho. Reitin, melele xa matu, mei pipin tangan

^r13:5 Sam 7:12 ^s13:6 Hab 3:17; Mat 21:19; Mak 11:13

^t13:8 2Pit 3:9,15 ^u13:14 Mat 12:10; Mak 3:2; Luk 6:7; Sion 5:16; 7:23; 9:14,16; Eks 20:9-10; Dut 5:13-14 ^v13:15 Luk 14:5 ^w13:16 Luk 19:9

tuman xil mei lipol ni nunu mae xil e halite xil.”^x

²⁰Di, Iesu biteni mi xil bit, “?Hi imei ihe suv toto na moletin xil itep? ?Nihit kila mi xamim itep? ²¹Sexien teni nggoni is vutei xa atou tei ngguri e bilesi del pulaoa xa mahulong. E tave ti neta xa miling is hokorong tang en, is ak pol ni pulaoa ak mikaio ba vuma ... mei be mahulong xa mahulong.”^y

**Iesu dei vole usil sexien xa ngan xil
kestang xa laling neketen
nae en lakila lave ut nesao**

²²Melele xa Iesu di nggusil suse nan tangan vahe Serusalem, xi misao ni metimal e taon xil hao e di pispisi mi moletin xil holu. ²³Vatei, moletin tei misisi bit, “?Suv, midep? ?Hi iteh meulien e moletin xil holu, mu rut moletin xil tang?”

²⁴E Iesu bit rilomun ni mini bit, “Vehakut, xamim di musak pisi tangan muxo puiteh xa hokorong muve ut nesao. Vengan xa be reitin xa moletin holu di lasak pisi tangan laxo en, e lasakras.^z

²⁵Melele tei di bemei xa Suv te nim ak mei ikoe xol puiteh e ilok xole. E melele nen ak, xamim mei musoh e hale, ti muti puiteh, e mukei iha mi Suv muhit, ‘!Suv li, sah puiteh tangan mavat nim!’^a

“E xi ihiteni mi xamim ihit, ‘E-e, mu-namei ti nim vengan xa natakil ti xamim e natakil ti xa munggo xave.’

²⁶“Ma xamim muhiteni mini muhit, ‘E, okil xamem. Vengan xa mateanien e matemun tetelak. Xouk otepispisi mi xamem e metimal namem.’

²⁷“E xi ihiteni mi xamim ihit, ‘E-e, inou natakil ti vari xa xamim munggo xave. !Muhe reling nou, xamim vus xa mukavui!’^b ²⁸E melele nen ak, Suv iso

rat xamim, Siu xil, mutit hale tang, e ti mumuis e ti muat luhemim ve longpangasien namim. E muti nga sotin, ti mupus Ebrahim, **Aesak** e **Siekob** itel **provet** xil tetiamu xa ladi e nim na Hi e ut nesao.^c ²⁹E moletin xil xa latave Siu ti lixo rute xil vus te ut etan, e mei liti e rute xa Hi ihe suv toto nae en. Xil mei litotan e von anienen nan itela.^d ³⁰Reitin, ngan xil xa di mupus xil langgoni neta sav tang, xil mei lihe eilep mak mu lileli xamim. E xamim xa munemi mubit mube eilep mak mu, mei muhe neta sav tang pe met Hi.”^e

**Iesu milonge misa ve longrasien na
moletin xil te hal Serusalem**

Mat 23:37-39

³¹E melele nen tak, rut **Farasi** xil lamei visal Iesu e labiteni mini labit, “!Bos xa umea e uhe reling rute ak uha, vengan xa suv toto **Herod** Antipas bit va-has vinuk!”

³²E Iesu bit rilomun ni mi xil bit, “Mutilomun muha e muhiteni mi kuli reran ak muhit, ‘Xosali e visuvong, ti nihol rerat ninin tesa xil e nileh rerat mesien ra moletin xil. E, e melengien tol nen, nipol sen polien xa natemei ven. ³³Io, xosali, visuvong, e heis, nihusil suse navan nihe Serusalem. Reitin, nihe Serusalem e lihas vin nou en, vengan xa rute sav xil tavos ti tangan Siu xil lavas vin provet tei na Hi en.

³⁴“!O moletin xil te hal Serusalem! Xamim iaxa mutehas vin provet xil e mutehov vin eloheoh xil xa Hi tesil xil latemei ve xamim. Melengien xil holu, ieok bei pupu tangan nakes viton xamim e nasikoe xol xamim vaxoni tuto tei xa mikes viton tuten xil mei mite aveoun

^x13:19 Dan 4:12,21; Esek 17:23; 31:6 ^y13:21 Mat 7:13-14,21-23

^z13:24 1Tim 6:12; Mak 10:25 ^a13:25 Mat 25:10-12 ^b13:27 Sam 6:8

^c13:28 Mat 8:11-12 ^d13:29 Sam 107:3; Luk 14:15

^e13:30 Mat 19:30; 20:16; Mak 10:31

e muhin xol xil. E xamim iemim ti tavei. ³⁵ Misak ni, Hi istokovein xamim e nasikoe xol xamim ti mun. Imaen Nim Eo namim mei ita hon tang, moletin ti mun nava en. Nabiteni reitin mi xamim, munapus ti mun inou ituxoh melele xa muhiteni muhit, *‘!Tuxolxatien iti mi ngan xa di bemei e his Iahova!’*” (Sam 118:26)^f

Iesu dal rat moletin tei ra mesien nan e Sabat

14 E *Sabat* tei, Iesu ba mingganien e tim sa vat tei na *Farasi* xil. E Farasi sav xil lamei tangan lipus ti xos ipol ni neta tova xa tamal ti e Sabat xa likila lilihi ihe von koten nae ven.⁸ ²Di, moletin tei xa len e hen mitep bemei nim e misoh pe met Iesu. ³Ma Iesu biles pus titsa xil te *rae na Mosis* e Farasi xil e misis xil bit, “?Rae nar di maen xir tangan rital rat moletin tova ra mesien nan, mu tamaen ni ti?”^h ⁴E xil ladit votei, latavit ti neta. Ma Iesu duxol moletin ak e pol ni ven mei bos rilomun. Di, misil moletin ak ba.

⁵Di, Iesu biteni mi xil bit, “?Vahit tova xamim, horamue nan mu buluk san vamat vahe vul e Sabat, ma vapol ni naha? Vatakes, vatal rat vari ni. ?Midep, ngan ak be reitin?”ⁱ ⁶E xil lasakras lasa rilomun ni sepinien nan.^j

Iesu pispisi xa Hi ipet rat moletin xa di miling nenemien nan be tan

⁷E anien ak, Iesu pus kila xa rut moletin xa lasilasil ni xil di lale kis ni von totanen xil xa bos. Ma dei vole tei mi xil bit, ⁸“Melele xa moletin tei misilasil ni xouk e anien te tetelien tei, onatemanon ti tangan onahur von totanen xa bos mak mu. Vengan xosxa latesilasil ni moletin tei xa be eilep mak mu mili xouk,^k ⁹ma

melele xa imei, ngan xa tesilasil ni xouk mei ihiteni minuk ihit, ‘Umea e umaen eilep ak mei ihur voninom.’ Imak, ma xouk uhe unoun pe met moletin xil, e ha uhur von totanen xa misa tang. ¹⁰Misak ni, xosxa lasilasil ni xouk, ha utotan e von totanen xa tavos ti. Imak, ma ngan xa tesilasil ni xouk imei visaluk e ihiteni ihit, ‘Tua, amei nesao e von totanen xa bos inggak.’ Ti, moletin te nim ak isa merereen minuk pe met moletin xil vus. ¹¹Vengan ngan xil xa di lapol ni nene-mien nae be nesao, Hi ipol ni xil lihe tan. E ngan xil xa di lapol ni nenemien nae be tan, Hi ipet rat hisexil ihe nesao.”^l

¹²Di, Iesu biteni mi moletin xa tesilasil ni bit, “Xosxa opol ni anien tei, onasilasil ni ti tua nam xil, mu vatimol nam xil, mu ngan xil xa holesok nae holu e ladit sangas visaluk. Vengan xa xil lakila lasilasil ni xouk mun, e uhur rilomun ni naha xa otepol ni mi xil. ¹³E-e. Melele xa opol ni anien tei, ihos mak mu xa usilasil ni hoeo xil, moletin xil xa lasakras lakakao, ngan xil xa rut tenbexil mat, e ngan xil xa metexil bar. ¹⁴Vengan xa xil lasakras lasa xoles neta xa otepol ni mi xil. Imak, ma Hi ituxol xatuk e isa rilomun ni huite teni minuk e melengien xa ngan xil xa lamal pe met Hi limea rilomun ra maten.”^m

Iesu dei vole usil sexien xa moletin xil holu lasin silasilen na Hi tangan mei lava anien xa mahulong vatela

Mat 22:1-10

¹⁵Melele xa moletin tei xa de anien ak milong sepinien na Iesu, biteni mini bit, “!Sien iti mi ngan xil xa lianien vituei e anien xa mahulong na Hi e melele xa isak ni lelaxatien nan mei istal e ut etan!”ⁿ

^f13:35 1King 9:7-8; Ser 12:7; 22:5 ^g14:1 Luk 11:37 ^h14:3 Luk 6:9

ⁱ14:5 Mat 12:11; Luk 13:15 ^j14:6 Mat 22:46; 23:6 ^k14:8 Pro 25:6-7

^l14:11 Mat 23:12; Luk 18:14 ^m14:14 Sion 5:29 ⁿ14:15 Luk 13:29

¹⁶ Melele xa Iesu milong sepinien na Farasi ak, dei vole ak mini bit, “Vatei, eilep tei bit vapol ni anien tei xa eilep. Ma misilasil ba mi moletin xil holu. ¹⁷ Di, momal e melengien xati te anien ak, xi misil eloheoh nan tangan vaha vahit mesen ni mi moletin xil xa tesilasil ni xil vahit, ‘Mumei, holesok xil te anien ak mese tuei.’

¹⁸ “E xil vus lasin ni tangan lamei en vengang lanemi labit holesok sav xil be eilep mak mu mili anien ak. Tei e xil bit, ‘Inou natexal tan tei e niha mu nisao ni. Ve rin ak, nasakras namat.’

¹⁹ “Tei mun bit, ‘Inou natexal buluk te polien he xalu (10) tangan lilihi aean xa itei tan savan, e nabit nama mu nasak pis xil. Ve rin ak, nasakras namat.’

²⁰ “Tei mun bit, ‘Inou nateli rohon tang. Ve rin ak, nasakras namat.’^o

²¹ “Misak ni, eloheoh ak dilomun ba bit mesen sepinien xil ak mi eilep nan. E melele xa milonge, eilep ak ien mikat pupu, e biteni mi eloheoh nan bit, ‘!Ute-manon, uhe suse xil te metimal ak! Ha uleh hoeo xil, moletin xil xa lasakras lakakao, ngan xil xa metexil bar, e ngan xil xa rut tenbexil mat.’

²² “Tavehi ti, eloheoh dilomun e biteni mini bit, ‘Suv, napol sen holesok xil xa otesemae ni, e ut pipin ni moletin xil holu tamu.’

²³ “Ma eilep biteni mini bit, ‘Ha uhe ut xil ngasen e suse xil vus e ukes moletin xil limei, tangan isak ni nim mavan ipolu kuhi ni moletin xil. ²⁴ !E nabiteni minuk, tovuol e ngan xil xa natesilasil ni xil tetiamu likar pis ti anien ak!’” Melele xa Iesu ngganien bus, be reling nim ma Farasi ak ba.

Iesu pispisi xa ngan xil xa labit lavusili linem kuhi mu

²⁵ E melele xa Iesu di mikakao mikapis e metimal xil, vanut moletin xil holu di langgusili. Vatei, Iesu biles e biteni mi xil bit, ²⁶ “Xosxa moletin tei bit vahusil nou, eheien nan e nou ili eheien xa di e tamen, ninen, atou nan, horamue nan xil, tuneli e hineli xil, e xi mun tang. Xosxa namak ti, ma xi misakras vahe moletin navan.^P ²⁷ Ngan xil xa iexil ti tavei tangan lapo eivave te maten nae e lavusil xat nou, xil lasakras mei lave moletin navan xil.^q

²⁸ “Xosxa tei e xamim di minemi bit vahil nim tei xa mahulong, itotan mu e inem usili xa mani te nim ituxol mani eah. Ti, ipusi xa mani nan pipin mu tapin ti tangan ipol vuol ni nim ak. ²⁹ Maxani, ipol ni rute tang e napol vuol ni ti. Xosxa imak, ma moletin xil vus xa lipusi, liseppisili lihiti, ³⁰ ‘!Xi miling hen e polien te nim man, e misakras vapol vuol ni!’

³¹ “Nggusil nenemien ak, sexien ak nggoni suv toto tei xa mileh viton moletin xil taosen he xalu (10,000) tangan ha lavae vatel suv toto sav tei xa di be-mei del moletin nan xil xa labe taosen hanutap tei (20,000). Itiamu, xi itotan e inem kuhi xa xi nggur xeihen pipin tangan vavae vatel suv toto ak e moletin nan xil. ³² E xosxa pus kila xa tahur ti xeihen vapin, ma isil ti eloheoh nan xil liha lipus suv toto sav ak melele xa xi da tamu sotin tangan lisep ves suse tova te tomat. ³³ Ma, e hisit sexien ak, xamim vus munem kuhi mu. Xosxa xouk tasom osakras oling holesok nam xil vus, ma osakras mei ove moletin navan.”

^o14:20 1Kor 7:33

^P14:26 Dut 33:9; Mat 10:37-38; 16:24; Mak 8:34; Luk 9:23; 18:29; Sion 12:25

^q14:27 Mat 10:38; 16:24; Mak 8:34; Luk 9:23

**Iesu pispisi xa moletin xa nggusili,
di, mistokovein ni, xi nggoni sol xa
kekasen teni tovuol mun**

Mat 5:13; Mak 9:50

³⁴E Iesu misel xat vanut moletin xil bit, “Xamim munggoni sol. Sol bos. ?E xosxa xa kekasen teni be relingi, ma lik-ila liling rilomun ni itep? ³⁵Sol ak tavos ni ti tova, e vahos mak mu vahit laso ni vaha.^{§§} !Xosxa vurangemim di, ma mu-teong kuhi!”^r

**Iesu dei vole usil sipsip xa mikesae
tengan vapisen sexien xa Hi ien bei
valang ni ngan xil xa lakesae e tesaen
tengan mei lave moletin nan xil**

Mat 18:12-14

15 Vatei, moletin te *takis* xil del mo-letin tesa sav xil mun lamei visal Iesu tengen lateong ni pispisien nan xil. ²E melele xa *Farasi* xil del *titsa* xil te rae na Mosis lapusi, di laseputut ni labit, “Moletin ak di nggur pilei moletin tesa xil e di mingganien vituei mun del xil.”^s

³Ma Iesu dei vole ak mi xil bit, ⁴“?Xosxa tei e xamim, sipsip san xil labe handred tei (100) e tei e xil mikesae, ma xi ipol ni itep? Iling ngan tesav xil liti e valkesao lia husmunae e ha ilang ni ngan xa mikesae iha vuma ... ikameti.^t ⁵E melele xa ikameti, ihesi xi ihe holu xa ihe holu pupu, ipoe ite vatuvun, e itilomun ihe tim. ⁶E melele xa ituxoh tim san, ikes viton tuneli xil e ngan xil xa ladi sangas visali, e ihiteni mi xil ihit, ‘!Rihesi xir vengan xa nakamet sipsip savan xa tekesae!’ ⁷Nabiteni mi xamim, ngan xil te ut nesao di labesi xil mak mu melele

xa moletin tei takes xa mikesae e *tesaen* biles meulien nan tengen ihusil Hi, ili moletin xil holu xa labit lamal ngamu pe meten, ma labit linaviles ti.”

**Iesu dei vole usil mani xa mikesae
tengan vapisen sexien xa Hi ien bei
valang ni ngan xil xa lakesae e tesaen
tengan mei lave moletin nan xil**

⁸E Iesu dei vole tei mun bit, “?Xosxa atou tei miling kuh *mani* nan xa be he xalu (10) di, e pusi xa tei e xil mikesae, ma ipol ni itep? Isahan laet, itaveas e nim, e ilang kuhi ni mani xa mikesae e ut xil vus iha vuma ... ikameti. ⁹E melele xa mikameti, ikes viton timue nan xil e ngan xil xa ladi sangas visali e ihiteni mi xil ihit, ‘!Rihesi xir vengan xa nakamet mani navan xa tekesae!’ ¹⁰Nabiteni mi xamim, *masxaxa* xil na Hi labesi xil mak mu melele xa moletin tei xa mikesae e tesaen biles meulien nan tengen ihusil Hi.”

**Iesu dei vole usil nat moletin lu xa
lukesae tengen vapisen sexien xa Hi
ien bei valang ni ngan xil
xa lakesae e tesaen tengen
mei lave moletin nan xil**

¹¹Iesu dei vole teimun bit, “E rute tei, tiramue tei da del natneli lu. ¹²Vatei, ngan xa be tasite mei biteni mi tamen bit, ‘Tata, ha useti holesok nam xil xa ihe namel. Ti, usa navan taxeak.’ Ma tamealu miseti holesok nan xil mi xalu.

¹³“Melengien vahis mitavi, e natneli xa be tasite pos vuol ni tan nan e holesok sav nan xil, nggur xat mani teni, e be reling tim sa tamen ba. Di, be rute tei xa

^{§§}**14:35** Sol xa tetiamu tenamese ti vaxoni naxoni sol te xosali. Misak ni kekasen teni mikila vahe relingi. Koute te vole ak mak: moletin xa nggusil pis Iesu, di, be relingi, xi nggoni sol xa kekasen teni be relingi. Meulien nan misakras vapol ni ti mun neta xa vahos.

^r**14:35** Mat 11:15; 13:9; 13:43; Mak 4:9,23; Luk 8:8 ^s**15:2** Luk 5:30

^t**15:4** Esek 34:11,16; Luk 19:10

be sotin e purun sen mani nan e sexien xil te suse.^u ¹⁴E melele xa horamue ak tepos vuol ni mani nan xil bus, rute xa da en, us tamus ti e anien tovuol. Misak ni, mae kekaten bemei e horamue ak mei be hoeo vari. ¹⁵Misak ni, ba pol mi moletin tei te rute ak xa misila tangan vati vatel vueili san xil e vahangan xil. ¹⁶E melele xa di bangan xil mak, ien bei tangan vaa ti anien a vueili xil ak, e moletin tovuol xa mei vasa anien mini vahe an. ¹⁷Di, vatei, minem kila sung e biteni mi xi tasen bit, 'Moletin te polien xil vus na tata nava, anien ae holu. E inou, navehi ti, mae ikar vin nou inggak. ¹⁸Nimea, niha mun nipus tata nava, E melele xa nipusi nihiteni mini nihit, "Tata, napol misa li pe met Hi e pe metom.^v ¹⁹Natapin ti mun tangan okes nou ni natumali. Upol ni minou ixoni ngan xa nabe moletin te polien tei nam."²⁰ Ma mea, e nggur suse tangan itilomun ihe tim sa tamen.

"E melele xa di tamu sotin vuteili ra tim, tamen pusi. Melele xa tamen pusi de suse, ien misae en, e mitamea miloh be visali. Melele xa duxoli, miso hen nggaxol natneli e pesum ni vin. ²¹E natneli biteni mini bit, 'Tata, napol misa li pe met Hi e pe metom. Natapin ti mun tangan okes nou ni natumali.'

²²"Tasepin ti mu vavus, e tamen di mikes moletin te polien nan xil lamei e biteni mi xil bit, '!Mutemanon! Muleh eising xil xa bos vamei mei musing xole ni. Muling ring e vakuhen tangan vapisen ni xa xi be natuxoli. E musa sandel ihesi tangan vapisen ni xa tave hoeo ti mun. ²³!Ti, muhas sulut buluk tova xa mikaio kuhu tangan ripol ni anien tei xa mahulong, vangan xa rabesi xir holu xa holu pupu xosali! ²⁴Rabesi xir vangan xa natuxoli temat, e xosali, nggoni ngan xa

meul rilomun. Reitin, xi tekesae, e taxeak, rakameti mun.' Ma xil langganien, lakikei, e labol del sien.^w

²⁵"Melele xa holesok xil ak di mistal, horamue xa be muimol nan tete naho. E melele xa dilomun bemei sangas visal tim, milonge xa moletin xil di lakikei e di labol. ²⁶Ma mikes moletin te polien tei bemei visali, e misisi bit, '?Naha xiak?'

²⁷"E xi bit rilomun ni mini bit, 'Tumali dilomun bemei tim e tamom bas sulut buluk tei xa mikaio kuhu vangan pusi xa natneli meul tang da e bemei mun mi xir.'

²⁸"E melele xa muimol ak milonge mak, ien mikat, e bit nave ti nim. Ma tamen mistal be hale e dakesi tangan vahe nim vatel xil. ²⁹E muimol misa sepinien ba mi tamen bit, '!Uteong ni nou! !Huram holu ngamu di napol minuk nggoni ngan xa nabe moletin te polien nam tang! !Inou natateong ras ni ti raem! ?E naha tova iaxa otesa ni minou ven? !Neta tovuol! Otasa pas nani tova minou tangan nipol ni anien tova itel timue navan xil. ³⁰!E melele xa natumali xai bemei mistal mun e tim, ngan xa tepurun sen holesok nam xil e hoeaso xil, omea obas sulut buluk xa mikaio kuhu ven!'

³¹"E tamen bit rilomun ni mini bit, 'Natuxoli, vehakut xouk oda visal nou, e holesok xil vus navan be nam.^x ³²E momal tang tangan ripol ni anien ak, e rihesi xir holu ven. Vangan xa tumali temat, e taxeak, di meul mun. Reitin, xi tekesae, e taxeak, rakameti mun."

Iesu dei vole usil vat tei xa pol ni vatin tangan vapisen sexien xa moletin xil livue xat xil tangan lihe ut nesao

16 Melele xa Iesu di tamu e suse tangan vahe Serusalem, dei vole ak

^u15:13 Pro 29:3 ^v15:18 Sam 51:4 ^w15:24 Efes 2:1,5; 5:14

^x15:31 Sion 17:10

mi *moletin nan xil* bit, “Vatei, eilep tei da xa pol ni bisnis tei, e xi teling moletin te polien nan tei tangan vahe vat te bisnis ak. Vat ak pol ba vuma ... eilep nan nggur longeongen bit vat nan di purun holesok nan xil. ²Ma mikes vat ak bemei visali e biteni mini bit, ‘?Naha iaxa di nalonge usiluk xiak? Uha utis usil polien xil vus xa di otepol ni e rin navan, vengon xa, navehi ti, niso ratuk ra polien ak.’

³“Melele xa vat ak milonge mak, misep tasen bit, ‘Suv navan vaso rat nou ra polien navan xiak. ?Xosxa imak, ma nipol ni naha vari? Veok taxeih ti vapin tangan nata len tan, e nabe unoun pupu tangan naram ni moletin xil ve mani. ⁴!Aha! Nakila naha xa nipol ni. Xosxa nipol ni imak, ma melele xa nivus ra polien ak, timue navan xil liti e lihur pilei nou e tim sae xil.’

⁵“Ma vat ak mikes kekes ni moletin xil xa kaon nae di del suv nan. Ngan xa bemei diamu, vat ak misisi bit, ‘?Kaon nam be naha del suv navan?’

⁶“E moletin ak bit rilomun ni mini bit, ‘Nateleh tiram oel te *olip* tehe handred tei (100).’

“Ma vat biteni mini bit, ‘Utemanon, uhur uvei nam, e utei kaon nen imei etan ituxoh tiram oel hanutap lu e he xalu mun (50) kestang.’

⁷“Di, mikes ngan tesav bemei e misisi bit, ‘?E xouk, kaon nam be naha?’

“E xi bit rilomun ni bit, ‘Nateleh bak pulaoa tehe taosen tei (1000).’

“E vat biteni mini bit, ‘Uhur uvei nam e utei kaon nam imei etan ituxoh bak handred tol e he sav (800) kestang.’

⁸“Melele xa suv na vat ak milonge xa pol ni vatin mak, suv ak mei biteni mini bit, ‘Tave ti neta xa otepol ni vatum

temak, sexien nam di pisen metisouen nam vengon xa di onem usil melele xa ti imei e melele xa niso ratuk ra polien ak.’”^y

Di, Iesu bit kil koute te vole ak mi moletin xil bit, “Nabiteni mak vengon xa moletin xil te ut etan di lapol ni vatixil melele xa lapol del tua nae xil tangan linem ihos mi xil e melele xa ladi tamu e ut etan. E sexien nae bos mak mu mili sexien na ngan xil xa ladi e miehen. ⁹E nabiteni mi xamim, mani namim misakras vata vahehi. Ma muleh moletin sav xil mei lihe timue namim xil e mututou ni xil itel holesok namim xil te ut etan ak. Vengon xa melele xa mustokovein holesok namim xil te ut etan, timue namim xil lihur pilei xamim e rute xa ita ve-hakut e ut nesao.

¹⁰“Moletin xa di milaxat kuh neta tei xa hokorong, xi mikila valaxat kuh neta tei xa mahulong.^z E moletin tei xa di purun neta tei xa hokorong, xi mikila mun vapurun neta tei xa eilep. ¹¹Ve rin ak, xosxa otepol ni sexien xil xa tepisen ni xa moletin xil lasakras lanesi e xouk vatel holesok nae xil te ut etan, ma Hi mun misakras vanesi e xouk vatel holesok hos nan xil xa be eilep mak mu mili. ¹²E xosxa mutalaxat kuh holesok xil ti te ut etan xa Hi di milingi e hemim, ma misakras vasa ti mun neta mi xamim e ut nesao.

¹³“Moletin te polien tei misakras vapol mi suv lu. Maxani, ien iat tei, e eheien nan iti e tei xalu. Mu ilong xat tei, e iketeh isa ni tei xalu. Osakras omot mi Hi e mi mani mun.”^a ¹⁴Melele xa *Farasi* xil lalong sepinien xil ak, lasep pepamen ni Iesu, vengon xa eheien nae di e *mani* holu.

Iesu misep usil sexien xa Farasi xil langgur xoteh rae xil na Hi

Mat 11:12-15; 5:31-32; Mak 10:11-12

¹⁵E Iesu biteni mi Farasi xil bit, “Xamim iaxa di mupol ngegeh tangan vasak ni mosav xil lanem labit xamim mumal tevi, e Hi mikil nenemien namim. Vengan xa holesok xil xa moletin xil di lanemi labit bos, ngan ak pupuru pupu pe met Hi.^b

¹⁶“Tetiamu, *rae xil na Mosis* e tisen na *provet* xil latepisen suse na Hi mi moletin xil ba duxoh melele xa Sion teme i di tebaptaes ni moletin xil. E xosali iha, di labithiten longeongen hos usil suse xa Hi mei be suv toto te meulien na moletin xil. Longeongen hos ak di mikapis e ut xil ngasen, e moletin xil holu di lakal tangan lasak ni Hi mei vahe suv toto te meulien nae.^c

¹⁷“Neta sav xos ut nesao e ut etan lalivus e melengien tei xa ti imei, e mavulut sepinien xil vus te rae xil na Hi, xeihen teni misakras vavus vatova.^d

¹⁸Ve rin ak, tiramue xa mistokovein atou nan e nggur atou sav di pol ni tesaen dela. E tiramue xa miteli del atou xa testokovein tiramue nan, xi mun di pol ni tesaen dela.”^{* e}

Iesu pispisi usil pangasien xa imei e ngan xil xa esaean nae e mosav xil tovuol

¹⁹Iesu mitumul mi moletin xil bit, “Vatei, moletin tei da xa holesok nan holu. Xi mising ni eising xil xa bos e mani nan be holu, ma mikila vaxal holesok xil ngasen xa ien bei. E meulien nan, xi milonge bos vehakut.²⁰ E sangas visal

puiteh te vloh xa di mikapis xol nim man, hoeo tei di pat, hisen Lasaros. Holesok nan tovuol, misakras vakakao, e tenben be menuk xil kestang.²¹ E melele xa dat mak, kuli xil lamei di lamun menuk nan xil. E Lasaros ien bei pupu ni tangan vaa saxut anien xa moletin xa holesok nan holu di miso ni ba.^f

²²“Ludi mak ba vuma ... hoeo ak mat, e *maxaxa* xil langguri ba lalingi dotan vituei del avu *Ebrahim* e anien xa mahulong e ut nesao. Tave nousav ti, moletin xa holesok nan holu mun mat, e ladihin ni.²³ E moletin ak ba de ut sa Temat, e milong pangas xi pupu. E melele xa miketeh be sotin, pus avu Ebrahim nesao, e Lasaros dotan de rin.²⁴ Misak ni, xi mikei be nesao bit, ‘!Avu Ebrahim, iem isae li e nou! Usil Lasaros imei tangan isa rut oei nimu ni tangan vasak ni meok vamerir timoli. Vengan xa nalong pangas nou pupu e upang ak.’

²⁵“E Ebrahim biteni mini bit, ‘Natuxoli, unem pisi mu. E meulien nam tetiamu, xouk otepus kuh hosien vehakut, e Lasaros tepus longpangasien kestang. E taxeak, xi sung di pus hosien inggak, e xouk, di olong pangasuk inggaxai.²⁶ E teimun, poal tei xa mahulong da xoteh xouk ra xamel xa be tan xa be tan e hoxalite teni tovuol. Misak ni xamel malsakras malihur xotehi malihat visal xouk. E xouk e ngan xil mun xa ladi delak musakras mumei visal xamel.’

²⁷“Ma moletin xa holesok nan tehe holu biteni mini bit, ‘O avu Ebrahim, imak ma nadakesuk li tangan usil Lasaros ihe tim sa tata navan.²⁸ Vengan xa e rute ak, tuxoli lim (5) ladi en. Umaen ni Lasaros ha isel xat xil tangan

^{*}**16:18** Hi bit moletin xa miteli nastokovein atou nan ti. E, e melengien xil na Iesu, Farasi xil holu di latepol ni sexien ak tehe holu.

^b**16:15** Mat 23:28; Luk 18:9-14; Pro 24:12 ^c**16:16** Mat 11:12-13

^d**16:17** Mat 5:18 ^e**16:18** Mat 5:32; 19:19; Mak 10:11-12; 1Kor 7:10-11

^f**16:21** Mat 15:27; Mak 7:28; Luk 15:16

xil sung linamei ti e ut te longpangasien ak.'

²⁹“E Ebrahim bit rilomun ni mini bit, ‘Rae xil na **Mosis** del sepinien na provet xil tetiamu di ngamu xa di misel xat vati-mol nam xil. Momal tangan ti lilong xat sepinien xil ak.’

³⁰“E moletin ak bit rilomun ni mini bit, ‘!E-e! !Avu Ebrahim, ngan ak tapin ti mu! E vahit moletin tova vamea rilomun ra maten e vahe visal xil, ma xil lipus kila sung, e lihiles meulien nae ra sexien tesa nae xil.’

³¹“E Ebrahim misa sepinien kor mini bit, ‘Xosxa xil latalong xat ti rae xil na Mosis e sepinien na provet xil, ma lasakras lalong xat sepinien na moletin tei xa mea rilomun ra maten.’”^g

**Iesu pispisi usil suse
te tesaen e suse te neketen**

Mat 18:6-7,21-22; Mak 9:42

17 Iesu biteni mi **moletin nan xil** bit, “Be reitin xa sexien xil xa ipol ni moletin imot e tesaen ti imei. !E isa pupu mi moletin xa be suse te tesaen xil ak xa bemei e mosav xil! ²Vengan xa pangasien xa Hi isa ni mi ngan xil xa di lapol ni moletin tei xa taxeih ti e neketen nan mot e tesaen isa xa isa pupu. Reitin, pangasien xa isa ni mi xil ili longpangasien na moletin tei xa labar xat hat tei xa mahulong de hiraen e laterir ni be huinep te tas. ³!Ma muxouxou kuhi xa munapol ni tuemim xil ti e neketen linamot e **tesaen!**^h

“Xosxa tumali e neketen di pol ni tesaen tei ba minuk, umal ni. E xosxa xi biles meulien nan ra tesaen ak, ma uketeh ihos rilomun mini. ⁴E neta sav xos tumali ak pol ni tesaen ba minuk

be valu e he sav (7) e melengien tei, e, e melele xil ngasen, xi bemei visaluk e biteni minuk bit, ‘Napol misa pupu li minuk e ninapol ni ti mun vari namak,’ xa momal xa uketeh ihos rilomun mini.”

⁵Melele xa moletin nan xil lalonge mak lasis Iesu labit, “O Suv li, upol ni neketen namem mei ixeh mu.”ⁱ

⁶Ma xi biteni mi xil bit, “Reitin xa neketen namim hokorong pupu. Vengan xa xosxa neketen namim hokorong ngogoni tutut utiei tei, ma mukila mupol ni merekel xil ixoni ngan xa muhiteni mi vatiei xa mahulong xiak muhit, ‘!Put ratuk ra tan ak, e ha, ulih xouk tasom ute tas inggaxor!’ e xi ilong xat rae namim.”^j

**Iesu pispisi xa momal tangan
moletin xil na Hi lipol ni
nenemien nae mei ihe tan**

⁷Iesu biteni mun mi moletin nan xil bit, “Xamim mukil sexien na masta tei ngamu xa di misil slev nan tangan ha vapol e naho nan mu valaxat sipsip san xil. Melele xa slev nan pol bus, masta nan misakras vahiteni mini vahit, ‘!Amei, utotan kuhi e uanien!’ ⁸!E-e, sexien na masta tei tamak ti! Xi ihiteni mi slev nan imak ihit, ‘Ha usak mesen anien avan mu. Ti, using xoles eising nam e uleh anien avan imei. Utatil nou mu nianien. Ti, xouk sung okila uanien.’ ⁹?E midep? ?Masta ak imes slev nan vengan xa di nggusil naha xa di misemae ni mini? E-e, misakras. ¹⁰E hisit sexien ak, melele xa mupol sen polien xil xa Hi biteni mi xamim tangan mupol ni, momal tangan muhiteni tang muhit, ‘Xamem mabe slev nan xil kestang, e di mapol nggusil naha xa Hi di misa ni mi xamem tangan mapol ni.’”

^g16:31 Sion 11:44-48 ^h17:3 Mat 18:15 ⁱ17:5 Mak 9:24

^j17:6 Mat 17:20; 21:21

**Iesu leh rerat mesien leporsi[†] ra
moletin he xalu (10)**

¹¹ Melele xa Iesu del moletin nan xil di langgusil suse tangan lave taon te hal **Serusalem**, xil langgo provins te hal Kaleli e langgur xoteh provins te hal **Sameria** laba.^k ¹² Melele xa xil lakakao labe metimal tei, labisu ni moletin he xalu (10) e suse xa mesien **leporsi** di bas purun tenbexil. Melele xa lapus Iesu, dit lasoh sotin^l ¹³ e lakei ba ni labit, “!Suv Iesu! !Iem isae li e xamem!”^m

¹⁴ Iesu miketeh ba e biteni mi xil bit, “Muha, mupisen xamim mi **pris** xil tangan lilepis kuh tenbemim.” E melele xa moletin xil ak langgusil suse nae laba, tenbexil mei memese rilomun ra mesien nae.ⁿ

¹⁵ Melele xa tei e xil pus kila xa tenben mei memese rilomun, xi dilomun bemei visal Iesu, e miki be nesao ni memesien xil ba mi Hi. ¹⁶ Moletin ak mitingeiril pe met Iesu e misa memesien nan mini. E moletin ak tave ngan Siu ti, be ngan **Sameria**. ¹⁷ E Iesu misis moletin nan xil bit, “Moletin he xalu (10) iaxa tenbexil temei temese rilomun. ?Ngaran tesav xil xa labe hat e he sav (9) ladi xave? ¹⁸ Moletin ak tave Siu ti. ?Veneh ma xi kestang dilomun bemei tangan vasa memesien nan mi Hi?”

¹⁹ Misak ni, Iesu biteni mi moletin ak bit, “Umea e uhusil suse nam uha. Neketen nam iaxa tesak ni tenbom mei memese.”^o

**Iesu pispisi usil sexien xa Nat
Moletin imei rilomun ixo en**

Mat 24:23-28,37-41

²⁰ Vatei, rut **Farasi** xil mei lasis Iesu labit, “?Hi mei ihe suv toto na moletin xil vilieh?”^p

E Iesu bit rilomun ni mi xil bit, “Lelaxatien na Hi namei ti naxo suse xa moletin xil lakila lipusi ni metexil. ²¹ Moletin ti misakras vahiteni vahit, ‘!Pus ti mu, xi tak!’ mu ‘!Iaxa da inggaxor!’ vengana xilaxatien na Hi di mi xamim ngamu, e tine ngan xil xa xi be suv toto te meulien nae.”^q

²² Di, Iesu biteni mi moletin nan xil bit, “Melele te xeih xil ti imei, e inou ninara ti mun visal xamim. E melengien xil ak, iemim ti ihei tangan Nat Moletin imei isak ni xamim mei muti e hosien itela, tave ti neta xos ihe te melengien tei takes. E nastal ti e melengien xil ak ti. ²³ E mulong moletin xil lihit, ‘!Mupus ti mu Nat Moletin iaxor!’ mu ‘!Xi tak!’ E munaha ti e munahusil xil ti.”^r ²⁴ Nabiteni mak mi xamim, melengien xa Nat Moletin imei rilomun en moletin xil vus lipus kila e litemanin ni ixoni melele xa lapus an milangas e miehen teni nggur vuol ni tilang hat nggo rin tei ba duxoh rin sav mun. ²⁵ E itiamu, xi ilong pangas pupu ni xi, e moletin xil te xosali ak lisin ni.^s

²⁶ “Melengien xil na Nat Moletin mei istal ixoni melengien xil na **Noah**!”^t ²⁷ E melele nen ak, moletin xil ngasen di lateanien, di latemun, e di lateteli teha

[†]**17:10** Leporsi be mesien xa pol ni hilbe moletin di mat, misak ni menuk xa da en bo. Siu xil labit mesien leporsi misa mak mu mili mesien sav xil. Moletin xa ngguri natuxol ti moletin sav xil e ita tasen tang.

^k**17:11** Luk 9:51; 13:22; 9:52; Sion 4:4 ^l**17:12** Lev 13:46

^m**17:13** Mat 9:27; 15:22; Luk 18:38 ⁿ**17:14** Lev 14:2-3; Luk 5:14 ^o**17:19** Luk 7:50; 18:42 ^p**17:20** Sion 3:3; 18:36 ^q**17:21** Mak 13:21; Luk 17:23

^r**17:23** Mak 13:21; Luk 17:21; 21:8 ^s**17:25** Mat 16:21; 17:22-23; 20:18-19; Mak 8:31; 9:31; 10:33-34; Luk 9:22; 18:32-33 ^t**17:26** Sen 6:5-8; 7:6-24; Sen 6:5-12

tetuxoh melengien xa Noah tehe tuturil nan xa mahulong. Latetemanin, e oei teleh xol rute xil vus e moletin xil vus latmerir.¹¹

²⁸“Melengien xil na **Lot** ^{v29}E melele xa Lot temea tehe reling moletin xil te hal **Sodom**, upang e hatupang xil texo ut nesao temei e tan e tehas lelen moletin xil vus.^w ³⁰E melengien xa Nat Moletin mei istal en ixoni melele xalu ak xa moletin xil latetemanin ni.

³¹“E melengien nen ak, xosxa moletin tova di mingel e hale, mesal ihe tovuol tangan vatilomun vahe nim e vahur neta tova nan. E xosxa moletin tei di pol e naho, xi nava ti mun tim tangan vahur neta tova ra tim san.^x ³²Munem usil longpangasien xa testal e meulien na atou na Lot.^y ³³Ngan xil xa lasak pisi tangan likenin meulien nae ve xil tang, ma meulien nae ikesae ra xil. E ngan xil xa limaen meulien nae ikesae, ma xil iaxa likamet meulien sal.^z ³⁴Nabiteni mi xamim, e melele nen ak, tiramue xal atou nan lalipat e rong tei takes, e Hi ihur rat tei xalu ihe visali e ut nesao, e teimun isin ni e ilingi ita. ³⁵Atou lu ti lalipol ni anien e ut tei takes, e Hi ihur rat tei xalu ihe visali e ut nesao, e teimun isin ni e ilingi ita.” ³⁶‡

³⁷Sepinien nan misak ni moletin nan xil lasisi labit, “?Suv, Nat Moletin imei rilomun e rute xave?”^a

Ma Iesu bit rilomun ni mi xil bit, “Moletin xil vus lipus kil rute xa Nat Moletin itilomun imei en vengan xa imei itel pan-

gasien holu. Reitin, lipus kila ixo hisit sexien xa di lapus kil rute xa neta tei mat da en e melele xa lapus vanut angelu xil ladi e ut tei.”[¶]

Iesu dei vole usil tunau tei e moletin te lepisien tei tangan vapisen sexien te sisen

18 Di, Iesu dei vole tei mi moletin nan xil tangan vapispisi mi xil xa ti lisis vehakut e linamaen nenemien nae ti namot.^b ²Xi biteni mi xil bit, “E metimal tei, moletin te lepisien tei da, xa di tamerere ni Hi mu moletin sav xil ti. ³E metimal ak, tunau tei da xa vehakut ba pus moletin te lepisien tangan vatakesi vahit, ‘Moletin tei di pol tavos ti minou. !Umea, ulepis rin namel e upol ni naha xa momal e rin navan!’

⁴“E melengien xil vus, tunau ak dakesi dakesi ba vuma ... moletin te lepisien ak pol ni naha xa misisi ven. Vengan minemi bit, ‘Tave ti neta xa natamerere ni Hi mu moletin xil ti, ⁵e vengan xa tunau ak dit dakes nou ve tutouen vehakut mak, bos xa nipol ni naha xa momal e rin nan. Vengan xa xosxa ninapol ni ti, ma xi ixulehi imei vehakut e mei nitalang.”^c

⁶Di, Iesu bit kil koute te vole ak mi moletin xil bit, “Neta sav xa sexien na moletin te lepisien ak tamal ti, mulonge xa biteni xa ipol ni naha xa momal e rin na tunau ak. ⁷?Ma munemi midep e rin te sexien na Hi? ?Munemi mubit Hi xa momal mak mu mili moletin ak misakras

‡**17:36** Rut vanuvei matu xil te Luk laling sepinien ak xa nggoni Mat 24:40 xa bit, “*Moletin lu ti lalipol e naho tei takes, e Hi mei ihur rat tei xalu ihe visali e ut nesao, e teimun isin ni e ilingi ita.*”

¶**17:37** Sepinien xati teni bit, “*voltsa,*” tuman tei xa mahulong xa di langga lakapis xol neta tei xa mat.

^u**17:27** Sen 7:6-23 ^v**17:28** Sen 19:1-28; Sen 18:20-21; 19:1-14

^w**17:29** Sen 19:15-19 ^x**17:31** Sen 19:17; Mat 24:17-18; Mak 13:15-16

^y**17:32** Sen 19:26 ^z**17:33** Mat 10:39; 16:25; Mak 8:35; Luk 9:24; Sion 12:25

^a**17:37** Siob 39:30 ^b**18:1** Rom 12:12; Kol 4:2; 1Tes 5:17 ^c**18:5** Luk 11:7-8

valepis rin na moletin nan xil ixo sexien xa momal? ?Munemi mubit napol ni ti naha xa momal e rin na ngan xil xa tekes xil labe nan, xa di ladakesi ve tutouen melengien e vongien? ⁸ Reitin li nabiteni mi xamim, Hi itemanon ilepis rin nae ihusil sexien xa momal e ipol ni ihos mi xil. ?E melele xa Nat Moletin imei rilomun mi moletin xil te ut etan, munemi mubit ikameti xa neketen nae nggeih en, mu nakameti ti?”

Iesu dei vole usil sexien te sisen na Farasi e moletin te takis tangan vapisen ni xa ti riling nenemien nar ihe tan melele xa rasis

⁹ E melele nen ak, rut moletin xil ladi inggak xa lanemi labit lamal ngamu pe met Hi ve polien hos nae xil. E lanem male ni mosav xil. Ma Iesu dei vole ak mi xil bit, ¹⁰ “Vatei, moletin lu lube vloh te **Nim Eo** na Hi tangan lalisis. Tei xalu be **Farasi**, e teimun be moletin te **takis**. ¹¹ Ngan xa be Farasi mikakao bemei sangas visal puiteh te Nim Eo e misoh misis bit, ‘Hi, namesuk vengan xa inou nataxoni mosav xil ti xa di labe hokan, xa di lapol ni tesaen ba xat mosav xil, e xa di laleh atou na mosav xil. Namesuk mun vengan xa inou nataxoni moletin te takis ti xa da iaxor. ¹² Vengan xa inou di nabal ni anien ve sisen melengien lu e wik tei, e di nasa taet te holesok navan xil minuk.”^d

¹³ “E moletin te takis misoh de sotin vuteili ra Nim Eo e tapet rat vatin ti vahe nesao vengan xa bit napin ti tangan vaketeh vahe ut nesao. Melele xa minem usil meulien tesa nan, simeten mereh e misis bit, ‘O Hi, iem isae li e nou! !Nabe moletin tesa tang!”^e

¹⁴ Ma Iesu biteni mi xil bit, “Nabiteni mi xamim, melele xa lusus bus e ludilo-

mun lube tim salu, moletin te takis iaxa momal pe met Hi, e tave Farasi ti. Vengan xa moletin xil xa di lapet rat xil labe nesao, Hi ipol ni xil lihe tan. E ngan xil xa di laling nenemien nae be tan, Hi ipet rat xil lihe nesao.”^f

Iesu misa tuxolxatien mi horamue xil

Mat 19:13-15; Mak 10:13-16

¹⁵ E melele nen ak, rut moletin xil di laleh tutut horamue nae xil labe visal Iesu tangan valing hen e xil e vasa tuxolxatien nan mi xil. E melele xa **moletin nan xil** lapus naha xa moletin xil di lapol ni, lasikoe xol xil e labul xat xil ven. ¹⁶ E Iesu mikes tutut horamue xil ak lamei visali e biteni mi moletin nan xil bit, “Munasikoe xol xil ti. Mumaen xil tang tangan limei visal nou. Vengan xa Hi be suv toto e meulien na hisit moletin xil xa langgoni tutut horamue xil ak. ¹⁷ Reitin li nabiteni mi xamim, moletin xil xa lasakras laling nenemien nae vahe tan vaxoni tutut horamue tei, lasakras lavur tuxolxatien te lelaxatien na Hi e meulien nae.”^g

Iesu pispisi xa nggeih pupu mi ngan xil xa holesok nae holu tangan lamaen Hi mei vahe suv toto te meulien nae

Mat 19:16-30; Mak 10:17-31

¹⁸ E melele nen ak, vat tei na Siu xil bemei visal Iesu e misisi bit, “Titsa, xouk obos li mak. ?Nipol ni naha tangan nihur meulien sal?”^h

¹⁹ E Iesu misis rilomun ni ba mini bit, “?Veneh ma obit nabos? Moletin ti tavos, Hi kestang bos. ²⁰ Xouk okil rae xil na Hi ngamu,

‘Munakan ni atou mu tiramue na mosav ti. Munahas vin ti moletin.

Munakan ni ti neta.

^d18:12 Sion 14:20; Mat 23:23 ^e18:13 Luk 23:48; Sam 51:1

^f18:14 Mat 23:12; Luk 14:11 ^g18:17 Mat 18:3 ^h18:18 Luk 10:25

Munaluvos ni his mosav xil ti.

Mumerere ni tamemim e ninemim xil.” (Eks 20:12-16)ⁱ

²¹ Vat ak bit rilomun ni mini bit, “E melele xa natehe horamue mei duxoh xosali natahur xoteh ti rae xil ak.”

²² Melele xa Iesu milonge mak, biteni mini bit, “Neta tei mun otapol ni ti mu. Upos vuol ni holesok nam xil e useti mani teni mi hoeo xil. Imak, ma e ut nesao, holesok nam xil imei ihe holu mu. Ivus, ti umei uhusul nou.”^j ²³ E melele xa vat ak milong sepinien na Iesu, xi milonge misa vengang xa holesok nan holu pupu.

²⁴ Melele xa Iesu pusi xa vat ak milonge misa biteni mi moletin xil bit, “Nggeih pupu mi ngan xil xa holesok nae holu tangan lamaen Hi vamei vahe suv toto te meulien nae. ²⁵ Minggeih pupu tangan **kamel** tei vakital vaxo vulut nitil tei. E minggeih mak mu mili mi moletin tei xa holesok nan holu tangan Hi vamei vahe suv toto te meulien nan.”

²⁶ Ngan xil xa lalong sepinien na Iesu lasisi labit, “?Imak, ma visi vari ikila ihur meulien sal?”

²⁷ Ma Iesu bit rilomun ni mi xil bit, “Reitin xa moletin xil lasakras lapol ni neta tova tangan vasak ni xil lavur meulien sal. E Hi mikila vahiteni xa visi iaxa ihur meulien sal.”^k

²⁸ Di, Pita biteni mini bit, “?E midep e xamem? Matestokovein holesok xil namem e mei manggusil xatuk.”

²⁹ E Iesu biteni mi moletin xil bit, “Nakila. E reitin li nabiteni mi xamim xa Hi isa huite teni mi ngan xil vus xa las-tokovein tim sae, mu atou nae, mu tua nae xil, mu tamexil, mu ninexil, mu horamue nae xil mun tangan lavusil xat Hi

e lasak ni mei vahe suv toto e meulien nae. ³⁰ Reitin, Hi isa xoles neta mi xil xa ihe holu mak mu ili holesok xil ak e ut etan. E, e ut nesao mun, xil lihur meulien sal.”

Iesu misep usil maten nan vatei mun

Mat 20:17-19; Mak 10:32-34

³¹ Iesu mileh viton moletin nan xil xa labe lu e le tei (12) ba ladi se xil, e xi biteni mi xil bit, “!Muteong ni nou! Tax-eak, di raba ve **Serusalem**. E rute ak, holesok xil vus xa **provet** xil tetiamu di latehit lelen ni usil Nat Moletin mei istal ihe reitin.^l ³² Rut moletin xil limaen ni ihe he moletin xil xa latave Siu ti. E ngan xil lisep purun ni, lipol isa mini, e likusah iha xati.^m ³³ Limeas pangasi, e lihasi imat. E melengien tol nen, xi imea rilomun ra maten.”

³⁴ E moletin nan xil latanem kil ti holesok xil ak. Koute te sepinien nan ming-gus ra xil. Misak ni xil latakil ti naha xa Iesu di misep usili.ⁿ

Iesu pol ni moletin tei xa meten bar mei miketeh rilomun

Mat 20:29-34; Mak 10:46-52

³⁵ Melele xa Iesu del ngan xil xa di langgusili lamei sangas ni taon te hal Seriko, moletin tei xa meten bar dotan de seri suse e di miram ve tutouen.

³⁶ Melele xa milong vanut moletin xil ak di lakakao lali rute xa da en, misis xil bit, “?Naha xiak?”

³⁷ E xil labit rilomun ni mini labit, “Iesu te hal Nasaret iaxa mei mitavi ba iaxai.”

³⁸ Melele xa metevar ak milonge mak, mikei nggeih bit, “!Iesu, nat suv toto **Deved!** !Iem isae li e nou!”^o

ⁱ18:20 Dut 5:17-20; Dut 5:16 ^j18:22 Mat 6:20 ^k18:27 Mak 14:36

^l18:31 Luk 24:25-27,44 ^m18:32 Luk 9:22,44 ⁿ18:34 Mak 9:32

^o18:38 Mat 9:27; 15:22; Luk 17:13

³⁹ Melele xa biteni mak, moletin xil xa di lakakao diamu labul xati labit, “!Utat votei!”

E tavei ti neta xa mak, xi miki nggeih pilei sung bit, “!O nat suv toto Deved! !Iem isae li e nou!”

⁴⁰ E melele xa Iesu milong keien nan, misoh e biteni mi moletin xil bit, “Mutel moletin xai vamei inggak.” E melele xa bemei visali, Iesu misisi bit, ⁴¹ “?Iem bei tangan nipol ni naha minuk?”^p

E metevar ak biteni bit, “Suv, ieok bei li tangan niketeh rilomun.”

⁴² Ma Iesu biteni mini bit, “!Bos, keteh rilomun! Metom xalu mei lubos rilomun nggusil neketen nam.”^q

⁴³ Vatakes, metevar ak mikila vaketeh rilomun. Ma misa memesien ba mi Hi e nggusil xat Iesu. Melele xa vanut moletin xil ak lapusi, xil vus lames Hi ven.

Moletin tei te takis biles ra tesaen nan e Hi miteh meulien en

19 Melele xa Iesu di tamu nggusil suse ba be Serusalem, di mika pas taon te hal Seriko. ² E taon te hal Seriko, Siu tei xa be vat na moletin te **takis** xil da en. Hisen Sakias xa holesok nan xil holu. ³ Xi bit vapus ti xa Iesu be visi, e misakras vengan xa xi be tamure tang e vanut moletin xil xa di langgusil Iesu labe holu pupu. ⁴ Ma Sakias miloh diamu ni vanut moletin xil ak, e ba peou e vatit sikamor tei tangan ipus Iesu melele xa ihusil suse mei ileli rute xa da en. ⁵ E melele xa Iesu bemei momal ni rute ak, miketeh be nesao e biteni mi Sakias bit, “Sakias, utemanon umei e tan, vengan xa mei nisao ni xouk e tim sam xosali.”

⁶ Misak ni, Sakias mitemanon bemei e tan. Xi besi xi e del Iesu luba, e nggur pilei e tim san. ⁷ Moletin xil vus xa lapusi

laseputut ba xat Iesu labit, “Moletin xai ba be tim sa moletin tesa tei.”^r

⁸ Melele xa Iesu e moletin sav xil ladi tamu e tim san, Sakias mitamea misoh e biteni mi Iesu bit, “!Suv, uteong ni nou! Inou nabit xati xa niseti holesok xil vus navan ihe vanute lu, e vanute tei nisa ni mi hoeo xil. E xosxa natekan ni mani na moletin tova texo polien navan xil, ma nabit xati tangan nisa xolesi mini e nisa hat (4) mun itel xati.”^s

⁹ Melele xa biteni mak, Iesu biteni mini bit, “Xosali, di opisen ni xa Hi miteh meulien e xouk del ngenom xil. Reitin, xouk mun obe nat **Ebrahim** tei vengan xa di oling neketen nam e Hi nggoni ngan xa xi tepol ni.”^t ¹⁰ Nat Moletin bemei e ut etan tangan valang ni hisit moletin xil vamak xa latekesae, tangan mei vateh meulien e xil.”^u

Iesu dei vole usil eilep tei xa miling nenesien nan di e rut moletin te polien nan xil tangan lilaxat kuh naha xa tesa ni mi xil

Mat 25:14-30

¹¹ Melele xa Iesu da tamu e taon te hal Seriko, moletin xil di lanem usil naha xa mei istal e taon te hal **Serusalem**. Moletin xil holu lanemi xa melele xa Iesu ituxoh Serusalem, xi mei ihe suv toto e isak ni lilexatien na Hi mei istal. ¹² Ve rin ak, Iesu dei vole ak mi xil bit, “Vatei, eilep tei di bue xat xi tangan vastokovein kantri nan xati tangan ha vapus suv toto xa mahulong xa di milaxat kantri xil vus. Xi ba tangan suv toto xa mahulong ak isa xeihen mini tangan itilomun e mei ihe suv toto te kantri nan xati e ilaxat moletin xil en.”^v ¹³ E diamu, xi mikes viton moletin xil te polien nan xa labe he xalu (10) lamei tangan iseti **mani** han-

^p18:41 Mak 10:36 ^q18:42 Luk 7:50; 17:19 ^r19:7 Luk 5:30; 15:2

^s19:8 Eks 22:1 ^t19:9 Pol 16:31-34; Luk 13:16

^u19:10 Esek 34:16; Luk 15:4,6,9 ^v19:12 Mak 13:34

dred taosen (100,000) mi xil kekes. Di, biteni mi xil bit, 'Muleh mani xil ak e mupol itela ituxoh melele xa nitilomun en.'

¹⁴“Ma eilep ba, e moletin xil te kantri nan xati iexil ti tavei. Misak ni, xil lasil eloheoh nae xil laba tangan lihiteni mi suv toto xa mahulong lihit, 'Xamem iemem ti tavei moletin ak tangan vamei vahe suv toto namem.' ¹⁵E tave ti neta xa iexil ti tavei, suv toto xa mahulong xa di milaxat kantri xil vus milingi be suv toto nae. Di, eilep ak dilomun be kantri nan xati tangan valaxati.

“Melele taxa eilep ak dilomun nggoni suv toto, mikes moletin te polien nan xil lamei tangan wakil ti xa xil latepol ni naha tetel mani xa teseti mi xil. ¹⁶Ngan xa diamu bemei visali e biteni bit, 'Suv, inou natepol tetel mani nam, ma natekamet mani xa be milian tei (1,000,000) da xat ngan xa otesa ni minou.'

¹⁷“Suv toto ak biteni mini bit, '!Bos pupu! Xouk obe moletin te polien tei xa bos. E vengan xa otelaxat kuh neta xa hokorong, nilinguk tangan ti ulaxat taon he xalu (10) navan.’”

¹⁸“Teimun bemei e biteni mini bit, 'Suv, inou natepol tetel mani nam, ma nakamet mani xa be handred taosen lim (500,000) da xat ngan xa otesa ni minou.'

¹⁹“Ma suv toto ak biteni mini bit, 'Xouk iaxa ulaxat taon lim (5) navan.'

²⁰“E moletin te polien teimun bemei e biteni bit, 'Suv, mani nam xiak. Natepis xol kuhi ni kaliko tei e ba natesoso ni tang teta. ²¹Natepol ni temak vengan xa uluk tekan ni xouk. Xouk di onggur neta xa otapol ti ven, e di onggur anien xa moletin sav xil di lapol ven e naho sam xil.'

²²“Di, suv toto ak biteni mini bit, '!Xouk obe moletin te polien tei xa osa tang! !Nipol ni sepinien nam xil ak mei ihe am mun tang! Xouk okila xa inou nabe moletin te xeih, di nanggur neta xa di natapol ti ven, e di nanggur anien xa moletin sav xil di lapol ni e naho navan. ²³?Ve rin ak, veneh ma otaso mani navan ti vahe bangk tova? Suse ak be temale tang, e melele xa natilomun nakila navur rilomun ni mani navan xil vatel tuten mun xa vata xati.'

²⁴“Di, suv toto ak biteni mi ngan xil xa lasoh ladi sangas visali bit, 'Muleh rat mani ak ra moletin xai, e musa ni mi moletin te polien navan xa nggur mani milian tei (1,000,000).'

²⁵“E xil labiteni mini labit, '!E suv toto, xi nggur mani milian tei (1,000,000) ngamu!'

²⁶“E xi bit rilomun ni mi xil bit, 'Nabiteni reitin mi xamim, ngan xil xa di lapol del xat naha xa di nalingi de hexil, xil lihur huite teni ihe mahulong mak mu. E ngan xil xa di latapol ti vatel xat naha xa di naling e hexil, neta sav xos vahe hokorong tang, nileh rati ra xil.’”

²⁷“Dutou ni ngan ak, suv toto ak biteni mun mi moletin nan xil bit, 'E taxeak, ha utel elu navan xil xa iexil ti tavei tangan mei name suv toto nae tangan limei visal nou. Ti, muhas vin xil pe metok.’”

²⁸Melele xa Iesu dei vole ak bus, nggusil suse nan tangan vahe Serusalem del moletin nan xil.

Iesu duxoh taon te hal Serusalem e vanut moletin xil lasa merereen mini nggoni ngan xa be suv toto nae

Mat 21:1-11; Mak 11:1-11; Sion 12:12-19

²⁹Melele xa Iesu bemei sangas ni metimal te hal Betfas e Betani, sangas ni Vathu te Urvatiei te *Olip*, xi mikes moletin nan lu (2) tangan lalitiamu laliha.

³⁰ E biteni mi xalu bit, “Mulihe metimal xa da iaxor. E melele xa muba en, mulikamet sulut dongki tei xa lasare da, xa moletin tovuol tamu vatotan en. Mullah rati e multeli imei inggak. ³¹ Xosxa moletin tei isis xamil xa mulal rati veneh, ma mulhiteni mini xa Suv iaxa ien bei.”

³² Misak ni, xalu luba e lupus holesok xil vus momal ni naha xa Iesu tehiteni mi xalu.^y ³³ E melele xa di lulal rat sulut dongki ak, moletin xil xa sae lasis xalu labit, “?Veneh ma di mullal rat sulut dongki samem?”

³⁴ E xalu lubit rilomuni mi xil lubit, “Suv iaxa ien bei.” Melele xa lalonge mak, moletin xil ak lamaen ni mi xalu. ³⁵ Ma ludel sulut dongki ak be visal Iesu. Luden kot nalu da xol mar dongki, e ludutou ni Iesu ba dotan en. ³⁶ E melele xa xi di muloh en e di nggusil suse ba, moletin xil laden kuh eising nae xil e suse nan tangan lapien merereen nae mini.^z

³⁷ E melele xa xi bemei sangas ni Serusalem, momal ni suse xa be Vathu te Urvatiei te Olip, **moletin nan xil** del vanut moletin sav xil mun xa di langgusili lakei ni memesien nae mi Hi. Xil lameun be nesao ve merekel xil xa di latepusi testal. Xil labit,

³⁸ “*!Tuxolxatien iti mi ngan xa di bemei e his Iahova! (Sam 118:26)*

Xi iling tomat mi moletin xil itel Hi, e xil lipet rat hisen ihe ut nesao.”

³⁹ E melele xa rut **Farasi** xa ladi e vanut moletin xil ak lalong sepinien nae, labul xat Iesu labit, “!Titsa, semae ni moletin nam xil tangan litit votei!”

⁴⁰ E Iesu bit rilomun ni mi xil bit, “Nabiteni mi xamim, xosxa xil litit votei, ma hat xil ak sung likekei ni.”

Iesu muis ve moletin xil te hal Serusalem vengan xa di lale ras naha xa Hi di pol ni ve rin nae

⁴¹ Melele xa Iesu bemei sangas ni Serusalem, miketeh pusi, e muis ven^a ⁴² bit, “O mol-Serusalem xil, vahit mupus kil suse te tomat, ma mukila muvuri. E taxeak, di mule rasi.^b ⁴³ Reitin li, melengien tei di bemei xa elu namim xil mei livae itel xat xamim. Xil mei likapis xol taon namim e musakras mulesae ra hexil. ⁴⁴ Xil lihu lelen holesok namim xil vus, e hat xil vus te vioh e nim namim xil linavil xat xil ti mun, vengan xa xamim mutapus kil ti melele xa Hi teme i tangan vateh meulien e xamim.”^{§ c}

Iesu minggol rerat moletin xil holu ra vioh te Nim Eo na Hi, e vat na Siu xil lasep ves suse tangan lavas vini

Mat 21:12-17; Mak 11:15-19; Sion 2:13-22

⁴⁵ Melele xa Iesu duxoh Serusalem, be **Nim Eo** na Hi. E melele xa be vioh teni, pusi xa moletin xil holu di lapos ni sipsip e tuman xil holu te sanien eo e von moten. Misak ni, Iesu ien mikat pupu e minggol rerat xil ra rute ak ⁴⁶ bit, “Latetis xati e Vanuvei Eo na Hi bit, ‘*Nim Eo navan ihe nim te sisen.*’ (Aes 56:7) E xamim mupol ni sung mei be ‘*nim ma vati kanen xil.*’” (Ser 7:11)

⁴⁷ Dutou sung, e melengien xil vus te wik ak, Iesu dilomun be vioh te Nim Eo na Hi e di pispisi mi moletin xil

§19:44 E 70 AD, haram 37 tetutou ni melele xa Iesu tehit lelen sepinien ak, moletin te vaeen xil te hal Rom mei latehu lelen Nim Eo e ut xil vus e taon te hal Serusalem, e latepurun Siu xil holu mun.

^y19:32 Luk 22:13 ^z19:36 2King 9:13 ^a19:41 Sion 11:35 ^b19:42 Dut 32:29; Aes 6:9-10; Mat 13:14; Mak 4:12; Luk 8:10; Pol 28:26-27; Rom 11:8,10

^c19:44 Sam 137:9; Mat 24:2; Mak 13:2; Luk 21:6; 1:68

en.^d 48 E xil lasakras vengon xa, vehakut, vanut moletin xil di langgorelisi vengon xa iexil bei mak mu tangan lateong kuhi ni sepinien nan xil.

**Vat xil na Siu xil lasis Iesu tangan
ihit kila xa di pol e his visi**

20 Vatei, melele xa Iesu di pispisi mi moletin xil usil longeongen hos na Hi e vloh te **Nim Eo, vat xil na pris xil, titsa** xil te rae na Mosis, e elda xil mun lamei visali.^e 2 E lasisi labit, “?Hiteni mi xamem, visi iaxa temaen xoux tangan otehol rerat moletin xil ra vloh te Nim Eo ak? ?!Visi vari maenuk tangan mei opol ni polien xil ak!”

³ E Iesu bit rilomun ni mi xil bit, “Iti-amu, inou nisis pilei neta tei mi xamim. E xosxa muhit rilomun ni minou, ma inou sung nihit rilomun ni naha xa musis inou ni. ?Muhiteni minou, ⁴visi iaxa temaen Sion tangan mei vabaptaes ni moletin xil, Hi mu moletin tang?”^f

⁵ E vat xil ak lasel mi xil mun tang labit, “?Rihiteni itep? Xosxa rihit, ‘Hi iaxa temaen ni,’ ma xi ihit rilomun ni mi xir ihit, ‘?E veneh ma mutake reitin ti e pispisien na Sion?’^g ⁶E xosxa rihit, ‘Moletin tang temaen ni,’ ma vanut moletin xil ak lihov vin xir vengon xa xil laneket xa Sion be **provet** tei na Hi.”
⁷ Misak ni, xil labit rilomun ni mi Iesu labit, “Matakil ti visi iaxa temaen Sion tangan vapol ni polien nan.”

⁸ Ma Iesu biteni mi xil bit, “Xosxa mak, ma inou mun ninavit kil ti mi xamim xa visi iaxa di maen nou tangan napol ni polien xil ak.”

**Iesu dei vole usil longrasien na
moletin xil xa di lalaxat urvatie tei**

Mat 21:33-46; Mak 12:1-12

⁹ Melele xa vat xil na Siu xil di tamu lalonge, Iesu dei vole ak mi moletin xil bit, “Vatei, moletin tei milih urvatie tei te **grop** e tan san. Milihi bus, hortan ak miling urvatie ak de he moletin sav xil tangan ti lilaxati del nenemien xa xil ti lisa rut huite teni mini melele xa lamem. Di, hortan te urvatie ak ba be ut tei xa de sotin, e ba da en huram vahis.^h
¹⁰ Melele xa hortan ak mikila xa melele momal tangan laleh viton huit grep xa men, misil slev nan tei ba tangan vasis ngan xil xa di lalaxat urvatie san tangan lisa ti huite xil xa labe san xati mini.ⁱ

“E melele xa slev nan ba visal xil, ngan xil xa lalaxat urvatie ak lapurun ni. Di, langgol rati ba, e latasa ni ti neta mini.
¹¹ Misak ni, hortan ak, misil slev nan teimun ba visal xil. E ngan xil xa lalaxat urvatie san labasi mun, e lasak purun ni mili ngan xa tetiamu. Di, langgol rati ba, e latasa ni ti neta mini.
¹² Di, hortan ak misil slev nan xa be tol nen ba visal xil. E melele xa duxoh moletin tesa xil ak, labasi ba vuma ... sangas vamat e lakuvun rati ra urvatie ak.

¹³ “Ma hortan te urvatie ak minemi bit, ‘?Nipol ni itep sung? !Aha, nakila! Nisil natuxoli xati xa eheien navan da en iha. Xil limerere ni xi sung.’

¹⁴ “E melele xa moletin xil xa di lalaxat urvatie ak lapusi bemei, xil lasem xil labit, ‘?Mupus ti? Ngan ak be nat hortan xati xa urvatie te grep ak mei ihe san. !Rihis vini vari! !Imak, ma urvatie te grep ak ihe sar sung!’
¹⁵ Ma xil laba,

^d19:47 Luk 21:37; 22:53; Sion 18:20; Mat 21:46; Mak 12:12; 14:1-2; Luk 20:19; 22:2; Sion 5:18; 7:30 ^e20:1 Mat 21:23-27; Mak 11:27-33 ^f20:4 Mat 3:6,11; Mak 1:4,5,8; Luk 3:3,16; Sion 1:25-26; Pol 1:22; 10:37; 13:24; 18:25; 19:3,4
^g20:5 Mat 21:32 ^h20:9 Aes 5:1 ⁱ20:10 2Kron 36:15-16

ladal xati, lakuvun rati ra urvatiei ak, e labasi mat.”

Melele xa Iesu dei vole ak bus, miketeh pus moletin xil e misis xil bit, “?Midep? ?Hortan te urvatiei ipol ni naha mi ngan xil xa di lalaxat urvatiei san? ¹⁶ Nabiteni mi xamim, xi imei ihas vin xil vus. Ti, imaen urvatiei te grep san mi moletin sav xil tengen lilaxat kuhi.”

E melele xa moletin xil lalonge mak, labiteni mini labit, “!Ei, Hi misakras va-maen rin ak mei vastal!”**

¹⁷ Iesu miketeh pus xil e misis xil bit, “Xosxa nastal ti, ma veneh ma Vanuvei na Hi di biteni mak bit,

‘Pos xa moletin te polien xil di lasin ni, xi vari iaxa mei be seteman xati te nim e mili sen pos nen xil vus.’ (Sam 118:22)

¹⁸ *‘!Ngan xil xa mei lasavut en imot e sixil limavul tova tang!*

E xosxa seteman ak imot imal e moletin tei, ma moletin ak imat vari.’” (Aes 8:14-15)

¹⁹ Melele xa titsa xil te rae na Mosis del vat xil na pris xil lalonge mak, lalong kila xa Iesu dei vole ak ba xat rin nae bit xil iaxa labe ngan xil xa di lalaxat urvatiei te grep. Misak ni, iexil bei pupu ni tengen latal xati, e ulixil mikan ni moletin xil xa di lakapis xole vehakut.^j

Iesu misepin e rin te takis

Mat 22:15-22; Mak 12:13-17

²⁰ Vengan xa titsa xil te rae na Mosis del vat xil na pris xil ulixil mikan ni moletin xil, lalang ni mesal tova xa likila lital xati ixo en. Misak ni, lasil xuxus ni rut moletin nae xil tengen ha lipus Iesu e lisis pilei ni neta ixoni ngan xa labe

moletin hos xil. Lanemi xa xosxa lak-ila lasak ni Iesu isavut e sepinien nan, lakila lalingi e he kavmen te hal Rom.^k ²¹ Ma, moletin te luvosen xil ak lamei visal Iesu e labiteni mini labit, “Titsa, xamem makila xa naha xa di obiteni e naha xa di opispisi ni mi moletin xil momal tevi. Makila mun xa xoux di opus moletin xil ngasen lapin tang, ngan xil xa latellep del moletin votei xil mun. E xoux di opispisi mi moletin xil vus usil suse te reitinen xa Hi ien bei tengen moletin xil lihusili.^l ²² Ve rin ak, xamem iemem bei tengen makil ti neta. ?E rin te **takis** xil xa di rasa ni ba mi **Sisa** te hal Rom, **rae xil na Hi** di maen xir tengen rasa ni, mu tamaen xir ti?”^m

²³ E Iesu mile kil luvosen nae.^{††} Misak ni, biteni mi xil bit, ²⁴ “!Sa **mani** tova xa di langgal takis ni minou! Xamim mupus pisi. ?Valnao visi e his visi iaxa da en?”

E xil labit, “Na Sisa te hal Rom.”

²⁵ Ma Iesu biteni mi xil bit, “Mak, ma musa naha xa be na Sisa iha rilomun ni mi Sisa. !E naha xa be na Hi, musa rilomun ni mi Hi!”

²⁶ E Farasi xil lamesep vari ni metisouen te sepinien nan, e ladit votei. Lapusi xa lasakras lapol ni Iesu vamot e sepinien nan pe met moletin xil.

Satusi xil lasis Iesu usil melele xa moletin xil limea rilomun ra maten

Mat 22:23-33,41-46;

Mak 12:18-27,35-37

²⁷ Di, rut Siu xil xa lamos e vanut Siu xil xa lakes xil ni ‘**Satusi**’ lamei visal Iesu. Satusi xil lanemi labit moletin misakras

****20:16** Siu xil lalong kila xa Iesu di biteni xa Hi isa pangasien mi vat na Siu xil, e ha ilang ni vanut moletin sav xil tengen mei lilaxat kantri tehal Isrel.

††**20:23** Xosxa Iesu ihiteni xa Siu xil linasa takis xil ti mi kavmen te hal Rom, ma moletin te vaen xil liso ni ihe nim te xeih. E xosxa ihiteni xa momal tengen Siu xil lisa takis xil mi xil, ma Siu xil iexil iati vengam xa iexil di mikat kavmen te hal Rom.

^j**20:19** Mat 21:46; Mak 12:12; 14:1-2; Luk 19:47-48; 22:2; Sion 5:18; 7:30

^k**20:20** Luk 11:54 ^l**20:21** Sion 3:2 ^m**20:22** Rom 13:6-7

vamea rilomun ra maten. Ma xil lamei labit lisak pis Iesu, e labitini mini labit,ⁿ 28 “Titsa, **Mosis** tetis rae ak tehe nar xa tehit, ‘Xosxa moletin tei mat e mistokovein atou nan e horamue nalu tovuol, ma tunali sav ihur mei iteli itel tunau nan. Imak, ma isa horamue mini xa ihur his tunali xa mat ngamu.’ (Dut 25:5)^o 29 Ma vatei, tua xil latehe lu e he sav (7). E ngan xa tehe muimol teteli tetel atou tei. Di, xi temat e horamue nalu tehe tovuol. 30 Misak ni, tuneli xa tetutou ni mei tehur tunau nan. E xi mun temat, e tuvava nalu tehe tovuol. 31 Ma di, sexien ak testal mun mi ngan xa tehe tol nen e dit temak tang teha vuma ... tetuxoh ngan xa tehe tasite e tua xil ak. Xil ngasen latelel e tuvava nae tehe tovuol. 32 E tetutou ni holesok xil ak, atou ak mun temat. 33 ?Ma xosxa mea rilomunen be reitin, melele xa moletin xil vus limea rilomun ra maten, ngan xave e tua xil xa labe lu e he sav (7) xiak iaxa ihur atou ak ihe nan xati, vengam xil vus lateteli tetela?”

34 E Iesu bit rilomun ni mi xil bit, “E ut etan ak, tiramue xil e atou xil lakila lateli. 35 E, e melengien tei xa di bemei, ngan xil xa lamal pe met Hi limea rilomun ra maten, e linateli ti mun. 36 Xil mei lixoni masxaxa xil xa lasakras lalel. E melele xa moletin xil limea rilomun ra maten, ipisen ni xa labe horamue xil na Hi.^p 37 E Mosis mun tehit kila xa ngan xil xa lamal, limea rilomun ra maten. E tumulen usil holiei xa upang tepili en e tenaxa ni ti, Mosis tetisi xa Hi Suv tehiteni tehit ‘Inou **nabe** Hi na Ebrahim, Hi na Aesak, e Hi na Siekob.’ (Eks 3:6) 38 ?Mulonge? Neta sav xa lattelel ngamu, di tamu latmeul pe met Hi te ut nesao. Hi di meul, e xi **be** Hi na ngan xil xa di

lameul, e tave Hi ti na ngan xil xa lalel. Vengan xa, pe meten, moletin xil vus di lameul.”^q

39 Melele xa rut titsa te rae na Mosis la-long sepinién na Iesu, labitini mini labit, “!Titsa, sepinién xa otesa ni mi xil mormal tevi!” 40 Ve rin ak, vat xil na Siu xil ulixil mikan tangan lasisi ve neta tova mun.

41 Di, Iesu misis vat xil na Siu xil bit, “?Midep? ?Mesaea istal ixo vatimol na suv toto **Deved** itep? 42 Vengan xa Deved vari tang tehiteni e sam nan tei tehit,

‘Iahova biteni mi Suv navan bit,
“Utotan inggak e riuk metu,
43 ituxoh melele xa niling elu nam xil e hem.” (Sam 110:1)

44 ?Mulonge? Suv toto Deved vari tekes Mesaea ni ‘Suv nan.’ ?E vengam xa tata tei misakras vakes natneli ni ‘suv,’ Mesaea istal ixo vatimol na Deved itep?”[‡]

Iesu misepin nggeih ba xat titsa xil te rae na Mosis

Mat 23:1-2,5-7; Mak 12:38-40

45 Melele xa moletin xil di tamu la-teong ni sepinién nan, Iesu misel xat **moletin nan xil** bit, 46 “Muxuxou kuhi tangan munapol ni ti sexien xil naxoni ngan xa titsa xil te rae na Mosis di lapol ni. Vengan xa xil iexil bei tangan lasing ni eising xil xa bos e teviei vaxoni eilep xil. Xil di lasing mak e di lakapis e valkesao tangan mosav xil lakila lipus xil e likes xil itel merereen. E melele xa ba labe **nim te pispisién**xil e anien xil xa latellep, ba ladotan e von totanen xa laserev kuhi be na eilep xil. 47 Di lapol ni sisen xil xa teviei tangan moletin xil linemi lihit lamal tevi. E labe vati kanen tang

‡20:44 Reitin xa Mesaea ixo vatimol na suv toto Deved, e vengam xa xi tekes Mesaea ni suv, di pisen ni xa Mesaea be eilep mak mu mili, e xos, Mesaea ak teta ngamu tetiamu ni.

xa di lakan ni holesok holu ra tunau xil. !Ve rin ak, pangasien xa imei mi xil ihe mahulong mak mu ili pangasien xa imei mi moletin tesa sav xil!”

**Iesu misep usil sanien na
tunau tei mi Hi e hisit sanien
eah xa momal pe met Hi**

Mak 12:41-44

21 Melele xa Iesu di tamu pispisi mi moletin xil e vloh te Nim Eo na Hi, miketeh ba e pus moletin xil xa holesok nae holu di lasa sanien nae xil tenggan vatutou ni polien te Nim Eo. ²Di, miketeh mun e pus tunau tei xa be hoeo bemei e miso selen lu (2) tang. ³Ma Iesu biteni bit, “Nabiteni mi xamim, tunau xa be hoeo iaxai, sanien xa xi milingi mili sen sanien xa mosav xil latesa ni.^r ⁴Venggan moletin sav xil di lasa sanien nae xa be rute tang te holesok nae xil, e eilep be nae. E tunau ak xa be hoeo tang, xi di misa vuol ni mani xa vahe te anien an.”^s

**Iesu bit lelen usil sakpurunien xil e
melengien xil te xeih xa ti imei**

⁵Rut moletin xil na Iesu di laketeh mikapis e **Nim Eo** na Hi e holesok xil xa di e vloh teni. Lapusi xa lasak xati bos xa bos del hat xil xa laminehin pupu e del sanien hos sav xil. Melele xa di lasep usili, Iesu biteni mi xil bit, ⁶“Melengien tei di bemei xa lihu len sen holesok xil xa di mupusi iaxai. Hat ti vari nasoh.”^t

⁷Ma moletin xil na Iesu lasisi labit, “?Titsa, holesok xil ak istal vilieh? ?E naha vari iaxa istal xa ipisen ni xa ngan ak di bemei sangas?”

⁸Iesu biteni mi xil bit, “Muxuxou kuhu venggan xa moletin holu limei tenggan liluvos pis xamim. Xil liluvos lihit di

lasepin e hisok lihit, ‘!Inou nabe Mesaea xa Hi tehiti xati!’ E liluvos mun lihit, ‘!Hoxalite te holesok xil bemei sangas xiak!’ E munake reitin ti e sepinien nae e munahusil xil ti.^u ⁹Melele xa mulonggeong ni xa kantri tei di bae del kantri sav mun, mu moletin xil di labae mi xil mun tang, ulimim nakan ti. Sexien xil ak istal itiamu, e nave hoxalite te holesok xil ti mu.”^v

¹⁰Xi biteni mun bit, “Kantri tei ti ivae itel kantri sav mun, e suv toto tei ti ivae itel suv toto teimun.^w ¹¹Lul ilil ixeh e an tesa xil holu mei istal. E ut xil holu e ut etan, mae iat vanut moletin xil holu e mesien xil te xeih mei ihas vin moletin xil. E tilang hat nesao, neta xil hao listal xa isak ni moletin xil ulixil ikan pupu.

¹²“E itiamu, melele xa holesok xil ak nastal ti mu, moletin xil mei lital xat xamim e lisak purun xamim. Liling xamim muhe he eilep xil te **nim te pispisien**xil e lisa xamim muhe nim te xeih. Litel xamim ha musoh pe met suv toto xil e vat xil te kavmen venggan xa mube moletin navan xil e di mupol e hisok.^x ¹³E ngan ak ihe mesal tenggan muhithiten longgeongen hos mi xil. ¹⁴Ve rin ak, bos xa mupol ni nenenmien namim tenggan munanexo pupu ti ve sepinien eah xa muvue xati tenggan ha muhithiteni mi xil e rin namim.^y

¹⁵Venggan inou iaxa nisa sepinien te metisouen mi xamim xa elu namim xil lasakras lavit ti neta mun ven, mu lavit rilomun ni sepinien tova mi xamim.^z

¹⁶Tamemim e ninemim xil, tuemim xil e vatimol namim xil mun tang, xil iaxa limaen xamim muhe he elu namim xil, e lihas vin rut xamim mulel.^a ¹⁷Moletin xil vus iexil iat xamim venggan xa

^r21:3 2Kor 8:12 ^s21:4 Mat 24:1-21; Mak 13:1-19 ^t21:6 Luk 19:44

^u21:8 Dan 7:22; Plp 4:5 ^v21:9 Dan 2:28 ^w21:10 Aes 19:2; 2Kron 15:6

^x21:12 Mat 10:18; Luk 12:11 ^y21:14 Mat 10:19 ^z21:15 Pol 6:10

^a21:16 Mat 10:21-22

di mupol e hisok. ¹⁸E lasakras lapurun meulien sal xa xamim ti muhuri.^b ¹⁹Reitin, xosxa musoh ixeih e neketen namim, ma muhur meulien sal.

²⁰“Melele xa mupus moletin te vaeen xil mei likapis xol taon te hal *Serusalem*, ma mukila xa navehi ti lihu lelen ni. ²¹E melele nen ak, ngan xil xa ladi en, lite-manon lihe reling. E ngan xil xa ladi e ut sav xil sangas visali linasak pisi ti tangan litilomun en. E ngan xil xa liti e ut sav xil e provins te hal Sudea, lilesae ha liti e vathu xil. ²²Melele nen ak ihe ‘Melengien xil te Longpangasien’ xa Hi ipol ni mei istal ixoni ngan xa tehit xati e Vanuvei Eo nan.^c ²³E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil. Vengan xa melengien xil xa ixeih pupu mei istal, e moletin xil ak lilong pangas xil ihe holu pupu ve ekaten na Hi xa ita xat xil.^d ²⁴E melele te vaeen, litil vin rute xil ni tiei te vaeen xil, e rute ngan xil mun livar xat xil e lileh xil ha liti pe he suv toto xil te kantri sav xil. E Hi imaen taon te hal Serusalem mi ngan xil xa latave Siu ti tangan lipurun ni ha ituxoh melele xa Hi ihiteni ihit melengien nae ipin.^e

²⁵“Holesok xil holu istal e meteneai, aveti e hitu xil mun. Misak ni, e ut etan, lisak ni tahe xil xa tellep limea e lihas lelen kantri xil holu. Melele xa moletin xil lipusi, linexo pupu, limuis e liat luhexil ve ulikanen.^f ²⁶Melele xa moletin xil vus lipus holesok xil ak xa di mistal e ut etan e lipusi xa holesok xil te tilang hat di bilhiles, holu e xil limermesil ve ulikanen nae.^g ²⁷E melele xa liketeh ihe nesao,

lipus ‘*Nat Hi mei istal ixo momah xil te tilang hat*’ (*Dan 7:13*) itel xeihen e minehinen te xeihen nan.^h ²⁸Melele xa holesok xil ak mei istal, musoh ixeih e mupet rat vatumim ihe nesao vengan xa Hi sangas vamei veng vateh meulien e moletin nan xil.”ⁱ

**Iesu bit usili xa itep iaxa
moletin xil lipus kila xa
melengien kor xil di bemei**

Mat 24:32-35; Mak 13:28-31

²⁹Di, Iesu dei vole ak mi moletin nan xil bit, “Munem pis vatit *fik* xil itel vatiei savsav xil mun. ³⁰Melele xa lite xil miso rohon ni ute xil xa be neta hu, xamim mukila xa melele te an te tin di bemei. ³¹Usil sexien nen tak, melele xa mupus holesok xil ak mei istal, mukila xa melele xa Hi mei ihe suv toto na moletin xil te ut etan di bemei sangas xiak.

³²“Nabiteni reitin mi xamim, moletin xil xa lameul ladi xosali ti lipus longpangasien xil ak mei listal e taon te hal Serusalem. ³³Ut nesao e ut etan lalivus, e sepinien navan xil misakras vavus vavova.”^j

³⁴Iesu misel xat moletin nan xil bit, “!Muxouxou kuhu! Munamaen nenemien te anienen, mu munien, mu nenexoen sav xil te ut etan ak namei nalih nenemien namim ti. Maxani, melengien xa Nat Moletin itilomun en imei, e xamim mutemanin ni ixoni ngan xa moletin mitemanin melele xa mitam ras suse nan e be siling tei.^k ³⁵Vengan melengien ak mei istal mi moletin xil vus e ut etan.^l ³⁶Misak ni, muvue xat xamim vehakut. E ti misis tangan muvur xeihen tangan

^b21:18 1Saml 14:45; Luk 12:7 ^c21:22 Dut 32:35; Hos 9:7; Ser 46:10

^d21:23 1Kor 7:26 ^e21:24 Ser 21:7; Esra 9:7; Sak 12:3; Sam 79:1; Aes 63:18; Dan 9:26; 12:7; Rom 11:25; Rev 11:2 ^f21:25 Aes 13:10; Esek 32:7; Soel 2:30-31; Rev 6:12-13; Sam 46:2-3; 65:7; Aes 24:19 ^g21:26 Hag 2:6,21

^h21:27 Mat 26:64; Rev 1:7 ⁱ21:28 Rom 13:11 ^j21:33 Luk 16:17

^k21:34 Mat 24:48-50; Luk 17:27; 1Tes 5:3 ^l21:35 Aes 24:17

mutuxoh hoxalit longpangasien ak, tenggan munave unoun ti e melele xa ha musoh pe met Nat Moletin.^m

³⁷ E melengien xil vus, Iesu di pispisi mi moletin xil e vloh te Nim Eo. E melele xa vongien bemei, xi ba pat e Vathu te Urvatiei te *Olip* del moletin nan xil.ⁿ

³⁸ E, e makoe roroh xil vus, moletin xil labe vloh te Nim Eo na Hi tenggan lateong ni pispisien nan xil.

Vat xil na Siu xil lapol ni suse tenggan lavas vin Iesu vaxo en

Mat 26:1-5,14-16; Mak 14:1-2,10-11; Sion 11:45-53

22 Melele bemei sangas tenggan Siu xil lanem rilomun ni *Melengien xil te Beret xa Is Tovuol En*. Melengien kokot teni vari, xil lapol ni anien xa lakesi ni Anien te Tavien. ² *Vat xil na pris xil* del *titsa* xil te rae na Mosis di lalang ves suse tenggan lakila lavas xusus ni Iesu vamat vaxo en. Iexil ti tavei tenggan lapol ni e melele xa moletin xil di lakapis xol Iesu venggan ulixil mikan xa linapol ni neta tova mi xil.^o

³ Melele xa vat xil ak di latumul usili, *Temat* bemei misa nenemien tesa tei mi Sudas Eskariot xa be tei e moletin lu e le tei (12) na Iesu.^p ⁴ Ma Sudas ba pus vat xil na pris xil del vat xil na merekete h xil te Nim Eo usil suse xa xi mikila iling Iesu ihe hexil ixo en. ⁵ Xil labesi xil pupu ve tutouen nan e labit xati xa lixale ven. ⁶ Mak, ma Sudas maen ni tenggan vatutou ni xil. E melele xa dilomun ba, di milang ves suse xa bos tenggan iling Iesu ihe hexil ixo en e melele xa moletin xil linave holu ti en.^q

Moletin lu na Iesu rusak mesen holesok xil ve Anien te Tavien

⁷ E melengien kokot te Melengien xil te Beret xa Is Tovuol En, be melele xati xa moletin xil di labas sulut sipsip xil ve *Anien te Tavien*.^r ⁸ Ma Iesu misil Pita xal Sion del xat sepinien ak, “Muliha mulisak mesen Anien te Tavien tenggan ha ria vituei ni.”^s

⁹ Ma xalu lusisi lubit, “?Rute xave iaxa iem bei tenggan malsak mesen Anien te Tavien en?”

¹⁰ Xi bit rilomun ni mi xalu bit, “Melele xa mulihe taon te hal Serusalem, mulhisu ni moletin tei xa di po valoei tei. Mulhusili ha mulhe nim xa xi iha en.

¹¹ Ti, mulsis moletin te nim ak mulihit, “Titsa bit, “?Inou mei nia Anien te Tavien itel moletin navan xil e rute xave?”” ¹² E xi itel xamil mulihe nesao e nim man e ipisen von toen tei xa mahulong xa langgur revu ngamu datil xamil. Rute ak vari iaxa mulisak mesen holesok xil vus en.”

¹³ Misak ni, Pita xal Sion luba, e lupus holesok xil vus nggoni ngan taxa Iesu tehiteni mi xalu. Ma xalu rusak mesen Anien te Tavien e rute ak.^t

Anien eo na Suv Iesu

Mat 26:26-30; Mak 14:22-26; 1Kor 11:23-25

¹⁴ Momal ni melele te anien en, Iesu bemei vituei del moletin nan xil e lakapis xol vet te anien en. ¹⁵ Melele xa ladotan bus, Iesu biteni mi xil bit, “Ieok tehei pupu tenggan nama Anien te Tavien ak vatel xamim. Ti, niha sung nihur longpangasien navan. ¹⁶ Nabiteni mi xamim, ninaxa ti mun anien ak iha vuma ... koute te Anien te Tavien ak mei istal ihe

^m21:36 Mak 13:33; Rev 6:17 ⁿ21:37 Luk 19:47; 22:39

^o22:2 Mat 21:46; Mak 12:12; 14:1-2; Luk 19:47-48; 20:19; Sion 5:18; 7:30 ^p22:3

Sion 13:2,27; Pol 1:17 ^q22:6 Mat 26:17-25; Mak 14:12-21; Sion 13:21-30

^r22:7 Eks 12:6,14,15 ^s22:8 Eks 12:8-11 ^t22:13 Luk 19:32

reitin e melele xa Hi mei e isak ni relaxatien nan iti e ut etan.”^u

¹⁷Di, Iesu nggur kap xa uae ba en, memes Hi ven, e biteni bit, “Muhuri, e xamim vus mumu ni. ¹⁸Nabiteni mi xamim, taxeak iha ninamu ti mun uae ak ha ituxoh melele xa Hi imei istal ihe suv toto na moletin xil.”

¹⁹Di, Iesu nggur beret, memes Hi ven, bul pasi e miseti mi moletin nan xil bit, “Ngan ak be tiei navan xa di nasa ni ve xamim. Mupol ni imak tangan ti munem xat nou.”^v ²⁰Usil sexien tak, melele xa langganien bus, Iesu nggur kap xa uae ba en, misa ni mi xil e biteni bit, “Uae ak be reok xa di mileh ve xamim tangan vasak ni *hitxatien te xeih* hu na Hi mei istal e ihe reitin.”^{f w}

²¹“!E muteong ni nou! Ngan xa imaen ni nou nihe he elu navan xil da tak. Reitin, xi di ngganien vituei del nou e vet ak.”^x ²²Be reitin xa Nat Moletin ha imat ixoni ngan taxa Hi tehit xati ngamu tangan istal. !E isa xa isa pupu mi ngan xa ihe suse teni!”

²³Melele xa lalonge mak, moletin nan xil lasis xil mun tang xa visi e xil iaxa ikila ipol ni sexien ak.^y

Moletin xil na Iesu langor xa visi e xil be eilep mak mu

²⁴Melele xa moletin xil na Iesu ladi tamu e von anien en, di langor mi xil

mun tang usil visi e xil iaxa be eilep mak mu mili.^z ²⁵Ma Iesu biteni mi xil bit, “E kantri sav xil, suv toto xil na moletin xil xa latakil ti Hi di lapol ni nggeih mi ngan xil xa ladi pe hexil tangan vapisen xeihen nae. E melele xa di lapol ni nggeih mi moletin xil mak, di labit usil rin nae labit, ‘Xamem mabe timue hos na moletin xil e di madutou ni xil tang.’^a ²⁶E rin xa namim, namak ti. Ngan xa be eilep e xamim mei ihur nenemien xa ihe tan ixoni ngan xa be moletin xa be neta sav tang. E ngan xa be vat namim, xi mei itutou ni ngan tesav xil e xamim ixoni ngan be slev nae tang.^b ²⁷?Visi iaxa be eilep mak mu, ngan xa dotan di ngganien e vet tei, mu ngan xa di misa anien mini? Moletin xil vus lanemi labit ngan xa dotan di ngganien. E inou, nade visal xamim nggoni slev tei xa di misa anien mi xamim.”^c

²⁸“Xamim muteti visal inou e melele te xeih xil e melele te xeih xil vus xa natehisu ni. ²⁹E nggoni ngan taxa Tata teling xat relaxatien te holesok nan xil tete heok, inou mun niling xat relaxatien ak ite hemim.”^d ³⁰E melele xa nitotan e von relaxatien navan ixoni suv toto, xamim ti muanien e ti mumun itel nou. E xamim mun mutotan e von relaxatien e ti mulaxat vatimol xil xa mahulong lu e le tei (12) na mol-Isrel xil e mulepis rin nae xil.”^e

^f22:20 E Eks 24:6-8, Mosis tete re buluk e hor te sanien tangan vasak ni hitxatien te xeih matu xa Hi tepol ni tetel mol-Isrel xil mei istal e ihe reitin. Usil sexien nen tak, re Iesu tepol ni hitxatien te xeih hu na Hi mei be reitin xa isak ni Hi iteh meulien na moletin xil te ut etan.

^u22:16 Luk 13:29 ^v22:19 Luk 24:30; Pol 27:35

^w22:20 Ser 31:31; 32:40; Sak 9:11 ^x22:21 Sam 41:9; Sion 13:21

^y22:23 Sion 13:22 ^z22:24 Mat 18:1; Mak 9:34; Luk 9:46

^a22:25 Mat 20:25-27; Mak 10:42-44 ^b22:26 Mat 23:11; Mak 9:35

^c22:27 Sion 13:4-16 ^d22:29 Luk 12:32 ^e22:30 Mat 19:28

**Iesu bit lelen ni xa Pita
imuun xole ihit takil ti xi**

*Mat 26:31-35; Mak
14:27-31; Sion 13:36-38*

³¹Di, Iesu biteni mi Saemon Pita bit, “!Saemon, Saemon, uteong ni nou! Temat tesis Hi tangan isak pis xamim vus, e Hi temaen ni tangan vakil ti reitinen te neketen namim.^f ³²E inou natesis ve xoux, Saemon, tangan neketen nam navus relinguk ti. E melele xa uhiles meulien nam e neketen nam imei ix-eih mun, ha ututou ni tumali xil tangan neketen nae mun mei ix-eih.”

³³E Pita mitamea e biteni mini bit, “!Suv, inou nabue xat nou tangan nihe nim te xeih itelak e nimat itelak!”^g

³⁴E Iesu bit rilomun ni mini bit, “Nabiteni minuk Pita, melele xa tuto nakora ti mu e ut nalan ti mu, e xoux umuun xole ihe vatol (3) xa otakil ti nou.”^h

**Iesu misel xat moletin nan
xil tangan livue xat xil ve
melele te xeih xil xa di bemei**

³⁵Di, Iesu biteni mi moletin nan xil bit, “Melele xa natesil rerat xamim tangan ha mupol, mutnaleh ti *mani*, ateli, mu sandel. ?E midep, mutehe terume ni neta tova?”ⁱ

E labit rilomun ni mini labit, “E-e, matnave terume ni ti neta.”

³⁶Iesu biteni mi xil bit, “E taxeak, tei xa mani mu ateli nan di, ihur xati itela. E xosxa tiei te vaeen nan tovuol, ma ipos ni eising tova nan e ixal tiei tova.”^j

³⁷Nabiteni mi xamim, imak ma sepinien xa de Vanuvei Eo na Hi mei ihe reitin usil nou xa bit, ‘*Xi temaen xi tangan lasak pu-*

run ni vaxoni moletin tesa xil.’ (Aes 53:12) Reitin, e melele nen tak naha xa latetisi usil nou di bemei be reitin.”^k

³⁸Melele xa moletin nan xil lalong selxatien nan, labiteni mini labit, “!Suv, pus ti mu! Tiei lu te vaeen xiak.”^l

E Iesu bit rilomun ni bit, “!Ngan ak pipin!”

**Iesu be Vathu te Urvatiei te
Olip e bue xat xi nggo sisen**

³⁹Melele xa langganien bus, Iesu be reling taon te hal Serusalem e ba be Vathu te Urvatiei te *Olip* nggoni ngan taxa di pol vehakut ni, e *moletin nan xil* langgusili.^m ⁴⁰Melele xa laduxoh rute ak, Iesu biteni mi xil bit, “Xamim ti musis tangan munamot ti e melele xa sakpisien xil imei mi xamim.”ⁿ

⁴¹Di, Iesu be reling xil e be sotin vuteili. E rute ak, mitingeiril be tan e misis bit, ⁴²“Tata, xosxa omaen ni, ma hur rat longpangasien ihe reling nou li. E onapol ni ti naxoni ngan xa inou ieok bei, e upol ni uhusil naha xa xoux kestang di iem bei.”^o ⁴³E masxaxa tei te ut nesao mei mistal mini e misak ni ven e nenemien nan mei ngegeh mu. ⁴⁴Iesu minem holu usil naha xa imei, e midakes Hi ngegeh vatei mun. E melele xa misis, vetin nan mileh holu e mot be tan nggoni ra.

⁴⁵Melele xa Iesu misis bus, xi mea, ba rilomun visal moletin nan xil. E mikameti xa xil vus di lapat. Di lapat venggan xa nenexoen di bas xil e misak ni xil vexil labuol. ⁴⁶Ma Iesu biteni mi xil bit, “?Veneh ma di mupat? !Mutamea! !Muisis tangan Hi itutou ni xamim tangan munamot e tesaen ti e melele xa sakpisien xil imei!”^p

^f22:31 2Kor 2:11; Amos 9:9 ^g22:33 Luk 22:54 ^h22:34 Luk 22:61

ⁱ22:35 Mat 10:9-10; Mak 6:8-9; Luk 9:3; 10:4 ^j22:36 Luk 22:49

^k22:37 Luk 12:50 ^l22:38 Mat 26:36-46; Mak 14:32-42 ^m22:39 Sion 18:1; Luk 21:37 ⁿ22:40 Luk 22:46 ^o22:42 Mat 6:10 ^p22:46 Luk 22:40

Vat xil na Siu xil ladal xat Iesu

*Mat 26:47-56; Mak
14:43-50; Sion 18:3-11*

⁴⁷ Melele xa Iesu di tamu misepin mi moletin nan xil, Sudas xa be tei e moletin lu e le tei (12) nan di mikakao bemei del tatit moletin tatei xil. Melele xa pus Iesu, bemei visali tangan vapesum ni vin. ⁴⁸ Ma Iesu misisi bit, “?Sudas, veneh ma mei opesum ni nou nggoni ngan xa nabe timue hos nam e melele xa di osa rat nou, Nat Moletin, tangan name he elu navan xil?”

⁴⁹ Melele xa moletin xil na Iesu lapus naha xa di mistal, lasis Iesu labit, “?Suv, rakila ravae vatel tiei te vaeen nar xiak?”^q ⁵⁰ Tei xil milihi rat tiei nan e da xoteh vurang metu na slev tei na vatixar na pris xil.^r

⁵¹ E Iesu misel mini bit, “!Ei, pipin!” Di, mitang duxol vurang moletin ak e misak ni vurangen mei bos rilomun.

⁵² Di, Iesu biteni mi vat xil na pris xil, mereketeh xil te **Nim Eo**, del elda xil na Siu xil xa lamei tangan latal xati bit, “?Veneh ma di muleh tiei e home-nda xil te vaeen tangan mei mutal xat nou? ?Munemi mubit inou di nadiamu ni moletin xil tangan mavae vaha xat kavmen nar?”^s ⁵³ !E-e! Melengien xil ngasen nadotan nade vangit vloh te Nim Eo e di naspisipi mi moletin xil, e xamim mutamei ti tangan mutal xat nou. E melele xa ut maluxoluk mak, ma di mupol ni, vengon xa ngan ak be melele namim, e be melele na ngan xil vus xa ladi pe xei-hen te maluxoluken.”^t

Pita muun xole bit takil ti Iesu

*Mat 26:57-58,69-75; Mak
14:53-54,66-72; Sion 18:12-18,25-27*

⁵⁴ Xil ladal xat Iesu e ladeli ba be nim ma vatixar na pris xil. E Pita di mika xus e di nggusil xil.^u ⁵⁵ Melele xa laduxoh nim ak, lasahan upang tei di minggan e hilaep te vloh teni. Ma Pita ba mos del ngan xil xa di ladotan xorelisi. ⁵⁶ Melele xa Pita di dotan visal upang mak, atou te polien tei pusi, miketeh momal ba ni, e biteni bit, “!Ei, moletin ak mun be tei e ngan xil xa latehusil xat Iesu!”

⁵⁷ E Pita muun xole bit, “!Atou, inou natakil ti moletin xai!”

⁵⁸ Tave nousav ti, moletin teimun pus kil Pita ma biteni mini bit, “!Xouk mun obe tei e xil!”

E Pita muun xole vatei mun bit, “!Ei, natave tei e xil ti!”

⁵⁹ Di, be nousav vuteili, moletin sav mun pusi e misepin nggeih xati bit, “!Reitin mak! Tiramue ak be tei e moletin xil na Iesu vengon xa sepinien nan nggoni ngan Kaleli xil tang.”

⁶⁰ E Pita muun xole nggeih vatol nen bit, “!Tave reitin ti! !Inou natakil ti vari naha xa di obit usili iaxai!”

Vatei takes, melele xa di tamu misepin, tuto tei mikora. ⁶¹ E melele nen tak, Suv Iesu biles e miketeh momal ba ni Pita. Di, Pita minem rilomun ni naha xa Suv tehiteni mini tehit, “Melele xa tuto nakora ti mu e ut nalan ti mu, e xouk umuun xole ihe vatol (3) xa otakil ti nou.”^v ⁶² Ma Pita milonge misa xa misa e mistal be reling vangit vloh ak, ba di muis nggeih.

^q22:49 Luk 22:36 ^r22:50 Sion 18:26 ^s22:52 Luk 22:37 ^t22:53 Luk 19:47;
21:37; Sion 7:30; 8:20; Kol 1:13 ^u22:54 Luk 22:33 ^v22:61 Luk 22:34

Lapurun Iesu e lalihi be von koten na vat xil na Siu xil

Mat 26:59-68; Mak 14:55-65; Sion 18:19-24

⁶³Mereketeh xil te Nim Eo xa di laketeh xol Iesu lasep pepamen ni e di labas purun ni. ⁶⁴Labar xol meten e labasi. E melele xa tei xil basi, xil lasisi labit, “?!Xosxa obe provet reitin, uhit pisi, visi iaxa basuk!?” ⁶⁵E lasep purun ni ni holesok hao mun xa mak.

⁶⁶Melele xa ut milan, elda xil na Siu xil, vat xil na pris xil, del titsa xil te rae na Mosis lamei vituei e von koten nae. Di, ladel Iesu bemei misoh pe metexil. ⁶⁷Xil lasisi labit, “?Hit pisi mi xamem, be reitin xa xouk iaxa obe Mesaea xa Hi tehosei?”^w

E Iesu bit rilomun ni mi xil bit, “Xosxa nihiteni mi xamim, ma munake reitin ti en. ⁶⁸E xosxa nisis xamim xa veneh ma mutake reitin ti en, ma musakras muvit kuhi minou. ⁶⁹E nihiteni imak, taxeak iha, Nat Moletin itotan e von xeihen e ri metu na Hi te xeihen.”^x

⁷⁰Melele xa Iesu biteni mak, xil vus lasisi labit, “?Midep? ?Di obiteni obit xouk iaxa obe Nat Hi?”^y

Ma Iesu bit rilomun ni mi xil bit, “Ngoni ngan taxa xamim di mubiteni.”

⁷¹Misak ni vat xil na Siu xil labiteni labit, “?!Veneh ma di rilang ves moletin tova tangan isa sepinien iha xati!? !Xir vus ralong sepinien tesa xil xa mistal nggo vulongen ihe an mun tang!”

Vat xil na Siu xil ladel Iesu ba be von koten na Suv Paelet tangan ikin maten mini

Mat 27:1-2,11-14; Mak 15:1-5; Sion 18:28-38

23 Vat xil na Siu xil vus xa ladi e kot lamea e ladel Iesu ba misoh pe met Suv Paelet xa be vat te kavmen e provins te hal Sudea. ²Di, xil labit rat holesok holu ba xat rin na Iesu mi Paelet labit, “Xamem makameti xa moletin ak iaxa di miling nenemien xil xa misa mi Siu xil. Xi di misep xol xil tangan linaxal **takis** ti nava mi **Sisa** e kavmen nan te hal Rom. E xi di bithiteni xa be Mesaea xa Hi tehosei tangan mei vahe suv toto tei.”^z

³Ma Paelet misis Iesu bit, “?Midep? ?Be reitin xa xouk iaxa obe suv toto na Siu xil?”^a

E Iesu bit rilomun ni bit, “Ngoni ngan taxa obiteni.”

⁴Di, Paelet biteni mi **vat xil na pris xil** del tatit moletin xil ak bit, “Inou natakamet ti neta xa misa vata xat rin na moletin ak.”

⁵E xil laso rut sepinien ba xat rin na Iesu labit, “Pispisien nan di misi petine moletin xil tangan livae itel xil mun tang. Xi tepol kokot ni e provins te hal Kaleli, e taxeak, di pol ni inggak e provins te hal Sudea.”

⁶Melele xa suv Paelet milonge mak, misis xil bit, “?Be reitin xa moletin ak be ngan Kaleli?” ⁷Melele xa Paelet milong kila xa Iesu be ngan Kaleli tei, rute xa suv toto **Herod** Antipas di milaxati, misil Iesu ba pusi vengan xa Herod de **Serusalem** e melele nen ak.^b

⁸E melele xa suv toto Herod pus Iesu, besi xi pupu. Besi xi vengan, be nousav ngamu, xi ien tehei tangan vapus ti ni

^w22:67 Sion 10:24; 3:12; 8:45 ^x22:69 Sam 110:1; Pol 7:56 ^y22:70 Mat 4:3,6; Luk 4:3,9 ^z23:2 Luk 20:25 ^a23:3 1Tim 6:13 ^b23:7 Luk 3:1

meten xati. Xi minemi bit vahit Iesu vapul ni merekel tova tangan vapus ti.^c ⁹Ma Herod misis rovui Iesu e rin xil holu, e Iesu dat votei, tasa rilomun ni ti sepinien tova mini. ¹⁰Vat xil na pris xil del *titsa* xil te rae na Mosis mei lasoh pe met Herod e laso sepinien xil xa nggeih xat Iesu. ¹¹Di, Herod del moletin te vaeen nan xil mun lasepin misa ba xati. Xil lapol pepamen ni Iesu e lasing xole ni kaliko tei xa bos nggoni suv toto tei. Di, lasa rilomun ni be visal suv Paelet. ¹²E melengien nen ak vari, Herod del Paelet mei lube timue hos. E diamu ni melele nen ak, lutehe elu mi xalu.

Suv Paelet misemae ni tangan litel Iesu ha liti xati e eivave

Mat 27:15-26; Mak 15:6-15; Sion 18:39–19:16

¹³Paelet mikes viton vat xil na pris xil, eilep xil na Siu xil, del moletin sav xil mun. ¹⁴Di, biteni mi xil bit, “Xamim mutehur moletin ak temei visal nou e mutehiteni xa xi iaxa di miling nene-mien xil xa misa mi Siu xil. E taxeak, pe metemim, natelepis rin nan xil vus, e natakamet ti rin tova xa misa xa xamim mubit xi di pol ni. ¹⁵E suv toto Herod mun takamet ti rin tova xa misa vata xati. Mak iaxa misa rilomun ni bemei visal xir. Moletin ak tenapol ni ti neta tangan ha imat ven. ¹⁶Mak, ma nisemae ni moletin navan xil tangan ha limeas pangasi, ti, nimaen ni ha ven imase.”
¹⁷§§

¹⁸Vatei takes, vanut moletin xil ak lakei be nesao labit, “!Has vin moletin xai! !Maen Barabas ha ven imase!”
¹⁹Barabas tete nim te xeih vengam xa

tehas vin moletin tei e hal Serusalem e melele xa latevae tetel kavmen te hal Rom en.

²⁰Paelet ien bei tangan vamaen Iesu vaha ven vamase, ma biteni mi vanut moletin xil ak vatei mun bit, “!Nimaen Iesu ha ven imase!”

²¹E moletin xil lakei nggeih pilei sung labit, “!Ti xati e eivave! !Ti xati e eivave!”

²²Vatol nen, Paelet misak pisi tangan vasepin mi xil bit, “?Xi tepol ni naha xa tesa? !Natakamet ti neta tova xa xi tepol ni tangan vaha vamat ven! Misak ni, moletin navan xil ha limeas pangasi, ti, nimaen ni ha ven imase.”

²³E vanut moletin xil langgulehi di lakei nggeih pilei mu tangan ha liti xat Iesu e eivave. Dit lapol ni, lapol ni, lapol ni ba vuma ... Paelet maen ni sung. ²⁴Ma Paelet pol ni naha xa moletin xil di lasisi ven. ²⁵Nggusil keien nae, xi maen ngan xa tehas vin moletin tei e vaeen tei tetel kavmen te hal Rom tangan ha ba ven imase ra nim te xeih. E Iesu sung, Paelet misa rati be he moletin te vaeen nan xil tangan lihusil naha xa vanut moletin xil ak iexil tehei, ma ba tangan liti xati e eivave.

Ladi xat Iesu e eivave

Mat 27:32-44; Mak 15:21-32; Sion 19:17-27

²⁶Melele xa moletin te vaeen xil na Paelet ladel Iesu laba, labisu ni moletin tei te hal Saerin xa di mikakao bemei tangan vahe Serusalem, hisen Saemon. Ma ladal xati, e laling eivave na Iesu de vatuvun tangan ipoe ihusil xil. ²⁷Tatit moletin tei xa mahulong mun di langgusil Iesu laba. E rute xil labe atou xil

§§**23:17** Rut vanuvei matu xil te Luk laling sepinien ak xa nggoni Mak 15:6 xa bit, “Sangas ni Anien te Tavien xil ngasen, Paelet di maen vatxeih tei na Siu xil xa de nim te xeih nan tangan ha ven imase.”

xa di lamuis e di ladang ven. ²⁸E Iesu biles, miketeh pus xil e biteni mi xil bit, “Atou xil te hal Serusalem, munates nou ti. E mutes xamim mun tang itel horamue namim xil. ²⁹Vengan melengien tesa xil di bemei xa moletin xil ti lihiteni lihit, ‘Ihos pupu mi atou xil xa labe lumalum, ngan xil xa lataling ti mu horamue, e ngan xil xa latatunat ni ti tuvava.’^d ³⁰E ti lihiteni mun mi vathu xil lihit, ‘Tetu xat xamem!’ e mi hu xil lihit, ‘!Soson xamem!’^e ³¹?Vengan xosxa upang te pangasien di ngga len moletin hos tei xa nggoni vatiei xa memas, ma itep mi moletin tesa xil xa langgoni vatiei xil xa langguxu? Upang na Hi mei ia lelen xil vus.”

³²E melele nen ak, di ladel moletin lu mun xa lutepol tesa luba tangan ha lihas vin xalu itela. ³³Melele xa laduxoh rute xa lakesi ni ‘Valvat Moletin,’ ladi xat Iesu de eivave. E moletin tesa xalu, ladi xat xalu ludi e eivave lu mun. Tei de rin metu, e tei de rin meil.^f ³⁴Melele xa Iesu di murur e eivave, biteni bit, “Tata, unaketeh ti nasa ni xil vengon xa xil latakil ti naha xa di lapol ni.”^g

Sangas visal Iesu, moletin te vaeen xil laso daes tangan laseti eising nan mi xil. ³⁵E tave sotin pupu ti, moletin xil hao lasoh ladi tangan lapusi. Vat xil na Siu xil di lasep pepamen mini labit, “Mupus pisi. Xi miteh meulien e moletin sav xil. !Bos! !E xosxa be Mesaea reitin xa Hi tehosei, ma iteh meulien e xi tasen tang!”^h

³⁶Moletin te vaeen xil mun, di lasep pepamen mini. Labe visali, e lasa uaeen xa mikon mini tangan vamun ni.ⁱ ³⁷Labiteni labit, “!Xosxa obe suv toto na Siu xil, uteh meulien e xouk tasom tang!”

³⁸Di, xil ladi xat tisen tei de nesao ni vat Iesu xa bit, “Ngon ak be suv toto na Siu xil.”

³⁹Tei e moletin tesa xalu xa di murur e eivave misepin misa ba mi Iesu bit, “?Be reitin xa obe Mesaea? !Uteh meulien e xouk itel xamel mun!”

⁴⁰E teimum xalu misepin nggeih ba ni tua nan bit, “?Midep? ?Ulum takan ni Hi ti? Longpangasien naratel pipin tang.

⁴¹E ralu, momal tang xa ralihur longpangasien ak vengon xa rupol misa. E moletin ak tapol ni ti neta xa vasa.” ⁴²Di, xi biteni mi Iesu bit, “Melele xa mei uhe suv toto e uhur xeihen nam, unem xat inou li.”^j

⁴³E, Iesu bit rilomun ni mini bit, “Nabit xati minuk, xosali tang, xouk uta itel xat nou e rute tei xa ihos xa ihos pupu.”

Maten na Iesu

Mat 27:45-56; Mak 15:33-41; Sion 19:28-30

⁴⁴E piniae xati, ut biles bemei maluxoluk e dat mak duxoh tri klok mahis,^k ⁴⁵vengon xa eai taxan ti mun. Di, kaliko xa dakoe xol ut eo te **Nim Eo** na Hi mesel e hilaep be rin lu. ⁴⁶E melele nen ak, Iesu miki be nesao mi Hi bit, “Tata, naling meulien navan de hem.” Melele xa biteni mak, Iesu milih kor ni votiang, di, mat.^l

⁴⁷Melele xa vat na moletin xil te vaeen pus naha xa mistal, xi pus kil xeihen na Hi nggo holesok xil xa di mistal e biteni bit, “Reitin mak, moletin ak temal tevi e tenapol ni ti neta vasa.”

⁴⁸Moletin sav xil holu latemei tangan lapus holesok xil xa testal mi Iesu teha tetuxoh maten na Iesu e sexien xa di mat. E melele xa latepus naha xa mistal,

^d23:29 Luk 21:23 ^e23:30 Hos 10:8; Rev 6:16 ^f23:33 Aes 53:12

^g23:34 Aes 53:12; Mat 5:44; Pol 7:60; Sam 22:18 ^h23:35 Sam 22:7-8

ⁱ23:36 Sam 69:21 ^j23:42 Mat 16:28

^k23:44 Amos 8:9; Eks 26:31-33; 36:35 ^l23:46 Sam 31:6; Pol 7:59

ladang e lamuis ba labe tim sae xil.^m 49 E ngan xil xa latekil kuh Iesu, del atou xil xa di latehusili melele xa latexo provins te hal Kaleli latemei, xil lasoh ladi nga sotin vuteili, e di lapus holesok xil xa di mistal.ⁿ

Tehinen na Iesu

Mat 27:57-61; Mak 15:42-47; Sion 19:38-42

⁵⁰ Moletin tei da e rute ak, hisen Siosep te hal Aramatea e provins te hal Sudea. Xi be moletin hos tei e sexien nan xil momal. Neta sav xa be tei e kaonsel xa latepol ni kot mi Iesu,^o 51 xi tenamae ti e lingxatien nae tangan lavas vini. E xi mun di datil melele xa Hi imei ihe suv toto na moletin xil te ut etan. 52 Xi be visal Paelet e misisi tangan vamaen ni tiei na Iesu ha vatihin ni. Ma Paelet maen ni mini. 53 Di, Siosep ba po rat tiei na Iesu ra eivave, e pis xole ni kaliko te mieh tei xa memese. Di, poe e ba milingi de vangihat te tehinen hu tei xa lateseh moten rohon ni tang.^p 54 Be Fraede mahis, e **Sabat** bemei sangas xa Siu xil lasakras lapol en.

⁵⁵ Melele xa Siosep di po tiei na Iesu, atou xil xa di latehusil Iesu latexo Kaleli latemei lapusi. Ma xil langgusil xuxus ni e lapus vangihat ak e midep iaxa teling tiei na Iesu da en.^q 56 Di, xil ladi lomun labe tim, e labue xat vokon e oel tangan lixul maxoe ni tiei na Iesu ni.^r

E langel e Sabat nggoni ngan xa rae na Mosis tesemae ni.

Iesu mea rilomun ra maten

Mat 28:1-10; Mak 16:1-8; Sion 20:1-10

24 E Sande makoe roroh, atou xil lakakao labe vangihat del vokon e oel taxul maxoe en xa lateling xati tuei teti tangan livue xat tiei na Iesu ni.^s 2 E melele xa laduxoh vangihat ak, lakameti xa vatihat xa dakoe xol puiteh te vangihat, ladin rati ngamu. 3 E melele xa labe vangite, latapus ti tiei na Suv Iesu. 4 Misak ni, lanexo e di lanem vesi xa tiei na Iesu ba xave. Vatakes, rumali lu xa eising nalu mihinehin pupu mei lustal mi xil.^t 5 Atou xil ulixil mikan pupu e latingeiril mi xalu. E rumali xalu ak lubiteni mi xil lubit, “?Veneh ma di mulang ni ngan xa meul e von maten?”^u 6 Xi tara ti ak, mea rilomun ra maten ngamu. Munem xat naha xa xi tehiteni mi xamim melele xa xi teta tamu e Kaleli. 7 Xi tehiteni xa lisa rat Nat Moletin ihe he moletin tesa xil. Ti, xil liti xati e eivave e imat. E melele xa melengien tol mei itavi, imea rilomun ra maten.^v

⁸ Ma atou xil lanem rilomun ni sepinien na Iesu.^w 9 Di, labe reling vangihat te tehinen e ladi lomun ba lapus moletin xil na Iesu xa labe tei e le tei (11) e labit mesen holesok xil vus mi xil del mosav xil mun xa latehusil xat Iesu. 10 Atou xil ak latehe Meri te hal Makdela, Soana, e Meri xa be nine Temis, del rut atou xil mun. E melele xa atou xil ak laba labit mesen holesok xil ak mi **eloheoh** xil,^x 11 xil lanemi labit tumulen na atou xil ak be luvosan tang, ma latake reitin ti e xil. 12 E Pita mitamea e miloh be vangihat. E melele xa duxoli, mitei hiraen be

^m23:48 Luk 18:13 ⁿ23:49 Sam 38:11; 88:8; Luk 8:2; 23:55

^o23:50 Luk 2:25,38 ^p23:53 Luk 19:30 ^q23:55 Luk 8:2; 23:49

^r23:56 Eks 12:16; 20:10; Dut 5:14 ^s24:1 Sion 20:19; Pol 20:7; 1Kor 16:2

^t24:4 Pol 1:10 ^u24:5 Luk 2:9 ^v24:7 Mat 16:21; 17:22-23; 20:18-19; Mak 8:31; 9:31; 10:33-34; Luk 9:22; 17:25; 18:32-33; Pol 17:3 ^w24:8 Sion 2:22

^x24:10 Luk 8:2-3

vangite e pus kaliko te mieh xa latepis xol Iesu ni da, e tapus ti tiei nan. Di, xi dilomun be tim e di minem ves naha xa mistal.

Iesu mistal mi moletin lu e suse

Mak 16:12-13

¹³E melengien nen tak, moletin lu xa lutehusil xat Iesu di lukakao lube metimal tei xa lakesi ni Emeas. Metimal ak be sotin vuteili, kilomita teni be tei e le tei (11) ra hal **Serusalem**. ¹⁴Xalu lukakao luba e di lutumul usil holesok xil vus xa testal. ¹⁵E melele xa di tamu lutumul mak, Iesu vari bemei dutou ni xalu e mei mos e xalu latoba.^y ¹⁶E Hi misikoe xol nenemien nalu tangan lulnale kil ti. ¹⁷Melele xa latkakao mak, Iesu misis xalu bit, “?Xamil di mutumul usil naha e suse namil?”

Xalu lusoh kat, e valnao xalu be tan. ¹⁸Tei e xalu xa hisen Kleopas misis Iesu bit, “?Midep? ?Xouk kestang xa otemei e hal Serusalem iaxa otakil ti holesok xil xa testal e melengien vahis xa tetavi?”

¹⁹Ma Iesu misis xalu bit, “?Holesok eah?”^z

E xalu lubit rilomun ni mini lubit, “Holesok xil xa testal mi Iesu te hal Nasaret. Moletin ak tehe **provet** tei na Hi xa eilep pupu pe meten e pe met moletin xil mun xa tesepin e tepol tetel xeihen. ²⁰E **vat xil na pris xil** del eilep xil na Siu xil latesa rati teha tehe he kavmen te hal Rom. E xil iaxa latekin maten mini, lateti xati e eivave, e temat. ²¹E xamem di matenesi matehit xi iaxa ileh rerat mol-Isrel xil ha vexil imase ra he ngan xil xa di lapol ni nggeih mi xil. E neta tei mun, holesok xil testal melengien tol

ngamu xa tetavi.^a ²²E xosali, makoe ro-roh tamu, rut atou xil xa di lamos e xamem latehe vangihat te tehinen nan, e latetumul ni neta xa misak ni xamem mamesep pupu.^b ²³Xil latetilmun late-mei e latehit mesen ni mi xamem xa latnapus ti tiei na Iesu e vangihat ak. Latehiteni mun xa latepus **maxaxa** lu xa lutestal mi xil xa lutehiteni mi xil xa Iesu temea rilomun ra maten. ²⁴Di, rute e xamem latehe vangihat ak e latekameti xa holesok xil vus texoni ngan taxa atou xil ak latehiteni. E tiei nan latnapus ti.”^c

²⁵Melele xa Iesu milong tumulen nalu, biteni mi xalu bit, “!Xamil mube varu tova tang! !Muraru pupu tangan muke reitin e holesok xil xa provet xil tetiamu latehiteni!^d ²⁶Vengan xa xil latehiteni xa, itiamu, Mesaea ihur longpangasien xa mak. Ti, ihur his xa eilep e ha ihur von lelatxatien itel minehinen te xeihen nan.”^e ²⁷Di, Iesu bit kil holesok xil vus xa di e Vanuvei Eo xa di misep usil xi: ngan xil xa langgo tisen xil na **Mosis** mei duxoh tisen xil na provet xil mun.^f

²⁸Melele xa latomei sangas visal metimal te hal Emeas, Iesu bit ha ihur sal ni suse iha. ²⁹E xalu ludakesi lubit, “Uta tamu visal xamel li vengan xa meteneai ba tu xiak, e navehi ti ut imaluxoluk.” Ma be xatel latodi. ³⁰E melele xa Iesu dotan tangan vaanien vatel xalu, nggur beret, memes Hi ven, bul pasi e misa ni mi xalu.^g ³¹Vatei takes, nenemien nalu miluv e lupus kila xa xi be Iesu. E melele xa di tamu luketeh lupusi, Iesu mikesae reling metealu. ³²E xalu lubiteni mi xalu mun tang lubit, “!Moletin ak tehe Iesu vari! Melele xa di tamu tehit kil sepinien xil te Vanuvei Eo mi ralu, rulong kila

^y24:15 Mat 18:20; Mak 16:12 ^z24:19 Mat 21:11 ^a24:21 Luk 1:68; 2:38

^b24:22 Mat 28:1-8; Mak 16:1-8; Luk 24:1-11

^c24:24 Sion 20:3-8 ^d24:25 Luk 24:44 ^e24:26 Mat 16:21; Mak 8:31; Luk 9:22; 17:25; Pol 17:3; Sion 7:39; 12:16,23; 13:31-32; 17:1-5; Pol 3:13

^f24:27 Dut 18:15; Sam 22:1-18; Aes 53; Luk 24:44 ^g24:30 Luk 22:19

nggo tinalu xa xi iaxai.”³³ Misak ni, e melele nen ak vari, xalu lutamea e ludilomun lube Serusalem.

Melele xa luduxoh hal Serusalem, lukamet moletin tei e le tei (11) na Iesu xa ladi vituei del rut moletin sav xil mun xa latehusil xat Iesu.³⁴ E xil labiteni mi xalu labit, “!Be reitin! !Suv Iesu temea rilomun ra maten, vengan xa testal ni Saemon Pita!”^h

³⁵ Di, moletin xalu ak sung lusep kil naha xa testal mi xalu e suse, e midep iaxa lutepus kil Iesu melele xa tevul pas beret.ⁱ

Iesu mei mistal mi moletin nan xil

³⁶ Melele xa rumali di tamu lusep usil holesok xil ak mi xil, Suv Iesu vari mei misoh e hilaep te xil e biteni mi xil bit, “Tomat iti mi xamim.”^j

³⁷ Xil lamesep pupu e ulixil mikan venggan xa lanemi labit di lapus ninin nan tang.^k ³⁸ E xi biteni mi xil bit, “?Ulimim di mikan ni nou veneh? ?E veneh ma nenemien namim be lu usil nou e mutake reitin ti xa natemea rilomun ra maten reitin? ³⁹ Muketeh mupus heok xalu e leok xalu. Inou mak xiak. Mutang mei mutuxol inou tangan muteong kila xa hisi e siuk di, venggan xa ninin tei, hisi e sin xil latovuol en.”

⁴⁰ E melele xa biteni mak, pisen hen xalu del len xalu mi xil. ⁴¹ Melele xa lapusi, lapolu e sien, e nggeih tamu tangan lake reitin xa be xi iaxai. Misak ni, Iesu misis xil bit, “?Rut anien ti di tak tangan nama ni?”^l ⁴² Ma xil lasa rut meseo tei xa meses mini,^m ⁴³ e Iesu ngguri e ngga ni pe metexil.

⁴⁴ Di, Iesu biteni mi xil bit, “Holesok xil xa testal tehusil xat naha xa natehiteni mi xamim e melele xa nateta tamu visal xamim. E testal minou tangan vasak ni holesok xil xa latetisi usil nou e **rae xil na Mosis**, tisen xil na provet xil, e sepinien te Sam xil mun mei vahe reitin.”ⁿ

⁴⁵ Di, misah nenemien nae tangan long kil sepinien xil xa di e Vanuvei Eo. ⁴⁶ E biteni mi xil bit, “Koute te tisen xil ak mak: Mesaea xa Hi tehosei ha ihur longpangasien e imat. Ti, melele xa melengien tol mei itavi, imea rilomun ra maten.^o ⁴⁷ E, e hisen, moletin xil ha lihithiteni xa Hi iketeh ihos rilomun mi ngan xil vus xa labiles ra **tesaen** nae xil. Itiamu, lihithiten longongen hos ak mi moletin xil te hal Serusalem. Ti, ha lihithiteni e rute xil vus te ut etan.^p ⁴⁸ Xamim xa di mupus holesok xil ak e di mulong sepinien nan ti muhit rati mi mosav xil.^q ⁴⁹ !Muteong kuhi! Inou nisa Ninin Eo xa Hi Tata tehit xati tehit isa ni mi xamim.^r

Iesu be ut nesao pe met moletin nan xil

Mak 16:19; Pol 1:9-11

⁵⁰ Di, Iesu del moletin nan xil labe reling taon te hal Serusalem e labe metimal te hal Betani. E rute ak, mitei mormal ni hen e misa tuxolxatien mi xil. ⁵¹ Melele xa di tamu misa tuxolxatien mi xil, Hi nggur rati be reling xil e ngguri be ut nesao.^s ⁵² Melele xa lapusi mak, lamot mini. Di, del sien, ladilomun labe

^h24:34 1Kor 15:4-5

ⁱ24:35 Mat 28:16-20; Mak 16:14-18; Sion 20:19-23; Pol 1:6-8

^j24:36 1Kor 15:5 ^k24:37 Mat 14:26 ^l24:41 Sion 21:5

^m24:42 Sion 21:9-10 ⁿ24:44 Luk 18:31; 24:27 ^o24:46 Aes 53; Hos 6:2

^p24:47 1Tim 3:16 ^q24:48 Sion 15:27; Pol 1:8

^r24:49 Soel 2:28-29; Sion 14:16; 15:26; 16:7; Pol 1:4 ^s24:51 Pol 1:9

Serusalem.^{t 53}E melengien xil vus, xil
labe vloh te ***Nim Eo*** di lasa memesien
nae ba mi Hi.

Sepinien xa diamu te

Sion

?Visi iaxa tetis vanuvei ak?

Moletin xa tetis vanuvei ak, hisen tehe Sion. Xi tehe tei e moletin na Iesu xil xa latehe lu e le tei (12). Tave ti neta xa tavit rat hisen ti e vanuvei ak, tekes tasen ni xi tang ni *“ngan xa eheien na Iesu di en.”*^u

Sion tetis vanuvei ak tetiamu ni huram 70 AD (huram xil xa tetutou ni melele xa Iesu tepot en). Lanemi mak vengan xa Sion tenavit usili ti melele xa moletin xil te vaen te hal Rom mei latehu len taon te hal Serusalem xa testal e huram 70 AD. Xi tetisi tetutou ni vanuvei xil xa Matiu, Mak tetel Luk latetisi usil meulien e pispisien xil na Iesu.

?Visi iaxa tevuli vanuvei ak tetiamu?

Melele xa Sion tetis vanuvei ak usil Iesu, moletin sav xil na Iesu tetel moletin sav xil holu mun xa lateti visal Iesu melele xa tete ut etan latekesae ngamu. Eloheoh Sion tepol tetel Kristin xil e taon xil te hal Efeses, Samerna, Pegamam, Taeatira, Sadis, Piladelfia, e Laodisia xa lateti e tan xa mahulong te hal Esia.^v Ma, melele xa Sion temeul tamu teta, ngan xil ak latesisi tangan vatis rat naha xa tepus Iesu tepol ni e naha xa telonge tehiteni. E texoni ngan xa Sion tehiteni e 21:25 tehit, *“Iesu tepol ni holesok xil*

holu mak mu mili naha xa natetis xati. Vahit latis xat holesok xil vus xa xi tepol ni vati e vanuvei xil, ma nanemi nabit ut tapin ti e ut xil vus te ut etan tangan laling xil en.” Misak ni, Sion tehosei tumulen xil kestang xa mikila vatutou ni Kristin xil tangan lipus kil kuhi xa Iesu tehe Mesaea, Mesaea xa Hi tehit xati tangan isa ni imei, nggoni ngan xa Sion tehiteni e 20:31 tehit, *“E natetis holesok xil ak tangan vasak ni moletin xil mei lake reitin xa Iesu be Mesaea, Nat Hi. E xamim mukil kuhi xa ngan xil xa lake reitin e xi lihur meulien sal ixo hisen.”*

?Sion tetis vanuvei ak veneh?

Sion ien tehei tangan vapisen ni xa Iesu nggo visal Hi - Melele xa Mak tetis usil meulien na Iesu, tetis kokot usili e vanuvei nan xa merekel xil xa Iesu tepol ni tepisen kila xa xi tehe Mesaea. E Matiu xal Luk, lutetis kokot usili e vanuvei nalu xa tetep iaxa Iesu mei tepot e ut etan tehusil lingxatien na Hi. E Sion, xi tetis kokot usili e vanuvei nan xa tetep iaxa Iesu tete visal Hi tetiamu nousav e lutepeas vituei ni holesok xil vus xa ladi.^w
Sion ien tehei tangan vapisen ni xa Iesu tehe Nat Hi - Iesu tehit kila tehe holu xa xi tehe Nat Hi reitin^x
Sion ien tehei tangan vapisen ni xa Iesu tehe Mesaea xa Hi tehit xati tangan isa ni mi moletin xil - Sion tetis xat sepinien na moletin xil xa latepus kila xa Iesu tehe Mesaea na Hi: Sion Baptis.^y
Sion ien tehei tangan vapisen xeihen na Iesu texo merekel xil xa xi tepol ni

^u1:0 Sion 13:23; 19:26; 20:2; 21:7,20,24; Mat 4:18-22; Sion 13:23-24; 20:2-10; 21:2,7,20-23; Sion 19:26-27; Kal 2:9; Pol 3:1-11; 4:1-23; 8:14-24

^v1:0 Rev 2:1-3:22 ^w1:0 Sion 1:1-18; Sion 1:14; 3:2,16-17; 4:34; 5:23-24; 6:32-33; 7:16; 8:14; 9:4; 10:36; 11:42; 12:44-45; 13:3; 16:27-28; 17:3; 18:36; 20:2 ^x1:0 Sion 1:18; 3:16-18; 5:19-23; 6:40; 8:36; 10:36; Sion 1:14; 2:16; 3:35; 4:21; 5:17-23; 6:27; 12:26-28 ^y1:0 Sion 1:29,36; Sion 1:41; Sion 1:45; Sion 1:49; Sion 4:25-26; Sion 4:29; Sion 4:42; Sion 6:14; Sion 6:68-69; Sion 7:31,40; Sion 11:27

- Sion tetis xat merekel na Iesu xil tehe lu e he sav (7). 1) Iesu tehiles oei mei tehe uae.^z Merekel xil ak tesak ni moletin xil latehiteni e 7:31 latehit, “*Xamem malonge xa melele xa Mesaea imei, xi ipol ni merekel xil holu. !E moletin tovuol xa mikila vapol ni merekel xil vahe holu mak mu vali ngan xil xa Iesu di pol ni!*”

Sion ien tehei tangan vapisen ni xa Iesu tehit rati xa xi be Hi, e tepisen reitinen teni texo vole xil - E Eksodas 3:14, Hi tepisen xi mi Mosis tehit, “*Inou nabe ngan xa NABE!*” Ma, Siu xil latehur sepinien te NABE texoni ngan xa be his xati na Hi. Koute te his ak iaxa Hi dat mak vehakut, e melele xil tetiamu, te xosali ak, e te melengien xil vus xa ti imei mun. E, ve merereen nae, moletin xil latekes Hi ni ‘Iahova’ xa koute teni be Suv. E Sion tetis xati tehe vahat e he sav (9) xa Iesu mun tehit sepinien ak xa tehit, “*!Inou NABE!*”^a

Sion ien tehei tangan vapisen ni xa ngan xil kestang xa labisti del Iesu lihur meulien sal - Vengan xa be reitin xa Iesu be Hi e vatit meulien sal, ngan xil xa labisti dela lihur meulien sal.^b

Sion ien tehei tangan vapisen ni xa xir, moletin nan xil, ti ripisen Iesu mi mosav xil ixo sepinien e sexien nar xil - Iesu tesil moletin nan xil tangan ha lihithiten longeongen hos usili mi mosav xil.^c

Vatit nenemien tei te vanuvei ak de Sion 20:31

E natetis holesok xil ak tangan vasak ni moletin xil mei lake reitin xa Iesu be Mesaea, Nat Hi. E xamim mukil kuhi xa ngan xil xa lake reitin e xi lihur meulien sal ixo hisen.

?Naha iaxa di e sepinien ak?

1. Iesu be Vatit Sepinien te Meulien. (1:1-18)
2. Iesu pisen ni xa xi be Nat Hi nggo polien e pispisien nan xil. (1:19-4:54)
3. Vat na Siu xil lanem misa holu ni Iesu. (5:1-12:50)
4. Iesu misa pispisien kor mi moletin nan xil. (13:1-17:26)
5. Ladal xat Iesu, ladi xati e eivave, e Iesu mat. (18:1-19:42)
6. Iesu mea rilomun ra maten e mistal mi moletin nan xil. (20:1-21:23)
7. Sepinien kor. (21:24-25)

Iesu be Vatit Sepinien te Meulien xa temeie tete ut etan

1 Tetiamu nousav, melele xa Hi tenapeas ni ut nesao mu ut etan ti mu, Vatit Sepinien teta ngamu. Xi xa be Vatit Sepinien teta tetel xat Hi, e xi tehe Hi e rin xil vus.^d ² Xi teta tetel xat Hi ngamu e melele xa holesok xil latehe tovuol tamu. ³ E texo xi, Hi teta tetel xat Hi ngamu e holesok xil vus.

^z1:0 Sion 2:1-12; Sion 4:45-54; Sion 5:1-18; Sion 6:1-15; Sion 6:16-21; Sion 9:1-41; Sion 11:17-45 ^a1:0 Sion 4:26; 6:20; 8:24,28,58; 13:19; 18:5,6,8; Sion 6:35; Sion 8:12; Sion 10:7; Sion 10:11; Sion 11:25; Sion 14:6; Sion 15:1

^b1:0 Sion 12:44-45; 13:20; 14:7-10; Sion 3:15-16; 5:24-25; 6:47-58; 8:12; 10:27-29; 11:25-26; 17:3; Sion 1:10-11; 3:11; 5:40; 6:64; 8:37-47; 10:25-26; 12:37-40; 14:24; 16:9; Sion 1:18; 8:19; 14:6-7; 16:3; 17:3; Sion 1:1; 3:13; 5:19-20; 7:29; 8:26; 10:15; 15:15; 17:25; Sion 1:4; 5:26; 6:63; 10:28

^c1:0 Sion 13:16; 14:12; 15:26-27; 17:18; 20:21; Sion 12:36; 13:12-17; 14:12; 15:10; Sion 13:34-35; 15:12; 17:26; Sion 5:8; 17:10; 21:19

^d1:1 Rev 19:13; Sion 17:5; Plp 2:6; 1Sion 1:1-2

E vahit nave xi ti, ma neta vahe tovuol.^e
⁴Vatit Sepinien ak be vatite te meulien.
 E mei be miehen mi moletin xil tangan
 lakila lale kil holesok xil vus vaxo en.^f
⁵Ngan xa be miehen ak mileluv e malux-
 oluken, e ngan xil xa ladi e maluxoluken
 ak lasakras lanem kila mu laleli.^g

⁶Hi tesa moletin tei temei, hisen tehe
 Sion.* ^{h7}Xi temei tangan vahit usil xi xa
 be miehen ak, e tangan vasak ni moletin
 xil vus mei laling neketen nae en. ⁸Sion
 tenave miehen ak ti. E xi temei tangan
 vahit usil xi xa be miehen ak.ⁱ ⁹Reitin,
 Sion temei tangan vahit usil meien na
 ngan xa be miehen reitin xa mei ileluv e
 nenemien na moletin xil vus tangan lile
 kil reitinen na Hi.^j

¹⁰Ngan xa be miehen ak temei tete ut
 etan. E tave ti neta xa holesok xil vus e ut
 etan latestal latexo xeihen nan, moletin
 xil te ut etan latnakil ti xi.^k ¹¹Xi temei
 mi moletin nan xil xati, e moletin nan
 xil latnahur pilei ti. ¹²E ngan xil vus xa
 latehur pilei e lateneket en, xi tepol ni
 suse temal tangan mei lihe horamue xil
 na Hi.^l ¹³Xil mei latehe neta hu reitin, e
 tenaxo rin te pesisen ti xa di mistal nggo
 eheien mu lingxatien na moletin xil. E
 xil latemei latehe horamue xil na Hi ven-
 gan xa Hi vari tang tehosei xil mei latehe
 nan.^m

¹⁴Vatit Sepinien ak temei tehe mo-
 letin xa ven teta. Xi temei tete visal xir
 e xamem matepus minehinen te xeihen

nan, vengan xa xi be Nat Hi tei takes re-
 itin xa tepolu ni eheien hos e reitinen.ⁿ
¹⁵Sion tehiti usil xi xa xi be visi tehiti,
 “Moletin ak be ngan xa di natesep usili.
 Ngan xa natehiteni natehiti imei itutou ni
 nou xa ihe eilep ili nou. Be eilep mili nou
 vengan xa xi teta ngamu tetiamu nousav,
 e melele xa nana taling nou ti mu.”^o

¹⁶Xi polu ni eheien hos, ma di duxol
 xat xir vus holu xa holu pupu mili naha
 xa momal tangan ravuri.^p ¹⁷Texo **Mo-**
sis tetiamu, Hi tesa **rae** nan xil mi mo-
 letin xil. E, nggo Iesu Kristo, Hi di pisen
 eheien hos e reitinen nan mi moletin
 xil.^q ¹⁸Moletin tovuol tamu iaxa vapus
 Hi ni meten xati. E moletin xil mei lakil
 Hi nggo Natneli xa be siskes nan, ngan
 xa de ri Tamen.^r

Sion Baptis bit rati xa xi tave Mesaea na Hi ti

Mat 3:11-12; Mak 1:7-8; Luk 3:15-17

¹⁹Ngan ak be tumulen usil naha xa
 Sion Baptis tehiti rati usil Iesu. Vatei, vat
 xil na **Siu** xil e hal **Serusalem** lasil rut
pris xil del ngan xil xa lastal langgo vati-
 mol na **Livae** xa di lapol e Nim Eo tangan
 lava lapus Sion e lasis pilei xa xi be visi.
 Ma melele xa lastal e rute xa Sion da en
 lasisi labit, “?Xouk obe visi?”

²⁰E Sion tasin ni ti tangan vasa rilo-
 mun ni sepinien nae e bit rati bit, “Inou
 natave Mesaea ti xa Hi tehiti xati tangan
 isa ni imei.”^s

***1:6** Melele xa vanuvei ak misepin usil Sion, di bit usil Sion Baptis. E melele xa eloheoh Sion, nat Sepeti, di misepin usil xi tasen, mikes xi ni “moletin xa eheien na Iesu di en.”

^e**1:3** Sion 1:10; Kol 1:16-17; Hib 1:2 ^f**1:4** Sion 5:26 ^g**1:5** Sion 3:19

^h**1:6** Mat 3:1; Mak 1:4; Luk 1:13,17,76; 3:2 ⁱ**1:8** Sion 1:20 ^j**1:9** 1Sion 2:8

^k**1:10** Sion 1:14; 1:3; 1Kor 8:6; Kol 1:16; Hib 1:2; Sion 17:25 ^l**1:12** Kal 3:26

^m**1:13** Sion 3:3,5,6; Tem 1:18; 1Pit 1:23; 1Sion 3:9; 5:18 ⁿ**1:14** Rom 1:3; Kal 4:4;
 Plp 2:7; 1Tim 3:16; Hib 2:14; 1Sion 4:2; Aes 60:1-2; Luk 9:32; Sion 2:11

^o**1:15** Sion 1:30; Mat 3:11; Mak 1:7; Sion 1:27 ^p**1:16** Kol 2:10

^q**1:17** Eks 31:18; 34:28; Sion 7:19 ^r**1:18** Eks 33:20; Sion 6:46; 1Tim 6:16; 1Sion
 4:12; Mat 11:27; Luk 10:22 ^s**1:20** Sion 3:28

²¹ Misak ni, xil lasisi labit, “?Xos imaxai, ma xouk obe visi vari? ?Obe *provet Ilaetsa?*”^t

E Sion bit rilomun ni mi xil bit, “E-e, natave xi ti.”

Lasisi mun labit, “?Xouk obe Provet xa Mosis tehit lelen ni tehit Hi isa ni imei?”^u

E xi biteni bit. “E-e.”

²² Ma xil ladakesi labit, “Hit rati li mi xamem xa xouk obe visi tangan mukila muhit mesen ni mi vat namem xil xa lasil xamem mamei tangan makil ti. ?Di obit naha usil xouk tasom?”

²³ Misak ni, Sion misa sepinien na provet Aesea mi xil xa bit,

“*Inou nabe rae tei xa di miki e uruvuol bit,*

!Musak mesen suse na Suv!

!Mupol ni suse nan imal!” (Aes 40:3)^v

²⁴ Rut moletin xil ak xa latemei, tehe

Farasi xil iaxa latesil xil lamei visal Sion.

²⁵ E xil iaxa mei lasis Sion labit, “?Xosxa xouk otave Mesaea ti, mu Ilaetsa ti, mu Provet xa Hi tehit xati ti, veneh ma di obaptaes ni moletin xil?”^{f w}

²⁶ E Sion bit rilomun ni mi xil bit, “Inou di nabaptaes ni moletin xil del oei tang. E, e hilaep te xamim, moletin tei da ngamu xa xamim mutakil ti. ²⁷ Xi iaxa imei itutou ni nou xa be eilep mak mu mili inou. E inou natapin ti tangan mei name slev nan tang xa naleh rerat sandel nan.”^x

²⁸ Holesok xil vus ak testal e rute xa Sion di **baptaes** ni moletin xil en, ist te

Oeisal Sodan e sangas visal taon te hal Betani.^{‡ y}

Sion Baptis bit rati xa Iesu be Mesaea na Hi

²⁹ E melengien sav nen, Sion miketeh ba e pus Iesu di bemei visali. Melele xa pusi, Sion bit rati mi moletin xil bit, “!Mupus ti! Sulut sipsip xa Hi tesila di bemei. Xi iaxa ileh rerat tesaen xil ra moletin xil te ut etan.^z ³⁰ Xi vari be ngan xa natesep usili natehit, ‘Moletin tei imei itutou ni nou e xi ihe eilep mak mu ili nou. Vengan xi teta ngamu e melele xa nana taling nou ti mu.’^a ³¹ Melele xa natesep usili, inou mun natnakil kuh ti mu xa xi be visi. E Hi tesil inou tangan namei inggak e nabaptaes ni moletin xil, e napisen xi mi mol-Isrel xil.”

³²⁻³³ Sion biteni mun bit, “Reitin. Teti-
amu, inou natnakil ti xa xi be visi. E Hi xa tesil nou namei inggak tangan nabaptaes ni moletin xil vatel oei, xi tehiteni minou tehit, ‘Melele xa upus **Ninin Eo** imei etan e mei ite moletin tei, xi vari iaxa ihe ngan xa ti ibaptaes ni moletin xil itel Ninin Eo.’ Misak ni, tave nousav ti, natepusi xa xi temevisal inou, e natepus Ninin Eo texo ut nesao e temevisal inou mae mei teta kat en.^b ³⁴ Reitin li nabiteni mi xamim xa natepusi ngamu. E di nabit rati mi xamim xa moletin ak vari be Nat Hi reitin.”^c

[†]1:25 Farasi xil latemanin xa Sion di baptaes ni Siu xil. Vengan xa xil lamaen ni tangan labaptaes ni xil kestang xa latakil ti Hi xa labiles mei langgur rohon ni neketen.

[‡]1:28 Betani ak tenave Betani xa Merta xal Meri luteti en xa de sangas visal Serusalem. Betani ak sotin ra hal Serusalem.

^t1:21 Mat 11:14; 17:11-13; Mak 9:13 ^u1:21 Dut 18:15,18; Sion 6:14; 7:40; Pol 3:22; 7:37 ^v1:23 Mat 3:3; Mak 1:3; Luk 3:4 ^w1:25 Mat 21:25; Mak 11:30; Luk 20:4; Sion 1:33 ^x1:27 Sion 1:15; Pol 13:25 ^y1:28 Mat 3:13; Sion 10:40

^z1:29 Sion 1:36; Aes 53:6-7; Pol 8:32; 1Pit 1:18-19 ^a1:30 Sion 1:15

^b1:32-33 Mat 3:16; Mak 1:10; Luk 3:22

^c1:34 Mat 3:17; 17:5; 27:54; Mak 9:7; 15:39; Luk 9:35; Sion 20:31; Pol 9:20

Iesu mikes moletin hat (4) tangan lavusili

³⁵ E melengien sav nen, Sion dilomun be rute ak del moletin nan lu. ³⁶ E melele xa Sion pus Iesu di mikakao ba, xi bit rati mi moletin xil bit, “?Mupusi? !Ngan ak be sulut sipsip xa Hi tesila teme!”^h

³⁷ Melele xa moletin nan xalu lulung naha xa biteni, luba lunggusil Iesu. ³⁸ E melele xa Iesu di mikakao ba, xi biles e pus xalu xa di lunggusili. Ma, misis xalu bit, “?Iemil bei naha?”

E xalu lubit rilomun ni mini lubit, “Titsa, iemel bei tangan malkil ti xa oda xave.”

³⁹ Iesu biteni mi xalu bit, “Mulimei e mulipusi.” Melele xa di latkakao latoba, be mahis ngamu e eai da be tan vuteili. E ludi visal Iesu duxoh vongien.

⁴⁰ Tei e xalu xa telong sepinien na Sion e tehupil Iesu, hisen Andru, xa be tua na Saemon Pita.^d ⁴¹ E melele xa misepin del Iesu bus, vatakes, ba pus Saemon Pita e biteni mini bit, “Tuxoli, xamel makamet **Mesaea** xa Hi tehit xati tangan isa ni imei.”^e ⁴² Di, Andru del Saemon Pita e lube visal Iesu.^f

E melele xa Iesu pus Saemon, biteni bit, “Xouk obe Saemon, nat Sion. E tax-eak iha, hisom ihe Pita.” Koute te Pita be ‘hat.’

⁴³ E melengien sav nen, Iesu pol ni nenemien nan tangan vahe reling rute xa de sangas ni Oeisal Sodan, e ihe provins te hal Kaleli. Ma, ba mikamet moletin tei xa hisen Pilip e biteni mini bit, “Amei,

uhusil inou.” ⁴⁴ Pilip be ngan Betsaeta tei, taon xa Andru xal Pita lutexo en.^g

⁴⁵ Pilip maen ni e ba milang ni tuneli xa hisen Nataniel. Melele xa mikameti, xi biteni mini bit, “Xamem makamet Mesaea xa Mosis tetis usili e tisen te rae xil, ngan xa provet xil mun latetis usili. Hisen Iesu, nat Siosepe te hal Nasaret.”^h

⁴⁶ Melele xa milong sepinien ak, Nataniel misisi bit, “?Reitin mak? Inou natanem ti xa neta tova vahos vamak mikila vaxo taon votei te hal Nasaret.”

E Pilip bit rilomun ni mini bit, “Amei, mei upus ti.” Ma lukakao lube visal Iesu.

⁴⁷ Melele xa Iesu pus Nataniel bemei visali, bit usili bit, “Ngan ak be moletin tei xa taluvos ti, ngan xa pipin tangan likesi ni ‘ngan **Isrel** tei.”

⁴⁸ Melele xa Nataniel milonge mak, misisi bit, “?Xouk okil nou midep?”

Iesu bit rilomun ni mini bit, “Natepusuk ngamu e melele xa di tamu ote-totan pe mamel te vatit **fik**, e melele xa Pilip tenavat ti mu tangan vakes xouk.”

⁴⁹ Nataniel mesep pupu e biteni mini bit, “!Titsa, xouk obe Nat Hi reitin! !Xouk obe suv toto te hal Isrel xa di madatili!”ⁱ

⁵⁰ Iesu biteni mini bit, “Xouk oneket e nou vengan xa nabiteni tang minuk xa natepusuk melele xa di tamu otetotan pe mamel te vatit fik. E navehi ti, upus holesok savsav xil xa lihe tellep mak mu mili ngan ak. ⁵¹ Reitin li nabiteni minuk xa upus tilang hat imesel e **masxaxa** na Hi xil ti likakao lihe nesao e limei etan lixo nou, Nat Moletin, ixoni ngan xa nabe suse tei.”^j

^{¶1:36} Sion 1:29 biteni xa Iesu ileh rerat tesaen na moletin xil ixoni ngan xa sulut sipsip tei xa be sanien eo mi Hi di pol ni.

^d1:40 Mat 4:18-20; Mak 1:16-18 ^e1:41 Sion 4:25

^f1:42 Mat 10:2; 16:18; Mak 3:16; Luk 6:14 ^g1:44 Sion 12:21

^h1:45 Dut 18:18; Aes 7:14; 9:6; Esek 34:23

ⁱ1:49 Sam 2:7; Mat 3:17; 14:33; 16:16; Mak 1:11; 3:11; Luk 3:22; 4:41; Sion 11:27; Pol 13:33; Sef 3:15; Mat 27:42; Mak 15:32; Sion 12:13 ^j1:51 Sen 28:12

**Iesu biles oei mei be
uaen e tetelien tei**

2 Melengien lu mei mitavi. E, e melengien tol nen, moletin xil te metimal te hal Kena xa de provins te hal Kaleli lapol ni anien te tetelien tei. Nine Iesu tehe xil lateti e tetelien ak. ²E latesilasil mun teha mi Iesu tetel **moletin nan xil** tangan mei lianien itel xil e tetelien ak. ³Melele xa di langganien, nine Iesu milongcong ni xa uaen tovuol mun tangan lasa ni mi moletin xil. Misak ni, be visal Iesu e biteni mini bit, “Uaen mae tovuol mun. Ututou ni xil li.”

⁴E Iesu bit rilomun ni mini bit, “Nana, rin naralu tovuol en. Melele xati tangan nipisen ni mi moletin xil xa nabe visi tamei ti mu.”^k

⁵E ninen be visal moletin te polien xil e biteni mi xil bit, “Mupol sen holesok xil xa xi ihiteni mi xamim.”^l

⁶E rin tei, Iesu pus valoei tei e he sav (6) xa eilep xa **Siu** xil lase oei ba en tangan likila likas moten holesok nae xil ni mei imese ihusul rae na Siu xil. Xil kekes pipin tangan lise oei iha en ihe lita handred tei (100).^m ⁷Melele xa Iesu pusi, biteni mi moletin te polien xil bit, “Muse xat valoei xil xa latellep xiak ni oei.” Ma, lase xat xil mei lapolu duxoh vulongexil nesao. ⁸Lapol ni bus, Iesu biteni mi xil bit, “Muhutih ti oei ak ni kap tova. Ti, ha musa ni mi vat te anien ak tangan imu pisi.” Ma, lapol ni nggoni ngan xa xi biteni.

⁹E melele xa vat ak mu pis oei ak, mu ni be uaen e takil ti xa nggo xave. E moletin te polien xil xa latehutih oei ak lakila. Ma, vat ak mikes moletin xa miteli ¹⁰e misepin bos mini bit, “Mosav xil xa lapol ni anien tei xa eilep, diamu, lasa

uaen hos xa mani nen nggeih mi moletin xil. E melele xa moletin xil latalang holu, xi misa uaen sung xa tavos kuhi ti mi xil. E xouk, oling kuh uaen xil xa bos tangan ukila usa ni mi xamem sung itutou.”

¹¹Misak ni, e taon te hal Kena e provins te hal Kaleli, Iesu tepisen kokot ni xa xeihen da en nggo merekel ak. E melele xa moletin nan xil lapus xeihen nan, laling neketen nae en.ⁿ

¹²Melele xa tetelien bus, Iesu, ninen, tuneli xil, del moletin nan xil labe taon te hal Kapaniam. E ladi rute ak melengien vahis.^o

**Iesu nggol rerat ngan xil xa di lapol ni
Nim Eo na Hi mei be nim te posen tei**

*Mat 21:12-13; Mak
11:15-17; Luk 19:45-46*

¹³Melele te **Anien te Tavien** bemei sangas, Siu xil holu labe **Serusalem** tangan lasa sanien eo xil teni e Nim Eo. Misak ni, Iesu mun ba del moletin nan xil.^p ¹⁴E melele xa Iesu be vloh te **Nim Eo**, mikameti xa moletin xil holu di lapos ni buluk, sipsip, e tuman xil tangan lave sanien eo. E moletin xil holu ladotan lade tep nae xil e di laso papas mani na moletin xil. ¹⁵Melele xa Iesu pus holesok xil xa moletin xil ak di lapol ni, ien mikat pupu. Ma, mileh mavulut ao vutei xa ladi e tan, minggil viton ni mei be teviei e nggeih, e minggol rerat ngan xil vus ak ra vloh te Nim Eo, del buluk e sipsip sae xil mun ni ao ak. Di, Iesu midivin rerat tep na ngan xil xa di laso papas mani e mani nae xil mikora lel be tan. ¹⁶E mi ngan xil xa di lapos ni mae xil tangan vahe sanien eo xil, Iesu bul xat xil bit, “!Muleh holesok namim xil ak muhaha! !Munapol ni nim ma Tata navan ti mei nahe nim te posen!”^q

^k2:4 Sion 7:30; 8:20 ^l2:5 Sen 41:55 ^m2:6 Mak 7:3-4; Sion 3:25

ⁿ2:11 Sion 4:54; 20:30; Luk 9:32; Sion 1:14; 12:41 ^o2:12 Mat 4:13

^p2:13 Sion 6:4; 11:55 ^q2:16 Luk 2:49

¹⁷ Melele xa moletin nan xil lapus naha xa Iesu tepol ni, xil lanem xati xa Vanuvei Eo biteni bit, “O Hi, vengam xa di namerere ni Nim mam holu, ieok nggat pupu ni ngan xil xa latamerere ni ti.” (Sam 69:9)

¹⁸ E melele xa vat xil na Siu xil lapus naha xa Iesu tepol ni, lamesep pupu e lasepin nggeih mini labit, “?Visi iaxa maen xouk tengam opol ni holesok xil ak? Xosxa be reitin xa xouk onggur xeihen pipin tengam opol ni vamak, ma upol ni merekel tova mapusi.”

¹⁹ Ma Iesu bit rilomun ni mi xil bit, “Xosxa muhu len **Nim Eo** ak, inou nipet rilomun ni e melengien ihe tol (3) tang.”^r

²⁰ Vat xil ak latemanin ni sepinien nan labit, “!Iva! Moletin xil latepol huram hanutap lu e tei e he sav mun (46) tengam lapol pilei Nim Eo ak. E xouk obit ukila upet rilomun ni e melengien ihe tol tang. !E-e, osakras!”

²¹ E melele xa Iesu misep usil Nim Eo ak, di misep usil tenben.^s ²² E tetutou sung, e melele xa temea rilomun ra maten, moletin nan xil latenem rilomun ni sepinien nan, e lateneket e naha xa tehiteni e naha xa Vanuvei Eo tesep usili.^t

Iesu pisen ni xa xi mikil nenemien na moletin xil

²³ Melele xa Iesu da tamu e Serusalem e melele te Anien te Tavien, moletin xil holu lapus merekel xil xa di pol ni e laling neketen nae en.^u ²⁴ E Iesu take reitin ti xa neketen nae en be reitin vengam xa xi minem kil naha xa di nenemien na moletin xil vus. ²⁵ Moletin ti tavit kila mini, e xi minem kil holesok xil vus xa moletin xil di lanem usili e di iexil bei.

Vat tei na Siu xil bemei tengam vasepin vatel Iesu

3 E taon te hal Serusalem, **Farasi** tei da en xa be tei e ngan xil xa ladi e Kaonsel na **Siu** xil, hisen Nikodimas.^v

² E vongien tei, xi ba tengam vasepin vatel Iesu e biteni mini bit, “Titsa, xamem makila xa xouk obe titsa tei xa Hi tesila tengam imei. Makila vengam vahit Hi nata ti natel xouk, ma osakras opol ni merekel xil ak.”^w

³ E Iesu bit rilomun mini bit, “Reitin li nabiteni minuk, xosxa moletin tei tenamei ti tenave neta hu rilomun, ma xi misakras mei vate pe lelatiatien na Hi.”

⁴ Melele xa Nikodimas milonge mak, xi mitemanin e biteni bit, “?Moletin tei xa mahulong ngamu mei ihe neta hu rilomun itep? !Vengam xa moletin misakras vatilomun vahe vang ninen vatei mun tengam valingi mei vahe neta hu rilomun!”

⁵ Misak ni, Iesu bit rilomun ni bit, “Reitin li nabiteni minuk, moletin xa tave neta hu ti vatel oei e **Ninin Eo**, xi misakras mei vate pe lelatiatien na Hi.

⁶ Melele xa lapus moletin tei mei be neta hu nggusil suse na moletin xil, xi nggur tenbe moletin e sexien nan mei nggoni moletin tei tang. E melele xa moletin tei mei be neta hu nggusil suse na Ninin Eo, xi nggur ninin e sexien nan mei nggoni Ninin. ⁷ Munatemanin ti xa nabiteni mi xamim xa xamim vus mei muhe neta hu rilomun. ⁸ Polien na Ninin Eo nggoni polien te votiang xa di misisi nggusil nenemien nan. Xamim mukila mulong kil votiang, e mutakil ti xa nggo xave bemei mu di ba xave. Usil sexien nen tak, musakras mupus Ninin Eo. E mukila mupus kil polien nan e meulien

^r2:19 Mat 26:61; 27:40; Mak 14:58; 15:29; Pol 6:14 ^s2:21 1Kor 6:19

^t2:22 Luk 24:6-8; Sion 12:16; 14:26 ^u2:23 Sion 7:31; 11:47-48

^v3:1 Sion 7:50; 19:39 ^w3:2 Mat 22:16; Sion 9:16; Pol 10:38

na ngan xil xa xi mei mise xat xil e misak ni xil mei labe neta hu rilomun.”^x

⁹E Nikodimas misisi bit, “?E neta mikila istal itep?”

¹⁰Ma Iesu bit rilomun mini bit, “Xouk obe titsa tei na mol-Isrel xil. ?Veneh ma otakil ti koute te sepinien navan xil? ¹¹Nabiteni reitin minuk xa inou del ngenok xil di mabit usil holesok xil xa makila ngamu, e di mabit rat naha xa matepusi tuei. E xamim vat xil na Siu xil mutake reitin ti e sepinien namem.^y ¹²Xouk otake reitin ti e sepinien navan melele xa nabit kila nggo holesok xil ak te ut etan. ?Mak, ma ukila uke reitin e sepinien navan xil itep xosxa nisepe usil holesok xil te ut nesao?^z ¹³Inou, Nat Moletin, nakila nasepin usili vengana xa inou natexo ut nesao e namei e ut etan ak. E moletin tovuol mun vahe ut nesao.^a

¹⁴“Tetiama, e melele xa **Mosis** tete uruvuol, tepol ni tetal tei ni aean brons e teti xati tete liei tei e tepet rati tehe nesao. E ixo sexien nen ak, liti xat Nat Moletin ite liei tei e lipet rati ihe nesao.^b ¹⁵E ngan xil vus xa lineket en lihur meulien sal.^c ¹⁶E vengana xa eheien na Hi di e moletin xil vus te ut etan holu xa holu pupu, xi temaen xoteh meulien na Natneli xa be siskes nan tengana ngan xil vus xa laneket en lasakras lakesae, e ha lihur meulien sal sung.^d ¹⁷Hi tenasa Natneli ti tenamei e ut etan tengana valepis rin na moletin xil e vasa pangasien mi xil ve sexien tesa nae xil. E-e, Hi tesa Natneli temei tengana vahe suse xa iteh meulien na moletin xil te ut etan ixo en.^e

¹⁸“Ngan xil xa laneket e Nat Hi, Hi nasa pangasien ti mi xil. E ngan xil vus

xa lataneket ti en, xil lalihi pangasien na Hi bemei e xil ngamu, vengana xa lataneket ti e Natneli xa be siskes nan.^f ¹⁹Hi tesa miehen nan ngamu temei e ut etan. E moletin xil lasin ni e iexil bei maluxolukuken mak mu mili miehen nan, vengana xa sexien nae misa. Misak ni, xi ilepis rin na moletin xil ihusil naha xa lapol ni del miehen ak.^g ²⁰Ngan xil vus xa di lapol ni tesaen, iexil di nggat miehen. E xil latava ti visal miehen ak vengana xa iexil ti tavei tengana miehen ak vapisen rat sexien nae xil xa lakavui.^h ²¹E ngan xil xa langgusil suse te reitinen labe visal miehen xa ileluv kuhi xa sexien nae xil di nggusil naha xa Hi ien bei.”

Sion Baptis bit rati xa Iesu be Mesaea

²²Melele xa Iesu misepin bus, ba be rute tei e provins te hal Sudea xa da sen nga tang. De rute ak del **moletin nan xil** e di **baptaes** ni moletin xil xa lamei visali.ⁱ ²³E, e rute sav xa lakesi ni Aeon, Sion Baptis mun di baptaes ni moletin xil holu xa lamei visali vengana xa oei holu di e rute ak. Rute ak de provins te hal Sameria, sangas visal taon te hal Salim. ²⁴E melele nen ak, latnaso Sion ti mu vahe nim te xeih.^j

²⁵E melele xa Sion de rute ak, Siu tei bemei visal moletin na Sion xil. Xi mingor del xil usil sexien eah xa mormal tengana moletin tei ikas moten tenben imese ixo en tengana mei imal pe met Hi. ²⁶Misak ni, xil labe visal Sion e labiteni mini labit, “?Titsa, onem xat moletin xa otepisen ni mi xamem e seri Oeisal Sodan, ngana xa otehit rati otehit xi be Mesaea? !Xi mun di baptaes ni mo-

^x3:8 Ekl 11:5 ^y3:11 Sion 3:32; 8:26 ^z3:12 Luk 22:67 ^a3:13 Pro 30:4; Rom 10:6 ^b3:14 Nam 21:9; Sion 8:28; 12:34 ^c3:15 Sion 20:31

^d3:16 Rom 8:32; 1Sion 4:9-10; Sion 3:36; 10:28; 1Sion 5:13

^e3:17 Sion 12:47; 5:22,30; 8:15-16; Pol 17:31 ^f3:18 Sion 5:24

^g3:19 Sion 1:5,9; 8:12; 9:5 ^h3:20 Efes 5:11-13 ⁱ3:22 Sion 3:26; 4:1-2

^j3:24 Mat 4:12; 14:3; Mak 1:14; 6:17; Luk 3:20

letin xil, e, taxeak, moletin xil vus di labe visali sung!^k

²⁷ Sion bit rilomun ni bit, “Moletin tovuol xa mikila vahur polien tei xosxa Hi te ut nesao tamaen ni ti.^l

²⁸ Xamim vari mutelong sepinien nava e melele xa natehiteni natehit inou natave Mesaea ti xa Hi tehit xati tengan isa ni imei. E Hi tesil nou tengan mei nisak mesen suse nan.^m ²⁹ Iesu nggoni tiramue tei xa mei iteli itel atou tei. E atou ak be nan xati. E inou nanggoni tuneli tei xa di nadatili tengan nisoh e rin e nilong sepinien xa xi ihit rati. E melele xa tiramue xa iteli bemei, tuneli di besi xi holu melele xa milong raen. Ma, inou nabesi nou mak vengana xa Mesaea bemei ngamu tengan vahur voninen xati.ⁿ

³⁰ Momal xa xi mei ihe nesao mak mu, e inou nihe etan mak mu.”

³¹ Sion biteni mun bit, “Iesu nggo ut nesao e be eilep mak mu mili holesok sav xil vus. Ngan xil xa langgo ut etan labe te ut etan tang, e di lasepin nggoni moletin xil te ut etan. E ngan xa nggo ut nesao bemei be eilep mak mu mili xil vus.^o ³² Xi di misepin usil holesok xil xa pusi e miteong ni e ut nesao, e moletin xil latake reitin ti e sepinien nan.^p ³³ E ngan xil vus xa lake reitin e sepinien nan lakil kuhi xa naha xa Hi di biteni be reitin. ³⁴ Reitin, ngan xa Hi tesila tengan imei di misa sepinien xati na Hi, vengana xa Hi mise xat kuh meulien nan ni Ninin Eo nan. ³⁵ Hi Tamer, eheien nan di e Natneli, e di misa rat holesok nan xil vus de pe hen.^q ³⁶ Mak, ma ngan xil

vus xa laneket e Nat Hi lihur meulien sal. E ngan xil xa lasin ni linahur ti meulien, vengana ekaten na Hi di xat xil e litit ni ngan taxa ti lihur pangasien ven.”^r

Iesu pisen ni mi ate-Sameria tei xa xi be Mesaea

4 E melele nen ak, longeongen ba duxoh *Farasi* xil xa moletin xil holu di langgusil Iesu mili ngan xil xa di langgusil Sion. E lalongeong ni mun xa Iesu di *baptaes* ni moletin xil holu mili ngan xil xa Sion di baptaes ni xil.^s ² E ngan ak tave reitin ti vengana tave Iesu ti iaxa di baptaes ni xil, be *moletin nan xil* iaxa di lapol ni. ³ E melele xa Iesu milong kila xa Farasi xil lalongeong ni usil polien nan, xi be reling provins te hal Sudea, e dilomun be provins te hal Kaleli.⁸

⁴ Usil suse nae tengan lave Kaleli, Iesu del moletin nan xil laka pas provins te hal *Sameria* xa de hilaep te provins xalu ak.^t ⁵ E melele xa di lakakao laba, laduxoh taon tei na mol-Sameria xil, ngan xa lakesi ni Saekar. Saekar de sangas visal tan tei xa avu *Siekob* tesa ni mi natneli Siosepe tetiamu.^u ⁶ E rute ak, vulut oei tei da xa avu Siekob vari tehili. Melele xa Iesu del moletin nan xil laduxoh vulut oei ak be piniae, e Iesu milong ven memel e ba dotan visal vulut oei ak tengan vangal ti mu.^v ⁷⁻⁸ E melele xa di mingel, moletin nan xil labe taon tengan lalang ni ti anien ae. Tave nousav ti, ate-Sameria tei bemei tengan vahutih oei. Melele xa mei duxoh vulut oei ak,

§4:3 Iesu mile kila xa Farasi xil labe elu mini, e ien ti tavei mu tengan vangor vatel xil. Ma, be reling provins te hal Sudea e ba pol e provins te hal Kaleli.

^k3:26 Sion 3:22; 4:1-2 ^l3:27 Sion 19:11; 1Kor 4:7; Hib 5:4

^m3:28 Sion 1:20; Mal 3:1; Mat 11:10; Mak 1:2 ⁿ3:29 Mat 9:15; Mak 2:19

^o3:31 Sion 8:23; 1Sion 4:5 ^p3:32 Sion 3:11; 8:26

^q3:35 Sion 5:20; 10:17; 15:9; Mat 11:27; Luk 10:22; Sion 13:3 ^r3:36 Sion 3:16;

1Sion 5:13; Efes 5:6 ^s4:1 Sion 3:22,26 ^t4:4 Mat 10:5; Luk 9:52; 17:11

^u4:5 Sen 33:19; 48:22; Sos 24:32 ^v4:6 Sion 4:12

Iesu misisi bit, “Sa ti oei li minou namu ni.”

⁹E atou ak bit rilomun ni mini bit, “Xouk obe **Siu** tei e inou nabe ate-Sameria tei. E Siu xil lasakras lavanien vituei e pelet tei takes mu lamun vituei e kap tei takes vatel xamem.”^{**} ?Ma, veneh ma osis nou tegan nisa ti oei minuk umu ni?”^w

¹⁰Iesu bit rilomun ni bit, “Xouk otakil ti sanien hos xa Hi bit vasa ni minuk. E otakil ti xa inou xa di nasis oei minuk nabe visi. Vengan xa vahit okila, ma osis nou ve oei te meulien e nisa ni minuk.”^x

¹¹Ma atou ak biteni mini bit, “E suv, valoei nam tovuol, e vulut oei ak be tan xa be tan vari. ?Ma, obit uhur oei te meulien ak ixo xave? ¹²?Midep? ?Oei xa di obit usili bos mak mu mili oei ak? Vengan xa avu Siekob vari iaxa tesa vulut oei ak mi xamem. E tehe oei ak xi temu ni, natneli xil latemu ni, e buluk tetel sip-sip san xil mun latemu ni. ?Ma midep, di obiteni xa xouk obe eilep mak mu oli avu Siekob?”^y

¹³Iesu bit rilomun ni bit, “Ngan xil vus xa lamu oei ak, meruru iat rilomun ni xil.

¹⁴E ngan xil xa limu oei xa inou nisa ni mi xil, meruru naxat ti mun xil. Oei xa nisa ni mi xil mei ihe oaisal tei xa ti ileh e tinexil e isa meulien sal mi xil.”^z

¹⁵Atou ak biteni mini bit, “!Suv, sa ti oei ak minou li! Imak, ma meruru naxat

nou ti mun, e ninakakao ti mun ninamei inggak vehakut tegan nihutih oei.”

¹⁶Iesu biteni mini bit, “Ha ukas tiramue nam, ti multilomun mulimei.”

¹⁷Atou bit rilomun ni mini bit, “Tiramue navan tovuol.”

E Iesu bit rilomun ni mini bit, “Xouk obiteni reitin melele xa obit tiramue nam tovuol. ¹⁸Vengan xa, e meulien nam, xouk oteteli tetel tiramue lim (5) ngamu. E moletin xa oda vituei dela xosali, otateli ti vatela. Ma, naha xa otehiteni minou be reitin.”

¹⁹Melele xa atou ak milonge mak, mesep pupu e biteni bit, “Suv, napas kila xa xouk obe **provet** tei.”^a ²⁰?Mak, ma uhut kila mu minou, rute xave iaxa momal tegan moletin xil ha limot mi Hi en? Vengan xa avu namem xil tetiamu, latemot mi Hi inggak e Vathu Kerasim. E xamim, Siu xil, mubit **Serusalem** be rute xa momal tegan moletin xil vus ha limot mi Hi en.”^b

²¹E Iesu biteni mini bit, “Reitin li nabiteni minuk, melele tei di bemei xa nave ti neta xosxa moletin tei imot mi Hi Tamer e vathu ak mu e Serusalem mu e rute sav tova. ²²Xamim, mol-Sameria xil, di mumot mi Hi e mutakil kuhi ti.”^{††} E xamem, Siu xil, mamot mi Hi e makila. Vengan xa Hi tesa hitxatien mi Siu xil xa isa Mesaea nan imei, ngan xa iteh meulien e moletin xil vus.^c ²³E melele tei di bemei xa ngan xil xa labe reitin del Hi Tamer ti limot mini itel xeihen na Ninin

^{**}4:9 Mol-Sameria xil del Siu xil di laketeh misa ni xil vengan xa mol-Sameria lateteli mi ngan xil xa latave ngan Siu ti e lamot mi Hi e ut sav tei. Siu xil di lanemi xa xil latamase ti mili ngan tesav xil xa latave Siu reitin ti e lasin ni tegan lavanien mu lamun vituei vatel xil.

^{††}4:22 Mol-Sameria xil langgusil kes ni vanuvei lim (5) xa Mosis tetisi. E vanuvei sav xil xa ladi e Vanuvei Eo latake reitin ti e xil. Misak ni, latakil kuh ti Hi.

^w4:9 Esra 4:3; 9:1–10:44; Luk 9:52-53

^x4:10 Sion 4:26; 7:37-38; Rev 21:6; 22:17 ^y4:12 Sion 8:53

^z4:14 Sion 6:35; 7:38 ^a4:19 Mat 21:46; Sion 7:40; 9:17

^b4:20 Dut 11:29; Sos 8:33; Dut 12:5-14; Sam 122:1-5 ^c4:22 Aes 2:3; Rom 9:3-4

Eo ixo sexien xil xa ihe reitin. Melele ak bemei ngamu. E Hi di milang ves hisit moletin xil ak tangan lamot mini. ²⁴Hi be ninin e tahur ti tenben vaxoni xir. Ma, momal tangan ngan xil xa lamot mini lipol ni itel xeihen na Ninin Eo e ihusil sepinien te reitinen nan.”^d

²⁵Atou ak biteni mini bit, “Nakila xa Hi tehiti xati xa isil **Mesaea** nan imei. E melele xa imei, xi ihit kil holesok xil vus mi xamem.”^e

²⁶Iesu bit rilomun ni bit, “Inou xa di nasepin minuk, inou nabe xi.”^{†† f}

²⁷E melele nen tak, moletin xil na Iesu ladilomun, e lamesep pupu melele xa lapus Iesu di misepin del atou ak vengon xa tahusil sexien nae ti. E tovuol e xil vasis atou ak vahit, “?Iem bei naha?” mu vasis Iesu vahit, “?Veneh ma di osepin del atou ak?”

²⁸Di, atou ak be reling valoei nan da nga, dilomun be taon, e ba mikes moletin xil lamei e bit, ²⁹“!Mumei mupus ti moletin xa bit lenen holesok xil vus xa natepol ni e meulien navan! Xos xi be Mesaea xa Hi tehiti xati tangan isila imei.”^g ³⁰Ma, moletin xil holu labe reling taon tangan ha lipus Iesu.

³¹Melele xa atou ak teta tamu e taon, moletin xil na Iesu labiteni mini labit, “Titsa, amei a rut anien xil ak.”

³²E xi bit rilomun ni mi xil bit, “Anien tei avan da xa xamim mutakil ti.”

³³Melele xa lalonge mak, xil lasis xil mun tang labit, “?Midep xiak? ?Moletin tova tesa anien tuei mini tea ni?”

³⁴Misak ni, Iesu biteni mi xil bit, “Melele xa nanggusil nenemien na Hi xa tesil inou namei tangan nipol vuol

ni polien nan, nateong ni nggoni ngan xa nangganien ngamu.”^h ³⁵Moletin xil di labiteni labit, ‘Aveti hat (4) mei itavi e rileh rerat anien ar.’ E inou nabiteni mi xamim nabit muketeh kuhi ikapis e naho sa Hi. Anien teni men ngamu tangan lalehi.”ⁱ ³⁶E ngan xil vus xa di laleh viton anien xil teni, Hi di miling kuh huit polien nae iti. E anien ak be moletin xil xa di langgur meulien sal. Ma, ngan xil xa lalih utut sepinien na Hi e meulien na moletin xil e ngan xil mun xa di laleh viton anien xil teni, xil vus lihesi xil pupu ve naha xa di lapol ni. ³⁷Ngan ak nggoni sepinien te metisouen xa biteni bit, ‘Moletin tei milih naho tei, e moletin sav mileh viton anien teni.’^j ³⁸Inou nasil xamim tangan ha muleh viton anien ixo naho tei xa moletin sav xil ba latepol en tetiamu ni xamim. E ihe xamim iaxa ti mupus huite te polien nae.”

³⁹Melele xa Iesu di tamu misepin mi moletin nan xil, mol-Sameria xil holu langgo taon lamei. Lamei e lake reitin en vengon xa latelong sepinien na atou xa tehiteni tehiti, “!Mumei mupus moletin xa bit lenen holesok xil vus xa natepol ni e meulien navan!”^k ⁴⁰Misak ni, melele xa lamei, ladakes Iesu tangan vate visal xil. Ma, Iesu del moletin nan xil ladi visal xil melengien lu mun. ⁴¹E melele xa mol-Sameria xil lalong sepinien na Iesu, xil holu mun lake reitin en. ⁴²Ma, laba e labiteni mi ate-Sameria ak labit, “Tetiamu, mateke reitin e xi ve naha xa xoux otehiteni. E taxeak, make reitin xa xi be **Mesaea** xa iteh meulien e moletin xil vus te ut etan vengon xa di malong sepinien nan ni vurangemem xati vari.”^k

^{††}4:26 Vahit sepinien ak vahe, “**inou NABE**” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^d4:24 2Kor 3:17; Plp 3:3 ^e4:25 Sion 1:41; 14:26

^f4:26 Mak 14:61-62; Sion 9:37 ^g4:29 Mat 12:23; Sion 7:26

^h4:34 Sion 5:30; 6:38; 5:36; 17:4 ⁱ4:35 Mat 9:37; Luk 10:2

^j4:37 Maek 6:15 ^k4:42 1Sion 4:14

⁴³⁻⁴⁴ Ngan ak nggoni ngan xa Iesu vari tehiteni tehit, “Provet tei, tave ti neta xa moletin sav xil di lamerere ni, e moletin xil te kantri nan xati latamerere ni ti.” E melele xa de visal xil melengien lu bus, Iesu del moletin nan xil laba sung labe provins te hal Kaleli.¹

Iesu nggur rat mesien ra horamue na moletin tei xa di pol mi kavmen

⁴⁵ Melele xa Iesu duxoh provins te hal Kaleli, moletin xil holu te rute ak langgur pilei. Holu e xil latetilmun ra Anien te Tavien e hal Serusalem e latepus holesok xil xa Iesu tepol ni en. Ma, mol-Kaleli xil iexil bei tangan lapus ti Iesu vapol ni holesok xil ak e ut sae mun.^m

⁴⁶ Iesu mikakao duxoh metimal te hal Kena, rute xa tehiles oei mei tehe uae en.ⁿ ⁴⁷ Melele xa eilep ak milonge xa Iesu nggo provins te hal Sudea e bemei ngamu e provins te hal Kaleli, xi be visali e dakesi tangan vahe xalu lalohe Kapaniam tangan vahur rat mesien ra natneli xa sangas vamat.

⁴⁸ Iesu biteni mini bit, “!Iva! Vehakut, xamim di mudakes nou ve merekel xil mu neta tova mun xa eilep. E xosxa natapol ni ti, ma xamim di mutake reitin ti e nou.”^o

⁴⁹ E eilep ak biteni mini bit, “O suv li, ralotemanon raloha tangan natuxoli namat ti.”

⁵⁰ E Iesu biteni mini bit, “Husil suse nam uha. Horamue nam milonge bos tuei.” Melele xa eilep ak milong naha xa Iesu biteni, xi mike reitin en e nggusil suse nan ba.^p

⁵¹ Melengien tei mei mitavi, e melele xa eilep ak da tamu e suse nan, rut moletin xil te polien nan xa langgo Kapaniam mei labisu mini. Xil labiteni mini labit, “Natumali milonge bos tuei.”

⁵² Melele xa eilep ak misis xil tangan lihit kil melele xati vari iaxa latepus horamue nan telonge tehos en, xil labit rilomun ni mini labit, “Horamue nam, ven tean pupu tetuxoh wan klok piniae. Di, mesien nan tehe relingi e telonge tehos rilomun.”

⁵³ Melele xa labiteni mak, eilep ak minem kila xa ngan ak mistal e melele xati vari xa Iesu tehiteni mini xa horamue nan milonge bos tuei. Ma, xi del ngenen xil vus e nim man lake reitin e Iesu.^q

⁵⁴ Ngan ak be merekel xa be lu nen xa Iesu tepol ni e provins te hal Kaleli, melele xa tetilmun ra provins te hal Sudea.^r

E Sabat, Iesu pol ni moletin tei xa mesei milonge bos rilomun

5 E melengien sav tei, Iesu dilomun be taon te hal *Serusalem* vengan xa mol-Isrel xil di laba tangan lapus melengien eo tei nae en. ² E melele xa Iesu duxoh taon, xi mikakao be sangas visal vangoei tei xa lakesi ni Betsaeta. Rute ak tave sotin ti ra puiteh xa lakesi ni Puiteh te Sipsip xil,[¶] e horao lim (5) iaxa mikapis xol oei ak. ³ E vangit horao xil ak, vanut moletin xa eilep xa lamesei ladi en: ngan xil xa metexil bar, ngan xil xa lasakras lakakao, e ngan xil mun xa

[¶]**5:2** E taon te hal Serusalem, vloh xa mahulong tekapis xole xa puiteh xil xa mahulong vahis lateti en. Vengan xa puiteh ak tete sangas visal von posen xa di lapos ni sipsip xil holu en, vehakut, sipsip xil di latexo puiteh ak e suse nae tangan lave von posen. Ve rin ak, latekesi ni Puiteh te Sipsip xil.

¹**4:43-44** Sion 4:40 ^m**4:45** Sion 2:23 ⁿ**4:46** Sion 2:1-11; Mat 8:5-6; Luk 7:1-3

^o**4:48** Dan 4:2,37; Mak 13:22; 1Kor 1:22 ^p**4:50** Mat 8:13; Mak 7:29

^q**4:53** Pol 11:14; 16:14-15,31 ^r**4:54** Sion 2:11

rut tenbexil misa. ⁴§§5 Moletin tei xa di mesei de rute ak. E mesien nan tehasi huram hanutap tei e tol e le sav mun (38). ⁶Melele xa Iesu pus moletin ak pat da, xi mikila xa xi tepat temak tehe nousav pupu. Ma, be visali e misisi bit, “?Iem bei tangan olonge vahos rilomun?”

⁷E moletin ak bit rilomun mini bit, “Suv, moletin tovuol xa mikila vatutou ni nou name vangit oei melele xa oei nggururi vengam melele xa nasak tangan ha naxul en, moletin sav tei diamu ni nou e ba minggul en.”

⁸E Iesu biteni mini bit, “!Utamea! Uleh rong mam e ukakao uha.”^s ⁹Vatakes, tenbe moletin ak mei bos rilomun. Ma, mitamea, mileh rong man e mikakao ba. Ngan ak testal e **Sabat**.^t

¹⁰Melele xa moletin xa Iesu pol ni milongse bos di mikakao ba, vat xil na Siu xil lapusi e labul xati labit, “!Ei, be Sabat xosali! **Rae** nar biteni xa tamal ti tangan oleh rong mam xosali.”^u

¹¹E moletin ak bit rilomun mi xil bit, “Moletin xa pol ni tenbeok mei bos rilomun iaxa biteni minou bit nileh rong mavan e nikakao niha.”

¹²Xil lasisi labit, “?Visi iaxa tehiteni minuk tangan opol ni vamak?”

¹³E moletin ak takil ti. Vengan melele xa tetamea, tepusi xa Iesu tekesae ngamu.^v

¹⁴Tave nousav ti, Iesu be vloh te **Nim Eo**. E melele xa di mikakao en, mikamet moletin ak e biteni mini bit, “?Opusi? Xouk olonge bos ngamu. E uxuxou kuhu

xa onapol ni ti mun **tesaen**. Vengan, vahit vamak, ma xos neta tova sung xa isa pilei mak mu mei ipurun xouk.”¹⁵ Di, moletin ak ba, milang ni vat na Siu xil ak, e biteni mi xil xa moletin xa tepol ni ven mei tehos rilomun, hisen Iesu.^w

¹⁶Melele xa vat xil ak lakil visi iaxa tepol ni moletin ak telonge tehos e Sabat, xil mei lasak purun Iesu holu mak mu.

¹⁷E melele xa lasepin misa ve naha xa di pol ni, Iesu bit rilomun ni mi xil bit, “Tata navan xa de ut nesao di pol vehakut, ma inou mun di napol vehakut nggoni xi.”

¹⁸Sepinien ak misak ni vat xil ak mei iexil nggati pilei sung e lapol ni nenemien nae tangan lavasi vamat. Vengan xa, e nenemien nae, Iesu di nggur xoteh rae te Sabat. E, ngan xa misa mak mu, xi di po rat xi mei be nesao mu bit xi pipin ni Hi, vengam di biteni bit Hi be Tamen xati.^x

Iesu pisen ni xa Hi di misa xeihen mini vengam xa be Natneli xati

¹⁹Melele xa Iesu mikila xa vat na Siu xil ak iexil nggati vengam biteni bit Hi be Tamen xati, biteni mi xil bit, “Reitin li nabiteni mi xamim, natneli tei tapol ni ti neta vahusil nenemien nan tasen tang. E di pol kes ni naha xa di pus tamen di pol ni. Mak iaxa, inou xa nabe Nat Hi di napol nggusil Tata navan tang.”^y

²⁰Nakila napol ni mak vengam xa Tata navan, eheien nan di e inou, e di pisen holesok xil xa tellep minou xa xi di pol

§§5:4 Rut vanuvei matu xil te Sion laling sepinien ak xa bit, “Ngan xil ak xa lamesei lapat sangas visal oei e ladatil melele xa lipus oei ak ixururi. Lake reitin xa masxaxa tei di bemei e di misak ni oei ak nggururi. E visi e xil xa mikila vaxul rohon e oei ak, ma Hi ihur rat mesien re tenben.”

§5:8 Mat 9:6; Mak 2:11; Luk 5:24 §5:9 Mak 2:12; Luk 5:25; 13:14; Sion 9:14

u5:10 Ser 17:21 v5:13 Mat 8:18; 13:36; Mak 4:36; 7:17; Sion 6:2-3,15

w5:15 Sion 9:11

x5:18 Mat 14:5; 26:4; Mak 14:1; Sion 7:1,25; 8:37,40; 11:53; 10:30,33

y5:19 Sion 5:30; 8:28

ni. E xi ipisen ni minou holesok xil xa tellep mak mu xa inou ti nipol ni xa ili ngan xa mutepus inou natepol ni ngamu, e isak ni xamim ti mumesep ven.^z ²¹ Reitin mak, vengang xa e hisit sexien xa Tata navan mikila vasak ni moletin tei vamea rilomun ra maten e vasa meulien mini, inou mun xa nabe Natneli nikila nisa meulien mi ngan xil xa ieok bei tangan nisa ni mi xil.^a ²² E rin sav mun, Tata navan di talepis rin na moletin xil ti, e xi miling polien ak de heok tangan ti nilepis rin na moletin xil vus.^b ²³ Tata navan pol ni mak tangan vasak ni moletin xil vus lamerere ni nou xa nabe Natneli vaxo hisit sexien xa di lamerere mini. E ngan xil xa di latamerere ni nou ti xa nabe Natneli, ma xil di lapisan ni xa latamerere ni Tata navan ti xa tesil inou namei.^c ²⁴ Reitin li nabiteni mi xamim, ngan xil vus xa lalong sepinien navan e lake reitin xa Hi tesa inou namei, xil vari iaxa lihur meulien sal. Ngan xil ak, Hi nalepis ti mun rin nae tangan vasa pangasien mi xil. Ngan xil ak lameluv ngamu ra xeihen te maten, e langgur meulien xa misakras vavus.^d

²⁵ “Reitin li nabiteni mi xamim, melele tei di bemei xa ngan xil xa lalel tuei lalong rae Nat Hi e limea rilomun ra maten limeul. Reitin, melele ak bemei ngamu.^e ²⁶ Tata navan be vatit meulien. E usil rin tak, xi misak ni nou, Natneli, tangan mei nabe vatit meulien xa nakila nasa meulien mi moletin xil.^f ²⁷ E, vengang xa inou nabe Nat Moletin, Tata na-

van misa xeihen minou tangan nilepis rin na moletin xil e nisa pangasien mi xil ihusil sexien nae xil.^g ²⁸ Munatemanin ti ve sepinien navan xil. Vengang melengien tei di bemei sangas xa ngan xil xa lalel tuei liteong ni raeok.^h ²⁹ E melele xa lalonge, xil limea ra von tehinen nae. Ngan xil xa latepol temal e meulien nae, xil limea rilomun ra maten e lihur meulien xa hoxalite teni ihe tovuol. E ngan xil xa latepol tenamal ti, xil limea rilomun ra maten e ha lihur pangasien xa hoxalite teni ihe tovuol.”ⁱ

³⁰ E Iesu biteni mun mi xil bit, “Inou, natapol ni ti neta vahusil nenemien navan tasok. Melele xa nalepis rin tei, nenemien navan xil di nggusil naha xa Hi di biteni minou. Reitin, naha xa nabiteni momal vengang xa natasa ni ti vahusil nenemien navan, e di nasa naha taxa Hi Tata navan ien bei, ngan xa tesil inou namei.^j ³¹ Vahit inou tang iaxa ti nabit rat neta tei usil inou tasok, ma vama tang tangan munake reitin ti en.^k ³² E vengang xa Tata navan di bit rati xa nabe visi, momal tangan muke reitin e nou, vengang nakila xa sepinien nan usil nou be reitin.^l ³³ E melele xa mutesil moletin namim xil tangan lava lapus Sion Baptis, naha xa xi tehit rati usil nou be reitin.^m ³⁴ E, e rin navan, inou nataling nenesien navan ti vate naha xa moletin xil te ut etan ak di labit rati usil nou. E di nasep usil sepinien xa Sion tehiteni usil inou tangan xamim mukila muke reitin

^z5:20 Sion 3:35; 10:17; 15:9; 17:23-24 ^a5:21 Rom 4:17; Efes 2:5; Sion 11:25

^b5:22 Sion 3:17; 5:27; 9:39; 12:47; Pol 10:42; 17:31

^c5:23 Plp 2:10-11; Luk 10:16

^d5:24 Sion 3:15,16; 8:51; 12:44; 3:18; 1Sion 3:14

^e5:25 Mak 5:41; Luk 7:14; 8:54; Sion 5:28; 11:43 ^f5:26 Sion 1:4

^g5:27 Sion 5:22; 9:39; Pol 10:42; 17:31

^h5:28 Sion 5:25; 11:43 ⁱ5:29 Dan 12:2; Pol 24:15 ^j5:30 Sion 5:19; Luk 22:42;

Sion 4:34; 6:38 ^k5:31 Sion 8:13-14 ^l5:32 Sion 1:15,34; 3:26; 5:36,37,39; 8:18;

10:25; 15:26; 1Sion 5:6-9; Sion 19:35; 21:24 ^m5:33 Sion 1:19-27

en e Hi iteh meulien e xamim ixo en.ⁿ
³⁵Vengan xa Sion teme i texoni laet tei xa tepili e teleluev kuhi ve holesok xil. E, vuteili tang, xamim mutesesi xamim tangan muteti e miehien te pispisien nan.

³⁶“E neta tei di bit rati mak mu xa nabe reitin mili naha xa Sion tehtit rati usil inou. Polien xil xa Tata tesa ni minou tangan napol ni, xil di lasepin e rin navan labit rati xa inou nabe Nat Hi reitin. Reitin, polien navan xil di lapisan ni xa Tata vari iaxa tesil inou namei. E inou nipol vuol ni naha xa xi telingi tete heok tangan ti nipol ni.^o ³⁷E Tata xa tesil inou namei, xi mun di bit rati xa inou nabe reitin. E xamim mutnalong ti mu raen e mutnapus ti mu valnaon.^p ³⁸Di mupisen ni xa sepinien nan tara ti e meulien namim, vengon xa mutake reitin ti e nou xa xi tesil nou.^q

³⁹“Xamim di musak tangan mulang ves reitinen nggo sepinien xil te Vanuvei Eo vengon xa di munemi mubit mukamet meulien sal ixo en. E sepinien nen ak vari tang di bit rat reitinen usil inou.^r ⁴⁰E tave ti neta xa mak, xamim mupol ni nenemien namim tangan munamei ti visal nou tangan muvur meulien sal vaxo inou.

⁴¹“Tave ti neta e nou xosxa moletin xil lisa memesien minou mu linasa ni ti.^s ⁴²E nakil xamim, e nakila xa eheien na Hi tovuol e meulien namim.^t ⁴³Tave ti neta xa namei e his Tata navan, xamim mutahur pilei nou ti. E vahit moletin tova vamei e hisen tasen tang, xamim muvur pilei vari. ⁴⁴Xamim di mupol ni holesok xil tangan mukila musa meme-

sien mi xamim mun tang. E mutapol ni ti holesok xil tangan mukila muvur memesien vaxo Hi vari. Misak ni, natamesep ti xa mutake reitin ti e nou.^u

⁴⁵“E munanemi ti munahit ihe inou iaxa nisa sepinien iha xat rin namim e melele xa musoh pe met Tata navan. E-e. Ihe **Mosis** vari tang xa di muling nenesien namim de sepinien nan iaxa isepin iha xat rin namim.^v ⁴⁶Vengan, vahit vahe reitin xa di muke reitin e sepinien na Mosis, ma muke reitin e inou mun, vengon xi tetis usil inou.^w ⁴⁷?E xosxa mutake reitin ti e naha xa Mosis tetisi usil inou, ma mukila mukei reitin e naha xa inou di nabiteni itep?” Di, Iesu be reling xil.^x

Iesu misa anien mi moletin taosen lim (5000)

6 Melengien vahis mei mitavi, e Iesu be bot del moletin nan xil e langgur xoteh Oei Kaleli (lakes oei ak ni Oei Taeberias mun).^y ²E melele xa Iesu ba, vanut moletin xil holu langgusili langgo ut vengon xa latepus merekel xil xa tepol ni e tetep iaxa tesak ni ngan xil xa latemesei latelonge tehos rilomun.^z ³Melele xa Iesu duxoh ri oei, xi be nesao e vathu tei e dotan en del **moletin nan xil**.^a ⁴Ngan ak testal sangas ni melele te **Anien te Tavien**.^b

⁵Melele xa ladotan mak, Iesu miketeh ba e pus vanut moletin xil holu di lamei visali. Ma, misis Pilip bit, “?Rute xave iaxa rikila rixal anien ipin tangan risa ni mi tatit moletin xa eilep xiak?” ⁶Iesu

ⁿ5:34 1Sion 5:9 ^o5:36 1Sion 5:9; Sion 10:25,38; 14:11 ^p5:37 Mat 3:17; Mak 1:11; Luk 3:22; Sion 5:32; 8:18; 1Sion 5:9 ^q5:38 1Sion 2:14; Sion 6:29 ^r5:39 Luk 24:27,44; Pol 13:27; 1Pit 1:10-11 ^s5:41 Sion 12:43 ^t5:42 1Sion 3:17

^u5:44 Sion 12:43 ^v5:45 Dut 31:26-27 ^w5:46 Dut 18:15; Luk 24:27; Pol 3:22; 7:37 ^x5:47 Luk 16:29-31 ^y6:1 Mat 14:13-21; Mak 6:30-44; Luk 9:10-17

^z6:2 Mat 4:25; 8:1; 12:15; 19:2; 20:29; Mak 5:24; Luk 9:11; Sion 2:23; 6:14

^a6:3 Mat 5:1; 24:3; Mak 3:13; Luk 22:39 ^b6:4 Luk 22:1; Sion 2:13; 11:55

mikila ngamu naha xa ipol ni, e biteni mak tangan vasak pis Pilip.

⁷ E Pilip bit rilomun ni mini bit, “!Ei! Tave ti neta xosxa huit polien nar vapin ni aveti tei e he sav (6)* tangan raxal beret ni, anien ak napin ti tangan moletin xil vus ak lavur mavulut beret xa hokorong tang vahe ae.”

⁸ Andru, xa be moletin teimun na Iesu e tua na Saemon Pita, xi biteni bit,^c ⁹ “E horamue tei da tak xa mileh beret lim (5) xa lapol ni ni **bale**, del meseo lu. E anien ak tapin ti vari mi vanut moletin xa mahulong xiak.”^d

¹⁰ Ma, Iesu biteni bit, “Muhiteni mi moletin xil ak tangan litotan.” E rute ak, husmunae holu di, ma vanut moletin xil ak ladotan en. Moletin xil vus sangas laduxoh taosen lim (5000). ¹¹ Melele xa ladotan bus, Iesu mileh beret, misa memesien mi Hi ven, e misa ni mi moletin nan xil tangan liseti mi vanut moletin xil vus xa ladotan ladi. Di, pol ni mak tang mi meseo mun. Moletin xil vus langganien ba duxoh melele xa xil vus lalonge labit pipin.

¹² Melele xa moletin xil vus langganien pipin, Iesu biteni mi xil bit, “Ha muleh viton rut anien xil xa ladi tangan rinapurun ni ti.” ¹³ Ma, xil laba e laleh viton rut anien xa di nggo beret bale lim (5) tang xa moletin xil langga rasi di. E lamesep pupu melele xa lapusi xa lase ni be valeat lu e le tei (12) ba vuma ... xil vus lapolu.

¹⁴ Melele xa vanut moletin xil ak lapus kil merekel xa Iesu pol ni, labiteni labit,

“Reitin li, ngan ak be **Provet** xa Hi tehit xati tangan isila imei e ut etan.”^e

¹⁵ Iesu mikila xa nenemien na vanut moletin xil ak bit mei lixeih xati tangan mei ihe suv toto nae. Ma, Iesu be reling xil ladi nga, e mika tasen tang be vathu.^f

Iesu mikakao e ramut oei

Mat 14:22-33; Mak 6:45-52

¹⁶ Melele xa mahis bemei, moletin na Iesu xil labe tan e bien. ¹⁷ Lapusi xa Iesu tamei ti mu vastal visal xil, e ut maluxoluk ngamu. Ma, labe bot nae e labalis tangan lavur xotex oei latilomun lave Kapaniam. ¹⁸ Melele xa di laba, lakameti nggeih tangan lavalis vengon xa di labisu ni votiang tei xa nggeih e oei mun misa xa misa. ¹⁹ Melele xa labalis ba duxoh kilomita lim (5), xil lamesep pupu xa lapus Iesu di bemei visal xil e di mikakao e ramut oei nggoni ngan taxa di mikakao e tan tang. Melele xa lapusi, ulixil mikan pupu. ²⁰ E Iesu biteni mi xil bit, “!Ulimim nakan ti! !Inou nabe xi!”[†] ^{g21} Melele xa lapusi xa be xi reitin, labesi xil tangan lavuri vamei e bot. E melele xa Iesu bemei e bot, latemanin xa laduxoh ut e rute xati xa labit lava en.

²² Melele xa ut da milan, vanut moletin xil xa ladi tamu e ri oei di lanemi labit lipus Iesu, vengon xa lakila xa tehe moletin nan xil kestang xa latehe bot tei takes nae lateha, e latestokovein Iesu e ri oei nae. ²³ E melele nen ak, moletin sav xil xa langgo taon te hal Taeberias lamei del bot nae xil. Xil lamei ut sangas e rute xa Iesu temes Hi ve beret e tesa ni mi tatit moletin xil lava ni.^h ²⁴ Melele

***6:7** Sepinien xati teni bit, “*200 denarie*” xa mili 200,000 vatu. Iesu tetel moletin nan xil latnahur ti hisit mani xa temak.

†**6:20** Vahit sepini ak vahe, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^c**6:8** Mat 4:18; 10:2; Mak 1:16; Luk 6:14; Sion 1:40 ^d**6:9** Sion 21:9,13 ^e**6:14** Dut 18:15,18; Pol 3:22; 7:37 ^f**6:15** Sion 18:36; Mat 14:23; 15:29; Mak 6:46; Luk 6:12 ^g**6:20** Mat 14:27 ^h**6:23** Sion 6:11

xa moletin xil ak lapusi xa Iesu del moletin nan xil latari ti e rute ak, xil labe bot na mol-Taerberias xil e labe taon te hal Kapaniam tangan lalang ni.

Iesu be beret te meulien

²⁵ Moletin xil lakamet Iesu e ri Oei Kaleli. E melele xa lakameti lasisi labit, “?Titsa, otemei inggak vilieh?”

²⁶ E Iesu bit rilomun ni mi xil bit, “Reitin li nabiteni mi xamim xa mutalang ni nou ti vengana xa mule kil koute te merekel xil xa di napol ni. E-e. Di mulang ni nou vengana xa natesak ni vangemim mei tepolu ni beret.ⁱ ²⁷ Munasa xamim ti ve anien tang xa di mungga ni e, tavehi ti, di mikesae mun. E ihos pupu tangan musa xamim ve anien xa misakras vakesae xa mikila vasa meulien sal mi ngan xil vus xa langguri. Inou, Nat Moletin, nikila nisa ni mi xamim vengana xa Hi, Tata navan, tehosei inou e besi xi ve nou.”^j

²⁸ Ma, moletin xil lasisi labit, “?Hi ien bei tangan xamem mupol ni naha?”

²⁹ E Iesu bit rilomun ni bit, “Naha xa Hi ien bei tangan xamim mupol ni mak: muling neketen namim iti e ngan xa xi tesila temei.”

³⁰ Ma, xil lasis Iesu labit, “?Upol ni merekel eah mupusi tangan muling neketen namem e xouk? ?Reitin, upol ni naha vari? ³¹ Melele xa avu namem xil di latekakao e uruvuol, latea manna xa Mosis tesa ni mi xil, vengana xa Vanuvei Eo biteni bit, *‘Xi tesa beret texo ut nesao tangan mei vahe ae.’*” (Sam 78:24)^k

³² E Iesu biteni mi xil bit, “Reitin li nabiteni mi xamim, ngan xa tesa beret

texo ut nesao tangan vahe ae tenave **Mo-****sis** ti. Tehe Tata navan iaxa tesa ni mi xil. E xosali, xi di misa beret xa nggo ut nesao reitin mi xamim. ³³ Vengana xa beret xa Hi di misa ni be ngana xa nggo ut nesao bemei e di misa meulien mi moletin xil te ut etan.”^l

³⁴ Melele xa lalonge mak, xil lasisi labit, “Suv, sa beret ak mi xamem li vehakut.”^m

³⁵ Ma, Iesu biteni mi xil bit, “Inou nabe beret xa di misa meulien. Ngan xil vus xa lamei visal nou, mae naxat xil ti mun. E ngan xil xa laneket e nou, meruru naxat xil ti mun.ⁿ ³⁶ E tave ti neta xa natehiteni mi xamim xa mutepus nou e merekel xil xa natepol ni, mutaneket ti mu e nou.^o ³⁷ Ngan xil vus xa Tata navan bosei xil tangan mei labe moletin navan xil, xil mei lihusil xat kuh inou. E inou ti nihur pilei ngan xil vus xa di langgusil xat nou, ninasil rerat xil ti linave reling nou.^p

³⁸ “Nihur pilei xil vengana xa ngana ak be naha xa ngana xa tesil nou ien bei inou nipol ni. E vehakut di napol ni naha xa xi ien bei e natapol ni ti naha xa inou tasok tang ieok bei.^q ³⁹ E ien bei tangan nilaxat kuh holesok xil vus xa telingi teti heok tangan neta ti nakesae. E, e hoxalite te holesok xil vus, moletin navan xil vus limea rilomun ra maten.^r ⁴⁰ Vengana xa Tata navan ien bei tangan ngana xil vus xa lapus Natneli e laneket en mei lihur meulien sal. E, e hoxalite te holesok xil vus, inou nisak ni xil limea rilomun ra maten limeul.”

⁴¹ Melele xa **Siu** xil lalonge Iesu bit xi be beret te meulien xa nggo ut nesao bemei,

ⁱ6:26 Sion 6:11-12 ^j6:27 Sion 4:14; 6:50,51,54,58

^k6:31 Eks 16:15; Nam 11:7-9; Neh 9:15; Sion 6:49,58; Sam 105:40

^l6:33 Sion 6:41,51 ^m6:34 Sion 4:15; Mat 6:11; Luk 11:3

ⁿ6:35 Sion 6:48,51,58; 4:14 ^o6:36 Sion 20:31

^p6:37 Sion 17:2,7,24; Mat 11:28 ^q6:38 Mat 26:39; Mak 14:36; Luk 22:42; Sion 4:34; 5:30 ^r6:39 Sion 6:44,54; 10:28,29; 11:24; 17:12; 18:9

xil laseputut ba xati labit,^s 42 “Xamem makil moletin ak. E makil tamen xal ninen mun. Xi be Iesu, nat Siosep tang. ?Ma, veneh di biteni xa xi texo ut nesao bemei?”^t

43 Iesu bit rilomun ni bit, “Munaseputut ti mun ve sepinien navan xil. 44 Be reitin xa Hi Tata tesil nou namei, e ngan xil kestang xa xi di bosei xil lakila mei lihe moletin navan xil. E inou nisak ni xil limea rilomun ra maten e hoxalite te holesok xil vus.^u 45 Provet xil tetiamu latetisi latehit, ‘*Hi vari ipispisi mi moletin xil vus.*’ (Aes 54:13)^v E ngan xil xa lalong rae Hi e langgur pispisien nggo en di lamei visal nou. 46 Nataviteni ti namit moletin tei tepus Hi Tata ni meten xati. Inou kestang natepus Tata navan ngamu vengan xa natexo visali.^w 47 Reitin li nabiteni mi xamim xa ngan xil vus xa laling neketen nae e nou langgur meulien sal.^x 48 Inou nabe beret te meulien.^y 49 Avu namim xil latea manna e uruvuol. E neta sav xa mak, xil latelel.^z 50 E inou nabe beret xa nggo ut nesao bemei e tan. E ngan xil xa langga beret ak linalel ti.^a 51 Reitin, inou nabe beret xa nggo ut nesao bemei e tan xa di misa meulien. Moletin xa ia beret ak imeul iha vuma ... navus ti. Beret xa nisa ni mi xamim be tenbeok. E di nasa ni mi moletin xil te ut etan tangan likila lihur meulien sal ixo en.”

52 Melele xa Siu xil lalong sepinien na Iesu lamesep pupu ven. E langor mi xil mun tang labit, “?Ei, midep xiak? ?Moletin ak isa tenben mi xir tangan ria ni itep?”

53 E Iesu biteni mi xil bit, “Reitin li nabiteni mi xamim, xosxa xamim mu-

naxa tenbe Nat Moletin ti, e munamu ren ti, meulien tovuol e xamim. 54 Ngan xil xa langga tenbeok e lamu reok, nisak ni xil limea rilomun ra maten e hoxalite te holesok xil vus.^b 55 Vengan xa tenbeok be neta tei te anienen reitin, e reok be neta tei te munien reitin. 56 Ngan xil xa langga tenbeok e lamu reok labisti del xat inou, e inou mun nabisti del xat xil.^c

57 “Tata navan be vatit meulien, e inou nanggur meulien nggo en. Xi tesil inou namei, e ngan xil xa langga nou lihur meulien ixo inou. 58 Ma, tenbeok be beret xa nggo ut nesao bemei etan. E beret ak taxoni beret ti xa avu namim xil latea ni, e tetutou ni sung latelel. Vengan moletin xa ia beret ak imeul vehakut xa vehakut tang.” 59 Iesu misa sepinien xil ak melele xa xi di pispisi e *nim te pispisienna* Siu xil e taon te hal Kapaniam.

Moletin xil holu latahusil ti mun Iesu vengan xa lanemi labit pispisien nan xil nggeih pupu

60 Melele xa ngan xil xa di langgusil Iesu lalong sepinien nan xil, labiteni mi xil mun tang labit, “Ei, pispisien xil ak nggeih pupu tangan ravuri. ?Visi vari mikila vake reitin en?”

61 E Iesu mikila xa moletin nan xil di laseputut usil pispisien nan xil. Ma, ba pus xil e biteni mi xil bit, “?Midep? ?Pispisien xil ak di misak ni xamim mumesep e musavut e neketen namim? 62 E ti mumesep e ti musavut reitin xosxa vahit mupus inou, Nat Moletin, nihe ut nesao, rute xa natexo en tetiamu.^d 63 Ninin na Hi kestang di misa meulien mi moletin xil. Moletin mis-

^s6:41 Sion 6:33,35,51,58 ^t6:42 Mat 13:55; Mak 6:3; Luk 4:22

^u6:44 Sion 6:65; 6:39,40,54; 11:24 ^v6:45 1Tes 4:9 ^w6:46 Sion 1:18

^x6:47 Sion 3:15,16,36 ^y6:48 Sion 6:35,41,51,58 ^z6:49 Sion 6:31,58

^a6:50 Sion 6:33,58 ^b6:54 Sion 6:39,40,44; 11:24

^c6:56 Sion 15:5; 1Sion 3:24 ^d6:62 Pol 1:9-11

akras vakamet meulien vaxo xeihen nan tassen. E sepinien xil xa inou iaxa di nasa ni mi xamim lastal langgo Ninin Eo e di lasa meulien.^e ⁶⁴E rut xamim lataling neketen nae ti e nou.” Iesu biteni mak vengan xa, e melele xa tepol kokot ni polien nan, xi tekila ngamu visi e xil linaling neketen nae ti en, e visi iaxa isa rati ihe he elu nan xil.^f ⁶⁵Di, Iesu biteni mun mi xil bit, “Vengan xa nakila xa moletin xil holu linaling neketen nae ti e nou, inou natehiteni mi xamim ngamu xa ngan xil kestang xa Hi Tata di bosei xil iaxa lakila mei lihe moletin navan xil.”^g

⁶⁶E melele nen tak, moletin xil holu labe relingi e latahusili ti mun vari. ⁶⁷Melele xa Iesu pusi xa moletin xil di labe relingi, xi biles pus moletin nan xil xa labe lu e le tei (12) e misis xil bit, “?E itep mi xamim? ?Xamim mun mubit muhe reling nou?”

⁶⁸E Saemon Pita bit rilomun ni mini bit, “?Suv, xosxa xamem muhe relinguk, ma muhe visal visi mun? Vengan xouk kestang di osa sepinien xil xa di misa meulien sal.^h ⁶⁹E xamem maling neketen namem e xouk e mapus kila xa xouk iaxa obe Mesaea, Moletin Eo na Hi.”ⁱ

⁷⁰Ma, Iesu biteni mi xil bit, “Inou iaxa nabosei xamim xa mube lu e le tei (12) tangan muvusil nou. E tave ti neta xa mak, tei e xamim be **Temat.**” ⁷¹Iesu di misep usil Sudas, nat Saemon Eskariot. Vengan, tave ti neta xa xi be tei e moletin lu e le tei (12) nan, xi isa rat Iesu ihe he elu nan xil.^j

Tua na Iesu xil lataling neketen nae ti en

7 Dutou ni ngan ak, Iesu mikakao mikapis e rute xil holu e provins te

hal Kaleli. E xi ien ti tavei vahe provins te hal Sudea, vengan xa mikila xa vat xil na **Siu** xil di lalang ni mesal tova tangan lavasi vamat vaxo en.^k ²E melele xa **Wik te Horao xil** bemei sangas,¹ ³tua na Iesu xil labiteni mini labit, “Onata ti kestang inggak e provins te hal Kaleli. Ihos mak mu xa uhe provins te hal Sudea tangan ngan xil xa iexil bei tangan lihusil xouk likila lipus merekel xil xa di opol ni. ⁴Uhe Sudea sung vengan xa moletin xa ien bei tangan mei vahe eilep tei misakras ti vapol xuxus. Ma, xosxa be reitin xa okila opol ni merekel xil, ma upol ni e valkesao tangan upisen xouk mi moletin xil te ut etan.” ⁵Tuneli xil labiteni mak mini vengan xa, tave ti neta xa xil labe tuneli xil, xil mun latake reitin ti en xa xi be Mesaea.^m

⁶E Iesu biteni mi xil bit, “Melele xati tangan nipisen nou mi moletin xil vus tamei ti mu. E xamim mukila mupol ni naha xa iemim bei tangan mupol ni e melengien xil ngasen.ⁿ ⁷Moletin xil te ut etan iexil taxat xamim ti. E iexil di nggat nou vengan xa di nabit rati e valkesao xa sexien nae misa.^o ⁸Xamim ha mupus melengien eo xil ak e inou ninava ti mu, vengan xa melele nen ak tamal ti mu tangan nama.” ⁹Melele xa Iesu biteni mak, xi dat e provins te hal Kaleli.

Iesu be Serusalem tangan vapus Wik te Horao xil en

¹⁰Melele xa tua na Iesu xil labe Serusalem tangan lapus Wik te Horao xil en, Iesu dat e tim melengien vahis. Di, xi mun ba, e pol xuxus ni tang del moletin nan xil tangan moletin sav xil linakil ti. ¹¹E hal Serusalem, vat xil na Siu xil di lalang ves Iesu e hilaep te vanut moletin xa lamei tangan lapus melengien eo xil

^e6:63 2Kor 3:6 ^f6:64 Sion 13:11 ^g6:65 Sion 6:44 ^h6:68 Sion 6:63 ⁱ6:69 Mak 1:24; Luk 4:34 ^j6:71 Sion 12:4 ^k7:1 Sion 5:18; 7:19,25; 8:37,40 ^l7:2 Lev 23:34 ^m7:5 Mak 3:21 ⁿ7:6 Sion 2:4; 7:30; 8:20 ^o7:7 Sion 15:18; 3:19

ak. Xil di lasis moletin xil labit, “?Moletin ak da xave?”^p

¹² Moletin xil xa lamei tangan lapus melengien eo xil ak lasep xusus holu usil Iesu. Rute xil labit, “Xi be moletin hos tei.” E tesav e xil labit, “E-e, xi di miluvos moletin xil.” ¹³ E moletin xil latasepin ti e valkesao usil Iesu vengon xa ulixil mikan xa vat xil na Siu xil linalong ti e linapol ni naxeih mi xil.^q

¹⁴ Melele xa Siu xil ladi tamu lapol vituei ni holesok xil e hilaep te Wik te Horao xil, Iesu bemei e hal Serusalem, be vloh te **Nim Eo**, e di pispisi mi moletin xil en. ¹⁵ E melele xa vat xil na Siu xil lalong pispisien nan xil, latemanin e labit, “?Moletin ak nggur kilakilen ak nggo xave, vengon xa xi tava ti e sukul tangan lapispisi mini?”^r

¹⁶ Iesu bit rilomun mi xil bit, “Holesok xil xa di nispisi ni taxo nou ti. Xil vus langgo Hi xa tesil nou namei.”^s ¹⁷ Ngan xil xa iexil bei tangan lapol ni naha xa Hi ien bei, xil likila xa pispisien navan xil nggo visal Hi e taxo nou tasok ti. ¹⁸ Moletin xa misa sepinien xil xa nggo xi tasen, xi ien bei vapet rat xi tasen vahe nesao. E moletin xa di misak pisi tangan vapet rat ngan xa misila, xi be reitin e luvoson tovuol en.^t ¹⁹ Xamim vus mukila xa **Mosis** tesa **rae** xil mi xamim. E tovuol e xamim valong xat vuol ni rae xil ak. ?Ma, veneh iaxa di mulang ni mesal tova tangan muvas vin nou vaxo en?”^u

²⁰ Vanut moletin xil xa lalong sepinien nan labiteni mini labit, “Xos temat tova de xoux xa biles nenemien nam. ?Visi vari iaxa di misak tangan vahas vinuk?”^v

²¹ Iesu bit rilomun ni mi xil bit, “Inou natepol ni tutut polien tei e Sabat e xamim musepin pupu ven e mubit natepol tesa.”^w ²² Tetiamu, Mosis tesa rae te **vexahu** mi xamim, xa xi tehuri texo vatit avu nar xil tetiamu. E tangan muhusil xat rae ak, xamim vari di mupol ni vexahu ni rut tenbe horamue namim xil e melele xa melengien nae be tol e he sav (8) xati.^x ²³ E neta sav xa di mupol ni polien ak e **Sabat**, mutahur xoteh rae te Sabat ti. ?Misak ni, veneh ma iemim di nggat inou xa natepol ni tenbe moletin tevi tei mei temese rilomun e Sabat?^y ²⁴ Ma, munalepis rin navan ti nahusil naha xa moletin xil di lapusi e hale tang, e mulepis rin navan ihusil naha xa momal reitin tangan ripol ni.”^z

Moletin xil latakil kuh ti xa Iesu be Mesaea mu be visi

²⁵ Melele xa moletin xil e hal **Serusalem** lapus Iesu di pispisi labiteni labit, “?Tave moletin ak ti xa vat nar xil iexil bei tangan lavas vini?”^a ²⁶ !E mupus ti! Xi di misepin e valkesao pe met moletin xil ak, e vat xil ak latavit ti neta. Xos lakila be reitin xa moletin ak be Mesaea xa Hi tehit xati tangan isa ni imei. ²⁷ E labiteni xa melele xa Mesaea imei, moletin ti nakil ti xa xi nggo xave bemei. Ma, xi tave Mesaea ti vengon xa rakil rute xa xi texo en.”^b

²⁸ Melele xa Iesu di pispisi e vloh te Nim Eo, xi misepin be nesao bit, “?Midep? ?Be reitin xa xamim mukil nou e rute xave xa natexo en? E natamei ti inggak vahusil nenemien navan tasok. E

^p7:11 Sion 11:56 ^q7:13 Sion 9:22; 19:38; 20:19

^r7:15 Mat 13:54; Luk 2:47 ^s7:16 Sion 12:49; 14:10 ^t7:18 Sion 8:50

^u7:19 Sion 1:17; Pol 7:53; Rom 2:21-24; Sion 5:18; 7:1,25; 8:37,40

^v7:20 Sion 8:48,52; 10:20 ^w7:21 Sion 5:16 ^x7:22 Sen 17:10-13; Lev 12:3

^y7:23 Sion 5:8-9,16 ^z7:24 Aes 11:3; Sion 8:15; Lev 19:15; Aes 11:4

^a7:25 Sion 5:18; 7:1,19; 8:37,40 ^b7:27 Sion 9:29

namei inggak nggusil nenemien na Hi xa tesil inou namei. Xi vari be reitin, e xamim mutakil ti xi.^c ²⁹Inou nakila, venggan xa natexo visali, e xi iaxa tesil inou namei e tan.”

³⁰Melele xa lalong sepinien nan, rut moletin xil lasak tangan latal xati. E moletin ti tapol ni venggan xa melengien nan xati tamei ti mu.^d

³¹E moletin xil holu lake reitin xa xi be Mesaea venggan xa labiteni labit, “Xir ralonge xa melele xa Mesaea imei, xi ipol ni merekel xil holu. !E moletin tovuol xa mikila vapol ni merekel xil vahe holu mak mu vali ngan xil xa Iesu di pol ni!”^e

³²**Farasi** xil lalong naha xa moletin xil di lasep piao ni usil Iesu. Ma, xil del **vat xil na pris xil** lasil mereketeh xil xa di laketeh xol Nim Eo na Hi tangan lava latal xat Iesu.

³³Melele xa mereketeh xil laba, Iesu biteni bit, “Inou nite visal xamim nave nousav ti. Ti, nitilomun nihe visal ngan xa tesil inou natemei.^f ³⁴Xamim ti mulang ni nou, e munakamet nou ti. Xamim munakamet nou ti venggan xa musakras muve rute xa inou ha nita en.”^g

³⁵Melele xa lalonge mak, vat xil na Siu xil ak labiteni mi xil mun tang labit, “?Moletin ak iha xave iaxa xir rasakras rakameti? ?Xos ihe visal Siu xil xa ladi e kantri na mol-Kris xil nggoni ngan hale-sav xil, mu xos ha ipispisi mi mol-Kris xil vari? ³⁶?Naha vari be koute te sepinien

nan xa bit ti rilang ni e rinakameti ti, e rasakras rave rute xa xi ha ita en?”

Vole usil oei te meulien

³⁷E melengien eo kor te Wik te Horao xil, ngan xa be eilep mak mu mili melengien sav xil teni, Iesu misoh e vioh te Nim Eo e misepin be nesao bit, “Xamim xa meruru nggat xamim mumei visal nou.^h ³⁸Moletin xa mineket e nou imei imu ni. Imak, ma naha xa Vanuvei Eo bit usili mei istal ihe reitin xa bit, *‘Inou nisak ni oei xa misa meulien mei istal ixo tin moletin, e ileh ihe holu ixoni oaisal tei xa mahulong.’*” (Aes 44:3) ³⁹Oei xa Iesu di bit usili be vole tei usil **Ninin Eo** xa mei ise xat ngan xil xa laneket en xa xi be Mesaea. E melele nen ak, Ninin Eo tenamei ti mu e xil venggan xa Hi tenasa ti mu Iesu vaha vahur minehinen te xeihen nan.ⁱ

⁴⁰Melele xa moletin xil lalong sepinien xil na Iesu, rute xil labiteni labit, “!Reitin mak xa moletin ak be **Provet** xa ixoni Mosis xa Hi tehiti xati tangan isila imei!”^j

⁴¹E rute xil labit, “E-e, xi be Mesaea vari.”^k

E rute sav xil mun labit, “Xi misakras vahe Mesaea venggan xa Mesaea misakras vastal vaxo provins te hal Kaleli. ⁴²Venggan Vanuvei Eo bit lenen ni xa Mesaea imei ixo vatimol na suv toto **Deved**, e lipesi e hal Betlehem, taon xa Deved teta

^{37:37} E melengien eo kor te Wik te Horao xil, pris xil labe Vangoei Saelom tangan vahutih oei vaxo en. Di, laleh oei ak ladilomun labe vioh te Nim Eo e ladehi ba xat hor te sanien eo. Oei ak be simeleleen tei tangan vasak ni moletin xil lanem xat oei xa Hi tesa ni mi mol-Isrel xil e melele xa latekakao e uruvuol huram hanutap lu (40). E koute teni be tuxolxatien xil xa Hi ti isa ni mi xil e hoxalite te holesok xil vus. E Iesu bit lenen ni xa xi iaxa be suse tangan lakila lavur oei ak.

^{7:28} Sion 8:55; 17:25 ^{d7:30} Sion 8:20; 7:44; 2:4; 7:6 ^{e7:31} Sion 2:3; 8:30; 10:42; 11:45; 12:11,42 ^{f7:33} Sion 13:33; 16:5 ^{g7:34} Sion 8:21; 13:33; 13:36; 17:24 ^{h7:37} Pro 18:4; Aes 58:11 ^{i7:39} Sion 16:7; 20:22; Pol 2:4 ^{j7:40} Dut 18:15-22; Sion 6:14; Pol 3:22; 7:37 ^{k7:41} Sion 4:29; 7:26; Pol 9:22; Sion 7:52

en tetiamu.”^{1 43} Ma, vanut moletin xil ak langgur nenemien savsav xil usil Iesu.^m
⁴⁴ E rute e xil iexil bei tangan latal xati, e tovuol e xil vaha tangan vapol ni.ⁿ

Vat xil na Siu xil lataneket ti e Iesu

⁴⁵ Mereketeh xil te Nim Eo xa vat na pris xil del Farasi xil latesil xil tangan lava latal xat Iesu lalong naha xa Iesu di biteni. Di, ladihomun labe visal vat nae xil. E melele xa vat na pris xil del Farasi xil lapusi xa lamei hon tang, xil labiteni labit, “?Veneh vari mutatal xat Iesu ti?”

⁴⁶ E mereketeh xil labit rilomun ni mi xil labit, “Matatal xati ti vengon xa sepinien nan xil bos pupu. Pispisien nan xil taxoni na moletin sav xil ti.”

⁴⁷ Ma Farasi xil labul xat xil labit, “?Midep? ?Moletin ak miluvos xamim mun? ⁴⁸ Tovuol e xamem Farasi xil del eilep xil maneket en mu mavusili.^o ⁴⁹ Be movotei xil tang xa latakil ti rae xil na Mosis iaxa di laneket en. E ve rin ak, halesil ite meulien nae.”

⁵⁰ Nikodimas, xa teha tuei tangan vasepin mi Iesu, xi mos e xil e be xil ladi. E melele xa milong sepinien nae xil biteni bit,^p ⁵¹ “?Midep? ?Rae nar xil lamaen ni tangan rakin pangasien tei mi moletin tei melele xa ratalepis rin nan ti e von koten tangan rakamet naha tova xa xi pol ni xa misa? E-e, tamaen ni ti.”^q

⁵² Vat sav xil labul xati xeih labit, “!Ei! ?Midep? ?Xouk mun obe ngan Kaleli? Xosxa usak tangan ulang pisi e Vanuvei Eo, ma ukameti xa provet tovuol xa

vaxo provins te hal Kaleli.”^r ⁵³ Di, xil vus ladihomun labe tim sae xil.

Iesu pisen esaeen mi atou xa tepol tesa tetel moletin tei^f

8 Iesu be Vathu te Urvatiei te *Olip* del moletin nan xil e laba lapat en.^s
² Ut milan, Iesu dilomun be Serusalem e ba be vloh te *Nim Eo*. Moletin xil holu lamei visali e lakapis xole. Ma, Iesu dotan e pispisi mi xil.^t ³ Melele xa di tamu pispisi, *titsa* xil te rae na Mosis del *Farasi* xil ladiamu ni atou tei xa latekameti di pat tetel tiramue tei xa tave tiramue nan xati ti. Ma ladel atou ak ba misoh pe met moletin xil. ⁴ Di, labiteni mi Iesu labit, “Titsa, atou ak, melele xa lakameti, xi dit pat del tiramue tei xa tave tiramue nan xati ti. ⁵ *Rae na Mosis* biteni xa rihov vin hisit atou xil xa lamak. ?E xouk, uhit naha?”^u ⁶ Xil lasis Iesu mak tangan vasak pisi e rin te sepinien nan tangan xos isa sepinien tova xa imaen xil ha lital xati ven.^{s v}

E Iesu mitingeiril, e midis neta tei e tan ni vakuhen. ⁷ E xil dit lasi petinen tangan isa nenemien nan mi xil usil rin ak. Ma, Iesu mea misoh e biteni mi xil bit, “Visi e xamim xa tapol ni ti tesaen, xi vari iaxa ihov kokot ni.”^w ⁸ Di, mitingeiril mun e midis neta teimun e tan.

⁹ Melele xa titsa xil te rae na Mosis del Farasi xil lalonge mak, xil kekes labaha. Ngan xil xa lamatu ladiamu, di, tesav xil mun laba ba vuma ... Iesu tasen tang da, e atou ak di tamu misoh pe meten.^x ¹⁰ Di,

8:0 E rut vanuvei matu xil te Sion, tumulen te Sion 8:1-11 tovuol en.

8:6 Lanemi xa isa mesal mi xil tangan lital xati vengon xa xosxa Iesu ihit, “Ristokovein atou ak iha,” ma ita xoteh rae na Mosis. E xosxa ihit, “Momal tangan rihov vini,” ma ita xoteh rae na kavmen te hal Rom xa tamaen Siu xil ti tangan lavas vin moletin.

7:42 2Saml 7:12; Sam 89:3-4; Maek 5:2; Mat 2:5-6 **7:43** Sion 9:16; 10:19

7:44 Sion 7:30 **7:48** Sion 12:42 **7:50** Sion 4:1-2; 19:39

7:51 Dut 1:16 **7:52** Sion 1:46; 7:41 **8:1** Luk 21:37 **8:2** Mat 26:55

8:5 Lev 20:10; Dut 22:22 **8:6** Mat 22:15 **8:7** Dut 17:7 **8:9** Mat 22:22

Iesu mea misoh e biteni mini bit, “?Atou, moletin xil laba xave? ?Midep? ?Ti xil tara ti ak tangan vahit umat ve tesaen nam?”

¹¹ Atou bit rilomun ni mini bit, “Suv moletin tovuol.”

Ma Iesu biteni mini bit, “E inou mun ninavit neta ti nava xat rin nam. E utilomun uhe tim, e xosali iha, onapol ti mun nasa.”^y

Vat na Siu xil latake reitin ti e sepinien na Iesu melele xa bit rati xa xi be miehien na Hi mi moletin xil te ut etan

¹² Melele xa Iesu di tamu e vloh te Nim Eo, misepin rilomun mi moletin xil bit, “Inou nabe miehien xa di mileluy e meulien na moletin xil te ut etan. E moletin xa di nggusil nou nakakao ti e maluxoluken, vengan xa miehien nava xa iti en ileluy kuh suse te meulien mini.”^{** z}

¹³ Farasi xil xa lalong sepinien nan labiteni mini labit, “Xouk di obit rat sepinien xil ak e rin nam tasom tang. Misak ni, xamem masakras make reitin e sepinien nam.”^a

¹⁴ Iesu bit rilomun ni bit, “Reitin xa di nabit rat holesok xil holu e rin nava. E naha xa di nabit rati be reitin vengan xa nakil rute xa natexo en, e nakil rute xa niha en. E xamim mutakil ti rute xa natexo en mu rute xa niha en.”^b ¹⁵ Melele xa mulepis rin nava, munggusil nenemien na moletin xil te ut etan tang. E inou, di natalepis rin na moletin xil ti.^c ¹⁶ E vahit ieok bei tangan nilepis rin na moletin

tei, naha xa nihiteni ihe reitin. Vengan xa tave inou tasok ti xa nipol ni, e inou xamel Tata nava xa misil inou namei malilepis vituei ni rin ak.^d ¹⁷ E rae xil na Mosis xa xamim vari di munggusil xati biteni xa melele xa sepinien na moletin lu usil neta tei lupin, moletin xa likila like reitin xa naha xa lubiteni be reitin.^e ¹⁸ Mak, ma inou nasepin e rin nava, e Tata nava xa misil inou namei, xi mun di misepin e rin nava.”^f

¹⁹ Ma, xil lasisi labit, “?Xosxa mak, tata nam da xave?”^g

Iesu bit rilomun ni bit, “Xamim mutakil ti nou e mutakil ti Tata nava mun. Vengan, xosxa mukil inou, ma mukila mukil Tata nava mun.”

²⁰ Melele xa Iesu bit holesok xil ak, de vloh te **Nim Eo**, sangas visal rute xa laling kuh mani te Nim Eo di en. E tave ti neta xa rute ak de sangas ni rute xa vat na Siu xil ladi vituei en, moletin tovuol vatal xati. Latatal xati ti vengan xa melele nan xati tamei ti mu.^h

Iesu bit usil maten nan

²¹ Di, Iesu bit rilomun ni mi titsa xil te rae na Mosis e Farasi xil bit, “Inou nihe reling xamim e, neta sav musak pisi tangan mulang ni nou, munakamet nou ti. Xamim muxulehi mupol ni **tesaen** e muhur huite teni e von maten tang. Mak, ma xamim masakras muve rute xa inou niha en.”ⁱ

²² Vat xil na **Siu** xil latakil ti koute te sepinien na Iesu. Ma, lasepin mi xil mun tang labit, “?Veneh ma xi biteni xa xir

****8:12** E melengien eo kor te Wik te Horao ak, pris xil labe vloh te Nim Eo e lasahan laet xa mahulong xa kandel xil holu ladi en. Xos Iesu di bit lelen ni xa laet ak nggoni vole tei usil xi xa be miehien na Hi mi moletin xil te ut etan.

y8:11 Sion 5:14 **z8:12** Aes 49:6; Sion 1:4,5,9; 9:5; 12:46 **a8:13** Sion 5:31

b8:14 Sion 13:3; 16:28; 7:28; 9:29 **c8:15** 1Saml 16:7; Sion 7:24; 12:47

d8:16 Sion 5:30; 5:37; 8:29 **e8:17** Dut 17:6; 19:15 **f8:18** 1Sion 5:9

g8:19 Sion 16:3; 14:7 **h8:20** Sion 7:30 **i8:21** Sion 7:34,36; 13:33

rasakras rave rute xa xi iha en? ?Itep? ?Ihas vin tasen ni xi tang?”^j

²³ Iesu bit rilomun ni bit, “Xamim mube te ut etan ak tang. E inou, nabe te ut nesao. Xamim mube moletin xil te ut etan, e inou natave te ut etan ti.”^k

²⁴ Mak, ma nabiteni xa xamim muhur huit tesaen namim xil e von maten tang. Vengan xa xosxa munake reitin ti en xa inou nabe xi,^{††} reitin xa mumat itel xat tesaen namim xil.”^l

²⁵ Xil latemanin ni sepinien nan e labit, “?Xouk obe visi vari?”

E Iesu bit rilomun ni bit, “Tetiamu mei duxol xosali, di nabit lelen ni mi xamim xa nabe visi. ²⁶ Inou nikila nihit rat neta holu xa misa iha xat rin namim. E di nabit lelen ni mi moletin xil te ut etan naha xa Tata biteni minou vengan xa nakila xa ngan xa tesil nou namei be reitin.”^m

²⁷ Melele xa Iesu di bit usil Tata nan, xil latakil ti xa Iesu di bit usil Tata nan xa de ut nesao. ²⁸ Mak, ma Iesu biteni mi xil bit, “Melele xa mupo rat Nat Moletin ihe nesao,ⁿ ²⁹ E ngan xa misil nou namei, xi di minou e tastokovein nou ti. Vengan xa, vehakut, di napol kes ni neta xa xi besi xi ven.”^o ³⁰ Melele xa Iesu bit holesok xil ak, moletin xil holu lake reitin en xa xi be Mesaea na Hi reitin.^p

Iesu bit kila xa ngan xil xa lalong xat pispisien nan xil labe moletin nan xil reitin

³¹ Di, Iesu pusi xa rut Siu xil lake reitin en, ma biteni mi xil bit, “Xosxa muxulehi ni ngan taxa ti mulong xat pispisien navan xil, ma mupisen ni xa xamim mube moletin navan xil reitin.”^q ³² Mukil naha xa be reitin, e reitinen ak isak ni xamim mei mumeluv reitin.”

³³ E xil labit, “Xamem mabe vatimol na **Ebrahim**, e matave slev na moletin ti vatova.^{‡‡} ?Mak, ma veneh vari obiteni xa xamem mei mumeluv reitin?”^r

³⁴ Iesu biteni mi xil bit, “Reitin li nabiteni mi xamim xa moletin xil vus xa di lapol ni tesaen labe slev xil teni.”^s ³⁵ E slev tei, voninen tovuol e vatimol xati na masta nan. E nat masta ak, voninen xati e vatimol nan da vehakut.^t ³⁶ Mak, ma xosxa Nat Hi pol ni xouk mei omeluv, ma omeluv reitin. ³⁷ Nakila xa xamim mube vatimol xil na Ebrahim. E neta sav xa mak, di musak pisi tangan mulang ni suse xa muvas vin inou vaxo en. E iemim bei tangan muvas vin inou vengan xa ut tovuol e tinemim tangan sepinien navan vaha vata en.^u ³⁸ Inou di nabit mesen naha xa natepusi e melele xa natete visal Tata navan. E xamim, ihos xa ti mupol ni naha xa Tata di biteni mi xamim tangan ti mupol ni.”

^{††}8:24 Vahit sepinien ak vahe, “**inou NABE**” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^{‡‡}8:33 Sepinien nae tave reitin ti vengan xa mol-Isrel xil ladi pe he kavmen te hal Rom. E, e histri nae, lateti pe he mol-Isip xil, mol-Babilon xil, mol-Siria xil, mol-Kris xil, e pe he moletin savsav xil mun.

^j8:22 Sion 7:35 ^k8:23 Sion 3:31; 17:14 ^l8:24 Sion 13:19

^m8:26 Sion 7:28; 12:49 ⁿ8:28 Nam 21:9; Sion 3:14; 12:32; Sion 5:19

^o8:29 Sion 8:16; 16:32 ^p8:30 Sion 2:23; 7:31; 10:42; 11:45; 12:11,42

^q8:31 Sion 15:7 ^r8:33 Mat 3:9; Luk 3:8; Sion 8:39,56; Neh 9:36

^s8:34 Rom 6:16,20; 2Pit 2:19 ^t8:35 Eks 21:2; Dut 15:12

^u8:37 Sion 5:18; 7:19,25

³⁹Xil labit rilomun ni labit, “Tata namem Ebrahim.”^v

E Iesu biteni bit, “Xosxa xamim mube horamue xil na Ebrahim reitin, ma sexien namim xil ixoni sexien nan xil. ⁴⁰Inou nabit mesen ni mi xamim reitinen xa Hi biteni minou. E xamim, musak tangan muvas vin inou. Ngan ak tave sexien xil na Ebrahim ti. ⁴¹E-e. Sexien xil namim nggoni sexien xil na tata namim xati.”^w

E xil labiteni labit, “!Ei! !Tave xamem ti iaxa mabe horamue xil te suse! Tata namem tei takes, xi be Hi vari.”

⁴²Iesu biteni mi xil bit, “Xosxa be reitin xa Hi be Tata namim, eheien namim vati e nou. Vengan xa inou natexo visal Hi, e xosali nade visal xamim inggak. Natamei ti vahusil nenemien navan, e Hi iaxa tesil inou namei.^x ⁴³E nakila veneh ma xamim musakras mulong kil naha xa nabiteni. Vengan xa iemim ti tavei mukil sepinien navan xil. ⁴⁴Tata namim be **Temat** vari e iemim bei tangan mupol ni naha xa xi ien bei xamim tangan mupol ni. Vengan xa xi misak ni moletin xil labas vin moletin sav xil e melengien xil tetiamu mei duxol xosali. Xi tara ti e rin te reitinen, vengan reitinen tovuol en. Melele xa miluvos, di misa sepinien nan xati, vengan xa xi be vat luvosen, e be tata na ngan xil xa di laluvos.^y ⁴⁵Mak, ma vengan naha xa inou nabiteni mi xamim be reitin, xamim mutake reitin e nou ti. ⁴⁶?Visi e xamim mikila vahit rat naha xa inou di napol ni xa misa? Tovuoel e xamim mukila vapol ni. ?Ma xosxa di nabit naha xa be reitin, veneh vari mutake reitin ti e sepinien navan xil?^z ⁴⁷Ngan xil xa labe horamue xil

na Hi di lalong kil sepinien nan xil. E xamim mutave horamue xil na Hi ti, ma mutalong kil ti.”^a

⁴⁸Ma Siu xil lasepsisil Iesu labit, “!Ei! Mabiteni reitin melele xa mabit osa tova tang e onggoni ngan **Sameria** tei e temat tei de xouk.”^b

⁴⁹E Iesu bit rilomun ni mi xil bit, “Temat tovuol e nou. Inou namerere ni Tata navan, e xamim mutamerere ni nou ti. ⁵⁰Natasak pis ti tangan napet rat hisok vahe nesao. E tei da xa ien bei tangan vapet rat hisok, e xi iaxa ilepis rin namim.^c ⁵¹Reitin li nabiteni mi xamim xa ngan xil xa lalong xat pispisien navan xil linapus ti maten vatova.”^d

⁵²Vat na Siu xil labiteni mini labit, “Taxeak makil kuhi sung xa temat tei de xouk. Vengan Ebrahim temat, e **provet** xil na Hi mun latelel. E xouk di obiteni xa ngan xil xa lalong xat pispisien nam xil linapus ti maten vatova.^e ⁵³?Midep? ?Di obiteni xa xouk obe eilep mak mu mili avu Ebrahim tetiamu xa temat? ?E midep e rin te provet xil? ?Di obiteni xa xouk obe eilep mak mu mili xil, vengan xil mun lalel? ?Di obiteni xa xouk obe visi vari?”^f

⁵⁴Iesu bit rilomun ni bit, “Xosxa inou di napet rat tasok ni hisok, his ak be neta sav tang. E be Tata navan xa di pet rat hisok. Tata navan be ngan xa xamim mubit be Hi namim, ⁵⁵e mutakil ti xi vari. E inou nakila, e nasakras naluvos namit natakil ti. Vengan xosxa vama, name vat luvosen vaxoni xamim tang. Reitin, inou nakil xi, e di nalong xat sepinien nan xil.^g ⁵⁶Ebrahim, avu namim, xi minem kila xa melengien navan mei istal, ma besi pupu ni xi ven.”

^v8:39 Mat 3:9; Sion 8:33 ^w8:41 Dut 32:6; Aes 63:16; 64:8

^x8:42 1Sion 5:1; Sion 13:3; 16:28; 17:8; 7:28; 17:8 ^y8:44 1Sion 3:8; Sen 3:4

^z8:46 2Kor 5:21; 1Pit 2:22; 1Sion 3:5 ^a8:47 1Sion 4:6; Sion 18:37

^b8:48 Sion 4:9; Mak 3:21-22; Sion 7:20 ^c8:50 Sion 5:41 ^d8:51 Sion 5:24

^e8:52 Mak 9:1 ^f8:53 Sion 4:12 ^g8:55 Mat 11:27; Luk 10:22; Sion 7:28-29

⁵⁷ Siu xil labiteni mini labit, “Huram nam tatuxoh hanutap lu e he xalu mun (50) ti mu. ?Mak, ma obit otepus Ebraham midep?”

⁵⁸ Iesu bit rilomun ni mi xil bit, “Reitin li nabiteni xamim xa melele xa Ebraham tenapot ti mu, *inou NABE*.” (Eks 3:14)^{¶f h}

⁵⁹ Melele xa Siu xil lalong naha xa Iesu biteni, laleh hat xil labit lihov vini. E Iesu minggus ra xil e be reling vioh te Nim Eo.¹

Iesu pol ni moletin xa meten bar e melele xa ninen telingi mei bos

9 Melele xa Iesu di mikakao ba, pus moletin tei xa meten bar xa tevar ngamu melele xa ninen telingi. ²E melele xa *moletin xil na Iesu* lapusi, lasisi Iesu labit, “?Titsa, *tesaen* na visi iaxa tesak ni met moletin ak tevar e melele xa ninen telingi? ?Tesaen nan tang, mu tesaen na tamen xal ninen?”^j

³Iesu bit rilomun ni bit, “Tave tesaen nan ti, mu tesaen na tamen mu ninen iaxa tepol ni met moletin ak tevar melele xa ninen telingi. Xi be metevar mak tangan Hi ikila ipisen xeiheh nan ixo meulien nan.^k ⁴Melele xa meteneai di tamu nesao, rixulehi ti ripol ni polien na Hi xa misil inou namei. Vengan vongien di bemei, e, e melele nen ak, moletin misakras mun vapol.¹ ⁵E melele xa nada tamu e ut etan, inou nabe miehhen teni.”^m

⁶Melele xa misepin bus, Iesu mikusah be tan e pol ni mei be mame. Di, miling mame ak e met moletin ak.ⁿ ⁷Di, Iesu biteni mini bit, “Uha ukas valnaom e Vangoei Saelom.” (His Saelom, koute teni be ‘misila’). Ma, metevar ak ba

mikas valnaon. Melele xa mikasi bus, mikameti xa mikila vaketeh. Di, dilomun be tim.^o

⁸Melele xa dilomun be tim san, ngenen xil del ngan xil mun xa lapus kila xa xi iaxa be ngan xa di miram ni moletin xil ve mani latemanin ni e labit, “?Midep? ?Be reitin xa ngan ak be metevar xa, vehakut, matepusi di tetotan e di tetakes moletin xil ve mani?”^p

⁹Rute xil labit, “Reitin, xi iaxai.”

E rute ngan xil labit, “E-e, be moletin sav xa mapusi nggoni xi.”

E xi vari di biteni mi xil bit, “!Be inou vari!”

¹⁰Ma xil dit lasisi labit, “?Naha vari testal xa tesak ni xoux okila oketeh vamak?”

¹¹Xi bit rilomun ni bit, “Moletin tei, hisen Iesu, pol ni mame e milingi de metok xalu. Di, biteni minou tangan nihe Vangoei Saelom e nikas valnaok en. Melele xa napol ni, vatakes nakila naketeh.”

¹²Moletin xil lasisi labit, “?E moletin ak da xave?”

E ngan xa meten tevar bit, “Natakil ti.”

Farasi xil lasisi pilei ngan xa meten tevar usil visi iaxa tepol ni meten xalu mei lubos rilomun

¹³Ngenen xil ladiamu ni ngan xa meten tevar be visal *Farasi* xil.⁹ ¹⁴⁻¹⁵Melele xa Farasi xil lapus moletin ak, lasisi xa meten mei bos midep xa mikila miketeh mak. Ma, moletin ak biteni mi xil bit, “Iesu iaxa teling mame tete metok xalu. E melele xa natekas valnaok, nakila naketeh sung.” Melele

^{¶f}8:58 E sepinien Hibru, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^h8:58 Sion 1:1 ⁱ8:59 Sion 10:31; 11:8

^j9:2 Eks 20:5; Esek 18:20; Luk 13:2,4 ^k9:3 Sion 11:4 ^l9:4 Sion 5:17

^m9:5 Aes 49:6; Sion 1:4,5,9; 12:46; 8:12 ⁿ9:6 Mak 8:23 ^o9:7 2King 5:10

^p9:8 Pol 3:10 ^q9:13 Luk 13:14; Sion 5:9

xa Iesu tepol ni mame e tesak ni meten mei tehos, tehe **Sabat**.

¹⁶ Melele xa Farasi xil lalong tumulen na moletin xa tehe metevar, rute xil labit, “Iesu misakras vaxo visal Hi, vengang xi talong xat rae xil te Sabat ti.”^r

E rute xil mun labit, “?Xosxa be reitin xa be moletin tesa tei xa taxo visal Hi ti, ma midep iaxa mikila vapol ni merekel xil xa mak?” Ma, Farasi xil langgur nenemien lu (2) usili.

¹⁷ Misak ni, Farasi xil lasis moletin ak vatei mun labit, “Be xouk iaxa moletin ak tepol ni metom xalu mei bos tangan okila oketeh. ?Onem naha usil moletin ak? ?Be visi vari?”^s

Moletin ak bit rilomun ni bit, “Inou nake reitin xa xi be **provet** tei.”

¹⁸ Melele xa vat xil na **Siu** xil lapus moletin ak, latake reitin ti xa, tetiamu, tehe metevar tei. E lakila sung xa be reitin melele xa lasis tamen xal ninen lumei e lasis pilei xalu usili. ¹⁹ Lasis xalu labit, “?Be reitin xa moletin ak be horamue namil? E xamil mubit be metevar melele xa ninen telingi. ?Mak, ma, midep iaxa mikila sung vaketeh taxeak?”

²⁰ Xalu lubit rilomun ni lubit, “Xamel makila xa be horamue namel. E makila mun xa meten tevar melele xa ninen telingi mei duxoh xosali. ²¹ E matakil ti sung tetep iaxa mikila vaketeh taxeak, mu visi vari tepol ni meten xalu mei lubos rilomun. E xamim mukila musisi ni, vengang xi matu pipin tangan vasepin e rin nan tasen.” ²² Tame moletin ak xal ninen lubiteni mak vengang xa ulixalu mikan tangan lalihit his Iesu mi vat xil na Siu xil. Lulongeong ni xa moletin xil vus xa labit rati xa Iesu be Mesaea, vat xil liso rat xil ra **nim te pispisienna** Siu

xil.^t ²³ Mak, ma xalu lubiteni mi vat xil ak xa horamue nalu matu pipin tangan vasepin e rin nan.

²⁴ Misak ni, vatei mun, vat xil na Siu xil lasis moletin xa meten tevar tangan mei vasoh pe metexil. Di, labul xati labit, “!Uhit xati e his Hi xa be eilep pupu xa naha xa di obiteni be reitin! Vengang xa xamem makila xa Iesu ak be moletin tei xa misa.”^u

²⁵ Ma moletin ak bit rilomun ni bit, “Natakil ti xos moletin ak be moletin tesa tei, mu be visi mun. E neta tei takes nakila. Tetiamu, metok tevar, e xosali, di naketeh.”

²⁶ E xil lasisi mun labit, “?Xi tepol ni naha minuk? ?Tepol ni metom xalu mei tehos texo sexien xave?”

²⁷ Ma, moletin ak bit rilomun ni mi xil bit, “Nabiteni ngamu mi xamim, e xamim iemim ti tavei tangan mulonge. ?Veneh ma iemim bei tangan muteong ni tumulen navan vatei mun? ?Xos xamim mun iemim bei tangan mei muve moletin nan xil?”

²⁸ Melele xa lalonge mak, vat xil na Siu xil lasepin misa ba xat moletin ak labit, “!Ei, xouk vari obe moletin nan tei! E xamem, mabe moletin xil na **Mosis**.

²⁹ Xamem makila xa Hi tesepin mi Mosis e tesa xeihen mini. E, e rin na moletin xai, matakil ti rute xa xi nggur xeihen nan nggo en.”^v

³⁰ Ma, moletin xa mei miketeh bit rilomun ni bit, “Natemanin ni sepinien namim xil. Mubiteni xa mutakil ti rute xave xa xi nggur xeihen nan nggo en, neta sav xa pol ni metok xalu mei lubos rilomun. ³¹ Rakila xa Hi tateong ni ti moletin tesa xil xa lasisi ve neta ngan. E di milong sisen na moletin tei xa di merere

^r9:16 Sion 3:2; 9:33; 5:16,18; 9:31; 7:43; 10:19

^s9:17 Mat 21:46; Sion 4:19; 7:40 ^t9:22 Sion 7:13; 19:38; 20:19; 12:42

^u9:24 Sos 7:19; Rev 11:13 ^v9:29 Sion 7:27,28; 8:14

ni e di pol nggusil naha xa xi ien bei.^w
³² Melele xa Hi tepeas kokot ni ut etan
 mei duxoh xosali, moletin sav tovuol xa
 vapol ni met moletin tei xa tehe metevar
 melele xa ninen telingi mei vahos rilo-
 mun. ³³ E moletin nen ak tepol ni. Xosxa
 Iesu taxo visal Hi ti, ma misakras vapol
 ni merekel xil ak.”^x

³⁴ Melele xa lalonge mak, vat xil na Siu
 xil lasepin nggeih mini labit, “!Xouk osa
 pupu e melele xa latepesuk mei duxoh
 xosali! ?Veneh ma di osak pisi tangan
 opispisi mi xamem?” Ma laso rati ra nim
 te pispisien nae.^y

³⁵ Melele xa Iesu milongeong ni xa
 lateso rat moletin xa mei miketeh ra
 nim te pispisien na Siu xil, ba tangan
 valang ni. Melele xa mikameti, misisi bit,
 “?Xouk oke reitin e Nat Moletin?”

³⁶ E moletin ak bit rilomun ni bit,
 “Suv, uhiteni minou li xa xi be visi. Imak,
 ma nikila nike reitin en.”

³⁷ Ma, Iesu biteni mini bit, “Xouk ote-
 pusi ngamu. Inou xa di nasepin delak
 iaxa nabe xi.”^z

³⁸ Melele xa milonge mak, moletin ak
 biteni bit, “O Suv li, nake reitin e xouk
 vari.” Ma, be tan e di mot mini.

³⁹ Iesu bit, “Namei e ut etan ak tangan
 nilepis rin na moletin xil. Reitin, namei
 tangan nipol ni ngan xil xa metexil bar
 taxeak, mei liketeh; e nipol ni ngan xil xa
 labit lakila laketeh, metexil mei ivar.”^a

⁴⁰ Rut Farasi xil ladi sangas, e melele
 xa lalong sepinien na Iesu lasisi labit,
 “?Midep? ?Di obiteni xa metemem
 bar?”^b

⁴¹ Iesu bit rilomun ni bit, “Xosxa
 metemim bar reitin, munahur pangasien
 ti ve naha xa misa xa xamim di mupol ni.
 E vengan xa mubit mukila muketeh bos,

ma xamim mudi tamu e *tesaen* namim
 xil.”^c

Vole usil moletin xa milaxat kuh sipsip san xil

10 Iesu biteni mi Siu xil bit, “Reitin
 li nabiteni mi xamim, moletin xil
 ak langgoni sipsip xil na Hi xa ladi e van-
 git vioh nan. E xosxa ngan xil xa labit
 litiamu ni sipsip xil na Hi di lasin puiteh
 e di lasak pisi tangan lave vangit vioh ak
 vaxo suse sav mu di labut xorao e vioh
 ak, ma ngan xil ak labe moletin te kanen
 xil xa lasa. ² E ngan xa be vangit vioh
 nggo puiteh xati teni, xi be moletin xati
 xa di milaxat kuh sipsip san xil. ³ Melele
 xa bemei, ngan xa di miketeh xol vioh
 pus kila, ma misah puiteh mini. E melele
 xa xi mikes kekes ni sipsip san xil ni hi-
 sexil xati, sipsip xil lalong kil raen e di
 langgusili labe hale. ⁴ E melele xa mileh
 rerat san xil vus labe hale, di mikakao di-
 amu ni xil. E sipsip san xil langgusil xati
 vengan xa lalong kil raen.^d ⁵ Xil lasakras
 lavusil moletin sav tova. Reitin, lilesae
 rani vengan xa latakil ti e latalong kil ti
 raen.” ⁶ Siu xil lalong vole xa Iesu biteni
 mi xil, e latakil ti koute teni.^e

⁷ Iesu misepin mun mi xil bit, “Reitin
 li nabiteni mi xamim, inou nabe puiteh
 xa sipsip xil langgo en tangan lave van-
 git vioh nae. ⁸ Moletin xil xa latemei teti-
 amu ni nou, xil vus latehe moletin xil te
 kanen xa latesa. E sipsip xil latalong xat
 xil ti.^f ⁹⁻¹⁰ Moletin te kanen xil lamei ten-
 gan lakan ni neta, lavas vin sipsip xil, e
 lapurun holesok xil. E inou nabe puiteh
 te vioh. E ngan xil xa lamei nim langgo
 nou, Hi iteh meulien e xil. Xil limei nim
 e lihe hale lixo nou e likamet husmunae
 xa ihos. Reitin, namei tangan nakila nasa

^w9:31 Sam 66:18; Aes 1:15; Sam 34:15; Pro 15:29

^x9:33 Sion 3:2 ^y9:34 Sam 51:5; Sion 9:2 ^z9:37 Sion 4:26 ^a9:39 Sion 3:17;
 5:22,27,30; 8:15,16; 12:47 ^b9:40 Mat 15:14; 23:26 ^c9:41 Sion 15:22

^d10:4 Sion 10:27 ^e10:6 Sion 16:25 ^f10:8 Ser 23:1-2; Esek 34:2-3

meulien mi moletin xil, meulien tei xa polu ni hosien.^g

¹¹ “E inou nabe moletin hos te relaxatien na sipsip xil mun. E inou nabue xat inou tangan nimaen xoteh meulien navan e nimat tangan nihinat sipsip savan xil.^h ¹² Xosxa moletin te polien tang di milaxat sipsip xil e pus kuli reran tei be-mei, ulin ikan e ilesae reling sipsip xil venghan xa latave san xati ti. Isak ni, kuli reran ak imei ingas vin rut sipsip xil ak e ihol tetasil ni ngan tesav xil.ⁱ ¹³ Reitin, moletin te polien di milesae tang venghan xa di milaxat xil tangan vahur huit polien teni tang, e eheien nan tara ti e sipsip xil. ¹⁴⁻¹⁵ E inou nabe moletin hos te relaxatien na sipsip xil. E hisit sexien xa Tata navan mikil inou e inou nakila, inou nakil sipsip savan xil e xil lakil inou. E nabue xat inou tangan nimaen xoteh meulien navan e nimat nihinat xil.^j

¹⁶ “Sipsip sav xil savan ladi xa lasav ni sipsip xil xa ladi e vloh ak.⁸⁸ Momal tangan niha nileh xil mun limei. Xil lalong raeok, e limei limos itel sipsip xil ak. Imak, ma limei lihe tatit sipsip tei takes, e inou nihe moletin te relaxatien tei takes nae.^k ¹⁷ Tata navan, eheien nan di e nou venghan xa nabue xat inou tangan nisa xoteh meulien navan ve rin nae. E itutou, nikila nihur rilomun ni.¹ ¹⁸ Moletin tovuol mikila vahur rat meulien navan ra nou. E napol ni nenemien navan tangan nasa rati. Inou nanggur xeihen tangan nasa rat meulien navan, e nanggur xeihen tangan nihur rilomun ni.

Ngan ak be naha xa Tata navan tesemae ni nou tangan nipol ni.”^m

¹⁹ Melele xa moletin xil lalong sepinien nan xil, nenemien na **Siu** xil be lu (2) usil Iesu.ⁿ ²⁰ Xil holu di labiteni labit, “!Temat tei da en xa di misak ni misep talang mak! ?Veneh vari xamim di mulong sepinien nan xil?”^o

²¹ E rute xil mun di labiteni labit, “Sepinien nan taxoni sepinien na moletin tei ti xa temat da en. E moletin xa temat da en misakras vapol ni met metevan tei mei vahos vaxoni ngan xa Iesu tepol ni.”

Vat xil na Siu xil lasin Iesu

²² Aveti lu mei mitavi, e be Disemba, melele xa momal tangan lapol ni Wik Eo te Tuxolxatien te Nim Eo e hal **Serusalem**. ²³ E melele nen ak, Iesu be-mei e di mikakao e vloh te **Nim Eo**, rute tei e vloh xa eilep xa lakesi ni veranda na **Solomon**.^p ²⁴ Melele xa Siu xil lapusi, lakapis xole e lasisi labit, “?Vilieh vari uhit kuhi mi xamem xa obe visi vari? Xosxa obe Mesaea reitin xa Hi tehit xati tehit isa ni imei, uhit rati imese tang.”^q

²⁵ E Iesu bit rilomun ni bit, “Nabit rati mi xamim ngamu. E xamim mutake reitin ti en. Holesok xil xa napol ni nggo xeihen na Tata navan di lapien ni xa inou nabe visi.^r ²⁶ E neta sav xa mak, xamim mutake reitin ti e nou venghan xa mutave sipsip savan xil ti.^s ²⁷ Venghan sipsip savan xil lalong kil raeok. Inou nakil xil, e xil langgusil nou.^t ²⁸ Mi xil iaxa di nasa meulien sal e linakesae ti va-

⁸⁸10:16 Vahit Iesu di misepin usil ngan xil xa latave Siu ti.

^g10:9-10 Sam 118:20; Sion 14:6 ^h10:11 Sam 23:1; Aes 40:11; Esek 34:15; Hib 13:20; Rev 7:17; Sion 15:13; 1Sion 3:16 ⁱ10:12 Pol 20:29

^j10:14-15 Sion 10:27; 2Tim 2:19; Mat 11:27; Sion 15:13; 3:16

^k10:16 Aes 56:8; Sion 11:52; 1Pit 2:25; Esek 34:23; 37:24 ^l10:17 Plp 2:8-9

^m10:18 Sion 14:31; 15:10 ⁿ10:19 Sion 7:43; 9:16

^o10:20 Mak 3:21-22; Sion 7:20 ^p10:23 Pol 3:11; 5:12 ^q10:24 Luk 22:67

^r10:25 Sion 5:36; 10:38 ^s10:26 Sion 6:64; 8:45 ^t10:27 Sion 8:47; 10:3

tova. E moletin tovuol mikila valeh rerat xil ra heok.^u ²⁹Tata navan tesa xil minou, e xi be eilep mak mu mili holesok xil vus. Mak, ma moletin tovuol mikila valeh rerat xil ra he Tata. ³⁰E Tata navan e inou mabe tei takes.”^v

³¹Melele xa lalonge mak, Siu xil laleh hat xil tangan laxov vini.^w

³²E Iesu biteni mi xil bit, “Tata navan tesa xeihen minou tangan napol ni holesok holu xa bos pe metemim. ?Di mubue xat xamim tangan muhov vin inou ve polien hos eah?”

³³Xil labit rilomun ni mini labit, “!Xamem iemem ti navei mavov vinuk ve polien hos tei, e mabit mavov vinuk vengon xa di musep xar ni his Hi vari! !Xouk obe movotei tei tang te ut etan, e di opo rat xouk e sepinien nam obit onggoni Hi vari!”^x

³⁴Iesu bit rilomun ni bit, “Ladisi de *rae* namim xil bit, *‘Inou di nabiteni xa xamim mube hi xil.’* (Sam 82:6) ³⁵Rakila xa sepinien na Hi taviles ti. Misak ni, xosxa Vanuvei Eo mikes moletin xil ak ni *hi xil*,^y ³⁶be reitin mak mu usil inou. Vengon xa inou nabe ngan xa Tata tehosei nou e tesil nou tangan namei e ut etan. Mak, ma natasep xar ni his Hi ti e melele xa nabiteni nabit nabe Natneli.^z

³⁷“Xosxa natapol ni ti merekel xil xa Tata navan tesa ni minou tangan ni pol ni, momal tangan mutake reitin ti e nou.

³⁸E xosxa di napol ni merekel xil, neta sav xa mutake reitin ti e nou, momal tang xa muke reitin e holesok xil xa di napol ni. Imak, ma mukila xa Tata di bistu del nou, e inou di nabisti dela.”^a

³⁹Vatei mun, lasak tangan latal xat Iesu, e xi mea reling hexil.^b

⁴⁰Di, Iesu ba be Oeisal Sodan e ba nggur xotehi be rin. Iesu de rute ak del moletin nan xil, e rute xa, tietiamu, Sion di tebaptaes ni moletin xil en.^c ⁴¹Moletin xil holu lamei tangan lapusi. E di labiteni mi xil mun tang labit, “Neta sav xa Sion tenapol ni ti merekel tova, holesok xil vus xa xi tehiteni usil moletin ak mei be reitin.”^d ⁴²E moletin xil holu e rute ak laneket xa Iesu be Mesaea xa Hi tehit xati tangan isa ni imei.^e

Maten na Lasaros

11¹⁻²E metimal te hal Betani, moletin tei da en, hisen Lasaros. Hineli xalu, Meri xal Merta.^f Ma melele xa Lasaros mei mesei holu, ³hineli xalu lusa sepinien ba mi Iesu bit, “Suv, ngan xa eheien nam di en mesei pupu.”^g

⁴Melele xa Iesu milonge, biteni bit, “Hoxalit mesien ak navei maten ti. Ngan ak di mistal tangan vapet rat his Hi e isak ni moletin xil mei lipet rat his Natneli mun.”^h ⁵E neta sav xa eheien na Iesu de Merta, Meri e Lasaros eilep pupu, ⁶melele xa nggur longeongen xa Lasaros mesei mak, da kat e rute xa da en melengien lu mun.

⁷Di, Iesu biteni mi *moletin nan xil* bit, “Ritilomun rihe provins te hal Sudea.”

⁸E moletin nan xil lasisi labit, “Titsa, tenave nousav ti, *Siu* xil te rute ak late-sak tangan lavov vinuk. ?Ma xouk iem bei tangan utilomun uha veneh?”ⁱ

⁹Iesu misepin bit, “E melengien tei, eai di ngan haoa lu e le tei (12). E

^u10:28 Sion 17:2; 3:16; 6:39; 17:12; 18:9 ^v10:30 Sion 17:21

^w10:31 Sion 8:59 ^x10:33 Lev 24:16; Mat 26:65; Mak 14:64; Sion 5:18

^y10:35 Mat 5:18; Luk 16:17 ^z10:36 Sion 5:17-20

^a10:38 Sion 14:10-11; 17:21 ^b10:39 Sion 7:30; 8:20; Luk 4:30; Sion 7:30

^c10:40 Sion 1:28 ^d10:41 Sion 1:26-34; 3:27-28

^e10:42 Sion 2:23; 7:31; 11:45; 12:11,42 ^f11:1-2 Luk 10:38-39; Sion 12:3

^g11:3 Sion 11:36 ^h11:4 Sion 9:3 ⁱ11:8 Sion 8:59; 10:31

ngan xil xa di lakakao e miehen lasakras lasavut vengan xa miehen xa bemei e ut etan ak di misak ni xil di lapus kil holesok xil vus.^j ¹⁰E ngan xil xa lakakao e maluxoluku lasavut, vengan xa miehen tovoul e xil.”

¹¹Di, Iesu bit rilomun ni bit, “Tua nar Lasaros ba pat li. E inou niha nisiasi ni tangan ilale.”^k

¹²Ma, moletin nan xil labiteni labit, “Suv, xosxa xi pat kuhi, ma di meul e, ti, ilonge ihos rilomun.” ¹³Xil lanemi xa Iesu di misepin usil paten na Lasaros, e xi di bit usil maten na Lasaros vari.

¹⁴Mak, ma Iesu bit lelen ni mi xil bit, “Lasaros mat ngamu. ¹⁵E nabesi nou xa natnara ti visal xil e melele nen ak, venggan xa ngan ak itutou ni xamim tangan muke reitin mak mu e nou. Rihe visali.”

¹⁶Mak, ma Tomas, ngan xa lakesi ni Meah, biteni mi xil bit, “Xir vus riha tangan ha rimat itela.”^l

Iesu misak ni Lasaros mea rilomun ra maten vengan xa be vatit mea rilomunen e vatit meulien

¹⁷Melele xa Iesu duxoh metimal te hal Betani, xi mikameti xa lateling tiei na Lasaros de vangihat te tehinen melengien hat (4) ngamu. ¹⁸Betani tave sotin ti ra hal *Serusalem*, be kilomita tol (3 km) tang.^m ¹⁹Ma, Siu xil holu lamei tangan lasa esaeen nae mi Merta e Meri ve maten na tua nalu. ²⁰Melele xa Merta milonggeong ni xa Iesu di bemei, xi ba tangan ha vahisu mini. E Meri dat tim. ²¹Melele xa Merta pus Iesu, biteni mini bit, “Suv, vahit xouk otete inggak, tua navan namat ti li.” ²²E nakila xa xosali ak, Hi isa ni minuk naha xa di osisi ven.”

²³Iesu biteni mini bit, “Tumali imea rilomun ra maten.”

²⁴Merta bit rilomun ni bit, “Nakila xa xi imea rilomun ra maten e hoxalite te holesok xil vus.”^o

²⁵Iesu biteni mini bit, “Inou nabe vatit mea rilomunen e nabe vatit meulien. Ngan xil xa lake reitin e nou, neta sav xa amat, xil limea rilomun ra maten e limeul. ²⁶E ngan xil xa lameul tamu ladi e lake reitin e nou, xil linamat ti vatova. ?Midep? ?Oke reitin e ngan ak?”^p

²⁷Xi bit rilomun ni bit, “Suv, nake reitin xa xouk obe Mesaea, Nat Hi, ngan xa xi tehit xati tangan isila imei e ut etan.”^q

²⁸Melele xa Merta misepin mi Iesu bus, dilomun be tim e mikes xuxus ni tunehin Meri. Ngguri be rin e biteni mini bit, “Titsa bemei inggak e di misisuk.” ²⁹Melele xa Meri milonge mak, mea katen e be hale tangan ha vapusi. ³⁰⁻³¹Melele xa ngan xil xa di ladang dela lapusi xa mea katen mak, langgusili. Lanemi labit xi di be vangihat te tehinen tangan ha vatang en.

Iesu datil Meri e rute xa Merta tehisu ni e seri metimal te hal Betani.^r ³²Melele xa Meri duxoh rute xa Iesu da en, pusi ma mitingeiril sangas ni len e midang bit, “!O Suv, vahit otete inggak, tua navan li namat ti!”^s

³³Melele xa Iesu pusi di midang mak, e pusi middep moletin xil xa lamei dela di ladang, xi mun milonge misa e tinen muis. ³⁴Misis xil bit, “?Mutetihin ni ingga xave?”

Labit rilomun ni labit, “Suv, amei pusi.”

³⁵Melele xa di laba, simete Iesu mileh.^t ³⁶E ngan xil xa lapusi labiteni

^j11:9 Sion 9:4-5; 12:35 ^k11:11 Mat 9:24; 27:52; Mak 5:39; Luk 8:52; Pol 7:60; 1Kor 11:30 ^l11:16 Mak 14:31; Rom 6:8 ^m11:18 Mat 21:17

ⁿ11:21 Sion 11:32 ^o11:24 Dan 12:2; Sion 5:28-29; 6:39-40; Pol 24:15

^p11:26 Sion 8:51 ^q11:27 Sion 6:69; Mat 16:16; Sion 6:14

^r11:30-31 Sion 11:20 ^s11:32 Sion 11:21 ^t11:35 Luk 19:41

labit, “Pus ti mu. Eheien nan di pupu e tua nan.”^u

³⁷ E rute xil labiteni labit, “Xi tepol ni met metevar mei miketeh. ?Veneh vari tenapol ni Lasaros tangan namat ti?”^v

³⁸ Melele xa laduxoh vangihat te tehi-nen, Iesu milonge misa mun. Pusi xa ladinvin hat tei xa eilep da xol puiteh te vangihat ak.^w ³⁹ Ma, Iesu biteni bit, “Mutivin rat hat ak vaha.”

Merta, hine ngan xa temat, bit rilomun ni bit, “Suv, tiei nan bo ngamu vengan xa mat melengien hat (4) tuei.”

⁴⁰ E Iesu biteni mini bit, “Nabiteni tuei minuk xa upus minehinen te xeihen na Hi xosxa uke reitin en.”

⁴¹ Ma, moletin xil ladinvin rat hat ak ba. Di, Iesu miketeh be nesao e misis bit, “Tata, namesuk vengan xa di olong nou. ⁴² Nakila xa vehakut di olong nou, e nabit lelen sepinien ak ve moletin xil ak, tangan isak ni xil like reitin xa xoux iaxa otesil nou namei.”^x

⁴³ Melele xa bit sepinien ak bus, Iesu miki nggeih bit, “!Lasaros, amei hale!”

⁴⁴ E moletin xa temat mea e bemei hale. Mavulut kaliko xil di tamu bar xat tenben, hen e len del valnaon mun. Misak ni, Iesu biteni mi moletin xil bit, “Muleh rerat kaliko rani e mumaen ni ha ven imase.”^y

⁴⁵ Melele xa Siu xil xa langgusil Meri lapus naha xa Iesu pol ni, holu e xil lake reitin en.^z ⁴⁶ E rute xil labe visal **Farasi** xil, e labit mesen ni mi xil naha xa Iesu tepol ni. ⁴⁷ Mak, ma Farasi xil e **vat xil na pris xil** lakes viton kaonsel nae. Melele xa lamei vituei, lasis xil mun tang labit, “?Ripol ni naha vari mi Iesu? Xi dit pol ni merekkel xil holu. ⁴⁸ Xosxa rimaen ni

tangan ixulehi ipol imak, ma moletin xil vus mei like reitin en e lisak pisi tangan lilingi mei ihe suv toto nae. !Xosxa imak, ma mol-Rom xil mei lihu len Nim Eo nar, e lipurun sen mol-Isrel xil vus e kantri nar!”

⁴⁹ Tei e kaonsel, hisen Kaeafas. Xi be vatixar na pris xil e haram ak. E melele xa milong sepinien na ngan xil te kaonsel, biteni mi xil bit, “!Xamim mutakil ti neta!^a ⁵⁰ Ihos mak mu xosxa moletin tei takes imat e rin na moletin xil, ili xosxa rimaen mol-Rom xil mei lipurun sen mol-Isrel xil vus e kantri nar.” ⁵¹ Kaeafas taviten sepinien ak ti vaxo nenemien nan tasen. E, texo polien nan usil vatixar na pris xil te haram ak, xi tehit lelen ni xa Iesu imat ihinat mol-Isrel xil. ⁵² E bit lelen ni mun xa Iesu imat e rin na horamue xil vus na Hi xa ladi e kantri sav xil tangan ileh viton xil mei lihe tatit moletin tei takes.^b ⁵³ Misak ni, e melele nen ak ba, vat xil na Siu xil lapol ni lingxatien tei tangan lihas vin Iesu.^c

⁵⁴ Mak, ma Iesu takakao ti mun e valkesao pe met Siu xil. Be reling rute ak e be metimal sav tei xa lakesi ni Efrem, xa de sangas ni uruvuol. E de rute ak del moletin nan xil melengien vahis.^d

⁵⁵ Melengien eo xil te **Anien te Tavien** di bemei sangas, e Siu xil hao langgo ut xil vus te kantri ak e labe Serusalem. Di laba tangan lapol ni sexien xil xa ipol ni xil mei limese pe met Hi tangan lik-ila lipol ni holesok xil te anien eo ak.^e

⁵⁶ E moletin xil di lalang ves Iesu. Melele xa lamei vituei e vloh te **Nim Eo**, di lasis xil mun tang labit, “?Munemi midep? ?Iesu imei e anien eo ak, mu namei ti?”^f

⁵⁷ Labiteni mak vengan xa vat xil na pris

^u11:36 Sion 11:3 ^v11:37 Sion 9:6 ^w11:38 Mat 27:60; Mak 15:46; Luk 23:53; 24:2; Sion 20:1 ^x11:42 Sion 12:30; 6:29; 17:8,21 ^y11:44 Sion 20:6-7

^z11:45 Luk 16:31; Sion 2:23; 7:31; 8:30; 10:42; 12:11,42 ^a11:49 Sion 18:14

^b11:52 Sion 10:16; 17:21 ^c11:53 Mat 14:5; Sion 5:18; 7:1,25; 8:37,40 ^d11:54 Sion 7:1; 2:12; 3:22 ^e11:55 Sion 2:13; 6:4; 2Kron 30:17 ^f11:56 Sion 7:11

xil e Farasi xil latesemae ni xa moletin tova xa mikil rute xa Iesu da en imei ihit mesen ni mi xil tangan likila liha lital xati.

**Atou tei te hal Betani
misa merereen mi Iesu**

Sion 11:1,43-44

12 Melengien tei e he sav (6) diamu ni **Anien te Tavien**, Iesu be metimal te hal Betani. Ba misao ni Lasaros e tim san, moletin xa tepol ni temea rilomun ra maten.^g ²Ma, xil lapol ni anien tei xa eilep tangan lapisen memesien nae mini. Merta mileh anien bemei, e Lasaros dotan vituei e tep te anienen del Iesu e moletin sav xil mun.^h ³Di, Meri nggur valit vokon tei xa lapol ni ni **nard**^{*} xa mani nen be nesao pupu. Be sangas visal Iesu e mitahi ba xat le Iesu tangan vamerere ni. Di, Meri misihi moten len ni hilin. Melele xa pol ni mak, vut vokon xa bos xiak nggur sen rute xil vus e nim.ⁱ

⁴E, melele xa tei e moletin lu e le tei (12) na Iesu pusi, xi tavesi xi ti ven. His moletin ak Sudas Eskariot, ngan xa isa rat Iesu ihe he elu nan xil. Ma, xi bit,^j ⁵“?Veneh ma latapos ni vokon ti xa xiak tangan lasa **mani** nen mi hoeo xil? Vengan xa mani teni pipin ni silva mani handred tol (300).”^k ⁶Xi taviten sepinien ak ti vengan xa ien misae pupu ni hoeo xil. !E-e! Xi misepin mak vengan xi be moletin te kanen tei. Vengan xa xi iaxa milaxat ateli te **mani** na Iesu e ngenen xil, e di mikan ni mani ra ni.

⁷E Iesu biteni mini bit, “!Lingi! Atou ak nggal vokon ak tangan vavue xat tenbeok vamese ve melele te tehinen navan.¹ ⁸Hoeo xil liti visal xamim vehakut. E inou, ninata ti visal xamim vehakut.”^m

**Siu xil lapol ni lingxatien
tei tangan lihas vin Lasaros**

⁹Melele xa moletin xil lalonge xa Iesu de metimal te hal Betani, moletin xil holu xa holu pupu lamei tangan lapusi. Lamei mun tangan lapusi ti Lasaros xa Iesu tesak ni temea rilomun ra maten.ⁿ ¹⁰E melele xa **vat xil na pris xil** lalongeong ni, lapol ni lingxatien tangan lihas vin Lasaros mun. ¹¹Labit lihas vini venggan lapusi xa merekel xa mistal en pol ni moletin xil holu lake reitin e Iesu, e latahusil xil ti mun.^o

**Moletin xil holu lasa memesien nae
ba mi Iesu e melele xa xi
mei mistal e hal Serusalem**

Mat 21:1-11; Mak 11:1-11; Luk 19:28-40

¹²Ut milan, vanut moletin xil xa lamei e hal **Serusalem** tangan lapol ni Anien te Tavien en lalonge xa Iesu di bemei. ¹³Ma, ladei ut emeil xil e ba labisu mini e suse. E melele xa lakakao laba, lameun be nesao labit, “!Memesien ba mi Hi!

!Tuxolxatien iti mi ngan xa bemei e his Iahova! (Sam 118:26)^p

*!Tuxolxatien iti mi suv toto te hal **Isrel!**”*

¹⁴Iesu mikamet sulut dongki tei e miloh nggo en ba. Ngan ak nggoni ngan xa Vanuvei Eo tehiteni xa tehit,

^{*}12:3 Nard be vokon tei xa lapol ni ni amulit holiei tei te hal India xa lakesi ni ‘nard.’

[†]12:5 Mani ak mili 300,000 vatu e pipin ni huit polien xa moletin tei mikila vahuri melele xa pol hura tei.

^g12:1 Mat 26:6-13; Mak 14:3-9 ^h12:2 Luk 10:40 ⁱ12:3 Luk 7:37-38

^j12:4 Sion 6:71 ^k12:5 Mat 19:21; Mak 10:21; Luk 18:22 ^l12:7 Sion 19:40

^m12:8 Dut 15:11 ⁿ12:9 Sion 11:43-44 ^o12:11 Sion 11:45

^p12:13 Mat 27:42; Mak 15:32; Sion 1:49

¹⁵ “*Xamim xa mudi e taon te hal Serusalem e Vathu Saeon ulimim nakan ti. !Mupusi! Suv toto namim di bemei tangan valaxat kuh xamim.*

Reitin, di dotan e sulut dongki tei tang e di bemei.” (Sak 9:9)

¹⁶ Melele xa holesok xil ak di mistal, moletin lu e le tei (12) na Iesu latakil ti koute teni. E, dutou sung, melele xa Hi tetal rat Iesu tehe nesao tangan vahur xeihe nan, lanem xati xa holesok xil xa testal mini tehusil xat naha xa Vanuvei Eo tehit lenen ni usili.^q

¹⁷ Holu e vanut moletin xil ak latehur longeongen usil Iesu texo ngan xil xa latehithiteni xa tetep iaxa xi tekes rat Lasaros ra vangihat te tehinen e tesak ni temea rilomun ra maten.^r ¹⁸ Ve rin ak, moletin xil holu pupu latelongeong tumulen usil merekel ak, e laba tangan lavisu mi Iesu e suse.

¹⁹ E melele xa **Farasi** xil lapus tatit moletin xil xa mahulong xiak, labiteni mi xil mun tang labit. “!Mupus ti mu! !Moletin xil vus e ut etan di langgusil xati ngamu! Misakras mun mupol ni ti neta tova vaha xati.”^s

Iesu bit usil maten nan vatei mun

²⁰ Melele xa Siu xil labe Serusalem tangan lava lamot mi Hi e melele te Anien te Tavien ak, rut mol-Kris xil mun laba.

²¹ Mol-Kris xil ak ba lapus Pilip, xa nggo metimal te hal Betsaeta e provins te hal Kaleli. E labiteni mini labit, “Xamem iemem bei tangan mapus Iesu.”^t

²² Ma, Pilip ba bit mesen ni mi Andru, e xalu luba lubiteni mi Iesu. ²³ E

Iesu bit rilomun ni bit, “Melengien bemei xiak tangan Hi ipet rat his Nat Moletin.”^u ²⁴ Nitei vole usil reitinen tei mi xamim. Xosxa utiei tei namot ti vahe tan e latatihin ni ti naxoni ngan xa mat, ma utiei ak itat imak tang. E xosxa itihin utiei ak e tan ixoni ngan xa mat, ma itutou sung, imeul rilomun e ihur huite xil lihe holu.^z ^{v25} Ngan xil xa iexil bei meulien nae, meulien ak ha ikesae ra xil. E ngan xil xa iexil nggat meulien nae e ut etan ak, xil vari lihur xat meulien nae iti vehakut.^w ²⁶ Ngan xil xa iexil bei tangan lapol minou, xil lihusil nou. Vengan rute xave xa inou nada en, moletin te polien navan xil mun liti en. E Tata navan isa merereen mi ngan xil xa di lapol minou.^x

²⁷ “Xosali, tinok li polu ni nenexoen. ?E nihit neh? Vahit nisis Tata navan tangan iteh meulien e nou tangan ninahisu ni ti melengien te xeih ak. E ninapol ni ti. Vengan xi tesil nou namei tangan nihisu ni longpangasien xil ak.”^y

²⁸ Di, Iesu misis bit, “O Tata li, upisen ni xa hisom be eilep mak mu.”^z

Melele xa misis mak, rae tei misepin nggo ut nesao bit, “Natepisen ni xa hisok be eilep mak mu ngamu, e nipol rilomun ni.”

²⁹ Vanut moletin xil xa lasoh ladi e rute ak lalong rae ak, e rute xil labiteni labit be veta tang xa di posou. E rute xil mun labit, “!**Masxaxa** tei misepin mini!”^a

³⁰ E Iesu biteni mi xil bit, “Rae ak tasepin ti tangan vatutou ni nou. E mis-

^q12:24 Iesu di misepin usil maten, mea rilomunnen nan, e itep iaxa ikila isa meulien mi moletin sav xil holu ixo maten nan.

^q12:16 Sion 2:22 ^r12:17 Sion 11:43-44 ^s12:19 Sion 11:48

^t12:21 Sion 1:44; Luk 19:3; 23:8 ^u12:23 Sion 13:31-32; 17:1

^v12:24 1Kor 15:36 ^w12:25 Mat 10:39; 16:25; Mak 8:35; Luk 9:24; 17:33

^x12:26 Sion 14:3; 17:24 ^y12:27 Sam 6:3; 42:5,11; Mat 26:38; Mak 14:34

^z12:28 Mat 3:17; 17:5; Mak 1:11; 9:7; Luk 3:22; 9:35 ^a12:29 Pol 23:9

epin mak tangan vatutou ni xamim.^b
³¹ Melele bemei ngamu tangan Hi isa pangasien ihusil lepisien nan ve tesaen na moletin xil te ut etan ak. Melele bemei ngamu tangan Hi ihu len xeihen na Temat xa tehe vat na moletin xil holu te ut etan e ihol rati iha.^c ³² E melele xa moletin xil lipo rat inou e nimurur nihe nesao, nileh moletin xil vus limei visal nou.^d ³³ Iesu biteni mak tangan vahit lelen sexien xa imat ixo en.^e

³⁴ Vanut moletin xil ak labit rilomun ni labit, “Vanuvei Eo na Hi di biteni xa Mesaea ita vehakut.^f ?Ma, veneh ma di obiteni xa lipo rat Nat Moletin e imurur ihe nesao? ?Visi vari iaxa be Nat Moletin nen ak?”

³⁵ Iesu biteni mi xil bit, “Miehen iti mi xamim ihe vuteili mun. Ma, bos xa ti mukakao kuhu e melele xa miehen di tamu mileluv tangan maluxoluken nakutaxol xamim ti. Vengan ngan xil xa lakakao e maluxoluken latakil ti rute xa di laba en.^g ³⁶ Ma, muke reitin e miehen ak melele xa di tamu mileluv, tangan mei muhe moletin xil te miehen.” Melele xa Iesu misepin mi moletin xil bus, be reling xil e ba minggus ra xil.^h

³⁷ E neta sav xa Iesu pol ni merekel xil holu pe metexil, tave moletin xil vus ti xa lake reitin en. ³⁸ Ngan ak mistal be reitin nggusil naha xa **provet** Aesea tehiteni tehiti,
*“?Iahova, vahit moletin tei vahit usil longengen ak tetiamu, visi vari vake reitin en?
 ?O Iahova, visi mikila vapus kil hem*

vaxo sexien xil xa di mistal xiak?” (Aes 53:1)ⁱ

³⁹ Misak ni, xil lasakras lake reitin en, vengaxa Aesea tehiteni mun tehiti,
⁴⁰ *“Hi misak ni xil di label xat metexil e tinexil mei nggeih pilei sung.
 Imak, ma linapus kil ti neta ni metexil, e linanem kil ti neta naxo tinexil.
 Vengan xosxa namak ti, ma lihiles meulien nae,*

e Hi ital rat xil ra mesien nae xil.” (Aes 6:10)^j
⁴¹ Provet Aesea tesa sepinien ak vengaxa tepus kil minehinen te xeihen na Iesu e tehiti lelen ni usili.^k

⁴² E neta sav xa rin ak be reitin, moletin xil holu, del rut vat xil na Siu xil mun, lake reitin e Iesu, e ulixil mikan tangan lavit rati. Ulixil mikan mak vengaxa Farasi xil labiteni xa ngan xil xa labit rati xa Iesu be Mesaea, liso rat xil ra **nim te pispisiennae** xil.^l ⁴³ Melele xa ngan xil ak ladit votei mak, lapisan ni xa iexil bei mak mu tangan mei lihe eilepe pe met moletin xil ili ngan xa lihe eilepe pe met Hi.^m

Iesu bit lelen ni xa ngan xil xa lasin ni lihur pangasien ixo he Hi

⁴⁴ Iesu miki nggeih bit, “Ngan xil xa laneket e nou, tave ti inou kestang xa laneket en. Di lapisan ni xa di laneket mun e ngan xa tesil inou namei.ⁿ ⁴⁵ Vengan ngan xil xa lapus nou, nggoni ngan taxa di lapus ngan xa tesil inou namei.^o
⁴⁶ Namei nabe miehen xa di mileluv xol moletin xil te ut etan, tangan ngan xil vus xa lake reitin e nou linati ti mun e

^b12:30 Sion 11:42 ^c12:31 Sion 9:39; 14:30; 16:11

^d12:32 Nam 21:9; Sion 3:14 ^e12:33 Sion 18:32; 21:19

^f12:34 2Saml 7:16; Sam 72:17; 89:4,35-37; 110:1; Aes 9:7; Esek 37:25; Dan 7:14

^g12:35 Sion 7:33; 8:12; 9:4; 12:46; 11:9-10; 1Sion 2:11 ^h12:36 Efes 5:8

ⁱ12:38 Rom 10:16 ^j12:40 Mat 13:15; Mak 4:12 ^k12:41 Aes 6:1

^l12:42 Sion 7:48; 2:23; 7:31; 8:30; 10:42; 11:45; 12:11; 9:22

^m12:43 Sion 5:44 ⁿ12:44 Mat 10:40; Sion 5:24 ^o12:45 Sion 14:9

maluxoluken.^p ⁴⁷Xosxa moletin tei milong sepinien navan e talong xati ti, inou ninasa pangasien ti mini. Vengan xa natamei ti e ut etan tangan nasa pangasien mi moletin xil teni. E-e, namei tangan niteh meulien e xil.^q ⁴⁸E ngan xil xa lasin nou e laling nenemien nae tangan linake reitin ti e sepinien navan, tei da xa isa pangasien mi xil. E, e hoxalite te holesok xil, e Melengien te Lepisien, sepinien navan xil iat xil e ipisen ni xa imal tangan lihur pangasien ak. ⁴⁹Ngan ak ihe reitin, vengan xa natavit ti neta xa vaxo nenemien navan tasok, e di nabit neta xil xa Tata xa tesil inou namei tese-mae ni minou tangan nihiteni.^r ⁵⁰Ma, di nabit mesen sepinien kestang xa Hi tese-mae ni minou tangan nihiteni, vengan xa nakila xa moletin xil likamet meulien salixo en.”^s

Iesu ngganien kor del moletin nan xil, e pispisi mi xil xa litoutou ni mosav xil itel nenemien xa be tan

13 Be melengien tei sutang da, e ihe melengien eo te **Anien te Tavien**. Iesu mikila ngamu xa melele xa istokovein ut etan e ihe visal Tamen di bemei sangas. Ma, vengan xa eheien nan di e moletin xil xa Hi tesa ni mini, Iesu ien bei tangan vapisen eheien nan mi xil ha ituxoh hoxalit meulien nan.^t ²E **Temat** tesa nenemien ngamu mi Sudas, nat Saemon Eskariot, tangan isa rat Iesu ha ihe he elu nan xil.^u

Di, e vongien, Iesu di ngganien del moletin nan xil. ³E xi minem kila xa Tata teling holesok xil ngasen de hen ngamu, e mikila mun xa xi texo visal Hi e itilo-

mun iha ite visali.^v ⁴Misak ni, mitamea ra von anien en, misil rat kot xa mising ni, e mituatu ni taol tei. ⁵Mising mak bus, miteh oei be pesin tei, di, poe be visal moletin nan xil. Bus, Iesu mikas kekes ni le moletin nan xil. Di, misihilexil ni taol xa mituatu ni.^w

⁶Melele xa Iesu duxoh Saemon Pita, Pita biteni mini bit, “?Suv, veneh vari di obit ukas leok?”

⁷E Iesu bit rilomun ni mini bit, “Tax-eak otakil ti mu naha xa di napol ni, e itutou sung, mei ukila.”^x

⁸E Pita biteni nggeih bit, “!E-e, xouk onakas leok ti vatova!”

E Iesu bit, “Xosxa natakas lem ti, marin nam tovuol e nou.”

⁹Ma Saemon Pita bit, “!Suv li, xosxa imak, ma onakas leok ti kestang! !E ukas heok xalu e vatuk mun!”

¹⁰Iesu biteni mini bit, “Ngan xil xa langgul tui lamease, linakas ti mun tenbexil vus. Ihe lexil kestang iaxa likas rilomun ni. E xamim mumese ngamu, e tave xamim vus ti xa mumese.”^y ¹¹Iesu biteni xa tave xil vus ti iaxa lamease, vengan xa tekila ngamu visi iaxa isa rati ha ihe he elu nan xil.^z

¹²Melele xa Iesu mikas lexil bus, mising rilomun ni kot nan e dotan de von anien en. Di, biteni mi xil bit, “?Xamim mukil koute te naha xa napol ni mi xamim xiak?^a ¹³Mukes inou ni ‘Titsa’ mu ‘Suv,’ e momal tangan mupol ni mak, vengan xa be reitin. ¹⁴Ma, vengan xa inou, xa nabe Suv e Titsa namim, di naling nenemien navan be tan e nakas moten lemim, ma momal tangan xamim ti mukas moten lemim xil mun tang.”^b

^p12:46 Sion 1:9; 3:19; 8:12; 9:5; 12:35 ^q12:47 Mat 7:26; Sion 3:17; 8:15

^r12:49 Sion 7:17; 14:31 ^s12:50 Sion 8:26,28

^t13:1 Mat 26:45; Mak 14:41; Sion 12:23; 17:1; 16:28

^u13:2 Luk 22:3; Sion 13:27 ^v13:3 Mat 11:27; Luk 10:22; Sion 3:35; 16:28

^w13:5 Luk 7:44; Sion 12:3 ^x13:7 Sion 13:12 ^y13:10 Sion 15:3 ^z13:11 Sion 6:64,70-71 ^a13:12 Mat 28:8,10 ^b13:14 Luk 22:27; Mat 20:28; 1Tim 5:10

¹⁵Inou napol ni sexien ak tangan xamim mukila mupol ni ixoni nou. Imak, ma ha mututou ni mosav xil itel nenemien xa be tan, ixoni ngan taxa inou di napol ni mi xamim.^c ¹⁶Reitin li nabiteni mi xamim, *slev* tei nave eilep ti nali masta nan, e *eloheoh* tei nave eilep ti nali ngan xa di misila.^d ¹⁷Xosxa mukil reitinen ak, tuxolxatien iti mi xamim xosxa mupol ihusili.”^e

Iesu bit lelen ni xa tei e moletin nan xil isa rati ha ihe he elu nan xil

¹⁸Di, Iesu biteni mi moletin nan xil bit, “E nataviteni ti xa tuxolxatien ak iti mi xamim vus. Melele xa natehosei xamim tangan mei muhusil inou, nakil xamim ngamu. E natehosei tei e xamim mun tangan naha xa Vanuvei Eo tehit lelen ni mei ihe reitin xa bit, *‘Moletin xa ngganien del nou, xi vari biles e pol misa minou.’* (Sam 41:9)

¹⁹“Sexien ak tamei ti mu, e di nabit mesen ni mi xamim taxeak tangan, melele xa mei istal, xamim muke reitin xa inou nabe xi.^f ²⁰Reitin li nabiteni mi xamim, moletin xa nggur pilei moletin tei xa nasila, nggoni ngan xa di nggur pilei inou mun. E moletin xa di nggur pilei inou, nggoni ngan xa xi di nggur pilei ngan xa tesil inou namei.”^g

²¹Melele xa Iesu bit sepinien ak bus, tinen polu ni nenexoen e bit lelen ni bit, “Reitin li nabiteni mi xamim, tei e

xamim isa rat inou ha nihe he elu navan xil.”

²²Melele xa moletin nan xil lalonge mak, laketeh mikapis e xil mun tang, e latakil ti visi vari iaxa Iesu di bit usili.

²³Tei e moletin nan xil, ngan xa eheien na Iesu da en holu,[§] xi di dotan e ri Iesu.^h

²⁴Ma, Saemon Pita misepin mini nggo hen bit xi isis Iesu xa di bit usil visi vari.

²⁵Misak ni, moletin nan ak milis be visal Iesu e misisi bit, “?Suv, visi vari?”ⁱ

²⁶E Iesu bit rilomun ni mini bit, “Niso saxut beret ak ihe sup xa iaxor e nisa ni mini. Xi vari iaxai.” Ma, Iesu nggur rut beret tei, miso ni be sup, e di, misa ni mi Sudas, nat Saemon Eskariot. ²⁷Ma Sudas nggur rut beret ak. Bus di, *Temat* mei mise xat nenemien nan. E Iesu misepin mi Sudas bit, “Neta xa onemi obit upol ni, utemanon ha upol ni.”^j ²⁸Tovuol e xil xa ladotan e von anien en ak vakila veneh ma Iesu bit sepinien ak mini.

²⁹Rute e xil lanemi labit Iesu di misila tangan ha vaxal neta tei ve anien ak, mu tangan vasa neta tova mi hoeo xil vengan xa Sudas iaxa di milaxat *mani* nae.^k ³⁰Ma, dutou ni ngan xa tehur rut beret ak, Sudas mitemanon be hale. E be vongien ngamu.”^{** 1}

Iesu misa rae hu te eheien mi moletin nan xil

³¹Melele xa Sudas ba, Iesu biteni bit, “Taxeak be melele xa momal tangan Hi isa ni minou, Nat Moletin, his tei xa

^{¶13:19} Vahit sepinien ak vahe, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^{§13:23} Ngan ak tehe sexien xa Sion, xa tetis vanuvei ak, tesepe usil xi tasen.

^{**13:30} Be vongien e rin lu. Reitin xa ut vong. E, e rin sav, be vongien te meulien na Iesu xa tesepe usili e Sion 9:4; 11:9-10; e 12:35-36.

^{c13:15} Plp 2:5; 1Pit 2:21 ^{d13:16} Mat 10:24; Luk 6:40; Sion 15:20 ^{e13:17} Tem

1:25 ^{f13:19} Sion 14:29; 16:4; 8:24,28 ^{§13:20} Mat 10:40; Mak 9:37; Luk 9:48;

10:16 ^{h13:23} Sion 19:26; 20:2; 21:7,20 ^{i13:25} Sion 21:20

^{j13:27} Luk 22:3; Sion 13:2 ^{k13:29} Sion 12:6

^{l13:30} Sion 9:4; 11:9-10; 12:35-36

eilep. E naha xa ti nipol ni ipisen ni xa his Hi be eilep mak mu.^m 32 E vengan xa naha xa nipol ni ipisen ni xa hisen be eilep mak mu, ma Hi vari iaxa ipisen ni xa hisok, Nat Moletin, be eilep mun. E ipol ni xosali tang.

³³“Xamim li munggoni tutut horamue navan xil. E nite visal xamim vuteili mun. Ivus, ti mulang ni nou, e munapus ti nou. Nabiteni mi xamim sepinien xa natesa ni mi vat xil na *Siu* xil melele xa nabit, ‘Rute xa inou niha en, xamim musakras muva en.’ⁿ 34 E di nasa rae hu tei mi xamim: eheien namim iti e xamim mun tang. Ixo hisit sexien xa inou di napisen eheien navan mi xamim, xamim mun ti mupisen eheien namim mi xamim mun.^o 35 Xosxa xamim di mupisen eheien mi xamim mun tang, ma moletin xil vus lipus kila xa mube moletin navan xil.”^p

**Iesu bit lelen ni xa Pita
imuun xole ihit takil ti xi**

*Mat 26:31-35; Mak
14:27-31; Luk 22:31-34*

³⁶Saemon Pita misis Iesu bit, “?Suv, uha xave?”^q

E Iesu bit rilomun ni bit, “Rute xa inou niha en, xouk osakras ova en taxeak. E itutou sung, xouk uhusil inou.”

³⁷E Pita misis bit, “?Suv, veneh vari nasakras namusiluk taxeak? !Inou nabue xat inou tangan nimat e rin nam!”

³⁸Iesu bit rilomun ni bit, “?Reitin mak xa obue xatuk tangan umat ve nou? Re-

itin li nabiteni minuk xa ut nalan ti mu, e tuto nakorat ti mu, e xouk uhiteni ihe vatol ngamu xa otakil ti nou.”

**Iesu be suse tangan moletin
xil lakila lave visal Hi Tata**

14 Iesu misepin mi moletin nan xil bit, “Munanexo ti e munalonge ti nasa. Muneket e Hi e muneket e nou mun.^r 2 E rute xa Tata navan da en, vontoen holu ladi en. E inou niha tangan nisak mesen vonemim.^{††} Ngan ak be reitin, vengan vahit nave reitin ti, ma nina viteni ti mi xamim. 3 E vengan xa be reitin xa niha nisak mesen vonemim, reitin mak mu xa nitilomun e nileh xamim mumei visal inou. Isak ni, xamim muti e rute xa inou ha nita en.^s 4 E xamim mukil suse ngamu xa be rute xa inou niha en.”

⁵E Tomas biteni mini bit, “Suv, xamem matakil ti rute xa uha en. ?Misak ni, xamem mukil suse nen itep?”

⁶Iesu biteni mi moletin nan xil bit, “Inou nabe suse, inou nabe reitinen, e inou nabe meulien.^{‡‡} Moletin tovuol mikila vahe visal Hi Tata xosxa naxo inou ti.^t 7 Xosxa xamim mukila xa nabe visi, ma mukil Tata navan mun. Ma, xosali iha, mukil kuh Hi Tata ixoni ngan taxa mutepusi reitin.”^u

⁸Ma Pilip biteni mini bit, “Suv, upisen Hi Tata mi xamem, e ngan ak iaxa ipin ni xamem.”

⁹Iesu bit rilomun ni bit, “Pilip, natete visal xamim be nousav ngamu. ?Veneh ma otakil ti nou mu? Moletin xa pus

^{††}14:2 Iesu taviteni ti xa ihe ut nesao tangan vakili ni nim savsav xil tangan vahe na moletin nan xil. Di biteni xa ha imat tangan vapol ni suse tangan ngan xil xa laneket en lakila ha liti e ut nesao itela e itel Tamen.

^{‡‡}14:6 Koute te sepinien ak be, “Inou nabe ngan xa di pisen suse tangan moletin xil lakila lave visal Hi Tata e ut nesao, nabe ngan xa di pisen reitinen usili, e inou nabe ngan xa di misa meulien sal mi moletin xil.”

^m13:31 Sion 12:23; 17:1,5 ⁿ13:33 Sion 7:33-34; 8:21 ^o13:34 Sion 15:12,17; 1Sion 2:7; 3:23; 2Sion 1:5 ^p13:35 1Sion 3:14 ^q13:36 Sion 7:35; 7:34,36

^r14:1 Sion 14:27 ^s14:3 Sion 12:26; 17:24 ^t14:6 Hib 10:20 ^u14:7 Sion 8:19

inou, nggoni ngan xa di pus Tata mun. ?Veneh vari di osis nou tangan nipisen Tata mi xamim?^{v 10} ?Be reitin iaxa otake reitin ti mu xa inou nabisti del Tata, e Tata bisti del nou? Sepinien xil xa di nabiteni mi xamim tastal ti vaxo inou tasok. Tata xa di nabisti dela iaxa di misa ni minou, e xi misak ni nou di napol ni polien nan xil.^{w 11} Muke reitin xa inou nabisti del Tata, e Tata di bisti del inou. E neta sav xa musakras muke reitin e rin ak, muneket e nou tang ve polien xil xa di napol ni.^{x 12} Reitin li nabiteni mi xamim, ngan xil xa laneket e nou ti lipol ni holesok xil xa tellep ixoni nou. Reitin, xil lipol ni holesok xil xa ihe eilep mak mu ili ngan xa inou di napol ni, vengang xa inou ha nite visal Tata.^{y 13} Ma melele xa musis ve neta e hisok, inou nipol ni tangan inou, Nat Hi, nikila nisak ni his Tata navan ihe nesao mak mu.^{z 14} Reitin, xosxa musis ve neta tova e hisok, inou nipol ni.”

Iesu bit xati xa isa Ninin Eo mi moletin nan xil

¹⁵ Iesu biteni mun mi moletin nan xil bit, “Xosxa eheien namim di e nou, ma mulong xat rae navan xil.^{a 16} Imak, ma nisis Tata navan, e xi isa xoles teimun tesav tangan mei isa tutouen mi xamim e iti mi xamim vehakut.^{b 17} Di nasep usil **Ninin** xa di pisen reitinen na Hi mi moletin xil. E nara ti mi ngan xil xa labe te ut etan tang vengang xa lasakras lapus kila e latakil ti xi. E xamim mupus kila

vengang xa xi di bisti del xamim e iti mi xamim.^c

¹⁸ “Melele xa niha, ninastokovein xamim ti naxoni ngan xa mube timaru xil. Vengang xa nitilomun nimeil visal xamim.^{d 19} Nave nousav ti, ngan xil xa labe te ut etan tang linapus ti mun inou, e xamim mupus inou e melele xa nimeul rilomun. E vengang xa nimeul rilomun, mukila xa xamim mun mumeul rilomun.^{e 20} E melele nen ak, xamim mukila xa inou nabisti del Tata navan, e xamim mubisti del inou, e inou nabisti del xamim.^{f 21} Ngan xil xa langgur rae navan xil e lalong xati, di lapisan ni xa eheien nae de nou. E ngan xil xa eheien nae de nou, eheien na Tata navan ite xil, e eheien navan mun ite xil e nipisen inou mi xil.”^g

²² Sudas,[¶] “xa tave Sudas Eskariot ti, bemei visal Iesu e misisi bit, “?Suv, itep vari iaxa ti upisen xouk mi xamem e nave mi ngan tesav xil te ut etan?”^h

²³ Iesu biteni mini bit, “Ngan xil xa eheien nae di e inou lilong xat neta xa nabiteni. Imak, ma eheien nan Tata navan iti mi xil. Xamel malimeil maliti visal xil. ²⁴ E ngan xil xa eheien nae tara ti e nou, lalong xat ti neta xa di nabiteni. E naha xa di mulong inou di nabiteni taxo ti e nou tasok, di nggo visal Tata xa tesil nou namei.ⁱ

²⁵ “Di natehit holesok xil ak melele xa nateta tamu visal xamim. ²⁶ E hisok, Tata isil **Ninin Eo** xa imei ihe ngan te tutouen. Xi imei ipispisi mi xamim ni holesok xil

[¶]14:22 Hisen teimun tehe Tatios xa latesep usili e Mat 10:3 e Mak 3:18.

^v14:9 Sion 12:45; Kol 1:15; Hib 1:3

^w14:10 Sion 10:38; 14:20; 17:21; 12:49; 14:24 ^x14:11 Sion 10:37-38

^y14:12 Sion 7:33; 13:1; 14:28 ^z14:13 Sion 15:16; 16:23; 13:31-32; 17:1

^a14:15 Sion 15:10; 1Sion 5:3; 2Sion 1:6 ^b14:16 Sion 14:26; 15:26; 16:7

^c14:17 Sion 15:26; 16:13 ^d14:18 Sion 14:3,28

^e14:19 Sion 16:16; 7:33-34,36; 6:57 ^f14:20 Sion 10:38; 14:10-11; 17:21-23

^g14:21 Sion 15:10; 1Sion 5:3; 2Sion 1:6; Sion 16:27 ^h14:22 Pol 10:40-41

ⁱ14:24 Sion 7:16; 14:10

vus e isak ni xamim munem xat holesok xil vus xa di natehiteni mi xamim.^j ²⁷Reitin xa nihe reling xamim, e di nasa tomat navan ite tinemim. Tomat xa nasa ni mi xamim taxoni ti naha xa ngan xil te ut etan di lasa ni. Ma, munanexo ti e ulimim nakan ti.^k

²⁸“Xamim di mulong nou nabiteni xa nihe reling xamim, e ivus, nitilomun nimei visal xamim. Xosxa eheien namim de nou reitin, ma muhesi xamim ihe holu xa nihe visal Tata navan. Vengan xi be eilep mak mu mili nou.^l ²⁹Di nabit holesok xil ak mi xamim taxeak tangan, e melele xa mei istal ihe reitin, xamim mupus kila e muke reitin e naha xa natehiteni.^m ³⁰Ninasepin ti mun nave holu mi xamim vengaxa Temat, ngan xa be vat na moletin xil holu te ut etan, di be-mei. Xi taxur ti xeihen vali nou,ⁿ ³¹e niha nihe hen ixoni ngan xa Tata tese-mae ni nou tangan ti nipol ni. Imak, ma moletin xil te ut etan lipus kila xa eheien navan de Tata navan.^o

“E taxeak, mumea, rave reling rute ak.”

Vole usil midep iaxa Iesu be vatite xa be reitin

15 E Iesu dei vole mi moletin nan xil bit, “Inou nabe vatite xa be reitin e Tata navan nggoni moletin xa di milaxati. ²E lite xil ngasen xa lataso ti huite, xi ita xotex xil liha. E lite xil xa laso huite, xi ita moten xil tangan isak ni xil mei liso huite ihe holu mu.^p ³E xamim mumese ngamu vengaxa mutehur sepinien xil xa natesa ni mi xamim.^q

⁴Ma muxulehi muhisti itel nou, e inou mun nixulehi nihisti itel xamim. E hisit sexien xa lite xil xa latavisti ti vatel vatite lasakras laso tase ni huite, xamim mun musakras muso huite e meulien namim xosxa munavisti ti natel inou.^r

⁵“Inou nanggoni vatite ak, e xamim munggoni lite xil teni. Ngan xil xa labisti del inou, e inou del xil, ti liso huite ihe holu e meulien nae. E xosxa munavisti vatel inou, misakras mupol ni ti neta.^s

⁶Ngan xil xa latavisti ti vatel nou langgoni lite xil xa langguxou e labue. Hisit lite xil xa lamak, Hi ileh viton xil, e iso xil lihe upang xa ia len xil vari.^t ⁷E xosxa mubisti del inou, e munggulil xat sepinien navan xil, xamim mukila musis ve neta xa iemim bei, e Hi ipol ni.^u ⁸E di mumerere ni Hi Tata melele xa muso huite xil lihe holu e meulien namim. Imak, ma mupisen ni xa mube moletin navan xil reitin.^v

⁹“Eheien navan di mi xamim e hisit sexien xa eheien na Tata de inou. Muxulehi muhisti itel inou tangan eheien navan iti mi xamim vehakut. ¹⁰Xosxa mulong xat rae navan xil, ti mupisen ni xa di mubisti del inou reitin e eheien navan iti mi xamim. Ngan ak nggoni ngan taxa inou di nalong xat rae xil na Tata navan tangan nipisen ni xa di nabisti dela e eheien nan de nou.^w

¹¹“Nabit holesok xil ak mi xamim tangan vasak ni sien navan vati e meulien namim e tangan mei mupolu kuhi itela.^x ¹²Rae xa di nasa ni mi xamim xiak: iemim ihei xamim mun ixoni ngan taxa

^j14:26 Sion 14:16; 15:26; 16:7 ^k14:27 Sion 16:33; 14:1

^l14:28 Sion 14:3; 16:16,17; 13:1; 14:12; 16:10,17,28; 20:17

^m14:29 Sion 13:19 ⁿ14:30 Sion 12:31; 16:11 ^o14:31 Sion 12:49; 15:10; Mat 26:46; Mak 14:42 ^p15:2 Mat 3:10; 15:13 ^q15:3 Sion 13:10

^r15:4 Rom 11:17-18; 2Kor 3:5; Sion 6:56 ^s15:5 1Kor 12:12,27; Sion 15:16; 2Kor 3:5 ^t15:6 Mat 3:10; 7:19; 13:42 ^u15:7 Mak 11:24; Sion 14:13; 16:23 ^v15:8 Mat 5:16 ^w15:10 Sion 14:15; 1Sion 2:5; 5:3 ^x15:11 Sion 17:13; 1Sion 1:4

inou di ieok bei xamim.^y ¹³ Sexien xil xa di pisen ni xa eheien na moletin tei de tuneli xil mak: melele xa di maen xoteh meulien nan tengen vamat vahinat xil. Sexien ak be eilep mak mu mili sexien sav xil te eheien.^z ¹⁴ E xamim mube tua navan xil xosxa mupol ni naha xa nase-mae ni mi xamim.^a ¹⁵ Ninakes xamim ti mun ni moletin te polien navan xil, veng-an xa moletin te polien xil latakil ti naha xa masta nae di pol ni. E di nakes xamim ni tua navan xil, veng-an xa nate-hit mesen ni mi xamim ngamu holesok xil vus xa Tata navan tehiteni minou. ¹⁶ Tave xamim ti xa muthosei inou ten-gan ti muhusil inou, e be inou vari iaxa nathosei xamim. E natesil xamim ten-gan ha mupol. Ma, ha muso huite ihe holu, huite xa ita vehakut. Ma, isak ni Tata isa ni mi xamim neta xa musisi ni e hisok.^b ¹⁷ Vatei mun, ha mupol ni naha xa di nasemae ni mi xamim xiak: iemim ihei xamim.”^c

Isu misel xat moletin nan xil xa moletin xil te ut etan ti iexil iat xil

¹⁸ Isu biteni mun mi moletin nan xil bit, “Xosxa moletin xil te ut etan iexil di nggat xamim, ma munem xati xa, teti-amu, iexil di teat inou.^d ¹⁹ Xosxa xamim mube moletin xil te ut etan, ngan xil te ut etan iexil ihei xamim veng-an lipus xamim muxoni xil tang. E inou natho-sei rat xamim ra xil tengen mei musav ni ngan xil te ut etan. Misak ni, xil iexil di nggat xamim.^e ²⁰ Munem xat naha xa nathiteni mi xamim xa slev tei nave eilep ti nali masta nan.^f Ve rin ak, xosxa

moletin xil latesak purun ni nou, ma be reitin xa xil ti lisak purun ni xamim mun. E xosxa moletin xil latelong xat pispisien navan xil, ma be reitin xa xil ti lilong xat pispisien namim mun. ²¹ E xil lipol ni holesok xil ak mi xamim, veng-an xa mube navan xil e di mupol e hisok e latakil ti ngan xa tesil inou namei.^g ²² Vahit natnamei ti e natnaviteni ti neta mi xil, ma naha xa di lapol ni nave **tesaen** ti. E veng-an xa natemei ngamu visal xil e latesin sepinien navan xil, lasakras mun lamuun xole lavit latnakil ti xa di lapol ni tesaen.^h ²³ Moletin xa ien nggat inou, xi di pisen ni xa di ien ng-gat Tata navan mun.ⁱ ²⁴ Vahit natnamei ti, e natnapol ni ti merekel xil xa mo-letin sav xil lasakras lapol ni, ma naha xa di lapol ni nave tesaen ti. E veng-an xa natemei ngamu visal xil e natepol ni hisit merekel xil pe metexil xa mosav xil lasakras lapol ni, di lapisan ni xa sex-iien tesa xil ak de rin nae. E veng-an xa latesin merekel xil ak, di lapisan ni xa iexil di nggat inou e Tata navan mun.^j ²⁵ Ngan ak di mistal mak tengen vasak ni sepinien xil xa latetisi tete **rae** nae xil xa mei be reitin xa bit, ‘*Texil iat votei ni nou tang.*’ (Sam 69:4)^k ²⁶ “Melele xa nite visal Tata navan, nisil **Ninin** te tutouen imei ve xamim e ise xat xamim. Xi ipisen reitinen nan mi xamim e ihit lenen reitinen usil inou.^l ²⁷ E xamim mun muhit rat reitinen usil inou mi moletin sav xil, veng-an xa xamim iaxa muteti visal inou e melele xa natepol kokot mei duxoh xosali.”^m

^y15:12 Sion 13:34; 1Sion 3:11,23; 2Sion 1:5 ^z15:13 Sion 10:11; Rom 5:8; 1Sion 3:16 ^a15:14 Luk 12:4 ^b15:16 Sion 6:70; 13:18; 15:5; 14:13,14; 16:23
^c15:17 Sion 13:34; 1Sion 3:11,23; 2Sion 1:5 ^d15:18 Mat 10:22; 24:9; Mak 13:13; Luk 6:22; Sion 17:14; 1Sion 3:13; Sion 7:7 ^e15:19 Sion 4:5; 17:14 ^f15:20 Mat 10:24; Luk 6:40; Sion 13:16 ^g15:21 Sion 16:3; Mat 5:11 ^h15:22 Sion 9:41
ⁱ15:23 Luk 10:16; Sion 5:23; 1Sion 2:23 ^j15:24 Sion 14:11; 9:41
^k15:25 Sam 35:19 ^l15:26 Sion 14:26 ^m15:27 Pol 1:8; 5:32; 1Sion 4:14

16 Iesu misepin mun mi moletin nan xil bit, “Nabit holesok xil ak mi xamim tangan munasavut ti e neketen namim melele xa muhisu ni sakpurunien xil. ²Ruti Siu xil xa lasa liso rat xamim ra *nim te pispisiennae* xil. E melengien tei di bemei xa moletin xil linemi lihit Hi ihesi xi melele xa laba tangan lavas vin xamim.ⁿ ³Xil ti lipol ni imak venggan xa latakil ti xa nabe visi, e latakil ti Tata navan mun.^o ⁴E nabit holesok xil ak mi xamim tangan, melele xa mei istal, munem xati xa natehit lenen ni mi xamim ngamu.”^p

Iesu bit lenen ni xa isil Ninin Eo mei itutou ni moletin nan xil

Iesu biteni mun mi moletin nan xil bit, “Natnavit holesok xil ak ti mi xamim tetiamu venggan xa nateta tamu visal xamim. ⁵E xosali, nihe visal ngan xa tesil nou namei. E xamim mutasis nou ti mun xa nihe ut xave.^q ⁶Mutasis nou ti venggan xa tinemim polu ni nenexoen ve naha xa di nabiteni mi xamim.^r ⁷E neta sav xa mak, nabiteni reitin mi xamim xa ihos mak mu xa nihe reling xamim niha. Venggan xosxa ninava ti, ma Ninin te tutouen namei ti visal xamim. E xosxa niha, ma nisila imei visal xamim.^s ⁸E melele xa Ninin imei, ipisen ni mi moletin xil xa nenemien nae tamal ti usil *tesaen* nae, momalen navan, e sexien te lepisien na Hi.^t ⁹Ninin Eo mei ipisen ni xa be tesaen xa lataneket e nou ti.^u ¹⁰Ipisen ni momalen navan mi xil venggan xa ha nite visal Hi Tata e xamim munapus ti mun inou.^v ¹¹E ipisen ni xa be reitin xa Hi ilepis rin na moletin xil venggan xa telepis rin na

Temat ngamu, ngan xa tehe vat na moletin xil holu te ut etan.^w

¹²“Teok bei tangan namit kil holesok sav xil holu mi xamim, e xosali, imeas tova tang tangan muvur xil.^x ¹³E melele xa *Ninin Eo* xa di pisen reitinen mi moletin xil imei, xi ipispisi mi xamim ni reitinen na Hi tangan mukila. Xi nasepin ti vaxo nenemien nan tasen tang, e ihit mesen ni mi xamim holesok xil vus xa miteong ni nggo ut nesao. Reitin, xi ihit lenen ni mi xamim holesok xil xa ti imei.^y ¹⁴Xi ipet rat hisok ihe nesao venggan xa ihur neta xa nabiteni e mei ihit mesen ni mi xamim. ¹⁵Holesok xil vus na Tata navan be navan mun. Misak ni, inou nakila namiteni xa Ninin Eo ihur neta xa nabiteni e mei ihit mesen ni mi xamim.”^z

Iesu bit lenen ni xa longpangasien na moletin nan xil ihiles mei ihe sien

¹⁶Iesu biteni mi moletin nan xil bit, “Navehi ti, munapus ti mun inou. Ti, nave nousav ti xa itutou, e mupus rilomun ni nou.”^a

¹⁷Di, rut *moletin nan xil* lasis xil mun tang labit, “?Naha vari iaxa be koute te sepinien nan melele xa bit, ‘Navehi ti munapus ti mun inou. Ti, nave nousav ti xa itutou, e mupus rilomun ni nou?’ ?E naha vari be koute te, ‘Nihe visal Tata?’ ¹⁸?E, ‘Navehi ti’ be naha? !Xir ratakil ti vari naha xa xi di bit usili!”

¹⁹Iesu mikila xa moletin nan xil iexil bei tangan lasisi ni holesok xil ak. Ma, biteni mi xil bit, “Nakila xa xamim di mubit usil sepinien navan melele xa nabit, ‘Navehi ti munapus ti mun inou. Ti, nave nousav ti, e mupus rilomun ni nou.’ ²⁰Reitin li nabiteni mi xamim xa

ⁿ16:2 Sion 9:22 ^o16:3 Sion 15:21 ^p16:4 Sion 13:19; 16:25

^q16:5 Sion 7:33 ^r16:6 Sion 16:22 ^s16:7 Sion 14:16,26; 15:26

^t16:8 Pol 24:25 ^u16:9 Sion 5:38; 6:36,64; 7:5; 10:26; 12:37 ^v16:10 Sion 13:1;

14:12,28; 16:28; 20:17 ^w16:11 Sion 12:31; 14:30 ^x16:12 1Kor 3:1 ^y16:13

Sion 14:17; 15:26; 14:26; 1Sion 2:27 ^z16:15 Sion 17:10 ^a16:16 Sion 14:19

melele xa niha, xamim mumuis e mutang ve nou, e moletin sav xil te ut etan lihesi xil ihe holu. Ihe reitin xa xamim mulonge isa, e, itutou sung, longpangasien namim ihiles mei ihe sien.²¹ Melele xa atou tei sangas valing tuvava e mei duxoh melele te longpangasien nan, xi di milonge misa ven. E, dutou sung, melele xa miling tuvava nan ngamu e ut etan, ien bovong ni longpangasien teni vengam xa sien xa da en be holu mak mu mili.^b ²²Ngan ak nggoni xamim. Xosali mulonge misa. E melele xa nitilomun mei nipus xamim, ma sien xa ite xamim mei ihe himetu. E moletin ti misakras vahur rat sien ak ra xamim.^c

²³“Melele xa ripus rilomun ni xir, xamim munasis ti mun inou ve neta tova. Reitin li nabiteni mi xamim, xosxa musis Tata navan ni neta tova e hisok, ma xi isa ni mi xamim.^d ²⁴Tetiamu mei duxol xosali, mutnasis ti mu neta tova e hisok. Ma melele xa musis ve neta ngan, muhuri. E melele xa muhuri, mupolu kuhi ni sien.^e

²⁵“Melele xa di nasepin mi xamim usil holesok xil xa mei ti istal, di nasep xuxus ni nggo vole xil. E melele tei di bemei xa ninasepin ti mun naxo vole xil. E melele nen ak, nisep kil usil Tata navan ixo sepinien xil xa imese tevi.^f ²⁶E melele nen ak, xamim musis Tata navan e hisok, e xi isa ni. Nave inou ti mun xa nisis mini e rin namim, ²⁷vengan xa eheien na Hi Tata di ngamu e xamim. Xi ien bei xamim vengam xa eheien namim de inou e muke reitin xa inou natexo visali.^g ²⁸E be reitin mak xa inou natexo visal Tata e

namei e ut etan. E xosali, nihe reling ut etan e nitilomun nihe visal Tata navan.”^h

²⁹E moletin nan xil labiteni mini labit, “Reitin mak, xosali di obit lelen holesok xil vus mei memese. Otasepin ti mun vaxo vole xil. ³⁰Xosali, xamem makila xa okil holesok xil vus. E xamem munasisuk ti mun ni neta, vengam xoux okila ngamu naha xa de nenemien namem. Nggo sexien ak make reitin xa xoux otexo visal Hi vari tang.”ⁱ

³¹Iesu bit rilomun ni mi xil bit, “?Be reitin xa muke reitin e nou sung? ³²Muteong pisi mu. Melele tei di bemei xa xamim te vusien muletasil, e xamim kekes iloh itilomun ihe tim san. Reitin xa muhe reling inou nitat tasok. E neta sav xa imak, ninata tasok ti, vengam xa Tata dat visal nou vehakut.^j ³³Nabit holesok xil ak mi xamim tangan muhisti kuhi itel inou, e, isak ni, tomat ite e tinemim. Melele xa mudi e ut etan ak, ti muhur sakpurunien xil.^k !E muxeih! Vengan xa inou nabas tan ni xeihen na Temat ngamu, ngan xa be vat na moletin xil holu te ut etan.”

Iesu misis mi Hi ve rin na moletin nan xil

17 Melele xa Iesu bit usil holesok xil ak bus, miketeh be nesao e misis bit, “O Tata, melele te longpangasien bemei ngamu. Nasis minuk tangan upet rat hisok, xa nabe Natumali, tangan inou nikila nipet rat hisom.¹ ²Oteling meulien na moletin xil vus tete heok tangan nikila nisa meulien sal iha mi ngan xil

^b16:21 Aes 13:8; 21:3; 26:17; Maek 4:9; 1Tes 5:3 ^c16:22 Aes 66:14

^d16:23 Sion 14:13,14; 15:16; 1Sion 5:14-15 ^e16:24 Sion 15:11; 1Sion 1:5

^f16:25 Mat 13:34; Mak 4:33-34; Sion 16:4 ^g16:27 Sion 14:21,23; 3:2; 8:42; 13:3; 17:8 ^h16:28 Sion 13:3 ⁱ16:30 Sion 2:24-25

^j16:32 Sak 13:7; Mat 26:31-35,56; Mak 14:27-31,50; Luk 22:31-34; Sion 8:29

^k16:33 Sion 14:27; 2Tim 3:12; 1Sion 5:4

¹17:1 Sion 11:41; Mat 26:45; Mak 14:41; Sion 12:23; 13:1; 13:31-32

vus xa otesa xil minou.^m ³E meulien sal be tangan moletin xil likila likil kuh xouk, xa xouk kestang obe Hi reitin, e tangan likila likil kuh inou mun, Iesu Kristo xa otesa ni bemei.ⁿ ⁴Inou natepet rat hisom pe met moletin xil te ut etan vengan xa natepol vuol ni polien xil xa otesa ni minou tangan nipol ni.^o ⁵Mak, ma Tata, nasikus tangan upet rat hisok e usak ni nou mei nihur his xa ihe eilep itelak ixoni ngan xa natehuri ngamu tetelak e melele xa nateti tamu visaluk e melele xa otnapeas ni ut etan ti mu.^p

⁶“Inou natepisen xouk mi ngan xil xa otesa xil minou, ngan xil xa xouk oteho-sei xil ra moletin xil te ut etan. Xil labe nam, e otesa xil minou. E xil latelong xat sepinien nam.^q ⁷E xosali, xil lakila xa holesok xil vus xa xouk otesa ni minou, texo visaluk. ⁸Sepinien xil xa otesa ni minou, inou natesa ni sung mi xil, e xil latehuri. E lakila xa be reitin xa inou natexo visaluk, e lake reitin xa xouk otesa nou namei.^f

⁹“Natisis ti ve moletin xil vus te ut etan. E di nasis tangan ututou ni ngan xil xa otesa xil minou vengan xa labe nam. ¹⁰Ngan xil vus xa di langgusil xat inou labe moletin nam xil, e moletin nam xil vus labe navan mun. E meulien nae di pisen ni xa hisok be eilep mak mu.^s ¹¹Di nabat visaluk, e ninara ti mun e ut etan. E xil liti tamu inggak. O Tata, obe eo xa obe eo pupu. Usikoe xol meulien na moletin navan xil itel xeihen te hisom, his xa otesa ni minou. Imak, ma xil mei livituei lihe tei takes ixoni ngan xa xouk del inou rube tei takes.^t ¹²Melele xa nateta

tamu visal xil, natesikoe xol xil tetel xeihen te hisom, his xa otesa ni minou. Reitin, nateketeh xol xil e ti e xil tenakesae. Tei takes e xil iaxa tehe reling inou e teha tekesae, ngan xa oteho-sei tangan vakesae xa tesak ni naha xa Vanuvei Eo tehiti lelen ni usili mei tehe reitin.^u

¹³“Nave nousav ti, nitilomun nihati visal xouk. E xosali, melele xa nada tamu e ut etan ak, nabit lelen holesok xil ak minuk tangan vasak ni sien xa de nou, mei ipolu e tine moletin navan xil mun.^v ¹⁴Natesa sepinien nam mi xil, e misak ni, ngan xil xa labe te ut etan tang, iexil di nggat xil ven. Iexil di nggat xil vengan xa lapus kila xa ngenen xil latave te ut etan ti, nggoni ngan xa inou mun natave te ut etan ti.^w ¹⁵Tata, natisikus ti tangan oleh rat xil ra ut etan, e nasikus li tangan usikoe xol xil ra Temat, ngan xa be vat tesaen.^x ¹⁶Moletin navan xil latave te ut etan ti, nggoni ngan xa inou mun natave te ut etan ti. ¹⁷Uling rat xil tangan mei lihe moletin eo nam xil ixo reitinen nam. E likamet reitinen nam ixo sepinien nam xil xa be vatit reitinen. ¹⁸Di nasil xil tangan ha lapol e ut etan ixoni ngan taxa xouk otesil nou namei e ut etan ak.^y ¹⁹E tangan nitutou ni rin nae, inou mun di naling rat meulien navan mei nabe moletin eo nam. Ve rin ak, xil mun lakila liling rat meulien nae mei lihe moletin eo nam xil ixo sepinien te reitinen nam.”

Iesu misis ve moletin xil xa mei lineket en itutou

²⁰Iesu misis mun bit, “Tata, natisikus ti ve moletin xil ak kestang, e di nasis

^m17:2 Mat 28:18 ⁿ17:3 1Tes 1:9; 1Sion 5:20

^o17:4 Sion 13:31-32; 14:13; 4:34 ^p17:5 Sion 1:1-2; 8:58; 17:24

^q17:6 Sion 17:26 ^r17:8 Sion 3:2; 16:30 ^s17:10 Luk 15:31; Sion 16:15

^t17:11 Sion 13:1; 13:1,3; 16:28; 10:30; 17:21; Kal 3:28

^u17:12 Sion 6:39,70-71; 18:9; Sam 41:9; 55:12-15; 109:4-8; 2Tes 2:3

^v17:13 Sion 15:11; 1Sion 1:4 ^w17:14 Sion 15:18-19; 8:23

^x17:15 Mat 6:13; 2Tes 3:3; 1Sion 5:18 ^y17:18 Sion 20:21

ve ngan xil mun xa like reitin e nou ixo sepinien xil xa moletin navan xil ti lisa ni mi xil.^z ²¹ Tata, nasisuk tangan xil vus mei lihe tei takes. Reitin, xil lihisti vituei itel ralu ixoni ngan taxa xouk obisti del inou, e inou nabisti del xouk. Vengan xa, melele xa mei labe tei takes, moletin xil te ut etan like reitin xa xouk vari iaxa otesil nou namei.^a ²² His xa eilep xa otesa ni minou, inou di nasa ni mi xil. Mak, ma xil lihe tei takes ixoni ngan xa ralu rabe tei takes.^b ²³ Inou nihisti vituei itel xil ixoni ngan taxa ralu di rabisti vituei. Imak, ma xil mei livituei lihe tei takes, e moletin xil te ut etan lipus kila xa xouk vari iaxa otesil nou namei e eheien nam di e xil nggoni ngan taxa de nou.

²⁴ “Tata, ieok bei tangan ngan xil xa otesa xil minou mei liti visal nou e ut ne-sao, e lipus minehinen te xeihen navan. Reitin, ieok bei tangan xil lipus minehinen te xeihen navan xa usa ni minou vengon xa eheien nam tete nou e melele xa otnapeas ni ut etan ti mu.^c

²⁵ “Tata, xouk omal tevi. E tave ti neta xa moletin xil te ut etan latakil ti xouk, inou nakilak. E ngan xil xa otesa xil minou, xil lakila xa xouk otesa nou namei.^d ²⁶ Inou natepisen ratuk mi xil, e nitit ni ngan xa di napol ni. Imak, ma eheien nam xa de inou, iti e xil. E inou mun niti e xil.”^e

Vat na Siu xil ladal xat Iesu

Mat 26:47-56; Mak
14:43-50; Luk 22:47-53

18 Melele xa Iesu misis bus, xi mea del *moletin nan xil* e laba labe ri Poal Kidron. E rute ak, urvatie i tei te olip di en, ma laba en.^f

² Sudas mikil rute xa laba en vengon xa melele xil holu Iesu di teleh viton moletin nan xil en. Ma, melele xa Sudas ba tangan vapol ni suse xa isa rat Iesu ha ihe he elu nan xil ixo en,^g ³ xi del tatit moletin te vaeen tei te hal Rom, del xat mereketeh xil te Nim Eo xa *vat xil na pris xil* e *Farasi* xil latesil xil laba. Xil lamei del laet nae xil, e di langgur xat tiei e homenda te vaeen nae xil.^h

⁴ Iesu mikil vuol ni holesok xil vus xa mei istal mini, ma ba bisu mi xil e misis xil bit, “?Xamim di mulang ves visi?”

⁵ Xil labit rilomun ni labit, “Iesu te hal Nasaret.”

Xi bit, “Inou nabe xi.”^{§§} Sudas xa di misa rati be he xil di mos del xat xil.

⁶ Melele xa Iesu bit, “Inou nabe xi,”^{*} xil lali tou e lamot labe tan.

⁷ Iesu misis xil mun bit, “?Xamim di mulang ves visi?”

E labiteni vatei mun labit, “Iesu te hal Nasaret.”

⁸ E xi bit, “Inou nabiteni mi xamim ngamu, inou nabe xi.”[†] E xosxa di mulang ves nou, ma mumaen ngan xil ak liha.”⁹ Xi bit sepinien ak tangan isak ni naha xa xi tehiteni mei ihe reitin melele

^{§§}18:5 Vahit sepinien ak vahe, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^{*}18:6 Vahit sepinien ak vahe, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

[†]18:8 Vahit sepinien ak vahe, “*inou NABE*” (Eks 3:14) xa be his xati na Hi. Ve merereen nae, moletin xil latekes Hi ni ‘Iahova’ xa koute teni be Suv.

^z17:20 Sion 17:9 ^a17:21 Kal 3:28; Sion 10:38 ^b17:22 Sion 17:11

^c17:24 Sion 12:26; 1:14; 17:5 ^d17:25 Sion 1:10; 8:55 ^e17:26 Sion 17:6

^f18:1 Mat 26:36; Mak 14:32 ^g18:2 Luk 21:37; 22:39 ^h18:3 Sion 7:32,45

xa tehit, “Tata, ti e ngan xil xa otesa xil minou tenakesae.”ⁱ

¹⁰Di, Saemon Pita, ngan xa nggur xat tiei tei xa eilep, xi milih rati tangan vahasa moletin tova ni. E melele xa mikuvun tiei ak, da xoteh vurang metu na slev na vatixar na pris xil. His slev ak be Malkas.^j ¹¹E Iesu misepin nggeih mi Pita bit, “!Uling rilomun ni tiei nam ite voninen! Tata navan vari iaxa tesak mesen longpangasien ak tangan nihur vuol ni.”^k

¹²Di, moletin te vaean xil te hal Rom lamei del vat nae, e merেকেহ xil te Nim Eo lamei ladal xat Iesu e labar xati. ¹³Di-amu, ladela be visal Anas, avu sasa na Kaeafas, ngan xa be vatixar na pris xil te hura n n n ak.^l ¹⁴E tehe Kaeafas vari iaxa tesel xat ngan xil te Kaonsel na Siu xil tehit, “Ihos mak mu xosxa moletin tei takes imat ve rin na moletin xil, ili xosxa rimaen mol-Rom xil mei lipurun sen mol-Isrel xil vus te kantri nar.”^m

Pita muun xole bit xi takil ti Iesu

*Mat 26:69-70; Mak
14:66-68; Luk 22:56-57*

¹⁵Saemon Pita e moletin teimun na Iesu luka xus e lunggusil Iesu. E venggan vatixar na pris xil mikil moletin teimun ak,[‡] maen ni tangan vahasil Iesu vahe vloh te nim xa eilep man.ⁿ ¹⁶E Pita dit misoh e hale, sangas ni puiteh te vloh ak. Ma, moletin teimun na Iesu, ngan xa vatixar mikila, xi be hale e misepin mi atou xa di miketeh xol puiteh. Misak ni, atou ak maen Pita mun ten-

gan vahe vloh. ¹⁷Di, atou xa di miketeh xol puiteh pus Pita e biteni mini bit, “?Midep? ?Xoux mun obe tei e moletin xil na moletin ak?”^o

E Pita muun xole bit, “E-e, tave nou ti.” ¹⁸Di, Pita ba mos del merেকেহ xil e moletin xil te polien na vatixar na pris xil xa latesupang ni sakol e di laso xorelisi ladale venggan xa di lalong masoh mikat.

Vatixar Anas misis pilei Iesu usil pispisien nan xil

*Mat 26:59-66; Mak
14:55-64; Luk 22:66-71*

¹⁹E vangit nim ma vatixar Anas, xi di misis pilei Iesu usil moletin nan xil e pispisien nan xil. ²⁰E Iesu bit rilomun ni bit, “Holesok xil xa natesep usili, natehit rati mi moletin xil vus. Melele xa di natepispisi, natepol ni e *nim te pispisiennar* tetel vloh te *Nim Eo*. Ma natepol ni e rute xil xa Siu xil holu di lamei vituei en. E natnavit xuxus ni ti neta tova.^p ²¹?Misak ni, di osis nou usili veneh vari? Usis ngan xil xa lateteong ni naha xa natehiteni mi xil, venggan xa xil lakil naha xa natehiteni.”

²²Melele xa Iesu misepin mak, merেকেহ tei na vatixar na pris xil mileves valnao Iesu e bul xati bit, “?!Veneh vari di osepin mak ba mi vatixar na pris xil!”^q

²³Iesu bit rilomun ni mini bit, “Xosxa natehit neta tova xa misa, ma uhit rati. ?E xosxa naha xa natehiteni momal, ma oleves nou veneh vari?”

[‡]**18:15** Moletin teimun ak tehe Sion xa tetis vanuvei ak.

ⁱ**18:9** Sion 6:39; 17:12 ^j**18:10** Luk 22:36,38

^k**18:11** Mat 20:22; 26:39; Mak 10:38; 14:36; Luk 22:42

^l**18:13** Luk 3:2; Sion 18:24 ^m**18:14** Sion 11:50

ⁿ**18:15** Mat 26:58; Mak 14:54; Luk 22:54-55 ^o**18:17** Sion 18:25

^p**18:20** Sion 7:26; Mat 4:23; 26:55; Sion 6:59; 7:14 ^q**18:22** Pol 23:2; Sion 19:3

²⁴ Bus di, Anas misa Iesu xa ao te xeih da tamu e hen xalu tangan vahe visal vatixar na pris xil xa be Kaeafas.^f †

**Pita muun xole vatei
mun bit xi takil ti Iesu**

*Mat 26:71-75; Mak
14:69-72; Luk 22:58-62*

²⁵ Melele xa Pita misoh da tamu sangas visal upang e di midale, tei e moletin xil ak misisi bit, “?Midep? ?Xouk mun obe tei e moletin xil na moletin xai?”^s

E Pita muun xole bit, “E-e, tave inou ti.”

²⁶ Di, slev tei na vatixar na pris xil misisi bit, “?E tave xouk ti iaxa natepus xouk oteta tetel Iesu e urvatie te olip?” Slev ak be vatimol na slev na vatixar xa Pita teta xoteh vurangen.^t

²⁷ E be vatol nen, Pita muun xole bit, “E-e, tenave nou ti.” E melele nen tak vari, tuto mikorat.^u

Ladel Iesu ba misoh pe met Paelet

*Mat 27:1-2,11-31; Mak
15:1-20; Luk 23:1-5,13-25*

²⁸ E makoe roroh, vat na Siu xil ladel Iesu be reling tim sa vatixar Kaeafas, e ladela be tim sa Paelet, vat te kavmen te rute ak, e latave vangit nim man ti. Vat xil na Siu xil latave vangit nim man ti vengon xa xi tave ngan Siu ti e lanemi labit isak ni xil mei lihe muis pe met Hi, ma lasakras lava **Anien te Tavien** sung.[§]

²⁹ Ma, Paelet be hale tangan vapus xil. Melele xa pus xil, misis xil bit, “?Naha vari iaxa be tesaen xa mubiteni ba xat rin na moletin ak?”

³⁰ Ma xil labit rilomun ni mini labit, “Moletin ak be moletin tesa tei. Vahit nave reitin ti, munasa ni ti minuk tengon osa pangasien mini.”

³¹ Ma Paelet biteni mi xil bit, “Xosxa imak, ma xamim muhuri e mulepis rin nan ihusil **rae** namim xil. Ivus ti, musa pangasien mini ihusili.”^v

E xil labit rilomun ni labit, “Rae xil te kantri ak di misikoe xol xamem bit xamem Siu xil masakras makin maten mi moletin tova e kot namem.” ³² Ngan ak testal tangan vasak ni sepinien na Iesu vamei vahe reitin melele xa tehit lelen sexien eah xa imat ixo en.^w

³³ Ma, Paelet dilomun be nim man e misis moletin te vaeen nan xil tangan litel Iesu vamei pe meten. Melele xa pusi, Paelet misisi bit, “?Midep? ?Xouk iaxa obe suv toto na Siu xil reitin?”

³⁴ Iesu bit rilomun ni mini bit, “?Di oxis nou mak ve rin nam tasom, mu vengon xa moletin sav xil latehit usil inou minuk?”

³⁵ Paelet bit rilomun ni bit, “Rin navan tovuol e xouk vengon xa natave Siu ti. Be moletin nam xil xati del vat na pris xil iaxa lasa ratuk omei e heok. ?Veneh? ?Otepol ni naha tova xa misa?”^x

^f18:24 E melele nen ak, Kaeafas tehe vatixar na pris xil reitin. E neta sav xa mak, xeihen xa mahulong tete he Anas, xa tehe vatixar na pris xil e huram xa tevus.

[§]18:28 Siu tei misakras vahe vangit nim ma ngan xil xa latave Siu ti, mu vanien vituei vatel xil, mu vatuxol holesok xil xa xil di laduxoli. Siu xil lanemi labit isak ni xil mei linamese ti pe met Hi. E tangan xil mei limese rilomun, lixul kuhi e ha lisa sanien eo tei mi Hi. Vat xil ak na Siu xil latepisen ni xa latenem pupu ni rae nae xil teli rae na Hi xa bit linavas vin moletin sav ti.

^f18:24 Luk 3:2; Sion 18:13 ^s18:25 Sion 18:17

^t18:26 Mat 26:51; Mak 14:47; Luk 22:49-50; Sion 18:10; 18:1

^u18:27 Mat 26:34; Mak 14:30; Luk 22:34; Sion 13:38 ^v18:31 Sion 19:6-7; 19:6; Pol 18:15 ^w18:32 Mat 20:19; 26:2; Sion 3:14; 8:28; 12:33 ^x18:35 Sion 1:11

³⁶ Iesu biteni bit, “Tave ngan xil ti te ut etan xa di labosei nou tangan nihur xeihen te laxatien. Vengan, vahit vama, moletin navan xil ti livae e rin navan tangan ninave he vat xil na Siu xil ti. E ngan xa di misa xeihen te laxatien minou tave ti te ut etan ak.”

³⁷ Ma, Paelet misisi bit, “?Ma, xouk obe suv toto reitin?”^y

Iesu bit rilomun ni bit, “Xouk iaxa obiteni reitin xa nabe suv toto tei. E natopot e natemei e ut etan ak tangan nipol ni polien tei takes. Natemei tangan nihithiten reitinen na Hi iha mi moletin xil. E ngan xil vus xa iexil bei reitinen, xil di lalong xat sepinien navan xil.”

³⁸ E Paelet misisi bit, “?Visi vari mikila vakil ti reitinen?”

Melele xa Paelet misepin del Iesu bus, be hale e misepin mun del Siu xil bit, “Inou natapus ti neta tova vasa e rin nan xa momal tangan nasa pangasien mini ven. ³⁹ E nggusil sexien metu naralu, e melengien te Anien te Tavien ak, di namaen moletin tei xa xamim mubosei tangan iha ven imase ra nim te xeih. ?Misak ni, xamim iemim bei tangan nimaen suv toto na Siu xil ha vameluv?”

⁴⁰ E tatit moletin xil lakei nggeih labit, “!E-e, iemem ti tavei moletin xai! Iemem bei Barabas tangan istal imeluv iha.” Barabas tehe vatxeih tei xa tevae tetel kavmen te hal Rom.^z

Lakin maten mi Iesu

19 Melele xa moletin xil lasin ni tangan lamaen Iesu ha ven vamase, Paelet misemae ni tangan limeasi ni ao xa mikan.^a ² Ma, moletin te vaeen nan xil langgur Iesu e laba. Langgil xat vatluvoluv tei ni ao tei xa sanute xil tepiei di

en e lasili xol vatin. Lasing xole ni kaliko tei xa pili nggoni ngan xa be suv toto tei.^b ³ Di, lapol pepamen ni labit, “!O suv toto na *Siu* xil, xamem mamerere ni xouk!” E melele xa labiteni mak, langgulehi lamei visali e lalevesi de valnaon.^c

⁴ Di, Paelet dilomun visal vanut moletin xil vatei mun e biteni mi xil bit, “?Mupusi? Di nanggur moletin ak be-mei visal xamim tangan mupus kila xa, e ketehen navan, natakamet ti neta xa vasa vaha xat rin nan.”^d ⁵ Ma ladel Iesu be pe metexil, vatluvoluv xa sanute di en de vatin e mising ni kaliko tei xa pili nggoni be suv toto tei. Di, Paelet biteni mi xil bit, “Mupusi. !Xi xiak!”

⁶ Melele xa *vat xil na pris xil* del mereketeh xil te Nim Eo lapusi, lakei nggeih labit, “!Ti xati e eivave! !Ti xati e eivave!”^e

Ma, Paelet biteni mi xil bit, “!Xamim vari muhuri e muti xati e eivave! Vengan xa, e ketehen navan, natakamet ti neta tova xa vasa vaha xat rin nan.”

⁷ E vat na Siu xil labit rilomun ni labit, “Usil *rae* nar, momal tangan ha imat, vangan di mikes tasen ni xi ni Nat Hi.”^f

⁸ Melele xa Paelet milonge, ulin mikan holu mak mu. ⁹ Xi dilomun be nim e misis Iesu bit, “?Xouk onngo xave vari?” E Iesu tavit ti neta.^g

¹⁰ E Paelet biteni mun bit, “?Midep? ?Onasepin ti minou? ?Otakil ti xa inou nanggur xeihen tangan nimaen xouk ha vem imase, mu nimaen ni liti xatuk e eivave?”

¹¹ Iesu bit rilomun ni bit, “Xosxa Hi te ut nesao namaen ni ti, ma xeihen nam ihe tovuol e meulien navan. Ma, ngan xa tesa rat inou mei nade hem, naha xa xi

^y18:37 1Tim 6:13; Sion 3:32-33; 8:47; 1Sion 4:6 ^z18:40 Pol 3:14

^a19:1 Mat 27:15-31; Mak 15:6-20; Luk 23:12-25 ^b19:2 Luk 23:11 ^c19:3 Sion

18:22 ^d19:4 Luk 23:4; Sion 18:38 ^e19:6 Sion 18:31 ^f19:7 Lev 24:16; Sion

18:31; 5:18; 10:33 ^g19:9 Mat 26:62-63; 27:12,14; Mak 14:61; Luk 23:9

tepol ni misa mak mu mili ngan xa xouk iaxa di opol ni.”^h

¹² Melele xa Paelet milonge mak, xi di misak tangan vakamet suse tova tangan vamaen Iesu ha ven vamese vaxo en, e Siu xil lakei rilomun ba mi Paelet labit, “!Xosxa umaen moletin xai ha ven imase, di opisen ni xa xouk otave reitin ti mi **Sisa**, suv toto nam te hal Rom! !Vengan moletin xa di pet rat tasen ni xi bit be suv toto tei be elu del Sisa!”ⁱ

¹³ Melele xa Paelet milong sepinien nae, miki tangan latel Iesu vamei visali, e xi dotan de von koten nan tangan vasa nenemien kor nan usil rin na Iesu. Rute ak lakesi ni ‘Kabata’ e sepinien Hibu ru xa koute teni be ‘Von Nge ngelen te Hat.’

¹⁴ Melele xa pol ni mak, sangas be piniae e melengien xa di lasak xat holesok xil ve Sabat te wik te **Anien te Tavien** en. E Paelet biteni mi Siu xil bit, “!Suv toto namim xiak!”

¹⁵ E moletin xil lakei nggeih labit, “!Has vini! !Has vini vari! !Ti xati e eivave!”

Paelet misis rilomun ni xil bit, “?Reitin? ?Iemim bei tangan niti xat suv toto namim ite eivave?”

E vat xil na pris xil labit rilomun ni labit, “!Sisa te hal Rom, xi kestang be suv toto namem!”

¹⁶ Ma, Paelet misa rat Iesu be he moletin te vaeen nan xil tangan litela iha e liti xati e eivave.

Ladi xat Iesu de eivave

*Mat 27:32-44; Mak
15:21-32; Luk 23:26-43*

Ma, moletin te vaeen ladel Iesu, ¹⁷ e langgeih xati tangan vapo tasen ni eivave nan. Xil laba labe ‘Von Valvat Moletin’ xa lakesi ni ‘Kolkota’ e sepinien Hibu ru. ¹⁸ E rute ak vari, ladi xat Iesu en.

Ladi xati de hilaep na moletin lu mun xa lateti xat xalu lutete eivave nalu e rin xalu. ¹⁹ Di, laling tisen tei de nesao e eivave na Iesu xa Paelet tetis en tehit, “Iesu te hal Nasaret, suv toto na Siu xil.” ²⁰ Tetis sepinien ak texo sepinien tol: Hibu ru, Latin, e **Krik**. Moletin holu latele usil sepinien ak, veng an xa rute xa lateti xat Iesu en tenave sotin ti ra taon.

²¹ Melele xa vat xil na pris xil lale usili, ladi lomun ba lapus Paelet e labiteni mini labit, “Onatisi ti onahit, ‘Suv toto na Siu xil,’ e momal tangan utisi uhit, ‘Moletin ak tehiteni tehit xi be suv toto na Siu xil.’”

²² E Paelet bit rilomun ni mi xil bit, “Naha xa natetisi tuei itat imak.”

²³ Melele xa moletin te vaeen xil ladi xat Iesu bus, laleh eising nan xil xa late sil rati ra ni, e laseti be tatite hat, pipin ni moletin hat te vaeen xil ak. E eising nan xa teviei xa bos da nga, ngan xa latepol ni ni ul xa latehei sal ni tang. ²⁴ Ma, moletin te vaeen xil ak labiteni mi xil mun tang labit, “Rinatal papasi ti. Riso daes e rikameti xa visi e xir ihuri.” Ngan ak testal tangan vasak ni naha xa Vanuvei Eo tehiteni mei vahe reitin xa tehit, “*Lateseti eising navan xil mi xil mun tang, e lateso daes ve eising tepiei navan.*” (*Sam 22:18*)

E ngan ak vari be naha xa moletin te vaeen xil latepol ni.

²⁵ Tave sotin ti ra eivave xa Iesu da en, atou hat (4) lasoh ladi: ninen xal tune hin, e Meri (atou na Klopas) del Meri te hal Makdela.^j ²⁶ Melele xa Iesu pus ninen e pusi xa moletin nan xa eheien nan di en di misoh visali, Iesu biteni mi ninen bit, “Nana, moletin ak ihe natumali.”^k ²⁷ Di, biteni mi moletin ak bit, “Atou ak ihe ninom.” Ma, e melengien ak ba, moletin ak

^h19:11 Sion 10:18; Rom 13:1 ⁱ19:12 Luk 23:2; Sion 18:37; Pol 17:7

^j19:25 Mat 27:55-56; Mak 15:40-41; Luk 23:49 ^k19:26 Sion 13:23; 20:2; 21:7,20

nggur nine Iesu tangan ha ite visali e tim san.

Maten na Iesu

*Mat 27:47-56; Mak
15:33-41; Luk 23:44-49*

²⁸ E melele nen ak, Iesu mikila xa holesok xil xa teme e ut etan tangan vapol ni duxoh hoxalite teni. Ma, tangan vasak ni naha xa de Vanuvei Eo mei vastal vahe reitin, xi biteni bit, “Meruru nggat nou.”** ²⁹ Valite tei da xa polu ni uen xa mikon. Ma, tei e moletin xil xa ladi e rute ak nggur mavulut eising tei, mikasi ni uen ak, milingi de kusut liei tei, e misa ni be nesao tangan Iesu vavisi. ³⁰ Melele xa mu rut uen ak, Iesu biteni bit, “!Natepol sen holesok xil vus!” Di, mitamet be tan, e mat.¹

³¹ Melele xa Iesu mat, be melengien xa di lasak xat holesok xil ve **Sabat**, e Sabat ak be eo mak mu vengang ti lipol ni e wik te Anien te Tavien. Ma, Siu xil lasis Paelet tangan ha vasemae ni moletin te vaeen nan xil tangan lava lamuvul le xatel xa di lamurur ladi e eivave natel tangan latolel vamanon.^{††} Imak, ma likila lileh rat tiei natel ak imei e tan ra eivave tangan xatel latnapurun Sabat ak ti vengang Sabat ak be eo pupu te wik te Anien te Tavien.^m ³² Ma, moletin te vaeen xil laba, langguvul le moletin xa diamu. Di, langguvul ngan tesav mun xa lateti xati tete sangas visal Iesu. ³³ E melele xa lamei visal Iesu, lapusi xa xi mat ngamu.

Ma, lataxuvul len xalu ti. ³⁴ E moletin te vaeen tei misal valxou Iesu ni soso nan. E vatakes, ra del siben mileh nggo en.ⁿ ³⁵ (Moletin taxa pus holesok xil ak mistal di bit rati tangan mukila muke reitin en, e sepinien nan be reitin.)^o ³⁶ Ngan ak testal tangan vasak ni naha xa Vanuvei Eo tehit lelen ni mei vahe reitin xa tehit, “*Sin tovuol namavul.*” (*Sam 34:20*)^p ³⁷ E sepinien teimun e Vanuvei Eo xa tehiteni tehit, “*Moletin xil lipus ngan xa latesal vini.*” (*Sak 12:10*)^q

Laling tiei na Iesu de vangihat te tehinen tei

*Mat 27:57-61; Mak
15:42-47; Luk 23:50-56*

³⁸ Dutou ni, moletin tei te hal Aramatea bemei, hisen Siosep. Xi mun tehe tei e xil xa tehusil xat Iesu, e tepol xuxus ni tang vengang xa ulin tekan ni vat xil na Siu xil. Xi ba pus Paelet e misisi tangan vamaen ni vapo tiei na Iesu. Paelet maen ni, ma Siosep ba po rat tiei nan.^f ³⁹ Nikodimas mun bemei del vokon xil holu xa **mir** e alo xil di en xa kilo nen mili hanutap tei e he xalu mun (30). Tehe Nikodimas ak iaxa teme tesao ni Iesu tetiamu e vongien tei.^s ⁴⁰ Xalu lupu rat tiei na Iesu, lubas vokon xil en nggusil sexien te tehinen na Siu xil, e lupis xole ni kaliko tei xa mieh e memese. ⁴¹ Sangas visal rute xa lateti xat Iesu en, urvatie tei da xa vangihat tei te tehinen da en, ngan xa latete ngamu e be neta

**19:28 Sam 22:15 tehit lelen ni xa meruru iati, e Sam 69:21 tehit lelen ni xa lisa uen xa ikon mini.

††19:31 Lamuvul le xatel tangan vasak ni xatel latsakras mun latosoh e latlihi kuh votiang. Mak, ma latilel imanon. Iexil bei tangan latilel imanon nggusil pispisien tei xa de Dut 21:22-23 xa bit moletin tei xa ladi xati de eivave ve neta xa misa, halesil di en. E xosxa lamaen ni tangan ita ituxoh ut imaluxuluk, ma isak ni tan xa moletin xil ladi en tangan mei namese ti pe met Hi.

¹19:30 Siob 19:26,27 ^m19:31 Dut 21:22-23 ⁿ19:34 1Sion 5:6,8

^o19:35 Sion 21:24 ^p19:36 Eks 12:46; Nam 9:12 ^q19:37 Rev 1:7

^r19:38 Sion 7:13; 9:22; 20:19 ^s19:39 Sion 3:1-2

hu tang, lataling ti mu tiei na moletin tova xa mat vata en.⁴² Ma, vengan xa be melengien xa di lasak xat holesok xil ve Sabat, e sangas ut vama luxoluk xa Siu xil lasakras mun lapol en, xalu ba luling tiei na Iesu de rute ak vengam xa dat sangas.

Iesu mea rilomun ra maten

Sion 20:19; Pol 20:7

20 E makoe roroh e Sande, ut tala ti mu, Meri te hal Makdela ba misao ni vangihat te tehinen na Iesu. E melele xa ba duxoli, mikameti xa hat xa eilep xa tetakoe xol puiteh teni, ladinvin rati ngamu be relingi.^t² Ma, miloh be visal Saemon Pita del ngan xa eheien na Iesu da en, e biteni mi xalu bit, “!Latepo rat Suv ra vangihat te tehinen! !E xamem matakil ti rute xave xa latelingi teti en!”^u

³ Melele xa lulonge mak, Pita del moletin sav na Iesu lube vangihat. ⁴ Xalu vus luloh, e ngan tesav miloh ba mili Pita e duxoh vangihat diamu ni. ⁵ Xi tava ti vangite, e mitei hiraen be vangite e pus kaliko te mieh xa latepis xol Iesu ni da. ⁶ E melele xa Saemon Pita xa di tetutou ni bemei, vatei takes, xi mika sal be vangit vangihat. Xi mun pus kaliko te mieh xa latepis xol Iesu ni da. ⁷ E xi pusi mun xa kaliko te mieh sav xa latepis xol vat Iesu ni tara ti vatel kaliko sav xil. Latepis xol kuhi da nga tasen e rin sav.^v ⁸ Di, ngan tesav xa tetuxoh vangihat tetiamu, xi mun be vangite. E melele xa pus holesok xil ak, xi mike reitin e Iesu. ⁹ Vengan, duxoh melele nen ak, lutnakil kuh ti mu xa Vanuvei Eo tehit lelen ni xa xi imea rilomun ra maten.^w ¹⁰ Di, rumali ludilomun lube tim.

Iesu mei mistal mi Meri te hal Makdela

Mat 28:9-10; Mak 16:9-11

¹¹ Melele xa moletin na Iesu xalu luba, Meri dit misoh e hale te vangihat e di muis. E melele xa di muis mak, mitei hiraen tangan vaketeh vahe vangit vangihat. ¹² E mitemanin melele xa pus *max-axa* lu xa lusing ni eising te mieh. Luditodan ludi rute xa, tetiamu, tiei na Iesu teta en. Tei de von vatin e tei de von kaelen xalu. ¹³ Xalu lusisi lubit, “?Atou, veneh ma di omuis?”^x

Meri bit rilomun ni bit, “Latepo rat Suv navan ra rute ak e natakil ti xa latelingi da xave.”

¹⁴ Melele xa bit ngan ak bus, biles e pus Iesu misoh sangas visali. E Meri takil ti xa ngan ak be Iesu vari.^y ¹⁵ E Iesu misisi bit, “?Atou, veneh ma di omuis? ?Di olang ves visi?”

Meri minemi bit xi be ngan xa di milaxat urvatie ak. Ma, biteni mini bit, “O suv, xosxa xoux iaxa otepo rati be rute sav, uhit rati li rute xave xa otelingi teta en tangan niha nipoe.”

¹⁶ E Iesu mikesi bit, “Meri.”

Melele xa milong raen, Meri biles pus kila e biteni mini bit, “!Raboni!” Koute te sepinien ak be ‘Titsa’ e sepinien Hibru.

¹⁷ Iesu biteni mini bit, “Onasak ni ti tangan otal xat nou vamak vengam xa natava ti mu visal Tata navan. E xoux uha upus tua navan xil e uhit mesen ni mi xil xa, nave nousav ti, ha nite visal Tata navan xa be Tata nae, ngan xa be Hi navan e be Hi nae mun.”^z

¹⁸ Ma, Meri te hal Makdela dilomun e ba biteni mi moletin na Iesu xil bit,

^t20:1 Mat 28:1-8; Mak 16:1-10; Luk 24:1-12

^u20:2 Sion 13:23; 19:26; 21:7,20; 20:13 ^v20:7 Sion 11:44 ^w20:9 Sam 16:9-10; Aes 53:11-12; Hos 6:2; Siona 1:17; Luk 24:26-27; Pol 2:27,31; 1Kor 15:4

^x20:13 Sion 20:2 ^y20:14 Luk 24:16; Sion 21:4 ^z20:17 Rom 8:29; Hib 2:11-12

“!Inou napus Suv!” E bit mesen naha xa xi tehiteni mini.

Iesu mei mistal mi moletin nan xil

*Mat 28:16-20; Mak
16:14-18; Luk 24:36-49*

¹⁹ E Sande vongien, *moletin xil na Iesu* ladi vituei e nim tei e lalok xol puiteh xil teni vengani ulixil mikan xa vat xil na *Siu* xil linamei linatal xat xil. Di, late-manin xa Iesu vari mei mistal mi xil e misoh de hilaep te xil. E biteni mi xil bit, “Tomat iti mi xamim.”^a ²⁰ Melele xa biteni mak, pisen hen xalu e valxoun mi xil. Misak ni, moletin nan xil lapus kila xa Suv nae meul reitin, e labesi xil pupu ven.^b ²¹ Di, Iesu biteni mun mi xil bit, “Tomat iti mi xamim. Ngoni ngan xa Tata navan tesil inou, inou di nasil xamim.”^c ²² E melele xa biteni mak, buhi xil e biteni bit, “*Ninin Eo* mei ise xat xamim. ²³ Xosxa muketeh ihos iha mi moletin sav xil xa latepol tesa, ma Hi mun iketeh ihos iha mi xil. E xosxa munaketeh ti navos mi xil, ma Tata namim mun naketeh ti navos mi xil.”^d

Iesu mei mistal mi Tomas

²⁴ Melele xa Iesu mei mistal mi moletin nan xil, tei e xil tenara ti, hisen Tomas xa lakesi mun ni Meah.^e ²⁵ Ma, melele xa bemei visal moletin sav xil na Iesu, labiteni mini labit, “!Xamem matepus Suv!”^f

E Tomas biteni mi xil bit, “Ninake reitin ti mu en ituxoh melele xa nipus von xoxo vari e kaehen xalu, nisingin vakuheok ihe von xoxo xalu ak, e niling heok ihe rute xa latesal valxoun en.”

²⁶ Wik tei mei mitavi, e moletin xil na Iesu ladi vituei vatei mun e nim ak. E melele nen ak Tomas tehe xil lateti. Tave ti neta xa lalok xol puiteh xil, late-manin xa Iesu mei mistal mi xil, e misoh de hilaep te xil e biteni bit, “Tomat iti mi xamim.”^g ²⁷ Di, biteni mi Tomas bit, “Amei visal nou. Usingin vakuheem vate inggak, e upus ti heok xalu. Utei momal ni hem e ulingi ite valxouk. Nenemien nam nave lu ti mun usil nou, e mei uke reitin e nou.”^h

²⁸ E Tomas bit rilomun ni bit, “!Xouk obe Suv navan! !Xouk iaxa obe Hi navan!”

²⁹ Iesu biteni mini bit, “Xouk oneket e nou vengani xa opus nou. E tuxolxatien iti e meulien na ngan xil xa di lake reitin e nou, tave ti neta xa latapus ti nou.”ⁱ

Sion bit kila xa veneh ma midis vanuvei ak

³⁰ E meulien nan, Iesu tepol ni merekel sav xil holu mun pe met moletin nan xil xa natnatis xati ti vati e vanuvei ak.^j ³¹ E natetis holesok xil ak tengani vasak ni moletin xil mei lake reitin xa Iesu be Mesaea, Nat Hi. E xamim mukil kuhu xa ngan xil xa lake reitin en, xil lihu meulien sal ixo hisen.^k

Iesu mei mistal mi rut moletin nan xil

21 E melengien sav tei, dutou ni holesok xil ak, Iesu mei mistal mi rut *moletin nan xil* e seri Oei Kaleli, xa lakesi mun ni Oei Taeberias. Ngan ak be tumulen usili xa tetep iaxa Iesu tepisen xi mi xil.

² E melele nen ak, Saemon Pita, Tomas (ngan xa lakesi ni Meah), Nataniel (te

^a20:19 Sion 20:1; Pol 20:7; Sion 20:26; 7:13; 9:22; 19:38

^b20:20 Sion 19:34; 20:25,27; 16:20,22 ^c20:21 Sion 17:18

^d20:23 Mat 16:19; 18:18 ^e20:24 Sion 11:16; 21:2

^f20:25 Sion 19:34; 20:20 ^g20:26 Sion 20:19 ^h20:27 Sion 19:34; 20:20,25

ⁱ20:29 1Pit 1:8 ^j20:30 Sion 21:25 ^k20:31 Sion 3:15; 1Sion 5:13

metimal te hal Kena e provins te hal Kaleli), nat Sebede xalu, e moletin sav lu mun na Iesu ladi vituei e rute ak.^{1 3} Saemon Pita biteni mi ngan tesav xil ak bit, “Nama naso net xiak.”

E xil labiteni mini labit, “Xamem mun muhusil xouk.” Ma, labe bot, e ba laso net e vongien ba vuma ... ut milan, e latasar ti meseo tova.

⁴ Melele xa eai da mistal, Iesu bemei misoh e seri oei. E moletin nan xil latakil ti xa be Iesu iaxai.^m ⁵ E xi mikei ba ni xil bit, “?Tiram maxoe xil, midep vari? ?Mutasar ti neta?”ⁿ

Lakei rilomun ni labit, “Tovuol vari.”

⁶ Ma, biteni mi xil bit, “Muso net namim ihe ri metu te bot. Imak, ma muhas ti xil.” Ma, laso net nae. E melele xa lalihi, lapusi xa lasakras lalihi rat net ak vengan xa labas pupu ni meseo xil.^o

⁷ Moletin xa eheien na Iesu di en pus kila e biteni mi Pita bit, “!Be Suv iaxai!” Melele xa Pita milonge xa be Suv, mising rilomun ni eising nan xil (vengan tehur rat rut eising nan xil tangan vapol) e but be oei.^p ⁸ E moletin sav xil labalis labe ut. Xil lalihi net nae xa polu ni meseo xil. Xil di lalihi mak vengan xa latari ti vahe sotin ra ut, be mita hanutap lim tang (100 m).

⁹ Melele xa laduxoh ut, lapusi xa Iesu misupang ni sakol e di midin rut meseo xil del rut beret en. ¹⁰ Iesu biteni mi xil bit, “Muleh ti meseo xil xa mubasi iaxai vamei.” ¹¹ Ma, Saemon Pita ba be bot, e milih rat net xa polu ni meseo xil holu xa latellep. Melele xa labul xil vus, lakameti xa labas meseo handred tei, hanutap lu e tol e le tei mun (153).

E tave ti neta xa labe holu mak, latatal papas net nae ti.^q

¹² Iesu biteni mi xil bit, “Mumei muanien.” Moletin nan xil ulixil mikan tangan lasisi xa xi be visi, vengan lakila ngamu be Suv. ¹³ Ma, Iesu be visal xil, nggur beret, e miseti mi xil. Di, pol ni mak mun del meseo.^f

¹⁴ Ngan ak tehe vatol nen xa Iesu testal mi moletin nan xil tetutou ni melele xa temea rilomun ra maten.^g

Iesu misel xat Pita e miling rilomun ni e polien nan

¹⁵ Melele xa langganien bus, Iesu misis Saemon Pita bit, “?Saemon, nat Sion, be reitin xa eheien nam di e nou mili moletin sav xil ak?”^t

Pita bit rilomun ni bit, “Suv, okila xa be reitin xa ieok bei xouk nggoni ngan xa obe tua navan.”

Iesu biteni mini bit, “Uhangan sulut sipsip savan xil.”

¹⁶ Be valu nen, Iesu misisi bit, “?Saemon, nat Sion, be reitin xa eheien nam di e nou?”^u

“Suv, okila xa ieok bei xouk nggoni ngan xa obe tua navan.”

Iesu biteni mini bit, “Ulxat kuh sipsip savan xil.”

¹⁷ Di, be vatol nen, Iesu misisi mun bit, “?Saemon, nat Sion, be reitin xa iem bei nou nggoni ngan xa nabe tumali?”^v

Pita milonge misa e tinen muis xa Iesu tesisi tehe vatol nen bit, “?Be reitin xa iem bei nou nggoni ngan xa nabe tumali?” Misak ni, Pita bit rilomun ni mini bit, “Suv, xouk okil holesok xil vus. Okila xa be reitin xa ieok bei xouk nggoni ngan xa obe tua navan.”

¹21:2 Sion 11:16; 20:24 ^m21:4 Luk 24:16; Sion 20:14 ⁿ21:5 Luk 24:41

^o21:6 Luk 5:4-7 ^p21:7 Sion 13:23; 19:26; 20:2; 21:20 ^q21:11 Luk 5:6

^r21:13 Mat 14:19; 15:36; Mak 6:41; 8:6; Luk 9:16; Sion 6:11

^s21:14 Sion 20:19,26 ^t21:15 Mat 26:33; Mak 14:29

^u21:16 Pol 20:28; 1Pit 5:2 ^v21:17 Sion 16:30

Iesu biteni mini bit, “Imak, ma uhangan sipsip savan xil. ¹⁸E reitin li nabiteni minuk xa melele xa otehe tiram maxoe tamu, otevue xatuk e otekila otekakao oteha e rute xil vus xa iem tehei. E melele xa mei uhe momatu, utei momal ni hem e moletin sav ising xolok e itelak uhe rute tei xa iem ti navei tenggan ova en.”^w ¹⁹Iesu biteni mak tangan vahit lelen suse xa Pita ipet rat his Hi ixo maten nan.^{‡‡ x}

Di, Iesu biteni mini bit, “Utiti ni ngan taxa ti uhusil inou.”^y

²⁰Pita biles, e pus moletin xa eheien na Iesu di en, ngan xa tetotan sangas visal Iesu melele xa di lateanien vituei e tesiani tehiti, “?Suv, visi iaxa isa ratuk uhe he elu nam xil?”^z ²¹Melele xa Pita pusi, misis Iesu bit, “?Suv, itep mi moletin ak?”

²²Iesu bit rilomun ni bit, “Xosxa ieok bei tangan moletin ak imeul itat imak

ituxoh melele xa nitilomun en, ngan ak tave ti tangan xouk okila. !E xouk, utiti ni ngan taxa ti uhusil inou!”^a ²³Ve sepinien ak, longeongen mikapis xa moletin ak namat ti. E Iesu tenaviteni ti xa xi namat. Tehitani tang tehiti, “Xosxa ieok iheiti tangan imeul itat imak ituxoh melele xa nitilomun en, ngan ak tave ti tangan xouk okila.”

Sepinien kor

²⁴Inou vari iaxa nabe moletin xa Iesu di tesepe usili xiak, hisok Sion. Inou natesep usil holesok xil ak e natetisi xati, e nakila xa holesok xil vus xa di natesep usili be reitin.^b

²⁵Iesu tepol ni holesok xil holu mak mu mili naha xa natetisi xati. Xosxa latis xat holesok xil vus xa xi tepol ni vati e vanuvei xil, ma nanemi nabiti ut tapin ti e ut xil vus te ut etan tangan laling xil en.^c

^{‡‡}**21:19** Tumulen xil tetiamu latehitani xa, haram 30 tetutu ni melele nen ak, mol-Rom xil latetal xat Pita e latetela tangan ha liti xati ite eivave. E venggan xa Pita telonge texoni ngan xa tapin ti tangan imat ixo hisiti sexien xa Suv nan temat en, tesis xil tangan lihilesi e melele xa liti xati e eivave, vatin ihe etan e len xalu ihe nesao. Ma, lateti xati temak. Ngan testal e haram 64 AD.

^w**21:18** 2Pit 1:14 ^x**21:19** Sion 12:33; 18:32 ^y**21:19** Mat 4:15; Luk 14:27; Sion 13:36 ^z**21:20** Sion 13:25; Sion 13:23,25; 19:26; 20:2; 21:7

^a**21:22** Mat 16:28 ^b**21:24** Sion 19:35 ^c**21:25** Sion 20:30

Sepinien xa diamu te

Polien

?Visi iaxa tetis vanuvei ak?

Moletin xa tetis vanuvei ak, hisen Luk. Luk tehe tokta tei^d Luk tenave Siu tei ti, e tave ti neta xa tehe Sentaël tei, mei teneket e Iesu Kristo.

Hi vari tesak ni Luk tetis vanuvei xalu ak te 'Longeongen hos xa Luk tetisi' e 'Polien na eloheoh xil.' Xi tekil kuh hole-sok xil xa testal e meulien na Iesu,^e

?Visi iaxa tevuli vanuvei ak tetiamu?

Luk tetis vanuvei ak teha mi timue tei nan xa hisen Teopolis.^f Koute te his ak be 'moletin xa eheien nan di e Hi.' Luk tetis vanuvei ak teha mi moletin ak, e tekila mun xa moletin xil holu xa latave Siu ti livuli.

?Luk tetis vanuvei ak veneh?

Luk tehit vapisen kila xa Sias testal tetep - Vanuvei te Polien di misep usil sexien xa Sias testal kokot e Serusalem. Xi misep usil polien xa Iesu tesa ni mi eloheoh xil e mi Kristin xil ngasen.^g

Luk tehit vapisen kila xa xeihen na Ninin Eo tesak ni Sias temeul tetep - E vanuvei ak, Luk tesep kila xa melele xa Sias testal e **Serusalem**, moletin xil

latepus Hi xa tesak ni hisit merekel xil ak latestal.^h mei laneket.

Luk tehit vasep kil vatit neketen na Kristin xil - Luk di tetis xat rut sepinien na Hi xa Pita tasetu ni mi Siu xil usil vatit neketen nan,ⁱ Misak ni, moletin holu lanemi labit Luk tetis uvei xalu ak te 'Longeongen hos usil Iesu Kristo xa Luk tetisi' e 'Polien na eloheoh xil' tenggan vahit kil vatit neketen na Pol tenggan vatutou ni rin nan.

Luk tehit vapisen kila xa sakpurunien xil misakras vahas tan ni Sias na Iesu Kristo - Luk tepisen ni xa Kristin xil holu xa di lavithiten longeongen hos na Hi di labisu ni melele te xeih xil e meulien nae (nggoni Pita^j). E sakpurunien xil xa nggeih xiak misakras vahas tan ni Sias na Iesu Kristo venggan xa Ninin Eo di e moletin xil teni. E xi iaxa di misak ni Sias meul mei be mahulong e nggeih mak mu.

Vatit nenemien tei te vanuvei ak de Polien 1:8

Iesu biteni bit, "Xamim mukil ngan ak kestang, melele xa Ninin Eo imei e xamim, mupolu ni xeihen. Ma ti musep usil nou e hal Serusalem, e ut xil xa di provins te hal Sudea, e provins te hal Sameria, e ut sav xil mun iha ihur vuol ni ut etan."

?Naha iaxa di e vanuvei ak?

^d1:0 Kol 4:14; Kol 4:14; 2Tim 4:14; Plp 1:24

^e1:0 Luk 1:3; Pol 1:8; Kol 4:14; 2Tim 4:14; Plp 1:24; Pol 16:10-17; 20:5-28:16; Pol 28:30

^f1:0 Luk 1:1; Pol 1:1 ^g1:0 Pol 1:7-8; Pol 2:1-12; Pol 2:43-46; Pol 2:47; 8:4 ^h1:0 Pol 2:14-7:60; Pol 2:4,7-12; Pol 3:1-10; 5:15-16; Pol 4:8-13,30-31; Pol 8:1,4-5; Pol 12:1-28:30

ⁱ1:0 Pol 2:14-41; 4:8-12; 10:34-48; Pol 13:16-41; 17:22-32; 22:1-21; 26:1-29; Pol 28:30

^j1:0 Pol 4:3; 12:3-17; Pol 16:22-40; Pol 7:59-60; Pol 12:2; Pol 15:19; 17:5-9; 18:6; 19:23-41

1. Polien na Pita del Siu xil. (1:1–12:25)

a. Sias na Iesu Kristo testal kokot e Serusalem. (1:1–7:59)

b. Sias ba duxoh provins te hal Same-ria e Siria. (8:1–12:25)

2. Polien na Pol del ngan xil xa latave Siu ti. (13:1–28:31)

a. Kakaoen kokot na Pol tangan vahithiten longeongen hos mi moletin xil e provins xalu te hal Kalesia e Pampilia. (13:1–14:28)

b. Kaonsel te Sias te hal Serusalem lamaen ni tangan Kristin xil xa latnave Siu ti mei lamos e Sias, neta sav xa latahusil rae na Siu xil ti. (15:1–35)

c. Kakaoen na Pol xa tehe valu nen xa tetuxoh provins te hal Esia e Masedonia. (15:36–18:28)

d. Kakaoen na Pol xa tehe vatol nen xa tetuxoh provins te hal Esia e Masedonia mun. (19:1–21:14)

e. Pol tesep usil vatit neketen nan e von koten e hal Serusalem, Sesaria, e teha tetuxoh taon xa mahulong te hal Rom. (21:15–28:25)

Map - Kakaoen hat na Pol

Sepkilaen na Luk usil vanuvei ak

1 Tuxoli Teopolis,^k
Nadis vanuvei ak bat minuk.

E tisen xa natetisi tehat minuk teti-
amu,^q natehit usil holesok xil xa Iesu di

tepol ni e di tepispisi ni e melele xa tepol kokot ni polien nan xil² ba duxoh melele xa Hi tehur rati tehe ut nesao. E melele xa Iesu teta tamu e ut etan, texo xeihen na **Ninin Eo**, xi tepispisi mi moletin xil xa tehosei xil mei latehe **eloheoh** nan xil.¹³ Melele xa Iesu tehur longpangasien nan e temat, xi testal mi moletin nan xil melengien hanutap lu (40) e suse holu xa tepisen ni xa xi temeul rilomun reitin ra maten. E, e melele nen xil ak, Iesu tesepin tetel xil usil suse xa Hi mei ihe suv toto na moletin xil en.^m ⁴E melele xa Iesu teta tamu tetel moletin nan xil, tesel xat xil tehit, “Munahe reling **Serusalem** ti mu. E mutatil sanien te Ninin Eo xa natehiteni mi xamim xa Tata navan tehit xati tangan isa ni mi xamim.ⁿ ⁵Vengan xa, tetiamu, Sion tebaptaes ni moletin xil ni oei tang, e navehi ti, Hi ibaptaes ni xamim ni Ninin Eo.”^{§§} ^o

Hi nggur rat Iesu be ut nesao

⁶Di, e melengien tei mun, eloheoh xil lamei vituei del Iesu e lasisi labit, “?Suv midep? ?Taxeak, melengien momal tangan xouk omei ove suv toto na mol-Isrel xil vaxoni suv toto Deved tetiamu, mu tamal ti mu?”^p

⁷E Iesu bit rilomun ni mi xil bit, “Melengien ak, Tata keatang nggur xeihen tangan ihosei. Tave tangan ti xa xamim mukil melele xa xi teling xati tangan istal

^q1:1 Luk tetis vanuvei tei nggusil meulien na Iesu teha mi Teopolis ngamu.

^{§§}1:5 Melele xa labaptaes ni moletin tei ni oei, ngan ak pisen ni xa mei mineket e Iesu e biles meulien nan ra sexien tesa nan xil, e misa sen meulien nan mi Hi. E melele xa Kristin tei misa meulien nan mi Iesu, Hi Tamen di baptaes ni e Ninin Eo. Misak ni, Ninin Eo mei polu e meulien nan, di misa xeihen mini, e di pisen suse xa momal tangan ihusili.

^k1:1 Luk 1:3

^l1:2 Mak 16:19; Luk 24:49-51 ^m1:3 Luk 24:36-42; Sion 20:19-20,26-27; Mat 28:18-20; Luk 24:46-49; Sion 20:21-23 ⁿ1:4 Luk 24:49; Sion 14:16-17; 15:26; Pol 2:33 ^o1:5 Mat 3:11; Mak 1:8; Luk 3:16; Sion 1:33 ^p1:6 Luk 24:21

en.^q ⁸E xamim mukil ngan ak kestang, melele xa Ninin Eo mei ise xat xamim, mupolu ni xeihen. Ma ti muhithiten holesok xil xa natehiteni e natepol ni. Mupol ni e taon te hal Serusalem, e rute sav xil mun e provins te hal Sudea. Ivus, ti muhithiteni e provins te hal *Sameria*, e ut sav xil mun iha ihur vuol ni ut etan.^{r†} ⁹Melele xa bit sepinien ak bus e xil dit tamu lapusi, Hi nggur rat Iesu be ut nesao, e momah tei mei da xole e latapus ti mun.^s

¹⁰E melele xa di tamu laketeh be tilang hat, vatei takes, moletin lu xa lusing ni eising te mieh lusoh visal xil.^t

¹¹E lubiteni mi xil lubit, “?Mol-Kaleli xil, xamim di musoh e di muketeh be nesao mak veneh? Iesu xa Hi nggur rati ra xamim e ngguri be ut nesao, xi vari tang itilomun imei ixo hisit sexien taxa di mupusi be ut nesao iaxai.”^u

Matias mei be eloheoh xa nggoles Sudas Eskariot

¹²Di, eloheoh xil labe reling Vathu te Urvatiei te *Olip* e ladilomun labe Serusalem xa tave sotin ti.* ^{v13}Melele xa laduxoh taon, labe von toen xa be nesao e nim xa ladi en. Ngan xil xa ladi vituei e melele nen ak labe Pita, Sion, e Temis; Andru, Pilip e Tomas; Batalomiu e *Matiu*; Temis (xa be nat Alveas), Saemon (xa lakesi ni Silixin) e Sudas (nat Temis).^w ¹⁴Vehakut, eloheoh xil ak lamei di lasis vituei. E moletin sav xil mun xa mei di lasis vituei del xil labe

Meri (nine Iesu), tua na Iesu xatel, del rut atou xil mun.

¹⁵Melengien vahis mei mitavi, e moletin xil xa laling neketen nae e Iesu lamei vituei. Moletin xil vus sangas laduxoh handred tei e hanutap tei (120). Melele xa ladi vituei mak, Pita mitamea misoh pe metexil e biteni mi xil bit, ¹⁶“Tuxoli e hinoxoli xil, sepinien xa suv toto *Deved* tehit lelen ni e Vanuvei Eo mei mistal be reitin usil Sudas Eskariot xa tetel ngan xil xa latemei latetal xat Iesu.^x ¹⁷Sudas tehe tei e xamem xa Iesu tehosei, e xi mun tepol vituei tetel xamem e polien namem.”

¹⁸(Vat xil na pris xil latesa mani mi Sudas ve tesaen xa tepol ni. E melele xa Sudas temat, latehur mani nan e latexal rut tan ni. Ngan ak tehe tan taxa xi temot en, xa tesak ni vangen temesel e tinen xil testal.[†] ¹⁹Melele xa longeongen usil rin xa Sudas temat texo en tekapis e ut xil vus te hal Serusalem, lakes rute ak ni ‘Akeldama,’ xa koute teni be ‘Tan te Ra.’)

²⁰E Pita biteni mun bit, “Reitin, suv toto Deved tehit lelen ni usil Sudas e Sam tei tehit,

‘Hi Suv, upol ni vatimol nan iha ikesae, e horamue tovuol mun nati e tim san.’ (Sam 69:25)

Deved tehit lelen ni mun tehit,

‘Bos xa moletin tei mei ixolesi e ihur voninen.’ (Sam 109:8)

²¹Ve rin ak, momal tengang moletin sav tei mei imos e xamem, tei xa tehupil xamem tetiamu e melele xa matehusil

***1:12** Vathu te Urvatiei te Olip be kilomita tei ra hal Serusalem.

†**1:18** Mat 27:1-10 biteni xa vat xil na pris xil latehur rilomun ni mani xa latesa ni mi Sudas, e latexal tan tei ni. Tumulen ak tehiteni xa Sudas teha tesar hiraen e vatieni xa di misoh de tan ak. E melele xa ao ak temeot, tenben temot tehe tan, e vangen temesel.

^q**1:7** Mak 13:32 ^r**1:8** Efes 3:16; Luk 24:48; Sion 15:27; Pol 2:32; 3:15; 5:32

^s**1:9** Mak 16:19; Sion 6:62 ^t**1:10** Luk 24:4

^u**1:11** Mat 26:64; Luk 21:27; Rev 1:7 ^v**1:12** Luk 24:50,52

^w**1:13** Mat 10:2-4; Mak 3:16-19; Luk 6:14-16 ^x**1:16** Sam 41:9

rohon ni Suv Iesu, e texulehi tehusil xamem e melele xil vus xa matekakao tetela.^y ²² Reitin, muhosei moletin tova xa teta tetel xat xir e melele xa Sion di tebaptaes ni moletin xil, mei duxoh melengien xa Hi tehur rat Iesu tehe ut nesao. Rihosei tova e xil vari tangan mei ipol itel xamem e ti ihit rati mi mosav xil xa be reitin xa tepus Iesu temea rilmun ra maten.” ²³ Ma xil labosei moletin lu: Siosep Barsabas (xa hisen tei mun be Sastas) e Matias.

²⁴ Di, lasis mi Hi labit, “Suv, xouk okil nenemien na moletin xil vus. Ma upisen ni mi xamem xa visi e moletin xalu ak iaxa otehosei^z ²⁵ tangan mei ipol ixoni **eloheoh** nam. ?Visi e xalu mei ixoles von Sudas, xa testokovein polien ak tangan ha ihe voninen xati te maten?” ²⁶ ^aMisak ni, be Matias iaxa langguri mei mos e eloheoh xil xa latehe tei e le tei (11).

Ninin Eo mei mise xat moletin xil xa laling neketen nae e Iesu

2 Melele xa melengien te anien xa lakesi ni ‘Pentekos’ bemei, moletin xil vus xa laling neketen nae e Iesu lamei ladi vituei e nim tei.^b ² Vatei takes, lalong tangalen tei xa nggo ut nesao e bemei nggoni votiang tei xa mu nggeih. Tangalen ak mise sen nim xa di ladotan en. ³ Di, neta tei mistal e nim ak xa pili nggoni upang xa mitasil ba misoh e vatixil kekes.^c ⁴ E melele nen ak, xil vus mei lapolu ni **Ninin Eo**. E Ninin misa xeihen mi xil xa misak ni xil di lasopin nggo hisit sepinien sav xil xa tave nae xati ti.^d

⁵ E melele nen ak, **Siu** xil xa latexo kantri sav xil holu ladi e taon te hal **Serusalem**. Latemei vengang xa neketen nae e Hi nggeih e iexil bei tangan lamot

mi Hi e melengien te Pentekos. ⁶ Melele xa moletin xil ak lalong tangalen ak, xil holu lamei vituei tangan lakil ti naha iaxa di mistal xiak. E melele xa lamei sangas, latemanin vengang xa di lalong kil sepinien na moletin xil na Iesu nggo sepinien savsav nae xil. ⁷ Xil lamesep pupu e lasis xil mun tang labit, “!Ei, moletin xil xa di lasopin iaxai, xil vus labe ngan Kaleli xil tang!^e ⁸ ?Ma vengang iaxa di ralonge xa xil di lasopin nggo sepinien savsav xati nar xil? ⁹ Xir rabe ngan Partia, Midia, e Ilam; ngan Mesopotemia, Sudea e Kapadosia; ngan Pontas e Asia; ¹⁰ ngan Frikea e Pampilia; ngan **Isip** e rin xil xa be Libia sangas visal Saerin. Rute e xir rabe Siu xil te hal **Rom**, e ngan tesav e xir labe te hal Rom xa labit xati tangan lihusil Hi e rae na Siu xil. ¹¹ Rute sav mun labe ngan Krit e Arebia. !E tave ti neta xa ranggo ut sav xil holu xa mak, e xir vus di ralong xil di lasopin e sepinien nar xati xil usil holesok xil xa tellep pupu xa Hi di tepol ni!” ¹² Xil vus latemanin e lanem holu usili. Ma lasis pilei xil mun labit, “?Naha vari koute te holesok xil ak?”

¹³ E rute xil lasop pepamen ni eloheoh xil labit, “!Moletin xil xai lamun tova tang e latalang ni!”

Pita misetu mi vanut moletin xil

¹⁴ Di, Pita misoh del eloheoh sav xil xa labe tei e le tei (11), e miki nggeih ba mi vanut moletin xil ak bit, “Xir Siu xil, e xamim vus xa mudi e Serusalem e melele ak, muteong ni nou e nihit kil koute te holesok xil ak mi xamim. ¹⁵ Moletin xil ak latamun ti vaxoni ngan xa di munemi. Taxeak be naen klok makoe tang. ¹⁶ E-e. Naha xa di mupusi nggoni ngan taxa Hi

^y1:21 Luk 1:2; Sion 15:27; Mat 3:13-15; Mak 1:9; Luk 3:21; Mak 16:19; Pol 1:9

^z1:24 Sion 2:24-25 ^a1:26 Pro 16:33; Pro 16:33

^b2:1 Lev 23:15-21; Dut 16:9-11 ^c2:3 Mat 3:11; Luk 3:16

^d2:4 Pol 4:31; 10:44-45; 19:6; Mak 16:17; Pol 10:46; 1Kor 13:1 ^e2:7 Pol 1:11

tehit lelen ni texo **provet** Soel tetiamu tehit,

¹⁷ *'E melengien kor xil,*

inou nisa Ninin Eo navan mi moletin xil ngasen.

Horamue e atuli namim xil lihit lelen sepinien navan xil.

E horam maxoe xil ti lipus kil nenemien xuxus xil ixo Hi,

e momatu xil lipus kil neta ixo metuveen xil.

¹⁸ *E melengien xil ak, inou niteh rat Ninin Eo navan*

ha ise xat moletin navan xil vus ituxoh tiramue e atou xil mun xa labe slev tang.

Reitin, xil mun, ti lihit lelen sepinien navan xil.

¹⁹ *Inou nipol ni holesok xil xa tellep listal e tilang hat,*

e nipisen xeihen navan e ut etan.

E ut etan, nipol ni holesok xil listal ixoni melele te vaeen:

ra ileh, e upang e eas ituvan e ut ngasen.

²⁰ *E tilang hat, meteneai mei imaluxoluk, e aveti imei ipili ixoni ra.*

Melele xa moletin xil lipus holesok xil ak mei istal,

lipus kila xa melengien xa eilep na Hi Suv sangas vastal xa mei ilepis rin na moletin xil vus.

²¹ *E melele nen ak, ngan xil vus xa likes nou ve tutouen,*

inou, Hi Suv, niteh meulien e xil.” (Soel 2:28-32)^f

²² Pita biteni mun mi xil bit, “!Tuxoli xil te hal **Isrel**, muteong ni sepinien xil ak! Melele xa Iesu te hal Nasaret teta tamu tetel xamim, Hi tepisen kila xa xi tehe Mesaea nan texo xeihen xa tesa ni mini tengan vapol ni merekel xil e hole-

sok sav xil xa tellep pe valnaomim xa vasak ni mutemanin. Xamim vus mukil kuhi xa ngan ak be reitin.^g ²³ E nggusil lingxatien nan, Hi xa mikil holesok xil vus xa di mistal teling Iesu pe hemim. E xamim, mutesa maten mini melele xa mutexeih xat ngan xil xa latahusil ti rae xil na Hi tengan liti xati e eivave.^h ²⁴ E Hi tesak ni temeaa rilomun ra maten tengan nahur ti mun longpangasien teni. Vengan xa xeihen te maten misakras vahur xati.ⁱ ²⁵ Ngan ak nggoni ngan xa suv toto **Deved** tetiamu tehit lelen ni usil Iesu tehit.^j

'Vehakut, napus Hi Suv de riuk metu.

E uluk nakan ti vengan xa xi de visal nou.

²⁶ *Reitin, nabesi nou e nasa memesien ba mini.*

E naling nenesien navan en xa isikoe xol tenbeok.

²⁷ *Reitin, nakila xa namaen ninin navan ti nate von maten.*

E namaen ni ti tiei navan, moletin eo nan, tengan navolel e vul te tehinen.^k

²⁸ *Xi pisen suse te meulien minou.*

Nihesi nou vehakut vengan xa xi de visal nou.” (Sam 16:8-11)

²⁹ Pita biteni mun mi vanut moletin xil bit, “Tuxoli xil te hal Isrel, inou nihiteni imal tang mi xamim usil Deved, avu nar. Xi temat, e latetihin ni. E von tehinen nan da tak duxoh xosali.^l ³⁰ Rakila xa xi tehe provet tei. Xi tekila xa Hi tepol ni hitxatien te xeih tei mini xa isak ni tei e vatimol nan ihur voninen e mei ihe suv toto.^m ³¹ Suv toto Deved tepus kil naha xa Hi ipol ni e melengien xil xa ti imei. Ma tesep usil mea rilomunen na Mesaea melele xa tehiteni tehit,

'Hi namaen ninin navan ti nate von maten.

^f2:21 Rom 10:13 ^g2:22 Sion 3:2 ^h2:23 Pol 4:28; Mat 27:35,50; Mak 15:24,37; Luk 23:33,46; Sion 19:18,30; Pol 3:15 ⁱ2:24 Mat 28:6; Mak 16:6; Luk 24:5; Pol 3:15; 2Saml 22:6; Sam 18:4; 116:3 ^j2:25 Sam 16:8-11 ^k2:27 Pol 13:35

^l2:29 1King 2:10; Pol 13:36 ^m2:30 Sam 132:11; 2Saml 7:12-13

E namaen ni ti tiei navan, moletin eo nan, tangan navolel e vul te tehinen.’ (Sam 16:10)

³²Ngan ak di misepin usil Iesu xa Hi tesak ni temea rilomun ra maten, e xamem vus matepusi xa be reitin.ⁿ ³³Hi tepet rati tehe ut nesao tangan ha vate von xeihen xa de rin metu. E Tamen tesa Ninin Eo mini nggoni ngan taxa xi tehit xati mi xamem. E taxeak, naha xa mupusi e mulonge be Ninin Eo ak xa Iesu di misa ni mi xamem.^o ³⁴Xir vus rakila xa tenave suv toto Deved ti iaxa tehe ut nesao. E Deved vari tang tesepin usil Iesu Kristo melele xa tesa sepinien ak tehit, *‘Hi Suv biteni mi Suv navan bit, ‘Utotan e riuk metu,*

³⁵*ituxoh melele xa niling ngan xil xa labe elu minuk mei liti pe hem.’” (Sam 110:1)^p*

³⁶Misak ni, momal tangan xamim e mol-Isrel xil vus mukil kuhi mak xa Iesu vari iaxa Hi tepol ni be Mesaea e be Suv nar. !E be xi vari xa xamim muteti xati e eivave!^q

³⁷Melele xa moletin xil lalong sepinien nan, iexil bon e tinexil muis. Ma lasis Pita del **eloheoh** sav xil mun labit, “?Tua xil, naha li vari iaxa makila mapol ni?”^r

³⁸Ma Pita bit rilomun ni mi xil bit, “Xamim kekes muhiles ra **tesaen** xil namim e mumaen xamem mubaptaes ni xamim e his Iesu Kristo. Imak, ma Hi ileh rerat tesaen namim xil e iketeh ihos rilomun mi xamim. Ivus, Hi isa Ninin Eo nan mi xamim ixoni sanien tei.^s ³⁹Xamim vus mupol ni imak vengang xa Hi tepol

ni hitxatien ak tetel xamim e horamue namim xil, e tetel ngan xil vus xa ladi sotin. Reitin, Hi Suv tehit xati xa xi isa Ninin Eo nan mi ngan xil ngasen xa xi di mikes xil tangan mei lihe moletin nan xil.”^t

⁴⁰Pita misel xat xil nggeih del sepinien sav xil mun. E dakes xil bit, “!Musis Hi tangan iteh meulien e xamim ra pangasien xa isa ni imei mi moletin tesa xil te xosali ak!”^u ⁴¹Di, moletin xil holu lake reitin e sepinien nan, ma lamaen eloheoh xil labaptaes ni xil. E melengien nen ak, moletin xil laduxoh taosen tol (3000) xa mei lamos del ngan xil xa laling neketen nae e Iesu.^v ⁴²E melengien xil ngasen, moletin xil ak di langgusil xat sexien xil ak: lamei vituei, lateong xat naha xa eloheoh xil di lispisi ni mi xil, laseti anien mi xil, langgur Anien Eo na Suv, e di lasis vituei.^w

Sexien na ngan xil xa laling neketen nae e Iesu

⁴³Melengien xil holu mei mitavi, e Hi di pol ni merikel xil e sexien xil holu xa tellep nggo he eloheoh xil. Misak ni, moletin xil vus latemanin ni e lamerere ni Hi mak mu.^x ⁴⁴Ngan xil vus xa laneket e Iesu, vehakut labe vituei, e di laso viton holesok nae xil tangan ti litutou ni ti e xil xa labe tamure ni neta ngan.^y ⁴⁵E rute ngan xil di lapos ni tan nae mu rut holesok nae xil, e lasa mani teni ba tangan vatutou ni ngan xil xa labe tamure ni neta.^z ⁴⁶Melengien xil ngasen, xil lamei vituei e vloh te **Nim Eo** na Hi. E tim sae xil, laso viton anien ae del tinae hos e di

^m2:32 Luk 24:48; Pol 1:8 ^o2:33 Mak 16:19; Pol 7:55,56; Rom 8:34; Kol 3:1; Hib 1:3; 8:1; 10:12; 12:2; 1Pit 3:22; Sion 14:16-17; 15:26; Pol 1:4

^p2:35 Mat 22:14; Mak 12:36; Luk 20:42-43; Hib 1:13 ^q2:36 Pol 5:30-31

^r2:37 Luk 3:10,12,14 ^s2:38 Pol 3:19

^t2:39 Aes 57:19; Soel 2:32; Rom 10:13 ^u2:40 Dut 32:5; Sam 78:8; Plp 2:15

^v2:41 Pol 2:47; 4:4; 5:14; 6:7; 11:21,24; 21:20 ^w2:42 Pol 2:46; 20:7 ^x2:43 Pol 5:5,11; 19:17; 5:12; 6:8; 14:3; 15:12 ^y2:44 Pol 4:32 ^z2:45 Pol 4:34-35

langganien vituei del sien.^a 47 Xil di latepet rat Hi, e moletin xil vus di lamerere ni xil. E melengien xil vus, Suv Iesu di misak ni moletin holu mu mei di lamos e xil e xi di miteh meulien e xil.^b

E his Iesu, Pita misak ni hoeo tei xa len mikavui mei mikakao rilomun

3 Vatei, e tri klok mahis xa be melele te sisen na Siu xil, Pita xal Sion lube **Nim Eo** na Hi tangan lalosis.^c 2 E melele nen ak, rut moletin xil lapo tua tei nae xa misakras vakakao vengon xa len tesa melele xa ninen telingi. Xil lalingi sangas ni puiteh te vioh te Nim Eo xa lakesi ni 'Puiteh xa Bos.' E melengien xil ngasen, xil di lapoe ba lalingi e rute ak tangan ti varam ni mani ra moletin xil xa di lamei e Nim Eo.^d

³ Melele xa moletin ak pus Pita xal Sion lumei sangas visali tangan lalohe nim, miram ni xalu tangan lalosa neta tova mini. ⁴ Xalu luketeh momal ba ni, e Pita biteni mini bit, "!"Keteh pus xamel!"^e ⁵ Ma xi miketeh pus xalu e minemi bit ti ihur neta tova ra xalu. ⁶ E Pita biteni mini bit, "Mani navan tovuol vari, e naha xa nangguri, nisa ni minuk. !E his Iesu Kristo te hal Nasaret, tamea e kakao!"^f ⁷ Di, Pita dal xat hen metu e dutou ni mitamea e misoh. Vatei takes, len xalu mei lunggeih. ⁸ Moletin ak butahut be nesao, misoh e mikakao. Di, nggusil Pita xalu latbe vioh te Nim Eo na Hi. E inggak mun, moletin ak di mikakao, di butahut, e di memes Hi holu.^g

⁹ Melele xa moletin xil lapusi xa di mikakao e di memes Hi mak, ¹⁰ lapus

kila xa be ngan xa, vehakut, di tetotan sangas visal 'Puiteh xa Bos' te vioh te Nim Eo e di miram mi moletin xil ve mani. E xil vus iexil bon e latemanin ni naha xa mistal mini.^h

Pita misetu mi moletin xil e vioh te Nim Eo

¹¹ Melele xa moletin ak xa mei mikakao di tamu nggusil xat Pita xal Sion, moletin xil vus latemanin e di labesi xil holu. Ladi e rute tei e vioh te Nim Eo xa lakesi ni 'Veranda na **Solomon**.'ⁱ ¹² Melele xa Pita pus moletin xil ak, biteni mi xil bit, "?Tuxoli xil te hal **Isrel**, veneh ma di mumesep mak? ?Veneh ma di mule mah xat xamel mak? ?Munemi mubit moletin ak mikakao nggo xeihen namel tang? ?Mu munemi xa di mikakao vengon xa sexien namel momal pe met Hi? !E-e, tamak ti! ¹³ Hi vari tesak ni mei bos rilomun. Hi ak be Hi na **Ebrahim**, na **Aesak**, na **Siekob**, e na avu nar xil mun. Xi vari iaxa tepet rat his Iesu, moletin te polien nan, be nesao. E xamim, mutesi ni pe met Paelet e mutelingi tehe hen tangan vahasi vamat. Paelet ien tehei tangan vamaen ni ha ven vabase, e xamim mutamaen ni ti.^j ¹⁴ Xi xa be moletin eo xa momal tevi pe met Hi, xamim iaxa mutesi ni. Di, mutesis Paelet tangan vamaen moletin tei xa tehas vin moletin mi xamim.^k ¹⁵ Xamim iaxa mutesak ni latehas vin ngan xa be Vatit Meulien. E Hi tesak ni temeul rilomun ra maten. Xamel matepusi, e taxeak di malsep mesen ni mi xamim.^l ¹⁶ Xeihen xa di e his Iesu iaxa tesak ni

^a2:46 Luk 24:53; Pol 2:42 ^b2:47 Pol 2:41; 4:4; 5:14; 6:7; 11:21,24; 21:20

^c3:1 Pol 10:3,9,30 ^d3:2 Sion 9:1; Pol 14:8 ^e3:4 Pol 6:15; 13:9; 14:9; 23:1

^f3:6 Pol 3:16; 4:10; 16:8 ^g3:8 Pol 14:10; Sion 5:14 ^h3:10 Sion 9:8

ⁱ3:11 Sion 10:23; Pol 5:12 ^j3:13 Eks 3:6,15; Mat 22:32; Mak 12:26; Pol 7:32; Aes 52:13; Sion 13:32; Luk 23:14-23; Sion 18:38-40; 19:12-15 ^k3:14 Mat 27:20-21;

Mak 15:7,11-12 ^l3:15 Pol 4:10; 5:30; Luk 24:48; Pol 1:8; 2:32

le moletin ak mei bos. Naha xa mupusi mistal xiak, mistal vengam xa moletin ak teling neketen nan de his Iesu Kristo. E ve rin ak xi dat bos tang pe metemim xosali.

¹⁷ “Tua navan xil, nakila xa naha xa xamim tetel vat namim xil mutepol ni mi Iesu, mutepol ni vengam xa mutnakil ti.^m ¹⁸E suse ak, Hi tepol ni lingxatien nan mei testal tehe reitin. Vengam xa tetiamu, Hi tehit lelen ni texo **provet** xil xa Mesaea nan mei ilong pangas xi.ⁿ ¹⁹Mak, ma mulonge isa ve **tesaen** namim xil e muhiles sexien namim xil. Mumei visal Hi tangan iketeh ihos rilomun mi xamim,^o ²⁰isak ni sien iti e meulien namim, e isa rilomun ni Iesu, Mesaea xa xi tehosei, tangan mei iteh meulien e xamim. ²¹E Iesu itat e ut nesao iha vuma ... imal ni melengien xa holesok xil vus mei ituxoh hoxalite teni e Hi isak ni mei ihe neta hu. Ixoni naha xa Hi tehit lelen ni tetiamu texo provet eo nan xil. ²²Ixoni ngan xa **Mosis** tehiteni tehit, ‘Hi, *Suv namim, ipet rat tei e xamim tangan mei ihe provet tei ixoni nou. Muteong xat holesok xil ngasen xa xi ihiteni mi xamim.* ²³E xosxa ti e xamim linateong xat provet ak ti, ma Hi isil rerat xil ra vanut moletin nan xil e ihas xil lilel.” (Dut 18:15,18,19)^p

²⁴E Pita biteni mun mi xil bit, “Reitin mak, provet **Samuel** del provet xil xa latemei tetutou ni, xil vus latehit lelen holesok xil xa di mistal taxeak.^q ²⁵Xir del provet xil ak, rabe mol-Isrel xil. Misak ni, **hitxatien te xeih** xa Hi tepol ni tetel xil be nar vus. Nggoni ngan xa Hi tehit xati mi Ebrahim tehit, ‘*Vatimol nam xil lihe suse te tuxolxatien navan iha mi vanut mo-*

letin xil vus te ut etan.’ (Sen 22:18)^r ²⁶Mak, ma melele xa Hi tesa moletin te polien nan temei, tesa ni mi xir tetiamu. Xi ien tehei tangan vatuxol xat xir vaxo sexien xa isak ni xir rihiles ra sexien tesa nar xil.”^s

Pita xal Sion lusoh pe met vat xil te Kaonsel na Siu xil

4 Melele xa Pita xal Sion di tamu lusepin mi moletin xil, rut **pris** xil mei lastal del mereteketeh xil te **Nim Eo** del **Satusi** xil mun.^t ²Iexil mikat vengam xa eloheoh xalu ak di lupispisi mi moletin xil xa Iesu temea rilomun ra maten, e, ve rin ak, be reitin xa xil mun lik-ila limea rilomun ra maten.^u ³Ma xil ladal xat xalu e laling xalu e nim te xeih ba duxoh melengien sav vengam xa be mahis ngamu.^v ⁴E moletin holu xa lalong sepinien nalu lake reitin en. Misak ni, ngan xil xa laling neketen nae e Iesu sangas laduxoh taosen lim (5000).^w

⁵E makoe nen, vat xil na Siu xil, elda xil, del **titsa** xil te rae na Mosis lamei vituei e kaonsel na Siu xil e hal **Serusalem**. ⁶Xil ladotan del Anas xa be **vatixar na pris xil**, e ngan xil mun xa lastal langgo vatimol na vatixar na pris xil xa Kaeafas, Sion, e Aleksanda latbe tol e xil. ⁷Melele xa xil vus ladotan, ladel Pita xal Sion mei lusoh pe metexil. E lasis xalu labit, “?Neta xa xamil mupol ni, munggur xeihen teni nggo xave? ?Mutepol ni netak e his visi?”^x

⁸E xeihen na **Ninin Eo** mei polu e Pita, ma bit rilomun ni mi xil bit, “Vat xil e elda xil na Siu xil,^y ⁹xosali, mudel xamel tangan musis xamel usil sexien hos xa

^m3:17 Luk 23:34; 1Tim 1:13 ⁿ3:18 Luk 24:27,44,46 ^o3:19 Pol 2:38

^p3:23 Lev 23:29; Pol 7:37 ^q3:24 Luk 24:27 ^r3:25 Sen 26:4; 12:3; 12:3; 18:18;

Kal 3:8 ^s3:26 Pol 13:46; Rom 1:16 ^t4:1 Mat 22:23; Mak 12:18; Luk 20:27; Pol

23:8 ^u4:2 Pol 4:33; 17:18; 26:23 ^v4:3 Pol 5:18; 3:1 ^w4:4 Pol 2:41,47; 5:14;

6:7; 11:21,24; 21:20 ^x4:7 Mat 21:23; Mak 11:28; Luk 20:2

^y4:8 Mat 10:19-20; Mak 13:11; Luk 12:11-12; Pol 6:3,5; 7:55; 9:17; 11:24; 13:9

mapol ni mi moletin xa len tesa. Mu-bit mukil ti xa xi bemei bos nggo sexien eah.¹⁰ Mak, ma malisep kila mi xamim e mi mol-Isrel xil vus xa le moletin ak bemei bos e xi di misoh pe metemim xosali nggo xeihen xa di e his Iesu Kristo te hal Nasaret. Ngan ak tehe Iesu taxa xamim muteti xati e eivave e temat. Ngan xa Hi tesak ni temea rilomun ra maten.^z

¹¹ Vanuvei Eo na Hi tesep usil Iesu tehit, *'Pos xa moletin te polien xil di lasin ni, xi vari taxa mei be seteman xati te nim e mili sen pos nen xil vus.'* (Sam 118:22-23)^a

¹² Iesu kestang mikila iteh meulien e xir. Vengan xa e ut etan, his moletin sav tovuol mun xa Hi tesa ni tangan vateh meulien e xir."^b

¹³ Melele xa vat xil te kaonsel lalong sepinien hos na Pita xal Sion, latemanin ni xalu. Vengan xa, tave ti neta xa lutasukul kuhi ti, lapusi xa ulikanen tovuol e xalu. E lapus kila xa xalu di lutehusil xat Iesu.¹⁴ E melele xa lapus moletin xa len mei bos di tamu misoh e rin nalu, lasakras laso sepinien tova vaha xat xalu.¹⁵ Ma xil lasil rerat xatel latbe hale vuteili. Melele xa latoba, xil lasep tetavoe mi xil mun tang usil rin natel^c
¹⁶ labit, "Ripol ni itep mi xalu? Moletin xil vus te hal Serusalem lakila xa xalu ak lutepol ni merekel tei xa eilep pupu. Rasakras raviteni ravit tave reitin ti.^d
¹⁷ Xosxa rihit moletin xil linalongeong ti mun usil merekel ak, momal tangan rike xat xalu tangan lalnasepin ti mun mi moletin xil usil Iesu."^e

¹⁸ Di, lakes rilomun ni xalu lumei nim, e lake xat xalu nggeih tangan lalnasepin ti e lalnaspisi ti mun mi moletin xil usil Iesu.¹⁹ E Pita xal Sion lubit rilo-

mun ni mi xil lubit, "Xamim mulepis rin namel. ?Momal mak mu tangan xamel ti maliteong xat xamim, mu maliteong xat Hi? ?Munemi midep?^f ²⁰ Vengan xa xamel masakras malhit malnasepin ti usil naha xa matepusi e matelonge usil Iesu."²¹ Ma vat xil te kaonsel lake xat xalu nggeih rilomun e lamaen xalu ba vexalu mase. Lamaen xalu luba vengan xa lasakras lasa pangasien mi xalu venggan xa moletin xil vus di lapet rat his Hi ve naha xa testal.²² Moletin xil lakila xa naha xa testal be merekel tei venggan moletin xa len mei tehos, haram nan mili haram hanutap lu (40).

Moletin xil xa laling neketen nae e Iesu lasis Hi tangan valeh rerat ulikanen vahe reling xil

²³ Melele xa vat xil te kaonsel lamaen Pita xal Sion ba vexalu mase, ludilomun ba lupus timue nalu xil xa laling neketen nae e Iesu. E melele xa lupus xil, lubit mesen sepinien xil vus mi xil xa vat xil na pris xil, del elda xil latehiteni mi xalu.
²⁴ E melele xa lalonge, xil vus lasis vituei ba mi Hi labit, "Hi Suv, xouk otepol ni ut nesao, ut etan, tas, e holesok xil vus xa ladi en.^g ²⁵ Nggo xeihen te Ninin Eo, xouk otesepin texo avu namem *Deved* xa tehe moletin te polien nam otehit, *'Veneh ma ngan xil xa latave Siu ti di iexil mikat?*

?Moletin xil di lapol ni lingxatien xil xa mei be neta sav tang veneh?

²⁶ *Suv toto xil te ut etan di labue xat xil ve vaeen,*

e vat xil lamei vituei tangan lavae vatel Hi Suv e vatel Mesaea nan xa xi tehosei.' (Sam 2:1-2)

^z4:10 Pol 3:6; 2:36; 5:30; 10:39; 2:24,32; 3:15; 5:30; 10:40; 13:30; 17:31

^a4:11 Mat 21:42; Mak 12:10; Luk 20:17; 1Pit 2:4,7 ^b4:12 Mat 1:21

^c4:15 Pol 5:34-35 ^d4:16 Sion 11:47 ^e4:17 Pol 5:28 ^f4:19 Pol 5:29

^g4:24 Eks 20:11; Sam 146:6

²⁷ Reitin mak, suv toto **Herod** e Pontias Paelet mei lutevituei e Serusalem tetel Siu xil e ngan xil xa latave Siu ti tangan lavae vatel Iesu, xa be moletin eo te polien nam.^h ²⁸ Naha xa latepol ni mi Iesu tehusil naha xa xouk oteeling xati tuei texo xeihen nam tangan mei instal.ⁱ ²⁹ Hi Suv, taxeak, uteong kuhi ni sepinien te xeih xil xa di laso ni ba xat rin namem, moletin te polien nam xil. Uhur rat ulikanen ihe reling xamem tangan mukila muhithiten sepinien nam itel xeihen.^j ³⁰ Usa xeihen nam mi xamem li tangan mukila mutal rerat mesien ra ngan xil xa lamesei, e mupol ni merekel e holesok sav xil xa tellep ixo his Iesu xa be moletin eo te polien nam.”

³¹ Melele xa lasis bus, nim xa ladi en mulul. E xil vus mei lapolu ni Ninin Eo, e ulixil takan ti mun. Ma ba di lasetu ni sepinien na Hi del xeihen.^k

Sexien hos na moletin xil xa laling neketen nae e Iesu

³² Vanut moletin xil xa laling neketen nae e Iesu, ladi vituei bos e nenemien nae be tei takes. Tovuol e xil vahe hokan ni neta ngan, xil vus lamaen holesok nae xil tangan latutou ni mosav xil ni.^l ³³ Del xeihen na Ninin Eo, **eloheoh** xil di labit usil mea rilomunen na Iesu. E Hi di duxol xat holesok xil vus xa di lapol ni.^m ³⁴ Xil latave tamure ni ti neta, vengan xa vatei nga, ngan xil xa tan nae mu nim mae di, lapos ni. Di, langgur mani nenⁿ ³⁵ e lasa ni ba ni eloheoh xil. Di, laseti mani xil ak tangan vatutou ni ngan xil xa holesok nae tovuol.

³⁶ E melele nen ak, moletin tei teta, hisen Siosep te hal Saepras. Xi nggo vati-mol na **Livae**. Ve sexien hos nan, eloheoh xil laling hisen teimum nan be ‘Banabas’

xa koute teni be ‘moletin xa di pet rat nenemien na mosav xil.’ ³⁷ E melele nen tak, xi pos ni tan tei nan e misa **mani** nen ba ni eloheoh xil.

Hi bas vin Ananaeas xal Savira ve luvosen nalu

5 E melele nen ak, moletin teimum di mos e xil, hisen Ananaeas. E xi del atou nan xa hisen Savira lupos ni rut tan tei nalu. ² E xalu lupol ni lingxatien tei nalu xa lalkixat xat rut mani nen ihe nalu. Di, Ananaeas mileh rut mani tang e ba misa ni mi **eloheoh** xil bit, “Xamel mapos ni rut tan namel e mani xil vus teni xiak.”^o

³ Di, Pita biteni mini bit, “?Ananaeas, veneh ma otemaen **Temat** mei tepurun nenemien nam? ?Veneh ma obit oluvos **Ninin Eo** melele xa otepos ni rut tan nam e otekixat xat rut mani teni be nam?^p ⁴ Tetiamu, tan ak tehe nam. E melele xa otepos ni, mani xil vus nen be nam. ?Misak ni, veneh ma obit opol ni vamak? !Luvosen xa di opol ni xiak, otapol ni ti vaha xat xamem tang, e di opol ni ba xat Hi vari!” ⁵ Melele xa Ananaeas milonge mak, vatei takes, mot e mat. Moletin xil vus xa lalongeong ni, le mulul holu ven.^q ⁶ Di, rut horam maxoe xil lamei nim e lapis xol tiei nan. Di, lapoe ba, ladihin ni.

⁷ Haoa tol mei mitavi, e atou nan be-mei nim. E xi takil ti vari xa tiramue nan mat. ⁸ E Pita misisi bit, “?Hit kuhi mu minou, ngan ak be mani xil vus xa xamil tiramue nam mutehuri e tan xa mutepos ni?”

Atou ak bit rilomun ni mini bit, “Io, xil vus iaxai.”

⁹ Ma Pita biteni mini bit, “?Veneh ma xouk del tiramue nam mubit mulosak pis

^h4:27 Pol 3:13; Aes 61:1 ⁱ4:28 Pol 2:23 ^j4:29 Efes 6:19 ^k4:31 Pol 2:4

^l4:32 Pol 2:44 ^m4:33 Pol 4:2; 2:47 ⁿ4:34 Pol 2:45 ^o5:2 Pol 4:34-35,37

^p5:3 Sion 13:2 ^q5:5 Pol 2:43; 5:11; 19:17

Ninin na Hi? ?Olonge? Ngan xil xa latetihin tiramue nam di lamei sangas, ladi ngamu e puiteh. E mei lipo tiei nam mun iha.^r ¹⁰ Vatakes, atou ak mun mot e mat sangas visal le Pita. E melele xa horam maxoe xil lamei nim, lakameti xa xi mun mat. Misak ni, lapoe ba e ladihin ni de ri tiramue nan. ¹¹ Ngan xil vus te sias te hal Serusalem, del mosav xil mun xa lalongeong ni naha xa mistal, ulixil mikan tova tang ven.^s

Eloheoh xil lapol ni merekel xil del sexien xil holu xa latellep

¹² E melele nen ak, eloheoh xil di lapol ni merekel xil del sexien xil holu xa tellep pe met moletin xil. Vehakut, ngan xil xa laneket e Iesu mei di labe vituei e rute tei e vioh te Nim Eo xa lakesi ni ‘Horao ma suv toto **Solomon**.^t ¹³ Neta sav xa moletin xil ngasen lamerere ni xil, moletin xil xa lataneket ti mu, uli mikan tengan lamei vituei vatel xil.^u ¹⁴ E Hi mileh moletin holu lamei e laneket e Iesu. Misak ni xil mei labe holu mu.^v ¹⁵ Ve polien xa eloheoh xil di lapol ni, moletin xil laleh ngan xil xa lamesei mei laling xil ladi suon mae e seri suse. Xil labit xosxa nini Pita tang ituxol xil melele xa ikakao imei, ma xil lilonge ihos.^w ¹⁶ E vanut moletin xil holu lamei langgo taon xil xa mikapis e **Serusalem**. Xil ladel ngan xil xa lamesei e ngan xil xa **ninin tesa** xil lapolu e xil. E xil vus mei lalonge bos rilomun.

Vat xil na Siu xil di lasa pangasien mi eloheoh xil

¹⁷ Di, **vatixar na pris xil** del **Satusi** xil lanem misa ni eloheoh xil e labit

lisa pangasien mi xil.^x ¹⁸ Misak ni, ladal xat xil e laso xil labe nim te xeih.^y ¹⁹ E vongien nen tak, **masxaxa** tei na Hi mei misah puiteh te nim te xeih e del xil lastal. Di, xi biteni mi xil bit,^z ²⁰ “Muha, musoh e vioh te **Nim Eo** na Hi. Musa sen sepinien xil ngasen usil meulien hu ak mi moletin xil.” ²¹ Ma eloheoh xil lalong xat sepinien nan, e melele xa ut da milan, xil labe vioh te Nim Eo na Hi e di lapispisi mi moletin xil.^a

E melele nen tak, vatixar na pris xil del vat sav xil lamei e lakes viton elda xil na Siu xil lamei vituei e totanen tei na Kaonsel nae. Di, lasil mereketeh xil labe nim te xeih tangan lileh eloheoh xil ak limei lisoh pe met xil. ²² E melele xa mereketeh xil labe nim te xeih, latapus ti xil. Ma ladilomun ba labit mesen ni mi vat xil te Kaonsel labit, ²³ “Melele xa mabe nim te xeih, mapusi xa puiteh mikoe nggeih tang, e mereketeh xil dit laketeh xole. !E melele xa masah puiteh mabe nim, matale xoteh ti moletin!” ²⁴ Melele xa vat xil na pris xil del vat na mereketeh xil te Nim Eo lalong sepinien ak, latakil ti naha xa nggul eloheoh xil.^b ²⁵ Di, moletin tei bemei visal xil e biteni bit, “!Muteong! !Moletin xil xa muteling xil e nim te xeih, taxeak, di lapispisi mi moletin xil e vioh te Nim Eo na Hi!” ²⁶ Ma vat na mereketeh xil del rut moletin nan xil ba laleh eloheoh xil labe von Kaonsel. Xil latapol ni ti vaxeih mi xil vengangan ulixil mikan xa moletin xil linahop vin xil.^c

²⁷ Laleh eloheoh xil lamei nim, e lapol ni xil lasoh pe met moletin xil te Kaonsel ak. Di, vatixar na pris xil misis xil bit, ²⁸ “Matesemae ni xamim texeih tengan

^f5:9 1Kor 10:9 ^g5:11 Pol 2:43; 5:5; 19:17

^h5:12 Pol 2:43; 6:8; 14:3; 15:12; Sion 10:23; Pol 3:11 ⁱ5:13 Pol 2:47

^j5:14 Pol 2:41,47; 4:4; 6:7; 11:21,24; 21:20 ^k5:15 Mak 6:56; Pol 19:11-12

^l5:17 Pol 4:1,6 ^m5:18 Pol 4:3 ⁿ5:19 Pol 12:7-10 ^o5:21 Pol 12:19 ^p5:24

Luk 22:4,52; Pol 4:1 ^q5:26 Mat 14:5; 21:26,46; Mak 11:32; 12:12; Luk 20:19

munapispisi ti mun usil his moletin ak. E xamim dit mupispisi ni ba tang. Ma tax-eak, Serusalem polu ni pispisien namim. !E mubit muling maten nan mun vata xat xamem!”^d

²⁹ E Pita del eloheoh xil labit rilomun ni mini labit, “!Xamem muteong xat Hi keatang, e nave moletin xil ti!”^e ³⁰ Hi na avu nar xil tepol ni Iesu temea rilomun ra maten, ngan xa xamim mutehas vini melele xa mutesak ni xil lateti xati e eivave.^f ³¹ E xi, Hi tepet rati ba de rin metu e misa xeihen mini tangan mei ihe Vat ni moletin xil vus e iteh meulien e xil. Mak, ma Hi di misa mesal mi mol-Isrel xil tangan lihiles ra *tesaen* nae e mei iketeh ihos rilomun mi xil.^g ³² Xamem iaxa di masep usil holesok xil ak, e Ninin Eo mun di pisen ni be reitin. Ninin Eo ak, Hi misa ni mi moletin xil xa di lalong xati.”^h

³³ Melele xa vat xil te Kaonsel lalong sepinien ak, iexil nggat pupu ni eloheoh xil e labit lavas vin xil.ⁱ ³⁴ E *Farasi* tei mitamea misoh, hisen Kameliel. Xi be titsa tei te rae na Mosis e moletin xil vus di lamerere ni. Xi misis vat te Kaonsel tangan vasil rerat eloheoh xil latalal vuteili mu.^j ³⁵ Di, biteni mi Kaonsel bit, “Tua navan xil te hal *Isrel*, mulaxat xamim ve naha xa mubit mupol ni mi moletin xil ak. ³⁶ ?Munem moletin tei xa hisen Teotas? Hiram vahis xa ba ngamu, xi testal e tevae tetel mol-Rom xil. Xi tehiteni tehtit xi be eilep tei, e moletin xil xa lamos en labe handred hat (400). E melele xa mol-Rom xil labas vin ni, moletin nan xil lateletasil, ma polien nan telel.^k ³⁷ Dutou ni ngan ak, Sudas

te hal Kaleli testal e melele xa kavmen tepol ni pupuluven te moletin xil. Xi teleh vanut moletin tei latehusili e xil mun latevae tetel mol-Rom xil. Xi mun labas vin ni, ma moletin nan xil xa lathusili lateletasil.^l ³⁸ Mak, ma e rin na moletin xil ak, inou nabiteni mi xamim mak: !Vat nae mat ngamu! !Munapol ni ti neta nasa mi xil! !Muling xil liti nga! Xosxa naha xa xil laling xati e lapol ni mistal nggo nenemien na moletin tang, ma mei ilel. ³⁹ E xosxa mistal nggo Hi, ma xamim musakras musikoe xil. Maxani, munatemanin ni xa di mubae mi Hi.”

Melele xa lalong sepinien nan, xil lamaal e nenemien nan. ⁴⁰ Di, lakes rilomun ni eloheoh xil lamei nim, e Lase-mae ni mereketeh nae xil tangan lameas pangas xil. Di, lake xat xil tangan linavit usil ti mun Iesu, e lamaen xil ba vexil mase.^m ⁴¹ Melele xa eloheoh xil labe reling Kaonsel, labesi pupu ni xil vengan lakila xa Hi di pet rat xil melele xa maen xil langgur pangasien ve his Iesu.ⁿ ⁴² E melengien xil ngasen, e vioh te Nim Eo e e tim sae xil mun, xil dit lapispisi e lasetu ni longeongen hos usil Iesu xa be Mesaea xa Hi tehosei.^o

Eloheoh xil labosei rut moletin xil te tutouen

6 E melengien xil ak, melele xa moletin xil xa laneket e Iesu mei labe holu mu, ngongoren tei mistal. Rut Siu xil xa lasepin ni sepinien *Krik* laseputut labit melele xa ngan xil xa lasepin ni sepinien Hibu di laseti anien ba mi hoeo xil, di latasa kuhi ti mi tunau xil xa di lasepin ni sepinien Krik.^p ² Ma eloheoh

^d5:28 Pol 4:18; Mat 27:25 ^e5:29 Pol 4:19

^f5:30 Pol 2:24,32; 3:15; 4:10; 13:30; 17:31; 2:23,36; 10:39 ^g5:31 Hib 2:10; Pol 2:33; Luk 24:47; Pol 2:38 ^h5:32 Luk 24:48; Sion 15:27; Pol 1:8; 2:32; 3:15; Sion 15:26 ⁱ5:33 Pol 7:54 ^j5:34 Pol 22:3; 4:15 ^k5:36 Pol 21:38

^l5:37 Luk 13:1-2 ^m5:40 Pol 4:18 ⁿ5:41 Mat 5:10-12; 1Pit 4:13

^o5:42 Pol 2:46; 17:13; 18:5,28 ^p6:1 Pol 2:45; 4:35

xil xa labe lu e le tei (12) lakes viton moletin xil vus xa laneket mei labe vituei. Di, labiteni mi xil labit, “Tamal ti tenggan xamem eloheoh xil maling polien namem xa di masa sepinien na Hi tenggan ti maseti anien xil ak.³ Tua xil, bos mak mu xa xamim muhosei moletin xil lihe lu he sav (7) xa nenesien namim di e xil, xa mupus kila labe metisou e lapolu ni xeihen na Ninin Eo. Ti, muling xil iaxa ti lilaxat polien ak.⁴ Imak, ma xamem mukila musa xamem tenggan ti musis e ti musetu ni sepinien na Hi mi xamim.”

⁵Ma vanut moletin xil lamaal pupu ve nenemien na eloheoh xil. Ma xil labosei Stivin xa neketen nan nggeih e polu ni xeihen na **Ninin Eo**. Labosei Pilip mun, del Prokorus, Nikanor, Timon, Parmenas, e Nikolaus. Nikolaus be ngan Kris tei te hal Antiok xa tehusil xat rae na Siu xil, e dutou sung mei miling neketen nan e Iesu.^r ⁶Di, ladel xil ba lasoh pe met **eloheoh** xil xa laling he e xil, e lasis Hi tenggan ituxol xat polien na moletin xil ak.^s

⁷Ma di, longeongen hos usil Iesu mikapis e rute xi vus e **Serusalem**, e moletin holu mun lamei laling neketen nae e Iesu. E **pris** xil holu mun laling neketen nae e Iesu e mei lamos e xil.^t

Vat xil na Siu xil ladal xat Stivin

⁸E melele nen ak, Hi di duxol xat Stivin e di misa xeihen mini. Misak ni xi di pol ni merekel xil e sexien xil holu xa tellep xa pol ni moletin xil di lamesep ven.^u ⁹E rut Siu xil mei langor mi Stivin. Ngan xil ak, langgo **'nim te pispisienna** ngan xil xa lameluv.^z Rute xil lastal

langgo taon te hal Saerin e taon te hal Aleksandria. E rute xil langgo provins xalu te hal Silisia e Esia.¹⁰ E melele xa xil langor del Stivin, Ninin Eo misa metisouen mini e lasakras lavit rilomun ni ti neta vaha xat sepinien nan xil.^v ¹¹Misak ni, xil langgal xuxus ni moletin tatei xil tenggan mei liluvos lihit, “!Xamem matelong moletin xai tesa sepinien tesa teha xat **Mosis** e teha xat Hi mun!”^w ¹²Sepinien nae misak ni moletin xil, elda xil, del **titsa** xil te rae na Mosis, nenenemien nae misa ni Stivin. Ma laba ladal xati e lalihi ba misoh pe met kaonsel na Siu xil.

¹³Di, lakes rut moletin xil tenggan limei liluvos iha xat rin na Stivin. E xil labiteni labit, “Vehakut, moletin ak di misepin misa ba xat Nim Eo nar e ba xat **rae xil na Mosis** mun.^x ¹⁴Xamem malonge xa xi di biteni xa Iesu te hal Nasaret mei ihu len Nim Eo na Hi e ihiles sexien xil xa Mosis tesa ni mi avu nar xil.”^y ¹⁵E ngan xil vus xa di ladotan e kaonsel ak lale mah xat Stivin. E latemanin xa valnaon di minehin nggoni valnao **masxaxa** tei.

Stivin misel xat vat xil te kaonsel na Siu xil

7 Di, **vatixar na pris xil** misis Stivin bit, “?Midep? ?Sepinien xil ak be reitin?”

²Stivin bit rilomun ni mi xil bit, “!Tata xil e tuxoli xil, muteong ni nou! Teti-amu, melele xa avu nar **Ebrahim** tenava ti mu tenggan vate taon te hal Heran, Hi te minehinen testal mini e kantri te hal Mesopotemia.^z ³E Hi tehiteni mini

^z**6:9** Lakesi ni mak venggan xa, tetiamu, holu e avu nae xil latehe slev na mol-Rom xil, e tetutou, vexil latemase e lateha latemeluv.

^q**6:3** Pol 10:22; 16:2; 22:12; 1Tim 3:7; 3Sion 1:12; Pol 6:10

^r**6:5** Pol 11:24 ^s**6:6** Pol 1:24; 13:3; 14:23 ^t**6:7** Pol 12:24; 19:20; 2:41,47; 4:4; 5:14; 11:21,24; 16:5; 21:20 ^u**6:8** Pol 2:43; 5:12; 14:3; 15:12

^v**6:10** Luk 21:15; Pol 6:3 ^w**6:11** Mat 26:59-61; Mak 14:55-58

^x**6:13** Ser 26:11 ^y**6:14** Pol 21:21 ^z**7:2** Pol 22:1; Sam 29:3; Sen 11:31-12:1

tehit, *'Umea uhe reling kantri nam itel vatimol nam xil, e ha uhe ut tei xa inou nipisen ni minuk.'* (Sen 12:1)⁴ Ma avu Ebrahim tehe reling kantri xa teta en xa be na mol-Kaltia xil, e xi tehe taon te hal Heran e ba tehe sangas visali. E dutou ni ngan xa tamen temat, Hi tesila mei tete kantri ak xa xamim, Siu xil, mudi en taxeak.^a ⁵E Hi tenasa ti tan ak mini. Reitin, tenasa ti mavulut tan mini xa vahit vahe nan xati. E Hi tehit xati xa isa ni mi vatimol nan xil xa, itutou, listal lixo en tangan mei ihe tan nae xati. Hi tepol ni hitxatien ak tetel Ebrahim, neta sav xa horamue nan tehe tovuol tamu.^b

⁶“Ngan ak tehe naha xa Hi tehiteni mini tehit, *'Vatimol nam xil lihe kantri na mosav xil e liti e tan sa moletin xil teni. Lihe slev xil na moletin xil te rute ak xa ti lisak purun xil huram ihe handred hat (400).* ⁷*Itutou ni, inou nilepis rin na moletin xil ak e nisa pangasien mi xil. Ti, vatimol nam xil limea ra rute xa latehe slev xil en, e liti-limun mei limot minou inggak.'* (Sen 15:13-14)^c ⁸Di, Hi tesa sexien te **vexahu** mi Ebrahim tangan vapisen ni xa xi del vatimol nan xil labe moletin xil na Hi. Vi rin ak, melele xa latepes **Aesak** e melengien nan tehe tol e he sav (8) xati, Ebrahim tepol ni tehe vexahu. E Aesak mun tepol ni **Siekob** tehe vexahu, e Siekob tepol ni natneli lu e le tei (12) latehe vexahu. Ngan xil ak iaxa latehe avu nar xil.^d

⁹“E avu nar xil ak xa latehe nat Siekob xil iexil teat Siosepe xa tehe tua nae. Ma latepes ni teha tehe slev tei e kantri te hal **Isip**. E Hi teti mini^e ¹⁰e tesikoe xol

meulien nan ra sakpurunien xil xa tehisu ni. E melele xa Siosepe tesoh pe met suv toto te hal Isip, Hi tesa metisouen mini e tesak ni suv toto ak tehesi xi pupu ven e tehosei Siosepe tangan ilaxat kantri nan itel holesok xil vus xa teti e nim man mun.^f ¹¹Di, melele te mae kekatena tei xa eilep mei tekapis e kantri xalu te hal Isip tetel **Kenan**, e tesak ni moletin xil ngasen lalong pangas xil holu. E avu nar xil teti-amu mun lasakras lakamet anien tova.^g ¹²E melele xa Siekob telongeong ni xa anien teti e kantri te hal Isip, tesil natneli xil xa labe avu nar xil lateha. Ngan ak tehe kakaoen kokot nae xa latehe Isip.^h ¹³Di, e kakaoen nae xa tehe valu nen xa latehe Isip, Siosepe tehit kil xi mi tuneli xil, e suv toto te hal Isip tepus kil vatimol xil na Siosepe.ⁱ ¹⁴Ma Siosepe tesa sepinien teha mi tamen xa Siekob, tetel vatimol nan xil vus xa latehe hanutap tol e lim e le tei mun (75) tangan limei liti visali e Isip.^j ¹⁵Misak ni, avu Siekob tehe kantri te hal Isip e teta en teha vuma ... temat, xi tetel vatit avu nar xil vus.^k ¹⁶E tetutou sung, lateleh rilomun ni tiei nae xil latehe taon te hal Sekem, e latetihin xil e von tehinen xa Ebrahim texal rati ra vatimol xil na Hamor ni mani tei.^l

¹⁷“Huram holu mei tetavi, e Siu xil xa lateti Isip mei latehe holu. E Hi tepusi xa be sangas ni melele xa xi teling xati tangan isak ni hitxatien nan xa tepol ni tetel Ebrahim mei vastal vahe reitin.^m ¹⁸E melele nen ak, suv toto teimun xa takil ti Siosepe e naha xa tepol ni temeji telaxat kantri te hal Isip. ¹⁹Suv toto ak tepol ni tesa mi Siu xil xa latexo avu nar

^a7:4 Sen 11:31–12:1,5; Pol 15:7

^b7:5 Dut 2:5; Sen 12:7; 13:15; 15:2,18; 17:8; 24:7; 48:4; 16:1 ^c7:7 Eks 3:12

^d7:8 Sen 17:10-14; 21:4 ^e7:9 Sen 37:11; 37:28; 45:4; 39:2-3,21-23

^f7:10 Sen 41:37-39; 41:40-44; Sam 105:21

^g7:11 Sen 41:54; 42:5 ^h7:12 Sen 42:1-2 ⁱ7:13 Sen 45:3-4; 45:16 ^j7:14 Sen 45:9-11,18-19; 46:27; Eks 1:5; Dut 10:22

^k7:15 Sen 46:5-6; 49:33; Eks 1:6

^l7:16 Sen 23:2-20; 33:19; 49:29-30; 50:7-13; Sos 24:32 ^m7:17 Eks 1:7-8

xil e tesak purun xil. Xi texeih xat xil tangan listokovein tuvava hu nae xil liti nga hale tangan lilel.ⁿ ²⁰ **Mosis**, latepesi e melele nen ak vari. E xi tehe tuvava tehos tei pe met Hi. E tamen xal ninen lutelaxati e tim aveti tol (3).^o ²¹ E melele xa lutelingi tete hale, atuli na suv toto te hal Isip tekameti e telaxati texoni natneli xati.^p ²² Misak ni, latepispisi mini ni kilakilen xil vus te hal **Isip**. E xi mei tesepin e tepol tetel xeihen.

²³ “Melele xa haram na Mosis tetuxoh hanutap lu (40), tepol ni nenemien nan tangan vakil ti moletin nan xil xati, mol-Isrel xil, ma teha tesao ni xil.^q ²⁴ E melele xa tepus ngan Isip tei xa di tehas purun ngan Isrel tei, Mosis teha tetutou ni. Ma xi tesa xoles sakpurunien teha mi ngan Isip ak, e tehasi temat. ²⁵ Xi tenemi tehit mol-Isrel xil xa latehe vatimol nan xati lile kila xa Hi di miteh meulien e xil nggo hen, e xil latnale kil ti.

²⁶ “E melengien sav nen, Mosis tepus ngan Isrel lu xa di lutevae mi xalu mun tang. Ma xi teha tangan vamal ni rin nalu tehit, ‘!Ei, xamil, muliteong ni nou! Xamil vus mube ngan Isrel tang. ?Ma di mubae mi xamil veneh?’”

²⁷ “E ngan xa di tehas purun tuneli tetivin rat Mosis tehe rin e tesisi texeih tehit, ‘?Visi vari milinguk tangan mei ove vat namem e ti olepis rin namem?’^s ²⁸ ?Obit ovas inou mun vaxoni ngan taxa otehas vin ngan Isip nanganoh?’ ²⁹ Melele xa Mosis telonge temak, ulin tekan holu, ma telesae tehe reling kantri te hal Isip, e tete sotin e teta tete tan na mol-Midia xil. E rute ak, tehur atou tei xa teling natneli lu.^t

³⁰ “Mosis tete rute ak haram hanutap lu (40). Di, melele xa Mosis tehe rute tei xa be uruvuol, sangas visal **Vathu Senae, maxxaxa** tei mei testal mini texoni upang xa tepili e holiei tei.^u ³¹ Melele xa Mosis tepusi, temesep pupu e telis tehe sangas visali tangan vale kuhu. E melele xa temeji sangas, telong rae na Hi Suv xa tehiteni mini tehit, ³² ‘*Inou nabe Hi na avu nam xil: na Ebrahim, na Aesak, e na Siekob.*’ (Eks 3:6) Melele xa telonge temak, Mosis temalili pupu e ulin tekan tangan vaketeh. ³³ E Hi Suv tehiteni mini tehit, ‘*Usil rat sandel nam vengan xa tan xa di osoh en be ut eo.*’ ³⁴ *Inou natepus kil longpangasien xil xa moletin navan xil xa di langguri e hal Isip, e natelong tangen nae. Misak ni, namei etan tangan niteh meulien e xil. Amei, inou nilalak utilomun uhe Isip.*’ (Eks 3:5,7-8,10)

³⁵ “Ngan ak tehe Mosis nen tak xa mol-Isrel xil latesin ni melele xa latesisi latehit, ‘?Visi vari milinguk tangan mei ove vat namem e ti olepis rin namem?’ (Eks 2:14) E maxxaxa xa testal mini texo upang xa pili e holiei tei tehiteni tehit Hi di tesil Mosis ha ihe vat na mol-Isrel xil tangan ilaxat xil e isak ni ha vexil imase e limeluv liha. ³⁶ Melele xa xi teleh rerat mol-Isrel xil ra hal Isip, Mosis tepol ni merekel xil e sexien xil xa tellep e Isip, e Tas Tepili, e, e uruvuol xa lateti en haram hanutap lu (40).^v ³⁷ Mosis nen tak tehiteni mi mol-Isrel xil tehit, ‘*Hi isa provet tei xa ixoni nou xa istal ixo xamim tang.*’ (Dut 18:15)^w ³⁸ Mosis ak be ngan taxa teti tetel mol-Isrel xil e melele xa lateti e uruvuol. Xi teti tetel avu nar xil tetiamu, melele xa maxxaxa tei tesepin

^{¶7:19} Eks 1:10-11; 1:22 ^{¶7:20} Eks 2:2; Hib 11:23 ^{¶7:21} Eks 2:3-10

^{¶7:23} Eks 2:11-12 ^{¶7:26} Eks 2:13-14 ^{¶7:27} Luk 12:14

^{¶7:29} Eks 2:15; 2:21-22; 18:3-4 ^{¶7:30} Eks 3:2-3

^{¶7:36} Eks 7:3; 14:21; Nam 14:33 ^{¶7:37} Pol 3:22

tetela e Vathu Senae. E xi tehur sepinien te meulien texo Hi e tesa ni mi xir.^x

³⁹“E avu nar xil latehit linalong xat ti sepinien na Mosis. Xil latesin ni e latepol ni nenemien nae latehit litilomun lihe Isip.^y ⁴⁰Ma latehiteni mi **Eron** latehit, ‘Pol ni hi sav xil ihe namem tangan ti liti-*amu ni xamem, vengan xa matakil ti naha xa nggul Mosis xai xa teleh rerat xir ra hal Isip.*’ (Eks 32:1,23) ⁴¹Ma e melele nen ak, latepol ni nanao tei xa tehur nini buluk. Di, latemot mini e latehas vongoro tei tehe sanien eo nae mini. Di, latepol ni anien tei xa eilep e lateanien ve nanao xa latepol xati ni hexil tang.^z ⁴²Ma Hi tekavitou ni xil e temaen xil latemot mi hitu xil.^a Ngan ak nggoni ngan taxa Hi tehit usili e tisen tei na provet xil tehit, ‘Mol-Isrel xil, melele xa muteti e uruvuol hura^m hanutap lu (40), mutnavas ti vongoro tangan vahe sanien eo namim minou.

⁴³E mutetamea sung, mutepo xat nim tavolin na hi Molek, e muteleh xat nanao na hi Revan xa tehur nini hitu xil.

Xamim mutepol ni nanao xalu ak tangan ti mumot mi xalu.

Misak ni, inou nisil rerat xamim muha muhe slev xil e rute xil xa lihe sotin pupu ha ili hal Babilon.” (Amos 5:25-27)

⁴⁴Stivin biteni mun mi xil bit, “Avu nar xil latemot mi Hi e nim tavolin melele xa lateti tamu e uruvuol. Nim tavolin ak, latepol ni tehusil xat naha xa Hi tehiteni e tepisen ni mi Mosis.^b ⁴⁵Tetutou ni sung, moletin xil ak latesa ni teha mi avu nar xil, e xil latepo xat

nim tavolin ak melele xa latehusil Sosua ba latehur tan na vanut moletin xil xa Hi tehol rerat xil ra rute ak. E nim tavolin ak tetak ba tetuxoh melele xa **Deved** mei tehe suv toto.^c ⁴⁶Hi tehesi xi ve Deved xa tesis tangan vamaen ni vapet kuh nim hos tova vahe na Hi, xi xa be Hi na Siekob. E Hi tamaen ni ti.^d ⁴⁷E tehe **Solomon** sung iaxa tehil nim na Hi.^e ⁴⁸E Hi te ut nesao misakras vate nim xa moletin tang pol ni. Ngan ak nggoni ngan taxa Hi tehit lelen ni texo provet Aesae tehit,

⁴⁹‘Inou nade von xeihen navan e ut nesao e di nalaxat kuh holesok xil en e ut etan be rute xa di naling leok di en. ?Hisit nim eah iaxa mukila muhili ihe mavan?

Musakras muvil nim tova xa vapin tangan mei nangel en.

⁵⁰Holesok xil ngasen xa di e ut nesao e ut etan,

inou tang natepol ni.” (Aes 66:1-2)

⁵¹Di, Stivin misepin nggeih mi vat xil na Siu xil bit, “!Vatumim nggeih tova tang, e vurangemim bon ni sepinien na Hi! !Vehakut, holesok xil xa di mupol ni nggoni ngan xil xa latakil ti Hi! !Xamim munggoni avu namim xil tang, xa vehakut di latesin holesok xil xa **Ninin Eo** tepol ni!^f ⁵²Vengan xa avu namim xil iaxa latesak purun provet xil vus. Teti-*amu, xil latehas vin ngan xil xa latehit lelen ni usil meien na Moletin te Moma-
len na Hi. E taxeak, be xamim vari tang iaxa musa rati be he ngan xil xa latehas vini. Ven rin ak, ren di xat hemim.*^g ⁵³Be xamim iaxa mutehur xat **rae xil na Hi** xa masxaxa xil latesa ni temei mi avu

^{37:38} Pol 7:53; Eks 19:1-6; 20:1-17; Dut 5:4-22; 9:10 ^{37:39} Nam 14:3

^{37:41} Eks 32:1-35 ^{37:42} Ser 7:18; 8:2; 19:13 ^{37:44} Eks 27:21; Nam 1:50; Eks 25:9,40 ^{37:45} Sos 3:14-17; 18:1; 23:9; 24:18

^{37:46} 2Saml 7:2-16; 1King 8:17-18; 1Kron 17:1-14; 2Kron 6:7-8; Sam 132:1-5

^{37:47} 1King 6:1,14; 8:19-20; 2Kron 3:1; 5:1; 6:2,10 ^{37:51} Eks 32:9; 33:3,5; Lev 26:41; Ser 9:26; 6:10; Aes 63:10 ^{37:52} 2Kron 36:16; Mat 23:31

namim xil. !E neta sav xa mak, xamim mutalong xati ti!"^h

Siu xil langgov vin Stivin

⁵⁴ Melele xa vat xil te kaonsel na Siu xil lalong sepinien na Stivin, iexil mikat pupu e mete pili xati.ⁱ ⁵⁵ E xeihen na Ninin Eo mei polu e Stivin, e xi miketeh momal be ut nesao. Melele xa miketeh nesao, pus minehinen te xeihen na Hi e pus Iesu di misoh de rin metu.^j ⁵⁶ Ma xi biteni mi xil bit, "Mupusi? !Napus tilang hat di masel e Nat Hi di misoh de ri metu na Hi!"^k

⁵⁷ Melele xa vat xil te kaonsel lalong sepinien ak na Stivin, laki xol vurange, lakei nggeih, e xil vus laloh laba latal xati. ⁵⁸ Di, lakuvun rati be hale ra taon, e ngan xil xa lateso sepinien teha xat rin nan e kaonsel lamei tangan lihov kokot ni. Ma laling kot xil nae teti e he tiram maxoe tei, hisen Sol. Di, xil del moletin sav xil mun langgove.^l ⁵⁹ E melele xa di langgov Stivin, xi miki be nesao bit, "!Suv Iesu, uhur pilei ninin navan ihat visaluk!"^m ⁶⁰ Di, mitingeiril etan e miki nggeih bit, "!O Suv li, onaketeh ti nasa naha xat moletin xil ak ve *tesaen* xil xa di lapol ni xiak!" Stivin biteni mak, di, mat.ⁿ

8¹⁻² Melele xa Stivin mat, rut moletin xa neketen nae nggeih e Hi laba lapo tiei nan e ba ladihin ni. Xil ladang nggeih ve maten nan. E moletin tei da xa minem bit momal xa latehas vin Stivin temak, hisen Sol.^o

Sol misak purun ngan xil xa laling neketen nae e Iesu

E melele nen ak vari, sakkpurunien tei xa eilep mistal nggo he Siu xil ba xat ngan xil te sias te hal *Serusalem*. Misak ni, holu e ngan xil xa laling neketen nae e Iesu lalesae labe reling taon te hal Serusalem e labe rute sav xil e provins xalu te hal Sudea e *Sameria*.^p E *eloheoh* xil na Iesu latnalesae ti, xil ladi kat e hal Serusalem.

³ E Sol misa xi tangan ihu lelen sias na Iesu Kristo, ma ba misak purun ngan xil xa laling neketen nae e Iesu. Xi be vangit nim xil vus, tei bus teimun. E di dal xat tiramue e atou xil vus xa laling neketen nae e Iesu. E melele xa dal xat xil, ba miso xil labe nim te xeih.^q

Pilip bithiten longeongen hos usil Iesu mi mol-Sameria xil

⁴ Melele xa moletin xil xa laling neketen nae e Iesu latelesae ra hal Serusalem, xil labe ut xil ngasen. E, e rute xil vus xa laba en, di labithiten longeongen hos usil Iesu mi moletin xil.^f

⁵ Tei e xil xa laling neketen nae e Iesu tehe taon tei xa eilep e provins te hal Sameria, his moletin ak be Pilip. E ba bithiteni mi moletin xil te rute ak xa Iesu iaxa be Mesaea xa Hi tehiti xati tehiti isa ni imei. ⁶ E melele xa vanut moletin xil te rute ak lalong sepinien na Pilip e lapus holesok xil xa tellep xa di tepol ni, xil vus lateong kuhi ni holesok xil vus xa biteni. ⁷ Xil lapusi xa tehol rerat *ninin tesa* xil

^h7:53 Pol 7:38; Kal 3:19; Hib 2:2

ⁱ7:54 Pol 5:33; Siob 16:9; Sam 35:16; 37:12; 112:10

^j7:55 Pol 4:8; 6:3,5; 9:17; 11:24; 13:9; Mat 22:44; 26:64; Mak 12:36; 14:62; 16:19; Luk 20:42; 22:69; Pol 2:34; Rom 8:34; Efes 1:20; Kol 3:1; Hib 1:3,13; 8:1; 10:12; 12:2; 1Pit 3:22 ^k7:56 Mat 3:16; Luk 3:21; Sion 1:51; Pol 10:11; Rev 19:11

^l7:58 Pol 22:20 ^m7:59 Sam 31:5; Luk 23:46

ⁿ7:60 Mat 27:46,50; Mak 15:34; Luk 23:46; 23:34 ^o8:1-2 Pol 7:58; 22:20

^p8:1-2 Pol 8:4; 11:19 ^q8:3 Pol 9:1,13; 22:4; 26:9-11 ^r8:4 Pol 8:1; 11:19

ra moletin xil holu xa latehe reling moletin xil holu tetel tangen xil xa nggeih. E moletin xil holu xa rut tenbexil temat mu latsakras lakakao, xil vus mei labos rilomun.^s ⁸ Misak ni, moletin xil vus te rute ak labesi pupu ni xil.

⁹ E taon ak, moletin tei da en xa di tesak ni mol-Sameria xil latemesep ve vongou xil xa di tepol ni, hisen Saemon. E pe met moletin xil, x di po xi bit be eilep tei xa nggur xeihen. ¹⁰ Ma moletin xil vus te rute ak, ngan xil xa latellep ba duxoh movotei xil mun, xil vus latenemi latehit, “Moletin ak be eloheoh tei na Hi xa lakesi ni ‘Xeihen xa Mahulong.’” ¹¹ Xil di latehusili nousav vengan xa vongou xil xa di tepol ni tesak ni xil latmesep ven. ¹² E melele xa moletin xil lalong longeongen hos xa Pilip di biteni usil sexien xa Hi mei ihe suv toto te meulien nae e usil Iesu xa be Mesaea xa xi tesila, moletin xil holu lake reitin en. E melele xa tiramue xil e atou xil ak laling neketen nae e Hi, xil mei lamaen Pilip tangan vabaptaes ni xil. ¹³ Saemon mun mike reitin e sepinien na Pilip e maen ni **baptaes** ni. Di, Saemon nggusil xat Pilip e mesep pupu ve merekel xil e sexien sav xil mun xa tellep xa Pilip di pol ni.

¹⁴ Longeongen usil naha xa di mistal e provins te hal Sameria duxoh eloheoh xil na Iesu e Serusalem. Xil lalonge xa mol-Sameria xil di lake reitin e sepinien na Hi. Misak ni, lasil Pita xal Sion lube visal xil. ¹⁵ Melele xa ba lustal mi mol-Sameria xil, lusus ve xil xa **Ninin Eo** mei ise xat xil ¹⁶ vengan xa Ninin Eo tenamei ti mu e tova xil. Pilip tebaptaes ni xil e his Iesu kestang. ¹⁷ Ma melele xa Pita xal Sion luling he xalu e xil, Ninin Eo mei polu e xil.^t

¹⁸ Saemon pusi xa melele xa eloheoh xalu luling he xalu e moletin xil, Hi di

misa **Ninin Eo** mi xil. Misak ni, Saemon misa **mani** mi xalu e biteni bit, ¹⁹ “Nixal xamil xosxa mulisa xeihen xai minou li tangan inou mun nikila nisa Ninin Eo mi moletin eah xa niling heok en.”

²⁰ E Pita misep pangasi bit, “!Xouk uhe Von Upang itel xat mani nam! !Osakras oxal rat sanien na Hi ni mani! ²¹ Xouk otapin ti tangan omos e polien namem vengan meulien nam tamal ti pe met Hi.” ²² Itiamu, uhiles nenemien tesa nam, e usis mi Hi Suv tangan nasa pangasien ti minuk ve nenemien tesa xa obit opol ni. E vahit xi vaketeh vahos rilomun mi xouk. ²³ Taxeak, uhiles meulien nam vengan napusi xa di onem misa ni xamem ve xeihen xa Hi di misa ni mi xamem. E napusi mun xa tesaen di bar xolok.”^v

²⁴ Melele xa Saemon milong sepinien ak, dakes Pita xal Sion bit, “Lusis mi Hi Suv ve rin navan li tangan holesok xil xa di musep usili nastal ti minou.”^w

²⁵ Pita xal Sion lutehit usili mi mol-Sameria xil holesok xil xa Suv Iesu tepol ni e tehiteni melele xa luteti tamu visali. Melele xa lupol ni bus, ludilomun lube Serusalem. E, e suse nalu, lusao ni metimal xil holu te hal Sameria e lubithiten longeongen hos usil Iesu Kristo mi mol-Sameria xil.

Eilep tei te hal Itiopia mei miling neketen nan e Iesu

²⁶ Vatei, **maxaxa** tei na Hi mei mistal mi Pilip e biteni mini bit, “Uvue xatuk e ukakao uhusil suse xa be saot. Uhusil suse xa nggo taon te hal Serusalem e ba be taon te hal Kasa.” Suse ak di nggur xoteh uruvuol. ²⁷ Ma Pilip bue xat xi e ba.

E melele nen ak, eilep tei te kantri te hal Itiopia di nggusil suse ak. Xi be eilep

^s8:7 Mat 10:1; Mak 6:7; 16:17 ^t8:17 Pol 19:6 ^u8:21 Sam 78:37

^v8:23 Dut 29:18; Tang 3:15; Aes 58:6 ^w8:24 Eks 8:4,24; 9:28

tei xa di milaxat mani xil vus na suv toto te hal Itiopia xa be atou, hisen Kandis. Eilep ak tehe Serusalem tangan vamot mi Hi, ²⁸ e di, nggusil suse nan tangan vatilomun vahe ut san. E melele xa ba, di miloh e kat tei xa hos milihi. E melele xa dotan de kat, di buli rut sepinien e Vanuvei Eo na Hi xa **provet** Aesea tetisi. ²⁹ Ma Ninin Eo biteni mi Pilip bit, “Uha, ha uhe sangas visal moletin xa di miloh e kat iaxor.”

³⁰ Misak ni, Pilip miloh be sangas visal kat ak e milonge xa eilep ak di buli sepinien xa provet Aesea tetisi. Ma misisi bit, “?Xouk okil koute te naha xa di obuli iaxai?”

³¹ Eilep ak bit rilomun ni mini bit, “?Xosxa moletin ti navit kila minou, ma nikil koute teni itep?”^x

Ma eilep ak misis Pilip tangan vapeou vaha vatotan vatela e kat nan. ³² Melele xa Pilip ba dotan dela, pusi xa eilep ak di buli rut sepinien te Vanuvei Eo na Hi xa biteni bit,

“Moletin ak, texoni sulut sipsip tei xa ladela tangan ha lavasi vamat, xi tenavit pas ti sepinien.

Io, xi tenatangal ti nggoni sipsip tei e melele xa di lakot rerat hilin.

³³ *Melele xa latelepis rin nan, latnapol ni ti tenamal mini.*

Lasakras lanem usil horamue nan xil venggan xa latehur xoteh meulien nan e ut etan.” (Aes 53:7-8)

³⁴ Eilep ak misis Pilip bit, “Hiteni minou li. ?Provet ak di misep usil visi vari xiak? ?Di misep usil xi mun tang, mu moletin tova?” ³⁵ Ma Pilip bit kil koute te sepinien ak mini e misetu mun ni longongen hos usil Iesu Kristo mini. Melele xa biteni mak, eilep ak mike reitin en. ³⁶ E melele xa di lunggusil suse luba,

lumei e rute tei xa oei di en. Ma eilep ak biteni mi Pilip bit, “!Pus ti! Oei xi tak. Xosxa onemi obit bos, ma ubaptaes ni nou li en.”^y

³⁷ E Pilip bit rilomun ni mini bit, “Nakila nibaptaes ni xouk en xosxa oke reitin en nggo meulien tevi nam.”

Ma xi biteni bit, “Inou nake reitin xa Iesu Kristo be Nat Hi.”

³⁸ Ma, eilep ak biteni mi moletin nan tangan vapol ni kat nan vangal. Di, xal Pilip, lukakao lube oei, e Pilip baptaes ni en. ³⁹ E melele xa xalu di lukakao lumea reling oei, vatei takes, Ninin Eo na Hi mei nggur rat Pilip ra rute ak. E eilep ak tapus ti mun. E neta sav xa mak, eilep nggusil suse nan ba del memesien mi Hi.^z

⁴⁰ E Pilip^a mitemanin melele xa pusi xa da ngamu e taon tei xa lakesi ni Asotas.[¶] E kakaoen nan, Pilip di bithiten longongen hos e taon xil vus xa di misao ni e suse nan ba vuma ... duxoh taon te hal Sesaria.

Iesu Kristo pisen xi mi Sol, e Sol mei miling neketen nan en

9 E melele nen tak, Sol di tamu misa sepinien xil te xeih bit ihas vin ngan xil vus xa di laling neketen nae e Iesu. Misak ni, be visal **vatixar na pris xil^b** ² e misisi tangan itis uvei xil xa isep kil polien nan mi vat xil te **nim te pispisienxil** na Siu xil xa ladi e taon te hal Damaskas. Ma vatixar misa uvei tei mini xa maen ni. Uvei ak biteni xa melele xa Sol ikamet tiramue mu atou tei xa di mineket e Iesu, ikila ital xati e ilihi imei mun e hal **Serusalem**.

³ Melele xa Sol di bemei sangas visal taon te hal Damaskas, vatei takes, miehien tei xa minehin pupu nggo ut nesao e mei mileluy xole. ⁴ Sol mot be tan.

¶8:40 Taon te hal Asotas be 20 kilomita ra ut xa Pilip tepus eilep te hal Itiopia en.

^x**8:31** Sion 16:13 ^y**8:36** Pol 10:47 ^z**8:39** 1King 18:12 ^a**8:40** Pol 21:8

^b**9:1** Pol 8:3; 9:13-14

E melele xa de tan, milong rae tei xa biteni mini bit, “!Sol, Sol! ?Veneh ma di osak purun nou del moletin navan xil mak?”

⁵E Sol biteni mini bit, “?Suv, xouk visit?”^c

E rae ak biteni mini bit, “Inou Iesu, ngan xa di osak purun ni. ⁶E taxeak, umea uhe taon xai te hal Damaskas. E rute ak lihiteni minuk naha iaxa upol ni sung.”

⁷Moletin xil xa di lakakao del xat Sol, lalong rae ak, e xil latapus ti moletin tova. Ma ulixil mikan holu e ladit votei.

⁸Melele xa Sol mitamea ra tan e miketeh ba, mikila sung xa meten bar. Misak ni, tuneli xil ladal xat hen e ladeli be Damaskas.^d ⁹Sol dat mak e taon ak melengien tol. Meten bar e bit naxanien ti e namu ti neta.

¹⁰E taon te hal Damaskas, moletin tei xa miling neketen nan e Iesu da en, hisen Ananaeas. E Suv Iesu mistal mini nggo metuveen tei e biteni mini bit, “!Ananaeas!”

E xi bit rilomun ni bit, “!o Suv, inou iaxale.”

¹¹Ma Suv biteni mini bit, “Uvve xatuk e uha uhusil suse xa lakesi ni ‘Suse xa Momal.’ E tim sa Sudas, usis ves moletin tei te hal Tarsis, hisen Sol. E melele nen tak, xi di misis.^e ¹²E metuveen tei, tepus moletin tei xa hisen Ananaeas xa bemei e miling hen en tangan vasak ni vaketeh rilomun.”

¹³Ananaeas bit rilomun ni bit, “Suv, moletin xil holu di latumul usil moletin ak ve holesok holu xa misa xa di pol ni mi moletin nam xil e hal Serusalem.^f

¹⁴Labiteni xa bemei inggak del xeihen na vatixar na pris xil tangan mei ital xat

moletin xil vus xa di laling neketen nae e xouk.”^g

¹⁵E Suv Iesu biteni mini bit, “Ha pusi, vengan inou nabosei xi ngamu tangan ipol minou. Xi ti isep usil hisok mi ngan xil xa latave Siu ti, mi suv toto xil, e mi mol-Isrel xil mun.^h ¹⁶E inou vari iaxa ti nipisen ni mini hisit longpangasien xil xa ihuri ve polien xa ipol ni e hisok e melele xil xa ti imei.”ⁱ

¹⁷Ma Ananaeas ba mikamet tim xa Sol da en e be tim. Melele xa pus Sol, be visali e miling hen en bit, “Tua Sol, Suv Iesu xa testal minuk e suse melele xa di omei inggak, xi vari iaxa misil nou. Xi misil nou namei tangan nisis ve rin nam tangan uketeh rilomun e mei upolu ni **Ninin Eo.**” ¹⁸Vatei takes, neta tei xa nggoni kahbe meseo mot reling meten, e Sol mikila vaketeh rilomun. Di, melele xa mitamea, maen Ananaeas vabaptaes ni. ¹⁹E melele xa ngganien bus, tenbe Sol mei nggeih rilomun.

Sol misa longeongen hos mi moletin xil te hal Damaskas

Sol da melengien vahis mun e taon te hal Damaskas del moletin xil xa laling neketen nae e Iesu. ²⁰Melele xa Sol miketeh rilomun, vari tang, mika mal be nim te pispisien xil na Siu xil e di bithiteni mi moletin xil xa Iesu be Nat Hi reitin.

²¹Ngan xil vus xa lalong sepinien nan latemanin, e lasis xil mun tang labit, “?Ei, tave xi ti iaxa di tehas vin ngan xil xa di laling neketen nae e Iesu e hal Serusalem? Malonge xa bemei inggak tangan vatal xat ngan xil xa langgusil Iesu e valeh xil lava mun visal vat xil na pris xil. ?Midep vari?”^j

^c9:5 1Kor 15:8 ^d9:8 Pol 13:11 ^e9:11 Pol 21:39; Mak 8:23-25

^f9:13 Pol 8:3; 9:1

^g9:14 Pol 9:1-2,21; 26:10; 9:21; 22:16; 1Kor 1:2; 2Tim 2:22 ^h9:15 Rom 1:5; Pol 26:1; 27:24 ⁱ9:16 2Kor 11:23-28 ^j9:21 Pol 8:1; 9:1,14; 26:10

²² E Sol mei nggeih pilei sung e sexien xa di bit kila xa Iesu vari iaxa be Mesaea xa Hi tehosei tangan vamei. E **Siu** xil xa ladi e hal Damaskas lasakras lavit rilomun ni sepinien tova vaha xat sepinien na Sol.^k

²³ Melengien hao mei mitavi, e rut Siu xil lamei vituei e lapol ni lingxatien tei tangan lihas vin Sol.^l ²⁴ Ma e melengien xil vus, makoe be duxoh vongien, xil di laketeh xol puiteh te vioh xa mahulong xa mikapis xol taon ak tangan livulu xati e lihas vini. E Sol milongeng ni lingxatien nae.^m ²⁵ Misak ni, e vongien tei, ngan xil xa laling neketen nae e Iesu nggo pispisien na Sol, lasoson ni de ateli tei xa eilep. Di, lasar xat ao da en e laso kital ni nggo mesekital tei xa de nesao e seri vioh te taon ak. Di, lasae ni be tan. Ma, nggo sexien ak, Sol milesae be reling taon te hal Damaskas.ⁿ

Sol be Serusalem tangan vahisu ni eloheoh xil

²⁶ Sol dilomun be Serusalem e misak pisi tangan mei vamos e ngan xil xa laling neketen nae e Iesu. E xil vus ulixil mikan ni e latake reitin ti e melele xa Sol biteni bit be tei e xil. ²⁷ Di, tei e xil xa be-mei e dutou ni, hisen Banabas. Xi mei del Sol lube visal **eloheoh** xil na Iesu,^o ²⁸ Ma lamaen Sol mei mos e xil. E xi ba mikapis e ut xil ngasen e hal Serusalem e di misepin usil Suv Iesu del xeihen. ²⁹ Di misep tetavoe del Siu xil xa lasepin ni sepinien **Krik**. E melele xa lapus kila xa lasakras laleli sepinien nan xil, lalang ves suse tova tangan lakila lavas vini vaxo en. ³⁰ E melele xa ngan xil xa laneket lalongeng ni, xil ladel Sol ba be taon te hal Sesaria. E rute ak, lalingi be sip tei ten-

gan vahe taon xati nan te hal Tarsis tenggan vasikoe xol meulien nan.^p

³¹ Dutou ni ngan ak, ngan xil te Sias na Iesu xa ladi e provins xil te hal Sudea, Kaleli e **Sameria**, xil latehisu ni melele te tomat. Ma xil mei langeih pilei sung e neketen nae. Lamerere kuhi mi Suv Iesu, e Ninin Eo dutou ni xil e misa xeihen mi xil. Ve rin ak, moletin xil holu mei late-mos e xil.

Hi misak ni moletin tei xa len misa mei mikakao rilomun nggo he Pita

³² Eloheoh Pita mikakao ba misao ni ngan xil xa lateling neketen nae e Iesu xa lateti e rute savsav xil. E vatei, ba misao ni moletin xil na Hi xa ladi e taon te hal Lita. ³³ E rute ak, Pita pus moletin tei xa rin tei mat, hisen Aeneas. Huram tol e he sav (8) xi takakao ti, e pat dat rong mak tang. ³⁴ Melele xa Pita pusi, biteni mini bit, "Aeneas, Iesu Kristo pol ni tenbem bos ngamu. !Utamea e uvulun suon mam!" Vatei takes, Aeneas mitamea e misoh. ³⁵ E melele xa moletin xil vus te taon xalu te hal Lita e Saron lapusi midep iaxa tenben mei bos rilomun, xil labiles meulien nae e mei laling neketen nae e Suv Iesu.

Hi dal rat atou tei ra maten nggo he Pita

³⁶ E taon te hal Siopa, atou tei da en xa teling neketen nan e Iesu, hisen Tapita. E moletin xil lakesi ni Dorkas, hisen sav e sepinien te hal Krik. Vehakut, atou ak di misa xi tangan vapol ni polien hos xil tangan vatutou ni hoeo xil. ³⁷ E melele xa Pita da tamu e taon te hal Lita, atou ak nggur mesien tei e mat. Timue nan xil lakas moten tiei nan mei memese tangan ha lithin ni. Di, lalingi pat e von toen

^k9:22 Pol 17:3; 18:5,28 ^l9:23 Pol 23:12 ^m9:24 Pol 23:16

ⁿ9:25 2Kor 11:33 ^o9:27 Kal 1:18; 1Kor 9:1; 15:8; Pol 9:4; 22:7; 26:14; 9:20

^p9:30 Pol 11:25

nesao e nim man.³⁸ E melele xa moletin xil e hal Siopa lalongeong ni xa Pita dat sangas e taon te hal Lita, lasil tiramue lu lube visali del xat sepinien ak lubit, “!Utemanon li, umei visal xamem!”

³⁹ Melele xa lubit mesen rin nalu mi Pita, xi bue xat xi e be xatel latoba. Melele xa latduxoh tim sa Dorkas, timue nan xil ladel Pita be von toen nesao e nim ak. E rute ak, tiei na Dorkas de vet tei e tunau xil di lasoh lakapis xole. Melele xa lapus Pita, ladang e lapisen ni mini eising xil xa Dorkas tetili melele xa temeul tamu teta.⁹

⁴⁰ Di, Pita misis xil tangan lihe relingi lihe hale. Melele xa labe, mitingeiril e misis mi Hi. Di, pus tiei na Dorkas e biteni bit, “!Tapita, tamea!” Vatei takes, met Dorkas milale. E melele xa pus Pita, mitamea e dotan de vet man.^r ⁴¹ Di, Pita dal xat hen e dal rati misoh. Melele xa misoh, Pita mikes viton moletin xil na Hi e tunau xil mun lamei, e Pita pisen ni mi xil xa Dorkas meul tang da. ⁴² Longeongen usili ba mikapis e ut xil ngasen sangas visal taon te hal Siopa. Ma moletin holu mei laling neketen nae e Suv Iesu. ⁴³ E Pita de visal xil melengien vahis mun e hal Siopa e nim ma moletin tei xa di pol kuh hilbe buluk tangan ikila ipol ni holesok hos xil ni, hisen Saemon.^s

Hi pisen ni mi Pita xa moletin xil ngasen lakila mei labe moletin nan xil

10 E taon te hal Sesaria, ngan Rom tei da en xa hisen Konilias. Xi be vat tei na vanut moletin te vaeen xil xa lakes xil ni ‘mol-Itali xil.’^t ² Xi be moletin tei xa merere pupu ni Hi na Siu xil e di mot mini, xi del ngenen xil. Vehakut, di misa tutouen mi hoeo xil e di misis mi Hi.

³ Vatei, e 3 klok mahis, Konilias di misis e tim san e pus neta tei xa nggoni metuveen tei. E metuveen ak, pus **masxaxa** tei na Hi xa bemei sangas visali e mikesi bit, “!Konilias!”^u

⁴ Konilias miketeh momal ni masxaxa ak e ulin mikan pupu ni. E bit rilomun ni mini bit, “O-o. ?Suv, di okes nou?”

Masxaxa biteni mini bit, “Hi milong sisen nam xil e pus kil tutouen xa di osa ni ba mi hoeo xil. Holesok xil vus xa di opol ni nggoni vo sanien eo tei xa ba mi Hi, e di pongosi xa von mikon e besi xi ven. ⁵ Taxeak, usil rut moletin nam xil tangan lihe taon te hal Siopa e ha lipus moletin tei, hisen Saemon Pita, tangan litela imei e tim sam.^v ⁶ Xi de visal moletin tei xa di pol ni holesok xil ni hilbe buluk. Moletin ak, hisen Saemon, e nim man de sangas visal tas.”^w ⁷ Melele xa masxaxa be relingi, Konilias mikes viton moletin te polien nan lu del moletin te vaeen tei xa di dutou ni e tim san xa xi mun di mot mi Hi. ⁸ E melele xa mitumul mi xatel usil holesok xil xa testal mini bus, misil xatel latobe taon te hal Siopa.

⁹ E visuvong nen, sangas vahe piniae, moletin xatel ak latemei sangas ni Siopa. E melele nen tak, Pita be nesao e nim xa da en tangan vasis. ¹⁰ Melele xa di misis, milonge xa mae nggati e bit vanien, e anien tameses ti mu. E melele xa di misis mak, Pita pus neta tei nggoni metuveen tei. ¹¹ E metuveen ak, pus tilang hat masel e neta tei nggoni kaliko xa mahulong xa di lasae ni nggo kusute hat (4) nggo ut nesao bemei e ut etan.^x ¹² E hilaep te kaliko ak, Pita pus hisit vongoro sav xil, tetal xil, e tuman xil. ¹³ Melele xa pusi mak, milong rae tei xa misepin mini bit, “!Pita, utamea! Uhas ti xil e ua ni.”

^{99:39} Pol 10:23 ^r9:40 Mak 5:40-41 ^s9:43 Pol 10:6,32

^t10:1 Luk 7:2,5; Pol 27:1,3 ^u10:3 Pol 3:1 ^v10:5 Mat 10:2; Mak 3:16; Luk 6:14; Sion 1:42; Pol 10:18; 11:13 ^w10:6 Pol 9:43; 10:32 ^x10:11 Pol 11:5-12

¹⁴E Pita misepin rilomun mini bit, “!Suv, nasakras napol ni vamak! E meulien navan, natarak pis ti mu neta xa tamese ti mu tamal ti tangan lava ni pe metom.”^y

¹⁵Rae ak misepin rilomun mini bit, “!Holesok xil xa Hi pol ni lamese ngamu, xouk onahitini ti onahit latamese ti pe meten!”^z ¹⁶Sexien ak mistal mi Pita be vatol. Di, kaliko ak dilomun be ut nesao.

¹⁷Melele xa Pita di tamu minem usil koute te neta xa tepusi, moletin xatel xa Konilias tesil xatel, latkamet nim ma Saemon e latemei latesoh sangas visal puiteh te vioh. ¹⁸Latsoh e hale e latkei latbit, “?Moletin tova dat tak xa hisen Saemon Pita?”^a

¹⁹E melele nen tak, melele xa Pita di tamu minem usil naha xa tepusi, **Ninin Eo** mei misepin mini bit, “Moletin tol mei latdi tak e di latolang ni xouk.”^b

²⁰Utamea, ha upus xatel, e ulum nakan ti tangan uhusil xatel mutiha. Uhusil xatel vengan xa inou vari iaxa natesil xatel latemei ve xouk.”

²¹Ma Pita be visal moletin xatel ak biteni bit, “Inou iaxa nabe ngan xa di mutolang ni. ?Mutomei ve neta tova?”

²²Ma xatel latbiteni mini latbit, “Vat namatel xa hisen Konilias, xi iaxa tesil xametil matomei. Xi be moletin hos tei xa di mot mi Hi, e **Siu** xil vus di lamerere pupu ni. Tave nousav ti, masxaxa tei na Hi mei testal mini e tehiteni mini xa isil xametil matimei tangan matkila matsis xouk mei uhe tim san. Masxaxa ak biteni mini bit bos xa xi ilong kil ti naha xa xouk ukila uhiteni mini.”^c ²³Melele xa Pita milong sepinien natel, misis xatel

tangan latiti visali e nim ak ituxoh visuvong nen.”^d

Ut milan, Pita del rut moletin ngan xil te hal Siopa xa laneket labue xat xil, e langgusil xatel laba. ²⁴Lakakao laba e, e visuvong nen, laduxoh taon te hal Sesaria. E Konilias dat tim e di datil Pita. Dat tim del vatimol nan xil e rut timue nan xil mun xa tesilasil ni xil tangan limei. ²⁵E melele xa Pita duxoh tim, Konilias mei bisu mini, miteingeiril pe meten, e pol ni nggoni ngan xa imot mini.”^e ²⁶E Pita dal rati e bit, “Mea soh. Inou mun nabe moletin tang.” ²⁷Ma Konilias mea e diamu ni be nim, e melele xa di lukakao luba, di lusepin vituei. Melele xa labe vangit nim man, Pita mikameti xa moletin xil holu lamei vituei ngamu e di ladatili. ²⁸Ma Pita misepin mi xil bit, “Xamim vus mukil kuhi xa rae na Siu xil biteni bit xamem masakras mati vituei vatel ngan xil xa latave Siu ti. E Hi tepisen ni tuei minou xa ninahitini ti ninahit hisit moletin tei tamese ti mu tamal ti pe meten.”^f ²⁹Misak ni, melele xa mutesilasil ve nou, uluk tenakan ti tangan namei. ?E ieok bei tangan nakila, mutesilasil ve nou veneh?”

³⁰Misak ni, Konilias biteni mini bit, “Melengien tol xa mitavi ba, e tri klok mahis, nggoni ngan taxa radi en xiak, inou di natesis e nim mavan. Vari nga tang, natepus moletin tei tesing ni eising xa minehin pupu xa di misoh visal nou.”^g

³¹Xi biteni minou bit, ‘Konilias, Hi milong sisen xil nam e pus kil tutouen xa di osa ni ba mi hoeo xil. ³²Taxeak, usil rut moletin nam xil tangan lihe taon te hal Siopa e ha lipus moletin tei, hisen

^y10:14 Lev 11:1-47; Esek 4:14 ^z10:15 Mak 7:15,19

^a10:18 Mat 10:2; Mak 3:16; Luk 6:14; Sion 1:42; Pol 10:5,32; 11:13

^b10:19 Pol 11:12; 13:2 ^c10:22 Pol 10:1-2,5; Luk 7:5

^d10:23 Pol 10:45; 11:12 ^e10:25 Pol 14:13-15; Rev 19:10

^f10:28 Pol 10:15; 11:19 ^g10:30 Pol 3:1; Luk 24:4; Pol 1:10

Saemon Pita, tangan litela imei e tim sam. Xi de visal moletin tei xa di pol ni holesok xil ni hilbe buluk. Moletin ak, hisen Saemon, e nim man de sangas visal tas.^h ³³ Misak ni, natemanon nasa sepinien bat tangan nasilasil ve xouk omei. E bos mak mu xa omei mak. Ma xamem vus mei madi vituei inggak pe met Hi Suv tangan xa mateong ni holesok xil xa Hi tesemae ni minuk tangan uhiteni mi xamem.”

³⁴ Di, Pita misa sepinien ak mi xil bit, “Taxeak, nakil kuhi sung xa Hi tapus ti hisit moletin tei vahos mak mu vali hisit moletin sav xil.ⁱ ³⁵ Hi memaal ve ngan xil vus xa di lamot mini e di lapol naha xa momal pe meten, tave ti neta xa labe moletin xil te kantri sav tei.^j ³⁶ Xamim mukil sepinien xa Hi tesa ni tuei mi mol-Isrel xil tangan likila liti e tomat itela. Reitin, likila liti e tomat itel Hi ixo naha xa Iesu Kristo tepol ni e rin nar. !E Iesu be Suv na moletin xil vus!^k ³⁷ Mukila ngamu xa longeongen hos ak tekapis e provins te hal Sudea. Testal kokot e provins te hal Kaleli, tetutou ni melele xa Sion di tehithiteni xa moletin xil lihiles ra tesaen nae xil e limaen ni ibaptaes ni xil.^l ³⁸ Mukila usili ngamu xa tetep iaxa Hi tesa **Ninin Eo** mei tese xat Iesu te hal Nasaret e tesa xeihen mini. E Iesu tekakao tekapis e di tepol ni polien hos xil. Xi tetal rerat ngan xil vus xa lateti pe xeihen na **Temat** tangan lameluv rani e ha vexil vamase. Xi tekila tepol ni temak vengan xa Hi teti visali.^m ³⁹ E xamem, eloheoh xil, iaxa matepus holesok xil xa

di tepol ni e taon te hal **Serusalem** e rute sav mun e provins te hal Sudea. E di, lateti xati tete eivave e temat.ⁿ ⁴⁰ E melele xa melengien tol tetavi, Hi tesak ni temeaa rilomun ra maten e mei testal^o ⁴¹ mi rut xamem tang xa Hi tehosei xamem ngamu tangan mapusi. Reitin mak, dutou ni melele xa temeaa rilomun ra maten, xamem mateanien e matemung tetela. ⁴² E be Iesu vari iaxa teseaa ni xamem tangan ti muhithiteni longeongen hos usili mi moletin xil e musep kila xa xi iaxa be ngan xa Hi tehosei tangan ti ilepis rin na moletin xil vus, ngan xil xa lameul ladi e ngan xil xa lalel ngamu.^p ⁴³ **Provet** xil vus di latesepin usili latehit ngan xil vus xa laling neketen nae e hisen, Hi iketeh ihos rilomun mi xil.”^q

⁴⁴ Melele xa Pita di tamu misepin, Ninin Eo bemei polu e ngan xil xa di lataeong ni sepinien nan.^r ⁴⁵ Siu xil xa laneket xa latexo Siopa latemei latehe Sesaria tetel Pita, xil lamesep pupu melele xa lapusi xa Hi maen ngan xil mun xa latave Siu ti tangan lavur sanien te ni Ninin Eo nan vaxoni ngan xa di pol ni mi Siu xil. ⁴⁶ Xil lakila xa Ninin Eo iaxa di bemei e xil reitin vengan xa lalong xil lasepin nggo sepinien sav xil xa tave nae xati ti e di lapet rat his Hi. Melele xa Pita pusi mak, biteni mi ngan xil xa latehusili bit,^s ⁴⁷ “Ngan xil ak lapolu ngamu ni Ninin Eo nggoni xir tang. ?Mak, ma visi tova mikila vasikoe xol xir tangan rinabaptaes ni xil ti e oei?”^t ⁴⁸ Misak ni, Pita misemae tangan labaptaes ni Konil-

^h10:32 Mat 10:2; Mak 3:16; Luk 6:14; Sion 1:42; Pol 10:18; 11:13; 9:43; 10:6

ⁱ10:34 Dut 10:17; 2Kron 19:7; Rom 2:11; Kal 2:6; Efes 6:9; Kol 3:25; 1Pit 1:17

^j10:35 Sion 9:31 ^k10:36 Sam 107:20; 147:18; Aes 52:7; Neh 1:8-11; Rev 17:14; 19:16 ^l10:37 Mat 4:12,17; Mak 1:14 ^m10:38 Aes 61:1; Luk 4:18; Sion 3:2

ⁿ10:39 Dut 21:22

^o10:40 Sion 14:19,22; Luk 24:30,42; Sion 21:12-13; Pol 1:4 ^p10:42 Pol 17:31; Rom 14:9; 2Tim 4:1; 1Pit 4:5 ^q10:43 Aes 33:24; 53:5-6; Ser 31:34; Dan 9:24

^r10:44 Pol 11:15; 15:8 ^s10:46 Mak 16:17; Pol 2:4,11; 19:6 ^t10:47 Pol 8:36

ias xatel e his Iesu Kristo.^u Melele xa Pita **baptaes** ni xil bus, Konilias e ngenen xil lasisi tangan latiti itel xil melengien ihe vahis mun.

Pita bit kila xa Hi pol ni suse tangan ngan xil xa latave Siu xil ti likila lihur meulien sal

11 E provins te hal Sudea, **eloheoh** xil del Siu sav xil mun xal laling neketen nae e Iesu langgur longongen xa bit ngan xil xa latave Siu ti lake reitine e Iesu e di langgusil sepinien na Hi.² E melele xa Pita dilomun be **Serusalem**, Siu xil xa laneket e Iesu mei laseputut ba ni³ labit, “?Veneh vari oteha otete tim sa ngan xil xa latave Siu ti e di oteanien vituei mun tetel xil? !Okila xa rae nar xil tamaen ni ti tangan ramos vituei vatel ngan xil lamak xa latave Siu xil ti!”^v

⁴Ma Pita misep kila mi xil usil holesok xil xa testal kokot mini ba duxoh hoxalite teni bit,⁵ “Melele xa natete taon te hal Siopa, di natesis. E melele xa di tamu natesis, natepus hisit metuveen tei. E metuveen ak, tilang hat temasel e kaliko tei xa mahulong xa latesae ni texo kusute xatel texo ut nesao temei temal vari ni nou.”^w ⁶E melele xa nateketeh teha en, natepus hisit vongoro sav xil, ngan xil xa lamah e ngan xil xa labe vuran, tetal xil e tuman xil mun. ⁷Di, natelong rae tei xa tehiteni minou tehit, ‘!Pita, utamea! Uhas ti xil e ua ni.’

⁸“E inou natehit rilomun ni natehit, ‘!Suv, nasakras napol ni vamak! E meulien navan, natarak pis ti mu neta xa latamese ti mu tamal ti tangan lava ni pe metom.’

⁹“Di, rae xa texo ut nesao tesepin rilomun minou tehit, ‘!Holesok xil xa Hi pol

ni memese ngamu, xouk onahiteni ti onahit hisit moletin tei tamese ti pe meten!’¹⁰ Sexien ak testal minou tehe vatol. Di, kaliko ak tetilomun tehe ut nesao.

¹¹“Vari nga tang, moletin tol xa latosis xatel latexo Sesaria latemei latetuxoh nim xa nateta en. ¹²E **Ninin Eo** tehiteni minou tangan nihusil xatel matiha, e ninanem ti ninavit xatel latamese ti venggan xa latave Siu ti. E melele xa nateha, moletin tei e he sav (6) ak te hal Siopa iaxa latehe xametel mateha matehe vangit nim na moletin xa tesilasil ve nou, hisen Konilias.^x ¹³Xi tehiteni mi xam-etel xa **masxaxa** tei mei testal mini e tesoh sangas visali e tim san. Masxaxa ak tehiteni mini tehit, ‘Usil rut moletin nam xil tangan lihe taon te hal Siopa e lisilasil ni moletin tei, hisen Saemon Pita, tangan itela imei e tim sam.’^y ¹⁴Moletin ak ihiteni minuk itel ngenom xil vus suse xa muhur meulien sal ixo en.”^z

¹⁵“E melele xa di tamu natesepin mi xil, **Ninin Eo** mei tepolu e xil texoni ngan xa testal rohon e melele xa tepolu ni xir tetiamu.”^a ¹⁶Melele xa natepusi, natenem rilomun ni naha xa Suv Iesu tehiteni tehit, ‘*Sion tebaptaes ni moletin xil ni oei tang, e Hi ibaptaes ni xamim ni Ninin Eo.*’ (Pol 1:5) ¹⁷?Misak ni, xosxa Hi bit moletin xil ak lakila lavur sanien nan nggoni ngan taxa tesa ni mi xir e melele xa rateling neketen nar e Iesu Kristo, ma inou nabe visi vari iaxa nikila nisikoe xol polien na Hi?”

¹⁸Melele xa lalong sepinien na Pita, latasepin ni ti mun neta vaha xati. E xil vus lapet rat his Hi labit, “Taxeak, Hi misah suse tangan ngan xil mun xa latave Siu ti lakila laviles ra tesaen nae xil e mei lavur meulien sal vaxo en.”^b

^u10:48 Pol 19:5; Sion 4:40 ^v11:3 Pol 10:28; Kal 2:12 ^w11:5 Pol 10:9-20

^x11:12 Pol 10:23,45 ^y11:13 Pol 10:3-5,22,30-32 ^z11:14 Pol 10:22; 16:31

^a11:15 Pol 10:44; 2:4 ^b11:18 Pol 13:48; 14:27

Moletin xil te hal Antiok mei lake reitin e longeongen hos usil Iesu

¹⁹ Melele xa vat xil na *Siu* xil te hal Serusalem latehov vin Stivin e lateha latesak purun ngan xil te Sias, holu e ngan xil xa laling neketen nae e Iesu late-tasil latehe rute sav xil. Rute e xil latelesae latehe sotin ba latetuxoh tan te hal Ponisia, rute latehe aelan te hal Saepras, e rute sav mun latehe taon xa mahulong te hal Antiok. E melele xa lateti e rute xil ak, di latehithiten longeongen hos usil Iesu mi *Siu* xil kestang.^c ²⁰ E rute e ngan xil ak latehe te hal Saepras xal Saerin. E melele xa xil latelesae ra hal Serusalem e latehe taon te hal Antiok, xil di latehithiten longeongen hos usil Iesu mi ngan xil xa latave *Siu* ti.^d ²¹ Xeihen na Suv di mi xil, e moletin holu labiles ra tesaen nae xil e laling neketen nae e Suv Iesu.^e

²² Melele xa vat xil e Sias te hal Serusalem langgur longeongen xa ngan xil xa latave *Siu* ti di laling neketen nae e Iesu, lasil Banabas be Antiok tangan vapus kil rin nae. ²³ Melele xa duxoh taon xa mahulong te hal Antiok, besi xi melele xa pusi xa tuxolxatien na Hi di mi xil. Ma misel xat xil tangan lisoh ix-eih e neketen nae e lihusil kuh Suv Iesu e meulien nae.^f ²⁴ Banabas be moletin hos tei xa neketen nan nggeih e polu ni xeihen na Ninin Eo. Moletin holu inggak langgur selxatien nan be nae, labiles ra

tesaen nae, e mei laling neketen nae e Suv Iesu.^g

²⁵ Di, vatei, Banabas ba be taon te hal Tarsis tangan valang ves Sol.^h ²⁶ Melele xa mikameti, Sol nggusili e lukakao vituei ludilomun lube Antiok. Xalu lupol vituei huram tevi tei del ngan xil te sias te hal Antiok e di lupispisi mi moletin xil holu. E rute ak vari, latekes kokot ni ngan xil xa laling neketen nae e Iesu ni '*Kristin*.'^g

²⁷ E melele nen ak, rut *provet* ngan xil te sias te hal Serusalem lamei e Antiok.ⁱ ²⁸ E totanen tei, xeihen na Ninin Eo mei polu e tei e xil xa hisen Akabas. Misak ni, misoh e hilaep te moletin xil e bit lelen ni xa melele te mae kekaten imei ikapis xol ut xil vus xa ngan xil te hal Rom di lalaxati (ngan ak testal sung e melele xa Klodias tehe suv toto xa mahulong te hal Rom).^{**} ²⁹ Kristin xil kekes te hal Antiok lapol ni hitxatien xa lisa sanien eah xa likila lipol tangan ha itutou ni tua xil te neketen xa ladi provins te hal Sudea. ³⁰ Ma laso viton sanien nae xil ak, e lalingi e he Banabas xal Sol tangan ha lalisa ni mi elda xil te sias te hal Serusalem.^k

Suv toto Herod misak purun Kristin xil e Hi bas vini

12 E melele nen tak, suv toto *Herod* misis moletin te vaen nan xil tangan liha lital xat Kristin xil e sias te hal Serusalem. ² Di, misemae ni tangan lita xoteh hurae Temis xa be tuneli

§11:26 Tetiamu, mosav xil latekes pepamen ni ngan xil xa lateling neketen nae e Iesu ni 'Kristin,' xa koute teni be 'moletin xil na Kristo.' E melele xa ngan xil xa laneket latelongeong ni his te xaren ak, xil labesi xil tang tangan lavuri.

**11:28 Ngan ak tehe reitin, e AD 41-54 us tamus ti e anien mun tenapin ti e ut xil vus xa kavmen te hal Rom di latelaxati.

^c11:19 Pol 8:1-4 ^d11:20 Sion 7:35

^e11:21 Pol 2:41; 4:4; 5:14; 6:7; 11:24; 21:20 ^f11:23 Pol 13:43; 14:22

^g11:24 Pol 6:5; 2:41; 4:4; 5:14; 6:7; 11:21; 21:20 ^h11:25 Pol 9:30

ⁱ11:27 Pol 13:1; 15:32 ^j11:28 Pol 21:10 ^k11:30 Pol 12:25

Sion. ³E melele taxa Herod pusi xa **Siu** xil labesi xil ve neta xa tepol ni, misis moletin te vaeen nan xil tangan ha lital xat Pita mun. Xi pol ni mak momal ni Melengien xil te Beret xa Is Tovuol En.¹ ⁴Melele xa ladal xat Pita, ba laso ni be nim te xeih e Herod misemae ni tangan vanut moletin xil te vaeen hat liketeh xole. Herod minemi bit ipisen ni mi moletin xil e ihas vini itutu ni **Anien te Tavien**. ⁵E melele xa Pita da tamu e nim te xeih, ngan xil te sias te hal Serusalem di latangel ni ti sisen ven.^m

⁶E vongien xati xa diamu ni melele xa Herod bit ilepis rin na Pita e kot nan, neta tei testal. Pita di pat e nim te xeih e latevar xat hen xalu ni sen e tete hilaep te moletin te vaeen lu xa di luketeh xole. E, e hale mun te puiteh, moletin te vaeen sav lu mun lutesoh e di luteketeh xol nim te xeih ak.ⁿ ⁷Vatei takes, **masx-axa** tei na Suv mei mistal, e minehinen teni mileluy xol ut xa Pita da en. E masx-axa ak mei dil valxou Pita e milale ni bit, “!Utemanon utamea!” Melele xa biteni mak, sen xalu lumeluy reling hen xalu. ⁸Di, masxaxa biteni mini bit, “Using ni kot nam, ulih xat atuatu nam, e uhesh xat sandel nam.” Ma Pita pol ni. Di, masx-axa biteni mun mini bit, “Uhusil nou raliha.” ⁹Ma Pita mitamea, nggusil masx-axa lustal ra nim te xeih. Pita takil ti mu xa naha xa di pol ni del tutouen na masxaxa be reitin. Minemi bit holesok xil be metuveen tei tang. ¹⁰Xalu lukakao luba lutavi ni vanut moletin te vaeen tei. Di, luba vuteili mun, e luli vanut moletin te vaeen tei mun. E melele xa luduxoh puiteh te viov te nim te xeih xa be aean, lupusi xa misaha tasen. Misak ni, lustal lube hale e lukakao e suse tei e Serusalem luba. Vatei takes, Pita

mikameti xa di mikakao tasen tang, e masxaxa ak tehe relingi ngamu.^o

¹¹Di, melele xa Pita minem kila xa neta xa di mistal mini be reitin, misep tasen bit, “!Be reitin! Hi Suv tesil masx-axa nan tei bemei tangan vahur rat nou ra he suv toto Herod e ra holesok xil xa Siu xil di lanemi labit ti lipol ni minou.”

¹²Melele xa Pita minem kil holesok xil ak, ba be nim ma Meri, nine Sion Mak. E rute ak, Kristin xil holu ladi vituei e di lasis.^p ¹³Melele xa Pita mei mirei puiteh te nim ak, atou te polien tei xa hisen Roda bemei tangan vakes pilei visi iaxa de hale. ¹⁴E melele xa Roda milong kil rae Pita, mesep e besi pupu ni xi ven. E ien bovorong ni tangan vasah puiteh, e xi miloh sung ba biteni mi ngan xil xa ladi nim bit, “!Pita vari tang iaxa misoh de hale xiak!”

¹⁵Xil labit, “?!Otalang!?” E Roda nggulehi dit biteni xa milong rae Pita reitin.^q

Ma xil labit mini labit, “Xos be masxaxa nan tang iaxa di olonge iaxai.”

¹⁶Melele xa di tamu lasopin usili, Pita nggulehi dit miti puiteh ba vuma ... tei e xil misaha. E melele xa lapusi xa be xi reitin, lamesep pupu. ¹⁷Pita mike xat xil nggo hen bit litit votei. Di, bit kila mi xil suse xa Suv tesak ni testal reling nim te xeih ha ven temase. Biteni mun mi xil bit, “Muhit mesen holesok xil ak mi elda Temis e ngan tesav xil mun xa di laneket.” Di, Pita be reling xil ba be rute sav tei.^r

¹⁸E makoe nen, moletin te vaeen xil xa di lateketeh xol Pita lanexo pupu vengan xa latakil ti xa Pita teha xave.^s ¹⁹Melele xa Herod milong usili, misemae ni moletin te vaeen nan xil tangan lava lalang ni, e xil mun latakamet Pita ti. Di, misis

¹12:3 Pol 4:3 ^m12:5 Tem 5:16 ⁿ12:6 Pol 5:23 ^o12:10 Pol 5:19

^p12:12 Pol 12:25; 15:37 ^q12:15 Pol 26:24; Mat 18:10

^r12:17 Pol 13:16; 19:33; 21:40 ^s12:18 Pol 5:22-24

pilei ngan xil xa lateketeh xol Pita usil naha xa testal. E melele xa lasakras lavit kila mini, mikin maten mi xil. Dutou ni ngan ak, suv toto Herod be reling provins te hal Sudea e ba be taon xa mahulung te hal Sesaria.

²⁰ Melele xa Herod di tamu e taon te hal Sesaria, moletin xil te taon xalu te hal Taer xal Saedon lapol ni neta tei xa misak ni Herod ien nggat xil. Misak ni, misemae bit moletin nan xil linasa ti mun anien mi xil. Ma moletin xil te rute xalu ak, lasil vanut moletin tei tangan lava lapus Herod. E diamu ni melele xa labit ha lipus Herod, lasis tutouen nggo eilep nan xa nenesien na Herod di en, hisen Blastas. E del tutouen na eilep ak, Herod maen ni xa liling xat melengien tei xa moletin xil te hal Taer e Saedon likila limei tangan lipol ni hitxatien te tomat itela.^t

²¹ E melengien xati teni, Herod mising ni eising tei xa bos xa bos na suv toto, e bemei dotan de hor te xeihen nan. Di, misa sepinien tei ba mi moletin xil. ²² Moletin xil labit lisak ni xi valonge vahos, ma lakei ba ni labit, “!Ngan ak tave moletin ti! !Xi be hi vari tang vengan xa raen bos xa bos pupu!”^u

²³ Melele xa suv toto Herod milonge xa di lapet rat hisen mak, besi xi pupu e tasa merereen ti vaha mi Hi. Misak ni, vatei takes, masxaxa tei na Hi Suv bemei e pol ni mei mesei holu. Tavehi ti, tomasis xil langga tinen ba vuma ... mat.^v

²⁴ E sepinien eo na Hi xa Herod di tevae tetela mei be eilep mak mu, e moletin xil holu mun mei lake reitin en.^w

²⁵ E rin na Banabas xal Sol, melele xa lutepol sen polien nalu tangan lalsa tutouen mi hoeo xil e hal *Serusalem*,^x

ludilomun lube taon te hal Antiok, e Sion Mak nggusil xalu latoba.

Ninin Eo bosei Banabas xal Sol tangan laliha lalihithiten longeongen hos na Hi e rute savsav xil

13 E sias te hal Antiok, rut moletin xil mei labe *provet* e titsa xil, hisexil labe Banabas, Simeon (xa be timaluxoluk tei), Lusias (te hal Saerin), Manaen (xa tehe timue hos tei na suv toto *Herod*), e Sol.^y ² Vatei, melele xa di lamot mi Hi e di labal ni anien, *Ninin Eo* bemei misepin mi xil bit, “Muling Banabas xal Sol lalihe rin tangan ti lalipol ni polien tei xa natehosei xalu ngamu tangan ti lalipol ni.”^z ³ Misak ni, melele xa laduxoh hoxalite te melele xa latelingi tangan laval ni anien e lasis, laling he e Banabas e Sol e lasil rat xalu luba.^a

Banabas xal Sol ba lubithiten longeongen hos e aelan te hal Saepras

⁴ Melele xa lasil Banabas xal Sol ra hal Antiok luba nggusil nenemien na Ninin Eo, xalu lube taon te hal Selusia. E rute ak, lunggo tuturil tei e lube aelan te hal Saepras.^b ⁵ Melele xa lube ut e metimal te hal Salamis, xalu lube *nim te pispisien*xil e di lusetu ni sepinien na Hi mi *Siu* xil en. Sion Mak mun be xatel e di dutou ni xalu.^c

⁶ Banabas xal Sol lupol ni mak e rute xil vus te aelan te hal Saepras ba vuma ... luduxoh taon te hal Pamos. E inggak, lubisu mi Siu tei, hisen Bar-Iesu, mu Eleimas e sepinien Krik. Xi be eimas tei xa di miluvos moletin xil nggo vongou xil xa xi be *provet* tei na Hi. ⁷ Vehakut, Eleimas de sangas visal vat tei te kavmen xa di milaxat rute ak, hisen Serkias

^t12:20 1King 5:11; Esek 27:17 ^u12:22 Esek 28:2 ^v12:23 Dan 5:20

^w12:24 Pol 6:7; 19:20 ^x12:25 Pol 11:29-30; 12:12; 15:37

^y13:1 Pol 11:27; 15:32 ^z13:2 Pol 9:15; Kal 1:15-16 ^a13:3 Pol 6:6; 14:23

^b13:4 Pol 15:39 ^c13:5 Pol 12:25; 13:13; 15:39

Polas. Xi be moletin tei xa tehe eimae, e melele xa nggur longeongen usil Banabas e Sol, misilasil ni xalu tangan mei lalsetu ni sepinien na Hi mini tangan iteong ni.⁸ E Eleimas misepsisil hisealu tangan vasak pisi vapol ni vat te kavmen ak nakei reitin ti e Iesu.^{d 9} Melele xa Eleimas di **pol** ni mak, xeihen na Ninin Eo bemei polu e Sol (xa hisen tei mun e sepinien Krik be Pol). Ma miketeh mormal ni Eleimas¹⁰ e misepin nggeih ba mini bit, “!Xouk obe nat **Temat** vari! !Di obae del xat holesok xil vus xa mormal! !Opolu ni hisit luvosen xil vus e vehakut di opurun mosav xil! E xosali, di osak pisi tangan oviles pispisien xil na Suv Iesu xa lamal mei lakavui tang.^e
¹¹ Ve sexien ak, Suv isa pangasien mi xouk. Metom xalu mei ivar e onapus ti mun miehen ihe nousav vuteili.” E, vatei takes, met Eleimas be momah. Misak ni, Eleimas dit mitavuel mikapis tangan vakamet moletin tova vatal xat hen e vapisen suse mini.^{f 12} Melele xa vat te kavmen pusi mak, mesep pupu e mei mike reitin e pispisien nalu usil Suv Iesu.

**Banabas xal Sol ba
lubithiten longeongen hos e
taon te hal Pisitia Antiok**

¹³ Pol e ngan xalu xa di latopol vituei lathe reling taon te hal Pampos e latnggo tuturil tei xa teling xatel e taon te hal Perka xa de provins te hal Pampilia. E rute ak, Sion Mak mistokovein xalu e dilomun be **Serusalem**.^{g 14} Di, Pol xal Banabas luli hal Perka e ba lube taon te hal Pisitia Antiok. E **Sabat**, xalu lube nim te pispisien na Siu xil e ba ludotan ludi en.¹⁵ Melele xa moletin tei buli

sepinien tei nggo **rae xil na Mosis** e tisen tei nggo provet xil bus, vat xil te **nim te pispisien**ak lasil moletin tei ba misis Pol xal Banabas bit, “Tuxoli xalu, xosxa munggur xat neta tova tangan mulohitani vatutou ni moletin xil ak, ma bos xa mei mulhitani.”^h

¹⁶ Ma Pol mea, misa hen be nesao tangan liti votei, e biteni mi xil bit, “Xamim xa mube Siu, e xamim xa mutave Siu ti xa di mumot mi Hi, bos xa muteong ni nou.^{i 17} Hi na Siu xil iaxa tehosei avu nar xil. E xi iaxa tesak ni moletin nar xil mei latehe holu tova tang e melele xa lateti e kantri te hal **Isip**, kantri xa tenave nae xati ti. E Hi teleh rerat xil ra rute ak texo xeihen nan xa mahulong.^{j 18} Hi telaxat kuh xil e uruvuol haram hanutap lu (40), tave ti neta xa sexien nae xil tesa.^{k 19} Di, Hi tehas lelen vanut moletin xil te kantri lu e he sav (7) xa latehe mahulong pupu xa lateti e tan xa mahulong te hal **Kenan**. E tan ak, Hi tesa ni mi avu nar xil mei tehe tan nae xati.^{l 20} Reitin, melele xa Hi tesak ni avu nar xil latetuxoh rohon ni kantri te hal Isip ba tetuxoh melele xa tan te hal Kenan mei tehe tan nae xati, haram handred hat e hanutap lu e he xalu mun (450) tetavi.^m

“Di, Hi tepet rat kekes ni vat xil tangan ti lilaxat mol-Isrel xil e ti lilepis rin nae ba tetuxoh melele xa tepet rat **Samuel** mei tehe provet nae.²¹ E melele xa provet Samuel di tamu telaxat xil, mol-Isrel xil latesis Hi tangan vasa suv toto tova mi xil. Ma Hi tehosei Sol, nat Kis xa texo vatimol na **Bensamin**. E xi telaxat mol-Isrel xil haram hanutap lu (40).^{n 22} Di, melele xa Hi tesin Sol, tepet rat **Deved** sung mei tehe suv toto nae e

^d13:8 2Tim 3:8 ^e13:10 Pro 10:9; Hos 14:9 ^f13:11 Pol 9:8; 22:11

^g13:13 Pol 13:5; 15:38 ^h13:15 Pol 15:21

ⁱ13:16 Pol 12:17; 19:33; 21:40; 13:26 ^j13:17 Eks 6:1,6; 12:51

^k13:18 Eks 16:35; Nam 14:34 ^l13:19 Dut 7:1; Sos 14:1

^m13:20 Sats 2:16; 1Saml 3:20 ⁿ13:21 1Saml 8:5,19; 10:20-21,24; 11:15

tehit usili tehit, *'Deved, nat Tiese, napusi xa xi be hisit moletin tei xa di pol nggusil nenemien navan e ipol sen holesok xil vus xa ieok bei tangan ipol ni.'* (1Saml 13:14; Sam 89:20)

²³“E nggo vatimol na suv toto Deved, Hi tesak ni **Mesaea** tei mei testal mi mol-Isrel xil tangan mei vateh meulien e moletin xil vaxoni ngan xa tehit xati. Mesaea ak be Iesu.^o ²⁴E melele xa Iesu tenapol ni ti mu neta, Sion di tamu tehithiteni mi mol-Isrel xil vus tangan li-maen ni mei ibaptaes ni xil tangan vapisen ni xa di labiles ra tesaen nae xil.^p ²⁵E melele xa polien na Sion sangas vavus, tesepe kila mi moletin xil tehit, *'Xos munemi mubit nabe Mesaea xa Hi tehit xati tangan isa ni imei. E inou natave Mesaea ti. E tei xa imei itutou ni nou, xi iaxa ihe eilep mak mu ili nou, e inou natapin ti tangan nalal rat sandel nan.'* (Luk 3:16)^q

²⁶“!Tuxoli xil te vatimol na **Ebrahim**, del xamim vus xa mutave Siu ti xa di mumot mi Hi, muteong kuhi ni nou! Hi tesa sepinien nen ak mi xir tangan vateh meulien e xir vaxo en.^r ²⁷E hal Serusalem, Siu xil e vat nae xil latelong rohon ni sepinien ak, e xil latele rasi xa Iesu be Mesaea xa di miteh meulien e xil. Reitin, xil latnalong kil ti sepinien na provet xil xa di latevuli e Sabat xil vus. E melele xa latekin maten mini, di latepol ni sepinien xil ak mei testal tehe reitin.^s ²⁸Tave ti neta xa latnakamet ti neta vasa xa Iesu tepol ni tangan lakin maten mini ven, e latesi petine Paelet tangan vase-

mae ni lavas vini.^t ²⁹E melele xa latepol ni holesok xil ngasen mini xa Vanuvei Eo tehit lelen ni, Iesu temat e latehur rat tiei nan ra eivave. Di, ba latelingi tete vangihat te tehinen tei.^u ³⁰!E Hi tesak ni temeaa rilomun ra maten!^v ³¹E melengien xil holu, Iesu testal mi ngan xil xa latehe xil latexo Kaleli mei latehe Serusalem. E taxeak, ngan xil ak di lasep usil naha xa latepusi mi Siu xil.^w

³²“E xosali, xamel Banabas mamei tangan malosep kil longeongen hos ak mi xamim. Naha xa Hi tehit xati mi avu nar xil tetiamu,^x ³³xosali, xi di pol ni be-mei be reitin mi xir, horamue nae xil. E rakila xa be reitin vengan xa tesak ni Iesu temeaa rilomun ra maten. Ngan ak nggoni ngan taxa Hi tehiteni usil Iesu e Sam xa be lu (2) tehit,

'Xouk obe Natuxoli, e xosali, inou mei nabe Tamom.' (Sam 2:7)^y

³⁴Hi tesak ni Iesu temeaa rilomun ra maten e tenamaen ni ti mun tangan tiei nan tenavo lel. Ngan ak nggoni ngan taxa Hi tehit usili tehit,

'Hitxatien eo xa natepol ni tetel Deved, nipol ni mun itel xamim.' (Aes 55:3)

³⁵E Deved tehit lelen ni e Sam teimun tehit,

'Hi Suv, onamaen ni ti tiei na moletin eo nam navolel ti e von maten.' (Sam 16:10)

³⁶E melele xa Deved tepol vuol ni holesok xil xa Hi teling xati tangan ipol ni e melele xa di tamu temeul, xi temat sung. E melele xa temat, latelingi tepat e von tehinen tetel avu nan xil, e tiei nan tevo

^o13:23 2Saml 7:12; Aes 11:1 ^p13:24 Mat 3:1-2,5; Mak 1:4-5; Luk 3:3 ^q13:25 Sion 1:20; Mat 3:11; Mak 1:7; Sion 1:27 ^r13:26 Pol 13:16 ^s13:27 Pol 3:17
^t13:28 Mat 26:60; Mak 14:55,56,59; 15:14; Luk 23:4,14,15,22; Sion 18:38; 19:4,6; Mat 27:22-23; Mak 15:13-14; Luk 23:21,23; Sion 19:6,7,15
^u13:29 Mat 27:59-60; Mak 15:46; Luk 23:53; Sion 19:38,41-42
^v13:30 Pol 2:24,32; 3:15; 4:10; 5:30; 10:40; 17:31 ^w13:31 Pol 1:3; Luk 24:48; Pol 1:8; 2:32; 3:15; 5:32; 10:39,41 ^x13:32 Pol 13:23 ^y13:33 Hib 1:5; 5:5

lel.^z ³⁷ E ngan xa Hi tesak ni temeaa rilo-
mun ra maten, tiei nan tenavo lel ti.

³⁸ “Tuxoli xil, xamel di mabithiten lon-
geongen hos ak mi xamim vengan xa
iemel bei tangan mukil kuhi xa moletin
ak be suse xa e isak ni Hi iketeh ihos mi
moletin xil ixo en.^a ³⁹ Reitin, nggo naha
xa Iesu tepol ni, ngan xil vus xa laling
neketen nae en mei lameluv ra tesaen
xil xa rae xil na Mosis misakras valeh rat
xil rani.^b ⁴⁰ Misak ni, muxuxou kuhi ten-
gan pangasien xa Hi tehiti leleni ni texo
provet xil namei ti e xamim texoni ngan
xa tehiteni tehiti,

⁴¹ *‘Muteong ni nou! E melele ak xa xamim
mumeul tamu mudi, di napol ni polien
tei xa mahulong.*

*Tave ti neta xosxa moletin tei imei e ihit kil
polien ak mi xamim, musakras muke
reitin en.*

*E vengan xa di munem male ni, nisa pan-
gasien tei mi xamim xa isa pupu.*

*!E melele xa pangasien ak imei, mutemanin
ni e mumat ve ulikanen!’” (Hab 1:5)*

⁴² Melele xa Pol xal Banabas lusepin
bus e lube hale ra nim te pispisien, mo-
letin xil lasis xalu tangan lalitolomun e
Sabat xa itutou imei tangan lalisep usil
holesok xil ak vatei mun. ⁴³ Melele xa
totanen ak bus e moletin xil di latetasil,
xil holu langgusil Pol xal Banabas. Rute
xil labe Siu e rute sav xil di langgusil Hi
na Siu xil. E xalu lusepin mi xil e lusel xat
xil tangan lixulehi liling nenesien nae e
Hi xa di pisen eheien hos nan mi moletin
xil.^c

⁴⁴ Melele xa Sabat sav bemei, sanga
moletin xil vus te taon te hal Pisitia An-
tiok lamei tangan lalong sepinien nalu
usil Suv Iesu. ⁴⁵ E melele xa Siu xil la-
pus vanut moletin xil xa mahulong xiak,

lanem misa ni xalu. Misak ni, laseputut
ba mi Pol e lasep sisin holesok xil vus
xa di misep usili.^d ⁴⁶ Ma Pol xal Banabas
lusepin nggeih ba ni xil lubit, “Momal
tangan mamei e masep kokot ni sepinien
na Hi mi xamim Siu xil. E vengan xa
xamim di musin ni, ma di pisen ni xa
mutapin ti tangan muvur meulien sal.
Misak ni, xosali di mabe reling xamim, e
maba sung mi ngan xil xa latave Siu ti.^e

⁴⁷ Ngan ak nggoni ngan taxa Hi Suv tese-
mae mi xamel tangan malipol ni tehiti,
*‘Nisak ni xouk mei uhe laet tei xa ileluy
kuhi iha ituxoh moletin xil te kantri
sav xil,*

*tangan usa longeongen mi moletin xil vus
te ut etan xa inou nimei tangan niteh
meulien e xil.’” (Aes 49:6)*

⁴⁸ Melele xa ngan xil xa latave Siu ti la-
longe mak, labesi xil pupu e lapet rat
sepinien na Hi. E ngan xil vus xa Hi teho-
sei xil tangan lihur meulien sal, xil laling
neketen nae e Iesu.^f

⁴⁹ Ma longeongen hos usil Suv Iesu
miloh mikapis e ut xil ngasen te rute ak.

⁵⁰ E rut Siu xil labe Pisitia Antiok tangan
lihiles nenemien na moletin xil tangan
mei linem isa iha ni Pol xal Banabas. Ma
ba lapus rut vat xil del rut atou ngan xil
mun xa labe eilep e di langgusil neketen
na Siu xil. Ve rin ak, lasi petine moletin
xil tangan lisak purun xalu e lihol rerat
xalu ra taon nae.^g ⁵¹ E melele xa Pol xal
Banabas luba, lutamea lubas rat meas te
taon ak ra kaelealu tangan vahe selxa-
tien tei mi xil usil pangasien xa Hi isa
ni mi xil ven. Di, luba lube taon te hal
Aekoniam.^h ⁵² E moletin xil te hal Pisi-
tia Antiok xa lateling neketen nae e Iesu
labesi xil holu e xeihen te Ninin Eo be-
mei polu e xil.

^z13:36 1King 2:10; Pol 2:29; Sats 2:10 ^a13:38 Pol 10:43; Hib 9:9

^b13:39 Rom 4:25; 6:7; 10:4 ^c13:43 Pol 11:23; 14:22 ^d13:45 Pol 14:2

^e13:46 Pol 3:26; Rom 1:16; Luk 7:30; Pol 18:6 ^f13:48 Pol 11:18

^g13:50 Pol 17:4,12 ^h13:51 Mat 10:14; Mak 6:11; Luk 9:5; 10:11; Pol 18:6

**Rut Siu xil langgol rat Pol xal
Banabas ra taon te hal Aekoniam**

14 Melele xa Pol xal Banabas lunggusil sexien matu nalu e lube *nim te pispisienna Siu* xil. Melele xa lupispisi bus, Siu xil holu del ngan xil xa latave Siu ti mei laling neketen nae e Iesu. ²E rut Siu xil xa latake reitin ti e pispisien nalu, lasi petine ngan tesav xil xa latave Siu ti tangan linem isa iha xat ngan xil xa labe Kristin.ⁱ ³Pol xal Banabas ludi be nousav e rute ak e ulixalu takan ti tangan lalosetu kuhi mi moletin xil usil eheien hos na Iesu. E Suv di pisen ni xa sepinien nalu be reitin nggo xeihen xa misa ni mi xalu tangan lupol ni merekel xil e sexien sav xil xa tellep.^j

⁴Ma moletin xil te taon te hal Aekoniam ladi pas xil be vanute lu: vanute tei ladi e rin na Siu xil, e vanute sav ladi e rin na *eloheoh* xalu. ⁵E Siu xil e ngan xil xa latave Siu ti, del vat nae xil, lapol ni lingxatien tei tangan lasak purun xalu e ha lavov vin xalu.^k ⁶E melele xa eloheoh xalu lulongeong ni lingxatien ak, lulesae lube tan te hal Laekonia. E rute ak ba ludi e taon xalu te hal Derbi xal Listra e rute sav xil mun xa ladi sangas visal xalu.^l ⁷E rute xil ak, xalu di lubithiten longeongen hos usil Iesu mi moletin xil vus.

**Moletin xil te hal Listra lanemi labit
Pol xal Banabas lube hi lu**

⁸E taon te hal Listra, moletin tei da en xa misakras vakakao vengan xa len xalu tesa melele xa latepesi.^m ⁹Xi dotan tang da e di miteong ni sepinien na *Pol*. Pol pusi e pus kila xa neketen nan pipin ten-

gan mei ihos. Ma miketeh momal niⁿ ¹⁰e mikei ba mini bit, “!Xouk, tamea soh!” Melele xa moletin ak milonge mak, but be nesao e mikakao.

¹¹Melele xa vanut moletin xil ak lapus holesok xil xa tellep ak xa Pol di pol ni, xil lakei nggeih nggo sepinien nae te hal Laekonia labit, “!Ngan xalu ak lube hi lu xa lutexo ut nesao xa lutehiles vexalu mei lunggoni moletin!”^o ¹²Ma lakes Banabas ni ‘hi *Sius*’ e Pol ni ‘hi *Hermis*’ vengan xa Pol be tei e xalu xa di misepin e rin nalu. ¹³Sangas ni taon ak, nim eo tei da xa moletin xil te rute ak latepeti tangan ti limot mi hi Sius en. E melele xa *pris* teni nggur longeongen usil xalu, be-mei visal xalu e puiteh te vioh te taon ak del xat buluk lu xa lasoxolen hungovae de huraealu. Pris ak del vanut moletin xil labit lavas buluk xalu ak vahe sanien eo tei nae mi eloheoh xalu.

¹⁴Melele xa Pol xal Banabas lule kil naha xa xil labit ti lipol ni, lulonge misa pupu. Ludal papas eising nalu e luloh lube hilaep te vanut moletin xil ak e lukei nggeih lubit, ¹⁵“!Moletin xil! ?Veneh ma di mupol ni sexien xil ak? !Xamel mabe moletin tang manggoni xamim! Mamei inggak tangan malosa longeongen hos na Hi mi xamim. Xi bit muviles ra nanao votei xil ak e mumot mini kestang. Xi iaxa meul e tepol ni ut nesao e ut etan, tas del holesok xil vus xa ladi e xatel.^p ¹⁶Tetiamu, xi temaen moletin xil te kantri xil vus tangan lavusil nenemien nae xil tang e di lamot mi hi sav xil.^q ¹⁷E tave ti neta xa latakil ti, xi di pisen xi mi xil nggo sexien hos nan xil. Di misa us mi xamim nggo ut nesao e mei mikas anien samim xil e naho tangan lameul kuhi. Xi bos pupu nggo rin

ⁱ14:2 Pol 13:45 ^j14:3 Mak 16:20; Pol 19:11; Hib 2:4

^k14:5 Pol 14:19; 2Tim 3:11 ^l14:6 Mat 10:23 ^m14:8 Sion 9:1; Pol 3:2

ⁿ14:9 Mat 9:28 ^o14:11 Pol 28:6

^p14:15 Pol 10:26; Tem 5:17; Eks 20:11; Sam 146:6 ^q14:16 Pol 17:30

xa di misa anien holu mi xamim e di pol ni di mubesi xamim.^r 18 E tave ti neta xa xalu lusa sepinien xil ak, sangas lal-sakras lalosikoe xol moletin xil ak teng-an linavas buluk xalu ti ak nave sanien eo nae mi xalu.

19 Melele xa Pol xal Banabas ludi tamu e taon te hal Listra, rut Siu xil langgo taon te hal Pisitia-Antiok e taon te hal Aekoniam mei lastal e Listra. Xil labil-hiles nenemien na moletin xil ak teng-an lanem vasa vaha xat eloheoh xalu. Ma rut moletin xil lamei langgov Pol. Di, lalihi tenben ba laso ni be reling taon nae vangan xa lanemi labit langgov vini ngamu.^s 20 E dutou sung, Kristin xil labe rute xa lateso tenbe Pol en e lakapis xole. Vatei takes, xi mitamea e dilomun be Lis-tra del xil. Ut milan, xal Banabas luba sung e taon te hal Derbi.

Pol xal Banabas ludilomun lube sias te hal Antiok

21 E taon te hal Derbi, Pol xal Banabas lusetu ni longeongen hos mi moletin xil, e xil holu mei laling neketen nae e Iesu. Di, ludilomun lunggusil suse nalu lube taon xalu te hal Listra xal Aekoniam. Di, lunggur sal ni lube taon te hal Pisitia An-tiok. 22 E ut xil ngasen ba lusao ni Kristin xil, e lusel xat xil teng-an lipol ni nene-mien nae mei ixeh mu teng-an lisoh ix-eih e neketen nae. Di lupispisi mi xil lu-bit, “Teng-an xir rakila rave rute xa Hi be suv toto en, rihusil suse te sakpurunien xil.”^t 23 E sias xil ngasen xa lusao ni, di luling elda xil teng-an lilaxat Kristin xil. E diamu ni melele xa lubit laloha, xalu lubal ni anien e lusi mi Suv Iesu teng-an ilaxat kuh elda xil xa laling neketen nae en.^u

24 Di, lunggusil rilomun ni suse nalu ba lunggur xoteh tan te hal Pisitia e lube provins te hal Pampilia. 25 E rute ak, xalu lusetu ni sepinien na Hi e taon te hal Perka. Di, lupol ni mak tang e taon te hal Atalia. 26 E taon ak, lube tuturil tei e ludilomun lube taon xa mahulong te hal Antiok. Antiok tehe rute xa moletin xil lateling hexil e xalu teng-an Hi iti mi xalu e polien te kakaoen nalu. E taxeak, lupol vuol ni.^v

27 Melele xa mei lustal e taon te hal Antiok, luleh viton ngan xil te sias. Melele xa lamei vituei bus, xalu lutumul usil holesok xil vus xa Hi tepol ni texo polien nalu. Lusep kila xa Hi tesah suse mi moletin xil xa latave Siu ti, e mei lal-ing neketen nae e Iesu.^w 28 E Pol xal Ban-abas ludi aveti vahis del Kristin xil e rute ak.

Kristin xil lakila mei lamal pe met Hi nggo neketen nae e Iesu Kristo kestang e taxo rae na Siu xil ti

15 Melele xa Pol xal Banabas ludi tamu e taon te hal Antiok, rut moletin xil langgo provins te hal Sudea lamei teng-an lasao ni Kristin xil. E melele xa lamei, di lapispisi mi Kristin xil te hal Antiok labit, “Rae xil na **Mo-sis** biteni bit Hi misakras vateh meulien e xamim xosxa munave **vexahu** ti.”^x 2 Melele xa **Pol** xal Banabas lulonge mak, xalu lungor pupu del xil usil rin ak. Misak ni, Kristin xil te hal Antiok labo-sei Pol, Banabas, del rute sav xil mun teng-an lihe **Serusalem** e ha lisep tetavoe usil rin te vexahu itel **eloheoh** xil e elda xil te Sias.^y 3 Melele xa ngan xil te sias te hal Antiok lasil xil e di lakakao laba, lasao ni Kristin xil e rute xil vus e tan

^r14:17 Sam 147:8; Ser 5:24 ^s14:19 Pol 17:13; 2Kor 11:25; 2Tim 3:11

^t14:22 1Tes 3:3; Pol 15:32; 18:23; 11:23; 13:43 ^u14:23 Pol 13:3

^v14:26 Pol 13:1-2; 15:40 ^w14:27 Pol 15:4,12; 11:18; 13:47-48

^x15:1 Kal 5:2; Lev 12:3 ^y15:2 Pol 11:30; Kal 2:1

te hal Ponisia del provins te hal **Same-ria**. E melele xa lapus xil, labit mesen ni mi xil tetep iaxa moletin hao xa latave Siu ti di latehiles meulien nae e mei laling neketen nae e Iesu. Longeongen ak misak ni Kristin xil ngasen ak labesi pupu ni xil.

⁴Melele xa laduxoh Serusalem, eloheoh xil, elda xil, e moletin sav xil mun te sias langgur pilei xil. Di, Pol xal Banabas lutumul usil holesok xil vus xa Hi tepol ni mi ngan xil xa latave Siu ti texo xalu.^z ⁵E melele xa xalu di tamu lusepin, rut **Farasi** xil xa mei latehe Kristin xil lasoh e labiteni labit, “Xosxa ngan xil xa latave Siu ti iexil bei tangan mei lamos e xir, bos xa xil mun lihe vexahu e lilong xat **rae xil na Mosis**.”

⁶Di, eloheoh xil del elda xil mei ladotan vituei e kaonsel tei tangan lalepis rin te vexahu ak del rin te rae xil na Mosis mun. ⁷Lasep tetavoe usili be nousav. Di, Pita misoh e biteni mi xil bit, “Tuxoli xil, xamim vus mukila xa, tetiamu, Hi tehosei nou ra xamim tangan ha nihithiten longeongen hos usil Iesu mi ngan xil xa latave Siu ti tangan lilonge e liling neketen nae en.^a ⁸E Hi, xa mikil vuol ni nenemien na moletin xil, tepisen ni xa xi temaen ngan xil ak xa latave Siu ti mei labe moletin nan xil melele xa tesa **Ninin Eo** mi xil texoni ngan xa tesa ni mi xir. ⁹Naha xa Hi di pol ni mi xil pipin tang ni naha xa tepol ni mi xir. Ngoni xir, xi mikas moten meulien nae ra tesaen venganae laling neketen nae e Iesu.^b ¹⁰?Ma tax-eak, veneh ma di musak pis Hi melele xa mubit muling rae na Siu xil mei vameas

xat vatuvu ngan xil latave Siu ti? Vengan rae xil ak lameas pupu, e xir del avu nar xil tetiamu rasakras rapoe.^c ¹¹!Rinapol ni ti namak! Xir xa raling neketen nar e Iesu, di rake reitin xa rihur meulien sal ixo eheien hos nan kestang. Ma xil mun imak tang.”^d

¹²Melele xa Pita misa sepinien xil ak bus, ngan xil vus te kaonsel ak ladit votei e lamaen Banabas xal Pol lutumul usil merekel xil e holesok xil xa tellep xa Hi tepol ni texo xalu mi moletin xil xa latave Siu ti.^e ¹³E melele xa xalu lusepin bus, vat na elda xil te sias, hisen Temis, mea e misepin mi xil bit, “Tuxoli xil, muteong ni nou. ¹⁴Saemon Pita misep kila ngamu tetep iaxa Hi tepisen eheien nan tetiamu mi ngan xil xa latave Siu ti e teleh rerat rute e xil tangan mei lihe moletin nan xil e ti lipet rat hisen.^f ¹⁵Sepinien na Saemon Pita nggoni sepinien xa Hi tehit lelen ni texo **provet** xil tetiamu tehit,

¹⁶*Itutou ni holesok xil ak, inou nitilomun e nipol ni vatimol na suv toto Deved isoh rilomun.*

Reitin li, neta sav xa vatimol nan temot, inou nipol ni isoh ixeh mu.^{††}

¹⁷*Nipol ni imak tangan moletin sav xil te ut etan likila limei visal nou ixo en.*

Reitin, ngan xil xa latave Siu ti xa natehosei xil labe navan, xil limei visal nou.

¹⁸*Ngan ak be sepinien navan xa nabe Hi Suv xa natehit mesen ni nousav teme.*” (Amos 9:11-12)^g

¹⁹Di, elda Temis biteni mun bit, “Ngan ak be nenemien navan. Nanemi nabit bos xa rinapol ni ti naxeih pupu mi ngan xil xa latave Siu ti xa di lasa meulien

^{††}**15:16** Vatimol na suv toto Deved di misep usil Iesu, xa Hi tesak ni temea rilomun ra maten. E Hi tesak ni Iesu mei be suv toto na moletin xil ngasen, Siu xil e ngan xil mun xa latave Siu ti.

^z**15:4** Pol 14:27; 15:12 ^a**15:7** Pol 2:4; 10:1-44; 11:15 ^b**15:9** Pol 10:34-35

^c**15:10** Pol 15:19; Kal 5:1 ^d**15:11** Kal 2:16; Efes 2:5-8

^e**15:12** Pol 14:27; 15:4 ^f**15:14** Pol 15:7-9; Luk 1:68 ^g**15:18** Aes 45:21

nae xil mi Hi. !E-e!^h ²⁰ E bos xa risa uvei iha mi xil, e risep xol xil tangan linaxa ti anien xil xa latesa ni tehe sanien eo teha mi nanao xil vengam xa ngan ak tamese ti pe met Hi. Linaxa ti ra, mu hisi te vongoro xil xa lasar xoteh huraexil tang e latnatei xoteh huraexil ti tangan ra valeh rani. E xil linapat ti natel atou mu tiramue sav xil xa latateli ti vatel xil.ⁱ ²¹ Mormal tangan lihusil xat rae xil ak vengam xa e taon xil vus xa Siu xil ladi en, di lispisi ni rae xil ak na Mosis mi xil. Vengam xa, tetiamu bemei duxoh xosali, e **Sabat** xil vus, moletin xil di lalong kil rae xil na Mosis melele xa di labuli e **nim te pispisien**xil.”^j

Vat xil te Sias labit mesen ni xa ngan xil xa latave Siu ti linahusil rae xil na Siu xil ti tangan mei lave moletin xil na Hi

²² Di, ngan xil vus te sias te hal Serusalem lamaen ni tangan eloheoh xil e elda xil lihosei rut moletin nae xil tangan lisil xil lihe taon te hal Antiok itel xat Pol xal Banabas. Ma labosei vat lu te Sias tangan laliha, hisealu Saelas del Sudas (xa hisen tei mun Barsabas). ²³ E lasa uvei ak mi xil tangan lihuri liha. Uvei ak biteni mak bit,

“Xamem, eloheoh xil del elda xil, mabit mavit bos makoe mi xamim, tua namem xil xa mutave Siu ti xa mudi taon te hal Antiok, e rute sav xil e provins te hal Siria e provins te hal Selisia.

²⁴ “Malongeong ni xa rut moletin namem xil latehat e latesa sepinien tei xa tepol ni lemim temalili e nenemien namim tenata kat ti. Xamem matnasa ti sepinien tova mi xil tangan lavat laviteni mi xamim va-

mak.^k ²⁵ E xamem matetotan vituei e matemei e nenemien tei takes. Matehosei moletin lu e di masil xalu lubat tangan lalihit mesen nenemien namem usil rin namim mi xamim. Xalu di luka vituei del xat Banabas xal Pol xa lube tua hos nar. ²⁶ Ngan xalu ak, sangas meulien nalu tekesae ve polien na Iesu Kristo, Suv nar. ²⁷ Ma masil Sudas xal Saelas lubat. Xalu lalihit rat sepinien xil taxa mormal ni ngan xa madisi xiak. ²⁸ Ninin Eo bit bos tangan nasa ti mun rae xil mi xamim, ma xamem mun mamae en tangan munasa ti mun rae xil xa meas nati xat vatuvumim. E muhusil kes ni hisit rae xil xa latellep xiak:^l ²⁹ munaxa ti anien xil xa latesa ni tehe sanien eo teha mi nanao xil; munaxa ti ra; munaxa hisi te vongoro xil xa ra di tamu en; munaxa ti mun vongoro xil xa latesar xoteh huraexil tang e latnatei xoteh huraexil ti tangan ra valeh rani; e munapat ti natel atou mu tiramue sav xil xa mutateli ti vatel xil. Xosxa muhusil kuh rae xil ak, ma ihos pupu mi xamim.^m

“Ngan ak be hoxalit sepinien namem. Bos mahis mi xamim vus.”

³⁰ Ma sias te hal Serusalem lasil Sudas, Saelas, Pol del Banabas latobe Antiok. Melele xa laduxoh rute ak, lakes viton Kristin xil vus e lasa uvei ak mi xil. ³¹ Melele xa moletin xil labuli, labesi xil himetu ve sepinien te selxatien xil xa di en. ³² Sudas xal Saelas lube provet, e lusepin teviei del xil. Lupet rat nenemien nae e lusak ni xil lasoh nggeih mu e neketen nae.ⁿ ³³ Sudas xal Saelas ludi vituei del Kristin xil te hal Antiok be nousav vuteili. E melele xa lubit laloha rilomun e Serusalem, Kristin xil lasil xalu

^h15:19 Pol 15:10 ⁱ15:20 Sen 9:4; Lev 3:17; 17:10-14 ^j15:21 Pol 13:15

^k15:24 Pol 15:1 ^l15:28 Mat 23:4 ^m15:29 Sen 9:4; Lev 3:17; 17:10-14

ⁿ15:32 Pol 11:27; 13:1; 14:22; 18:23

del xat tomat na Hi tangan laltilomun lalihe visal ngan xil xa latesil xalu lute-mei. ³⁴E Saelas bit ita tamu visal xil.

³⁵E Pol xal Banabas ludi nousav vuteili e Antiok. E melele xa ludi tamu e rute ak, xalu del moletin sav xil holu mun di lapispisi mi moletin xil xa e di lasetu ni sepinien na Suv mi xil.

Pol xal Banabas luseti xalu

³⁶Melengien holu mei mitavi, e vatei, Pol biteni mi Banabas bit, “Bos xa raltilomun ralihe taon xil xa ratehithiten sepinien usil Suv Iesu en, e ha ralisao ni ngan xil xa di laling neketen nae e Iesu e ralipus ti xa ladi midep.” ³⁷Banabas mae en, e bit bos xa lalihur Sion Mak ihe xatel.^o ³⁸E Pol minemi xa tamal ti tangan lalihuri, vengon xa, tetiamu, melele xa tehusil xat xalu lattehe taon te hal Pampilia, Sion Mak tehiles nenemien nan e testokovein polien nan xa tepol ni tetel xalu teta nga. Di, telesae reling xalu e tetilomun tehe tim san e Serusalem.^p ³⁹Ngongoren na Pol xal Banabas mei nggeih e misak ni luseti xalu. Ma Banabas nggur Sion Mak ba lubut e tuturil tei lube aelan te hal Saepras.^q ⁴⁰E Pol bosei Saelas tangan ihe xalu. Di, Kristin xil lasis ve xalu tangan Hi Suv te eheien hos ilaxat kuh polien nalu.^r ⁴¹Di, Pol xalu ba di lukapis e provins te hal Siria e Silisia e di lusao ni Kristin xil e sias xil. E lusak ni xil mei lasoh nggeih mu e neketen nae.

Pol xal Saelas lumaen Timoti mei pol vituei del xalu

16 E kakaoen na Pol xal Saelas, lusao ni taon xalu te hal Derbi e Listra. E rute ak, horam maxoe tei da xa miling neketen nan e Iesu, hisen Timoti.

Ninen be Siu tei xa xi mun be Kristin, e tamen be ngan **Krik**.^s ²Kristin sav xil te hal Listra e Aekoniam lanemi labit Timoti be moletin hos tei.^t ³Misak ni, **Pol** pol ni nenemien nan tangan lalihur Timoti ihe xatel e kakaoen natel. E diamu, Pol misak ni Timoti ba be vexahu, vengon xa mikila xa ti lihisu mi **Siu** xil e rute xil xa liha en xa lakila xa tame Timoti tave Siu ti. E Pol ien ti tavei tangan Siu xil lanem male ni Timoti ven.^u

⁴Melele xa Pol, Saelas e Timoti latoba, latkakao latobe taon xil holu. E taon xil vus, latbit mesen nenemien na **eloheoh** xil del elda xil te sias te hal **Serusalem** usil rae vahis tang xa latesis Kristin xil xa latave Siu ti tangan lilong xati.^v ⁵Ma e sias xil vus, Kristin xil mei langgeih pilei mu e neketen nae. E, e melengien xil ngasen, moletin sav xil holu mun lamei lamos del xil.^w

Nggo metuveen tei, Hi pisen ni mi Pol xa iha ihithiten longongen hos usil Iesu Kristo e provins te hal Masedonia

⁶E kakaoen na Pol xatel Saelas e Timoti, **Ninin Eo** tamaen xatel ti tangan latohe provins te hal Esia tangan lati-hithiten sepinien na Hi en. Misak ni, xatel latnggot tan te hal Frikea e provins te hal Kalesia. ⁷E melele xa latduxoh haxot te provins te hal Misia e provins te hal Bitinia, **Ninin Eo** na Iesu tamaen xatel ti tangan latohe Bitinia. ⁸Ma xatel latkakao latoba latnggo provins te hal Misia e ba latbe taon te hal Troas.

⁹Melele xa latodi e Troas, e vongien nen tak, Pol metuve e pus moletin tei te provins te hal Masedonia. Moletin ak misoh e di mikesi bit, “!Amei li e Masedonia! !Mei tutou ni xamem li!” ¹⁰E makoe, melele xa Pol milale, minem kila

^o15:37 Pol 12:12,25 ^p15:38 Pol 13:13; Kol 4:10 ^q15:39 Pol 4:36; 13:4

^r15:40 Pol 14:26 ^s16:1 Pol 14:6; 2Tim 1:5 ^t16:2 Plp 2:20,27

^u16:3 Kal 2:3-5 ^v16:4 Pol 15:23-29 ^w16:5 Pol 2:42; 5:14; 6:7

xa Hi ien bei tangan xatel latihe provins te hal Masedonia tangan latihithiten lon-geongen hos mi moletin xil en. Misak ni, latbue xat xatel. E inou mun, Luk, namos e xatel[‡] e kakaoen natel matoba.

Atou tei te hal Pilipae mei miling neketen nan e Iesu

¹¹ E taon te hal Troas, xametel matbe tuturil tei e matnggur xoteh tas matbe aelan te hal Samotres. Di, e makoe nen, tuturil ak be ut e taon te hal Neapolis. ¹² Di, matbe reling Neapolis e matkakao matbe taon te hal Pilipae xa be taon tei xa eilep e provins te hal Masedonia. E kavmen te hal Rom tesil mol-Rom xil holu tangan ha liti en. Xametel matdi en melengien vahis.

¹³ E **Sabat**, matbe reling taon e matbe rute tei sangas ni oeisal tei. Matonemi matobit rute ak iaxa be von sisen na Siu xil. Ma matdotan e di matsepin del atou votei xil xa mei ladi vituei ngamu. ¹⁴ Tei e xil xa di miteong ni sepinien nametel, hisen Lidia. Xi te hal Taeatira e di inggak tangan vapos ni kaliko xil xa bihili e bos pupu. E tave ti neta xa tave Siu ti, xi mike reitin e Hi e vehakut di mot mini. E melele xa Lidia milong naha xa Pol di misepin usili, Hi misah puiteh e meulien nan tangan vakei reitin en. ¹⁵ Ma, e melengien nen tak, Lidia del ngenen xil vus lamaen Pol **baptaes** ni xil. Di, misis xametel bit, “Xosxa mutbit nabe moletin na Hi reitin, mei mutti e nim mavan.” Ma matmaen ni ba matodi e nim man.^x

Moletin xil te hal Pilipae laso Pol xal Saelas lube nim te xeih

¹⁶ Vatei, matoba tangan mathe von sisen e hal Pilipae, e melele xa matoba,

[‡]**16:10** Luk xa tetis uvei ak temos e xatel e hal Troas.

^x**16:15** Pol 16:33; 18:8 ^y**16:16** Pol 19:24

^z**16:17** Mak 1:24,34; Luk 4:34,41 ^a**16:18** Mak 16:17; Pol 19:13

^b**16:20** Pol 17:6; 1King 18:17 ^c**16:22** Plp 1:30; 1Tes 2:2 ^d**16:22** 2Kor 11:25

matbisu mi atuli tei xa be slev. Atuli ak, **ninin tesa** tei da en xa misak ni mik-ila vahit lelen naha xa istal e melengien xil xa ti imei. Atuli ak, moletin xil holu lamei tangan lalong pis naha xa mei istal e meulien nae, e masta xil na atuli ak di latlihi mani xil holu nggo en.^y ¹⁷ Atuli ak di nggusil Pol e xametel e di mikei nggeih bit, “!Moletin xil ak labe slev xil na Hi xa mili hi sav xil! !Xil di lasep kil suse xa Hi iteh meulien e xamim ixo en!”^z ¹⁸ Melengien holu xi di pol ni mak e misak ni Pol ien mikat.^a

Ma, vatei, Pol biles biteni mi ninin tesa ak bit, “!E his Iesu Kristo, nasemae ni xoux tangan uhe reling atuli xai uha!” E vatakes, ninin tesa ak be relingi.

¹⁹ Melele xa masta xil na atuli ak lapus kila xa lasakras mun lalihi mani vaxo atuli ak, iexil mikat pupu. Ve rin ak, ladal xat Pol xal Saelas e ladel xalu lube von koten xa de hilaep te taon. ²⁰ Laling xalu ba lusoh pe met moletin xil te lepisien e labiteni mi xil labit, “Moletin xalu ak di lupol ni ngongoren holu e taon nar. Xalu lube Siu^b ²¹ e di lupispisi xa xir, mol-Rom xil, rihusil sexien nae xil. E **rae** nar xil bit rasakras rapol ni naha xa di labiteni.” ²² Melele xa moletin xil lalonge mak, xil vus lasepin nggeih ba xat Pol xal Saelas e lasak tangan lati xalu.^c

Di, moletin te lepisien xil lasemae ni moletin te vaen xil ladal papas eising na Pol xal Saelas e labas pangas xalu ni liei.^d ²³ Melele xa labas purun xalu bus, ba laso xalu lube nim te xeih. E labiteni mi vat te ni te xeih ak tangan ivar xat kuh xalu. ²⁴ Melele xa moletin ak milong sepinien ak, ba miso xalu lube namba sikis e bar xat le xalu del xat liei tei xa meas tangan lalsakras lalipol ni ti neta.

²⁵ E hilaep te vongien, Pol xal Saelas di luis e di lukikei ni sisien xil te memesien ba mi Hi. E ngan tesav xil mun xa ladi e nim te xeih di lateong ni xalu. ²⁶ E melele xa di tamu lupol ni mak, latemanin e lul tei xa nggeih milil, e misak ni nim te xeih ak mulul pupu. Puiteh xil vus lasaha e sen xil vus xa teti xat ngan xil xa ladi e nim te xeih lamea reling xil e lakiri labe tan.

²⁷ Lul ak misak ni vat te nim te xeih mitemanin holu. E melele xa mitamea, pusi xa puiteh xil vus milel e minemi bit vatxeih xil vus xa ladi e nim te xeih nan lalesae. Misak ni, milihi rat tiei te vaeen nan e bit vatil vin xi mun tang ni.^e ^{e28} E Pol mikei nggeih ba ni bit, “!Onahasuk ti! Xamem vus madi tak.”

²⁹ Ma vat ak mikei tangan lapo laet tova vamei. Di, miloh be rute xa Pol xal Saelas ludi en, mitingeiril pe metealu e len mulul pupu ve ulikanen. ³⁰ Melele xa miling kuh moletin sav xil e nim te xeih ak, midel Pol xalu lustal ra nim te xeih. Di, misis xalu bit, “?Suv xalu, nipol ni itep tangan Hi iteh meulien e nou?”^f

³¹ Xalu lubit rilomun lubit, “Uling neketen nam e Suv Iesu e xi iteh meulien e xouk, xouk itel ngenom xil vus.” ³² Di, lusa sepinien usil Suv Iesu mini e mi ngenen xil mun. ³³ E vongien nen tak, vat te nim te xeih ak mileh xalu e ba mikas moten menuk xil e vatuvualu e rute xa latehas xalu en. Di, Pol baptaes ni del ngenen xil mun tangan vapisen ni xa laling neketen nae e Iesu reitin.^g ³⁴ Di, vat ak nggur pilei Pol xal Saelas latbe ne-

sao e nim man, e misa anien mi xalu. E xil vus labesi xil holu vengan xa xil mei laneket e Hi.

³⁵ Melele xa ut milan, moletin xil te lepisien lasil polis nae xil be nim te xeih del sepinien ak, “Ha mumaen moletin xalu xai ha vexalu imase.”

³⁶ Ma vat te nim te xeih bit mesen ni mi Pol bit, “Moletin xil te lepisien lamaen xamil muliha vemil imase. Ma mukila mulistal muliha itel xat tomat na Hi.”

³⁷ E Pol bit rilomun ni mi polis xil ak bit, “Neta sav xa latnakamet ti naha xa xamel matepol ni xa tesa, latesemae ni tangan lavas purun xamel pe met moletin xil. Di, laso xamel mabe nim te xeih. E xamel mabe hortan xalu te kantri te hal Rom.^{§§} ?E taxeak, xil iexil bei tangan lasil xuxus ni xamel maloha? !E-e, namak ti! Xil tang limei e lihit sore mi xamel, e liling kuh xamel e suse namel sung.”^h

³⁸ Ma polis xil ladilomun ba labit mesen sepinien xil ak mi moletin te lepisien xil. E melele xa lalonge xa Pol xal Saelas lube hortan te kantri te hal Rom, ulixil mikan holu xa vat nae xil nalong ti xa latehas purun xalu votei tang. ³⁹ Ma moletin te lepisien laba labit sore nae mi Pol xal Saelas. Di, ladel xalu lustal ra nim te xeih e latsis xalu tangan lalihe reling taon nae.ⁱ ⁴⁰ Melele xa Pol xal Saelas lumea reling nim te xeih, ludilomun ba lupus Lidia. E nim man, lukes viton Kristin xil e lusel xat xil vatei mun ten-

^e16:27 Sexien na mol-Rom xil biteni bit xosxa moletin te vaeen tei maen moletin tei xa di miketeh xole ba ven mase, xi sung mei ihur pangasien na moletin ak.

^{§§}16:37 E melele nen ak, rae na mol-Rom xil biteni bit neta sav xosxa eilep nae xil labas purun movotei xil, e lasakras lapol ni mi ngan xil xa labe hortan xil te kantri te hal Rom. Hortan xil ha lisoh pe met moletin te lepisien mu. Ti, likila lisa pangasien teni mi xil sung.

^e16:27 Pol 12:18-19 ^f16:30 Pol 2:37 ^g16:33 Pol 16:15

^h16:37 Pol 22:25 ⁱ16:39 Mat 8:34

gan lisoh ixeih e neketen nae. Di, lunggusil suse nalu luba.*

**Rut moletin xil te hal Tesalonaeka
mei labe Kristin, e rut Siu
xil lasi petine moletin xil
tengan lisak purun xil**

17 Pol xal Saelas lukakao luba, lunggur sal lunggo taon te hal Ampipolis del Apolonia e mei lustal e taon xa mahulong te hal Tesalonaeka. E rute ak, *nim te pispisientei* na *Siu* xil da en.^j ² *Pol* be nim te pispisien ak nggoni ngan taxa di pol vehakut ni. *E Sabat* tol, xi di misep kil sepinien xil xa di e Vanuvei Eo na Hi mi moletin xil.^k ³ Pol pisen ni memese mi xil xa Vanuvei Eo tehit lelen ni xa Mesaea na Hi imei, ilong pangas xi, ha imat, ti, imea rilomun ra maten. Biteni mak bit, “Mesaea xa Hi tehit xati xiak, ngan ak be Iesu xa di nasep usili mi xamim.”¹ ⁴ Rute xil xa lateong ni sepinien nan lake reitin en e mei lamos e Pol xal Saelas. Mol-Kris holu xa lamot mi Hi, del rut atou xil te rute ak xa labe eilep langgusil xalu.^m

⁵ E melele xa Siu xil lapusi mak, lanem misa ni xalu. Ma laleh viton vatxeih tatei xil xa labe te suse tang, e lasis xil tenggan lisi petine moletin xil te hal Tesalonaeka tenggan lisak purun Pol xal Saelas. E melele xa di lalang ves Pol xal Saelas tenggan laleh xalu lalohe kot, lapol ni rumen tei xa eilep e moletin xil holu langgusil xil. Lanemi labit xalu ludi nim ma Tiesen, ma ba langgulen puiteh te nim man.ⁿ ⁶ E melele xa latakamet ti xalu, xil ladal xat Tiesen del rut Kristin xil mun e

lalihi xil mei lasoh pe met vat xil te taon ak tenggan lapol ni kot vaha xat rin nae. Vatxeih xil ak lakei nggeih ba xat rin nae labit, “!Moletin xil xai di labilhiles nenemien na moletin xil vus te ut etan! E taxeak, xil lamei tenggan lapol ni e taon nar.”^o ⁷ E Tiesen xai di nggur pilei xil e nim man. Xil vus di langgur xoteh rae xil na suv toto nar te hal Rom venggan xa di lapet rat suv toto tei mun xa di lakesi ni Iesu.”^p

⁸ Melele xa vat xil del moletin sav xil lalong sepinien ak, iexil mikat pupu ven. ⁹ Misak ni, lasemae ni Tiesen del ngan tesav xil tenggan lisa mani tova xa eilep mi xil labit, “Xamem muleh xat mani e namim xil ak. E xosxa tuemim xalu lalipol ni neta tei mun xa isa, ma mani namim xil ak ikesae reling xamim mei ihe mani namem sung.” Di, lamaen xil laba.

**Moletin xil te hal Beria mei
laling neketen nae e Iesu**

¹⁰ Melele xa vongien bemei, Kristin xil te hal Tesalonaeka lasil Pol xal Saelas lube taon te hal Beria tenggan vasikoe xol meulien nalu. E melele xa ba lustal e hal Beria, luka sal lube nim te pispisien na Siu xil. ¹¹ Lukameti xa moletin xil te taon ak langgur pilei sepinien nalu mili Siu xil te hal Tesalonaeka. Misak ni, e melengien xil vus, labuli kuhi ni Vanuvei Eo na Hi tenggan lalang ves pis reitinen te naha xa Pol di pispisi ni mi xil.^q ¹² Misak ni, holu e Siu xil del mol-Kris tatei xil e ate-Kris xil holu xa labe eilep e hal Beria mei laling neketen nae e Iesu.^r ¹³ E

* **16:40** Rakila xa Pol miling Luk dat e taon tehal Pilipae venggan xa, e sepinien xil xa itutou, Luk tamos ti mun e xil. Melele xa Pol isao rilomun ni Kristin xil e hal Pilipae e 20:5, Luk ihusili rilomun.

^j**17:1** ¹Tes 2:1-2 ^k**17:2** Luk 4:16; Pol 9:20; 17:10,17

^l**17:3** Luk 24:26; Pol 3:18; Luk 24:46; Pol 9:22; 18:5,28

^m**17:4** Pol 13:50; 17:12 ⁿ**17:5** 1Tes 2:14 ^o**17:6** Pol 16:20

^p**17:7** Luk 23:2; Sion 19:12 ^q**17:11** Sion 5:39 ^r**17:12** Pol 13:50; 17:4

melele xa Siu xil xa ladi Tesalonaeka langeong ni xa Pol di bithiten sepinien na Hi e taon te hal Beria, xil labe rute ak mun. Mei lasi petine moletin xil te hal Beria tangan lisak purun Pol xal Saelas.^s

¹⁴Vatakes, Kristin xil te hal Beria lasil Pol ba be bien tangan vahur tuturil tei. E Saelas xal Timoti ludit e Beria. ¹⁵Rut Kristin xil ladel Pol labe taon te hal Atens, e laling pilei e rute ak. Di, ladilomun labe Beria del xat sepinien na Pol xa biteni bit Saelas xal Timoti laltemanon mei lalipusi e taon te hal Atens.

Pol bithiten longeongen hos usil Iesu Kristo mi moletin xil te hal Atens

¹⁶Melele xa Pol di datil Saelas xal Timoti e taon te hal Atens, xi milonge misa pupu vengan xa pusi xa nanao na hi sav xil labe holu tova tang e rute xil vus te taon ak. ¹⁷Ma xi be nim te pispisien na Siu xil e di misep kil sepinien na Hi mi Siu xil del ngan xil xa latave Siu ti xa laneket e Hi. E melengien xil ngasen mun, be von bovarangen e taon ak e di misepin del xat hisit moletin xil vus xa di bisu mi xil.^t ¹⁸Rut moletin xil xa mei lasep tetavoe del Pol labe titsa na vanut moletin lu, tei lakesi ni Epikiurias,[†] e tei xalu mun lakesi ni Stoik.[‡] Xil lasis moletin xil usil pispisien na Pol labit, “!Ei! ?Unu xai di misep usil naha vari?”

E rut moletin sav xil labit, “Lehit moletin ak di misep usil hi sav tatei xil xa ratakil ti mu.” Labitenei mak vengana xa Pol di misetu usil ‘Iesu’ e ‘Mea Rilomunen.’

¹⁹Ma, vatei, lasis Pol tangan vamei e von totanen tei te taon ak xa lakesi ni ‘Ariopakas.’ Labitenei mini labit, “Xamem mabit makil ti pispisien hu nam iaxa di opispisi ni mi moletin xil. ²⁰Rut sepinien xil xa xouk di obitenei be neta hu mi xamem, e mabit makil ti koute teni.” ²¹Xil labitenei mak vengana xa moletin xil vus te taon xa mahulong te hal Atens e ngan halesav xil mun xa ladi en, vehakut, iexil bei tangan latumul e ti lateong usil holesok hu xil vus xa di mistal tangan likila ti lisep usili.

²²Ma Pol ba misoh pe met kaonsel te taon ak e moletin sav xil mun. Di, bitenei mi xil bit, “Inou napusi xa xamim, moletin xil te hal Atens, di mumerere kuhi ni hi namim xil nggo sexien namim xil vus. ²³Vengana xa, melele xa di nakakao nakapis e taon namim, napus kila xa di mumot mi holesok xil holu. E nakamet von moten tei xa latetis en latehit, ‘**Hor na Hi** xa xamem matakil ti.’ Misak ni, xosali, nihit kil Hi ak mi xamim, ngan xa di mumot mini, neta sav xa mutakil ti. ²⁴Hi ak tepol ni ut etan e holesok xil vus xa ladi en. Xi tasen iaxa be Suv te ut nesao e ut etan. E xi tara ti e nim mu hor tova xa moletin xil tang di lapol ni.^u ²⁵Xir rasakras ravatutou ni ni neta tova, vengana xa xi tasen tang iaxa be vatit meulien xa tepol ni moletin xil del holesok nae xil vus.^v ²⁶Nggo moletin tei takes, Hi ak tepol ni hisit moletin savsav xil e miling kekes ni xil e ut xil vus te ut etan tangan liti e tan nae xati. Reitin, xi tepol ni haxot te tan xa ladi en.

[†]17:18 Vanut moletin xil ak langgusil pispisien na moletin tei, hisen Epikiurias (342-270 BC). Xi bitenei bit hi xil lanem male ni moletin xil te ut etan. Misak ni bos mak mu tangan moletin xil lipol ni holesok xil xa isak ni limaal vehakut tang.

[‡]17:18 Vanut moletin xil ak langgusil pispisien na moletin tei, hisen Zeno (332-260 BC). Xi bitenei bit hi tovuol. Misak ni bos mak mu tangan moletin xil lameul e tomat itel holesok xil te ut etan e lilaxat kuh sexien e nenemien nae xil.

^s17:13 Pol 14:19 ^t17:17 Pol 18:19 ^u17:24 Sam 146:6; Aes 42:5; Mat 11:25; 1King 8:27; Pol 7:48 ^v17:25 Sam 50:12; Aes 42:5

E xi di buli xat melengien nae xil vus e mikil kuhi xa meulien nae ihe teviei itep.^w ²⁷ Xi tepol ni xil tangan ti lilang vesi ha vuma ... xos ti e xil likameti. Vengan xa xi tara ti sotin ra xir.^x ²⁸ Nnggoni ngan taxa moletin tei tehiteni xa tehit, 'Nggo xeihen nan kestang, xir di rameul, di rakakao e di rapol ni neta ngan.' E nnggoni ngan taxa rut moletin te tisen namim xil latetisi latehit, 'Xir mun rabe horamue nan xil.'

²⁹ "Reitin, e venganae xa rabe horamue nan xil, rakila xa Hi meul. Rinanemi ti rinahit xi tameul ti nnggoni nanao tei xa moletin pol ni nggo gol mu silva mu hat nnggusil metisouen e nenemien nan tang.^y ³⁰ Tetiamu, e melele xa moletin xil latnakil ti mu Hi, xi tenasa pangasien ti ve hisit tesaen xil vus xa latepol ni. E taxeak, xi di misemae ni moletin xil vus e ut xil ngasen tangan lihiles ra tesaen nae xil.^z ³¹ Xil lihiles meulien nae venganae xa xi teling xat Melengien te Lepisien ngamu. E tehosei moletin tei tuei xa ilepis rin na moletin xil vus te ut etan ihusil sexien xa imal. E rakila xa Hi tehosei moletin ak venganae xa tesak ni temea rilomun ra maten."^a

³² Melele xa moletin xil lalong Pol misep usil moletin tei xa temea rilomun ra maten, rute xil lapol pepamen ni e rute sav xil labiteni labit, "Iemem bei tangan mulong xouk usep usil rin ak e melengien sav tova sung."

³³ Ma melele xa Pol misepin bus, be reling xil e von totanen ak. ³⁴ E rut moletin xil langgusili e mei laling neketen nae e Iesu. Tei e xil tehe moletin tei te kaonsel ak, hisen Daionaisas. Atou tei mun teke reitin e sepinien na Pol, hisen

Damaris. Xalu del rut moletin sav xil mun.

Pol bithiten longeongen hos e hal Korin e moletin xil holu mei laling neketen nae e Iesu

18 Melele xa Pol misepin mi ngan xil te kaonsel te hal Atens bus, ba sung be taon xa mahulong te hal Korin. ² E inggak, Pol mikamet **Siu** tei, hisen Akuila xa be ngan Pontas. Xi teme'i rohon tang e Korin tetel atou nan xa hisen Prisila. Xalu lutexo Itali lutemei e Korin e melele xa suv toto Klodias tesa rae tei tehit Siu xil vus lihe reling Rom e litilomun lihe vonine xati. Ma Pol ba misao ni xalu.^b ³ Pol mikameti xa Akuila di pol ni nim tavolin xil. E venganae ngan ak be polien xati xa Pol di tepol ni tetiamu, Akuila xal Prisila lubit bos xa Pol ite visal xalu e latipol vituei.^c ⁴ E **Sabat** xil vus, Pol be **nim te pispisienna** Siu xil. E inggak, xi di misep tetavoe del xil e misak pisi tangan vahit kil reitinen usil Iesu mi Siu xil del ngan xil xa latave Siu ti tangan likila liling neketen nae en.

⁵ E melele xa Saelas xal Timoti lunggo provins te hal Masedonia lumei e taon te hal Korin e provins te hal Akea, **Pol** mistokovein polien nan te nim tavolin e misa xi tangan ihithiten longeongen hos kestang. Xi be nim te pispisien na Siu xil e bit kila mi xil xa Iesu be Mesaea xa Hi tehit xati tangan imei iteh meulien e moletin xil.^d ⁶ E xil lasin sepinien nan e di lasepsisili tang. Misak ni, Pol mirang rerat meas te nim te pispisien ak ra eising nan pe metexil tangan vahe selxatien tei mi xil xa Hi isa pangasien mi xil venganae xa latahur pilei xi ti mu longeongen hos xa ngguri. Pol biteni mi xil bit, "I!Be

^w17:26 Dut 32:8 ^x17:27 Aes 55:6; Sam 145:18; Ser 23:23

^y17:29 Sen 1:27; Aes 40:18-20; 44:10-17; Pol 19:26 ^z17:30 Pol 14:16; 17:23

^a17:31 Sam 9:8; 96:13; 98:9; Pol 10:42 ^b18:2 Rom 16:3

^c18:3 Pol 20:34; 1Kor 4:12 ^d18:5 Pol 17:14-15; 9:22; 17:3; 18:28

xamim Siu xil vari iaxa di mulihi pangasien bemei xat xamim mun tang, e rin navan tovuol en! !Ma taxeak, niha ni-hithiten longeongen ak iha mi ngan xil xa latave Siu ti!”^e

⁷Ma Pol be reling nim te pispisien ak del Siu xil, e ba be nim ma moletin tei xa tave Siu ti e di mot mi Hi, hisen Titias Sastas. Nim man dat sangas visal nim te pispisien na Siu xil. ⁸Vat te ***nim te pispisien***ak, hisen Krispas. Xi del ngenen xil lateling neketen nae e Suv Iesu. E mol-Korin xil holu mun xa lateteong ni sepinien na Pol, xil mun laling neketen nae e Iesu e lamaen Pol ***baptaes*** ni xil.^f

⁹E vongien tei, Suv misepin mi Pol nggo metuveen tei bit, “!Onata votei ti! !Ti uhhithiten sepinien navan xil e ulum nakan ti!”^g ¹⁰Inou nadat visaluk e di nadutou ni xouk. Ninamaen ni ti neta naxul xouk vengan xa moletin xil holu xa ladi e taon ak labe navan.” ¹¹E Pol tete Korin huram tei e aveti tei e he sav (6), e di tepispisi mi moletin xil usil sepinien na Hi.

¹²Melele xa Pol teta tamu e taon te hal Korin, kavmen te hal Rom teling xoles vat te provins te hal Akea xa Korin da en. Vat hu ak xa nggur voninen, hisen Kalio. Melele xa Siu xil lapusi mak, xil holu ba ladal xat Pol, e langguri be kot tangan Kalio ilepis rin nan. ¹³Xil labiteni mi Kalio labit, “!Moletin ak di misak pisi tangan vapol ni moletin namem xil ti lamot mi Hi nggo sexien tei xa nggur xoteh ***rae*** namem xil!”

¹⁴Pol tasepin ti mu, e Kalio biteni mi Siu xil bit, “Xamim Siu xil, xosxa xamim mubit moletin ak pol ni neta tei xa misa ba xat rae xil te hal Rom mu sexien sav tei xa eilep, ma momal tang tangan inou

niteong ni sepinien namim.”^h ¹⁵E vengan xa di mungor usil rut sepinien namim xil kestang, usil his moletin namim xil, e usil rae namim xil tang, ma ihos mak mu xa xamim tang mumal ni. Inou ieok ti tavei tangan nalepis hisit rin xil xa mak.”ⁱ ¹⁶E Kalio misil rerat xil ra kot nan. ¹⁷Di, vanut moletin xil xa ladi inggak ladal xat vat te nim te pispisien na Siu xil, hisen Sostenis, e labasi e von koten vari. Kalio pusi, e bit nakil ti.

Pol dilomun be Antiok

¹⁸Pol da e taon te hal Korin melengien holu. Di, pol ni nenemien nan tangan itilomun ihe provins te hal Siria. Misak ni, misep ling Kristin xil te hal Korin, e mikakao ba be taon te hal Senkaria xa pasis te tuturil xil da en. E Prisila xal Akuila lunggusil Pol latoba. Melele xa latduxoh Senkaria, Pol kot hilin be vatumas tangan vapisen ni xa tepol vuol ni hitxatien tei xa tepol ni tetel Hi. Di, xatel latnggur tuturil tei e latoba latobe provins te hal Siria.^j

¹⁹Melele xa laduxoh taon te hal Efeses, Pol ba be nim te pispisien e misepin del Siu xil en. Di, Pol bit bos tangan iling Prisila xal Akuila inggak.^k ²⁰Siu xil te hal Efeses lasis Pol tangan vata vatel xil melengien vahe vahis mun, e xi tamaen ni ti. ²¹E melele xa miling xil, biteni bit, “Xosxa Hi imaen ni, ma nitilomun nime i visal xamim.” Di, be reling Efeses e nggo tuturil tei ba.

²²Melele xa tuturil ak duxoh pasis te hal Sesaria, Pol be ut e mikakao ba be Serusalem tangan vasao ni ngan xil te sias inggak. Pol da vuteili tang del xat xil, di, mikakao melengien vahis ba be taon te hal Antiok. ²³Pol de inggak aveti

^e18:6 Pol 13:45-46; Mat 10:14; Mak 6:11; Luk 9:5; 10:10-11; Pol 13:51; 20:26

^f18:8 1Kor 1:14; Pol 16:15,33 ^g18:9 1Kor 2:3; Aes 41:10; 43:5; Ser 1:8

^h18:14 Pol 23:29; 25:18-19 ⁱ18:15 Sion 18:31

^j18:18 Nam 6:18; Pol 21:24 ^k18:19 Pol 17:17; Rom 1:10; 1Kor 4:19

vahis. Di, be reling taon te hal Antiok e ba tangan vasao ni vanut Kristin xil holu e tan te hal Frikea e provins te hal Kalesia. E rute xil vus, Pol di dutou ni Kristin xil e misak ni neketen nae e Iesu mei nggeih mu.

E taon te hal Efeses, Apolos mei be titsa hos tei te sias

²⁴ E melele nen ak, Siu tei te hal Aleksandria temeï tete taon te hal Efeses, hisen Apolos. Xi be moletin tei xa di misepin kuhi mak e mikil kuh sepinien xil xa di e Vanuvei Eo na Hi. ²⁵ Melele xa bemei, telong longeongen hos usil Iesu ngamu. E melele xa tesep usili, sepinien nan momal e di pispisi mi moletin xil del eimaen. E xi mikil kes ni sexien te **bap-taes** xa Sion tepol ni xa tepisen ni xa moletin tehiles ra tesaen nan xil. ²⁶ E melele xa Apolos di misepin e nim te pispisien na Siu xil, lapusi xa ulikanen tovuol en. Ma melele xa Prisila xal Akuila lulonge, lusisi tangan ihusil xalu latihe tim salu. Di, ludotan dela e lusep kil longeongen hos mini tangan vakil kuhi mu.^m

²⁷ Melengien vahis mei mitavi, e Apolos pol ni nenemien nan tangan ihe taon te hal Korin e provins te hal Akea. Ma Kristin xil te hal Efeses ladutou ni e ladis uvei tei ba ni Kristin xil te provins te hal Akea tangan xa lihur pilei melele xa istal mi xil. E melele xa Apolos duxoh xil, dutou ni ngan xil xa mei labe Kristin xil nggo eheien hos na Hi.ⁿ ²⁸ Melele xa Siu xil te hal Korin lamei tangan lassep tetavoe vatel Kristin xil pe met moletin xil, Apolos pisen kila nggo Vanuvei Eo na Hi xa Iesu iaxa be Mesaea xa Hi tehiti xati tangan isa ni imei.^o

Ninin Eo mei polu e Kristin xil te hal Efeses

19 Melele xa Apolos di tamu e taon te hal Korin, **Pol** mikakao nggo vathu xil te provins te hal Kalesia e mei mistal e taon te hal Efeses. E inggak, xi mei bisu ni rut Kristin xil. ² Ma misis xil bit, “?Melele xa mei muneket e Hi, **Ninin Eo** temeï tepolu e xamim, mu tenapolu ti e xamim?”^p

E labit rilomun ni mini labit, “E-e. Xamem matakil ti xa Ninin Eo be naha.”

³ Ma Pol misis xil mun bit, “?Ma xamim munggur hisit **baptaes** eah?”

E xil labiteni mini labit, “Manggur hisit baptaes nggoni ngan taxa Sion di tepol ni.”

⁴ Ma Pol biteni mi xil bit, “Sion tebaptaes ni moletin xil tangan vapisen ni xa latehiles ra tesaen nae xil. E xi tehiteni mi Siu xil xa xil mei liling neketen nae e ngan xa imei itutou ni. E moletin ak be Iesu.”^q

⁵ Melele xa lalong sepinien na Pol, lamaen ni baptaes ni xil e his Suv Iesu.

⁶ Di, Pol miling hen e xil, e Ninin Eo mei polu e xil, e misak ni xil di lasopin ni hisit sepinien sav xil xa latnakil ti mu tetiamu, e labit lelen sepinien xa Ninin Eo di pisen ni mi xil.^r ⁷ Moletin xil ak sangas labe lu e le tei (12).

⁸ Pol dat Efeses e ba di be **nim te pispisienna** Siu xil aveti tol (3), e ulin takan ti tangan vasep tetavoe vatel moletin xil usil suse xa moletin xil mei liti pe lelatxatien na Hi tangan xi mei ihe suv toto e meulien nae.^s ⁹ E rute ngan xil te nim te pispisien vatixil nggeih e latake reitien ti e sepinien xil na Pol. E pe met moletin xil, moletin xil ak laso sepinien xil xa misa ba ni Kristin xil xa langgusil

¹18:25 Rom 12:11; Pol 19:3 ^m18:26 Pol 19:8 ⁿ18:27 2Kor 3:1

^o18:28 Pol 9:22; 17:3 ^p19:2 Pol 2:38; Sion 7:39; Pol 8:16

^q19:4 Mat 3:11; Mak 1:4,7-8 ^r19:6 Pol 8:17; 10:44; 10:46 ^s19:8 Pol 18:26

xat suse na Suv Iesu. Misak ni, Pol mistokovein xil, E ngan xil xa laling neketen nae e Iesu langgusili. E ba sung be von vitueien na moletin tei, hisen Tiranasi. E inggak, e melengien xil vus, Pol di misep tetavoe del hisit moletin xil vus.^t ¹⁰ Pol pol ni mak hurang lu (2), e moletin xil vus xa ladi e provins te hal Esia, **Siu** xil e ngan xil mun xa latave Siu ti, lateteong ni longeongen hos usil Suv Iesu.

Moletin xil vus te provins te hal Esia lapus kil xeihen xa di e his Iesu e mei lamerere ni

¹¹ E melele nen ak, Hi di tepol ni hisit merekel sav xil tehe holu texo polien na Pol.^u ¹² Vengan xa, tave ti neta xa ngan xil xa lamesei latamei ti visali, xosxa laduxoh saxut kaliko xa Pol di tepol tetela, ma mesien nae mu **ninin tesa** xa da e xil lalesae reling xil.^v

¹³ E melele nen ak, vanut Siu vutei xil di latekapis e rute xil e di latehit lakila lavol rerat ninin tesa xil ra moletin xil. E melele xa lapusi xa his Suv Iesu nggur xeihen, xil laba labiteni mi ninin tesa xil labit, “E his Iesu xa Pol di bit usili, nase-mae ni xouk tangan uhe reling moletin ak!”^w

¹⁴ Siu lu e he sav (7) ladi xa di lapol ni hisit sexien ak. Xil labe nat **vaxixar na pris xil**, hisen Skeva. ¹⁵ Vatei, melele xa di lasak pisi tangan lapol ni vamak, ninin tesa tei bit rilomun ni mi xil bit, “Iesu nakila, e Pol mun nakila. ?E xamim, mube visi vari?”^x

¹⁶ Di, moletin xa ninin tesa da en but xat xil e bas purun xil misa xa misa. Dal papas eising nae reling xil e mikal kukul tenbexil. Ma nat Skeva xil ak langgul ni re e laloh reling tim san, laka hon tang laba. ¹⁷ Melele xa moletin xil vus te

hal Efeses lalongeong usil rin ak, xil vus ulixil mikan pupu. E Siu xil del ngan xil mun xa latave Siu ti lapet rat his Iesu be nesao mu e lamerere ni.^y

¹⁸ E melele nen ak, moletin xil holu mu mei laling neketen nae e Iesu, e pe met moletin xil labit rerat tesaen xuxus nae xil. ¹⁹ E holu e ngan xil xa latepol ni eimas laleh viton vanuvei nae xil xa sepinien te eimas di en, e mei ladin ni pe met moletin xil. E melele xa labit lakil kuh ti xa mani te vanuvei xil ak be mani eah, lakameti xa mani nen duxoh milian be hanutap lu e he xalu mun (50,000,000). ²⁰ Mak, ma moletin xil lapus kil xeihen na Hi, e moletin holu mu mei lake reitin e longeongen hos usil Iesu Kristo.^z

Ngan xil xa lapol ni nanao xil e hal Efeses lasi petine moletin xil tangan lasak purun Kristin xil

²¹ Dutou ni ngan xa holesok xil ak testal, Pol milonge nggoni ngan xa Ninin Eo ien bei tangan itilomun ikakao ihe provins xalu te hal Masedonia del Akea e suse nan tangan ihe **Serusalem**. Xi minemi bit, “Melele xa nihe Serusalem ivus, ti, niha sung e taon xa mahulong te hal **Rom**.”^a ²² Ma misil moletin lu te tutouen tangan laltiamu ni lalihe provins te hal Masedonia, hisealu Timoti xal Urastas. E Pol da luvoluv tamu e taon te hal Efeses e provins te hal Esia.

²³ Melele xa Pol da tamu e Esia, ngongoren tei xa eilep testal xa mi Kristin xil xa di langgusil xat suse na Suv Iesu.^b ²⁴ E hal Efeses, moletin tei da xa di pol ni nanao xil ni silva xa langgur nini nim te moten na hi tei xa lakesi ni hi **Artemis**. Moletin ak, hisen Demitrias, e xi del moletin sav xil mun xa di lapol

^t19:9 2Kor 6:17 ^u19:11 Pol 14:3 ^v19:12 Pol 5:15-16 ^w19:13 Mak 9:38; Luk 9:49 ^x19:15 Mak 1:24,34; Luk 4:34,41 ^y19:17 Pol 5:5,11
^z19:20 Pol 6:7; 12:24 ^a19:21 Pol 23:11; Rom 1:13 ^b19:23 2Kor 1:8

ni hisit polien ak di langgur mani holu nggo en.^c ²⁵ Misak ni, Demitrias mikes viton ngan xil vus xa di lapol ni nanao xil nggoni xi. Melele xa lamei vituei, biteni mi xil bit, “Tiramue xil, xamim mukila xa xir di rapus hosien nar nggo hisit polien ak. ²⁶ Xamim di mupusi e di mulong naha xa Pol di pol ni. E taon ak te hal Efeses e e rute xil vus e provins te hal Asia, xi di bilhiles nenemien na moletin xil holu bit hi xil xa moletin xil tang di lapol ni, xil latave reitin ti. Ve rin ak, moletin xil holu di latamot ti mun mi hi Artemis.^d ²⁷ !Ngan ak misa pupu mi xir! Sepinien nan ipurun meulien te polien nar. Vengan hi Artemis be eilep mak mu, e momal tangan moletin xil vus te provins te hal Asia lamerere ni. !E sepinien na moletin ak ikila ipol ni moletin xil linem isa mi hi nar e ipol ni his hi Artemis mei ihe neta sav tang! !Ngan ak misa tova tang!”

²⁸ Melele xa vanut moletin xil ak lalong sepinien xil ak, iexil mikat pupu. Ma latamea e lakekei ni nggeih labit, “!Artemis be hi na mol-Efeses xil! !Ripet rat hisen!” ²⁹ Rumen te ekaten nae ba mikapis e rute xil vus te taon ak. Misak ni, moletin xil vus laloh lamei vituei e vanut moletin xil xa mahulong. E laba ladal xat moletin lu te provins te hal Masedonia xa di lunggusil Pol lumei, hisealu Keas e Aristakas. Ladal kakao ni xalu mei ba laling xalu e von vitueien xa eilep te hal Efeses.

³⁰ Melele xa Pol nggur longgeongen usil naha xa di mistal, ien bei tangan vahe pe met moletin xil ak tangan vasep kil rin nan mi xil. E Kristin xil te rute ak lasikoe xole bit nava ti. ³¹ Rut vat xil mun te provins ak xa labe timue xil na Pol mun lasa sepinien ba mini labit nava ti visal von vitueien ak.

³² E von vitueien ak, moletin xil di lapol ni rumen tei xa mahulong. Rut moletin xil di lameun ni neta tei. E ngan tesav xil di lameun ni neta sav mun. E moletin xil holu latakil ti veneh ma di lamei vituei mak. ³³ Di, rut Siu xil lading vat tei nae mei misoh pe met moletin xil tangan isep kila xa rin na Siu xil tovuol e holesok xil ak, hisen Aleksanda. Misak ni, misa hen tangan vapol xil mei lati votei.^e ³⁴ E melele xa lapus kila xa Aleksanda be Siu tei, xil vus lakekei ni nggeih vatei mun labit, “!Artemis be hi na mol-Efeses! !Ripet rat hisen!” Xil langgulehi lameun mak ba vuma ... duxoh haoa lu (2).

³⁵ Di, melele xa klak te hal Efeses be-mei e misak ni moletin xil ladi votei, biteni mi xil bit, “!Moletin xil te hal Efeses! Moletin xil vus lakila xa taon nar di miketeh xol nim te moten na hi Artemis. E xir di raketeh xol nanao eo nan xa temot texo ut nesao e temei e etan mi xir. ³⁶ Moletin tovuol mikila vahit netak be luvosen. Misak ni, mupol ni nenemien namim ihe tan, e munapol ni ti mun sexien xil xa mitalang. ³⁷ Xamim mudel moletin xalu ak lumei inggak, e xalu lutnakan ni ti neta ra nim te moten na hi nar, mu lutnaso ti sepinien xil xa vasa vaha xati. ³⁸ Ve rin ak, xosxa Demitrias del moletin te polien sav xil xa di langgusili iexil bei tangan laso sepinien tova xa misa vaha xat rin na moletin tei, xil likila lipol ni sung ixo sexien xa momal teni vengan von koten iaxa be rute xa momal tangan limal ni rin ak en. ³⁹ E xosxa iemim bei neta ti mun, ma mutatil melengien xati te totanen nar xa ti imei, e moletin xil te kaonsel te taon ak iaxa limal ni sung. ⁴⁰ !Vengan naha xa di rapol ni xosali ak tamal ti! E vat xil te taon nar likila lileh xir ngasen rihe von koten. E xosxa xil lipol ni imak, ma xir rasakras

^c19:24 Pol 16:16 ^d19:26 Pol 17:29 ^e19:33 Pol 12:17; 13:16; 21:40

ravit kila mi xil veneh ma di rapol ni rumen xa eilep xiak.”⁴¹ Melele xa misepin bus, klak ak misil rerat moletin xil labe tim sae xil.

Pol misao ni Kristin xil e provins xalu te hal Masedonia e Akea

20 Melele xa rumen te ekaten ak e hal Efeses bus e nenemien na moletin xil be tan, **Pol** mikes viton Kristin xil e pet rat nenemien nae del sepinien nan. Di, misep ling xil e ba be provins te hal Masedonia.² E rute xil vus e provins xalu ak, Pol misao ni Kristin xil e misa sepinien te selxatien tangan vatutou ni xil ni. Di, mikakao ba be provins te hal Akea.³ E inggak, Pol ba mikapis e taon xil aveti tol (3). E melele xa di bue xat xi tangan vahe reling rute ak e vatilomun vahe provins te hal Siria, Pol milong kila xa rut **Siu** xil di lapol ni lingxatien tei tangan lihas vini e suse nan. Misak ni, Pol biles nenemien nan e dilomun nggusil suse nan be provins te hal Masedonia.⁴ Pol mikakao del moletin xil ak: Sopata xa be nat Piras te hal Beria; Aristakas xal Sekandas te hal Tesalonaeka; Nggeas te hal Derbi; Tikikas xal Tropimas te hal Asia; e Timoti mun xa be ngan Listra tei.⁵ Melele xa laduxoh taon te hal Pilipae, rut moletin xil ak langgo tuturil tei labe taon te hal Troas diamu ni Pol e ladatili e taon te hal Troas.

⁶ E xamem xal Pol, madi e hal Pilipae duxoh hoxalite te Melengien xil te Beret xa Is Tovuol En. Di, inou Luk natekakao vituei tetel xil e kakaoen nae. Ma mastokovein Pilipae e manggo tuturil tei e maloh en melengien lim (5), di, maduxoh Troas. Inggak, xamem mabituei del ngan xil xa latetiamu, e madi e taon te hal Troas wik tei.

⁷ E melele xa di mabue xat xamem tangan mave reling rute ak, mamei vituei del Kristin xil te hal Troas e Sarere vongien tangan mavur vituei ni anien eo na Suv. Pol mikila xa, makoe nen tang, ihe reling xil. Misak ni, misetu mi moletin xil e dit misepin ba vuma ... duxoh hilaep te vongien.^f ⁸ Rute xa di madi vituei en be von toen xa de nesao xa be tol nen. E laet holu di lapili en.⁹ E melele nen ak, horam maxoe tei di dotan de windo, hisen Iutikas. E melele xa Pol di tamu misepin, horam maxoe ak miteong ni sepinien nan ba vuma ... meten minoh, ma pat. Latemanin, e horam maxoe ak mot nggo windo nesao mei mirum e tan. E melele xa ba lapusi, lakameti xa mat.¹⁰ E Pol be visali, mitingeiril be tan, e por xati. Di, biteni mi xil bit. “!Munanexo ti, xi tamat ti, meul tang da!”^g ¹¹ Di, Pol del moletin sav xil ladilomun labe von toen xa de nesao, e langganien vituei. Langganien bus, Pol misepin rilomun mi xil ba vuma ... ut milan. E makoe nen ak, Pol e ngan xil xa lakakao dela lastokovein xil laba.¹² E horam maxoe ak, ladela labe tim san, e labesi xil himetu vengan xa meul tang da.

Pol misel xat elda xil te sias te hal Efeses tangan lilaxat kuh moletin nae xil

¹³ Pol mistokovein taon te hal Troas e mikakao tangan vahe taon te hal Asos xa tave sotin ti. E xamem mabe pasis tangan maxo tuturil tei e ha muhur Pol e Asos.[†] ¹⁴ E melele xa maduxoh Asos, mapusi xa Pol di datil xamem ngamu. Ma mangguri be xamem e tuturil e mabituei mabe taon te hal Mitilen.¹⁵ Tuturil xa madi en be reling Mitilen e miloh ba. Ut milan, maduxoh Kios. Di, e makoe sav

[†]20:13 Taon te hal Asos be 32 kilomita nggo ut ra hal Troas, e 80 kilomita nggo tas.

^f20:7 Pol 2:42,46 ^g20:10 1King 17:21

nen, mastal e aelan te hal Samos. Di, e melengien sav nen, mabe ut e taon te hal Maelitas. ¹⁶Tuturil ak tava ti e taon te hal Efeses vengan xa Pol tepol ni nene-mien nan tuei tangan navas melengien ti nave holu e provins te hal Esia. Ien bei mak mu tangan vatuxoh *Serusalem* vate-manon vatiamu ni melengien te Pentekos.⁸

¹⁷Melele xa madi tamu e taon te hal Maelitas, Pol misil eloheoh nan tei ba pus elda xil te sias te hal Efeses bit limei lipusi.^h ¹⁸E melele xa lamei, madotan vituei e Pol biteni mi xil bit, “Xamim mukil sexien navan xil e melele xa nate-mei nateti tetel xamim e provins te hal Esia, e melengien kokot teni tetuxoh melengien xa natehe reling xamim nateha.ⁱ ¹⁹E melele nen ak, di natepol ni polien na Suv tetel nenemien xa be tan e, melele xil holu, simetok teleh ve xamim. Natepol ni temak, tave ti neta xa melengien holu natekameti te xeih ve lingxatien xil xa rut Siu xil latepol ni teha xat nou.^j ²⁰Mukila xa natesa sen holesok xil tangan vatutou ni meulien namim texo neta xa natehithiteni mi xamim e natepispisi ni. Melele xa ratemei vituei e von vitueien mu nim nar xil, natnasoson ti neta vari ra xamim. ²¹Natesel xat xamim vus, Siu xil del ngan xil xa latave Siu ti, tangan muhiles ra tesaen xil namim e mumei visal Hi. E natesel xat xamim mun tangan muling neketen namim e Suv Iesu.

²²“E taxeak, Ninin Eo di del nou tangan name Serusalem. E natakil ti naha tova iaxa ixul nou en.^k ²³Vengan xa e

rute xil vus xa di natesao en, *Ninin Eo* di pisen ni minou xa nave nousav ti, nihe nim te xeih e ti lisak purun nou.¹ ²⁴Tave ti neta xa mak, natanem ti tave holu usil meulien navan. E ieok bei tangan nipol vuol ni polien xa Suv Iesu tesa ni minou tangan ti nihithiteni longeongen hos usil eheien hos na Hi. Ieok bei tang tangan xa ti nihusil xat suse te lohen xa Suv teling nou en ha ituxoh hoxalite teni.^m

²⁵“Melele xa nateti tamu visal xamim, ba natekapis e ut xil vus namim e di natehithiteni mi xamim suse xa mei muhe moletin xil na Hi e muti pe lelatxatien nan. E taxeak, nakila xa xamim vus musakras mupus rilomun ni nou. ²⁶Ve rin ak, xosali, ieok bei namit mesen ni mi xamim xa xosxa tei e xamim ikesae e taling ti mu neketen nan e Iesu, rin navan tovuol en.ⁿ ²⁷Vengan xa inou natnasoson ti neta ra xamim. E natesep vuol ni holesok xil xa Hi ien bei tangan vapol ni e meulien na moletin xil. ²⁸Ma muxuxou kuhi ve xamim e ve moletin xil na Hi xa Ninin Eo miling xil ladi e hemim. Mulaxat kuh xil vengan xa labe Sias na Hi xa texal rat xil texo re Natneli xati.^o ²⁹Nakila xa itutou ni ngan xa niha, rut moletin xil mei listal e lisak purun xamim ixoni kuli reran xil xa mei lastal langas vin sipsip xil e latanem pupu ni ti usil meulien nae.^p ³⁰Xos rut moletin xil mei listal lixo ngan xil xa di lamos e sias namim, xa mei lihiles reitinen na Hi e lisep luvos Kristin sav xil tangan lihusil pispisien nae xil.^q ³¹Misak ni, muxuxou kuhi ve xamim. Munem usil hram tol (3) xa nateti mi xamim, e tetep iaxa, me-

§20:16 Pentekos be melengien hanutap lu e he xalu mun (50) dutou ni Anien te Tavien. Melengien ak iaxa Ninin Eo teme i tepolu e moletin xil xa lateneket kokot (Pol 2:1-4).

^h20:17 Pol 18:21

ⁱ20:18 Pol 18:19; 19:10

^j20:19 Pol 20:3

^k20:22 Pol 19:21

^l20:23 Pol 21:4,11; 9:16

^m20:24 Pol 21:13; 2Tim 4:7

ⁿ20:26 Pol 18:6

^o20:28 1Pet 5:2; Sam 74:2

^p20:29 Mat 7:15; Sion 10:12

^q20:30 1Sion 2:19

lengien tetuxoh vongien, di natesel xat xamim tetel simetok xa teleh tangan munake reitin ti e pispisien sav xil.^r

³²“Ma, xosali, naling xamim e he Hi tangan ilaxat kuh xamim. Sepinien usil eheien hos nan isak ni neketen namim mei ixehi mu. E nggo sepinien xil na Hi, xi di bit xati xa isa tuxolxatien mi xamim e mi ngan xil vus xa tepol ni xil labe moletin eo nan xil.^s ³³Melele xa nateti mi xamim, natnasis ti moletin tangan vasa mani mu eising xil minou.^t ³⁴Xamim mukil kuhi mak xa natepol tetel heok xalu tangan makamet holesok xil xa inou tetel moletin navan xil iemem tehei tangan muvuri.^u ³⁵Texo sexien navan xil xa natepol ni pe metemim, natepisen ni xa melele xa rapol nggeih, rakila ti ritutou ni ngan xil xa lamerou. Ngan ak ixoni sepinien xa Suv Iesu vari tang xa tehiteni melele xa tehit, ‘Sien te sanien xa di osa ni di mili sien te naha xa di onguri.’”^v

³⁶Melele xa Pol misepin bus, mitegingeiril be tan del xil vus e misis ve xil.^w ³⁷Xil vus lamuis e lasa hexil ngga xole. Di, lapesum e vin e lasep lingi.^x ³⁸Lalonge misa himetu vengan xa Pol tehiteni mi xil xa xil linapus ti mun. Di, lalingi be tuturil, e ladilomun labe tim sae xil.^y

Labit lenen ni mi Pol xa ihe nim te xeih melele xa ituxoh Serusalem

21 Melele xa masep ling elda xil te sias te hal Efeses bus, mabe tuturil ak e mabe aelan te hal Kos. Di, visuvong nen, mei maduxoh aelan te hal Rods. Rods bus, tuturil ak miling xamem e taon te hal Patara. ²E inggak, makamet tuturil teimun xa di labue xati tangan

vahe tan te hal Fonesia, ma mabut en maba. ³Maloh e tuturil ak e mei matavi e aelan te hal Saepras e rin xa be saot. Maba vuma ... maduxoh taon te hal Taer e provins te hal Siria. E inggak, tuturil miso rat holesok xil xa teti e vangite.

⁴E taon te hal Taer, makamet rut Kristin xil e madi visal xil wik tei. E melele xa madi tamu visal xil, **Ninin Eo** pisen kila xa neta tei xa misa di datil **Pol** e hal **Serusalem**. Ma lasak pisi tangan laviles nenemien na Pol, e lasakras.^z ⁵E melele xa tuturil bue xat xi tangan vaha, Kristin xil vus te hal Taer, tiramue xil, atou nae xil del horamue nae xil mun laba tangan laling xamem e tuturil. E bien, xamem vus mitegingeiril e masis vituei.^a ⁶Di, lasep ling xamem, laling xamem e tuturil, e ladilomun labe tim sae xil.

⁷Ma tuturil be reling taon te hal Taer e ba be taon te hal Patolemas. E inggak, masao ni Kristin xil e madi visal xil melengien tei. ⁸Di, visuvong nen, tuturil xa madi en miloh ba be taon te hal Sesaria. Inggak, masao ni Kristin tei xa hisen evanselis Pilip, e madi vituei e tim san. Xi be tei e dikon xil xa labe lu e he sav (7) xa latehosei kokot ni e hal Serusalem.^b ⁹Natnahin xil labe hat (4) xa latateli ti mu. Melele xil holu, Ninin Eo mei di pisen sepinien xil mi xil e di labit lenen ni sung mi mosav xil.^c

¹⁰Xamem madi e tim sa Pilip melengien vahis. E melele xa madi inggak, **provot** tei mei mistal nggo Sudea, hisen Akabas.^d ¹¹Melele xa pus xamem, bemei visal xamem e nggur rat atuatu na Pol. E del atuatu nan, Akabas bar xat tasen ni len e hen xalu. Di, bit lenen ni bit, “**Ninin**

^r20:31 Pol 19:10; 1Tes 2:11 ^s20:32 Dut 33:3-4; Pol 26:18

^t20:33 1Saml 12:3; 1Kor 9:11 ^u20:34 Pol 18:3; 1Kor 4:12; 1Tes 2:9

^v20:35 Mat 10:8 ^w20:36 Pol 21:5 ^x20:37 Pol 21:5; Rom 16:16; 1Pit 5:14

^y20:38 Pol 20:25 ^z21:4 Pol 20:23 ^a21:5 Pol 20:36 ^b21:8 Pol 8:40; 6:5

^c21:9 Soel 2:28; Pol 2:17 ^d21:10 Pol 11:28

Eo iaxa di biteni xa moletin xa atuatu nan xiak, **Siu** xil livar xati imak e melele xa ha ituxoh Serusalem. Ti, lisa rati ihe he ngan xil xa latave Siu ti.”^e

¹² Melele xa malonge mak, xamem del moletin sav xil mun madakes Pol tangan nava ti mu Serusalem.^f ¹³ E Pol bit rilonun ni bit, “?Veneh ma di mumuis mak? Di musak ni tinok mun di muis. E inou nabue xat nou ngamu tangan livar xat nou mu lihas nou nimat e Serusalem ve neketen navan e Suv Iesu.”^g

¹⁴ Melele xa mapusi xa masakras mav-iles nenemien nan, ma malingi da nga tang. E mabiteni tang mini mabit, “Masis tangan Suv ipol ni mi xouk ixoni ngan xa xi ien bei.”^h

¹⁵ Melele xa madi e Sesaria melengien vahis, mabue xat xamem tangan mave Serusalem. ¹⁶ Rut Kristin xil te hal Sesaria mun mei lakakao vituei del xamem e laling kuh xamem e tim sa moletin tei, hisen Neson te hal Saepras. E melele xa Sias be neta hu, Neson be tei e ngan xil xa lateling kokot ni neketen nae e Iesu.

Pol misao ni Kristin xil te hal Serusalem

¹⁷ Melele xa xamem maduxoh taon te hal Serusalem, Kristin xil langgur pilei xamem del sien. ¹⁸ E visuvong nen, Pol be xamem ba mapus elda Temis del elda sav xil mun te sias.ⁱ ¹⁹ Melele xa Pol bit bos makoe mi xil, mitumul mi xil usil holesok xil ngasen xa Hi di tepol ni mi ngan xil xa latave Siu ti texo polien nan xil.^j

²⁰ Melele xa elda xil lalong holesok xil xa Pol di bit usili, xil vus lames Hi ven. E labiteni mini labit, “Tua Pol. ?Opusi?

Siu xil holu pupu mei lateling neketen nae e Suv Iesu. E xil vus nenemien nae nggeih tova tang tangan lihusil xat **rae xil na Mosis**.^k ²¹ E xil latehur longeongen xa xouk di opisipisi mi Siu xil xa ladi e tan na moletin xil xa latave Siu ti tangan ti linahusil ti mun rae xil na **Mosis**. Latelongeong ni mun xa di otehiteni mi xil tangan linapol ni horamue nae xil ti linave vexahu, e linahusil xat ti mun sexien matu nar xil.^l ²² Navehi ti, xil lilongeong ni xa xouk ostal ngamu inggak. ?Ma, ti ripol ni itep? ²³ Ve rin ak, mormal tangan upol ni naha xa di mabiteni minuk. Moletin hat (4) ladi inggak xa latepol ni hitxatien tei tetel Hi.^m ²⁴ Ha umos itel xil muhe Nim Eo na Hi e muhusil xat sexien xil te serev moten moletin en. E melele xa muha tangan musa sanien eo namim, xouk iaxa uxal sipsip namim xil. Melele xa mupol vuol ni, ma mukila mukot hilimim mei muhe vatumas tangan ipisen ni xa mutepol vuol ni hitxatien namim tetel Hi. Imak, ma moletin xil vus lipus kila xa longeongen tesa xa di langguri usiluk tave reitin ti. Xil lipus kila sung xa di tamu omerere ni rae xil na Mosis e di olong xat xil. ²⁵ E usil rin na ngan xil xa latave Siu ti xa lamei labe Kristin, xamem matesa uvei tei tuei tehat mi xil. E uvei ak, matesis xil tangan linaxa ti anien xil xa latesa ni tehe sanien eo teha mi nanao xil; linaxa ti ra; linaxa ti hisi te vongoro xil xa ra di tamu en xa lasar xoteh huraexil tang e latatei xoteh huraexil tangan ra valeh rani; e linapat ti natel atou mu tiramue sav xil xa latatei ti vatel xil.”ⁿ

²⁶ Pol mae e nenemien nae. Misak ni, e makoe nen, xi mikas moten xi nggulis sexien na Siu xil. Di, Pol ba be vloh te

^e21:11 Sion 21:18; Pol 20:23; 21:33 ^f21:12 Mat 16:22 ^g21:13 Pol 20:24

^h21:14 Mat 26:39; Mak 14:36; Luk 22:42 ⁱ21:18 Pol 15:2; 15:13; Kal 1:19

^j21:19 Pol 15:12 ^k21:20 Pol 15:1,5 ^l21:21 Pol 15:30; 16:3; 21:28; Kal 2:3

^m21:23 Nam 6:5,13-18,21; Pol 18:18 ⁿ21:25 Pol 15:19-20,28-29; Lev 17:10-14

Nim Eo na Hi del tuneli xil e bit mese ni mi pris xil melengien xil xa lipol ni sexien te serev moten moletin en tangan mei limese pe met Hi. Di, miling xat melengien mun vari xa xil litilomun e lisa kekes ni sanien eo nae xil iha mi Hi en.^o

Pol be vloh te Nim Eo, e Siu xil ladal xati

²⁷ E melele xa melengien lu e he sav (7) xa Pol xatel di laserev moten xatel en sangas mei vatavi, rut Siu xil xa latexo provins te hal Esia lamei e Serusalem. E melele xa xil lamei e vloh te Nim Eo, lapus kil Pol. Ma lasi petine vanut moletin xil tangan liha lital xati. ²⁸ Melele xa ladal xati, lakei nggeih ba mi moletin xil labit, “!Tua namem xil, mumei! !Mututou ni xamem! Moletin ak vari iaxa di pispisi mi moletin xil vus e rute xil vus tangan linem isa iha xat xir, ngan **Isrel** xil, iha xat rae xil xa Mosis tesa ni mi xir, e iha xat Nim Eo nar. E taxeak, xi di mileh moletin xil xa latave Siu ti lamei e Nim Eo ak vari, e di misak ni ut eo nar mei pupuru pe met Hi.”^p ²⁹ Labiteni mak vengan, melele xa latepus Pol e taon, xi tekakao tetel moletin tei te hal Efeses xa tave Siu ti, hisen Tropimas. Ma xil latenemi latehit be xi iaxa Pol tehuri lutemei e vloh te Nim Eo ak.

³⁰ Longeongen usil naha xa di mistal miloh mikapis e rute xil vus e taon te hal Serusalem. E moletin xil holu xa holu pupu laloh lamei e vloh te Nim Eo ak. Ladall xat Pol, e ladel kakao be hale. Di, vatakes, pris xil lakoe xol puiteh xil teni. ³¹ Melele xa vanut moletin xil ak di lasak tangan lavas vin Pol, vatixar tei na moletin xil te vaeen milongeong ni xa vaeen tei xa mahulong mistal e Serusalem. ³² Ma, vatakes, vatixar ak mileh viton

vat sav xil del moletin te vaeen nae xil, e latemanon labe visal vanut moletin xil ak. E melele xa Siu xil lapus moletin xil te vaeen, lastokovein Pol e latavasi ti mun.

³³ Vatixar na moletin xil te vaeen mikakao be visal Pol, dal xati, e mise-mae ni tangan moletin nan xil livar xati ni sen lu. Di, misis pilei vanut moletin xil bit, “?Moletin ak be visi? ?Xi tepol ni naha xa tesa?”^q

³⁴ Rut moletin xil lakekei ni neta tei. E rute ngan xil mun lakekei ni neta sav. E vengan xa vanut moletin xil latangal holu, vatixar te **moletin xil te vaeen** misakras valong kuhi xa vatit rumen ak testal tetep. Ma misemae ni tangan moletin nan xil lihur Pol ha lilingi ite nim ma moletin te vaeen xil tangan likila lisis pilei. ³⁵ E melele xa ladel Pol lamei sangas ni nim mae, nenemien na Siu xil mei nggeih pupu tangan lital rat Pol ra hexil e lihas vini. Misak ni, moletin te vaeen lapo rat Pol dat nesao tangan vanut moletin xil ak linavas vini ti. ³⁶ E melele xa laba, Siu xil langgulehi di langgusil xil e lakekei ni be nesao labit, “!Rihasi! !Rihasi vini!”^r

Pol misep kil rin nan pe met moletin xil

³⁷ Melele xa moletin te vaeen xil lamei sangas ni puiteh te nim mae, Pol misepin mi vatixar nae e sepinien **Krik** bit, “?Nakila namit neta tei minuk?”

Ma vatixar ak biteni mini bit, “?Ei, xouk okila osepin ni sepinien Krik? ³⁸ Inou di nanemi nabit xouk obe silixin te hal **Isip** xa testal tave nousav ti. Moletin ak teleh viton vanut moletin xil latehe taosen hat (4000) latehe uruvuol xa ba latevae xuxus e di, latesak pisi ten-

^o21:26 1Kor 9:20; Nam 6:2-5; 13-21 ^p21:28 Pol 6:13; 21:21; Esek 44:7

^q21:33 Pol 20:23; 21:11 ^r21:36 Luk 23:18; Sion 19:15; Pol 22:22

gan lapangei polien na kavmen te hal Rom.”^s

³⁹Pol bit rilomun ni mini bit, “E-e, tave inou ti. Inou nabe Siu tei xa te hal Tarsis, taon taxa be eilep e provins te hal Silisia. Nasisuk tangan umaen nou li nisepin vuteili mi vanut moletin xil ak.”^t

⁴⁰Vatixar ak maen ni. Ma Pol misa hen be nesao tangan vasak ni moletin xil latit votei.^u Di, misepin mi xil ni sepinien Hibu.

22 Pol biteni mi vanut Siu xil bit, “!Tuxoli xil e tata navan xil te hal Isrel, muteong ni nou! Nisak pisi tangan nisep kil rin navan pe metemim.”^v

²Melele xa lalonge taxa di misepin mi xil nggo sepinien Hibu, xil ladit votei e lateong kuhi ni.

Di, Pol biteni mi xil bit, ³“Inou nabe Siu tei xa natestal natexo taon te hal Tarsis e provins te hal Silisia. E natematu sung e Serusalem. Inggak, Kameliel vari tepispisi kuhi minou usil *rae* xil na avu nar xil. Natehusil xat rae xil ak e eheien navan te xeih e Hi nggoni xamim vus xa mudi inggak xosali.”^w ⁴Inou vari natesak purun ngan xil xa latehusil xat Iesu teha vuma ... natesak ni xil holu latelel. Tiramue xil e atou xil mun, natetal xat xil e nateso xil latehe nim te xeih.^x ⁵Vahit musis pis *vatixar na pris xil* vatel vat xil te kaonsel nar, ma xil lakila lavit rati xa sepinien navan be reitin. Xil vari iaxa latetis uvei xil tangan nilehi iha mi tua nar xil xa ladi e hal Damaskas. Ma natehur suse navan nateha tangan nital xat Kristin xil te rute ak e nileh xil lililomun e limei *Serusalem* tangan mei lihur pangasien inggak ven.”

Pol misep usili xa tetep iaxa Hi tehiles meulien nan

⁶Pol biteni mun mi xil bit, “Melele xa di natekakao natehe sangas ni taon te hal Damaskas, e piniae vari, miehen tei xa teminehin pupu texo ut nesao e mei telelul xol nou. ⁷Misak ni natemot natehe tan e natelong rae tei xa tehiteni minou tehit, ‘!Sol, Sol! ?Veneh ma di osak purun nou del moletin navan xil mak?’

⁸“E natesis pilei natehit, ‘?Suv, xouk obe visi?’

“E xi tehiteni minou tehit, ‘Inou Iesu te hal Nasaret xa di osak purun ni.’ ⁹Tiramue xil xa latehe xamem latepus miehen ak, e latnalong ti rae xa tesepin minou.

¹⁰“Ma natesisi natehit, ‘?Suv, inou nipol ni naha?’

“Ma Suv tehiteni minou tehit, ‘!Tamea e uhe Damaskas! Inggak, moletin tei mei ihit mesen ni mi xouk holesok xil vus xa Hi teling xati tangan ti upol ni.’ ¹¹Melele xa rae ak tesepin tevus, natetemanin xa metok xalu lutevar ve miehen xa telelul xol nou. Tesak ni, ngan xil xa latehe xamem latetal xat heok e lateteli nou tang matehe Damaskas.

¹²“E taon, moletin tei mei tesao ni nou, hisen Ananaeas. Xi tehe *Siu* tei xa eheien nan nggeih e Hi. Xi tehusul xat vuol ni rae nar xil, e Siu xil vus xa ladi e taon ak di latemerere ni. ¹³Xi teme tesoh sangas visal nou e tehiteni minou tehit, ‘!Tuxoli Sol, keteh rilomun!’ E melele nen tak vari, nateketeh rilomun e natepusi. ¹⁴Di, xi tehiteni minou tehit, ‘Hi na avu nar xil tehosei xouk tangan ukil nenemien nan, upus Moletin te Momalen nan, e uteong xat raen. ¹⁵Xi pol ni mak vengang xa tehosei xouk ten-

^s21:38 Pol 5:36-37 ^t21:39 Pol 9:11; 22:3

^u21:40 Pol 12:17; 13:16; 19:33; 26:14 ^v22:1 Pol 7:2

^w22:3 Pol 21:39; 5:34; Rom 10:2 ^x22:4 Pol 8:3; 22:19; 26:9-11

gan ha ti uhit mesen ni mi moletin xil vus te ut etan naha xa otepusi e ote-longe. ¹⁶!Ma onararu ti mun! Utamea e utakes Iesu tangan isak ni xouk mei umese ra **tesaen** nam xil. Uling nenesien nam iti en e umaen ni nou nibaptaes ni xouk.' Misak ni, natetamea e natemaen Ananaes tebaptaes ni nou.^y

¹⁷"Tetutou sung, natetilmomun nate-mei e Serusalem. E melele xa natetak, natehe vloh te **Nim Eo** tangan nasis. E melele xa di natesis, natepus metuveen tei. ¹⁸E metuveen ak, Suv Iesu testal minou e tehiteni tehit, 'Utemanon uhe reling Serusalem vengan xa moletin xil inggak iexil ti tavei tangan lataeong ni sepinien nam xil usil nou.^z

¹⁹"E natehit rilomun ni mini natehit, 'Suv, moletin xil ak lakil kuh nou. Lakila xa inou iaxa di natehe **nim te pispisien**xil e natetal xat ngan xil xa laneket e xouk en, e ba di natehas purun xil.^a ²⁰Xil latekila xa inou iaxa natemos tetel ngan xil xa latehov vin Stivin vengan xa tesep usiluk mi moletin xil. E inou natemae melele xa latekin maten mini e natelaxat kot na ngan xil xa latehov vini.^b

²¹"E Suv tehiteni minou tehit, '!E-e, uhe reling rute ak! Vengan xa inou di nasilak tangan uha uhe ut xil xa sotin ve ngan xil xa latave Siu ti."^c

²²Moletin xil di lataeong kuh sepinien xil na Pol. E melele xa misep kokot usil ngan xil xa latave Siu ti, lakekei nggeih be nesao e labit, "Rihasi! Rihur xoteh meulien nan! Tavos ti tangan xa xi vameul!"^d ²³E melele xa di lakekei ni mak, lasil rerat kot nae xil e labuil ni ba xat vulmeas e tan e mituveas be nesao.

²⁴Melele xa vatixar na **moletin xil te vaeen** pus sexien na vanut moletin xil

ak, misemae ni moletin nan xil tangan lihur Pol ihe nim nae, e ha limeas pangasi tangan ihit kil ti veneh ma Siu xil ak di lamaxan ni mak.

²⁵E melele xa moletin te vaeen xil labar xat **Pol** tangan lameas pangasi, biteni mi vat nae xa di misoh sangas visali bit, "?Midep? ?**Rae** na mol-Rom xil di maen ni tangan umeas hortan xati te hal Rom xosxa latalepis ti mu rin nan?"^e

²⁶Melele xa vat ak milonge mak, mite-manin ni, ba pus vatixar nan, e misisi bit, "?Di opol ni naha xiak? ?!Okila xa moletin xai be hortan te hal Rom vari!?"

²⁷Ma vatixar ak be visal Pol e misis pilei bit, "!Uhit rati minou! ?Reitin mak xa xouk obe hortan te hal Rom xati?"

E Pol bit rilomun ni bit, "Ngan ak be reitin."

²⁸Ma vatixar bit, "Inou mei natehe hortan te hal Rom texo suse xa natexale ni mani tei xa eilep."

E Pol biteni mini bit, "E inou, mei natehe hortan te hal Rom texo suse xa nana teling nou en."

²⁹Melele xa vatixar milong mak, mite-manin ve ulikanen e, vatakes, labe relingi e latapol ni ti neta mun mini. Ulixil mikan vengan rae nae xil tamaen ni ti tangan lavar xat hortan tei te hal Rom e lavas pangasi melele xa latalepis ti mu rin nan e kot nae.^f

Kaonsel na Siu xil lalepis rin na Pol e von koten nae

³⁰Vatixar na moletin xil te vaeen ien bei tangan wakil ti xa Siu xil di labit naha vari ba xat rin na Pol. Misak ni, ut milan, misemae ni moletin nan xil tangan lalal rerat sen xil ra he Pol. Di, misis vat xil na pris xil tangan litotan vituei itel vat

^y22:16 Soel 2:32; Pol 2:21; Rom 10:13 ^z22:18 Pol 9:20-30

^a22:19 Pol 8:3; 22:4-5; 26:9-11 ^b22:20 Pol 7:58; 8:1

^c22:21 Pol 9:15; 13:2; Kal 2:7-9 ^d22:22 Pol 21:36

^e22:25 Pol 16:37; 23:27 ^f22:29 Pol 16:38

na Siu xil e kaonsel nae. Di, vatixar na moletin te vaeen xil del Pol ba misoh pe metexil.

23 Melele xa laling *Pol* pe met Siu xil te Kaonsel, miketeh momal mi xil e biteni mi xil bit, “Tuxoli xil te hal Isrel, melele xa nanem usil polien xil te meulien navan mei duxoh xosali ak, e suse xil ngasen xa natehusili, natave unoun ti pe met Hi.”⁸ ²Melele xa lalonge mak, *vatixar na pris xil* xa hisen Ananaeas misemae ni tangan ngan xil xa lasoh ladi visal Pol tangan limuxol pon.^h

³Melele xa lamuxol pon, Pol bit rilomun ni mini bit, “!Hi vari imuxol pom xa di oluvos obit omese pe met moletin xil! Di odotan inggak tangan olepis rin navan vahusil *rae xil na Hi*, e xouk vari tang di onggur xoteh rae xil ak melele xa otesemae tangan lamuxol pok.”ⁱ

⁴Ngan xil xa lasoh ladi visal Pol lasel xati labit, “?Ulum takan ti xa di osepsisil vatixar na pris xil na Hi iaxai?”

⁵E Pol bit rilomun ni mi xil bit, “Tuxoli xil, natnakil ti li xa xi be vatixar na pris xil. Vahit nakila, ma ninapol ni ti namak venggan xa Vanuvei Eo na Hi di biteni bit, *‘Munaso ti sepinien xil xa misa naha xat vat tei na moletin namim xil.’*” (Eks 22:28)

⁶Melele xa Pol pus kila xa rute e ngan xil xa ladi e Kaonsel ak labe *Satusi* xil, e rute ngan xil mun labe *Farasi* xil, mikei nggeih bit, “Tuxoli xil te hal Isrel, inou nabe Farasi tei e nabe nat Farasi tei. !E di nasoh inggak pe metemim venggan xa nake reitin xa moletin mikila imea rilomun ra maten!”^j

⁷Melele xa misepin mak, Farasi xil del Satusi xil langor del xil mun tang e ladi-pas xil labe vanute lu. ⁸Langor mak venggan xa Satusi xil latake reitin ti xa mo-

letin mikila imea rilomun ra maten, e lanemi labit *masxaxa* del *ninin* xil latovuol. E Farasi xil lake reitin e neta xatel vus ak.^k ⁹Ngongoren ak mei be himetu, e rut *titsa* xil te rae na Mosis xa lamos e Farasi xil lamea e lasepin nggeih labit, “Xamem matakamet ti neta vasa vata xat rin na moletin ak. !Xos be reitin mak xa masxaxa mu ninin tova tesepin mini!”^l ¹⁰Ngongoren ak mei be himetu e sangas vaeen vastal en. Misak ni, vatixar na *moletin xil te vaeen* ulin mikan xa linatal papas Pol. Ma misemae ni moletin nan xil tangan lihe tan e lital rat Pol ra hexil, e litel rilomun ni lihe nim mae.

¹¹E vongien nen tak, Pol pus Suv Iesu mei misoh visali e biteni mini bit, “Ulum nakan ti. Xouk otesep usil kuh nou inggak e *Serusalem*. Ma ha usepin ni imak mun tang e *Rom*.”^m

Rut Siu xil labein xati tengan lihas vin Pol

¹²Ut milan e melengien sav, rut *Siu* xil lamei vituei e labein xati tangan linaxanien ti mu linamu ni ti neta ituxoh melele xa lihas vin Pol. ¹³Ngan xil vus xa latemae e lingxatien ak lateli hanutap lu (40). ¹⁴Di, labe visal vat xil na pris xil del elda nae xil mun e labit mesen ni mi xil labit, “Xamem mabein xati nggeih xa munaxa ti mu neta ituxoh melele xa muhas vin Pol. E xosxa muhur xotehi, ma Hi isa pangasien mi xamem.”ⁿ ¹⁵Mak, ma xamim itel ngan xil te Kaonsel musa sepinien iha mi vatixar na moletin te vaeen xil tangan itel Pol imei mun visal xamim. Muluvasi taxa iemim bei tangan muteong kuhi ni vatei mun tangan mukila mulepis kuh rin nan. E xamem,

⁸23:1 Pol 24:16 ^h23:2 Sion 18:22-23 ⁱ23:3 Esek 13:10-15; Lev 19:15

^j23:6 Pol 4:2; 26:5; Plp 3:5; Pol 24:15,21 ^k23:8 Mat 22:23

^l23:9 Luk 23:4,14,22; Sion 18:38; 19:4,6; Pol 25:25

^m23:11 Pol 18:9; 19:21; 27:24; 28:16,23 ⁿ23:14 Pol 25:3

muxus tili e suse tangan muhas vini, e natuxoh xamim ti inggak.”

¹⁶ E metilou na Pol nggur longeongen usil lingxatien ak. Misak ni, miloh ba be nim ma moletin te vaeen xil xa maen ni tangan vapus pap nan. Di, bit mesen lingxatien ak mi Pol. ¹⁷ Ma Pol mikes moletin te vaeen tei bemei e biteni mini bit, “Utel horam maxoe ak iha tangan ha ipus vatixar namim vengon xi nggur sepinien tei tangan ihit rati mini.”

¹⁸ Ma moletin te vaeen ak dela ba pus vatixar nan e biteni mini bit, “Pol xa de nim te xeih tekes nou natehe visali, e misis nou tangan nitel horam maxoe ak imei visaluk vengon xa xi nggur sepinien tei tangan ihit rati minuk.”

¹⁹ Ma vatixar dal xat he horam maxoe ak, e melele xa be xalu kestang ludi e misis bit, “?Naha vari obit ovit rati minou?”

²⁰ Ma xi biteni mi vatixar ak bit, “Rut Siu xil labein xati ngamu da xa visu-vong, mei lisisuk tangan utel Pol ihe visal Kaonsel nae ixoni ngan xa iexil bei tangan lilong ti mun neta usil rin nan. ²¹ E onahusil ti li naha xa xil lihiteni vengon xa vanut moletin nae xil ti lixus tili. Reitin, moletin hanutap lu (40) mu mili iaxa labein xati nggeih xa linaxanien ti mu linamu ti neta ituxoh melele xa lihas vin Pol. E taxeak tang, di labue xat xil ngamu e ladatiluk sutang tangan umaen Pol ihe hexil.”

²² Melele xa vatixar ak milong sepinien nan xil, biteni mini bit, “Onahiteni ti mi moletin tova xa omei obit sepinien ak minou.” Di, misil horam maxoe ak ba.

Hi misak ni ngan xil te kavmen te hal Rom lasikoe xol meulien na Pol

²³ Ma, e mahis nen tak, vatixar mikes vat lu na vanut moletin te vaeen xil lumei e biteni mi xalu bit, “Mulivue xat moletin xil te vaeen xil namim xa lihe handred lu (200) tangan muhe taon te hal Sesaria e naen klok vongien tak. Mukakao vituei itel moletin hanutap tol e he xalu mun (70) xa liloh ni hos xil, e itel moletin te sosoen xil mun lihe handred lu (200). ²⁴ Musa hos tova mun mi Pol tangan iloh en, e mutel kuhi ha mulingi pe he Filiks xa be vat te kavmen te hal Sudea xa de taon te hal Sesaria.”

²⁵ Di, vatixar ak midis uvei tei tangan ha lisa ni mi vat Filiks xa misepin ni mak:

²⁶ “Vat tehos te kavmen Filiks,

“Inou, Klodias Lisias, nabit bos mahis minuk.

²⁷ “Moletin xa nasa ni bat iaxai, Siu xil latetal xati e sangas lavas vini. E melele xa natekameti xa xi be hortan xati te hal **Rom**, natemanon tetel moletin te vaeen navan xil e ba matehur rati ra hexil.^o

²⁸ “Di, ieok tehei tangan nakil ti xa latemaxan veneh, ma natetela tehe visal kaonsel nae.^p ²⁹ E melele xa di nateong ni sepinien nae, natekameti xa di lasepsisili latehit tehur xoteh rae nae xil kestang e rin te neketen nae. E moletin ak tenapol ni ti neta vasa xa vapien tangan lavas vini mu lalingi e nim te xeih ven.^q

³⁰ “Dutou sung, natehur longeongen usil lingxatien tei xa vanut moletin xil lapol ni tangan lavas vini. Misak ni, vatakes, nasa ni bemei mi xouk. E natesemae ni ngan xil xa di lasepsisili tangan lihat lihiti kil rin nae minuk. Ngan ak be holesok

^o23:27 Pol 21:30-33; 22:27 ^p23:28 Pol 22:30

^q23:29 Pol 18:14-15; 25:18-19; 23:6; 23:9; 26:31; 28:18

xil xa nakila namiteni usili rin ak. Namesuk.”^r

³¹ Moletin te vaeen xil lalong xat naha xa vatixar nae tesemae ni mi xil. Ma e vongien nen tak, xil ladel xat Pol ba labe taon te hal Antipatris. ³² Ut milan, moletin te vaeen xil xa latekakao tang ladiplomun labe Serusalem. E ngan xil xa laloh e hos xil ladel Pol nga tang laba. ³³ Melele xa laduxoh taon te hal Sesaria, laba labe visal vat te kavmen, e lasa uvei na vatixar nae mini. Di, laling Pol de hen.

³⁴ Melele xa vat te kavmen Filiks buli uvei ak bus, misis Pol tangan vahit kila xa xi nggo provins xave. Melele xa mikameti xa Pol be te hal Silisia,⁵ ³⁵ biteni mini bit, “Momal. Inou nilepis ngongoren namim e von koten navan melele xa ngan xil xa di lasepsisiluk limei lituxoh inggak.” Di, Filiks misemae ni tangan ha liketeh xol Pol e nim xa mahulong xa suv toto **Herod** tepol ni.**

Pol bit usil rin nan e von koten na vat te kavmen Filiks

24 Melengien lim (5) mei mitavi, e Ananaeas xa be **vatixar na pris xil** be taon te hal Sesaria del rut elda na Siu xil te hal Serusalem. Loea nae mun nggusil xil lamei, hisen Tetalas. E melele te kot, xil ba lasoh pe met Filiks tangan likila lihit rat rin nae iha xat **Pol**.^t ² Lamei vituei bus, Filiks misemae ni tangan litel Pol imei nim. Melele xa bemei, Tetalas misa sepinien nan ba

xat rin na Pol pe met Filiks bit, “Vat te kavmen Filiks, vengan xa di olaxat kuh xamem del hosien nam, xamem madi e tomat vehakut. Del metisouen nam, ote-hiles holesok holu mei bos pupu tangan vatutou ni moletin xil te kantri ak. ³ E ut xil vus, xamem mamaal ve relaxatien nam, e mabit mamesuk ven.

⁴ “Xosali, iemem ti tavei tangan mavas ti melele nam xil, e, nggusil hosien nam, madakes xouk tangan usa vurangom li e uteong vuteili ni rin namem usil rin na moletin ak. ⁵ Xamem makameti xa moletin ak be vatxeih tei xa di pol ni ngongoren xil xa tellep mei di mistal mi vanut **Siu** xil e rute xil vus e ut etan xa xi di ba en. Xi be vat tei na vanut moletin xil xa di langgusil pispisien na moletin tei te hal Nasaret.^u ⁶ E, e hal Serusalem, xi tesak pisi tangan vasak ni **Nim Eo** na Siu xil mei vahe muis pe met Hi. E ve rin ak, xamem matetal xati. ⁷ ^{††8} E xosxa ulepis kuh rin na moletin ak, ma ulong kila ixo xi mun tang xa holesok xil xa di mabit rati usili be reitin.” ⁹ E Siu xil vus xa ladi e von koten ak lamae e sepinien na Tetalas labit holesok xil vus xa biteni be reitin.

¹⁰ Melele xa Tetalas misepin e rin na Siu xil bus, vat Filiks pisen ni nggo hen tangan Pol imei e ihit kil rin nan mini. Ma Pol bemei e biteni mini bit, “Vat Filiks, xosali, inou namei pe metom tangan nisep kil rin navan usil ngongoren ak itel sien. Nabesi nou vengan xa nakila xa huram xil holu, xouk di otelepis moletin

**23:35 Suv toto Herod ak be Herod xa Mahulong xa temat dutou ni melele xa Iesu tepot. Xi vari iaxa tesemae ni tangan lipol ni nim mahulong ak. E melengien xil na Pol, moletin te vaeen xil tang lateti en.

††24:7 Rut vanuvei matu xil te Polien laling sepinien ak xa bit, “E melele xa mabue xat xamem tangan masa pangasien mini vahusil rae nar xil, Lisias, vatixar na moletin te vaeen xil, temei e texeih xat xamem tangan masa rati mini. Di, tesemae ni mi xamem mamei inggak pe metom tangan mavit rat rin namem vaha xat moletin ak.”

^r23:30 Pol 24:5-8; 25:5 ^s23:34 Pol 22:3 ^t24:1 Pol 25:2

^u24:5 Pol 17:6; 24:14

xil te kantri ak texo sexien xa momal.
¹¹Xosxa usis moletin xil ak, ma ulong kila xa melengien lu e le tei (12) tang tetavi xa inou natehe **Serusalem** tangan namot mi Hi en.^v ¹²E melele xa Siu xil latekamet nou, natnangor ti vatel moletin tova e vloh te Nim Eo, mu natnapol ni ti selen mi moletin xil e **nim te pispisientova** mu e rute sav xil mun e hal Serusalem. ¹³Siu xil xai lasakras lapisen kil reitinen te sexien tesa tova xa di labiteni xa natepol ni.

¹⁴“E neta tei xa latehiteni usil nou be reitin, inou di namot mi Hi na avu namem xil nggusil sexien xil xa Iesu tepispisi ni mi xamem, sexien xa Siu xil ak labit tamal ti. E inou mun nake reitin xa holesok xil vus xa latetisi e **rae xil na Mosis** tetel uvei xil na **provot** xil.^w ¹⁵Nenesien navan vatei takes e nenesien nae xa bit Hi isak ni moletin xil vus limea rilomun ra maten tangan Hi ilepis rin nae, ngan xil xa lamal pe meten e ngan xil xa latamal ti.^x ¹⁶Ve rin ak, vehakut di nasak tangan napol ni holesok xil e suse tei xa isak ni nou ninave unoun ti pe met Hi mu pe met moletin sav xil.^y

¹⁷“Huram xil holu natnata kat ti e hal Serusalem. Di, tenave nousav ti, natetilo-mun natemei tetel rut mani tatei tangan vaha vatutou ni rut hoeo xil te hal Isrel, e tangan nasa sanien eo navan xil vaha mi Hi.^z ¹⁸E melele xa di natepol ni holesok xil ak, Siu xil ak latekamet nou e vloh te Nim Eo na Hi. E melele nen ak, di natepol vuol ni sexien xil te serev moten moletin en pe met Hi. E melele xa latekamet nou, natnata ti vatel vanut moletin tova, e natnapol ni ti selen tova. Natetat temak tang.^a

¹⁹“E melele nen ak, rut Siu xil xa latexo provins te hal Esia latemei, e xil vari

latepol ni ngongoren ak. Vahos mak mu vahit xil mun lati inggak xosali tangan lasep kil sexien tesa xa labit latepus nou natepol ni. ²⁰Mu umaen ni ngan xil xa ladi inggak tangan lihith kil neta tova xa misa xa latekameti e melele xa natesoh pe met kaonsel nae e latelepis rin navan. ²¹Vahit lakila laviteni tang xa natesoh pe metexil e natekekei ni natehit, ‘!Di nasoh inggak pe metemim xosali vengang xa nake reitin xa moletin mikila imea rilomun ra maten!’^b

²²Melele xa Pol misepin bus, Filiks, xa mikil kuh sexien xa Kristin xil di langgusil pispisien xil na Iesu, misemae ni tangan koten nan ingel mu ituxoh melengien sav tova. Filiks biteni bit, “Melele xa Lisias, vatixar na moletin te vaeen xil, imei ituxoh inggak, inou nimal ni ngongoren namim sung.” ²³Di, Filiks misemae ni moletin te vaeen nan xil tangan litel Pol iha e liketeh xole, e limaen ni tangan ikakao vuteili e nim te xeih e limaen ni timue nan xil tangan mei lisao ni e litutou ni.^c

Pol de nim te xeih pe he vat Filiks be huram lu

²⁴Melengien vahis mei mitavi, e Filiks bemei del atou nan xa hisen Drusila lube rute xa Pol da en. Atou nan be ate-Siu tei. Di, Filiks misa sepinien tangan litel Pol imei tangan luteong ni sepinien nan usil neketen nan e Iesu Kristo. ²⁵E sepinien nan, Pol bit usil midep iaxa Hi ien bei tangan moletin xil lipol ni naha xa momal, lixuxou kuhi ve sexien nae, e itep iaxa Hi ilepis rin na moletin xil vus e Melengien te Lepisien e hoxalite te holesok xil vus. E melele xa vat Filiks milongemak, ulin mikan holu. Ma biteni mi Pol bit, “Osepin pipin te xosali. Utilo-

^v24:11 Pol 21:17; 8:27 ^w24:14 Pol 24:5 ^x24:15 Dan 12:2; Sion 5:28-29; Pol 23:6 ^y24:16 Pol 23:1 ^z24:17 Pol 11:29-30; Rom 15:25-26; Kal 2:10

^a24:18 Pol 21:26-27 ^b24:21 Pol 23:6; 24:15 ^c24:23 Pol 27:3; 28:16,30

mun uha, e melele xa nakamet mesal tova mun, nikes rilomun ni xouk.”^d ²⁶E melele nen ak, Filiks di minemi bit vahit Pol vasa *mani* tova mini. Ve rin ak, Filiks mikes Pol vehakut tangan mei isepin itela.

²⁷Huram lu mei mitavi, e moletin tei minggoles von Filiks e mei be vat hu te kavmen te hal Sudea, hisen Porkas Festas. E melele nen ak, Filiks tamaen Pol ti vaha vameluv ra nim vaxoni ngan xa rae te hal Rom tesemae ni. E-e, mistokovein ni da tang vengan xa ien ti tavei tangan vapol ni nenemien na Siu xil mei vasa xati.^e

Pol misis kavmen te hal Rom tangan imaen ni ha ihe Rom tangan suv toto nae xa mahulong ilepis rin nan

25 Festas temei e taon te hal Sesaria tangan vahur kokot ni polien te vat te kavmen te provins te hal Sudea. Di, melengien tol mitavi, nggo Sesaria e be *Serusalem*. ²E rute ak, *vat xil na pris xil* del vat xil na *Siu* xil lamei lapusi. Pe met Festas, Siu xil ak laseputut xat *Pol*, e lasisif ³tangan vapol ni xil lalonge vahos e vamaen Pol vamei e nim te xeih e hal Serusalem. Xil lasisi mak vengan xa lateling xati ngamu xa lihas vin Pol e suse.^g

⁴E Festas biteni mi xil bit, “Pol da nga nim te xeih e Sesaria. E navehi ti, inou nitilomun nihe rute ak. ⁵Xosxa itep, ma vat namim xil mei lihe xamem muvituei muhe Sesaria. Xosxa moletin ak tepol ni neta tova xa tesa, ma xil likila lihit rati inggaxor.”^h

⁶Festas bas melengien xos tol e he sav (8) mu he xalu (10) del xat xil. Di, dilomun be Sesaria. E visuvong nen, xi dotan e von koten nan, e misemae ni xa lavur

Pol vamei nim.ⁱ ⁷Melele xa Pol bemei, Siu xil xa latexo Serusalem mei lakapis xole e labit rat sexien tesa hao xa tellep xa labit Pol di tepol ni. E xil lasakras lapisen kil reitinen te naha xa labit Pol di tepol ni.^j ⁸E Pol misep moten rin nan bit, “Inou natnapol ni ti neta xa vasa vaha xat *rae* na Siu xil, mu vaha xat *Nim Eo* na Hi, mu vaha xa *suv toto xa mahulong te hal Rom*.”

⁹E Festas ien bei tangan vasak ni Siu xil lamaal ve polien nan. Misak ni, misis Pol bit, “Xouk iem bei ove Serusalem tangan ha nilepis rin nam en?”^k

¹⁰Ma Pol bit rilomun ni mini bit, “E-e. Natamaen ni ti. Taxeak, di nasoh ngamu nade von koten te kavmen te hal Rom. Ma e rute ak vari iaxa momal tangan ulepis rin navan en. Xouk okila ngamu xa inou natapol ni ti neta vasa mi Siu xil. ¹¹Xosxa be reitin xa natehur xoteh rae tei mu natepol ni neta tei xa misa tangan ha nimat ven, ma ninasak pisi ti tangan nilesae rani. E xosxa sepinien nae usil inou be luvosen tang, ma moletin tovuol mikila vamaen nou name hexil. Ve rin ak, nasisuk Festas tangan umaen nou nihe Rom tangan suv toto vari iaxa ilepis rin navan usil ngongoren ak e von koten nan.”

¹²Ma Festas misepin del moletin xil te tutouen nan e lasep kil rae xil mini. Di, Festas bit rilomun ni mi Pol bit, “Xouk osis nou tangan ha upus suv toto xa mahulong te hal Rom, ma nisanuk ha upusi.”

Vat Festas misep usil rin na Pol mi suv toto Akripa

¹³Rut melengien xil mei mitavi, e suv toto Akripa bemei e taon te hal Sesaria del hineli xa hisen Bernis, tangan lalsa

^d24:25 Sion 16:8 ^e24:27 Pol 25:9 ^f25:2 Pol 24:1; 25:15

^g25:3 Pol 23:15 ^h25:5 Pol 23:30 ⁱ25:6 Pol 25:17

^j25:7 Pol 24:5-6; 24:13 ^k25:9 Pol 24:27

sepinien te hurpilien nalu mi Festas ve polien hu nan. ¹⁴ Melele xa ludi visali melengien vahis, Festas misep usil rin na Pol mi suv toto Akripa bit, “Melele xa Filiks tehe vat te kavmen inggak, xi teling moletin tei e nim te xeih, e da tamu xiak.¹ ¹⁵ E melele xa natehe Serusalem, vat xil na pris xil del elda xil na Siu xil mei latepus nou. Siu xil ak latesep-sisil moletin ak e latsis nou tangan nikin maten mini.^m ¹⁶ E natehiteni mi xil xa ngan ak tave sexien na mol-Rom xil ti tangan mamaen moletin tei vaha valong pangas xi vatiamu melele xa tava ti mu von koten. E-e, itiamu, rilepis rin nan e von koten tangan ipus kila xa visi iaxa di miso sepinien ba xati e ilong kil naha xa xil labit tepol ni xa tesa. Ti, ramaen ni tangan isep moten rin nan pe metexir.

¹⁷ “Ma melele xa latemei inggak, natnararu ti. E-e. Ut milan tang, natekes viton moletin xil limei e matetotan e von koten. Di, natesemae ni tangan moletin te vaeen navan xil litel Pol mei isoh pe metok.ⁿ ¹⁸ E melele xa elu nan xil latesoh tangan lateso sepinien vaha xati, sepinien nae tenatuxoh ti naha xa natenem usili.^o ¹⁹ Xil latengor mini usil neta ngan e rin te neketen nae, usil hisit sexien nae xil, e usil moletin tei xa hisen Iesu. Siu xil labit temat vuol vari, e Pol mike reitin xa xi meul tang da.

²⁰ “E melele nen ak, inou natnakil ti vari tangan nikamet reitinen te sepinien nae itep. Ma nasis Pol tangan vamaen ni vahe Serusalem tangan lilepis rin te naha xa labit xi tepol ni.^p ²¹ E Pol ien ti tavei, e tesis nou tangan itat e heok inggak ituxoh melele xa nikila nisa ni ihe Rom tangan ha suv toto xa mahulong ilepis kuh rin nan e von koten nan.”^q

²² Melele xa suv toto Akripa milonge mak, biteni mi vat Festas bit, “Inou mun, ieok bei tangan niteong ni sepinien na moletin ak.”^r

Ma Festas biteni mini bit, “Bos tang. Visuvong vari uteong ni sung.”

²³ E visuvong nen, lamerere kuhi mi suv toto Akripa xal Bernis del anien tei xa mahulong e langgur pilei xalu lumei nim e von koten. Vat xil te taon ak del vat xil na vanut moletin xil te vaeen ladel xalu lamei del merereen, e ladotan e von vitueien tei xa mahulong. Melele xa ladotan bus, Festas misemae tangan litel Pol imei nim.^s

²⁴ Di, Festas biteni mi xil bit, “Suv toto Akripa e xamim vus xa mudi visal xamem, taxeak di nanggur pilei xamim vus. Pe metemim, moletin tei di misoh xa Siu xil vus te hal Serusalem e rute ak mun di lasepsisili minou. Xil di ladakes nou nggeih be nesao labit momal tangan mavur xoteh meulien nan.^t ²⁵ E inou natnakamet ti neta tova xa misa xa xi tepol ni tangan ha vamat ven. Ma melele xa moletin ak tesis nou tangan nisa ni ihe Rom tangan suv toto xa mahulong ikila ilepis rin nan e von koten nan, inou natemaen ni. ²⁶ E natahur ti mu neta tova xa momal tangan nitis usili veneh ma di nasa ni vahe Rom ven. Mak iaxa, nangguri mei misoh pe metom, suv toto Akripa, e pe metemim vus, tangan melele xa risis pilei e rikamet rin nan, ma nikila sung nitis neta tova usili. ²⁷ Vengan xa di nanemi nabit tamal pupu ti xa nasa vatxeih tei vaha mi suv toto xa mahulong xosxa ninavit kil ti neta xa di nasa ni ven.”

¹25:14 Pol 24:27 ^m25:15 Pol 25:1-2 ⁿ25:17 Pol 25:6 ^o25:18 Pol 18:14-15; 23:29 ^p25:20 Pol 25:9 ^q25:21 Pol 25:11-12 ^r25:22 Luk 23:8
^s25:23 Mat 10:18; Mak 13:9; Luk 21:12 ^t25:24 Pol 25:2,7,15; 22:22

**E von koten, Pol misep kil rin
nan pe met suv toto Akripa**

26 Di, suv toto Akripa biteni mi **Pol** bit, “Namaen ni xouk tangan usep kil rin nam usil holesok xil xa misa xa di labit usili ba xatuk.”

Ma, nggo hen, Pol misis moletin xil tangan litit votei. Di, misepin bit, ²“Suv toto Akripa, namaal pupu ve mesal xa osa ni minou tangan nisep kil rin nava usil holesok xa misa xa labiteni labit di natepol ni. ³Bos tangan alonge, venggan xa okil kuh sexien xil vus na **Siu** xil ngamu del ngongoren namem xil. Ma nasasuk tangan uteong ni nou li ihe vuteili tang.

⁴“Siu xil vus lakil meulien navan, melele xa natehe horamue mei duxoh xosali ak, e naha xa natepol ni e ut xati navan del taon te hal **Serusalem** mun. ⁵Xosxa usis xil, xil tang likila lihiteni minuk xa, tetiamu, inou natemos tetel vanut Siu tei xa lakes xil ni **Farasi** xil e nanggusil xat kuh rae xil namem mili vanut Siu sav xil vus.^{u6} Ma taxeak, di nasoh e von koten ak venggan xa di naling nenesien navan e hitxatien xa Hi tepol ni tetel xat avu namem xil tetiamu.^{v7} Moletin xil vus xa lastal langgo vatimol lu e le tei (12) namem, xa di lamot mi Hi melengien e vongien xil, xil vus mun di laling nenesien nae xa hitxatien ak mei istal ihe reitin. Mak ma suv toto, ve vatit nenesien navan e hitxatien ak, Siu xil ak di lasepsisil nou.”

⁸Di, Pol biles pus Siu xil xa ladi e von koten ak e biteni mi xil bit, “?Veneh vari xamim, Siu xil, mutake reitin ti xa Hi mikila isak ni moletin tei imea rilomun ra maten? ⁹Tetiamu, inou mun natenemi temal tangan nisak purun ngan xil xa laling neketen nae e Iesu te hal Nasaret.^{w10} E natepol ni temak e hal

Serusalem. **Vat xil na pris xil** latesa xeihen minou tangan nital xat moletin xil na Hi e niso xil lihe nim te xeih. E melele xa vat xil na Siu xil iexil tehei tangan lavas vin rut Kristin xil, inou mun natemae e nenemien nae. ¹¹E melengien xil holu, natehe **nim te pispisienna** Siu xil tangan nilang ni xil. E melele xa natekamet rute ngan xil en, natesak purun xil texeih tangan vasak ni xil lasepin vasa vaha xat his Iesu e lapol ni hitxatien xa linahusili ti mun. Ieok teat pupu ni xil, misak ni di natehe taon sav xil mun tangan nihol rerat xil en.”

**E von koten, Pol misep usili xa
tetep iaxa Iesu testal mini e
suse xa be Damaskas**

¹²Pol misepin mi moletin xil mun bit, “Usil nenemien nen tak, vat xil na pris xil latesil nou natehe Damaskas tetel xeihen nae tangan nipol vuol ni rae xil nae. ¹³E nabiteni reitin minuk, suv toto, melele xa di natehusil suse nateha, e piniae vari, miehen tei testal texo ut nesao xa teminehin pupu teli eai teme telelup xol nou tetel moletin xil xa latetel xat nou mateha. ¹⁴Mak, ma xamem vus matekiri matehe tan. E inou, natelong rae tei xa tesepin minou texo sepinien Hibru tehit, ‘!Sol, Sol! ?Veneh ma di osak purun nou? Di osa pangasien mi xouk mun tang melele xa di obae del nou. Xouk onggoni buluk tei xa masta nan di measi melele xa di pol ni vatin.’

¹⁵“E inou natehiteni natehit, ‘?Suv, xouk obe visi?’

“E xi tehit rilomun ni minou tehit, ‘Inou Iesu, xa di osak purun ni. ¹⁶!Tamea! Di nastal minuk xosali venggan xa natehosei xouk tangan mei uhe moletin te polien navan. Nateling xati ngamu xa xouk uha uhit mesen naha xa otepusi usil nou xosali, e naha

xa nipisen ni minuk e melengien xil xa ti imei.^x ¹⁷Inou nisikoe xolok tangan moletin nam xil napurunuk ti. E nisikoe xolok mun ra ngan xil xa latave Siu ti xa di nasilak tangan uhe eloheoh navan mi xil.^y ¹⁸Di nasilak ve xil tangan ukila ututou ni xil lipus kil miehen navan te reitinen tangan mei lihiles ra maluxolukuken xa ladi en. Reitin, itutou ni xil limea reling he **Temat** e xeihen nan, e mei liti pe he Hi e xeihen nan. Mak, ma melele xa liling neketen nae e nou, xa nabe Kristo, Hi iketeh ihos rilomun mi xil e nanem ti mun **tesaen** nae xil. Ti, Hi ihur pilei xil mei lihur vonine itel moletin sav xil xa Hi tehosei xil labe nan vengan xa di laling neketen nae e nou.”^z

E von koten, Pol misep usil polien nan

¹⁹Pol biteni mun bit, “Ma, suv toto Akripa, natehusil kuh metuveen xa natepusi xa temei minou texo ut nesao. ²⁰Misak ni, e hal Damaskas, natehithiteni mi Siu xil vus xa momal tangan lihiles ra tesaen nae xil e lipol ni holesok xil xa ipisen ni xa latsa meulien nae mi Hi. Di, natehithiten vatit sepinien ak mi Siu xil e hal Serusalem, e e ut xil vus e provins te hal Sudea. Di, natehithiteni mun mi ngan xil xa latave Siu ti.”^a ²¹Ve sexien ak vari iaxa, Siu xil latetal xat nou e vloh te **Nim Eo** e latesak pisi tangan lavas vin nou.^b

²²“E Hi di dutou ni nou e polien ak melele xa testal rohon ni nou mei duxoh xosali ak. Misak ni, nakila nasoh inggak pe metemim e nabithiten longeon-gen hos usil Iesu Kristo mi xamim vus, mi eilep xil be duxoh movotei xil mun. E naha xa di nabit usili nggoni ngan taxa

Mosis del **provet** xil tetiamu latehit lelen ni latehit mei istal.^c ²³Xil latehiteni xa Mesaea xa Hi tehiti xati tangan isa ni imei, xi ilong pangas xi e ha imat. Ti, imea rilomun ra maten itiamu ni moletin sav xil tangan ipisen suse te miehen mi moletin xil vus, mi Siu xil e mi ngan xil xa latave Siu ti.”^d

²⁴Melele xa Pol di tamu misep kil rinnan e von koten mak, vat Festas men bit, “!Pol, otalang tova tang! Otevuli pupu ni vanuvei nam xil e mei otalang pupu.”

²⁵E Pol bit rilomun ni mini bit, “Suv Festas, inou natatalang ti. Sepinien xil xa di nasa ni mi xamim taxeak be reitinen e metisouen da en. ²⁶Suv toto xa xiak mikil holesok xil ak ngamu, e nakila namiteni vama tang mini. Xi mikil kuhi vengan xa holesok xil ak tastal ti vaxo suse te xusen.”^e

²⁷“?Ma midep e xouk, suv toto Akripa, oke reitin e naha xa provet xil latetisi? Nakila xa di oke reitin en.”

²⁸E Akripa bit rilomun ni mini bit, “?Pol, onemi obit ukila uhiles nenemien navan tangan mei nihe **Kristin** imanon imak? E-e, osakras.”

²⁹E Pol biteni mini bit, “Inou di nasis mi Hi ve xouk, e ve xamim vus xa di muteong ni sepinien navan xosali, ti xamim mei muhe Kristin ixoni nou ... e, e xamim, sen xil ak ihe tovuol e hemim. E inou, tave ti neta xosxa mei uhe Kristin itemanon mu e melengien sav tei xa ti imei.”

³⁰Melele xa Pol misepin bus, suv toto Akripa, vat te kavmen Festas, Bernis, del xil vus xa latotan tetel xatel e von koten ak latamea laba. ³¹E melele xa di laba, labiteni mi xil mun tang labit, “Moletin

^x26:16 Esek 2:1 ^y26:17 1Kron 16:35; Ser 1:7

^z26:18 Aes 35:5; 42:7; 61:1; 42:16; Efes 2:2; Kol 1:13; Dut 33:3-4; Pol 20:32

^a26:20 Pol 9:19; Mat 3:8 ^b26:21 Pol 21:30-31 ^c26:22 Luk 24:44

^d26:23 Luk 24:46-47; Aes 42:6; 49:6 ^e26:26 Sion 18:20

ak tapol ni ti neta vasa tangan ha vamat ven mu vahe nim te xeih ven.”^f

³²E Akripa biteni mi Festas bit, “Vahit ngan xa moletin ak nasisuk ti tangan usa ni vaha vapus *suv toto xa mahulong te hal Rom*, ma bos tangan omaen ni ha ven vamase.”^g

Laling Pol be tuturil tei tangan vahe Rom

27 Melele xa vat Festas pus mesal tangan valing *Pol* vahe tuturil tei xa di ba ve taon xa mahulong te hal Rom e provins te hal Itali, miling moletin sav xil mun en xa lateti e nim te xeih. E inou Luk mun nanggusil xil maba. E Festas miling xamem vus e he moletin tei xa hisen Sulias. Xi be vat na moletin te vaeen xil xa lakes xil ni ‘vanut moletin na suv toto xa mahulong te hal Rom.’^h
²Tuturil ak texo taon te hal Atramitiam e di labue xati tangan vahe pasis xil e provins te hal Esia. Di, xamem maba del xat ngan Masedonia tei xa texo taon te hal Tesalonaeka, hisen Aristakas.ⁱ

³Maloh e tuturil ak e, melengien sav, maduxoh pasis te taon te hal Saedon. E vat Sulias bit vapol ni vahos mi Pol, ma maen ni tangan ha vapus ti timue nan xil e hal Saedon tangan likila lisa ti tutouen mini.^j
⁴Melele xa mabe reling Saedon, votiang miseten nggeih. Misak ni maba makapis e rin sav te aelan te hal Saepras xa tas merou vuteili en. ⁵Di, manggur xoteh tas sangas ni provins xalu te hal Silisia del Pampilia, e ba masotiei e taon te hal Mira xa de provins te hal Lisia. ⁶E rute ak, mabut mabe ut e Sulias mikamet tuturil tei mun na mol-Aleksandria xil xa

di bue xat xi tangan vahe Itali. Ma misis vatihos tangan vamaen xamem mava en.

⁷Melele xa di maloh e tuturil ak, lakameti xa votiang nggeih pupu, ma dat miloh merou tang melengien vahis. Melengien hao mei mitavi, di, maduxoh rute tei sangas visal taon te hal Nitas. E vatihos pusi xa tuturil ak misakras valoh vamaen nggeih pupu, misak ni, biles tuturil nan ba nngusil aelan te hal Krit, e rin xa tas be tan vuteili en. Di, tuturil miloh ba sangas ni meteh xil xa tave sotin ti ra metimal te hal Salmone. ⁸Vatihos mikameti nggeih tangan vasak ni tuturil nan valoh, ma maloh merou ba vuma ... maduxoh rute tei xa bos xa lakesi ni ‘Pasis xa Bos’ xa de sangas visal taon te hal Lasia.

⁹E rute ak, mapusi xa matehas melengien hao ngamu e suse e, ve rin ak, madi ngamu e melengien xil te an tesa (melengien xil xa Siu xil di labal ni anien ve ‘Melengien te langgal Rat Tesaen ni Ra’^{k, l, m} mitavi ngamu.) Misak ni, melele xa vat te moletin te vaeen xil del ngan xil te tuturil di lanem usil suse nae, Pol mei misa nenemien nan mi xil bit, ¹⁰“Suv navan xil li, e ketehen navan, xosxa ti riha nga tang, napusi xa suse nar ixeh pupu. Tuturil ak imahoe lel, holesok xil xa di vangite ikesae, e moletin ngan xil mun lilel.”¹¹
¹¹E Sulias, xa be vat na moletin te vaeen xil, xi mae e nenemien na vatihos te tuturil del moletin xa tuturil ak be man. E xi minem male ni sepinien na Pol. ¹²Xalu lubiteni mi Sulias lubit pasis xa madi en tavos ti e melengien xil te an tesa. Ve rin ak, sangas moletin xil vus xa ladi e tuturil ak iexil bei tangan lasak pisi

[†]27:9 Melengien Eo ak be na Siu xil xa di lapol ni e hoxalite te aveti Septemba. E melengien kokot xil te Septemba ba duxoh hoxalite te aveti Febuari be melengien xil te an tesa xa tavos ti tangan tuturil xil laloh en.

^f26:31 Pol 23:29 ^g26:32 Pol 25:11 ^h27:1 Pol 25:12

ⁱ27:2 Pol 19:29; 20:4 ^j27:3 Pol 28:2; 24:23 ^k27:9 Lev 16:29

^l27:10 Pol 27:22

lalah lave pasis xa bos xa de hal Finiks e rin sav te aelan ak te hal Krit tangan liti en ituxoh hoxalite te melengien xil te an tesa. Pasis ak nggur mesal e rin lu, tei nggo saotwes, e tei mun nggo notwes.

Votiang te xeih tei mei divin tuturil xa Pol da en ba be mesal vuol

¹³ Melele xa votiang hos tei xa nggo saot mistal mi xamem, moletin xil te tuturil lanemi labit bos tangan mava vaxoni lingxatien nae. Misak ni lalihi rat angka e manggo sangas tang ni ut maba. ¹⁴ Tavehi ti, votiang tei xa nggeih pupu xa nggo ut bemei e divin tuturil be mesal. ¹⁵ Vengan xa votiang bas pupu ni tuturil e masakras maviles matilomun mavusil suse namem mava, ma mamaen votiang ak tangan vativin xamem mava mave mesal.

¹⁶ Xamem manggus vuteili melele xa mabe rin xa be saot e tutut aelan te hal Kaoda. E rute ak, mapol nggeih tangan maling kuh bot te tuturil ak. ¹⁷ Melele xa boskru xil te tuturil lapo rat bot ak bemei nesao bus, laso ao xil be tas mei langgo pe tuturil e malet xat xil tangan tas naxu len tuturil ak ti. Ulixil mikan xa tuturil naxon e mae te kantri te hal Libia, misak ni laseti sel be tan e laso angka be tan tangan vasak ni tuturil valoh merou mu.

¹⁸ E melengien sav teni, mapusi xa votiang ak nggeih tamu e tas di bas tuturil xa madi en misa tang. Misak ni, laso rut holesok xil xa di vangit tuturil be tas tangan vasak ni tuturil ak mei vameit mu. ¹⁹ E melengien sav xa be vatol nen, mun, xil laso rut holesok xil te tuturil xa meas be tas. ²⁰ Maloh mak melengien hao xa matapus ti eai mu hitu xil tangan mapus kil suse namem vaxo en vengan xa momah xil mikoe xol tilang hat e votiang nggeih xa nggeih. Misak ni, nen-

esien namem mot e manemi mabit be te maten tuei iaxa madi xiak.

²¹ Di, melele xa Pol pusi xa moletin xil lataxanien ti melengien xil holu, mitamea misoh pe metexil e biteni mi xil bit, "Tiramue xil, vahit muteong ni nou e munave reling Krit ti, ma ratit vahos tang e tuturil ak e holesok xil mun xa ladi en nakesae ti nave tas namak. ²² E tave ti neta xa mak, ulimim nakan ti mun. Moletin ti nakesae. Tuturil kestang iaxa ikesae.^m ²³ Nakil rin ak vengan xa, e vongien, *masxaxa* tei na Hi navan xa di namot mini mei testal minou e tehiteni minou tehit, ²⁴ 'Pol, ulum nakan ti. Hi miling xati ngamu xa xouk ha usoh pe met *svv toto xa mahulong te hal Rom*. E nabiteni reitin xa Hi imaen ni xa moletin xil vus mun xa ladi e tuturil ak del xouk linalet ti.ⁿ ²⁵ !Misak ni, tiramue xil, ulimim nakan ti! Nanesi e Hi xa holesok xil istal ixoni ngan taxa masxaxa ak tehiteni minou. ²⁶ E be reitin xa tuturil ak ha ixon ite aelan tova."^o

²⁷ Melele xa mateloh e votiang ak wik lu e Tas te hal Medeterenia xa xiak, e hilaep te vongien, rut moletin xil xa di lapol e tuturil lanemi labit sangas mave ut e rute tei. ²⁸ Misak ni, laso ao be tas tangan lakameti xa tas ak be huinep midep, e lakameti xa be huinep duxoh mita hanutap tei e lu e le sav mun (37 m). Ma melele xa maloh vuteili mun e laso rilomun ni ao, lakameti xa be huinep duxoh mita hanutap tei e lu e he sav mun (27 m). ²⁹ Ulixil mikan xa tuturil ak naxon nate hat ti. Misak ni, laso tiei ni angka hat (4) xa di pe vil tuturil e moletin xil ngasen lasis mi hi nae xil tangan ut valan katen.

³⁰ E rut moletin xil xa di lapol e tuturil lapol ni lingxatien tei labit listokovein sip ak e lilesae relingi. Xil laluvos labit liha tangan liling xat angka xil iti vat tu-

turil mun, ma laling bot te tuturil be tas. ³¹ E melele xa Pol pusi mak, ba biteni mi vat na moletin te vaeen xil del moletin nan xil bit, “Xosxa moletin xil te tuturil ak lilesae rani, ma xamim vus musakras mumeul.”^p ³² Ma moletin xil te vaeen lada xoteh ao xa dal xat bot e lastokovein ni misal ba.

³³ Sangas ut valan, Pol misel xat moletin xil vus tangan lavanien bit, “Wik lu ngamu xiak xa di munexo pupu e mutaxanien ti. ³⁴ Mak, ma bos xa muanien tangan vemim ixeh e mukila mumeul. E munanexo ti vengan xa nakila xa tovuol e xamim nakesae.”^q

³⁵ Melele xa Pol misepin bus, mileh beret vutei e memes Hi ven pe met xil. Di, bul pasi e ngga ni.^r ³⁶ Melele xa lapusi mak, ulikanen be reling xil, e xil mun langga anien vutei. ³⁷ Xil vus xa ladi e tuturil ak laduxoh handred lu e hanutap tol e tei e le sav mun (276). ³⁸ Melele xa xil vus langganien pipin, laso bak pulaoa xil vus xa teti vangite be tas tangan vasak ni tuturil vameit mu.

Tuturil xa Pol da en minggon de mae

³⁹ Melele xa ut da miluv kuhi, moletin xil te tuturil lale ras rute xa ladi en, e lale kil tutut pasis tei xa be suhon. Ma lanemi labit xosxa itep, ma lipol ni tuturil ha isal xat suhon ak. ⁴⁰ Ve rin ak, lada xoteh angka xil tangan lamerir lave huinep te tas, e lada xoteh ao xil xa dal xat stia. Di, lalihi rut sel xil xa di vat tuturil be nesao tangan votiang ikila itivin tuturil ak ihe ut. Mak, ma tuturil xa madi en miloh be visal suhon ak. ⁴¹ E melele xa tuturil di miloh ba, minggon e mae tei e misakras mun valisalis ti. Reitin, vat tuturil ak minggon, ma tahe xil xa nggeih mei di nggol len tuturil nggo toun.^s

⁴² Moletin xil te vaeen lapol ni lingxatien tei labit lihas vin vatxeih xil vus xa ladi pe hexil tangan lasakras laxul lave ut e, lavit xil lalesae. ⁴³ E vat nae tamaen ni ti vengan ien bei tangan vateh meulien e Pol. Ma misemae ni moletin xil vus xa lakil xulen tangan lavut lave tas e laxul lave ut.^t ⁴⁴ E moletin xil xa latakil ti xulen, misemae ni tangan liha sung itutou itel xat mavulut bilang xil te tuturil e lisal itela lihe ut. Ma nggo sexien ak vari, xamem vus ba maduxoh ut e mameul tang madi.

Pol dutou ni moletin xil te hal Malta

28 Melele xa xamem vus ba maduxoh ut, malong kila sung xa aelan ak, lakesi ni ‘Malta.’ ² Moletin xil te rute ak lapol ni bos mi xamem e langgur pilei xamem. Xil lapol ni upang tei xa eilep e di madale vengan xa us mus e masoh nggat xamem.^u ³ Pol mun di mileh viton av tangan vaso ni vahe upang. E melele xa di miso ni be upang, tetal tesa tei mistal nggo vanut av xil ak, mei mingar xat hen, e murur tang en. ⁴ Melele xa moletin xil te rute ak lapusi xa tetal ak di murur de he Pol, labiteni mi xil mun tang labit, “Xos moletin ak tehas vin moletin tova vengan xa, tave ti neta xa tamat ti e tas, hi nar xa rakesi ni ‘Hi te lepisien’ tamaen ni ti tangan vameul vata.” ⁵ E Pol misin rat tetal ak be upang, e neta ti taxula.^v ⁶ Moletin xil di ladatili tangan hen vatep mu vamot tang vamat. E melele xa ladi nousav e latapus ti neta vaxula, xil labiles nenemien nae e labit, “!Ei, xos moletin ak be hi tova!”^w

⁷ Tave sotin ti ra rute xa matetuxoh ut en, moletin tei xa eilep te aelan ak da, hisen Pablias. Xi nggur pilei xamem e

^p27:31 Pol 27:22 ^q27:34 1Saml 14:45; 2Saml 14:11; Mat 10:30; Luk 12:7

^r27:35 Mat 15:36; Mak 8:6; Luk 22:19; 1Kor 11:23-24 ^s27:41 Pol 27:22

^t27:43 Pol 27:22,24 ^u28:2 2Kor 11:27 ^v28:5 Mak 16:18 ^w28:6 Pol 14:11

tan nan e milaxat kuh xamem melengien tol (3).⁸ E melele nen ak, tame Pablias mesei. Ven minggan e miloh en pupu, misak ni, pat dat mak. Pol milong usili e ba misao ni. Melele xa be nim man, miling hen da en e misis xole. Pol ni bus, ma tame Pablias mei bos rilomun.⁹ Melele xa moletin xil te aelan ak lalongeong ni, mosav xil mun te aelan ak xa lamei visal Pol, e Hi pol ni xil vus mei labos rilomun.¹⁰ Misak ni, xil lasa sanien xil holu mi xamem. E laso viton holesok xil hao mun tangan itutou ni suse namem melele eah xa mustokovein xil muha.

Hi pol ni suse sav tangan Pol vatuxoh Rom

¹¹ Madi aelan ak te hal Malta aveti tol (3). Di, makamet tuturil tei na mol-Aleksandria xil xa texus tete aelan ak ra an tesa. Tuturil ak, latesteh nanao na hi lu xa lubit lube meah en, hisealu be Kasta xal Polakis. E lamaen xamem maba en.¹² Ma, maloh ba e maduxoh taon tei e kantri te hal Sisili xa lakesi ni Serakus. Madi rute ak melengien tol (3).¹³ Di, maloh ba maduxoh taon tei te hal Itali xa lakesi ni Rikiam e provins te hal Itali, e madi en melengien tei. Di, ut milan, votiang tei mistal nggo saot e mei divin temanon ni xamem. Misak ni, e melengien lu tang, ba maduxoh taon te hal Puteoli.¹⁴ E rute ak, makamet moletin vutei xil xa labe Kristin ngamu, e lasis xamem tangan mati visal xil wik tei. Melele xa mabe reling xil, maba mun e suse namem tangan mave taon xa mahulong te hal **Rom**.¹⁵ Melele xa Kristin xil te hal Rom lalongeong ni usil meien namem, lakakao lamei tangan lavisu mi

xamem e suse. Rute xil ladatil xamem e taon xa lakesi ni ‘Von Posen na Apias,’^{¶¶} e rute xil ladi nga e taon xa lakesi ni ‘Nim te Paten Tol.’^{§§} E melele xa Pol pus xil, xi besi xi pupu e memes Hi ve xil.

Pol bit rat rin nan mi Siu xil te hal Rom

¹⁶ Melele xa maduxoh taon xa mahulong te hal Rom, kavmen te hal Rom maen Pol tangan ha ita nga tasen e nim tei itel xat moletin te vaen tei xa di miketeh xole ituxoh melele xa lilepisi e von koten.^x

¹⁷ Melele xa melengien tol mitavi, Pol mikes viton vat xil na **Siu** xil lamei vituei e totanen tei. Melele xa mei ladi vituei, Pol biteni mi xil bit, “Tuxoli xil te hal Isrel, namei inggak nggoni vatxeih tei vengan xa mol-Serusalem xil latetal xat nou e lateling nou natete e he mol-Rom xil. Latepol ni minou, neta sav xa natnapol ni ti neta vasa vaha xat moletin nar xil, mu vaha xat sexien hos xil xa avu nar xil latepispisi ni mi xir.^y ¹⁸ Melele xa mol-Rom xil latelepis rin navan, iexil tehei tangan lamaen nou ha veok vamaese vengan xa latnakamet ti neta vasa xa inou natepol ni tangan lakin maten minou ven.^z

¹⁹ “E melele xa vat xil na Siu xil latesin nenemien nae, napusi xa suse navan minggonaxon. Misak ni, natesisi tangan limaen nou nime inggak tangan ha nipus **su v toto xa mahulong te hal Rom** e xi iaxa ilepis rin navan e von koten nan. E natnapol ni ti tangan masa nenemien tesa vaha xat mol-Isrel xil xa labe moletin navan xil xati.^a ²⁰ Mak iaxa nakes viton xamim mumei visal nou tangan nipus xamim e nikila nisep kil holesok xil

^{¶¶}28:15 ‘Von Posen na Apias’ be taon tei xa be 69 kilomita ra hal Rom.

^{§§}28:15 ‘Nim te Paten Tol’ be taon tei xa be 53 kilomita ra hal Rom.

^x28:16 Pol 24:23; 28:30 ^y28:17 Pol 24:12-13; 25:8

^z28:18 Pol 23:29; 25:25; 26:31-32 ^a28:19 Pol 25:11

xa testal minou mi xamim. E ieok bei tangan xamim mukila xa sen xil ak di xat nou vengan xa naling nenesien navan e ngan xa Hi tehit xati mi mol-Isrel xil xa isa ni imei tangan iteh meulien e xir.”^b

²¹ Vat na Siu xil labit rilomun ni mini labit, “Xamem matahur ti uvei vaxo provins te hal Sudea xa vahit usiluk mi xamem. Mu tuemem tovuol xa vamei inggak vatel longeongen tei mu sepinien tova xa vasa usiluk. ²² E xamem iemem bei tangan mateong ni ti mu nenemien nam xil vengan xa makila xa, e ut xil ngasen, moletin xil di lasepin misa ba ni vanut Kristin xil xa xouk obe tei e xil.”^c

²³ Ma vat xil na Siu xil laling xat melengien tei xa Pol mikila isepin mi xil. E melengien nen ak, Siu xil holu lamei e rute xa Pol da en. E makoe nen ak ba duxoh vongien, Pol misep kil suse xa Hi mei ihe suv toto na moletin xil en mi xil. Pol misak pisi tangan vapisen ni vaxo **rae xil na Mosis** e tisen xil na **provet** xil xa Iesu be Mesaea na Hi. ²⁴ Rute e xil lake reitin e sepinien nan. E rute e xil, latake reitin ti en. ²⁵ Ma xil di langor mi xil mun tang. E melele xa labit ti lava, Pol miso sepinien ak ba mi xil bit, “Naha xa **Ninin Eo** tehiteni mi avu namim xil texo provet Aesea temal tevi xa tehit,

²⁶ *‘Ha uhit lelen ni mi moletin xil ak uhit, “Xamim muteong vuma ... e munalong kil ti neta.*

Muketeh vuma ... e munapus kil ti neta.”

²⁷ *Vengan xa tinexil nggeih,*

di laki xol vurangexil e di label xat metexil.

Xil lapol ni mak vengan iexil ti tavei lapus

kil neta ngan ni metexil,

mu lalong kil neta ngan ni vurangexil.

Reitin, xosxa linamak ti,

ma xil likil kuh koute te sepinien navan,

tinexil mei imerou e lihiles meulien nae,

e inou mei nital rat xil ra mesien nae xil.”

(Aes 6:9-10)^d

²⁸ E hoxalite te sepinien na Pol, xi biteni mi xil bit, “Mak, ma ieok bei tangan mukila xa Hi di misa longeongen hos nan usil suse teteh meulien en ba mi ngan xil xa latave Siu ti. !Xil iaxa lilonge e liling neketen nae en!” ²⁹ *

³⁰ Huram lu (2), Pol de nim tei xa di minggale e aveti xil vus ni mani nan. Inggak, di nggur pilei moletin xil ngasen xa mei di lasao ni.^e ³¹ E rute ak, Pol mikila vahithiteni usil suse xa Hi mei ihe suv toto na moletin xil mi ngan xil vus xa lamei visali, e di pispisi mi xil usil Suv Iesu Kristo. Moletin tovuol vamei vasak tangan vasikoe xol naha xa Pol di pol ni. Ma Pol ulin takan ti e di pol del sien.

***28:29** Rut vanuvei matu xil te Polien laling sepinien ak xa bit, “E melele xa Pol biten sepinien ak, Siu xil latehe relingi. E lasel mi xil mun tang.”

^b**28:20** Luk 2:34; Pol 24:15; 26:6-7 ^c**28:22** Pol 24:14

^d**28:27** Sam 67:2; 98:3; Aes 40:5; Luk 3:6; Pol 13:46; 18:6 ^e**28:30** Pol 28:16

Sepinien xa diamu te

Rom

?Visi iaxa tetis uvei ak?

Pol, xa tehe eloheoh tei na Iesu Kristo, tetis uvei ak^f

E diamu ni kakaoen xa tehe vahat (4) nen ak, Pol ien tehei tangan ha isa sanien tei xa mahulong xa texo Kristin xil xa lateti e provins xil xa Pol di tepol en tangan ha itutou ni Kristin xil te hal Serusalem.^g E Pol tepusi xa ngan ak tehe mesal tei xa Hi tesa ni mini tangan ti ipispisi kuhi ni Kristin xil te hal Rom.

?Visi vari tevuli uvei ak tetiamu?

Pol tetis sepinien ak tangan teha mi Kristin xil xa lateti e taon te hal Rom. Rom tehe taon xa mahulong xa tehe eilep mak mu teli taon sav xil e melele nen ak. Rom tehe vone kavmen te rute xil vus xa di latesep usili e Vanuvei Eo, Isip teha tetuxoh Serusalem, ut xil vus xa Pol teha en ba tetuxoh Spen mun. Suv toto sav xil xa latelaxat ut xil vus ak lateti pe he suv toto tei xa eilep xa latekesi ni 'Sisa.' Xi teta kat e taon te hal Rom tetel eilep nan xil xa di latepol ni rae xil te kavmen.

E melele xa Iesu temat e eivave, Siu xil holu lateti e hal Serusalem xa latexo ut xil vus e kantri te hal Rom. Lateti inggak tangan mei lapol ni Anien te Tavien e hal Serusalem,^h e melele xa latepus naha xa testal mi Iesu, rute e xil lateneket en e mei latehe Kristin. Ma melele xa latetilmun latehe tim sae xil, xos late-

hur longeongen usil holesok xil xa latepusi e latelonge usil Iesu, ma moletin xil holu mei lateneket en. Rut moletin xil ak latehe Siu, e holu latnave Siu xil ti.

E melele xa Pol tetis uvei ak, xi tenava ti mu e taon te hal Rom. E, e kakaoen nan xil, xi tehisu mi mol-Rom xil holu texoni Prisila xal Akuila. E melele xa tetis uvei ak, xalu lutetilmun ngamu ba luteti e Rom. E xalu di lupispisi kuhi mi Kristin xil e rute ak.ⁱ

?Pol tetis uvei ak veneh?

Pol ien tehei tangan vahit rati mi Kristin xil xa lateti e Rom xa nave nousav ti e xi imei - Pol ien tehei tangan vaha vasa longeongen hos usil Iesu mi ngan xil xa ladi e taon xa mahulong te hal Rom.^j

Pol ien tehei tangan vahit kil vatit longeongen hos xa xi di pispisi ni

Hi tepisen xi mi moletin xil te ut etan, e latesin ni.^k

Moletin xil vus, Siu xil e ngan xil xa latave Siu ti, lapol misa e latalong xat Hi ti.^l

Ngan xil xa lapol ni tesaen lihur pangasien xa be maten xa hoxalite teni ihe tovuol.^m

Melele xa xir rateti tamu e tesaen, Iesu Kristo temaen xoteh meulien nan e temat tehinat xir tangan vasak ni xir mei ramal pe met Hi.ⁿ

Mak, ma melele xa moletin tei bit rati xa Iesu be suv toto te meulien nan, e mike reitin nggo tinen xa Hi tesak ni temea rilomun ra maten, ma Hi iteh meulien en.^o

Ti, moletin ak imaen Hi ihiles tinen e ipol ni nenemien nan tangan mei

^f1:0 Rom 1:1; Pol 18:23–21:16; Pol 20:1-3; Rom 16:1,23; Rom 15:23-24

^g1:0 Rom 15:25-28; Pol 25:11-12; 27:1 ^h1:0 Pol 2:10 ⁱ1:0 Rom 16:1-16

^j1:0 Rom 1:10-15; Rom 15:22-25 ^k1:0 Rom 1:18-23 ^l1:0 Rom 3:23

^m1:0 Rom 6:23 ⁿ1:0 Rom 5:8-9 ^o1:0 Rom 10:9-10

ihur meulien hu. Imak, ma ikil nenemien na Hi e itep iaxa ikila ipol ni naha xa momal pe meten.^p

Pol ien tehei tangan vahit kil lingxatien na Hi e rin na Siu xil e ngan xil xa latave Siu ti - Pol tekila xa rut Kristin xil te hal Rom latehe Siu xil e ngan tesav xil latnave Siu ti. Misak ni ien tehei tangan vapisen ni xa tatit moletin xalu ak lutnapol ni ti naha xa momal pe met Hi.^q

Vatit nenemien tei te uvei ak de Rom 5:1

“E vengan xa mei ramal pe met Hi nggo suse te neketen, di radi e tomat del Hi nggo naha xa Iesu Kristo, Suv nar, tepol ni.”

?Naha iaxa de uvei ak?

Naha vari momal tangan rike reitin en? (1:1–11:36)

1. Moletin xil vus lapol ni tesaen pe met Hi. (1:1–3:20)

2. Hi di miketeh bos rilomun mi ngan xil xa di laling neketen nae e Iesu Kristo. (3:21–5:21)

3. Hi di misak ni moletin nan xil lameluv ra xeihen te tesaen. (6:1–8:39)

4. Hi teling xati xa iteh meulien e Siu xil itel ngan xil mun xa latave Siu ti. (9:1–11:36)

Naha vari momal tangan ripol ni? (12:1–16:27)

5. Sexien xil xa momal tangan ripisen ni mi Kristin sav xil. (12:1-21)

6. Sexien xil xa momal tangan ripisen ni mi ngan xil xa latave Kristin ti. (13:1-14)

7. Sexien xil xa momal tangan ripisen ni mi ngan xil xa neketen nae taxeih ti. (14:1–15:13)

Sepinien kor na Pol. (15:14–16:27)

Sepkilaen na Pol usil uvei ak

1 Inou **Pol**, nabe moletin tei te polien na Iesu Kristo xa Hi tekes nou tangan mei nihe **eloheoh** tei nan. E xi teho-sei inou tangan ti nihithiten longeongen hos nan. ^{r2} Longeongen hos ak, Hi tehit xati nousav ngamu texo sepinien nan xa **provet** nan xil tietamu latetisi tete Vanuvei Eo. ^{s3} Longeongen hos ak di misep usil Natneli, xa latepesi mei tehe moletin tei texo ra na suv toto xil xa latestal e vatimol na suv toto **Deved**. ^{t4} E Hi tepisen ni mun xa ngan ak be Natneli reitin tetel xeihen melele xa **Ninin Eo** tesak ni xi temea rilomun ra maten. Ngan ak be Iesu Kristo, Suv nar. ^{u5} Ve naha xa Iesu tepol ni, Hi di pisen eheien hos nan mi xamem e misak ni nou nabe **eloheoh** nan. Inou nabe eloheoh nan tei tangan nihe ut sav xil e nitel ngan xil xa latave Siu ti mei liling nenesien nae e Kristo e mei lilong xat Hi. Imak, ma ipisen ni xa his Hi be eilep xa eilep pupu. ^{v6} Longeongen hos ak tetuxoh xamim mun xa mudi e taon te hal Rom, e Hi tekes rat xamim tuei mei mube moletin xil na Iesu Kristo.

^{w7} Mak iaxa di nadis uvei ak bat mi xamim xa mudi e **Rom** xa Hi tekes rat xamim tuei mei mube moletin nan xil vengan xa eheien nan di e xamim. Nasis Hi Tamer e Suv Iesu Kristo tangan lalisa eheien hos e tomat nalu mi xamim vus.

^w

^{p1:0} Rom 12:2

^{q1:0} Rom 2:9; Rom 3:21-22; Rom 9:4-5; Rom 9:6,23-24; Rom 11:25-26 ^{r1:1} Pol 9:15; 13:2; Kal 1:15 ^{s1:2} Rom 16:25-26; Taet 1:2 ^{t1:3} Mat 22:42; 2Tim 2:8; Rom 9:5 ^{u1:4} Pol 13:33 ^{v1:5} Pol 26:16-18; Rom 15:18; Kal 2:7,9

^{w1:7} 1Kor 1:2; 2Kor 1:1; Nam 6:25-26; 1Kor 1:3; 2Kor 1:2

Sisen te memesian

⁸ Itiamu, ve naha xa Iesu Kristo tepol ni e rin nar, nabit nasa memesian navan vaha mi Hi navan ve xamim vus, vengam xa moletin sav xil di lasap usil neketen namim e rute xil vus e ut etan. ^{x9} Inou di napol mi Hi del meulien tevi navan tangan nikila nihithiten longeongen hos usil Natneli mi moletin xil vus. E xi mikil kuhi xa be reitin xa inou di nanem usil xamim vehakut e sisen navan xil. ^{y10} E nasis mak tangan, xosxa imal ihusil nenemien nan, ma Hi ipol ni suse navan imese tangan mei nisao ni xamim ixoni ngan xa ieok tehei nousav ngamu tangan nipol ni. ^{z11} Vengan xa ieok bei pupu tangan nipus xamim e nisa tuxolxatien xil mi xamim xa ixo visal Ninin Eo xa isak ni neketen namim mei ixeih mu. ¹² Reitin, ihos xa nihath tangan xir vus ti ripet rat nenemien nar xil ve neketen xa de xir.

¹³ Tuxoli e hinoxoli xil, ieok bei pupu ni tangan mukila xa nousav ngamu natesak pisi tangan mei nasao ni xamim. E vehakut, holesok xil latesikoe xol nou. Ieok bei pupu xa namat napol vatel xamim tangan nikila nipus huit polien navan istal e meulien namim ixoni ngan xa di mistal e meulien na mosav xil xa latave Siu ti e melele xa di napol del xil. ^{a14} Nalonge nggoni ngan xa be polien xati navan tangan niha nihithiten longeongen hos mi ngan xil xa latave Siu ti, xa rute e xil labe mol-Kris xil xa lakil kuh neta, e rute sav xil mun labe ngan xil te rute sav xil xa latasukul kuhi ti. ¹⁵ Mak iaxa, ieok bei pupu tangan ni-

hat nihithiten longeongen hos mun mi xamim xa mudi e taon te hal Rom.

¹⁶ Longeongen hos ak, inou natave unoun ti tangan nihithiteni mi mol-Rom xil vengam xa xeihen na Hi da en tangan iteh meulien e ngan xil vus xa langgur neketen: tetiamu, mi **Siu** xil, e xosali, mi ngan xil mun xa latave Siu ti. ^{b17} Longeongen hos ak di pisen suse xa Hi di misak ni moletin xil mei lamal pe meten nggo en. E ngan xil xa langgur neketen lakila xa neketen ak kestang be suse te momalen, vatite ba duxoh hoxalite teni. Ngan ak nggoni ngan xa Vanuvei Eo di biteni xa bit, *“Ngan xa di nggusil Hi del neketen nan, xi momal pe meten.”* (Hab 2:4)

c

Tesaen na moletin xil

¹⁸ Momal tangan moletin xil lihusil Hi itel neketen, vengam xa ngan xa de ut nesao di pisen ekaten nan mi moletin xil vus xa latahusili ti, ngan xil xa tesaen nae di misikoe xol xil latapus kil ti reitinen usil xi. ^{d19} Reitin, Hi isa pangasien mi xil vengam xa xil lakil usili ngamu, vengam xa tepisen xi tasen mi xil tuei. ^{e20} Vengan xa, tetiamu nousav, e melele xa Hi tepeas ni holesok xil vus te ut etan mei duxoh xosali, Hi di pisen xi mi moletin xil. Tave ti neta xa rasakras rapusi ni metexir, e rapus kila xa hoxalite te xeihen nan tovuol e di rapus kil sexien nan xil nggo holesok xil xa xi tepeas ni xil ladi. Vengan xa ngan ak be reitin, moletin xil lasakras laviteni xa latakil ti xa Hi da. ^{f21} E tave ti neta xa latekila xa Hi da, iexil ti tenavei tangan lamerere ni, e latnamesi ti ve holesok xil xa xi di pol ni ve rin nae. Nenemien nae mikoe, e ng-

^{x1:8} 1Tes 1:8 ^{y1:9} Plp 1:8; 1Tes 2:5,10; Efes 1:16

^{z1:10} Pol 19:21; Rom 15:23,32 ^{a1:13} Sion 15:16

^{b1:16} Sam 119:46; Mat 10:18; 1Kor 1:18,24; Pol 13:46

^{c1:17} Rom 3:21-22; Kal 3:11; Hib 10:38 ^{d1:18} Efes 5:6; Kol 3:6; 2Tes 2:12

^{e1:19} Pol 14:15-17; 17:24-28 ^{f1:20} Siob 12:7-9; Sam 19:1

goni ngan xa dit latavuel e maluxoluken. ^{g22}Xil lanemi labit labe metisou, e labe unu vari tang. ^{h23}E di langgoles Hi xa be eilep pupu xa da vehakut ni nanao xil xa di lapol ni xil tangan lavur nini moletin, mu nini tuman, mu nini vongoro, mu nini tetal xil te ut etan tang xa di lakesae. ⁱ

²⁴Vengan xa di latemot mi nanao xil, Hi testokovein xil tangan eheien tesa xil xa di e tinexil itel xil tangan lipol ni holesok holu xa tamese ti pe meten. E tesak ni xil ba latepol ni tesaen xil holu ni tenbexil tetel xil mun tang xa momal tangan lave unoun ni. ^{j25}Xil di langgoles reitinen usil Hi ni luvosen tang. E lamot mi nanao xil xa langgur nini holesok xil xa Hi tepeas ni e lapol nggusil nenemien nae. E mi Hi reitin xa tepeas ni holesok xil ak, latamot ti mini e latapol ti vahusil nenemien nan. !Neta sav xa xi iaxa momal tangan lapet rat hisen vehakut xa vehakut tang! Reitin. ^k

²⁶Vengan xil lasin Hi mak, xi be reling moletin xil tangan ti lihusil xat naha xa tenbexil di ien bei, naha xa momal tangan lave unoun ni. Atou xil laling sexien xil xa momal tangan ti lapol ni vatel tiramue xil di, e laba sung di lapat del atou xil mun tang. ²⁷E nggo hisit sexien ak, tiramue xil mun laling sexien xil xa momal tangan ti lapol ni mi atou xil di, e eheien nae bas nenemien nae vehakut tang tangan lipol isa itel tiramue xil mun tang. Reitin, tiramue xil di lapol misa holu del xil mun tang nggo sexien xa momal tangan lave unoun ni. Mak, ma di lalihi pangasien ve sexien nae xil xa mikavui mei iha xat xil mun tang. ^l

²⁸E vengan xa moletin xil iexil ti tavei tangan lakil Hi, ma xi be reling xil e nenemien nae mei polu ni holesok xil xa

tavos ti e lapol ni tesaen xil xa tamal ti tangan lapol ni. ²⁹Reitin, xil mei lapolu ni sexien savsav xil holu xa tamal ti: lapol misa holu, labe hokan, e sexien nae tamal ti. Labe elu mi mosav xil, langor, e labas vin moletin xil. Laluvos, lalang ves suse tangan ti lapangei moletin xil vaxo en, e laseputut usil mosav xil. ³⁰Lasep-sisil rin na mosav xil, tinexil di nggat Hi, e di lanem holu usil suse sav xil xa lakila lapol ni tesaen sav xil vaxo en. Lapo rat xil labe nesao mili mosav xil, labe koai, e lasin rae tamexil e ninexil. ³¹Xil labe unu, langgur xoteh hitxatien nae xil, e latapisen hosien mu esaen ti mi mosav xil. ³²Lakila xa rae xil na Hi di biteni xa moletin xil xa di lapol ni hisit sexien tesa xil ak, momal tangan lihur pangasien teni xa be maten. E tave ti neta xa lakila, langgulehi dit lapol ni tesaen xil ak e dit lapet rat his moletin sav xil mun xa di lapol ni.

Hi di milepis rin na moletin xil nggusil nenemien nan xa momal tevi

2 ?Mak, ma vengan xa mukila xa Hi isa pangasien mi ngan xil xa di lapol ni hisit tesaen xil xa mak, veneh ma rut xamim di mulepis rin na mosav xil? Vengan, melele xa di mubiteni mubit momal tangan xil ti lihur pangasien ve tesaen nae xil, di mulihi pangasien be-mei e xamim mun tang. Mak tang, venggan xa, neta sav xa di mulepis rin nae, xamim di mupol ni hisit tesaen nen xil tak. ^{m2}Xamim mukila xa momal tangan Hi ihusil momalen nan e isa pangasien mi ngan xil xa di lapol ni hisit tesaen xil ak. ³E, e melele nen tak xa di mulepis rin na moletin sav xil, xamim mun tang di mupol ni sexien tesa xil ak. ?Midep? ?Munemi mubit mukila mulesae ra he Hi

^g1:21 Efes 4:17-18 ^h1:22 Ser 10:14; 1Kor 1:20

ⁱ1:23 Dut 4:15-19; Sam 106:20 ^j1:24 Pol 14:16 ^k1:25 Ser 13:25; 16:19; Rom 9:5 ^l1:27 Lev 18:22; 20:13; 1Kor 6:9 ^m2:1 Mat 7:2; Luk 6:37; Sion 8:7

e ra pangasien xa isa ni iha xat ngan xil xa di lapol misa? !Musakras! ⁴Mu, xos di munem male ni Hi, vengan xa xi polu ni hosien, ien takat temanon ti, e nene-mien nan teviei. E Hi di pisen hosien nan mi xamim tangan vatiamu ni xamim mei muhiles ra tesaen namim xil. ⁵E vengan xa tinemim e vatumim ngegeh, mutaviles ti ra tesaen namim xil. Misak ni, di muso rin ni pangasien xa iha xat rin namim mei ihe mahulong mak mu e Melengien te Lepisien, melele xa Hi ilepis rin na moletin xil en. Vengan, e melele nen ak, Hi ipisen ekaten nan iha xat tesaen xil e ilepis rin na moletin xil ihusil nenemien nan xa momal tevi. ⁶E melele nen ak, Hi isa kekes ni huit sexien xil vus mi moletin xil ihusil naha xa xil latepol ni. ⁷Hi isa meulien sal mi ngan xil xa langgulehi di lapol ni neta xa bos, e lasak tangan lakamet holesok xil xa latellep, lapolu ni merereen, e liti vehakut. ⁸E mi ngan xil xa di lanem usil xil kestang e di lasin reitinen na Hi tangan lakila tit lavusil sexien xil xa mikavui, Hi, tinen misoh, e ti ipisen ekaten nan mi xil. ⁹Reitin, moletin xil vus xa di lapol ni holesok xil xa lasa, xil lihur pangasien e ti lilonge isa pupu ven. Iha mi **Siu** xil itiamu. Ti, iha sung mi ngan xil xa latave Siu ti. ¹⁰E Hi isa merereen, tomat e his xa eilep mi ngan xil vus xa di lapol ni holesok xil xa bos, iha mi Siu xil itiamu, e ti, iha mi ngan xil mun xa latave Siu ti. ¹¹Vengan melele xa moletin xil mei lisoh pe met Hi, ilepis xil kekes ipin tang ixo sexien tei takes imal ni naha xa latepol ni. ^q

¹²Reitin xa ngan xil xa latave Siu ti, xa latahur **rae xil na Mosis** ti, Hi nalepis rin nae xil ti nahusil rae xil ak. E tave ti neta xa mak, Hi ikin maten mi xil ve

tesaen nae xil. E mi Siu xil xa latehur rae xil na Hi ngamu, Hi ilepis rin nae ihusili e ikin maten mi xil ve tesaen nae xil. ^{r13}Vengan xa tave ngan xil ti xa lalong rae xil na Hi xa lamal pe meten, e be ngan xil xa di lapol ni naha xa rae xil ak biteni iaxa lamal pe meten. ¹⁴Holu e ngan xil xa latave Siu ti latahur ti rae xil na Mosis. E neta sav xa mak, tinexil di milihil xil tangan lapol ni sexien xil xa rae xil ak di labiteni. Melele xa lapol ni mak, xil lapisen ni xa rae xil ak di ngamu e tinexil, tave ti neta xa xil latavuli ti mu rae xil ak. ^{s15}Reitin, sexien nae xil pisen ni xa Hi midis xat rae nan xil di ngamu e tinexil, e nenemien nae di bit mesen naha xa be reitin e momal mi xil. Ma, nenemien nae di misel xat xil bit, “Sexien ak misa,” mu “Sexien ak bos.” ^{t16}E Melengien te Lepisien, Hi imaen Iesu Kristo mei ilepis rin na moletin xil vus ihusil nenemien xuxus nae xil. Ngan ak ihusil pispisien xil xa di nasa ni mi moletin xil melele xa di nabithiten longeongen hos mi xil.

Siu xil xa langgur rae xil na Hi latahusil kuhi ti

¹⁷?E itep mi xamim xa di mukes xamim ni Siu xil e di munemi xa Hi iteh meulien e xamim vengan xa munggur rae nan xil? ?Itep mi xamim xa di mube koai mubit xamim kestang mukil Hi? ¹⁸?Itep mi xamim xa mubit mukil naha xa Hi ien bei xamim tangan mupol ni e di mupus kil naha xa bos vengan xa latepispisi mi xamim ngamu texo rae nan xil? ^{u19}?Itep mi xamim xa mubit mukila mutel ngan xil xa metexil bar, e mube miehien xa di muleluv rat suse mi

²:4 2Pit 3:15 ^o2:5 Sam 62:12; Pro 24:12; Mat 16:27; Sion 5:29; 2Kor 5:10

^p2:9 2Tes 1:8; Rom 1:16 ^q2:11 Dut 10:17; 2Kron 19:7; Pol 10:34; Kal 2:6; Efes 6:9; Kol 3:25; 1Pit 1:17 ^r2:12 Mat 7:21; Tem 1:22,25; 1Sion 3:7

^s2:14 Pol 10:35 ^t2:15 2Tim 2:8 ^u2:18 Plp 1:10

ngan xil xa ladi e maluxoluken? ^{v20} ?Itep mi xamim xa mubit mukila mumal ni ngan xil xa labe unu e mukila mupispisi mi ngan xil xa latakil ti Hi vaxoni ngan xa labe tutut horamue xil, vengan xa munggur rae xil xa be vatit kilakilen e reitinen na Hi? ²¹ Ihos mak mu xa xamim xa mubit mukila mupispisi ni mosav xil, itiamu mupispisi mi xamim mun tang. ?Midep? ?Melele xa musel xat mosav xil mubit, “Munakan ni ti neta,” veneh ma di mukan ni neta? ^{w22} ?E melele xa mubiteni mubit, “Munahur atou mu tiramue na mosav ti,” veneh ma xamim mun tang di munggur atou e tiramue na mosav xil? ?E veneh vari xamim xa di mupus nanao xil mubit lasa, e di mukan ni neta nggo nim eo nae? ²³ ?Veneh vari iaxa di mube koai mubit munggur rae xil na Hi, e xamim di mubiles e munggur xoteh rae xil nen tak? Ve rin ak, mupisen ni xa mutamerere ni ti ngan xa tesa rae xil ak. ²⁴ Naha xa Vanuvei Eo biteni be reitin xa bit, “*Ngan xil xa latave Siu ti di lasepsisil his Hi ve sexien tesa xa xamim di mupol ni.*” (Aes 52:5) ^x

²⁵ Xosxa xamim Siu xil mube **vexahu** ngamu, ngan ak bos xosxa mulong xat rae sav xil mun. E xosxa munggur xoteh rae xil, vexahu namim mei be neta sav tang. ^{y26} E xosxa ngan xil xa latave Siu ti di langgusil kuh naha xa di e rae xil, neta sav xa latave vexahu ti, xil lamal pe met Hi nggoni ngan xa lehit labe vexahu ngamu. ^{z27} Mak, ma ngan xil xa latave vexahu ti xa di lalong xat rae xil, xil lisa sepinien iha xat rin namim e Melengien te Lepisien. Vengan xa, tave ti neta xa xamim mutehur rae xil e simeleleen te vexahu, di munggur xototeh rae nan sav

xil. ²⁸ Moletin misakras vahe Siu vaxo sexien te vexahuen kestang xa di lapol ni ni hilbe malohos xa de valkesao tang. ^{a29} E be ngan xa di nggusil Hi nggo tinen iaxa be Siu reitin. E moletin tei be vexahu reitin melele xa di maen Ninin Eo mei biles tinen, tave ti vengan xa lapol ni neta tei e hilben. E tave ti neta xosxa moletin xil e ut etan latasa memesien nae ti mini, moletin ak di nggur memesien nggo Hi vari.^b

3 ?Mak, ma naha bos e rin na **Siu** xil? ?Naha iaxa bos e rin te **vexahu**? ² Reitin li xa holesok holu bos e rin xalu vus. Vengan, tetiamu, Hi tesa sepinien nan mi Siu xil e teling nenesien e xil tenggan lilaxat kuhi. ^{c3} E be reitin xa ti e xir Siu xil latahusil kuhi ti. E neta sav xa latahusil sepinien nan xil ti, Hi ipol sen holesok xil vus xa tehiteni. ?Midep, be reitin xa xil lakila lapol ni holesok xil xa Hi tehiteni mei vahe neta sav tang? ^{d4} !E-e, lasakras! Vengan xa, tave ti neta xosxa moletin xil vus di laluvos, Hi di pisen ni xa be reitin vehakut. Ngan ak nggoni ngan xa Vanuvei Eo di biteni bit, “*O Hi, melele xa di olepis rin navan, sepinien nam xil vus be reitin.*

Nenemien nam momal e melele xa di osa pangasien minou.” (Sam 51:4)^e

⁵ E vahit moletin tei vahiteni vahit, “Melele xa xir, Siu xil, rapol tamal ti, ngan ak di pisen ni mak mu xa Hi di pol momal vehakut. Ma, vengan xa neta xa bos di mistal nggo tesaen nar xil, Hi di pol tamal ti mi xir melele xa ien nggat tesaen nar xil e di misa pangasien mi xir ven.” (Ngan ak nenemien na rut moletin xil.) ⁶ !E tamak ti! Hi di pol momal vehakut. Vengan xosxa Hi di pol ni neta xa

^{v2:19} Mat 15:14; Luk 18:9; 2Tim 3:15 ^{w2:21} Sam 50:16-21; Mat 23:3-4

^{x2:24} Esek 36:20 ^{y2:25} Ser 4:4; 9:25 ^{z2:26} Kal 5:6

^{a2:28} Sion 7:24; 8:15,39 ^{b2:29} Dut 30:6; Kol 2:11; 1Kor 4:5; 2Kor 10:18

^{c3:2} Dut 4:7-8; Sam 103:7; 147:19-20; Rom 9:4

^{d3:3} Rom 9:6; 11:29; 2Tim 2:13 ^{e3:4} Sam 116:11

tamal ti e melele xa di ien nggat tesaen nar xil, ma xi tapin ti mun tangan valepis rin na moletin xil te ut etan.

⁷E vahit moletin tei vahiteni vahit, “Luvosen navan di pisen ni mak mu xa Hi be reitin tevi, e misak ni moletin xil di lapet rat hisen be nesao. Ve rin ak, Hi pol tamal ti e melele xa di milepis rin navan e di misa pangasien minou nggoni ngan xa nabe moletin tesa tei.”

⁸E nalonge xa rut moletin xil di laluvos labit inou iaxa di nasa sepinien tesa ak nabit, “Momal tangan ti ripol isa iaxa isa mesal tangan neta xa ihos mei istal ixo en.” E ngan ak tave reitin ti. !Momal tevi tangan Hi isa pangasien mi ngan xil xa labiteni mak e melele xa ilepis rin na moletin xil! ^f

Moletin tovuol vakila vama pe met Hi vaxo suse te rae xil

⁹Ma midep xiak? ?Be reitin xa Hi ti ipol ni ihos mak mu mi xir, Siu xil, ili ngan xil xa latave Siu ti? !E-e! Vengan xa natepisen ni ngamu xa moletin xil vus ladi pe xeihen te **tesaen**, tave ti neta xa labe Siu mu latave Siu ti. ^{g10}Ngan ak nggoni ngan xa Vanuvei Eo di biteni xa bit, “Moletin tovuol vama.

Reitin, tovuol li vari.

¹¹*Moletin tovuol vakila.*

Moletin tovuol vari xa ien bei tangan vakil Hi.

¹²*Xil vus latehiles rani.*

Xil vus mei labe neta sav tang pe meten.

Moletin tovuol xa ti vapisen sexien xa vahos mi mosav xil.

Reitin, tovuol li vari.” (Sam 14:1-3)^h

¹³“Sepinien nae xil pupuru vari nggoni vo tiei na moletin tei xa mat e di bo e vangavul,

e vulongexil polu ni luvosen vehakut tang.” (Sam 5:9)

“Reitin, sepinien nae nggoni neta xa misa xa di mistal nggo vulonge tetal tesa xil melele xa di langas vin moletin xil.”
(Sam 140:3)

¹⁴“Sepinien nae polu ni halesil xil xa lasa pupu.” (Sam 10:7)

¹⁵“Moletin xil ak latemanon tangan lapangei mosav xil e ha lavas vin xil.

¹⁶*E rute xil vus xa laba en di labas lelen holesok xil vus e di lasak ni moletin sav xil lalonge misa.*

¹⁷*Xil latakil ti suse te tomat.” (Aes 59:7-8)ⁱ*

¹⁸“E latakil ti mu xa momal tangan ti limerere ni Hi.” (Sam 36:1)

¹⁹Sepinien xil ak xa nggo rae na Hi di pisen kila mi xir xa moletin tovuol vama pe meten. E rakila xa **rae xil na Hi** di misepin momal mi Siu xil vengan xa tesa rae nan xil ak mi xil. Mak iaxa moletin tovuol vakila vasoh pe met Hi e vahit, “Inou namal tevi.” !E-e, tovuol vari! E momal tang tangan moletin xil vus ti lihur pangasien ve tesaen nae xil. ²⁰Vengan xa moletin tovuol vakila vapol sen ni holesok xil xa rae xil di biteni tangan mei vama pe met Hi. E be polien xati te rae xil ak tangan vasak ni moletin xil mei lapus kil tesaen nae xil. ^j

Ramei ramal pe met Hi nggo suse te neketen

²¹E xosali, Hi di pisen suse ngamu tangan rakila mei ramal pe meten. Suse ak, rae na Mosis e tisen na **provet** xil mun latesep usili, e taxo ti suse te longxatien te rae xil. ²²Hi pus ngan xil vus xa di laling neketen nae e Iesu Kristo iaxa lamal pe meten. Reitin, ien ti tavei tangan vakil ti xos moletin tei be Siu mu tave Siu ti, e di misak ni ngan xil vus xa laling neketen nae e Kristo mei lamal pe meten. ^{k23}Vengan xa moletin xil vus lapol misa, lasakras latuxoh hosien xa

^f3:8 Rom 6:1 ^g3:9 Rom 1:18–2:24; 3:23 ^h3:12 Sam 53:1-3; Ekl 7:20

ⁱ3:17 Pro 1:16 ^j3:20 Sam 143:2; Kal 2:16; Rom 7:7 ^k3:22 Rom 1:17; Kal 2:16

eilep xa Hi teling xati tangan moletin xil liti en. ¹²⁴E ve eheien hos na Hi, xi tesak ni xil mei lamal pe meten texo Iesu Kristo xa texal rat xil mei lameluv ra pangasien te tesaen nae xil. ^{m25}Nggusil lingxatien nan, Hi tesil Iesu tangan ha imat ixoni sanien eo tei, e ren teleh tangan vakas moten xir ramese ra **tesaen** nar xil. Hi tepol ni temak tangan vapisen momalen nan. E di pus ngan xil xa laling neketen nae e Iesu Kristo nggoni ngan xa lamal pe meten. Hi tepisen ni mun xa di nggur xat ekaten nan, vengana xa, tetiamu ni maten na Iesu, xi tenasa pangasien ti mi moletin xil ve tesaen xil vus xa latepol ni ngamu. ⁿ²⁶Reitin, tetiamu xi di tehur xat ekaten nan temak tangan, xosali, xi mikila vapisen momalen nan vaxo rin xa di misak ni ngan xil vus xa di laling neketen nae e Iesu Kristo mei lamal pe meten.

²⁷?Ma xir rikila risep koai ve naha vari? !Neta tovuol! ?Rikila risep koai vengana xa di ranggusil xat rae xil? !E-e, rasakras! E ti risep koai vengana xa di ranggusil suse te neketen. ^{o28}Vengana rapusi xa ramei ramal pe met Hi nggo neketen nar kestang, e tave ti vengana xa di rapol sen holesok xil vus xa rae xil na Mosis di biteni. ^{p29}?Midep xiak? ?Hi be Hi na visi? ?Na Siu xil kestang? !E-e! Xi be Hi na Siu xil del ngan xil mun xa latave Siu ti. ^{q30}Vengana xa Hi be tei takes. E xi di misak ni ngan xil xa labe **vexahu** mei lamal pe meten nggo rin te neketen. E xi iaxa di misak ni ngan xil mun xa latave vexahu ti mei lamal pe meten nggo rin te hisit neketen ak. ^{r31}?Ma midep? ?Rakila raso rat rae xil ak lava vengana xa di ranggusil suse te neketen? !E-e, namak ti! E xir di rasak ni rae xil ak di lapol sen polien nae e melele xa di ranggusil xil nggo neketen.^s

Ebrahim tepisen suse te neketen mi xir

4 ?E midep e rin na **Ebrahim**, vatit avu namem Siu xil? ?Xi temei temal pe met Hi texo suse xave? ²Vengana xosxa Ebrahim temei temal pe met Hi texo holesok xil xa tepol ni, ma xi vakila vasep koai ven pe met moletin sav xil. E pe met Hi, xi misakras vasep koai ve naha xa xi tepol ni. ³?E Vanuvei Eo bit naha usil rin ak? Biteni bit, “*Ebrahim miling neketen nan e hitxatien na Hi. E ve rin ak, Hi bit rati xa Ebrahim momal pe meten.*” (Sen 15:6) ^{t4}Ngan xil xa lapol di langgur huit polien nae ven, e momal tangan lavuri. Latahur ti vaxoni sanien tei. ^{u5}E Hi mikila vasak pilei rin na moletin tesa xil. Misak ni, melele xa moletin tei miling neketen nan e Hi, tave ti neta xa moletin ak tahusili ti vaxo suse te rae xil, e Hi bit rati xa moletin ak momal tuei pe meten. ⁶Ngan ak nggoni naha xa **Deved** tehiteni e melele xa tesep usil sien na ngan xil xa Hi pus xil lamal pe meten, tave ti neta xa latapol ni ti neta tangan lavuri.

⁷“*Sien iti mi ngan xil xa Hi taketeh ti mun vasa mi xil ve tesaen nae xil, mi ngan xil xa xi di miketeh bos mi xil.*”

⁸“*Sien iti mi ngan xil xa Iahova tavuli ti mun tesaen nae xil vaha xat rin nae.*” (Sam 32:1-2)

⁹?E midep? ?Sien ak xa Deved tesep usili be na ngan xil kestang xa labe **vexahu** nggoni Siu xil? !E-e! Sien ak be na ngan xil mun xa latave vexahu ti. Vengana xa Vanuvei Eo biteni bit, “*Ve neketen nan, Hi bit rati xa Ebrahim momal pe*

^{l3:23} Rom 3:9 ^{m3:24} Efes 2:8; Rom 5:1 ^{n3:25} Efes 1:7 ^{o3:27} 1Kor 1:31

^{p3:28} Kal 2:16 ^{q3:29} Rom 10:12 ^{r3:30} Dut 6:4; Kal 3:20; Rom 4:11-12

^{s3:31} Mat 5:17; Rom 4:3; 8:4 ^{t4:3} Kal 3:6; Tem 2:23 ^{u4:4} Rom 11:6

meten." (Sen 15:6) ^{v10}?E Hi tehit rati xa Ebrahim temal pe meten e melele xave vari? ?Tetiamu ni melele xa Ebrahim tehe vexahu, mu tetutou ni? !Tehit rati tetiamu ni! Ma xi tenave vexahu ti mu, e Hi tehit rati ngamu xa xi temal pe meten. ¹¹ Reitin, Hi tesa sexien te vexahu mi Ebrahim tengan ihe simeleleen tei xa ipisen ni xa xi temal pe meten tuei texo neketen nan e melele xa tenave vexahu ti. Nggusil sexien ak, Ebrahim mei be avu na ngan xil xa mei lamal pe met Hi nggo suse te neketen, neta sav xa latave vexahu ti. ^{w12}E rin sav mun, Ebrahim mei be avu na ngan xil xa labe vexahu e di langgusil xat Hi del hisit neketen xa avu nar Ebrahim tetiamu tehuri melele xa tenave vexahu ti mu.

Hitxatien na Hi teme mi avu Ebrahim texo suse te neketen

¹³ Melele xa Hi tehit xati mi Ebrahim tetel vatimol nan xil xa ti lihur holesok xil te ut etan xa xi tehit xati mi xil, tenave ti vengang xa Ebrahim telong xat **rae** nan xil. !E-e! Hi tehit xati temak vengang xa tehit rati xa xi momal ngamu pe meten texo suse te neketen. ^{x14}Xosxa be reitin xa Hi isa naha xa tehit xati mi ngan xil kestang xa lalong xat rae nan xil, ma moletin tovuol vakila vahuri. E isak ni neketen mei ihe neta sav tang, e hitxatien na Hi mun mei ihe neta hon tang. ^{y15}Vengang xa rae xil di lalihi ekaten na Hi bemei etan ba xat ngan xil xa latahusili ti. E melele xa rae xil labe tovuol, moletin xil lasakras lavur xotehi. ^z

¹⁶ Mak iaxa, hitxatien xa Hi tepol ni di nggusil suse te neketen. Ve rin ak, nggusil eheien hos nan, Hi isak ni hitxatien nan mei ihe reitin e meulien na ngan xil

vus xa labe vatimol na avu Ebrahim. E nave Siu xil kestang ti xa di langgusil xat rae xil na Hi iaxa lipus huit hitxatien nan xil. E ngan xil mun xa di laling neketen nae e hitxatien na Hi ixoni ngan taxa Ebrahim tepol ni iaxa ti lipus reitinen teni istal. Vengang xa Ebrahim be avu nar xil vus xa di ranggusil suse te neketen. ^{a17}Ngan ak nggoni ngan xa Hi tehiteni mi Ebrahim e Vanuvei Eo tehit, "*Nipol ni xouk mei uhe vatit moletin na tatit moletin xil holu xa lixo kantri xil holu.*" (Sen 17:5)^b E hitxatien ak mei tehe reitin pe met Hi vengang xa Ebrahim teling neketen nan en vengang tekila xa Hi xa tesak ni holesok xil xa latehe tovuol tamu mei testal tehe reitin texo raen, mikila mun vapol ni neta xa mat mei meul rilomun.

¹⁸Tave ti neta xa suse tovuol mun xa Ebrahim vakila vahur horamue nan xati vaxo en, xi teling neketen nan e hitxatien xa Hi tepol ni mini melele xa tehit xi mei ihe "*vatit moletin te tatit moletin xil holu xa lixo kantri xil holu.*" (Sen 17:5) Reitin, xi teling neketen nan e Hi xa tehiteni mini tehit, "*Vatimol nam xil lihe holu xa lihe holu pupu lixoni hitu xil ak.*" (Sen 15:5) ¹⁹Ebrahim tenamot ti e neketen nan, tave ti neta xa huram nan sangas vatuxoh handred tei (100) ngamu e xi tehe momatu pupu. Reitin, neketen nan texeih tamu, tave ti neta xa **Serah** tehe lumalum e tesakras vahur tuvava tova vahe nalu. Ma, e rin te tuvava, tenbexalu tesakras mun vengang xa lutehe momatu pupu. ^{c20-21}Ebrahim tenastokovein neketen nan ti, e temes Hi vengang tekila xa Hi mikila isak ni naha xa tehit xati mini mei istal ihe reitin. Misak ni, neketen na Ebrahim tesak ni nenemien nan mei texeih mu. ²²E "*ve neketen nan, Hi bit rati xa Ebrahim mo-*

^{v4:9} Rom 4:3; Kal 3:6; Tem 2:23 ^{w4:11} Sen 17:10-11

^{x4:13} Sen 18:18; 22:17-18; Kal 3:29 ^{y4:14} Kal 3:18

^{z4:15} Rom 3:20; 5:13; 7:8 ^{a4:16} Kal 3:7 ^{b4:17} Aes 48:13 ^{c4:19} Sen 17:17

mal pe meten," (Sen 15:6) ²³E sepinien xa bit, "Hi bit rati xa Ebrahim momal pe meten." latnatisi ti ve Ebrahim kestang. ^{d24}Latetisi ve xir mun vengan xa Hi bit rati xa xir mun xa raling neketen nar en ramal pe meten. E be xi iaxa tesak ni Iesu, Suv nar, temea rilomun ra maten. ^{e25}E tehusil nenemien nan, temaen xoteh meulien na Iesu tangan imat ve tesaen nar xil, e tepol ni temea rilomun ra maten tangan isak ni xir mei rimal pe meten.

Ngan xil xa langgusil suse te neketen mei lamal pe met Hi e lipus hosien xa xi tehit xati

5 E vengan xa mei ramal pe met Hi nggo suse te neketen, di radi e tomat del Hi nggo naha xa Iesu Kristo, Suv nar, tepol ni. ^{f2}Reitin, ve naha xa Iesu tepol ni e vengan xa di raling neketen nar di en, rakila ravur eheien hos na Hi xa radi en xosali. Misak ni, di rasep koai vengan xa rakil kuhi xa rihisti itel Hi e minehinen te xeihen nan xa eilep. ^{g3}E rakila rasep koai mun ve longpangasien xil xa di rangguri nggo he mosav xil ve neketen nar, vengan xa rakila xa longpangasien xil ak di misak ni nenemien nar mei be teviei mak mu. ^{h4}E nenemien xa teviei di misak ni xir rapin tangan risoh ixeh mak mu e melele xa holesok xil xa misa di bemei. E melele xa mei rapin, ngan ak di misak ni xir rakil kuhi xa holesok xil xa di raling nenesien nar en be reitin. ⁵E nenesien ak misakras vapol ni nenemien nar vamot, vengan rakila xa eheien xa Hi di pisen ni mi xir mahulong pupu. Rakila xa ngan ak be reitin vengan xa Hi tesa **Ninin Eo** mi xir nggoni sanien tei tangan ise xat tinexir. ⁱ

⁶Rakila xa eheien na Hi be reitin vengan xa melele xa rasakras rapol ni ti neta tangan vatutou ni rin nar mun tang, e melele xati nen tak, Hi tehit momal tangan Kristo vamei vamat vahinat xir, moletin xil xa rateti sotin ra ni. ⁷Sangas moletin vahe tovuol xa vamaen xoteh meulien nan tangan vamat vateh meulien e mosav tei xa meulien nan momal tevi. E nahe xos moletin tova da xa imaen xoteh meulien nan tangan vatutou ni moletin tova xa bos xa bos. ⁸E Hi tepisen eheien nan mi xir texo sexien ak: melele xa xir ratepuru tamu, Kristo temaen xoteh meulien nan e tehinat xir. ^{j9}E re Iesu Kristo mileh e mikas moten xir ra tesaen nar xil, e misak ni xir mei ramal pe met Hi. E vengan xa ngan ak be reitin, rakil kuhi xa Iesu iteh meulien e xir ra ekaten na Hi xa ba xat tesaen. ^{k10}Mak iaxa, melele xa di tamu ratehe elu tetel Hi ve tesaen nar xil, Natneli temat tangan isak ni xir riti e tomat itela. Ma, vengan xa be reitin xa maten nan misak ni xir radi e tomat del Hi, mea rilomunen na Kristo ra maten di pisen ni xa be reitin mak mu xa xi di miteh meulien e xir ra ekaten na Hi. ¹¹E ngan xa be mahulong mak mu, rakila rasep koai ve naha xa Hi tepol ni e rin nar texo Iesu Kristo, Suv nar. Vengan xa Kristo tesak ni xir rakila radi e tomat dela xosali ak.

Melele xa rateti tamu e suse te maten na avu Adam, Kristo tepol ni suse sav tangan rakila ravur meulien vaxo en

¹²**Tesaen** temei e ut etan texo moletin tei takes, ngan ak tehe Adam. E tesaen nan tepol ni suse te maten. Misak ni, xir vus rilel vengan xa xir vus rapol ni tesaen. ^{m13}Reitin xa tesaen tete ut etan

^d4:23 Rom 15:4 ^e4:24 1Pit 1:21; Aes 53:4-5; 1Kor 15:17

^f5:1 Rom 3:24,28 ^g5:2 Efes 2:18; 3:12 ^h5:3 Tem 1:2-3; 1Pit 1:5-7

ⁱ5:5 Sam 22:5; 25:20; Hib 6:18-19 ^j5:8 Sion 3:16; 1Sion 4:10

^k5:9 Rom 1:18; 2:5,8 ^l5:10 Rom 8:7-8 ^m5:12 Sen 2:17; 3:6,19; Rom 6:23

tetiamu ni melele xa Hi tesa **rae** nan xil mi Mosis. E melele xa rae tovuol, lasakras lavitani xa moletin tei di nggur xotehi. ⁿ¹⁴E maten nggur xeihen e meulien na moletin xil vus xa lateti e melengien xil na **Adam** mei tetuxoh melengien xil na **Mosis**. Reitini, moletin xil vus latelele, tave ti neta xa latnahur xoteh ti rae xa Hi tehit kila mi xil vaxoni ngan xa Adam tepol ni. ^o

Naha xa Adam tepol ni, huite teni teha tetuxoh moletin xil vus. E, texo hisit suse nen ak, moletin teimun testal tetutou ni Adam. E naha xa xi tepol ni, huite teni mei duxoh moletin xil vus mun. ¹⁵E naha xa xalu lutepol ni tesav. Vengan xa, texo moletin tei takes, moletin xil holu di lalele ve tesaen nae. Ngan ak be Adam. E ngan xa be eilep mak mu, texo eheien hos na moletin sav, Hi di pisen eheien hos nan mi moletin xil holu e di misa momalen mi xil nggoni sanien tei. [†]E moletin sav ak be Iesu Kristo vari tang. ¹⁶E momalen xa Hi di misa ni mi xir nggoni sanien tei, misav ni naha xa temei e xir texo tesaen na moletin tei takes. Vengan xa tesaen na moletin tei takes telihi pangasien temei e xir e tesak ni xir ralele. E be sanien tei xa Hi di misa momalen mi ngan xil xa latepol tesa holu, e xi di miling pilei xil mei labos rilomun pe meten. ¹⁷Be reitini xa maten temei tetuxoh moletin xil vus texo tesaen xa moletin tei takes tepol ni. E xosxa ngan ak be reitini, ma be reitini mak mu xa meulien imei ituxoh moletin xil vus ixo eheien hos e momalen xa Hi di misa ni xa be sanien tei tang nggo naha xa moletin teimun, Iesu Kristo, tepol ni e rin nae.

¹⁸Misak ni, be reitini xa tesaen xa moletin tei takes tepol ni di misak ni moletin xil vus mei latamal ti pe met Hi e langgur pangasien te maten. E tave ti neta xa mak, sexien xa momal xa moletin teimun tepol ni tesak ni moletin xil vus lakila mei lamal pe met Hi e lavur meulien. ^{p19}Vengan, tave ti neta xa longrasien na moletin tei takes tesak ni moletin xil vus mei lateti e **tesaen**, longxatien na moletin teimun isak ni moletin xil holu mei liti e momalen. ^q

²⁰E melele xa Hi tesa rae nan temei, ngan ak tesak ni moletin xil latepus kil tesaen nae xil mak mu. E melele xa di lapus kil tesaen nae xil mak mu, ma lapus kila xa eheien hos xa Hi di pisen ni mi xil mahulong xa mahulong mak mu mili tesaen nae xil. ^{r21}Misak ni, tetiamu, xeihen te tesaen temei tehe eilep e meulien na moletin xil e di tevar xat xil ni ao te maten. E taxeak, eheien hos na Hi di be meimei be eilep mak mu e meulien na moletin xil, e di milal rat xil ra ao te maten, e di misak ni xil mei lamal pe met Hi. Misak ni, xir di ranggur meulien sal nggo naha xa Iesu Kristo, Suv nar, tepol ni ve rin nar. ^s

Ngan xil xa labisti del Iesu Kristo, nggoni ngan taxa latemat e latemea rilomun ra maten tetela

6 ?Ma, rihit naha usil rin ak? Xos ti e xamim di lanemi labit bos xa xir rixulehi tit ripol ni **tesaen** tengan Hi ikila tit ipisen eheien hos nan mi xir ihe mahulong mak mu. ^{t2}!E-e, tamak ti! Vengan melele xa ratemei visal Iesu, texoni ngan xa ratemat tetela. E vengani xa ratemat,

[†]5:15 Momalen xa Hi di misa ni tave huit polien nar ti. Momalen ak be momalen na Iesu Kristo xa Hi di misa ni nggoni sanien tei tang mi ngan xil vus xa di labisti del Iesu.

ⁿ5:13 Rom 4:15

^o5:14 1Kor 15:21-22,45

^p5:18 1Kor 15:22

^q5:19 Aes 53:11

^r5:20 Rom 4:15; 7:8; Kal 3:19

^s5:21 Rom 6:23

^t6:1 Rom 3:5-8

tesaen tahur ti mun xeihen e meulien nar. Misak ni, rinamaen tesaen ti namei vahe vat te meulien nar. ^{u3}Vengan bos xa mukila xa melele xa latehe **baptaes** ni xir tangan vapisen ni xa di ratehisti tetel Iesu Kristo, ratehisti tetel maten nan mun. ^{v4}Misak ni, melele xa latehe **baptaes** ni xir ni oei, texoni ngan xa latetihin meulien matu nar tetela e ratehisti tetela e maten nan. Mak iaxa, melele xa ratemea rilomun ra oei, texoni ngan xa ratemea rilomun ra maten tetel Kristo xa Hi Tamer tetal rati ra maten tetel xeihen nan xa mahulong pupu. Nggo sexien ak, Hi di misa meulien hu mi xir tangan rakila rameul en. ^w

⁵Kristo temat. E melele xa rabisti dela, nggoni ngan xa xir mun ratemat tetela. E vengan xa ngan ak be reitin, be reitin mak mu xa rimea rilomun ra maten e rihur meulien hu ixoni ngan xa testal mini. ^{x6}E bos xa rakila xa meulien matu nar, nggoni ngan xa lateti xati tetel Kristo tete eivave nan. Reitin, maten nan ak tehas tan ni xeihen te tesaen e meulien hu nar tangan rinave slev te tesaen ti mun. ^{y7}Vengan rakila xa melele xa moletin tei mat, xi meluv ngamu ra xeihen te tesaen. ^{z8}E vengan xa di ratemat tetel Iesu, rake reitin xa rimeul mun itela. ⁹E rakila xa Hi tesak ni Kristo temeaa rilomun ra maten, e namat ti mun vatova. Reitin, maten nahur ti mun xeihen e meulien nan. ¹⁰Vengan melele xa temat, xi temeaa ra xeihen te tesaen, e namat ti mun vatova. E vengan xa temeaa ra xeihen te tesaen, taxeak di meul tangan vapet rat his Hi. ^{a11}E hisit suse nen ak, e rin te tesaen, vengan xa di mubisti dela, muling nenemien namim taxa xamim

mun mutemat e mutemea ra xeihen te tesaen. E rin na Hi, xamim mumeul del Iesu Kristo e munggur meulien hu xa misak ni xamim ti muhusil xat naha xa Hi ien bei tangan ti mupol ni. ^b

¹²Mak, ma munamaen tesaen ti namei nave vat te tenbemim tangan naxeih xat xamim tangan ti mupol ni naha xa xi ien bei. ^{c13}Reitin, munamaen ti mun rut tenbemim xil linapol nasa. E musa tenbemim xil mi Hi xa tetal rat xamim ra maten e tesa meulien hu mi xamim. Reitin, musa sen tenbemim xil vus mi Hi tangan mupol ni neta xa momal pe meten. ^{d14}Tesaen nave vat te meulien namim ti, vengan xa mutari ti mun pe he **rae xil na Mosis**, e di mudi pe he eheien hos na Hi. ^e

Rinave slev xil te tesaen ti, e mei rihe slev xil te momalen

¹⁵?Ma midep? ?Vengan xa ratati ti mun pe he rae xil e di radi pe he eheien hos na Hi, be reitin xa rikila ripol ni **tesaen** sung? !E-e, namak ti! ^{f16}Vengan mukila xa melele xa muling xamim pe he moletin tei tangan mulong xat raen nggoni slev nan, mei mube slev nan reitin. Nggo hisit sexien nen ak, melele xa mulong xat tesaen, ma mei mube slev teni, e hoxalit suse ak be maten tang. E melele xa mulong xat Hi, ma mei mube slev nan, e, e hoxalit suse ak, Hi ihit rati xa mumal pe meten. ^{g17}!E rimes Hi ihe holu mak mu! Vengan xa, tetiamu, xamim mutehe slev xil te tesaen. E taxeak, del meulien tevi namim, di mulong xat reitinen xa mukameti e pispisien xil xa mutehuri. ¹⁸Reitin, mumeluv ra ao te tesaen e mei mube slev xil te momalen. ^{h19}Sepinien

^{u6:2} 1Pit 4:1 ^{v6:3} Kal 3:27 ^{w6:4} Kol 2:12 ^{x6:5} Plp 3:10-11

^{y6:6} Kal 5:24 ^{z6:7} 1Pit 4:1 ^{a6:10} Hib 9:26-28; 1Pit 3:18; Kal 2:19

^{b6:11} 2Kor 5:15; 1Pit 2:24 ^{c6:12} Sen 4:7 ^{d6:13} Rom 12:1; Efes 2:5; 5:14

^{e6:14} 1Sion 3:6 ^{f6:15} Rom 5:17,21 ^{g6:16} Sion 8:34; 2Pit 2:19

^{h6:18} Sion 8:32

navan xil usil slev xil be vole tang xa be temale tang tangan munem kil koute teni vengan xa mutepisen ni xa nene-mien namim memerou tamu usil holesok xil te neketen. Tetiamu, muteling xamim pe xeihen te tesaen e mutepol tesa tetel rut tenbemim xil texoni ngan xa mutehe slev teni, e muteha sung di mutepol ni holesok xil xa tesa xa tesa pilei mak mu. Ma taxeak, ti muling xamim pe he momalen tangan ti mupol ni holesok xil xa momal ixoni ngan xa mube slev teni. Imak, ma ti mupisen ni xa mube moletin eo xil na Hi.

²⁰ Melele xa muteti tamu pe xeihen te tesaen, mutnari ti pe xeihen te momalen na Hi. Ma mumeluv tangan muhusil kes ni rae te tesaen tang. ²¹ ?E mutehur naha xa tehos texo holesok xil xa mutepol ni xa di mube unoun ven xosali ak? Neta tovuol vengan xa hoxalit suse te sexien tesa nen xil ak be maten tang. ⁱ²² E taxeak, Hi di misak ni xamim mumeluv ra tesaen e mei mube slev nan xil. E melele xa mube slev xil na Hi, ngan ak bos mak mu, vengan xa mei mube moletin eo nan xil, e hoxalit suse teni be meulien sal. ^{j23} Vengan xa huit polien te tesaen nar xil be maten. E Hi di misa meulien sal nggoni sanien tei mi xir vus xa di rabisti del Iesu Kristo, Suv nar.^k

**Iesu Kristo misak ni xir rameluv
ra rae matu xil xa di misa
maten mi moletin xil**

7 Tuxoli e hinoxoli xil, xamim vus mukil sexien te **rae** xil. Rae xil langgur xeihen e meulien na moletin tei melele xa meul tamu da. ² Nggusil nene-mien ak, melele xa atou tei miteli, rae nen misak ni xi di bisti del xat tiramue nan e melele xa xi meul tamu da.

E xosxa tiramue nan mat, ma atou ak meluv ra rae xa tevistin xalu lutevituei. ³ Ve rin ak, xosxa atou ak ba nggur moletin sav teimun e melele xa tiramue xati nan meul tamu da, ma momal tangan lakes atou ak ni 'atou te suse.' E xosxa tiramue xati na atou ak mat, ma atou ak meluv ra rae te tetelien. Misak ni, xosxa ba mun miteli del moletin sav teimun, ma xi tapol ni tesaen ti.

⁴ Tuxoli e hinoxoli xil, vole ak nggoni xamim. Xamim xa muling neketen namim e Iesu Kristo, nggoni ngan xa mutemat tetela. E maten ak misak ni xamim mutateli ti mun vatel rae nar xil. Misak ni, taxeak, mumeluv tangan mukila muhe na Iesu, ngan xa temea rilomun ra maten, tangan muhisti itela. Ixo suse ak, ma rakila raso huite e meulien nar xa imal pe met Hi. ¹⁵ Vengan xa, tetiamu, melele xa rateti tamu e meulien matu nar, rae xil latelihi nenemien nar teha e tesak ni xir ratenem usil holesok holu xa tesa. Tesak ni mun xa eheien xil te tenbexir latehas xir vehakut. E hoxalit suse te sexien xil ak be maten tang. ^{m6} E taxeak, xir rameluv ra ao te rae xil xa latavar xat xir. E nggo Iesu, nggoni ngan xa ramat del rae xil ak. Misak ni, ratave slev ti mun pe he rae xil xa latetis xat xil lateti e vanuvei tei. E-e, taxeak, ranggur meulien hu e di ralong xat **Ninin Eo** xa di dutou ni xir tangan rapol mi Hi. ⁿ

**Rae xil na Hi lasak ni xir rapus kil
tesaen xa di e meulien nar**

⁷ ?E rihit naha e rin te rae xil na Hi? ?Reitin xa rae xil xa Mosis tetisi tesa? !E-e, tamak ti! Rae xil ak iaxa tepispisi minou tangan nakil naha vari be **tesaen**. Vengan xa vahit rae ak naviteni ti navit, "*Eheien namim nati ti e holesok xil na*

ⁱ6:21 Esek 16:61,63; Rom 7:5; 8:6,13 ^j6:22 1Pit 1:9 ^k6:23 Rom 5:12,15
^l7:4 Kol 2:14 ^m7:5 Rom 5:21; 8:6,13 ⁿ7:6 Rom 8:2; 6:4

mosav,” (Eks 20:17) ^oinou ninakil ti xa hisit eheien xa xiak be tesaen. ⁸Mak iaxa, nggo rae ak, tesaen nggur mesal tangan isak ni eheien navan iti e holesok na mosav xil mak mu. Vengan xa melele xa rae tovuol, tesaen tahur ti xeihen e meulien navan. ^{p9}Tetiamu, melele xa natnakil ti mu rae xil ak, natenemi natehit meulien navan momal. E melele xa natelong usil rae xil na Hi, mei napus kila sung xa tesaen di e meulien navan. ¹⁰Melele xa napus kil tesaen ak, mei nakila mun xa momal tang tangan nimat ven e ha nite sotin ra Hi vehakut xa vehakut tang. Mak, ma rae xa bit xati tangan isa meulien mi ngan xil xa di langgusil xati, e rin navan, di tekin maten minou. ^{q11}Vengan xa, melele xa natelong rae ak, tesaen tehur mesal e meulien navan tangan valuvos nou e vahas vin nou. ^{r12}Misak ni, rae xa Mosis tetisi be eo tevi. E holesok xil xa xi tesemae ni be eo, momal e bos tangan rihusili. ^s

¹³?Mak ma middep? ?Be reitin xa rae na Mosis xa bos mak di tesak ni nou nimat? !E-e, tamak ti! Be **tesaen** vari tang iaxa telih maten temei e nou texo rae xil xa bos. Ngan ak be reitin veng an xa rae xil ak di lasak ni moletin xil vus di lapus kil tesaen xa di e meulien nae, e di lasak ni xil mei lanem kila xa tesaen ak pupuru tova tang. ^t

E tinexir, iexir bei tangan ralong xat Hi, e nggo tenbexir, iexir bei tangan ralong xat tesaen

¹⁴Rakila xa rae xil na Hi bos veng an xa texo Ninin nan. E inou nabe moletin tei te ut etan tang, e namei nabe slev te tesaen. ^{u15}Misak ni, natakil ti veneh ma di napol ni sexien xil xa di napol

ni. Vengan xa naha xa ieok bei tangan nipol ni, natapol ni ti. E naha xa pupuru pe metok, ngan ak vari di napol ni. ¹⁶E melele xa di napol ni naha xa ieok ti tavei tangan napol ni, ngan xa nakil kuhi be tesaen, di napisen ni xa di nake reitin xa rae xil ak bos. ¹⁷Misak ni, tave nou ti iaxa di napol ni sexien tesa xil ak, e be tesaen xa di meul de nou iaxa di pol ni. ¹⁸Reitin xa nabe moletin tei te ut etan tang e neta tovuol xa vahos vate nou. Vengan xa, tave ti neta xa ieok bei tangan nipol ni neta xa ihos, e nasakras napol ni. ^{v19}Natapol ni ti neta vahos xa di ieok bei tangan napol ni. E nakameti xa di napol ni neta xa pupuru xa ieok ti tavei tangan napol ni. ²⁰E xosxa napol ni neta xa ieok ti tavei tangan napol ni, tave nou ti iaxa di napol ni, e be tesaen xa di meul de nou iaxa di pol ni.

²¹Misak ni, nakameti xa sexien tei di mistal e meulien navan. Vengan melele xa nabit napol ni neta xa bos, tesaen xa de nou di misak ni nou di napol ni tesaen vehakut tang. ²²E tinok, nabesi nou pupu ve rae xil na Hi. ²³E di napus kila xa sexien sav tei iaxa di pol e rut tenbeok. E sexien ak di bae del rae xil na Hi xa di e tinok. Sexien ak di misak ni nou mei nabe slev te tesaen xa di pol e rut tenbeok xil. ^{w24}!Aue li! !Nalonge misa holu! ?Visi tova mei iteh meulien e nou ra eheien te tenbeok ak xa di milih inou nihe suse te maten? ²⁵!E names pupu ni Hi veng an xa xi vari iaxa di miteh meulien e nou nggo naha xa Iesu Kristo, Suv nar, tepol ni! ^x

Misak ni, napusi xa ngan ak be reitin e meulien navan: e tinok, nalong xat rae na Hi nggoni ngan xa nabe slev teni; e eheien te tenbeok di misak ni nou nalong

^{o7:7} Dut 5:21; Rom 13:9 ^{p7:8} Rom 5:13 ^{q7:10} Lev 18:5

^{r7:11} Sen 3:13; Hib 3:13 ^{s7:12} 1Tim 1:8 ^{t7:13} Rom 5:20

^{u7:14} Sam 51:5; Sion 3:6 ^{v7:18} Sen 6:5; Rom 8:21

^{w7:23} Kal 5:17; Tem 4:1; 1Pit 2:11 ^{x7:25} 1Kor 15:57

xat sexien te tesaen nggoni ngan xa nabe slev teni mun.

Ngan xil xa langgusil naha xa Ninin Eo ien bei labe nat Hi reitin

8 Misak ni, vengan xa Iesu Kristo di miteh meulien e xir xa rabisti dela, rakila xa Hi nasa pangasien ti mun mi xir. ²Vengan xa **rae** na **Ninin Eo** ³xa tesak ni xir ratehisti tetel Iesu Kristo di pol e xir e di misa meulien mi xir. E rae nan di misak ni xir rameluv ra rae na Mosis xa di pisen **tesaen** mi xir e di mil- ihi maten bemei e xir. ^{y3}E naha xa rae na Mosis misakras vapol ni vengan xa tenbexir memerou tang, Hi vari tepol ni. Vengan Hi iaxa tesil Natneli xati teme- i tehe moletin xa tenben teta texoni mo- letin xil te ut etan xa tenbexil di lalihi xil tangan lapol ni tesaen. Nggo suse ak, pangasien te tesaen xa moletin xil te ut etan di lapol ni del tenbexil, Hi telingi sung tete Natneli xa tehas tan ni xeihen te tesaen ak e meulien nae. ^{z4}Hi pol ni mak tangan Natneli mikila ihur sen pan- gasien xa rae na Mosis bit momal ten- gan xir rihuri. Ve rin ak, rinahusil ti mun naha xa tenbexir ien bei tangan ripol ni, e ti rihusil xat naha xa Ninin Eo ien bei xir tangan ripol ni. ^{a5}Vengan xa ngan xil xa di langgusil xat holesok xil te ut etan, xil di laling nenemien nae e naha xa ten- bexil tang di ien bei. E ngan xil xa di langgusil xat Ninin Eo, xil di laling nen- emien nae e naha xa xi di ien bei xil ten- gan lapol ni. ⁶Ma moletin xa di miling nenemien nan e holesok xil xa tenben di ien bei, xi de suse te maten. E ngan xa

di miling nenemien nan e holesok xil xa Ninin Eo ien bei, xi de suse te meulien e tomat. ^{b7}Reitin, moletin xa di miling nenemien nan e holesok xil xa tenben di ien bei, xi be elu mi Hi, vengan xa ta- long xat ti rae nan. Xi misakras vari tang. ^{c8}Ngan xil xa di lalong xat eheien te ten- bexil lasakras lasak ni Hi vahesi xi ve xil.

⁹E xamim mutahusil ti mun eheien te tenbemim. Di munggusil naha xa Ninin Eo ien bei vengan xa xi di meul de tine- mim. E ngan xil xa Ninin na Kristo tara ti e tinexil, xil latave moletin nan xil ti. ^{d10}E xosxa Kristo meul de tinemim nggo Ninin nan, di munggur meulien hu ngamu vengan xa mei mumal tuei pe met Hi, tave ti neta xa tenbemim ha imat ve tesaen. ^{e11}Xosxa Ninin na Hi, xa tesak ni Iesu teme- a rilomun ra maten, di meul e xamim, Ninin ise xat tenbemim ni meulien hu tei.

¹²Misak ni, tuxoli e hinoxoli xil, kaon nar del Hi da. E tave ti tangan ha ri- husil xat eheien te tenbexir. ^{f13}Vengan xa, xosxa muhusil xat eheien te tenbe- mim, ma mumat vari. E xosxa mubles ra eheien te tenbemim del tutouen na Ninin Eo, ma mumeul. ^{g14}Vengan xa ngan xil xa Ninin na Hi di del xil, xil vari iaxa labe nat Hi xil. ¹⁵Vengan xa Ninin xa Hi tesa ni mi xamim tasak ni xamim ti mu- malili e ulimim vakan vaxoni slev xil xa di lamalili pe met suv nae. E-e, Hi tehur xao ni xamim mei mube horamue nan xil xa mukila muviteni mini muvit, “!O Tata, obe Tamemem reitin!” ^{h16}E Ninin xa Hi tesa ni mi xir di bit mesen ni mi xir nggo tinexir xa rabe horamue xil na Hi

³**8:2** Nggo Ninin Eo, Hi di pol e meulien na moletin nan xil vus tangan vasak ni sexien nae xil mei ixoni sexien xil na Iesu xa di labisti dela.

^y**8:2** Rom 7:23,24; 3:27

^z**8:3** Pol 13:38; 15:10; Sion 1:14; Plp 2:7; Hib 2:17; 4:15 ^a**8:4** Kal 5:16,25

^b**8:6** Rom 6:21; 7:5; 8:13 ^c**8:7** Tem 4:4; Mat 12:34; Sion 8:43; 12:39

^d**8:9** 1Kor 3:16; 12:3 ^e**8:10** Kal 2:20; 1Pit 4:6 ^f**8:12** Rom 6:7,18

^g**8:13** Kal 6:8 ^h**8:15** 2Tim 1:7; Kal 4:5-6; Mak 14:36

reitin.¹⁷ E xosxa be reitin xa xir rabe horamue nan xil, ma holesok xil vus xa di e he Hi, xa tehit xati tangan ihe na horamue nan xil, xir vari iaxa rilehi itel Kristo vengon xa xir mun di ranggur longpangasien xil ve neketen nar nggoni ngan xa Kristo tehuri. Imak, ma xir mun rihur his xa eilep ixoni ngan xa xi tehuri.^j

Hi ipisen holesok xil xa ihos pupu mi horamue nan xil

¹⁸ Melele xa nanem usil longpangasien xil xa di rangguri taxeak, napusi xa be tereli tang, vengon nakila xa neta xil xa Hi ipisen ni mi xir e melele tei xa ti imei tellep xa tellep pupu ili longpangasien xil ak.^{k19} Vengon xa holesok xil vus xa Hi tepeas ni iexil bei mak mu tangan lapus ti melele xa Hi ipisen ni xa visi xil iaxa labe horamue nan xati.^{l20} Vengon xa Hi tesak ni holesok xil xa xi tepeas ni lasakras mun lapol sen polien nae xati. E Hi tenapol ni ti vahusil naha xa holesok nen xil ak iexil bei, e tepol ni tehusil nenemien nan tasen. E holesok xil vus te ut etan di laling nenesien nae en xa,^{m21} e melele tei xa ti imei, Hi ipol ni xil mei limeluv ra ao te maten. Reitin, Hi mikila xa, e melele nen ak, liti itela e minehinen te xeihen nan itel horamue nan xil xa limeluv tevi.ⁿ²² Vengon rakila xa, tetiamu nousav mei duxoh xosali, holesok xil vus xa Hi tepeas ni xil di lamuis ve longpangasien. Reitin, langgoni atou xa di muis ve longpangasien te tuvava xa sangas valingi.^{o23} E tave holesok xil kes ti xa Hi tepeas ni iaxa di lamuis. Xir mun xa ratehur rohon ni Ninin Eo xa Hi tesa ni mi xir di ramuis. Di ramuis vengon xa di tamu radatil melele xa Hi ihur rat xir mei rihe horamue nan xil xati,

e melengien xa isak ni vexir mei imase ra ao xil vus te ut etan, e isak ni tenbexir mei ihe neta hu.²⁴ Melele xa rateling nenesien nar e naha xa Hi tehit xati mi xir, xi teteh meulien e xir. Reitin xa ratehur hitxatien ak ngamu, e vengon xa ratnahur ti mu huite teni, del nenesien, di radatil melele xa huite teni mei istal. ?Vengon visi tova di datil neta tei del nenesien e melele xa tehuri ngamu? Moletin tovuol.^{p25} E xosxa raling nenesien nar xa ripus huite te hitxatien na Hi xa ratapus ti mu, di radatil melele xa Hi ipisen ni itel nenemien nan xa teviei.

²⁶ E hisit sexien xa nenesien nar di dutou ni xir, Ninin mun di dutou ni xir e melele xa ralonge vexir memel. Vengon xa melele xa ratakil ti mun naha iaxa momal tangan ti rasis Hi ven, Ninin Eo vari di misis mini e rin nar. Reitin, melele xa Ninin di dakes Hi e rin nar, mike ba mini del isien xil xa sepinien nar tapin ti tangan vahiteni.²⁷ E Hi, xa miketeh ril e tinexir, xi di minem kil nenemien na Ninin. Vengon xa **Ninin Eo** di dakesi e rin na moletin nan xil nggusil naha xa Hi vari ien bei.^q

²⁸ E rakila xa, e holesok xil vus xa di mistal, Hi di pol ni mei ihos ihusil nenemien nan. Reitin, ipol ni mei itutou ni rin na ngan xil xa eheien nae di en, xa xi tekes xil tangan lave nan.^{r29} Vengon, ngan xil ak, Hi tekil xil tetiamu nousav ngamu, e teling xati xa xil mei lixoni Natneli. Mak iaxa, moletin xil holu lakila mei lave nat Hi xil, xa Iesu be muimol e xil.^{s30} Ngan xil xa Hi tehosei tangan mei lihe nan, tekes xil. E ngan xil xa xi tekes xil, xi tepol ni xil lamal pe meten. E ngan xil xa tepol ni xil lamal pe meten,

ⁱ8:16 2Kor 1:22 ^j8:17 Kal 4:7; Rev 21:7 ^k8:18 2Kor 4:17 ^l8:19 Kol 3:4

^m8:20 Sen 3:17-19; 5:29; Ekl 1:2 ⁿ8:21 2Pit 3:13; 1Sion 3:2

^o8:22 2Kor 5:2-4; Kal 5:5 ^p8:24 2Kor 5:7 ^q8:27 Sam 139:1; 1Kor 4:5

^r8:28 Efes 1:11; 3:11 ^s8:29 Kol 1:18; Hib 1:6

xi temaen xil liti visali e minehinen te xeihen nan.

Eheien na Hi de xir e neta tovuol vakila vahur rat xir ra hen

³¹ ?Xosxa mak, ma holesok xil vus ak di lapisen naha mi xir? ?Xosxa Hi di dutou ni rin nar, ma visi vari vakila vavae vatel xir? ^{t32} Hi pisen ni xa xi di dutou ni rin nar vengan xa tenakenin Natneli xati ti. E tesa ni temeï tangan imat ihinat xir vus. E xosxa tesa Natneli temeï ve rin nar, pisen ni xa isa holesok xil vus mun nan mi xir ixoni sanien tang. ^{u33} ?Visi mikila vasa sepinien vaha xat rin na moletin xil xa Hi tehosei xil mei latehe nan? !Moletin tovuol, vengan xa Hi vari tang tesak ni xil lamal ngamu pe meten! ^{v34} Reitin, moletin tovuol vakila vasak ni Hi vasa pangasien mi xir. Vengan xa Iesu Kristo, xa temat e temea rilo-mun ra maten, xi vari de ri matu na Hi e di misepin mini e rin nar. ^{w35} ?Mak, ma visi sung mikila valeh rat xir ra he Kristo xa eheien nan di e xir? Vengan xa, tave ti neta xa xil di lasa longpangasien e sakpu-runien xil mi xir e lasak ni xir di rabisu ni melengien xil te xeih, e lasakras lavur rat eheien nan ra xir. E tave ti neta xa lasak ni xir di rabisu ni mae kekaten mu laleh rerat holesok xil ngasen ra xir, lapurun xir mu labas vin xir, e lasakras lavur rat eheien na Iesu Kristo ra xir. ³⁶ Ngan ak nggoni ngan xa Vanuvei Eo di biteni xa bit,

“Tahova, vehakut di mabisu ni maten nggo he mosav xil,

vengan xa mabe moletin nan xil.

Xil labit momal tangan lavas vin xamem

vaxoni ngan xa mabe sipsip xil

xa momal tangan ladiamu ni xil tangan halamu vin xil.” (Sam 44:2) x

³⁷ Reitin, tave ti neta xa di rabisu ni holesok tesa xil ak, Kristo, xa eheien nan de xir, misak ni xir mei rabe eilep mak mu e xil, e mei rileli xil vus. ^{y38} Vengan xa, tave ti neta xos rimat mu rimeul, tave ti neta xa ti ripus xeihen na *masxaxa* xil mu na temat xil, e tave ti neta naha xa di mistal xosali mu istal e melengien xil xa ti imei, nakil kuhi xa neta ti misakras valeh rerat xir ra relaxatien na Iesu Kristo. ³⁹ Reitin, tave ti neta naha xa ti istal e ut nesao mu e ut etan, neta ti e holesok xil xa Hi tepeas ni vakila valeh rerat xir ra eheien nan xa di e xir ve naha xa Iesu Kristo, Suv nar, tepol ni e rin nar.

Hi tehosei moletin nan xil tehul nenemien nan

9 Nabit nasepin mi xamim usil tua navan xil xa labe Siu. Inou nabe moletin tei na Kristo e *Ninin Eo* xa de nou di bit kila minou xa nabiteni reitin e nataluvos ti melele xa nabiteni xa ² di nalonge misa holu e tinok pangas ³ ve Siu xil xa labe moletin navan xil xati. E vengan xa tinok pangas ve xil mak, xosxa nikila nitutou ni rin nae, ma nihur vonexil e nimaen Hi isa halesil minou tangan ninavisti ti mun natel Kristo. E nasakras namur vonexil. ^{z4} Tetiamu, Hi tehosei mol-Isrel xil tangan mei lihe moletin nan xil. E tepol ni xil latehe horamue nan xil e tepisen xeihen nan xa eilep pupu mi xil. Xi tepol ni *hitxatien te xeih* xil tetel xil e tesa rae nan xil mi xil. Hi tepispisi mi xil ni sexien xa momal tangan ti limot mini ixo en, e tehiti xati xa ipol ni holesok xil holu xa ihos mi xil. ^{a5} Xil lastal langgo ra na avu nae xil tetiamu texoni Ebrahim, Aesak, e Siekob. E melele xa Mesaea temeï etan mei tehe moletin xa tenben teta, xi testal texo vatimol nae.

^{t8:31} Sam 118:6 ^{u8:32} Sion 3:16 ^{v8:33} Aes 50:8

^{w8:34} Sam 110:1; 1Sion 2:1 ^{x8:36} 2Kor 4:11 ^{y8:37} Sion 16:33

^{z9:3} Eks 32:32 ^{a9:4} Eks 4:22; Dut 7:6; 14:1-2

Xi be Hi xa be eilep pupu mili holesok xil vus. E momal tevi tangan hisen ihe nesao vehakut xa vehakut tang. Reitin. ^b

⁶Tetiamu, Hi tehit xati xa iteh meulien e mol-Isrel xil. E melele xa mol-Isrel xil latesin lingxatien na Hi, tave hitxatien nan ti iaxa temot. Vengan xa tave mol-Isrel xil vus ti xa lave moletin xil na Hi reitin. ^{c7}E tave ngan xil vus ti xa langgo ra na **Ebrahim** iaxa labe horamue nan xati pe met Hi. Vengan, neta sav xa horamue sav xil na Ebrahim lateti, e Hi tehiteni mini tehit, “*Vatimol xil xa natehit xati minuk, listal lixo Aesak.*” (Sen 21:12) ⁸Ngan ak di pisen ni xa tave horamue xil vus ti xa langgusil ren iaxa lave horamue xil na Hi. E be horamue xil xa langgusil xat hitxatien nan xil iaxa labe horamue nan xati pe meten. ^{d9}Vengan xa Hi tehosei ngan xa ihur hitxatien nan melele xa tehit, “*E melele nen ak e huram xor, Serah iling natumali.*” (Sen 18:10)

¹⁰Vatei mun, Hi tehosei ngan xa xi ien tehei tangan vahur hitxatien nan e melele xa **Rebekah** teti ni meah lu na Aesak, avu nar tetiamu. ^{e11-12}Vengan xa melele xa xalu luteti tamu e vang ninexalu, Hi tesepin mini tehit, “*Ngan xa istal itiamu mei ipol pe he ngan xa istal itutou.*” (Sen 25:23) Hi tehit sepinien ak e melele xa meah xalu ak lutnapol ni ti mu neta xa tehos mu tesa. Ngan ak tepisen ni xa Hi di mikes moletin xil nggusil nenemien nan kestang e tahusil polien nae xil ti. ¹³Ngan ak nggoni naha xa Hi tehit usili e Vanuvei Eo tehit, “*Eheien navan di e Siekob; e di nasin Esao.*” (Mal 1:2-3)

¹⁴?Midep, sexien ak pisen ni xa Hi di pol tamal ti? !E-e, tamak ti! ¹⁵Vengan xa tehiteni mi **Mosis** tehit,

“*Inou tasok nihosei moletin si xa ieok ti isae en, e nitutou ni visi xil kestang xa di nenenemien navan tangan nitutou ni xil.*” (Eks 33:19)^f

¹⁶Mak, ma Hi di bosei moletin nggusil esaeen nan kestang, e tahusil ti naha xa moletin xil te ut etan di iexil bei tangan lapol ni. ^{g17}Ngan ak nggoni ngan xa Hi tehiteni mi suv toto te hal Isip e Vanuvei Eo tehit, “*Inou nateling xatuk mei obe suv toto mak tangan nikila nipisen xeihen navan ixo xouk tangan lihithiten usil hisok xa eilep e rute xil vus e ut etan.*” (Eks 9:16) ¹⁸Mak, ma de Hi kestang tangan ihosei visi e moletin xil xa lihur esaeen nan, e visi xil iaxa isak ni nenemien nae mei ivon tangan lisin ni. ^h

Hi di pisen ekaten e esaeen nan nggusil nenemien nan kestang

¹⁹Vahit tei e xamim vahiteni minou vahit, “?Xosxa Hi kestang di bosei visi iaxa ihur esaeen nan e visi iaxa isin ni, ma ikameti xa latepol tesa tetep e melele xa ilepis rin nae? ?Vengan visi vari iaxa ikila ipol ni neta isav ni ngan xa Hi teling xati ngamu tangan ipol ni?” ²⁰?E xouk xa obe moletin te ut etan tei tang, onemi xa obe visi tangan ti osel vatel Hi? Valihe xa moletin pol ni ni tan tepili misakras vangor vatela vahit, “?Veneh ma otepol ni inou namak?” ⁱ²¹Vengan xa moletin xa pol ni valihe xil ni tan tepili mikila vapol ni xil vahusil nenemien nan. Di e xi kestang xosxa ien bei tangan vapol ni tan tepili mei vahe valihe lu (2), tei xa ipol ni mei ihos te anien xil xa tellep, e teimun tesav xa ipol ni mei ihe neta votei tang te melengien xil vus. ^j

^{b9:5} Mat 1:1-16; Luk 3:23-38; Sion 1:1; Sam 41:13; Rom 1:25

^{c9:6} Nam 23:19; Rom 2:28 ^{d9:8} Kal 4:23 ^{e9:10} Sen 25:21

^{f9:15} Dut 32:4 ^{g9:16} Efes 2:8 ^{h9:18} Eks 4:21; 7:3; 9:12; 14:4,17

^{i9:20} Aes 29:16; 45:9 ^{j9:21} Ser 18:6

²² E ngan ak nggoni naha taxa Hi di pol ni. Xi ien bei vapisen ekaten nan vaha xat tesaen e vasak ni moletin xil lakil xeihen nan. E tave ti neta xa tepeas ni rut moletin xil momal tangan ihu len xil ve tesaen nae xil, nenemien nan teviei e di dal xat ekaten nan tangan napangei xil ti mu. ^{k23} E di dal xat ekaten nan tangan vapisen ni xa xi polu ni hosien. Misak ni, xi di miteh meulien e ngan xil xa tehosei xil tangan lihur esaeen nan, vengang xa tevue xat xil ngamu tangan ha liti vituei itela e minehinen te xeihen nan e ut nesao. ^{l24} E xir mun rabe ngan xil nen tak, xa xi tekes rat xir ra **Siu** xil e ra ngan xil mun xa latave Siu ti. ²⁵ Ngan ak be naha xa Hi tesepe usili texo provet Hosea tehit, *“Moletin xil xa ‘latave moletin navan xil ti’ nikes pilei xil ni ‘moletin navan xati.’ E ngan xil xa ‘eheien navan tovuol e xil,’ nikes pilei xil ni ‘ngan xil xa eheien navan di e xil.’”* (Hos 2:23)

²⁶ *“E rute xa Hi tehit rati mi xil tehit, ‘Xamim mutave moletin navan xil ti,’ e rute nen ak vari, ikes xil ni ‘horamue xil na Hi xa meul vehakut.’”* (Hos 1:10)

²⁷ E provet Aesea mun tehit lelen neta mun usil mol-Isrel xil tehit, *“Tave ti neta xa mol-Isrel xil labe holu langgoni suvien xil te tas, Hi iteh meulien e rute xil kestang.”* ^{m28} *Vengang xa Hi ilepis rin na moletin xil vus te ut etan, e xi isa katen ni pangasien mi xil ihusil naha xa xi pusi bit momal.”* (Aes 10:22-23) ²⁹ Ngan ak nggoni naha xa Aesea tehiteni tetiamu tehit,

“Tetiamu, Iahova, suv toto te ut nesao, tepisen esaeen nan mi xir e temaen horamue nar xil latemeul.

Vahit Hi Suv napol ni ti namak, ma xir vus mei raxoni Sodom mu Komorah ngamu xa ekaten na Hi tehu lelen moletin xil xa lateti en.” (Aes 1:9)

Pol misis mi Hi ve rin na Siu xil xa lasin Iesu Kristo

³⁰ Ma, rapusi xa ngan xil xa latave Siu ti, xa di latasak pisi ti tangan mei lamal pe met Hi, xil vari iaxa laduxoli e langgur momalen nggo suse te neketen. ⁿ³¹ E mol-Isrel xil xa di lasak pisi tangan mei lamal pe meten nggo suse te **rae** xil, xil latnahuri ti. ^{o32} ?E veneh vari latahur ti momalen? Vengang xa latahusil suse te neketen ti tangan lavuri. E xil di lasak pisi tangan lavuri vaxo naha xa xil kestang di lapol ni. Ve rin ak, xil di lasavut e hat xa Hi telingi tangan moletin xil ti lisavut en. ^{p33} Ngan ak nggoni ngan xa Vanuvei Eo tehiteni usil Kristo tehit,

“!Mupusi! Inou nateling hat tei e hal Saeon, e hilaep te mol-Isrel xil tangan ti lisavut en e ti limot.

E ngan xil xa laling neketen nae en, xi nasak ni xil ti linave unoun.” (Aes 28:16)^q

10 O tuxoli e hinoxoli xil, ieok bei pupu li tangan Hi iteh meulien e moletin navan xil xati. E vehakut di nasis nggeih mini ve rin nae. ² Nakila namiteni mi xamim xa mol-Isrel xil iexil bei pupu tangan lavusil xat Hi, e latapol ni ti vaxo sexien xa vama vaxoni ngan xa Hi tepisen ni mi xil. ^{r3} E vengang xa latakil ti suse xa Hi telingi teta tangan moletin xil lakila mei limal pe meten, xil di lasak pisi tangan lapol ni suse sav tangan mei lavur momalen ak vaxo en. Misak ni, lateling nenemien nae tangan linahusil ti suse te momalen xa Hi telingi ngamu ve xil. ^{s4} E melele xa moletin xil di lasak pisi tangan lavur momalen vaxo **rae xil na Mosis** mei duxoh hoxalite teni. Vengang, taxeak, ngan xil xa di laling neketen

^{k9:22} Ser 50:25 ^{l9:23} Efes 1:3-12 ^{m9:27} Aes 10:22-23; Hos 1:10

^{n9:30} Rom 10:20 ^{o9:31} Rom 10:2-3 ^{p9:32} Aes 8:14

^{q9:33} Rom 10:11; 1Pit 2:6,8 ^{r10:2} Pol 22:3 ^{s10:3} Rom 9:31-32

nae e Iesu Kristo iaxa mei langgur momalen pe met Hi. ^t

Hi di miteh meulien e moletin xil vus nggo suse te neketen kestang

⁵ **Mosis** tetis usil moletin xil xa lasak pisi tangan lavur momalen vaxo rae xil tehit, “Ngan xil xa di lalong xat sepinien xil vus te rae xil ak iaxa limeul.” (Lev 18:5) ^u

⁶ E rin te sepinien xa bit usili xa itep moletin mei imal pe met Hi ixo suse te neketen, Vanuvei Eo di biteni bit, “*Onasis ti naxo nenemien nam onahit, ‘?Visi iaxa ihe ut nesao tangan ikameti?’*” (Dut 30:12) Vengan xa ngan ak nggoni ngan xa iemim bei tangan Kristo vamei rilomun e ut etan tangan vasep usili. E xi bemei e ut etan ngamu. ⁷ “*E onasis ti onahit, ‘?Visi iaxa ihe etan e von maten tangan ikameti?’*” (Dut 30:13) Vengan ngan ak nggoni ngan xa iemim bei tangan Kristo vamea rilomun ra maten vatei mun tangan vasep usili. E xi temea rilomun ra maten ngamu. ⁸ E naha xa Mosis tehit usili xiak, “*Sepinien na Hi dat sangas visal xamim, da tuei e vulongomim e tinemim.*” (Dut 30:14) ^v E ngan ak be sepinien usil neketen xa xamem di mabithiteni. ⁹ Vengan xa xosxa mubit rati nggo vulongomim xa Iesu be Suv namim, e muke reitin en nggo tinemim xa Hi tesak ni temea rilomun ra maten, Hi iteh meulien e xamim. ¹⁰ Vengan xa melele xa moletin tei mike reitin nggo tinen, Hi pusi nggoni ngan xa momal ngamu pe meten. E melele xa bit rati nggo vulongen, Hi di miteh meulien en. ¹¹ Vengan xa Vanuvei Eo biteni bit, “*Ngan xil xa laling neketen nae en, xi nasak ni xil linave unoun.*” (Aes 28:16) ^{w12} Ngan ak di misep usil xir vus. Vengan xa, pe met Hi, neta tovuol vasav

ni **Siu** xil e ngan xil xa latave Siu ti. Hi be hisit Suv na moletin xil vus, e di misa tuxolxatien xa tellep mi ngan xil vus xa di lakei mini ve tutouen. ^{x13} Ngan ak nggoni ngan xa Vanuvei Eo biteni bit, “*Moletin xil vus xa lakei ba mi Iahova ve tutouen, xi iteh meulien e xil.*” (Soel 2:32)

¹⁴ ?E moletin xil likila likei mi Hi ve tutouen itep xosxa lataneket ti mu en? ?E lineket en itep xosxa latalong ti mu sepinien usili? ?E lilong sepinien usili itep xosxa moletin tovuol tangan vaha vahithiteni mi xil? ¹⁵ ?E moletin xil likila lihithiten sepinien ak itep xosxa moletin ti nasil xil tangan lava? Ngan ak nggoni ngan xa Vanuvei Eo biteni bit, “*Melele xa moletin xil langgur longeongen hos bemei, meien nae bos xa bos.*” (Aes 52:7) ^y ¹⁶ E tave moletin xil vus ti iaxa lalong xat sepinien xil te longeongen hos ak. Vengan xa provet Aesea tehiteni mun tehit, “*?Iahova, visi mike reitin e sepinien namem? Moletin tovuol.*” (Aes 53:1) ^{z17} Mak, ma itiamu, moletin tei iha ihithiten longeongen hos usil Iesu Kristo mi moletin xil. Ti, moletin xil likila lilonge. E melele xa lilonge, likila liling neketen nae en. ^a

¹⁸ E nasis xamim, “?Midep, be reitin xa mol-Isrel xil latalong ti mu longeongen hos usil Kristo?” Io, lalonge ngamu. Vengan xa ngan ak nggoni ngan xa Vanuvei Eo biteni bit, “*Nggo rae xil, di labithiten longeongen usili mikapis e rute xil vus, e sepinien nae usili ba duxoh moletin xil ngasen te ut etan.*” (Sam 19:4)

¹⁹ Nasis xamim vatei mun nabit, “?Midep, be reitin xa mol-Isrel xil latalong ti mu naha xa Hi tehit lelen ni xa ipol ni?” E-e, lalonge tuei. Vengan xa Mosis tetisi xa Iahova vari tesep usili tehit,

^t10:4 Mat 5:17; Sion 3:18; Hib 8:13 ^u10:5 Kal 3:12 ^v10:8 Dut 9:4

^w10:11 Rom 9:33 ^x10:12 Pol 10:34; 15:9 ^y10:15 Neham 1:15; Efes 6:15

^z10:16 Sion 12:38 ^a10:17 Sion 17:20

“Inou nipol ihos mi tatit moletin sav xil tangan nisak ni xamim, mol-Isrel xil, iemim ihei naha xa di napol ni e meulien nae.

Reitin, iemim ikat xa nipisen inou mi ngan xil xa xamim di mukes xil ni unu xil.”
(Dut 32:21)

²⁰ E Hi tehit kila mak mu melele xa tesepin texo provet Aesea tehit,

“Ngan xil xa latalang ves nou ti, xil iaxa latekamet nou.

Reitin, natepisen nou mi ngan xil xa latnakes nou ti.” (Aes 65:1)

²¹ E Hi tehit usil mol-Isrel xil tehit,
“E melengien xil vus, di nate momal ni heok tangan namur pilei moletin navan xil, e xil latalong xat nou ti, e vatixil nggeih pupu.” (Aes 65:2)

Longrasien na mol-Isrel xil misa mesal tangan Hi iteh meulien e moletin xil vus

11 Nasis xamim mun nabit, “?Midep, reitin mak xa Hi tesin moletin nan xil?” !E-e tamak ti! Vengan xa inou vari nabe ngan **Isrel**, nanggo ra na **Ebrahim**, e nanggo vatimol xa eilep na **Bensamin**. ^{b2} Hi tasin moletin nan xil ti xa tepus kil xil ngamu e tehosei xil tetiamu nousav tangan mei lihe nan. Xamim mukil neta xa provet **Ilaetsa** tehiteni e Vanuvei Eo melele xa teseputut xat mol-Isrel xil mi Hi tehit, ^{c3} “O Iahova, xil latehas vin provet nam xil vus e latehu lenen hor xil xa di matesa sanien eo namem xil minuk en. !Inou kestang nameul tamu nada, e di lasak tangan lihas vin inou mun nimat!” (1King 19:10) ⁴ ?Ma Hi tesa rilomun ni sepinien eah teha mini? Tehiteni tehit, “Inou natesikoe xol moletin xil latehe taosen lu e he sav (7000) xa di langgusil xat nou

tangan limeul. Ngan xil ak, latnamot ti mu mi hi Baal.” (1King 19:18) ⁵ E, nggoni melele nen tak, xosali mun, Hi tepisen eheien hos nan e rin xa tehosei rut mol-Isrel xil tangan ti lihusil xati. ^{d6} Reitin, Hi tehosei moletin nan xil tehupil eheien hos nan e tahupil ti naha xa xil tang di latepol ni. Vengan vahit Hi vahosei moletin xil tangan mei lave nan vahupil naha xa xil di lapol ni, ma napol ni ti mun nahupil eheien hos nan. ^e

⁷ Ma, rapusi xa mol-Isrel xil holu di lalang ves suse tangan mei lamal pe met Hi, e latakameti ti. E be vanut moletin vahis tang iaxa Hi tehosei xil tangan likameti. E ngan tesav xil vus, Hi tesak ni vurangexil tevon ni keien nan. ^{f8} Ngan ak nggoni ngan taxa latetisi e Vanuvei Eo latehit,

“Hi tesak ni nenemien nae tekoe, e mei duxoh xosali, nggoni ngan xa metexil bar e vurangexil bon.” (Dut 29:4; Aes 29:10)

⁹ E suv toto **Deved** tehiteni tehit,
“O Hi, usak ni lisavut e naha xa di langgusien nggo en, e usa rilomun ni pangasien mi xil ixoni ngan xa xil latesa ni mi mosav xil.

¹⁰ Usak ni metexil ivar tangan lisakras liketeh, e upol ni xil lilonge isa ni mar pangasien ve polien te xeih xil xa ti lipol ni ixoni ngan xa labe slev xil.” (Sam 69:22-23)^g

¹¹ Nasis xamim mun nabit, “?Midep, melele xa mol-Isrel xil lasavut mak, lamot vari xa linamea ti mun vatova?” !E-e, tamak ti! Hi temaen xil lasavut mak tangan ikila iteh meulien e ngan xil xa latave Siu ti. Imak, ma isak ni Siu xil mei iexil ihei naha xa xi di pol ni e meulien nae. ^{h12} E neta xa tesa xa Siu xil latepol

^b11:1 Plp 3:5 ^c11:2 1Saml 12:22; Sam 94:14 ^d11:5 Rom 9:27

^e11:6 Kal 3:18 ^f11:7 Rom 9:31 ^g11:10 Sam 35:8

^h11:11 Pol 13:46; Dut 32:21; Rom 10:19

ni tesah suse tangan moletin xil vus te ut etan likila lipus tuxolxatien na Hi. Reitin, longrasien nae misak ni ngan xil xa latave Siu ti tangan mei lapolu ni hosien na Hi. E xosxa ngan ak be reitin, ma be reitin mak mu xa moletin xil vus lipus kila xa tuxolxatien na Hi be eilep xa be eilep pupu e melele xa Siu xil vus xa Hi tehosei xil mei lihur neketen nae.

Hi misak ni ngan xil xa latave Siu ti mei labe moletin nan xil

¹³E, taxeak, nabit nasepin mi xamim xa mutave Siu ti. Hi tehosei nou tangan nihe *eloheoh* tei nan xa nihat mi xamim, e nabesi nou ve polien navan.

¹⁴Xos polien xa di napol ni del xamim ikila isak ni moletin navan xil xati iexil ihei naha xa Hi di pol ni e meulien namim. Xosxa imak, ma rute xil lihiles e Hi iteh meulien e xil. ¹⁵Melele xa Hi tesin mol-Isrel xil, tepol ni suse tangan iserev rin na moletin sav xil te ut etan. Ma melele xa ihur pilei rilomun ni mol-Isrel xil ak, ihos pilei sung. Ixoni ngan xa di lameul rilomun ra maten.

¹⁶Melele xa moletin tei biles pulaoa e, diamu, pol ni beret ni xa misa ni be sanien eo mi Hi, beret xa ipol ni itoutou mun ihe beret eo.[†] E melele xa moletin tei bosei vatiei tei bit ihe vatiei eo sa Hi, lite xil e huite xil mun lihe eo.[§] ⁱ

¹⁷Mol-Isrel xil, langgoni vatit *olip* eo na Hi, e xi tetal vuvul rut lite xil ra ni.^{**} Di, teha telang ves lit olip sav xil e urmatu, e tehistin xil mei latehur vonexil.

Mak, ma xosali, xamim xa mutave Siu ti, di munggur tuxolxatien na Hi nggoni ngan xa mube mol-Isrel xati xil. ^j¹⁸Mak, ma xamim xa mutave Siu xil ti, munanem male ni Siu xil ti xa Hi tesin xil e tetal vuvul xil nggoni ngan xa latehe lit olip san xil. ?Veneh ma di musep koai usil rin namim? Xamim mube lite xil tang xa mutatutou ni vatite ti. Be vatite iaxa di dutou ni xamim. ^k

¹⁹E vahit tei e xamim vahiteni minou vahit, “E Hi tepisen ni xa eheien nan di e xamem xa matave Siu ti vengan xa tetal vuvul Siu xil xa latelong rasi tangan vasak ni mesal vati e vahistin xamem mei mavur vonexil.” ²⁰Ngan ak be reitin. Hi tetal vuvul xil vengan xa lataling neketen nae ti e Kristo. E xamim mudi e vatite ak vengan xa muteling neketen namim en. E munasep koai ti. Ihos mak mu xa ulimim ikan e mulaxat kuh xamim. ²¹Vengan xosxa Hi ikila ital vuvul mol-Isrel xil ra vatit olip san xa labe lite xati teni, ma ihe temelete tang mini tangan ital vuvul xamim mun.

²²Ma, munem pisi mu usil hosien e ekaten na Hi vengan xa xi tepol ni texeih mi Siu xil xa latemot ngamu, e tepol ni tehos mi xamim xa mutave Siu ti. E xamim tit mupus hosien nan xosxa muhe reitin mini. E xosxa munave reitin ti mun mini, ma xi ital vuvul xamim mun muha. ^m²³E xosxa Siu xil lihiles e liling neketen nae e Kristo, Hi nggur xeihen tangan ihistin xil mun liti e vonexil xati. ²⁴Xamim xa mutave Siu ti, tetiamu

[†]11:16 Nggusil nenemien ak, mol-Isrel xil labe moletin eo na Hi vengan xa avu nae xil tetiamu latehe moletin eo nan xil.

[§]11:16 Nggusil nenemien ak, Hi tehosei Ebrahim, vatit avu na Siu xil tetiamu, tehit tehe moletin eo nan. Ma, ngan xil xa lastal langgo en mun labe moletin eo xil na Hi.

^{**}11:17 Nggoni ngan xa mol-Isrel xil labe vatit olip sa Hi xa xi di milaxat kuhi. Vatite e amulite teni labe vatit avu xil xa latexoni Ebrahim, Aesak xal Siekob, e mol-Isrel sav xil labe lite xil teni.

ⁱ11:16 Nam 15:17-21; Neh 10:37; Esek 44:30 ^j11:17 Efes 2:11-19

^k11:18 Sion 4:22 ^l11:20 Rom 12:16 ^m11:22 Sion 15:2,4; Hib 3:14

muteti sotin ra Hi, e xi tehur pilei xamim mei mube nan. Munggoni lit **olip** xil te urmatu xa tehistin xamim muti e vatit olip san xa xi di milaxat kuhi. E xosxa Hi mikila vapol ni sexien ak mi xamim, teme le tang mini tangan ileh lit olip xil xati te vatit olip san e ihistin xil liti mun e vonexil xati.

Hi ien isae e mol-Isrel xil e ihur pilei xil lihe moletin nan xil

²⁵ Tuxoli e hinoxoli xil, ieok bei tangan xamim xa mutave Siu xil ti mukil nene-mien xuxus tei xa Hi di pisen ni tangan ti munasep koai ti munahit mube metisou mak mu. Hi vari tang iaxa tesak ni mol-Isrel xil holu, tinexil mei nggeih. E tinexil ixehi imak ha vuma ituxoh melele xa Hi teling xati ngamu tangan istal e melele xa ngan xil xa latave Siu ti xa mei lihisti itel moletin xil na Hi mei ituxoh pupulu en xati teni. ²⁶ Ti, Hi iteh meulien e mol-Isrel xil vus ixoni ngan xa tese p usili tuei e Vanuvei Eo tehit, *“Moletin te teh meulien en istal ixo Serusalem e Vathu Saeon e xi ileh rerat tesaen xil vus ra ngan xil xa lastal langgo ra na Siekob.”* (Aes 59:20)^o

²⁷ *“E nipol ni hitxatien te xeih navan itel moletin nan xil e melele xa nileh rerat tesaen nae ra xil.”* (Ser 31:33-34)^p

²⁸ Vengan xa ien bei tangan xamim mulong longeongen hos, Hi mei tehe elu mi mol-Isrel xil xa tinexil texeih. E veng an xa Hi minem usil avu nae xil, eheien nan di tamu e Siu xil. ²⁹ Reitin, eheien nan di tamu e mol-Isrel xil veng an xa neta tovuol mikila vahiles nenemien na Hi usil ngan xil xa xi tehosei xil, mu usil

ngan xil xa tehit xati tangan ituxol xat xil.

³⁰ Tetiamu, xamim xa mutave Siu ti mutelong ras Hi. E taxeak, Hi di pisen esaeen nan mi xamim veng an xa Siu xil di lalong rasi. ³¹ Misak ni, longrasien nae misak ni Hi tepol ni suse te esaeen xa mei duxoh meulien namim. E ixo suse te esaeen ak xa Hi tepol ni ve xamim, xi ipisen esaeen mi Siu xil mun. ³² Veng an xa Hi ien bei tangan vapisen ni xa moletin xil vus, Siu xil e ngan xil xa latave Siu ti, ladi e voh te longrasien. Ma, ve rin ak, xi mikila vapisen esaeen nan mi xil vus. ^q

³³ !Napet rat his Hi! Xi polu ni hosien, metisouen, e kilakilen. ?Visi iaxa mikila vak il sen nenemien nan? Xir rasakras rapus kil vatite te holesok xil xa xi di pol ni. ^{r34} Ngan ak nggoni naha xa Vanuvei Eo biteni xa bit,

“?Visi mikil nenemien na Iahova?

?Visi iaxa mikila ipisen suse mini?” (Aes 40:13)^s

³⁵ *“?Visi iaxa mikila vasa sanien tei mini tangan vasak ni Hi vasa rilomun ni mini?”* (Siob 41:11)

³⁶ Vengan xa holesok xil vus xa ladi, Hi iaxa tepol ni. Ladi pe hen, e ladi tangan ti lipet rat hisen. ^t Ma xir, ti ripet rat his Hi xa minehinen te xeihen nan da vehakut xa vehakut tang. Reitin.

Melele xa rabisti del Kristo, mei rabe rut tenben xil xa di rapol vituei

12 Mak, ma tuxoli e hinoxoli xil, veng an xa Hi tepisen esaeen nan xa bos mak mu mi xir vus, nadakes xamim tangan musa sen meulien namim mi Hi ixoni sanien eo namim mini. E sanien eo ak namim tamat ti, meul tang da. Reitin, musa xamim tangan mupol

^o11:25 Rom 12:16; Luk 21:24; Sion 10:16 ^o11:26 Sam 14:7

^p11:27 Aes 27:9 ^q11:32 Kal 3:22; 1Tim 2:4 ^r11:33 Aes 45:15; 55:8

^s11:34 Siob 15:8; Ser 23:18; 1Kor 2:16 ^t11:36 1Kor 8:6

mini e mupol ni holesok xil xa xi imaal ven. Reitin, musa xamim mi Hi, vengan xa ngan ak be sexien xa momal tangan ti mumot mini ixo en. ^{u2}Sexien namim xil nahusil sexien xil ti na ngan xil te ut etan. E mumaen Hi tangan ihiles tine-mim ixo suse xa di misak ni nenemien namim mei ihe neta hu. Imak, ma xamim mukila mukil nenemien na Hi e naha xa xi ien bei tangan mupol ni. Reitin, mei mukil naha xa bos, naha xa xi memaal ven, e naha xa momal pe meten tangan mupol ni. ^v

³Hi di pisen eheien hos nan minou melele xa tehosei nou tangan name elohohon tei nan. Ma, nabiteni mi xamim vus xa munanemi ti munahit mube eilep mak mu muli naha xa momal pe met Hi. E munem kil xamim ixo sexien xa momal ihusil neketen xa Hi tesa ni mi xamim kekes. ^{w4}E tenbexir, rut tenben holu ladi en, e xil vus di lapol ni polien savsav xil. ^{x5}Nggusil hisit nenemien ak, tave ti neta xa rabe holu, e melele xa rabisti del Kristo, mei rabe tenben xa be tei takes. E ve rin ak, rabisti del xir mun tang nggoni ngan xa rut tenben xil di lapol vituei e tenben tei takes. ^{y6}E Ninin Eo di misa sanien savsav xil mi xir kekes. Ma, ti ripol itel sanien nar xil xa Hi tesa ni mi xir tehusil eheien hos xa tepisen ni mi xir. Xosxa onggur sanien tangan uhit lenen sepinien na Hi, ma upol ni ihusil neketen xa otehuri. ^{z7}Xosxa onggur sanien tangan ututou ni mosav xil, ma ututou ni xil. Xosxa onggur sanien tangan upispisi mi moletin xil, ma upispisi mi xil. ⁸Xosxa onggur sanien tangan usel xat moletin xil, ma usel xat xil.

Xosxa onggur sanien xa sien di e xoux melele xa osa neta ngan tangan vatutou ni mosav xil ni, ma usa ni mi xil. Xosxa onggur sanien tangan mei ove vat tei na moletin nan xil, ma upol ixeh en vehakut. E xosxa onggur sanien tangan iem isae e mosav xil, ma iem isae e xil itel sien. ^a

Selxatien tangan ripol ni holesok xil ihusil nenemien te eheien

⁹E holesok xil vus xa mupol ni, mupol ni itel nenemien te eheien xa be reitin. Sexien xil xa misa, mustokovein ni. E sexien xil xa bos iaxa mutal xati ixeh e meulien namim. ^{b10}Iemim ihei xamim mun ixoni ngan taxa mube vatimol tei takes tang. E musak pisi mak mu tangan mupisen sexien te merereen mi mosav xil. ^{c11}Muhe imae e polien xil vus namim e munave mah ti. Reitin, ti mupol mi Hi Suv itel nenemien tevi namim. ^{d12}Mu-maal vehakut vengan mukila xa naha xa muling nenesien namim en be reitin. Musoh ixeh melele xa mubisu mi long-pangasien xil. E tit musis mi Hi vehakut. ^{e13}Melele xa moletin sav xil na Hi labe tamure ni neta ngan, musa naha xa mukila musa ni mi xil tangan mututou ni xil. E melele xa mupus ngan halesav xil, muhur pilei xil e tim samim. ^f

¹⁴Musis mi Hi tangan ituxol xat ngan xil xa di lasak purun xamim ve neketen namim. Reitin, musis mini tangan ituxol xat xil, e nave ti tangan vasa halesil mi xil. ^{g15}Muhesi xamim itel ngan xil xa labesi xil, e mutang itel ngan xil xa di ladang. ^{h16}Mutit ihos itel Kristin sav xil itel nenemien xa xamim mupin tang pe

^{u12:1} Rom 6:11,13; 1Pit 2:5 ^{v12:2} Efes 4:23; 5:10,17

^{w12:3} 1Kor 12:11; Efes 4:7 ^{x12:4} 1Kor 12:12 ^{y12:5} 1Kor 12:27; Efes 4:25

^{z12:6} 1Kor 12:4-11; 1Pit 4:10-11 ^{a12:8} 2Kor 9:7

^{b12:9} 1Tim 1:5; 1Pit 1:22; Amos 5:15 ^{c12:10} 2Pit 1:7; Plp 2:3

^{d12:11} Pol 18:25; Rev 3:15 ^{e12:12} 1Tes 5:17 ^{f12:13} Hib 13:2

^{g12:14} Mat 5:44; Luk 6:28; Pol 7:60; 1Kor 4:12 ^{h12:15} Sam 35:13

met Hi. Munanemi ti munahit xamim mube eilep mak mu muli xil, mu kilakilen namim mili kilakilen nae. E mupol ni nenemien namim ihe tan. ⁱ

¹⁷ Melele xa moletin tei pol ni neta tei xa misa minuk, onasa xoles ti neta xa misa mini. Musak pisi tangan mupol ni neta xa moletin xil vus lanemi labit bos. ^{j18} Mupol ni holesok xil vus xa mukila mupol ni tangan muti ihos e tomat itel moletin xil vus. ^{k19} Tuxoli e hinoxoli xil, munasa xoles sexien tesa xil ti xa moletin xil di lapol ni mi xamim. E-e. Mumaen Hi tangan ipisen ekaten nan mi xil ve naha xa di lapol ni, vengan xa Vanuvei Eo biteni bit, *“Inou, Iahova vari, nabiteni xa nisa xoles neta xa misa xa xil latepol ni. Reitin, inou nisak ni xil lia huit sexien tesa nae xil.”* (Dut 32:35) ^{l20} Misak ni, ti mupol ni naha xa Vanuvei Eo biteni xa bit, *“Xosxa mae nggat elu namim xil, ma musa anien mi xil. E xosxa meruru nggat xil, ma musa neta tova mi xil tangan limu ni. Vengan xa imak, ma sexien namim xil isak ni xil lihe unoun e lihiles.”* (Pro 25:21-22) ^{m21} Ma munaemaen sexien tesa na mosav xil ti nasak ni xamim mun munapol nasa. E ihos mak mu xosxa muleli nenemien na ngan xil xa lapol misa mi xamim itel sexien hos xil.

**Selxatien tangan rilong xat vat nar
xil vengan xa Hi vari iaxa
teling xil e vonexil**

13 Momal tangan moletin xil vus na Hi lilong xat vat nae xil te kavmen, vengan Hi iaxa temaen vat xil vus langgur xeihen nae, e xi vari tang iaxa teling xil e vonexil. ⁿ² Moletin xil xa lasin relaxatien na vat xil di lasin naha xa Hi

teling xati. E ngan xil xa di lapol ni sexien ak di lalihi pangasien bemei e xil mun tang. ³ Vengan ngan xil xa lapol ni sexien xil xa bos lasakras ulixil vakan ni vat xil te kavmen. Ngan xil kestang xa di lapol ni tesaen xil iaxa ulixil di mikan ni xil. Ma, xosxa iemim ti navei tangan ulimim vakan ni vat xil ak, ma mupol ni neta xa bos. Imak, ma xil linem ihos mi xamim. ^{o4} Vengan Hi miling vat xil te kavmen tangan lihe moletin te polien nan xil xa ti litutou ni xamim. E xosxa mupol ni tesaen, momal tangan ulimim ikan ni xil vengan xeihen xa Hi di milingi de hexil be reitin xa xil ti mak lisa pangasien mi ngan xil xa lapol misa. Reitin, xil di lapol nggusil nenemien na Hi e di lasa pangasien mi ngan xil xa lapol misa. ^{p5} Vengan xa rin ak be reitin, momal tangan mulong xat vat te kavmen xil ak, tave ti ve ulimim di mikan ni pangasien xa xil lakila lasa ni, e mulong xat xil venggan xa xamim mukila xa sexien xil ak momal pe met Hi.

⁶ Misak ni, momal tangan muxal **takis** namim mi xil venggan xa xil di lapol ni polien nae nggoni moletin te polien na Hi. ⁷ Reitin, muxal sen neta xa momal tangan lavuri. Muxal takis mi vat xil teni, e muxal takis te holesok sav xil xa di mupos ni nggo mosav xil iha mi vat xil teni. E mupisen merereen mi xil vus. ^q

**Selxatien tangan moletin xil na Hi ti
lipol ihusil sexien te eheien**

⁸ Momal tangan muxal sen kaon namim xil del mosav xil e melengien xil xa momal teni. E kaon tei takes iaxa momal tangan ti musa xolesi vehakut, ngan ak be sexien te eheien

ⁱ12:16 Rom 15:5; Pro 3:7; Aes 5:21; Rom 11:20 ^j12:17 1Tes 5:15; Pro 3:4

^k12:18 Mak 9:50; Hib 12:14 ^l12:19 Lev 19:18; Mat 5:39; Rom 13:4; 2Tes 1:6-7;

Hib 10:30 ^m12:20 Mat 5:44 ⁿ13:1 Taet 3:1; Pro 8:15; Sion 19:11

^o13:3 1Pit 2:13-14; 3:13 ^p13:4 Rom 12:19

^q13:7 Mat 22:21; Mak 12:17; Luk 20:25

xa di mupisen ni mi xamim mun tang. Vengan xosxa mupisen sexien te eheien mi mosav xil, nggoni ngan xa mulong xat **rae** xil vus na Hi. ^{r9}Rae xil na Hi mak: “*Munakan ni atou mu tiramue na mosav ti, munahas vin moletin ti, munakan ni ti neta na mosav xil, e eheien namim nati ti e holesok na mosav xil.*” (Eks 20:13-17)^s ¹⁰Xosxa iemim bei mosav xil, musakras mupol ni neta xa vasa vaha xat xil. Mak, ma eheien be suse xa mukila mulong xat rae xil vus xa Hi tesa ni. ^t

¹¹Reitin, muhusil sexien te eheien vengan xa melele xa Hi iteh meulien e xir di bemei sangas. Mak, ma mumea ra paten namim vengan xa rakila xa, taxeak, melele xa Hi iteh meulien e xir di bemei sangas mak mu mili melele xa ratehur rohon ni neketen nar. ^{u12}Reitin, vongien xa teviei ak sangas vavus e miehen di bemei xiak. Misak ni, ristokovein sexien xil te maluxoluken, e rising ni xir ni sexien hos xil te miehen ixoni ngan xa labe eising te vaeen nar xil. ^{v13}Rixuxou kuhi ve sexien nar xil tangan ripisen ni xa rabe moletin xil xa radi e miehen. Ma rinapol ni ti sexien xa misa melele xa ramei vituei e anien xil xa mahulong e rinamun ti nave holu. Rinapol ti nasa mi mosav xa ratateli ti vatela mu rinapol ni ti sexien sav xil xa misa natel tenbexir. Rinaseputut xat mosav xil ti e rinanem ti nasa naha xat xil. ^{w14}E ihos mak mu xa sexien namim ihusil sexien na Suv Iesu Kristo. Ma munamaen ti mun tesaen mu eheien xil te tenbemim nalihi nenemien namim. ^x

Selxatien tangan rinalepis rin na mosav xil ti

14 Momal tangan muhur pilei ngan xil xa neketen nae memerou tang tangan mei limos itel xamim. E munangor ti natel xil usil naha xa lanemi labit Hi maen xil tangan lapol ni e meulien nae. ^{y2}Rut moletin xil xa langgur neketen lake reitin xa Hi maen xil tangan lia anien xil vus. E rut moletin xil xa neketen nae memerou tang di lake reitin xa Hi tamaen xil ti tangan lava kovi. ^{z3}Ngan xil xa langga holesok xil vus linanem male ni ti ngan xil xa lanemi labit lasakras lava kovi. E ngan xil xa lataxa hisi ti linalepis rin na moletin ti xa di ngga holesok xil vus linahit di pol ni tesaen, vengan xa Hi tehuri ngamu mei tehe moletin nan. ^{a4}?Xamim mube visi tangan ti mulepis rin na moletin te polien na moletin sav tei? Be suv nan xati iaxa ilepis rin nan e ihiteni xa xi pol momal pe meten mu tamal ti. E Hi Suv iaxa ipusi xa xi momal ngamu venggan xa xi mikila vasak ni xi mei vamaal pe meten. ^b

⁵Rut moletin xil lanemi labit melengien tei be melengien eo mak mu mili melengien sav xil pe met Hi. E rut moletin sav xil labit melengien xil vus pipin tang. E moletin xil kekes ti liling nene-mien nae tangan lipol ni naha xa labit Hi ien bei tangan lapol ni. ^{c6}Ma, ngan xil xa labit melengien tei be melengien eo mak mu mili melengien sav xil, ti lipol ni tangan limerere ni Hi Suv ixo en. E ngan xil xa labit lakila lava anien xil vus, ti lipol ni tangan limerere ni Hi Suv ixo en, venggan xa di lasa memesien mini ve anien

^{r13:8} Kal 5:14; 1Tim 1:5 ^{s13:9} Dut 5:17-19,21; Mat 19:18; Lev 19:18; Mat 5:43; 19:19; 22:39; Mak 12:31; Luk 10:27; Kal 5:14; Tem 2:8 ^{t13:10} Mat 22:40

^{u13:11} Efes 5:14; 1Tes 5:6-7 ^{v13:12} 1Sion 2:8; Efes 5:11 ^{w13:13} Luk 21:34; Efes 5:18 ^{x13:14} Kal 3:27 ^{y14:1} Rom 15:7 ^{z14:2} Sen 1:29; 9:3

^{a14:3} Kol 2:16 ^{b14:4} Mat 7:1; Tem 4:11-12 ^{c14:5} Kal 4:10

nen ak. E ngan xil xa labit lakila lava rut anien xil tang, ti lipol ni tangan limerere ni Hi Suv ixo en, e xil mun di lasa memesien mini ve anien ak. ⁷Xir ratameul ti tangan ti ravusil naha xa xir tang iexir bei tangan rapol ni. E nggusil nenemien ak, ratalel ti vahusil naha xa di iexir bei tangan vastal. ⁸Vengan xosxa rimeul, ti rimeul tangan ti rihusil xat naha xa Suv ien bei. E xosxa rimat, ti rimat tangan rihusil xat naha xa Suv ien bei tangan vastal. Mak, ma tave ti neta xosxa rimeul mu rimat, xir rabe moletin xil na Suv. ^{d9}Vengan xa Kristo temat e temeaa rilmun ra maten tangan mei vahe Suv na ngan xil xa lameul e ngan xil mun xa lamat.

¹⁰?Ve rin ak, xamim xa mutaxa kovi ti, veneh ma di mulepis rin na moletin sav xil mubit xil lapol ni tesaen? ?E xamim sav xa mungga anien xil vus, veneh ma di munem male ni tuemim xil e neketen ve nenemien nae? Vengan xa xir vus ha risoh pe met Hi, e xi iaxa ilepis rin nar. ^{e11}Vengan xa Vanuvei Eo biteni xa,

“Iahova biteni bit,

‘Ngoni ngan xa be reitin xa nabe Hi xa nameul,

be reitin mun xa moletin xil vus mei litingeiril minou,

e lisa memesien minou.” (Aes 45:23)^f

¹²Ve rin ak, be reitin xa xir kekes ha rihit rat rin nar pe met Hi ihusil naha xa xir ratapol ni. ^g

Selxatien tangan rinapol ni Kristin sav xil ti linamot e tesaen

¹³Ma, rinalepis ti mun rin na Kristin sav xil. E muling nenemien namim tangan munapol ni ti neta xa vakila vasak ni tuemim xil e neketen lasavut e lamot

e tesaen. ¹⁴Vengan xa nakila xa nabisti del Suv Iesu, nakila mun xa anien tovuol iaxa vasak ni nou ninamese ti pe met Hi. E xosxa moletin tei mike reitin xa anien tei mikila isak ni xi mei namese ti pe met Hi, ma be reitin xa isak ni xi namese ti pe meten. ^{h15}E xosxa neta xa di onnga ni di misak ni mosav tei milonge misa ven, ma sexien nam tahusil ti mun sexien te eheien. !Munamaen anien ti xa di mungga ni napurun neketen na moletin sav xa Kristo temat tehinat rin nan! ⁱ¹⁶Ma, tave ti neta xa mukila xa neta tei bos tangan muvuri, munapol ni ti xosxa sexien ak mikila vapurun moletin sav xil tangan xil linasep purun xamim ti ven. ^{j17}Vengan xa di ratapisen lelxatien na Hi ti e meulien nar vaxo naha xa di rangga ni mu di ramu ni. E di rapisen ni nggo sexien te momalen, sexien xa di radi vituei bos del mosav xil e tomat, e sexien te sien xa **Ninin Eo** di misa ni mi xir. ¹⁸E melele xa moletin tei di pol ni sexien xil ak vengan xa di nggusil Kristo, Hi ihesi xi ven e mei imal pe met moletin sav xil mun.

¹⁹Ve rin ak, vehakut, ti riling nene-mien nar xil tangan ripol ni sexien xil xa isak ni moletin xil liti vituei e tomat, e itutou ni moletin sav xil tangan mei lixeih mu e neketen nae. ^{k20}Muxuxou kuhi tangan naha xa di mungga ni napurun ti naha xa Hi di pol ni e meulien na mosav xil. Be reitin xa anien xil vus bos te anien en pe met Hi. E tavos ti xa di mungga neta tei xa vasak ni mosav vamot e tesaen. ²¹Mak, ma bos tangan munahur ti kovi, natel uaen, mu holesok sav xil xa mikila vapol ni tuemim xil linasavut ti e tesaen. ^{l22}Naha xa neketen nam tasom di maen xouk tangan opol

^d14:8 Luk 20:38; Kal 2:20; 1Tes 5:10

^e14:10 Mat 25:31-32; Pol 17:31; 2Kor 5:10 ^f14:11 Aes 49:18; Plp 2:10-11

^g14:12 Kal 6:5 ^h14:14 Pol 10:15; Taet 1:15 ⁱ14:15 1Kor 8:11-13

^j14:16 Taet 2:5 ^k14:19 Rom 12:18; 15:2 ^l14:21 1Kor 8:13

ni, ngan ak be namil Hi kestang. Tuxolxatien na Hi iti mi ngan xil xa lakila xa holesok xil xa di lapol ni momal pe meten. ²³E xosxa nenemien na moletin tei tara kat ti e di pol lualu usil naha xa bos tangan vapol ni, melele xa xi mingga anien tei xa takil ti xa bos mu misa tangan vahuri, ma Hi isa pangasien mini ven, vengang xa naha xa xi tepol ni tahusil ti neketen xa ngguri. Reitin, sexien xil xa moletin tei di pol ni xa tahusil neketen nan ti be *tesaen*.^m

Sexlatien tangan rinem usil mosav xil ileli xir

15 Xir, Kristin xil xa neketen nar nggeih, ihos mak mu xa ritutou ni Kristin xil xa neketen nae memerou e di lanemi labit holesok xil holu mikila vasak ni xil mei linamal ti pe met Hi. Momal tangan ti rinem usil xil mun e rinapol ni ti holesok xil xa isak ni xir kestang rihesi xir ven. ²Reitin, xir kekes rinem usil tua nar xil e neketen, e tit ripol ni holesok xil xa itutou ni xil, tangan isak ni xil lihesi xil ni, e isuv xat neketen nae. ³Vengang xa Kristo mun tenanem ti usil xi tasen tang. Xi tepol ni nggoni ngan xa Vanuvei Eo biteni bit, “O Hi, sepinien tesa xil xa di laso ni ba xatuk, nalonge nggoni ngan xa xil di lapol ni ba xat inou.” (Sam 69:9) ⁴Holesok xil vus xa latetisi teti e Vanuvei Eo tetiamu, latetisi tangan ipispisi mi xir xosali. Reitin, latetis holesok xil ak tangan vasuv xat neketen nar e vapo rat nenemien nar mei vahe teviei mak mu. ⁵E be Hi iaxa di misak ni nenemien nar ihe teviei mak mu e di po rat nenemien nar. Misak ni, di nasisi tangan isak ni xamim mei muti vituei e tomat ixoni ngan xa Iesu Kristo mun tepol ni. ⁶Imak, ma xamim vus ti

mupet rat vituei ni his Hi xa be Tame Iesu Kristo, Suv nar.

Longeongen hos usil Iesu Kristo be na Siu xil e na ngan xil mun xa latave Siu ti

⁷Ma, vengang xa Iesu Kristo tehur pilei xamim mube nan, xamim mun ti muhur pilei Kristin savsav xil ixoni ngan xa labe tuemim xil e neketen tangan isak ni ngan xil xa lipus sexien namim xil lipet rat his Hi ihe nesao. ⁸Vengang xa nabiteni mi xamim xa Kristo mei be moletin te tutouen na Siu xil tangan vasak ni holesok xil xa Hi tehiti xati mi avu nae xil tetiamu mei vastal vahe reitin. ⁹E nggo suse nen ak, Iesu misak ni ngan xil mun xa latave Siu ti tangan mei likila limes Hi ve esaen xa xi di pisen ni mi xil. Ngan ak nggoni ngan xa Vanuvei Eo biteni xa bit,

“Misak ni, inou nihithiten usil hosien nam mi ngan xil xa latave Siu ti, e nipet rat hisom itel kikeien xil te memesien.” (Sam 18:49)^r

¹⁰E rute sav, biteni bit,

“!Xamim xa mutave Siu ti, muhesi xamim itel moletin xil na Hi!” (Dut 32:43)

¹¹E rute sav mun biteni bit,

“Xamim vus xa mutave Siu ti, mumes Iahova.

!Reitin, moletin xil vus, mumesi!” (Sam 117:1)

¹²E vatei mun, provet Aesea tehiti lelen ni tehiti,

“Moletin tei xa imea ixo vatimol na suv toto Deved mei istal.

Xi mei ilaxat ngan xil xa latave Siu ti, e xil liling nenesien nae en.” (Aes 11:10)^s

¹³Xir rakila raling nenesien nar e Hi xa di pol sen holesok xil vus xa tehiti xati tangan ipol ni. E di nasis mini tangan

^m14:23 Taet 1:15 ⁿ15:2 Rom 14:19; 1Kor 9:19; 10:24,33 ^o15:4 Rom 4:23-24;

1Kor 10:11 ^p15:7 Rom 14:1 ^q15:8 Mat 15:24; Maek 7:20; Pol 3:25

^r15:9 Rom 11:30; 2Saml 22:50 ^s15:12 Rev 5:5

isak ni xamim mei mupolu ni sien xil vus e muti e tomat ve neketen xa mungguri. Imak, ma nenesien namim en mei ixehi mak mu e meulien namim ixo xeihen na **Ninin Eo**.

Pol misep usil polien nan mi ngan xil xa latave Siu ti

¹⁴Tuxoli e hinoxoli xil, inou nakila xa xamim mupolu ni holesok xil xa bos, mupolu ni kilakilen, e mukila mupispisi mi xamim mun tang ni holesok holu usil Hi. ¹⁵E, e uvei ak, di nasel xat xamim ngegeh usil rut holesok xil tangan nisiasi ni xamim mulale. E napol ni mak vengan xa Hi, ngan xa tepisen eheien hos nan minou, xi iaxa tesa polien hos ak minou. ¹⁶Xi iaxa teling nou tangan nihe moletin te polien na Iesu Kristo tangan nipol itel ngan xil xa latave Siu ti. Reitin, napol del xil nggoni ngan xa inou nabe pris tei na Hi tangan nihithiten longeongen hos na Hi mi xil, e nisa meulien nae mini ixoni sanien eo tei. Vengan xa xi teho-sei xil labe nan e melele xa tesa Ninin Eo mi xil. ¹⁷E vengan xa nabisti vituei del Iesu Kristo, nakila nasep koai ve polien xa di napol ni ve Hi. ¹⁸E di nasep koai ve holesok xil xa Kristo tepol ni texo inou tangan vatel ngan xil xa latave Siu ti mei lalong xat Hi. Iesu tepol ni holesok xil ak texo sepinien e polien xil, ¹⁹tetel xeihen te merkel xil e sexien sav xil xa latellep, e del xeihen na **Ninin** na Hi. Mak, ma nateha natepol e ut xil vus tangan nikila nihithiten sen longeongen hos usil Iesu Kristo mi moletin xil, e hal **Serusalem** teha sotin tetuxoh provins te hal Ilirikam. ²⁰Vehakut, ieok bei tangan namithiten longeongen hos ak e rute xil xa moletin xil latalong ti mu usil Kristo en. Di napol ni mak vengan xa

ieok ti tavei tangan ha nipol e rute xil xa moletin xil latepol en ngamu. ^{w21}Ngan ak nggusil naha xa Vanuvei Eo biteni melele xa bit,

“Xil lipus kil ngan xa latalong ti mu usili, e linem kil holesok xil sung xa latnakil ti mu tetiamu.” (Aes 52:15)

Pol misep usil nenemien nan tangan ha isao ni Kristin xil e hal Rom

²²E vengan xa di napol tangan nasa longeongen hos e rute sav xil, melengien holu polien ak misikoe xol nou tangan nasakras namat nasao ni xamim. ^{x23}E xosali, napusi xa natepol sen polien navan xil e rute xil ak. Ma, di naling nenemien navan tangan nihat nisao ni xamim e hal Rom ixoni ngan xa ieok tehei nousav ngamu tangan nipol ni. ²⁴Reitin, ieok bei tangan nisao ni xamim e suse navan e melele xa nihe kantri te hal Spen. Nanemi nabit nihat nite visal xamim vuteili. Ti, mukila mututou ni nou e suse navan tangan niha. ^y

²⁵E taxeak, di nabue xat nou tangan name Serusalem e nitutou ni moletin xil na Hi inggaxor. ^{z26}Vengan xa sias xil xa ladi e provins xalu te hal Masedonia e Akea labesi xil tangan lasa hexil vaha vatutou ni ngan xil xa ladi e sias te hal Serusalem xa labe tamure ni holesok xil holu. ^{a27}Reitin, labesi xil tangan lapol ni, e ngan ak momal vengan nggoni ngan xa xil di lasa xoles tuxolxatien xa latehuri texo xil. Vengan xa Siu xil lasa tuxolxatien te neketen mi ngan xil xa latave Siu ti. Ma, momal xa ngan xil xa latave Siu ti lisa rut mani xa Hi tetuxol xat xil ni tangan ha ihe tuxolxatien mi Siu xil. ^{b28}Melele xa nipol sen polien ak e nisa rat mani xil vus xa lateso viton ni, niha nihe Spen. E, e suse navan, nihat nisao ni

^{t15:15} Rom 1:5; 12:3 ^{u15:16} Rom 11:13; Plp 2:17 ^{v15:18} 2Kor 3:5

^{w15:20} 2Kor 10:15-16 ^{x15:22} Rom 1:10-13 ^{y15:24} 1Kor 16:6 ^{z15:25} Pol 19:21; 20:22 ^{a15:26} 1Kor 16:1; 2Kor 8:1; 9:2,12 ^{b15:27} Rom 9:4; 1Kor 9:11

xamim. ²⁹E melele xa nihat visal xamim, nakila xa nihat itel tuxolxatien xil vus na Kristo tangan nisa ni mi xamim.

³⁰Tuxoli e hinoxoli xil, vengan xa rabisti vituei del Iesu Kristo, Suv nar, e vengan xa eheien na Ninin Eo de xir, nadakes xamim tangan mumei vituei e sisen mi Hi itel nou e rin navan. ^{e31}Musis tangan Hi isikoe xol meulien navan ra he moletin xil te provins te hal Sudea xa latake reitin ti e Iesu. Musis mun tangan polien xa nipol ni e hal Serusalem imal pe met moletin xil na Hi inggaxor. ³²Musis imak tangan, xosxa ihusil nenemien na Hi, nihat nisao ni xamim itel sien, e riti vituei tangan nilonge ihos ve vitueien nar. ³³E inou di nasis tangan Hi, xa be vatit tomat, iti mi xamim vus. Reitin.

Pol bit bos makoe mi moletin xil na Hi e taon xa mahulong te hal Rom

16 Nabit namit kila mi xamim usil hinexir hos tei xa hisen Fibi. Xi di pol e sias te hal Kengkria. ²Melele xa ihat visal xamim, muhur pilei e his Suv ixo sexien xa ipisen ni xa muhe moletin xil na Hi. E nasis xamim tangan mututou ni ni neta xil vus xa xi be tamure ni, vengan xa xi tetutou ni moletin xil holu, e tetutou ni nou mun.

³Muhit 'bos makoe' navan mi Prisila xal Akuila xa lutepol vituei tetel nou e polien xa Iesu Kristo tesa ni mi xametel. ^{d4}Sangas xalu lalamat tangan lalotutou ni nou. Ma, names xalu holu pupu, e tave inou ti kestang. Sias xil vus na ngan xil mun xa latave Siu ti di lames xalu. ⁵E nabit 'bos makoe' mi ngan xil mun xa lalah vituei e tim salu. ^e

E mi Epaenetas xa xi vari e provins te hal Esia teling rohon ni neketen nan e Kristo, nabit 'bos makoe' mini. ⁶'Bos makoe' navan ba mun mi Meri, ngan xa tepol texeih e rin namim. ⁷'Bos makoe' navan ba mun mi Andronikas xal Sunias. Xalu lube Siu xa matteti vituei e nim te xeih. **Eloheoh** xil lakil kuh xalu, e mei lutehe Kristin tetiamu ni nou.

⁸'Bos makoe' mi Ampliatas, tua hos tei navan vengan xa neketen namel e Kristo tei takes. ⁹E nabit 'bos makoe' navan ba mi Obanas xa di rapol vituei mi Kristo, e mi Stakis mun, xa be tua hos tei. ¹⁰'Bos makoe' mi Apeles xa tepisen ni ngamu xa neketen nan e Kristo be reitin. 'Bos makoe' mun mi ngan xil xa ladi tim sa Aristobolas. ¹¹'Bos makoe' mi Herodion xa be Siu tei nggoni nou, e mi ngan xil xa ladi e tim sa Nasisas xa laling neketen nae e Suv nar.

¹²Nabit 'bos makoe' mun mi Trifaena xal Trifosa, xa di lupol mi Suv. E 'bos makoe' navan ba mi Perisis, tua hos navan xa di pol nggeih ve Suv. ¹³Nasa 'bos makoe' navan ba mi Rufas, moletin hos tei xa Suv tehosei mei be nan, e mi ninen xa vehakut di telaxat kuh inou texoni ngan taxa natehe horamue nan xati. ^{f14}'Bos makoe' mun mi Asingkritas, Flegon, Heremes, Patrobas, Heremas, e tuxoli e hinoxoli xil xa ladi visal xil. ¹⁵'Bos makoe' mun mi Filolokas xal Sulia, mi Nereas xal hineli, e mi Olimpás e mi moletin xil vus mun na Hi xa ladi visal xil.

¹⁶Melele xa mubit 'bos makoe' mi xamim, musa hemim metu^{††} tangan vapisen eheien eo mi xamim. E moletin xil e sias xil vus na Kristo di labit 'bos makoe' bat mi xamim. ^g

^{††}**16:16** Sepinien xati tehit, "*pesumen eo*," vengan xa ngan ak tehe sexien nae melele xa lapus rohon ni xil e melengien xil kekes.

^c**15:30** 2Kor 1:11; Plp 1:27; Kol 4:3; 2Tes 3:1 ^d**16:3** Pol 18:2,18,26

^e**16:5** 1Kor 16:19; 16:15 ^f**16:13** Mak 15:21 ^g**16:16** 1Kor 16:20; 1Pit 5:14

Sepinien kor

¹⁷Tuxoli e hinoxoli xil, nasel xat xamim tangan muketeh xol kuh xamim, vengan xa rut moletin xil di lamos del moletin xil na Hi e di lapol ni ngongoren xil, di labiles nenemien na moletin xil ra reitinen, e di lapurun neketen na moletin xil holu. Ngan xil ak di labae del xat pispisien xil xa xamim mutehuri ngamu. Ma, di nasel xat xamim tangan muti sotin ra hisit moletin xil ak. ^{h18}Vengan xa ngan xil xa lapol ni holesok xil ak latapol ti mi Kristo, Suv nar. Io, di lapol ni holesok xil ak tangan lakila lavur naha xa xil tang iexil bei. Sepinien nae xil mikas e di lasa sepinien xil tangan vapet rat nenemien na ngan xil xa latakil kuh ti holesok xil te neketen tangan lakila laluvos xil. ⁱ¹⁹Moletin xil vus latelongeong usili xa xamim mutehur kuh longeongen hos usil Iesu Kristo. Mak, ma nabesi nou holu ve xamim. E ieok bei tangan xamim muhe metisou e rin te holesok xil xa bos, e mumese tevi e rin te holesok xil xa misa. ^{j20}E Hi xa be vatit tomat, navehi ti, ihe tan ni **Temat** e isak ni xamim muleli. Nasis tangan eheien hos na Iesu, Suv nar, iti mi xamim vus. ^k

²¹Timoti xa mapol vituei, xi bit 'bos makoe' nan mi xamim. E Lusias, Tiesen e

Sosipata, xa latbe Siu nggoni nou, latbit 'bos makoe' mi xamim. ^l

²²Inou, Tosias, moletin xa di midis uvei ak e rin na Pol, nasa 'bos makoe' navan mi xamim e his Suv.

²³Nggeas, xa nggur pilei nou e tim san e di maen moletin xil te sias lasukul en, xi mun di bit 'bos makoe' mi xamim. E Erastas, moletin xa di milaxat mani te taon ak, e tua nar Kuotas, xalu mun lubit 'bos makoe' nalu mi xamim. ^{m24}‡‡

Sisen te memesien

²⁵!Ripet rat his Hi ihe nesao! Xi i-ila isak ni xamim musoh ixekh e neketen namim ixo longeongen hos xa di mungguri. Longeongen hos ak usil Iesu Kristo be nenemien xuxus tei na Hi xa teling xuxus ni tetiamu nousav mei duxoh xosali. ⁿ²⁶E taxeak, Hi te vehakut di misemae ni tangan xir rihithiten longeongen hos ak xa di nggo tisen xil na **provet** xil iha mi moletin xil te kantri xil vus tangan likila liling neketen nae en e lilong xati. ^o

²⁷!Ripet rat his Hi ihe nesao vengan xa xi kestang be metisou mak mu! !Rimesi vehakut e his Iesu Kristo! Reitin. ^p

‡‡16:24 Rut vanuvei matu xil te Rom laling sepinien ak xa bit, "Nasis tangan eheien hos na Iesu Kristo, Suv nar, iti mi xamim vus. Reitin."

^h16:17 Mat 7:15; Taet 3:10 ⁱ16:18 Plp 3:19; Kol 2:4; 2Pit 2:3

^j16:19 Rom 1:8; Mat 10:16; 1Kor 14:20 ^k16:20 Sen 3:15; Rom 15:33 ^l16:21

Pol 16:1; 19:22; 20:4; Plp 2:19 ^m16:23 Pol 19:29; 1Kor 1:14; 2Tim 4:20

ⁿ16:25 Efes 1:9; 3:5,9; Kol 1:26 ^o16:26 Rom 1:5 ^p16:27 1Tim 1:17; Siud 1:25

Sepinien xa diamu te

1 Korin

?Visi iaxa tetis uvei ak?

Pol, xa tehe eloheoh tei na Iesu Kristo, iaxa tetis uvei ak^q

?Visi iaxa tevuli uvei ak tetiamu?

Pol tetis sepinien xil ak teha mi Kristin xil xa lateti e taon te hal Korin. Teha rohon mi xil e hram 52 AD^r

Taon te hal Korin tehe taon tei xa tehe eilep xa tuturil xil holu di lateso angka en. Misak ni, moletin xil hao latepol ni bisnis xil holu en. Sangas moletin xil vus te hal Korin di latemot mi hi Apafrodaeti, xa labit tehe hi te eheien. E melele xa moletin xil latemei tangan lamot mini, xil di lateanien vituei e di latepat tetel hoeaso xil xa lateti e nim eo ak.^s

Usil kakaoen na Pol xa tehe vatol nen,^t Melele xa Pol telongeong usil sakpu-runien xil xa Kristin xil e hal Korin di latehisu ni, xi tetis uvei ak mi xil.

?Pol tetis uvei ak veneh?

Pol ien tehei tangan vama ni nene-mien na mol-Korin xil usil visi iaxa momal tangan lavusili - Kristin xil e hal Korin latetipas xil latehe vanute xil e latehusil vat sav xil.^u

Pol ien tehei tangan vama ni nene-mien na mol-Korin xil usil sexien xil xa di lapat vituei tetel atou mu tiramue xil xa latnateli ti vatel xil - Kristin xil e hal Korin di latepat vituei tetel moletin sav xil xa latnateli ti vatel xil nggoni ngan xa latepol ni tetiamu.^v

Pol ien tehei tangan vama ni nene-mien na mol-Korin xil usil naha xa Hi di maen Kristin xil tangan ti lipol ni - Kristin xil e hal Korin di latenemi latehit Hi di maen xil tangan lipol ni holesok xil vus xa iexil bei tangan lapol ni,^w

Pol ien tehei tangan vama ni nene-mien na mol-Korin xil usil sanien xil xa Ninin Eo di misa ni mi Kristin xil, e sexien xa ti lipol itela - Kristin xil e hal Korin latesep koai vengan xa Ninin Eo tesa sanien holu mi xil.^x ma itutou ni xil vus.

Pol ien tehei tangan vama ni nene-mien na mol-Korin xil usil mea rilomunen na Iesu del Kristin xil - Rut Kristin xil e hal Korin labit ngan xil xa lalel lasakras lamea rilomun ra maten.^y

Vatit nenemien tei te uvei ak de 1 Korin 1:10

Tuxoli e hinoxoli xil e neketen, e his Iesu Kristo, Suv nar, nasel xat xamim tangan muti e tomat itel xamim. Reitin, e holesok xil vus xa di mupol ni, mupol vituei ni. E, e holesok xil vus xa di muneket en, nenemien namim ihe tei takes. Sexien te ngongoren e tipasien ihe tovuol e xamim.

^q1:0 1Kor 1:1; 1Kor 16:8-9; Pol 20:31

^r1:0 Pol 18:1-18; Pol 18:11; Pol 18:18; Pol 18:24-26; Pol 18:27-28 ^s1:0 1Kor 8:1-13; 10:14-22; 1Kor 5:1; 6:12-20; 1Kor 1:10-17; 3:1-9 ^t1:0 Pol 18:23-21:16; Pol 19:1-20:1,31

^u1:0 1Kor 1:10-12; 3:3-4; 1Kor 1:13-17; 3:5-11,21-23 ^v1:0 1Kor 6:13; 7:5; 1Kor 6:15-20; 1Kor 5:12-13 ^w1:0 1Kor 6:12; 1Kor 6:13; 1Kor 8:8; 10:25-27; 1Kor 8:7-13; 10:28-30; 1Kor 6:9-11,18-20; 1Kor 6:15; 1Kor 6:19

^x1:0 1Kor 1:4-7; 1Kor 14:39-40; 1Kor 12:1-31; 1Kor 13:1-13; 1Kor 14:26-40

^y1:0 1Kor 15:12; 1Kor 15:1-58

Vatit nenemien tei mun te uvei ak de 1 Korin 6:19-20

Xamim di mupol ni nggoni ngan xa mutakil ti xa tenbemim be Nim Eo, e Ninin Eo xa Hi tesa ni mi xamim da en. Bos tangan mukila xa meulien namim tave namim ti mun. Meulien namim be na Hi. Vengan xi texal rat xamim ni meulien na Natneli xa be neta tei xa eilep pupu. Ma bos tangan mupet rat his Hi ixo holesok xil xa ti mupol ni itel tenbemim.

?Naha iaxa di e uvei ak?

1. Pol pispisi mi xil bit sexien xa di ladi pas xil tamal ti. (1:1–4:21)

2. Pol pispisi mi xil bit sexien xa di lapat vituei del ngan xil xa tave nae xati ti tamal ti. (5:1–6:20)

3. Pol pispisi mi xil usil holesok xil xa latesisi mini.

a) usil sexien te tetelien. (7:1-40)

b) usil sexien xa di ladi lomun labe nim eo na hi sav xil. (8:1–11:1)

c) usil sexien xa di lapol ni e melele xa lamei vituei tangan lamot mi Hi. (11:2–14:40)

d) usil sexien xa Kristin xil limea rilo-mun ra maten. (15:1-58)

e) usil itep iaxa xil livue xat xil tangan lisa tutouen mi Kristin sav xil e hal Serusalem. (16:1-4)

4. Sepinien kor. (16:5-24)

Sepkilaen na Pol usil uvei ak

1 Inou, *Pol*, xa Hi tekes nou tangan mei name *eloheoh* na Iesu Kristo nggusil lingxatien nan, di nadis uvei ak del Sostenis xa be tua tei nar e neketen.

²Di madis uvei ak bat mi xamim xa mube Sias na Hi e hal Korin, xa Hi tepol ni xamim mei mutehe nan texo naha xa Iesu Kristo tepol ni. Reitin, Hi tekes xamim mei mube moletin eo nan xil, nggoni ngan xa tepol ni e meulien na Kristin xil e rute xil vus xa laling neketen nae e Iesu Kristo, Suv nae e Suv nar mun. ^z

³Nasis tangan Hi Tamer e Suv Iesu Kristo lalisa eheien hos e tomat nalu ha iti mi xamim. ^a

Pol misa memesien ve holesok xil xa Hi tepol ni e meulien na Kristin xil e hal Korin

⁴Names Hi vehakut ve xamim vengan xi tepisen eheien hos nan mi xamim xa mubisti del Iesu Kristo. ⁵Reitin, vengan melele xa mutevisti tetela, xamim mei mutepolu ni holesok xil vus te neketen texo suse xa Hi temaen xamim mei mutekil sepinien nan e mukila muvithiteni mi mosav xil. ⁶Texo suse ak, longeongen hos na Iesu Kristo xa xamem matehiteni mi xamim mei tehur huite e meulien namim tangan mosav xil lak-ila lapus kila. ⁷Reitin, xamim mutave tamure ni ti sanien te xeih xa Ninin Eo di misa ni. E di mupol nggeih del sanien xil ak melele xa di mudatil melengien xa Hi isak ni Iesu Kristo, Suv nar, mei istal en. ^{b8}Hi isa xeihen mi xamim tangan musoh ixeh e neketen namim ituxoh melele xa Iesu Kristo itilomun en. Xi ipol ni imak tangan melele xa ilepis moletin xil, nakamet ti neta xa nasa e rin namim. ^{c9}Hi pipin tangan muling nenesien namim en. E xi iaxa tekes xamim tangan muvisti vatel Natneli, xa be Iesu Kristo, Suv nar. ^d

^z1:2 1Kor 6:11; Pol 9:14; 18:1 ^a1:3 Rom 1:7

^b1:7 Luk 17:30; 2Tes 1:7; Taet 2:13 ^c1:8 Plp 1:6; 1Tes 3:13; 5:23

^d1:9 Dut 7:9; 1Kor 10:13; 1Tes 5:24; 1Sion 1:3

**Pispisien tangan Kristin xil linati pas
xil ti e midep iaxa longeongen
hos usil Iesu Kristo misav ni
sepinien sav xil te ut etan**

¹⁰Tuxoli e hinoxoli xil e neketen, e his Iesu Kristo, Suv nar, nasel xat xamim tangan muti e tomat itel xamim. Reitin, e holesok xil vus xa di mupol ni, mupol vituei ni. E, e holesok xil vus xa di muneket en, nenemien namim ihe tei takes. Sexien te ngongoren e tipasien ihe tovuol e xamim. ^{e11}Di nabiteni mak venggan xa natehur longeongen texo ngan xil e nim ma Kloe xa xamim, tuxoli e hinoxoli xil, di mungor del xamim mun tang. ¹²Reitin, natelongoeng ni xa xamim di mudipas xamim. Rut xamim labit, “Xamem di manggusil xat Pol.” E rute sav xil di labit, “Xamem di manggusil xat Apolos.” E rute ngan xil mun labit, “Xamem di manggusil xat Pita.” E rut xamim mun tang di labit, “Xamem di manggusil xat Kristo.” ^{f13}?!Midep, xamim munemi mubit mukila mutipas tenbe Iesu Kristo vamak!? ?Midep? ?Tehe inou, Pol, iaxa natemat e eivave ve rin namim? ?Latebaptaes ni xamim e hisok tangan mei muve moletin navan xil? !E-e, tenamak ti!

¹⁴Melele xa natelongoeng ni rin ak, natemes Hi xa natnabaptaes ni xamim ti vahe holu. Natepol ni tang mi Krispas tetel Ngeas. ^{g15}Natehesi nou ve rin xa tovuol e xamim vahiteni xa natebaptaes ni e hisok. ¹⁶O reitin li, ieok tebong ni xa natebaptaes ni Stefanas tetel ngenen xil. E natanem ti mun visi tova e xamim xa natebaptaes ni. ^{h17}Vengan melele xa Iesu Kristo tesil nou, tenave ti tangan ha ti nabaptaes ni moletin xil. E-e. Xi tesil

nou tangan namit longeongen hos usili. E nataviteni ti vahusil metisouen na moletin xil. Vengan tavos ti xosxa moletin xil ti laling nenesien nae e sepinien hos xil navan, e linaling nenesien nae ti e xeihen xa nggo maten na Iesu Kristo e eivave. ⁱ

**Metisouen na Hi tahusil ti metisouen
na moletin xil te ut etan**

¹⁸Natnasa sepinien navan ti vaxo metisouen na moletin xil, vengan melele xa ngan xil xa langgusil suse te maten di lalong longeongen usil maten na Kristo e eivave, xil labiteni labit, “Sepinien ak mitalang tang.” ^j

E melele xa xir di ralong usil longeongen hos ak, di rabiteni rabbit, “Sepinien ak di pisen xeihen na Hi.” Vengan nggo en, Hi di miteh meulien e xir ra longpangasien te tesaen nar.

¹⁹Nggoni ngan xa Vanuvei Eo di biteni bit, “*Nimu len metisouen na ngan xil xa labe metisou,*

e nisak ni kilakilen na ngan xil lakilakil mei ihe neta sav tang.” (Aes 29:14)

²⁰?Mak, ma itep ni ngan xil xa labit labe metisou? ?Mu ngan xil xa labit langgur kilakilen? ?Mu ngan xil xa, taxeak, iexil bei pupu tangan ti lasep usil holesok xil holu te ut etan tang? Hi kestang di misak ni metisouen xil vus na hisit moletin xil ak te ut etan mei be te talangen tang. ^{k21}Ngan ak be reitin venggan Hi xa be metisou tepol ni moletin xil te ut etan ak lasakras lakameti vaxo hisit metisouen nae. E-e, Hi tepol ni tangan sepinien namem, xa xil labit be te talangen tang, mei ihe suse xa iteh meulien e

^e1:10 Plp 2:2 ^f1:12 1Kor 3:4; Sion 1:42; Pol 18:24-28

^g1:14 Pol 18:8; Rom 16:23; Pol 19:29 ^h1:16 1Kor 16:15 ⁱ1:17 Mat 28:19; Sion 4:2 ^j1:18 2Kor 4:3; Rom 1:16 ^k1:20 Siob 12:7; Aes 19:12; 33:18; 44:25

moletin xil xa mei laneket e Iesu Kristo nggo en.¹

²²Io, lateong ni nggoni ngan xa sepinien namem be te talangen tang. Vengan **Siu** xil iexil bei tangan lipus merekel xil tangan like reitin e neta ngan, e ngan xil xa latave Siu xil ti iexil bei tangan lilong sepinien te metisouen tangan like reitin en. ^{m23}E xamem, melele xa mabithiten naha xa Iesu Kristo tepol ni ve xamem e melele xa lateti xati e eivave, Siu xil latake reitin ti en, vengam tamal ti e nenemien nae. E ngan xil mun xa latave Siu xil ti latake reitin ti en, vengam lanemi labit be te talangen tang. ⁿ²⁴E mi ngan xil xa Hi tekes xil, tave ti neta xa labe Siu mu latave Siu xil ti, longeongen hos usil Kristo di pisen xeihen e metisouen na Hi. ^{o25}Vengan naha xa lanemi labit di pisen talangen na Hi, ngan ak iaxa di pisen ni xa Hi be metisou pilei mili moletin xil te ut etan. E naha xa di pisen merouen na Hi, ngan ak di pisen ni xa Hi nggeih pilei sung mili xeihen na moletin xil vus. ^p

²⁶Tuxoli e hinoxoli xil, munem pisi mu usil nenemien ak. ?Muteti tetep melele xa Hi tekes xamim tangan mei muve nan? E nenemien na moletin xil te ut etan, tave holu ti e xamim xa mutehe metisou, mu muvur xeihen, mu muve eilep xil. Xamim holu mube movotei xil tang. ^{q27}E Hi tehosei xamim xa mube talang tang pe met moletin xil te ut etan mei mube nan, tangan vasak ni ngan xil xa labe metisou mei lave unoun ni. E Hi tehosei ngan xil xa latahur ti xeihen e ut etan tangan vasak ni ngan xil xa langgur xeihen e ut etan mei lave unoun ni.

²⁸Reitin, Hi tehosei movotei xil tang xa moletin sav xil di lapus mele ni xil e di lanemi labit labe neta sav tang. Di pol ni mak tangan vasak ni eilep xil te ut etan mei vahe neta sav tang. ²⁹Mak, ma moletin tovuol mikila vasep koai tasen ni xi pe met Hi. ^{r30}Vengan Hi kestang iaxa tesak ni xamim mei mubisti del Iesu Kristo. Ma Iesu sung, xi mei be metisouen e momalen nar. Xi kestang iaxa texal rat xir rabe nan e misak ni xir mei rabe eo e ramese ra tesaen nar xil. ^{s31}Mak, ma nggoni ngan xa Vanuvei Eo biteni bit, "*Tei xa ien bei vasep koai, ti isep koai ve neta xil kestang xa Iahova di pol ni.*" (Ser 9:24)

Hi pisen ni xa sepinien na Pol be reitin nggo xeihen na Ninin Eo

2 Tuxoli e hinoxoli xil e neketen, melele xa natemei visal xamim tangan namit rat nenemien xusus na Hi xa tepisen ni minou, [¶]natnamei ti vatel sepinien xil xa mikas tangan nalihi moletin xil ni, mu sepinien te metisouen te ut etan. ^{t2}E-e, melele xa natete visal xamim, natepol ni nenemien navan tangan nisepin usil Iesu Kristo kestang, e tetep iaxa temat e eivave tehinat xir. Reitin, nateling nenemien navan tangan ninasepin ni ti mun neta. ^{u3}E melele xa nateta tetel xat xamim, natelonge texoni ngan xa natemerou tang e natemalili pupu ve ulikanen. ^{v4}Pispisien e sepinien xil xa natesa ni mi xamim, natnaviteni ti vatel sepinien hos te metisouen xil te ut etan. E-e. Melele xa natesepin, mutekila xa tehe reitin vengam mutepus kila xa **Ninin** na Hi di tepol tetel xeihen

^{¶¶}**2:1** Efes 1:9-10 di bit kil nenemien xusus na Hi tangan ileh viton holesok xil vus xa di ut nesao e ut etan, e iling Kristo vari iaxa ihe vat teni.

¹**1:21** Mat 11:25 ^m**1:22** Mat 12:38; Sion 4:48; Pol 17:18,32 ⁿ**1:23** Rom 9:32; 1Kor 2:14 ^o**1:24** Kol 2:3 ^p**1:25** 2Kor 13:4 ^q**1:26** Mat 11:25; Sion 7:48; Tem 2:1-5 ^r**1:29** Rom 3:27; Efes 2:9 ^s**1:30** Ser 23:5-6; Sion 17:19; 2Kor 5:21
^t**2:1** 1Kor 1:17 ^u**2:2** Kal 6:14 ^v**2:3** Pol 18:9; 2Kor 10:1

hen. ^{w5} Natepol ni temak tangan neketen namim nati ti e metisouen na moletin xil te ut etan. !E-e! Neketen namim vati e xeihen na Hi kestang.

Metisouen na Hi bemei nggo Ninin nan

⁶E mi Kristin xil xa neketen nae matu ngamu, naha xa xamem mabiteni be sepinien xil te metisouen. Sepinien namem taxo ti metisouen te xosali ak, e taxo ti moletin xil te ut etan xa latellep, vengan Hi di pol ni xeihen nae mei be neta sav tang. ^{x7}E metisouen xa di mabithiteni be nenemien xuxus na Hi, xa tesoson ni ra moletin xil. Reitin, teti-
amu ni melele xa Hi tepeas ni ut etan, xi tepol ni nenemien nan tangan ipol ihos mi xir usil suse te metisouen nan. ^{y8}E moletin xil xa latellep te ut etan latakil ti nenemien na Hi. Vengan vahit lakila, ma linati xat Suv te minehinen nar ti nate eivave. ^{z9}E xil latakil ti nggoni ngan xa Vanuvei Eo biteni bit,
“Ngan xa latnapus ti mu,
ngan xa latnateong ti mu,
ngan xa latnanem ti mu usili
ngan ak be neta vari xa Hi tesak mese ni ngamu
ve ngan xil xa eheien nae di en.” (Aes 64:4)
a

¹⁰E mi xir, Hi tepisen nenemien xuxus nan texo Ninin nan. Vengan Ninin nan di pus kil holesok xil vus, e mikil holesok xil vus mun xa di e huinep te kilakilen na Hi xa moletin xil lasakras lakila. ^{b11}Nggoni rin taxa ninin na moletin kestang mikil nenemien xil vus nan, Ninin na Hi kestang mikil nenemien xil vus na Hi. ^{c12}Xir ratnahur ti ninin xa be te ut etan. !E-e! Xir ratehur Ninin xa Hi tesa ni ten-

gan xir rikil sanien hos xil xa Hi di misa ni mi xir, e holesok xil xa xi di pol ni e rin nar. ^d

¹³Mak, ma melele xa xamem di masepin usil holesok xil ak, matasepin ni ti sepinien xil xa moletin xil tang te ut etan latepispisi ni mi xamem texo metisouen nae. !E-e! Mi moletin xil xa Ninin na Hi di e xil, xamem di mapispisi ni mi xil usil holesok xil xa Ninin di misa ni mi xamem. ^{e14}E moletin xa Ninin na Hi tara ti en, xi bit nalong ti holesok xil xa nggo visal Ninin na Hi. Hisit moletin ak misakras wakil holesok xil ak. Milonge nggoni ngan xa be sepinien te talangen tang, vengan Ninin Eo kestang mikila vasep kil reitinen teni e nenemien nan. ^{f15}Xir xa Ninin na Hi di e xir, xir rakila rapus kil holesok xil vus xa Ninin di pisen ni mi xir. E moletin xa Ninin na Hi tara ti en, xi misakras vanem kil xir. ^{g16}Xi misakras vanem kila nggoni ngan xa Vanuvei Eo biteni bit,
“Moletin tovuol wakil kuh nenemien na Iahova.

Moletin misakras vapispisi mini.” (Aes 40:13) ^h

E xir, Kristin xil, iaxa rakila vengan xa ranggur nenemien na Kristo de xir.

Sexien te tipasien ihe tovuol e Sias na Iesu Kristo

3 Tuxoli e hinoxoli xil, melele xa natete visal xamim, natesakras nasepin mi xamim vaxoni ngan xa namit namiteni mi moletin xil xa Ninin Eo de xil. E-e. Natesepin mi xamim texoni ngan xa mube te ut etan tang. Reitin, natesepin mi xamim texoni ngan xa mutehe xil tamu e neketen namim e Kristo. ⁱ²Melele xa natepispisi mi

^{w2:4} 1Tes 1:5 ^{x2:6} Efes 4:13; Plp 3:15 ^{y2:7} Rom 16:25; Kol 1:26 ^{z2:8} Luk 23:34; Tem 2:1 ^{a2:9} Aes 52:15 ^{b2:10} Mat 13:11 ^{c2:11} Pro 20:27
^{d2:12} Sion 16:13-14 ^{e2:13} 1Kor 2:4 ^{f2:14} Sion 8:47; 14:17; 1Kor 1:23
^{g2:15} 1Sion 2:20 ^{h2:16} Rom 11:34 ^{i3:1} Sion 16:12

xamim, natesa pispisien xil xa tehe teme le tang mi xamim tangan muvuri nggoni ngan xa nana tei di misa sus mi tuvava nan. Io, nggoni tuvava xil xa lasakras lava anien xil xa nggeih, inou natnapispisi ti mi xamim usil holesok xil xa nggeih vengan xa natekila xa xamim mutnamatu kuhi ti mu e neketen namim. j

E taxeak mun, neketen namim tamatu kuhi ti mu tangan muvur pispisien xil xa nggeih. ³E nabiteni mak vengan xa sexien namim xil nggoni sexien xil na molet in xil te ut etan tamu. Reitin, melele xa di munem misa e di mungor mi xamim mun tang, sexien ak di pisen ni xa mube molet in te ut etan tang, vengan di munggulil sexien teni xil. ^{k4}Vengan melele xa tei xamim bit, "Inou di nanggulil **Pol**," e tei mun bit, "Inou di nanggulil Apolos," hisit sexien ak di pisen ni xa xamim mube molet in xil te ut etan tang. ¹

⁵?Munemi midep? ?Apolos be visi? ?E inou, Pol, nabe visi? Xamel mabe molet in te polien na Hi tang xa mate tel xamim tangan muvur neketen e Iesu Kristo. Xamel dit mapol ni polien xa Suv di misa ni mi xamel. ^{m6}Ngan ak nggoni ngan xa natemei tangan nalih utiei te neketen e meulien namim. E Apolos xa teme i tetutou ni nou, xi texoni molet in xa tekas tutut vatiei ak ni oei. E Hi kestang iaxa mikila vapol ni neketen namim vameul mei vahe eilep. ⁿ⁷Ngan xa telihi e ngan tekasi, xalu vus lube neta sav tang. E Hi kestang iaxa be eilep, veng an xi kestang tepol ni utiei te neketen namim temeul. ⁸Ngan xa telihi e ngan xa tekasi, lupol nggulil nenemien tei takes.

E Hi isa huit polien mi xalu vus ihusil polien xa xalu lutepol kekes ni. ^{9o}

E vole tei mun, xamim mube nim na Hi mun. ¹⁰E inou, nanggoni molet in xa mikila vapol kuhi ni nim xil. Tetel meti souen xa Hi tesa ni minou ve eheien hos nan, texoni ngan xa natemei natepol ni vatite te nim ak. E molet in te polien sav xil late mei e latekili ni nim tesoh e naha xa inou natepol ni. E xamem kekes, molet in xil te polien, ixuxou kuhi xa ti ikili ni nim ak itep. ^{p11}E vatite te neketen namim xa nateling xati tuei be Iesu Kristo. E molet in sav ti mun naling vatite sav nata xati. ^{q12}Rut molet in te polien xil lakili ni nim te neketen namim da xat vatite ak del pispisien hos xil xa nggeih nggoni gol, silva mu hat xil xa bos. E rute ngan xil lakili ni nim del pispisien xil xa teme le tang nggoni vatit hinu, rong e robae. ^{13r14}E xosxa upang naxa len nim ti xa molet in tei tekili ni tesoh e vatite xiak, xi ihur huit polien teni. ¹⁵E xosxa upang ia len nim xa tepol ni, polien nan xil vus ikesae relingi. Be reitin xa Hi iteh meulien en, e ixoni ngan xa molet in milesae hon tang ra nim xa upang di ngga ni.

¹⁶Bos xa xamim mukila xa mube **Nim Eo** na Hi, e **Ninin** nan di e meulien namim. ^{s17}Mak, ma xosxa molet in tei bemei tangan vapurun Nim Eo na Hi vatel pispisien nan xa tave reitin ti, Hi ipurun molet in ak vengan xa Nim nan be eo. E xamim, mube Nim Eo nan ak.

¹⁸Munaluvos xamim ti mun tang. Rute e xamim lanemi labit labe metisou nggulil metisouen na molet in xil te ut etan. E vahos mak mu vahit mei lave talang tang pe met ngan xil te ut etan tangan mei lave metisou ni holesok xil te ut ne-

j3:2 Hib 5:12-13; 1Pit 2:2 ^{k3:3} 1Kor 1:10-11; 11:18 ^{l3:4} 1Kor 1:12

^{m3:5} Pol 18:24,27 ^{n3:6} Pol 18:4,11; 18:24-28 ^{o3:9} Efes 2:20; Mat 13:3-9; Efes

2:20 ^{p3:10} 1Kor 15:10; 2Pit 3:15 ^{q3:11} Aes 28:16; 1Pit 2:4-6

^{r3:13} 1Kor 15:10; 1Kor 4:5; 2Tes 1:7-10 ^{s3:16} 1Kor 6:19; 2Kor 6:16

sao pe met Hi. ¹⁹Vengan naha xa moletin xil te ut etan di lanemi labit be metisou, ngan ak be te talangen tang pe met Hi. Ngan ak nggoni naha xa Vanuvei Eo biteni bit,

“Moletin xa minemi bit metisouen nan mahulong,

Hi misak ni sepinien te metisouen nan mei ihe voh tei xa ivoh xol xi tasen ni.”

(Siob 5:13)

²⁰E Vanuvei Eo biteni mun bit,

“Tave ti neta xa moletin xil di lanemi labit metisouen nae mahulong,

Hi Suv mikila xa nenemien nae be neta sav tang.” *(Sam 94:11)*

²¹Mak, ma xamim munasep koai ti munahit moletin xa di munggusili be eilep mak mu mili eilep sav xil. Vengan Hi misa xil vus tangan mei latutou ni xamim. ²²Hi tesa inou, Apolos, e Pita mi xamim tangan mei matutou ni xamim, e xamemel matnggoni holesok sav xil mun te ut etan xa Hi di misa ni tangan vatutou ni xamim. Reitin, tave ti neta xosxa mumeul mu mulel, naha xa istal e meulien namim xosali mu melengien xil xa ti imei, Hi isak ni holesok xil ak mei ti itutou ni xamim. ²³E naha xa be eilep mak mu, xamim mube moletin xil na Iesu kestang, e Iesu be na Hi.

Selxatien tangan rinalepis moletin xil ti nahusil nenemien xil te ut etan

4 Misak ni, melele xa di munem usil xamem, mukil kuhi xa xamem mabe moletin xil te polien na Iesu Kristo, e Hi tesa nenemien xuxus nan mi xamem tangan ti mulaxati. ²E be eilep mak mu xa melele xa suv tei miling neta tei de he moletin te polien nan tangan valaxati, moletin te polien ak ipol kuhi itela. ¹³Inou di napol mi Iesu Kristo, e nabit ninakil ti xosxa xamim mu mosav xil te

ut etan mubit mulepis polien navan tangan mukameti xa momal pe metemim. Reitin, tave ti neta xosxa inou tasok di nalepis rin navan. ⁴Melele xa nanem usil polien navan xil, nenemien navan xil memese. E ngan ak tapisen ni ti xa inou namease reitin. Suv kestang di milepis nou del polien navan xil. ¹⁵Mak, ma munatemanon ti munahit polien na moletin ak bos e na ngan xor misa tang. Bos mak mu tangan mutatil melengien xa momal teni e melele xa Iesu Kristo itilomun en. Vengan, e melele nen ak, xi ital rat holesok xil xa di langgus e maluxoluken mei liti e miehen. E xi ipisen kil naha xa minggus de nenemien na moletin xil tangan mei iti e valkesao. Ti, Hi isa sepinien te memesien mi moletin xil kekes ihusil naha xa tepol ni. ^v

⁶Tuxoli e hinoxoli xil, nabit holesok xil ak mi xamim tangan vatutou ni nenemien namim usil Apolos e inou. Xosxa muhusil xat kuh naha xa latetis xati di Vanuvei Eo e mutasorin ni ti nenemien xil mun vata xati, ma munasep koai usil vat tei ti nali vat sav. ^{w7}?Veneh ma di mupus xamim nggoni ngan xa mubos mak mu mili Kristin tesav xil? ?Naha tova iaxa mungguri xa tastal ti vaxo Hi? !Holesok xil vus namim nggo Hi! ?E xosxa Hi tesa holesok xil vus mi xamim, veneh ma di musep koai nggoni ngan xa mungguri nggo xeihen namim tang? ^x

⁸?Midep? ?Be reitin xa muleh holesok xil vus xa iemim bei? ?Be reitin xa xamim mupolu ni sanien xil vus xa Ninin Eo di misa ni? ?Be reitin xa xamim mei mube suv toto xil ngamu pe met Hi, e di mulaxat holesok xil vus te ut etan? ?Be reitin xa xamim mei mutehe suv toto xil pe met Hi texo xeihen namim tang e tenaxo tutouen namem ti? !E-e, tave reitin ti! Vahos pupu xosxa vahe re-

^{t4:2} Luk 12:42

^{u4:4} Sam 143:2

^{v4:5} 1Kor 3:8

^{w4:6} Rom 12:3

^{x4:7} Rom 12:6

itin xa mei mutehe suv toto xil ngamu. Vahit vamak, xamem mun makila mei mave suv toto xil e malaxat holesok xil te ut etan vatel xamim. ^{y9z10}O reitin, e nenemien namim, xamim te hal Korin, mubos mak mu muli xamem eloheoh xil. Munemi mubit xamem mata-lang tang, e xamim mube metisou. Munemi mubit xamem mamerou tang, e xamim munggeih mak mu muli xamem. Munemi mubit moletin xil di lanem male ni xamem tang, e di lamerere ni xamim. E tavos ti xa di muling nenemien namim be nesao mak. ^{a11}Vengan, e meulien namem, eloheoh xil, duxoh xosali ak, mae e meruru di nggat xamem. Masing ni eising xil xa mumu tang e tim samem tovuol. Mosav xil di labas purun xamem, ^{b12}e xamem di mabas xamem mun tang ni polien. Melele xa lasep purun xamem, masis mi Hi tangan ituxol xat xil. Melele xa lasa pangasien mi xamem, mangguri tang. ^{c13}Melele xa laseputut ni xamem, masepin kuhi mi xil. Xamem mei mabe tisok tang pe met moletin xil te ut etan. Reitin, taxeak e vehakut, mapuru tang pe metemim. ^d

**Pol misel xat mol-Korin xil
vengan ien bei xil nggoni ngan
xa labe horamue nan xil**

¹⁴Nadis sepinien te selxatien ak mi xamim tave tangan ti xa napol ni xamim muve unoun. E-e. E ieok bei tangan nasel xat xamim vaxoni ngan xa mube navan xil xa eheien navan di e xamim. ¹⁵Vengan, tave ti neta xosxa titsa taosen he xalu (10,000) latepispisi mi xamim usil Kristo, tamemim tei takes. Vengan, melele xa xamim mutehur rohon ni

meulien hu e Iesu Kristo texo longeon-gen hos xa natesa ni mi xamim, inou iaxa mei natehe tamemim. ^{e16}Mak, ma nadakes xamim tangan muhusil Kristo ixo hisit sexien xa inou mun di napol ni. ^f

¹⁷Tangan nitutou ni xamim muhusil selxatien navan xil ak, di nasil Timoti bat visal xamim. Eheien e nenesien navan di en nggoni ngan xa be navan xati xa be reitin minou vehakut. Xi ihit rilomun ni mi xamim usil kakaoen navan e Iesu Kristo. Vengan xa kakaoen navan momal tang ni naha xa di napolisi ni e sias xil e ut xil vus. ^{g18}E rut xamim di lasep koai vengan lanemi labit nasakras namaat napus ti mun xamim. ¹⁹E xosxa Suv imaen ni, nave nousav ti, nihat visal xamim. E melele nen ak, nipus ti sung xa be reitin xa valkoai xil ak di lapol del xeihen na Hi, mu dit lasepin votei tang. ^{h20}Vengan melele xa Hi mei be suv toto na vanut moletin tei, latapisen ni ti vaxo sepinien nae kestang. E-e, tamak ti. Di lapien ni nggo xeihen e sexien nae xil. ⁱ²¹?Iemim bei tangan nipisen sexien eah melele xa nihat visal xamim? Xosxa di tamu musep koai mak, ma nihat itel liei tangan nimal ni xamim ni. E xosxa muhiles ra sepkoaien namim, ma nihat itel eheien e nipol ni ihos mi xamim.

**Selxatien tangan vat xil te sias limal
ni Kristin tei tangan lisak ni Sias
na Iesu Kristo imese tevi**

5 Inou nalongeong ni xa tei e xamim di pat vituei nggusil nenemien tesa tei xa misa pilei mak mili sexien xa ngan xil xa latakil ti Hi di lapol ni. Vengan xi di pat vituei del atou xa tamen xati

^{y4:8} Rev 3:17; 3:21 ^{z4:9} 2Kor 2:14; Rom 8:36; Hib 10:33

^{a4:10} 1Kor 3:18 ^{b4:11} 2Kor 11:23-27 ^{c4:12} Pol 18:3; 20:34; 1Tes 2:9; 2Tes 3:8; 1Kor 9:14-15; Sam 109:28; Mat 5:44; Luk 6:28; Pol 7:60; Rom 12:14

^{d4:13} Tang 3:45 ^{e4:15} Kal 4:19 ^{f4:16} 1Kor 11:1; Plp 3:17; 1Tes 1:6

^{g4:17} Pol 19:22; Plp 2:19-22 ^{h4:19} Pol 18:21; Tem 4:15 ^{i4:20} 1Kor 2:4

tehuri tetutou. ^{j2}?Xosxa sexien ak be reitin, ma veneh iaxa di musep koai usil rin namim? Vahos pupu vahit mulonge vasa ve sexien tesa xa moletin ak di pol ni, e musil rati ra sias namim.

³Tave ti neta xa nade sotin ra xamim, e nenemien navan, nadat visal xamim. Mak, ma nasa nenemien navan ngamu usil moletin xa di pol ni sexien tesa ak. ^{k4}Misak ni, melele xa mumei vituei tangan mulepis rin na moletin ak, musa pangasien mini ihusil nenemien navan xil e itel xeihen na Iesu Kristo, Suv nar. ⁵Musil rat moletin ak ra sias namim tangan ha ita ti mu e he **Temat**. Xos long-pangasien xa ihuri isak ni istokovein sexien tesa te tenben. Imak, ma Hi iteh meulien e ninin nan melele xa Suv itilomun en. ¹

⁶Melele xa di musep koai usil rin namim e di mumaen tesaen xil ak di e sias namim, ma rin ak tamal ti. Vengan sepinien ak be reitin xa bit, “Supun is tei takes tang di misak ni pulaoa xil vus mikaio.” ^{m7}Mak, ma mupol ni ixoni ngan xa Siu xil di lapol ni e melele te **Anien te Tavien**. ⁸⁸E melele nen ak, xil di laleh rerat is xil vus ra tim sae xil tangan lia beret xa imese tevi xa is tovuol en. Nggusil sexien nen tak, xamim mumoten xamim ra tesaen xil namim tangan mei mumese tevi. E melele nen ak mun, Siu xil di labas sipsip xil tangan Hi vateh meulien e xil. Nggusil sexien nen tak, Kristo mei nggoni sipsip sar, e latehasi ngamu ve rin nar tangan vateh meulien e xir. ⁿ⁸Ve rin ak, e meulien nar, nggoni ngan xa di rapol ni Anien te Tavien del sien. E rixuxou kuhi tangan rinapol ni ti

^{§§5:7} Pasova

natel is te tesaen, xa be sexien te ekaten e sexien xil xa mikavui. E-e, ripol ni itel beret xa is tovuol en ixoni ngan xa xir ramese kuhi e di ranggusil xat reitinen. ^o

⁹E uvei xa natetisi mi xamim ngamu, natehiteni mi xamim tangan munavituei ti natel moletin xil xa di lapat del mosav xil xa latateli ti mu vatel xil. ^{p10}Natesep usil ngan xil te Sias tang. Natavitieni ti namit munavituei ti natel ngan xil xa latakil ti Hi xa di lapol misa del tenbexil, mu di labe hokan, mu di lakan ni holesok xil, mu di lamot mi nanao xil. Musakras, vengan xosxa imak, ma ha muhe reling moletin xil vus te ut etan. ¹¹Koute te sepinien xa natetisi mak, munaha ti sangas visal ngan xil xa labit labe tua namim e neketen e di lapol misa ni tenbexil del mosav xil, labe hokan, di lakan ni holesok xil, labe vat munien, di laseputut, mu di lamot mi nanao xil. Hisit moletin ak, munamaen ni ti tangan mei navituei natel xamim, e naanien ti natel xamim. ^{q12-13}Vengan, ngan xil xa ladi se ra sias, nave inou ti iaxa nilepis rin te meulien nae. Hi kestang ipol ni mi xil. E ngan xil xa ladi e sias namim, momal tang tangan mulepis rin nae ixoni naha xa Vanuvei Eo di biteni bit, “*Muso rat moletin tesa ihe reling xamim.*” (Sen 17:7)^f

Selxatien tangan Kristin xil linalihi Kristin sav xil ti linave von koten

6 Xosxa tei e xamim minemi bit tua tei nan e neketen pol misa mini, tamal ti tangan valihi vahe von koten na ngan xil xa latakil ti Hi. Ihos mak mu xa ilih iha mi moletin xil na Hi tangan li-

^{j5:1} Lev 18:7-8; Dut 22:30; 27:20

^{k5:3} Kol 2:5; Mat 16:19; 18:18; 2Kor 13:10 ^{l5:5} 1Tim 1:20; 1Pit 4:6

^{m5:6} Kal 5:9 ^{n5:7} Eks 13:7; 12:21; Aes 53:7; 1Pit 1:19 ^{o5:8} Eks 12:3-20; 13:7;

Dut 16:3 ^{p5:9} Mat 18:17; 2Tes 3:14 ^{q5:11} 2Tes 3:6; Taet 3:10; 2Sion 1:10

^{r5:12-13} Mak 4:11; Dut 17:7; 19:19; 22:21,24; 24:7

mal ni. ²E rin te lepisien, ihos mak mu xa mukil rin ak. Melengien tei di be-mei xa moletin na Hi xil ti lilepis rin na moletin xil vus te ut etan. ?E xosxa ngan ak be reitin, veneh ma, xosali ak, mutahur ti metisouen vapin tangan mumal ni tutut ngongoren namim? ^{s3}E rin nen tei mun, xir ti rilepis rin na **max-axa** xil mun. Mak, ma tutut vaeen xil xa tereli pupu e ut etan ak, bos tangan rimal ni. ⁴?E melele xa neta tei mistal mi xamim Kristin xil, veneh ma di muba mi ngan xil xa latave Kristin ti xa ladi se ra Sias tangan xil lalepis rin namim? !Sexien ak tavos ti! ⁵Nabiteni mak tangan muve unoun ni. ?Midep, be reitin xa tovuol e xamim, Kristin xil e hal Korin, vahur metisouen vapin tangan vama ni tutut ngongoren namim? ⁶E xamim di munggsuil sexien ak: Kristin tei di mil-ihhi Kristin tei mun lube kot, e lumaen ngan xil xa latakil ti Hi tangan lamal ni rin nalu. !Sexien ak tamal ti vari!

⁷Tavos ti tangan ti mulihi xamim mun tang muve kot. Sexien ak di pisen ni xa xamim mumot ngamu e neketen namim. Vahos mak mu vahit iemim vabovorong ni rin namim. Vahos mak mu vahit moletin tei xa tepol tesa mi xamim mu tekan ni neta namim, munalihhi ti nave kot. ¹⁸E xamim, sexien namim xil misav. Xamim di mupol misa e di mukan ni neta ngan ra mosav, tave ti neta xa xil labe tua namim xil e neketen.

⁹Mupol ni nggoni ngan xa mutakil ti xa ngan xil xa di lapol misa mak lasakras lave rute xa Hi be suv toto en. !Xamim di muluvos xamim mun tang! Ngan xil xa di lapol misa del mosav ni tenbexil, mu di lamot mi nanao xil, mu di laleh atou mu tiramue na mosav xil, mu di langgur mani nggo tenbexil, mu tiramue

xa di pat del tiramue sav; hisit moletin xil ak lasakras lava lati e rute xa Hi be suv toto en. ^{u10}Reitin, ngan xil xa di lakan, mu labe hokan, mu labe vat munien, mu di laseputut ni mosav xil, mu labas moletin tangan lakan ni holesok nan: tovuol e xil mikila vaha vate rute xa Hi be suv toto en. ¹¹E tetiamu, rut xamim di latepol ni sexien tesa xil ak. E Hi tekas moten meulien namim e teho-sei xamim ra mosav xil tangan mei muhe nan xati. Ve naha xa Iesu Kristo xa be Suv nar tepol ni, Hi tepol ni xamim mei mutemal pe meten texo xeihen na **Ninin Eo** nan. ^v

Selxatien tangan Kristin xil ti lipet rat his Hi itel meulien tevi nae

¹²Natelongeong ni xa rut xamim di labit, “Hi maen xamem tangan mapol ni holesok xil vus.” Ngan ak be reitin, e rut holesok xil ak tavos ni xamim ti. Inou mun nakila namiteni namit, “Hi maen inou tangan ha nipol ni holesok xil vus.” E natamaen ni ti neta mei vahe eilep mak mu vali Kristo e meulien navan. ^{w13}Rut xamim mun di labiteni labit, “Hi tepol ni anien te vangexir, e tepol ni vangexir te anien.” Ngan ak mun be reitin. E, e melele xa ti imei xa rihur tenbexir hu, anien e vang moletin ihe tovuol e linaxanien ti mun. E nggsuil hisit nene-mien ak tang, rut xamim di lanemi labit Hi tepol ni tenbexir tangan rapat vatel mosav xil tangan ralonge vahos ni, tave ti neta xosxa latave nar xati ti. E ngan ak tave reitin ti, vengon Hi tenasa tenbexir ti mi xir tangan ti rapol vasa vatela. Hi tesa tenbexir tangan rapat rat his Suv itela, e xi be Suv te tenbexir. ^{x14}Mak, ma ripol ihos itel tenbexir vengon Hi isak ni tenbexir limea rilomun ra maten itel xei-

^{s6:2} Dan 7:22; Luk 22:30; Rev 3:21; 20:12-15

^{t6:7} Mat 5:39; 1Tes 5:15; 1Pit 3:9 ^{u6:9} Kal 5:19-21; Efes 5:5; Rev 22:15

^{v6:11} Taet 3:3-7 ^{w6:12} 1Kor 10:23 ^{x6:13} 1Tes 4:3-5

hen nan. Reitin, isak ni limea rilomun ixoni ngan xa tepol ni tenbe Suv Iesu temea rilomun ra maten. ^y

¹⁵Xamim di mupol ni sexien xil nggoni ngan xa mutakil ti xa tenbemim be rut tenbe Iesu Kristo. ?Munemi mubit momal xa di mubistin tenbe Iesu del tenbe hoeaso xa di nggur mani nggo en? !E-e, ngan ak tamal ti! ^{z16}?Midep, mutakil ti xa moletin xa maen xi tangan vahisti vatel hoeaso tei, xalu mei lalihe tei takes? Ngan ak be reitin, vengan xa Vanuvei Eo biteni bit, “*Melele xa tiramue ihisti itel atou nan, xalu lalihe tei takes.*” (Sen 2:24) ^{a17}E rin tei mun, moletin xa bisti del Suv Iesu, ninin nan del Ninin na Suv mei lube tei takes. ^b

¹⁸Mak, ma melele xa di mupus mesal tei tangan mupol vasa ni tenbemim vatel moletin sav, mulesae relingi. Vengan melele xa mupol ni *tesaen* sav xil, mupurun xamim e hale. E melele xa mupol ni tesaen nggo tenbemim del mosav xil, di mupurun xamim nggo iemim vari. ¹⁹Xamim di mupol ni nggoni ngan xa mutakil ti xa tenbemim be *Nim Eo*, e *Ninin Eo* xa Hi tesa ni mi xamim da en. Bos tangan mukila xa meulien namim tave namim ti mun. Meulien namim be na Hi. ^{c20}Vengan xi texal rat xamim ni meulien na Natneli xa be neta tei xa eilep pupu. Ma bos tangan mupet rat his Hi ixo holesok xil xa ti mupol ni itel tenbemim.^d

Pispisien usil sexien te tetelien

7 Ieok bei tangan nihit rilomun ni sepinien xa mutetisi temei minou xa mubit, “Xamem manemi mabit bos xa tiramue tei namei ti sangas ni atou tei.” ²E vengan xa moletin xil holu di lang-

gur xuxus ni hanusav xil xa latateli ti vatel xil, momal tang tangan tiramue kekes tei xa miteli ihe xal atou nan kestang. E atou kekes tei mun xa miteli ihe xal tiramue nan kestang. ³Tiramue xa miteli imaen tenben mi atou nan kestang. E nggusil sexien nen tak, atou xa miteli imaen tenben mi tiramue nan kestang. Sexien te vitueien ak momal ni ngan xil xa lateli kestang. ⁴Vengan atou xa miteli tave vat ti te tenben, e tiramue nan iaxa be vat teni. Usil sexien nen tak, tiramue xa miteli tave vat ti te tenben, e atou nan iaxa be vat teni. ⁵Tiramue e atou xa luteli, lalnasikoe xol xalu ti tangan mei lalivisti vituei. Xos lalikila lalisikoe xol xalu ihe terume tang tangan lalsa melele nen ak tangan ha lalsis. Ma ti, mei lalihisti vituei mun. Ixo rin ak, ma munasa ti mesal mi *Temat* tangan vasak pis xamim vengan xa musakras muvuli xat eheien te tenbemim. ⁶E ngan ak tave rae na Hi ti tangan lalisikoe xol xalu tangan ha lalosis, e inou tang iaxa di namaen ni. ⁷Reitin, e nenemien navan, nanemi nabit bos tangan tiramue xil vus lixoni nou xa eheien te tenbeok tavas nou ti. E ngan ak be sanien xa Hi tesa ni minou. E Hi di misa hisit sanien savsav xil mi moletin sav xil. Misa sanien tei mi moletin tei, e misa tei mun tesav mi moletin sav. ^e

⁸E mi ngan xil xa latateli ti mu, mu labe tunau xil, nabiteni nabit bos tangan linateli ti ixoni nou. ⁹E xosxa lasakras lavur xat eheien te tenbexil, ma bos tangan liteli sung. Vengan xa sexien te tetelien bos mak mu mili sexien xa eheien te tenbexil di bas xil vehakut. ^f

¹⁰Mi ngan xil xa lateli, nasa rae ak (tave nou ti, e be Suv Iesu iaxa misa ni):

^y6:14 Rom 8:11; 1Kor 15:15,20; 2Kor 4:14 ^z6:15 Rom 12:5; 1Kor 12:27

^a6:16 Mat 19:5 ^b6:17 Sion 17:21-23; Rom 8:9-11; Kal 2:20

^c6:19 1Kor 3:16; 2Kor 6:16 ^d6:20 1Kor 7:23; 1Pit 1:18-19; Plp 1:20

^e7:7 Mat 19:11-12 ^f7:9 1Tim 5:14

atou nastokovein tiramue nan ti. ⁸¹¹ E xosxa ipol ni, ma xi itat imak e nateli ti mun, mu itilomun ihe visal tiramue nan. E nggusil sexien nen tak, tiramue mun nastokovein atou nan ti.

¹² Mi xamim sav xil, inou di nasa sepinien ak (be inou e tave Suv ti): xosxa tiramue tei be Kristin, e atou nan xa tave Kristin ti maen ni tangan laliti vituei, ma xi nastokovein ni ti. ^h¹³ E xosxa atou tei be Kristin e miteli del tiramue tei xa tave Kristin ti xa maen ni tangan laliti vituei, xi mun nastokovein ni ti. ¹⁴ Rute e xamim munemi mubit Kristin xil xa lateli del moletin xil xa latave Kristin ti latamese ti pe met Hi. E ngan ak tave reitin ti. Melele xa atou tei mei nggur neketen, Hi di pusi xa tetelien nalu momal. E tiramue tei mun xa mei nggur neketen, Hi pusi xa tetelien nalu momal tang. Vahit nave reitin ti, ma nalu xil linamese ti pe met Hi. E vengan be reitin, nalu xil lamal pe met Hi. ¹⁵ E vahit moletin xa tave Kristin ti ien vahei tangan vahe reling ngan xa be Kristin. E melele nen ak kestang, ngan xa be Kristin naxeih xat ngan ti xa tave Kristin ti tangan laloti vituei. E Hi mikes xamil tangan muliti vituei e tomat. ¹⁶ Vengan xa, xoux atou, otakil ti xos tiramue nam mei ihur neketen ixo xoux. E xoux tiramue, otakil ti xos atou nam mei ihur neketen ixo xoux xosxa muliti vituei. ^j

Pispisien tangan Kristin xil litit e hisit meulien xa Hi miling xil en

¹⁷ E ngan ak be selxatien tei xa di napolisi ni mi sias xil vus: bos mak mu xa moletin xil liti tang e hisit meulien xa Hi teling xil tangan liti en. Vengan ngan ak be hisit meulien xa Hi iaxa tekes xil tangan liti en. ^k¹⁸ Nggoni, xosxa mo-

letin xa tehe vexahu melele xa Hi tekesi tangan mei vahe Kristin tei, ma xi nasak pisi ti tangan vasu len von vexahu ak ra tenben. Nggusil nenemien nen tak, xosxa moletin tei tenave vexahu ti mu melele xa Hi tekesi tangan mei vahe Kristin tei, ma moletin ak nasak pisi ti tangan ha vahe vexahu. ¹⁹ E pe met Hi, xosxa moletin tei tehe **vexahu** mu tenave vexahu ti, ngan ak tave ti neta. E ngan xa be eilep pe met Hi mak mu xosxa moletin ak di milong xat naha xa di misemae ni. ²⁰ Ma bos tangan xamim kekes itat e hisit meulien xa teta en melele xa Hi tekesi tangan mei vahe Kristin tei.

²¹ Xosxa rut xamim latehe slev xil melele xa Hi tekes xil, bos tangan linanem pupu ti ven. E xosxa masta nae maen xil tangan ha vexil vamase, ma lipol ni sung. ²² Vengan melele xa Hi mikes slev tei tangan mei vahe Kristin tei vaxo his Iesu, xi misak ni mei be moletin tei nan reitin xa meluv ra xeihen na Temat. Nggo rin ak, melele xa Hi mikes moletin tei xa ven mase ngamu tangan mei vahe Kristin tei, xi misak ni mei be slev na Iesu Kristo. ^m²³ Hi texal rat xamim ni neta tei xa eilep xa eilep. Ma xamim xa vemim mase ngamu, munamaen xamim ti tangan mei muve slev na moletin ti te ut etan. ²⁴ Tuxoli e hinoxoli xil e neketen, hisit meulien xa Hi tekes xamim tangan mei muti en melele xa mei mutehe Kristin xil, bos tangan mutit en, e muti ni ngan taxa ti muhusil xat Hi.

Selxatien usil ngan xil xa latateli ti mu e ngan xil xa labe tunau xil

²⁵ Ieok bei tangan namit usil naha xa mutetisi temei minou usil rin na ngan xil xa latateli ti. Hi tenasa ti rae tova

⁸**7:10** Mat 5:32; 19:9; Mak 10:11-12; Luk 16:18 ^h**7:12** Rom 11:16

ⁱ**7:15** Rom 14:19 ^j**7:16** 1Pit 3:1 ^k**7:17** 1Kor 7:20,24

^l**7:19** Rom 2:25; Kal 5:6; 6:15 ^m**7:22** Flm 1:16; Efes 6:6; 1Pit 2:16

minou usil xil. E nisa nenemien navan mi xamim usil rin ak, e mukila muling nenesien namim e nou vengan natehe moletin na Hi Suv texo eheien hos nan. ²⁶Ve longpangasien xa nggo he mosav xil di bemei e meulien namim, nanemi nabit bos tangan moletin tei itat e hisit meulien xa da en tuei. ²⁷Xosxa muteli del atou tuei, ma munastokovein ni ti. E xosxa mutateli ti mu, ma munalang ni ti atou. ²⁸E xosxa mubit muteli, ngan ak bos tang, mutapol ni ti *tesaen*. E xosxa atul maxoe tei miteli, xi mun tapol ni ti tesaen. E bos tangan mukila xa ngan xa miteli ihur longpangasien holu ixo mosav xil ili ngan xa ngenen tovuol. Ma ieok bei tangan nisikoe xol xamim tangan munalonge ti nasa pupu. ^o

²⁹Tuxoli e hinoxoli xil, koute te sepinien xil ak mak: melele xa Hi teling xati tangan Iesu Kristo itilomun en, nave nousav ti mei istal. Ma moletin xil vus lihusil xat Hi ili holesok xil te ut etan. Moletin xil xa lateli, linamaen ni ti atou nae nasikoe xol xil ra Hi. ^{p30}Ngan xil di ladang, mu di labesi xil ve neta ngan, mu di langgal holesok xil, linamaen ni ti rin xil ak te ut etan nasikoe xol xil ra Hi. ³¹Reitin xa rut xir di lapol ni polien xil e ut etan ak. E linamaen ni ti polien ak nasikoe xol xil ra Hi. Vengan ut etan xa radi en taxeak, nave nousav ti, ikesae. ^q

³²Di nabiteni mak vengan ieok bei pupu tangan vemim vamase ra nenexoen xil te ut etan. Vengan moletin xa tateli ti, nenemien nan xil di e holesok xil na Hi Suv, e itep ikila isak ni Suv ihesi xi ven. ³³E moletin xa miteli, nenemien nan dit e holesok xil te ut etan, e itep iaxa isak ni atou nan ihesi xi. ³⁴Ma moletin ak, nenemien nan be lu. E atou xil xa latateli ti mu, mu atul maxoe xil, di lanem holu usil holesok xil na Hi Suv.

Iexil bei tangan lamese tevi pe met Hi vatel tenbexil e nenemien nae. E atou xa miteli, nenemien nan dit e holesok xil te ut etan, e itep isak ni tiramue nan ihesi xi. ³⁵Di nabiteni mak vengan ieok bei tangan ti natutou ni xamim. E natavit holesok xil ak ti tangan vasikoe xol xamim. !E-e! Ieok bei tangan nitutou ni kakaoen namim mei imal tevi, e neta ti nasikoe xol vitueien namim ra Hi Suv.

³⁶Xamim mutetis minou usil rut horam maxoe xil xa latesikoe xol atul maxoe xil be nousav ngamu, e latakil ti naha xa momal tangan lipol ni. Xosxa lanemi labit di lapurun nenemien na atul maxoe nae xil vengan huram nae xil di ba mili ngan xa momal tangan lateli en, e xosxa eheien te tenbe horam maxoe xil ak nggeih e xil tangan lateli, ma bos tangan liteli tang. Ngan ak tave tesaen ti. ³⁷E xosxa tei e horam maxoe xil ak, nenemien nan nggeih tang tangan nateli ti, e mikila vatal xat xi ra eheien te tenben, ma momal tang tangan nateli ti mi atul maxoe xa tesikoe xole. ³⁸Ma moletin xa miteli, xi pol bos. E moletin xa tateli ti, xi pol bos mak mu.

³⁹Atou xa miteli, ita kat tang itel tiramue nan melele xa meul tamu da. E xosxa tiramue nan mat, atou ak mikila iteli rilomun itel tiramue sav xa ien bei xosxa be Kristin tei. ^{r40}E inou nanemi nabit ihesi xi mak mu xosxa itat imak e nateli ti mun. E nenemien xil ak xa di nasa ni mi xamim xiak, nanemi nabit **Ninin** na Hi di dutou ni nou ni.

Selxatien tangan ngan xil xa neketen nae nggeih linapurun ti neketen na ngan xil xa lamerou

8 Ieok bei tangan nihit rilomun ni usil sepinien xa mutetisi teme minou usil rin te anien xil xa latesa ni mi nanao

^{m7:25} 1Tim 1:12-13 ^{o7:28} Luk 21:23

^{q7:31} 1Sion 2:17 ^{r7:39} Rom 7:2-3

^{p7:29} Rom 13:11

xil.^s ²Moletin xa minemi bit nggur kilakilen xil vus ngamu, xi di miluvos xi tasen e di pisen ni xa kilakilen nan tapin ti mu. ¹³E ngan xa eheien nan nggeih e Hi, Hi mikil moletin ak. ^u

⁴Rinem usili. ?Momal tang tangan ti mua anien xa moletin xil di lasa ni mi nanao xil, mu tamal ti? Sepinien xa mutetisi minou be reitin xa bit, “Makila xa nanao xil tave hi xil reitin ti.” E mubiteni mun mubit, “Makila xa Hi tei takes, e hi sav xil latovuol mun.” ^{v5}Be reitin xa moletin xil di lamot mi holesok xil holu xa lakesi ni hi mu suv nae, xa lanemi labit ladi e ut nesao mu ut etan. ^{6 w}

⁷Tave ti neta xa nanao xil latave reitin ti, tave Kristin xil vus ti iaxa lakil rin ak. Vengan, rut xamim xa neketen nae memel tamu, e meulien tevi nae, melele xa latesa anien mi nanao xil tangan lamot mi xil, lateanien vituei e latepol tesa tetel ngan tesav xil e nim eo te hi nae xil ak. Misak ni, xosali, melele xa langga anien xil xa latesa ni mi nanao xil, latelonge nggoni ngan xa di tamu lamot mini. Mi xil, xosxa latea anien ak, ma xil lanemi labit latamese ti pe met Hi, e di misak ni neketen nae mot. ⁸Be reitin xa anien misakras vasak ni xir ramei sangas mu visal Hi, mu vati pas xir ra ni. Xosxa moletin taxa ni ti, ngan ak tasak ni ti mei vasa pupu vali ngan xil xa di langga ni. E xosxa moletin tei ngga ni, ngan ak tasak ni ti mei vahos mak mu vali ngan xil xa lataxa ni ti. ^{x9 y}

¹⁰Xamim mukila mupurun xil vaxo rin ak. Xamim xa munggur kilakilen xa nanao xil labe neta sav tang muhe rute

xa di lamot mi nanao xil en. E ti, mua anien e rute ak. E xosxa ngan xil xa neketen nae memel tamu lipus xamim, ma ilihi xil tangan lihusil sexien namim xil e ha lia anien xil ak xa be tesaen mi xil. ¹¹Ixo sexien ak, kilakilen namim ipurun neketen na tua namim xil xa lamerou xa Iesu Kristo temat ve xil. ^{z12}E melele xa mupurun neketen na tua namim xil xa lataxeih ti, mupol ni *tesaen* ba mi xil. E melele xa mupol ni tesaen ba mi xil, mupol ni tesaen ba mi Iesu Kristo. ¹³Ma, e rin navan, xosxa nakila xa anien xa di nangga ni di misak ni tua navan xil lamot e tesaen, ma ninaxa ti mun anien ak. Vengan ieok ti tavei napol ni tua navan xil lamot e tesaen.^a

Pol misep usil rin nan nggoni eloheoh tei na Iesu Kristo

9 ?Midep vari? ?Munemi mubit inou natameluv ti tangan napol ni sexien xil vus? ?Munemi mubit inou natave *eloheoh* tei ti reitin?^b ?E midep, tave xamim ti iaxa mube huit polien xil xa natepol ni ve Suv? ²E tave ti neta xa moletin sav xil latake reitin ti xa nabe *eloheoh* tei, xamim ti muke reitin en mak mu. Vengan neketen namim iaxa be huit polien navan xil mi Suv, e di pisen ni xa nabe eloheoh tei reitin. ^c

³Mi ngan xil xa di lalapis inou labit tamal ti tangan xamim musa tutouen minou, nisep usil rin navan imak: ⁴xamem xa mabe eloheoh xil na Suv, momal tang tangan mavur anien e oei ve polien namem. ^{d5}E xosxa atou namem xil ladi, momal tang tangan lavusil xamem e kakaoen namem nggoni ngan xa Pita,

^s8:1 Pol 15:29; 1Kor 13:2 ^t8:2 Kal 6:3 ^u8:3 Kal 4:9 ^v8:4 1Kor 10:19; Dut 4:35,39; 6:4 ^w8:6 Dut 6:4; Efes 4:6; Sion 1:3; Kol 1:16; Mal 2:10; 1Kor 12:6; Efes 4:6; Sion 1:3; 1Kor 12:5; Efes 4:5; Kol 1:16 ^x8:8 Rom 14:3,17
^y8:9 Rom 14:13-21; Rom 14:13,15,21; Kal 5:13 ^z8:11 Rom 14:15,20
^a8:13 Rom 14:21 ^b9:1 1Kor 1:1; Pol 9:1-6; 22:17-18; 26:16; 1Kor 15:8
^c9:2 2Kor 3:2-3 ^d9:4 Luk 10:8; 1Kor 9:13-14

tua xil na Iesu, e eloheoh sav xil di lapol ni. ^{e6} Eloheoh xil vus lakila lavur tutouen ve polien xa di lapol ni. ?E midep? ?Be inou del Banabas kestang iaxa malsakras malhuri? ⁷ Melele xa moletin xil te vaeen di lapol, amy di nggal holesok nae xil ve polien nae. E moletin xil xa lalih naho di langga anien xil teni. E moletin xil mun xa di lalaxat sipsip xil lakila lamu melik xa langgur rati ra sipsip sae xil.

⁸ Vole xatel ak nalehi nggo meulien nar, e **rae na Hi** mun di biteni mak tang. ⁹ Reitin, vengan, e rae na **Mosis**, latetisi latehit, “*Xosxa buluk sam di pol ve xouk e naho te uit, onavar xol vulongen ti, umaen ni tangan ia rut uit ak.*” (*Dut 25:4*)^f ?Midep vari, Hi di minem usil buluk ak kestang? ¹⁰ E-e, melele xa Hi tehiteni temak, di tenem usil xir. E latetisi tangan vatutou ni xir. Vengan, ngan xil xa ladei tan te naho, lapol ni del nenemien tangan lihur neta tei ixo en. E ngan xil xa di laleh rerat anien ra naho, di lapol ni del nenemien xa lileh rut anien xil ak ihe ae. ^{g11} Melele xa xamel mateti visal xamim, matelih xat utiei xil te neketen e meulien namim.^h ¹² Moletin sav xil xa mei lapol mi xamim, momal tang tangan musa huit polien nae mi xil. E nanemi nabit momal mak mu tangan xamel Banabas mun malihur neta tova ixo xamim.
i

E xamel matnasis xamim ti tangan musa huit polien mi xamel melele xa di matepol mi xamim. E-e, vengan iemal ti tavei tangan ni ti neta ngan tangan vasikoe xol longeongen hos na Kristo. Ma manemi mabit bos mak mu tangan malhisu ni melele te xeih xil. ^{j13} Xamim mukila xa moletin xil xa di lapol e **Nim**

Eo di langgur anien ae nggo sanien xil xa moletin xil di lalehi. E pris xil xa laling sanien eo na moletin xil e **hor te sanien**, xil laleh rute be ae. ^{k14} Usil nenemien ak, Suv Iesu tesemae ni xa ngan xil xa di lasetu ni longeongen hos lihur huit polien nae ven. ¹

^{15m16} Xosxa nihithiten longeongen hos mi moletin xil, nasakras nati valhasok ven. Vengan Iesu tesemae ni nou tangan nipol ni, e vasa pupu minou vahit ninavithiteni ti. ⁿ¹⁷ Vahit vahe nenemien navan tang tangan napol ni polien ak, momal tang tangan namur huit polien ven. E di napol ni polien ak vengan xa Hi teling nenesien nan e nou, e misil nou tangan ha nipol ni. ^{o18} ?Ma nihur hisit huite eah? Huit polien navan be sien xa nangguri melele xa nasa longeongen hos nggoni sanien tei tang, tave ti neta xa momal tangan namur huit polien ven.

¹⁹ Inou natave ti slev na moletin tova. E inou nikila nipol ni naha xa ieok bei tangan nipol ni. E tave ti neta xa mak, di napol nggoni slev na moletin xil vus tangan nakila naleh moletin xil holu mu mei laling nenesien nae e Iesu. ^{p20} Melele xa natepol tetel **Siu** xil, natehusil sexien nae xil tangan nakila naleh xil. Reitin, melele xa natepol tetel ngan xil xa latehusil xat rae xil na Mosis, inou mun natehusil xat rae xil ak tangan nakila naleh ngan xil xa di langgusili, tave ti neta xa nameluv ra ao teni. ^{q21} Usil suse nen tak, melele xa natepol tetel ngan xil xa latnahusil xat rae xil na Siu xil ti, inou mun natehusil xat sexien nae xil tangan nakila naleh xil. Tave ti neta xa di natahusil xat rae xil ti xa Hi tesa ni texo Mosis e di nanggusil

^{e9:5} Sion 1:42 ^{f9:9} 1Tim 5:18 ^{g9:10} 2Tim 2:6

^{h9:11} 1Kor 3:6; Rom 15:27 ^{i9:12} Pol 20:34-35; 2Kor 11:9; 1Kor 13:7

^{j9:12} 1Tes 2:9 ^{k9:13} Lev 6:16,26; Nam 18:8,31; Dut 18:1-3 ^{l9:14} Mat 10:10;

Luk 10:7-8; Kal 6:6 ^{m9:15} 2Kor 11:9-10; Pol 18:3 ^{n9:16} Ser 20:9

^{o9:17} 1Kor 4:1 ^{p9:19} Mat 20:26-27 ^{q9:20} Pol 16:3; 21:20-26

xat rae xil na Iesu Kristo. ^{r22 s23}Holesok xil vus xa di napol ni, napol ni tangan longeongen hos mikila vahe rute xil vus. E nggo suse ak, inou nakila namur tuxolxatien teni vatel moletin xil ak.

²⁴Neketen namim nggoni lohen tei xa moletin xil holu di laloh en, e moletin tei takes ha ihur huite teni. Ma, e lohen te neketen namim, muloh ixehi tangan muhur huite te neketen namim. ^{t25}E ut etan, moletin te lohen xil langguxou kuhi ve sexien nae xil tangan lasak xat xil ve lohen ak. E xil, di lapol ni tangan lakila lavur huit lohen xa be sanien tei tang xa, navehi ti, imerer. E xir, di rapol ni tangan ravur huite te ni xa misakras vamerer. ^{u26}Ma, e meulien navan, nangguxou kuhi ve sexien e nenemien navan xil. E lohen te neketen, naloh momal tangan nakila natuxoh hoxalite teni. Nanggoni moletin te tutouen mun. Di nataso voten heok ti vahe rute xil vus. E-e, nasak tangan naso heok vama e melele xil vus. ²⁷Vehakut, napol ni nggeih minou tangan nixuxou kuhi ve eheien te tenbeok. Napol ni mak tangan, melele xa nihit vuol ni sepinien na Hi mi mosav xil, Hi naviteni ti minou navit nasakras mun namur huit neketen navan.^v

Pispisien tangan Kristin xil linamaen eheien te tenbexil ti natiamu ni xil

10 Tuxoli e hinoxoli xil, ieok bei tangan munem rilomun ni naha xa testal mi avu nar xil xa latehusil Mosis tetiamu. E kakaoen nae, Hi tesikoe xol xil texo momah nan e tesak ni xil late-

hur xoteh Tas te Pili. ^{w2}Melele xa latepol ni nenemien nae xil tangan lavusil **Mosis**, texoni ngan taxa momah ak e tas ak tebaptaes ni xil, e mei latehusil xat Mosis. ^{3 x4}E xil vus latemu hisit oei tei takes xa Hi tesak ni mei testal texo hat tei xa mahulong. Hat xa mahulong xiak tehe vole tei usil Kristo xa tehusul xil e tesa oei mi xil e kakaoen nae. ^{y5}E tave ti neta xa Hi telaxat kuh xil, sangas mol-Isrel xil vus, Hi tenavesi xi ti ve xil. Misak ni Hi tesak ni xil holu latelele, e tiei nae xil telel teti nga tang e uruvuol, e latnatuxoh von tuxolxatien ti. ^z

⁶Holesok xil ak xa testal mi xil be simeleleen tei tangan vassel xat xir e rina- napol ni ti holesok xil xa misa naxoni ngan xa xil latepol ni. ^{a7}Munamot ti mi nanao xil naxoni ngan xa xil latepol ni. Vengan melele xa di latepol ni, tehe tesaen nggoni ngan xa Vanuvei Eo biteni xa bit, *“Melele xa mol-Isrel xil latetotan e anien xa eilep tangan lamot mi nanao xa tehur nini buluk, latemun tehe holu e latepat vituei tetel ngan tesav e xil mun tang.”* (Eks 32:6) ^{8 b9}Xir rinasak pis Kristo ti tangan rinalihi ekaten nan namei e xir naxoni melele xa rut mol-Isrel xil xa latesak pis Hi, e xi tesak ni tetal tesa xil ba latengas vin xil. ^{c10}Rinaseputut ti ve naha xa Hi di pol ni naxoni ngan xa mol-Isrel xil latepol ni, ma Hi tesa masxaxa tei teme i tangan vahas vin xil. ^{d11}Holesok xil ak xa testal mi xil tehe simeleleen xil tangan vassel xat moletin sav xil. E latetis xat xil tangan vahe selxatien mi xir xa rameul radi e melele ak,

^{r9:21} Kal 2:3 ^{s9:22} Rom 14:1; 2Kor 11:29; Rom 11:14 ^{t9:24} Plp 3:14; 2Tim 4:7 ^{u9:25} 1Tim 4:8; 2Tim 2:4-5; 4:8; Tem 1:12; 1Pit 5:4

^{v9:27} Rom 8:13; 13:14 ^{w10:1} Eks 13:21-22; 14:22-29

^{x10:3} Eks 16:35; Eks 16:4,35; Dut 8:3; Sam 78:24-29

^{y10:4} Eks 17:6; Nam 20:11; Sam 78:15

^{z10:5} Nam 14:6,23,29-30; Sam 78:31; Hib 3:17; Siud 1:5 ^{a10:6} 1Kor 10:11; Nam 11:4,34; Sam 106:14 ^{b10:8} Nam 25:1-18; Nam 25:1,9 ^{c10:9} Nam 21:5-6

^{d10:10} Nam 14:2,36; 16:41-49; Sam 106:25-27; Hib 3:11,17

xa, navehi ti, ut etan e holesok xil vus xa di en likesae. ^e

¹²Ma, xosxa munemi mubit di musoh nggeih tamu e neketen namim, muxuxou kuhi tangan munamot ti e tesaen. ^{13 f}

¹⁴Mak, ma tua navan xil, munamot ti mi nanao xil. Reitin, muloh muhe reling sexien xil ak. ^{g15}Di nasepin mi xamim nggoni ngan xa mube moletin xil xa vatixil di. Xamim mulepis kuh sepinien navan xil tangan mupusi xa be reitin mu tave reitin ti. ¹⁶Munem pisi mu. Melele xa di ramu uae te Anien Eo na Suv xa di rames Hi ven, di ranem usil re Iesu xa teleh ve xir. E melele xa rabul papas beret e rangga vituei ni, di ranem usil tenbe Kristo e tetep iaxa temat e eivave ve xir. Nggo sexien ak, di rapisen ni xa xir mei rabe tenbe Kristo xa be tei takes. ^{h17}Xir di rabul papas beret tei takes. Ma, melele xa di rangga vituei ni, di rapisen ni xa, tave ti neta xa rabe holu, mei rabe tenbe Kristo xa be tei takes. ⁱ¹⁸Munem pis mol-Isrel xil. Melele xa langga rut anien xil te sanien eo xa latelingi tete **hor te sanien**, xil latehe tei takes e moten nae mi Hi. ^{j19}?Koute te sepinien navan be naha vari? ?Nanao tei be hi tova xa be reitin? ?E anien xil te sanien eo xa lasa ni mini be neta tova pe met Hi? ^{k20}!E-e, be neta sav tang! Di nabiteni xa buluk e sipsip xil xa rut xil te hal Korin xa latakil ti Hi di labas xil e laling xil ladi e hor te sanien na nanao xil, di lasa ni ba mi temat xil tang, latasa ni ti vaha mi Hi. E inou ieok ti tavei tangan mumot mi temat xil e muvisti vatel xil. ^{l21}Musakras mumu uae te Anien Eo na

Suv, ti vatutou ni, ha mumu uae e rute xa di lamot mi temat xil en. Musakras muva anien e tep te Anien Eo na Suv, ti vatutou ni, ha muvanien mun e tep tei xa di lasa sanien xil mi temat xil en. ^{m22}?Midep vari? ?Mubit musak ni Suv ien vakat vengam mubit muvusi sav? ?Munemi mubit munggur xeihen tangan mukila mulesae reling ekaten nan? ⁿ

²³Di mubiteni mubit, “Holesok xil vus momal tangan Kristin xil ti lipol ni.” Ngan ak be reitin, e rut holesok xil ak tavos ti mi xamim. Xamim mukila muvit sepinien ak, e holesok holu misakras vatutou ni meulien mu neketen namim. ^{o24}Munapol ni ti holesok xil tangan vatutou ni xamim kestang. E-e, ixo sexien xil vus namim, musak pisi tangan mututou ni mosav xil ni. ^{p25}Ma, mupol ni imak: hisi te vongoro xil xa lalehi bemei e von posen, momal tangan muxale e mua ni. E munasis xil ti tangan mukameti xa hisi xil ak lalehi nggo sanien xil xa latesa ni mi nanao xil tangan munapurun nenemien namim ti. ^{q26}Vengan Vanuvei Eo biteni bit, “*Ut etan del holesok xil vus xa di en be na Hi.*” (*Sam 24:1*) ^{q27}E xosxa moletin tei xa tave Kristin ti misilasil ve xoux tangan ova ovanien e tim san, e xoux omae en, ha ua anien xil vus xa di misa ni. Onasisi ti onahit, “?Anien xil ak nggo xave?” tangan ukameti xa momal tangan ova ni. ^{r28}E xosxa moletin ak biteni minuk xa anien xil ak latesa ni mi nanao xil, onaa ni ti. Vengan xos biteni minuk vengam minemi bit tamal ti tangan ova ni. E xosxa imak, ma upurun nenemien nan. ^{s29}Neta sav

^e10:11 1Kor 10:6; 1Pit 4:7 ^f10:13 Dut 31:5-8; Tem 1:2-5; Hib 13:5-6; Dut 7:9; 1Kor 1:9; 1Tes 5:24 ^g10:14 1Sion 5:21 ^h10:16 Mat 26:26-28; Mak 14:22-24; Luk 22:19-20; Pol 2:42 ⁱ10:17 Rom 12:5; 1Kor 12:27; Efes 4:16; Kol 3:15
^j10:18 Lev 7:6,15; Dut 14:22-27 ^k10:19 1Kor 8:4
^l10:20 Dut 32:17; Sam 106:37; Rev 9:20 ^m10:21 Mal 1:7,12; 2Kor 6:15,16
ⁿ10:22 Dut 32:21-22 ^o10:23 1Kor 6:12 ^p10:24 Rom 15:2
^q10:26 Sam 50:12; 89:11 ^r10:27 Luk 10:8 ^s10:28 1Kor 8:7

xa mutanemi ti vamak, e vengan xa moletin sav xil di lanemi mak, ma munaxa ni ti.

E xosxa moletin tovuol xa vahit anien ak tamal ti, bos xa xamim munanem ti nahe holu usili. Ihos mak mu xa mua ni tang e munanem ti usil naha xa momal te anienen. ³⁰Xosxa di mumes Hi ve anien xa di mungga ni, ma moletin tovuol mikila vahitini xa di mupol tamal ti. ^t

³¹Mak, ma melele xa mungga neta tei, mu mumu neta tei, mu, e neta xil vus xa di mupol ni, mupol ni ixo sexien xa ipet rat his Hi. ^{u32}Io, sexien namim napurun nenemien na **Siu** xil ti, mu nenemien na ngan xil xa latave Siu xil ti, mu nenenemien na ngan xil xa ladi e Sias na Hi. ^{v33}Ma mupol ni ixoni ngan xa inou di napol ni: e holesok xil vus xa di napol ni, di nasak pisi tangan nipol ni naha xa momal pe met moletin xil. Natanem ti neta xa itutou ni nou kestang, e nanem usil naha xa itutou ni moletin sav xil tangan xil likila lihur neketen ixo en. Imak, ma Hi ikila iteh meulien e xil. ^w

11 Ma muhusil sexien navan xil, ixoni ngan xa inou di nanggusil sexien xil na Iesu. ^x

Pispisien usil sexien na Kristin xil melele xa lamei vituei tengan lamot mi Hi

²Names xamim vengan, vehakut, di munem xat nou e di munggul pispisien xil xa natesa ni mi xamim. ³E ieok bei tangan mukila xa Iesu be vat na tiramue xil vus, e tiramue tei be vat na atou nan, e Hi be vat na Iesu. ^{y4}Ma, xosxa tiramue tei di bar xol vatin e di misis mu

di misep kil sepinien na Hi pe met moletin xil vus, xi di misa unounen mi vat nan xa be Kristo. ⁵E xosxa atou tei tavar xol vatin ti, e di misis mu di misep kil sepinien na Hi pe met moletin xil, xi di misa unounen mi vat nan xa be tiramue nan. Sexien ak nggoni unounen xa atou tei ngguri melele xa lakoti be vatumas. ^{*}
⁶E xosxa atou tei ihit navar xol vatin ti, momal tangan likoti ihe vatumas. Ma ihos mak mu xa ivar xol vatin ni kaliko tova. ⁷Tiramue xil, bos tangan linavar xol vatixil ti vengan Hi pol ni xil nggoni xi tang, e di lapisan ni xa Hi be eilep mak mu. E atou xil, xil di lapisan ni xa tiramue nae xil labe eilep nae. ^{z8}Vengan Hi tenapol ni tiramue ti tenaxo atou, e xi tepol ni atou testal texo tiramue. ^{a9}E Hi tenapol ni tiramue ti tangan vatutou ni atou, e tepol ni atou tangan vatutou ni tiramue. ^{b10}Ma, momal tangan atou tei ivar xol vatin tangan vapisen ni xa tiramue nan be vat nan. Ipol ni sexien ak tangan isak ni **masxaxa** xil lihesi xil melele xa lipus sexien te merereen nan.

¹¹Neta sav xa mak, e meulien nar e Iesu, momal tangan atou xil del tiramue xil ti lipol vituei. Vengan vahit tiramue vahe tovuol, atou mun vahe tovuol. E vahit atou xil lave tovuol, ma tiramue xil mun lave tovuol. ¹²Vengan, e sexien xa Hi tepol ni atou testal texo tiramue, Hi tepol ni tiramue mei mistal nggo atou melele xa milingi be tuvava. E holesok xil vus xa di, nggo visal Hi.

¹³Xamim mulepis rin ak: ?Momal tangan atou vasis mi Hi pe met moletin xil melele xa tavar xol vatin ti? E-e. ¹⁴Vengan, melele xa rapus tiramue tei xa hilin

^{*}**11:5** Melele xa lakameti xa atou tei pol misa del moletin tei, lakoti be vatumas tangan ihe unounen pe met moletin xil.

^t**10:30** 1Tim 4:4 ^u**10:31** Kol 3:17 ^v**10:32** Rom 14:13

^w**10:33** 1Kor 9:20-22 ^x**11:1** 1Kor 4:16; Plp 3:17

^y**11:3** Efes 5:23; Sen 3:16; Efes 5:23; 1Kor 3:23 ^z**11:7** Sen 1:26-27; 5:1; 9:6; Tem

3:9 ^a**11:8** Sen 2:21-23; 1Tim 2:13 ^b**11:9** Sen 2:18-23

tepiei, rapusi xa tamal ti e be unounen tang mini. ¹⁵E melele xa atou tei, hilin xil tepiei, rapusi bos e rapet rat hisen. Vengan Hi tesa hilin mini tangan vavar xol vatin. ¹⁶E xosxa ti e xamim mubit museputut ve sexien xa atou xil di labar xol vatixil melele xa lasis, ma inou nabit namiteni xa sias xil vus na Hi di langgusil sexien ak melele xa lamei vituei tangan lamot mi Hi. Usil rin ak, xamem eloheoh xil matamaen ti mun sexien sav xil.

Pispisien usil sexien xil xa di lapol ni Anien Eo na Iesu nggo en

¹⁷E, e rin xa nisep usili taxeak, natapet rat xamim ti ven. Vengan xa melele xa mumei vituei, tave ti tangan mupol ni holesok xil xa bos, e be tangan ti mupol ni sexien xil xa misa tang. ¹⁸Ngan xa ti nisep usili itiamu imak: nalongeong ni xa melele xa di mumei vituei, di mudi pas xamim mube vanute sav xil. E melele xa natelonge, natekila xa longeongen ak be reitin. ¹⁹E xos bos xa di mudi pas xamim mak, vengam imak, ma ti ripus kila xa visi e xamim be na Hi reitin. ²⁰Melele xa mumei vituei tangan mupol ni Anien Eo na Suv, xamim mutapol ni ti vatel nenemien xa di munem usil Suv Iesu. ²¹Vengan melele xa mupol ni anien ak, rute e xamim laleh anien ae be holu e latasotil ngan tesav xil ti. Misak ni, xil di langga vuol ni anien ae diamu, e ngan xil xa lamei dutou, mae di nggat xil. E rut xamim di lamun ba vuma ... latalang ni. ²²?Midep vari? ?Tim samim tovuol tangan ti muvanien mu mumun en? ?Veneh ma di mupurun Sias na Hi e di musak ni ngan xil xa labe hoeo tangan lave un-

oun? ?Munemi mubit nimes xamim ve sexien ak? !E-e, nasakras! ^e

²³Pispisien usil Anien Eo na Suv Iesu xa natesa ni mi xamim be pispisien xati xa xi vari tesa ni minou. E vongien xa latesa rat meulien nan, xi tehur beret tei. ²⁴E melele xa temes Hi ven, tevul papasi e tehiteni tehit, "Ngan ak be tenbeok xa di nasa ni e rin namim. Mupol ni imak tangan ti munem usil nou ixo en." ²⁵Usil sexien nen tak, melele xa lateanien tevus, Iesu tehur kap te uae e tehiteni tehit, "Uae ak be ra navan xa isak ni *hitxatien te xeih* hu na Hi mei ixeh e ihe reitin. Mupol ni imak tangan ti munem usil nou ixo en." ²⁶Ma, ituxoh melele xa Iesu itilomun en, e melele xil ngasen xa mua beret ak e mumu uae ak, di mubithiteni xa Suv temat tehinat moletin xil. ^h

²⁷Ma xosxa moletin tei ngga beret mu mu uae te Anien Eo na Suv Iesu nggusil sexien tei xa tamal ti, xi ihur pangasien ven vengam xa di pol ni tesaen ba xat tenbe Iesu del ren. ²⁸Ma, itiamu ni melele xa mua beret e mumu uae ak, xamim vus munem kil koute teni e mulepis meulien namim. ²⁹Vengan xosxa mua beret e mumu uae ixo suse tei xa ti ipurun moletin sav xil xa labe tenbe Suv, di mulihi longpangasien na Hi bemei mi xamim. ³⁰Ve sexien namim ak, holu e xamim di lamesei e tenbexil memel, e rut xamim laleh tuei. ³¹E xosxa rilepis meulien nar itiamu, ma longpangasien na Hi namei ti e xir. ³²E melele xa Hi misa pangasien mi xir xosali, xi di pol ni tangan vama ni xir. Vengan melele xa mei ramal rilomun pe meten, xir rinahur ti mun pangasien ven

^c11:18 1Kor 1:10-12; 3:3 ^d11:19 Dut 13:3; 1Sion 2:19 ^e11:22 Tem 2:5-6

^f11:23 Mat 26:26-28; Mak 14:22-24; Luk 22:19-20

^g11:25 Eks 24:8; Ser 31:31; 32:40; 2Kor 3:6; Hib 8:8-13; Eks 24:6-8; Sak 9:11

^h11:26 Mat 26:29 ⁱ11:27 Hib 10:29 ^j11:28 Mat 26:22; 2Kor 13:5

^k11:29 1Kor 11:20-21 ^l11:30 Pol 7:60; 1Kor 15:20; Efes 5:14; 1Tes 5:6

e Melengien te Lepisien xa mei isa pangasien mi moletin xil te ut etan. ^m

³³ Mak, ma tuxoli e hinoxoli xil e neketen, melele xa mumei vituei tangan mua Anien Eo na Suv, mutatil ngan tesav xil tangan ti museti anien amim itel xil. ³⁴ E xosxa mae nggat xamim, muanien e tim samim itiamu. Imak, ma melele xa mumei vituei, munalihi longpangasien na Hi ti namei mi xamim. E rin te holesok sav xil mun, nipispisi ni mi xamim melele xa nihat.

Pispisien xil usil sanien xil na Ninin Eo

12 Tuxoli e hinoxoli xil, nabit nihit rilomun ni sepinien xa mutetisi minou usil sanien xil na Ninin Eo, venggan ieok bei tangan mukil reitinen teni. ² Mukil kuhi mak xa, tetiamu, melele xa mutnakil ti mu Hi, holesok sav xil holu latetel xamim tangan ha mukesae e suse sav. Ve rin ak, mutemot mi nanao xil xa lasakras lasepin mi xamim venggan latameul ti. ³ Mak, ma ieok bei tangan mukil naha xa pisen ni xa **Ninin Eo** de moletin tei. Ngan xil xa Ninin Eo di e xil, lasakras lasepsisil Iesu. E ngan xil xa Ninin Eo tara ti e xil, lasakras lavitenei lavit, “Iesu be Suv reitin.” ^o

⁴ Hisit sanien sav xil labe holu, e Ninin tei takes iaxa di misa xil. ⁵ Hisit tutouen sav xil labe holu, e xir rapol mi Suv tei takes. ⁶ E hisit polien sav xil mun labe holu, e Hi tei takes iaxa misa xeihen mi xir tangan rapol ni. ⁷ Ninin Eo di pisen xi e meulien na Kristin xil kekes, tangan vatutou ni Kristin xil vus te Sias. ⁸ Mi moletin tei, Ninin misak ni mikila vahit rat sepinien te metisouen xa nggo visal Hi. Mi moletin tei mun, Ninin nen tak

pisen neta tei mini tangan vasep mesen ni mi moletin sav. ⁹ Mi moletin tei, Ninin ak di misa neketen mini xa neta tei mei istal ihe reitin. E mi moletin sav mun, Ninin nen tak misak ni mikila vapol ni tenbe moletin xil mei vahos. ¹⁰ Mi tei, misa xeihen tangan vapol ni merekel xil; e mi tei mun, misa xeihen tangan vahit rat sepinien xil xa Hi tesa ni mini. Mi tei mun tesav, misak ni mikila vale kil naha xa nggo Ninin na Hi, e naha xa nggo ninin tesa xil. Mi moletin tei, Ninin maen ni tangan vasepin ni hisit sepinien sav xil, e mi moletin sav, maen ni tangan valong kil sepinien xa di biteni. ¹¹ Holesok xil vus ak be sanien xil xa Ninin tei takes di misa ni. E xi vari iaxa di miseti sanien xil ak mi moletin kekes xil nggusil nenemien nan. ^t

Kristin xil langgoni rut tenbe xil holu xa labisti vituei e tenbe tei takes

¹² Ninin Eo di misa kekes ni sanien xil mi ngan xil xa langgusil Iesu venggan Kristin xil ak langgoni rut tenbe xil holu xa labisti vituei e tenbe tei takes. Tave ti neta xa rut tenbe xil labe holu, labe tenbe tei takes. ¹³ Reitine, tave ti neta xosxa rabe **Siu** xil mu ratave Siu xil ti, rabe slev xil mu rameluv. Venggan labe **baptaes** ni xir e Ninin Eo tei takes, e xi misak ni xir mei rabe vanut moletin tei takes xa be tenbe Kristo. E Ninin nen tak mei mise xat xir vus. ^v

¹⁴ Be reitin pupu, e tenbe moletin tei, rut tenbe xil holu ladi en. ¹⁵ Xos le moletin tei vahitenei vahit, “Inou natave he moletin ti, ma natavisti ti vatel tenbe moletin ak,” e tasak ni len ak ti tangan navisti ti vatel tenben. ¹⁶ E xos vurangen tei vahitenei vahit, “Inou natave meten

^m11:32 Hib 12:5-6 ⁿ12:2 Sam 135:15-18; Hab 2:18-19

^o12:3 Mak 9:39; 1Sion 4:2-3 ^p12:4 Rom 12:6; Efes 4:4 ^q12:5 Efes 4:11

^r12:7 1Kor 14:26; Efes 4:12 ^s12:10 Pol 2:4; 1Kor 14:5 ^t12:11 Rom 12:3; 1Kor 7:7; Efes 4:7 ^u12:12 Rom 12:4-5; 1Kor 10:17 ^v12:13 Kal 3:28

tei ti, ma natavisti ti natel tenbe moletin ak,” e tasak ni ti tangan vurangen ak navisti ti natel tenben.¹⁷ ?Vahit tenbe moletin vahe meten kestang, ma valong neta vatep? ?Vahit tenbe moletin vahe vurangen kestang, ma vapongos kil neta vatep? ¹⁸Tamak ti. Vengan Hi miling kuh rut tenbe moletin nggusil nenemien nan. ¹⁹Vahit tenbe moletin tei vahe rut tenben tei takes, ma tave tenbe moletin tei ti. ²⁰E tamak ti, vengon rut tenben sav xil di labisti vituei tangan mei lave tenbe moletin tei takes.

²¹Ma meten tei misakras vahitene mi hen vahit, “Inou kestang nitak, e ieok ti tavei xouk.” Mu vatin misakras vahitene mi len vahit, “Inou kestang nitak, e ieok ti tavei xouk.” ²²Tamak ti, vengon xa rut tenbe xil xa rapusi xa tahur ti xeihen, polien nae di. E tenbe moletin tei misakras vameul vahos xosxa rut tenben xil linati ti en. ²³Rut tenbe xil xa di ranem male ni xil, di rasing xol kuh xil. E rut tenbe xil xa di rabe unoun ni, di rangguxou kuhi ve xil. ²⁴E rut tenbe xil xa ladit kesao, xir ratasing xol xil ti. E Hi miling kuh rut tenbe xil ladi e vonine xati tangan ngan xil xa di ranem male ni xil, rimerere ni xil ixo sexien xa di rasing xol kuh xil. ²⁵Hi tepol ni temak tangan vasak ni rut tenbe xil linati pas xil ti. Ien bei tangan rut tenbe xil vus ti lipol vituei ni polien nan, e ti lilaxat kuh rut tenben sav xil. ²⁶Mak, ma xosxa rut tenbe moletin tei milonge misa, ma tenben xil vus di lalonge misa dela. E xosxa lapet rat rut tenben tei, ma tenben xil vus di lalonge bos dela.

²⁷Di nabit usil sexien te rut tenbe xil vengon xa xamim mube rut tenbe Iesu Kristo. ^{w28}Tenben ak be Sias na Hi, e xi miling rut tenbe xil en xa mak: ngan xa diamu, miling **eloheoh** xil; ngan xa be lunen, miling **provet** xil te xosali; e ngan

xa be tol e xil, miling titsa xil te Sias. E dutou ni ngan xil ak, Hi tesa xeihen mi moletin sav xil te sias: ngan xil xa lakila lapol ni merekel; ngan xil xa lakila latal rat moletin ra mesien; ngan xil xa di ladutou ni mosav xil; ngan xil xa labe vat xil; e ngan xil xa lakila lasepin ni hisit sepinien sav xil xa latnakil ti tetiamu. ^{x29}Tave moletin xil vus ti te sias iaxa labe eloheoh xil, mu provet xil, mu titsa xil, mu langgur xeihen tangan lapol ni merekel. ³⁰Tave xil vus ti iaxa langgur xeihen tangan latal rat moletin xil ra mesien nae, mu lakila lasepin ni hisit sepinien sav xil, mu lasep kil koute te sepinien xil xa latehitene. ³¹E xamim iemim ihei sanien xil mak mu xa tellep tangan vatutou ni moletin xil e Sias na Hi. E itiamu, nipispisi ni mu mi xamim usil neta tei xa bos mak mu mili sanien xil ak.^y

**Xosxa eheien tovuol e meulien nar,
ma holesok xil xa di rapol
ni del sanien xil na Ninin
Eo mei lihe neta sav tang**

13 Xosxa nanggur sanien tangan nakila nasepin ni hisit sepinien sav xil te ut etan vatel sepinien na **max-axa** xil mun, e natapisen eheien ti mi mosav xil, ma sanien ak be neta sav tang. Vengan xa, xosxa eheien navan e mosav tovuol, ma sepinien navan xil be te tangalen tang nggoni ngan xa di nabas voten vangivue mu bel tei. ²Xos nanggur xeihen tangan nasep kil sepinien na Hi, mu nakil holesok xil vus xa di minggus e kilakilen sav xil. Mu xos neketen navan nggeih tangan nakila napol ni neta tova xa eilep vaxoni ngan xa nalisin vat hu tei ra voninen. E tave ti neta xa nakila napol ni holesok xil vus ak, xosxa eheien navan tovuol, inou nabe neta sav tang.

^{z3}Xos di nasa holesok navan xil vus ba mi hoeo xil, mu ba nanggur sakpurunien xil vengan xa di nanggusil xat Iesu tangan ti nasep koai ven. [†]E xosxa di napol ni holesok xil ak, e eheien navan e mosav xil tovuol, Hi nasa ti neta minou ven. ^a

⁴Melele xa eheien xa be reitin di e moletin tei, xi di pisen ni nggo sexien xil ak: nenemien nan teviei, be hanmerou, naketeh ti nasa mi mosav xil, nasep koai ti, e nanem male ni mosav xil ti. ⁵Moletin xa eheien di en napurun moletin sav xil ti, e nave hokan ti. Ien nakat ti namanon, e nanem pupu ti usil naha xa tamal ti xa moletin sav tepol ni mini. ^{b6}Moletin ak navesi xi ti ve holesok xil xa misa, e ihesi xi mak mu ve holesok xil xa nggusil reitinen na Hi. ^{c7}Eheien di misak ni xir rakila rasoh vaxeih e melele xil vus, e neketen nar ixehi vehakut. Eheien di misak ni xir rakila raling nenesien nar e Hi vatel hitxatien nan xil, e rinamot ti, neta sav xa naha imei. ^d

⁸Sexien te eheien ita vehakut e misakras vakesae vatova. E sexien xa labit kil sepinien na Hi, ngan ak ikesae. Sepinien sav xil xa rut moletin xil di labithiteni, xi ikesae. E kilakilen xa langguri nggo Ninin Eo, xi mun ikesae. ⁹Vengan naha xa rakila, e naha xa rabit lenen ni, Hi pisen ni vuteili tang mi xir. ¹⁰E melele xa Hi ipisen holesok xil vus mi xir, vuteili xa tepisen ni mi xir tuei, ha ikesae.

¹¹Melele xa natehe tutut horamue tamu, natesepin texoni tutut horamue tei, nenemien navan xil texoni tutut horamue, e natenem usil holesok xil texoni tutut horamue. E melele xa namatu

mei nabe tiramue, nastokovein sexien xil na tutut horamue. ¹²Vengan, taxeak, ratakil vuol ni ti holesok xil na Hi. Ngan ak nggoni ngan xa di rasak tangan rapus nini holesok xil ak e tutut kilas tei. E melele xil xa ti imei, ti ripus vuol ni holesok xil ak ni metexir vari. Reitin, naha xa rakila taxeak be hokorong tang. E, e melele nen ak, rikil vuol ni holesok xil ixoni ngan taxa Hi mikil vuol ni xir ngamu. ^e

¹³E xosali, xir riti ni ngan taxa ti ripol ni sexien xatel ak: ti riling neketen nar e Iesu, ti riling nenesien nar e Hi xa iteh meulien e xir, e eheien nar iti mi Hi e mi moletin sav xil. E ngan xa eilep mak mu e sexien xatel ak be sexien te eheien. ^f

**Sanien tangan lasep kil sepinien na
Hi mikila vatutou ni moletin
nan xil mili sanien xa di
lasepin ni hisit sepinien sav xil**

14 Xamim mutit ni ngan taxa ti mupisen eheien mi moletin sav xil, e iemim ihei sanien xil xa Ninin na Hi di misa ni mi moletin nan xil. E sanien xa iemim ihei mak mu tangan muhuri ihe sanien xa isak ni moletin mikila vasesep kil sepinien na Hi. ^{g2}Moletin xil xa langgur sanien xa misak ni xil lakila lasepin ni hisit sepinien sav xil, xil latasepin ni ti mi moletin sav xil, di lasepin ni mi Hi kestang. E di lasep usil holesok xil xa minggus nggo xeihen na **Ninin Eo**. E moletin tovuol xa valong kil naha xa di lasep usili. ³E moletin xa di misep kil sepinien na Hi di misepin mi moletin xil. E sepinien nan di dutou ni xil, misa xeihen mi xil, e di pet rat nenemien nae. ⁴Ngan xil xa di lasepin ni hisit sepinien

[†]13:3 Sepinien matu sav tei bit, “*namaen rat tenbeok tangan upang ia len ni vengan xa di nanggusil xat Iesu ...*”

^z13:2 Mat 17:20; 21:21; Mak 11:23 ^a13:3 Mat 6:2 ^b13:5 Plp 2:4; Sak 8:17

^c13:6 Rom 12:9 ^d13:7 Pro 10:12; Rom 15:1; 1Pit 4:8; 1Kor 9:12 ^e13:12 2Kor 5:7; Tem 1:23 ^f13:13 1Tes 1:3; 1Sion 4:16 ^g14:1 1Kor 12:31; 14:39

sav xil dit ladutou ni xil tang. E ngan xil xa di lasep kil sepinien na Hi di ladutou ni moletin xil vus te sias. ⁵Inou ieok bei tangan xamim vus mukila musepin ni hisit sepinien sav xil. E ieok bei mak mu tangan muhur sanien xa isak ni xamim mukila musep kil sepinien na Hi. Reitin, moletin xa mikila vasep kil sepinien na Hi di dutou ni moletin sav xil mili ngan xil xa di lasepin ni hisit sepinien sav xil tang. Hisit sepinien sav xil bos xosxa moletin tei da xa mikila vasep kil koute teni mi moletin sav xil tangan itutou ni meulien nae. ^h

⁶?Tuxoli e hinoxoli xil, xosxa nihat e nisepin mi xamim ni hisit sepinien sav xil xa mutakil ti, ma ngan ak ikila itutou ni xamim? !E-e, misakras! ?E xosxa nihat tangan nipisen neta tei na Hi mi xamim, mu nisa kilakilen tei, mu nisep kil sepinien na Hi, mu nipispisi ni neta tei mi xamim, ma ngan ak ikila itutou ni xamim? !Io, itutou ni xamim! ⁷Kitar del iukalele[‡] lube neta lu xa meulien nalu tovuol, e dit ludei vole usil nenemien ak mi xir. Xosxa moletin tei bas tei xalu e takixatxat string nen ti vaxeih, moletin xil lasakras lalong kil tun nen. ⁸?E xosxa moletin tei bui amaru[¶] tangan vakes moletin te vaeen xil tangan lasak xat xil ve vaeen, e tasa kuh rae teni ti, visi iaxa mikila isak xat xi ven? Moletin tovuol. ⁹Usil suse nen tak, xosxa tei xamim di misepin ni hisit sepinien sav tei xa moletin xil latakil ti, xil lasakras lalong kila. Xi di misepin votei tang. ¹⁰Be reitin xa hisit sepinien sav xil labe holu e ut etan, e xil vus koute teni di. ¹¹E xosxa moletin tei bemei visal nou e misepin minou nggo hisit sepinien tei xa natakil ti, xi be ngan halesav tei minou, e inou mun nabe ngan halesav tei mini. ¹²Ma, vengan xa

iemim bei pupu tangan muhur sanien xil xa Ninin Eo di misa ni, musak pisi tangan muleh sanien xil mak mu xa lakila litutou ni moletin xil te Sias na Hi.

¹³Ma bos xa moletin xa nggur sanien tangan ikila isepin hisit sepinien sav xil isis mi Hi tangan ihur sanien mun xa ikila isep kil koute teni. ¹⁴Vengan xosxa nasis nggo hisit sepinien sav tei, ninin navan di misis, e nenemien navan tapol ni ti neta. ¹⁵?Ma ti nipol ni naha vari? Bos tangan nitit ni ngan taxa ti nisis itel ninin navan, e nisis itel nenemien navan mun. Bos tangan nitit ni ngan taxa ti nikikei itel ninin navan, e nikikei itel nenemien navan mun. ¹⁶Xosxa moletin tei di misepin ni sepinien sav tei xa nggo ninin tang tangan vapet rat Hi, ma moletin sav xil xa lalonge lasakras lalong kil koute teni, e lasakras laviteni lavit, “Reitin,” ven. ¹⁷Vengan tave ti neta xosxa sisen nan te memesien momal, tatutou ni ti mosav xil.

¹⁸E rin navan, names Hi xa maen nou tangan nasepin ni hisit sepinien sav xil mili xamim vus. ¹⁹E melele xa Kristin xil lamei vituei tangan lasukul, nanemi nabit ihos mak mu xa nisa huit sepinien ihe lim tang xa moletin xil ti lilong kila xa ipispisi mi xil, mili ngan xa nasa hisit sepinien sav tei vahe taosen he xalu (10,000) xa mosav xil linalong kil ti.

²⁰Tuxoli e hinoxoli xil, munanem ti mun usil holesok xil ak naxoni ngan xa mube tutut horamue xil. Muhe tutut horamue xil e rin te tesaen kestang, e, e rin te holesok xil na Hi, ti munem usili ixoni ngan xa mube moletin matu xil. ^{j21}E sepinien na Hi tetiamu, latetisi latehit, “Nggo moletin xil xa di lasepin ni hisit sepinien sav xil e nggo vulonge ngan halesav xil mun,

[‡]14:7 sepinien xati teni be *flut e harp*

[¶]14:8 sepinien xati teni be *bugle*

^h14:5 Nam 11:29

ⁱ14:15 Efes 5:19

^j14:20 Efes 4:14; Plp 3:15

inou, Hi Suv, nisepin mi moletin navan xil. E neta sav xa mak, e melele nen ak mun, xil linalong xat nou ti.” (Aes 28:11-12)^k

²²Ma, sanien te hisit sepinien sav xil be simeleleen tei tangan vapisen xeihen na Hi mi ngan xil xa latahur ti neketen, e tave na ngan xil ti xa langgur neketen ngamu. E sanien tangan lasep kil sepinien na Hi di pisen xeihen na Hi mi ngan xil xa langgur neketen ngamu, e tave na ngan xil ti xa neketen nae tovuol. ²³Xosxa xamim vus te sias mumei vituei e xamim vus mudit ni ngan xa di musepin ni hisit sepinien sav xil, ngan xil xa latakil ti sexien ak, mu ngan xil xa neketen nae tovuol xa ladi, xil linemi lihit xamim vus mutalang pupu. ¹²⁴E xosxa xa xamim vus di musep kil sepinien na Hi, ma ngan xil xa limei lipus kil tesaen nae e lipus kila xa momal tangan lihur longpangasien ven xosxa linaviles meulien nae ti. ^{m25}Moletin xil ak likila xa Hi mikil nenemien xil vus nae xa di minggus. Imak, ma limot mi Hi e lihiteni lihit, “O reitin li, Hi dat visal xamim.”ⁿ

Pispisien usil sexien xil xa momal tangan Kristin xil lihusili melele xa lamei vituei tangan lamot mi Hi

²⁶?Tuxoli e hinoxoli xil, naha vari iaxa di mupol ni melele xa mumei vituei tangan mumot mi Hi? Mupol ni imak: xamim kekes isa neta tei tangan itoutou ni moletin xil te sias ni. Nggoni, rut xamim lisa sisien tei xa moletin xil lakila lakikei ni, e moletin tei ipispisi, tei ihit kil sepinien na Hi, tei mun isepin ni hisit sepinien sav, e tei mun tesav xa milong kila ihit rat koute teni. ^{o27}Xosxa rut moletin xil iexil bei tangan lasepin ni

sepinien sav, ma ihe moletin lu tang xa lalisepin, e nali tol ti: tei itiamu, ti, tei mun, e moletin tei ihit kil koute te naha xa latbiteni. ²⁸E xosxa moletin tovuol xa mikila vahit kil koute te sepinien natel, bos tangan latitit votei e vitueien namim. Xatel latisepin ni sepinien sav natel mi Hi kestang melele xa latiti tasexatel. ²⁹Mumaen moletin lu mu tol mei latsep kil sepinien na Hi, e xamim mulepis sepinien natel. ^{p30}E xosxa Hi pisen kilakilen mi moletin tei mun xa di dotan del xamim, ma ngan xa di misep kil sepinien na Hi ingel, e imaen ngan xa dotan isa sepinien nan mu. ³¹Xamim vus mukila musep kil kekes ni sepinien na Hi tangan xamim vus mukila muhur tutouen ixo en. ³²Ngan xil xa di lasep kil sepinien na Hi lakila latal xat sepinien nae. ³³Vengan Hi nar tave Hi ti xa di pol lualu ni holesok xil. Xi be Hi tei xa di pol ni holesok xil vus nggusil suse xa momal.

Bos xa muhusil sexien xa di lapol ni e sias xil vus. ³⁴Atou xil litit votei e vitueien xil te sias. Xamem eloheoh xil matamaen atou xil ti tangan lasepin e sias. E bos xa xil ti limerere ni vat nae xil ixoni ngan xa **rae na Mosis** mun di biteni. ^{q35}Xosxa iexil bei tangan lakil ti neta tei xa di lasep usil e sias, xil ti lisis tiramue nae xil ni sung e tim. Vengan ihe unounen xosxa atou tei isepin melele xa di lasukul e sias.

³⁶?Midep vari? ?Melele xa sepinien na Hi testal rohon, testal texo xamim moletin xil te hal Korin kestang? ?Mu mei tetuxoh xamim kestang? !E-e! ³⁷E xosxa tei xamim minemi bit xi be **provet** tei na Hi, mu Ninin na Hi da en, xi ikila xa naha xa nadisi mi xamim be naha xa Suv Iesu vari di misemae ni. ^{r38}E xosxa moletin

^k14:21 Dut 28:49 ^l14:23 Pol 2:13 ^m14:24 Sion 16:8

ⁿ14:25 Aes 45:14; Dan 2:47; Sak 8:23; Sion 4:19

^o14:26 1Kor 11:18; 12:8-10; Efes 4:12; Efes 5:19 ^p14:29 Pol 17:11; 1Tes 5:21

^q14:34 Sen 3:16; 1Kor 11:3; Efes 5:22; 1Tim 2:12; Taet 2:5 ^r14:37 1Sion 4:6

tei bit nakil ti sepinien navan, ma xamim mun munakil ti moletin ak.³⁹ Ma, tuxoli e hinoxoli xil, iemim ihei mak mu tangan musep kil sepinien na Hi, e munasikoe xol ngan xil ti xa di lasepin ni hisit sepinien sav xil.⁴⁰ E, e holesok xil vus xa di mupol ni, mupol ni itel sexien xa momal e ihusil suse xati teni.⁵

Vatit neketen nar

15 Tuxoli e hinoxoli xil, ieok bei tangan munem rilomun ni longeongen hos xa natehithiteni mi xamim. Longeongen hos ak, mutehuri tehe namim e mutesoh texeih en.² Longeongen hos ak xa natehiteni mi xamim, di miteh meulien e xamim melele xa muling neketen namim nggeih en. E xosxa muhusil suse sav, neketen namim mei ihe neta sav tang.

³Vengan longeongen hos xa eilep pupu xa inou natehuri, natesa rati tehat mi xamim. E sepinien teni xil mak: Iesu temat ve *tesaen* nar nggusil naha xa latetisi tete Vanuvei Eo.⁴ Melele xa temat, latetihin ni. E melengien tol nen, Hi tetal rati ra maten nggusil naha xa latetisi tete Vanuvei Eo.⁵ Melele xa temea rilomun, xi testal mi Pita, di, mi eloheoh nan xa latehe lu e le tei (12).⁶ Di, vatei, xi testal mi ngan xil xa di latehusili xa latehe handred lim (500) xa ladi rute tei takes. Holu e xil lameul tamu ladi taxeaak. E rute ngan xil lalel tuei.⁷ Di, testal mi Temis,⁸ e tetutou ni, testal mi *eloheoh* nan xil vus.⁸ Di, late-manin ni xa, tetutou ni xil vus, Iesu testal minou, nggoni ngan taxa late-manin ni

tuvava tei xa bemei e melele xa tamal ti tangan vastal en.⁹ Ve rin ak, di nanemi nabit nabe hokorong pupu ni eloheoh sav xil, e nalonge nggoni ngan xa natapin ti tangan namur his te eloheoh venggan, tetiamu, natehas purun moletin xil te Sias na Hi.¹⁰ E ve eheien hos na Hi, inou mei nabe eloheoh tei reitin. E eheien hos xa xi tepisen ni minou tave neta votei ti. Vengan inou napol nggeih mili eloheoh sav xil. E tave nou ti kestang iaxa di napol, e be eheien hos na Hi xa di pol nggo nou.¹¹ Ma, xosxa longeongen hos ak usil Iesu Kristo texo nou, mu texo eloheoh sav xil, ngan ak be naha xa xamem vus di mabithiteni, e ngan ak be naha xa xamim vus mei muteneket en.

Mea rilomunen na Iesu ra maten be vatit neketen nar

¹²Xamem di mabithiteni xa Iesu temea rilomun ra maten. ?Mak, ma veneh rut xamim di labiteni labit ngan xil xa lalel lasakras lamea rilomun ra maten? ¹³Vahit ngan ak vahe reitin, ma Iesu mun misakras vamea rilomun ra maten. ¹⁴E xosxa be reitin xa Iesu tenamea rilomun ti ra maten, longeongen hos xa xamem di mabiteni mi xamim be neta sav tang, e neketen namim mun be neta sav tang. ¹⁵E xosxa vamak, ma sepinien namem xil usil Hi mun be te luvosen tang, venggan mabiteni xa Hi iaxa tetal rat Iesu ra maten. E xosxa be reitin xa ngan xil xa latelel lasakras lamea rilomun ra maten, Hi mun misakras vatal rat Iesu ra maten. ¹⁶Vengan xosxa ngan

^{§15:7} Temis ak be tuneli Iesu xa midis Temis e xa misepin usili e Mat 13:55; e Kal 1:19.

^{§14:40} 1Kor 14:33; Kol 2:5 ^{†15:3} Aes 53:8-9

^{¶15:4} Sam 16:10; Hos 6:2; Siona 1:17; Mat 12:40; Pol 2:24-32 ^{¶15:5} Luk 24:34; Mat 28:16-17; Mak 16:14; Luk 24:36; Sion 20:19 ^{¶15:7} Luk 24:50

^{¶15:8} Pol 9:3-6; 1Kor 9:1 ^{¶15:9} Efes 3:8; 1Tim 1:15; Mat 5:19; Pol 8:3

^{¶15:10} 2Kor 6:1; 11:5,23 ^{¶15:15} Pol 1:22; 4:33; 5:32

xil xa lalel lasakras lamea rilomun, Iesu mun misakras vamea rilomun ra maten. ¹⁷E vahit Iesu tenamea rilomun ti ra maten, ma neketen namim vahe neta sav tang. Vamak, ma xamim muve muis tamu vatel xat tesaen xil namim. ¹⁸E xosxa vamak, ma ngan xil xa laneket e Iesu xa latemat ngamu, xil mun lakesae vatel xat tesaen nae xil. ¹⁹E xosxa nenesien nar e Iesu di dutou ni xir e meulien ak kestang, e misakras vatutou ni xir e meulien xa ti imei, ma neketen nar be neta sav tang, e momal tang tengen ralonge vasa vali moletin sav xil.

²⁰E be reitin xa Iesu temeaa rilomun ngamu ra maten. E mea rilomunen nan di pisen ni xa ngan xil xa lalel, xil mun limea rilomun. Iesu nggoni anien hu xa laleh rohon ni xa di pisen ni xa lileh anien sav xil holu mun listal ra naho ak. ^{b21}Maten temei mi xir texo moletin tei takes. E nggusil suse nen ak, mea rilomunen ra maten mun temei mi xir texo moletin tei takes. ^{c22}Ve naha xa **Adam** tepol ni, xir xa rastal ranggo en, ramat nggoni xi. E, ve naha xa Iesu tepol ni, ngan xil xa labisti dela limea rilomun ra maten ixoni xi. ²³E xir kekes, rimea rilomun e melele xati teni xa momal: Iesu temeaa tetiamu, e melele xa itilomun imei, xir sung xa rabe nan, rimea rilomun. ^{d24}E itutou ni melele nen ak, hoxalite te holesok xil vus imei. E melele nen ak, Iesu ivae itel ngan xil vus xa lasa xa labe tellep e langgur xeihen, e ihas tan ni xil vus. Ti, lelaxatien te holesok xil vus, xi isa ni mi Hi Tamer. ^{e25}Nggusil nenemien na Hi, Kristo ilaxat holesok xil mu

ituxoh melele xa elu nan xil vus liti pe hen. ^{f26}E elu kor xa Iesu ihas tan ni ihe maten. ^{g27}Ixoni ngan xa Vanuvei Eo di biteni bit, “*Hi miling holesok xil vus xa tepol ni di pe hen.*” (Sam 8:6) E melele xa biteni bit, “*holesok xil vus xa tepol ni di pe hen,*” rakila xa taviteni ti xa Hi teling xi tasen teti pe he Natneli. ²⁸Ma melele xa Hi isak ni holesok xil vus iti pe he Natneli, Natneli iling xi mun ite pe he Hi. Ixo suse ak, ma Hi vari tang ihe eilep te holesok xil, e moletin xil vus likil xeihen nan.

²⁹?E rin tei mun usil mea rilomunen, xosxa be reitin xa moletin xil lasakras lamea rilomun ra maten, veneh ma rut moletin xil di labe **baptaes** ni xil e rin na ngan xil xa lalel ngamu? ^{**} ³⁰?E xosxa be reitin xa moletin xil lasakras lamea rilomun ra maten, veneh ma inou del eloheoh sav xil di maba tengen di mavur sakpurunien xil vehakut? ^{h31}Reitin, vehakut, di nabisu ni maten. Tuxoli e hinoxoli xil, naha xa di nabiteni mi xamim taxeak be reitin nggoni ngan taxa be reitin xa di nasep koai ve neketen xa xamim mungguri e Iesu Kristo, Suv nar. ⁱ³²Vatei, mol-Efeses xil mei latekapis xol nou e latesak tengen latal papas nou ve sepinien na Hi xa di natehiteni mi xil. Reitin, latepol tesa minou texoni ngan xa labe kuli reran xil ?E xosxa natepol ni tetel nenemien xil tang te ut etan, e moletin xil lasakras lamea rilomun ra maten, ma itutou ni nou itep? Vengan xosxa imak, ma vahos mak mu vahit ravusil nenemien matu na Siu xil xa latenemi latehit lilel xa bit,

****15:29** Rut moletin xil lanemi xa Hi iteh meulien e moletin tei xosxa ihe baptaes. Neta sav xa ngan ak tave reitin ti, mol-Korin xil labe baptaes e his famle nae xil xa amat ngamu, vangan xa lanemi xa isak ni famle nae xil lihe ut nesao.

^b15:20 Kol 1:18 ^c15:21 Sen 3:17-19; Rom 5:12,18

^d15:23 1Kor 15:51-52; 1Tes 4:16; Rev 20:5 ^e15:24 Dan 2:44

^f15:25 Sam 110:1; Mat 22:44 ^g15:26 Rev 20:14; 21:4

^h15:30 Rom 8:36; 2Kor 4:10-11 ⁱ15:31 Rom 8:36; 2Kor 4:10-11

“Rianien e rimun,

vengan xa visuvong, rilel.” (Aes 22:13) ^j

³³ Munamaen tua namim xil ti linalu- vos xamim e linahiles nenemien hos namim mei nasa. Sexien nae nggoni sepinien matu ak xa bit “Melele xa omos del moletin tesa xil, meulien hos nam mei ihe muis.” ³⁴ Ma, muhiles nenemien namim xil mei lihos rilomun e munapol ni ti mun *tesaen* namim xil. E ketehen navan, sexien namim xil di pisen ni xa rut xamim latakil ti Hi vari. Ngan ak be unounen mi xamim. ^k

Melele xa rimea rilomun ra maten, tenbexir ihiles mei isav

³⁵ Xosxa moletin tova isisi ihit, “?Molet in xil limea rilomun ra maten itep? ?E melele xa limea rilomun, tenbexil itep vari?” ³⁶ Ma moletin ak, nenemien nan tovuol. Vengan moletin xil vus lakil rin ak: melele xa mulih utiei tei e tan, utiei ak imat mu tangan isak ni neta tei ituv istal ixo en e imeul. ¹³⁷ E melele xa mulih neta tei, mutalih ngan ti xa meul ngamu be eilep. !E-e! Mulih utute xil xa nggoni kon, bin e kavis. ^{††} ³⁸ E di Hi sung tangan isak ni imeul ihe eilep itep. Nggo hisit utiei xil vus, Hi misak ni xil di lameul nggusil sexien xati teni xil. ^m

³⁹ E ngan ak nggoni holesok xil xa di meul xa tenbexil di. Tenbe moletin xil misav ni tenbe vongoro xil, e tenbe vongoro xil mun misav ni tenbe tuman xil. E tenbe tuman xil mun misav ni tenbe meseo xil. ⁴⁰ E usil nenemien nen tak, holesok xil xa ladi tilang hat, lasav ni holesok xil xa ladi ut etan. Holesok xil te tilang hat labos nggo sexien tei xa misav ni holesok xil te ut etan. ⁴¹ E xil

mun lasav ni xil mun tang. Miehen te eai misav ni miehen te aveti, xa misav mun ni miehen te hitu xil. E hitu xil mun, miehen nae misav ni xil mun tang.

⁴² Ma, usil nenemien ak, tenbe ngan xil xa lalel isav ni tenbexil xa lihuri melele xa limea rilomun ra maten. Melele xa ladihin tenbe moletin tei, tiei nan ivo ixoni utiei tei xa lalihi. E melele xa molet in ak imea rilomun ra maten, tenben isav tangan ita vehakut e misakras mun vamat. ⁴³ Melele xa ladihin moletin tei, lapus tiei nan nggoni neta tei xa tavos ti e memerou tang. E melele xa imea rilomun ra maten, lipus tenben ixoni neta xa bos pupu e xeihen da en. ⁿ⁴⁴ Melele xa ladihin ni, tiei na moletin ak pipin tangan vatat ut etan, e melele xa imea rilomun ra maten, tenben ak ipin tangan ite ut nesao. Vengan tenbe moletin te ut etan da, rakila xa tenben te ut nesao mun da. ^{45 o46} Hi tenasa ti mu tenbexir mi xir xa vahe te ut nesao. E-e. Tetiamu, xi tesa tenbexir mi xir xa pipin tangan riti e ut etan. E itutou sung, xi isa tenbexir mi xir xa ipin tangan ritit e ut nesao. ⁴⁷ Tetiamu nousav, Hi tepol kokot ni tenbe Adam, moletin xa tetiamu, ni tan te ut etan. E Adam xa teme tetutou, xi texo ut nesao. ^{p48} Ngan xil xa ladi e ut etan langgoni Adam xa Hi tepol ni texo tan. E ngan xil xa ha liti e ut nesao lixoni xi xa texo ut nesao. ⁴⁹ Nggoni ngan taxa xir ranggur nini Adam, moletin xa Hi tepol ni texo tan, xir mei rihur nini Kristo, molet in mun xa texo ut nesao. ^q

⁵⁰ Tuxoli e hinoxoli xil, naha xa di nabiteni mak: xir rasakras ha ravur vonexir e ut nesao xa Hi be suv toto en vatel xat tenbexir te ut etan tang.

^{††}15:37 sepinien xati bit, *uit mu gren sav tei*

^j15:32 Aes 56:12; Luk 12:19-20

^k15:34 Rom 13:11; Efes 5:14; Pol 26:8; 1Kor 6:5 ^l15:36 Sion 12:24

^m15:38 Sen 1:11 ⁿ15:43 Plp 3:20-21 ^o15:45 Sen 2:7; Sion 6:63; Sen 2:7; Sion 6:63; 2Kor 3:16,17 ^p15:47 Sen 2:7 ^q15:49 Sen 5:3

Vengan tenbexir xa mikila vamat e vavo misakras vaha vati e rute xa holesok xil lasakras lalel en. ^r

⁵¹ Muteong kuhi e nisep kil nenemien na Hi xa texus tetiamu xa xi di pisen ni xosali: nave xir vus ti iaxa rilel, e xir vus tenbexir ihiles. ^{s52} Mei istal imak: vatova, melele xa lihui kor ni amaru na Hi, ngan xil xa lalel limea rilomun ra maten e linallel ti mun. E xir vus xa rameul tamu radi, tenbexir ihiles. Holesok xil ak mei istal imanon tang ixoni melele taxa mubel xat metemim, di, muketeh mun. ⁵³ Vengan ixoni ngan taxa rileh rerat tenbexir xa mikila lalel e lavo tangan rixoles ni xil itel tenbexir xa misakras lalel e lavo. ^{t54} Melele xa ngan ak mei istal, sepinien xa de Vanuvei Eo mei istal ihe reitin xa bit,

“*Maten, Hi bas tan ni ngamu.*” (Aes 25:8)

⁵⁵ “*Maten misakras vahas tan ni xir.*

Maten tahir ti xeihen tangan vapurun xir.”

(Hos 13:14)

⁵⁶ Naha xa misak ni maten mikila vapurun moletin xil be tesaen. E tesaen nggur xeihen melele xa rakil **rae xil na Hi** e ranggur xotehi. ^{u57} E rames Hi vengan naha xa Iesu Kristo, Suv nar, tepol ni misak ni xir rabas tan ni xeihen te tesaen e te maten mun. ^v

⁵⁸ ^w Mak, ma tuxoli e hinoxoli xil, venggan mea rilomunen be reitin e rabas tan ni xeihen te tesaen e maten, musoh ixeih e munaxeal ti e neketen namim. Vehakut mupol ixeih ni polien xil na Hi Suv venggan xa mukila xa polien namim nave polien votei ti.

Pispisien tangan mol-Korin xil livue xat xil tangan lisa tutouen mi Kristin xil e hal Serusalem

16 Bos tangan nisep usil naha xa mutetisi usil mani xa di muso viton ni tangan vatutou ni moletin na Hi xil e hal Serusalem. Xamim mupol ni ixoni ngan xa natehiteni mi moletin xil e sias xil e provins te hal Kalesia. ^{x2} E Sande te wik xil vus, xamim kekes ileh rerat rut mani ihusil naha xa xi mikameti e polien nan e iserev kuhi iti. Imak, ma melele xa nihat, munalang ni ti mun mani xil ak. ^{y3} Melele xa nihat, nitis uvei te sepkilaen ve ngan xatel xa xamim muhosei xatel tangan ha latileh sanien namim xil ihe hal **Serusalem**. ⁴ Xosxa napusi bos tangan inou mun niha, ma xatel ak latihusil xat inou.

Pol misep usil kakaoen nan tangan iha ipus mol-Korin xil

⁵ Be reitin xa inou nihat nisao ni xamim. E itiamu, niha nika pas provins te hal Masedonia. ^{z6} Xos nihat nite visal xamim ihe vuteili tang, mu xos nita e aveti xil vus te an tesa. Itutou ni, xamim mukila mututou ni nou e suse navan tangan nihe rute xave xa nihit niha en. ^{a7} Ieok ti tavei xa namaat e napas xamim vahe te melengien vahis tang. Xosxa Suv imaen ni, ieok bei tangan nita ihe teviei itel xat xamim. ^{b8 c9 d}

¹⁰ Xosxa Timoti ihat istal mi xamim, muhur pilei tangan xi nanexo ti melele xa ite visal xamim venggan xi mun di pol mi Suv Iesu nggoni nou tang. ^{e11} Ma, moletin ti nasin ni. Mututou kuhi ni ten-

^r15:50 1Kor 6:13 ^s15:51 1Tes 4:15-17; Mat 24:31 ^t15:53 2Kor 5:4

^u15:56 Rom 7:13; 6:14 ^v15:57 Rom 6:14 ^w15:58 2Kron 15:7; Rev 14:13

^x16:1 Pol 11:29; Rom 15:25-26; 2Kor 8:9; Kal 2:10 ^y16:2 Pol 20:7 ^z16:5 Pol 19:21 ^a16:6 Rom 15:24; Taet 3:12 ^b16:7 Pol 18:21 ^c16:8 Dut 16:9-11; Pol 19:1,10; Lev 23:15-21; Dut 16:9-11 ^d16:9 Pol 19:8-10; Pol 19:8-10; 2Kor 2:12; Kol 4:3; Rev 3:8 ^e16:10 1Kor 4:17; Plp 2:20

gan iha mun e kakaoen nan itel tomat, vengang di nasotili del rut tua xil mun e neketen. ^f

¹²Mutesis nou usil tua nar Apolos. Natesak tangan namiteni mini vahat vasao ni xamim vatel rut tua xil mun e neketen, e xi ien ti tenavei vahat e melele nen ak. Xosxa ipus mesal tova, ma ihat visal xamim sung. ^g

Sepinien kor

¹³E rin te neketen namim, muxouxou kuhi tangan musoh ixeih. Nenemien namim xil ixeih e ulimim nakan ti. ^{h14}E polien xil vus namim, mupol ni itel eheien.

¹⁵ⁱ¹⁶Nasel xat xamim tangan musa sen xamim e mupol itel hisit moletin xil xa lamak itel moletin sav xil vus mun xa di lapol nggeih del xil. ¹⁷Natehesi nou pupu melele xa natepus Stefanas temei

tetel Fortunatas e Akaekas xa latexo visal xamim, vengang xatel latteti visal nou e lattetutou ni nou e rin namim. ¹⁸Xatel latepet rat nenemien navan, e nakila xa latipet rat nenemien namim mun. Ma, mumerere ni hisit moletin xil xa lamak. ^j

^{19k20}Kristin xil vus te rute ak mun labit 'bos makoe' mi xamim. Mupo xat xamim itel eheien na Hi. ¹

²¹Mupusi, del xat heok xati nadis sepinien ak, *Inou Pol nabit bos makoe mi xamim.* ^m

²²Moletin xa eheien nan tara ti e Suv Iesu, halesil tei ita xati. ⁿ

!Suv namem, amei! !Reitin, *maranata!*

²³Eheien hos na Suv Iesu iti mi xamim.

²⁴Eheien navan iti mi xamim vus xa rabisti vituei del Iesu Kristo.

^f16:11 1Tim 4:12 ^g16:12 Pol 18:24; 1Kor 1:12; 3:5-6 ^h16:13 Sam 31:24; Efes 6:10 ⁱ16:15 1Kor 1:16; 1Kor 1:16; Rom 16:5 ^j16:18 Plp 2:29; 1Tes 5:12
^k16:19 Pol 18:2; Pol 18:2,18,26; Rom 16:3; 16:5 ^l16:20 Rom 16:16; 2Kor 13:12; 1Pit 5:14 ^m16:21 Kol 4:18; 2Tes 3:17 ⁿ16:22 Kal 1:8,9

Sepinien xa diamu te

2 Korin

?Visi iaxa tetis uvei ak?

Pol xa tehe eloheoh na Iesu Kristo iaxa tetis uvei ak^o

?Visi iaxa tevuli uvei ak tetiamu?

Pol tetis uvei ak teha mi Kristin xil xa lateti e taon xa mahulong te hal Korin. Dutou ni uvei te 1 Korin xa tetisi teha mi Kristin xil te rute nen tak e aveti Mats e huram 55 AD, xi teha mun tangan vasao ni Kristin xil e sias xil e provins te hal Masedonia.^p

Pol tetis uvei ak teha mi Kristin xil te hal Korin vengan xa telonge xa titsa te luvosen xil di latesa pispisien mi xil xa tenave reitin ti e di latesepsisil hisen.

?Pol tetis uvei ak veneh?

Pol ien tehei tangan vamal ni nene-mien na mol-Korin xil usil polien xa Hi tesa ni mini - Titsa xil te luvosen e hal Korin di latehiteni xa Pol tenave eloheoh xati na Hi ti,^q

Pol ien tehei tangan vamal ni nene-mien na mol-Korin xil usil melele te xeih xil xa Kristin xil di labisu ni e meulien nae - Kristin xil te hal Korin latelonge tesa vengan moletin sav xil latepol ni texeih pupu mi xil ve neketen nae.^r

Pol ien tehei tangan vamal ni nene-mien na mol-Korin xil usil tenbexil hu xa lihuri melele xa limea rilomun ra

maten - Kristin xil te hal Korin latnake reitin ti xa limea rilomun ra maten.^s

Pol ien tehei tangan vamal ni nene-mien na mol-Korin xil usil suse xa limal ni Kristin xil ixo en - Tehusil nene-mien na Pol, Kristin xil te hal Korin latesa pangasien mi tei xil xa tepat tetel atou na tamen.^t

Vatit nenemien tei te uvei ak de 2 Korin 5:17-19

Melele xa moletin tei bisti del xat Iesu Kristo, mei be neta hu. Meulien matu nan mikesae, e xi nggur meulien hu tei. Be Hi iaxa di biles xir mak. Tetiamu, ratehe elu mini. E ve naha xa Iesu Kristo tepol ni ve rin nar, Hi misak ni xir mei radi e tomat dela. Ma taxeak, xi misa polien mi xamem tangan ha ti mavit mesen ni mi moletin xil xa xil mun likila liti e tomat itela. Reitin, Hi tesak ni naha xa Iesu Kristo tepol ni mei be suse tangan moletin xil te ut etan likila liti e tomat itela. Ma Hi navuli ti mun tesaen nae xil nava xat rin nae. E xosali, longeongen hos usil suse te tomat ak, Hi misa ni mi xamem tangan ha ti muhithiteni mi moletin xil vus.

?Naha iaxa di e uvei ak?

1. Pol bit usil nenemien nan e veneh ma tehiles kakaoen nan. (1:1–2:11)

2. Pol bit usil polien xa tepol ni mi mol-Korin xil e mi moletin sav xil. (2:12–7:16)

3. Pol bit usil sanien te tutouen tangan livue xat xil ven. (8:1–9:15)

4. Pol bit usil suse xa Iesu tehosei xi tangan mei vahe eloheoh tei nan, e

^o1:0 2Kor 1:1; 10:1; 2Kor 2:13; 7:5 ^p1:0 Pol 20:1-2; 1Kor 16:5-7; Pol 20:2-3

^q1:0 2Kor 3:1-6; 10:1; 11:5; 2Kor 8:20; 2Kor 6:3-13; 10:1–12:18; 2Kor 8:1–9:15

^r1:0 2Kor 1:3-7; 2Kor 1:5; 2:14-15; 2Kor 1:8-11; 2Kor 8:2

^s1:0 2Kor 4:16; 2Kor 4:17–5:10 ^t1:0 2Kor 2:3-6; 2Kor 2:7-11; 7:8-13

melele te xeih xil xa xi di tehisu ni xa pisen ni xa xi be eloheoh tei reitin. (10:1–13:14)

Sepkilaen na Pol usil uvei ak

1 Inou *Pol, eloheoh* na Iesu Kristo ng-gusel nenemien na Hi,^u di nadis uvei ak del Timoti, xa rabe tua e neketen.

Nadis bat mi xamim xa mudi e sias na Hi e taon te hal Korin,^v e iha mun mi moletin tesav xil na Hi xa ladi ut sav xil e provins te hal Akea.

²Nasis tangan Hi Tamer e Suv Iesu Kristo lalisa eheien hos e tomat nalu mi xamim.^w

Pol memes Hi vengang xa misikoe xol meulien nan e melele xil te xeih

³Xamem di masa memesien ba mi Hi xa be Tame Iesu Kristo, Suv nar. Xi be Tamemem xa pisen esaeen nan mi xamem e di pet rat nenemien namem.^{x4} Reitin, xi di pet rat nenemien namem e melele te xeih xil vus xa di mabisu ni. Mak, ma del nenemien hos xa Hi di pet rat xamem ni, xamem mun makila ti mupet rat nenemien na mosav xil mun xa di labisu ni melele te xeih xil.^{5y6} Xamem, eloheoh xil, di mabisu ni melele te xeih xil tangan mukila mupet rat nenemien namim e mututou ni neketen namim. Reitin, melele xa Hi pet rat nenemien namem, pol ni mak tangan xamem mukila mupet rat nenemien namim melele xa di mubisu ni melele te xeih xil e mupol ni nenemien namim be teviei. E bos xa mukila xa melele te xeih xil xa xamim di mubisu ni nggo he moletin sav xil nggoni ngan taxa xamem mun di mabisu ni.^{z7} Mak, ma tave ti neta xa malonge xa xamim di mubisu ni melele te xeih xil ng-

goni ngan xa xamem di mabisu ni, makil kuhi xa Hi di pet rat nenemien namim nggoni ngan xa xi di pet rat nenemien namem.

⁸Tuxoli e hinoxoli xil, mabit mavit mesen ni mi xamim xa, melele xa mateti e provins te hal Esia, moletin holu latepol ni te xeih mi xamem. Melele te xeih xil xa di matehisu ni tehas tan ni xamem, ma matnanemi ti mun mavit mameul.^{a9} Nenemien namem temot texoni moletin tei xa langguri be von koten e lakin maten mini. E matepus kila xa holesok xil ak testal tangan vasak ni xamem manaling ti mun nenesien namem e xamem tang. Ngan ak mistal tangan vasak ni xamem maling nenesien namem e Hi xa di misak ni moletin xil lamea ra maten.¹⁰ Reitin, Hi teteh meulien e xamem ra melele te xeih xil xa tehe te maten tang. Mak, ma mapus kila xa Hi nen tak mikila vateh meulien e xir ra holesok sav xil mun. Ve rin ak, xamem maling nenesien namem nggeih di en xa iteh meulien e xir mun e melengien sav xil xa di bemei.^{b11} Hi ipol ni imak vengang xa xamim mudutou ni xamem nggo sisen xil namim. E ixo sisen xil namim e sisen na mosav xil mun ve xamem, moletin holu ti limes Hi melele xa ti lipus tuxolxatien xil xa xi ti isa ni mi xamem.

Pol misep kila xa veneh ma tenava ti tangan vasao ni mol-Korin xil

^{12c13}Naha xa di nadisi bat mi xamim be holesok xil xa mukila muvuli e be temale tang tangan mukila. E ieok bei tangan mukilakil kuhi ni.^{d14} E tave ti neta xosxa mutakil kuh ti mu xamem, e melele xa Suv Iesu itilomun en, xamim mei ti musep koai ve xamem ixoni ngan

^u1:1 1Kor 1:1 ^v1:1 Pol 18:1 ^w1:2 Rom 1:7; 1Kor 1:3 ^x1:3 Efes 1:3; 1Pit 1:3; Rom 15:5 ^y1:5 Sion 15:18-21; 16:33; Sam 34:19; 94:19

^z1:6 2Kor 4:15,17 ^a1:8 Pol 19:23-41; 1Kor 15:32 ^b1:10 2Tim 4:18

^c1:12 2Kor 2:17; Hib 13:18; 2Kor 2:17; 1Kor 1:17 ^d1:13 2Kor 5:12

taxa xamem mun di masep koai ve xamim. ^e

¹⁵⁻¹⁶^fVengan xa nake reitin xa xamim mubesi xamim ve nou, melele xa natehe reling taon te hal Efeses, nateling nene-mien navan tangan nihat nisao ni xamim e hal Korin mun. Di, natenemi natehit niha nipol e provins te hal Masedonia. E melele xa polien e rute ak ivus, ma nilomun nihat tangan mukila mahur tuxolxatien te polien e sepinien navan vatei mun. E imak, ma natenemi natehit mukila musil nou nihe provins te hal Sudea itel tutouen namim. ¹⁷E kakaoen navan xa natehit xati tangan nipol ni tehiles, ma natnavat ti mun napus xamim vaxoni ngan xa natehiteni. ?Mak, ma midep? ?Xamim mukila munesi e sepinien xil navan? Nalonge xa mubit di napol ni hitxatien xil navan nggusil nenemien na moletin xil tang te ut etan. Munemi mubit inou nabe moletin te luvosen tei xa di miluvos bit, “reitin nipol ni netak,” e dutou ni, di nabit, “e-e, ninapol ni ti mun.” ^{g18}!E tave reitin ti! Natave moletin te luvosen ti. Nggoni ngan xa Hi di pol vuol ni hitxatien nan xil e misakras valuvos, sepinien namem xil mun tave luvosen ti. E sepinien xil namem, melele xa mabit, “io, ha mupol ni netak,” masakras mun mavit, “e-e, munapol ni ti mun.” ¹⁹Io, di mataluvos. Vengan xa Iesu Kristo, Nat Hi xa Saelas, Timoti, e inou di matsep usili mi xamim, xi di taluvos. Vehakut, melele xa Iesu bit, “Reitin, nipol ni netak,” xi di pol vari ni. ^{h20}Io, di mataluvos, vengan Hi di taluvos. Hitxatien xil vus nan, Iesu pol ni xil ngasen mei mistal be reitin. Ve rin ak, melele xa rasis mi Hi, rabit, “reitin” e his Iesu Kristo tangan rapet rat his Hi xa be eilep

xa be eilep. ⁱ²¹E Hi vari tang iaxa misak ni xamem del xamim mun rasoh nggeih e neketen nar melele xa rabisti del Iesu Kristo. E Hi vari di tehosei xir mei rabe nan. ^{j22}Xi tetis xat hisen e meulien nar, e tesa **Ninin Eo** nan mi xir tangan mei ite tinexir. Hi pol ni mak tangan vapisen ni xa xi ti isa vuol ni holesok xil xa tehit xati mi xir. ^k

²³Mak iaxa natnavat ti mun napus xamim e taon te hal Korin vengan xa, vahit namaat, ma nasepin mi xamim vaxeih mu e nasak ni xamim mulonge vasa mun. Hi mikila xa sepinien xil navan be reitin. ^{l24}Xamem iemem ti tavei mave eilep namim tangan masemae ni xamim mupol vahusil nenemien namem vehakut, vengan di musoh nggeih e neketen namim ngamu. Xamem iemem bei mak mu xa ti mapol vituei vatel xamim tangan masak ni xamim mei mupolu ni sien. ^m

2 Ma, napol ni nenemien navan tangan ninavat ti mun tangan munalonge ti mun nasa ve selxatien navan xil. ⁿ²?Vengan, xosxa nipol ni xamim mulonge isa, ma visi iaxa da tangan ipol ni nou nihesi nou? Moletin ihe tovuol, vengan napol ni xamim mulonge misa pupu tuei. ³Ma natetis uvei tei tehat mi xamim tangan mukila muviles ra sexien namim xil xa tamal ti. Mak, ma melele xa nihat nisao rilomun ni xamim, ninalonge ti nasa ve sexien tesa xil namim. Reitin, ieok bei mak mu xa xamim mupol ni nou nilonge ihos. Nake reitin xa xamim vus mupol vuol ni naha xa nabiteni tangan sien navan mei ihe sien namim. ⁴Melele xa natetis uvei ak tehat mi xamim tangan vasel xat xamim, tinok tepangas e sime-tok temereh tehe tan. E natnatiasi ti ten-

^e1:14 Plp 2:16 ^f1:15-16 Pol 19:21; 1Kor 16:5-6 ^g1:17 2Kor 5:16

^h1:19 Pol 18:5 ⁱ1:20 Rev 3:14 ^j1:21 1Sion 2:27 ^k1:22 Efes 1:13; 4:30; Rom 8:16; 2Kor 5:4-5; Efes 1:14 ^l1:23 Rom 1:9; 2Kor 11:31; Plp 1:8; 1Tes 2:5,10

^m1:24 1Pit 5:3 ⁿ2:1 1Kor 4:21; 2Kor 12:21

gan vasak ni mulong pangas xamim. E-e. Natetisi tangan nasak ni xamim mukila xa eheien navan e xamim mahulong pupu. ^o

**Selxatien tangan Kristin xil
liketeh ihos itel ngan xa
mistokovein tesaen nan xil**

⁵Nabit nisep usil moletin xai xa tepol ni tesa. Neta xa tepol ni, tenapol ni nou ti kestang natelonge tesa. E rin tei, tesaen nan tepol ni xamim vus mutelonge tesa. ^{p6}Pangasien xa xamim holu mutesa ni mini pipin ngamu. ^{q7}Ma, taxeak, bos xa muketeh ihos rilomun mini e mupet rat nenemien nan. Imak, ma longpangasien nan nakutaxol vuol ni meulien nan ti. ⁸Ma, nasis xamim tangan musak ni mei ikila xa eheien namim di en. ⁹Melele xa natetis uvei mi xamim tetiamu, natepol ni tangan napus ti xa xamim mube reitin minou e mukila mulong xat naha xa di nabiteni. E nakameti be reitin xa di mulong xat naha xa di nabiteni. ^{r10}E taxeak, ieok bei tangan xamim muketeh ihos mini. E melele xil vus xa xamim muketeh ihos rilomun mi moletin tei, ma inou mun ti niketeh ihos mini. E xosxa be reitin xa tepol ni neta tei xa tesa teha xat inou, ma, pe met Iesu Kristo, inou niketeh ihos itela tangan itutou ni vitueien namim. ¹¹Di rapol ni mak venggan xa rakil kuh nenemien xil na **Temat** xa bit ti vapangei xir. Ma di misak pisi tangan vasak ni xir rati pas xir e rinavituei ti mun. ^s

**Usil kakaoen na Pol, moletin
holu mei lateneket**

¹²Dutou ni melele xa natesa uvei navan tehat mi xamim, natekakao ba

natehe taon te hal Troas tangan ti namithiten longeongen hos usil Iesu Kristo en. E natekameti xa Suv tesah puiteh minou tangan nipol ni polien nan e rute nen ak. ^{t13}E melele xa natnapus ti tuxoli Taetas xa natesila tehe rute ak, natenexo pupu ven. Ma natesep ling moletin xil te rute ak, e natetilomun natehusil suse navan ba natehe provins te hal Masedonia tangan nalang vesi. ^u

¹⁴E tave ti neta xa di natenexo temak, di names pupu ni Hi. Namesi venggan xi tesak ni Iesu Kristo tehas tan ni elu nan xil, e vehakut xi di del xamem pe met moletin xil. E rute xil vus xa di del xamem maba en, longeongen hos di misak ni moletin xil mei lakil Hi mikapis e rute xil vus. ^{v15}Rut moletin xil, Hi di miteh meulien e xil, e rute sav xil mun di langgusil suse te maten tang. E melele xa xamem mabithiten longeongen hos usil Iesu Kristo mi moletin xil, Hi besi xi holu ven nggoni ngan xa xi besi xi melele xa di pongos vokon te sanien eo tei. ^{w16}E melele xa ngan xil xa Hi di miteh meulien e xil lateong ni longeongen hos ak, di pisen suse te meulien mi xil. E melele xa ngan tesav xil lateong ni, di pisen ni mi xil xa di langgusil suse te maten tang. ^x

?Visi vari iaxa momal tangan vahur polien ak tangan vahithiten longeongen hos na Hi? !Moletin tovuol! ¹⁷E xamem mataxoni titsa te luvosen xil holu ti xa di lapos ni longeongen hos na Hi nggoni ngan xa be tutut neta tei tang. !E-e! Venggan xa Hi tesil xamem maba mabe eloheoh nan xil tangan mava mavithiten longeongen hos usil Iesu Kristo. E mangguxou kuhi tangan sexien namem ihusil nenemien xa be reitin e memese tevi

^o2:4 Pol 20:31 ^p2:5 1Kor 5:1 ^q2:6 1Kor 5:1-5 ^r2:9 2Kor 7:15; 10:6

^s2:11 Luk 22:31 ^t2:12 Pol 14:27; 1Kor 16:9; Kol 4:3; 4:3; Rev 3:8

^u2:13 Pol 20:1 ^v2:14 1Kor 4:9 ^w2:15 1Kor 1:18 ^x2:16 Luk 2:34; 2Kor 3:5-6

ixoni ngan xa Hi ien bei, vengan makila xa met Hi di e xamem vehakut. ^y

Hitxatien te xeih hu na Hi be eilep mili hitxatien matu xil xa Hi tesa ni tetiamu

3 Melele xa di nadis sepinien ak bat mi xamim usil polien namem, eloheoh xil, natapol ni ti tangan ti napet rat rilomun ni hisemem pe metemim. ?Mu midep? ?Iemim bei muvur uvei te hitkilaen vaxo eilep xil te sias tangan mukila muling nenesien namim vate xamem?^{‡‡} ?Mu xamim tang ti mutis uvei te hitkilaen e rin namem tangan mosav xil lakila laling nenesien nae vate xamem? !E-e!^{z2} Vengan xamim vari tang mube uvei xa di bit kila xa mabe reitin xa moletin xil vus lakila lavuli e lapus kila. Eheien namem di e xamim nggoni ngan xa Hi tetis xat hisemim teti e tinemem. ^{a3} Reitin, neketen namim xa be reitin nggoni uvei tei xa Kristo vari tang midisi tangan vahit kil xamem vaxo en. E tenatisi ti ni pen tova. E-e. Tetisi tetel **Ninin** na Hi xa meul. E tenatis ti e hat tenaxoni rae xil xa Mosis tetisi. E-e. Xi tetis xati teti e tinemim vari. ^b

⁴ Xamem makila maviteni vamak venggan xa manesi xa Hi tehosei xamem texo Iesu Kristo tangan mapol ni polien ak. ⁵ Mataviteni ti xa xamem kestang mapin tangan mapol ni holesok xil mu masak ni huit polien vastal. Makila xa holesok xil xa di mapol ni xa huite teni di, xil vus nggo visal Hi. ^{c6} Reitin, xi kestang misak

ni xamem mei mapin tangan mave moletin nan xil tangan ti musepin e rin te **hitxatien hu te xeih** nan. Hitxatien hu te xeih ak, vatite teni tave rae xil ti xa latetisi, venggan rae xil di misa maten mi ngan xil xa langgur xotehi. E vatit hitxatien hu te xeih ak be Ninin xa di misa meulien mi ngan xil xa langgusili. ^d

⁷ Tetiamu, melele xa Hi tesa rae nan xil mi **Mosis** xa tesehi teti e hat, xi tesa ni tetel minehinen te xeihen nan. E melele xa Mosis tetilomun temei visal mol-Isrel xil, xil latesakras laketeh vama ni valnaon venggan xa minehinen te xeihen na Hi di telelup texo en. E tetutou ni, minehinen te xeihen na Hi xa teta en tehetan teha vuma ... tekesae rani. E rae xil ak lasa maten mi moletin xil venggan xa lasakras lavusili. E xosxa Hi tesa rae nan xil tetel minehinen te xeihen nan xa mak, ^{e8} ma xi isak ni hitxatien hu te xeihen xa Ninin Eo di pol nggusili tangan imei itel minehinen te xeihen xa ihe eilep mak mu ili. ⁹ Vengan melele xa Hi tesa rae xil ak mi moletin xil, tesa ni tetel minehinen te xeihen nan xa eilep pupu. E rae xil ak tesak ni xil latepus kila xa latamal ti pe meten e momal tangan lavur pangasien ven. E xosxa xi tesa rae xil ak tetel minehinen xa eilep, hitxatien hu te xeihen xa misak ni moletin xil mei lamal pe meten di bemei del minehinen te xeihen xa eilep mak mu mili. ^{f10} Reitin mak, naha xa temei tetel minehinen te xeihen na Hi tetiamu, rapusi xa minehinen teni tekesae relingi, venggan xa mine-

^{‡‡}**3:1** Tenamal ti tangan xa Pol vasa uvei te hitkilaen mi mol-Korin xil venggan xa latekil kuhi ngamu. E titsa te luvosen xil latehur uvei te hitkilaen texo vat xil te Sias venggan xa mol-Korin xil latnakil ti xil. Titsa xil ak iexil tehei tangan lasak ni mol-Korin xil laling nenesien nae e xil e lake reitin e pispisien nae xil.

^y**2:17** 2Kor 1:12; 1Pit 4:11 ^{z3:1} 2Kor 5:12; Pol 18:27; Rom 16:1

^{a3:2} 1Kor 9:2 ^{b3:3} Eks 24:12; 31:18; 34:1; Dut 9:10,11; Pro 3:3; 7:3; Ser 31:33; Esek 11:19; 36:26 ^{c3:5} 2Kor 2:16

^{d3:6} Eks 24:8; Ser 31:31; 32:40; 1Kor 11:25; Hib 8:8-13; Sion 6:63; Rom 7:6

^{e3:7} Eks 34:29-30 ^{f3:9} Dut 27:26; Rom 1:17; 3:21

hinen te xeihen xa xi tesa ni tetutou ni be eilep mak mu mili. ^{g11}Naha xa Hi tesa ni tetiamu tetel minehinen te xeihen xa tekesae relingi, xi telingi tete rin tangan vasa hitxatien te xeih hu xa ita vehakut. Ma, rakila xa minehinen te xeihen teni be eilep pupu e ita ha vuma ... navus ti.

¹²Ma, vengam xa nenesien namem di e hitxatien hu te xeihen ak na Hi, di manggusili e di mapol mini del imaeen.

¹³Matapol ni ti taxoni Mosis xa tekutaxol valnaon ni kaliko tei tangan vasak ni mol-Isrel xil lasakras lapus kila xa minehinen te xeihen xa tete valnaon di mikesae vengam xa Hi di teling hitxatien matu ak tehe rin. ^{h14}Reitin, Hi tesak ni mol-Isrel xil latesakras lanem kil koute teni nggoni ngan taxa neta tei di tekutaxol nenemien nae. E xosali mun, melele xa mol-Isrel lalong moletin tei di buli sepinien te hitxatien te xeih matu, nenemien nae xil bon tamu. Latakil ti reitinen te hitxatien hu te xeihen nggoni ngan xa kaliko tei di mikutaxol nenenemien nae. E, e melele xa mei labisti del xat Iesu Kristo, nggoni ngan xa Hi nggur rat kaliko xa tekutaxol nenemien nae ni tangan mei linem kil naha xa Hi di pol ni.

ⁱ¹⁵Reitin, mei duxoh xosali, melele xa di labuli rae xil na Mosis, nggoni ngan xa kaliko di tamu mikutaxol nenemien na mol-Isrel xil. ¹⁶E melele xa tinexil biles e lamei visal Suv, Hi nggur rat kaliko ak ra nenemien nae. ^{j17}Suv ak be Ninin Eo. E melele xa Ninin na Hi Suv de tinexir, mei rameluv ra rae xil xa di misikoe xol xir ra Hi. ^{k18}Ma, xir vus xa raling nenesien nar e Suv, naha xa mikutaxol nenemien nar, Hi nggur rati tuei. Misak ni, rapus kil minehinen te xeihen na Suv, e

di biles xir ba vuma ... meulien nar di nggur nini Hi nggoni kilas tei xa nggur nini neta tei. E be Nini Suv xa di pol ni holesok xil ak e meulien nar. ¹

Nenemien na Kristin xil namot ti vengam xa Hi misak ni minehinen te xeihen nan mei mileluy nggo meulien nae

4 E be Hi vari tang iaxa di misa polien ak mi xamem tangan masep kil hitxatien hu te xeihen nan. Ma, vengam xa Hi tesa polien ak mi xamem nggusil eheien hos nan tangan ti musa longeongen hos nan, nenemien namem misakras vamot e munastokovein polien ak ti. ^{m2}Xamem masin sexien tesa xil xa moletin xil di lapol xuxus ni vengam xa labe unoun ni. E maling nenemien namem tangan munaluvos moletin sav xil ti, mu munavilhiles sepinien na Hi ti namei nasav. Pe met Hi, di mabit usil holesok xil vus xa be reitin nggusil sexien xa moletin sav xil ti lipusi lihit momal. ⁿ³E xosxa ngan xil xa ladi suse te maten latakil kuh ti koute te longeongen hos xa di mabithiteni mi xil, latakil ti vengam xa nenemien nae mikoe nggoni ngan xa kaliko di tamu mikutaxole. ^{o4}Latake reitin ti en vengam xa Temat, xa moletin xil te ut etan di langgusili nggoni hi nae, xi di mikoe xol nenemien nae. Mak iaxa, lasakras lapus kil minehinen te xeihen te longeongen hos usil Iesu Kristo. E Kristo nggoni Hi vari tang e rin xil vus. ^{p5}Mak iaxa, melele xa maba tangan masepin mi moletin xil, di matasep usil xamem ti, e di masep usili xa Iesu Kristo be Suv, e mabiteni xa di mapol mini nggoni ngan xa mabe slev namim. ^{q6}Melele xa Hi te-

^{g3:10} Eks 34:29-30 ^{h3:13} Eks 34:33,35

^{i3:14} Eks 34:34; Rom 11:23,25-26 ^{j3:16} Eks 34:34; Rom 11:23,26

^{k3:17} Sion 7:39; 8:32,36; Rom 8:2; Kal 5:1,13 ^{l3:18} Eks 16:7; 24:17

^{m4:1} 2Kor 3:6 ^{n4:2} 2Kor 2:17; 1Tes 2:5 ^{o4:3} 1Kor 1:18

^{p4:4} Efes 2:2; Plp 2:6; Kol 1:15,18; 2:9; Hib 1:3 ^{q4:5} 2Kor 1:24

peas ni ut etan, xi tehiteni tehit, “*Mae ni miehen vastal ra maluxoluken, ma ut miluv.*” (Sen 1:3)^f E xi be hisit Hi xa di pol ni miehen nan di mileluv e tinexir tangan mei rakil kuh minehinen te xeihen nan. E ngan xil xa lapus kil valnao Kristo, xil lapus kil minehinen te xeihen na Hi.

⁷ Reitin, minehinen te xeihen te hitxatien hu te xeihen ak bos pupu. E Hi milingi tangan valeluv vaxo meulien nar. Ngan ak nggoni moletin tei xa misoson neta tei xa bos pupu de valihe tei xa lapol ni ni tan te pili tang xa taxeih ti. Valihe ak nggoni vemem xa taxeih ti. E melele xa di mapol del xeihen, mosav xil lipus kila xa tastal ti taxo xamem tang, e di mistal nggo visal Hi vari. ⁸ Melengien holu, di manggur longpangasien e rin xil vus, e nenemien namem tara kat ti. Tave ti neta xa di manexo, e neketen namem takesae ti. ⁹ Moletin xil holu di lasak purun xamem, e Hi tastokovein xamem ti. Tave ti neta xa labas tan ni xamem, e latavas vuol ni xamem ti. ¹⁰ Nggo longpangasien te sakpurunien xil ak, tenbemem di bisti del xat Iesu xa tehur longpangasien te maten e tenben. Nggo suse ak, moletin xil likila lipus kil meulien na Iesu Kristo ixo meulien namem. ¹¹ Vengan xa melele xa rameul tamu radi, moletin sav xil di lakin maten mi xamem vengon xa di manggusil Iesu. Nggo suse ak, moletin xil lakila lapus kil meulien na Iesu vaxo tenbemem xa memerou tang. ¹² E tave ti neta xa xamem di mabisu ni maten vehakut tangan mavur longeongen hos vahat mi xamim, xamim di munggur meulien sal.

¹³ Vanuvei Eo biteni bit, “*Vengan xa naneket e Hi, dit nasepin.*” (Sam 116:10)

E vengon xa xamem maneket mak, dit masepin. ¹⁴ E dit masepin vengon xa makila xa Hi xa misak ni Suv Iesu temea ra maten, xi mun tang isak ni xamem mun mumea ra maten vengon di mabisti del Iesu. Reitin, xi ital rerat xamem itel xat xamim mun tangan ha risoh pe meten. ¹⁵ Reitin, longpangasien e melele te xeih xil xa mabisu ni, di mangguri tangan makila mavithiten longeongen hos. Vengon makila xa longeongen hos ak di dutou ni xamim, e dutou ni ngan tesav xil mun xa di lalong kil eheien hos na Hi. E melele xa lilong kila, ma likila limes Hi ven, e lipet rat hisen ve xeihen nan xa mahulong pupu. ^w

¹⁶ Mak, ma xamem masakras mamaen nenemien namem vamot. Tave ti neta xa tenbemem e hale di ba tangan vamat, e neketen xa de tinemem, vehakut mei di be neta hu mu. ¹⁷ Vengan xamem mapus longpangasien xa di mangguri nggoni neta tei xa hokorong tang. E melele xa di mabisu ni, makila xa muhur neta tei xa ihos mak mu xa misakras vakesae e ut nesao. ¹⁸ Vengan melele xa xamem di mapus holesok xil te ut etan ni metemem, mataling ti neketen namem en vengon xa makila xa iti melengien ihe vahis tang. Xamem maketeh be holesok xil te ut nesao xa met moletin misakras vapusi, e di maling neketen namem di en, vengon xa makila xa iti ihe nousav e misakras vavus. ^z

Rinanexo ti ve longpangasien xa di rangguri e tenbexir, vengon Hi isa tenbexir hu xa ita vehakut

5 Bos xa ti rinanem pupu ti usil tenbexir, vengon xa rakila xa tenbexir nggoni nim tavolin tei tang xa radi en

^f4:6 Aes 9:2; 2Kor 3:18 ^s4:7 2Kor 5:1 ^t4:8 2Kor 1:8; 7:5 ^u4:10 Rom 8:36; 1Kor 15:31; Rom 8:10; Plp 3:10; Kol 1:24; 2Tim 2:11; 1Pit 4:13

^v4:14 Rom 8:11; 1Kor 6:14; 15:15,20; 1Tes 4:14 ^w4:15 2Kor 1:3-6 ^x4:16 Efes 3:16; Kol 3:10 ^y4:17 Rom 8:17-18 ^z4:18 Rom 8:24; 2Kor 5:7; Hib 11:1

e ut etan. E melele xa lilihi rati e ristokovein ni, ha riti e nim xa Hi vari tang pol ni. E nim ak, xa be tenbexir hu, momal tangan riti en e ut nesao ihe nousav. ^{a2}E melele xa radi tamu e nim tavolin ak, di ramuis vengan xa iexir bei tangan ravur tenbexir hu xa ihe tim sar e ut nesao. ^{b3}E melele xa rimat, ninin nar naka hon ti vengan rikameti xa Hi tesing xol ninin nar ngamu ni tenbexir hu. ⁴Melele xa radi tamu e nim tavolin ak, di ramuis vengan longpangasien xa di rangguri meas pupu. E ramuis vengan xa iexir ti tavei tangan ramat e rastokovein nim tavolin ak. E iexir bei mak mu xa tenbexir te ut etan ak vahiles mei vahe ngan xa be neta hu xa ita vehakut. ^{c5}E Hi vari tang iaxa misak mesen xir tangan ravur tenbexir hu ak. E xi tesa **Ninin** nan mei meul de xir nggoni simeleleen tei tangan vapisen ni xa be reitin xa ipol ni naha xa xi tehiti xati. ^d

⁶Xosali radi tamu e nim tavolin ak, e ratati ti mu e rute xa Suv Iesu da en. E tave ti neta xa mak, nenemien nar ixehi ^{e7}Vengan melele xa radi tamu e ut etan, di ranggusil Iesu del neketen nar, ratahusili ti vengan xa di rapusi ni metexir. ^{f8}Reitin, nenemien nar nggeih, vengan xosxa rimat e rihe reling tenbexir inggak, ma rihesi xir tang vengan xa rakila xa ha rimeul itel Suv Iesu e tim sar hu ingga xor e ut nesao. ^{g9}E tave ti neta xosxa radi inggak mu riti ingga xor, di rasak pisi tangan Suv ihesi xi ve holesok xil vus xa di rapol ni. ^{h10}Vengan xa xir vus ha risoh pe met Iesu Kristo von koten nan e melele xa ilepis rin na moletin xil vus. E xir vus rihur huit kakaoen nar e ut etan ak, ngan ihos mu ngan isa. ⁱ

Hi tesak ni Iesu Kristo mei be suse tangan moletin xil te ut etan likila liti e tomat itela

¹¹Ma, vengan xa xamem di mamerere ni Suv e makila xa moletin xil ha lisoh pe meten vatova, masak pisi di madakes moletin xil tangan ti liling nenesien nae e Kristo. Hi mikil kuhi xa di mapol ni del nenemien xa momal, e iemem bei tangan xamim mukila. ^{j12}Xamem matasak pisi ti tangan mapet rat xamem mun tang pe metemim. E masak pisi tangan ti masep kil polien namem xil tangan muvesi xamim ve xamem. Mak, ma xamim mukila musepin e rin namem mi tita te luvoson xil xa di lasepin holu usil naha xa momal tangan moletin xil lipol ni itel tenbexil e hale tang. E latanem ti usil naha xa de tine moletin. ^{k13}Xosxa munemi mubit xamem di mapol ni holesok xil nggoni ngan xa matalang, ma di mapol ni mak vengan manggusil xat Hi. E xosxa munemi mubit xamem di mapol ni holesok xil del nenemien xa bos, ma di mapol ni tangan vatutou ni xamim. ¹⁴E holesok xil vus xa di mapol ni, mapol ni vengan makila xa eheien na Kristo be eilep e meulien namem. Vengan make reitin xa moletin tei temat tangan vahinat moletin xil vus te ut etan. E ve rin ak, nggoni ngan xa xir vus mun ratemat tetela. ¹⁵Reitin, xi mat ve xir ngasen tangan vasak ni xir xa ranggur meulien hu, rinameul ti mun nahusil nenemien nar kestang. Momal tangan rimeul ihusil xat nenemien na Kristo xa temat e temea rilomun ra maten ve xir. ¹

¹⁶Mak, ma xamem munalepis ti mun rin na moletin tova nahusil nenemien na

^{a5:1} Siob 4:19; 2Kor 4:7 ^{b5:2} Rom 8:23 ^{c5:4} 1Kor 15:53-54

^{d5:5} Rom 8:16,23; 2Kor 1:22; Efes 1:13 ^{e5:6} Hib 11:13-16

^{f5:7} 1Kor 13:12 ^{g5:8} Plp 1:23 ^{h5:9} Kol 1:10; 1Tes 4:1

^{i5:10} Ekl 12:14; Mat 16:27; Pol 10:42; 17:31; Rom 2:16; 14:10

^{j5:11} 2Kor 4:2 ^{k5:12} 2Kor 3:1; 1:14 ^{l5:15} 1Tim 2:6; Rom 14:7-8

moletin xil te ut etan tang. Be reitin xa tetiamu, matelepis rin na Kristo tehusil nenemien na moletin xil tang te ut etan. E matapol ni ti mun vamak. ^{17 m18} Be Hi iaxa di biles xir mak. Tetiamu, ratehe elu mini. E ve naha xa Iesu Kristo tepol ni ve rin nar, Hi misak ni xir mei radi e tomat dela. Ma taxeak, xi misa polien mi xamem tangan ha ti mavit mesen ni mi moletin xil xa xil mun likila liti e tomat itela. ⁿ¹⁹ Reitin, Hi tesak ni naha xa Iesu Kristo tepol ni mei be suse tangan moletin xil te ut etan likila liti e tomat itela. Ma Hi navuli ti mun tesaen nae xil nava xat rin nae. E xosali, longeongen hos usil suse te tomat ak, Hi misa ni mi xamem tangan ha ti muhithiteni mi moletin xil vus. ^{o20} Ma, xamem di maba mi moletin xil vus e rin na Iesu Kristo, e Hi vari tang di misepin mi xil nggo xamem. Mak iaxa, e his Iesu Kristo, xamem madakes xamim tangan munave elu ti mun natel Hi. E mei muti e tomat itela. ^{p21} ^qIesu Kristo, **tesaen** tovuol en. E vengan xa Hi minem usil xir, xi teling tesaen nar xil vus teha xat Iesu, e tesa vuol ni pangasien teni mini. Ma, vengan xa rabisti del xat Iesu, Hi di pus xir nggoni ngan xa ramal tevi pe meten.

6 Mak, ma vengan xa di mapol vituei del xat Hi vari tang, madakes xamim xa munggur eheien hos nan ngamu tangan munanem male ni eheien hos nan ti. ^{r2} Muteong ni sepinien na Hi melele xa tehit,

*“E melele xati xa momal, natelong isien namim,
e namei tangan nitutou ni xamim e niteh meulien e xamim.” (Aes 49:8)^s*

!Reitin, xosali be melengien xati tangan Hi vamei vatutou ni xamim! !Xosali be melengien xa xi iteh meulien e xamim!

Pol misep usil longpangasien xil xa ngguri tangan vasa longeongen hos na Hi mi moletin xil

³ E polien e meulien xil namem, masak pisi tangan mapol ni holesok xil xa momal pe met moletin sav xil. Munapol sasavon ni ti sexien xil xa nasak ni moletin tova nasavut e neketen nan. ⁴ E holesok xil vus xa di mapol ni, masak pisi di mapisen ni xa mabe moletin te polien na Hi. Tave ti neta xa moletin sav xil di lasak pis neketen namem, lasa longpangasien mi xamem, e lapol ni nggeih mi xamem, dit mangguri tang del nenenemien xa teviei. ^{t5} Di labas xamem, laling xamem e nim te xeih, e labae del xamem del ekaten. Polien te xeih di bas xamem, mae kekaten di bas xamem, e vongien xil holu di matapat ti. ^{u6} Di mapisen ni xa mabe na Hi reitin nggo sexien xil xa memese, nggo kilakilen xa Hi di misa ni mi xamem, e nggo holesok xil xa mangguri del nenemien xa teviei. Di mapol ni bos mi mosav xil e mapol ni holesok xil del eheien xa be reitin. E di mapol del holesok xil xa **Ninin Eo** misa ni mi xamem. ^{v7} Sepinien namem be reitin e di mapol del xeihen na Hi. Nggoni moletin xil te vaeen, sexien namem xa momal nggoni tiei te vaeen xa mabae dela e rin na Hi, e mei nggoni eivae xa di misikoe xol longeongen hos dela. ^{w8} Manggulehi di mapol ni polien xa Hi di misa ni mi xamem, tave ti neta xosxa moletin xil di lamerere ni xamem mu latamerere ni xamem ti, di lapet rat hisemem mu di

^{m5:17} Rev 21:5; Rom 8:1,10; Kal 6:15; Aes 43:18; Rev 21:5 ^{n5:18} Rom 5:10

^{o5:19} Rom 3:24-25; Kol 1:19-20 ^{p5:20} Aes 52:7; Efes 6:20

^{q5:21} Sion 8:46; Hib 4:15; 1Pit 2:22; Kal 3:13; 1Kor 1:30; Plp 3:9

^{r6:1} 2Kor 5:20 ^{s6:2} Luk 4:19-21 ^{t6:4} 2Kor 4:2 ^{u6:5} 2Kor 11:23-27

^{v6:6} 1Tim 4:12 ^{w6:7} 1Kor 4:10

labe tan en. Tave ti neta xa naha xa di mabit usili be reitin, e xil di lapol ni mi xamem nggoni ngan xa mabe moletin te luvosen xil. ^{x9}Tave ti neta xa moletin holu lakil xamem, e xil di lapol ni mi xamem nggoni ngan xa latakil ti xamem. Melele xil hao di lameas pangas xamem e lasak pisi tangan lavas vin xamem. E xamim mupusi xa xamem mameul tamu madi. ^{y10}Tave ti neta xa malonge misa ve holesok xil holu, sien di iemem vehakut. Tave ti neta xa mani namem tovuol, masak ni moletin sav xil mei lapolu ni holesok xil na Hi. Reitin, tave ti neta xa holesok xil namem e ut etan tovuol, e holesok xil vus na Hi be namem. ^z

¹¹Tuxoli xil te hal Korin, xamem masa vuol ni nenemien namem, e matnasoson ti neta ra xamim. Eheien namem di e xamim vehakut e di masah puiteh te tinemem mi xamim. ¹²Xosxa neta tei di purun vitueien nar, taxo ti e xamem, e nggo xamim xa mukoe xol tinemim mi xamem. ¹³Di nasepin mi xamim nggoni ngan xa mube navan xati xil. E nasis xamim tangan musah puiteh te tine-mim mi xamem tangan mupisen eheien namim mi xamem. ^a

**Selxatien tangan rinavisti ti
natel ngan xil xa di langgusil
sexien xil te ut etan**

¹⁴Munavisti ti natel ngan xil xa lataneket ti e Hi. ^fVengan xa ngan xil

xa di langgusil suse xa momal lasakras lakakao vituei vatel ngan xil xa di langgusil suse xa mikavui. ?Midep, miehen e maluxolukuken lalikila laliti vituei? ^{b15}?Midep, Iesu Kristo e Temat lalikila lalimei e nenemien tei takes? !Lusakras! Nggo hisit sexien nen tak, moletin tei xa minesi e Iesu Kristo misakras favisti vatel moletin tei xa tanesi ti en. ¹⁶E hisit sexien xa tamal ti xa moletin xil lave **Nim Eo** na Hi tangan lamot mi nanao na hi sav xil en, tamal ti tangan xir ramot vituei vatel ngan xil xa di lamot mi nanao xil. Vengan xir rabe Nim Eo na Hi xa meul. Ngan ak nggoni naha xa Hi biteni melele xa bit,
“*Inou niti e tine moletin xil e niti vituei itel xil.*

Inou nihe Hi nae e xil lihe moletin navan xil.” (Lev 26:12; Esek 37:27)^c

¹⁷Mak ma Hi Suv biteni mun bit,
“*Xamim muhe reling xil e mutasil ra xil.*
Xosxa mutatuxol holesok xil ti xa be muis pe metok, ma inou nihur pilei xamim.”
(Aes 52:11; Esek 20:34)^d

¹⁸“*Inou xa nabe Hi Suv te xeihen nabiteni xa nihe Tamemim*”^e

^f**6:14** Selxatien ak momal e rin te titsa te luvosen xil xa latepispisi mi mol-Korin xil xa itep iaxa likila lipol lihusil rae xil na Siu xil. Selxatien ak momal mun mi mol-Korin xil xa latenemi latehit tave ti neta xosxa ti lixulehi lihe von moten na nanao xil. Pol ien tehei mun tangan vassel xat Kristin xil xa tamal ti tangan lapol vituei mu lateli vituei vatel ngan xil xa latave Kristin ti.

^x**6:8** 1Kor 4:10-13 ^y**6:9** 2Kor 4:10; Sam 118:18; 1Kor 1:8-10

^z**6:10** Pol 3:6; Rom 8:32; 2Kor 7:4; 8:9; Plp 2:17; Kol 1:24; 1Tes 1:6

^a**6:13** 1Kor 4:14

^b**6:14** Efes 5:7,11 ^c**6:16** 1Kor 3:16; 6:19; Ser 32:38 ^d**6:17** Rev 18:14 ^e**6:18** 2Saml 7:8,14; Aes 43:6; Ser 31:9; Amos 3:13; 4:13; Rev 4:8; 11:17; 15:3; 21:22

e xamim muhe natuxoli xil e natuxahin xil." (2Saml 7:8,14)^f

7 Tuxoli e hinoxoli xil, vengan xa ranggur hitxatien xil ak nggo Hi, momal tangan rikas moten meulien nar xil imese ra holesok xil xa mikila vasak ni tenbexir e ninixir vahe muis. Reitin, bos xa ripisen ni xa meulien nar be eo venggan xa di ramerere ni Hi.

Pol besi xi ve Kristin xil xa labiles ra tesaen nae xil

²Xamem masis xamim tangan musah puiteh e tinemim ve xamem. Vengan xa matnapol ni ti neta vasa vaha xat xamim, matapangei ti moletin, e matasak pisi ti tangan maluvos moletin tova tangan makila maleh holesok nan xil. ^{g3}Reitin xa rut xamim di lapurun hise-mem. E natavit sepinien ak ti tangan vasak ni xamim muve unoun. E-e. Vengan, nggoni ngan xa nabiteni tuei, eheien namem di pupu e xamim. E neta sav xosxa mumat mu mumeul, eheien namem iti e xamim vehakut. ^{h4}Inou nanesi e xamim e di nasep koai ve xamim. Tave ti neta xa mabisu ni melele te xeih xil holu nggo he mosav xil, melele xa nanem usil xamim, ngan ak di pet rat nenemien navan e di misak ni nou napolu ni sien.

⁵Ngoni ngan xa natehiteni tetiamu, melele xa xamemel mattetuxoh provins te hal Masedonia, matsakras matongel. Holesok xil holu temei e tehas tan ni xamemel: moletin xil di latepangei tenbexamemel e latengor tetel xamemel, e nenexoen di tehas tan ni nenemien namemel. ⁱ⁶E Hi xa di pet rat ngan xil xa nenemien nae mot, xi tepet rat nenemien namemel melele xa mattepus Tetas temei testal mi xamemel. ^{j7}E tave ti

ve meien nan kestang xa tepet rat nenemien namemel. E xi tehur longeongen xa xamim mutepet rat nenemien nan venggan tepusi xa xamim iemim bei pupu tangan mupus ti nou. Xi tepusi mun xa mulonge misa ve naha xa mupol ni, e nenemien namim nggeih tangan musoh ixeh e rin navan pe met ngan xil xa di lateseputut ni nou. Melele xa natehur longeongen ak, nalonge bos xa bos.

⁸Melele xa nalonge xa xamim mulonge misa melele xa mutehur uvei xa natetisi tehat mi xamim, inou mun natelonge tesa vuteili. E xosali, natalonge ti mun vasa ven. ^{k9}Reitin, xosali nabesi nou himetu, e tave vengan ti xa xamim mulonge misa. Nabesi nou venggan xa longpangasien namim tesak ni xamim mutehiles ra tesaen xil namim. Reitin, longpangasien xil xa mattesa ni mi xamim, Hi tehilesi mei tehe tutouen mi xamim. ¹⁰Vengan longpangasien xa nggo visal Hi misak ni moletin tei tangan vahiles ra tesaen nan xil. Melele xa Hi pusi xa moletin tei biles ra tesaen nan xil, di miteh meulien en. Ma, hisit longpangasien xa mak, moletin misakras valonge vasa ven. E longpangasien tei mun da xa be te ut etan tang. Hisit longpangasien ak tasak ni moletin ti vahiles ra tesaen nan xil. Hisit longpangasien ak di misak ni moletin tangan vate suse te maten e vate sotin ra Hi vehakut. ¹¹Mupus pis naha xa Hi tepol ni e meulien namim texo longpangasien xil namim. Ngan ak iaxa tesak ni xamim iemim tehei pupu tangan musak ni hisemim mei vahos ve naha xa mutepol ni. Reitin, melele xa mutehur uvei navan, mutemesep ni e iemim tevon ni. Mutelonge tesa pupu e iemim tehei tangan mupol ni naha xa momal. E, vari nga tang, mutesa pan-

^f6:18 Aes 43:6; Ser 31:9; Amos 3:13; 4:13; Rev 4:8; 11:17; 15:3; 21:22 ^{g7}:2 2Kor 12:17 ^{h7}:3 2Kor 6:11-12; Plp 1:7 ⁱ⁷:5 Pol 20:1-2; 2Kor 2:13; 4:8-9
^{j7}:6 Aes 49:13; 2Kor 1:3-4 ^{k7}:8 2Kor 2:4 ^{l7}:10 Mat 27:3-5; Hib 12:17

gasien mi ngan xa tepol tenamal ti. E rin xil vus xa natetis usili, xamim mutesak pupu tangan mumal ni e mei mumese rilomun. ¹²Melele xa natetis uvei ak mi xamim, natetisi ti tangan vasak ni xamim musa pangasien mi ngan xa tepol tesa, mu tangan mututou ni ngan xa xi tepol tesa mini. E-e. Natetisi tangan, pe met Hi, xamim mukila mupisen ni vahe reitin xa eheien namim di e xametel midep. ¹³Longeongen ak pet rat nenenien nametel holu.

E sien nametel tehe holu melele xa mattepus sien na Taetas. Vengan melele xa tehur longeongen usil xamim tetiamu, nenemien nan tenata kat ti. E melele xa tehat tepus xamim, sexien namim misak ni nenemien nan mei tehos rilomun. ¹⁴Melele xa natesil Taetas tehat mi xamim, natesep koai holu usil xamim mini natehit di munggul xat Hi e meulien namim. E nabesi nou holu xa mutnapol ni ti sepinien navan mei vahe te luvoson tang tangan vasak ni nou name unoun. Vengan e hisit sexien xa sepinien xil vus xa mattesa ni mi xamim tehe reitin, Taetas tepusi xa holesok xil vus xa natesep koai usili e rin namim mun be reitin. ¹⁵E eheien na Taetas e xamim mei nggeih pilei sung. Vengan xa xi di minem xati xa xamim vus mutelong xat sepinien navan xil, e tetep mutehur pilei xi tetel ulikanen e malilien vengon xa temei e his Hi. ¹⁶Ma, nabesi nou holu vengon nalonge xa neketen namim be reitin.

**Selxatien tangan Kristin xil
te hal Korin lisa mani ha
itutou ni Kristin sav xil**

8 Tuxoli e hinoxoli namem xil, xamem iemem bei tangan xamim mukil huite te eheien hos na Hi xa di mistal

nggo meulien na Kristin xil te sias xil e provins te hal Masedonia. ¹²Tave ti neta xa moletin xil di lapol ni nggeih ve neketen nae, lapolu ni sien. E tave ti neta xa holesok nae tovuol, xil latesa mani holu tangan vatutou ni mosav xil. ³Nakila namiteni mi xamim xa mani xa latesa ni tetel sien tehusil naha xa lakila lasa ni, e be eilep mak mu mili. ⁴Xil late-takes xamem texeih tangan mamaen xil lasa hexil tangan vatutou ni moletin xil na Hi xa ladi hal Serusalem. ⁵Naha xa latesa ni mahulong mili naha xa xamem matenem usili. E ngan xa bos mak mu mili ngan ak, tetiamu, xil latesa xil vari tang mi Hi Suv, e di, latesa xil mi xamem e matetel xil mei latehusil nenemien na Hi. ⁶Ma matesis Taetas, xa tepol rohon ni polien ak tetel xamim, tangan ihat ipus xamim mun tangan ipol vuol ni polien hos ak tangan xamim muso viton mani xil vus xa mutehit xati tangan musa ni. ⁷Xamim mupisen ni ngamu xa holesok xil vus xa di mupol ni bos pupu. Xamim holu langgur sanien te neketen ngamu, xamim holu langgur sanien tangan lakila lisetu ni sepinien na Hi, e xamim holu langgur sanien te kilakilen. Di mupisen ni mun xa iemim bei pupu tangan ti mututou ni mosav xil, e eheien namim e xamem mahulong xa mahulong. Mak, ma xamem iemem bei tangan musa xamim ve polien xa xiak tangan ti musak mesen sanien tova ha itutou ni ngan xil xa ladi e provins te hal Sudea. ^P
⁸Natasemae ni xamim ti tangan ti musa tutouen ak. E-e. E di nasak pisi tang tangan nakil kuhi xa eheien xa di xamim be reitin nggoni ngan xa di napusi e meulien na Kristin sav xil te hal Masedonia. ⁹Xamim mukil kuh eheien hos xa Iesu Kristo, Suv nar, tepisen ni mi xir. Tave ti neta xa holesok nan xil

^m7:15 2Kor 2:9 ⁿ8:1 Rom 15:26 ^o8:4 Pol 11:29; 2Kor 9:1

^p8:7 1Kor 1:5; 16:1-2

e ut nesao tehe holu pupu, e tehe relingi teme'i e ut etan e mei tehe moletin xa holesok nan tehe tovuol. E xi tepol ni temak tangan vatutou ni xamim. Reitin, xi teme'i etan e holesok nan xil tehe tovuol tangan vasak ni xamim mupolu ni holesok xil vus na Hi. ⁹

¹⁰E huram xa ba ngamu, xamim mutepol ni hitxatien tei tangan xamim kekes musa sanien mi Kristin xil e hal Serusalem. Di, mutepol kokot ni tetel sien. E, duxoh xosali, e mutapol sen ni ti mu. Misak ni nanemi nabit momal tangan ¹¹mupol vuol ni polien ak ihusil naha xa mukila musa ni. Ixo rin ak, mupisen ni xa sien xa di e xamim e melele xa mupol vuol ni polien ak, ixoni sien xa teti e xamim melele xa mutepol kokot ni hitxatien teni. ¹²Xosxa musa tutouen ak itel sien, ma imal pe met Hi. Xi ien bei xa sanien namim ihusil naha xa mukila musa ni. Tave nenemien nan ti tangan musa neta vali naha xa mukila mupol ni. ^r

¹³Jeok ti tavei xa xamim musa holesok vahe holu tangan xil mei lapolu ni holesok xil e xamim mei muve hoeo. E-e. E vahos vahit sanien namim vapol ni xil mei lapin tang mi xamim. ¹⁴Reitin, xosali, xamim mupolu ni holesok xil hao. Mak, ma momal tangan mututou ni ngan xil xa holesok nae tovuol. Imak, ma melele xa xil lapolu ni holesok, xos xil mun likila litutou ni xamim. Ixo suse ak, xamim vus muhuri ipin tang. ^{s15}Ixoni ngan xa Vanuvei Eo misepin ni bit, *“Ngan xil xa laleh manna holu pupu, lapusi pipin ni moletin xil e tim sae, e ngan xil xa lalehi vuteili tang, xil mun lapusi pipin ni xil.”* (Eks 16:18)

Pol bit mesen ni xa misil Taetas e tua sav xil tangan ha livue xat sanien na mol-Korin xil

¹⁶E xamem mames Hi vengan xa xi tesak ni Taetas tehesi pupu ni xi ve xamim nggoni ngan taxa xamem mun di mabesi xamem ve xamim. ¹⁷Vengan melele xa matesis Taetas tangan ihat itutou ni xamim, xi tehesi xi pupu tangan vapol ni, vengan tehusil naha xa xi mun tang ien tehei tangan vapol ni. ¹⁸E xamem di masil tua tei mun del Taetas xa Kristin xil te sias xil di lamerere ni. Di lamerere ni vengan, vehakut, di misao ni sias xil tangan vahithiten longeongen hos na Hi. ¹⁹E ngan xa bos mak mu iaxa sias xil latehosei moletin ak tangan ihusil xamem melele xa muha tangan ha musa sanien te tutouen ak. Sanien ak ipisen ni xa Kristin xil xa latave Siu xil ti iexil bei pupu tangan litutou ni tua nae xil xa labe Siu. Polien te eheien ak ipet rat his Suv xa be eilep xa be eilep pupu.

²⁰Xamem masil tua xalu ak lukakao vituei tangan moletin ti naseputut ni xamem usil suse xa di maleh viton sanien xa mahulong xiak, e ha museti itep. ²¹Vengan iemem bei mak mu xa ti mupol ni neta xa momal pe met Hi Suv, e momal pe met moletin xil mun. ^{t22}E del xat xalu, di masil tua tei mun. Xi, di mapusi xa holesok xil vus xa malingi di hen tangan vapol ni, xi di pol ni bos pupu del sien. E melele xa xi telong usili xa tetep iaxa xamim mutepisen reitinen te neketen namim, ien tehei mak mu tangan vahat vasao ni xamim. ²³Xamem di masil Taetas vengan xa be tua navan xa di mapol vituei e rin namim. E tua xalu ak mun, sias xil inggak di hasil xalu e rin nae. E holesok xil vus xa di lapol ni di pet rat his Iesu Kristo nggo en. ²⁴Melele

xa Taetas xatel latihat latipus xamim e hal Korin, bos xa muhur pilei xatel itel eheien. Sexien ak ipisen ni xa holesok xil vus xa di masep koai usil xamim mi sias sav xil vus be reitin.^u

Hi di dutou ni ngan xil xa di lasa tutouen mi mosav xil

9 Ninatis ti mun navat mi xamim usil tutouen xa musa ni iha mi moletin xil na Hi xa ladi e provins te hal Sudea.^{v2} Vengan nakila xa xamim iemim bei mak mu xa musa ti tutouen. Melele xa di nakakao e nasao ni moletin xil inggak e provins te hal Masedonia, di nasep koai holu usil xamim, Kristin xil te hal Korin xa mudi e provins te hal Akea. Natehiteni xa xamim mutevue xat xamim tuei e hram xa teha ngamu vengam mutehe imae pupu. E melele xa Kristin xil te hal Masedonia di lalong usil imaeen namim, ma xil mun labesi xil tangan ti lisa tutouen nae.³ Mak, ma di nasil tua xatel ak tangan latihat latitutou ni xamim musak mese kuhi ni holesok xil ixoni ngan xa di nabithiteni mi moletin xil. Isa pupu xosxa naha xa di natesep koai usil xamim ven mei ihe sepinien votei tang.⁴ Xosxa rut moletin xil e provins te hal Masedonia lihusil nou muhat tangan muhur sanien te tutouen namim e likameti xa xamim mutavue xat xamim ti mu, ma isak ni xamem muhe unoun pupu. E isak ni xamim iaxa muhe unoun mak mu.⁵ Mak iaxa, nanemi nabit bos tangan musil tua xatel ak tangan hat latiamu ni nou tangan latitutou ni xamim musak mese ni sanien te mani xa mahulong xa mutehit xati tangan musa ni. Imak, ma melele xa mei nistal mi xamim, mupisen ni xa sanien namim di nggusil naha xa iemim bei tangan musa ni, e

nave ti naha xa xamem tang di manggeih xat xamim tangan musa ni.

⁶ Munemi xa moletin xa milih utute vahis tang e naho san, anien xa ileh rerati ihe vuteili tang. E moletin xa milih utute holu e naho san, anien xa ileh rerati ihe holu.^{w7} Bos xa xamim kekes isa sanien ihusil nenemien nan. Navos ti xosxa isa ni itel nenexoen vengam moletin sav tepol ni texeih mini tangan vapol ni. Vengam eheien na Hi di e ngan xil xa di lasa sanien nae del sien.^{x8} E xi mikila vasak ni xamim mupolu ni holesok xil tangan vapin ni xamim vehakut. Imak, ma xamim mukila musa hemim ihe holu mu tangan itutou ni polien hos xil vus.⁹ Ngan ak nggoni ngan xa Vanuvei Eo biteni bit,

“Hi di misa tutouen nan be rute xil vus, e di misa sanien ba mi ngan xil vus xa labe terume ni neta, e xi di pisen momalen nan vehakut.” (Sam 112:9)

¹⁰ Hi di misa utiei mi ngan xil xa di lalihi, e misak ni xil langga huit naha xa lalihi. Ve rin nen tak, Hi isa holesok mi xamim tangan mukila musa ni mi moletin sav xil. E xi ituxol xat naha xa musa ni del nenemien xa momal.^{y11} Reitin, e suse holu xamim mupolu ni holesok holu tangan mukila mututou ni mosav xil ni vehakut. E melele xa xil lihur sanien namim ixo hemem, xil limes pupu ni Hi ven.^{z12} Vengan xa polien ak xa mupol ni di dutou ni moletin na Hi xil xa labe terume ni neta. E ngan xa eilep mak mu, sanien namim di misak ni moletin holu lames Hi holu mu.^{a13} Melele xa Kristin xil e provins te hal Sudea lipus sanien namim xil, ma lipet rat his Hi ihe nesao. Xil lipus kila xa neketen namim e longongen hos usil Iesu Kristo be reitin ixo longxatien namim e ixo sanien

^u8:24 2Kor 7:14 ^v9:1 2Kor 8:4,20 ^w9:6 Pro 11:24; 22:9 ^x9:7 Pro 22:8
^y9:10 Aes 55:10; Hos 10:12 ^z9:11 2Kor 1:11; 4:15 ^a9:12 2Kor 8:14

hos namim mi xil e mi moletin sav xil. ¹⁴E isak ni eheien nae iti mi xamim. E lisis mi Hi ve xamim vengan lipus kil eheien hos na Hi xa di pol e meulien namim. ¹⁵E momal tangan rimes Hi ve sanien xa xi misa ni mi xir xa be Natneli vari tang. Reitin, sanien nan bos xa bos pupu, e sepinien xil tovuol xa vapin tangan vasep kila.

**Pol di bit usil polien e xeihen xa
Hi telingi teti hen tangan
vapol vaxoni eloheoh nan**

10 Nakila xa rut moletin ngan xil di labiteni labit, “Melele xa **Pol** di sotin e di midis uvei xil mi xir, ien mikat pupu e sepinien nan xil nggeih. E melele xa dat sangas visal xir, sexien nan memerou tang e di misepin del nenemien xa be tan.” Ve rin ak, di nadis uvei ak del merouen e hosien tang, xa nggoni merouen e hosien na Iesu Kristo. ^{b2}Nadakes xamim tangan melele xa nimei, munapol ni nou ti ninasepin naxeih naha xat ngan xil xa di labiteni labit xamem di mapol nggusil nenemien na moletin xil te ut etan tang. ^{c3}Be reitin xa xamem mabe moletin xil xa madi e ut etan. E matavae ti vatel moletin xil vahusil nenemien na moletin xil te ut etan. ⁴Xamem manggoni moletin te vaeen xil na Hi. E matavae ti vatel holesok xil te vaeen na moletin xil te ut etan. E-e. Holesok xil xa di mabae dela nggo Hi vari tang, e langgeih pupu e lapin tangan limu len xeihen sav xil. Del xeihen ak na Hi, xamem di mamu len sepinien xil xa tave reitin ti. ^{d5}Sepinien xil vus te koaien, e pispisien xil ngasen xa di dakoe xol moletin xil tangan lasakras lakil kuh Hi, xamem di mapisen ni xa latave reitin ti. E nenemien xil vus na moletin xil xa di sotin, xamem mabilesi mei di la-

long xat Iesu Kristo. ⁶E melele xa malongeong ni xa xamim holu mei mulong xat kuh pispisien xa matesa ni, ma xamem muhat e musa pangasien mi ngan xil xa di tamu latalong xat ti pispisien namem. ^e

⁷!Muketeh kuhi! Xosxa xamim di munemi mubit mube na Iesu Kristo reitin, ma bos tangan mukila xa xamem mun mabe nan. ⁸Tave ti neta xa natesep koai pupu usil xeihen xa Hi tesa ni mi xamem, e natave unoun ti ven. Vengan Hi tesa xeihen ak mi xamem tangan mapet rat xamim ni, tave tangan ti xa mavas tan ni xamim ni. ^{f9}Melele xa di nasa uvei tei bat mi xamim, natapol ni ti tangan vasak ni xamim ulimim vakan. ¹⁰Vengan nakila xa rut moletin ngan xil di labiteni labit, “Melele xa Pol misa uvei mi xir, sepinien nan xil meas e nggeih pupu. E melele xa bemei de visal xir, ma rapusi xa ven memel e sexien te sepinien nan xil tamal kuhi ti.” ¹¹Reitin xa madi nga sotin ra xamim, e di masa sepinien te xeih mi xamim nggo uvei xil. E bos xa ngan xil xa di laseputut xat xamem likil kuhi xa, melele xa mumei visal xamim, xamem ti mupol ihusil sepinien namem xil ak. ⁸

¹²Xamem matasak pisi ti tangan ti mapisen xa mabos mak mu mali titsa te luвосen xil xa di lapet rat tase ni xil. Vengan xil di lapol ni nenemien nae tang usil naha xa lanemi labit bos. Di, lapisan ni xa labos mak mu nggusil nenemien xa xil latelingi. Nggo sexien xil ak, lapisan ni xa vatixil tovuol. ^{h13}E, e rin namem, ti musep koai ihusil kes ni polien xa di mapol ni e rute xil xa Hi tesil xamem tangan ha mupol en. E haxot te polien namem xil bat duxoh xamim te hal Korin vengan xa Hi tesil xamem

^b10:1 1Kor 2:3 ^c10:2 1Kor 4:21 ^d10:4 Efes 6:13-17 ^e10:6 2Kor 2:9

^f10:8 2Kor 12:6; 13:10 ⁸10:11 2Kor 13:2,10 ^h10:12 2Kor 3:1; 5:12

tengan muhat visal xamim. ⁱ¹⁴Reitin, melele xa matekakaosotin tangan mapus xamim, matnaleli haxot ti xa Hi tesa ni mi xamem. Vengan tehe xamem iaxa matehur longeongen hos usil Iesu Kristo xa xamim mutelong kokot ni. ¹⁵Titsa te luvoson xil ak di lasep koai usil polien xa moletin sav xil di lapol ni, e xamem matapol ni sexien ak ti. Xamem iemem bei tangan xamim mei mumeul kuhi e neketen namim. Imak, ma xamem mukila mupol ni holesok holu mu itel xamim. ^{j16}Ti, mukila muhe rute sav xil mun xa ileli ut xa xamim mudi en tangan xamem ha muhithiten longeongen hos usil Iesu Kristo en. Iemem ti tavei tangan mapol e rute xil xa mosav xil latepol tuei en, vengon xa iemem ti tavei masep koai usil huit polien na moletin sav xil na Hi. ^k

¹⁷Ngan ak nggoni ngan xa Vanuvei Eo di biteni melele xa bit, *“Moletin xa ien bei vasep koai ve neta ngan, bos xa isep koai ve naha xa Iahova di pol ni.”* (Ser 9:24) ¹¹⁸Vengan xa Hi tavesi xi ti ve ngan xil xa di lapo rat xil mun tang. E-e. Hi Suv besi xi ve ngan xil xa xi tang di po rat xil mei labe nesao. ^m

Selxatien tangan linamaen titsa te luvoson xil ti mei linaluvos xil

11 Nasis xamim tangan mumaen nou nisep koai ixoni ngan xa lehit natalang vuteili. Io, mumaen nou li mu nipol ni. ²Inou natesikoe xol xamim tangan muve na Kristo kestang nggoni ngan xa moletin tei di misikoe xol atuli nan xa memese tamu da tangan iteli itel tiramue tei e ihe nan kestang. Mak, ma di naketeh xol xamim nggoni ngan xa Hi vari tang di pol ni, vengon ieok ti tavei xa rut moletin sav

xil lamei sangas visal xamim e lapurun xamim. ⁿ³Uluk mikan xa moletin sav xil mei linaluvos xamim e linalihi nenemien namim nahe reling Kristo e munasa ti mun meulien namim mini natel eheien namim xa memese. Vengan, texo hisit sexien nen tak, tetal teluvos **Iv** texo sepinien nan xa tekas. ^{o4}Mabiteni mak vengon xa melele xa titsa te luvoson xil lamei visal xamim, tave ti neta xa naha xa labithiteni usil Iesu misav ni ngan xa xamem di mabithiteni, xamim mukaten tangan muke reitin en. Reitin, melele xa pispisien nae usil Ninin Eo e longeongen hos na Hi misav ni pispisien namem, xamim mubesi xamim vari tang tangan muvuri. ^p

⁵Moletin xil ak lakes tasexil ni *‘elo-heoh* tellep xil.’ E inou natave hokorong ni xil ti. ^{q6}Be reitin xa inou natnasukul kuhi ti usil sexien te sepinien, e natehur kuh kilakilen. E xamem mapisen ni xa kilakilen namem be reitin nggo sexien namem xil e texo holesok sav xil xa di matepol ni melele xa mateti visal xamim. ^r

⁷Melele xa natete visal xamim natepol ni nenemien navan tehe tan e natesa longeongen hos na Hi mi xamim texoni sanien tang. Natesa ni temak tangan makila mapet rat xamim vatel longeongen hos ak. E rut xamim lanemi labit pispisien navan xil be neta sav tang vengon xa natasis xamim ti tangan muxal rati ranou. ?Midep xiak? ?Tenamal ti xa natepol ni nenemien navan tehe tan temak? !E-e, naha xa natepol ni temal tang! ^{s8}E melele xa natepol tetel xamim e hal Korin, moletin xil e sias sav xil di latesa tutouen minou. Io, nggoni ngan xa lehit di natekan ni mani na Kristin sav xil

^{i10:13} Rom 12:3 ^{j10:15} Rom 15:20 ^{k10:16} Pol 19:21

^{l10:17} 1Kor 1:31 ^{m10:18} 1Kor 4:4-5 ^{n11:2} Efes 5:26-27

^{o11:3} Sen 3:13 ^{p11:4} Kal 1:8-9 ^{q11:5} 1Kor 15:10; 2Kor 12:11; Kal 2:6,9

^{r11:6} 1Kor 1:17; 2:1,13; Efes 3:4 ^{s11:7} 1Kor 9:12,18

tengan nakila napol vatel xamim. ^{t9} Vengan xa melele xa nateti tetel xamim e natehe terume ni neta ngan, natnapol ni ti vaxeih mi xamim tangan mutoutou nou ni. Vengan xa Kristin xil e provins te hal Masedonia latemei e latesa naha xa natehe terume ni. E, e melengien xil xa ba ngam, natnapol ni ti vaxeih mi xamim tangan musa tutouen minou, e nitit ni ngan xa nipol ni imak e melengien sav xil xa ti imei. ^{u10} E melele xil vus xa nihat ti nipus xamim e provins te hal Akea, nabiteni reitin e his Iesu Kristo xa nixulehi tit nisep koai xa natnahur ti neta ra xamim melele xa natapol tetel xamim. ^{v11} E rut xamim lanemi labit di natahur ti tutouen vaxo xamim vengan xa eheien navan tovuol e xamim. !E tave reitin ti! Hi mikila xa eheien navan e xamim mahulong pupu.

¹² Inou nixulehi tit nisa longeongen hos na Hi mi moletin xil ixoni sanien tang vengan ieok ti tave nasa mesal mi titsa te luvosen xil tangan ti lisep koai lihit polien nae nggoni polien xa xamem di mapol ni. ¹³ Ngan xil ak labe **eloheoh** te luvosen xil tang. Lasing xol xil ni sexien na eloheoh xil na Iesu Kristo tangan mei lapol vatel xamim e ti laluvos xamim. ^{w14} E rinatemanin ni sexien nae xil ti. Vengan xa **Temat** mun di mising xol xusus ni xi nggoni ngan xa be **masx-axa** tei xa minehinen te xeihen na Hi da en. ¹⁵ Mak ma rinatemanin ti melele xa di rapusi xa moletin te polien nan xil mun dit laluvos labit labe moletin te polien xil na Hi e sexien nae momal. E, e hoxalite te meulien nae, Hi isa huit polien nae mi xil xa imal ihusil sexien te luvosen nae.

**Pol bit usil polien nan e
longpangasien xa di ngguri vengan
xa xi be eloheoh reitin na Iesu Kristo**

¹⁶ Ieok ti tavei xa ti munemi muvit inou natalang. E nasis xamim rilo-mun xa mumaen nou tangan nisep koai ihe terume tang ixoni ngan xa natalang vuteili. ^{x17} Melele xa di nasep koai ve holesok xil ak, natapol ni ti vahusil sexien xa Suv bit ti nipol ni. E-e, dit nasepin nggoni moletin tei xa mitalang. ¹⁸ E vengan xa titsa te luvosen xil holu di lasep koai nggusil nenemien na moletin xil te ut etan tang, inou mun nisep koai imak. ¹⁹ Xamim munemi mubit mube metisou pupu. E mupisen ni xa mube unu xil tang vengan xa mubesi xamim tangan muvur pispisien xil vaxo ngan xil xa latalang. ²⁰ Vengan xa melele xa titsa te luvosen xil mei lapol ni nggeih mi xamim tangan ti muvusil xat nenemien nae, ma mumaen ni tang. Mumaen xil lakan ni holesok namim xil, laling xamim mudi pe hexil, lapet rat xil pe metemim, e laleves xamim. ²¹ ?Midep xiak? ?Munemi mubit nabe unoun vengan xa matnapol ni ti vaxeih xat xamim vaxoni ngan xa xil di lapol ni? E-e, natave unoun ti ven.

E naha xa titsa te luvosen xil di lasep koai ven, inou mun nisep koai usili ili xil (mukila xa di nasepin nggoni ngan xa lehit natalang tang). ²² ?Midep xiak? ?Xil labit labe Siu xil? Inou mun nabe Siu. ?Xil labit labe mol-Isrel xil? Inou mun nabe ngan Isrel. ?Xil labit ladi vatimol na **Ebrahim**? Inou mun nade vatimol nan. ^{y23} ?Midep? ?Xil labit labe moletin te polien na Kristo? Inou nabe moletin te polien tei xa bos mak mu mili xil. (!Ei, di nasep koai nggoni ngan xa lehit natalang pupu!) Vengan polien navan xil holu mak mu mili polien nae xil, e latel-

^{t11:8} Plp 4:15 ^{u11:9} 2Kor 12:13 ^{v11:10} 1Kor 9:15 ^{w11:13} Plp 3:2

^{x11:16} 2Kor 12:6 ^{y11:22} Plp 3:5

ing nou e nim te xeih melele xil holu mak mu teli xil. Moletin xil latemeas pangas nou teha vuma ... nasakras mun navuli, e natehisu ni maten mun melele xil holu. ^{z24} Valim (5), *Siu* xil latemeas tenbeok ni ao tei xa mekan tetuxoh hanutap tei e hat e le tei mun (39). ^{a25} Vatol (3), moletin xil latehas purun nou ni liei. Vatei, sangas latexov vin nou ni hat xil. Vatol (3), tuturil xa nateta en temerir. E vatei, natesal e mesavuol te tas melengien tevi tei tetel vongien teni mun. ^{b26} Melele xil holu natekakao ve polien na Suv, e, e suse navan xil, natehisu ni melele te xeih xil. Usil suse navan, natekon melele xa natehur xoteh oeisal xil, e natekon pupu melele xa e natehisu mi moletin te kanen xil. Natekon ni he moletin xil xati navan te hal Isrel xa latepol texeih xat nou, e natekon ni he ngan xil mun xa latave Siu xil ti xa latepol texeih xat nou. Di nabisu ni melele te xeih xil melele xa nade taon tei, mu uruvuol, mu e tas mun. E di nalong pangas nou nggo he ngan xil xa di laluvos labit labe tua navan xil e neketen. ^{c27} Nalongo pangas nou vengan napol nggeih xa nggeih. Vongien holu natnapat ti. Melele holu mae kekaten del maruruen di tehas pupu ni nou. Melele xil holu eising navan xil tenapin ti, ma masoh di teat pupu ni nou. ^{d28} E tei mun xa mili holesok xil ak, e melengien xil vus dit nanexo pupu ve Kristin xil e sias xil vus. ²⁹ Vengan xa melele xa nalong usil moletin tei xa neketen nan memerou, inou mun nalonge nggoni ngan xa namerou. E melele xa nalonge xa moletin sav xil di lasak ni Kristin tei misavut e neketen nan, tinok minggan pupu ven. ^e

³⁰ Xosxa nisep koai usil nou mi xamim, ma nixulehi tit nisep koai usil holesok xil xa di pisen ni xa namerou tang. ^{f31} Holesok xil vus xa nabit rati mi xamim be reitin. Hi, Tame Iesu Kristo (xa di napet rati vehakut), mikila xa nataluvos xamim ti. ^{g32} Vatei, melele xa natete taon te hal Damaskas, vat na kavmen e rute ak xa suv toto Aretas telingi tese-mae ni moletin nan xil tangan liketeh xol vloh te taon tangan lital xat inou. ^{h33} E vengan xa uluk tekan pupu, natemaen tuxoli xil e neketen latease nou natehe ateli tei xa eilep e lateso kital ni nou natexo mesal tei te vloh te taon xa be nesao pupu. Di, latesae ni nou natehe tan. Melele xa natetuxoh tan, natelesae tang tangan ninave ti he vat te kavmen ak. ⁱ

Pol bit usil naha xa Hi tepisen ni mini texo metuveen xil

12 Nitit ni ngan taxa ti nisep koai, ¹ **tave** ti neta xa tatutou ni nou mu mosav xil ti. Nihit rati mi xamim holesok xil xa Hi tepisen ni minou texo metuveen xil. ² Inou nakil Kristin tei xa da, ^{§§} xa hura ram hat e le tei (14) ngamu, Hi tehur rati tehe ut nesao, rute xa be nesao mak mu mili momah e hitu xil, rute xa Hi vari tang da en. Natakil ti xa teha tetel tenben mu ninin tang. Hi keatang iaxa mikila. ³ Reitin, nabit rilomun ni xa natakil ti xa moletin ak tehe ut nesao tetel tenben mu ninin tang tehe ut nesao, Hi keatang iaxa mikila. ⁴ E moletin ak, latehur rati tehe ut nesao, rute xa bos xa bos. E inggak, xi miteong ni holesok xil xa moletin xil te ut etan lasakras lasep usili. ⁵ Mak, ma nisep koai usil moletin ak. E, e rin navan, nisep koai usil holesok xil xa di pisen ni

§§12:2 Ngan ak di misep usil Pol vari.

^z11:23 1Kor 15:10 ^a11:24 Dut 25:3 ^b11:25 Pol 16:22; 14:19

^c11:26 Pol 9:23; 14:5 ^d11:27 2Kor 6:5 ^e11:29 1Kor 9:22

^f11:30 2Kor 12:5 ^g11:31 2Kor 1:23 ^h11:32 Pol 9:24-25 ⁱ11:33 Pol 9:23-25

xa namerou tang. ^{j6}E xosxa nihit nisep koai ve holesok xil xa di napol ni, ma natasep talang ti vengan xa holesok xil ak be reitin. E ninapol ni ti vengan ieok ti tavei xa moletin xil mei lisa his tova xa vahe eilep minou ve sepkoaien navan xil. Ihos mak mu xa linem usil holesok xil xa di lapus nou di napol ni e di lalong nou nabiteni. ^k

⁷E tangan ninasep koai ti ve holesok hos xil xa natepusi texo metuveen xil ak, Hi tesa longpangasien tei temei e tenbeok xa nggoni sanut aoven xil xa temavul teti nga tang e hilbeok. Reitin, ngan ak di misak ni nou nalong pangas nou vehakut nggoni ngan xa neta tei na **Temat** de nou tangan vasak ni nou ninasep koai ti nave holu. ¹⁸Vatol, nate-takes Hi tangan vahur rati vahe reling nou. ⁹E xi bit rilomun ni minou bit, “E-e, ninahur rati ti ra xouk. E nitutou ni xouk ve eheien hos navan. Ngan ak ipin mi xouk. Vengan xa melele xa omerou, di pisen xeihen navan mak mu.” Mak, ma nisep koai ihe holu mu itel sien ve merouen navan. Vengan, imak, ma xeihen na Kristo mei ite meulien navan. ¹⁰Ma, vengan xa nakila xa di nanggur sakpurnien xil ak ve his Iesu Kristo, melele xa moletin xil ti liseputut minou, ninalonge ti nasa ve merouen navan. Ninanexo ti melele xa moletin xil ti lipol ni ixeih minou, ti lisak purun nou, e lisa longpangasien minou. Ninanexo ti vengan xa nakila xa melele xa namerou, e melele nen ak vari, xeihen na Kristo bemei di pol nggeih mak mu nggo nou. ^m

Pol misep usil polien e eheien nan mi moletin xil te hal Korin

¹¹Melele xa di nasep koai mak, di nasep talang tang. E xamim vari iaxa

musak ni nou napol ni. Vahit vahe xamim iaxa ti musep koai venou, veng-an xa natave hokorong ti ni titsa te luvosen xil xa di lakes xil ni ‘**eloheoh** tellep xil.’ E tave ti neta xa inou nabe moletin votei tei tang, nabe eloheoh na Iesu Kristo reitin. ⁿ¹²Melele xa natete visal xamim, tave ti neta xa natehisu ni melele te xeih xil, dit natepol. Reitin, natepol ni merekel xil holu e simelelen sav xil xa tepisen ni xa nabe eloheoh tei reitin. ^{o13}?Midep xiak? ?Naha vari iaxa natnapol ni ti vatel xamim xa natepol ni mi moletin xil e sias sav xil? Neta tei takes iaxa natnapol ni ti. Natnasis xamim ti tangan musa ti mani mei vatutou ni nou. ?Mak, ma veneh vari iaxa di mubiteni xa natepol tesa mi xamim? ^p

¹⁴Muteong kuhi. Di nabue xat nou tangan mei nisao ni xamim vatei mun xa ihe vatol nen. E melele nen ak mun, ninasis xamim ti tangan mei mututou ni nou. Vengan ieok ti tavei holesok namim xil. E ieok bei tangan musa xamim vari tang minou. Vengan xa nalonge nggoni ngan xa mube horamue navan xil. E xil lataso viton holesok nae xil ti tangan vatutou ni tamexil e ninexil. E be tamexil e ninexil iaxa di laso viton holesok tangan vatutou ni nae xil. ^{q15}Nabesi nou holu tangan nisa holesok navan xil e nisa meulien tevi navan mun tangan itutou ni xamim. ?E xosxa eheien navan mi xamim mahulong pupu, ma veneh iaxa eheien namim minou hokorong mak? ^r

¹⁶Xamim vus mukila xa natnaleh ti neta ra xamim. E tave ti neta xa mak, titsa te luvosen xil di laseputut ni inou labit, “Pol teluvos xir e di telihi nene-mien nar texo sepinien xil xa mikas.” ¹⁷?Natepol ni tetep? Ngan xil xa natesil xil tangan hat lavat lapus xamim lat-

^{j12:5} 2Kor 11:30 ^{k12:6} 2Kor 10:8; 11:16 ^{l12:7} Siob 2:6

^{m12:10} Plp 4:11,13 ^{n12:11} 2Kor 11:5 ^{o12:12} Rom 15:19

^{p12:13} 2Kor 11:9 ^{q12:14} 2Kor 13:1 ^{r12:15} Plp 2:17

nasak pisi ti tangan laleh holesok namim vaxo suse te luvosen.¹⁸ Inou natesis Taetas tangan vahat vasao ni xamim vatel tua tei e neketen. E Taetas tenaluvos xamim ti tangan valeh holesok namim. E nenemien e sexien namel be tei takes.

¹⁹ ?Midep xiak? ?Xamim munemi mubit holesok xil vus xa di masepin ni e uvei ak di masepin ni tangan vasesp xol rin namem? !E-e, tamak ti! Tuxoli e hinoxoli xil, pe met Hi, xamem xa mabisti del xat Iesu Kristo di mabiteni reitin e melele xa mabiteni xa holesok xil vus xa di mapol ni, mapol ni tangan vatutou ni xamim.²⁰ Uluk mikan xa melele xa nihahat nipus rilomun ni xamim, ninakameti ti xa munaxoni naha xa ieok bei. Isa pupu xosxa nikameti xa sexien namim xil taviles ti, e xamim mun munakameti xa namei del xat ekaten. Uluk mikan xa ninakamet ngongoren, eluen, ekaten, sepututen, luvosen, koaien, tetasilen, nenemien namim napolu ni xamim, e ti muketeh nasa ni xamim mun tang.²¹ Reitin, uluk mikan xa melele xa nitilomun ve xamim, Hi navan napol ni nou ninave unoun pe metemim e ninalonge nasa vengan xa xamim holu lataviles ti mu ra tesaen nae xil. Reitin, uluk mikan xa ninakameti xa mutaviles ti mu ra sexien xil xa be muis, e dit mupat del ngan xil xa mutateli ti vatel xil, e dit mupol ni tesaen sav xil del tenbemim xa pisen ni xa unounen namim tovuol. ^u

Selxatien kor

13 Vanuvei Eo di biteni bit, “Melele xa moletin tei biteni xa moletin sav tei pol misa, moletin lu mu tol xa latepusi iaxa latimej latihiteni xa be reitin xa tepol ni. Ti, lisa pangasien mini.” (Dut 17:6)

^vE vengan xa ihe vatol xa nimej nisao ni xamim, nimej tangan nipus reitinen te sexien namim xil e nisa pangasien mi xamim.² Melele xa natemej natepus xamim tehe valu, natesel xat xamim xa ninasa ti mun mesal mi ngan xil xa di lapol misa. E taxeak mun, tave ti neta xa natara ti visal xamim, ieok bei xa nisa selxatien mun mi xil. Xosxa nitilomun ve xamim, nabiteni reitin xa nisa pangasien mi ngan xil xa di latepol tesa tetiamu, e langgulehi dit lapol ni taxeak.³ Vengan xa xamim mubit mupusi xa be reitin xa Iesu Kristo di misepin nggo inou, e, nave nousav ti, mupusi sung. Melele xa nimej, munapus ti mun merouen navan, e mupus xeihen xa Iesu Kristo tesa ni minou tangan nisa pangasien mi xamim.⁴ Be reitin xa moletin xil holu latehiteni xa Iesu Kristo tepisen merouen nan melele xa lateti xati tete eivave e temat. E melele xa Hi tesak ni temeja rilomun ra maten e mej meul xosali, ngan ak pisen xeihen na Hi. Nggo rin ak, xamem mun xa di mapol mini mamerou tang. E melele xa muhat mupus xamim tangan mulepis tesaen xil namim, xamim mupus ti sung xeihen na Hi xa mangguri e hise Iesu Kristo. ^w

⁵Bos xa xamim kekes iketeh ilepis meulien nan tangan ipus kila xa neketen nan e Iesu Kristo be reitin mu tave reitin ti. Reitin, bos xa musak pis neketen namim. Isa pupu xosxa mukameti xa di muluvos e neketen namim.^{x6} E xosxa mukameti xa neketen namim be reitin, ma ipisen ni xa polien xa matepol ni tetel xamim nggoni eloheoh xil na Iesu Kristo be reitin. E ipisen ni mun xa matnaluvos xamim ti.

⁷Xamem masis Hi tangan itutou ni xamim e munapol ni ti mun tesaen. Matasis ti vamak tangan vapisen ni xa

^s12:18 2Kor 8:6,16-18 ^t12:20 2Kor 2:1-4 ^u12:21 2Kor 13:2

^v13:1 2Kor 12:14; Dut 19:15; Mat 18:16; 1Tim 5:19 ^w13:4 Plp 2:7-8

^x13:5 1Kor 11:28

polien namem bos, e vengan xa iemem bei tangan sexien namim imal tevi. Mak, ma tave ti neta xa rut moletin ngan xil labit mapol ni neta xa tamal ti pe metemim, bos tangan xamim mupol ni neta xa imal. ⁸E naha xa di mapol ni, mapol ni tangan vapisen reitinen na Hi, e masakras mapol ni ti neta xa tahusil xat reitinen nan ti. ⁹Mak iaxa, neta sav xosxa rut moletin ngan xil di labiteni xa xamem mamerou tang, e mabesi xamem melele xa mapusi xa xamim di musoh nggeih e neketen namim. Ma masis tangan xamim mei mumese e sexien namim xil vus. ¹⁰Ma, di nadis selxatien xil ak bat mi xamim melele xa nade sotin tamu ra xamim. Imak, ma melele xa nitilomun nihat nipus xamim, ninasa ti mun pan-

gasien mi xamim natel xeihen xa Hi Suv tesa ni minou. Vengan xi tesa xeihen ak minou tangan ti nipet rat xamim ixo en, tave tangan ti xa namu len xamim muvetan. ^z

¹¹Tuxoli e hinoxoli hos xil, di nasa selxatien kor xil ak mi xamim: muling kuh holesok xil, muhusil kuh selxatien xil navan, nenemien namim ihe tei takes, e mutit e tomat itel xamim mun tang. Imak, ma Hi te eheien e te tomat iti mi xamim. ^a

¹²Mupo xat xamim itel eheien na Hi. ^{b13}E moletin xil vus na Hi inggak labit 'bos makoe' bat mi xamim.

¹⁴Eheien hos na Suv Iesu Kristo, eheien na Hi, e vitueien na Ninin Eo iti mi xamim vus.

^y13:8 1Kor 13:6 ^z13:10 2Kor 2:3; 10:8,11 ^a13:11 Plp 4:4; Rom 15:33

^b13:12 Rom 16:16; 1Kor 16:20; 1Pit 5:14

Sepinien xa diamu te

Kalesia

?Visi iaxa tetis uvei ak?

Pol, xa tehe eloheoh tei na Iesu Kristo iaxa tetis uvei ak^c

?Visi iaxa tevuli uvei ak tetiamu?

Pol tetis sepinien xil ak teha mi Kristin xil xa lateti e provins te hal Kalesia. Pol teha rohon mi xil e huram 46 AD e teti tetuxoh huram 48 AD (huram xil tetutou ni poten na Iesu)^d Di, Pol xal Saelas lutetilomun lutehe Antiok.

Melele xa Pol xal Saelas lutehe reling ngan xil te provins te hal Kalesia, rut Siu xil latemei e latehilhiles nenemien na Kristin xil te sias hu xil ak.^e

?Pol tetis uvei ak veneh?

Pol ien tehei tangan vamal ni nene-mien na mol-Kalesia xil usil visi iaxa tehosei xi tangan mei vahe eloheoh tei - Rut Siu xil latemei latehiteni xa Pol tave eloheoh reitin ti e longeongen hos xa di misep usili texo nenemien nan tang.^f

Pol ien tehei tangan vamal ni nene-mien na mol-Kalesia xil usil naha vari be vatit longeongen hos - Rut Siu xil latemei e latehiteni xa Kristin xil vus, ngan xa be Siu e ngan xil mun xa latave Siu xil ti, lihe vexahu,^g

Pol ien tehei tangan vamal ni nene-mien na mol-Kalesia xil usil naha xa Kristin xil lakila lapol ni - Melele xa rut Siu xil latehiteni xa Kristin xil lihusil xat rae xil na Siu xil tangan mei lamal pe met Hi, nggoni ngan xa di lasak tangan lapol ni xil lave slev te rae xil ak.^h

Pol ien tehei tangan vamal ni nene-mien na mol-Kalesia xil usil polien na Ninin Eo e meulien nae - Rut Siu xil latesi petine Kristin xil te provins te hal Kalesia tangan lavusil xat rae e sexien na Siu xil, e latnanem ti vahe holu usil Ninin Eo. E Pol tehit kila xa Ninin Eo be vatit meulien na Kristin xil,ⁱ

Vatit nenemien tei te uvei ak de Kalesia 2:16

Rakila sung xa moletin tovuol mei vamal pe met Hi vaxo suse xa di nggusil xat kuh rae xil vus na Siu xil. Di ranem kila xa moletin xil vus lakila mei lamal pe met Hi melele xa laling neketen nae e Iesu Kristo. E mei raneket e Iesu Kristo tangan mei ramal pe met Hi ve neketen nar, tave ti ve sexien xa di ranggusil xat rae na Siu xil.

?Naha iaxa di e uvei ak?

1. Pol misep usili xa tetep iaxa mei tehe eloheoh tei e tehur longeongen hos nan texo Iesu Kristo vari. (1:1–2:21)

2. Pol pispisi ni xa Kristin xil mei limal pe met Hi ixo neketen nae e Iesu Kristo, e tenaxo rae na Siu xil ti. (3:1–4:31)

3. Pol pispisi ni xa Kristin xil lameluv ra xeihen te rae xil, e ra xeihen te tesaen

^c1:0 Kal 1:1; Pol 13:4–14:28; Pol 15

^d1:0 Pol 13:4–14:28; Pol 14:1-5; Pol 14:8-20; Pol 14:21-25

^e1:0 Kal 1:6-9; Kal 3:1-5; Kal 1:11-12; 2:7-8; Kal 1:12–2:10; Kal 3:26–4:7

^f1:0 Kal 1:11-12; Kal 1:13-14; Kal 1:15-17; Kal 1:18-24; Kal 2:1-21 ^g1:0 Kal 2:3; 5:2; 6:12; Kal 2:12; Kal 2:4,10; 3:2; Kal 2:16; 3:6,22; 5:5; Kal 5:2-3 ^h1:0 Kal 5:1;

Kal 5:1; Kal 5:13; Kal 5:16 ⁱ1:0 Kal 2:20; Kal 3:2-5; Kal 4:6; Kal 5:16,22-25

e maten mun. E lameluv tangan lavusil xat Hi vatel tutouen na Ninin Eo. (5:1-6:18)

Sepkilaen na Pol usil uvei ak

1¹⁻²Inou, *eloheoh Pol*, del Kristin xil e rute ak di masa uvei ak mi xamim, Kristin xil te sias xil e provins te hal Kalesia. E tave vanut moletin xil ti xa latehosei inou tangan nihe eloheoh tei, mu tangan hat nisepin mi xamim. E be Iesu Kristo xal Hi Tamer, xa tesak ni temea rilomun ra maten, iaxa lutehosei inou tangan mei nihe eloheoh nalu.^j

³Nasis tangan eheien hos e tomat na Hi Tamer e Suv Iesu Kristo iti mi xamim. ^{k4}Iesu temaen rat meulien nan e temat ve *tesaen* nar xil. E tepol ni temak tehusil nenemien na Hi tangan vasak ni xir rameluv ra holesok xil xa misa te xos-ali ak. ¹⁵Hi be eilep pupu e momal tangan ripet rat hisen ihe nesao ha vuma ... hoxalite teni ihe tovuol. Reitin.

Selxatien tangan Kristin xil lihur xat longeongen hos xa be reitin xa latehuri ngamu

⁶Inou natemanin melele xa nalongeong ni xa di mustokovein Hi xa tepisen eheien hos nan mi xamim ve naha xa Iesu Kristo tepol ni, e xa tekes xamim mei mube nan. Reitin, di mustokovein ni e di mubiles munggusil xat longeongen sav tei. ⁷E naha xa di munggusili tave longeongen hos ti mun. Vengan xa rut Siu xil iexil bei tangan lihiles reitinen te longeongen hos usil Iesu Kristo mei ihe neta sav tang. E lasak ni nenemien namim di pol lualu usili. ^{m8-9}E inou nabiteni reitin mi xamim xa xosxa moletin tei ihat mi xamim e ihithiten

longeongen sav tei xa isav ni ngan xa xamem matehithiteni mi xamim ngamu, ma pangasien xa Hi isa ni mini ihe eilep e hoxalite teni ihe tovuol. !Reitin, tave ti neta xosxa xi be eloheoh sav tei, mu *masxaxa* tei te ut nesao vari, xosxa longeongen nan isav ni ngan xa mutehuri ngamu, ma xi ihe Upang xa misakras vavus vatova!ⁿ

¹⁰Xamim mulong kila nggo sepinien te xeih navan xil ak xa natasak pisi ti tangan nasak ni moletin xil mei lavesi xil venou. E ieok bei pupu tangan Hi tang ihesi xi venou. Vengan xosxa di nasak pisi tangan napol ni moletin xil tang lavesi xil venou, nggoni ngan xa rut moletin xil di labiteni, nasakras mun name moletin te polien na Iesu Kristo. ^o

Pol misep usil polien xa Iesu Kristo tehosei xi tangan vapol ni

¹¹Tuxoli e hinoxoli xil, ieok bei tangan mukila xa longeongen hos xa natehithiteni mi xamim tenaxo nenemien na moletin xil ti. ¹²Vengan longeongen hos ak, natnahuri ti tenaxo moletin tova mu tenaxo pispisien na mosav. E tehe Iesu Kristo vari tang iaxa tesepe kil longeongen hos ak minou. ^p

¹³Xamim mutelonge xa, tetiamu, natehusil xat pupu ni rae xil na Siu xil. Ngan ak be reitin. E melele nen ak, natehe elu mi Kristin xil. Natehas purun xil hao, e natesak pisi tangan namu len Sias na Hi. ^{q14}Natesa nou tangan namur sen pispisien xil na Siu xil. E kilakilen navan teli moletin holu xa haram nae tehe eilep mu teli navan. E natesak pisi tangan namusil vuol ni sexien xil xa avu namem xil tetiamu latesa ni mi xamem. ^r

^j1:1-2 Kal 1:11-12; Pol 20:24 ^k1:3 Rom 1:7; Plp 1:2; Flm 1:3

^l1:4 Kal 2:20; 1Tim 2:6; Taet 2:14; 1Sion 5:19 ^m1:7 Pol 15:1,24

ⁿ1:8-9 1Kor 16:22 ^o1:10 1Tes 2:4 ^p1:12 Kal 1:1

^q1:13 Pol 8:3; 22:4-5; 26:9-11 ^r1:14 Pol 22:3

¹⁵⁻¹⁶ E natnakil ti xa, tetiamu ni melele xa latepes nou, Hi tehesi xi tangan vahosei nou. ⁵natnava ti tangan nasis moletin sav tova mei vapispisi minou usili. ¹⁷ E natnave **Serusalem** ti tangan ha nasepin vatel ngan xil xa mei latehe eloheoh xil tetiamu ni nou. E natemea, natehe uruvuol te kantri te hal Arebia. E tetutou ni, natetilomun natehe taon te hal Damaskas.

¹⁸ Di, melele xa huraam tol mei tetavi, nateha sung e hal Serusalem tangan nasao ni Pita, e nateta tetela wik lu tang.

¹⁹ E natepus elda Temis, tua na Suv Iesu. E eloheoh sav xil, natnapus xil ti. Xil latnapispisi ti minou usil longeongen hos xa nangguri. ²⁰ Naha xa di nadisi mi xamim be reitin, nataluvos xamim ti. ^v

²¹ Di, natehe provins xalu te hal Siria xal Silisia. ²² E Kristin xil te sias xil e provins te hal Sudea latnapus kil nou ti mu. ²³ Xil latelongeong ni sepinien usil nou tang xa tehit, "Moletin xa temeigen tangan vasak purun ngan xil xa laneket e Iesu, meulien nan biles ngamu. E taxeak, xi di bithiten longeongen hos xa, tetiamu, di tesak pisi tangan vahu len ni."

²⁴ E melele xa latelonge temak, latepet rat his Hi ve naha xa tepol ni e meulien navan.

Eloheoh sav xil lapus kil reitinen te longeongen hos xa Pol di bithiteni

2 Huraam hat e le tei (14) mei tetavi, e nateha mun e taon te hal **Serusalem** tetel Banabas. E Taetas mun tehupil xamel. ^{w2} Natehe Serusalem texoni ngan xa Hi tepisen ni minou tangan nipol ni. E melele xa natetuxoh Serusalem, nate-totan tetel ngan xil kestang xa lateling xil latehe vat xil te sias. E natehit mesen longeongen hos xa natehithiteni mi ngan xil

xa latave Siu ti. Ieok tehei tangan vat xil ak lalong kila e lamae en. Vengan ieok ti tavei xil lapol ni polien navan mei vahe neta sav tang. ³ E melele xa vat xil late-long sepinien navan xil, latemea en xa moletin xil mei lamal pe met Hi nggo suse te neketen nae e taxo ti suse te vexahu. E xil lapus kila xa Taetas, xa tehupil nou, be tua nae e neketen, tave ti neta xa xi be ngan **Kris** xa tave vexahu ti. Vat xil ak te sias latnapol ni ti tenaxeih mini tangan vahe vexahu.

⁴ E, e melele nen ak, rut moletin xil xa di lateluvos latehit labe Kristin late-mos xuxus e totanen namem. Xil late-mei tangan lalong xuxus ni rin xa nabit xir, Kristin xil xa raneket e Iesu Kristo, rameluv ra rae xil na Siu xil. Vengan iexil tehei tangan lixeih xat xir rihusil xat rae na Siu xil e mei rihe slev xil teni. ^{x5} E xamem matnamae ti vari e nenemien nae xa tehit Kristin xil vus lihusil xat rae xil na Mosis ixoni ngan xa labe Siu xil. Matesoh texeih e reitinen te longeongen hos xa di matepispisi ni mi xamim tangan mukila tamu muling neketen namim en e muhusili.

⁶ E melele xa natesepin tetel ngan xil ak xa latepus xil texoni ngan xa latehe vat xil te sias, natepusi xa latesakras lasorin ni ti neta mun vatel pispisien xil xa di natehithiteni mi moletin xil. E neta sav xa mak, inou nabit ninakil ti xosxa moletin xil di lapet rat his vat xil ak be nesao, vengam xa moletin tovuol vahe nesao mu vahe etan mu pe met Hi. ^{y7} Reitin, vat xil ak latasorin ni ti neta mun vatel pispisien xil navan, e latepus kila xa Hi tehosei nou tangan ha nisa longeongen hos nan mi ngan xil xa latave Siu ti. Reitin, tehosei inou e vatit sexien xa tehosei Pita mun tangan vasa lon-

⁵1:15-16 Aes 49:1; Ser 1:5; Rom 1:1; Pol 9:3-6; 22:6-10; 26:13-18; Kal 2:7

¹1:18 Pol 9:26 ^u1:19 Mat 13:55; Mak 6:3 ^v1:20 Pol 9:30 ^w2:1 Pol 15:2

^x2:4 Pol 15:1,24; Kal 1:7; 5:1,13 ^y2:6 Dut 10:17

geongen hos nan mi Siu xil. ²⁸ Vat xil lapus kila xa Pita be **eloheoh** na Hi mi Siu xil nggo xeihen xa Hi di misa ni mini tangan vapol vatel xil. E nggo vatit suse ak, latepus kila xa Hi di misa xeihen minou tangan nakila napol vatel ngan xil xa latave Siu xil ti vaxoni eloheoh nan mi xil. ⁹ Reitin, melele xa Temis, Pita tetel Sion, xa latbe seteman xil te sias e hal Serusalem, lattelong usili xa Hi tepisen eheien hos minou e rin xa di duxol xat polien navan del ngan xil xa latave Siu ti, latehur pilei xamel Banabas tetel hexil metu te vitueien. Latehesi xil tangan ha muxulehi mupol itel ngan xil xa latave Siu ti, e xil ti lixulehi lipol itel Siu xil. ¹⁰ Neta tei takes iaxa latesis xamem tangan ti mupol ni tangan ti musa tutouen mi Kristin xil te hal Serusalem xa holesok nae tovuol. E natehesi nou melele xa natelonge, vengon xa teti nenemien navan ngamu tangan nipol ni. ^a

Pol momal ni Pita bit Kristin xil linahusil ti rae na Siu xil tangan mei lamal pe met Hi

¹¹⁻¹² E, vatei, Pita temei tangan vasao ni xamem e taon te hal Antiok. E melele xa bemei, xi teanien vituei tetel ngan xil xa latave Siu xil ti. ^b Di, elda Temis tesil rut Siu xil latemei latepus xamem e Antiok. Xil ladi e vanut Kristin xil xa lanemi labit moletin xil vus lihe **vexahu** mu tangan mei limal pe met Hi. E melele xa moletin xil ak latemei, Pita tehiles e tenamos ti mun e ngan xil xa latave Siu xil ti. Reitin, tenaxanien vituei ti mun tetel xil vengon ulin tekan xa Siu xil ak linanem nasa ni. Ma melele natepusi xa sexien nan tehiles temak, natevul xati pe met Kristin sav xil. ¹³ E melele xa Kristin sav xil te hal Antiok xa labe **Siu** latepus sexien na Pita, xil mun latehusil luvosen

ak e latepol texoni. E Banabas mun tang iaxa tetam ras suse nan e tepol ni texoni xil.

¹⁴ E melele xa natepusi xa sexien xa **Siu** xil ak latepol ni tenamal ti e tenahusil kuh reitinen te longeongen hos nar ti, natesepin mi Pita pe metexil natehit, “Tua navan, xouk obe Siu tei, e vatei, obesi xouk tangan ostokovein rae xil na Siu xil vati. Reitin, di ongganien vituei e opol ni rut sexien xil nggoni ngan xa di omos e ngan xil xa latave Siu ti. ?Mak, ma taxeak, veneh ma di obiles nenemien nam tangan oxeih xat ngan xil ak xa latave Siu ti tangan ti lihusil xat sexien na Siu xil, sexien xil xa xouk vari di ostokovein ni?” Reitin, natesepin temak mini.

Moletin xil vus mei lamal pe met Hi melele xa laling neketen nae e Iesu Kristo kestang

¹⁵ ?Ma midep e rin namim, Siu xil? Be reitin xa ratehe Siu ngamu melele xa latepes xir. E ratepus ngan xil xa latave Siu ti xa latahusil rae nar xil ti texoni ngan xa latehe moletin tesa xil pe met Hi. ¹⁶ E neta sav xa temak, xir vus rakila sung xa moletin tovuol mei vama pe met Hi vaxo suse xa di nggusil xat kuh **rae** xil vus na Siu xil. E rakila sung xa moletin xil vus lakila mei lamal pe met Hi melele xa laling neketen nae e Iesu Kristo, e tave ti vengon xa di ranggusil xat rae na Siu xil. ^c

¹⁷ Ma melele xa di rabbiteni xa Kristo kestang mikila vasak ni xir mei ramal pe met Hi, di rapisen ni xa rapus kila xa rabe moletin tesa xil nggoni ngan taxa rabe ngan xil xa latave Siu ti. ?Ma midep, be Kristo iaxa di misak ni xir mei rabe moletin tesa xil? !E-e, tamak ti! ¹⁸ E vahit natilomun namusil xat rae xil na Siu xil

²2:7 Pol 9:15; 22:21 ^a2:10 Pol 11:29-30 ^b2:11-12 Pol 11:5-18

^c2:16 Pol 15:10; Rom 3:20,28; 4:5; 11:6; Efes 2:8; Kal 3:11; Sam 143:2

xa natestokovein ni e natehu lelen ni ngamu, e nispisi mi mosav xil mun tangan lavusili, ma vahe reitin xa name moletin tesa tei xa di nanggur xoteh rae xil na Hi. E natapol ni ti vamak. ¹⁹ Vengan melele xa natepus kila xa nasakras vari mei namal pe met Hi vaxo rae xil na Siu xil, Hi tehur meulien matu navan xa natehusil xat kuh rae xil na Siu xil en, e xi teti xati tete eivave tetel Iesu Kristo. E melele nen ak, meulien matu navan temat, e rae xil labe neta sav tang minou. E Hi tepol ni temak minou tangan nakila nameul e napet rat xi tang vatel meulien hu navan. ^{d20} Misak ni, tave nou ti mun xa nameul, e be Ninin na Iesu Kristo iaxa di meul de nou. Ma, taxeak, holesok xil vus xa di napol ni del veok, di napol ni del neketen e Nat Hi. Xi iaxa ien bei nou e temaen xoteh meulien nan temat tangan vahinat nou. ^e

²¹ Inou nakila xa Hi di pus xir ramal vengon xa eheien hos nan mahulong. Misak ni, minasak pisi ti mun tangan nasoh e momalen navan vaxo suse te rae xil vengon, xosxa imak, ma ipisen ni xa di nake neta sav tang e sanien eo xa xi di misa ni minou nggo Kristo nggusil eheien hos nan. Vengan, vahit moletin tei mikila mei vama vaxo rae xil na Siu xil kestang, vaxoni ngan xa rut Siu xil di labiteni, ma Iesu Kristo temat votei tang. E rakila xa ngan ak tave reitin ti.

**Hi di misa tuxolxatien nan
nggo suse te neketen, e tave
suse te rae na Siu xil ti**

3 O mol-Kalesia xil, sexien namim xil di pisen ni xa mube unu xil tang. ?Veneh ma mutemaen moletin xil mei latesep luvos xamim tetel sepinien xa bit ti muhusil xat rae xil na Siu xil tangan

mei muve Kristin xil reitin pe met Hi? Vengan, pe metemim, inou natehit kila xa tetep iaxa Iesu Kristo temat e eivave. ² Ma muhit kila minou li. ?Hi tesa **Ninin Eo** mi xamim vengon xa mutehusil xat kuh **rae** na Siu xil? E-e. Tesa Ninin Eo mi xamim vengon xa muteneket e longeongen hos usil Kristo. ³ ?Misak ni, veneh ma di mupol ni sexien na unu xil? Vengan, tetiamu, muteka rohon e suse te neketen namim texo xeihen na Ninin Eo. E taxeak, di musak pisi tangan mutuxoh hoxalite te suse ak vaxo xeihen namim tang. ⁴ Xosxa muhiles ra suse te neketen xa be reitin, ma sakpurunien xil xa mutehuri ngamu ve neketen namim, mutehur votei ni tang. ⁵ E melele xa Hi tesa Ninin Eo mi xamim e tepol ni merekel xil mi xamim, tenapol ni ti vengon xa mutehusil xat kuh rae na Siu xil. Tepol ni vengon xa mutelong longeongen hos usil Iesu Kristo e muteling neketen namim en.

⁶ Rakila xa ngan ak be reitin vengon xa nggoni ngan xa Vanuvei Eo tehiteni usil **Ebrahim** tehit, “*Ebrahim miling neketen nan e hitxatien na Iahova. Ma ve rin ak, Iahova besi xi ven e pus meulien nan momal pe meten.*” (Sen 15:6) ^{f7} Ma bos xa mukila xa be ngan xil xa di laneket iaxa labe vatimol xati na Ebrahim. ⁸ E Hi teling xati ngamu tangan vapol ni suse taxa ngan xil xa latave Siu ti likila mei limal pe meten ixo neketen. Longeongen hos ak, Hi tehit lelen ni mi Ebrahim tetiamu tehit, “*E xouk uhe suse te tuxolxatien navan iha mi moletin xil te vatimol xil vus te ut etan.*” (Sen 12:3) ^{g9} Ve rin ak, tuxolxatien na Hi di mi ngan xil vus xa di langgur neketen nggoni ngan xa Ebrahim tehuri. ^h

¹⁰ E halesil tei iti mi ngan xil vus xa di lasak pisi tangan lavusil xat rae xil na

^{d2:19} Rom 7:6

^{e2:20} Sion 13:1; 17:23; 1Sion 3:16; Kal 1:4; 1Tim 2:6; Taet 2:14

^{f3:6} Rom 4:3 ^{g3:8} Sen 18:18; Pol 3:25 ^{h3:9} Rom 4:16

Siu xil tangan mei lamal pe met Hi. * Vengan xa Vanuvei Eo na Hi di biteni bit, “Halesil iti mi ngan xil vus xa latapol sen holesok xil vus ti xa latetis xati e rae xil na Mosis.” (Dut 27:26) ¹¹ Rakila xa moletin tovuol mikila mei vama pe met Hi vaxo rae xil ak vengan ralonge xa, “Ngan xil xa di langusil Hi del neketen, xil lamal pe meten.” (Hab 2:4) ¹² E ngan xil xa lasak pisi tangan mei lamal vaxo suse te rae xil, xil latahusul ti mun suse te neketen. E suse xa ladi en nggeih. Ngan ak nggoni ngan xa sepinien na Hi di biteni xa bit, “Moletin xa di misa xi tangan ipol ni rae xil na Hi, ma xi ipol sen xil vus.” (Lev 18:5) ^j

¹³ E neta sav xa halesil di bemei mi ngan xil vus xa latapol sen rae xil na Hi ti, Iesu Kristo misak ni xir rameluv ra longpangasien te halesil ak. Vengan xa xi iaxa tehur sen longpangasien te halesil nar texoni ngan xa Vanuvei Eo di biteni bit, “Halesil di e moletin xa mat e di murur de vatiei tei.” (Dut 21:23) ^{k14} Misak ni, nggo naha xa Iesu Kristo tepol ni, tuxolxatien xa Hi tehiti xati mi Ebrahim mikila vamei mun mi ngan xil xa latave Siu ti. Reitin, Iesu tehur longpangasien nar tangan rakila ravur Ninin Eo vaxo suse te neketen. Ngan ak be Ninin Eo xa xi tehiti xati tangan isa ni mi moletin nan xil.

Hi tehiti xati xa isa tuxolxatien nan mi ngan xil xa langgur neketen

¹⁵ Tuxoli e hinoxoli xil e neketen, nihit kil nenemien ak mi xamim ixo sexien tei e meulien nar. Melele xa moletin lu lumae e lingxatien tei, xalu lupol ni **hitxatien te xeih** tetel xalu. Di, ludis xati e luling hisealu di en. E melele xa luteli bus, moletin sav mun misakras vaso rin ni sepinien tova mun vatela, mu vasak

ni mei vahe neta sav tang. ¹⁶ E, nggoni ngan ak, melele xa Hi tepol ni hitxatien te xeih nan tetel Ebrahim, tepol ni mun tetel “ngan xa istal ixo en.” (Sen 17:7) ^l Vanuvei Eo taviteni ti vahit tepol ni tetel “ngan xil xa listal lixo en.” Vengan melele xa bit “ngan xa istal ixo en,” di misep usil moletin tei takes. E moletin ak be Iesu Kristo.

¹⁷ Di nasep usil hitxatien te xeih ak tangan vapisen ni mi xamim xa rae xil xa Mosis tesa ni mi Siu xil tenasak ni ti hitxatien te xeih xa Hi tepol ni tetel Ebrahim mei tehe neta sav tang. E-e, tenamak ti. Vengan Hi tepol ni hitxatien te xeih nan tetel Ebrahim tetiamu ni melele xa tesa rae nan mi xil. Reitin, huram handred hat e hanutap tei e he xalu mun (430) tetavi, e Hi tesa rae xil ak mi Mosis sung. E rae xil ak misakras vasak ni hitxatien tetiamu mei vahe neta sav tang. ^{m18} Tuxolxatien xa Hi tehiti xati tangan isa ni mi Ebrahim tehe sanien tei tang. Xi tenahur ti vengan xa tepol sen rae xil na Hi. Vengan, vahit moletin tei mikila vahur tuxolxatien ak vaxo suse sav te rae xil, ma vapol ni hitxatien na Hi mei vahe neta sav tang. E rakila xa tuxolxatien xa Ebrahim tehuri texo hitxatien na Hi tehe sanien tei tang. ⁿ

¹⁹ ?Xosxa moletin xil mei lamal pe met Hi nggo neketen tang, veneh ma Hi tesa rae xil mi moletin nan xil? Hi tesa rae xil ak mi mol-Isrel xil vengan xa di latepol ni tesaen vehakut. E tesa rae xil ak tangan lipus kil tesaen nae xil ituxoh melele xa “ngan xa istal” ixo Ebrahim imei, ngan xa Hi tehiti xati mini. E rae xil, Hi tesa ni mi **masxaxa** xil xa latehit mesen ni mi Mosis tangan xi iaxa ikila ihit mesen ni mi mol-Isrel xil ixoni ngan

*3:10 Rae xil na Siu xil labe holu pupu, e moletin tovuol vakila vapol sen xil vus.

ⁱ3:11 Rom 3:20; Kal 2:16; Rom 1:17; Hib 10:38 ^j3:12 Rom 10:5

^k3:13 Rom 8:3; Kal 4:5; 2Kor 5:21 ^l3:16 Sen 12:7; 13:15; 24:7

^m3:17 Eks 12:40 ⁿ3:18 Rom 4:14; 11:16

xa xi be vulonge Hi. ^{o20} Melele xa Hi tesa rae nan xil mi mol-Isrel xil, tesa ni mi xil texo Mosis tang. E melele xa tepol ni hitxatien te xeih nan tetel Ebrahim, Hi vari tang tepol ni. Ma, ngan ak pisen ni mi xir xa hitxatien te xeih nan tehe eilep mak mu teli rae xil xa tesa ni texo Mosis.

²¹ Vahit moletin tei vahiteni vahit, “Xosxa mak, ma Hi di biles nenemien nan. Vengan xa, tetiamu, tesa hitxatien nan, e tetutou sung, tesa rae nan xil.” E-e, tamak ti. Vengan vahit vahe reitin xa rae xil ladi xa lakila lasa meulien mi xir, ma lakila mun lasak ni xir ramal pe met Hi. E rae xil lasakras lasa meulien mu lapol ni xir mei ramal. ^{p22} E Vanuvei Eo na Hi di biteni xa moletin xil vus te ut etan ladi e nim te xeih te *tesaen*, e lasakras lalong xat rae nan xil. Hi tepol ni temak tangan iteh meulien e ngan xil vus xa di laling neketen nae e Iesu Kristo vaxoni ngan xa tehit xati. ^q

²³ Melele xa Kristo tenamei ti mu, xamem, Siu xil, mateti e nim te xeih te tesaen ak, e rae namem xil vari iaxa di lateketeh xol xamem. Di, e melele xa momal, Hi tepisen kila xa moletin tei mikila ha ven vamase ra nim te xeih ak vaxo suse te neketen. ^{r24} Misak ni, Hi tesa rae ak tangan valaxat kuh xamem e vapisen suse xa momal mi xamem ba duxoh melele xa Kristo mei mistal e misak ni ngan xil xa laneket en mei lamal pe meten. ^{s25} E vengan xa Kristo teme ngamu, xamem, Siu xil, xa maling neketen namem en ngamu munati ti mun pe rae ak.

²⁶ E xamim vus xa muling neketen namim e Iesu Kristo mube horamue na Hi reitin. ^{t27} Vengan melele xa labaptaes

ni xamim e his Iesu Kristo, tepisen ni xa mutehisti tetel Kristo e mutehur meulien hu texoni ngan xa mutesing ni eising hu tei. ^{u28} Misak ni, tave ti mun neta xosxa moletin be *Siu* tei mu tave Siu ti, meluv mu be slev tei xa de pe he moletin sav, mu be tiramue mu atou. Reitin, tave ti neta vengon xa xamim vus mubisti del Iesu Kristo ngamu e mei mube vanut moletin tei takes. ^{v29} Misak ni, melele xa mubisti del Iesu Kristo, mei mube horamue xil na Ebrahim, e muhur tuxolxatien xil xa Hi tehit xati tetiamu mini. ^w

Ngan xil xa laling neketen nae e Iesu Kristo lihur tuxolxatien xa Hi tehit xati mi Ebrahim e mi xir xa rabe horamue nan xil

4 Tengan nihit kila mi xamim, nihiteni imak. E nim tei, horamue tei mikila xa, e melengien tei xa ti imei, holesok xil xa di e he tamen mei ihe nan. E neta sav xa mak, melele xa be horamue tamu, xi tahir ti xeihen e tim sa tamen nggoni ngan xa xi be slev tei tang. ² Holesok xil xa di he tamen, moletin sav xil ti lilaxati ha ituxoh melele xa tamen teling xati tangan mei ihe he horamue nan. ³ Ngan ak nggoni xir tang. Melele xa ratahur ti mu neketen, texoni ngan taxa ratehe xil tamu, e ratehusil xat sexien e rae xil te ut etan. E rae xil ak di lateketeh xol sexien nar xil texoni ngan xa ratehe slev xil tang teni. ^{x4} E, e melengien xati xa Hi teling xati ngamu tangan istal en, xi tesil Natneli teme e ut etan texo atou tei. Xi tepot tehe Siu tei xa tete pe *rae* na Siu xil. ^{y5} Hi tesila tangan isak ni xir xa radi pe rae xil mei rimeluv ra ni. E misak ni xir rameluv tangan rikila rihur tuxolxa-

^{o3:19} Rom 5:20; Pol 7:38,53; Hib 2:2 ^{p3:21} Rom 8:2-4

^{q3:22} Rom 3:11-19; 11:32 ^{r3:23} Kal 4:3 ^{s3:24} Rom 10:4

^{t3:26} Sion 1:12 ^{u3:27} Rom 6:3; 13:14 ^{v3:28} Rom 10:12

^{w3:29} Rom 4:13 ^{x4:3} Kal 3:23; Kol 2:20 ^{y4:4} Efes 1:10; Sion 1:14; Rom 1:3

tien xil vus xa Hi tehit xati tangan isa ni mi horamue nan xil. ^z

⁶E vengan xa xamim mube horamue xil na Hi ngamu, xi tesa Ninin na Natneli temei teti e tinemim. E **Ninin Eo** xa di pisen ni xa mube nan reitin di mikes Hi e rin namim bit, "Tata, tata navan li."

^{a7}Misak ni, xamim munave slev ti mu. E mube nat Hi reitin. E ti muhur tuxolxatien xil vus xa xi teling xati tangan horamue nan xil ti lihuri. ^b

Pol misel xat Kristin xil tangan linahiles ti ra suse te neketen xa ladi en

⁸Melele xa xamim, mol-Kalesia xil, mutnakil ti mu Hi, mutehe slev na hi xil xa latapin ti tangan moletin xil ti lakes xil ni hi e ti lamot mi xil. ^{c9}E, taxeak, mei mukil Hi reitin. E xos ihos mak mu tangan nihiteni xa Hi mei mikil xamim. ?Misak ni, veneh ma iemim bei tangan muviles e muvusul rilomun ni rae xil te ut etan e sexien votei xil xa lasakras lateh meulien e xamim? ?Veneh ma iemim bei tangan mei muve slev xil teni vatei mun?

¹⁰Nalongeong ni xa di mungguxou kuhi ve melengien eo e wik xil, e aveti xil, e e hram xil mun nggoni ngan xa Siu xil tang di lapol ni vengan xa di munemi xa isak ni xamim mei mumal mu pe met Hi. ¹¹Uluk mikan xa holesok xil vus xa natepispisi ni mi xamim e natapol ni mi xamim mei nahe neta sav tang. ¹²Ma nadakes xamim, tuxoli xil e neketen, tangan mei muxoni nou xa nameluv ra xeihen te rae xil. E munem xati xa melele xa natemei ve xamim tetiamu, melele xa mutnahusil rae xil na Siu xil ti mu, inou mei natexoni xamim tang. ^d

Melele xa natemei kokot mi xamim, mutepol ni tehos minou. ¹³Munem xati

xa natemei e provins te hal Kalesia venggan xa mesien tei di tehas purun tenbeok. E, ve rin ak, natehithiten longeongen hos mi xamim. ¹⁴E neta sav xa mesien navan tepol ni texeih mi xamim xa mutelaxat kuh inou, mutnapurun nou ti e mutnasin inou ti. Mutehur pilei nou texoni ngan xa natehe **masxaxa** tei na Hi, mu texoni natehe Iesu Kristo vari. ¹⁵E melele nen ak iemim tehei pupu tangan mututou ni nou. Nanem xati xa mutevue xat xamim tangan muvur rat metemim tangan musa ni minou xosxa sexien ak mikila vatutou ni nou. ?E eheien xa mutepisen ni minou ba xave?

¹⁶?Midep, mei nabe elu mi xamim venggan xa di nabit reitinen na Hi mi xamim? ^e

¹⁷Siu xil ak xa di langgusil rae xil, lamei e lapol ni nggoni ngan xa di lapet rat xamim. E latapol ni ti tangan vatutou ni xamim. E-e. Iexil bei tangan lapol ni xamim mei muhe elu mi nou xa di nanggusil xat reitinen tangan xamim iaxa mukila mupet rat xil mak mu e nenenmien namim. ¹⁸Sexien xa moletin tei di pet rat mosav be sexien hos tei xosxa di nggusil nenemien xa bos. Ngan ak reitin vehakut e tave melele kestang xa nadi visal xamim. ¹⁹Eheien navan de xamim nggoni ngan xa mube natuxoli xil. E xosali, di nalong pangas inou ve xamim vatei mun nggoni ngan xa nabe ninemim. Vengan nggoni ngan xa maruk di pangas ve xamim ha ituxoh melele xa huit sexien na Kristo mei istal e meulien namim. ²⁰Ieok bei pupu ni xa ha nite visal xamim tangan nakila namiles selxatien te xeih navan mei vahe sepinien hos. E di nasepin mak mi xamim venggan xa di nanexo pupu ve sexien namim xil.

^z4:5 Kal 3:13; Rom 8:15 ^a4:6 Rom 8:15-16 ^b4:7 Rom 8:17; Kal 3:29 ^c4:8 2Kron 13:9; Aes 37:19; Ser 2:11; 1Kor 8:4-6 ^d4:12 1Kor 2:3 ^e4:16 Amos 5:10

Ngan xil xa di langgusil xat rae xil langgoni slev xil teni, e ngan xil xa di langgusil xat neketen lameluv tevi

²¹Xamim xa iemim bei tangan muhusil xat rae xil na Siu xil, bos xa ti mulong naha xa labiteni e vanuvei te rae xil xa Mosis tetisi. ²²Vengan xa xi tetisi xa **Ebrahim**, natneli lu. Tehur tei texo atou tei xa tehe slev. E tehur natneli tei mun texo atou tei xa temeluv. ^{f23}Natneli xa tehuri texo slev, tepot tehusil nenemien na moletin xil tang. E natneli xa tehuri texo atou xa temeluv, tepot tehusil hitxatien na Hi. ^{g24}Atou xalu ak lube vole usil **hitxatien te xeih** lu xa Hi tepol ni xa lusav ni xalu. Hitxatien te xeih xa Hi tepol ni e **Vathu Senae** tetel rae nan xil, ngan ak texoni **Hakar**. Vengan ngan xil xa di latehusil rae xil ak mei latehe slev xil teni texoni ngan xa nat Hakar mun mei tehe slev. ^{h25}E xosali, Hakar be nine ngan xil xa ladi e hal **Serusalem**. Ngan ak reitin vengang xa xil di tamu langgusil xat rae xil xa Hi tesa ni mi mol-Isrel xil melele xa tepol ni hitxatien te xeih tetel xil e Vathu Senae e kantri te hal Arebia. ²⁶E **Serusalem** hu tei de ut nesao xa meluv ra holesok xil te ut etan ak. E ngan xil xa di langgusil hitxatien te xeih hu na Hi ha liti en. Vengan xir xa rameluv ra xeihen te rae xil ak e raling neketen nar e Kristo, xir ranggoni nat Serah xa temeluv. ⁱ²⁷Ngan ak nggoni naha xa provet Aesea tetisi tehit,

“Uhesi xouk, xouk xa horamue nam tovuol.

Ukikei itel sien, xouk xa otalong ti mu marum vapangas ve tuvava tova.

Vengan xa horamue xil na atou xa be lumalum lihe holu mu

lili horamue xil na atou xa moletin tehuri.”

(Aes 51:1)

²⁸Tuxoli e hinoxoli xil, nggo suse te neketen, xamim mei mube horamue xil te hitxatien nggoni **Aesak** xa Hi tehit xati mi Ebrahim. ^{j29}E Siu xil xa labe slev te rae xil langgoni Ismael xa tepot texo nenemien na moletin tang. Vengan Ismael tesak purun Aesak xa latepesi texo nenemien na Ninin na Hi, texoni ngan xa Siu xil di lasak purun xamim xosali. ^{k30}?E Vanuvei Eo bit naha usili? Di biteni bit, *“!Sil rat slev ak xal horamue nan laliha! Vengan xa nat slev ak nahur ti neta tova naxo he Ebrahim xa ihe he nat atou xa meluv.”* *(Sen 21:10)* ^{l31}Tuxoli e hinoxoli xil e neketen, xir rataxoni ti nat slev ti. E ranggoni nat atou xa temeluv.^m

5 Kristo tesak ni xir rameluv tangan rimeluv tevi. Misak ni, ti musoh ix-eih e munamaen moletin xil ti mun linasak ni xamim munave slev xil te rae xil. ⁿ

Kristo misak ni xir rameluv tevi tangan rinave slev xil ti te rae xil

²!Muteong kuhi! Inou, eloheoh **Pol**, nabiteni xa xosxa mumae e nenemien na Siu xil ak, e muhe vexahu tangan mei mumal pe met Hi vaxo en, ma holesok xil xa Kristo tepol ni e rin namim misakras mun vatutou ni xamim. ³Reitin, nabit rilomun ni xa moletin xil vus xa di lamaen xil tangan lihe vexahu ihusil **rae** na Siu xil, xil lihusil sen rae xil vus nae. E moletin misakras vapol ni. ⁴E xamim vus xa mubit ti musak pisi tangan mei mumal pe met Hi vaxo rae na Siu xil, di mutavisti ti mun vatel Kristo, e di musin eheien hos na Hi.

⁵E rin nar, di raneket xa risoh pe met Hi, e xi ihiteni xa ramal pe meten vengang

^f4:22 Sen 16:15; 21:2 ^g4:23 Rom 9:7-9 ^h4:24 Rom 8:15; Kal 5:1 ⁱ4:26 Hib

12:22; Rev 3:12; 21:2,10 ^j4:28 Rom 9:7; Kal 3:29 ^k4:29 Sen 21:9

^l4:30 Sion 8:35 ^m4:31 Kal 3:29 ⁿ5:1 Sion 8:32,36; Kal 2:4; 5:13; Pol 15:10

xa rateling neketen nar e Kristo. Reitin, di radatil melengien hos ak del xat xeihen xa **Ninin Eo** di misa ni mi xir. ⁶ Vengan xa xir xa rabisti del Iesu Kristo, tave ti neta xosxa moletin tei tehe **vexahu**, mu tenave vexahu ti. Ngan xa eilep mak mu iaxa moletin tei di miling neketen nan e Kristo. E xosxa neketen nan be reitin, ma eheien nan mi Hi e mi moletin sav ti ipisen ni. ^o

⁷ Tetiamu, xamim di muteloh tehos e lohen te neketen namim. ?Visi vari iaxa tesa nenemien tesa mi xamim tangan munaloh ti mun nahusil suse te reitinen? ⁸ Nenemien tesa ak tenamei ti mi xamim tenaxo Hi xa tekes xamim tangan mei muve horamue nan xil. ⁹ Pispisien te luvošen xa mutehuri nggoni is te beret. Vengan is xa hokorong tang mikila vahiles vahe pulaoa xa mahulong mei vakaio pupu. E pispisien te luvošen tei takes tang mikila vapurun vanut moletin xil xa mahulong tangan lavusili. ¹⁰ E nake reitin xa Suv Iesu isak ni xamim mei mumae e nenemien navan. E mi ngan xil xa di labilhiles nenemien namim, Hi isa pangasien ihe holu mi xil.

¹¹ Tuxoli e hinoxoli xil, xosxa mulonge xa di nispisipi mi moletin xil tangan ha lihe vexahu tangan mei limal pe met Hi, ngan ak tave reitin ti. ?Vengan, xosxa be reitin, veneh ma Siu xil iexil nggat nou e ladit ni ngan xa di tamu lasak purun nou? E lapol ni mak vengan xa pispisien navan tamal ti e nenemien nae melele xa nabiteni xa neketen e Iesu Kristo xa temat e eivave texoles rae xil na Siu xil. ¹² !Ngan xil ak xa di lapurun nenemien namim del sepinien xil usil vexahu, nanemi nabit vahos mak mu xosxa

xil lapol sen ni, e lata xoteh vari ni ut eo nae vaha!

¹³ Tuxoli e hinoxoli xil, Hi tehosei xamim tangan mumeluv ra hisit rae xil ak. E neta sav xa mumeluv mak, munanemi ti munahit mumeluv tangan mukila mupol ni tesaen xil vus xa iemim bei. E mumeluv tangan ti mututou ni Kristin sav xil vengan xa iemim ti ihei xamim. ¹⁴ Vengan rae xil vus ladi ngamu e rae tei takes xa bit, *“Eheien namim iti e moletin sav xil ixoni ngan taxa eheien namim di e xamim mun tang.”* (Lev 19:18) ¹⁵ E xosxa xamim, Kristin xil, munggulehi di mungas xamim mun tang nggoni kuli reran xil, ma muxuxou kuhi maxani xamim mun tang munangas purun xamim.

Kristin xil lipol kes ni sexien xil xa Ninin Eo ien bei tangan ti lipol ni

¹⁶ Ma di nasel xat xamim tangan muhusil Ninin Eo e kakaoen te neketen namim. Vengan xosxa di munggul naha xa Ninin Eo ien bei xamim tangan mupol ni, ma munahusil ti eheien te tenbemim. ¹⁷ Vengan naha xa tenbemim ien bei tangan mupol ni misav ni ngan xa Ninin Eo ien bei tangan mupol ni. E naha xa Ninin Eo ien bei tangan mupol ni misav ni ngan xa tenbemim ien bei tangan mupol ni. Xalu di lubae mi xalu e nenemien namim, e rusak ni musakras muhusil kes ni naha xa xamim tang iemim bei tangan mupol ni. ¹⁸ E xosxa di munggul xat naha xa Ninin Eo ien bei tangan mupol ni, ma munati ti mun pe rae na Siu xil. ^w

¹⁹ Sexien xil xa di pisen ni xa moletin xil di langgul eheien te tenbexil mak: di lapat del mosav xil xa latateli ti vatela,

^o5:6 1Kor 7:19; Kal 6:15 ^p5:8 Kal 1:6 ^q5:9 1Kor 5:6 ^r5:11 1Kor 1:23

^s5:13 1Pit 2:16

^t5:14 Mat 5:43; 19:19; 22:39; Mak 12:31; Luk 10:27; Rom 13:9; Tem 2:8

^u5:16 Rom 8:4; Kal 5:25 ^v5:17 Rom 7:15-23; 1Pit 2:11 ^w5:18 Rom 6:14; 7:4

di lapol ni sexien tesa xil xa tamese ti pe met Hi, e di lasa xil tangan lihusil sexien xil xa tenbexil tang ien bei. ^{x20} Di lamot mi hi sav xil e di lapol ni eimas. Sexien nae xil polu ni ekaten, ngongoren, e labe elu mi mosav xil. Di lasak pisi tangan lapet rat xil tase tang, di lasopin nggeih xat mosav xil, e di ladi pas moletin xil. ²¹ Nenemien nae di e holesok na mosav xil, di lamun, di lapol ni sexien xil te suse, e di lapol ni hisit sexien tesa sav xil xa mak. Xosali, inou di nasel xat xamim nggoni ngan xa natesel xat xamim ni tetiamu, melele xa nateti tamu tetel xamim. Vengan xa natesel xat xamim xa moletin xil xa di lapol ni hisit sexien xil ak lasakras lapus tuxolxatien xil xa Hi bit isa ni mi horamue nan xil e rute xa be suv toto en.

Sexien xil xa pisen ni xa Ninin Eo di e meulien nar reitin

²² Reitin, sexien namim xil isav. Vengan xosxa be reitin xa Ninin Eo di e meulien na moletin xil, sexien nae ipisen ni. Xil lipolu ni eheien, sien, e tomat. Nenemien nae ihe teviei, ti lipol ihos mi mosav xil e ti litutou ni xil, e mosav xil likila liling nenesien nae e xil. ^{y23} Sexien nae imerou e likila lixouxou kuhi ve sexien nae xil. Rae tovuol xa ti vasemae ni moletin xil tangan linapol ni ti sexien hos xil ak. ^z

²⁴ Misak ni, ngan xil xa labe moletin xil na Iesu latahusil ti mun eheien te tenbexil vatel sexien e nenemien tesa xil teni. Reitin, nggoni ngan xa lateti xat meulien matu nar teti e eivave. ^{a25} Xosxa Ninin Eo di e meulien nar reitin, ma ti rimaen ni itiamu ni xir e ipispisi mi xir ni sexien eah xa ti ripol ni. ^{b26 c}Ve rin

ak, ihos tangan rinasep koai ti, rinasak ti tangan mei rave eilep mu rali mosav xil, e eheien nar nati ti e holesok xil na mosav xil.

Kristin xil ti litutou ni mosav xil

6 Tuxoli e hinoxoli xil, xosxa mukameti xa tei e tuemim xil di mot e tesaen, ma xamim, xa munggusil Ninin Eo nggeih, ha mumal ni ixo suse xa imerou tang. E melele xa di mupol ni, muxouxou kuhi tangan xamim mun mumot ti e tesaen. ^{d2} Melele xa Kristin sav xil di lapusi nggeih e meulien nae, bos xa ha mututou ni xil. Nggo sexien ak, ti mupol sen naha xa Kristo tesemae ni Kristin xil tangan lipol ni. ^{e3} E xosxa moletin tei minemi bit xi be eilep pupu mili mosav xil, ma xi di miluvos xi tasen e misakras vapol ni ti neta vahos. ⁴ Imal xa moletin xil kekes ilepis sexien nan tasen tangan vakil ti xos bos mu misa. Imak, ma mikila valonge vahos ve sexien nan kestang, e nalepis sexien nan ti natel sexien na mosav. ^{f5} Vengan momal xa xamim kekes ti ipol sen naha xa di hen tangan vapol ni. ^{g6} E momal mun xa ngan xil xa di langgur tutouen nggo pispisien na titsa tei isa rilomun ni tutouen iha mini. ^h

⁷ Munaluvos xamim ti mun tang, Hi namaen xamim ti munem male ni xeihen nan xa eilep pupu. Vengan be reitin xa xi ilepis rin na moletin xil vus e isak ni xil lia vari ni huite te naha xa latelihi e meulien nae. ⁸ Vengan xa moletin xa di milih tesaen nggusil naha xa tenben ien bei, ma xi ia huite teni xa ihe maten. E moletin xa di milih hosien nggusil naha xa **Ninin Eo** ien bei, ma Ninin Eo ak isak ni xi ia huite teni xa ihe meulien

^{x5:19} 1Kor 6:9-10; Efes 5:5; Rev 22:15 ^{y5:22} Efes 5:9 ^{z5:23} 1Tim 1:9

^{a5:24} Rom 6:6; Kol 3:5 ^{b5:25} Rom 8:4; Kal 5:16 ^{c5:26} Plp 2:3

^{d6:1} Mat 18:15; Tem 5:19 ^{e6:2} Rom 15:1 ^{f6:4} 1Kor 11:28; 2Kor 13:5

^{g6:5} Rom 14:12 ^{h6:6} 1Kor 9:11,14

sal. ¹⁹Mak, ma vemim navuol ti tangan ti mupol ni sexien hos xil. Vengan, xosxa rinastokovein polien hos nar xil ti, ma ti ripus huite teni mei istal e melengien xati teni. ^{j10}Misak ni, e melele xil vus xa di rapus mesal teni, ti ripol ni naha xa ihos tangan ritoutou ni moletin xil vus, e ripol ni mak mu mi ngan xil xa labe tua nar xil e neketen.

Sepinien kor

¹¹*Inou, Pol vari, di nadis sepinien kor ak del xat heok xa tisen xil teni mahulong mak.*

¹²Kristin xil xai xa labe Siu xil di lasak pisi tangan lapol ni vaxeih mi xamim tangan muve vexahu. E di lapol ni mak tang tangan vasak ni Siu sav xil lavesi xil ve polien nae. Di lanemi labit linahur ti mun sakpurunien naxo Siu sav xil ak vengan xa di langgusil xat Iesu xa temat e eivave. ^{k13}Siu xil xa labe vexahu ngamu, xil mun latahusil xat kuh **rae** na Siu xil ti. E labit ha muhe vexahu

vengan iexil bei tangan lisep koai usili mi Siu sav xil. ¹⁴E rin navan, inou nisep koai kestang usil maten na Iesu Kristo, Suv nar. Maten nan tesak ni nou mun natemat e rin te holesok xil te ut etan vengan xa rin navan tovuol en. E holesok xil te ut etan napol ni ti mun neta e nou. ¹⁵E pe met Hi, tave ti neta xosxa moletin tei be **vexahu**, mu tava ti. Vengan xa naha xa eilep mak mu be xosxa moletin tei nggur meulien hu mu tahuri ti. ^{m16}Ngan xil xa di langgusil nenemien ak, xil vari labe moletin na Hi reitin, e ipisen tomat e eheien hos mi xil. ⁿ

¹⁷E di nasel xat xamim tangan mu namaen mosav xil ti linasep purun rin navan. Vengan xa tenbeok polu ni von menuk te pangasien xa natehuri ve polien navan mi Iesu. ^o

¹⁸Tuxoli e hinoxoli xil, di nasep ling xamim del sisen ak: eheien hos na Hi iti e tinemim ve naha xa Iesu Kristo, Suv nar, tepol ni e rin namim. Reitin.

^{i6:8} Sion 3:6; 6:63; Rom 8:13 ^{j6:9} 2Tes 3:13 ^{k6:12} Kal 5:11

^{l6:14} 1Kor 1:31; 2:2 ^{m6:15} 1Kor 7:19; Kal 5:6; 2Kor 5:17

^{n6:16} Sam 125:5; 128:6 ^{o6:17} 2Kor 4:10

Sepinien xa diamu te

Efeses

?Visi iaxa tetis uvei ak?

Pol, eloheoh tei na Iesu Kristo, iaxa tetis uvei ak^p

?Visi iaxa tevuli uvei ak tetiamu?

Pol tetis sepinien ak teha mi Kristin xil xa lateti e taon te hal Efeses,^q Ma, Pol tenatis uvei ak ti tangan vama ni neta tei xa tenamal ti. E tetis uvei ak tangan vapispisi mi xil usil polien xati te Sias na Iesu Kristo. E tetisi mun tangan vassel xat xil xi lixulehi ti lisoh ixehi e neketen nae, e lixuxou kuhi xa sexien nae xil imal tevi.

?Pol tetis uvei ak veneh?

Pol ien tehei tangan vapispisi ni xa lingxatien na Hi bos mak mu - Pol tepispisi ni mi xil xa eheien hos na Hi mahulong pupu,^r Texo sepinien nan, mei rakila xa Pol tenemi xa holesok xil xa Hi teling xati bos pupu.

Pol ien tehei tangan vapispisi ni xa Iesu Kristo be vatite te holesok xil xa Hi teling xati tangan vapol ni - Pol tepispisi ni xa, texo Iesu Kristo, Hi teho-sei xir tangan mei rihe horamue nan xil,^s **Pol ien tehei tangan vapispisi ni xa Kristin xil labe Sias na Iesu Kristo e di lapol vituei nggoni tenben tei takes** - Neta sav xa Kristin xil langgo rute savsav xil, di lasopin ni sepinien tesav xil, e sex-

ien nae xil misav, Kristin xil labe vanut moletin tei takes^t

Pol ien tehei tangan vapispisi ni xa momal xa Kristin xil liling nenemien nae ihe tan tangan lipol ihusil nene-mien na Kristin sav xil - Pol tehiteni xa momal xa Kristin xil liling nenemien nae ihe tan. Atou xil itel tiramue nae xil,^u

Pol ien tehei tangan vapispisi ni xa itep iaxa neketen na Kristin xil mikila mei ixehi mu - Pol tepispisi ni xa Kristin xil livue xat xil ve vaean te neketen ixoni ngan xa labe moletin xil te vaean. E xil livae itel reitinen, momalen, tomat, nenesien, neketen, kilakilen xa Hi di miteh meulien e xil, e sepinien na Hi.

Vatit nenemien tei te uvei ak de Efeses 4:4-6

Io, xir xa raneket rabe tenben tei takes e Ninin Eo xa di iexir be tei takes. E, del nenemien xa be teviei, ranggur nenesien tei takes xa be reitin xa Hi tekes xir tangan riti vituei itela e ut nesao. Di ranggusil Suv tei takes xa be Kristo, di ranggusil xat pispisien tei takes, e labaptaes ni xir tangan ramos e neketen tei takes. Hi tei takes xa be Tame holesok xil vus. Xi be eilep mili holesok xil vus, di pol e meulien na moletin xil, e di meul e tine moletin xil.

?Naha iaxa di e uvei ak?

1. Pol pispisi ni xa Iesu Kristo iaxa be vatit lingxatien xil na Hi. (1:1-3:21)

2. Pol pispisi ni xa momal tangan Kristin xil mei lipol vituei e lipol vuol

^p1:0 Efes 1:1; Efes 4:1; 6:20; Pol 28:30-31

^q1:0 Efes 1:1; Pol 15:36-18:22; Pol 18:23-21:16; Pol 19:1-20; Pol 20:31; 1Tim 1:3; Pol 20:17-38 ^r1:0 Efes 1:7; 2:7; Efes 3:8; Efes 3:16; Efes 1:18

^s1:0 Efes 1:4-5; Efes 1:10-11; Efes 2:5-10; Efes 2:16; Efes 3:16-17 ^t1:0 Efes 4:3; Efes 4:4; Efes 4:5; Efes 4:11-13 ^u1:0 Efes 5:22-33; Efes 6:1-4; Efes 6:5-9

ni naha xa Hi ien bei tangan xil lipol ni. (4:1–6:24)

Sepkilaen na Pol usil uvei ak

1 Inou **Pol**, xa Hi tehosei nou mei nabe **eloheoh** tei na Iesu Kristo, ieok bei tangan nasa sepinién navan vahat mi xamim, moletín xil na Hi xa mudi e taon te hal Efeses. Xamim di mupisen ni xa neketen namim nggeih e mubisti del xat Iesu Kristo. ^v

²Di nasis xa eheien hos e tomat na Hi Tamer xal Suv Iesu Kristo iti mi xamim.

Holesok xil xa Iesu tepol ni di misak ni xir rabe moletín xil xati na Hi

³Ti risa memesien iha mi Hi xa be Tame Iesu Kristo, Suv nar. Ve vitueien nar del Iesu Kristo, Hi duxol xat xir del sanien xil vus xa nggo ut nesao. ^{w4}Teti-
amu tamu nousav, melele xa Hi tenapeas ni ut etan ti mu, eheien na Hi teta ngamu e xir e xi tehosei xir tangan ihistin xir itel xat Kristo. Xi tepol ni temak tangan xir rihe moletín eo xil e meulien nar mun imal tevi pe meten. ^{x5}Hi teling xati nousav ngamu xa ileh rerat xir mei rihe horamue nan xil ixo holesok xil xa Iesu Kristo tepol ni. Hi tepol ni temak tehusil xat nenemien nan vengan xa tehesi xi pupu tangan vapol ni. ^{y6}Reitin, Hi tehosei xir tangan ripet rat hisen ihe nesao ve eheien hos xa di pisen ni mi xir. Tave ti neta xa xir ratapol ni ti neta tangan ravur eheien hos nan, e tepisen ni mi xir ve holesok xil xa Natneli tepol ni, Natneli xa eheien nan di en. ^z

⁷Hi di pisen ni xa eheien hos nan mahulung pupu nggo rin xa texal rat xir

ra longpangasien ve tesaen nar texo re Natneli. Ve rin ak, xosali, xi di miketeh bos mi xir. ^{a8}Reitin, eheien hos nan xa di pisen ni mi xir eilep pupu. Hi be metisou e mikil holesok xil vus. ⁹Ve rin ak, besi xi tangan vapisen kil nenemien xuxus nan mi xir xa teling xati tangan ipol ni ixo Iesu Kristo. ^{b10}Vengan Hi teling xati ngamu xa melele xa melengien teni ipin, xi ileh viton holesok xil vus xa di ut nesao e ut etan, e iling Kristo vari iaxa ihe vat teni. ^c

¹¹Hi di misak ni holesok xil vus mei mistal nggusil lingxatien e nenemien nan. E nggusil nenemien nan, Hi tehosei xamem, Siu xil, mei mabisti del xat Kristo. E ve rin ak, di bosei xamim tangan mei muve moletín nan xil xati. ^{d12}Ma pol ni mak tangan xamem xa mateneket e Kristo tetiamu, mukila mumeul tangan mupet rat his Hi ihe nesao.

¹³E xamim mun, xa mutave Siu ti, mei mutelong longeongen hos te reitinen usil Kristo, e muteke reitin en. Mak, ma Hi teteh meulien e xamim e tesa **Ninin Eo** mi xamim xa xi tehit xati tangan isa ni. E Ninin Eo ak di pisen reitinen teni xa xamim mube nan. ^{e14}Reitin, melele xa Hi misa Ninin Eo ak mi xamim, di pisen ni xa ti imaen holesok xa di hen mi xir. E di pisen ni mun xa Hi nggal rat xir ngamu, e vatova, ileh xir ha riti vituei itela ixoni moletín nan xati xil. Mak, ma rimeul e riti itela tangan ripet rat hisen ihe nesao. ^f

^v1:1 1Kor 1:1; Kol 1:1 ^w1:3 Efes 2:6

^x1:4 Sion 15:16; 17:24; 2Tes 2:13; Efes 5:27; Kol 1:22 ^y1:5 Sion 1:12

^z1:6 Mat 3:17; Kol 1:13 ^a1:7 Kol 1:14,20; Efes 2:7

^b1:9 Rom 16:25; Efes 3:3,9 ^c1:10 Kal 4:4; Kol 1:16,20 ^d1:11 Rom 8:28-29

^e1:13 Kol 1:5; Efes 4:30 ^f1:14 2Kor 1:22; 5:5

**Pol misis ve mol-Efeses xil
tengan lipus kil holesok xil xa
Hi di pol ni e rin nae**

¹⁵Inou natelong usil neketen namim e Suv Iesu e sexien te eheien xa di mupisen ni mi moletin na Hi xil. E ve holesok xil ak xa bos xa Hi di pol ni e rin namim, di nasis ve xamim. ⁸¹⁶Reitin, e melele xil vus xa di nanem xat xamim e sisen xil nava, vehakut, dit nasa memesien ba mi Hi ve xamim. ¹⁷Di nasis tangan Hi, Tame Iesu Kristo, Suv nar xa eilep pupu, ti isak ni xamim mupolu ni metisouen ixo Ninin Eo nan. E di nasis tangan Ninin Eo nan isak ni xamim mei mukil kuh xi ihe holu mu. ^h¹⁸Ma melele xa Hi isah nenemien namim xil, xamim mei mukil kuh hosien nan e holesok hos xil xa xi tehit xati tangan isa ni mi moletin nan xil e melele xa ti imei, e mukila munesi en vatel nene-mien namim xa be teviei. ⁱ¹⁹E nasis mun tangan mukil kuh xeihen nan xa eilep pupu xa di pol dela e meulien nar xa di raneket e Kristo. ^j

²⁰E texo xeihen ak xa mahulong pupu, xi tepol ni Kristo temea rilomun ra maten, e telingi tetotan e rin metu e ut nesao. ^k²¹Mak, ma Kristo be eilep mak mu mili eilep savsav xil: ngan xil xa labe vat xil e ut nesao, e ngan xil mun xa labe vat xil e ut etan; suv toto xil xa lalaxat ut xa mahulong, e suv xil xa di lalaxat rute xil xa hokorong. Hisen be nesao pupu mili his eilep xil xa di latehur xeihen tetiamu, mu ngan xil mun xa langguri xosali. Hisen di mili his ngan xil mun xa ti lihur xeihen e melengien xil xa ti

imei. ^l²²Hi teling holesok xil vus te ut etan lateti pe he Kristo, e tesak ni mei be eilep te holesok xil e mei be vat na moletin nan xil xa labe Sias nan. ^m²³ⁿSias ak be tenben. E Kristo di mise xat Sias nan del meulien e xeihen nan nggusil vatit sexien xa di mise xat holesok xil vus del meulien e xeihen nan.

**Hi misa meulien hu mi xir
xa rabisti del Iesu Kristo**

2 Tetiamu, Hi tepus xamim texoni ngan xa muel tui vengan xa mute-long ras raen e *tesaen* xil teti xat meulien namim. ^o²E melele nen ak, mutehusil xat sexien tesa xil te ut etan e mutepol ni holesok xil xa Temat ien tehei. Xi be suv toto na *ninin tesa* xil xa di langga xolol e tilang hat, e xi di pol e meulien na ngan xil xa di latalong xat Hi ti. ^p³Xir vus ratexoni xil tang xa ekaten na Hi di xat xir, vengan xa ratehusil xat naha xa iexir tehei tangan vapol ni tenbexir valong vahas ni. Reitin, tetiamu, ekaten na Hi teti mi xir vengan, melele xa latepes rohon ni xir tang, nenemien xil te tesaen teti ngamu e xir texoni moletin sav xil vus e ut etan, e momal tangan rihur pangasien ven. ^q

⁴E vengan xa esaeen na Hi mahulong pupu e eheien nan mi xir be eilep mak mu, xi teteh meulien e xir. ⁵Misak ni, melele xa di tamu ratelel pe meten ve longrasien nar, xi tesak ni xir ratehisti tetel Kristo. E pe met Hi, vengan xa ratehisti tetel Kristo, nggoni ngan xa tesak ni xir ratemeul tetela. Reitin, ve eheien hos nan kestang iaxa Hi teteh meulien e

⁸**1:15** Kol 1:4; 1:3; 1Tes 1:2 ^h**1:17** Kol 1:9-10; Aes 11:2

ⁱ**1:18** Efes 4:4; Kol 1:12 ^j**1:19** 2Kor 13:4; Kol 2:12

^k**1:20** Sam 110:1; Mat 22:44; Mak 16:19; Pol 2:34; Hib 1:3; 8:1; 10:12; 12:2

^l**1:21** Kol 1:16; 2:10

^m**1:22** Sam 8:6; Rom 12:5; 1Kor 12:27; Efes 4:15; Kol 1:18

ⁿ**1:23** Efes 4:10; Kol 1:19 ^o**2:1** Efes 2:5; Kol 2:13

^p**2:2** Kol 3:7; Taet 3:3; Sion 12:31; Efes 6:12; 5:6 ^q**2:3** Kol 3:6

xamim. ¹⁶E vengon xa di rameul vituei dela, nggoni ngan taxa tesak ni xir rate-meia rilomun ra maten tetela, xi teling xir di radotan del Iesu Kristo e ut nesao tengan ti rilaxat holesok xil vus itela. ¹⁷Hi tepol ni temak tengan, e melengien xil xa ti imei, ikila ipisen ni xa eheien hos nan mahulong pupu e di pol bos mi xir xa rabisti del xat Iesu Kristo. ^t

⁸Io, texo eheien hos na Hi kestang, xi tete meulien e xamim vengon xa di muling nenesien namim e Kristo. Mutahur meulien sal ti vaxo neta tova xa xamim tang di mupol ni. E-e, meulien sal ak be sanien tei xa Hi vari iaxa di misa ni. ^{u9}Reitin, meulien ak tave huit polien na moletin ti tengan ti vasep koai ven. ¹⁰Hi pol kuhi ni xir mei rabe neta hu rilomun mak vengon xa rabisti del Iesu Kristo. Hi pol ni mak tengan ti ripol ni polien hos nan xil xa teling xati tuei tengan ti ripol ni. ^v

Nnggo Iesu Kristo, moletin xil vus lapin tang pe met Hi

¹¹Bos xa xamim, mol-Efeses xil, munem xati xa, melele xa latepes xamim, mutnave Siu ti. E Siu xil latekes xamim ni 'ngan xil xa latave **vexahu** ti.' E di lasep usil vexahu xa moletin tang di pol ni del hen e rut tenbe moletin xil. ^{w12}Munem pisi xa mutehe visi tetiamu, e melele xa mutnavisti ti mu tenatel Kristo. Vengon xa, e melele nen ak, xamim mutehe ngan halesav xil e mutnave moletin xil na Hi ti vengon xa mutnave hortan xati ti vatel mol-Isrel xil. Tesak ni, rin namim tehe tovuol e

hitxatien te xeih xa Hi tepol ni tetel moletin nan xil. Xamim mutemeul muteti e ut etan ak, e neta tehe tovuol tengan muling nenesien namim vati en vengon xa mutnakil ti Hi. ^{x13}Reitin, tetiamu, xamim muteti sotin ra Hi e moletin nan xil. E taxeak, vengon xa mubisti del Iesu Kristo, Hi tesak ni xamim mumei sangas visali. Pol ni mak vengon xa muling nenesien namim di e Kristo xa temaen ren teleh ve rin nar. ^y

¹⁴Re Iesu iaxa tekas moten metexir tengan vasak ni xir riti vituei e tomat e ti rinakete ti mun nasa mi xir. Io, tetiamu, texoni vioh tei xa eilep teta pas xamem, Siu xil, ra xamim xa mutave Siu ti. E maten na Iesu tehu lelen vioh ak tengan rakila mei rave vanut moletin tei takes. ^{z15}Melele xa Iesu temat, tesak ni **rae** xil na Siu xil mei labe neta sav tang, del holesok sav xil xa moletin xil di lapol pisi ni tengan mei lamal pe met Hi. E Iesu tehistin xi tetel tatit moletin lu tengan vapol ni tomat vatel xat xalu, e vasak ni xalu mei lalohe vanut moletin tei takes xa ihe neta hu. ^{a16}Texo maten nan e eivave, Iesu teserev ketehen tesa nalu. Io, texo naha xa tepol ni e eivave, Iesu tehistin xalu mei lube vanut moletin tei takes e misak pilei rin nalu pe met Hi. ^{b17}Ma Kristo temei e tehithiten longongen hos te tomat mi moletin xil vus: teha mi xamim xa mutave Siu ti xa muteti sotin ra Hi, e teha mi xamem mun, Siu xil xa mateti sangas visali. ^{c18}E nnggo Kristo, xir vus, Siu xil e ngan xil xa latave Siu ti, rakila ramei pe valnao Hi Tamer vengon xa **Ninin** tei takes de xir vus. ^d

^t2:5 Efes 2:1; Kol 2:13; Luk 15:24,32; Rom 6:13; Pol 15:11; Efes 2:8

^s2:6 Kol 2:12 ^t2:7 Efes 1:7 ^u2:8 Pol 15:11; Kal 2:16; Efes 2:5; Sion 4:10; Hib 6:4; Rom 2:28; 2Tim 1:9; Taet 3:5; 1Kor 1:29 ^v2:10 Taet 2:14

^w2:11 Efes 5:8 ^x2:12 Rom 9:4; Kol 1:21; 1Tes 4:13

^y2:13 Aes 57:19; Kol 1:20 ^z2:14 Aes 9:6; 1Kor 12:13; Kal 3:28; Kol 2:14

^a2:15 2Kor 5:17 ^b2:16 Kol 1:20,22 ^c2:17 Aes 57:19; 52:7; Sak 9:10

^d2:18 Rom 5:2; Efes 3:12

¹⁹Mak, ma xamim xa mutave Siu ti, mutave ngan halesav ti mun. Taxeak, mudi e vatimol xati na Hi e mube hortan xati del moletin sav nan xil. ^{e20}Moletin nan xil langgoni nim tei xa xi di mikili ni. **Eloheoh** xil na Iesu Kristo e **provet** xil na Hi, xil langgoni pos xil teni. E Iesu Kristo vari iaxa be seteman teni. ^{f21}Kristo iaxa di misuv xat nim ak e misak ni bisti kuhi. Xi pol ni mei be **Nim Eo** xa pipin tangan Hi mei ita kat en. ^{g22}^hE xamim xa mu-bisti ngamu del Kristo, xi di pol ni xamim del moletin sav xil na Hi mei mube vanut moletin tei takes. Nggo xeihen na Ninin Eo, xamim mei munggoni Nim Eo xa Hi da en.

Pol misep usil polien nan del ngan xil xa latave Siu ti

3 Ve holesok xil vus xa Hi di tepol ni e rin namim, inou di nasis ve xamim. E xosali, nade nim te xeih ve polien xa Iesu Kristo tesa ni minou tangan nihithiten longeongen hos mi xamim xa mutave Siu ti. ⁱ²Nanemi xa xamim mutelongeong ni ngamu xa Hi tepisen eheien hos nan minou e suse xa tesa polien ak minou tangan nihat nihit mesen longeongen hos nan mi xamim. ^{j3}Xi tepisen nenemien xusus nan minou tangan nikila. Ngan ak be naha xa natetis usili vuteili ngamu e uvei ak. ^{k4}E vahit xamim mule usil naha xa natetisi, ma mukil kuh kilakilen xa natehuri usil nenemien xusus na Hi usil Kristo. ⁵Tetiamu, Hi tenavit kil ti nenemien xusus ak mi moletin xil te ut etan. E taxeak, nggo **Ninin** nan, Hi pisen ni mi **eloheoh** eo xil na Iesu del **provet** nan xil te xosali ak tangan lakila. ⁶Nene-

mien xusus na Hi mak: nggo longeongen hos nan usil naha xa Iesu Kristo tepol ni, ngan xil xa latave Siu ti di lamos del Siu xil mei labe vanut moletin tei takes nggoni ngan xa labe tenben tei takes. Xil vus mei labe horamue xil xati na Hi e ti lileh holesok xil xa di e hen xa tehit xati tangan isa ni mi ngenen xil. ¹

⁷E rin te longeongen hos ak, Hi tesak ni nou napol mini del xeihen nan tangan nihithiteni. Reitin, Hi tepisen eheien hos minou nggoni sanien tei nan minou melele xa tesak ni nou mei nabe moletin te polien nan. ^{m8}Neta sav xa inou nabe hokorong mu ni moletin sav xil vus na Hi, e ve eheien hos nan di e nou, xi temaen nou nanggur polien hos ak. Io, xi temaen nou tangan niha mi ngan xil xa latave Siu ti e nihithiten longeongen hos mi xil. Di nabit usil holesok xil vus xa bos pupu xa nggo visal Kristo xa moletin tovuol mikila vaxale. ⁿ⁹Hi tepeas ni holesok xil vus, e tepol ni nenemien xusus nan tetiamu nousav. E xi di maen nou tangan nihithiteni mi moletin xil vus mei lilong kila. ^{o10}Taxeak, Hi di pol nggo Sias nan tangan vapisen suse xil te metisouen e xeihen nan mi ninin tesa xil e vat nae xil xa langgur xeihen xa ladi e tilang hat. ^{p11}Hi pol ni mak nggusil nenemien xa xi teling xati tetiamu nousav, xa mei testal tehe reitin texo Iesu Kristo, Suv nar. ¹²E vengang xalaling neketen nar e Iesu Kristo e rabisti dela, rakila ramei pe valnao Hi e ulixir nakan ni ekaten nan ti. ^q

¹³Misak ni, di nasis tangan nenemien namim namot ti ve longpangasien xil xa di nangguri ve xamim e nim te xeih ak.

^{e2:19} Efes 3:6; Hib 12:22-23 ^{f2:20} Rev 21:14; Mat 16:18; Aes 28:16; 1Pit 2:6

^{g2:21} Efes 4:15-16; Kol 2:19; 1Kor 3:16; 2Kor 6:16 ^{h2:22} 1Pit 2:5

^{i3:1} Efes 4:1; Plp 1:7,13; Flm 1:9 ^{j3:2} Kol 1:25 ^{k3:3} Efes 1:9-10; Kol 1:26

^{l3:6} Efes 2:13,18-19 ^{m3:7} Kol 1:23,25

^{n3:8} 1Kor 15:9-10; Kal 1:16; Efes 1:7 ^{o3:9} Rom 16:25; Kol 1:26

^{p3:10} 1Pit 1:12; Rom 11:33 ^{q3:12} Rom 5:2; Hib 4:16; 10:19

Bos xa musep koai ven, vengan di nang-guri tangan vatutou ni rin namim. ^r

**Pol misis rilomun xa mol-Efeses
xil lipus kil holesok xil xa
bos xa Hi tepol ni e rin nae**

¹⁴ Melele xa nanem usil holesok xil xa Hi Tamer tepol ni, di natingeiril e sisen pe meten. ¹⁵ Vengan xi be Tame ngan xil vus xa di laneket e langgur hisen: na ngan xil xa ladi e ut nesao, e na ngan xil xa ladi e ut etan. ¹⁶ Hi, holesok xil xa di latal langgo en ve minehinen te xeihen nan labe holu xa labe holu pupu. E di nasisi tangan Ninin Eo nan isak ni tine-mim ixehi mu ixo xeihen nan. ^{s17} Nasis tangan Kristo imeul e tinemim vengan xa muling neketen namim di en. E nasiss mun tangan musak ni suse te eheien mei ihe vatite te meulien namim, e sexien namim xil vus ipisen ni. ^{t18} Imak, ma xamim e moletin sav xil mun na Hi lik-ila likil kuhi xa eheien na Kristo eilep xa eilep pupu. ^{u19} Reitin, neta sav xa eheien nan eilep pupu mili naha xa moletin xil lakila lanem usili, nasiss Hi tangan isak ni xamim mukila. Imak, ma nenemien e sexien xil na Hi mei ise xat meulien namim. ^v

²⁰ Imak, ma ripet rat his Hi! Nggo xeihen xa di pol dela e meulien nar, xi mik-ila ipol ni holesok xil hao ili naha xa xir rakila ranem usili mu rasisi ven. ^{w21} Ti ripet rat hisen ihe nesao vengan xa xi be eilep, e di pol ni holesok xil xa tellep e Sias nggo Iesu Kristo. Xosali e melengien xil xa ti imei, moletin xil vus ti lipet rat hisen ihe nesao iha vuma ... navus ti. Reitin.

**Selxatien tangan Kristin xil ti lipol
vituei itel sexien te eheien**

4 Hi tesak ni xamim mei mube vanut moletin hu tei takes nan. Misak ni, inou Pol xa nade nim te xeih vengan xa napol mi Suv Iesu, di nasel xat xamim nggeih tangan musak ni meulien namim ipin ni ngan xil xa Hi tekes xil labe nan. ^{x2} Vehakut, mupol ni nenemien namim ihe tan e sexien namim imerou tang. Mupol ihos mi xamim mun tang itel eheien e nenemien xa teviei. ^{y3} **Ninin Eo** tesak ni xamim mei mube vanut moletin tei takes ngamu. Misak ni, musak pisi e rin xil vus tangan muti vituei e tomat. ^{z4} Io, xir xa raneket rabe tenben tei takes, e Ninin Eo xa de iexir be tei takes. E, del nenemien xa be teviei, ranggur nenesien tei takes xa be reitin xa Hi tekes xir tangan riti vituei itela e ut nesao. ^{a5} Di ranggusil Suv tei takes xa be Kristo, di ranggusil xat pispisien tei takes, e labaptaes ni xir tangan ramos e neketen tei takes. ^{b6} Hi tei takes xa be Tame holesok xil vus. Xi be eilep mili holesok xil vus, di pol e meulien na moletin xil, e di meul e tine moletin xil. ^c

⁷ E mi xir kekes, Kristo di miti sanien te xeihen tesav xil nggusil nenemien nan. ^{d8} Ngan ak nggoni sepinien xa de Vanuvei Eo xa bit,
“Melele xa be nesao e von merereen nan, xi diamu ni ngan xil xa tevae teli xil xa ladi pe hen.

E mi moletin nan xil, xi misa sanien hos xil mi xil.” (Sam 68:18)^e

⁹ Melele xa sepinien ak biteni xa xi *“be nesao e von merereen nan”* di pisen ni xa, tetiamu, Kristo teta ngamu e ut etan.

^r3:13 Kol 1:24 ^s3:16 Kol 1:11 ^t3:17 Sion 14:23; Kol 1:23; 2:7

^u3:18 Kol 2:2 ^v3:19 Kol 2:10 ^w3:20 Kol 1:29 ^x4:1 Efes 3:1; Plp 1:7,13; Flm 1:1,9; Kol 1:10 ^y4:2 Kol 3:12-13 ^z4:3 Kol 3:14-15

^a4:4 Rom 12:5; Efes 2:16; 2:18 ^b4:5 Sion 10:16; 1Kor 8:6 ^c4:6 1Kor 12:6

^d4:7 Rom 12:3,6; 1Kor 12:11 ^e4:8 Kol 2:15

^{f10} E xi xa tete ut etan, be xi vari tang iaxa be ut nesao e ba be von merereen xa mili ut sav xil te ut nesao tangan mei vahe eilep vali holesok xil vus. ¹¹ E Kristo tesa “*sanien hos xil*” mi moletin nan xil tangan rute mei lihe *eloheoh* xil, rute mei lihe *provet* xil te xosali, rute ha lisetu ni longeongen hos, e rute ha lilaxat kuh vanut Kristin xil e ti lipispisi kuhi mi xil. ^{g12} Kristo tesa sanien hos xil mi moletin nan xil ak tangan vasak mesen Kristin xil vus mei lapol ni polien hos xil tangan vatutou ni mosav xil. Nggo suse ak, ma Sias, xa be tenbe Kristo, mei ix-eih mu e neketen. ^{h13} Imak, ma ngan xil te Sias limei vituei tangan likil Nat Hi e liling neketen nae en, mei limatu kuhi e neketen nae, e limeul e rin xil vus iha vuma ... mei limal tevi ixoni Kristo tang. ⁱ

¹⁴ Rinaxoni tutut horamue xil ti mun e neketen nar xa latemanon tangan lake reitin e pispisien sav xil vus xa di lamei. E rinaxoni bot tei ti xa di miloh xolol tang e melele xa votiang sav xil lamei e di labuhi. Ma, rinamaen moletin te luvosen xil ti linamei linaluvos xir natel sepinien nae xil xa mikas. ^{j15} E-e, namak ti. Xir risepin usil reitinen na Hi e ti rihithiteni itel sexien te eheien. Imak, ma mei rimatu kuhi e rin xil vus e mei rixoni Kristo xa be Vat te Sias nan. ^{k16} Xi di bistin moletin nan xil nggoni ngan xa labe rut tenben xil xa di labistin xil labe tei takes. E melele xa rut tenben xil ak di lapol ni polien xati nae xil, ma tenben ak mei ixeh e imatu kuhi. Misak ni, xosxa moletin xil te Sias ti lipol sen polien nae xil itel sexien te eheien, ma Sias mei ix-eih mu e imatu kuhi.

Pol misel xat Kristin xil tangan listokovein meulien matu nae e lihur meulien hu xa Hi di misa ni mi xil

¹⁷ Vengan xa xamim mube rut tenbe xil te Sias na Iesu Kristo, ieok bei tangan nisel xat xamim itel xeihen xa Suv Iesu tesa ni minou. Nasel xat xamim tangan munahusil ti mun sexien na ngan xil xa latakil ti Hi. Vengan nenemien nae bon, e di lanem usil holesok xil xa be neta sav tang. ^{l18} Ladi tamu e maluxoluken e lasakras lanem kil holesok xil na Hi. Xil ladi sotin ra meulien hu xa Hi di misa ni vengan xa vatixil nggeih e iexil ti tavei lakil suse nan. ^{m19} Melele xa di lapol ni tesaen, latave unoun ti ven. Xil latesa xil tangan lihusil sexien xil xa tenbexil tang iexil bei, di lapol ni holesok hao xa misa pupu, e iexil bei pupu tangan lixulehi ti lipol ni isa mak mu. ⁿ

²⁰ E ngan ak tave sexien xil ti xa mutepol ni melele xa latepispisi mi xamim usil Iesu Kristo. ²¹ Reitin li, latepispisi mi xamim usil reitinen na Iesu melele xa mutelong usili e mutevisti tetela. ²² Latepispisi mi xamim tangan mustokovein meulien matu namim del sexien tesa xil teni, ixoni ngan xa muso rat talmusu tei ba. Vengan, e melele nen ak, muteluvos xamim mun tang mutehit holesok xil xa tenbemim ien tehei tehos mak mu. E holesok xil ak di tepurun meulien namim tang. ^{o23} Latepispisi mi xamim tangan mumaen Hi ihiles sexien te nenemien namim, e isak ni mei ihe neta hu. ^{p24} E latepispisi mi xamim tangan muhur sexien hos xil te meulien hu namim ixoni ngan xa di musing ni eising hu tei xa bos xa bos. Misak ni, momal tevi xa sexien namim xil ti ipisen ni xa

^f4:9 Sion 3:13 ^g4:11 1Kor 12:28 ^h4:12 2Tim 3:17; 1Pit 2:5

ⁱ4:13 Kol 1:28 ^j4:14 1Kor 14:20 ^k4:15 Efes 1:22; 5:23; Kol 1:18; 2:19

^l4:17 Rom 1:21 ^m4:18 Efes 2:12; Kol 1:21; 1Pit 1:14 ⁿ4:19 Kol 3:5

^o4:22 Kol 3:9; Kal 6:8 ^p4:23 Rom 12:2

meulien hu xa Hi tesa ni mi xamim be eo e momal tevi, nggoni ngan xa xi vari be eo e momal tevi. ^q

**Pol misel xat Kristin xil tangan
sexien nae xil ipisen ni xa
langgur meulien hu**

²⁵ Vengan xa ratehur meulien hu xa Hi tesa ni mi xir, rinaluvos ti mun. Bos xa holesok xil vus xa di rasep usili del tua nar xil e neketen ihe reitin. Ripol ni imak vengan xa xir vus rabe rut tenbexil te Sias tei takes. ^{r26} Momal tangan iemim ikat e melele xa mupus moletin tei di pol misa, e muxuxou kuhi tangan ekaten namim nasak ni xamim ti munamot e *tesaen*. E xosxa iemim nggat mosav tei, e melele nen tak, itiamu ni melele xa eai inu, mutemanon ha mumal ni rin namim. ^{s27} Mak, ma munasa mesal ti mi *Temat* tangan natiamu ni xamim munahusil suse nan te tesaen. ²⁸ Xosxa tei e xamim be moletin te kanen, ma istokovein sexien te kanen ak, e ha ipol itel hen xalu ihusil sexien hos tei. Imak, ma ikila isa tutouen mi ngan xil xa holesok nae tovuol. ^{t29} Munaso ti sepinien xa misa, e musa kes ni sepinien hos te tutouen mi xil xa ipisen eheien hos na Hi. Imak, ma melele xa mupusi momal tangan mupol ni, musa sepinien hos xa ti isak ni ngan xil xa lalonge, nenemien nae mei ixehi mu. ^{u30} Munapol ni sexien xil ti xa nasak ni *Ninin Eo* na Hi nalonge nasa. Vengan Hi tesa Ninin nan mi xamim tangan vapisen ni xa tesikoe xol xamim e texal rat xamim ngamu mube moletin nan xil e, e melele tei xa ti imei, ileh rerat xamim ra ut etan xa polu ni longpan-

gasien. ^{v31} Ma mustokovein sexien tesa xil ak. Munanem ti nasa, iemim naat xamim ti, e munaso ti sepinien te xeih naha xat xamim mun tang. Munavae ti natel xamim, munaseputut ni xamim ti, e munapol ni ti holesok sav xil mi xamim natel nenemien xa misa. ^{w32 x} Momal xa mupol ihos e mupisen esaen mi xamim mun tang. Muketeh ihos mun mi xamim ixoni ngan xa Hi di miketeh bos rilomun mi xamim ve holesok xil xa Kristo tepol ni.

**Pol misel xat Kristin xil tangan
linahusil ti mun sexien matu nae xil**

5 Vengan xa mube horamue xil xati na Hi xa eheien nan di e xamim, sexien namim ihusil xat sexien hos nan xil. ^{y2} Mupisen eheien namim mi mosav xil ixo sexien xil vus namim. Reitin, mupol ni itel eheien ixoni ngan xa Kristo tepol ni melele xa temaen tasen ni meulien nan mi Hi tangan vamat vahinat xir. E Hi tehesi xi ve maten nan nggoni ngan xa, tetiamu, tehesi xi melele xa latehas sipsip tei tangan vahe sanien eo tei e rin na moletin xil. ^z

³ E vengan xa xamim mube moletin eo xil na Hi, sexien tesa xil ak ihe tovuol vari e xamim: munapat ti natel mosav xil xa mutateli ti vatela, munapol ni ti sexien tesa xil te suse, e munaso viton holesok namim xil ti nave holu. ^{a4} Munasuhol ti, munasep talang ti, e munaso sepinien sav xil ti xa misa. Vengan tamal ti tangan moletin xil na Hi lasepin vama. Ihos mak mu xa musa sepinien te memesien iha mi Hi ve holesok xil xa di pol ni e rin namim. ^{b5} Bos xa mukil kuhi

^{q4:24} Kol 3:10; Sen 1:26 ^{r4:25} Sak 8:16; Kol 3:8-9

^{s4:26} Sam 4:4; Tem 1:19-20 ^{t4:28} 1Tes 4:11 ^{u4:29} Efes 5:4; Kol 3:8; 4:6

^{v4:30} Aes 63:10; 1Tes 5:19; Efes 1:13-14 ^{w4:31} Kol 3:8

^{x4:32} Kol 3:12-13; Mat 6:14; 18:22-35 ^{y5:1} Mat 5:48

^{z5:2} Rom 14:15; Kal 2:20; Sam 40:6; Hib 10:10; Eks 29:18; Esek 20:41

^{a5:3} Kol 3:5 ^{b5:4} Efes 4:29; Kol 3:8

xa ngan xil xa di lapol ni sexien tesa xil ak linava ti e rute xa Hi xal Iesu Kristo lube suv toto en e xi nahur ti neta xa bos xa da en. Io, ngan xil xa di lapat del moletin tei xa latateli ti vatela, e ngan xil xa di lapol ni sexien xil te suse, xil linava ti rute ak. E ngan xil mun xa di laso viton holesok nae tangan vahe holu linava ti en vengang xa sexien nae di pisen ni xa di lamot mi holesok nae xil nggoni ngan xa be hi nae. ^c

⁶Munamaen moletin xil ti tangan mei linaluvos xamim linahit Hi nasa pangasien ti mi ngan xil xa di lapol ni hisit tesaen xil ak, vengang xa be reitin xa Hi ien nggat ngan xil xa di lalong ras raen e isa pangasien mi xil. ^{d7}Misak ni, munamos ti natel hisit moletin xa di lapol ni sexien xil ak. ⁸Vengang, tetiamu, melele xa mutnakil ti mu Hi, xamim mun muteti e maluxoluken. E xosali, mubisti del Suv Iesu e mudi e miehen na Hi. Misak ni, sexien xil te meulien namim ti ipisen ni xa mube horamue nan xil. ^{e9}Vengang ngan xil xa ladi e miehen, sexien xil te meulien nae ipisen hosien, momalen, e reitinen. ¹⁰Misak ni, musak pisi tangan mukil sexien eah xa isak ni Hi ihesi xi ven, e ti mupol ni. ^f

¹¹Melele xa moletin sav xil di lapol ni sexien tesa xil te maluxoluken, rin namim ihe tovuol en, vengang xa neta ti xa bos nastal naxo en. Bos mak mu tangan muhit kila mi moletin xil xa hisit sexien xil ak tavos ti. ^{g12}Vengang xa hisit sexien tesa xil ak xa ngan xil xa di lalong ras Hi di lapol xuxus ni, xir rinalpol ni ti e rihe unoun tangan ti risep usili. ¹³E

melele xa miehen na Hi mei ileluv xati, ma ipisen kila tangan moletin xil vus ti lipus kila. ^{h14}Reitin, miehen di misak ni moletin xil lapus kil reitinen te holesok xil vus. Ngan ak nggoni kikeien tei nar xa bit,

“Xamim xa mupat, mutamea mulale.

Xamim xa mumat, mumeul rilomun ra maten.

Melele xa mudi e maluxoluken, miehen na Kristo ileluv e xamim.”ⁱ

¹⁵Misak ni, mungguxou kuhi ve kakaoen te meulien namim. Munapol ni ti sexien xil naxoni ngan xa mube unu xil, e muhe metisou. ¹⁶Reitin, mupol ihos e melele xil vus xa di mupus mesal tangan mupol ni. Vengang xa radi e melengien xil xa moletin xil di lapol misa vehakut. ^{j17}Munave unu ti, e mukil naha xa Hi ien bei tangan mupol ni, e ti mupol ni sung. ^{k18}Munatalang ni uae ti, vengang melele xa mupolu ni uae, musakras muvur xat sexien namim xil. E mupolu ni **Ninin Eo** tang. ¹⁹Vengang melele xa mupolu ni Ninin Eo mukila mupet rat his Suv Iesu melele xa mukikei vituei ni sam xil, sisien sav xil te neketen, e kikeien sav xil xa Ninin Eo di misa ni mi xamim tangan mumesi ixo tinemim tevi. ^{m20}Mukila mumesi Hi Tamer vehakut ve holesok xil vus xa di pol ni e rin nar nggo Iesu Kristo, Suv nar. ⁿ²¹E mukila muling nenemien namim ihe etan tangan mupol ihusil nenemien na Kristin sav xil. Xosxa mupol ni imak, ma di mupisen ni xa di mumerere ni Kristo. ^o

^c5:5 1Kor 6:9-10; Kol 3:5 ^d5:6 Kol 2:4,8; Rom 1:18; Kol 3:6

^e5:8 Efes 2:11,13; Kol 1:13; 1Pit 2:9; Luk 16:8; Sion 13:36 ^f5:10 Rom 12:2

^g5:11 Rom 16:17; 2Tes 3:6; 2Sion 1:10-11 ^h5:13 Sion 3:20-21

ⁱ5:14 Aes 26:19; 51:17; 52:1; 60:1; Rom 13:11 ^j5:16 Kol 4:5; Amos 5:13

^k5:17 Rom 12:2; Kol 1:9 ^l5:18 Pro 23:31 ^m5:19 Kol 3:16; Sam 33:2,3

ⁿ5:20 Kol 3:17 ^o5:21 1Pit 5:5

Pol misel xat Kristin xil tengan liti vituei e hosien

²² Atou xil, xamim ti mupol ni nenemien namim ihe etan tangan mupol ihusil nenemien na tiramue namim xil. Muhusil nenemien nae ixoni ngan xa di mupol ni mi Suv Iesu Kristo. ^{p23} Vengan tiramue namim xil labe vat namim nggoni ngan xa Kristo be vat te Sias nan. Sias ak be tenben, e moletin xil xa labe nan xati ladi en. E xi di miteh meulien e xil vus. ^{q24} E hisit sexien xa Kristin xil te Sias di laling nenemien nae be tan tangan lipol ihusil nenemien na Kristo, momal tangan atou xil mun ti liling nenemien nae ihe tan tangan lipol ihusil nenemien na tiramue nae xil.

²⁵ Tiramue xil, eheien namim iti mi atou namim xil. Eheien namim ixoni eheien xa Kristo tepisen ni mi Sias nan melele xa tesa xoteh meulien nan tangan vahinati. ^{r26 s27} Temotin ni tangan vasak ni Sias nan mei vamese tevi e vaminehin, e vasak ni tesaen e holesok xil xa be muis vahe tovuol en. Ien bei vapol ni vamak tangan vasak ni vamei vamese tevi pe meten. ^{t28} E vatit sexien ak, tiramue tei ipisen eheien mi atou nan e ilaxat kuhi ixoni ngan xa ien bei tasen ni tenben e di milaxat kuhi. Vengan xa tiramue xa di ien bei atou nan, nggoni ngan xa di ien bei xi tasen. ²⁹ Moletin tovuol xa ien vat tenben xati, vengan xi di misa anien mini e di misikoe xol kuhi. E Kristo mun di pol ni hisit sexien xil ak mi Sias nan ³⁰ venggan xa xir rabe rut tenben xil. ^{u31} Vanuvei Eo na Hi di misep usili melele xa bit, “*Ve rin ak, tiramue imea reling tamen*

xal ninen, e ihisti itel atou nan, e xalu mei lalihe tei takes.” (Sen 2:24) ^{v32} Vatit nenemien tei di minggus e sepinien ak, venggan xa di misepin mun usil vitueien na Kristo xal Sias nan. ^{w33} E, e rin namim tiramue xil, iemim ihei atou namim xil ixoni ngan xa iemim bei tenbemim tang. E xamim, atou xil, ti muling nenemien namim ihe tan e mupol ihusil nenemien na tiramue namim xil.

Selxatien ba mi horamue xil del tamexil e ninexil

6 Xamim, horamue xil xa di mubisti del Kristo, mulong xat tamemim e ninemim xil venggan xa ngan ak momal. ^{x2} Ngan ak be rae xa Hi tesa ni melele xa tehit, “*Mumerere ni tamemim e ninemim xil.*” (Eks 20:12)^y E nggo rae xil, ngan ak vari Hi tesa kokot ni rae ak vari tetel hitxatien tei tehit, ³ “*Imak, ma mupus hosien e meulien namim ihe teviei e ut etan.*” (Eks 20:12)

⁴ E xamim, tata xil, munapol ni ti naxeih pupu mi horamue namim xil tangan iexil naxat xamim ti. E mupispisi kuhi mi xil tangan likil holesok xil na Suv Iesu e itep likila lixuxou kuhi ve sexien nae xil. ^z

Selxatien ba mi slev xil del masta nae xil

⁵ Xamim slev xil, ti mulong xat masta namim xil e ut etan ak itel merereen, e mupol mi xil itel nenemien hos. Mulong xat xil e hisit sexien taxa di mulong xat Iesu Kristo nggo en. ^{a6} Munalong xat xil ti kestang e melele xa di lapus xamim tangan lavesi xil ve xamim. E

^{p5:22} Sen 3:16; Kol 3:18; 1Pit 3:1 ^{q5:23} 1Kor 11:3

^{r5:25} Kol 3:19; 1Pit 3:7; Efes 1:22; Kol 1:18

^{s5:26} Taet 3:5; Hib 10:10,14; 13:12 ^{t5:27} 2Kor 11:2; Kol 1:22

^{u5:30} Rom 12:5; 1Kor 6:15; 12:27; Efes 1:22-23; Kol 1:18 ^{v5:31} Mat 19:5

^{w5:32} Rev 19:7 ^{x6:1} Kol 3:20 ^{y6:2} Dut 5:16; Mat 15:4 ^{z6:4} Kol 3:21; Dut 6:7,20-25; Sam 78:4; Pro 19:18; 22:6 ^{a6:5} Kol 3:22-23; Taet 2:9-10

ihos mak mu tangan mulong xat xil venggan xa mube slev xil na Kristo, e mubesi xamim tangan ti mupol ni naha xa Hi ien bei xamim tangan mupol ni. ⁷Reitin, mupol mi masta namim xil itel nenemien hos ixoni ngan xa di mupol mi Suv Iesu, e nave moletin xil ti kestang. ⁸Ti mupol ni ihos imak venggan rakila xa Suv Iesu isa kekes ni huit polien ihusil naha xa xir di rapol ni, tave ti neta xosxa xir rabe slev mu rameluv tang. ^b

⁹E ihusil vatit sexien xil ak, xamim masta xil, mupol ihos mi slev namim xil. Munaso sepinien te xeih ti naha xat xil munahit ti musa pangasien mi xil xosxa linapol ti nahusil nenemien namim. Munem xati xa Masta nae xa de ut nesao be Masta namim mun. E melele xa ilepis rin namim xil vus, napus ti moletin nave eilep nali ngan tesav. Ipol ni ipin tang mi xamim vus. ^c

Selxatien mi Kristin xil tangan lisoh ixeih e neketen nae

¹⁰Tangan nisep kor mi xamim, ieok bei nasel xat xamim tangan muxeih mu e neketen namim. Xeihen namim nggo Suv Iesu vari venggan xa di mubisti dela.

¹¹Muvue xat xamim ve vaeen te neketen ixoni moletin te vaeen tei xa di bue xat xi. Reitin, musing ni eising xil te vaeen xa Hi di misa ni mi xamim tangan mukila musoh ixeih melele xa **Temat** mei isak pisi tangan valuvos xamim mumot. ^{d12}Venggan, e vaeen te neketen xa radi en, elu nar xil tave moletin xil te ut etan ti. E elu nar xil labe Temat e ninin tesa nan xil xa di langga xolol e tilang hat. Xil iaxa di langgur xeihen e ut etan ak e di lasak tangan lapol ni moletin xil lamot

e tesaen, e lapol ni nenemien na moletin xil ak mei vama luxoluk. ^{e13}Misak ni, musing kuhi ni eising xil vus te vaeen xa Hi di misa ni. Imak, ma mukila musoh ixeih e melengien xil vus xa Temat e ninin tesa nan xil mei ti lisak purun xamim. E melele xa muvae itel xil iha vuma ... ivus, xamim musoh ixeih tamu. ¹⁴Misak ni, muvue xat kuh xamim itel eising te vaeen xil xa Hi di misa ni. Mukil kuh reitinen na Hi xa mutehuri ngamu. Reitinen ak mei ixoni atuatu namim xa ihur xat xamim. Munesi xa Hi isak ni xamim mei mumal pe meten, venggan xa imak, ma momalen nan isikoe xol meulien namim. Momalen ak mei ixoni eising te xeih xa di misikoe xol valhasemim. ^{f15}Muling neketen namim e longeongen hos xa di misak ni xamim mudi e tomat del Hi. Imak, ma musoh ixeih mu e neketen namim. Longeongen hos ak mei ixoni but tei te xeih xa ivue xat xamim tangan musoh ixeih mu e munamot ti. ^{g16}Itel holesok xil ak, mupol ni neketen namim e Iesu Kristo ixeih mu. Neketen ak mei ixoni eivae tei xa isikoe xol xamim ra tovasing xil vus na Temat xa misa pupu tangan linamei ti e meulien namim. ^{h17}Mukil kuhi xa Hi teteh meulien e xamim ngamu. Misak ni, Temat misakras vasak ni nenemien namim ti vamat. Kilakilen ak isikoe xol nenemien namim ixoni eising te xeih tei xa di misikoe xol vatummim. Mukil kuh sepinien na Hi xa **Ninin Eo** di misa ni mi xamim tangan mukila muhithiteni vehakut. Sepinien na Hi ak mei ixoni tiei te vaeen namim. ⁱ

¹⁸E melele xa di musing mak, ma vehakut, ti musis mi Hi ihusil naha xa

^b6:8 2Kor 5:10; Kol 3:24-25 ^c6:9 Kol 4:1; Dut 10:17; 2Kron 19:7; Pol 10:34; Kol 3:25 ^d6:11 Rom 13:12; 2Kor 10:4 ^e6:12 Sion 14:30; Efes 2:2; 1Pit 5:8-9

^f6:14 Aes 11:5; Luk 12:35; 1Pit 1:13; Aes 59:17; 1Tes 5:8

^g6:15 Aes 52:7; Neham 1:15; Rom 10:15 ^h6:16 Sam 7:13

ⁱ6:17 Aes 59:17; 1Tes 5:8; Aes 11:4; 49:2; Hos 6:5; Hib 4:12

Ninin Eo di pisen ni mi xamim. E ti musis mun tangan Hi isa tutouen mi xamim. E melele xa musis, vemim navuol ni ti, e munaling ti sisen namim ve moletin savsav xil na Hi. ^{j19}Musis ve inou mun tangan nikila nisepin kuhi ni sepinien eah xa Hi isa ni minou. Ieok bei tangan nihit kil koute te nenemien xusus te longeongen hos nan, e uluk nakan ti. ^{k20}Vengan xa inou nabe eloheoh tei tangan ha nihithiten longeongen hos ak na Hi. E ve rin ak, xil labar xat inou ni sen xil te xeih. Musis ve inou tangan nikila nihithiteni ixoni ngan xa momal tangan nipol ni, e uluk nakan ti. ^l

Sepinien kor

²¹Tangan mukil kuh naha xa testal minou e holesok xil xa di napol ni, di

nasil Tikikas bat tangan ihit mesen ni mi xamim. Xi be tuxoli hos tei xa di nggusil kuh Suv Iesu. ^{m22}Reitin, di nasila bat mi xamim tangan mukil kuh rin namem, e tangan ipet rat nenemien namim.

²³Nasis xa tomat na Hi iti mi xamim vus xa di muneket. E nasis tangan Hi isak ni eheien namim mei ihe mahulong mu, e neketen namim e Iesu Kristo mei ixeh mu. ²⁴E nasis tangan Hi ipisen eheien hos nan mi xamim vus xa di mupisen ni xa neta tovuol xa mikila vahiles eheien namim ra Iesu Kristo, Suv nar.ⁿ

^{j6:18} Luk 18:1; Kol 4:2-3; 1Tes 5:17 ^{k6:19} Pol 4:29; Kol 4:3; 2Tes 3:1

^{l6:20} 2Kor 5:20; Flm 1:9; Kol 4:4

^{m6:21} Pol 20:4; Kol 4:7-8; 2Tim 4:12; Taet 3:12 ^{n6:24} 1Pit 1:8

Sepinien xa diamu te

Pilipae

?Visi iaxa tetis uvei ak?

Pol, xa tehe eloheoh tei na Iesu Kristo tetis uvei ak^o

?Visi iaxa tevuli uvei ak tetiamu?

Pol tetis uvei ak teha mi Kristin xil xa lateti e taon te hal Pilipae. Melele xa Pol di tekakao tangan vahithiten longeon-gen hos usil Iesu Kristo e kakaoen nan xa tehe valu nen,^p

?Pol tetis uvei ak veneh?

Pol ien tehei tangan vames Kristin xil te hal Pilipae ve sanien nae - Melele xa Kristin xil te hal Pilipae latelongeong ni xa Pol tete he kavmen te hal Rom, latesa sanien nae xil teha tangan vatutou ni.^q

Pol ien tehei tangan vapispisi mi Kristin xil te hal Pilipae ni sexien hos xil xa ipisen ni xa moletin be Kristin tei - Pol tesel xat ngan xil te sias te hal Pilipae tehiti Kristin tei, nenemien nan ihe tan ixoni ngan xa Iesu Kristo tepol ni,^r

Pol ien tehei tangan vassel xat Kristin xil te hal Pilipae tangan ti lihur sien vehakut iti e meulien nae - Melele xa Pol tetis sepinien ak teha mi Kristin xil te hal Pilipae, xil di latehur sakpurunien xil te xeih ve neketen nae.^s

Pol ien tehei tangan vassel xat Kristin xil te hal Pilipae tehiti lipol vituei ihusil sexien hos - Longpangasien xil^t

Vatit nenemien tei te uvei ak de Pilipae 1:21

Vengan xosxa nimeul, nipet rat Iesu Kristo ixo meulien navan. E xosxa nimat, ngan ak ihos mak mu, vengan xa ha nite visali.

Vatit nenemien teimun te uvei ak de Pilipae 2:5

Nenemien namim mei ixoni nenemien na Iesu Kristo xa tehe tan.

?Naha iaxa di e uvei ak?

1. Momal tangan ngan xil xa di lang-gusil Kristo ti lihisu ni melengien xil te xeih itel sien. (1:1-30)

2. Momal tangan ngan xil xa di lang-gusil Kristo ti lipol ni sexien hos xil itel sien. (2:1-30)

3. Momal tangan ngan xil xa di lang-gusil Kristo ti lisoh ixeh e neketen nae itel sien. (3:1-4:1)

4. Momal tangan ngan xil xa di lang-gusil Kristo ti litutou ni mosav xil itel sien. (4:2-23)

Sepkilaen na Pol usil uvei ak

1 Inou **Pol** xamel Timoti, xa mabe moletin te polien lu na Iesu Kristo, di madis uvei ak.

Madisi bat mi xamim moletin xil na Hi te hal Pilipae xa mubisti del Iesu Kristo, e mi elda e dikon xil mun namim.

²Masis tangan eheien hos e tomat na Hi Tamer e Suv Iesu Kristo iti mi xamim vus. ^u

^o1:0 Plp 1:1; Plp 1:7,12-14; Pol 28:30-31

^q1:0 Plp 4:10-14

^s1:0 Plp 1:27-30; Plp 1:4,25; 2:29; 4:4

^t1:0 Plp 1:29-30; Plp 3:2-3; Plp 2:2; 4:2-3

^p1:0 Pol 15:3-18:22; Pol 16:9-10; Pol

^r1:0 Plp 2:1-11; Plp 3:13-14; Plp 4:6; Plp 4:13

^u1:2 Rom 1:7; Kal 1:3; Flm 1:3

**Pol memes Hi ve neketen
na Kristin xil te hal Pilipae**

³Vehakut di names Hi navan e melele xil vus xa di nanem usil xamim. ^{v4}Reitin, di nasis mi Hi vehakut e rin namim del sien. ⁵Names Hi vengan xa, melele xa mutelong kokot ni longeongen hos mei duxoh xosali, di mupol vituei del nou tangan ti risak ni moletin sav xil likil longeongen hos usil Iesu Kristo. ⁶E nake reitin xa Hi, xa tepol kokot ni polien hos ak e meulien namim, itit ni ngan xa ipol ni iha vuma ... ipol sen ni e melele xa Iesu Kristo imei rilomun en. ^w

⁷Momal tangan nilonge ihos ve xamim vengan xa di mupisen eheien namim minou melele xa rapol vituei e polien xa Hi tesa ni minou nggusil eheien hos nan. Vengan xa xamim di mudutou ni nou e melele xa nade nim te xeih ak. E di mudutou ni nou mun e melele xa di nasep kila pe met moletin xil xa longeongen hos na Iesu Kristo be reitin. ⁸Hi pus kila be reitin xa ieok bei holu tangan nipus rilomun ni xamim, vengan xa eheien navan de xamim mak mu nggoni ngan taxa eheien na Iesu Kristo mun de xamim. ^x

⁹Di nasis Hi tangan isak ni xamim mukil kuhi mu xa itep ma iemim ihei xamim ihe holu mu ixo sexien xa imal. E nasis mun tangan mukil naha xa momal tangan ti mupol ni e melengien xil vus. ¹⁰Imak, ma e neta xil vus xa mei istal mi xamim, ti mukil kuh sexien hos xil tangan mupol ni, e ti, mupol ni sung. Isak ni, e melele xa Iesu Kristo itilomun en tangan ilepis moletin xil vus, xamim mukila musoh mumese pe meten e holesok ihe tovuol iha xat rin namim. ^{y11}Imak venggan xa Iesu Kristo ipus kila xa meulien

namim nggur huite te momalen xa nggo visali. E moletin sav xil xa lipusi lisa memesien iha mi Hi ven, e ti lipet rat hisen. ^z

**Longeongen hos usil Iesu Kristo
mikapis e rute xil vus, neta
sav xa Pol de nim te xeih**

¹²Tuxoli e hinoxoli xil, ieok bei tangan mukila xa longpangasien xa bemei minou, Hi di bilesi tangan vatutou ni longeongen hos ak vaha vakapis e rute xil vus mak mu. ^{a13}Vengan mereteketeh xil vus te taon xa mahulong te hal Rom e moletin sav xil vus mun lakila xa nade nim te xeih ak vengan xa di nanggusil xat Iesu Kristo. ^{b14}Misak ni, tuxoli e hinoxoli xil holu xa ladi inggak, melele xa lapusi xa nade nim te xeih ve neketen navan, neketen nae e Suv Iesu mei nggeih pilei sung. Ma, ulikanen nae be reling xil tangan ha lihithiten sepinien na Hi pe met moletin sav xil.

¹⁵Be reitin xa rut moletin xil di labit usil Iesu Kristo vengan xa di laketeh misa ni nou e iexil bei tangan lali inou. E rute ngan xil di labit usili vengan xa iexil bei tangan litutou ni moletin sav xil itela. ¹⁶Ngan xil ak di lasep usil Iesu Kristo vengan xa eheien nae di e nou. Xil lakila xa lateling inou nade nim te xeih venggan xa di naketeh xol longeongen hos ak. ¹⁷E moletin sav xil latavithiten longeongen hos usil Iesu Kristo ti vatel nenemien xa momal. Xil di lapol ni nggo nenemien tei xa be nesao venggan xa iexil bei tangan vasak ni longpangasien navan e nim te xeih ak mei vahe eilep pilei sung. ¹⁸E neta sav xa mak, nabesi inou. Nabesi nou venggan xa moletin xil di labit usil Iesu Kristo e rin holu, rute xil del xat nenemien xa momal, e rute sav xil del xat

^{v1:3} Rom 1:8; 1Kor 1:4 ^{w1:6} Plp 2:13; 1Kor 1:8; Plp 1:10; 2:16 ^{x1:8} Rom 1:9; 2Kor 1:23; 1Tes 2:5 ^{y1:10} Rom 2:18; 12:2; Hib 5:14; 1Kor 1:8; Plp 1:6; 2:16
^{z1:11} Sion 15:8 ^{a1:12} 2Tim 2:9 ^{b1:13} Efes 3:1; 4:1; Flm 1:1,9

nenemien xa tamal ti. E inou dit namaal tang ven.

¹⁹Inou namaal vengan xa nakila xa Hi isa huit sisen namim e rin navan e nakila xa **Ninin** na Iesu Kristo isak ni holesok xil ak mei ihe suse xa ha veok imase ra nim te xeih ixo en. ^{c20}Ieok bei mak mu e di nanesi xa be reitin xa ninapol ni ti neta xa isak ni nou nihe unoun ven. Ieok bei xa ulikanen navan ihe tovuol melele xa ti nisepin tangan nipet rat Iesu Kristo vehakut ixo tenbeok, neta sav xos nimeul mu nimat ven. ^d

²¹Vengan xosxa nimeul, nipet rat Iesu Kristo ixo meulien navan. E xosxa nimat, ngan ak ihos mak mu, vengan xa ha nite visali. ^{e22}Ma xosxa nimeul tang nita itel xat tenbeok, ma nikila nipol e meulien navan tangan nihur huite ve Hi. E natakil kuh ti ngan xave iaxa ieok bei mak mu. ^{f23}Ngan xalu ak di lulihi inou usil suse lu. Ngan xa bos pilei mak, ieok bei mak mu tangan nistokovein tenbeok e ha nite visal Iesu Kristo. ²⁴E ve xamim, bos mak mu xa nimeul tang nita itel xat tenbeok tangan nitit ni ngan xa ti nitutou ni xamim. ²⁵E nakila xa nimeul tang nita vengan xa nake reitin xa ti nitutou ni xamim tangan neketen namim mei imatu mu e mupolu ni sien. ²⁶Ma, melele xa nihat nipus rilomun ni xamim, mukila musep koai ihe holu ve naha xa Iesu Kristo tepol ni e rin navan.

²⁷E neta sav naha xa istal e meulien navan, musak ni meulien namim ihusil xat sexien hos na ngan xil xa di langgusil xat longeongen hos na Iesu Kristo. Imak, ma neta sav xosxa hat nipus xamim mu nisakras, niteong ni xa xamim di musoh vituei nggeih del nenemien tei takes, e di mubae vituei vengan xa di mul-

ing neketen namim e longeongen hos. ^{g28}Ihos xa ulimim nakan ni ti elu namim xil. Vengan melele xa musoh nggeih pe metexil, di pisen ni xa naha xa di obit usili be reitin. E di pisen ni mun xa Hi ihas lenen xil, e iteh meulien e xamim. E be Hi vari xa di misak ni holesok xil ak mei mistal e rin namim. ²⁹Vengan xa xi pol bos pupu mi xamim melele xa maen xamim muling neketen namim e Iesu Kristo, e maen xamim munggur longpangasien ve hisen. ³⁰E be reitin xa di munggur hisit longpangasien ve neketen namim nggoni ngan taxa mute-pusi xa inou natehuri melele xa nateti visal xamim, e xa mulonge di tamu nang-guri inggak.^h

Rihusil sexien na Iesu Kristo xa nenemien nan be tan

2 Vengan xa di mubisti del Iesu Kristo, nakila xa xi di misak ni xamim mei muxeih mu e neketen namim. Vengan xa mukila xa eheien nan di e xamim, ngan ak di pet rat nenemien namim. Vengan xa **Ninin Eo** de xamim, mupol ni bos mi mosav xil e iemim di misae e xamim mun. ²Misak ni, nasis xamim tangan mupol ni sexien xil ak xa isak ni nou nipolu ni sien: nenemien namim ihe tei takes, eheien xa de xamim ihe tei takes, tinemim ihe tei takes, e mupol vituei ixoni moletin tei takes. ³Ti xamim nasep koai mu naling xi nahe nesao mu nali mosav xil. Ihos mak mu xa xi iling nenemien nan ihe tan, ti ipus mosav xil ixoni ngan xa labos mak mu lali xi tasen. ⁱ⁴Ti xamim nanem tasen ni xi ti, e ihos mak mu xa ti inem usil mosav xil. ^j

⁵Nenemien namim mei ixoni nenenemien na Iesu Kristo xa tehe tan.

^c1:19 Siob 13:16; 2Kor 1:11 ^d1:20 1Pit 4:16 ^e1:21 Kal 2:20

^f1:22 Rom 1:13; 2Kor 5:8 ^g1:27 Efes 4:1; Kol 1:10; 1Tes 2:12; Plp 4:3

^h1:30 Pol 16:22; Plp 1:13 ⁱ2:3 Kal 5:26; Rom 12:10 ^j2:4 1Kor 10:24,33

⁶ Vengan neta sav xa Kristo be Hi e rin xil vus, ^k
xi tenapol ni nenemien nan ti vahit vahur xat xeihen nan tangan vapin ni Hi.

⁷ E testokovein xeihen nan xa eilep e temeï etan, ^l

mei tehe slev tei tang e rin xil holu.

Xi tepot e ut etan

e mei be moletin xa tenben da.

⁸ Tepol ni nenemien nan tehe tan

e telong xat Hi teha vuma ... temat.

Reitin, xi temaen ni tangan vaha vamat

e eivave vaxoni moletin tesa tei.^m

⁹ Ve rin ak, Hi tepet rat his Kristo tehe nesao, ⁿ

e tesa his tei xa eilep mini

xa mili his sav xil vus. ^o

¹⁰ Mak, ma e his Iesu, holesok xil vus mei limot mini: ^p

ngan xil xa ladi e ut nesao,

ngan xil xa ladi e ut etan,

e ngan xil mun xa ladi e ut te maten.

¹¹ Reitin, xil vus ti lihithiteni lihith,

“Iesu Kristo be Suv te holesok xil vus.”

Imak, ma lipus kila mak mu xa Hi Tata be eilep xa be eilep pupu.

Selxatien xa meulien nar imese tevi pe met moletin sav xil

¹² Tuxoli e hinoxoli xil, vengan xa nenemien namim be tan nggoni Iesu, mulong xat inou ixoni ngan xa di mutepol vehakut ni, e melele xa natete visal xamim. E ihos mak mu xa mupol ni taxeak xa natara ti visal xamim. Ti mupol ixehi tangan muketeh kuhi xa sexien namim xil lipisen ni xa mube ngan xil xa Hi miteh meulien nae ra tesaen.

Mupol ni imak itel merereen e ulikanen, ^{q13} vengan xa be Hi iaxa di pol e meulien namim. E be xi iaxa di misak ni xamim di iemim bei tangan muvusul naha xa xi ien bei xamim tangan mupol ni, e di misa xeihen mun mi xamim tangan mukila mupol ni. ^r

¹⁴ E holesok xil vus xa di mupol ni, munaseputut ti e munangor ti natel xamim mun tang. ^{s15} Imak, ma sexien namim xil ipisen ni xa mube nat Hi xil xa mumes tevi, e neta tovuol vasa vate rin namim e melele xa mudi taxeak e ut etan del moletin tesa xil xa sexien nae xil mikavui. Imak, ma meulien namim ileluev e hilaep te xil ixoni ngan xa hitu xil di laleluev e maluxoluken te vongien. ^{t16} Muhithiteni longeongen hos mi xil xa mikila vasa meulien mi xil. Vengan, xosxa imak, ma nikila nisepev koai e melele xa Iesu Kristo itilomun en. Nisepev koai vengan xa meulien namim ti ipisen ni xa naduxoh hoxalit lohen navan e natapol votei ti. E polien navan nggur huite.

¹⁷ Neta sav xosxa lihas vin inou, nabesinou tang e di napet rat his Hi ve xamim vus. Vengan xa meulien navan nggoni sanien eo tei xa di nasa ni ba mi Hi ve rin te neketen namim vus. ^{u18} Nggo hisit sexien ak, melele xa xamim di munggur longpangasien xil, xamim mun mumes Hi e muhesi xamim itel inou. ^v

Selxatien mi Kristin xil te hal Pilipae tangan lavur pilei Timoti xal Epafrodaetas

¹⁹ Xosxa ihusil nenemien na Suv Iesu, nanemi nabit nisil Timoti ihat mi xamim navehi ti. Imak, ma melele xa itilomun

^k2:6 Sion 1:1,2; 17:5 ^l2:7 2Kor 8:9; Sion 1:14; Hib 2:14,17 ^m2:8 Sion 10:17;

Hib 5:8; 12:2 ⁿ2:9 Pol 2:33; Hib 1:3 ^o2:9 Efes 1:21; Hib 1:4

^p2:10 Aes 45:23; Rom 14:11 ^q2:12 Sam 2:11; 1Pit 1:17 ^r2:13 Sion 15:5; 1Kor

12:6; 15:10; 2Kor 3:5; 1Tes 2:13 ^s2:14 1Kor 10:10; 1Pit 4:9 ^t2:15 Dut 32:5;

Mat 10:16; Pol 2:40; Dan 12:3; Mat 5:14; Efes 5:8; 1Tes 2:19; 1Kor 1:8; Plp 1:6,10;

Aes 49:4; 65:23; Kal 2:2 ^u2:17 Rom 15:16; 2Tim 4:6 ^v2:18 Plp 3:1; 4:4

visal inou, longeongen usil xamim xa isa ni minou isa sien minou. ²⁰ Moletin tovuol mun vate visal inou xa vaxoni Timoti xa eheien nan di e xamim e ien bei tangan vatutou ni xamim vaxoni inou. ²¹ Moletin savsav xil di lapol ni neta xa xil kestang iexil bei tangan lapol ni, e latapol ni ti naha xa Iesu Kristo ien bei. ^{w22} E Timoti tepisen ni ngamu mi xamim xa xi di pol mi Iesu. Vengan xamel malpol vituei ve longeongen hos na Hi nggoni ngan taxa horamue tei di pol vituei del tamen. ²³ Misak ni, e melele xati xa nihe von koten e nilong kil naha xa ti lipol ni minou, nisil Timoti ihat visal xamim. ²⁴ E nanesi xa, navehi ti, Suv imaen inou mun nimeluv nihat vis xamim.

²⁵ E nanemi nabit bos tangan nisil tuxoli Epafrodaetas itilomun visal xamim. Xamim mutesila temei visal nou tangan vahe **eloheoh** namim minou e mei vatutou ni nou e rin namim. E xamel mapol vituei e di mabae vituei ve polien na Hi. ^{x26} Xamim mutelonge xa xi temesei pupu e mutenexo ven. E melele xa Epafrodaetas telong usil nenexoen namim ven, xi milonge misa e bit vatilomun vahat vasao ni xamim. ²⁷ E reitin li xa xi temesei pupu e sangas vamat. E Hi ien tesae en, e ien tesae e nou mun. Vengan xosxa imat, ma inou nilonge isa pilei mak mu. ²⁸ Ma, namaal pupu tangan nisil rilomun ni ihat visal xamim tangan muhesi xamim ven melele xa mupusi. E imak, ma nenexoen navan mun ihe etan. ²⁹ Misak ni, muhur pilei kuhi e his Suv Iesu itel sien. E momal tangan musa merereen mi hisit moletin xil xa lamak. ^{y30} Vengan xi misa sen meulien

nan e sangas vamat ve polien na Kristo. Xi, ulin takan ni melele te xeih xil e di pol sen polien xil xa xamim iemim bei tangan mupol ni.

Momalen xa be reitin pe met Hi nggo suse te neketen

3 Misak ni, tuxoli e hinoxoli xil, neta sav xa naha imei, muhesi xamim vengaxa di mubisti del Suv. Taxeih ti minou tangan nasel xat rilomun ni xamim usil holesok xil ak, vengaxa di misikoe xol kuh meulien namim. ^z

² Muketeh kuhi ve titsa te luvosen xil xa lasa langgoni kuli reran xil. Moletin xil ak latamase ti pe met Hi. Xil di labiteni xa moletin itih purun rut tenben ixo sexien te vexahu tangan mei ihe moletin xati na Hi. ^{a3} E xir rataling nenesien nar ti e sexien xil xa di lapol ni e tenbe moletin tang nggot hale tangan vapol ni moletin tei mei vahe moletin xati na Hi. E-e, xir ranggur **vexahu** xa be reitin nggo tinexir, vengaxa di ramot mi Hi nggo Ninin Eo nan e rabesi xir vengaxa di rabisti del xat Iesu Kristo. ^b

⁴ Xosxa ieok bei, inou mun nikila niling nenesien navan e holesok xil xa mak xa moletin xil di lapol ni del tenbexil. Reitin, xosxa moletin tei di minemi bit xi mikila valing nenesien nan e neta xil xa xi di pol ni del tenben tangan vasak ni mei vamaal pe met Hi, inou natepol ni mak mu teli. ^{c5} Vengan inou natehe vexahu melele xa melengien navan tehe tol e he sav (8).[†] Melele xa latepes inou, natehe ngan **Israel** tei ngamu e nanggo vatimol xa mahulong na **Bensamin**. Reitin xa nabe Hibru xati. E rin te **rae** xil na Siu xil, inou nabe **Farasi** tei xa natehusil xati

[†]**3:5** Sen 17:1-27 di biteni xa Hi tesemae ni Ebrahim e horamue xil vus te vatimol nan tangan lihe vexahu melele xa melengien nae xil ihe tol e he sav (8) tangan vapisen hitxatien te xeih nan dela.

^w**2:21** 2Tim 4:10 ^x**2:25** Plp 4:18 ^y**2:29** 1Kor 16:16,18; 1Tim 5:17 ^z**3:1** Plp 2:18; 4:4 ^a**3:2** Sam 22:16,20; Rev 22:15 ^b**3:3** Rom 2:29 ^c**3:4** 2Kor 11:18

texeih. ^{d6}E vengan xa ieok tehei pupu tangan nasak ni mosav xil mun ti lavusil rae xil ak, natesa pangasien xil holu mi ngan xil te Sias na Iesu Kristo. Natepol ni temak vengan xa natenemi natehit di lasak pisi tangan lasak ni rae xil na Hi vakesae. ^e

⁷E neta sav xa holesok xil vus xa natepol ni tetiamu tangan navusil kuh rae xil na Hi latehe holu pupu, melele xa mei nabisti del Iesu Kristo, napus kila xa holesok xil ak be neta sav tang. ^{f8}E tave holesok xil ak ti kestang. Inou nanemi xa holesok xil vus e meulien navan tehe neta sav tang. Vengan melele xa mei natekil Iesu Kristo, natepus kila xa xi be eilep mak mu mili holesok sav xil vus. Misak ni, tangan nihusil xati, di naso rerat holesok sav xil vus e meulien navan ba nggoni tisok tang tangan nikila nihusil kes ni Iesu Kristo ixeh mak mu. ⁹Reitin, ieok bei mak mu tangan Hi ipus kila xa di nabisti del Iesu, e natamei ti namal pe meten vaxo longxatien navan e rae nan xil. E-e, taxeak namal pe meten vengan xa neketen navan de Iesu Kristo. Reitin, Hi di misa momalen mi ngan xil kestang xa di laling neketen nae e Iesu Kristo. ^{g10}Inou ieok bei pupu tangan nakil ti mu Iesu Kristo e nakil kuh xeihen na Hi e meulien navan. Ngan ak be xeihen xa Hi tepisen ni e melele xa tesak ni Iesu Kristo temea rilomun ra maten. E ieok bei mun xa namur rut longpangasien vaxoni ngan xa xi tehuri, neta sav xosxa nimat ixoni. ^{h11}Vengan xosxa imak, ma nikila nihur naha xa nateling nenesien navan en, xa inou mun nimea rilomun ra maten. ⁱ

Selxatien tangan ti riloh ixeh e rihur huit neketen nar

¹²E nataviteni ti xa namal tuei mu natehur sen huit neketen navan ngamu. E-e. Di nasak pisi tangan niloh ixeh mak mu tangan huite ak mei ihe navan, venggan Iesu Kristo tepol texeih tangan vahur nou name nan. ^{j13}Tuxoli e hinoxoli xil, nakila xa natahur sen huit neketen navan ti mu. E di napol ni neta tei, ieok di bovorong ni naha xa di pe touk, e di naloh nggeih tangan namur naha xa di diamu ni nou. ¹⁴Reitin, di naloh nggeih tangan nituxoh hoxalit lohen te neketen navan e nihur huite teni. Huit neketen ak be tangan nihe ut nesao reitin vengan xa Hi tekes inou mei nabisti del Iesu Kristo. ^k

¹⁵Xir vus xa ramatu ngamu e neketen nar, ti rihur hisit nenemien xa natesep usili nesao. E xosxa rute e xamim langgur nenemien sav, ma Hi ipol ni xil mei lipus kil kuh reitinen teni. ¹⁶E ngan xa be eilep mak mu iaxa ti rihusil xat reitinen xa Hi tepisen ni ngamu mi xir. ^m

¹⁷Tuxoli e hinoxoli xil, xamim vus ti muhusil xat sexien e nenemien navan xil. E muhusil xat ngan xil mun xa mupusi xa sexien nae nggoni sexien namem. ¹⁸Vengan xa, nggoni ngan xa natehiteni mi xamim melele holu ngamu, e di nabiteni mun del simetok, sexien na moletin xil holu di pisen ni xa labe elu mi longgeongen hos usil maten na Iesu Kristo e eivave. ¹⁹E Hi ihu lelen xil vengan xa di langgusil xat kes ni naha xa tenbexil di iexil bei nggoni ngan xa be hi nae, e holesok xil xa momal tangan lihe unoun

^{d3:5} Luk 1:59; 2:21; 2Kor 11:22; Pol 23:6; 26:5

^{e3:6} Pol 9:1-2; Pol 8:3; 22:4; 26:9-11 ^{f3:7} Mat 13:44,46; Luk 14:33

^{g3:9} Rom 3:21-22 ^{h3:10} Rom 6:3-5; 8:17; Kal 6:17

^{i3:11} Pol 4:2; Rev 20:5-6 ^{j3:12} 1Tim 6:12,19; Pol 9:5-6 ^{k3:14} 1Kor 9:24

^{l3:15} Mat 5:48; 1Kor 2:6 ^{m3:16} Kal 6:16

^{n3:17} 1Kor 4:16; 11:1; 1Tes 1:7; 1Pit 5:3 ^{o3:18} 1Kor 1:23; Kal 6:12

ven, xil di lasep koai ven sung. Reitin, xil di lanem usil holesok xil te ut etan tang. ^{p20}E xir, rabe hortan xil te ut nesao. E di radatil **moletin te teh meulien en** nar xa ixo ut nesao imei, ngan ak be Suv Iesu Kristo. ^{q21}E melele nen ak, Iesu ihiles tenbexir te ut etan xa memel tang, e ipol ni xil mei lixoni tenben hos te ut nesao xa minehinen te xeihen nan da en. E ipol ni imak itel hisit xeihen nan xa di pol ni holesok xil vus mei ladi pe hen.^f

**Selxatien xil tangan riti vituei
ihos e ti riling nenemien
nar iti e holesok xil na Hi**

4 Tuxoli e hinoxoli xil, vengan xa rabe hortan xil te ut nesao, musoh ixeih e neketen namim e Suv Iesu. Eheien navan xa mahulong di e xamim, e ieok bei pupu tangan nipus xamim vatei mun. Vengan xamim di musak ni nou nabesi nou e neketen namim nggoni huit lohen te meulien navan.^s

²Iuodia e Sintike, di nadakes xamil tangan mulsak pisi mulimei e nenemien tei takes vengan xa xamil vus di munggulil xat Suv tei takes. ³E nasikus, Susunggus, xa obe tua hos navan xa rupol vituei, tangan ha ututou ni atou xalu ak. Vengan xalu lutekon ni polien tetel xat inou tangan mattehithiten longongen hos. Reitin, matepol vituei tetel Klemen e tua sav xil mun xa hisexil di e Vanuvei te Meulien na Hi xa di ladis his moletin xil xa lihur meulien sal e ut nesao di en.^t

⁴Vehakut, sien iti mi xamim vengan xa di mubisti del Suv. Reitin, nabiteni mun xa muhesi xamim. ^{u5}Ti muhe han-

merou mi moletin xil vus vengan xa, navehi ti, Suv itilomun imei. ^{v6}Munanexo ti ve neta tova, e ti musis mi Hi ve holesok xil vus. E melele xa musis ve tutouen, mupol ni itel memesien. ^{w7}Imak, ma tomat na Hi xa mili kilakilen na moletin xil te ut etan iti mi xamim. Reitin, vengan xa mubisti del xat Iesu Kristo, tomat ak isikoe xol kuh meulien e nenemien namim.^x

⁸Tuxoli e hinoxoli xil, neta teimun xa nabit namiteni mi xamim be tangan xa ti muling nenemien namim iti e holesok xil xa ihos: ngan xa be reitin, ngan xa momal, ngan xa memase, ngan xa pipin tangan mumerere ni, ngan xa tellep, ngan xa di misak ni Hi besi xi ven, e ngan xa momal tangan risep koai ven. Reitin, holesok xil xa mak iaxa xamim ti munem usili. ^{y9}Muxulehi mupol ni sexien xil xa natepispisi ni mi xamim e natesa ni mi xamim. Reitin, holesok xil xa mute-long nou natesep usili mu mutepus nou natepol ni, xamim sung ti mupol ni. E Hi, xa be vatit tomat, iti visal xamim.^z

**Pol memes Kristin xil te hal
Pilipae ve sanien nae mini**

¹⁰Inou napolu ni sien e names Suv melele xa napus tutouen xa musa ni minou. Reitin xa tetiamu mutetutou ni nou, e be nousav vuteili xa mutnasa ti mun neta. Nakila xa iemim tabong ni nou ti, e mesal tovuol tangan mupisen eheien namim minou. ¹¹E nataviteni ti vamak vengan xa nabe tamure ni neta ngan. Vengan xa mei nakil sexien te sien sung, tave ti neta naha xa de heok. ^{a12}Vengan nakila nameul vatel ngan xa hokorong,

^{p3:19} Rom 16:18; 8:5-6 ^{q3:20} Efes 2:6,19; Hib 12:22

^{r3:21} Rom 8:29; 1Kor 15:43-53; 15:28 ^{s4:1} 1Tes 2:19-20

^{t4:3} Eks 32:32,33; Sam 69:28; Dan 12:1; Rev 3:5; 13:18; 17:8; 20:12,15; 21:27

^{u4:4} Plp 3:1 ^{v4:5} Hib 10:37; Tem 5:8,9 ^{w4:6} Mat 6:25; 1Pit 5:7; Kol 4:2

^{x4:7} Aes 26:3; Sion 14:27; Kol 3:15 ^{y4:8} Rom 12:17

^{z4:9} Rom 15:33; 16:20; 1Kor 14:33; 1Tes 5:23 ^{a4:11} 1Tim 6:6

mu vatel ngan xa be holu. E mei nakil kuh sexien te sien, neta sav xosxa anien avan holu, mu mae nggat inou; neta sav xosxa holesok navan be holu mu tovuol.¹³ Nakila namisu ni holesok xil vus vatel xeihen xa Iesu Kristo di misa ni minou.^{b14} E tave ti neta xa mak, ma names xamim ve tutouen xa di musa ni minou e melele xa di nabisu ni longpangasien navan xil.

¹⁵ Xamim mol-Pilipae xil mukil kuhi xa, melele xa natehe reling provins te hal Masedonia e ba natehithiten rohon ni longongen hos na Hi e rute sav xil, xamim keatang mutesa tutouen minou. Reitin, sias sav xil latnasa ti neta tenggan vatutou ni nou, tehe xamim keatang.^{c16} E melele xa natehe taon te hal Tesalonaeka, tenave melele tei takes ti xa mutesa neta ngan tenggan vatutou ni nou.¹⁷ Nataviteni ti vamak venggan xa ieok bei tenggan musa tutouen vatei mun minou. E-e. E ieok bei tenggan Hi ipus kil holesok xil xa di mupol ni e rin navan, e isa huite teni mi xamim e melengien tei xa ti imei.^d

¹⁸ Ieok bei tenggan namit kila mi xamim xa natehur sen tutouen xa mutesa ni minou nggo he Epafrodaetas. E napusi xa be mahulong mak mu mili ngan xa di ieok bei. Sanien namim nggoni sanien eo xa momal tevi pe met Hi, e vokon teni bos pupu e di misa sien mini.^{e19} E nakila xa Hi navan polu ni holesok xil vus. E xi isa holesok xil vus mi xamim xa mube tamure ni venggan xa di mubisti del Iesu Kristo.²⁰ Ripet rat his Hi Tamer xa minehinen te xeihen nan iti ha vuma ... navus ti vatova. Reitin.

Sepinien kor

²¹ Nabit 'bos makoe' mi moletin xil na Hi xa ladi visal xamim e di labisti del Iesu Kristo. E tuxoli xil e neketen xa ladi visal nou di labit 'bos makoe' nae bat mi xamim.²² Reitin, moletin xil vus na Hi e rute ak di labit 'bos makoe' nae mi xamim, e ngan xil mun xa ladi e tim sa ***suv toto te hal Rom.***^f

²³ Nasis tenggan eheien hos na Suv Iesu Kristo iti mi xamim vus.

^b4:13 2Kor 12:10; 2Tim 4:17 ^c4:15 2Kor 11:9 ^d4:17 1Kor 9:11

^e4:18 Sen 8:21; Eks 29:18; Esek 20:41 ^f4:22 Plp 1:13

Sepinien xa diamu te

Kolose

?Visi iaxa tetis uvei ak?

Pol, xa tehe eloheoh tei na Iesu Kristo tetis uvei ak^g

?Visi iaxa tevuli uvei ak tetiamu?

Pol tetis uvei ak teha mi Kristin xil xa lateti e taon te hal Kolose. Melele xa Pol di tepol e taon te hal Efeses,^h

?Pol tetis uvei ak veneh?

Pol ien tehei tangan vamal ni nene-mien nae usil anien eah xa bos tangan lia ni e melengien eah e wik iaxa momal tangan limot mi Hi en - Titsa te luvosen xil di latepispisi ni xa Kristin xil vus lihusil xat rae xi xa Hi tesa ni mi Siu xil tetiamu usil anien eah xa bos tangan lia ni e melengien eah e wik iaxa momal tangan limot mi Hi en.ⁱ

Pol ien tehei tangan vamal ni nene-mien nae usil sexien te vexahu - Titsa te luvosen xil di latepispisi ni xa Hi ien bei tangan Kristin xil ti lipol ni ixoni ngan xa labe Siu e lisa tiramue e horamue nae xil vus ha lihe vexahu.^j

Pol ien tehei tangan vamal ni nene-mien nae usil sexien xa di lamot mi maxaxa xil en - Titsa te luvosen xil di latepispisi ni xa momal tangan Kristin xil ti limot mi maxaxa xil.^k

Pol ien bei tangan vamal ni nenemien nae usil Iesu Kristo - Titsa te luvosen xil di lapispisi xa Kristin xil mei lamal pe

met Hi xosxa lihusil rae xil e sexien holu na Siu xil kestang, e latasepin ti vahe holu usil Iesu Kristo.^l

Pol ien tehei tangan vamal ni nene-mien nae usil sexien xa likila lihur nenemien xuxus na Hi ixo en - Titsa te luvosen xil di latehiteni xa xil kestang di langgur nenemien xuxus na Hi e likila lihit lelen ni mi ngan xil kestang xa di langgusil kuh pispisien nae xil.^m

Vatit nenemien tei te uvei ak de Kolose 2:9-10

E xamim muhusil xat Kristo xa mei tehe moletin xa tenben teta, neta sav xa holesok xil xa di Hi di en. E vengan xa di mubisti del Kristo xa be vat na vat xil e eilep savsav xil vus, di misak ni xamim mei mupolu ni holesok xil te neketen.

?Naha iaxa di e uvei ak?

1. Iesu Kristo be eilep mak mu mili holesok xil vus. (1:1-23)

2. Ngan xil xa labisti del Iesu Kristo lamal pe met Hi, tave ti vengan xa di langgusil xat rae xil na Mosis. (1:24-2:23)

3. Ngan xil xa labisti del Iesu Kristo, momal xa meulien nae ipolu ni sexien te eheien, memesien, e tomat. (3:1-4:18)

Sepkilaen na Pol usil uvei ak

1 Inou *Pol* xa nabe *eloheoh* tei na Iesu Kristo nggusil nenemien na Hi di nadis uvei ak del Timoti xa be tua nar e neketen. ⁿ

²Di nadis uvei ak bat mi xamim, moletin xil na Hi xa mudi e taon te hal Kolose. Xamim mube tuxoli e hinoxoli

^g1:0 Kol 1:1; Kol 1:24; 4:10,18; Pol 28:30-31 ^h1:0 Pol 19:1-41; Kol 1:7-8; Kol

4:12; Flm 1:23; Kol 2:8; Kol 2:7 ⁱ1:0 Kol 2:16; Kol 2:17

^j1:0 Kol 2:11; Kol 3:11 ^k1:0 Kol 2:18; Kol 2:19; 3:1-4 ^l1:0 Kol 2:18-19; Kol

2:15-20; Kol 1:2; 2:6,10 ^m1:0 Kol 2:8,18; Kol 2:2-3 ⁿ1:1 1Kor 1:1; Efes 1:1

xil e neketen vengan xa rabisti vituei del Iesu Kristo.

Malsis tangan eheien hos e tomat na Hi Tamer iti mi xamim.

Pol memes Hi ve neketen na Kristin xil te hal Kolose

³Melele xa xamel di masis ve xamim, vehakut di mames Hi, Tame Iesu Kristo, Suv nar. ⁴Mames Hi vengan xa malong usil neketen namim e Iesu Kristo, e eheien namim e moletin xil vus na Hi. ⁵Xamim mupol ni mak vengan xa di muling nenesien namim e Hi xa di misa xat kuh holesok hos xil ve xamim e ut nesao. E muling nenesien namim xa ngan ak be reitin e melele xa mulong sepini te reitinen xa be longeongen hos usil Iesu Kristo. ⁶Melele xa longeongen hos temei rohon mi xamim e mei mukil kuh eheien hos na Hi, miso huite e meulien namim. Reitin, miso huite e xamim nggoni ngan xa di miso huite e meulien na moletin xil holu e ut etan. ⁷Xamim mutehur longeongen hos ak texo Epafras, moletin te polien hos na Iesu Kristo xa di pol vituei del xamem. Xi tasin polien nan ti e di pol e rin namim vehakut. ⁸E xi mitumul mi xamel usil eheien xa **Ninin Eo** di misa ni mi xamim.

⁹Ve rin ak, melele xa matelong usil sexien namim mei duxoh xosali ak, xamel matangel ti e sisen namel ve xamim. Di masis mi Hi tangan mukil kuh naha xa xi ien bei xamim tangan mupol ni, e mei mupolu kuhi ni metisouen e kilakilen xa nggo Ninin Eo nan. ¹⁰Imak, ma kakaoen namim imal ni ngan xil xa di langgusil xat Hi Suv e di misa sien mini. Reitin, Hi ihesi xi ve xamim melele

xa meulien namim ti iso huite xil ihe holu e polien hos xil vus xa di mupol ni, e melele xa kilakilen namim usil xi mei ihe eilep mak mu. ¹¹Xamel di masis mi Hi tangan ipol ni neketen namim mei ixeh mak mu itel xeihen nan xil vus xa tellep pupu. Masis mini tangan isak xat xamim tangan mukila musoh ixeh e melele te xeih xil xa ti limei e ti muhisu ni xil itel sien e nenemien xa ihe teviei. ¹²Masis tangan isak ni xamim mukila mumes Hi Tamer xa di misak ni xamim mupin tangan muvur holesok xil xa teling xati ngamu teti xa ihe na moletin nan xil xa ladi e miehen. ¹³Xi tete meulien e xir ra xeihen te maluxoluken, e teling kuh xir radi e xeihen na Natneli tangan ilaxat kuh xir ixoni suv toto nar, Natneli xa eheien nan di en. ¹⁴Nggo naha xa Iesu tepol ni, Hi tepol ni suse tangan rameluv ra xeihen te **tesaen** nar xil, e Hi di miketeh bos rilomun mi xir. ^y

Iesu Kristo be eilep mak mu mili holesok xil vus

¹⁵Moletin xil lasakras lapus Hi. ^z
E melele xa lapus Iesu Kristo, di lapus Hi vari.

Iesu teta tetiamu ni holesok xil vus xa ladi,
e nggoni muimol tei, xi be eilep mak mu mili holesok xil vus.

¹⁶Vengan xa, nggo xi,
Hi tepeas ni holesok xil vus te ut nesao e te ut etan,
ngan xa rakila rapusi e ngan xil mun xa rasakras rapusi.^a

Texo Natneli,
Hi tepol ni suv toto xil e kavmen xil,

^o1:3 Efes 1:16; 1Tes 1:2 ^p1:4 Efes 1:15 ^q1:5 1Pit 1:4; Efes 1:13 ^r1:6 1Tim 3:16; Rom 1:13 ^s1:7 Kol 4:12 ^t1:9 Efes 1:15-17; Plp 1:9; Efes 1:9; 5:17

^u1:10 Efes 4:1; Plp 1:27; Efes 2:10 ^v1:11 Efes 1:19; 3:16 ^w1:12 Efes 1:18

^x1:13 Luk 22:53; Efes 1:6; 2:2; 6:12; Mat 3:17 ^y1:14 Efes 1:7

^z1:15 2Kor 4:4; Hib 1:3; Sion 1:18; 1Tim 6:16 ^a1:16 Sion 1:3,10

tetel masxaxa xil e ninin tesa xil mun xa di langgur xeihen.

Reitin, Hi tepeas ni holesok xil vus texo Natneli,

tengan ti limerere ni.

¹⁷ Iesu Kristo teta ngamu tetiamu ni holesok xil vus, e di misak ni holesok xil vus di langgusil xat naha xa Hi teling xati. ^b

¹⁸ Iesu iaxa be vat te Sias e vatit meulien teni,

e Sias be tenben.^c

Xi be muimol na Hi e rin xa tesak ni temea rilomun ra maten tetiamu ni moletin sav xil.

Misak ni, xi mei diamu mak mu mili holesok sav xil.

¹⁹ Nggo Kristo, xir di rapus kuh Hi, vengan xa Hi vari besi xi tangan vate e Natneli. ^d

²⁰ Nggo xi, Hi miserev rin te holesok xil vus xa tepeas ni del xi mun;

ngan xil xa ladi e ut etan e ut nesao mun. Reitin, nggo maten na Natneli e eivave, Hi misak ni holesok xil xa xi tepeas ni mei ladi e tomat dela. ^e

²¹ Tetiamu, xamim muteti sotin ra Hi e mutehe elu tetela, vengan xa holesok xil xa mutepol ni e mutenemi latesa tang. ^{f22} E xosali, Iesu Kristo miserev rin namim e melele xa temaen tenben teha temat ve xamim. E ve rin ak, xamim mukila ha musoh pe met Hi ixoni moletin eo nan xil xa mumese tevi, e neta tovuol mun xa iha xat rin namim. ^{g23} Ngan ak be reitin xosxa xamim mutit ni ngan xa ti musoh ixeih e neketen namim e munaviles ti rani. Munastokovein neketen namim ti e Iesu

Kristo xa mutehuri melele xa mutelong longeongen hos usili. Hisit longeongen hos ak, di labithiteni mi moletin xil vus te ut etan, e inou, Pol, mei nabe moletin te polien tei teni. ^h

Pol misepin usil polien nan nggoni moletin te polien tei te Sias

²⁴ Xosali, nabesi nou xa nakila namur longpangasien xa xiak tangan vatutou ni rin namim. Vengan xa, del tenbeok, di nanggur sen longpangasien xil xa Kristo teling xati ngamu tangan namuri vatutou ni Sias nan, Sias xa be tenben.

ⁱ²⁵ Hi vari iaxa teling inou nabe moletin te polien tei te Sias. E xi tesa polien ak minou tangan ha nihit kil vuol ni sepinien nan iha mi xamim xa mutave Siu ti. ^{j26} E tetiamu duxoh xosali, koute te sepinien ak texus ra moletin xil. E xosali, Hi di misak ni moletin nan xil mei lakila. ^{k27} Reitin, Hi tehosei xil tangan likil lingxatien xuxus nan ak, xa Kristo di meul e tinemim xa mutave Siu ti. E ve rin ak, xamim mun mukila muling nenesien namim en, tangan mumos e ngan xil xa liti e hosien nan e ut nesao. ^{l28} Misak ni, xamel ba di mabithiten Iesu Kristo mi moletin xil vus. Del metisouen e kilakilen, di masel xat moletin xil e di mapispisi kuhi mi xil usili. Di mapol ni mak tangan makila maleh viton moletin xil vus mei lavisti vatel Kristo tangan ha lisoh pe met Hi ixoni moletin xil xa neketen nae matu ngamu. ^{m29} E ve rin ak vari, di napol nggeih del xeihen xa eilep xa Iesu Kristo di misa ni minou e di pol dela e meulien navan mun.ⁿ

^b1:17 Sion 1:1; 8:58 ^c1:18 Efes 1:22-23; 4:15; 5:23; Pol 4:2; 26:23; Rev 1:5

^d1:19 Sion 1:16; Efes 1:23; Kol 2:9 ^e1:20 Efes 1:7; 2:16; 1Sion 2:2; Rom 5:1; Efes 2:13; 1:10 ^f1:21 Rom 5:10; Efes 2:12; 4:18 ^g1:22 Efes 2:14,16; 5:27

^h1:23 Hib 3:14; Efes 3:17; Mak 16:15; 1Tim 3:16 ⁱ1:24 Efes 3:13

^j1:25 Efes 3:2,7-8 ^k1:26 Rom 16:25-26; Efes 3:3,5,9-10 ^l1:27 Rom 16:25; Efes 3:9; 1:18; 1Tim 1:1 ^m1:28 Efes 4:13 ⁿ1:29 Efes 3:7,20; Plp 4:13

2E ieok bei tangan namiteni mi xamim xa midep iaxa di nakon pupu tangan natutou ni rin namim, rin na ngan xil mun xa ladi e taon te hal Lao-disia, e rin na ngan xil vus xa natapus ti mu xil. ²Di napol nggeih mak tangan vasak ni neketen namim mei vaxeih pilei mu e vasak ni iemim ti vahei xamim mun tang tangan muve tei takes. Reitin, di nasak tangan xamim mukil sen neni-mien hos na Hi xa teling xuxus ni teti-amu, e mukil kuhi xa koute teni be Iesu Kristo vari. ³Vengan xa xi be vatite te metisouen hos e kilakilen xil vus xa Hi teling xuxus ni tetiamu. ⁴Di nabit usil holesok xil ak mi xamim tangan munamaen ni ti moletin tova namei naluvos xamim natel sepinien xil xa mikas. ⁵Di nabiteni mak tangan vatutou ni xamim vengon xa, neta sav xa nade sotin ra xamim, nenemien navan de visal xamim vehakut. E nabesi nou melele xa nalong usili xa midep iaxa xamim di musoh vituei nggeih e neketen namim e Iesu Kristo. ^r

Pol misel xat moletin xil tangan lixulehi ti lisoh ixeih e neketen nae e Iesu Kristo

⁶Vengan xa munggur Iesu Kristo ngamu mei be Suv namim, mutit ni hisit meulien tei xa di pisen ni xa di mubisti dela. ⁷Nggoni vatiei tei, musak ni lite xil te neketen namim lihe tan e liteli ixeih e Kristo. Imak, ma mumatu kuhi e neketen namim ihusil pispisien xil xa mutehuri tuei, e mupolu ni memesien. ^s

⁸Rut moletin xil ladi visal xamim xa di lasak pisi tangan laluvo xamim del kilakilen xil xa be neta sav tang xa di nggusil rae xil xa moletin xil te ut etan di

lasa ni mu langgusili nousav ngamu. E holesok xil ak tahusil ti reitinen usil Iesu Kristo. Misak ni, munamaen xil ti linax-eih xat xamim tangan ti muvusil naha xa xil di lasamae ni xamim tangan mupol ni. ^{t9}E xamim muhusil xat Kristo xa mei tehe moletin xa tenben teta, neta sav xa holesok xil xa di Hi di en. ^{u10}E vengon xa di mubisti del Kristo xa be vat na vat xil e eilep savsav xil vus, di misak ni xamim mei mupolu ni holesok xil te neketen. ^v

¹¹E vengon xa di mubisti del Iesu Kristo, pe met Hi, nggoni ngan xa mube **vexahu** ngamu. E tave vexahu ti xa moletin xil tang di lapol ni ni rut tenbe moletin, e Kristo tepol ni vexahu ni nini xamim melele xa tetihi rat sexien tesa ra xamim. ^{w12}E melele xa latehe **baptaes** ni xamim, texoni ngan xa latetihin xamim tetel Iesu Kristo. E melele xa mutemea ra oei ak, texoni ngan xa mutemea rilomun ra maten tetela. Hi tepol ni tehe reitin e meulien namim, vengon xa muteling neketen namim e hisit xeihen nan iaxa tesak ni Iesu Kristo teme a rilomun ra maten. ^x

¹³Tetiamu, xamim muteti tamu e tesaen namim xil e mutnamos ti vatel moletin xil na Hi xa latehe vexahu. Misak ni, vengon xa mutnakil ti Hi, pe meten, texoni ngan xa mutemat. E texo Kristo xa teme a rilomun ra maten, Hi misak ni xamim mumeul reitin melele xa tekete tehos rilomun mi xamim. Reitin, xi di mikete h bos rilomun mi xir e tanem ti mun usil tesaen nar xil xa teti-amu. ^{y14}Vengan xa tetiamu, texoni ngan xa latetis xat tesaen xil vus xa ratepol ni teha xat Hi e rae nan xil tete vanuvei tei. E neta sav xa mikila isa pangasien mi xir ven, Hi misihi lelen ni. Reitin, hole-

^{o2:2} Efes 3:4; Kol 1:26; 4:3 ^{p2:3} Aes 45:3; 1Kor 1:24,30; Efes 3:19; Pro 2:3-4

^{q2:4} Rom 16:18; Efes 5:6; Kol 2:8 ^{r2:5} 1Kor 5:3 ^{s2:7} Efes 2:20,22

^{t2:8} Rom 16:18; Efes 5:6; Kol 2:4 ^{u2:9} Sion 1:14,16 ^{v2:10} Efes 1:21-22

^{w2:11} Rom 2:29 ^{x2:12} Rom 6:4; Kol 3:1; Efes 1:19-20 ^{y2:13} Efes 2:1,5

sok xil xa teha xat rin nar, Hi tehur rati e telingi teha xat rin na Iesu melele xa lateti xati e eivave. ^{z15}E melele nen ak, texo naha xa Iesu tepol ni e eivave, Hi tehas tan ni vat xil, ninin tesa xil, e eilep sav xil mun e tehur rat xeihen nae. Xi tepisen ni pe met moletin xil xa xeihen nan eilep mak mu mili xeihen nae.

¹⁶Misak ni, munamaen ti moletin mei naso sepinien xa nasa naha xat xamim vengana mutaxusil kuh rae na Siu xil ti e rin te naha xa di mungga ni mu mumu ni, mu sexien xa mutaxuxou kuhi ni melengien eo mu **Sabat** nae xil ti. ^{a17}Teti-
amu, Hi tesa rae xil xa lamak mi Siu xil xa langgoni nini neta ngan xa isa ni imei mi moletin nan xil e melengien xil xa ti imei. E reitinen teni teme ngamu, xa be Iesu Kristo. ^{b18}Munamaen ni ti moletin tova tangan mei napurun nenemien namim nahit mei mumal pe met Hi ixo suse xa musa pangasien mi tenbemim e mumot mi **masxaxa** xil. Hisit moletin xil ak di lasep koai vehakut labit langgur metuveen hos tei ra Hi, e nenemien nae polu ni holesok xil te ut etan tang. Holesok xil xa di labit usili be neta sav tang, ¹⁹vengan xa latavisti ti vatel Iesu Kristo xa be vat te Sias nan xa be tenben. Vengan xa be Iesu Kristo iaxa di misa anien mi rut tenben xil vus e di bistin xil mei labe tenben tei takes. Reitin, Kristo vari di misak ni tenben mei meul kuhi nggusil naha xa Hi ien bei. ^c

²⁰E vengana xa mubisti del Iesu Kristo, mumat dela e mumeluv ngamu ra xeihen na Temat e ninin tesa xil. Misak ni, munapol ni ti mun naxoni ngan xa di mubisti del holesok xil te ut etan. Munalong

xat ti mun rae xil xa moletin xil te ut etan di lasa ni mi xamim naxoni, ^{d21}“!Munaxol ti holesok xil ak! !Munakar pis ti hisit anien xil ak! !E munamei ti sangas ni ngan xil ak!” ²²Hisit rae e pispisien xil ak, di labit usil holesok xil xa di lakesae e melele xa ranggusili. Rae xil ak langgo nenemien na moletin xil tang te ut etan. ^{e23}Moletin holu di lanemi labit hisit rae xil ak lapolu ni metisouen vengana xa lasak pisi tangan laxeih xat moletin xil ha limot mi Hi, lipol ni nenemien nae ihe tan, e lixuxou kuhi ve sexien xil xa di mistal nggo en. E hisit rae xil ak be neta sav tang vengana xa lasakras latal xat eheien te tenbexir e sexien tesa nar xil. ^f

Nggo Iesu Kristo, ranggur meulien hu

3 Reitin, tetiamu, texoni ngan xa xamim mutemat e tesaen namim. E vengana xa mubisti del Kristo xa temea rilomun ra maten, xamim mun mutemea rilomun ra maten tangan muvur meulien hu. Misak ni, muhusil xat holesok xil te ut nesao, ut xa Kristo di dotan e von xeihen e ri metu na Hi. ^{g2}Reitin, muling nenemien namim e holesok xil te ut nesao, e nati ti e holesok xil te ut etan. ^{h3}Vengan xa meulien namim tetiamu temat ngamu. E meulien hu xa muthuri, Hi tesoson ni ngamu teti ut nesao visal Kristo. ⁱ⁴E melele xa Kristo xa tesa meulien mi xamim imei rilomun e ipisen xi, ipisen ni mun xa mubisti dela e minehinen te xeihen nan mei ihe minehinen namim mun. ^j

⁵E vengana xa mumat del Kristo, muhas lelen sexien namim xil te ut etan.

^{z2:14} Efes 2:14-15; 2:16; 1Pit 2:24 ^{a2:16} Rom 14:1-12

^{b2:17} Hib 8:5; 10:1 ^{c2:19} Efes 2:21; 4:15-16 ^{d2:20} Kal 4:3-5,9

^{e2:22} Aes 29:13; Mat 15:9 ^{f2:23} 1Tim 4:3; Rom 13:14

^{g3:1} Kol 2:12; Sam 110:1; Mat 22:44; Mak 16:19; Pol 2:34; Efes 1:20; Hib 1:3; 8:1; 10:12; 12:2 ^{h3:2} Mat 6:33 ^{i3:3} Rom 6:2; 2Kor 5:14

^{j3:4} Kal 2:20; Plp 1:21; 1Kor 15:43; Plp 3:21; 1Sion 3:2

Ma, munapat ti natel ngan xa mutateli ti vatela. Munapol ni ti sexien tesa sav xil xa tamal ti tangan mupol ni. Munamaen ni ti eheien te tenbemim mu nenemien tesa xil nalihi xamim. E munave hokan ti ve mani naxoni ngan xa mei be hi tei e meulien namim. ^{k6} Reitin, munapol ni ti vengang xa Hi ien nggat hisit sexien xil ak e isa pangasien mi ngan xil xa di lapol ni e latalong xat xi ti. ^{l7} E, tetiamu, xamim mupol ni hisit sexien xil ak.

⁸ E xosalı, xamim mustokovein hisit sexien xil ak. Iemim naat moletin ti e tinemim nahe tamure ti. Munapurun moletin sav ti, munahit usil xil ti, e munasuhol xil ti. ^{m9} Munaluvos xamim ti. Reitin, munapol ni sexien xil ak ti vengang xa mustokovein meulien matu namim del sexien xil teni nggoni ngan taxa mustokovein eising tei xa be tal-musu. ⁿ¹⁰ E musing xol kuh xamim ni meulien tei xa be neta hu. Meulien hu ak, Hi vari tepol ni. E vehakut, xi di misak pilei nenemien namim tangan mei muxoni xi mak mu, e mei mukil kuhi. ^{o11} E vengang xa Hi di misak ni xir mei rabe neta hu mak, xi tapus ti vahit ngan xil xa latave **Siu** ti lasav ni Siu xil, mu ngan xil labe **vexahu** lasav ni ngan xil xa latave vexahu ti. E ien ti tavei tangan vakil ti xa moletin tei nggo ut xave, mu misukul midep, mu be slev, mu ven mase. Vengang Kristo, xi vari be eilep mak mu mili rin xil ak, e xi di meul e xir vus xa rabisti dela. ^p

¹² Misak ni, vengang xa Hi tehosei xamim tangan mei muhe moletin eo nan xil xa eheien nan di e xamim, musing xol xamim ni sexien hos xil. Mupol ni sexien te esaeen, hosien, e nenemien

namim ihe etan. Muhe hanmerou e nenemien namim ihe teviei. ^{q13} Munapol ni ti nasa mi mosav xil xa lasav ni xamim, e iemim naat xil ti. E xosxa tei e xamim pol ni neta tei xa tamal ti pe met tuneli, ma lalimal ni rin nalu tangan laliketeh ihos rilomun mi xalu. Reitin, vehakut xamim vus mumal ni rin namim itel xamim mun tang e muketeh ihos rilomun mi xamim ixoni ngan taxa Suv tepol ni mi xamim vus. ^{r14} E ngan xa be eilep mak mu e sexien hos xil ak, musing xol kuh xamim ni sexien te eheien. Vengang xa xosxa iexir ihei xir mun tang, ma riti vituei e hosien e vitueien nar ihos tevi. ^{s15} Mumaen tomat na Kristo tangan itel meulien namim. Vengang xa Hi tekes xamim tangan muti vituei e tomat nggoni ngan xa mube tenben tei takes. E vehakut, mumes Hi ixo meulien tevi namim. ^{t16} Mumaen sepinien usil Kristo xa bos xa bos pupu mei ipolu e meulien namim. Mupispisi mi xamim e musel xat xamim itela ixo suse te metisouen. E, itel memesien, mukikei mi Hi ni sam xil, ni sisien xil te memesien, e kikeien sav xil mun xa Ninin Eo di misa ni mi xamim. ^{u17} E holesok sav xil vus xa di mubiteni mu di mupol ni, mupol ni itel sexien tei xa ipisen ni xa mube na Suv Iesu reitin. E ixo his Iesu, ti musa memesien namim mi Hi Tamen. ^v

Sexien hos xil xa Kristin xil ti lipol ni e tim sae xil

¹⁸ Xamim, atou xil, vengang xa di mungguşil xat Suv, momal tangan muling nenemien namim ihe etan tangan ti muhuşil nenemien na tiramue namim

^{k3:5} Rom 6:6,11; 8:13; Efes 4:19; 5:3,5 ^{l3:6} Efes 5:6

^{m3:8} Efes 4:25-31; 5:4 ^{n3:9} Efes 4:25; 4:22 ^{o3:10} Efes 4:24; Sen 1:26-27

^{p3:11} Kal 3:28; 1Kor 12:13; Rom 10:12 ^{q3:12} 1Pit 2:9; Efes 4:2,32 ^{r3:13} Mat 6:14; Efes 4:32; 5:2 ^{s3:14} Rom 13:8,10; Efes 4:3 ^{t3:15} Plp 4:7; 1Kor 12:13,27; Efes 4:4 ^{u3:16} Efes 5:19 ^{v3:17} 1Kor 10:31; Efes 5:20

xil. ^{w19}E xamim, tiramue xil, eheien namim iti mi atou namim xil e munapol ni ti naxeih mi xil. ^x

²⁰Xamim, horamue xil, mulong xat tamemim e ninemim xil vehakut, veng-an xa ngan ak be polien xa momal xa Suv tesa ni mi xamim tangan ti mupol ni. ^{y21}Xamim, tata xil, munasak ni horamue namim xil ti tangan iexil ti naat xamim. Muxuxou kuhi tangan munasak ni nenemien namim ti namot. ^z

²²Xamim slev xil, mulong xat masta namim xil te ut etan e rin xil vus. Munapol kes ni ti e melele xa metexil di e xamim tangan vasak ni xil lamaal ve xamim. E vehakut, ti mupol mi xil itel tinemim tevi veng-an xa di mumerere ni Suv Iesu. ^{a23}E holesok xil vus xa di mupol ni, mupol ni itel meulien tevi namim. Reitin, mupol ni ixoni ngan taxa di mupol ni ve Suv Iesu, e nave moletin ti te ut etan tang. ²⁴Iesu Kristo vari be Suv namim xa di mupol mini. Misak ni, mupol ixeh veng-an xa mukila xa Hi vari isa holesok nan xil ixoni sanien tei iha mi moletin nan xil. ²⁵E mi ngan xil xa di lapol misa, Hi isa rilomun ni huit tesaenae mi xil ihusil naha xa latepol ni. E xi ipol ni imak imal mi moletin xil vus. ^b

4 Xamim, masta xil, mupol ni ihos mi slev namim xil ixo suse xa imal. Munem xati xa, xamim mun, Masta tei namim de ut nesao. ^c

Pol misel xat moletin xil usil sisen e sexien nae del ngan xil xa latake reitin ti e Kristo

²Vehakut, ti musis mi Hi itel memesien e vemim navuol ni ti. ^{d3}E ti musis

mun ve xamem xa Hi isah suse tangan makila mavithiten nenemien xusus nan usil Iesu Kristo iha mi moletin xil. Ve sepinien ak vari iaxa, xosali, nade nim te xeih. ^{e4}Reitin, musis ve nou xa nikila nihit rat sepinien ak imese pe met moletin sav xil ixoni ngan xa momal tangan nipol ni.

⁵E xamim, e melengien xil vus xa di mupus mesal tei, itel metisouen, mupol ni sexien hos xil iha mi ngan xil xa lataneket ti e Iesu. ^{f6}Reitin, mupol ni sexien namim tangan musepin itel hosien vehakut, ixo sexien tei xa mikila mulihi nenemien na moletin xil ixo en. Veng-an xosxa ngan ak be sexien namim te vehakut, ma mukil kuh sepinien eah xa momal tangan musa rilomun ni mi moletin xil vus. ^g

Sepinien kor

⁷Tikikas ihiteni mi xamim holesok xil xa di mistal e rin navan. Xi be tuxoli hos xa di mapol vituei mi Suv. Xi di dutou ni nou e rin holu e nenesien navan di en. ^{h8}Misak ni, di nasila bat mi xamim tangan ipet rat nenemien namim itel longeongen xa xamem madi midep. ⁹Di nasila del Onesimas xa be tei e xamim. Xi mun be tuxoli hos xa nenesien e eheien navan di en. Xalu lalhithiten holesok xil vus xa di mistal inggak mi xamim. ⁱ

¹⁰Aristakas xa de nim te xeih del inou, xi di bit 'bos makoe' mi xamim. E Mak mun, xa be tua tei na Banabas, xi di bit 'bos makoe' mi xamim. Natesep usili ngamu mi xamim xa ti muhur pilei xosxa ihat. ^{j11}E Sosua Sastas mun xa de inggak di bit 'bos makoe' mi xamim. Nggo

^{w3:18} Sen 3:16; Efes 5:22; 1Pit 3:1

^{x3:19} Efes 5:25; 1Pit 3:7 ^{y3:20} Efes 6:1

^{z3:21} Efes 6:4 ^{a3:22} Efes 6:5-8

^{b3:25} Dut 10:17; 2Kron 19:7; Pol 10:34; Efes 6:9

^{c4:1} Lev 25:43,53; Efes 6:9

^{d4:2} Efes 6:18; Plp 4:6; 1Tes 5:17

^{e4:3} Efes 6:19-20; 2Tes 3:1; Rom 15:30; 1Kor 16:9

^{f4:5} Efes 5:15-16; 1Tes 4:11-12

^{g4:6} Efes 4:29; Mak 9:50; 1Pit 3:15

^{h4:7} Efes 6:21-22 ^{i4:9} Flm 1:10,12

^{j4:10} Pol 19:29; 27:2; Flm 1:24; Pol 12:12,25; 13:13; 15:37-39; Flm 1:24

Siu xil, ngan xatel ak kestang di latopol vituei del inou tangan mavit usil lelatien na Hi e meulien na moletin xil. Vehakut, xatel di latdutou ni nou e di latpet rat nenemien navan.

¹²Epafras xa be tei e xamim e moletin te polien tei na Iesu Kristo, xi di bit 'bos makoe' mi xamim. Vehakut, xi di mikon ni sisen xil ve xamim. Xi di misis Hi tangan isak ni xamim musoh ixeh mu, neketen namim mei imatu kuhi, e mukil kuh naha xa Hi ien bei tangan ti mupol ni. ^{k13}Nakila nihiteni xa xi di pol nggeih tova tang tangan vatutou ni rin namim e rin na ngan xil mun te hal Laodisia e Hierapolis. ¹⁴Tokta Luk xa eheien navan di en, e Demas mun, lubit 'bos makoe' mi xamim. ¹

¹⁵Inou mun nabit 'bos makoe' bat mi tuxoli e hinoxoli xil xa ladi e Laodisia, e bat mi Nimfa e ngan xil xa di lasukul e tim san. ¹⁶Melele xa xamim mubuli uvei ak bus, ma musa ni sung mi ngan xil te sias te hal Laodisia tangan xil mun livuli. E xamim muvuli uvei xa natesa ni mi xil. ¹⁷E muhiteni mi Akipas muhit, "Upol sen polien xa Suv tesa ni minuk tangan upol ni." ^m

¹⁸*Tengan mupus kila xa inou vari iaxa natesa uvei ak bat mi xamim, inou Pol di nadis sepinien ak. Nabit 'bos makoe' mi xamim. Temim nabong ni sen te xeih xil ti xa di labar xat inou ni.* ⁿ

Di nasis tangan eheien hos na Hi iti mi xamim vus.

Sepinien xa diamu te

1 Tesalonaeka

?Visi iaxa tetis uvei ak?

Pol xa tehe eloheoh tei na Iesu Kristo tetis uvei ak^o

?Visi iaxa tevuli uvei ak tetiamu?

Pol tetis uvei ak teha mi Kristin xil xa lateti e taon te hal Tesalonaeka. E kakaoen xa tehe valu nen, Pol teha tehe taon te hal Pilipae e tehithiten longeon-gen hos usil Iesu Kristo mi moletin xil. E rut moletin xil latepol texeih mini e latelingi e nim te xeih. Melele xa teta e nim te xeih ak, lul telil. E melele xa latemaen ni ba ven temase,^p

Melele xa Pol tetuxoh taon te hal Korin, teta tetel Kristin xil e rute ak aveti tehe tol e le sav (18).^q E melele xa tepol e rute ak, Pol telonge xa neketen na Kristin hu xil te hal Tesalonaeka di mot. Misak ni, tetis uvei ak teha mi xil tangan vaped rat nenemien nae e vasuv xat neketen nae.

?Pol tetis uvei ak veneh?

Pol ien tehei tangan vamal ni nene-mien nae xa momal tangan Kristin xil ti lihisu ni melele te xeih xil - Kristin xil te hal Tesalonaeka latehisu ni melele te xeih xil e he mol-Tesalonaeka sav xil.^f **Pol ien tehei tangan vamal ni nene-mien nae usil polien nan** - Rut Kristin xil te hal Tesalonaeka lateseputut ni Pol latehit di miluvos moletin xil tangan ik-ila ileh holesok nae xil ra xil.^s

Pol ien tehei tangan vamal ni nene-mien nae usil mea rilomunen na Kristin xil e itep iaxa Iesu imei rilomun en - Kristin xil te hal Tesalonaeka latenemi latehit Iesu imei rilomun ite-manon. Ma melele xa rute xil latelel, latenexo.^t

Nenemien tei xa eilep te uvei ak de 1 Tesalonaeka 3:12-13

Matsis tangan Suv Iesu isak ni eheien xa di mupisen ni mi xamim mun mei imatu e ihe eilep mak mu ixoni hisit sexien xa eheien nametel di pupu e xamim. E matsis mun tangan isak ni nenemien namim mei ixehi tangan muhe eo e mumese pe met Hi Tamer melele xa Iesu, Suv nar, imei rilomun en itel moletin nan xil.

Nenemien teimun xa eilep te uvei ak de 1 Tesalonaeka 4:14

Xir rakila xa Iesu temat e temea rilomun ra maten. Misak ni, rake reitin mun xa melele xa Iesu imei rilomun en, Hi isak ni ngan xil xa latelel ngamu xa lateling nenesien nae en tangan livituei itel Iesu e ileh xil lihe ut nesao.

?Naha iaxa di e uvei ak?

1. Pol di memes Hi ve neketen na Kristin xil te hal Tesalonaeka. (1:1-10)

2. Pol bit usil polien nan del xil e midep iaxa di misis ve xil vehakut. (2:1-3:13)

3. Pol misel xat xil usil hisit sexien xil xa Hi besi xi ven. (4:1-12)

4. Pol bit kil mei rilomunen na Iesu mi xil. (4:13-5:11)

^o1:0 1Tes 1:1; 2:18; 1Tes 3:1-2; Pol 18:1-8; Pol 15:36-18:22 ^p1:0 Pol 16:16-40;

Pol 17:1-4; Pol 17:5-11 ^q1:0 Pol 18:11 ^f1:0 1Tes 2:14; 1Tes 2:14-16

^s1:0 1Tes 2:3; 1Tes 2:4-12 ^t1:0 1Tes 4:13; 1Tes 4:14-18; 1Tes 5:1-22

5. Sepinien kor. (5:12-28)

Sepkilaen na Pol usil uvei ak

1 Inou, *Pol*, del Saelas[‡] e Timoti, matdis uvei ak bat mi xamim, moletin xil na Hi Tata e Suv Iesu Kristo xa mudi e sias te hal Tesalonaeka. Di matsis tangan eheien hos e tomat na Hi iti e meulien namim. ^u

Pol memes Hi ve meulien hos e neketen na Kristin xil e hal Tesalonaeka

²Xametel di matomes Hi vehakut ve xamim vus, e vehakut di matonem usil xamim e sisen nametel. ^{v3}Melele xa matsis mi Hi Tamer ve rin namim, matonem xat neta xatel ak: midep iaxa neketen namim e Iesu Kristo di misak ni xamim mupol nggeih mi Hi, midep iaxa eheien namim mi xalu di misak ni xamim di mupol nggeih tangan mudutou ni mosav xil, e midep iaxa nenesien namim e mei rilomunen na Suv Iesu Kristo di misak ni xamim musokil e melele xa di mubisu ni melele te xeih xil. ^{w4}Tuxoli e hinoxoli nametel xil, matkila xa Hi ien bei xamim e tehosei xamim ngamu mubenan. ⁵Matkila xa Hi tehosei xamim venggan melele xa mattehur longeongen hos tehat visal xamim, longeongen hos ak tenamei ti vatel sepinien kestang. E temei tetel xat xeihen e tetel polien xil na *Ninin Eo* mun, e mukil kuh reitinen teni e melele xa mattesepin mi xamim. Mutepus kil sexien xil te meulien nameitel melele xa matteti visal xamim tangan mattutou ni xamim. ^x

⁶E xamim mutehusil sexien nametel e sexien na Suv Iesu. E tave ti neta xa

[‡]1:1 Saelas, hisen tei mun be Silvanus.

mutehisu ni longpangasien ven, mutehesi xamim tangan muvur xat sepinien na Hi xa Ninin Eo tesa ni mi xamim. ^{y7}Nggo sexien ak, xamim mei mutehe simelelen tei mi Kristin xil vus xa ladi e provins xalu te hal Masedonia e Akea tangan lakila lavusil sexien namim xil. ^{z8}Mutehithiten sepinien usil Suv Iesu mi mosav xil xa latehuri teha tetuxoh provins xalu ak, e teha tehe ut savsav xil mun. Reitin, longeongen usil neketen namim e Hi tesel teha texoni rae ameru tei xa mosav xil xa ladi sotin di lalonge. Misak ni, neta tovuol mun xa xametel matkila mathiteni usil neketen namim e Hi venggan xa moletin xil vus lakila ngamu. ^{a9}Reitin, moletin xil vus xa ladi sotin ra xamim e rute xil ak di labit usili xa tetep iaxa mutehur pilei xametel melele xa mattehat matteti mi xamim. Di lasep usili xa tetep iaxa mutehiles ra nanao xil e mei mumot mi Hi e mupol mini, ngan xa meul e be reitin. ^{b10}Di lasep usili xa tetep iaxa muteling neketen namim e Natneli xa Hi tesak ni temea rilomun ra maten. E lakila xa taxeak, di mudatil melele xa Iesu imei rilomun ixo ut nesao. Be xi iaxa isikoe xol xir ra pangasien xil xa di bemei ve ekaten te xeih na Hi ba xat tesaen xil.^c

Pol memes Hi venggan xa mol-Tesalonaeka xil di lapien ni xa neketen nae be reitin

2 Tuxoli e hinoxoli nametel xil, mukila xa melele xa mattehat matteti mi xamim, matnavat votei ti. E-e, huite teni teta en. ^{d2}Mukila xa melele xa mattehat visal xamim e hal Tesalonaeka, xametel mattexo taon te hal Pilipae matemei.

^u1:1 2Tes 1:1; Pol 17:1 ^v1:2 Plp 1:3-4; Kol 1:3; 2Tes 1:11

^w1:3 1Kor 13:13; Kol 1:4-5 ^x1:5 1Kor 2:4-5; 4:20

^y1:6 1Kor 4:16; 2Tes 3:9; Pol 17:5-9 ^z1:7 1Pit 5:3 ^a1:8 Rom 1:8

^b1:9 Pol 17:4 ^c1:10 Taet 2:13; Pol 17:31; 1Tes 5:9 ^d2:1 1Tes 1:5,9

E rute ak, xil latesak purun xametel e latepangei xametel. E melele xa mattehat visal xamim, tave ti neta xa rut moletin xil latepol ni texeih mi xametel, Hi nar tesa xeihen mi xametel tangan matohithiteni mi xamim longeongen hos xa nggo visali. ^e

³Melele xa mattetakes xamim tangan muvles meulien namim, sepinien name-tel huitte teta en, vengon xa tenaxo ti e nenemien xa tamal ti mu sexien xil xa lakavui. Reitin, matnasepin ti tangan maluvos ti moletin. ⁴E-e, xametel di matsepin vehakut ni naha taxa Hi ien bei tangan matsepin ni, vengon xa xi tepisen ni xa xi tehosei xamim e teling nenesien nan teti e xametel tangan matkila mathithiten longeongen hos nan mi moletin xil. Ma, melele xa di matsepin, matnapol ni ti tangan moletin xil lavesi xil ve xametel. E-e. Di mattepol ni tangan Hi kestang xa mikil nenemien e eheien nar xil mikila ihesi xi ven. ⁵Xamim mukil kuhi xa melele xa mattehat visal xamim, matnavat ti vatel sepinien tova xa vakas tangan valihi nenemien namim, e matnapol xusus ni ti neta tangan matoleh mani namim vaxo en vaxoni ho mani tei. Hi xa mikil nenemien nar mikila xa naha xa di matbiteni xiak be reitin. ⁶Matnamei ti tangan xamim mu mosav xil ti mumes xametel ven. ⁷Tave ti neta xa Iesu Kristo teling xamem mabe **eloheoh** xil e vat na Kristin xil, e makila masemae ni xamim tangan mumerere ni xamem mu musa neta ngan mi xamem, e xamem matnapol ni ti vamak. E-e, melele xa mateti visal xamim, sexien nametel temerou tang texoni atou tei xa di milaxat kuh horamue nan xil. ⁸Vengon xa eheien nametel di e xamim, mattehesi xametel tangan matsa longeongen

hos xa nggo visal Hi mi xamim, e mattehesi xametel tangan matsa tutouen mi xamim e suse xil vus xa matkila matopol ni. !Reitin, eheien nametel di pupu e xamim! ⁹Tuxoli e hinoxoli nametel xil, munem rilomun usil sexien nametel e melele xa matteti visal xamim. Munem rilomun ni tetep iaxa mattepol texeih tetel hemetel melengien e vongien, e vetin nametel teleh tehe holu tangan matokamet ti mani vaxo en xa vapin tangan matokila matoxal rat naha xa iemetel tehei. Temak iaxa matnasa ti polien te meas mi xamim e melele xa mateti visal xamim e mattehithiten longeongen hos xa nggo visal Hi mi xamim. ⁱ

¹⁰Melele xa mateti visal xamim xa muke reitin e Iesu, mutepus kila xa sexien nametel temese, temal tevi, e neta tovuol vasa en. E Hi mun, xa mikil holesok xil vus, tepus kila. ¹¹Xamim mukila xa xamem matepol tehos mi xamim kekes texoni ngan taxa tata tei di milaxat kuh horamue nan xil. ¹²Reitin, matte-sel xat xamim, mattetutou ni xamim xa mutekameti texeih, e mattetakes xamim tangan mukakao ihusil sexien xa Hi ihesi xi ven. Vengon Hi tekes xamim tangan muve moletin nan xil e muti e lelatien e minehinen te xeihen nan. ^j

¹³Di matomes Hi vehakut ve neta teimun e melele xa di matsis ve xamim. Melele xa matehur sepinien na Hi tehat mi xamim, mutelonge e mutehur xati teti e xamim. Mutnahur xati ti vaxoni ngan xa tehe sepinien na moletin xil tang. E-e. Mutehur xati texoni ngan xa be sepinien na Hi vari tang. Reitin, be sepinien nan iaxa di pol e xamim vus xa di muneket. ^{k14}Tuxoli e hinoxoli nametel xil, sakpurunien xa testal mi xamim nggoni ngan taxa di testal mi moletin

^e2:2 Pol 16:19-24; 17:1-5 ^f2:4 1Tim 1:11; Kal 1:10; Ser 11:20 ^g2:5 Pol 20:33; 2Pit 2:3; 1Tes 2:10 ^h2:6 Sion 5:41,44 ⁱ2:9 Pol 20:34; 1Kor 4:12 ^j2:12 Efes 4:1; Plp 1:27; 2Tes 1:5; 1Pit 5:10 ^k2:13 1Tes 1:2; 2Tes 2:13; Kal 1:11-12

xil na Iesu Kristo xa ladi e sias na Hi e provins te hal Sudea. Ngan ak reitin venggan xa melele xa xamim mun muteke reitin e sepinien na Hi, moletin namim xil tang te hal Kris latemea latesak purun xamim. E sakpurunien ak texoni ngan taxa tua namem xil latehuri texo moletin nae xil mun xa labe **Siu** xil te provins te hal Sudea. ¹¹⁵E tehe Siu xil ak vari iaxa latehas vin **provet** xil tetiamu, xa latemea latehas vin Suv Iesu e latehol tetasil ni xamem ra tan nae. Ve sexien ak, xil di lalihi pangasien te ekaten na Hi bemei e xil. E lapisen ni xa labe elu mi moletin xil vus ^{m16}e melele xa lasak pisi tangan lasikoe xol xamem munasepin ti mun mi ngan xil xa latave Siu ti. Iexil ti tavei tangan masep usil suse xa Hi iteh meulien e ngan xil xa latave Siu ti ra **tesaen** nae xil. Nggo suse ak, xil di laso viton pangasien ve tesaen nae xil ba vuma ... be holu pupu ngamu. Ma mei laduxoh hoxalite teni tuei xa ti lipus ekaten te xeih na Hi. ⁿ

Pol ien bei tangan vaha vapus mol-Tesalonaeka xil vatei mun

¹⁷E melele xa moletin xil latexeih xat xamem tangan mave reling xamim vahe vuteili tang, tuxoli e hinoxoli nametel xil, matelonge texoni ngan xa matehe timaru xil e iemetel tehei pupu tangan matotilomun matohat matopus xamim vatei mun. E tave ti neta xa tenbemetel di sotin ra xamim, nenemien nametel di visal xamim vehakut. ^{o18}Reitin, iemetel bei tangan matotilomun matohat visal xamim e **Temat** tesikoe xol suse nametel. Inou, **Pol**, natesak pisi tangan natilomun namat visal xamim melele holu. ¹⁹?Matohat matopus xamim mun veneh? Venggan xa matopolu ni sien ve xamim ven-

gan xa mube huit polien nametel. E matonesi xa matkila matsep koai pe met Iesu Kristo ve neketen namim e melele xa imei rilomun. ^{p20}!Be reitin, xametel di matobut xametel del sien ve neketen namim!

3 Misak ni, melele xa nenexoen ve xamim mei texeih pupu e xametel, mattenemi mattehiti bos tangan inou xamel Saelas malitit e taon te hal Athens, ^{q2}e matesil Timoti tehat visal xamim tangan vatutou ni xamim e vasak ni neketen namim mei vaxeih mu. Xi be tua namel xa di pol vituei del xamel e polien na Hi xa di matbithiten longeongen hos usil Iesu Kristo mi moletin xil. ^{r3}Xamel matesila tehat visal xamim tangan vasak ni xamim munamot ti e neketen namim ve sakpurunien xil xa di bemei mi xamim. Reitin, xamim mukila xa Hi teling xati tangan ti rihur sakpurunien xil ak e meulien nar. ^{s4}Vengan melele xa matteti tamu visal xamim, mattehiti kila mi xamim xa ti rihur sakpurunien xil. E nggoni ngan xa mukila ngamu, holesok xil vus xa testal tehusil naha xa mattehiteni. ^{t5}Ma melele xa natnahur ti mu longeongen tova, natenexo pupu ve xamim. Ma natesil Timoti tehat tangan wakil ti xa neketen namim da midep. !Uluk tekan xa Temat xa di misak pis moletin xil nasak pis xamim tangan munahe reling suse xa momal e napol ni polien nametel mei nahe neta sav tang!
^u

Pol besi pupu ni xi ve longeongen usil sexien hos na mol-Tesalonaeka xil

⁶Ma Timoti xa tehat visal xamim, xosali, dilomun bemei visal xamel. E xi nggur longeongen hos bemei visal xamel usil neketen e eheien namim. Xi biteni

^{l2:14} Pol 17:5 ^{m2:15} Pol 2:23; 7:52 ^{n2:16} Sen 15:16; Mat 23:32-33

^{o2:17} 1Tes 3:10 ^{p2:19} Plp 2:16; 4:1; 2Tes 1:4 ^{q3:1} Pol 17:15

^{r3:2} Pol 16:1-3 ^{s3:3} Efes 3:13; 2Tim 3:12 ^{t3:4} Pol 14:22 ^{u3:5} Plp 2:16

mi xamel bit, vehakut, di munem kuh xametil, e iemim bei tangan mupus ti xametil nggoni ngan taxa iemetel bei pupu tangan matopus ti xamim mun. ^{v7}Ma, tuxoli e hinoxoli nametil xil, tave ti neta xa di matnggur longpangasien e sakpurunien xil holu, longeongen ak usil neketen namim di pet rat nenemien nametil holu. ^{w8}Reitin, melele xa matlongeong ni xa di tamu musoh nggeih e neketen namim e Suv Iesu, matlonge bos rilomun e meulien nametil. ⁹Xametil matsakras matomes Hi vapin ve rin namim, e matopolu ni sien xa eilep pupu pe meten ve xamim. ¹⁰Melengien xil e vongien xil, di matsis nggeih mi Hi tangan vamaen xametil matohat matopus rilomun ni valnaomim e matosa ti pispisien xil mi xamim xa mutnahuri ti mu tangan vatutou ni neketen namim.

¹¹Matsis tangan Hi Tamer e Iesu, Suv nar, lalisak mesen suse nametil tangan matilomun matihat visal xamim. ¹²Matsis tangan Suv Iesu isak ni eheien xa di mupisen ni mi xamim mun mei imatu e ihe eilep mak mu ixoni hisit sexien xa eheien nametil di pupu e xamim. ¹³E matsis mun tangan isak ni nene-mien namim mei ixehi tangan muhe eo e mumese pe met Hi Tamer melele xa Iesu, Suv nar, imei rilomun en itel moletin nan xil.^x

Pol misel xat Kristin xil tangan liti e hisit meulien tei xa Hi ihesi xi ven

4 Mak ma, tuxoli e hinoxoli nametil xil, xametil mattepispisi mi xamim ni sexien hos xil xa Hi ihesi xi tangan muhusili, xa di tuei mupol ni. E xosali, di matdakes xamim li e matsemæ ni e

his Suv Iesu tangan mei mupol ni ihos pilei mu. ^{y2}Muhusil kuh pispisien xil xa matesa ni vengæn xa xamim mukila xa xametil di matsepin e his Suv Iesu.

³Hi ien bei pupu tangan vasak ni xamim mei muve eo. Misak ni, muhe sotin ra sexien tesa xa tiramul mu atou xil di lapat vituei del ngan xil xa latateli ti vatel xil. ^{z4}Reitin, ien bei pupu tangan xamim kekes ixuxou kuhi tangan sexien xil xa di pol ni del tenben lihe eo pe meten e limal pe met moletin sav tangan limerere ni xamim ven. ^{a5}Hi ien ti tavei tangan mumaen nenemien te hoæsoen valihi xamim tangan vasak ni mupol vasa vatel moletin sav vaxoni ngan xa Sentael xil xa latakil ti Hi di lapol ni. ^{b6}Ve rin ak, ti e xamim napol nasa natel tuneli mu hineli tei e neketen, mu napurrun rin nan ti naxo en. Vengæn, nggoni ngan xa mattehiteni mi xamim ngamu e mattedesel xat xamim texeih ni, Suv Iesu isa rilomun ni pangasien mi ngan xil xa di lapol ni hisit tesaen xil ak ^{c7}Vengæn xa Hi tenakes xir ti tangan ti rapol ni hisit tesaen xil ak. E-e, xi ien bei tangan rihe eo e ripol ni sexien xil xa imese tevi. ^{d8}Ve rin ak, xosxa moletin tei di misin pispisien xil ak, ma xi tasin ti moletin tova. E-e, xi di misin vari ni Hi xa di misa **Ninin Eo** nan mi xamim. ^e

⁹Xamim mukil kuh sexien ngamu xa di mupisen eheien mi tuemim e hine-mim xil vengæn xa Hi tepispisi ni tuei mi xamim. Mak, ma tave tangan ti mun xa mattis mi xamim usili. ^{f10}Be reitin xa xamim di tuei mupisen eheien mi tuemim e hinemim xil xa labe Kristin xa ladi e provins namim te hal Masedonia. E xamim xa eheien nametil di e xamim,

^{v3:6} Pol 18:5 ^{w3:7} 2Tes 1:4 ^{x3:13} Plp 1:10; Sak 14:5; 2Tes 1:7,10

^{y4:1} 2Tes 3:6 ^{z4:3} 1Tes 5:23; Hib 10:10; 1Pit 1:16 ^{a4:4} 1Kor 6:13,15

^{b4:5} Sam 79:6; Ser 10:25 ^{c4:6} Sam 94:1 ^{d4:7} 2Tes 2:13-14; 1Pit 1:15-16

^{e4:8} Luk 10:16; Esek 36:37; 37:14; Rom 5:5; 2Kor 1:22; Kal 4:6; 1Sion 3:24

^{f4:9} Sion 13:34; Ser 31:33-34

matdakes xamim tangan mupol ni rin ak ixehi pilei mu. ⁸

¹¹E matdakes xamim tangan muling nenemien namim ixehi tangan mupol ni sexien xatel ak: muti e tomat itel xat moletin sav xil; munatup ngomim ti nahe rin na mosav xil; e mupol ixehi e polien namim xil tangan mulaxat kuh ngene-nim xil. Neta xatel ak nggoni ngan taxa mattehiteni mi xamim e melele xa mat-teti visal xamim tetiamu. ^{h12}Ixo suse ak, xamim munatati ti mosav xil tangan mei lisa tutouen mi xamim, e sexien namim mi ngan xil xa latave Kristin ti imal e isak ni xil limerere ni xamim ven. ⁱ

Pol bit lelen naha xa istal e melele xa Suv Iesu imei rilomun en

¹³Tuxoli e hinoxoli nametel xil, iemetel bei tangan mukil reitinen usil naha xa istal mi tuemim e hinemim xil xa latelel ngamu tangan munatang ti ven naxoni ngan xil xa nenesien nae tovuol, xa latake reitin ti e mea rilomunen. ^{j14}Xir rakila xa Iesu temat e teme a rilomun ra maten. Misak ni, rake reitin mun xa melele xa Iesu imei rilomun en, Hi isak ni ngan xil xa latelel ngamu xa lateling nenesien nae en tangan livituei itel Iesu e ileh xil lihe ut nesao. ^{k15}Naha xa di mapispisi ni mi xamim tehe pispisien na Suv Iesu vari tang. Xi tehiteni xa xir xa rimeul tamu riti e melele xa imei rilomun en, rinatiamu ni ngan xil ti xa lalel ngamu e melele xa xir vus rihe ut nesao. ^{l16}E-e, istal imak. Suv Iesu vari imei etan ixo ut nesao e ikei ixehi ihe nesao. E, e melele nen tak, vatixar tei na masxaxa xil ikei ihe nesao e masxaxa tei ihui

amaru na Hi. Ti, ngan xil xa lalel ngamu xa lateling nenesien nae e Iesu Kristo, xil limea ra maten itiamu. ^{m17}Ti, xir xa rimeul tamu riti e melele nen ak, rimeivituei itel xil e ut tei takes e momah xil te tilang hat nesao tangan ha rihisu mi Suv Iesu. Ma, e melele nen ak iha, xir riti visal Suv Iesu vehakut xa vehakut tang. ⁿ¹⁸Ma tit mupet rat nenemien namim mun tang itel sepinien xil ak.

Pol misel xat Kristin xil tangan livue xat meulien nae ve mei rilomunen na Iesu Kristo

5 Tuxoli e hinoxoli nametel xil, matnatis ti mun navat mi xamim usil melele xil xa holesok xil ak mei listal en, ^{o2}vengan xa mukil kuhi xa melengien te mei rilomunen na Suv Iesu isak ni moletin xil litemanin ni ixoni ngan taxa latemanin ni moletin te kanen tei xa bemei e vongien. ^{p3}Reitin, e melele nen ak, moletin xil ti lihithiteni lihithi, "Tomat di e ut ngasen e xir radi e hosien." !E vatakes, litemanin e Hi isa pangasien tei xa eilep mei ipurun xil e lisakras lilesae rani! Io, xil litemanin ni longpangasien ak ixoni ngan taxa atou tei mitemanin ni longpangasien xa bemei en e melele xa di miling tuvava nan. ^q

⁴E xamim, tuxoli e hinoxoli nametel xil, mutari ti e maluxoluken. Mukil kuh naha xa mei istal. Ma munatemanin ni melele ak ti naxoni melele xa moletin te kanen bemei. ⁵Munatemanin ni ti venggan xa xamim vus mube horamue xil na Hi e di mukakao e miehen te melengien. Xir ratave moletin xil ti xa di rakakao e maluxoluken te vongien. ^{r6}Mak, ma

⁸4:10 2Tes 3:4 ^h4:11 Efes 4:28; 2Tes 3:8,12 ⁱ4:12 1Kor 5:12-13; Kol 4:5

^j4:13 Efes 2:12 ^k4:14 Rom 14:9; 1Kor 15:3-4,12

^l4:15 1Kor 7:10,25; 15:51 ^m4:16 1Tes 1:10; 2Tes 1:7; 1Kor 15:52

ⁿ4:17 Sion 12:26; 17:24 ^o5:1 Mat 24:36

^p5:2 Mat 24:42-44; Luk 12:39-40; 2Pit 3:10; Rev 3:3; 16:15 ^q5:3 Ser 6:14; 8:11;

Esek 13:10; Mat 24:39; Luk 21:34-35; Sion 16:21-22 ^r5:5 Rom 13:12; Efes 5:9

xir rinapat ti naxoni moletin sav xil. Vehakut, riketeh kuhi e rixuxou kuhi ve sexien nar xil tangan ihusil nenemien xil xa momal. ⁷Vengan xa vongien be melele xa moletin xil di lapat, vongien be melele xa moletin xil di lamun. ⁸E vengan xa xir rabe moletin xil te miehien, sexien nar xil ihusil nenemien xil xa momal. E neketen nar, ripol ni ixoni ngan xa rabe moletin xil te vaean na Iesu Kristo. Rising xol kuh xir ni neketen e eheien ixoni eising te vaean xa isikoe xol valhasexir. E nenesien xa Hi iteh meulien e xir, rising xol xir ni ixoni neta xa di misikoe xol vatixir. ⁹Ripol ni imak venggan melele xa Hi tehosei xir, tenave ti tangan ravur pangasien te ekaten nan. E-e. Xi tehosei xir tangan vateh meulien e xir nggo Iesu Kristo, Suv nar. ¹⁰Xi temat tehinat rin nar tangan rikila ha riti vituei itela e melele xa imei rilomun en, tave ti neta xa xir rimeul tamu riti mu rilel ngamu. ¹¹Mak, ma mupet rat nenemien namim xil e mututou ni xamim mei mumatu kuhi mu e neketen namim ixoni ngan taxa di tuei mupol ni. ^v

Selxatien kor

¹²Tuxoli e hinoxoli nametel xil, xamete del di matdakes xamim tangan mumerere kuhi mi ngan xil xa Suv Iesu teling xil tangan lihe vat namim xil, xa di lapol ve rin namim e di lasel xat xamim. ^{w13}Mumerere kuhi ve xil ixo sexien te eheien ve polien xa di lapol ni. E muti e tomat itel xamim mun tang.

¹⁴Tuxoli e hinoxoli nametel xil, xamete del di matdakes xamim tangan musel xat

homah xil, mupet rat nenemien na ngan xil xa ulixil di mikan, mututou ni ngan xil xa lamerou e neketen nae, e mupol ni nenemien namim mei ihe teviei mu tangan iemim naxat mosav xil ti nate-manon. ^{x15}Muxuxou kuhi tangan ti e xamim nasa xoles sexien xa misa nava mi ngan xil xa di lapol ni sexien xa misa mi xamim. E melele xil vus, musak pisi tangan mupol ni naha xa bos mi xamim mun tang e mi mosav xil mun. ^y

¹⁶Muhesi xamim vehakut, ^{z17}mutit ni sisen, ^{a18}e mumes Hi ve holesok xil xa di bemei ve xamim, tave ti neta xa bos mu misa. Hi ien bei mak mu xa mupol ni sexien xatel ak venggan xa di mubisti del Iesu Kristo. ^b

¹⁹Munasikoe xol polien na **Ninin Eo** ti. ^{c20}Ma melele xa Hi di misa sepinienggo moletin tei nan, munasin ni ti. ^{d21}Ihos mak mu tangan mulepis sepinieng xil vus xa di bemei: ngan xa bos, muhur xati, ^{e22}e naha xa misa, musin ni. ^f

²³Di matsis tangan Hi xa di misa tomat mi xir isak ni xamim mei muhe eo tevi. Reitin, matsis tangan Hi isak ni ninin namim, nenemien namim, e tenbemim mei imese tevi ra tesaen xil vus. Imak, ma melengien xa Hi ilepis rin na moletin xil vus e melele xa Iesu Kristo imei rilomun en, nakamet ti neta xa nasa e rin namim. ^{g24}Hi xa tekes xamim tangan muve nan di pol sen holesok xil xa di biteni, e xi isak ni holesok xil ak mei istal ihe reitin. ^h

²⁵Tuxoli e hinoxoli nametel xil xa eheien nametel di e xamim, xamim mun musis ve xamete. ⁱ

^{5:8} Aes 59:17; Efes 6:14,17 ^{5:9} 1Tes 1:10; 2Tes 2:14

^{5:10} Rom 14:8-9; 1Tes 4:14 ^{5:11} Siud 1:20

^{5:12} 1Kor 16:18; 1Tim 5:17 ^{5:14} 2Tes 3:6,11,15

^{5:15} Pro 20:22; Rom 12:17; 1Pit 3:9 ^{5:16} Plp 4:4

^{5:17} Luk 18:1; Rom 12:12; Kol 4:2 ^{5:18} Efes 5:20 ^{5:19} Efes 4:30

^{5:20} 1Kor 14:1,39 ^{5:21} 1Sion 4:1 ^{5:22} Siob 1:1,8; 2:3

^{5:23} Rom 15:33; 2Tes 3:16 ^{5:24} 1Kor 1:9; 2Tes 3:3 ^{5:25} 2Tes 3:1

²⁶Xametel matobit 'bos makoe' name-
tel bat mi xamim, tuxoli e hinoxoli
nametel xil e neketen. E musa hemim
metu^f te eheien eo na Hi mi xamim mun
e rin nametel. ^{j27}Inou, Pol, di nasemae

ni mi xamim e his Suv Iesu tangan mu-
vuli uvei ak mi Kristin xil vus inggaxai.

²⁸Matsis tangan eheien hos na Iesu
Kristo, Suv nar, iti mi xamim vus.

^f5:26 Sepinien xati tehit, "*mupesum ni vemim ixo sexien xa be eo,*" vengan xa ngan
ak tehe sexien xa Siu xil latepol ni e melele xa latehisu ni xil.

^j5:26 Rom 16:16; 1Kor 16:20

Sepinien xa diamu te

2 Tesalonaeka

?Visi iaxa tetis uvei ak?

Pol, eloheoh tei na Iesu Kristo, iaxa tetis uvei ak^k sangas ni huram hanutap lu e lu e le tei mun AD (huram 52 tetutou ni poten na Iesu Kristo) e melele xa di tamu tepispisi mi Kristin xil e taon te hal Korin.

?Visi iaxa tevuli uvei ak tetiamu?

Pol tetis sepinien ak teha mi Kristin xil xa lateti e taon te hal Tesalonaeka. Moletin xil holu latenemi latehit melele xa Timoti tesa uvei te 1 Tesalonaeka mi xil e tetilomun tehe visal Pol, Pol tetis uvei ak sung mi xil xa tesep usil holesok xil xa texoni ngan taxa tete uvei nan tetiamu.

?Pol tetis uvei ak veneh?

Pol ien tehei tangan vasel xat xil tangan lisoh ixeih e sakpurunien xil xa di bemei e xil - Kristin xil te hal Tesalonaeka di tamu latehur sakpurunien xil ve neketen nae.¹

Pol ien tehei tangan vama ni nenemien nae usil naha xa istal e Melengien Kor xil - Kristin xil te hal Tesalonaeka latnakil kuh ti naha xa istal e Melengien Kor xil, e e melele xa Iesu imei rilomun en. Ma Pol tehit lelen ni mi xil xa, e Melengien Kor xil, moletin xil mei liluvos lihit xil labe Kristo na Hi.^m

Nenemien tei xa eilep te uvei ak de 2 Tesalonaeka 2:1-2

Tuxoli e hinoxoli nametel xil, imeitel bei tangan matsepin mi xamim usil melele xa Iesu Kristo, Suv nar, imei rilomun en e ileh viton xir tangan ha riti visali. Matdakes xamim li, tangan munanexo ti e munatemanin ni ti sepinien te luvosen xa bit Suv Iesu teme rilomun ngamu. Tave ti neta xosxa moletin tei bit nggur longeongen ak nggo Ninin Eo, mu nggo moletin tova, mu nggo uvei tei nametel, munake reitin ti en.

Nenemien teimun xa eilep te uvei ak de 2 Tesalonaeka 3:5

Matsis tangan Suv Iesu itel xat xamim ha ituxoh melele xa mukil kuh eheien na Hi e isak ni xamim mei musoh ixeih e neketen namim ixoni ngan xa Iesu Kristo mun tepol ni.

?Naha iaxa di e uvei ak?

1. Pol pet rat nenemien na Kristin xil te hal Tesalonaeka ve sakpurunien xil xa di langguri. (1:1-12)
2. Pol pispisi mi xil usil melele xa Iesu imei rilomun en. (2:1-17)
3. Pol misel xat xil usil sexien hos xil xa momal tangan ti lihusili. (3:1-18)

Sepkilaen na Pol usil uvei ak

1 Inou *Pol*, del Saelas^s xal Timoti, matdis uvei ak mi xamim, moletin xil na Hi Tamer e na Suv Iesu Kristo xa mudi e sias te hal Tesalonaeka. ⁿ²Matsis mi Hi Tamer e mi Suv Iesu Kristo tangan lalisa eheien hos e tomat nalu mei iti e meulien namim. ^o

[§]1:1 Saelas, hisen tei mun be Silvanus.

^k1:0 2Tes 1:1 ^l1:0 2Tes 2:4; 2Tes 1:5-12

^m1:0 2Tes 2:3-12; 2Tes 1:5-10

ⁿ1:1 1Tes 1:1 ^o1:2 Rom 1:7

**Pol bit kila xa melele
xa Iesu imei rilomun en,
ilepis rin na moletin xil vus**

³Tuxoli e hinoxoli nametel xil, ve-hakut di matomes Hi ve xamim. E momal tangan matopol ni vamak vengana xa neketen namim di bemei nggeih mu e xamim kekes di mupisen eheien mak mu mi xamim mun tang. ^{p4}Mak, ma xametel di matsep koai usil xamim mi Kristin xil e sias xil vus na Hi. Mattumul mi xil usil rin xa di musoh nggeih e neketen namim, tave ti neta xa di munggur sakpurunien e pangasien xil holu. ^q

⁵Melele xa di musoh nggeih e neketen namim mak, di mupisen ni xa nenemien xil na Hi momal tevi melele xa di maen xamim mubisu ni holesok xil ak tangan vasak ni xamim mupin tangan muve moletin xil xa mudi pe lelatatien nan. E di mubisu ni longpangasien xil ak vengana xa mube nan. ^{r6}Hi momal, e isa rilomun ni pangasien mi ngan xil xa di lasa pangasien mi xamim. ^{s7}E isa ngengelen mi xamim xa di munggur pangasien e mi xamem mun. Ipol ni e melele xa Suv Iesu istal ixo ut nesao imei itel *maxxaxa* te xeih nan xil. ^{t8}Xil limei etan itel upang te xeih tangan lisa pangasien mi ngan xil xa labit linakil ti Hi e mi ngan xil xa labit linalong xat ti longgeongen hos usil Suv Iesu. ^{u9}Melele xa Hi ilepis rin nae ivus, isa pangasien xa misakras vavus mi xil. Imak, ma xil liti sotin ra minehinen te xeihen na Suv Iesu vehakut xa vehakut tang. ^{v10}Holesok xil ak mei listal e melele xa Iesu imei rilomun en tangan moletin nan xil lipet rat hisen ihe nesao. Reitin, ngan xil xa lateling neketen nae

en lipusi e limesep ve minehinen nan. E xamim mun muti vituei itel moletin nan xil ak vengana xa muteke reitin e sepinien xa mattehiteni mi xamim. ^w

¹¹E vengana xa iemetel bei pupu tangan xamim muti vituei itel moletin xil ak, di matsis mi Hi nar ve rin namim tangan ipol ni xamim mupin tangan muhur meulien xa tekes xamim tangan muhuri. Matsis mun xa, ixo xeihen nan, xi isak ni xamim mukila mupol sen holesok xil xa bos xa ien bei tangan mupol ni vengana xa muteling neketen namim e Iesu Kristo. ^{x12}Di matsis ve holesok xil ak tangan ngan xil xa di lapus naha xa Suv Iesu di pol ni e meulien namim lipetrat hisen ven. E xi sung ipet rat hisemim. Matkila xa holesok xil ak istal ihusil eheien hos na Hi nar e na Suv Iesu Kristo.^y

**Pol bit lelen naha xa ipisen
kila iaxa mei rilomun na
Iesu Kristo di bemei sangas**

2 Tuxoli e hinoxoli nametel xil, iemetel bei tangan matsepin mi xamim usil melele xa Iesu Kristo, Suv nar, imei rilomun en e ileh viton xir tangan hari visi. Matdakes xamim li, ^{z2}tangan munanexo ti e munatemanin ni ti ve sepinien te luvoson xa bit Suv Iesu teme rilomun ngamu. Tave ti neta xosxa moletin tei bit nggur longgeongen ak nggo Ninin Eo, mu nggo moletin tova, mu nggo uvei tei nametel, munake reitin ti en. ³⁻⁴Reitin, munamaen ti moletin namei naluvos xamim ni sepinien nan, vengana melele xa Suv Iesu imei rilomun en mei itutou ni melele xa moletin xil likavitou ni Hi e livae itela, e moletin xa di misin rae xil na Hi mei istal. Xi isepin

P1:3 1Tes 1:2; 2Tes 2:13 **q1:4** 2Kor 7:4; 1Tes 2:19; Rev 1:9 **r1:5** Plp 1:28; Luk 20:35; 1Tes 2:12 **s1:6** Rom 12:19; Rev 18:6,7 **t1:7** Sak 14:5; Mat 25:31; 1Tes 3:13; 4:16 **u1:8** Sam 79:6; Aes 66:15; Ser 10:25; Rom 2:8; 1Pit 4:17 **v1:9** Aes 2:10,19,21 **w1:10** Sam 88:8; Aes 49:3; Kol 3:4; 1Tes 3:13; Sam 67:3-6
x1:11 Kol 1:9 **y1:12** Aes 24:15; 66:5; Mal 1:11 **z2:1** 1Tes 4:13-17

iha xat holesok xil xa moletin xil di lamot mi xil e labit labe hi nae xil. Xi ipo xi mei ihe nesao ili xil vus. E ngan xa isa mak mu iaxa xi ha itotan ite vangit **Nim Eo** na Hi e ithitheni xa xi be Hi reitin. E mukila xa Hi teling xati ngamu xa moletin ak ha ihe Upang.^{a 5} ?Midep vari? ?Iemim bovorong ni xa natesep usil holesok xil ak ngamu e melele xa nateta tamu visal xamim?

⁶E xosali, mukila xa Hi teling neta tei xa di misikoe xol moletin ak tangan nastal ti mu, vangan xa Hi teling xat melengien ngamu xa imaen moletin ak istal en. ⁷E rapusi be reitin xa ngan xa di misak ni moletin xil di lasin rae xil na Hi di tuei pol xuxus. E Hi teling neta tei xa bar xati ituxoh melele xa teling xati tangan ha ven imase rilomun. ⁸E melele xa imaen ni iha, moletin xa di misin rae xil na Hi mei istal. E melele xa Suv Iesu Kristo imei rilomun, minehinen te xeihen nan isak ni tenbe moletin ak imel ve ulikanen. Iesu ihui tang e moletin ak imat vari. ^b

⁹E itiamu ni melele xa Iesu Kristo istal en, **Temat** isa xeihen mi moletin ak xa di misin rae xil tangan isak ni ikila iluvos moletin xil ixo merikel xil e neta xil mun xa tellep xa xil litemanin ni. ^{c10}Reitin, ixo suse xil holu, xi iluvos moletin xil vus xa ladi e suse tangan ha lihur pangasien xa misakras vavus. Xil lihur pangasien ak vangan xa iexil ti tavei tangan laling eheien nae e sepinien te reitinen xa mikila vateh meulien e xil. ¹¹Imak, ma Hi isa nenemien tei xa isak ni moletin xil linem ras reitinen tangan moletin ak mei iluvos xil e isak ni xil mei lineket e luvosen ak. ^{d12}Imak, ma melele xa Hi ilepis rin na moletin xil, isa pan-

gasien mi ngan xil vus xa latake reitin ti e sepinien te reitinen usil Iesu Kristo e iexil bei tesaen mak mu.

Hi tehosei Kristin xil tangan lihur meulien

^{13e14}Hi tekes xamim texo longeongen hos xa mattehithiten mi xamim tangan mukila mumos e minehinen te xeihen na Iesu Kristo, Suv nar. ¹⁵Ma, tuxoli e hinoxoli nametel xil, musoh ixeih e neketen namim e muteli ixeih e holesok xil xa mattepispisi ni mi xamim texo sepinien mu uvei nametel.

¹⁶Eheien na Hi Tamer de xir, e nggo eheien hos nan, xi ti isak ni tinexir mei ihos vehakut xa vehakut, e ti isak ni nenesien nar en mei ixeih mu. E matsis tangan Iesu Kristo, Suv nar, xal Hi Tamer ¹⁷lalisak ni nenemien namim mei ihos e lalisa xeihen mi xamim tangan kakaoen namim e sepinien namim xil vus imal tevi.

Pol ien bei tangan Kristin xil lisis ve polien nan

3 Ma, tuxoli e hinoxoli nametel xil, ieok bei tangan musis li ve xametel tangan sepinien na Hi ikila iloh itemanon ihe rute xil vus, e moletin xil xa lilonge liteli en e limerere ni ixoni ngan xa xamim mutepol ni. ^{f2}Musis mun tangan Hi isikoe xol xametel ra moletin tesa xil xa sexien nae xil mikavui. Xil di lasak tangan lapurun xametel vangan xa xil holu latake reitin ti e longeongen hos ak.

³E munem xati xa Hi pipin tangan muling nenesien namim en. Xi isak ni xamim muxeih mak mu e isikoe xol xamim tangan Temat xa be vatit tesaen misakras vapurun xamim. ^{g4}E vangan xa

^{a2:3-4} 1Tim 4:1; Sion 17:12; Dan 11:36; Esek 28:2 ^{b2:8} Siob 4:9; Aes 11:4; Rev 19:15 ^{c2:9} Mat 24:24; Rev 13:11-13 ^{d2:11} 2Tim 4:4

^{e2:13} 1Tes 1:2; 2Tes 1:3; Dut 33:12; Sion 15:16; Efes 1:4; 1Tes 4:7; 5:9

^{f3:1} Kol 4:3; 1Tes 5:25 ^{g3:3} 1Kor 1:9; 1Tes 5:24

di munggul xat kuh Suv Iesu, matkil kuhi xa di mulong xat naha xa matte-se-mae ni mi xamim ngamu, e ti mupol sen naha xa di matbiteni e uvei ak. ^h

⁵Matsis tangan Suv Iesu itel xat xamim ha ituxoh melele xa mukil kuh eheien na Hi e isak ni xamim mei musoh ixeh e neketen namim ixoni ngan xa Iesu Kristo mun tepol ni.

Pol misel xat Kristin xil tangan linave homah ti

⁶Tuxoli e hinoxoli nametel xil li, di matsemae ni mi xamim e his Iesu Kristo, Suv nar, tangan munamos ti natel ngan xil te sias xa labe homah xil, xa di latahusil sexien ti xa mattesa ni mi xil. ¹⁷Xamim mukil kuh sexien nametel xa matnave homah xil ti melele xa mateti visal xamim, ma momal tangan muhusil xat sexien nametel ak. ¹⁸Anien xil vus xa mattea ni mattexale. Matepol te xeh e vetin nametel teleh tehe holu. Melengien xil e vongien xil di mattepol texeh tetel hemem tangan matokamet mani xa vapi ve meulien nametel tangan matnapol ni ti nameas mi xamim. ¹⁹Tave ti neta xa matkila matsis tutouen mi xamim veng-an xa matbe eloheoh xil na Iesu, matnapol ni ti. Matnapol ni ti veng-an xa iemetel tehei tangan matopisen sexien te meulien xa xamim mukila muhusili. ¹⁰Vengan, melele xa matteti tamu visal xamim, munem xati xa matte-se-mae ni

mi xamim mattehit, “Xosxa moletin tova di misin ni tangan ti vapol, ma munasa ti anien mini.” ^m

¹¹Matobit rilomun ni sepinien ak veng-an mattehur longeongen xa rute e xamim labe homah xil tang. Latapol ti, e dit latup ngxoil e rin na mosav xil. ¹²E his Suv Iesu Kristo, di matsemae ni hisit moletin xil ak e matosel xat xil tangan litit votei e lipol ixeh tangan likila lilaxat kuh tim sae xil. ^o

¹³E xamim, tuxoli e hinoxoli nametel xil, munave mah ti tangan ti mupol ni naha xa momal. ¹⁴Xos rute e xamim xa mudi latalong xat ti sepinien xa mat-tetisi e uvei ak. Xosxa imak, ma mupus kil xil e munamos ti mun natel xil tangan mei lihe unoun ve sexien nae. ¹⁵E mu-napol ni ti mi xil naxoni ngan xa labe elu namim xil. E-e, musel xat xil ixoni ngan xa labe tuemim xil e neketen. ^r

Sepinien kor

¹⁶Matsis tangan Suv Iesu, xa be Suv te tomat, iti mi xamim vus, e isak ni tomat iti e meulien namim e melengien xil vus e ixo suse xil vus. ^s

¹⁷*Inou Pol, di nasa bos makoe navan mi xamim. Sexien xa di nadis sepinien ak be simeleleen navan e uvei xil vus xa di nasa ni.* ^t

¹⁸Matsis tangan eheien hos na Iesu Kristo, Suv nar, iti mi xamim vus.

^h3:4 2Kor 7:16; Kal 5:10; 2Kor 7:15; 1Tes 4:10 ⁱ3:6 Mat 18:17; Rom 16:17

^j3:7 Plp 3:17; 1Tes 1:6 ^k3:8 1Kor 4:12; 1Tes 2:9 ^l3:9 Mat 10:10; 1Kor 9:4,6; 4:16; 1Tes 1:6 ^m3:10 1Tes 4:11 ⁿ3:11 1Tim 5:13

^o3:12 Efes 4:28; 1Tes 4:11 ^p3:13 Kal 6:9 ^q3:14 1Kor 5:9,11

^r3:15 1Tes 5:14 ^s3:16 Rom 15:33; 1Tes 5:23 ^t3:17 1Kor 16:21

Sepinien xa diamu te

1 Timoti

?Visi iaxa tetis uvei ak?

Polien 28 biteni xa Pol tete Rom e kavmen te hal Rom teling moletin te vaeen xil lateketeh xol Pol e nim tei.^u E tisen sav xil xa di e Vanuvei Eo e vanuvei sav xil mun labiteni labit kavmen te hal Rom latemaen Pol teha ven temase.

E kakaoen xil nan xa tetutou ni melele nen ak, Pol tehur Taetas, Timoti e moletin sav xil mun latehusili. E melele xa lateha latesao ni moletin xil e aelan te hal Krit, Pol teling Taetas tangan ilaxat kuh Kristin hu xil ixoni pasta nae.^v

Di, Pol tehe reling xalu e teha tesao ni Kristin xil e taon sav xil. Melele xa tetuxoh taon te hal Pilipae e provins te hal Masedonia, telongeong ni xa xalu lutekameti texeih e polien nalu. Tesak ni, tetis sepinien ak tangan vatutou ni Timoti^w e huraam 64 AD (huraam xil tetutou ni poten na Iesu). Tetisi tevus, Pol tehe Rom. E rute nen ak, moletin xil te vaeen te hal Rom latetal xati e lateso ni tehe nim te xeih vatei mun. Di, Pol tetis uvei tei mun teha mi Timoti.

?Visi iaxa tevuli uvei ak tetiamu?

Pol tetis sepinien ak teha mi Timoti.^x

?Pol tetis uvei ak veneh?

Pol ien tehei tangan vassel xat Timoti usil moletin xil te luvoson - E taon te hal Efeses, rut moletin ngan xil di lateluvos Kristin xil. Latehiteni latehit holesok xil vus te ut etan tesa pupu.^y

Pol ien tehei tangan pispisien xil vus na Timoti imal tevi - Pol tesel xat Timoti tangan ihur xat neketen nan e Iesu, ipispisi ni pispisien xa momal, e isak ni meulien nan mun imal tevi pe met Hi.^z

Pol ien tehei tangan vahit kil sexien hos xil na vat tei te sias mi Timoti - Vat tei te sias ipol ixeh e meulien nan melele xa ihit valaxat kuh moletin xil na Hi.^a e meulien nan imal tevi.

Pol ien tehei tangan vahit kil sexien hos na vat xil te sias mi Timoti - Xosxa moletin tei mei be elda mu dikon tei te sias, sexien nan imal.^b Xosxa sexien nan imal, ipet rat his Hi ihe nesao e holesok xil te sias iloh imal.

Pol ien tehei tangan vahit kil polien hos te sias mi Timoti - Vat xil te sias lilaxat kuh moletin nae xil. Lipol ixeh tangan lilaxat ngan xil xa lamesei, ngan xil xa labe hoeo, e tunau xil mun.^c

Pol ien tehei mun tangan vahit kil suse te sisen - Melele xa ramei vituei ve sisen, nenemien nar e Hi imal e iexir naxat mosav ti.^d

Vatit nenemien tei te uvei ak de 1 Timoti 4:12

Onamaen moletin xil ti linanem male ni xouk vengang xa obe horam maxoe tei tang. !E-e! Uhe vat tei na ngan xil xa laneket ixo sexien hos xil ak: ixo sepinien nam, kakaoen nam, eheien nam e mosav

^u1:0 Pol 28:30-31 ^v1:0 Taet 1:5; 1Tim 1:3 ^w1:0 1Tim 1:1

^x1:0 1Tim 1:2; Pol 16:1; Pol 16:1; Pol 16:3; 17:14; 18:5; Pol 19:22; 1Tim 1:2

^y1:0 1Tim 4:4; 1Tim 4:3; 1Tim 4:3; 1Tim 1:4-11

^z1:0 1Tim 3:14-16; 4:9-16; 6:20-21

^a1:0 1Tim 1:18-19; 4:6; 4:9-12; 6:11-16; 1Tim 4:13-16; 1Tim 5:1-2 ^b1:0 1Tim

3:1-13; 5:17 ^c1:0 1Tim 5:3-10; 1Tim 3:7; 4:15 ^d1:0 1Tim 2:1-8; 4:4-5

xil, e ixo neketen nam mun. E holesok xil vus xa di opol ni, meulien nam imese tevi.

?Naha iaxa di e uvei ak?

1. Pispisien xil xa momal tangan ri-husili. (1:1-20)

2. Pispisien xil usil polien te sias. (2:1–3:16)

3. Pispisien usil sexien na vat xil te sias. (4:1–6:21)

Sepkilaen na Pol usil uvei ak

1 Inou *Pol* iaxa nadis uvei ak. Nabe *eloheoh* tei xa di napol e his Iesu Kristo. Hi, xa di miteh meulien e xir, e Iesu Kristo, xa neketen nar di en, xalu iaxa luling nou e polien ak. ^e

²Bos makoe minuk Timoti. Ve neketen naralu, nalonge nggoni ngan xa xouk obe horamue navan xati. E nasis tangan eheien hos, esaeen e tomat na Hi Tamer e Iesu Kristo, Suv nar, iti minuk. ^f

Selxatien tangan Timoti nahusil ti pispisien te luvosen

³Timoti, ieok bei xa xouk utat e hal Efeses, nggoni ngan xa natehiteni minuk tuei melele xa natelinguk oteta en e inou natehe provins te hal Masedonia. Rut moletin xil xai di lapispisi ni hisit pispisien sav xil xa tamal ti usil suse te neketen, e ieok bei xa uhiteni mi xil tangan linapol ni ti mun namak. ^gUhiteni mun mi xil tangan linapispisi mi moletin xil ti mun naxo tumulen te luvosen nae xil mu naxo vanut his avu na Siu xil xa hoxalite teni tovuol. Hisit tumulen xil ak di pol ni ngongoren xil tang, e tahusil ti pispisien xil na Hi xa rakila nggo neketen nar kestang. ^hVatit selxatien ak be ten-

gan isak ni eheien iti e xamim xa di mistal nggo nenemien xa memese, nggo neketen xa be reitin, e nggo sexien xil xa mukila mubit momal pe met Hi. ⁱRut moletin namim xil latehusil hisit sexien hos xil ak tetiamu. E taxeak, xil lakavitou ni sexien xil ak e dit lapurun melengien nae xil e sepinien xil xa be neta sav tang. ^jXil di labiteni labit labe titsa xil te Rae na Hi. E tave ti neta xa di lamangang vehakut nggoni ngan xa lakilakil kuhi, xil latakil ti vari koute te holesok xil xa di labiteni.

⁸Rakila xa *rae na Hi* bos mak mu xosxa ranggusil kuhi nggo sexien xa momal. ^kRakila xa rae xil ak, Hi tenapol ni ti tangan ti vama ni ngan xil xa langgusil sexien xil xa momal ngamu. E-e. Hi tepol ni xil tangan vama ni ngan xil xa sexien nae xil misa: ngan xil xa langgur xoteh rae xil e labe vatxeih xil, ngan xil xa lapol misa e latakil ti Hi, ngan xil xa latamerere ni Hi ti e meulien nae di sotin rani, ngan xil xa di labas vin mosav xil e labas vin tamexil e ninexil mun tang, ^lngan xil xa di lapat vituei e latateli ti mu, e tiramue xil xa di lapat vituei del tiramue mun tang, ngan xil xa di lakan ni moletin xil e di lapos ni xil mei labe slev, ngan xil xa di laluvos vehakut e ngan xil xa di laluvos ni his mosav e koten, e ngan xil xa di lapol ni neta sav xil mun xa misav ni pispisien xil te reitinen na Hi. ^mPispisien xil na Hi nggusil longeongen hos xa xi misa ni minou tangan nihithiteni mi mosav xil. Longeongen hos ak bos pupu e nggo Hi xa be eilep xa be eilep pupu.

Pol memes Hi ve eheien hos nan

¹²Inou nasa memesien mi Iesu Kristo, Suv nar, vengon xa xi miling nenesien

^e1:1 Kol 1:27 ^f1:2 Taet 1:4 ^g1:3 Pol 20:1 ^h1:4 1Tim 4:7; Taet 1:14

ⁱ1:5 Rom 13:10 ^j1:6 1Tim 6:4,20; Taet 1:10 ^k1:8 Rom 7:12,16

^l1:10 1Tim 4:6; 6:3; 2Tim 4:3; Taet 1:9; 2:1

nan e nou tangan nipol mini, e misa xeihen minou tangan nikila nipol itela. ^{m13}Tetiamu, natesepin tesa teha xati, natepol ni texeih mi ngan xil xa latehusili e natehe vat xaren tei. E neta sav xa temak, Hi ien tesae li e nou vengang xa natnaneket ti mu e Iesu e natnakil ti xa di natepol tesa. ⁿ¹⁴E Iesu Kristo, Suv nar, tepisen eheien hos nan minou xa eilep pupu, e tesak ni nou nateling neketen e eheien navan teti en. ¹⁵Nisep usil neta tei xa be reitin, ma bos tangan uhur xati: 'Iesu Kristo temei e ut etan tangan iteh meulien e moletin tesa xil.' E inou nasa mak mu mili mosav xil. ^{o16}Ve rin ak, Hi tehosei nou tangan ien isae e nou e nasa pangasien ti mun minou. Xi tepol ni minou tangan ngan tesav xil xa mei lineket e Iesu e lihur meulien xa misakras vavus, xil lipus kil nenemien hos nan xa teviei pupu minou. ¹⁷!Reitin mak! !Ripet rat his Hi! !Xi kestang iaxa be Hi e be suv toto vehakut! Metexir misakras vapusi, e xi dat nggoni ngan tang, misakras vamat. !Bos mak mu xa xir rimerere ni e rimesi! !Reitin! ^p

Pol misel xat Timoti tangan isoh ixeih e neketen nan

¹⁸Timoti, natuxoli, di nasa selxatien ak minuk xa nggusil sepinien xa provet nar xil latekei mese ni usiluk tetiamu. Xosxa unem xat sepinien xil ak e uhusil xati, ma mei uhe moletin te vaeen hos tei na Hi xa ivae ixeih e rin nan. ^{q19}E melele xa upol ni, usoh ixeih e neketen nam e uhusil kes ni sexien xil xa okila obit momal pe met Hi. Rut moletin xil latapol ni ti sexien xil xa lakila labit momal, e di lapurun neketen nae. Xil lang-

goni vatihos te tuturil tei xa mikil suse xa momal e tahusili ti. E misak ni tuturil nan merir e meulien nan mikesae. ²⁰Moletin lu xa lupol mak, tei hisen Haeme-neas, e tei mun xalu, hisen Aleksanda. Mak, ma inou nasil rat xalu ra xir tangan ha lalihur pangasien e he **Temat**. E suse ak, xalu lalipus kila xa lalnapi spisi ti mun ni luvosen usil Hi. ^f

Selxatien usil melele xa moletin xil mei limot mi Hi

2 Timoti, ieok bei pupu tangan xamim musa sisen xil mi Hi ve tutouen, ve memesien, e musis mun ve moletin xil vus, ^{s2}ve ngan xil xa labe suv toto, e ve ngan xil mun xa labe eilep xil xa di lalaxat xir. Isak ni xir rikila riti e hosien e tomat itel mosav xil; e rikila rimot mi Hi e ripisen merereen mi mosav xil. ³Hisit sisen xil ak bos e momal pe met Hi. ^{t4}Xi ien bei vateh meulien na moletin xil vus e vapol ni xil mei lakil pispisien nan xil te reitinen xa mak: ^u

⁵Hi be tei takes; e moletin tei takes misoh pe met Hi e rin na moletin xil te ut etan, xi be Iesu Kristo. ^v

⁶Xi maen xoteh meulien nan mei mat tangan vaxal rat meulien na moletin xil vus ra maten. ^w

E melele xa temat ve xir, xi tepisen ni xa melengien momal tangan Hi vateh meulien na moletin xil. ⁷Ve rin ak, Hi tepol ni nou mei natehe **eloheoh** nan e tesil nou tangan niha nihithiten longegen hos nan mi ngan xil xa latave Siu ti, e nipispisi mi xil usil suse te neketen xa be reitin. !Ngan ak be reitin, nataluvos ni ti! ^x

^{m1:12} Pol 9:15; Kal 1:15-16 ^{n1:13} Pol 8:3; 9:1-2; 1Kor 15:9; Kal 1:13 ^{o1:15} Luk 15:2; 19:10 ^{p1:17} Rom 16:27 ^{q1:18} 1Tim 6:12; 2Tim 4:7; Siud 1:3

^{r1:20} 2Tim 2:17; 4:14; 1Kor 5:5 ^{s2:1} Efes 6:18; Plp 4:6

^{t2:3} 1Tim 1:1; 4:10 ^{u2:4} Esek 18:23; 2Pit 3:9 ^{v2:5} Rom 3:29-30; 10:12; Hib 12:24 ^{w2:6} Kal 1:4; 2:20; Taet 2:14 ^{x2:7} Pol 9:15; Kal 2:7-8; 1Tim 1:11

⁸Misak ni, e melele xil ngasen xa ti mumei vituei tangan mumot mi Hi, ieok bei xa tiramue xil liling tesaen, ngongoren e ekaten nae xil, e mei lisis mi Hi. ⁹Usil rin nen tak, atou xil linanem ti nahe holu usil eising nae xil. Linapilas ni hilixil ti, vurangexil ti, mu hiraexil ti e linavut xil ti natel eising xil xa mani nen nggeih. !E-e! Ieok bei tangan lising xol xil ni sexien xil xa ipisen merouen e merereen nae mi mosav xil. ¹⁰Ihos mak mu xosxa atou xil lipilas ni xil itel polien hos xil xa ipin ni atou xil xa labiteni labit di lamerere ni Hi. ¹¹Melele xa tiramue xil di lispispisi, atou xil linatanggal ti. Xil ti lihur pispisien xil ak e ti lilong xati itel nenemien te merouen. ¹²Inou natamaen atou xil ti tangan ti lipispisi mi tiramue xil mu lave vat na tiramue xil. Atou xil litit votei itel merereen e melele te pispisien. ¹³Vengan xa Hi tepol ni **Adam** mu tetiamu, e **Iv**, tetutou tang. ¹⁴E tenave Adam ti iaxa temot e luvozen. Tehe atou vari tang iaxa temot e luvozen e tehur xoteh rae na Hi. ¹⁵E Hi iteh meulien e atou xil melele xa ti lileh horamue xil, xosxa meulien nae di pisen neketen, eheien, merouen, e sexien xil xa momal pe meten.

Sexien hos na elda xil

3 Sepinien matu ak be reitin, “Xosxa moletin tei bit mei vahe elda tei te sias, naha xa xi ien bei tangan vapol ni bos pupu.” ²Mak ma moletin xa ihe elda, ihe hisit moletin ak: sexien nan imese tevi, nenemien nan iti atou nan xati kestang, ihe moletin xa ihusil nene-mien hos xil kestang, mikila ixuxou kuhi ve sexien nan xil, e ihe hisit moletin tei xa mosav xil di lamerere ni. Xi ihe hisit moletin xa di nggur pilei moletin xil e

tim san, e xi mikila vapispisi ni sepinien na Hi mi mosav xil. ³Xi nave moletin te munien ti, mu nave moletin te vaeen ti, sexien nan imerou tang. Xi ti naso sepinien xil ti xa nggeih, e ti nave ho **mani** ti. ⁴Xi ikila ilaxat kuh tim san e nan xil ti limerere ni e ti lilong xat raen. ⁵?Vengan moletin xa misakras valaxat ngenen xil, ma xi ikila ilaxat kuh moletin na Hi xil sung itep?

⁶Xi nave neta hu ti e neketen nan. Vengan xa xosxa neketen nan be neta hu, nahe xos ti ipo xi ihe nesao e nenemien nan. Imak, ma Hi isa pangasien mini ixoni ngan xa misa ni mi **Temat** ve hisit sexien ak. ⁷Sexien nan xil ipol ni moletin xil xa latahusul Hi ti lipus kila xa xi be moletin hos tei. Maxani, melele xa Temat isak pisi, xi imot e ipol ni neta ngan xa isak ni ihe unoun pe met moletin xil. ^e

Sexien hos na dikon xil

⁸Usil sexien nen xil ak, dikon xil mun lihe hisit moletin xil xa mosav xil di lamerere ni xil. Xil ti linavilhiles sepinien xil ti, ti linave vat munien ti, e linave ho mani ti. ⁹Xil ti lihur xat neketen nae iti mi xil e lihusili itel nenemien xa lakila labit momal pe met Hi. Reitinen te vatit neketen ak texus tetiamu, e taxeak, Hi di bit rati mi xir. ¹⁰Itiamu ni ngan xa moletin tei ihit vahur polien ak, xamim muketeh kuhi mupus meulien nan. Xosxa neta ti nasa nata xati, ma xi ikila ihur polien te dikon. ¹¹Atou nae xil lihe hisit atou xil xa moletin xil di lamerere ni xil. Linave atou te sepututen ti. Sexien nae ihusil nene-mien xa momal e lihe hisit atou xil xa mosav xil di laling nenesien nae di e xil. ¹²Dikon tei, nenemien nan iti atou nan

^y2:9 1Pit 3:3-5 ^z2:10 1Tim 5:10 ^a2:11 1Kor 14:34

^b2:13 Sen 1:27; 2:7,22; 1Kor 11:8-9 ^c2:14 Sen 3:6,13; 2Kor 11:3

^d3:2 Taet 1:6-9 ^e3:7 2Kor 8:21 ^f3:11 Taet 2:3

xati keatang, e xi ihe hisit moletin mun xa mikila milaxat kuh tim san. ¹³Dikon xil xa di lapol bos, mosav xil ti limerere ni xil. Imak, ma ulixil nakan ti e melele xa ti lisep usil neketen nae e Iesu Kristo.

Hi misak ni reitinen nan xa tesoson ni tetiamu, bemei e valkesao

¹⁴Nanemi nabit nave nousav ti, niहत nipusuk. E bos mak mu xa nadis uvei ak bat minuk, ¹⁵vengan xosxa niraru, e xouk ukil kuh sexien xil ngamu xa ngan xil na Hi ti lihusili. Xir ramos e Sias na Hi xa meul, e ranggoni pos e seteman xil teni xa di misuv xat vesis del veat te sepinien te reitinen. ¹⁶Reitin mak, vatit neketen nar xa Hi tesoson ni tetiamu bos pupu, e xosali, bithiteni xa be Iesu Kristo:

Tehe xi iaxa temei e ut etan e mei tehe moletin reitin.

Tehe xi iaxa **Ninin Eo** tesa xeihen mini tangan vapisen ni xa xi be Nat Hi.

Tehe xi iaxa **masxaxa** xil latepusi.

Tehe xi iaxa latesep usili mi ngan xil xa latave Siu ti.

Tehe xi iaxa moletin xil holu te ut etan laneket en.

E tehe xi mun tang iaxa Hi tehur rati tehe ut nesao e telingi e von merereen.^h

Pol misep usil titsa xil te luvosen

4 **Ninin Eo** bit kila xa e Melengien Kor xil, moletin xil holu listokovein neketen nae. Xil limaen ninin tesa xil liluvos xil e lihusil pispisien nae xil. ¹²Hisit pispisien xil ak mistal nggo moletin te luvosen xil xa di lasopin nggot hilibexil tang, e latahusil ti mun reitinen. Mak ma xil latakil ti naha xa bos e naha xa misa. ³Hisit moletin xil ak di lasep xol

moletin xil tangan linateli ti. E di lasep xol xil mun labit rut anien tavos ti tangan lava ni. E Hi pol ni anien xil vus bos, ma xir xa di ranggusili e rakil kuh reitinen nan, rikila ria ni itel nenemien te memesien. ¹⁴Holesok xil vus xa Hi pol ni bos. E melele xa rangguri e rangga ni del sisen te memesien, neta tovuol xa xir ravit raso ni vaha. ¹⁵Rakila ravuri venggan xa Hi tehiteni ngamu texo sepinien nan xa xil vus bos, e ramesi tuei ven.¹

Pol misel xat Timoti tangan ihe moletin hos te polien na Iesu Kristo

⁶Xosxa usa pispisien xil ak mi ngan xil xa di langgusil xat Iesu, xouk uhe moletin hos tei te polien nan. E melele xati nen tak, neketen nam e Iesu imeul ihe eilep ixo sepinien na Hi e ixo pispisien te reitinen xa otehusili tetiamu tuei temei. ⁷Ngan xil xa, vehakut, di lasep usil tumulen te luvosen xil na Siu xil, xa misakras vapol ni ti neta vahos e meulien na moletin xil, onamaen xil ti tangan mei linamos e xamim. Bos mak mu xa uvue xatuk tangan uhusil sexien xil xa isak ni xouk mei umal pe met Hi. ⁸Xosxa ripol ni tenbexir ixehi mu, ngan ak ihos vuteili tang. E xosxa ripol ni neketen nar ixehi mu tangan rihusil xat kuh Hi e meulien nar, ngan ak ihos mak mu. Vengan xa sexien xil ak mikila ipol ni meulien nar ihos taxeak xa rameul ra di, e ihos mun e meulien xa rihuri itutou. ⁹Sepinien ak be reitin, e bos xa moletin xil lihuri e linem xati. ¹⁰Io, ve rin ak, rapol nggeih e vetin nar mileh tangan ravusil sexien xil xa bos. Rakila rapol ni venggan raling nenesien nar e Hi xa meul. Xi be Hi te teh meulien en na moletin xil vus, e mi

^g3:15 Efes 2:19-22 ^h3:16 Sion 1:14; Mak 16:19; Pol 1:9 ⁱ4:1 2Tim 3:1; 2Pit 3:3; 1Sion 2:18; Siud 1:18 ^j4:3 Sen 9:3; Rom 14:6; 1Kor 10:30-31

^k4:4 Sen 1:31; Pol 10:15 ^l4:5 Sen 1:31; 2:18; 9:3

^m4:7 1Tim 1:4; 6:20; 2Tim 2:16; Taet 1:14 ⁿ4:8 1Tim 6:6 ^o4:9 1Tim 1:15

ngan xil mak mu xa laling neketen nae e Iesu. ^p

¹¹ Pispisien xil xa nadisi xiak, upispisi ni mi ngan xil xa di olaxat xil tangan ti lilong xati. ¹² Onamaen moletin xil ti linanem male ni xouk vengon xa obe horam maxoe tei tang. !E-e! Uhe vat tei na ngan xil xa laneket ixo sexien hos xil ak: ixo sepinien nam, kakaoen nam, eheien nam e mosav xil, e ixo neketen nam mun. E holesok xil vus xa di opol ni, meulien nam imese. ^{q13} Ha ituxoh melele xa nihahat, xouk ti upol ni sexien hos xil ak: ti uvuli sepinien te Vanuvei Eo mi moletin xil, ti uhit kil koute teni e melele xa ti usetu ni sepinien na Hi mi xil, e ti upispisi mi xil ni suse xa lihusili e meulien nae. ¹⁴ Upol itel sanien xa Hi telingi e meulien nam, e onapat ti natela. Unem xati xa sanien ak teme e xouk melele xa provet xil latesepin ni, e elda xil lateling hexil e xouk. ^{r15} Upol vehakut ni holesok xil ak e usa xouk ven, tangan isak ni moletin xil vus ti lipus kil polien hos xil nam. ¹⁶ Uloxat kuh meulien nam e uloxat kuh pispisien nam xil mun. Upol sen sexien hos xil ak, vengon xosxa upol ni, ma Hi iteh meulien e xouk e iteh meulien e ngan xil mun xa di lalong pispisien nam e di lalong xati.

Moletin xil na Hi ti lipol vituei ixoni ngan taxa xil labe vatimol tei takes

5 Timoti, xosxa momatu tei pol misa, onasepin ti naxeih mini. !E-e! Bos mak mu tangan usepin kuhi mini ixoni ngan taxa xi be tamom tei. Usil sexien nen tak, upol ihos mi horam maxoe xil ixoni ngan taxa xil labe tumali xil. ^{s2} Mi tovolih xil, usepin kuhi mi xil ixoni ngan taxa xil labe ninom xil. E usepin mi

atul maxoe xil itel nenemien xa memese ixoni ngan taxa xil labe tumahin xil.

Itep iaxa ukila uloxat kuh tunau xil

³ Uhiteni mi moletin xil lilaxat kuh tunau xil xa moletin nae xil tovuol tangan lalaxat xil. ⁴ E xosxa tunau tei, horamue xil mu havneli xil ladi, ma xil vari lilaxati ixoni ngan xa Hi tehiteni. Imak, ma xil ti lisa rilomun ni lelaxatien mini, vengon xa Hi memaal ve sexien xil ak. ^{t5} Tunau tei xa moletin nan tovuol tangan valaxati, xi di miling nenesien nan e Hi kestang, e di misisi ve tutouen e melengien e vongien. ^{u6} E tunau tei xa di misa xi ve sexien tesa xil te ut etan, munalaxati ti. Tave ti neta xa meul da, neketen nan mat ngamu. ⁷ Usa pispisien xil ak mi moletin na Hi xil tangan lilaxat kuh tunau nae xil. Imak, ma moletin ti nasepin nasa mi xil. ⁸ E xosxa rut moletin xil latalaxat kuh tunau nae xil ti mu ngan xil mun xa ladi e vatimol nae, xil lapol ni sexien tei xa misa mak mu mili ngan xa latestokovein neketen nae mu latnaneke ti e Hi.

⁹ Tunau xil xa mututou ni xil, mutis hisexil ihe vanuvei te lelaxatien. Ngan xil ak, hram nae ili hanutap tol (60), e melele xa lateteli, nenemien nae teti tiramue nae xati kestang. ¹⁰ Tunau xil ak, moletin xil lipus kil sexien hos xil ak e meulien nae xa, tetiamu, latehe atou xil xa latelaxat kuh horamue nae xil, latehur pilei moletin xil e tim sae, e latetutou ni moletin xil na Hi texo sexien te merouen. Melele xa latepus moletin tei xa tekameti texeih e meulien nan, xil latesa tutouen mini. E xil latemaen xil ve polien xil vus xa tehos. ^v

¹¹ Tunau xil xa di mulaxat xil, xil lipol ni hitxatien tei xa lisa sen meulien nae

p4:10 1Tim 2:3-4 **q4:12** Taet 2:15

r4:14 2Tim 1:6; Pol 6:6; 8:17; 1Tim 5:22 **s5:1** Lev 19:32 **t5:4** Eks 20:12

u5:5 Ser 49:11; Luk 2:37; 18:7 **v5:10** Hib 13:2; Sion 13:14

mi Iesu e linateli ti mun. Mak, ma ngan xil xa latave tovolihi pupu ti, munamaen ni ti tangan linatis hisexil ti nati vanuvei namim. Vengan melele xa eheien nae bas xil e misak ni xil labit lavur xoles tiramue tei mun, xil likila likavitou ni Iesu Kristo e liteli mun. ¹² Mak, ma xil lihur xoteh hitxatien xa latepol ni tetiamu tetel Hi, e lilihi pangasien na Hi imei e xil mun tang. ¹³ Ma xil lihur sexien te mahen e tit likakao likapis e tim xil vus. E ngan xa isa pilei mak, xil ti liseputut e ti lisep usil holesok xil xa tamal ti. ^{w14} Mak, ma bos pupu xa tunau xil xa latave tovolihi ti, liteli rilomun, lileh horamue xil, e lilaxat tim sae xil. Imak, ma ngan xil xa labit lasep xar ni xir xa raneket e Iesu, xil lasakras vengan xa sexien xa di rapol ni mi tunau nar xil ak momal tang. ^{x15} E rut tunau nar xil latekavitou ni suse xa momal ngamu, e latehusil suse xa tamal ti xa **Temat** ien bei tangan lavusili.

¹⁶ Xosxa atou tei xa mineket e Hi mikila xa tunau tei de vatimol nan, xi ihuri mei ilaxat kuhi. Nalingi ti nate he elda xil te sias, maxani, nasa polien nahe holu mi xil. Imak, ma elda xil ak likila lilaxat tunau xil xa ladit tasexil.

Selxatien mi Timoti tangan ipisen suse mi vat xil te sias

¹⁷ Elda xil xa di lalaxat kuh moletin xil te sias, xil likila lihur merereen e huit polien nae, vengan xa xil di lapol nggeih tangan lavithiten sepinien na Hi e di lapispisi mi moletin xil. ^{y18} Xil lihur huit polien nae ixoni ngan taxa Vanuvei Eo di misep usili bit, *“Xosxa buluk sam di pol minuk, onavar xol vulongen ti, umaen ni ianien ti.”*

(Dut 25:4)

E Vanuvei Eo biteni mun bit,

“Ngan xil xa di lapol, momal tangan lihur huitte teni.” (Luk 10:7)^z

¹⁹ E xosxa moletin tei takes bit sepinien tei ba xat elda tei, onatemanon ti onake reitin en. Utatili ituxoh melele xa moletin lu mu tol mun mei latihit sepinien ak iha xati, ti, ulepis elda ak sung. ^{a20} Elda xil xa lapol ni **tesaen**, uhit rat tesaen nae xil pe met moletin xil na Hi. Imak, ma ngan tesav xil, ulixil ikan tangan lapol ni tesaen. ^b

²¹ E pe met Hi, pe met Iesu, e pe met **maxaxa** xil mun, nasel xatuk Timoti: xosxa elda tei mot e tesaen, uhusil sen naha xa nabiteni minuk xiak. Upol ni imak mi elda xil vus, tave ti neta xa xi be timue hos tei nam. ²² Onatemanon ti onaling hem e moletin tei tangan mei vahur polien na Hi. Vengan xosxa xi imot e **tesaen**, moletin xil iexil iatuk sung iti en. E rin nam, meulien nam imese tevi, onamot ti e tesaen. ^c (²³ E onamu oei ti kestang, umu ti uae vuteili mak ixoni meresin tangan itutou ni vangom xa di pangas vehakut e mesien sav xil nam.)

²⁴ E rin te lepisien, tesaen na rut moletin ngan di kesao, e moletin xil vus lakila. E rut moletin ngan, tesaen nae xil di minggus e istal sung e melele te lepisien. ²⁵ Usil nenemien nen tak, sexien hos xil mun, rut moletin ngan xil di lapol ni be-mei kesao, e rute ngan xil dit lapol xuxus ni. E sexien xil vus ak misakras vaxus pe met Hi.

Selxatien ba mi slev xil xa langgusil xat Iesu

6 Nasel xat tua nar xil xa labe slev tangan ti limerere ni vat nae xil. Vengan xa xosxa linamerere ni xil ti, ma mosav xil lisepin isa iha mi his Hi itel pispisien nar xil. ^{d2} Xosxa slev tei, vat

^{w5:13} 2Tes 3:11 ^{x5:14} 1Kor 7:9 ^{y5:17} 1Kor 16:18; Plp 2:29

^{z5:18} 1Kor 9:9; Mat 10:10 ^{a5:19} Dut 17:6; 19:15; Mat 18:16; 2Kor 13:1

^{b5:20} Kal 2:14; Efes 5:11 ^{c5:22} 1Tim 4:14 ^{d6:1} Efes 6:5; Taet 2:9-10

nan mun di nggusil xat Hi, slev ak nanem male ni ti e nasep pepamen ni ti venggan xa xalu lusukul vituei. !E-e! Xi ipol ihos pilei mak mu mini venggan xa xi di dutou ni moletin tei na Hi. Reitin, eheien nan iti en ihe holu mu venggan xa lube tua usil neketen nalu. Timoti, upispisi mi moletin xil ni holesok xil ak tangan ti lihsili. ^e

Selxatien usil voh te mani

³ Rut moletin xil di lapispisi mi moletin xil ni pispisien xil te luvosen xa misav ni pispisien na Iesu Kristo. Naha xa di lapispisi ni tapisen suse ti xa Hi ien bei tangan moletin nan xil ti lavusili. ^{f4} Melele xa moletin ngan xil di lapol ni sexien xil xa mak, pisen ni xa xil lapolu ni koaien, e latakil ti naha xa di labit usili. Xil latalang venggan labit lasep mah usil mavulut sepinien xil vus xa di e tumulen matu na Siu xil. Hisit sexien xil ak di pol ni moletin xil labe elu mi xil, iexil di mikat, di lasuhol xil, e di lanem misa ni mosav xil. ⁵ Vehakut di labae mi xil. E venggan xa di tuei latepol ni sexien xil ak nousav teme, xil latapus kil ti mun naha xa be reitin e naha xa be luvosen. Xil laba di lapispisi mi moletin xil ni suse xa ti lihsil kuh Hi en, venggan xa di lanemi labit likila lihur holesok xil ihe holu ixo en. ⁸

⁶ Be reitin xa di raleh holesok xil te neketen xa bos melele xa ranggusil kuh Hi e ramaal tang ve holesok xil xa di e hexir ngamu. ^{h7} Melele xa latepes xir ratemei e ut etan, rateka hon tang. E melele mun xa rimat, rika hon tang riha. ⁱ⁸ Ve rin ak, xosxa rut anien ar e rut eisling nar di, ma rihesi xir tang ven. ^{j9} Moletin xil xa labe ho mani lakila lamaen

sakpisien xil litel xil ha lipol ni tesaen xil tangan lavuri. Suse te mani nggoni voh tei xa boh xol nenemien e eheien nae tangan lapol vasa e lapurun meulien nae. ^{k10} Reitin mak, eheien te *mani* be vatite te sexien xil holu xa misa. Mani telihi nenemien na moletin xil holu latehe sotin reling pispisien te reitinen usil Iesu Kristo ngamu. E xosali ak, meulien nae di pangas pupu ve holesok tesa xil xa di latepol ni.

Selxatien usil kakaoen hos na moletin xil na Hi

¹¹ E rin nam Timoti, venggan xa xoux obe moletin tei na Hi, onahusil ti sexien xil ak vari. !E-e! Uhusil hisit sexien xil xa Hi ien bei xoux tangan ti upol ni e onahe mah ni ti. Meulien nam imese, e sexien nam xil imal tevi. Uling nenesien nam e Hi, e ulong xati vehakut. Eheien nam iti e mosav xil, e utamerou mun ni sepinien nam xil. ¹¹² E rin te neketen nam, upol ixeh ven, ixoni ngan xa xoux ode lohen tei. Xosxa upol imak, ma uhur huite teni xa be meulien sal. Hi tekesuk tangan mei uhuri e melele xa otehit rat neketen nam pe met vanut moletin xil holu. ^{m13} Pe met Hi, xa misa meulien mi holesok xil vus te ut etan, e pe met Iesu, xa tehit rat reitinen usil xi mi Pontias Paelet, nasel xatuk mak: ⁿ¹⁴ uhusil kuh holesok xil vus xa Hi ien bei tangan opol ni ixo sexien hos xil xa mosav xil lasakras lasepin vaha xatuk ven. Onatam ras ti pispisien nan xil ha ituxoh melele xa Iesu Kristo, Suv nar, itilomun en. ¹⁵ Xi itilomun imei e melele xa Hi ipusi ihit momal.

Hi ak vari, lelxatien xil vus de hen e momal tangan lipet rati.

^e6:2 Flm 1:16 ^f6:3 Kal 1:6-9; 2Tim 1:13 ^g6:5 2Tim 3:8; 4:4; Taet 1:14

^h6:6 1Tim 4:8; Plp 4:11-12; Hib 13:5 ⁱ6:7 Ekl 5:15; Siob 1:21

^j6:8 Pro 30:8 ^k6:9 Pro 23:4; 28:22 ^l6:11 2Tim 2:22

^m6:12 1Kor 9:25-26; 2Tim 4:7 ⁿ6:13 Sion 18:36-37; 19:11

Xi be suv toto na suv toto xil vus,
e be Eilep na eilep xil vus.^o

¹⁶Hi ak kestang ita xa ita.

E vengan minehinen te xeihen xa de von
lelaxatien nan mahulong pupu,
moletin xil lasakras lave sangas visali e
lapusi.^p

Moletin xil vus lisa merereen mini
e lipus kil xeihen nan ha vuma ... navus
ti vatova.

Reitin.

¹⁷Moletin xil xa lapolu ni holesok xil
te ut etan, usel xat xil tangan ti linavut
xil ti. Bos mak mu tangan liling nene-
sien nae e Hi, e linaling nenesien nae ti
e holesok xil te ut etan xa mikila like-
sae reling xil. Hi di misa vuol ni holesok
xil holu pipin tangan ti rihesi xir ven.
^{q18}Usel xat xil tangan ti lipol ni hole-
sok xil xa bos. Xil lipolu ni polien hos

e livue xat xil tangan lisa tutouen mi
mosav xil mun. ¹⁹Itel sexien xil xa bos
xiak, ngan xil xa holesok nae holu, xil
likila liserev holesok xil xa bos iti nga
e ut nesao. Vengan xa holesok xil te ut
etan likesae, e holesok xil xa bos xa Hi
miling xati ve xil iti vehakut. Melele xa
xil lipol ni imak, xil lihur meulien tei xa
be reitin vari tang. ^r

²⁰Timoti, ulaxat kuh naha xa Hi
milingi de hem. Onamos ti natel ngan xil
xa di laso sepinien xil xa misa e tamal
ti e pe met Hi. Ngan xil ak, di labit
pispisien nae xil polu ni metisouen, e
polu ni luvosen tang. ^{s21}Rut moletin xil
langgusil pispisien xil ak ngamu. Mak,
ma xil latahusil ti mun suse te reitinen
na Hi. ^t

Nasis tangan eheien hos na Hi iti mi
xamim.

^o6:15 Dut 10:17; Rev 17:14 ^p6:16 Sam 104:2; Eks 33:20

^q6:17 Sam 62:10; Luk 12:20 ^r6:19 Mat 6:20 ^s6:20 2Tim 1:14; 1Tim 4:7

^t6:21 1Tim 1:6; 2Tim 2:18

Sepinien xa diamu te

2 Timoti

?Visi iaxa tetis uvei ak?

Pol tetis sepinién ak e hurañ 67 AD (hurañ xil tetutou ni potén na Iesu) xa tehe sepinién kor nan. Melele xa tetis tetiamu teha mi Timoti xal Taetas, di tesao ni vanut Kristin xil e taon holu. E melele xa tehe Rom, latetal xati e lateso ni tehe nim te xeih.^u

?Visi iaxa tevuli uvei ak tetiamu?

Pol tetis uvei ak teha mi Timoti^v. Sepinién xa Diamu te 1 Timoti di bit kila xa Timoti tehe visi.

?Pol tetis uvei ak veneh?

Pol ien tehei tangan vapus rilomun ni Timoti - Pol tekila xa navehi ti lihasi imat^w.

Pol ien tehei tangan vassel xat Timoti ve melele te xeih xil xa di bemei - Pol tepus kila xa melele te xeih xil di bemei, misak ni ien tehei tangan Kristin xil lisoh ixeh e neketen nae^x.

Pol ien tehei vassel xat Timoti tangan vaxouxou kuhi ve pispisien nan xil - Pol tesis Timoti tangan ixouxou kuhi ve pispisien nan xil melele xa di misetu ni sepinién na Hi^y.

Pol ien tehei tangan vassel xat Timoti vatei mun usil moletin xil te luvosen - Moletin xil te luvosen lateti tamu visal Timoti, ma Pol tesel xat rilomun ni tangan nahusil xat xil ti e nangor ti natel xil.^z

Vatit nenemien tei te uvei ak de 2 Timoti 2:15

Mak, ma Timoti, xoux ti usak pisi tangan upispisi ni sepinién te reitinen na Hi mi moletin xil. Mak, ma ukila usoh ixeh be met Hi ixoni moletin te polien tei xa tave unoun ti ni polien nan.

Vatit nenemien tei mun te uvei ak de 2 Timoti 3:16-17

Sepinién xil vus xa di Vanuvei Eo, nenemien xil vus teni nggo Hi. Sepinién xil ak bos te pispisien, te selxatien, te sepikilaen usil suse xa momal, e tangan vapispisi mi moletin xil xa linapol ni ti mun sexien xil xa misa. Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus.

?Naha iaxa di e uvei ak?

1. Pispisien xil usil ngan xil xa di langgur polien na Hi (1:1–2:26)
2. Selxatien ba mi Kristin xil tangan lisoh ixeh ve melele xil texeh xa di bemei (3:1–4:22)

Sepikilaen na Pol usil uvei ak

1 Inou *Pol* iaxa nadis uvei ak. Inou nabe *eloheoh* tei na Iesu Kristo nggusil nenemien na Hi xa bit xati xa isa meulien sal mi ngan xil xa di laling neketen nae e Iesu Kristo.

²Nadis minuk Timoti xa onggoni natuxoli hos tei. Nasis tangan eheien, esaeen, e tomat na Hi Tamer e na Iesu Kristo xa be Suv nar iti e meulien nam.

^u1:0 2Tim 1:8,16; 2Tim 1:3-14; 2Tim 3:10-17; 2Tim 2:1-26

^v1:0 2Tim 1:2; 2Tim 4:22 ^w1:0 2Tim 4:6-8; 2Tim 1:4; 4:9,21

^x1:0 2Tim 1:8; 2:3 ^y1:0 2Tim 1:14; 2Tim 3:14; 4:2 ^z1:0 2Tim 2:16-26

Pol misel xat Timoti tangan ital xat kuh polien xa Hi misa ni mini

³Timoti, e vongien del melengien, ieok di tabong ni xouk ti e sisen xil navan e di names Hi ve xouk. Hi ak iaxa di nanggusil xati, nggoni ngan xa avu navan xil tietiamu di latepol ni, e nakila namusil xati nggo sexien xil xa nakila nabit momal pe meten. ^{a4}Nanem xat simetom xa temereh melele xa rutetasil, e ieok bei tangan nipusuk rilomun e isak ni nou nipolu ni sien. ⁵Nanem xat neketen hos nam xa be reitin. Neketen ak nggoni neketen hos na avu nam Loes e na ninom Iunis. E nakila xa de xouk mun. ^{b6}Ve rin ak, nasel xatuk tangan utit ni ngan taxa ti upol itel sanien xa Hi tesa ni minuk melele xa natetuxol xatuk. Sanien ak nggoni upang na Hi e meulien nam e bos xa uhui xati tangan ileluv mei ihe eilep mu. ^{c7}Upol ixeh vengan Ninin Eo xa Hi tesa ni mi xir di misak ni ulixir takan ti. Ninin Eo nan di pol ni xir rapol vituei del xeihen nan, tangan eheien nar iti e mosav e mikila raxuxou kuhi ve sexien nar xil. ^d

⁸Mak, ma onahe unoun ti tangan ovit rat sepinien xil usil Iesu xa be Suv nar. E onahe unoun ni nou ti mun xa nade nim te xeih vengan inou nabe moletin na Iesu. !E-e! Itel xeihen xa Hi misa ni minuk, xouk mun uhusil suse te longpangasien ixoni nou ve longgeongen hos usil Iesu. ^{e9}Hi mileh rerat xir ra tesaen e misa meulien hu mi xir. Xi mikes xir tangan mei rave moletin nan xil, e tave ti ve naha xa xir di rapol ni. !E-e! Xi pol ni mak nggusil nenemien nan e ve eheien hos nan mi xir. Tietiamu ni melele xa Hi tepeas ni ut etan, xi tehiti xati xa xi isa

Iesu mei ihe suse tangan isak ni eheien hos nan mei istal mi xir. ^{f10}E xosali, hitxatien nan mei mistal be reitin e melele xa Iesu Kristo teme i e ut etan e tete meulien e xir. Xi tehas tan ni xeihen te maten, e longgeongen hos teni pisen suse te meulien hu mi xir. ⁸

¹¹Ma vengan Hi ien bei tangan longgeongen hos ak ihe ut xil vus, xi tehosei nou mei nabe eloheoh nan tangan nihit rati mi moletin xil vus e nipispisi ni reitinen nan mi xil. ^{h12}Ma ve rin ak, iaxa inou di nalong pangas nou ven e nim te xeih ak. Inou natanexo ti vengan xa nakil kuh ngan xa inou di naling nenesien navan da en. E nakil kuhi xa xi nggur xeihen pipin tangan isikoe xol naha xa xi milingi e heok tangan ti nipol ni ituxoh melele Iesu itilomun en. ¹³Xouk mun utal xat kuh sepinien te reitinen xa natepisi ni minuk ngamu. Holesok xil xa otepus nou natepol ni e otelong nou natehiteni, xouk mun upol ni. E utal xat sexien xil te neketen e eheien ixoni ngan xil xa di langgusil xat Iesu Kristo. ¹⁴Longgeongen hos xa ongguri be neta ngan xa bos pupu. Misak ni, uketeh xole e uxuxou kuhi ven itel tutouen na **Ninin Eo** xa de xir. ⁱ

¹⁵Xouk otelong kila xa tua navan xil e provins te hal Esia, nggoni Fukelas xal Hemonggenes, xil vus latetasil reling nou ngamu. ^{j16}Onesiforas, xi kestang teme i visal nou e melele nen xil ak, e di pet rat nenemien navan. Nasis Hi tangan isa hosien mini itel ngenen xil vengan xa xi tave unoun ti tangan mei vasao ni nou e nim te xeih ak. ¹⁷Io, melele xa tetuxoh taon xa eilep te hal **Rom** xi telang ni nou ba vuma ... tekamet rute xa inou nada en. ¹⁸E melele sav mun xa di natepol e

^a1:3 Plp 3:5; Pol 23:1; 24:16 ^b1:5 Pol 16:1 ^c1:6 1Tim 4:14

^d1:7 Rom 8:15 ^e1:8 Rom 1:16 ^f1:9 Efes 2:8-9; Taet 3:5

^g1:10 1Kor 15:55,57; Hib 2:14 ^h1:11 1Tim 2:7 ⁱ1:14 1Tim 6:20

^j1:15 2Tim 4:16

taon te hal Efeses, xouk okil kuhi mak xa xi tetutou ni nou tehe holu. Misak ni, di nasis tangan Suv Iesu ipisen esaeen mini e melele xa xi imei rilomun en e ilepis moletin xil.^k

Pol misel xat Timoti tangan isoh ixeih e neketen nan

2 Timoti, natuxoli, usoh ixeih itel tutouen xa Iesu Kristo di misa ni mi xir. ²Pispisien xil xa otelong nou natehiteni mi moletin xil, xouk uhuri e ha upispisi ni mi ngan xil xa nenesien nam di e xil. Mak, ma xil mun likila lipispisi ni mi mosav xil.

³Melele xa sakkisien xil di bemei, xouk usoh ixeih ixoni moletin hos tei te vaeen na Iesu Kristo. ⁴Melele xa moletin tei te vaeen di pol, xi di tamaen ni ti holesok xil te ut etan tangan valihi nenemien nan ra polien nan vengan ien bei tangan suv nan vamaal ven. ⁵Xouk onggoni moletin te lohen mun. Moletin ak iloh ihusil xat rae xil te lohen. Xosxa xi nahusil xat rae xil vus ti, xi misakras vahur huite teni. ⁶Xouk onggoni moletin te naho mun. Vengan moletin xa nggur vetin e naho san, momal tang tangan xi ihur anien en itiamu ni mosav xil. ⁷Bos xa unem xat vole xatel ak xa nabiteni minuk, e Hi Suv isak ni xouk ukil kuh koute te xatel.

⁸Unem xat Iesu Kristo: xa temeaa rilmun ra maten e xa testal texo ra na suv toto *Deved*. Ngan ak be vatit longgeongen hos xa di nabit rati. ⁹Ve longgeongen hos ak, inou di nanggur longpangasien e labar xat nou ni sen e nim te xeih ak nggoni moletin tei te kanen. E sepinien na Hi, lasakras lavar xati. ¹⁰Ve rin ak, namaen nou tangan nihur

longpangasien xil ak. Vengan nakila xa melele xa nabit rat longgeongen hos mi moletin xil, ngan xil xa Hi tehosei xil, likila lihur meulien hu xa mistal nggo Iesu Kristo. Mak, ma xil likila liti e minehinen te xeihen nan itela vehakut. ¹¹Usil nenemien ak, sepinien ak be reitin xa biteni bit:

Xosxa ratemat tetel Iesu Kristo, ma rimeul itela.

¹²Xosxa risoh ixeih ve hisen, ma xir rikila rilaxat ut xil e ut etan itela. E xosxa rihiteni rihit ratakil ti xi, ma xi mun ihiteni ihit takil ti xir.^p

¹³E tave ti neta xosxa rimot e neketen nar, e xi misakras vastokovein xir, vengan xi misakras vapol vasav ni sexien nan xati xa momal tevi.^q

Moletin te polien hos na Iesu Kristo

¹⁴Bos tangan vehakut ti upispisi mi moletin xil ni pispisien xil ak. Usel xat xil e his Hi tangan linangor ti ve koute te mavulut sepinien xil vus. Sexien ak misakras vapol ni ti neta vahos. Sexien xil ak di purun moletin xil xa di lalonge. ¹⁵Mak, ma Timoti, xouk ti usak pisi tangan upispisi ni sepinien te reitinen na Hi mi moletin xil. Mak, ma ukila usoh ixeih be met Hi ixoni moletin te polien tei xa tave unoun ti ni polien nan. ¹⁶E onamos ti natel ngan xil xa sepinien nae be neta sav tang e tamal ti. Vengan xa hisit sepinien xil ak di midel moletin xil labe sotin mak mu ra Hi del sexien hos xil xa ien bei xil lavusili. ¹⁷Ve naha xa di lasep usili mikapis mi moletin xil, e di purun nenemien nae. Sepinien nae nggoni menuk tei xa bo xa mistal e moletin, e ngga purun tenben xil vus.

^k1:18 Siud 1:21 ^l2:6 1Kor 9:7,10 ^m2:8 1Kor 15:4,20; Rom 1:3

ⁿ2:9 Efes 3:1; Plp 1:12-14 ^o2:10 Kol 1:24 ^p2:12 Mat 10:33; Luk 12:9

^q2:13 Rom 3:3-4; Nam 23:19; Taet 1:2 ^r2:14 1Tim 6:4; Taet 3:9

^s2:15 1Tim 4:6; Taet 2:7-8 ^t2:16 1Tim 4:7

Moletin lu xa lumak lube Haemeneas e Faelitas. ^{u18}Xalu di lupispisi ni mi moletin xil lubit mea rilomunen ra maten mistal ngamu. Mak, ma xalu di lupurun neketen na moletin sav xil e di lupisen ni xa lule ras suse te reitinen. ¹⁹E tave ti neta xa di lupol ni mak, sepinien na Hi di tamu misoh nggeih nggoni simen te nim tei xa lakili ni be tan. Vengan xa xi biteni mak bit, "*Tahova mikil kuh ngenen xil.*" (Nam 16:5) ^vE biteni mun bit, "*Ngan xil xa labit lavusil Iahova listokovein sexien tesa nae xil.*" (Aes 52:11)

²⁰Sias na Hi nggoni nim tei xa eilep xa tre xil e pelet xil holu di en. Rut tre ngan xil, lapol kuhi ni ni neta xil xa minehin, nggoni silva e gol; e rute xil mun, lapol ni ni liei e tan xa pili. Ngan xil xa bos pupu, laserevi datil polien hos tei; e ngan xil xa tavos pupu ti, dit lapol ni muis ba en. ²¹Usil nenemien ak, xosxa moletin tei pol ni xi mese ra hisit sepinien tesa xil xa nasep usili, Hi ise revu ve polien hos xa tehosei ven. E vengau xa xi misa meulien nan mi Hi e misak xat kuh xi bos ve polien, Hi xa be Suv te Sias ihur xati e ipol ni polien hos xil ixo en. ^{w22}Mak, ma Timoti, bos tangan uling sexien tesa xil xa tiram maxoe sav xil di langgusili. !Io! Xouk itel ngan xil xa di mumot mi Hi del nenemien hos, bos xa muloh ve sexien xil xa Hi ien bei nggoni momalen, neketen, eheien, itel tomat. ^{x23}Uhe reling ngan xil xa di lasep talang ve holesok xil xa be neta sav tang, vengau hisit sepinien xil xa mak di pol ni ngongoren xil tang. ^{y24}E vengau xa xouk obe moletin te polien na Hi, onangor ti natel moletin sav xil. Xouk uhos mi moletin xil vus e upispisi kuhi mi xil. Bos tangan utal xat nenemien nam tangan iem nakat

ti namanon. ^{z25}Ngan xil xa di laseputut ni xouk, xouk upispisi mi xil itel sexien te merouen. Xos Hi isak ni xil lihiles ra tesaen nae xil e mei likil reitinen nan. ^{a26}Mak, ma xil mei lihur nenemien xa bos e lilesae ra voh xa **Temat** di boxol xil ni. Temat di dal xat xil vengau ien bei tangan lapol vahusil nenemien nan.

Selxatien usil naha xa istal e Melengien Kor xil

3 Timoti, bos xa ukil kuhi xa, e Melengien Kor xil, melele te xeih xil holu limei. ^{b2}Vengan e melengien xil ak, moletin xil linem kes ni xil tang: nenemien nae iti e **mani**, lisep xoli xil e lihe koai. Xil lipurun mosav xil e linalong xat ti tamexil. Xil linem male ni tutouen xil xa mosav xil lasa ni e linem male ni holesok xil na Hi. ^{c3}E melele nenak, xil linanem ti meulien na mosav xil, esaeen nae ihe tovuol. Xil ti lisuhol purun mosav xil e lipol ni vaeen mi xil. Iexil ikat vehakut e liketeh isa ni holesok xil xa bos. ⁴Xil ti lipol ni suse tangan ti lipurun mosav xil e linanem ti meulien nae mu na mosav. Xil lipolu ni nenemien te molepen e eheien nae iti e sien xil te ut etan, e nati ti e Hi. ⁵Xil ti lihusil Hi ixot hilibexil tang, e xeihen nan ihe tovuol e meulien nae. !Hisit moletin xil xa lamak, onaha ti visal xil! ^{d6}Rut moletin xil ak di lakapis e nim xil vus e di lasep luvos atou xil xa nenemien nae taxeih ti tangan lavusil pispisien nae. Atou xil ak, eheien te holesok xil te ut etan di e xil, e nenemien usil **tesaen** nae xil di bas tan ni xil vehakut. ^{e7}E tave ti neta xa hisit atou xil ak di langgur pispisien xil vehakut, lasakras lakil ti reitinen teni. ⁸Xosali ak, moletin xil holu di lasepin

^{u2:17} 1Tim 1:20 ^{v2:19} Sion 10:14; 1Kor 8:3 ^{w2:21} 2Tim 3:17

^{x2:22} 1Tim 6:11 ^{y2:23} 1Tim 4:7 ^{z2:24} 1Tim 3:3; Taet 1:7

^{a2:25} 1Tim 2:4 ^{b3:1} 1Tim 4:1 ^{c3:2} Rom 1:29-31

^{d3:5} Mat 7:15,21; Rom 2:20; Taet 1:16 ^{e3:6} Taet 1:11; 2Tim 2:25

misa ba xat longeongen hos na Hi. Nenemien nae tamal ti e neketen nae be te luvosen tang. Xosali nggoni tetiamu, e melele xa provet te luvosen lu na suv toto te hal Isip lutesepin tesa teha mi **Mosis**, hisealu tehe Sanes e Sampres. ^{f9}E nggoni provet te luvosen xalu ak, polien nae xil mei ihe neta sav tang vengang moletin xil vus lipus kila xa xil dit lapol ni unuen.

Selxatien mi Timoti tangan ihusil kuh sepinien na Hi

¹⁰E xouk, Timoti, okil kuh pispisien xil navan e sexien navan xil ngamu. Okil kuh vatit nenemien xa di napol nggusili. E okil kuh neketen navan, eheien navan, e nenemien navan xa teviei. Okila mun xa inou natangel ti e polien navan. ¹¹Xouk okil kuh sakpurunien e longpangasien xil xa natehisu ni e taon xatel ak: Antiok, Aekoniam e Listra. Sakpurunien xil ak tehe holu pupu, e Hi tesikoe xol meulien navan ra xil vus. ^{g12}Io, moletin xil vus xa iexil bei tangan lavusil Iesu Kristo e suse xil xa momal na Hi, xil lihur sakpurunien xil ven. ^{h13}E moletin xil xa lasa e ngan xil xa di laluvos, xil mei lisa pilei sung. Xil ti liluvos mosav xil, e mosav xil mun ti liluvos xil. ¹⁴E xouk Timoti, onaxoni xil ti, utit ni ngan taxa ti uhusil pispisien xil xa otehuri tetiamu e okila ngamu xa be reitin. Okil kuh hisit pispisien xil xa otehuri ra moletin xil xa nenesien nam di e xil. ⁱ¹⁵E okil kuhi xa hisit pispisien xil ak di nggusil naha xa otelonge texo Vanuvei Eo e melele xa otehe horamue tamu mei duxoh xosali. Vanuvei Eo mikila vasak ni moletin xil lale kil suse xa lakila laling neketen nae

e Iesu Kristo e lavur meulien hu vaxo en. ^{j16}Sepinien xil vus xa di Vanuvei Eo, nenemien xil vus teni nggo Hi. Sepinien xil ak bos te pispisien, te selxatien, te sepkilaen usil suse xa momal, e tangan vapispisi mi moletin xil xa linapol ni ti mun sexien xil xa misa. ^{k17}Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus. ¹

Pol misel xat Timoti tangan ihithiten sepinien na Hi

4 Timoti, Iesu Kristo itilomun e mei ihe suv toto. Mak, ma pe met Hi e pe met Iesu Kristo xa ilepis moletin xil xa lameul e ngan xil xa lalel, inou nasa selxatien xil ak minuk. ^{m2}Uti ni ngan taxa ti uhit rat longeongen hos na Hi. E melele xa bos, e melele xa nggeih mun, ti usak xatuk ven. Mi ngan xil xa latakil ti Hi, usak ni xil like reitin en. Mi ngan xil xa di lapol ni tesaen, usel xat xil ni. E mi ngan xil xa di lalonge misa, upet rat nenemien nae ni. E uti ni ngan taxa ti upol ni sexien xil ak itel pispisien hos xil. ⁿ³E melengien xil xa ti imei, moletin xil iexil ti navei tangan lalong pispisien hos te reitinen. !Io! Xil lihusil naha kestang xa iexil bei. Ma lileh viton titsa xil mei liti xorelis xil tangan lisa pispisien xil xa iexil bei tangan ti lilonge. ^{o4}Xil lihiles ra sepinien te reitinen e lilong xat pispisien xil usil tumulen te luvosen xil. ^{p5}E xouk, Timoti, uxuxou kuhi ve sexien nam xil. Usoh ix-eih e longpangasien xil nam, uhit rat longeongen hos vehakut, e upol ni holesok xil vus xa Hi milingi di e hem.

⁶Nasel xatuk nggeih mak vengang inou, meulien navan sangas vavus xa nggoni

^f3:8 Eks 7:11,22; 1Tim 6:5 ^g3:11 Pol 13:50; 14:5; 14:19; Sam 34:19

^h3:12 Mat 16:24; Sion 15:20; Pol 14:22 ⁱ3:14 2Tim 2:2 ^j3:15 Sion 5:39

^k3:16 2Pit 1:21; Rom 15:4 ^l3:17 2Tim 2:21

^m4:1 Pol 10:42; Rom 14:9-10; 1Pit 4:5 ⁿ4:2 Pol 20:20,31 ^o4:3 1Tim 4:1

^p4:4 1Tim 4:7; Taet 1:14

sanien kor navan ba mi Hi. Navehi ti, nihe reling ut etan. ^{q7}Inou nanggoni moletin tei te vaeen e natevae texeih e rin na Iesu Kristo. E nanggoni moletin te lohen mun, xa natnagel ti e lohen te neketen. E taxeak, naduxol xoxalite teni ngamu. Natesoh texeih e neketen navan. ^{r8}Ma taxeak, huit lohen navan datil nou e ut nesao vengan xa nanggulil naha xa Suv ien bei. Xi xa momal isa huite ak minou e melengien xa mei ilepis moletin xil en. E nave nou ti kestang, xi isa huite mun mi moletin xil vus xa iexil bei pupu tangan lipus meien nan. ^s

Pol misis Timoti tangan vatemanon vamei visali

⁹Timoti, usak pisi li utemanon mei upus nou inggak. ¹⁰Nasisuk tangan omei vengan xa Kresken ba ngamu pol e provins te hal Kalesia, e Taetas mun ba ngamu pol e taon te hal Dalmesia. E Dimas, xa eheien nan di e holesok xil te ut etan, xi milesae ra nou e be taon te hal Tesalonaeka. ^{t11}Luk kestang be xamel madi. Mak, ma uhur Mak ihe xamil, vengan xi mikila itutou ni nou e polien navan ixoni ngan xa tepol ni tetiamu. ^{u12}Nasil Tikikas di bat ni xamil e taon te hal Efeses. ^{v13}E melele xa umei, bos tangan uhur kot navan xa natelingi tete he Karpas xa de taon te hal Troas. E uleh vanuvei navan xil, e ngan xa eilep mak mu, uleh tisen navan xil itel xat xamil. ^w

¹⁴Aleksanda xa di pol ni holesok xil ni aean, xi purun pupu ni nou. E Suv Iesu

isa rilomun ni naha xa tepol ni minou ihe an. ^{x15}U laxatuk ve moletin ak, vengan xi di bae pupu ba ni longeongen hos xa xir di rabithiteni.

¹⁶Melele xa latehur kokot ni nou natehe kot, moletin tovuol mei vasoh e rin navan tangan vatutou ni nou ni sepinien. Xil vus latelesae reling nou. E natesis Hi tangan naketeh ti nasa mi xil ve rin ak. ^{y17}E Suv iaxa tesoh e rin navan e tesa xeihen minou. Xi tesak ni nou natesepin kuhi ni longeongen hos nan tangan ngan xil xa latave Siu ti lakila lalonge. Xil sangas lasemae ni tangan lavas vin nou, e Hi tesikoe xol nou ra xil. ^{z18}E Hi isikoe xol nou ra he ngan xil vus xa lasa xa labit ti lapurun nou. E xi ihur kuh nou tangan ha nite metimal nan xa eilep xa de ut nesao. Ripet rat his Hi ihe nesao e ita vehakut. Reitin.

Sepinien kor

¹⁹Nabit bos makoe mi Prisila del tiramue nan, Akuila. Nabit bos makoe mun mi Onesiforas del ngenen xil. ^{a20}Eras-tas dat e ut Korin, e naling Tropimas e ut Maelitas vengan temesei. ^{b21}Usak pisi utemanon umei vengan an tesa xil di bemei. Epulas, Pudens, Laenus e Klodia, del tua sav xil mun inggak, labit bos makoe minuk.

²²Nasis tangan Hi iti minuk, Timoti, e eheien hos nan iti mi xamim vus.

^{q4:6} Plp 2:17 ^{r4:7} 1Tim 6:12 ^{s4:8} 1Kor 9:25; Plp 3:14; 2Tim 2:5; Tem 1:12; 1Pit 5:4; Rev 2:10 ^{t4:10} Kol 4:14; Flm 1:24; 2Kor 8:23; Kal 2:3; Taet 1:4 ^{u4:11} Kol 4:14; Flm 1:24; Pol 12:12,25; 13:13; 15:37-39; Kol 4:10; Flm 1:24 ^{v4:12} Pol 20:4; Efes 6:21-22; Kol 4:7-8 ^{w4:13} Pol 20:6 ^{x4:14} Pol 19:33-34; 1Tim 1:20; 2Saml 3:39; Sam 28:4; 62:12; Pro 24:12; Rom 2:6 ^{y4:16} 2Tim 1:15
^{z4:17} Pol 27:23; 23:11; Sam 22:21; Dan 6:22 ^{a4:19} Pol 18:2; 2Tim 1:16-17
^{b4:20} Pol 19:22; Rom 16:23; Pol 20:4; 21:29

Sepinien xa diamu te

Taetas

?Visi iaxa tetis uvei ak?

Polien 28 biteni xa Pol tete Rom e kavmen te hal Rom teling moletin te vaeen xil lateketeh xol Pol e nim tei.^c E tisen sav xil xa di e Vanuvei Eo e vanuvei sav xil mun labiteni labit kavmen te hal Rom latemaen Pol teha ven temase.

E kakaoen xil nan xa tetutou ni melele nen ak, Pol tehur Taetas, Timoti e moletin sav xil mun latehusili. E melele xa lateha latesao ni moletin xil e aelan te hal Krit, Pol teling Taetas tangan ilaxat kuh Kristin hu xil ixoni pasta nae.^d

Tehe reling Taetas e Krit bus,^e e huram 64 AD (huram xil tetutou ni poten na Iesu). Tetisi tevus, Pol tehe Rom. E rute nen ak, moletin xil te vaeen te hal Rom latetal xati e lateso ni tehe nim te xeih vatei mun.

?Visi iaxa tevuli uvei ak tetiamu?

Pol tetis sepinien ak teha mi Taetas.^f

?Pol tetis uvei ak veneh?

Pol ien tehei tangan vasep kil sexien hos na vat xil te sias mi Taetas - Elda xil, lilaxat kuh moletin xil te sias, lipol ixeh e polien na Hi, e lipispisi mi moletin xil ni pispisien xil xa bos.^g

Pol ien tehei tangan vasel xat Taetas usil moletin xil te luvosen - Vengan sexien na mol-Krit xil tesa pupu,^h

Pol ien tehei tangan vasep kil sexien hos na Kristin xil mi Taetas - Pol tesis Taetas tangan ipispisi kuhi mi ngan xil xa labe momatu,ⁱ

Pol ien tehei tangan vasep kila mi Taetas usil sexien hos xil xa Kristin xil ti lipol ni mi mosav xil - Pol ien tehei Kristin xil te sias liti e tomat itel mosav xil, ti lilong xat kavmen,^j

Vatit nenemien tei te uvei ak de Taetas 1:5

Melele xa natelinguk otete aelan te hal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan.

Vatit nenemien tei mun te uvei ak de Taetas 3:4-5

E tave ti neta xa ratemak, Hi tepisen hosien e eheien nan mi xir e tete meulien e xir. Xi iaxa teleh rerat xir ra tesaen xil nar, tave ti ve holesok eah xa bos xa xir ratepol ni. !E-e! Xi teleh rerat xir vengam ien misae e xir. Ma xi tesa Ninin Eo mi xir xa mikas moten xir ra tesaen nar xil e misa meulien hu e sexien hu xil mi xir.

?Naha iaxa di e sepinien ak?

1. Pispisien xil usil sexien hos xil na elda xil. (1:1-9)

2. Pispisien xil usil moletin xil te luvosen. (1:10-16)

^c1:0 Pol 28:30-31 ^d1:0 Taet 1:5; 1Tim 1:3

^e1:0 Taet 1:5; 2:15; 3:12-13; Taet 1:1 ^f1:0 Taet 1:4; 2Tim 2:8; Kal 2:3; 2Kor 7:6; 8:23; 2Tim 4:10; Taet 1:5; Taet 3:12 ^g1:0 Taet 1:5,9; Taet 1:6; Taet 1:7-8

^h1:0 Taet 1:12; Taet 1:10-16; Taet 3:9-11 ⁱ1:0 Taet 2:2; Taet 2:3-5; Taet 2:6-8; Taet 2:9-10; Taet 2:11-15 ^j1:0 Taet 3:1; Taet 3:2; Taet 3:9-11; Taet 3:3-7

3. Pispisien xil usil sexien hos xil na Kristin xil. (2:1-15)

4. Pispisien xil usil sexien hos xa lipol ni mi mosav xil. (3:1-15)

Sepkilaen na Pol usil uvei ak

1 Inou, *Pol*, iaxa nadis uvei ak e nabe moletin tei te polien na Hi e *eloheoh* tei na Iesu Kristo.

Hi tehosei nou e tesil nou tangan ha nitutou ni neketen na ngan xil xa Hi tehosei xil mei labe nan. Xi tesil nou mun tangan nipispisi mi xil usil reitinen te suse xa likila mei limal pe meten. ²Ngan xil ak likila lihusil hisit neketen ak vengana lanesi xa Hi isa meulien sal mi xil. Vengan xa, tetiamu ni melele xa Hi tepeas ni ut etan, tehit xati xa isa meulien ak mi xir, e Hi misakras valuvos. ³E melele xa xi bit momal, Hi xa di miteh meulien e moletin xil misak ni naha xa tehit xati mei mistal be reitin sung. Reitin, naha xa Hi tesoson ni, xi di pisen ni nggo sepinien xa tesa ni minou e tesemae ni minou tangan ti nihithiteni mi mosav xil. ^k

⁴Nadis bat mi xouk, Taetas, xa ongoni natuxoli xati, ve neketen naralu be tei takes. ¹

Di nasisi tangan Hi Tamer e Iesu Kristo, xa di miteh meulien e xir, lalisa eheien hos itel tomat nalu iti minuk.

Lihosei elda xil itep

⁵Melele xa natelinguk otete aelan te hal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan: ⁶elda tei, meulien nan imal, e nenemien nan iti atou nan xati kestang. Horamue nan xil lihusil xat

Iesu e sexien nae xil ihos tangan moletin sav xil ti linaseputut ni xil ti linavit vatixil nggeih e di latalong xat tamexil ti. ^{m7}Melele xa uling moletin tei mei ihe vat te sias tangan ti valaxat moletin xil na Hi, sexien nan imese. Nahe moletin te koaien ti, e tinen nasoh ti namanon. Nahe moletin te munien ti, nahe moletin te tutuen ti, e nahe ho mani ti. !Namak ti! ⁸Ihe hisit moletin xa di nggur pilei moletin sav xil e tim san, e di ien bei neta xil kestang xa bos. Nenemien nan ixehi e polien nan xil, kakaoen nan ihos, meulien nan imal, e mikila ixuxou kuhu ve sexien nan xil. ⁹Elda ak, ihur xat kuh pispisien usil Iesu xa xir di rapispisi ni. Ikila xa pispisien xil ak be reitin. Imak, ma xi ikila ti itiamu ni mosav xil e suse te momalen, e ti ipispisi mi xil usil naha xa be reitin. E melele xa mosav xil laseputut ni pispisien nan xil, elda ak ikila ipisen ni mi xil xa naha xa xil di lasepin ni be neta sav tang. ⁿ

¹⁰Nasepin ni mak vengana moletin xil holu latamemere ni vat xil te sias ti. Pispisien na moletin xil ak be votiang tang xa reitinen tovuol en e di laluvos moletin sav xil tangan lihusil xat xil. Xil di lapispisi ni xa moletin xil vus na Hi lihe *vexahu* ixoni ngan xa Siu xil di lapol ni. ¹¹Taetas, usikoe xol pispisien nae xil. Vengan, xil di lapispisi ni holesok xil xa tamal ti tangan lavur mani vaxo en. E misak ni, moletin xil vus e tim xil di las-tokovein neketen nae. !Ngan ak tamal ti! ^{o12}Tehe *provet* tei nae tang te hal Krit iaxa tesep usil sexien nae xil tehit, "Mol-Krit xil, vehakut di laluvos e sexien nae mikavui.

Xil labe mah e, vehakut, di lanem kes ni vangexil tang."

^k1:3 Efes 1:9-10; 1Tim 1:1,11; Taet 2:10; 3:4

¹1:4 2Kor 8:23; Kal 2:3; 2Tim 4:10; 1Tim 1:2 ^{m1:6} 1Tim 3:2-7; 2Tim 2:24-26

^{n1:9} 1Tim 1:10; 2Tim 4:3; Taet 2:1 ^{o1:11} 2Tim 3:6; Sion 10:12; 1Pit 5:2

¹³Sepinien ak be reitin. Ma bos xa xouk usepin ixeih mi xil. Ngan ak isak ni xil lihusil pispisien xil kestang xa momal. ^{p14}Linahusil ti mun tumulen te luvosen xil na **Siu** xil, mu rae xil na ngan xil xa lasin reitinen na Hi. ^{q15}Ngan xil xa meulien nae momal pe met Hi, holesok xil vus momal tang mi xil. ^{**}E ngan xil xa meulien nae tamal ti pe met Hi e lataneket ti e Iesu, ma holesok xil vus tamal ti e xil vengan xa nenemien nae be muis. Ngan xil ak latakil ti naha xa momal e naha xa tamal ti. ^{r16}Nggo vulong, xil labit lakil Hi, e sexien nae xil di pisen ni xa latakil ti. Latalong xat Hi ti, sexien nae pupuru tang, e lasakras lapol ni neta tova vahos e meulien nae.^s

Kakaoen xa nggusil pispisien te reitinen

2 E xouk, uti ni holesok xil xa nggusil pispisien te reitinen. ^{t2}Upispisi ni ngan xil xa labe momatu tangan liti merou, sexien nae xil ihusil nenemien hos xil kestang, e likila lixuxou kuhi ve sexien nae xil. Neketen nae e Hi ixeih, eheien nae iti e mosav xil, e tave ti neta xa melengien xil te xeih ti imei, xil lihusil xat Iesu vehakut.

³Ihusil sexien nen tak, upispisi ni tovolih xil tangan lipisen sexien te merereen mi moletin xil vus. Xil ti linaseputut ni mosav xil ti, e linahe vat munien ti. !Namak ti! Xil ti lipispisi mi mosav xil ni sexien hos xil kestang. ⁴Ixo sexien ak, xil ti lipispisi mi ate maxoe xil tangan ti lipisen eheien nae mi tiramue e

horamue nae xil. ^{u5}Tovolih xil ti lipispisi mi xil mun tangan lixuxou kuhi ve sexien nae xil e lipol ihos mi moletin sav. Xil limaen xil mi tiramue nae xil kestang e nave mi tiramue sav xil ti. Ate maxoe xil ak mei likila xa lilaxat kuh tim sae xil e ti liling nenemien nae ihe tan tangan lipol usil nenemien na tiramue nae xil tang. Sexien hos nae xil ak isak ni moletin sav xil lisakras ti lisep purun sepinien xil na Hi. ^v

⁶Ihusil nenemien xati ak, uhiteni mi tiram maxoe xil tangan lixuxou kuhi ve sexien nae xil. ⁷Taetas, xouk mun, ixo sexien hos nam xil, upisen suse xa bos tangan mosav xil likila lihusili. E melele xa ti upispisi mi moletin xil, upol ihusil sexien tei xa moletin sav xil likila linesi en e limerere ni. ^{w8}E sepinien nam xil, ti usepin usil neta kestang xa be reitin xa moletin sav xil lasakras lasep xar ni. Isak ni, ngan xil xa di laketeh misa ni xir lihe unoun vengan xa lasakras lavit ti neta vasa vaha xat xir. ^x

⁹Ngan xil xa labe slev, xil liling nenemien nae ihe tan e lipol ihusil nenemien na suv nae xil. E holesok xil xa ti lipol ni, lipol ni ihos tangan suv nae xil lihesi xil ven. Slev xil linaso rilomun ni ti sepinien xil naha xat suv nae xil, ^{y10}e linakan ni ti neta ra xil. Lipol ihos imak tangan suv nae xil likila liling nenesien nae iti e xil. Sexien hos nae xil isak ni moletin xil vus ti linemi xa pispisien nar xil usil Hi xa miteh meulien e xir bos pupu. ^z

¹¹Bos xa upispisi mi xil usil holesok xil ak vengan xa eheien hos na Hi mei

**** 1:15** Ngoni ngan xa 1Tim 4:3-5 biteni, titsa te luvosen xil xa labe Siu di lapispisi ni xa rut sexien xil e rut anien xil mun mikila vapol ni moletin tei namal ti pe met Hi. E Pol biteni xa melele xa di ranggur neta ngan del nenemien tei xa momal, anien ak momal tang, mu sexien ak momal tangan rapol ni.

P1:13 2Tim 4:2 **q1:14** 1Tim 1:4; 4:7 **r1:15** Mat 15:11; Rom 14:20

s1:16 1Sion 1:6; 2:4 **t2:1** 2Tim 1:13; 1Tim 1:10; 2Tim 4:3; Taet 1:9

u2:4 1Tim 3:11 **v2:5** Efes 5:22 **w2:7** 1Tim 4:12; 1Pit 5:3 **x2:8** 1Pit 2:15

y2:9 Efes 6:5; 1Tim 6:1; 1Pit 2:18 **z2:10** Taet 1:3; 3:4

mistal ngamu e di miteh meulien e xir vus. ¹²Eheien hos na Hi ak di pispisi mi xir tangan ti ristokovein sexien tesa xil e rinamaen ni ti sexien xil te ut etan nalih i nenemien nar. !Namak ti! Eheien hos na Hi isak ni xir rixuxou kuhi ve sexien nar xil, rikakao ihos, e rihusil sexien xil xa momal tevi e melele xa rameul radi e ut etan. ^{a13}Di rapol ni mak vengan xa di radatil melengien hos tei xa di bemei. E melengien nen ak, xir ranesi xa Iesu Kristo xa be Hi xa di miteh meulien e xir, xi mei istal itel minehinen te xeihen nan. ¹⁴Xi maen xoteh meulien nan mei mat binat xir tangan valeh rerat xir ra xeihen te tesaen. Mak, iaxa xi miteh meulien e xir e misak ni xir mei rabe nan. Reitin, xi pol ni xir mei rameluv ra sexien xil xa mikavui e misak ni xir rabe vanut moletin tei nan xa rasav ni moletin tesav xil. Io, xir rabe moletin nan xil xa iexir bei pupu tangan ti ripol ni polien hos xil xa momal tevi pe meten. ^b

¹⁵Hi milinguk e polien nan e misa xeihen minuk. Ma, upol itel xeihen ak e melele xa ti upispisi mi moletin xil usil suse xa momal tangan ti lihusili, e melele xa ti usel xat xil tangan linahusil ti mun suse te tesaen. Usil sexien xil ak, onamaen xil ti linanem male ni xouk. ^c

Sexien na moletin xil xa langgusil Hi

3 Usep rilomun ni mi moletin nam xil tangan ti liling nenemien nae ihe tan e ti lipol ihusil nenemien na moletin xil te kavmen e eilep sav nae xil e ti litaeong xat xil. Xil livue xat xil tangan lipol ni polien hos xil vus. ^{d2}Uhiteni mun mi xil tangan linasepin ti nasa mi moletin sav e linangor ti natel xil. !Namak ti! Xil

lipol ni ihos mi xil itel sexien te merouen, e ti lipisen merereen mi xil vehakut. ³Iexir nabong ni ti xa, tetiamu, xir mun ratehe hisit moletin xil xa ratexoni xil tang: ratehe unu, ratnalong xat Hi ti, e di ratehusil suse xil vus te luvosen. Tetiamu, sexien tesa xil e eheien te holesok xil te ut etan tevulu xat xir e di tetel xir. Ratehe elu mi mosav xil, e ratehesi xir melele xa ratepus mosav xil latemot e tesaen. Moletin xil, iexil teat xir, e xir mun, iexir di teat xil. ^{e4}E tave ti neta xa ratemak, Hi tepisen hosien e eheien nan mi xir e tete meulien e xir. ^{f5}Xi iaxa teleh rerat xir ra tesaen xil nar, tave ti ve holesok eah xa bos xa xir ratepol ni. !E-e! Xi teleh rerat xir vengan ien misae e xir. Ma xi tesa **Ninin Eo** mi xir xa mikas moten xir ra tesaen nar xil e misa meulien hu e sexien hu xil mi xir. ⁶E venggan xa hosien nan mahulong pupu, Hi tesa Ninin Eo mei tepolu e meulien nar. Maten na Iesu Kristo xa tete meulien e xir iaxa tepol ni suse temese tangan Ninin Eo imei ve xir. ⁸⁷Eheien hos nan misak ni xi tepol ni xir ramal pe meten, tave ti neta xa rabe moletin tesa xil tang. Misak ni, xosali, xir rakila mei rabe horamue nan xil e ranesi en xa be reitin xa xir rihur holesok hos xil melele xa ha riti itela e ut nesao. ^{h8}Sepinien xil xa di nabiteni minuk be reitin.

Misak ni, vehakut, ieok bei xa xouk tit upispisi mi moletin xil usil holesok xil ak. Upol ni imak tangan ngan xil xa di langgusil Hi, nenemien nae ixeih tangan ti lipol ni polien hos xil. Hisit pispisien xil ak bos e di dutou ni xir vus. ⁹Xouk onamaen xouk ti ha onasep tetavoe natel xil usil holesok xil xa be neta sav tang.

^{a2:12} 1Kor 1:7; Plp 3:20; 1Sion 2:16; Efes 1:4

^{b2:14} Kal 1:4; 2:20; 1Tim 2:6; Sam 130:8; Eks 19:5; Dut 4:20; 7:6; 14:2; Esek 37:23; 1Pit 2:9; Efes 2:10; 1Pit 3:13 ^{c2:15} 1Tim 4:12 ^{d3:1} Rom 13:1; 1Pit 2:13

^{e3:3} 1Kor 6:11; Efes 2:2; 5:8 ^{f3:4} Taet 1:3; 2:10; Efes 2:8-9; 2Tim 1:9; Efes 5:26; Sion 3:5 ^{g3:6} Soel 2:28 ^{h3:7} Rom 3:24

Ngan xil ak di lasep usil avu kokot nae bemei duxoh xil, e iexil bei tangan ti langor pupu usil rae xil na Siu xil. Hisit sexien xil ak misakras vatutou ni ti moletin e be neta sav tang. ⁱ¹⁰Xosxa moletin tei di pol ni sexien xil ak xa di misak ni moletin xil di latasil ra xil, vatei takes, ha usepin ixehi mini tangan istokovein sexien nan xil ak. E xosxa tastokovein sexien nan xil ti, ma ha usepin mini vatei mun. E xosxa dit nggulehi ni sexien nan xil, ma onamaen ni ti mun namei navituei natel xamim. ^{j11}Vengan xa sexien nan xil nggeih, di pisen ni xa xi be hisit moletin tesa tei xa tekavitou ni reitinen na Hi ngamu e di milihi longpangasien bemei e xi tasen. ^k

Sepinien kor na Pol

¹²Taetas, nisil Artemeas mu Tikikas ihat minuk tangan tei e xalu ihur voni-

nom. Ti, xouk usak pisi tangan mei upus nou e taon te hal Nikopolis, vengan xa inou nita tak ha ituxoh hoxalite te aveti xil te an tesa xa di bemei. ^{l13}Usak pisi tangan ututou ni Apolos, itel Sinas xa be moletin te ling xat rae xil en. ^{††}Xalu ti lalohusil suse nalu lalohat xiak. Ma nasasuk tangan upus rin nalu e usa holesok xil xa iexalu ihei tangan lalilehi itel xat xalu. ^{m14}Moletin nar xil likila lisa xil ve polien xil xa bos. Imak, ma likila ti litutou ni ngan xil xa labe tamure ni holesok xil holu. Moletin nam xil linati votei ti. Bos mak mu lipol ni neta ngan xa ihos itel meulien nae. ⁿ

¹⁵Ngan xil xa madi vituei inggak, labit 'bos makoe' mi xouk. E uhit 'bos makoe' namem mi tuemem xil te neketen.

Nasis tangan eheien hos na Hi iti mi xamim vus.

^{††}**3:13** Sinas tehe loa tei.

ⁱ**3:9** 2Tim 2:14,16,23 ^j**3:10** Mat 18:15-17 ^k**3:11** 1Tim 6:4-5

^l**3:12** Pol 20:4; Efes 6:21-22; Kol 4:7-8; 2Tim 4:12

^m**3:13** Pol 18:24; 1Kor 3:5-6; 16:12 ⁿ**3:14** Efes 4:28; Taet 2:14

Sepinien xa diamu te

Filimon

?Visi iaxa tetis uvei ak?

Pol tetis sepinien ak^o

?Visi iaxa tevuli uvei ak tetiamu?

Pol tetis sepinien ak teha mi moletin tei te sias te hal Kolose, hisen Filimon.^p

?Pol tetis uvei ak veneh?

Pol ien tehei tangan vapisen suse xa Kristin xil liketeh ihos ni ngan xil xa di lasa mi xil - Nggusil rae na mol-Rom xil, momal tangan Filimon vahas vin Onesimas vengon xa xi mikan ni neta tei nan e milesae relingi.^q Imak, ma xir mun rikila riketeh ihos rilomun mi ngan xil xa di lapol misa mi xir.

Pol ien tehei tangan vapisen ni xa, pe met Hi, xir vus rapin tang - E melele xa Pol temeul teta, ngan xil xa labe eilep, e ngan xil xa labe slev nae, lasakras lamos vituei. E nggo Iesu, xir vus rapin tang,^r neta sav xos rabe eilep mu rabe slev, rabe moletin xa holesok nar holu mu rabe hoeo tang, rabe moletin te malux-oluk mu rabe metalo, mu rabe malohos mu rabe atou. Vengan xir vus xa di raneket e Iesu, rapin tang pe met Hi.

Pol ien tehei tangan vapisen sexien te merereen - Pol tehe eilep te sias e mikila vasepin vaxeih mi Filimon tangan ihur pilei Onesimas e navasi ti.^s Bos xa xir mun rimerere ni moletin sav xil.

Vatit nenemien tei te uvei ak de Filimon 1:15-16

Nahe xos Hi maen Onesimas telesae relinguk vuteili tangan melele xa itilomun ihat, xi mikila ita kat visaluk vehakut. E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengon xi be slev nam, e be tumali mun vari e his Suv Iesu.

?Naha iaxa di e uvei ak?

1. Pol besi xi himetu ve polien na Filimon. (1:1-7)
2. Pol misis Filimon tangan iketeh ihos rilomun mi Onesimas. (1:8-25)

Sepkilaen na Pol usil uvei ak

1 Inou *Pol*, nade nim te xeih vengon xa di nabit rat longongen hos usil Iesu Kristo. ^t

Inou del tumali Timoti, mabit bos makoe minuk, Filimon. Xouk obe moletin hos tei te polien na Iesu nggoni xamel e eheien namel di e xouk. ²Mabit malhit bos makoe mun mi Apia, xa be hinoxoli namel. E bos makoe mun mi Akipas, xa di pol mi Iesu nggoni moletin hos tei te vaeen nan nggoni xamel. E bos makoe mun mi ngan xil xa langgusil Hi xa di lasukul e tim sam. ^u

³Nasis tangan eheien hos e tomat na Hi Tamer e Suv nar, Iesu Kristo, iti mi xamim. ^v

^o1:0 Flm 1:9,19; Pol 28:16-31; Kol 4:7-9 ^p1:0 Flm 1:1; Flm 1:19; Flm 1:2; Flm 1:16; Flm 1:9-10 ^q1:0 Flm 1:18-19; Flm 1:9-10; Flm 1:15-16

^r1:0 Flm 1:1-2,16,23-24 ^s1:0 Flm 1:8; Flm 1:9,14; Flm 1:21 ^t1:1 Efes 3:1; 4:1; Plp 1:7,13; Flm 1:9 ^u1:2 Kol 4:17 ^v1:3 Rom 1:7; Kal 1:3; Plp 1:2

Pol misep usil eheien e neketen na Filimon

⁴Tuxoli Filimon, melele xa di nanem xatuk e sisen xil navan, vehakut di names Hi ve xouk. ^{w5}Nasis mak vengana xa nalongeong usil neketen nam e Iesu Kristo, e eheien xa di opisen ni mi moletin xil na Hi. ⁶Nasis mi Hi tangan melele xa mumei vituei, isak ni neketen namim ixehi mu, e isak ni xamim mukilakil kuhi ni holesok hos xil vus xa be namim vengana mubisti del Iesu Kristo. ^{x7}Tuxoli, eheien nam mi mosav misak ni nou nabesi pupu ni nou e di dal rat nenemien na moletin xil na Hi. ^y

Pol misis Filimon tangan ihur pilei slev nan xa telesae relingi

⁸Vengan xa nakil kuh eheien nam mi mosav xil, inou nakila xa xosxa nisemae minuk e his Iesu Kristo tangan upol ni neta ngan, ma xouk upol ni. ⁹E nabesi nou tang tangan nisisuk e upol ni naha xa ieok bei ve eheien nam e nou, xa nabe momatu ngamu e nade nim te xeih taxeak ve his Iesu Kristo. ^{z10}Nasisuk ve rin na Onesimas. Xi nggoni horamue tei navan vengana xa, melele xa nade nim te xeih, natetutou ni e xi tekamet meulien hu. ^{a11}Tetiamu, melele xa telesae relinguk, xi tenave moletin hos te tutouen ti. E taxeak, xi bos tangan itutou ni xouk, e itutou ni nou mun. ^{‡‡}

¹²Eheien navan di pupu e Onesimas. E neta sav xa mak, di nasa rilomun ni bat minuk. ¹³Ieok bei tangan namur xati vate visal nou vaxolesuk tangan vatutou ni nou e melele xa nade nim te xeih ve longegen hos xa di nabithiteni.

^{b14}E ieok ti tavei napol ni ti neta xa xouk otamaen nou ti tangan napol ni. !E-e! Ieok bei tangan nipol ni naha xa xouk kestang di onemi obit bos. Isak ni, tutouen xa usa ni minou ihusil nenemien hos nam kestang, e nave ti vengana nanggeih xatuk tangan opol ni. ^c

¹⁵Nahe xos Hi maen Onesimas telesae relinguk vuteili tangan melele xa itilomun ihat, xi mikila ita kat visaluk vehakut. ¹⁶E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengana xi be slev nam, e be tumali mun vari e his Suv Iesu. ^d

¹⁷Mak, ma xosxa onemi obit rupol mi Suv tei takes, ma uhur pilei ixoni ngan taxa ovur pilei nou. ¹⁸Xosxa xi tepol ni neta tova tesa minuk, mu pol ni kaon tei delak, inou iaxa nixal rati. ¹⁹!Pus ti mu! Nadis ngan ak ni heok xati: *Inou Pol nixal rat holesok xil xa be kaon na Onesimas.* (E xouk iem nabong ni kaon nam ti xa del xat nou, vengana xouk otehur meulien hu texo nou.) ²⁰Tuxoli hos navan li, ieok bei pupu tangan upol ni naha xa inou di nasisi minuk vengana ralu vus rube moletin na Iesu Kristo. Ngan ak isak ni nou nipolu ni sien.

²¹Melele xa di ladis sepinien navan xil ak, inou nakil kuhi mak xa xouk upol ni ixoni ngan xa di nasisi. !Io! E nakila xa upol ni ili. ²²Nabit nasikus mun ve neta tei: usak mesen vontoen tova e nim mam tangan mei nita en. Vengana nake reitin xa Hi isa huit sisen namim tangan nistal ra nim te xeih ak e nihata nite visal xamim rilomun.

^{‡‡}**1:11** Onesimas be slev tei na Filimon. His Onesimas, koute teni be 'bos te tutouen.' Misak ni, Pol di misep pepamen ni hisen.

^w**1:4** Rom 1:8-9 ^x**1:6** Plp 1:9; Kol 1:9 ^y**1:7** 2Kor 7:4

^z**1:9** Efes 3:1; 4:1; Plp 1:7,13; Flm 1:1 ^a**1:10** 1Kor 4:15; Kal 4:19; Kol 4:9

^b**1:13** Plp 2:30 ^c**1:14** 2Kor 9:7; 1Pit 5:2 ^d**1:16** 1Tim 6:2

Sepinien kor

²³ Epapras xa de nim te xeih del nou ve his Iesu Kristo, xi bit 'bos makoe' minuk.
^{e24} E Mak, Aristakas, Dimas e Luk mun

xa di mapol vituei, xil mun labit lavit 'bos makoe' minuk.

²⁵ Nasis tangan eheien hos na Suv Iesu iti mi xamim vus.

Sepinien xa diamu te

Hibru

?Visi iaxa tetis uvei ak?

Moletin tovuol vakil kuh visi iaxa tetis sepinien ak. E lakila xa moletin ak tehe Siu teif

E, xosali, moletin xil holu lake reitin en xa Apolos iaxa tetisi. Apolos tehe Siu tei te taon te hal Aleksandria xa tesukul kuhi e tekil kuh Vanuvei Eo na Hi. Xi tehe vat te sias xa mikila vasepin kuhi e vaspis kuhi ni mi moletin xil xa Hi tehosei Iesu mei tehe Mesaea nae.^g E tave ti neta xa ratakil kuh ti xa visi tetis uvei ak te Hibru, Kristin xil vus xa latevuli mei duxoh xosali lapus kila xa metisouen xa di en nggo visal Hi.

Moletin tovuol xa vakil kuh melele xati xa latetis sepinien ak. Lakila tang xa latetisi tetiamu ni hram 70 AD (hram xil xa tetutou ni melele xa Iesu tepot en) vengon xa, e melele nen ak, moletin te vaeen xil te kavmen te hal Rom latemei e latehu lenen taon te hal Serusalem e Nim Eo na Hi xa da en. E, e uvei te Hibru ak, moletin xa tetisi tesepin texoni ngan taxa pris xil di tamu latesa sanien eo e Nim Eo ak.^h

?Visi iaxa tevuli uvei ak tetiamu?

Uvei ak, latetisi teha mi Kristin xil xa latehe Siu.ⁱ

?Latetis uvei ak veneh?

Latetis uvei ak tangan vapisen ni xa Iesu be eilep mak mu mili holesok xil vus xa Siu xil di laling neketen nae di en.

Iesu be eilep mak mu mili provet xil tetiamu.^j

Iesu be eilep mak mu mili masxaxa xil.^k

Iesu be eilep mak mu mili Mosis.^l

Iesu be eilep mak mu mili Sosua.^m

Iesu be eilep mak mu mili vatar na pris xil.ⁿ

Iesu be eilep mak mu mili pris xil xa lapol e Nim Eo.^o

Polien na Iesu be eilep mak mu mili polien xil vus xa latepol ni e Nim Tavolin na Hi.^p

Re Iesu tesak ni hitxatien hu na Hi mei tehos mak mu teli hitxatien matu nan.^q

Sanien eo te meulien na Iesu bos mak mu mili sen sanien eo xil vus xa tetiamu.^r

Nggo Iesu, ulixir takan ti tangan ramei visal Hi vaxoni ngan xa mol-Isrel xil tetiamu ulixil tekan pupu tangan lamei visali e Vathu Senae.^s

Latetis uvei ak tangan vassel xat Kristin xil tangan lisoh ixeh e neketen nae - Kristin xil holu xa latehe Siu latehur sakpurunien xil holu texo he Siu sav xil xa latehit rae xil te hitxatien te xeih matu na Hi tehos mak mu. Xil latehisu mi sakpurunien xil texo he ngan xil xa latave Siu ti xa latehit hi xil labe holu e iexil tehei tangan lavusil sexien tesa xil. E latehisu mi sakpurunien xil texo he ngan xil te kavmen te hal Rom xa di latehiteni latehit tehe Kristin xil iaxa di latelihi an

^f1:0 Hib 1:1; Hib 2:3; Pol 4:36; Pol 11:25-26; 13:1-15:41 ^g1:0 Pol 18:24,28

^h1:0 Hib 5:1-11; 8:3-5 ⁱ1:0 Hib 1:1; Hib 6:4-6; Hib 12:1 ^j1:0 Hib 1:1-3

^k1:0 Hib 1:4-14; 2:5 ^l1:0 Hib 3:1-6 ^m1:0 Hib 4:6-11

ⁿ1:0 Hib 5:1-10; 7:26-8:2 ^o1:0 Hib 6:20-7:25 ^p1:0 Hib 8:3-6; 9:1-28

^q1:0 Hib 8:7-13 ^r1:0 Hib 10:1-14 ^s1:0 Hib 12:18-24

tesa xil temeï xa tesak ni mae kekaten xa mahulong di teat moletin xil. Ma, xil latepurun Kristin xil e latehas xil holu latelel. E uvei ak te Hibru di misel xat Kristin xil tangan listokovein nenexoen e tesaen nae xil vus, e liloh ixeh e lohen te neketen xa Hi teling xil en tetel nenemien xa lituxoh hoxalite teni.[†]

Vatit nenemien tei te uvei ak de Hibru 1:1-3

Tetiamu, Hi tesepin mi avu nar xil melele xil holu e texo suse xil holu texo provet xil. E, e Melengien Kor xil xa radi en xiak, Hi tesepin mi xir texo Natneli xa tepeas kokot ni holesok xil xa ladi. E tehosei Natneli tangan iling holesok xil vus ak ihe hen. Xi nggoni Hi e rin xil vus, e di pisen minehinen te xeihen na Hi nggoni kilas tei xa di pisen minehinen te eai. Del xeihen te sepinien nan, Natneli di misak ni holesok xil vus xa tepeas ni mei di tak duxoh xosali nggusil nenemien nan. E melele xa Nat Hi tepol vuol ni holesok xil tangan vakas moten moletin xil mei lamease ra tesaen nae xil tangan Hi vaketeh vahos rilomun mi xil, xi teha tetotan e ut nesao e rin metu te von xeihen na Hi xa minehinen te xeihen nan eilep pupu.

?Naha iaxa di e uvei ak?

1. Naha xa Hi tepisen ni mi xir nggo Natneli bos mak mu mili naha xa tepisen ni texo provet xil tetiamu. (1:1-4)

2. Iesu be eilep mak mu mili eilep xil tetiamu. (1:5-7:28)

a. Iesu be eilep mak mu mili masxaxa xil. (1:5-2:18)

b. Iesu be eilep mak mu mili Mosis. (3:1-4:13)

c. Iesu be eilep mak mu mili pris xil xa lastal langgo vatimol na Eron. (4:14-7:28)

3. Polien na Iesu nggoni vatixar na pris xil bos mak mu mili polien xil vus xa latepol ni tetiamu e Nim Tavolin. (8:1-10:18)

a. Hitxatien te xeih hu bos mak mu mili hitxatien te xeih metu. (8:1-13)

b. Nim Eo e ut nesao xa Iesu di pol en bos mak mu mili Nim Tavolin tetiamu. (9:1-10)

c. Sanien eo na Iesu bos mak mu mili sanien eo xil vus xa tetiamu. (9:1-10:18)

4. Sexien xil xa di ranggusil Hi nggo suse te neketen bos mak mu mili sexien xa di rasak pisi tangan ravusili nggo suse te rae xil na Siu xil. (10:19-12:29)

a. Selxatien tangan ulixir nakan ti tangan rave visal Hi. (10:19-25)

b. Selxatien tangan rinastokovein neketen nar ti. (10:26-31)

c. Selxatien tangan risoh ixeh e neketen nar. (10:32-12:13)

d. Selxatien tangan meulien nar imese tevi. (12:14-17)

e. Selxatien tangan rilong xat Iesu e rinasin hitxatien te xeih hu na Hi ti. (12:18-29)

5. Sepinien kor. (13:1-25)

Hi tesepin mi moletin xil texo Natneli

1 Tetiamu, Hi tesepin mi avu nar xil melele xil holu e texo suse xil holu texo **provet** xil. ²E, e Melengien Kor xil xa radi en xiak, Hi tesepin mi xir texo Natneli xa tepeas kokot ni holesok xil xa ladi. E tehosei Natneli tangan iling holesok xil vus ak ihe hen. ³Xi nggoni Hi e rin xil vus, e di pisen minehinen te xeihen na Hi nggoni kilas tei xa di pisen minehinen te eai. Del xeihen te sepinien nan, Natneli di misak ni holesok xil vus xa tepeas ni mei di tak duxoh xosali nggusil

[†]1:0 Hib 12:1

nenemien nan. E melele xa Nat Hi tepol vuol ni holesok xil tangan vakas moten moletin xil mei lamease ra **tesaen** nae xil tangan Hi vaketeh vahos rilomun mi xil, xi teha tetotan e ut nesao e rin metu te von xeiheh na Hi xa minehinen te xeiheh nan eilep pupu.

Nat Hi be eilep mak mu mili masxaxa xil

⁴ Hi tesak ni Natneli mei be eilep mak mu mili **masxaxa** xil. Vengan xa his xa Hi tesa ni mini be eilep mak mu mili hi-sexil. ^{u5} Ngan ak be reitin vengan xa Hi tenaviteni ti mi masxaxa tova tenavit, “Xouk obe Natuxoli, e xosalí, inou mei nabe Tamom.” (Sam 2:7)^v E mi masxaxa tova mun, Hi tenaviteni ti tenavit,

“Inou nihe Tamen, e xi ihe Natuxoli.” (2Saml 7:14)^w

⁶ Di, melele xa Hi tesil muimol nan temei e ut etan, tehiteni tehit, “Masxaxa xil vus na Hi ti limot mini.” (Dut 32:43)^x

⁷ E, e rin te masxaxa xil, tehiteni tehit, “Hi misak ni masxaxa xil labe rute xa di misil xil laba en nggoni ngan xa labe votiang xil.

E labe moletin te polien nan xil xa di misa xeiheh mi xil nggoni ngan xa labe upang xa di minggan.” (Sam 104:4)

⁸ E usil Natneli, Hi biteni bit, “Lelaxatien nam, O Hi, ita vehakut xa vehakut tang.

Xouk di olaxat kuh moletin nam xil nggusil naha xa momal.

⁹ Iem bei holesok xil xa momal e iem nggat sexien xil xa mikavui. Mak, ma inou, Hi nam, natehosei xouk tenggan uhur merereen e sien xa ileli ngan xa ngan xil xa ladi visaluk latehuri.” (Sam 45:6-7)

¹⁰ E xi tehiteni mun tehit, “O Suv, tetiamu, otepeas ni ut etan, e otepol ni tilang hat tetel holesok xil xa ladi en.

¹¹ Tave ti neta xa holesok xil ak likesae, e xouk uta vehakut.

Holesok xil ak mei lihe neta metu e limerer lixoni talmusu xil.

¹² Reitin, xouk uso viton xil lixoni talmusu xil e uso xil liha.

E uxoles xil ixoni labe eising xil tang e upol ni holesok xil vus mei lihe neta hu. E xouk utat imak tang vehakut, meulien nam navus ti vatova.” (Sam 102:25-27)

¹³ Hi tenaviteni ti mi masxaxa tova tenavit, “Xouk mei utotan e von xeiheh inggak e riuk metu

ituxoh melele xa niling ngan xil xa labe elu nam liti pe hem.” (Sam 110:1)

¹⁴ ?Masxaxa xil labe naha? Xil labe ninin xil xa di lapol mi Hi. E xi di misil xil laba tangan latutou ni ngan xil xa xi tehosei xil tangan iteh meulien e xil.^y

Xosxa ranem male ni longeongen hos na Hi, rasakras ralesae reling ekaten na Hi

2 Mak, ma vengan xa Nat Hi be eilep mak mu mili masxaxa xil, xir rix-uxou kuhi tangan riteli ixeh e reitinen ak e rinamaen nenemien nar ti nasal nave relingi. ² Rae xil tetiamu xa Hi tehithiteni mi avu nar xil texo **masxaxa** xil tehe reitin. E ngan xil xa latnahusili ti mu latnalong xati ti latehur pangasien xa momal tangan lavuri. ^{z3} ?E xosxa avu nar xil lasakras lalesae reling pangasien ak, ma itep mi xir xosxa di ranem male ni longeongen xa eilep xiak usil midep iaxa Hi di miteh meulien e moletin xil? Pangasien xa imei mi xir ihe eilep pupu.

^{u1:4} Efes 1:21; Plp 2:9 ^{v1:5} Pol 13:33; Hib 5:5 ^{w1:5} 1Kron 17:13

^{x1:6} Sam 97:7 ^{y1:14} Sam 34:7; 91:11 ^{z2:2} Pol 7:38,53; Kal 3:19

E Suv Iesu vari tehithiten kokot ni longgeongen hos ak. Di, ngan xil xa lateteong ni latehit rati temei e valkesao tangan mei rikila xa be reitin. ^{a4}E Hi tepisen ni xa be reitin texo merekel xil e holesok sav xil xa tellep. E rapusi mun xa be reitin nggo sanien xil xa **Ninin Eo** di misa kekes ni mi moletin xil nggusil nenemien na Hi. ^b

Hi tehosei Iesu Kristo tangan mei ihe eilep mak mu ili holesok xil vus nggo longpangasien e maten nan

⁵Melele xa di nasep usil ut etan xa Hi isak ni mei ihe neta hu, bos tangan mukila xa tenahosei masxaxa xil ti tangan valing holesok xil ak ha vati pe hexil. ⁶Vengan nggoni ngan xa Vanuvei Eo tehiteni e ut tei tehit,

“?O Hi, moletin xil labe naha iaxa di onem usil xil mak?”

?Veneh ma di olaxat kuh nat moletin xil mak?

⁷Otesak ni xil mei latehe etan mak mu ni masxaxa xil tehe vuteili tang.

E tetutou sung, otesa von merereen mi xil e oteling vat luvoluv te lelatiatien teti e vatixil.

⁸Xouk oteling holesok xil vus xa otepeas ni ladi pe hexil tangan lilaxati.” (Sam 8:4-6)^c

Melele xa biteni bit, Hi *“teling holesok xil vus xa tepeas ni ladi pe hexil tangan lilaxati,”* rakila xa neta tovuol xa latalaxati ti. Tave ti neta xa ngan ak be reitin, taxeak di ratapus xil ti xa holesok xil di lalong xat rae moletin xil. ⁹E rapus Iesu xa *tehe vuteili tang mei tehe tan mu ni masxaxa xil.* E taxeak, rakila xa di nggur von merereen e vatluvoluv te lelatiatien de vatin vengan xa tehur longpangasien xil e temat tehinat xir. Reitin, ve eheien hos

nan, Hi teling xati tangan Iesu imat ve rin na moletin xil vus. ^d

¹⁰Holesok xil vus xa Hi tesak ni xil ladi, ladi tangan lapien xeihen nan e lapet rat hisen. E momal tevi xa Hi temaen Iesu tangan vahisu ni longpangasien xil tangan vasak ni mei vama tevi tangan, itutou ni, ha imat e iteh meulien e moletin xil. Ve rin ak, Hi tesak ni Iesu mei tehe eilep mak mu ni horamue sav nan xil tangan itiamu ni xil ha liti visali e minehinen te xeihen nan. ¹¹Ma Iesu del ngan xil xa tekas moten xil lamese ra tesaen nae, Tamexil tei takes. Misak ni, Iesu tave unoun ti tangan vakes xil ni tuneli mu hineli xil. ^{e12}Vengan xa xi tehiteni mi Hi tehit,

“Inou nihithiten usiluk mi tuxoli e hinoxoli xil.

Melele xa xamem mumei vituei, inou nisa memesien ihat minuk.” (Sam 22:22)

¹³Xi tehiteni mun tehit,

“Inou niling nenesien navan e Hi.” (Aes 8:17)^f

E xi tehiteni mun tehit, *“Inou xiak, del horamue xil xa Hi tesa ni minou.”* (Aes 8:18)

¹⁴Vengan xa horamue xil ak labe moletin xil xa tenbexil e rexil di, Iesu mun temei texoni xil. Tepol ni temak tangan, texo maten nan, xi mikila vahas tan ni **Temat** xa di tetal xat xeihen te maten. ^{g15}E texo rin ak, Iesu telal rat ngan xil xa ulikanen te maten tevar xat xil e melengien xil vus te meulien nae tangan ha lameluv.

¹⁶Makila xa Iesu tenamei ti tangan vatutou ni masxaxa xil. Xi temei *“tangan vatutou ni ngan xil xa lastal langgo vatimol na Ebrahim.”* (Aes 41:8-9) ¹⁷Mak, ma momal xa xi temei texoni tuneli e hineli xil e rin xil vus. E, texo suse ak, xi mei tepolu ni esaen ve xil e mikila vatutou ni xil

^{a2:3} Hib 10:29; 12:25 ^{b2:4} 1Kor 12:4,11 ^{c2:8} 1Kor 15:27

^{d2:9} Plp 2:8-9 ^{e2:11} Mat 25:40; Mak 3:35; Sion 20:17

^{f2:13} 2Saml 22:3; Aes 12:2 ^{g2:14} Sion 12:31; 1Sion 3:8; Rev 12:10

nggoni **vatixar na pris xil** xa tepol vuol ni holesok xil xa Hi teling xati tangan ipol ni. Xi tesa xoteh meulien nan texoni sanien eo tei tangan vaserev rin na moletin xil pe met Hi e vasak ni Hi mei vaketeh vahos rilomun mi xil e nanem ti mun usil **tesaen** nae xil. ^{h18}E vengang xa xi mun tehur sakpisien e longpangasien xil, xi ikila itutou ni ngan xil xa di langgur sakpisien xil.¹

Hi pisen ni xa Iesu be eilep mak mu mili avu Mosis tetiamu

3 Tuxoli e hinoxoli xil, Hi xa de ut ne-sao tekes xir tangan mei rimos vituei e rihe moletin eo nan xil. Ihos pupu tangan munem usil Iesu Kristo, ngan xa Hi tesila texoni **eloheoh** nan mi xir, e tepol texoni **vatixar na pris xil** e rin te neketen nar pe met Hi. ^{j2}E Iesu tepol vuol ni holesok xil vus xa Hi teling xati tangan ipol ni. Ngan ak texoni **Mosis**, xa “tepol vuol ni holesok xil e nim na Hi,” (Nam 12:7) xa koute teni be moletin nan xil. ³E moletin xa pol ni nim tei, lasa merereen mini mili merereen xa lapien ni ve nim kestang. E nggusil rin ak, momal tangan merereen xa lasa ni mi Iesu ili ngan xa latesa ni mi Mosis. ⁴Be reitin xa nim xil vus, moletin tei tepol ni. E Hi, xi vari tepol ni holesok xil vus. ⁵Mosis tepol sen holesok xil vus xa tehoh tehuhil nenemien na Hi texoni moletin te polien hos tei e nim na Hi. E tesepe usil holesok xil xa ti lisepe usili e melele xil xa ti imei. ⁶Kristo mun tepol sen holesok xil tehuhil nenemien na Hi. E xi tepol texoni Natneli xa be eilep mak mu mili Mosis e nim na Hi. E xir vari iaxa rabe nim nan ak xosxa ulixir nakan ti, e nenemien nar ixeh e holesok xil xa di raling nenesien nar di en. ^k

Selxatien tangan rinanem male ni rae Hi ti e naha xa ien bei tangan vapol ni e meulien nar

⁷Bos tangan riteong ni selxatien na **Ninin Eo** melele xa biteni bit,
“Xosali, xosxa mulong rae Hi,
⁸munanem male ni ti naxoni avu namim xil xa tetiamu di latepol ni e melele xa latekavitou ni,

e naxoni ngan ti mun xa latepol ni e uru-vuol tangan lasak pisi.¹

⁹Hi tesepe usil xil tehit,

“E rute ak, avu namim xil latehit lasak pis inou tangan lapus ti xa natete visal xil mu natnara ti visal xil, tave ti neta xa latepus holesok xil vus xa natepol ni ni metexil huram hanutap lu (40) ngamu.

¹⁰Tesak ni, ieok teat ngan xil vus te melele nen ak.

Vehakut, latepol ni vatixil texeih xat inou, e latehit linakil ti suse xil xa ieok bei tangan nitel xil liha en.

¹¹Tesak ni, ieok teat xil e natehit xati xa linava ti e rute xa nateling xati tangan liha lingel kuhi en.” (Sam 95:7-11)^m

¹²Tuxoli e hinoxoli xil, muxuxou kuhi tangan xamim kekes munahur ti nenenemien xil xa misa xa nasak ni neketen namim namot e munakavitou ni Hi ti xa meul. ¹³‘Xosali’ xa latesep usili xiak di tamu be melele xa radi en taxeak. Ve rin ak, mesal da tamu tangan muhiles meulien namim. Ma, vehakut xamim kekes ti musel xat xamim mun tang tangan munamaen **tesaen** ti naluvos xamim e nasak ni xamim ti munanem male ni rae na Hi. ¹⁴Vengan xosxa risoh ixeh e neketen nar ha ituxoh hoxalit meulien nar, ma ripisen ni xa di rabisti del Kristo

^{h2:17} Plp 2:7; Hib 2:14; 1Sion 2:2; 4:10 ^{i2:18} Hib 4:15

^{j3:1} Hib 4:14; 6:20; 7:26; 8:1; 9:11 ^{k3:6} Kol 1:23; Hib 3:14

^{l3:8} Eks 17:7; Nam 20:2-5 ^{m3:11} Nam 14:21-23

reitin. ⁿ¹⁵Ngan ak nggoni naha xa Vanuvei Eo biteni bit,

“Xosali, xosxa mulong rae Hi, munanem male ni ti naxoni ngan xa avu namim xil tetiamu latepol ni e melele xa latekavitou ni.” (Sam 95:7-8)^o

¹⁶?Visi xil iaxa latelong rae Hi e latekavitou ni? Tehe ngan xil vus xa lateti pe he Mosis xa Hi teleh rerat xil ra kantri te hal *Isip*. ^{p17}?E visi iaxa Hi ien teat xil huram hanutap lu (40)? Ien teat moletin xil xa latepol tesa, ma tesak ni xil kekes latekiri e latele e uruvuol. ^{q18}?E mi visi iaxa Hi tehit xati xa linava ti e rute xa teling xati tangan liha lingel kuhi en? Tehit xati temak mi ngan xil xa latelong ras raen. ^{r19}Misak ni, rapusi xa xil latnava ti e rute ak vengan xa iexil ti tenavei tangan laling neketen nae en.

Hi bit xati xa moletin nan xil ha liti e ut te ngengelen

4 E xosali, ngengelen xa Hi tehit xati tehit isa ni mi moletin nan xil da tamu. Misak ni, rixuxou kuhi xa ti e xir nale ras suse nan xa ihuri ha ituxoh ut te ngengelen nen ak. ²Vengan xa xir ralong longeongen hos nggoni ngan taxa mol-Isrel xil tetiamu latelonge. E longeongen hos ak tenatutou ni ti xil vengan xa melele xa latelonge, latnahuri ti vatel neketen. ³Nggoni ngan xa Hi tehiteni tehit,

“Teok teat xil e natehit xati xa linava ti e rute xa nateling xati tangan liha lingel kuhi en.” (Sam 95:11)^s

Xi tehit usil ngengelen ak, tave ti neta xa tepol vuol ni polien nan nousav ngamu melele xa tepeas ni ut etan. Ma, ngengelen ak da tamu tangan xir xa neketen nar di rikila rihuri. ⁴Rakila xa ngan ak

be reitin vengan xa rute tei e Vanuvei Eo biteni mak bit, “E melengien xa be lu he sav (7), Hi mingel ra polien nan xil vus.” (Sen 2:2) ⁵E rapusi ngamu xa Hi tehiteni tehit, “Linava ti e rute xa nateling xati tangan liha lingel kuhi en.” (Sam 95:11) ^{t6}Ngan xil xa latelong longeongen hos ak tetiamu, xil latnahuri ti ngengelen ak vengan xa latelong ras rae Hi. Misak ni, ngengelen ak da tamu tangan moletin sav xil likila lihuri. ⁷Vengan xa ngan ak be reitin, Hi teling xat melengien sav tei xa moletin xil likila mei lihur ngengelen nae en. Melengien ak be ‘xosali.’ Hi tesepin usil melengien ak texo suv toto *Deved* e huram xil holu tetutou ni melele xa tehit sepinien xa ratelonge ngamu xa tehit, “Xosali, xosxa mulong rae Hi, munanem male ni ti.” (Sam 95:7)^u

⁸E mol-Isrel xil latnakamet ti ngengelen ak e tan te hal Kenan xa Sosua tetel xil lateha en tangan lavuri. ?Vengan xosxa latehur ngengelen nae tuei, veneh ma huram holu tetutou ni, Hi tehit usil melengien sav tei xa xil lihur ngengelen nae sung en? ^{v9}E, vengan xa rin ak be reitin, melengien tei da tamu xa moletin xil na Hi lihur ngengelen hos nan. ¹⁰Vengan xa, nggo hisit sexien xa Hi tepol sen polien nan e tengel kuhi, moletin nan xil mun lingel kuhi ra polien nae xil. ^{w11}Mak, ma risak pisi ixehi tangan rihur ngengelen nen ak tangan ti e xir namot vengan milong ras sepinien na Hi nggoni ngan xa mol-Isrel xil latepol ni tetiamu.

¹²Mak, ma rilong xat sepinien na Hi, vengan xa xeihen e meulien da en. Sepinien nan mikan mili tiei xa mikan e rin xalu vus, vengan xa mikila vasal tine moletin tei vaha vuma ... vali rute xa hisi di bisti del sin, e vatuxoh rute xa ninin

^{n3:14} Hib 3:6 ^{o3:15} Hib 3:7-8 ^{p3:16} Nam 14:1-35

^{q3:17} Nam 14:29; 1Kor 10:10 ^{r3:18} Nam 14:22-23; Sam 95:11; Hib 3:11

^{s4:3} Hib 3:11; 4:5 ^{t4:5} Hib 3:11; 4:1 ^{u4:7} Hib 3:7-8

^{v4:8} Dut 31:7; Sos 22:4 ^{w4:10} Sen 2:2; Hib 4:4

e nenemien nan di en. Reitin, sepinien na Hi di midil tinexir e di pisen kil naha xa di e tinexir e nenemien nar xil, e di milepisi. ^{x13}Neta tovuol mikila vaxus ra Hi, vengan xa xi mikil holesok xil vus. E melengien tei, xir kekes risoh pe meten e risepin ni rin nar mini.

Iesu be vatixar na pris xil xa di misoh pe met Hi e rin nar

¹⁴Be reitin xa ti risoh pe met Hi. E be reitin mun xa Iesu, Nat Hi, be **vatixar na pris xil** e ba ngamu e ut nesao tangan ha isoh pe met Hi e rin nar. Misak ni, rihur xat neketen nar ixeih xa di rabit rati xa rangguri ngamu. ^{y15}Vatixar nar mikil merouen te tenbe moletin e xi polu ni esaeen ve rin nar. Vengan xi mun tehur sakpisien xil e suse xil vus nggoni ngan taxa xir di rangguri, e xi tenamot ti e **tesaen**. ^{z16}E vengan xa Iesu di pol ve rin nar, ulixir nakan ti tangan rihe visal Hi xa di dotan e von xeihen nan. Ma, e melengien xil vus xa iexir bei tutouen na Hi, ripusi xa xi ipisen esaeen e eheien hos nan mi xir. ^a

5 Melele xa laling moletin tei mei be **vatixar** tei na pris xil, labosei ra moletin xil tangan vapol e vasoh pe met Hi ve rin nae. Misak ni, xi mikila vasa sanien eo xil mi Hi ve rin nae, e vasak ni re vongoro xil valeh ve **tesaen** nae xil. ²E vengan vatixar mun be moletin tei xa merou, mikil kuh merouen na moletin xil. Mak, ma di pol merou del ngan xil xa latakil kuh ti suse xa momal e di lasavut vuteili en. ^{b3}E vengan xa vatixar mun be moletin xa merou mak, xi isak ni re vongoro xil ileh ve tesaen nan tasen itel tesaen na mosav xil mun. ^{c4}E mo-

letin tei tahusil nenemien nan tasen ti tangan vahur polien xa eilep xiak, e be Hi kestang iaxa di bosei ngan xa mei ihe vatixar na pris xil, nggoni ngan xa tepol ni mi **Eron**. ^d

⁵E Kristo mun tenamei ti vahe vatixar vahusil nenemien nan tasen tangan vapet rat hisen. E Hi vari iaxa tehosei tangan vahur polien ak xa tehit, *“Xouk obe Natuxoli, e xosali namei nabe Tamom.”* (Sam 2:7)^e

⁶E rute sav mun biteni bit, *“Xouk mei uhe pris tei te vehakut, ngan xa ixoni pris Melkisedek tetiamu.”* (Sam 110:4)^f

⁷E meulien nan e ut etan, Iesu tesis teha mi Hi e tetakesi ve tutouen tetel simeten. Reitin, tekei texeih teha mi Hi xa mikila vateh meulien nan ra maten. E Iesu temerere ni Hi, tepol ni nenemien nan tehe tan, e teling meulien nan teti pe hen. Mak, ma Hi teteong ni sisen nan xil. ^{g8}E neta sav xa xi be Nat Hi, Hi tepispisi mini ni sexien te longxatien texo longpangasien xa xi tehisu ni. ⁹⁻¹⁰^hE melele xa Hi tepusi xa Iesu mei tepin tevi, tepol ni mei tehe vatixar na pris xil xa texoni pris Melkisedek tetiamu tangan vapol pe meten e rin na moletin xil. Nggo rin ak, Iesu Kristo mei teteh meulien e ngan xil vus xa lalong xati e tepol ni suse tangan lihur meulien sal ixo en.

Selxatien tangan moletin xil linastokovein neketen nae ti

¹¹Xamem manggur holesok holu xa iemem bei tangan maviteni mi xamim usil holesok xil, e minggeih tamu tangan mulong kila vengan xa iemim ti tavei mun tangan mulong kil sepinien

^x4:12 1Pit 1:23; Aes 49:2; Efes 6:17; Rev 19:15; Sion 12:48

^y4:14 Hib 3:1; 6:20; 7:26; 8:1; 9:11; 10:23 ^z4:15 Hib 2:17

^a4:16 Hib 10:19 ^b5:2 Hib 2:17; 4:15 ^c5:3 Lev 9:7; 16:6 ^d5:4 Eks 28:1

^e5:5 Pol 13:33; Hib 1:5 ^f5:6 Hib 6:20; 7:17 ^g5:7 Mat 26:36-46; Mak 14:32-42;

Luk 22:39-46 ^h5:9-10 Aes 45:17; Sam 110:4; Hib 5:6

xil ak. ¹²Melengien pipin tangan xamim mumei muve titsa xil ngamu xa ti mupispisi mi moletin sav xil e rin te holesok xil te neketen. E neta sav xa mak, napusi tehit momal tangan xamim muvur pispisien kokot xil xa taxeih ti usil longeongen hos na Hi vatei mun. Xamim munggoni tutut horamue xil tamu xa mutamatu ti mu tangan muva anien xil xa nggeih, e di tamu musus xat pispisien xil xa lataxeih ti langgoni melik tang. ¹¹³E ngan xil xa di lasus xat melik te pispisien xil xa lataxeih ti, labe tuvava tamu, e latapin ti tangan lalong kila xa itep iaxa moletin xil mei limal pe met Hi. ¹⁴E pispisien xil xa nggeih vuteili langgoni anien xa nggeih be a ngan xil xa lamatu ngamu. Ngan xil ak lakila lapus kil naha xa bos e naha xa misa vengana xa, e meulien nae, vehakut di langgusil xat neta xa lakila labit nggusil sepinien na Hi.^j

6 Mak, ma ihos tangan ti risep usil pispisien sav xil xa isak ni xir mei rimatu kuhi e neketen nar. Reitin, rinatit ni ngan taxa di rasepin vehakut usil pispisien kokot xil usil Kristo xa tameas ti xa momal tangan mutehusili ngamu, pispisien xil xa be vatit neketen namim: ixoni itep iaxa muhiles ra sexien xil xa be neta sav tang xa lasakras lasa meulien mi xamim, e itep iaxa mukila muling neketen namim e Hi. ^{k2}Tamal ti tangan xamem matilomun mei mapispisi mi xamim vatei mun usil sexien xa muhe **baptaes** ni moletin tei, sexien xa muling hemim en, mu naha xa istal e melele xa moletin xil limea rilomun ra maten e lisoh pe met Hi e Melengien te Lepisien. ³Mak, ma xosxa Hi imaen ni, rihur pispisien xil xa isak ni xir ha rimatu pilei mu e neketen nar.

⁴?E itep mi ngan xil xa latehur neketen nae ngamu, e di, latestokovein ni mun? ?Hi ihiles xil vatei mun tangan lihur neketen nae vatei mun? E-e, Hi naviles xil ti mun. Vengan xa, teti-amu, mei latele kil kuh miehen te longeongen hos na Hi, latekar pis sanien te ut nesao xa be meulien hu nae nggo Iesu Kristo, e **Ninin Eo** mei tese xat xil texoni ngan xa tepol ni mi Kristin sav xil. ¹⁵Xil latekil kuhi xa sepinien na Hi bos, e latepus kuh xeihen xa Hi ti ipisen ni ixo holesok xil xa istal e melengien xil xa ti imei. ⁶Ma, xosxa lakil holesok xil vus ak, e di, lastokovein neketen nae, Hi naviles xil ti vatova mun tangan mei lavur neketen vatei mun. Vengan xa sexien nae xil nggoni ngan xa xil vari iaxa di ladi xat Nat Hi de eivave vatei mun pe met moletin sav xil, e di lasak ni mosav xil mei lanem male ni.

⁷Tine moletin nggoni tan. Rut tan, melele xa us di mus en vehakut e moletin xil di lapol en, anien hos xil di lastal e lameul en. Ma Hi di duxol xati. ⁸E rut tan, husmunae e ao tesa tang di lastal e lameul en. Tan ak tavos ti pe met Hi e, nave nousav ti, isa halesil iha xati, ilas moten ni, e isahan upang ia len ni. ^m

⁹Tuxoli e hinoxoli xil, neta sav xa di nasel xat xamim mak, nanesi xa xamim di munggusil xat Hi nggeih, e sexien namim pipin ni ngan xil xa mutehur meulien hu vengana xa Hi teteh meulien e xamim. ¹⁰Hi pol ni naha xa momal vehakut. E ien nabong ni ti holesok xil xa di mupol ni vengana xa eheien namim da en: polien xa di mupol ni e tutouen xa di tamu musa ni mi mosav xil xosali ak. ⁿ¹¹Xamem iemem bei tangan xamim kekes muling nenemien namim ixehi tangan mupol imak iha ituxoh melele xa mupus hoxalit lohen te neketen xa

ⁱ5:12 1Kor 3:1-3; 1Pit 2:2 ^j5:14 Rom 16:19 ^k6:1 Hib 9:14 ^l6:4 Mat 12:31; Hib 10:26-27; 1Sion 5:16 ^m6:8 Sen 3:17-18 ⁿ6:10 Hib 10:32-34

xamim mudi en. E ti mupol imak vengan mukila xa, e melele nen ak, mupusi xa holesok xil xa muling nenesien namim en be reitin. ¹²Xamem iemem ti tavei tangan xamim muve mah, e ihos mak mu xa mupol ixoni ngan xil xa nenemien nae teviei e di lasoh nggeih e neketen nae. Vengan xa, nggo sexien xil ak, xil di langgur naha xa Hi tehit xati mi xil.

Rakila xa hitxatien xil na Hi be reitin

¹³Melele xa Hi tepol ni hitxatien nan tetel avu **Ebrahim**, xi tesuv xati tetel hisen vengan his tovuol mun xa vahe eilep mak mu vali hisen. ¹⁴Xi tehiteni temak tehit, “*Reitin li, inou iaxa nabit xati xa nituxol xatuk ihe eilep e nipol ni vatimol nam xil xa listal lixo xouk lihe holu xa lihe holu pupu.*” (Sen 22:17) ¹⁵Mak, ma melele xa Ebrahim tetatil huit hitxatien na Hi tetel nenemien xa tehe teviei teha vuma ... tepus reitinen teni. ¹⁶Melele xa moletin tei bit vasak ni hitxatien nan mei vaxeih, xi di misuv xati del neta tei xa nggeih mu mili xi tasen. Vengan, melele xa misuv xat hitxatien nan mak, ngan tesav xil like reitin en e latangor ti mun usili. ¹⁷Nggo hisit sexien ak, melele xa Hi ien tehei tangan vapisen ni xa naviles nenemien nan ti mi ngan xil xa lihur huit hitxatien nan, tesuv xati tetel hisen. ¹⁸Reitin, Hi xa misakras valuvos tepol ni sexien lu xa lusakras lalhilhiles. Xi tehit xati xa xi ituxol xat xir, e tesuv xat hitxatien nan tetel hisen. Misak ni, xir xa ranggus radi pe hen rihesi xir, vengan xa rakila ranesi xa neta xa Hi tehit xati tehit ipol ni e rin nar, ti ripus huite teni mei istal. ¹⁹⁻²⁰Nenesien ak nggoni angka te meulien nar xa ihur xat xir tangan rinasal ti. E rakila xa Hi ipol sen naha xa

xi tehit xati vengan Iesu, xa nggoni pris **Melkisedek** tetiamu, xi di pol ve rin nar. Reitin, Iesu, xa raling nenesien nar da en, xi ba diamu ni xir be vangit Nim Eo xa de ut nesao, e di mikakao mili kaliko xa dakoe xol ut xa be eo xa be eo pupu xa Hi da en. E rute ak, xi di misoh pe met Hi ve rin nar nggoni **vatixar na pris xil** te vehakut.[†]

Iesu mei be vatixar na pris xil te vehakut nggoni pris Melkisedek tetiamu

7 Nihit kila mi xamim xa **Melkisedek** tehe visi. Tetiamu, xi tehe suv toto te taon te hal Salem[¶] e xi tepol texoni **pris** na Hi te hal ut nesao. Melele xa **Ebrahim** tetilomun ra vaeen xa xi tetel moletin nan xil latehas tan ni suv toto hat (4), “*Melkisedek teha tesao ni e tesa tuxolxatien tei mini.*” (Sen 14:19) ²E “*Ebrahim tesa taet te holesok xil vus xa telehi texo vaeen ak mini.*” (Sen 14:20) Hisen Melkisedek, xa koute teni be ‘suv toto te momalen.’ E vengan xa tehe suv toto te hal Salem, xa koute te his taon ak be ‘tomat,’ xi tehe ‘suv toto te tomat’ mun. ³Vanuvei Eo taviteni ti usil tamen mu ninen, taviteni ti usil poten mu maten nan, e taviteni ti usili xa avu nan xil latehe visi. Tesak ni, xi tehe pris te vehakut nggoni Nat Hi. ⁵

⁴Xir rapus kila xa Melkisedek tehe eilep pupu vengan xa Ebrahim, vatit avu nar, xi tesa taet mini texo holesok xil vus xa telehi texo vaeen. ⁵E texo re Ebrahim, Livae e ngan xil vus xa latestal texo vatimol xa mahulong nan, mei latehe **pris** xil. E melele xa Mosis temeul teta, tesemae ni xil tangan lileh taet ra mol-Isrel sav xil, tave ti neta xa latehe tua nae xil e xil mun latexo re Ebrahim.

[¶]7:1 Taon te hal Salem temei tehe taon te hal Serusalem e melengien xil na suv toto Deved.

[¶]6:13 Sen 22:16 [¶]6:16 Eks 22:11 [¶]6:18 Nam 23:19; 1Saml 15:29

[†]6:19-20 Lev 16:2-3,12,15; Sam 110:4; Hib 5:6; 7:17 [†]7:3 Sam 110:4

¹⁶E Melkisedek tenastal ti vaxo vatimol xa mahulong na Livae. E neta sav xa temak, rapusi xa xi tehur taet texo Ebraham e tesa tuxolxatien mini, ngan xa Hi tehiti xati tangan vatuxol xati. ⁷E rakila xa melele xa moletin tei di misa tuxolxatien mi moletin sav, xi xa misa ni be eilep mak mu mili ngan xa di ngguri. ⁸E rin na pris xil xa di langgur taet, xil labe moletin xil tang xa lakila lalel. E, e rin na Melkisedek xa tehur taet, nggoni ngan xa xi di tamu meul vengan xa Vanuvei Eo tenasep usil maten nan ti. ⁹E rakila raviteni vamak xa melele xa Ebraham tesa taet ak, texoni ngan xa tesa ni e rin na **Livae** e ngan xil mun xa lateti e vatimol xa mahulong nan xa latnastal ti mu. ¹⁰Vengan xa tave ti neta xa Livae, latnapesi ti mu, melele xa Melkisedek temei tesao ni Ebraham, nggoni ngan xa Livae teta tamu e tenbe Ebraham xa be vatit avu nan.

¹¹Melele xa Hi tesa rae nan xil mi moletin xil te hal Isrel texo Mosis, xi tesa suse tangan pris xil e vatimol na **Livae** lakila lapol e rin na mol-Isrel xil vus. E moletin xil lasakras mei lamal tevi vaxo polien na pris xil ak. Misak ni, latehit usil pris sav tei xa ixoni pris Melkisedek tetiamu, ngan xa nastal ti naxo re **Eron** xa texo vatimol xa mahulong na Livae.^{§§} ¹²E melele xa Hi tehosei pris sav tei tangan vaxoles pris xil tetiamu, momal tangan isa **rae** hu mun xa ixoles rae xil tetiamu. ¹³E Suv nar, xa holesok xil ak di misep usili, xi testal texo vatimol sav tei xa moletin tovuol tamu vaxo en xa vapol

vaxoni pris tei. ¹⁴Reitin, Suv nar testal texo vatimol xa mahulong na Sudah.* E **Mosis** tavit usil vatimol ak ti e melele xa tesev usil pris xil. ^u

¹⁵E rakil kuhi xa Hi texoles pris xil tetiamu melele xa rapusi xa tesak ni pris sav tei mei mistal, ngan xa nggoni pris Melkisedek tetiamu. ¹⁶Vengan melele xa pris sav nen ak mei tehe pris, tenahusil ti rae xil tetiamu xa tehiteni tehiti ixo vatimol na Livae. Xi mei tehe pris vengan xa meulien nan misakras vavus e xeihen de hen. ¹⁷Ngan ak nggoni naha xa Vanuvei Eo tehiti usili tehiti,

*“Xouk mei uhe pris tei te vehakut,
ngan xa ixoni pris Melkisedek tetiamu.”*

(Sam 110:4)^v

¹⁸Misak ni, di rapusi xa Hi teling rae xil tetiamu latehe rin vengan xa latapin ti e di lapol votei ni naha xa labit usili.

¹⁹Vengan xa moletin tovuol vamei vamaal tevi pe met Hi vaxo rae xil na Mosis. Misak ni, Hi tepol ni suse sav xa rikila riling nenesien nar iti en, xa isak ni xir rikila rimeis sangas mu visali ixo en. ^w

²⁰Melele xa Hi tehiti usil suse sav ak, xi tesuv xati tetel hitxatien tei. E ratapus ti xa Hi tepol ni sexien ak e melele xa tehosei pris sav xil tangan mei lavur polien nae. ²¹E melele xa Hi tehosei Iesu tangan mei ihe pris, tesuv xati ni sepinien nan tehiti,

*“Inou nabe Iahova,
e nabit xati xa xouk umei uhe pris tei te
vehakut,*

e ninaviles nenemien navan ti usili.” (Sam 110:4)^x

^{§§}**7:11** E vatimol lu e le tei (12) na mol-Isrel xil, Hi tehosei vatimol xa mahulong na Livae tangan mei lapol ni polien xil na Hi. E texo vatimol xa mahulong na Livae, Hi tehosei kokot ni Eron tangan mei be vatixar na pris xil e ngan xil xa langgo ren lakila mei lapol e rin na moletin xil pe met Hi nggoni pris xil (Eks 28:1).

^{*}**7:14** Vatimol xa mahulong na Sudah be vatimol xa Hi tehiti xati xa suv toto xil na mol-Isrel xil listal lixo en.

[†]**7:5** Nam 18:21 ^u**7:14** Sen 49:10; Aes 11:1; Mat 2:6; Rev 5:5

^v**7:17** Hib 5:6; 6:20 ^w**7:19** Hib 9:9 ^x**7:21** Hib 5:6; 6:20; 7:17

²² E vengan xa Hi tesuv xat *hitxatien te xeih* hu ak xa di pol ni del xir tetel hisen, rakila xa hitxatien ak bos mak mu mili ngan xa tetiamu. E Iesu mun iaxa di misuv xati. ^y

²³ E rin sav mun, Iesu misav ni pris xil tetiamu. Pris xil tetiamu latehe holu vengan melele xa lalel, xil lasakras mun lapol. ²⁴ E vengan xa Iesu meul vehakut, polien nan nggoni pris tei iti hen vehakut, e nasa rati ti mun mi moletin tova. ²⁵ Misak ni, xosali e vehakut, xi mikila vateh meulien e ngan xil xa lamei visal Hi. E vengan xa Iesu di meul vehakut, xi mikila vasoh pe met Hi vehakut e vatakesi ve rin na moletin xil xa di laling neketen nae en. ^z

²⁶ Misak ni, rapus kila xa momal tevi tangan Iesu mei ihe *vatixar na pris xil* xa di pol ve rin nar. Xi be eo, memese tevi, e tenapol ni ti neta vasa. E Hi tetal rat Iesu ra moletin tesa xil e tehur rati tangan ite ut nesao. ^{a27} Xi taxoni pris xil tetiamu ti. Vengan xa xil latesa sanien eo xil mi Hi e melengien xil vus. E tetiamu, xil latesa sanien eo tei mi Hi ve *tesaen* nae vari. Di, tetutou sung, latesa sanien eo ve moletin sav xil. E Iesu, xi tesa sanien eo tei tekes e melele xa tesa xi tasen. E Hi tepus sanien eo ak texoni ngan xa pipin te vehakut. ^{b28} Rapusi xa melele xa langgusil rae xil na Mosis tangan vahosei visi e moletin xil lakila lamei lave pris xil, di labosei moletin xil te ut etan xa lamerou tang. E tetutou ni rae xil ak na Mosis, Hi tehosei Natneli tangan mei vahe vatixar na pris xil, e tesuv xat sepinien nan ni hitxatien nan. E Natneli vari mei temal tevi tangan ihur polien ak vehakut. ^c

Polien xa Iesu di pol ni ve rin nar bos mak mu mili polien na pris xil tetiamu

8 Vatite te holesok xil vus xa xamem di mabiteni xiak: *vatixar* tei na pris xil da ngamu xa tepol sen holesok xil vus ak xa di matehit usili, e xi iaxa di pol e rin nar. E xi di dotan de rin metu te von xeihen na Hi e ut nesao. ^{d2} Xi nggur polien te vatixar e rute xa be eo xa be eo pupu e vangit Nim Eo na Hi e ut nesao vari. Nim Eo ak be ngan xa Hi vari tekili ni, ngan xa bos mak mu mili *Nim Tavolin* xa moletin xil te ut etan tang latepol ni xa texoni ngan xa de ut nesao. ^e

³ Ngan xil vus xa lateling xil mei latehe vatixar na pris xil latesa sanien eo mi Hi e latehas buluk e nani xil tangan vaserev moletin xil ra tesaen nae xil. Misak ni, momal tangan vatixar nar e ut nesao mun isa neta tova mi Hi. ⁴ Vahit xi vata tamu e ut etan, xi nave *pris* tei ti, venggan pris xil ladi ngamu xa di lasa sanien eo xil nggusil naha xa Hi tesemae ni texo Mosis. ⁵ Melele xa pris xil te ut etan ak di lamot mi Hi, di lapol ni e Nim Tavolin tang. E Nim Tavolin ak nggoni nini neta xa di rapusi e kilas tei xa reitinen teni be nim na Hi xa de ut nesao. ^f Ngan ak nggoni naha xa Hi tehiteni mi *Mosis* e melele xa tesemae ni tangan vakili ni Nim Tavolin nan tehit, "*Upol ni holesok xil vus te nim ak ihusil nini Nim Eo xa natepisen ni minuk e Vathu Senae.*" (Eks 25:40) ⁶ E xosali, polien xa Iesu di pol ni nggoni vatixar na pris xil bos mak mu mili ngan xa pris xil tetiamu latepol ni. E melele xa xi di pol pe met Hi e rin na moletin xil, di pol nggusil *hitxatien te xeih* hu xa bos mak mu mili hitxatien te

^{y7:22} Hib 8:6; 12:24 ^{z7:25} Rom 8:34; 1Sion 2:1

^{a7:26} Hib 3:1; 4:14; 6:20; 8:1; 9:11 ^{b7:27} Lev 9:7; 16:6,15

^{c7:28} Hib 5:1-2 ^{d8:1} Hib 3:1; 4:14; 6:20; 7:26; 9:11; Sam 110:1; Mat 22:44; Mak 16:19; Pol 2:34; Efes 1:20; Hib 1:3; 10:12; 12:2 ^{e8:2} Nam 24:6 ^{f8:5} Kol 2:17

xeih matu. Vengan melele xa Hi tepol ni, tesuv xati texo hitxatien tei xa tesak ni mei tehos mak mu. ^{g7}Vahit vahe reitin xa hitxatien te xeih matu vama tevi, ma Hi napol ni ti hitxatien te xeih teimun. ⁸E vengana xa Hi tekameti xa moletin nan xil latehur xoteh hitxatien te xeih matu xa tepol ni tetel xil, xi tesep usil hitxatien te xeih teimun tehit, ^h

“Inou, Iahova, nabiteni xa melengien tei di bemei

xa inou nipol ni hitxatien te xeih hu tei itel mol-Isrel xil e mol-Sudah xil.[†]

⁹*Hitxatien te xeih hu ak naxoni hitxatien te xeih matu ti*

xa natepol ni tetel avu nae xil tetiamu, e melele xa natetel xil ni heok e natetiamu ni xil latehe reling kantri te hal Isip.

E vengana xa xil latehur xoteh hitxatien te xeih xa latepol ni tetel nou, natekavitou ni xil.

¹⁰*Hitxatien te xeih hu xa nipol ni itel mol-Isrel xil e melele nen ak imak:*

Inou, Iahova, niling rae navan xil iti e neni emien nae

e nitis xati iti e tinexil.

Inou nihe Hi nae,

e xil lihe moletin navan xil.

¹¹*Isak ni, ti e xil mun napispisi mi tuneli tangan wakil Iahova*

vengana xa xil vus likil nou ngamu, ngan xil xa latereli, ha ituxoh ngan xil xa latellep.

¹²*Reitin, xil likil esaeen navan vengana ninaketeht ti mun nasa mi xil*

ve holesok xil xa tamal ti xa latepol ni.

Io, ninanem ti mun usil tesaen nae xil

xa teha xat rin nae.” (Ser 31:31-34)ⁱ

¹³Misak ni, melele xa Hi tesep usil “*hitxatien te xeih hu*” tepisen ni xa hitxatien te xeih xa tepol ni tetel xil mei be neta matu ngamu. E holesok xil xa be neta matu e tapol ti mun, nave nousav ti ma ha ikesae vari.

Polien xa Iesu di pol ni e Nim Eo e ut nesao bos mak mu mili polien xil vus xa pris xil e ut etan di lapol ni

9 Melele xa Hi tepol ni hitxatien te xeih xa tetiamu tetel mol-Isrel xil, tepisen suse mi xil tangan likili ni nim man xa ha ti lihisu mini en, e suse xa momal tangan ti limot mini ixo en. ²Ma, xil latelihi tavolin tei xa mahulong, e vangite teni latekesi ni Ut Eo. E rute ak lateling laet tei xa tesoh, e sangas visali, lateling tep tei xa beret te sanien a Iahova teti en. ³E vangit nim ak, latesaxolen kaliko tei tangan iti pas vangit nim ak mei ihe rum lu (2). E rum xa tehe lu nen, xil latelihi tavolin teimun mei tehe tutut rum tei. E latekes vangit rum ak ni ut xa be eo xa be eo pupu. ⁴E rute ak, lateling pesin tei xa latepol ni ni gol tete tep nen, e latetin vokon eo xil en. E **Bokis te Hitxatien te Xeih** na Hi mun teta en, ngan xa latehas xol rin xil vus ni gol. E vangit bokis ak lateling valit manna xa latepol ni ni gol, lateling eitingil na **Eron** xa tesohunguite, e lateling hat lu (2) xa latetis xat rae he xalu (10) te hitxatien te xeih na Hi teti en. ⁵E latepol ni nini masxaxa lu xa latekes xalu ni sereb lutetotan luteti e led te bokis ak e rin xalu. Melele xa lutetotan temak, lutete momal

[†]**8:8** E hura 930 BC, hura xil tetiamu ni poten na Iesu, mol-Isrel xil latevae tetel xil mun tang e lateseti xil latehe vanut moletin lu. Ngan xil xa lateti e not, latekes xil ni mol-Isrel xil. E ngan xil xa latexo vatimol xa mahulong lu na Sudah e Bensamin lateti e saot, sangas visal taon te hal Serusalem, e latekes xil ni mol-Sudah xil.

^{g8:6} Hib 7:22; 9:15; 12:24 ^{h8:8} Ser 31:31-34 ^{i8:12} Hib 10:16-17

^{j9:2} Eks 26:1-20; 25:31-40; 25:23-30 ^{k9:3} Eks 26:31-33

^{l9:4} Eks 30:1-6; 25:10-16; 16:33-34; Nam 17:8-10; Dut 10:3-5

ni aveouxalu teta xol von esaeen na Hi.[‡] E melele nen ak tave melengien xati ti tangan namit kil holesok xil vus ak mi xamim.^m

⁶Melele xa xil lateling kuh holesok xil vus e **Nim Tavolin**, vehakut e melengien xil vus, pris xil latehe vangit nim ak e rum xa tietamu tangan lapol ni polien nae xati en.ⁿ⁷ E, e rum xa be lu (2) nen xa tehe eo xa tehe eo pupu, **vatixar na pris xil** kestant tekila teha en, e tekila vapol ni ihe vatei takes tang e huram xil vus. E melele xa teha en, tepo xat pesin tei xa ra te sanien eo tei teti en tangan vaserev rin nan vatel rin na mol-Isrel sav xil mun ve tesaen xil xa latnakil ti e dit latepol ni.^{o8} Nggo sexien xil ak xa pris xil latepol ni, **Ninin Eo** tepisen ni xa suse xa vahe rum xa tehe eo xa tehe eo pupu xa Hi da en di tamu texus ra mol-Isrel xil. E suse ak xa be Hi di tamu texus e melele xil vus xa moletin xil di tamu latehusil sexien te moten xa latepol ni e Nim Tavolin.⁹ E holesok xil ak be vole tei tang mi xir te xosali ak tangan vapisen ni xa sanien eo xil vatel re buluk mu nani xil xa Siu xil di lasa ni mi Hi latapin ti. Latapin ti vengan xa sanien xil ak lasakras laserev nenemien nar mu vasak ni tinexir mei vama tevi.^{p10} Lasakras lapol ni ti neta vengan xa di labit usil sexien xil te anienen, te munien, sexien te kas he xil en, e sexien sav xil mun tangan vasak ni tenbe moletin mei vamese vaxo hale tang. E Hi tesa sexien xil ak tangan moletin xil ti lipol ni ituxoh melele xa teling xati tangan iling

kuh sexien xil xa moletin xil likila limot mini ixo en.^q

¹¹E melele xa Kristo temei, mei tehe vatixar te pris xil xa teleh holesok hos xil xa di rapusi ngamu. E xi di pol e Nim Eo te ut nesao xa be eilep mak mu mili Nim Tavolin te ut etan xa moletin xil tang latekili ni.^{r12} E melele xa Kristo be ut nesao, be rute xa be eo xa be eo pupu. E melele xa teha en, tenaleh ti re buluk mu re nani. E-e, tehe sangas visal Hi tetel ren xati. Texo sexien nen tak, Iesu texal rat tesaen nar xil vus e teserev rin nar vehakut xa vehakut tang pe met Hi.

¹³Melele xa pris xil latehusil xat rae xil tietamu, latesak ni moletin xil xa latname se ti pe met Hi tangan mei lamese mun del re nani xil e re buluk xil. E latepol ni xil mei latemese mun tetel oei xa latevuil xat xil ni xa latehilesi tetel vulmeas te sulut buluk xa latetin ni tehe sanien eo tei. E sexien xil ak tesak ni tenbexil mei temese texot hale tang.^{s14} E re Kristo mikila vapol ni neta xa be eilep mak mu e rin nar. Nggu sil nenemien na **Ninin Eo** xa da vehakut, Iesu tesa xoteh meulien nan tasen xa temese tevi teha mi Hi. E ra te sanien eo nan di mikas moten nenemien nar ra sexien votei xil xa lasakras lateh meulien e xir. Reitin, ren tesak ni xir mei ramese pe met Hi xa meul vehakut tangan rakila ramot mini.^t

¹⁵Re Kristo tesak ni hitxatien te xeih hu xa Hi tepol ni tetel moletin nan xil mei tehe reitn e texeih. Misak ni, xosali, Kristo di pol pe met Hi ve rin na ngan xil xa Hi tekes xil, tangan lakila lileh hole-

[‡]9:5 Led nen, his tei mun teni be 'von esaeen.' Led ak texoni von xeihen xa Hi di tetotan en texoni suv toto na moletin nan xil, e di tepisen esaeen nan mi xil texo en. (Eks 25:17-22)

^m9:5 Eks 25:18-22 ⁿ9:6 Nam 18:2-6 ^o9:7 Eks 30:10; Lev 16:2,14,15

^p9:9 Hib 10:1-2 ^q9:10 Lev 11:2; 11:25; 15:18; Nam 19:13

^r9:11 Hib 3:1; 4:14; 6:20; 7:26; 8:1; 10:1 ^s9:13 Lev 16:3,14,15; Hib 10:4; Nam 19:9,17-19 ^t9:14 1Pit 1:18-19; 1Sion 1:7; Hib 6:1

sok xil vus xa ladi he Hi xa liti vehakut xa vehakut tang, holesok xil xa tehit xati tangan isa ni mi horamue nan xil. E rik-ila rileh holesok xil ak vengan xa maten nan texal rat xir ra pangasien xa imei mi xir vengan xa ratehur xoteh hitxatien te xeih tetiamu. ^u

¹⁶⁻¹⁷ Nggusil sexien na moletin xil holu, melele xa moletin tei meul tamu, xi pol ni hitxatien te xeih tei tangan isa rat holesok xil xa di e hen mi horamue nan xil melele xa imat. E horamue nan xil linapus ti mu huite te hitxatien nan ha ituxoh melengien xa moletin ak imat. Ma lilehi sung e melele xa ngan xa tepol ni hitxatien te xeih ak imat.

¹⁸ Nggusil nenemien ak, hitxatien te xeih tetiamu na Hi mei tehe reitin tehusul suse te maten, e melele xa latesak ni re vongoro xil mei teleh. ¹⁹ E melele nen ak, **Mosis** tehit mesen ni mi moletin xil usil rae xil vus te hitxatien te xeih ak. Di, xil labit xati tangan lihusili. Di, Mosis tepo valihe tei xa re buluk e re nani di en, e tehilesi tetel oei. Di, tehur husmunae tei xa tepepiei xa lakesi ni hisop, tevar xat hil sipsip xa pipili tete kusute, e teterir ni e ra ak. Di, Mosis tevuil ni ra teha xat uvei xa **rae xil na Hi** lateti en, e tevuil ni ra teha xat moletin xil vus mun. ^{v20} Melele xa tepol ni temak, Mosis tehiteni tehit, “*Ra ak di misa xeihen mi hitxatien te xeih xa Hi di pol ni del xamim.*” (Eks 24:8) ²¹ E vatit suse ak, Mosis tevuil ni ra teha xat Nim Tavolin na Hi, e teha xat holesok xil vus xa tete vangit nim xa pris xil di latepol tetela melele xa di late-mot mi Hi. ^{w22} Reitin, melele xa latehusil rae xil tetiamu na Hi, sangas latevuil ni ra teha xat holesok xil vus, vengan, vahit latnasak ni ti re vongoro xil te sanien eo naleh, ma moletin xil lasakras laserev rin

nae pe met Hi ve tesaen nae xil tangan vaketeh vahos rilomun mi xil. ^x

Ra xa Iesu tesa ni di mikas moten xir ra tesaen nar xil e di misak ni Hi di miketeh bos rilomun mi xir

²³ Nim Tavolin e holesok xil ngasen xa lateti en latexoni vole tang usil reitinen te holesok xil xa di e ut nesao. E momal tangan lihusil sexien xil ak tangan isak ni holesok xil mei limese itel ra. Ma, momal mak mu tangan lisa sanien eo tei xa ihos mak mu xa isak ni holesok xil vus te ut nesao mei imese tevi. ²⁴ Vengan xa Iesu tenave nim eo ti xa moletin xil tang latekili ni, ngan xa tehe vole tei tang te nim eo xa be reitin xa de ut nesao. Xi tehe rute xa be eo pupu xa de ut nesao vari, e ba misoh pe met Hi ve rin nar. ^{y25} E melele xa Iesu tehe sangas visal Hi, tesa meulien nan mini vatei takes tang. Sexien nan misav ni naha xa vatixar na pris xil te ut etan di pol ni, vengan xa xi tehe vangit rum xa be eo xa be eo pupu e huraam xil vus, e di tasa ren xati ti. ²⁶ Vengan vahit Iesu mun vaha tangan vasa sanien eo nan e huraam xil ngasen, ma xi vahur longpangasien e melele xa Hi tepol kokot ni ut etan ha vatuxoh xoxalite teni tangan vasa ren e huraam xil vus. E tamak ti. Vengan, e melele nen ak xa sangas holesok xil vus vatuxoh hoxalite teni, Kristo ba misoh pe met Hi melele tei takes tang tangan vasa tasen ni meulien nan vaxoni sanien eo mini tangan vaxal rat **tesaen** na moletin xil.

²⁷ Hi teling xati xa moletin xil vus lilel vatei takes. E itutou sung, xil lisoh pe meten e kot nan tangan ilepis rin nae xil. ^{z28} Nggo hisit suse ak, Kristo mun tesa xoteh meulien nan e temat vatei takes. E Hi pus meulien nan be sanien eo tei xa mileh rerat vuol ni tesaen na moletin

^u9:15 Hib 7:22; 8:6; 12:24 ^v9:19 Eks 24:3,6-8; Lev 14:4; Nam 19:6

^w9:21 Lev 8:15,19 ^x9:22 Lev 17:11 ^y9:24 1Sion 2:1 ^z9:27 Sen 3:19

xil holu. E Kristo itilomun imei vatei mun, e nave ti mun tangan valeh rerat tesaen nar xil. Melele xa itilomun imei, iteh meulien e moletin xil vus xa nenemien nae nggeih en tangan litatil mei rilomunen nan.^a

**Sanien tei takes xa Iesu Kristo
tesa ni ve rin na moletin xil
pipin te melengien xil vus**

10 *Rae* xil tetiamu xa Mosis tesa ni mi mol-Isrel xil, latehe vole tang. Reitin, labe vole usil holesok hos xil xa ti imei, xa reitinen teni di e ut nesao. Ve rin ak, hisit sanien eo xil xa di lasa ni e haram xil vus lasakras lapol ni ngan xil xa ba labe visal Hi mei lamal tevi pe meten.² Vengan, vahit ngan xil xa di lamot mi Hi lamese tevi ra *tesaen* nae xil vahe reitin, linalonge ti mun nasa ve tesaen nae xil e linasa ti mun sanien eo xil nava mini.³ E sanien eo xil xa di lasa ni e haram xil vus di lasak ni moletin xil di lanem xati xa tesaen nae xil di tamu.

⁴ Mak iaxa vengan xa re buluk e re nani lasakras laleh rerat tesaen xil ra moletin xil.^{b5} Misak ni, melele xa Kristo temei e ut etan, xi tehiteni mi Tamen tehit,

“Sanien eo xil del holesok xil xa ladin xil bat minuk iem ti tavei.

E otesa tenbeok minou tangan nimei e nimot minuk itela.

⁶ *Otnavasi xouk ti melele xa di ladin hisi e von sanien eo, mu labas vongoro xil tangan vaserev rin nae pe metom.*

⁷ *E inou natehiteni minuk natehit, ‘Inou xiak.*

O Hi, namei tangan napol vahusil nenemien nam,

vaxoni ngan xa latetisi di e Vanuvei Eo usil inou.” (Sam 40:6-8)

⁸ E sepinien xil ak, Kristo tehiteni tehit, *“Sanien xil del holesok xil xa ladin xil bat minuk iem ti tavei ... Otnavasi xouk ti melele xa di ladin hisi e von sanien eo, mu labas vongoro xil tangan vaserev rin nae pe metom.”* E holesok xil ak labe naha xa rae na Hi tetiamu tesemae ni tangan lisa ni mini.^{c9} Bus di, Iesu tehiteni mun tehit, *“Inou xiak. O Hi, namei tangan napol vahusil nenemien nam.”* Mak, ma melele xa Iesu tesa xi tasen, texoni ngan xa teling sanien eo xil tetiamu tehe rin, e tesa xoteh meulien nan tehe sanien eo te vehakut tangan vahur xoles sanien eo xil xa tetiamu xiak.^{d10} Reitin, vengan xa Iesu Kristo tepol tehusil nenemien na Hi, melele xa tesa tasen ni tenben mini, sanien eo nan tesak ni xir mei ramese ra tesaen nar. E sanien tei takes nan e rin na moletin xil vus pipin te melengien xil ngasen.^e

¹¹ E rin te polien nae, *pris* xil vus lapol ni polien nae e melengien xil ngasen. E di lasa mah ni hisit sanien eo xil vehakut e melengien xil ngasen xa misakras valeh rerat tesaen xil.^{f12} E rin na Kristo, xi tesa sanien eo tei takes nan xa pipin tangan valeh rerat moletin xil vus ra tesaen nae xil te melengien xil vus. E melele xa tesa ni tevus, *“xi dotan de ri metu na Hi.” (Sam 110:1)*^{g13} E xi da tamu e rute ak *“ituxoh melele xa Hi iling elu nan xil liti pe hen.” (Sam 110:1)*¹⁴ Vengan xa, tetel sanien eo tei takes, xi tepol ni ngan xil xa lamese ra tesaen nae xil mei lamal tevi pe met Hi vehakut.

¹⁵ E *Ninin Eo* mun tesa sepinien xa di pisen ni xa ngan ak be reitin. Vengan tetiamu, tehiteni tehit,

^{a9:28} Hib 10:10; Aes 53:12; 1Pit 2:24; Plp 3:20; 2Tim 4:8

^{b10:4} Lev 16:15,21; Hib 9:13 ^{c10:8} Sam 40:6 ^{d10:9} Sam 40:7

^{e10:10} Hib 9:12,28 ^{f10:11} Eks 29:38

^{g10:12} Mat 22:44; Mak 16:19; Pol 2:34; Efes 1:20; Hib 1:3; 8:1; 12:2

¹⁶ *“Hitxatien te xeih hu xa nipol ni itel moletin navan xil e melele nen ak imak: Inou, Iahova, niling rae navan xil liti e tinexil,*

e nitis xati iti e nenemien nae.” (Ser 31:33)^h

¹⁷ Di, tehiteni mun tehit,

“Reitin, ninanem ti mun usil tesaen nae xil, mu holesok xil xa tamal ti xa teha xat rin nae.” (Ser 31:34)ⁱ

¹⁸ Ma, melele xa Hi di miketeh bos rilomun mi moletin xil ngamu, linasa ti mun sanien eo xil ve tesaen nae xil.

Ve sanien eo xa Iesu tesa ni, rakila rave sangas visal Hi

¹⁹ Mak ma tuxoli e hinoxoli xil, venggan xa re Iesu tepol ni suse ve xir ngamu, ulixir nakan ti tangan rave sangas visal Hi e rute xa be eo xa be eo pupu. ^{j20} Venggan melele xa Iesu temaen xoteh tenben e temat, kaliko xa lalihi tangan vasikoe xol moletin xil linava ti sangas visal Hi temesel tehe rin lu e tesah suse temese ve xir. ²¹ E xosali, Iesu mei be vatixar na pris xil e Nim Eo na Hi e di misoh ve rin nar. ²² Mak, ma rime i sangas visal Hi itel meulien xil xa memese e neketen xa be reitin. Melele xa ramei visali, rakila xa nggoni ngan xa Iesu tevuil ni ren xat xir e tesak ni meulien nar mei temese ra nenemien tesa xil, e tetel oei xa mexal e temese tevi, xi tekas moten tenbexir. ^{k23} Mak, ma nenemien nar ita kat, e ti ritat xat neketen nar ixehi xa di rabi rati xa di raling nenesien nar da en. Ripol ni imak venggan xa rakila ranesi e Hi xa di pol sen hitxatien nan xil. ^{l24} E bos xa rinem usil suse xa rikila ritutou ni xir tangan eheien nar iti e xir e ripol ni sexien hos xil. ²⁵ Rinastokovein sexien te vitueien ti naxoni ngan xa rut moletin

xil di lapol ni. E ti risel xat xir ihe holu mak mu, venggan di rapusi xa melengien te mei rilomunen na Suv di bemei sangas mu.

²⁶ Reitin, rixuxou kuhi venggan xosxa rakil reitinen usil Iesu Kristo ngamu, e di tamu rapol ni **tesaen**, ma sanien eo tovuol mun tenggan vasak ni xir ramese rilomun ra tesaen nar xil. ^{m27} Misak ni, momal tang xa ngan xil xa langgulehi di lapol ni tesaen ulixil ikan ihe holu melele xa di ladatil melengien xa Hi ilepis rin nae e ikin pangasien mi xil ihtih Upang xa misakras vamat xa ia len elu nan xil. ⁿ²⁸ Be reitin xa melele xa moletin tei nggur xoteh rae xil na **Mosis** e *“moletin lu mu tol latbit rati latbit be reitin,” (Dut 17:6)^o* linapisen esaeen ti mini, e likin maten vari mini. ²⁹ Venggan ngan ak be reitin, munem usil naha xa mei istal e moletin xa mikil reitinen usil Kristo, e nggulehi dit pol ni tesaen. Moletin ak di pisen ni xa xi di misin Nat Hi. Xi di mike neta sav tang e re Iesu, ngan xa tesak ni hitxatien te xeih hu na Hi mei be reitin, e xa tesak ni moletin ak mei memese pe met Hi. E xi di misepin misa ba xat **Ninin Eo** xa di pisen eheien hos mini. Mak, ma be reitin xa naha xa mei istal mi hisit moletin xa mak isa xa isa pupu. ^{p30} Ngan ak be reitin, venggan rakila xa Hi iaxa tehiteni tehit, *“Inou, Iahova vari, nabiteni xa nisa xoles neta xa xil latepol ni. Reitin, inou nisak ni xil lia huit sexien tesa nae xil.” (Dut 32:35)^q* ³¹ Ma, rixuxou kuhi venggan xosxa rihe hisit moletin xil xa imak, ma isa xa isa pupu mi xir e melele xa rihe he Hi xa meul.

³² Mak, ma munem rilomun ni sexien xil namim xa tetiamu, melele xa mule kil miehen na Hi. Munem rilomun ni xa

^h10:16 Hib 8:10 ⁱ10:17 Hib 8:12 ^j10:19 Hib 4:16

^k10:22 Esek 36:25; Efes 5:26 ^l10:23 Hib 4:14 ^m10:26 Hib 6:4-8

ⁿ10:27 Aes 26:11 ^o10:28 Dut 19:15 ^p10:29 Eks 24:8; Hib 13:20

^q10:30 Rom 12:19; Sam 135:14

tetep iaxa mutekameti texeih ve melele te xeih xil xa mutehisu ni, xa mutehuri tetel nenemien xa tehe teviei. ³³Melele xil holu moletin tesa xil latesepin tesa teha xat xamim e latesak purun xamim pe met moletin xil. E ulimim tenakan ti tangan mumos vatel ngan xil xa di langgur hisit sakpurunien xil xa mak. ³⁴Teti-amu, esaen namim teti e ngan xil xa lateti e nim te xeih. E melele xa moletin xil latesa pangasien mi xamim vengon taxa mube Kristin xil e mei lateleh vuol ni holesok namim xil, xamim mutemaen kuhi mi xil tang tetel sien. Mutemaen ni vengon xa mutekila xa holesok namim xil te neketen iti vehakut e ihos xa ihos mak mu ili holesok xil xa lateleh rerati. ³⁵Mak, ma xosali, ulimim nakan ti, vengon xa be reitin xa huit neketen xa muhuri ihos mak mu. ³⁶Musak ni nenemien namim ihe teviei tangan mukila mupol ni neta xa Hi ien bei. Vengon xosxa imak, ma muhur xat naha xa xi tehit xati. ³⁷Ngan ak nggoni ngan xa Vanuvei Eo di biteni xa bit,

*“Nave nousav ti,
ngan xa di bemei imei ihe reitin e nararu ti.*

³⁸*E ngan xa di nggusil Hi del neketen nan,
xi momal pe meten.*

E Hi tavesi xi ti ve moletin xa di biles rilmun ra neketen nan ve ulikanen.” (Hab 2:3-4) ^t

³⁹E xir ratave moletin xil xa ti raviles rilomun ra neketen nar ve ulikanen, e ti rakesae ven. !E-e! Xir rabe ngan xil xa di rasoh nggeih e neketen nar e Hi di misa meulien sal mi xir.

Tetep iaxa Hi tepol texo moletin xil tetiamu xa neketen nae teta

11 Neketen nar di e melele xa rakil kuhi xa ti ripus huitte te naha xa

raling nenesien nar en, xa rake reitin e holesok xil xa rasakras rapusi. ²Vanuvei Eo tesepin tehos usil avu nar xil tetiamu ve neketen xa latehuri. ³Vengon xa nggo neketen iaxa di ranem kila xa Hi tepeas ni ut etan tetel sepinien nan kestang. Ma, holesok xil vus xa di rapusi, Hi tepeas rohon ni texo holesok xil xa rasakras rapusi. ^u

⁴Vengon xa **Ebel**, neketen nan teta, xi tesa sanien eo tei mi Hi xa tehos mak mu teli sanien eo xa **Ken** tesa ni. Melele xa Hi tepus kil neketen nan, tehesi xi ven e tehesi xi ve sanien eo nan mun. Tesak ni, Vanuvei Eo tehiteni xa Ebel temat pe meten. E, neta sav xa Ebel temat, neketen xa tepisen ni di pispisi mi xir xosali. ^v

⁵Vengon xa Inok, neketen nan teta, xi tenamat ti. Hi tetal rati tehe ut nesao e moletin tovuol vakila vakameti mun. Vanuvei Eo tehiteni xa Hi tehesi xi ve Inok, e tehur rati tehe ut nesao. ^{w6}E rakila xa moletin tovuol mikila vasak ni Hi vahesi xi ven xosxa neketen nan tovuol. Vengon xa ngan xil vus xa di lamei visal Hi lineket mu xa xi da e di misa huitte mi ngan xil xa iexil bei tangan lamei visali.

⁷Vengon xa **Noah**, neketen nan teta, xi telong xat Hi melele xa tesel xati usil holesok xil xa isa xa imei xa xi tenapus ti mu. E vengon xa Noah temerere ni Hi, xi tepol ni tuturil tei xa mahulong tangan vateh meulien e ngenen xil. E tuturil ak tehe simelelen tei mi mosav xil tangan vapisen ni mi xil xa momal tangan xi vasa pangasien mi xil ve longrasien nae. Tesak ni, Hi tepusi xa Noah temat pe meten vengon xa, neketen nan teta. ^x

⁸Vengon xa **Ebrahim**, neketen nan teta, xi telong xat Hi e melele xa tekese tangan ihe kantri tei xa tehit xati tehit

^f10:33 1Kor 4:9 ^s10:36 Luk 21:19; Hib 6:12 ^t10:38 Aes 26:20; Rom 1:17; Kal 3:11 ^u11:3 Sen 1:1; Sam 33:6,9; 2Pit 3:5; Rom 4:17 ^v11:4 Sen 4:3-10
^w11:5 Sen 5:24 ^x11:7 Sen 6:13-22; 7:1; 1Pit 3:20; Rom 3:22; 4:13; 9:30

isa ni mini. E neta sav xa takil ti rute xave xa di teha en, Ebrahim testokovein kantri nan xati e teha. ^{y9}E vengan xa, neketen nan teta, melele taxa tetuxoh kantri xa Hi tehit xati mini, Ebrahim teta en texoni ngan halesav tei. Reitin, xi tetel ngenen xil lateti e nim tavolin xil tang, texoni ngan xa **Aesak** xal **Siekob** mun lutepol ni xa lustral texo vatimol nan tetutou. E hisit hitxatien xa Hi tesa ni mi Ebrahim teha tetuxoh xalu mun del vatimol nalu xil. ^{z10}Ebrahim teta texoni ngan halesav temak vengan xa teling nenemien nan tangan vatatil taon xa mahulong xa de ut nesao. Ngan ak be taon xa Hi vari teling xati e tekili ni tehusil nenemien nan, taon tei xa ita vehakut. ¹¹Vengan xa Ebrahim, neketen nan teta, Hi tesak ni mei tehe tata tei, neta sav xa tehe momatu kuhi ngamu e **Serah** tehe lumalum. Hi tepol ni temak vengan xa Ebrahim tenesi xa Hi ipol sen holesok xil xa tehit xati mini. ^{a12}Tesak ni, rapusi xa, neta sav xa Ebrahim tehe momatu xa tehe momatu pupu e sangas vamat,^b

¹³Melele xa Ebrahim, Aesak xatel Siekob lattelel, neketen natel e hitxatien na Hi texeih tamu, neta sav xa latnaleh ti mu naha xa Hi tehit xati mi xatel. Texoni ngan xa latteketeh tehe sotin e lattelonge tehos pupu ven. Tesak ni, tetel sien, lattehit rati xa lattehe ngan halesav xatel xa tan natel xati e ut etan tovuol. ^{c14}E rakila xa ngan xil xa di lasepin mak di lalang ves kantri tei xa mei ihe nae xati. ¹⁵Xatel ak latnanem ti mun usil kantri xa latestokovein ni. Vengan xa vahit latotit ni ngan xa ti latonem usili, ma latkila

latotilomun latoha en. ¹⁶E eheien natel teti e kantri tei xa ihos mak mu, kantri xa de ut nesao. Misak ni, vengan xa neketen natel texeih en, Hi tave unoun ti tangan moletin xil lakesi ni Hi natel. Vengan xa be reitin xa tesak mesen taon xa mahulong tei e ut nesao tangan latiti en. ^d

¹⁷Vengan xa Ebrahim, neketen nan teta, melele xa Hi tehit vapus kil reitinen te neketen nan, xi temaen xoteh meulien na natneli xa tehe Aesak tangan mei vahe sanien eo tei mini. Reitin, Ebrahim tevue xat xi tangan vahas vin natneli xati xa tehe tei takes nan mei vahe sanien eo tei mi Hi, neta sav xa Hi tehit xati xa isa tuxolxatien mini ixo en. ^{e18}Ebrahim teneket en vengan xa Hi tesepin mini usil natneli ak tehit, “*Vatimol xil xa natehit xati minuk, xil mei listal lixo Aesak.*” (Sen 21:12) ^{f19}E Ebrahim telong xati vengan xa tenemi xa Hi ikila ital rat Aesak ra maten. E, e rin tei, rakila raviteni xa tehe reitin xa Ebrahim tehur rilomun ni Aesak ra maten.

²⁰Vengan xa Aesak, neketen nan teta, melele xa mei tematu kuhi, tesis Hi tangan ituxol xat Siekob xal **Esao** e melengien xil xa ti imei e meulien nalu. ^g

²¹Vengan xa Siekob, neketen nan teta, melele xa sangas vamat, tesis Hi tangan ituxol xat kekes ni nat Siosep xalu.^h Di, “*Siekob tesuv xat xi ni eitingil nan e tepet rat his Hi.*” (Sen 47:31)

²²Vengan xa Siosep, neketen nan teta, melele xa sangas vamat, tesepe usil melele xa Hi isak ni mol-Isrel xil limea lihe reling kantri te hal Isip. E vengan xa teneket xa ngan ak mei istal ihe reitin,

^y11:8 Sen 12:1-5; Pol 7:2-4 ^z11:9 Sen 23:4; 26:3; 35:12,27 ^a11:11 Sen 17:19; 18:11-14 ^b11:12 Rom 4:19; Sen 15:5-6; 32:12; Eks 32:13; Dut 1:10; 10:22

^c11:13 Sen 23:4; 47:9; 1Kron 29:15; Sam 39:12; 1Pit 2:11

^d11:16 Eks 3:6,15; 4:5; Mak 12:26 ^e11:17 Sen 22:1-10; Tem 2:21

^f11:18 Rom 9:7 ^g11:20 Sen 27:27-29,39-40 ^h11:21 Sen 48:15-16

ma tesa sepinien mi xil usil naha xa ti lipol ni ni tiei nan melele xa liha.^{¶ i}

²³Vengan xa tame **Mosis** xal ninen, neketen nalu teti, melele xa Mosis tepot, lutesoso ni aveti tol (3) vengan xa lute-pusi xa tuvava ak tehos xa tehos pupu. Ve neketen nalu, ulixalu tenakan ti teng-an lalolong ras rae na suv toto te hal Isip. ^j

²⁴Vengan xa Mosis, neketen nan teta, melele xa temeul tehe eilep, tesin ni teng-an latekesi ni nat atuli na suv toto te hal Isip. ^{k25}E teling nenemien nan xa ihos mak mu xa ihur longpangasien itel moletin xil na Hi ili ngan xa itit ni **tesaen** xa di misak ni moletin xil lalonge bos tave hi ti. ²⁶Xi tepusi xa longpangasien xa di tehuri vengan di teling neketen nan e Mesaea xa Hi tehiti isa ni imei ihos mak mu ili holesok hos xil xa teti e **Isip**. Tenemi temak vengan xa teketehe tehe sotin tetuxoh huit neketen xa Hi isa ni mini. ²⁷Vengan xa Mosis, neketen nan teta, testokovein kantri te hal Isip e ulin tenakan ni ti ekaten na suv toto teni. Mosis teling nenemien nan texeih xa ix-ulehi ihusil Hi vengan texoni ngan taxa tepusi di tetiamu ni teha, ngan xa moletin ti misakras vapusi. ^{l28}Vengan xa Mosis, neketen nan teta, telong xat rae Hi e tepispisi mi mol-Isrel xil ni sexien xa ti lipol ni **Anien te Tavien** ixo en e itep iaxa ti likas pos te puiteh mae xil ni ra. Isak ni, melele xa masxaxa tei mei ihas vin muimol xil vus xa latehe mal-ohos, navas vin muimol xil na mol-Isrel xil ti. ^m

²⁹Vengan xa mol-Isrel xil, neketen nae teta, latehur xoteh Tas te Pili e tan xa te-vue. E melele xa mol-Isip xil latesak pisi teng-an lapol ni, Hi tepol ni tas mei teku-taxol xil, e xil vus latemerir e latelel. ⁿ

³⁰Vengan xa mol-Isrel, neketen nae teta, latekakao latekapis taon te hal Seriko tehe valu e he sav (7), e viox xa mahulong te taon ak tekiri lel. ^{o31}Vengan xa **Rehab**, neketen nan teta, xi xa tehe atou tei te suse tehur pilei moletin xalu te luvoloven na mol-Isrel xil e tetutou ni xalu. Misak ni, xi tenamat ti vatel ngan xil xa latelong ras rae Hi. ^p

³²Nakila masepin usil moletin sav xil holu, e melele nen ak tapin ti teng-an masep usil neketen na Kideon^q ³³E veng-an xa neketen nae teta, lateha tan ni suv toto te kantri sav xil,^r latelaxat kuh moletin xil texo sexien xa temal,^s

latehur huit hitxatien xil na Hi, latepus Hi teki xol vulonge laeon xil,^t

³⁴latehas upang tei xa mahulong temat,^u

latelesae ra tiei te vaeen, tenbexil temerou, e mei latexeih rilomun, latepol ni holesok xil xa tellep e vaeen xil,

e latehol rerat ngan xil xa di latevae ve rin na kantri sav xil lateha.

³⁵Vengan xa mama xil latehur neketen, xil latehur rilomun ni horamue nae xil xa latemea rilomun ra maten. ^vE mama sav xil, horamue nae xil latehas vin xil vengan xa latesin ni teng-an ha

^{¶11:22} Siosep tesis xil teng-an lileh tiei nan e melele xa listokovein kantri te hal Isip e lilitomun lihe tan xa Hi tehiti xati mi xil (Sen 50:25-26).

^{i11:22} Sen 50:24-25; Eks 13:19 ^{j11:23} Eks 2:2; 1:22 ^{k11:24} Eks 2:10-12

^{l11:27} Eks 2:15; 12:51 ^{m11:28} Eks 12:21-30 ^{n11:29} Eks 14:21-31

^{o11:30} Sos 6:12-21 ^{p11:31} Sos 2:11-12; 6:21-25; Tem 2:25

^{q11:32} Sats 13:2; Sats 4:6; Sats 4:6 ^{r11:33} 1Saml 17:34-36

^{s11:33} Sats 15:20 ^{t11:33} Dan 6:1-27 ^{u11:34} Dan 3:23-25

^{v11:35} 1King 17:17-24; 2King 4:25-37

lameluv. Latemaen ni tangan ha lalel e he mosav xil tangan, itutou sung, likila lihur meulien tei xa ihos mak mu e melele xa limea rilomun ra maten.[§]
³⁶Moletin sav xil, latepol pepamen mi xil, latemeas pangas xil ni ao xa tekan, lateso xil latehe nim te xeih, e lateling sen e xil.^{w37} E moletin tesav xil mun, latehov vin xil, lateta xoteh xil latehe rin lu, e latesal vin xil ni tiei te vaeen. Xil holu, moletin xil latesak purun xil e latepol ni tesa mi xil. Holesok nae xil latehe tovuol e latesing ni hilbe sipsip mu nani xil tang.^{x38} Ngan xil ak latekakao e uruvuol e rute xa vathu xil lateti en, e lateti e vangihat xil e vul xil tang. Hisit moletin xil ak latehos mak mu pe met Hi, e ut etan tapin ti tangan xil liti en.

³⁹Vengan xa neketen nae teta, Vanuvei Eo tesepin tehos usil moletin xil vus ak. E, e meulien nae, xil latnahur sen holesok xil ti xa Hi tehiti xati mi xil.
⁴⁰Vengan xa Hi teling xati xa huite te naha xa tehiti xati mi xil mei imal tevi ixo naha ti ipol ni e meulien nar e melele xa rituxoh hoxalit lohen te neketen nar.

Ripol ni sexien nar mei ixoni sexien na Iesu Kristo

12 Moletin xil ak latepisen ni xa neketen nae tete Hi. E nggoni ngan xa xil di lakapis xol xir e di lapet rat nenemien nar tangan ti riloh kuhi e lohen te neketen nar. Misak ni, e hisiti sex-

ien xa moletin te lohen di mistokovein holesok xil vus xa meas xat xi, momal tangan xir ristokovein neta xil vus xa di meas xat xir e *tesaen* xil xa di bil xat xir. Ti, riloh ixeh e lohen xa Hi teling xir en itel nenemien xa rituxoh hoxalite teni.^{y2} Riling metexir e Iesu xa teha teti-amu ni xir e suse te neketen, e tesak ni mei ramal tevi pe met Hi nggo neketen nar. E vengan xa Iesu tepus kil sien xa ihuri itutou, xi tehur nenemien xa tehe teviei e temaen tasen ni xi e teha temat e eivave. Xi tenave unoun ti tangan vahur hisiti maten xa vamak xa be na moletin tesa xil. Misak ni, melele xa temat, Hi tepet rati e temaen ni tetotan e von mer-eeen e rin matu te von xeihen nan.^z

³Iesu tehur sakpurunien xil holu texo he ngan xil xa lapol ni *tesaen*, e tehuri tetel nenemien xa tehe teviei. Misak ni, melele xa xamim mulonge misa, munem usil xi tangan nenemien namim namot ti e munastokovein neketen namim ti.
⁴Melele xa di musak del tesaen xil te ut etan ak, munem xati xa remim tenaleh ti mu e mutnamat ti mu ven.⁵ E iemim nabong ni ti selxatien xa teha mi xamim vengan xa mube horamue xil na Hi xa tehiti,

“Horamue navan, uteong kuhi e melele xa Iahova di momal ni xouk ve neta ngan, e nenemien nam namot ti e melele xa di misa pangasien minuk.

⁶*Upol ni imak, vengan xa Iahova di momal ni ngan xil xa eheien nan di e xil*

§11:35 Sepinien ak di bit usil mama tei e 170 BC, hura xil tetiamu ni poten na Iesu, xa tepus natneli lu e he sav (7) xa latehur longpangasien xil te xeih e he kavmen te hal Kris xa tehiteni mi xil xa likila ha limeluv xosxa listokovein neketen nae e Hi. E melele xa latesin ni tangan lapol ni, latehu vin xil kekes pe met mama nae. E melele xa horam maxoe xil ak latelel, xil vus latehit rati xa lateling nenesien nae e Hi xa isak ni xil limea rilomun ra maten. Di, latehas vin mama nae mun (2 Maccabees 7:1-41).

^w11:36 1King 22:26-27; 2Kron 18:25-26; Ser 20:2; 37:15; 38:6

^x11:37 2Kron 24:21 ^y12:1 1Kor 9:24

^z12:2 Sam 110:1; Mat 22:44; Mak 16:19; Pol 2:34; Efes 1:20; Hib 1:3; 8:1; 10:12

e di misa pangasien mi ngan xil xa teleh rerat xil mei labe nan xati.” (Pro 3:11-12)^a

⁷ Melele xa di mubisu ni longpangasien xil, muhuri itel nenemien xa ihe teviei ixoni ngan xa be Hi iaxa di momal ni xamim. E munalonge ti nasa vengan xa Hi di pol ni mi xamim nggoni ngan xa mube horamue nan xati. Vengan xa horamue tovuol xa tamen di tamal ni ti. ^{b8} E vahit Hi namal ni xamim ti naxoni ngan xa di pol ni mi horamue nan xil vus, ma vapisen ni xa di pol ni mi xamim naxoni ngan xa mube horamue xil te suse e mutave horamue nan xil xati ti. ⁹ Melele xa tamexir te ut etan di lamal ni xir, ramerere ni xil. Mak, ma momal mak mu tangan riling nenemien nar ihe tan tangan rihusil nenemien na Tamexir xa de ut nesao tangan rihur meulien sal. ^{c10} Tamexir te ut etan di lamal ni xir be tamure tang nggusil naha xa momal e nenemien nae. E Hi, xi di momal ni xir tangan vatutou ni xir tangan vasak ni xir mei rave eo vaxoni ngan xa xi be eo. ¹¹ Melele xa lamal ni xir ve neta ngan, ratamaal ti ven. Reitin, di misak ni xir ralonge misa ven. E dutou ni sung, melele xa lapispisi mi xir ni naha xa momal nggo en, di rapus huiteni xa di mistal e meulien nar xa be tomat e momalen. ^d

¹² Ve rin ak, *“musak ni hemim mei ix-eih tangan ipol e lemim mei ix-eih tangan musomal.”* (Aes 35:3) ¹³ E *“muxuxou kuhi xa kakaoen namim imal,”* (Pro 4:26) tangan ngan xil xa di langgusil xamim xa lamerou mu lasakras lakakao kuhi e neketen nae, xil linasavut ti e linamot. Ihos mak mu xa mututou ni xil mei lix-eih pilei mu.

Selxatien tangan rinasin eheien hos ti xa Hi di pisen ni mi xir

¹⁴ Musak pisi tangan muti e tomat itel moletin xil vus, e musak pisi tangan kakaoen namim ihe eo. Mupol ni imak vengan xa ngan xil xa latave eo ti lasakras lapus Hi Suv. ^{e15} Muxuxou kuhi tangan munahiles tinemim ra Hi xa tehur pilei xamim ve eheien hos nan. Vengan isa xosxa mupol ni imak, ma nenemien tesa namim naat purun xamim ti mun tang naxoni hing xa di nggat purun xuxus ni vatiei savsav xil. ^{f16} Muxuxou kuhi tangan ti e xamim napat vituei natel hanusav tei xa tenateli ti tetela, e nanem male ni holesok xil na Hi tenaxoni ngan xa *Esao* tepol ni. Vengan xa xi tepos ni von muimol nan ve pelet te anien tei takes. ^{g17} E xamim mukila xa, tetutou sung, Esao ien tehei tangan vahur tuxolxatien na muimol xil, e tamen tesin ni. E neta sav xa tetang ven, tepusi xa mesal tovuol mun tangan vahiles naha xa tepol ni ngamu. ^h

¹⁸ Xamim mutamei ti visal Vathu Senae vaxoni ngan xa mol-Isrel xil teti-amu latepol ni. Mutnamei ti e rute xa mukila mupusi e mutuxoli. Mutnapus ti upang xa mahulong xa tepili, momah xa maluxoluk xa di tetuvan, e votiang xa temu texeih. ⁱ¹⁹ Xamim mutnalong ti amaru xa tesel texeih xa texeih, e rae Hi xa tesak ni ngan xil xa latelonge, ulixil tekan pupu e latetakesi tangan nasepin ti mun imal ni xil. ²⁰ Ulixil tekan temak melele xa lateteong ni rae na Hi xa tehit, *“Xosxa neta tei imei sangas ituxoh vathu ak, ma muhov vini, neta sav xos be moletin mu vongoro tei.”* (Eks 19:12-13) ²¹ Reitin, melele xa **Mosis** tepusi, len mun temalili

^a12:6 Rev 3:19 ^b12:7 Dut 8:5; 2Saml 7:14 ^c12:9 Nam 16:22; 27:16

^d12:11 Tem 3:17-18 ^e12:14 Sam 34:14; Rom 12:18 ^f12:15 Dut 29:17

^g12:16 Sen 25:29-34 ^h12:17 Sen 27:30-40

ⁱ12:18 Eks 19:16-22; 20:18-21; Dut 4:11-12; 5:22-27; Eks 19:12-13; Dut 9:19

e tehit, “*Leok di malili e uluk di mikan holu.*” (Dut 9:19)

²² E xamim mutamei ti sangas ni vathu tei te ulikanen xa temak. E xamim mumei visal **Vathu Saeon** te ut nesao, taon te hal **Serusalem** na Hi xa di meul vehakut xa vehakut tang. Mumei visal **masxaxa** nan xil xa labe holu xa labe holu pupu xa di lamei vituei tangan lapet rat hisen itel sien. ^{j23} Mumei tangan mutit vituei itel horamue sav xil na Hi xa di langgur tuxolxatien holu nggoni ngan xa labe muimol nan xil, ngan xil xa latetis xat hisexil tete vanuvei na Hi e ut nesao. Xamim mumei visal Hi xa di milepis rin na moletin xil vus. E mumei e rute xa ninin na ngan xil xa lamal tevi pe met Hi ladi en. ^{k24} E mumei visal Iesu xa di pol pe met Hi ve rin na moletin xil nggusil **hitxatien te xeih** hu nan.¹

²⁵ Misak ni, muxuxou kuhi tangan munasin ti ngan xa di misepin mi xamim. Munem xati xa mol-Isrel xil xa latesin selxatien na Hi e ut etan, latnalesae ti ra ekaten nan. ?Vengan xa ngan ak be reitin, xamim xa di musin rae Hi xa di misepin mi xamim nggo ut nesao ti mulesae ra ni itep? !Musakras vari! ^{m26} E melele xa Hi tesepin texo Vathu Senae, raen tesak ni tan temulul texeih.ⁿ E xosali, xi tehit xati tuei tehit, “*Nisak ni rute xil vus te ut etan imulul vatei mun, e nave ut etan ti kestang, ut nesao mun imulul.*” (Hag 2:6)

²⁷ Sepinien xa bit, “*vatei mun*” di bit kila xa holesok xil vus xa Hi tepeas ni, xi ilul ni e ileh rerati ihe rin e ha ikesae vari. Isak ni, holesok xil kestang xa lasakras lamulul liti nga.

²⁸ Lelaxatien na Hi misakras vamulul. E vengon xa di misa rat lelaxatien nan

ak mi xir, momal tevi tangan rimesi ihe holu xa ihe holu mak mu e rimot mini itel merereen e ulikanen. ²⁹ Rimot mini imak vengon xa xeihen na Hi nar nggoni upang tei xa mikila vaa len holesok xil vus.^o

Selxatien tangan ripol ni sexien xil xa imal pe met Hi

13 Momal tangan xamim Kristin xil muxulehi tangan ti iemim ihei xamim mun tang. ² Iemim nabong ni ti tangan ti muhur pilei ngan xil e tim samim xa labe ngan halesav. Munem xati xa rut moletin xil xa latepol ni, latakil ti xa di latehur pilei **masxaxa** xil. ^{p3} Iemim nabong ni ti tangan ti musa tutouen mi ngan xil xa ladi e nim te xeih. Mupol ni ixoni ngan xa xamim mun mudi e nim te xeih itel xil. Iemim nabong ni ti tangan ti mututou ni ngan xil xa di langgur longpangasien xil holu nggo he mosav xil. Mupol ni ixoni ngan xa xamim mun di munggur longpangasien xil ak. ^q

⁴ Xamim vus mumerere ni tetelien, e tiramue xal atou xa luteli lalihe reitin ve xalu kestang. Mupol ni imak vengon xa Hi ilepis rin na tiramue mu atou xa miteli ngamu e ba pat vituei del hanusav tei. E ilepis rin na ngan mun xa ba pat vituei del hanusav tei e melele xa lutateli ti mu. ^{r5} Mupol ni meulien namim imeluv ra eheien te **mani**. Mulonge ihos tang e naha xa mungguri. Vengon xa Hi tehiteni tehit,

“*Ninastokovein xamim ti e ninasin xamim ti.*” (Dut 31:6) ^s

⁶ Ma, risoh ixeih e rihit, “*Iahova vari di dutou ni nou, misak ni uluk nakan ti.*”

^j12:22 Kal 4:26; Rev 21:2; 5:11 ^k12:23 Luk 10:20; Sen 18:25; Sam 50:6

^l12:24 Sen 12:2-4; Hib 7:22; 8:6; 9:15; 1Pit 1:2; Sen 4:10

^m12:25 Hib 2:1-3; 10:28-29 ⁿ12:26 Eks 19:18; Sats 5:4; Sam 68:8 ^o12:29 Dut 4:24; 9:3; Aes 33:14 ^p13:2 Sen 18:1-8; 19:1-3 ^q13:3 Mat 25:36; Hib 10:34

^r13:4 Kal 5:19,21; Efes 5:5 ^s13:5 Sen 28:15; Dut 31:8; Sos 1:5

?Vengan xosxa imak, visi vari mikila vapol ni neta vaha xat inou? Moletin tovuol.” (Sam 118:6)

⁷ Munem xat vat xil xa latetel rohon ni xamim e neketen namim, xa latesa longeongen hos na Hi mi xamim. Munem rilomun ni usil sexien te kakaoen nae e melele xa latemeul tamu lateti, e tetep iaxa latemat, e mutepol texoni xil tang. ¹⁸ Iesu Kristo dat mak tang tetiamu, xosali, e vehakut tang, nahiles ti. ⁹ Munamaen pispisien savsav xil ti xa latave reitin ti tangan linatel xamim muhe reling suse na Hi xa momal. Ma ihos xa nenemien namim ixeih vengana xa mukil eheien hos xa Hi di pisen ni mi xamim. Munanem ti xa mumal pe meten vengana xa di mulong xat rae xil te anienen. Vengana xa hisit rae xil ak usil anien lasakras latutou ni ngan xil xa di langgusili. ^u

¹⁰ E rin nar, Iesu temat texoni sanien eo tei xa lalingi de *hor te sanien eo*. E pris xil xa di lapol e *Nim Tavolin* xa langgulehi dit langgusil sexien matu na Siu xil, sanien eo ak na Iesu natutou ni xil ti. ¹¹ Tetiamu, melele xa *vaticar na pris xil* na Siu xil latehas buluk mu nani tei, teserev kuh re vongoro ak tehe pesin tei tangan vahuri vahe visal Hi tangan xi vakas moten meten ra *tesaen* na moletin xil. Melele xa tepol ni tevus, pris sav xil latepo rat tiei teni tehe reling rute xa moletin xil lateti en, e latesupang e upang tea len ni vari tang. ^{v12} Misak ni, Iesu mun tehur longpangasien xil e temat e hale te taon tangan, tetel ren xati, mikila vasak ni moletin nan xil mei lamese pe met Hi ve tesaen nae xil. ¹³ Misak ni,

rinave unoun ti tangan rave reling rute xa moletin nar xil ladi en** tangan rave visal Iesu xa di rabisti vituei dela e ti rihur hisit longpangasien xil ixoni ngan xa xi tehuri. ^{w14} Vengana xa, e ut etan ak, taon tovuol xa mikila vata vehakut. E di ralang ni taon tei xa ti mei. ^{x15} Misak ni, ve naha xa Iesu tepol ni e rin nar, vehakut ti risa memesien mi Hi ixoni sanien eo nar mini. E rihit rati xa Iesu be Suv nar e di raling neketen nar en. ^{y16} E iemim nabong ni ti tangan mupol ihos mi mosav xil e mututou ni xil itel naha xa di e hemim tangan mupol ni, vengana xa Hi besi xi ve sexien xil ak. ^z

¹⁷ Mulong xat vat namim xil te neketen e muhasil sepinien nae xil. Vengana xa xil di laketeh xol meulien e neketen namim. E melengien tei, xil lisoh pe met Hi tangan lihit rilomun ni sepinien mini ihusil polien xa xi telingi tete hexil. Mulong xat xil tangan likila lipol itel sien, e natel nenemien ti xa nasa, vengana nenemien tesa xa mak misakras vatutou ni xamim. ^a

¹⁸ Muis li e rin namem vengana xa di mapol ni holesok xil vus del nenemien xa memese tevi, e di masak tangan sexien namem mi mosav xil momal e melengien xil vus. ^{b19} E nadakes xamim mak mu tangan musis mi Hi xa itemanon ipol ni suse tangan nikila nitilomun nihat ve xamim nave nousav ti.

Sisen kor

²⁰ Hi be vatit tomat e xi tetal rat Iesu, Suv nar, ra maten. Iesu nggoni moletin te lelatatien xa eilep na sipsip san xil.

**13:13 Ngan ak di misep usil sanien eo xil del sexien sav xil na Siu xil xa tateh meulien e moletin xil ti vengana xa Iesu Kristo kestang iaxa be suse tete meulien en.

^{t13:7} 1Kor 4:16; Hib 6:12 ^{u13:9} Efes 4:14 ^{v13:11} Lev 16:27

^{w13:13} Hib 11:26 ^{x13:14} Hib 11:10,16; 12:22

^{y13:15} 2Kron 29:31; Sam 50:14,23; Hos 14:2 ^{z13:16} Plp 4:18

^{a13:17} Aes 62:6; Esek 3:17 ^{b13:18} Pol 24:16; 2Kor 1:12

E Hi tesak ni *hitxatien te xeih* nan mei tehe reitin e ita vehakut texo re Iesu. ^{c21} Misak ni, nasis tangan Hi ipol sen holesok xil xa ihos e meulien namim tangan mukila mupol sen naha xa xi ien bei xamim tangan mupol ni e ihesi xi ihe holu ve xamim. Ipol ni holesok xil ak ixo Iesu Kristo xa momal tangan risa memesien e merereen iha mini vehakut xa vehakut tang. Reitin.

Sepinien kor

²² Nadakes xamim, tuxoli e hinoxoli xil, tangan mulong kuh selxatien navan

xil ak, vengam xa sepinién xil xa di nadisi xiak bat mi xamim tave teviei pupu ti. ²³ Ieok bei tangan xamim mukila xa tua nar Timoti ba ven mase ra nim te xeih ngamu. E xosxa imei itemanon, ma nihuri itel inou e melele xa nihat nisao ni xamim. ²⁴ Musa ‘bos makoe’ navan iha mi vat namim xil vus e mi moletin xil vus na Hi mun. Tuemim xil te neketen xa ladi e kantri te hal Itali di lasa ‘bos makoe’ nae bat mi xamim. ²⁵ Di nasis tangan eheien hos na Hi iti mi xamim vus.

Sepinien xa diamu te

Temis

?Visi iaxa tetis uvei ak?

Moletin xa tetis uvei ak, hisen Temis. Xi tehiteni xa tehe moletin te polien na Iesu Kristo xa tehe Suv nan.^d Temis temat e huram hanutap tol e lu mun AD (huram 62 tetutou ni poten na Iesu) e he vat xil na Siu xil e hal Serusalem xa latehov vini.

?Visi iaxa tevuli uvei ak tetiamu?

Temis tetis uvei ak teha mi Siu xil xa latehe Kristin xil xa latetasil ba lateti e rute xil vus e ut etan.^e Xi tetis uvei ak sangas ni huram hanutap lu e tol e he sav mun (48) AD tetiamu ni vitueien xa eilep tetel Pol xal Saelas usil Kristin xil xa latave ngan Siu ti e huram hanutap lu e he xalu mun (50) AD.

?Veneh vari Temis tetis uvei ak?

Temis tesel xat Kristin xil tangan lipisen reitinen te neketen nae ixo sexien hos xil - Kristin xil xa latehe Siu xa latetasil ba lateti e tan na ngan xil xa latave Siu ti di latenemi latehit pipin tang tangan lineket e Hi e Iesu Kristo ixo nenemien nae kestang. E Temis tesel xat xil tangan ti lipol ni naha xa sepinien na Hi di biteni.^f

Temis tesel xat Kristin xil tangan lisoh ixeh e melele xa lihisu e sakpisien xil e melele te xeih xil - Kristin xil di latehisu ni hisit melele te xeih sav xil. Ma

tesel xat xil tangan lisokil e neketen nae vengan xa ti lihur meulien sal.^g

Temis tesel xat Kristin xil tangan sepinien e sexien nae xil ihusil metisouen xa nggo ut nesao - Temis telongeong ni xa Kristin xil di lale ras suse te reitinen na Hi,^h

Temis tesel xat Kristin xil tangan lixouxou kuhi e linamaen nenemien te mani ti nalihi nenemien nae - Temis telongeong ni xa ngan xil te sias di latemerere ni ngan xil xa holesok nae holu e di latenem male ni movotei xil tang.ⁱ

Nenemien xa eilep te uvei ak de Temis 2:18

E vahit moletin tei vahiteni minou vahit, “Rut moletin xil langgur neketen kestang, e rut moletin xil langgur neketen del sexien hos xil teni mun.” E nenemien na moletin ak tamal ti. Moletin ti misakras vapisen reitinen te neketen nan xosxa sexien hos xil teni tovuol. E inou nikila nipisen reitinen te neketen navan ixo sexien hos xil teni.

?Naha iaxa di e uvei ak?

1. Selxatien tangan Kristin xil lisoh ixeh e neketen nae e melele xa labisu ni sakpurunien xil. (1:1-18)

2. Sexien hos na ngan xil xa neketen nae be reitin. (1:19–5:20)

a. Ngan xa neketen nan be reitin di milong xat sepinien na Hi. (1:19-27)

b. Ngan xa neketen nan be reitin naketeh ni ti navit moletin tei mili moletin sav xil. (2:1-13)

c. Ngan xa neketen nan be reitin ipisen kil xi ixo sexien hos xil nan. (2:14-26)

^d1:0 Tem 1:1; Mat 13:55; Mak 6:3; Pol 12:17; 15:13,19; Kal 2:9,12; Sion 7:3-10; 1Kor 15:7; Pol 1:14; 1Kor 9:5; Kal 1:19 ^e1:0 Tem 1:1 ^f1:0 Tem 1:22,25; Tem 2:17 ^g1:0 Tem 1:12; Tem 1:12-18 ^h1:0 Tem 5:19; Tem 5:13-14; Tem 3:14; Tem 4:1-4; Tem 1:5; Tem 3:17-18 ⁱ1:0 Tem 2:1-4; Tem 2:5-7; 5:1-6; Tem 4:4

d. Ngan xa neketen nan be reitin di ng-gouxou kuhi ve sepinien nan xil. (3:1-12)

e. Ngan xa neketen nan be reitin di ng-gusil metisouen na Hi. (3:13-18)

f. Ngan xa neketen nan be reitin di miling nenemien nan be tan pe met Hi. (4:1-12)

g. Ngan xa neketen nan be reitin di miling nenesien nan e Hi e tave holesok xil ti te ut etan. (4:13-5:6)

h. Ngan xa neketen nan be reitin di datil mei rilomunen na Iesu Kristo del nenemien xa teviei. (5:7-12)

i. Ngan xa neketen nan be reitin be moletin te sisen. (5:13-18)

j. Ngan xa neketen nan be reitin di misak pisi tangan vahiles mosav xil ra suse te maten xa ladi en. (5:19-20)

Sepkilaen na Temis usil uvei ak

1 Inou, Temis, nabe moletin te polien na Hi e na Suv Iesu Kristo. ^j

Nabit 'bos makoe' mi xamim xa mustal munggo vatimol xa mahulong lu e le tei (12) te hal Isrel, xa sakpurunien xil tesak ni xamim muletasil ba mudi e rute xil vus nggoni ngan halesav xil. ^{††}

Neketen e metisouen xa nggo Hi itutou ni ngan xil xa di labisu ni melele xil te xeih

²Tuxoli e hinoxoli xil, melele xa di mubisu ni melele xil te xeih nggo suse sav xil munalongte ti nasa ven, e muhesi xamim tang. ^{k3}Vengan xa mukila xa holesok xil xa di misak pis neketen namim ti isak ni xamim mei mukila musokil mak mu. ¹⁴E melele xa musokil e neketen xil namim vehakut, isak ni mumatu kuhi e neketen namim e sex-

ien namim imal tevi. Imak, ma munave tamure ni ti neta melele xa ti muhisu ni holesok xil vus xa ti imei.

⁵E xosxa tei e xamim be tamure ni metisouen e meulien nan, ma isis Hi ni e xi isa ni mini. Isa ni mini venggan xa, vehakut, Hi besi xi tangan vasa holesok xil xa bos mi moletin xil. ^{m6}E melele xa xamim di musis Hi ve neta ngan, muneket ixehi xa Hi di milong sisen namim e isa huitte teni. Nenemien namim usili nave lu ti, venggan moletin xa taneket kuhi ti e Hi, xi tara kat ti e di pol lualu ni holesok xil nggoni tahe tei xa mea e mesal e votiang dit divinlil ni. ⁿ⁷Hisit moletin xa mak nanem ti nahit Hi isak ni huit sisen nan mei istal, ⁸venggan xa Hi mikila xa nenemien nan usil sisen nan be lu e xi tara kat ti e rin xil holu e meulien nan.

Momal xa moletin xil vus lavesi xil ve naha xa Hi tepol ni ve rin nae

⁹Xamim xa holesok namim e ut etan tovuol, mukila musep koai venggan xa mutehur his xa be nesao pe met Hi. ¹⁰E xamim xa holesok namim holu, neta sav xa, vatei, holesok namim xil ikesae ixoni hosien te hungovae tei, mukila musep koai venggan xa mutehur hisit his xa pipin mi moletin sav xil pe met Hi. ^{o11}Reitin, hungovae tei, melele xa eai be nesao e mingga nggeih, misin xat hungovae ak e misak ni hosien teni di mikesae, mei melles, e mot be tan. Ng-gusil hisit sexien ak, e melele taxa moletin tei xa holesok nan holu di tamu pol ni polien nan xil, xi ikesae itel holesok nan xil.

^{††}**1:1** Latekes Kristin xil ni 'halesav xil' venggan xa vonexil xati be ut nesao. Latehit usili e Pol 8:1,4; 11:19.

^j**1:1** Pol 15:23; 1Pit 1:1 ^k**1:2** Rom 5:3-5; 1Pit 1:6 ^l**1:3** 1Pit 1:7

^m**1:5** Pro 2:3-6 ⁿ**1:6** Mat 7:7; Mak 11:24

^o**1:10** Sam 102:4,11; Aes 40:6-7; 1Pit 1:24

Hi tave vatite te melele te xeih xil mu sakkpisien xil ti

¹²Tuxolxatien na Hi iti mi ngan xil xa di lasokil e melele xa di labisu ni melele te xeih xil e sakkpisien xil. Lih-esi xil vengan xa ngan xil xa di lasokil e neketen nae mak lihur huit neketen nae xa ihe meulien sal xa Hi Suv tehit xati mi ngan xil xa eheien nae di en. ^{p13}E melele xa di ranggur sakkpisien tangan rapol ni neta xa vasa, rinanemi ti rinahit Hi iaxa di misak pis xir. Sakkpisien ak misakras vaxo Hi vengan xa xi misakras vasak pis moletin tei vaxo rin te tesaen. Ngan ak be reitin vengan xa tesaen misakras vasak pis Hi vari. ¹⁴E sakkpisien xil nggo tine moletin tang, e melele xa eheien nan de neta tei xa misa, e maen ni milihi nenemien nan. ¹⁵Di, eheien e neta xa misa xiak di meul xuxus e nenemien nan nggoni ngan xa tuvava tei di meul xuxus e vang ninen. Reitin, eheien tesa ak di meul xuxus ba vuma ... mei mistal e valkesao be sexien te **tesaen**. E melele xa tesaen ak mei imeul ihe eilep e meulien na moletin ak xa temaen ni tangan vameul, tesaen ak ihiles ihas vini vari. ¹⁶O navan xil li, vengan xa rin ak be reitin, munahusil pispisien te luvosen xil ti usil Hi.

¹⁷E bos xa mukila xa sanien xil vus xa bos e momal tevi di lastal langgo he Hi Tamer xa de ut nesao xa besi xi tangan ti vasa xil. Xi iaxa be vatit miehien xa tepol ni eai, aveti, e hitu xil. E sexien nan xil taviles ti vaxoni nini neta tei xa mieh e, di, bilhiles mei maluxoluk. ^{q18}Nggusil nenemien nan, Hi tesak ni xir mei rabe neta hu texo sepinien te reitinen nan. Xi tepol ni temak vengan ien bei tangan

vasak ni xir mei rave eilep raleli holesok sav xil vus xa xi tepeas ni, nggoni ngan xa rabe muimol teni. ^r

Melele xa di rateong ni sepinien na Hi, momal mun tangan ripol ihusili

¹⁹Tuxoli e hinoxoli xil, bos mak mu tangan xamim vus mutemanon tangan muteong kuhi ni sepinien na mosav xil, e munatemanon ti tangan munaso sepinien tova. Ma munave hisit moletin xil ti xa iexil di mikat manon. ^{s20}Vengan melele xa iemim di mikat, musakras mupol ni ti neta xa vamal pe met Hi. ²¹Misak ni, muso sen sexien tesa xil liha vengan xa lapuru pupu e di labo e meulien namim. E itel nenemien xa ihe tan, muhur pilei sepinien xa Hi telih xati tete meulien namim e mupol ihusili. Reitin, muhur pilei vengan xa xeihen di en tangan vateh meulien e xamim. ^t

²²Melele xa di mulong sepinien na Hi, bos xa ti mupol ihusili. Vengan xa ngan xil xa latahusili ti, xil di laluvos xil mun tang. ^{u23}Reitin, xosxa moletin tei di mulong sepinien na Hi e di tapol ti vahusili, ma xi nggoni moletin xa ba pus valnaon e kilas tei. ²⁴E melele xa be reling kilas ak, ien bovorong ni valnaon mun vari. ²⁵E xamim mube ngan xil xa di mupus **rae na Hi** xa momal tevi xa ikila isak ni xamim mumeluv ra ekaten te lepisien na Hi xa iha xat tesaen. Ma, munem xati e muhusil xat kuh naha xa di biteni. Imak, ma tuxolxatien na Hi iti e meulien namim. ^v

²⁶Xosxa mubit mube moletin xil xa di munggusil kuh sexien xil te neketen pe met Hi, e mutaxuxou kuh ti ve sepinien namim xil, ma di muluvos xamim mun tang e neketen namim tave reitin ti.

^{p1:12} 1Kor 9:25; 2Tim 4:8; 1Pit 5:4; Rev 2:10 ^{q1:17} Mat 7:11

^{r1:18} Sion 1:13; 1Pit 1:23 ^{s1:19} Ekl 7:9 ^{t1:21} Kol 3:8; 1Pit 2:1 ^{u1:22} Mat 7:26; Rom 2:13 ^{v1:25} Rom 8:2; Kal 6:2; Tem 2:12; 1Pit 2:16; Sion 13:17

^{w27} Hisit sexien xil te neketen xa bos mak mu e memese tevi pe met Hi Tamer mak: ti mulaxat kuh timaru xil e tunau xil xa lakameti nggeih e meulien nae, e ti munamaen meulien namim ti mei nahe muis ni tesaen xil te ut etan.

Selxatien tangan Kristin xil linapet rat moletin tei ti nali moletin sav

2 Tuxoli e hinoxoli xil, xosxa neketen namim di e Suv Iesu Kristo xa hisen eilep mak mu mili sen his sav xil, munapet rat hisit moletin tei ti nali hisit moletin sav xil. ²Ma, vahit moletin lu lalomei e vitueien tei namim, tei xa holesok nan holu xa mising bos e pilas ni xi ni ring xa be gol, e tei xa holesok nan tovuol xa mising ni talmusu xil tang. ^{x3}E vahit mupus kil ngan xa mising bos muhit, “Amei li, utotan e vontoen xa bos xiak.” E ti, ha muviteni mi ngan xa mising ni talmusu muvit, “!Ha, usoh inggaxor!” mu “!Amei, utotan e tan inggak!” ⁴Xosxa di mupol ni hisit sexien ak ma nenemien namim polu ni tesaen. Nenemien namim misa vengan xa di pisen ni xa di mulepis rin na moletin xil mubit rut moletin xil labos lali rute ngan xil.

⁵!Tuxoli e hinoxoli xil, muteong kuhi! ?Midep? ?Mutakil ti xa Hi tehosei ngan xil xa holesok nae xil tovuol e ut etan tangan mei lipolu kuhi ni neketen? E tehit xati xa mei lihe vat xil te holesok xil xa ladi pe lelxatien nan. ^{y6}?Ma veneh ma di munem male ni ngan xil xa holesok nae tovuol? Vengan be ngan xil xa holesok nae xil holu iaxa di lasak purun xamim. Xil iaxa di lalihi xamim mube von koten. ⁷Be xil iaxa di lasopin misa

ba xat his hos na Iesu, ngan xa mutehuri mei be Suv namim.

⁸Bos mak mu xa muhusil xat **rae** na ngan xa be suv toto nar reitin xa tehiteni e Vanuvei Eo tehit, “*Iemim ihei moletin sav xil ixoni ngan taxa xamim vus di iemim bei xamim mun tang.*” (Lev 19:18) ⁹E xosxa ti muPET rat hisit moletin tei ili hisit moletin sav xil, ma ngan ak be **tesaen** ba xat rin namim, e rae na Hi di pisen kila xa di munggur xoteh rae nan. ^{z10}Vengan, neta sav xa sangas muvur xat rae xil vus na Hi, e munggur xoteh tei takes, ma pe meten, nggoni ngan xa munggur xoteh rae nan xil vus. ^{a11}Nggusil nenemien ak, Hi tesemae ni tehit, “*Munakan ni ti atou mu tiramue na mosav.*” (Eks 20:14)^b E xosxa mutakan ni ti atou mu tiramue na mosav, e muba sung mubas vin moletin tei, ma di tamu munggur xoteh rae na Hi.

¹²Ma, vengan xa mukila xa rae na Hi ikila isak ni xamim mumese ra ekaten te lepisien nan ba xat tesaen, sepinien e sexien namim mi mosav xil ihusil rae nan te eheien. ^{c13}Vengan moletin xa tapisen eheien ti mi mosav xil, xi nakamet ti eheien e Melengien te Lepisien. E ngan xa di pisen eheien mi mosav xil, xi ikamet eheien na Hi melele xa isoh pe meten e melele nen ak. ^d

Ngan xil xa neketen nae be reitin lipisen ni ixo sexien hos nae xil

¹⁴?Tuxoli e hinoxoli xil, naha ihos mi moletin tei xa bit neketen nan da, e sexien hos nan xil tovuol? ?Midep, hisit neketen ak mikila vateh meulien e moletin ak? !E-e, misakras! ^{e15}Xos tuxoli mu hinoxoli tei namim da xa eising nan

^{w1:26} Sam 34:13; 39:1; 141:3 ^{x2:2} Siob 34:19; Pol 10:34; Tem 2:9

^{y2:5} 1Kor 1:26-28 ^{z2:9} Dut 1:17 ^{a2:10} Mat 5:19

^{b2:11} Dut 5:18; Mat 5:27; 19:18; Mak 10:19; Luk 18:20; Rom 13:9; Dut 5:17; Mat 5:21; Mak 10:19; Luk 18:20; Rom 13:9 ^{c2:12} Rom 8:2; Kal 6:2; Tem 1:25; 1Pit 2:16

^{d2:13} Mat 5:7; 18:32-35 ^{e2:14} Mat 7:21

tovuol e anien an tapin ti. ¹⁶E xosxa mubiteni tang mini mubit, “Uha itel tomat. Ulonge vem itin e ti uanien kuhi,” e mutatutou ni ti, ma neketen namim be neta sav tang. ¹⁷Ma mupusi xa neketen xa sexien hos xil tahusili ti be neta sav tang. Reitin, hisit neketen ak mat. ^f

¹⁸E vahit moletin tei vahiteni minou vahit, “Rut moletin xil langgur neketen kestang, e rut moletin xil langgur neketen del sexien hos xil teni mun.” E nenemien na moletin ak tamal ti. Moletin ti misakras vapisen reitinen te neketen nan xosxa sexien hos xil teni tovuol. E inou nikila nipisen reitinen te neketen navan ixo sexien hos xil teni. ¹⁹?Be reitin xa di oke reitin xa Hi be tei takes? Ngan ak bos, e munem kila xa ninin tesa xil mun lake reitin e rin ak, e lexil di mulul del ulikanen ve pangasien xil xa di bemei e xil. ^{g20}Di opisen ni xa vatum tovuol. Nipisen kila minuk xa neketen xa sexien hos xil tovuol en be neta sav tang.

²¹Xamim munem usil **Ebrahim**, vatit avu nar tetiamu. Xi mei temal pe met Hi texo sexien hos nan xil. Vengan melele xa Hi tesis, Ebrahim teling natneli **Aesak** e **hor** tangan vahas vini vahe sanien eo nan mini. ^{h22}Mak, ma mupus kila xa neketen na Ebrahim di pol vituei del sexien hos nan xil. Reitin, texo sexien hos nan xil, Ebrahim tepisen ni xa neketen nan temal tevi. ⁱ²³Ngan ak tepisen reitinen te sepinien xa de Vanuvei Eo na Hi xa bit, “*Ebrahim miling neketen nan e hitxatien na Hi. E ve rin ak, Hi bit rati xa Ebrahim momal pe meten.*” (Sen 15:6)^j E ve rin ak, laces Ebrahim ni timue hos na Hi. ²⁴Ma mupus kila sung xa moletin mei momal pe met Hi nggo

sexien hos nan xil mun, e taxo neketen nan ti kestang.

²⁵Nggusil hisit sexien ak, **Rehab** xa tehe atou tei te suse mei temal pe met Hi tehusil sexien hos xil xa tepol ni. Vengan xi tepol ni temal melele xa tehur pilei moletin te luvoloven lu, e tesil xalu lutesae lutexo suse sav luteha. ^k

²⁶Mukila xa xosxa nini moletin tei be relingi, ma tenbe moletin ak mat. Nggusil hisit nenemien ak, xosxa sexien hos xil na moletin tei tovuol, ma neketen na moletin ak mun mat.^l

Muxouxou kuhi ve sepinien namim xil

3 Tuxoli e hinoxoli xil, nave xir vus ti mei rinave moletin te pispisien xil e sias. Vengan Hi ilepis moletin te pispisien xil ixeih mu ili mosav xil. ²Be reitin xa xir vus di rapol ni sexien holu xa tamal pupu ti. Vahit opus moletin tei xa sepinien xil vus xa di mistal nggo vulongen momal tevi vehakut, ma moletin ak matu kuhi e sexien nan momal tevi. Imak, ma xi mikila ixuxou kuhi ve sexien xil vus te tenben. ³Munem usil ngan xil xa di laloh e hos xil. Melele xa di laling tutut aean tei de vulonge hos, lakila laviles tenbe hos tangan vasak ni vahusil nenemien nae e valong xat xil. ⁴E munem mun usil sexien na ngan xil xa di laloh e tuturil tei. Neta sav xa tuturil ak eilep e di miloh nggo votiang tei xa nggeih, e vatihos te tuturil ak mikila vahilesi vatel stia tei xa hokorong tangan vasak ni vahusil nenemien nan. ⁵Nggusil sexien ak, vulongexir hokorong tang, e mikila vasep koai usil holesok xil xa tellep.

Munem usil sexien te upang. Tave ti neta xa hatupang tei hokorong tang, e mikila vaa len urmatu tei xa mahulong.

^f2:17 Tem 2:20,26 ^g2:19 Dut 6:4; Mat 8:29; Mak 1:24; 5:7; Luk 4:34

^h2:21 Sen 22:9,12 ⁱ2:22 Hib 11:17 ^j2:23 Rom 4:3,9,22; Kal 3:6; 2Kron 20:7;

Aes 41:8 ^k2:25 Sos 2:4,15; 6:17; Hib 11:31 ^l2:26 Tem 2:17,20

⁶ Vulongexir nggoni upang. Be rut tenbexir tei tang, e di pol pupu ni tesaen xil vus te ut etan, e mikila vasak ni tenbexir vus mei vahe muis pe met Hi. Reitin, vulongexir di milih upang te Vangavul xa misakras vamat bemei di ngga len holesok xil vus e meulien nar. ^m

⁷ Munem usili xa vongoro xil, tuman xil, moup xil, e holesok xil vus xa lameul ladi e tas labe holu pupu. E xil vus, moletin xil te ut etan iaxa lakila lasak ni xil mei lamah e dit lapol vehakut ni. ⁸ E, e rin te vulonge moletin, moletin tovuol mikila vasak ni mei vamah. Reitin, vulongexir dit purun mosav xil del holesok xil xa misa nggoni vulonge tetal tesa tei xa di mingas vin moletin xil. ⁿ

⁹ Del vulongexir, di rasa memesien ba mi Hi Suv xa be Tamer. E del vulongexir mun tang di rasuhol moletin xil xa langgur nini Hi. ^{o10} Ma di rapus sexien ak e meulien nar xa nggot vulonge moletin tei, memesien e susuholen xalu vus di lustal lunggo en. !Tuxoli e hinoxoli xil, tamal ti tangan rapol ni vamak! ¹¹ ?Munemi mubit tas del oei xa mexal lalikila lalileh lalixo vangoei tei takes? ¹² ?Mu munemi xa vatit tavu mikila vava ni huit vetei, mu vatit mal mikila vava ni huit tavu? !E-e, misakras! E oei xa bos te munien misakras vastal vaxo metatum te tas. Ve rin ak, tuxoli e hinoxoli xil, sepinien xa istal ixo vulongexir ihos kestang.

Bos xa meulien nar ihusil metisouen xa nggo Hi

¹³ ?Visi e xamim minemi bit xi polu ni metisouen e mikil neta? Xosxa imak, ma ipisen ni ixo meulien nan itel sexien hos xil xa di pol ni del nenemien xa be tan e del merouen xa di nggusil metisouen.

¹⁴ E xosxa munem misa pupu ni moletin sav xil vengan xa holesok nae xil labos mak mu lali holesok namim xil, e xosxa iemim bei tangan muhe nesao mak mu muli xil, ma munasep koai ti e munaluvos xamim ti munahit munggur metisouen nggo Hi ngamu. ¹⁵ Vengan nenemien tesa xil ak tastal ti vaxo Hi e ut nesao. Hisit nenemien ak nggot ut etan nggusil nenemien na moletin xil tang, e di mistal nggo Temat vari. ^{p16} Ngan ak be reitin vengan melele xa rapus sexien xa moletin tei di minem misa ni moletin sav xil vengan xa holesok nae xil bos mak mu mili holesok nan, e ien bei tangan ihe nesao mak mu ili mosav xil, rikila ripus ngongoren xil holu e hisit sexien tesa sav xil mun xa lapuru tang. ¹⁷ E sexien na moletin xa nggur hisit metisouen xa nggo Hi te ut nesao isav. Itiamu, sexien nan imese tevi, e tomat e merouen iti en. Ien isae e mosav xil e ti ipol ihos mi xil. Vehakut ti iteong kuhi ni nenemien na mosav xil, e ti ipus moletin xil vus lipin tang. Xi misakras vapol ni neta vahusil nenemien te luvosen. ¹⁸ E melele xa moletin te tomat di milih utiei xil te sexien hos xil, xi ileh viton huitte teni e meulien nan xa ihe momalen.^q

Kristin xil linamos ti natel ngan xil xa di lapol ni sexien xil te ut etan

4 Natelongeong ni xa xamim di mubae e di mungor mi xamim mun tang. ?Sexien ak nggo xave? Sexien te ngongoren ak di nggo holesok xil xa misa xa di iemim bei xa di bae del neketen namim e tinemim. ^{r2} Iemim bei pupu ni holesok xil na mosav xil xa namim tovuol, ma mupol ni suse tangan muvas vin xil ven. Reitin, muling nenemien namim e neta ngan, e mupusi

^{m3:6} Mat 12:36-37; 15:11,18,19 ^{n3:8} Sam 140:3; Rom 3:13

^{o3:9} Sen 1:26,27; 1Kor 11:7 ^{p3:15} Tem 1:5,17

^{q3:18} Aes 32:17; Hib 12:11; Mat 5:9 ^{r4:1} Rom 7:23; 1Pit 2:11

xa musakras muvuri. Ma, di mubae e di mungor ven. E mutahur ti neta vengon xa mutasis Hi ti ven. ³E melele xa di musisi ve neta, mutahuri ti. E mutahuri ti vengon xa iemim bei muvuri tangan vasak ni xamim kestang mulonge vahos ni.

⁴Sexien namim nggoni atou tei xa miling tiramue nan xati e ba da vituei del tiramue sav. Vengon melele xa di iemim bei holesok xil te ut etan, di mupisen ni xa mube reling Hi. Misak ni, ngan xil xa iexil bei tangan laling eheien nae e holesok xil te ut etan, xil mei labe elu mi Hi tang. ⁵Vanuvei Eo na Hi di biteni xa Hi tepeas ni nini moletin xil e teling xil lateti e moletin xil. ?E midep, munemi mubit sepini na Hi dit misepin votei tang melele xa Hi ien bei pupu ni tangan ninin nar mei ihe reitin mini? ⁶E eheien hos xa Hi di pisen ni mi xir mahulong pupu, nggoni ngan taxa labiteni labit, *“Hi di misin ngan xil xa di lapet rat tase ni xil mun tang,*

e di pisen eheien hos nan mi ngan xil xa di lapol ni nenemien nae be tan.” (Pro 3:34)^u

⁷Ma, ve rin ak, muling nenemien namim ihe tan tangan mupol ihusil nenemien na Hi. Musin nenemien na **Temat**. Xosxa mupol ni imak, ma xi ilesae reling xamim. ^{v8}Reitin, mumei sangas visal Hi, e xi imei sangas visal xamim. Xamim xa mupolu ni **tesaen**, mumoten meulien namim. Xamim xa nenemien namim be lu, musak ni tinemim mei imese tevi. ^{w9}Mulonge isa ve tesaen namim xil, mutang e mumuis ven. Menen namim ve sexien tesa xil ihiles mei ihe tangen. Sien ve neta xa mikavui ihiles mei mulonge

isa ven sung. ¹⁰Xosxa muling nenemien namim ihe tan pe met Hi, ma xi ipet rat xamim muhe nesao. ^x

Selxatien tangan Kristin xil linaseputut xat mosav xil ti e linasep koai ti

¹¹!Tuxoli e hinoxoli xil, munaseputut ni xamim ti! Xosxa museputut ni mosav tei, ma di mulepis rin nan. Mak, ma nggoni ngan taxa di museputut xat **rae na Hi** e di mulepisi mubit misa. E xosxa mulepis rae na Hi mubit misa, ma mupisen ni xa iemim ti tavei tangan muvusili e di muling xamim mube nesao muleli e mubit mupin tangan mulepisi. ¹²E Hi kestang iaxa di misa rae xil, e xi kestang iaxa mikila ilepis neta xil. Di e xi kestang tangan iteh meulien e moletin xil, mu ihu lelen xil. ?Ma munemi mubit mupin tangan mulepis rin na tua namim xil? !E-e, mutapin ti! ^y

¹³Muteong ni nou, xamim xa mubiteni mubit, “Xosali mu visuvong, nihe taon. E rute ak, nita ihe haram tei e nipol ni polien xil. Mak, ma niso xat mani navan xil ihe holu.” ^{z14}E munasep koai ti namak vengon xa mutakil ti naha xa istal visuvong. ?Meulien namim be naha? Meulien namim nggoni eas xa mistal e da vuteili tang, di, mikesae ba. ¹⁵Bos mak mu tangan ti muviteni muvit, “Xosxa Hi Suv ien bei, ma xamem mumeul muti e mupol ni holesok xil ak.” ^{a16}E taxeak, nenemien namim be nesao pupu e di musep koai holu. Sexien te sepkoaien misa. ¹⁷Misak ni, xosxa mukil naha ngamu xa bos tangan mupol ni e mutapol ni ti, ma di mupol ni **tesaen** iaxai.^b

^{s4:4} Rom 8:7; 1Sion 2:15 ^{t4:5} Eks 20:5 ^{u4:6} Mat 23:12; 1Pit 5:5

^{v4:7} Efes 6:12; 1Pit 5:8-9 ^{w4:8} Sak 1:3; Mal 3:7; Aes 1:16

^{x4:10} Siob 5:11; 1Pit 5:6 ^{y4:12} Rom 2:1; 14:4

^{z4:13} Pro 27:1; Luk 12:18-20 ^{a4:15} Pol 18:21 ^{b4:17} Luk 12:47

Selxatien mi ngan xil xa holesok nae holu xa di lapurun mosav xil

5 Muteong ni nou, xamim xa holesok namim xil holu. Bos mak mu xa ti mumuis e ti mutang ve longpangasien xil xa mahulong xa di bemei mi xamim. ^{c2}Holesok xil xa muteso xati tehe holu di bo, e pipei xil di lakar tatal eising namim xil. ^{d3}*Mani* namim xil xa di muso xati di be turara tuei. E turara ak iaxa ipisen kila xa mube hokan. E longpangasien teni mei ia len xamim ixoni upang vengan xa muteso xat holesok holu tehe namim, e taxeak radi e Melengien Kor xil. ^{e4}Mutesis moletin xil mei latepol e urvatiei samim xil e latepol vuol ni polien nae xil ngamu. Di, mutekixat xat huit polien nae xil. !E taxeak, muteong ni keien te longpangasien nae! Keien na ngan xil xa latepol e urvatiei samim xil be nesao duxoh vurange Iahova, suv toto te ut nesao. ^f

⁵E ut etan ak, xamim mutepus hosien holu e mutehur holesok xil xa misak ni xamim di mulonge bos. E munggoni buluk xil xa lakaio kuhi xa laleh xil laba e melengien xati xa latelingi tangan lavas vin xil en. ^{g6}Hi isa pangasien mi xamim vengan xa mutelihi ngan xil xa rin nae momal mei latehe von koten, e latnasak ti tangan lasikoe xol rin nae. Muteso sepinien teha xat xil, e mutemaen ni tangan ha lilel. Ve rin ak, rexil di xat hemim.

Selxatien tangan Kristin xil lihisu ni melele xil te xeih itel nenemien xa ihe teviei

⁷Be reitin, tuxoli e hinoxoli xil, xa Suv Iesu imei rilomun, ma mupol ni nenenemien namim ihe teviei. Mei muxoni mo-

letin tei te naho xa nenemien nan teviei. Vengan melele xa milih holesok san xil bus, di datili del nenemien xa teviei ba vuma ... us mus, eai ngga ni, di meul, e dutou ni, mikameti xa anien xil holu xa bos xa bos mei mistal nggo en. ^{h8}Nggo sexien nen tak, nenemien namim ihe teviei. Ma, nenemien namim namot ti vengan xa meien na Suv di bemei sangas. ⁱ⁹O tuxoli e hinoxoli xil, munaseputut ni xamim ti tangan munalihi lepisien na Hi namei e xamim ven. ?Mutakil ti? Ngan xa di bemei tangan valepis rin na moletin xil dat sangas taxeak. ^j

¹⁰Xamim munem usil sexien hos na **provet** xil tetiamu xa latesepin mi moletin xil e his Hi Suv. Xil latehur longpangasien xil texo he mosav xil tetel nenemien xa tehe teviei. ¹¹E rapus sexien nae bos vengan xa di rabiteni xa tuxolxatien na Hi iti mi ngan xil xa di lasoh nggeih be nousav. Munem usil Siob xa tesoh texeih tehe nousav tetel longpangasien nan, e tetep iaxa Hi tesak ni hosien mei testal texo en. Reitin, Hi polu ni esaeen e eheien hos. ^k

¹²E tuxoli e hinoxoli xil, sexien teimun xa eilep mak mu tangan munapol ni ti iaxa, munasuv xat sepinien namim ti natel his neta te ut nesao mu te ut etan. Mak, ma melele xa mubit neta tei, muhiteni tang muhit, "Io," ihe reitin tang. E melele xa mubit, "E-e," ihe e-e tang. Vengan xosxa musuv xat sepinien namim ni neta tei, ma Hi ilepis sepinien namim ven. ^l

Sexien te sisen e meulien na Kristin xil

¹³?Midep? ?Rute e xamim di lalonge misa? Bos xa ti lisis. ?Rute e xamim

^{c5:1} Luk 6:24 ^{d5:2} Mat 6:19 ^{e5:3} Sam 21:9 ^{f5:4} Lev 19:13; Dut 24:14-15; Mal 3:5; Sen 4:10; Sam 18:6; Aes 5:9 ^{g5:5} Ser 12:3; 25:34 ^{h5:7} Dut 11:14; Ser 5:24; Soel 2:23 ^{i5:8} Rom 13:11-12; Hib 10:25; 1Pit 4:7 ^{j5:9} Mat 24:33
^{k5:11} Dan 12:12; Eks 34:6; Sam 103:8; 111:4 ^{l5:12} Mat 5:34-37

di lalonge bos? Bos xa ti limes Hi itel kikeien xil. ¹⁴?Rute e xamim di lame-sei? Bos xa lisis elda xil limei, e lisis ve xil e liteh oel xat xil e his Suv. ^{m15}Lipol ni imak vengan xa sisen xa lasa ni del neketen ikila itutou ni ngan xil xa lame-sei. Reitin, Hi ital rat xil ra mesien nae. E xosxa di lamesei ve **tesaen** nae xil, ma Hi naketeh ti mun nasa mi xil ven. ⁿ¹⁶Mak, ma melele xa mupol ni tesaen, bos xa ha ti muhit rat tesaen namim mi teimun e xamim, e ti musis ve xamim tangan Hi ipol ni xamim mei muhos rilomun ra mesien namim xil. Vengan xa xeihen di e sisen na moletin xa meulien nan momal pe met Hi e ihur huite. ¹⁷Xamim munem usil **Ilaetsa** xa tehe moletin tei texoni xir

tang. E xi tesis texeih tangan us namus ti, ma us tenamus ti e tan te kantri ak tetuxoh huram tol (3) e aveti tei e he sav (6). ^{o18}Di, melele xa tesis rilomun ve us, us temus texo tilang hat e tekas kuh tan na moletin xil te kantri ak e tesak ni holesok sae xil lateteh, latemeul, e lateso huite. ^p

¹⁹Tuxoli e hinoxoli xil, xosxa tei e xamim di mile ras suse te reitinen xa da en, ma musak pisi tangan mutel rilomun ni mei ihusili. ^{q20}Munem kila xa ngan xil vus xa lakila laviles moletin tei xa di mika talang e **tesaen** nan xil di lateh nini moletin ak ra maten, e lasak ni Hi naketeh ti mun nasa mini ve tesaen nan xil.

Sepinien xa diamu te

1 Pita

?Visi iaxa tetis uvei ak?

Pita xa be eloheoh tei na Iesu Kristo iaxa tetis uvei ak^f Polien 1:1–12:24 di bit usil holesok holu xa Pita tepol ni. Di, sangas ni hoxalit meulien nan, Pita tehe taon xa eilep te hal Rom (xa tekes xuxus ni en Babilon) e tepusi xa, e ut xil ngasen, Kristin xil di latekameti tex-eih vengas xa di latehur sakpurunien xil holu texo he kavmen, texo he mol-Isrel xil xa latesin Iesu, e texo he titsa te luvosen xil mun xa pispisien nae tenahusil reitinen ti. Tesak ni, Pita tetis uvei ak tangan vapet rat nenemien na Kristin xil.

?Visi iaxa tevuli uvei ak tetiamu?

Pita tetis uvei ak teha mi mol-Isrel xil xa lateling neketen nae e Iesu Kristo. E melele xa sakpurunien xil teme texeih e taon te hal Serusalem, Kristin xil holu latestokovein rut ak e latehe ut savsav xil sung. E, e rut xil vus xa lateha en, latehithiten longongen hos usil Iesu Kristo mi moletin xil xa mei lateling neketen nae sung e Iesu Kristo.

?Pita tetis uvei ak veneh?

Pita ien tehei tangan Kristin xil lakila xa Hi tehosei xil mei labe nan - Hi tehosei Kristin xil mei labe Nim Eo nan,[§] **Pita ien tehei vassel xat Kristin xil tangan lipisen merereen mi vat nae xil te ut etan** - Pita tekila xa Kristin xil holu di latekameti texeih texo he ngan xil te kav-

men. E tave ti neta xa temak, Pita tesel xat Kristin xil tangan ti lipisen merereen mi xil.^t

Pita ien tehei vassel xat Kristin xil tangan limerere ni xil mun tang - Pita tesel xat slev xil tangan lipol ihusil nenemien na masta nae xil,^u

Pita ien tehei vassel xat Kristin xil tangan lixulehi lipol ihos - Tave ti neta xa di latehur sakpurunien xil texo he mosav xil, bos tangan Kristin xil lipol ni holesok xil vus itel nenemien xa ihe tan tang^v

Pita ien tehei vassel xat ngan xil te Sias tangan limerere kuhi ni elda nae xil - Pita tesel xat elda xil tangan ti lilaxat kuh moletin xil na Hi,^w

Nenemien tei xa mahulong te uvei ak de 1 Pita 4:12-13

Tuxoli xil e neketen, munatemanin ni ti longpangasien te xeih xil xa di mung-guri tangan vasak pis reitinen te neketen namim. Munanemi ti munahit holesok xil ak linamei ti e xamim. E-e. Xosali, bos tangan mupolu ni sien vengas xa mudi e suse te longpangasien xa Iesu vari teta en. E, e hoxalit suse ak, melele xa Iesu ipisen minehinen te xeihen nan, xamim mei mupolu kuhi ni sien.

?Naha iaxa di e sepinien ak?

1. Hi tehosei vanut moletin xil tangan mei lihe moletin eo nan xil. (1:1–2:10)

2. Kristin xil limerere ni moletin sav xil itel nenemien xa ihe tan. (2:11–3:7)

3. Tave ti neta xa di langgur longpangasien xil, Kristin xil ti lisoh ixeih e linem xati xa Iesu tehur longpangasien ve xil. (3:8–4:19).

^f1:0 1Pit 1:1; Mak 1:17; Sion 21:15-17

[§]1:0 1Pit 2:4; 1Pit 2:9-11; 1Pit 2:9,11;

1Pit 2:11 ^t1:0 1Pit 2:13-17

^u1:0 1Pit 2:18-20; 1Pit 3:1-6; 1Pit 3:7

^v1:0 1Pit 3:8; 1Pit 3:9; 1Pit 4:12-17

^w1:0 1Pit 5:1-4; 1Pit 5:5

4. Kristin xil limerere ni ngan xil te sias vengau xa lakila xa Iesu imei rilomun. (5:1-14)

Sepkilaen na Pita usil uvei ak

1 Inou Pita, *eloheoh* na Iesu Kristo. ^x Di nadis uvei ak bat mi xamim, Kristin xil xa mudi e provins xil te hal Pontas, Kalesia, Kapadosia, Esia, e Bitinia. Hi tehosei xamim mei mube nan, xa xosali, sakpurunien tesak ni xamim muteletasil ba muteti e rute xil vus e ut etan nggoni ngan halesav xil.[‡] ²Hi Tamer tekil xamim tetiamu nousav e tehosei xamim tehusil nenemien nan. Misak ni, *Ninin* nan di pol ni xamim mube eo tangan mulong xat Iesu Kristo e ren isak ni xamim mei mumese ra tesaen namim xil. ^y

Nasis mi Hi tangan meulien namim ipolu ni eheien hos e tomat nan.

Rimes Hi vengau xa xi tepol ni suse tangan vateh meulien e xir

³Risa memesien iha mi Hi xa be Tame Iesu Kristo, Suv nar! Vengau xa esaeen nan mahulong, Hi misak ni xir mei rabe neta hu e mei rabe horamue nan xil reitin. E ranesi xa rimea rilomun ra maten e rihur meulien sal vengau xa di rabisti del Iesu xa temea rilomun ra maten. ⁴E rakil kuhi mun xa ti rihur neta xa Hi teling kuhi tangan ihe na moletin nan xil. Xi teling kuh neta xil ak ladi e ut nesao, e lasakras lamerer, lasakras lasa, e lasakras lave neta metu. ⁵Holesok xil ak labe namim xa Hi di misikoe xol xamim del xeihen nan. Xi di misikoe xol xamim nggo neketen namim ituxoh hox-

alite te holesok xil vus, xa ipisen ni mi xamim e melele xa mutuxoh hoxalit suse te neketen namim. ^a

⁶Misak ni, mukila muhesi xamim ihe holu, vengau xa holesok xil ak be reitin, neta sav xa, xosali ak di munggur longpangasien xil nggo melele te xeih xil xa di mubisu ni xa be te melengien vahis tang. ^{b7}Melele te xeih xil ak di be-mei tangan vapisen reitinen te neketen namim, xa bos mak mu mili gol xa memese tevi xa latelingi tete upang tangan vaa moten ni, vengau xa, vatova, gol ak ha ikesae. E vengau xa sexien namim xil di lapisan ni xa neketen namim be reitin, Hi isa memesien, his tei xa eilep, e merereen mi xamim e melele xa Iesu imei rilomun en. ^{c8}Tave ti neta xa mutapus ti mu Iesu Kristo, eheien namim da en ngamu. Reitin, neta sav xa mutapus ti taxeak, e di muneket en tuei. Misak ni, di mulonge bos pupu e mupolu ni sien tei xa sepinien tovuol xa vapin tangan vahit usili. ^{d9}Mupolu ni sien ak vengau xa di munggur huit neketen namim xa di mudatili, vengau xa be reitin xa Hi di miteh meulien e xamim. ^e

¹⁰⁻¹¹^f**Provet** xil tetiamu latehit lenen rin xa Hi iteh meulien e xamim e itep iaxa xi ipisen eheien hos nan mi xamim. Xil latelang ves koute teni e latenem holu usili tangan mei lakil kuhi. Ma melele xa Ninin na Kristo tese xat provet xil ak, tesak ni xil latehit lenen ni usil longpangasien xa Kristo ihuri itiamu, itel his xa eilep xa ihuri itutou sung. E provet xil ak latesak pisi tangan lalang ni melele xati xa netak istal en e istal itep. ¹²E Hi tepisen ni mi provet xil ak xa sepinien

[‡]**1:1** Latekes Kristin xil ni 'halesav xil' vengau xa ut nae xati be ut nesao. Latehit usili e Pol 8:1,4; 11:19.

^x**1:1** Tem 1:1 ^y**1:2** Rom 8:29; 2Tes 2:13; Hib 12:24 ^z**1:3** 2Kor 1:3

^a**1:5** Sion 10:28; 17:11 ^b**1:6** Tem 1:2 ^c**1:7** Siob 23:10; Sam 66:10; Pro 17:3;

Tem 1:3; Aes 48:10; Sak 13:9; Mal 3:3; 1Kor 3:13 ^d**1:8** Sion 20:29; 2Kor 5:7

^e**1:9** Rom 6:22 ^f**1:10-11** Mat 13:17; Luk 10:24; Sam 22; Aes 53; Luk 24:26

nae xil tenave te melele xil ti xa lateti en tangan vatutou ni xil, e be nar te xosali ak tangan vatutou ni xir. Reitin, naha xa xil latehit lelen ni usili tetiamu, moletin xil di labit usili xosali. Di labit usili e melele xa di lasa longeongen hos mi xamim nggo xeihen na **Ninin Eo** xa Hi te ut nesao tesila teha mi xamim. Reitin li, holesok xil di lastal ve rin namim xosali, **masxaxa** xil mun labesi xil pupu e melele xa di laketeh bemei e lapusi xa di mistal. ⁸

Sexien nar imese tevi vengan xa Hi texal rat xir ni re Iesu Kristo

¹³Ma, vengan xa longeongen hos xa Hi di miteh meulien e xir bos pupu, muvue xat nenemien namim tangan mupol ni neta xil ak: muxuxou kuhi ve sexien namim xil e muling sen nenesien namim iti e eheien hos xa Iesu Kristo ipisen ni mi xamim e melele xa mei istal en. ^{h14}Mulong xat Hi ixoni horamue hos nan xil xa di lalong xat tamexil. Munapol ni ti mun sexien tesa xil xa mutepol ni tetiamu, e melele xa mutnahur ti mu kilakilen usil Iesu Kristo. ⁱ¹⁵Ma sexien namim isav e muhe eo e holesok xil vus xa di mupol ni. Reitin, muhe eo vengan xa Hi xa tekes xamim mei mube nan, xi be eo. ¹⁶Ngan ak be reitin, vengan xa latetisi e Vanuvei Eo latehit, "**Muhe eo vengan xa inou nabe eo.**" (Lev 19:2) ^j

¹⁷Be reitin xa di musis mi Hi xa di milepis rin na moletin xil vus e tapus ti moletin tova xa be nesao mu be tan vali mosav xil, e di mukes

ni Tata. Ve rin ak, momal mun tangan mupisen merereen namim mini itel meulien namim e melele xil ngasen xa mudi e ut etan nggoni ngan halesav xil. ^{k18}Reitin, mumerere mi Hi itel meulien tevi namim vengan xa mukil neta hos xil ngamu xa Hi tepol ni tangan vaxal rerat meulien namim. Tetiamu, mutehusil xat sexien votei xil na avu namim xil xa tehe neta sav tang. E, taxeak, Hi texal rerat xamim mutemeluv ra sexien votei xil ak. E melele xa texal rerat xamim, tenapol ni ti vatel neta xa mikila mei vasa vatova vaxoni silva mu gol. ¹⁹E-e, Hi texal rerat xamim ni neta tei xa bos mak mu mili holesok xil ngasen te ut etan. Xi texal rerat xamim ni re Suv Iesu Kristo, ngan xa temat texoni sulut sipsip te sanien eo xa memese tevi e tesaen tovuol en. [¶]
^{l20}Tetiamu nousav, e melele xa Hi tenapeas ni ut etan ti mu, xi tehosei Iesu tuei tangan isa rat meulien nan. E taxeak, sangas ni hoxalite te holesok xil vus, Hi tepisen xi mi xamim e melele xa tesa ni temei ve rin namim. ^{m21}Iesu be suse xa xamim mei muneket e Hi, xa tesak ni temea rilomun ra maten e tesa his xa be eilep mini. Ve rin ak, di muling neketen e nenesien namim nggeih e Hi. ⁿ

²²Melele xa mulong xat reitinen na Hi, misak ni xamim mumese ra tesaen xil namim. Ve rin ak, mupusi xa di jemim bei tuemim xil e neketen del eheien tei xa be reitin. Misak ni, itel meulien tevi namim, muxulehi ti mupisen eheien mi xamim. ^{o23}Mupol ni imak vengan xa munggur meulien hu tei xa misav ni

[¶]**1:19** Eks 12:5 di biteni xa sulut sipsip te sanien eo, neta tovuol vasa e tenben.

⁸**1:12** Efes 3:10 ^h**1:13** Luk 12:35; Efes 6:14

ⁱ**1:14** Rom 12:2; Efes 2:3; 4:17-18 ^j**1:16** Lev 11:44,45; 20:7 ^k**1:17** Sam 89:26; Aes 64:8; Ser 3:19; Mat 6:9; Luk 11:2; 2Kron 19:7; Pol 10:34; Rom 2:11; Kal 2:6; Efes 6:9; Kol 3:25; Sam 28:4; 62:12; Pro 24:12; Aes 59:18; Ser 17:10; Rom 2:6; 1Kor 3:8; 2Kor 11:5; 2Tim 4:14; Rev 2:23; 18:6; 20:13-14; 22:12

^l**1:19** Pol 20:28; Hib 9:12; 1Pit 1:2 ^m**1:20** Pol 2:23; Efes 1:4

ⁿ**1:21** Sion 14:6; Rom 5:1-2; 4:24; 10:9 ^o**1:22** Sion 13:34; Rom 12:10

meulien xa mutehuri texo tamemim del ninemim xil te ut etan, xa hoxalite teni tehe maten tang. Mutehur meulien hu ak texo sepinien na Hi xa meul vehakut e misakras vakesae vatova. ^{p24}Ngan ak nggoni naha xa Vanuvei Eo di biteni bit, “*Nggoni husmuna, meulien na moletin xil vus te ut etan nati ti navehi.*

E hosien xa di lapusi be te melengien vahis tang nggoni hungovae xil te urmatu.

Reitin, husmuna xil mei langguxu katen e hungovae xil di lamereh labe tan,

²⁵ *e sepinien na Hi Suv ita vehakut xa vehakut tang.” (Aes 40:6-8)^q*

Sepinien ak be longeongen hos xa latehithiteni mi xamim.

Hi di pol ni xir mei rabe vanut moletin eo tei

2 Vengan xa Hi pol ni xamim mei mube neta hu nggo sepinien nan, mustokovein sexien tesa xil ak: ekaten, luvosen, eluen, sepututen, e sexien xil xa di mupol ni nggot hilibemim. ^{r2}E xamim iemim ihei tangan muhur pispisien xil te reitinen ixoni ngan xa tuvava xil xa laling rohon ni xil iexil bei tangan lasus e anien xati ae. Nggo hisit sexien ak, vengang xa Hi miteh meulien e xamim ngamu, iemim ihei mak mu tangan muhur ti mu reitinen nan xa isak ni neketen namim imeul mei imatu kuhi. ^{s3}Mupol ni imak vengang xa “*mutekar pisi tui e meulien namim xa Hi Suv bos kuhi mak.” (Sam 34:8)*

⁴Amei visal Suv Iesu xa nggoni vatiei^{ss} tei xa di meul. Moletin xil holu latele male ni latehit tenavos ti, e Hi te-

pusi tehit xi bos mak mu e tehosei mei tehe seteman te Nim Eo nan. ^{t5}E xosali, Hi ien bei tangan vapol ni Nim Eo nan e meulien namim tangan Ninin nan ha ita en. Mak, ma mumaen meulien namim mini e mei muxoni pos xil te Nim Eo nan xa di meul. E Nim Eo ak xa be neketen nar, xamim ti mupol mi Hi en ixoni **pris** nan xil e ti musa sanien eo xil mini. Ve naha xa Iesu Kristo tepol ni ve xir, Hi besi xi ve sanien eo xil ak te neketen namim xa labe sexien hos namim xil. ^{u6}Ngan ak nggoni naha xa Hi tehit lelen ni e Vanuvei Eo tehit,

“Mupusi, inou naling pos tei e hal Serusalem,

ngan xa bos mak mu pe metok xa natehosei tangan mei ihe seteman te Nim navan.

Moletin xil vus xa laling nenesien nae en, neta tovuol vasak ni xil mei lave unoun ven.” (Aes 28:16)^v

⁷Mi xamim xa muke reitin en, mukila xa ngan xa nggoni seteman ak bos pupu. E mi ngan xil xa latake reitin ti en, sepinien xa di e Vanuvei Eo be reitin xa biteni bit,

“Pos xa moletin te polien xil latesin ni, xi vari iaxa mei be seteman xati te nim xa mili sen pos xil vus teni.” (Sam 118:22)^w

⁸E Vanuvei Eo biteni mun bit,

“Pos ak, moletin xil lisavut en.

Reitin, xil lisavut e ha limot en vari tang.” (Aes 8:14)^x

Xil di lasavut en vengang xa latake reitin ti e sepinien na Hi e latalong xati ti. Sexien nae nggusil xat naha xa Hi tehosei xil tangan lipol ni.

^{ss}**2:4** Sepinien xati bit ‘hat’ e vengang xa mol-Isrel xil di lapol ni nim mae xil ni hat, e xir di rapol ni nim mar xil ni vatiei xil.

P1:23 Sion 1:13; Hib 4:12; Dan 6:26 **q1:25** Tem 1:10-11

r2:1 Efes 4:22; Tem 1:21 **s2:2** 1Kor 3:2; Hib 5:12-13

t2:4 Sam 118:22; Mat 21:42; Pol 4:11; Aes 28:16

u2:5 Efes 2:21-22; Eks 19:6; Aes 61:6; 1Pit 2:9; Rev 1:6; 5:10; 20:6; Rom 12:1; Hib 13:15 **v2:6** Rom 9:33; Efes 2:20 **w2:7** Mat 21:42; Pol 4:11 **x2:8** Rom 9:33

⁹E xamim, mube vanut moletin xil xa Hi tehosei.^y ¹⁰Rin ak nggoni naha xa provet Hosea tehit usili tehit, “*Tetiamu, mutnave moletin na Hi xil ti, e xosali, mube moletin nan xati xil. Tetiamu, mutnahur ti esaean na Hi, e xosali, di munggur esaean nan.*” (Hos 2:23)^z

Sexien hos na moletin xil na Hi

¹¹Tuxoli xil e neketen, xamim mudi e ut etan ak nggoni ngan halessav xil veng-an xa mube hortan xati te ut nesao. Mak, ma nadakes pupu ni xamim tegan munapol ni ti sexien tesa xil te ut etan xa vasak ni tenbemim tang valonge vahos ni. Munapol ni ti namak, veng-an xa sexien xil ak di labae del meulien te neketen namim te ut nesao. ^{a12}Melele xa mudi vituei del ngan xil xa latakil ti Hi, sexien namim ihos mak mu. Vengan xosxa imak, melele xa lasak pisi tangan laseputut usil hisemim lavit musa tang, xil mei lipus kil sexien hos namim xil. E sexien hos namim isak ni xil ti lipet rat his Hi e melele xa imei ilepis rin na moletin xil vus e Melengien te Lepisien. ^b

Moletin xil na Hi lipisen merereen iha mi eilep nae xil te ut etan

¹³Nggo hisit nenemien ak, musak ni his Suv Iesu ihe nesao pe met eilep xil te ut etan. Mak, ma muling nenemien namim xil ihe tan tangan mupol ihusil nenemien na ngan xil xa di lalaxat moletin xil: neta sav xos xi be suv toto tei, ^{c14}mu be vat te kavmen xa di milaxat rute tei xa di milepis rin na moletin xil e di mikin pangasien mi ngan

xil xa di lapol misa e di misa memesien mi ngan xil xa di lapol bos. ¹⁵Mupol ni imak veng-an xa Hi ien bei xa sexien hos namim isak ni ngan xil xa labe unu xil xa di lasep talang usil xir litit votei ve unounen nae. ^{d16}E melele xa mudi pe he kavmen, munem xati xa Iesu tesak ni xamim mei mumeluv ngamu. E munanemi ti munahit mumeluv tangan mupol rilomun ni sexien tesa xil. E-e, ihos mak mu xa mupol ni holesok xil vus ixoni ngan xa mube moletin te polien xil na Hi. ^{e17}Mak iaxa mumerere mi moletin xil vus e mupisen eheien namim mi tuemim xil te neketen. Mumot mi Hi e mupet rat hisen. E mi suv toto te hal Rom, mupisen sexien te merereen mini. ^f

Ngan xil xa labe slev ti lipisen merereen mi masta nae xil

¹⁸Xamim slev xil, mupol ni nenemien namim ihe tan tangan mupol ihusil nenemien na masta namim xil e musa merereen ihe holu mi xil. Munapol ni ti mi ngan xil kestang xa di lapol ni bos mi xamim. E-e, mupol ni mun mi ngan xil xa sexien nae nggeih. ^{g19}Vengan xosxa muhur pangasien xa tamal ti itel sexien te merouen veng-an xa di munggusil Hi, ma Hi iketeh ihos mi xamim ve sexien hos xil ak. ²⁰?E xosxa lameas pangas xamim veng-an xa mutepol ni neta tova tesa, naha iaxa tehos en? !Neta tovuol! E xosxa mutehir pangasien xil, neta sav xa mutepol tehos, ma Hi ihesi xi e iketeh ihos mi xamim ven. ^h

²¹Reitin mak, Hi tekes xamim tangan muhur longpangasien itel nenemien

^y2:9 Aes 43:20; Dut 7:6; 10:15; Eks 19:6; 23:22; Aes 61:6; 1Pit 2:5; Rev 1:6; 5:10; 20:6; Aes 43:21; Eks 19:5; Dut 4:20; 7:6; 14:2; Taet 2:14; Aes 42:12; 9:2; Pol 26:18; Efes 5:8; Kol 1:13 ^z2:10 Hos 1:6,9; 2:1 ^a2:11 Sam 39:12; Kal 5:24; 5:17; Tem 4:1

^b2:12 Mat 5:16; Aes 10:3; Luk 19:44 ^c2:13 Rom 13:1-7; Taet 3:1

^d2:15 1Pit 3:16 ^e2:16 Kal 5:13 ^f2:17 Rom 12:10; Pro 24:21

^g2:18 Efes 6:5; Taet 2:9 ^h2:20 1Pit 3:14,17; 4:14

xa ihe tan, ixoni longpangasien xa Iesu Kristo mun tehuri ve xamim tetel nene-mien xa tehe tan. Bos xa ti munem xat sexien nan xil e mupol ixoni.ⁱ²² Vanuvei Eo bit usil sexien nan bit,

“*Xi tapol ni ti tesaen, e tenaluvos ti moletin.*” (Aes 53:9)^j

²³ Reitin, melele xa lateseputut teha xati, Iesu tenasa rilomun ni ti sepinien tesa mi xil.^k E melele xa tehur longpangasien texo hexil, tenaviteni ti mi xil xa isa xolesi mi xil. E-e, xi teling rin nan tete he Hi e tenesi xa Hi ilepis rin nae ihusil suse xa momal.²⁴ Iesu Kristo, xi vari tehur sen pangasien te tesaen nar xil e tenben melele xa tete eivave.¹ Maten nan tesak ni xir mei rameluv ra xeihen te tesaen tangan ravusil suse xa momal. E menuk xil xa latepol ni teti e tenben, latesak ni tenbexir mei temase ra mesien nar xil.²⁵ Tetiamu, xamim mutexoni sipsip xil xa latele ras suse nae e latekesae. E xosali, xamim mei muhusil Iesu, ngan xa di milaxat kuh sipsip xil e ngan xa di miketeh xol meulien namim.^m

Ngan xil xa lateli lipisen merereen mi atou mu tiramue nae xil

3 Itel nenemien te merereen nen ak, momal tangan xamim, atou xil, muling nenemien namim ihe tan e mupol ihusil nenemien na tiramue namim xil. Mak iaxa, xosxa tiramue tova take reitin ti e sepinien na Hi, ma sexien hos na atou nan kestang ilih mei ike reitin en, e naxo sepinien nan ti kestang.ⁿ² Vengan melele xa lipusi xa meulien namim momal e mupisen merereen mi xil, xil linem usili.³ Xamim munanem ti nahe holu usili xa itep iaxa mukila mupilas kuhi ni tenbemim vaxoni sexien xa di

mumesies ni hilimim, mu musing ni eising xil xa bos, mu mupe sen, mu mudel ring.^{o4} E ihos mak mu xa mupilas ni tinemim itel neta xil xa iti vehakut ixoni sexien te hosien e te merouen. Hisit sexien xil ak bos mak mu pe met Hi.⁵ Tetiamu, atou xil xa latehe eo e lateling nenesien nae teti Hi, xil latepilas ni meulien nae tetel hisit sexien xa lateling nenemien nae tehe tan tangan lihusil nenemien na tiramue nae xil.⁶ *Serah* tepol ni temak. Xi telong xat *Ebrahim* e tekesi ni suv nan. E xosali, xamim mube natanahin xil e melele xa mupol ni neta xa bos e munamaen ti ulikanen xil usil naha xa ixul xamim tangan napurun neketen namim.^p

⁷ Nggo hisit sexien te merereen nen ak, xamim tiramue xil muti vituei e hosien itel xat atou namim xil. Mupisen merereen mi xil vangan xa mukila xa tenbexil taxeih ti vaxoni tenbemim. Xil mun lihur meulien sal xa Hi di misa ni. Reitin, muti vituei e hosien itel atou namim xil, ma neta ti nasikoe xol sisen namim.^q

Ripol ihos, tave ti neta xa di rabisu ni longpangasien xil

⁸ E rin te sexien te merereen, ngan ak be nenemien kor navan usili. Xamim vus ti mumei e nenemien tei takes e muti vituei e hosien e merouen. Eheien namim iti mi xamim, iemim isae e mosav xil, e nenemien namim ihe etan.⁹ Xosxa moletin tei pol ni neta ngan xa misa mi xamim, munasa xoles sexien tesa ti mini. E xosxa moletin tei di miseputut ni xamim, xamim munasa xoles sepututen ti mini. E-e. Ihos mak mu tangan xamim mupol ni ihos mi xil, vangan xa Hi mikes xamim tangan mei mupol ihos mi mo-

ⁱ2:21 Sion 13:15; Mat 16:24 ^j2:22 Sion 8:46; 2Kor 5:21; 1Sion 3:5

^k2:23 Aes 53:7; 1Pit 3:9 ^l2:24 Aes 53:4,12; Hib 9:28; Rom 6:2,11; Aes 53:5

^m2:25 Aes 53:6; Esek 34:5-6; Mat 9:36 ⁿ3:1 Efes 5:22; Kol 3:18; Taet 2:5

^o3:3 1Tim 2:9 ^p3:6 Sen 18:12 ^q3:7 Efes 5:25; Kol 3:19

letin sav xil. E xosxa imak, ma Hi ipol ni ihos mi xamim sung ixoni ngan xa tehit xati mi ngan xil xa labe nan. ^{r10} Ngan ak nggoni naha xa Vanuvei Eo biteni bit, “Ngan xil xa iexil bei meulien e iexil bei tangan lipus hosien e melengien nae xil, xil lixouxou kuhi tangan linasepin ti nasa e linaluvos mosav xil ti.

¹¹ Xil lihiles ra holesok xil xa misa e ti lipol ni neta xil xa bos.

Xil lipol ixehi tangan lipus tomat e meulien nae.

¹² Vengan xa met Hi Suv di e moletin xil xa meulien nae momal, e di misa vurangen tangan vateong ni sisen nae xil.

E ngan xil xa lapol misa,

Hi di pol nggeih ba xat xil.” (Sam 34:12-16)

¹³ ?Visi mikila vapurun xamim melele xa di musak tangan mupol ni neta ngan xa bos vatel sien? ¹⁴ E xosxa muhur longpangasien vengon xa di mupol ni neta xa momal, Hi ituxol xat xamim ven. Mak, ma “ulimim nakan ti e munanexo ti ve naha xa moletin sav xil ulixil di mikan ni.” (Aes 8:12) ^{s15} E-e. E meulien namim, mupet rat Iesu Kristo e mumerere ni ixoni Suv namim. E melengien xil vus ti muvue xat xamim tangan ti muhit kes ni sepinien tei mi moletin xil vus xa lasis xamim tangan ti musep usil nenesien xa mungguri. ^{t16} E melele xa ti musepin itel xil, ti mupol ni ixo sexien te merouen e merereen. Melele xa munem usil sexien namim xil, nenemien namim xil imese. Imak, ma moletin xil xa di laseputut mi xamim ve sexien hos xil xa di mupol ni vengon xa munggusil Iesu, xil mei lihe unoun. ¹⁷ Bos pupu vahit muvur long-

pangasien ve neta xa bos xa di mupol ni, xosxa ngan ak di nggusil nenemien na Hi. Reitin, ngan ak ihos pupu ili ngan xa vahit muvur longpangasien ve neta ngan xa tesa xa di mupol ni.

¹⁸ Xamim mupol ni imak vengon xa Iesu Kristo temat tehinat **tesaen** nar xil. Reitin, xi temat vatei takes, e maten nan pipin tangan vahinat xir te melengien xil vus. Xi xa momal kuhi mak temat tehinat xir xa ratamal ti tangan ikila itiamu ni xamim mumei visal Hi. Neta sav xa temat e latetihin tiei nan, Hi tesak ni temeul rilomun del xat **ninin** nan. ^{u19} Texo ninin nan, Iesu teha tehithiten sepinien na Hi mi ninin na ngan xil xa Hi teso xil e nim te xeih na ninin tesa xil, ^{*} ²⁰ vengon xa tetiamu nousav, xil latnalong xat ti sepinien na Hi e melele xa **Noah** di teti tuturil nan. Hi, texo nenenemien tehos nan, tetatil xil tangan laviles ra tesaen nae xil teha vuma ... e xil latnaviles ti. Tesak ni, Hi teteh meulien e rut moletin xil tang, tol e he sav tang (8), xa latehe tuturil e latesal e oei xa mahulong xiak iaxa latemeul. E ngan tesav xil vus latelel vari. ^v

²¹ Neta xa Hi tepol ni xiak tehe vole tei usil sexien te **baptaes** xa di pisen ni xa Hi teteh meulien e xamim texo maten e mea rilomunen na Iesu Kristo. E taxeak, melele xa labaptaes ni xamim, tave ti tangan lakas moten muis vahe reling tenbemim. E-e, labaptaes ni xamim tangan vapisen ni xa mupol ni hitxatien del Hi mubit musoh e sexien xil xa lamese pe meten. E sexien ak di pisen ni mun xa munggur meulien hu xa Hi tehit xati mi xamim texo Iesu Kristo xa temeua rilo-

^{*}3:19 Xos koute te sepinien ak mak: tetiamu nousav, ninin na Iesu mei tese xat Noah xa teha tesepin mi moletin tesa xil e melengien nan xil. E taxeak, ladi e Upang xa be nim te xeih na ninin tesa xil.

^f3:9 Mat 5:44; 1Tes 5:15; 1Pit 2:23 ^s3:14 Mat 5:10; 1Pit 2:20; 4:14

^t3:15 Aes 8:12-13 ^u3:18 Rom 6:10; Efes 2:18; Hib 9:28; 10:10; 1Pit 2:21; 4:1

^v3:20 Sen 6:1-7:24

mun ra maten. ^{w22} Meulien hu nggo Iesu Kristo xa tehe ut nesao ngamu, e, taxeak, di dotan de von merereen xa de ri matu na Hi xa latesak ni *masxaxa* xil vus del ninin sav xil xa xeihen di e xil ladi pe hen.^x

?Ti rilong xat Hi itep?

4 Melele xa di mubisu ni longpangasien ve neketen namim, ti muhur hisit nenemien xa Iesu tehuri melele xa telong pangas xi e tenben. Muhisu ni imak vengang xa melele xa di mulong pangas xamim e tenbemim ve neketen namim, di mupisen ni xa mutahusil ti mun suse te *tesaen*. ^{y2} Misak ni, e melengien xil vus xa di mumeul mudi, munahusil ti eheien tesa xil te ut etan. E, muhusil sexien hos xil xa Hi kestang ien bei tangan xamim mupol ni. ³ Teti-
amu, mutehas purun melengien namim xil holu texo hisit sexien xil na ngan xil xa latakil ti Hi. Mutepol ni hisit sexien tesa xil vus e mutehusil eheien namim vehakut, mutemun tova tang e mutepat vituei tetel malohos e atou xil xa mutnateli ti tenatel xil. Reitin, teti-
amu mutepol ni sexien te hoeasoen holu e mutemot mi nanao xil xa latepuru tang.

⁴ E xosali, ngan xil xa latakil ti Hi di latemanin xa mutavituei ti mun vatel xil tangan mumos e hisit sexien te hoeasoen xa xil di lapol ni. Misak ni, xil di laseputut ni hisemim. ^{z5} E ve sexien nae, xil mei lisoh e lisep usil rin nae pe met Hi xa ilepis rin na moletin xil vus, ngan xil xa lamat itel ngan xil xa lameul. ^{a6} Ve rin ak, Hi tepol ni suse tangan ngan xil mun xa lalel ngamu lakila lalong longeongen hos usil Mesaea nan. Misak ni, tave ti

neta xa latehur pangasien te maten e tenbexil nggoni ngan xa moletin xil vus langguri, e ninixil imeul vehakut ixoni ngan xa Hi di meul vehakut.

⁷ Hoxalite te holesok xil vus te ut etan di bemei sangas. Misak ni, muxuxou kuhi tangan nenemien namim e sexien namim xil imal vehakut tangan neta ti nasikoe xol sisen namim xil. ^{b8} E iemim nabong ni ti tangan iemim ihei xamim mun tang, ve sexien te eheien di misak ni xamim di muketeh bos ni moletin sav xil, neta sav xosxa di lapol misa mi xamim. ^{c9} Muhur pilei mosav xil e tim samim xil e munaseputut ti ven.

¹⁰ Ve eheien hos na Hi, xi di misa kekes ni sanien hos savsav xil mi xamim. Misak ni, nggoni ngan xa mube moletin hos nan xil te polien, mupol itel sanien namim xil ixo suse xa momal teni, e mututou ni mosav xil itela. ^{d11} Reitin, moletin xa nggur sanien te sepinien, ihithiten sepinien xa Hi vari isa ni mini. E moletin xa nggur sanien te tutouen, xi itutou ni mosav xil itel xeihen xa Hi di misa ni mini. Ma, ixo Iesu Kristo, holesok xil vus xa di mupol ni ipet rat his Hi ihe nesao xa minehinen te xeihen nan iti en vehakut xa vehakut tang. Reitin. ^e

Moletin xil na Hi di langgur longpangasien

¹² Tuxoli xil e neketen, munatemanin ni ti longpangasien te xeih xil xa di mungguri tangan vasak pis reitinen te neketen namim. Munanemi ti munahit holesok xil ak linamei ti e xamim. ^{f13} E-e. Xosali, bos tangan mupolu ni sien vengang xa mudi e suse te longpangasien xa Iesu vari teta en. E, e hoxalit suse ak, melele xa Iesu ipisen minehinen te

^{w3:21} Hib 10:22 ^{x3:22} Efes 1:20-21 ^{y4:1} Rom 6:2,7

^{z4:4} Efes 2:2-3; Taet 3:3 ^{a4:5} Pol 10:42; 2Tim 4:1; 1Pit 3:19

^{b4:7} Rom 13:11-12; 1Sion 2:18 ^{c4:8} Pro 10:12; Tem 5:20

^{d4:10} Rom 12:6-8 ^{e4:11} 1Kor 10:31 ^{f4:12} 1Pit 1:7

xeihen nan, xamim mei mupolu kuhi ni sien. ^g14 Xosxa lasepin misa ba xat xamim vengan xa di munggusil xat Iesu Kristo, munem xati xa tuxolxatien na Hi di mi xamim vengan xa **Ninin** na Hi xa be eilep mak mu di meul e xamim. ^h15 Reitin xa ti muhisu ni longpangasien xil, e isa xosxa tei e xamim ihisu ni longpangasien vengan xa tehas vin moletin sav, mu tekan ni neta, mu tepol ni neta tei xa tesa, mu di mitup ngon e rin na mosav xil. Ve sexien xil ak, momal tangan ihur longpangasien ven. ^l16 E xosxa muhur longpangasien vengan xa mube **Kristin** xil, munave unoun ti ven. E mumes Hi vengan xa moletin xil di lapus kila xa di munggusil Iesu Kristo. ^l17 Nabiteni mak vengan xa Melengien te Lepisien di bemei xiak xa Hi ilepis rin na moletin nan xil mu. ?E xosxa xir di rapus longpangasien e meulien nar, ma itep sung mi ngan xil xa latalong xat ti reitinen te longeongen hos xa Hi tesa ni? !Mi xil isa pilei mak mu! ⁱ18 Nggoni ngan xa Vanuvei Eo biteni bit,

“?Xosxa nggeih tangan ngan xil xa sexien nae momal lavur meulien sal, ma naha vari ti imei mi ngan xil xa meulien nae tamal ti e di lapol misa?” (Pro 11:3)

^l19 Ve rin ak, xosxa di munggur longpangasien ve neketen namim nggusil nenemien na Hi, bos xa mutit ni ngan taxa ti ihos e muling meulien namim iti pe hen. Mupol ni imak vengan xa xi tepol ni xamim e vehakut xi di pol sen naha xa di bit xati.^j

Sexien xa elda xil ti lilaxat moletin na Hi xil ixo en

5 Ieok bei tangan nisel xat xamim xa mube elda xil vengan xa inou mun

nabe elda tei. E pe metok, inou natepus longpangasien xil xa Iesu tehuri. E melele xa ipisen minehinen te xeihen nan mi moletin xil, inou mun nisoh vituei itela. ²Nasel xat xamim tangan mulaxat kuh moletin xil xa Hi miling xil ladi pe hemim nggoni ngan taxa mube moletin xil xa di lalaxat kuh sipsip xil. Munapol ni ti naxoni ngan xa mosav xil di langgeih xat xamim tangan mupol ni, mu tangan muvur mani vaxo en. E mupol ni itel sien e itel nenemien xa ihos ixoni ngan xa Hi ien bei tangan mupol ni. ^k3 Reitin xa Hi teling xamim tangan ti mulaxat moletin nan xil, e munapol ni ti natel sexien te xeihen mu natel nenemien xa be nesao. E bos mak mu xa mupol ni sexien hos xil xa moletin xil lik-ila lipol ihusili. ^l4 Reitin, Vat na ngan xil xa di lalaxat moletin nan xil mei istal. E melele xa imei, xi isa merereen e his tei xa eilep mi xamim xa ixoni vatluvoluv te lelaxatien xa minehinen teni iti vehakut.^m

⁵ E xamim xa mube horam maxoe xil, bos xa mulong xat elda xil te sias. E melele xa mudi vituei, xamim vus mupol ni nenemien namim ihe tan vengan xa Vanuvei Eo di biteni bit,

“Hi di pol ni nggeih ba xat rin na ngan xil xa labe koai, e di pisen eheien hos nan mi ngan xil xa di lapol ni nenemien nae be tan.” (Pro 3:34)ⁿ

⁶ Ma, mupol ni nenemien namim ihe tan e muhusil xat nenemien na Hi te xeihen xa mudi pe hen. E xi ipet rat hisemim e melengien hos tei xa xi teling

⁸4:13 Pol 5:41 ^h4:14 Sam 89:50-51; Pol 5:41; 1Pit 2:20; Aes 11:2 ⁱ4:17 Ser 25:29; Esek 9:6; 2Tes 1:8 ^j4:19 Sam 31:5 ^k5:2 Sion 21:15-17; Pol 20:28 ^l5:3 2Kor 1:24; Plp 3:17; Taet 2:7 ^m5:4 1Kor 9:25 ⁿ5:5 Mat 23:12; Tem 4:6

xati ngamu teta. ⁰⁷Reitin, del nenemien xa be tan musa sen nenexoen namim xil vus iha mi Hi, vengan xa eheien nan di e xamim e di milaxat kuh xamim. ^p

⁸Muxuxou kuhi e muketeh xol meulien namim vehakut, vengan xa **Temat** xa be elu namim di mikakao xuxus xorelis xamim e di milang ni suse tangan vapurun xamim vaxo en. Reitin, xi nggoni laeon tei xa mae nggati, xa di milang ves moletin tangan vatal papasi e vaa ni. ⁹⁹Ma, musoh ixeh e neketen namim e musikoe xole tangan namei ti sangas visal xamim. Musoh ixeh imak vengan xa mukila xa tuemim sav xil mun te neketen xa ladi e rute xil vus e ut etan di langgur hisit longpangasien xil taxa xamim di mungguri. ^{r10}E melele xa mulong pangas xamim e tenbemim vuteili, Hi te eheien hos xil vus iling pilei xamim e itutou ni xamim. Xi isak ni neketen namim mei ixeh mu e isak ni nenesien namim naxelial ti mun. Hi xa tekes xamim tangan mei

muvisti vatel Iesu Kristo xa minehinen te xeihen nan iti vehakut, xi ipol ni holesok xil ak ve xamim. ^{s11}!Xeihen te lelatxatien na Hi iti vehakut xa vehakut tang! Reitin.

Sepinien kor

¹²Inou di nadis uvei ak xa tamure tang mi xamim del tutouen na Saelas xa be tuxoli hos tei xa di nggusil xat Hi. E uvei ak, ieok bei tangan nasel xat xamim e namiteni xa sepinien xil ak be reitin usil naha xa Hi di pol ni e rin nar ve eheien hos nan. Ma mupol ihusili.

¹³Moletin xil te sias xa xiak te hal '**Babilon**,'[†] xa Hi tehosei xil latehe nan, xil di labit 'bos makoe' bat mi xamim xa xamim mun mube nan. Mak mun, xa nggoni natuxoli e neketen, di misa 'bos makoe' nan bat mi xamim. ¹⁴Musa hemim metu mi xamim itel eheien na Hi.

Nasis xa tomat na Hi iti mi xamim vus xa di mubisti del Iesu Kristo.

[†]**5:13** Koute te his taon ak tehe 'Rom.' E melele te oltestamen, Babilon tehe taon xa mahulong xa tehur xeihen tangan valaxat kantri xil holu e ut etan. E xil latepol ni texeih mi moletin xil na Hi. E tetutou, Hi tesak ni xeihen teni tekesae.

^{05:6} Siob 22:29; Mat 23:12; Luk 14:11; 18:14; Tem 4:10 ^{p5:7} Sam 55:22; Mat 6:25-30 ^{95:8} 1Tes 5:6 ^{r5:9} Efes 6:11-13; Tem 4:7 ^{s5:10} 1Tes 2:12

Sepinien xa diamu te

2 Pita

?Visi iaxa tetis uvei ak?

Eloheoh Pita tetis uvei ak^t

?Visi iaxa tevuli uvei ak tetiamu?

Pita tetis uvei ak teha mi Kristin xil vus. E 1 Pita, xi tepet rat nenemien nae e tesel xat xil tangan lisoh ixeih ve long-pangasien xil xa ti imei. E, e 2 Pita, xi tesel xat xil tangan lipus kil sexien tesa xil na titsa te luvoson xil.

?Pita tetis uvei ak veneh?

Pita ien tehei tangan Kristin xil lihur xat sepinien te reitinen usil Iesu Kristo - Pita tesel xat moletin xil na Hi tangan mei limatu kuhi e neketen nae^u

Pita ien tehei tangan vasel xat Kristin xil linahusil titsa te luvoson xil ti - Pita tehiteni xa hisit titsa te luvoson xil lateti nousav ngamu,^v

Pita ien tehei tangan vapet rat nene-mien na Kristin xil xa mei rilomunen na Iesu Kristo be reitin - Vengan xa titsa te luvoson xil latehiteni xa Iesu natilomun ti mun,^w

Pita ien tehei tangan vasel xat Kristin xil xa meulien nae imese tevi - Vengan xa titsa te luvoson xil di lapispisi mi Kristin xil labit momal tangan ti lihusil eheien te tenbexil,^x

Ne-nemien tei xa eilep te uvei ak de 2 Pita 3:17

E xamim xa mube navan xil li, veng-an xa mukil holesok xil xa di nabiteni xiak, mungguxou kuhi tangan moletin tesa xil linatel xamim ti ni pispisien xil xa tamal ti e linasak ni xamim ti munamot e neketen namim ra rute xa bos xa mudi en taxeak.

?Naha iaxa di e uvei ak?

1. Selxatien tangan Kristin xil mei limatu kuhi e neketen nae. (1:1-21)

2. Selxatien tangan Kristin xil ti linahusil pispisien xil ti na titsa te luvoson xil. (2:1-22)

3. Selxatien tangan Kristin xil ti lipol ni sexien xil xa momal e melele xa di latil mei rilomunen na Suv Iesu. (3:1-18)

Sepkilaen na Pita usil uvei ak

1 Inou nabe Saemon Pita, moletin te polien na Iesu Kristo e *eloheoh* tei nan.

Di nadis uvei ak bat mi xamim xa mutehur neketen hos xa bos pupu nggoni ngan xa xamem mangguri. Iesu Kristo tesa neketen ak mi xamim texo holesok xil xa xi tepol ni xa temal tevi. Xi iaxa be Hi nar e di miteh meulien e xir.

²Nasis tangan eheien hos e tomat na Hi mei ipolu kuhi e meulien namim ixo naha xa mukila usil Hi e Iesu, Suv nar. ^y

Hi di mikes moletin xil mei labe nan

³Nggo xeihen na Hi, xi tesa holesok xil vus xa ti rihuri tangan riti e meulien xa xi ien bei e rihusil suse xa momal. Di misa ni mi xir melele xa rakil kuh xi, ngan xa tekes xir ve hosien e minehinen te xeihen nan. ^{z4}E nggo hosien e minehinen

^t1:0 2Pit 1:1; 2Pit 3:1 ^u1:0 2Pit 1:5-11; 2Pit 1:12-21

^v1:0 2Pit 2:1-10; 2Pit 2:19; 2Pit 2:12 ^w1:0 2Pit 3:4; 2Pit 3:6-10

^x1:0 2Pit 2:13; 2Pit 3:14-15 ^y1:2 Siud 1:2 ^z1:3 1Pit 2:9

te xeihen nan, Hi di misa hitxatien tellep xil xa bos pupu mi xir.[‡] Di misa ni mi xir tangan rikila rilesae ra sexien tesa xil te ut etan xa di purun moletin xil, e ripol ni sexien xil xa momal kuhi ixoni ngan xa Hi mun momal tevi.

⁵ Misak ni, vengan xa Hi tepol ni holesok xil ak, xamim musak ixeih tangan musuv xat neketen namim itel sexien hos xil. E musuv xat sexien hos namim itel kilakilen te reitinen na Hi. ⁶ E musuv xat kilakilen ak itel nenemien xa muxouxou kuhi ve sexien namim xil. E musuv xat nenemien ak itel nenemien xa tit mupol ixeih ha vuma ... ituxoh hoxalit meulien namim. E musuv xat nenemien ak itel sexien xil xa imal ixoni sexien xil na Hi. ^{a7} E musuv xat sexien xa momal ak itel vitueien hos. E musuv xat vitueien hos ak itel sexien te eheien. ⁸ E xosxa sexien xil ak ladi e meulien namim e di lamatu kuhi e xamim, ma kilakilen namim e Iesu Kristo, Suv nar, mei ihe mahulong mak mu. E ipisen ni xa kakaoen namim di ngusil neketen namim e meulien namim ihur huite ihe holu. ⁹ E xosxa moletin tei tapol ni ti sexien hos xil ak, ngan ak di pisen ni xa nenemien nan be tamure tang, misakras vanem vaha mu, e di ien bovorong ni xa Hi tekas moten ni tuei ra **tesaen** xa tepol ni.

¹⁰ Misak ni, tuxoli xil e neketen, musak pisi ixeih tangan mupol ni sexien xil ak tangan ipisen ni ihe reitin xa Hi tehosei xamim e tekes xamim mei mube nan. Xosxa kakaoen namim ihusil reitinen ak, ma musakras musavut e neketen namim. ¹¹ Vengan, nggo rin ak, Hi di pol ni suse mei memese tevi tangan ihur pilei

xamim mumei e ut xa Iesu Kristo, Suv nar xa teteh meulien e xir, be suv toto en vehakut xa vehakut tang.

¹² Misak ni, neta sav xa xamim mukil holesok xil ak ngamu e di musoh nggeih e reitinen xa mungguri, nanemi nabit bos xa nitit ni ngan taxa ti nihithiteni mi xamim tangan iemim nabong ni ti. ^{b13} Reitin, e melele xil vus xa nimeul nita, nanemi nabit momal tangan tit nihithiten holesok xil ak mi xamim vehakut. ^{c14} Vengan xa nakila xa nave nousav ti, nimat ixoni ngan xa Iesu Kristo, Suv nar, tehit lelen ni minou ngamu. ¹⁵ Misak ni, di nadis uvei ak bat mi xamim tangan nipol ni holesok xil xa nakila nipol ni tangan vatutou ni neketen namim. Imak, ma melele xa nimat, xamim mukila munem rilomun ni rin xil ak vehakut.

Eloheoh xil e provet xil tetiamu latehit rat reitinen usil Iesu Kristo

¹⁶ Di nadelu rilomun ni nenemien namim tangan mukila xa sepinien navan be reitin. Vengan melele xa xamem eloheoh xil na Iesu Kristo di masepin mi xamim usil xeihen e mei rilomunen na Iesu Kristo, Suv nar, matatumul ti usil tumulen xil xa moletin tei tang tepol ni tangan valihi nenemien na moletin sav xil vaxo en. E-e, xamim matepus minehinen te xeihen nan ni metemem xati. ¹⁷⁻¹⁸ ^d Reitin, xametil mateti tetel Iesu e vathu na Hi e melele xa Hi Tata tesa merereen e minehinen te xeihen mini. Xametil matelonge melele xa Hi te Xeihen tesep usili tehit, "Ngan ak be Natuxoli reitin xa eheien navan di en. Inou nabesi

[‡]1:4 Hitxatien hos xil na Hi labe holu pupu e rute xil labit itep iaxa Hi isa Ninin Eo nan mei ise xat moletin nan xil (Pol 2:14-41), itep iaxa mei rihe eo ixoni Hi (1Sion 3:2), itep iaxa Iesu imei rilomun en (2Pit 3:4), e itep iaxa rihur meulien sal e ut nesao (1Pit 1:4; 2Pit 3:13).

^a1:6 Kal 5:22-23 ^b1:12 Siud 1:5 ^c1:13 2Kor 5:1; Sion 21:18-19

^d1:17-18 Mat 17:1-5; Mak 9:2-7; Luk 9:28-35

nou pupu ven.” Reitin mak, xamétel vari mattelong rae nen ak xa texo ut nesao.

¹⁹ Mak iaxa, holesok xil vus xa xamétel mattepusi e mattelonge di misak ni xir rakil kuhi xa sepinien xa **provet** xil tetiamu latehit lelen ni usil Mesaea be reitin tevi. Bos mak mu xa muhur kuh sepinien nae xil e ti mulong xati, vengan xa sepinien nae di mileluv xol holesok xil nggoni laet xa di mileluv kuhi e ut te maluxoluk. Mak, ma bos mak mu xa mupol itel laet te sepinien ak ituxol melengien hos xa Iesu imei rilomun en xa isak ni nenemien namim mei ileluv kuhi. Reitin, xi imei ixoni Melan, hitu te makoe xa di pisen ni xa ut da milan. ²⁰ E ngan xa eilep mak mu tangan mukila xiak: sepinien xil vus xa Vanuvei Eo di bit lelen ni tenastal ti tenaxo nene-mien na provet xil kestang. ²¹ Vengan xa hisit sepinien xa mak taxo moletin xil ti kestang. E be Hi iaxa di misepin nggo vulonge moletin xil e melele xa **Ninin Eo** di mise xat xil.^e

Hi isa pangasien mi titsa te luvosen xil itel ngan xil mun xa di langgusil pispisien nae xil

2 Tetiamu, **provet** te luvosen xil lat-estal e hilaep te mol-Isrel xil. E, usil hisit sexien tak, titsa te luvosen xil ti listal e hilaep te xamim. Xil lileh xuxus ni pispisien te luvosen xil xa ipurun vuol ni neketen na ngan xil vus xa ti lihusili. E ngan xa isa mak mu iaxa xil likavitou ni Suv Iesu xa texal rat xil ra pangasien ve tesaen nae xil. Isak ni, xil ti lilihi pangasien imei itemanon mak mu mi xil mun tang xa lihuri e melele xa ha lisoh pe met Hi. ^{f2} Moletin holu lihusil suse te sexien tesa na titsa te luvosen xil ak. E ve tesaen xil xa di lapol ni, moletin

sav xil lisepin isa iha xat Suse te Reitenen xa di ranggusili. ^{g3} Titsa te luvosen xil ak labe hokan e mei lipurun xamim itel tumulen xil xa di lasa ni tang tangan lakila lalah rat mani namim xil vaxo en. Nousav ngamu, Hi tevue xat xi tangan valepis rin na moletin xil ak. Reitin, xi xa ti ilepis rin na moletin xil ak tapat ti. E isa pangasien mi xil e ihu len vuol ni xil. ^h

⁴ Hi isa pangasien mi titsa xil ak ixoni ngan xa tepol ni tetiamu. Rakila vengana, tetiamu, Hi tenastokovein **maxaxa** xil ti tangan litit ni ngan xa ti lipol ni **tesaen**. E Hi tesa pangasien mi xil ven. Reitin, tesil rerat xil latehe Vangavul te Upang xa misakras vamat e tevar xat xil ni sen te xeih e maluxolukuken tangan litatil Melengien te Lepisien. ⁱ⁵ E, tehusil sexien tak, e melengien xil na **Noah**, Hi tenastokovein moletin xil ti tangan latit ni ngan xa ti lapol ni tesaen nae xil, e xi tesa pangasien mi xil. Reitin, xi tesa oei tei xa mahulong teleh mei tekutaxol ut etan tangan vahu len moletin tesa xil ak. Noah tesa sepinien xa tepisen suse te momalen mi moletin xil, e latesin ni. Tesak ni, tete meulien e Noah kestang tetel ngenen xil xa latehe lu e he sav (7). ^{j6} E melengien xil na Lot, Hi tesa pangasien mi moletin xil xa lateti e taon xalu te hal **Sodom** xal **Komorah**. Reitin, tesa upang xa mei tea len holesok xil vus xa teti e xalu teha vuma ... taon xalu ak mei lutehe meas tang. Hi tepol ni temak tangan moletin sav xil lipus kila xa ngan ak be naha xa mei istal mi ngan xil xa di lapol misa. ^{k7} E Hi tete meulien e **Lot** vengana xa sexien nan xil temal pe meten e xi mun telonge tesa ve sexien tesa na moletin xil xa di latesin rae hos xil. ^{l8} Reitin mak, Lot tetat visal xil, ma

^{e1:21} 2Tim 3:16; 1Pit 1:11 ^{f2:1} Mat 24:11; Siud 1:4 ^{g2:2} Aes 52:5

^{h2:3} Rom 16:18; 1Tes 2:5 ^{i2:4} Siud 1:6; Rev 20:1-3

^{j2:5} Sen 6:1-7,17; 8:18; 2Pit 3:6 ^{k2:6} Sen 19:24; Siud 1:7 ^{l2:7} Sen 19:1-16

melengien xil vus tepus sexien nae xil xa tekavui e telong sepinien tesa nae xil. E veng an xa kakaoen na Lot temal, sexien nae xil tesak ni tinen tepangas ven teha vuma ... sangas vatin mei vatalang ni.⁹ Misak ni, di rapus kila xa midep iaxa Hi mikila vateh meulien e ngan xil xa lamal ra melele te xeih xil xa di labisu ni. Rakila mun xa Hi di milepis rin na ngan xil xa di lapol misa e di miso viton pangasien xa xil ti lihuri e Melengien te Lepisien.^{m10} Reitin, Hi ilepis rin na moletin xil vus xa di lapol misa, e ipol ni mak mu mi ngan xil xa di langgusil eheien xil te tenbexil tang xa tamal ti, e di lasin rae na vat nae xil.ⁿ

Titsa te luvosen xil ak, vatixil nggeih e ulixil takan ti tangan laseputut ni ngan xil xa labe eilep mak mu lali xil e ut etan e e ut nesao mun.¹¹ Vengan rapusi xa, tave ti neta xa masxaxa xil latellep e langgur xeihen lali titsa te luvosen xil ak, masxaxa xil latanemi ti lavit xil lapin tangan laseputut ni neta ngan. Reitin, pe met Hi, latasa ti sepinien tova vaha xat masxaxa sav xil vaxoni ngan xa titsa te luvosen xil ak di lapol ni.^{o12} E titsa xil ak di laseputut xat ngan xil xa latakil ti. E nggoni vongoro xil te ut etan xa ladi tangan mosav xil lital xat xil e lihas vin xil, kilakilen na titsa xil ak tovuol e di langgusil naha xa tenbexil tang di ien bei.^{p13} Reitin, Hi isa xoles longpangasien mi xil xa latesa ni mi mosav xil. Titsa te luvosen xil ak labesi xil tang tangan ti lapol ni sexien te hoeasoen xil e melengien tang. E melele xa titsa xil ak di langganien vituei del xamim e anien eo xil, langgoni tan xa di purun eising tei xa mieh. Di lapurun vitueien namim veng an xa di lapol misa tang, e unounen tovuol e xil vari.^{q14} Vehakut, mae di ng-

gat xil ve **tesaen** e iexil bei mak mu tangan lasak pisi tangan ha lapol vasa vatel atou xil vus xa di labisu mi xil. Di ladel ngan xil xa neketen nae taxeih ti e suse te tesaen. Labe ho mani e latepispisi kuhi mi xil mun tang ni suse xil xa likila lihur mani na mosav xil ixo en. Halesil de meulien nae e lipus xil ekaten na Hi sung.¹⁵ Xil latehe reling suse xa momal e latele ras suse nae. Dit langgusil suse na provet **Balam**, nat Beor, xa tehesi xi tangan vahur mani vaxo sexien tesa xil xa di tepol ni.^{r16} E ve sexien tesa ak, Hi tesel xati texo vulonge dongki san. Reitin, Hi tesak ni vongoro votei xiak, xa takil ti sepinien, mei tesepin ni rae moletin tangan vasikoe xol **provet** ak e napol ni ti mun sexien te talangen nan.^s

¹⁷Titsa te luvosen xil ak di lasepin votei tang, e lasakras lapol ni naha xa di labiteni. Langgoni vangoei xil xa lames. Langgoni momah votei xil xa votiang di bui, e latasak ni ti us vamus. Hi teling xat vonexil tangan liha liti e ut xa imaluxoluk xa imaluxoluk pupu.^{t18} Di lasep koai holu, e sepinien nae be neta sav tang. E di laluvos moletin xil labit bos tangan lipol ni naha xa tenbexil tang di ien bei. E nggo sexien ak, di lalihi ngan xil xa neketen nae be neta hu tangan limot rilomun e sexien tesa xil ixoni moletin xil xa sexien nae xil mikavui. E be hisit sexien tesa xil ak iaxa latemeluv ra ni tave nousav ti.¹⁹ Titsa te luvosen xil ak labit xati xa lisak ni moletin xil mei limeluv tevi, e xil vari labe slev xil te sexien tesa xil xa di bar xat xil e lasakras lameluv ra xil. Reitin, xil labe slev te sexien tesa nae xil xa di purun xil. Vengan moletin be slev te holesok xil xa be eilep e meulien nan.^u

^m2:9 1Kor 10:13; Siud 1:6 ⁿ2:10 Siud 1:7,8 ^o2:11 Siud 1:9

^p2:12 Siud 1:10 ^q2:13 Siud 1:12 ^r2:15 Nam 22:7; Siud 1:11; Rev 2:14

^s2:16 Nam 22:28 ^t2:17 Siud 1:13 ^u2:19 Sion 8:34

²⁰?E midep ni ngan xil xa lakil Iesu Kristo, Suv nar, ngamu, xa tesak ni xil latemeluv ra ao te sexien tesa xil te ut etan, e di, lamaen sexien tesa xil ak tangan mei vavar xat rilomun ni xil? Moletin xil ak likameti xa meulien nae mei isa mak mu ili ngan xa lateti en tetiamu. ^{v21}Vengan xa pangasien xa ngan xil ak lihuri isa pilei sung, vengan xa latekavitou ni rae eo xil na Hi xa xamem eloheoh xil matesa ni mi xil. Xos vahos mak mu vahit linakil ti suse te momalen ak. ^{w22}Naha xa di lapol ni pisen ni xa sepinien te metisouen xalu ak lube reitin xa lubit,

“Kuli tei dilomun ba ngga luluhen nan,”

(Pro 26:11)

e *“Vueili xa latekas moten ni dilomun ba pat e mame man.”*

Hitxatien usil mei rilomunen na Iesu Kristo

3 Ngan ak be valu nen xa nadis uvei tei bat mi xamim xa eheien navan di e xamim. E uvei xalu vus natesak pisi tangan namithiten reitinen mi xamim xa mukila ngamu tangan munem rilomun ni holesok xil xa bos e momal. ²Ieok bei tangan munem xat sepinien xil xa **provēt** eo xil tetiamu latehiteni, e munem xat rae xil na Suv Iesu xa tete meulien e xamim, xa xamem, **eloheoh** namim xil, matesa ni mi xamim. ^x

³Neta tei xa eilep mak mu tangan mukil kuhi xiak: e Melengien Kor xil, moletin xil mei listal xa ti liseputut ni holesok xil xa bos e lihusil sexien tesa xil xa tenbexil tang iexil ihei. ^{y4}Xil lihit, “?Midep? ?Be reitin xa xi tehit xati xa imei rilomun? ?Xi da xave? Avu nar xil tetiamu latemat ngamu, e neta tovuol vahiles. Holesok xil vus dit mak tang e melele xa Hi tepeas ni ut etan mei duxoh

xosali ak.” ⁵Neta sav xa xil lakil reitinen xa Melengien te Lepisien imei, labit linakil ti. Vengan xa tetiamu, Hi tepeas ni ut nesao e ut etan texo sepinien nan. Reitin, texo sepinien nan, xi tepol ni oei mei tehe tan e tesak ni tan ak testal texo oei. ^{z6}E del xat oei ak mun tang, Hi tehu len holesok xil vus xa latemeul lateti e ut etan e melele xa tesak ni oei ak teme tekutaxol ut xil vus. ^{a7}E xosali, nggo sepinien nen mun tak, Hi di miling kuh ut nesao e ut etan tangan laliti ituxoh melele xa teling xati tangan imaen upang mei ia len xalu vus. Reitin, xi di miserev xalu ve Melengien te Lepisien xa ikin maten mi moletin tesa xil vus.

⁸Ma xamim xa eheien navan de xamim, nasel xat xamim tangan iemim nabong ni netak ti. Pe met Hi Suv, huram taosen tei (1000) nggoni melengien tei tang. Reitin, xalu lupin tang nggusil keteheh nan. ^{b9}Rut moletin xil lanemi labit Hi di miraru tangan vasak ni hitxatien nan usil mei rilomunen na Iesu vastal, e tave reitin ti. Nenemien nan teviei e rin namim e di misa mesal mi xamim tangan mukila muhiles ra tesaen namim xil, vengan xa ien ti tavei tangan moletin ti vakesae. Ien bei mak mu tangan moletin xil vus lihiles ra tesaen nae xil e mei lihe visali.

¹⁰E melengien xa Suv Iesu imei istal rilomun mi xamim ixoni meien na moletin te kanen tei xa moletin xil lite-manin ni. E melele nen ak, ut nesao ikesae itel tangalen tei xa mahulong; upang xa eilep ia lelen eai, aveti e hitu xil; e ut etan itel holesok xil ngasen xa ladi en ihe tovuol mun.

¹¹?Ma, vengan xa Hi ihu lelen holesok xil vus ixo suse ak, xamim mei muhe hisit moletin eah vari? Meulien namim

^{v2:20} Mat 12:45 ^{w2:21} Luk 12:47-48 ^{x3:2} Siud 1:17 ^{y3:3} Siud 1:18

^{z3:5} Sen 1:6-9 ^{a3:6} Sen 7:11-21; 2Pit 2:5 ^{b3:8} Sam 90:4

ihe eo e kakaoen namim ihusil naha xa Hi ien bei. ¹²E mupol ni imak e melele xa di mudatil melengien xa Hi tehit xati xa Iesu imei rilomun en e mupol ni imei itemanon.^f E melengien nen ak, upang ia len tilang hat, e saluh teni ia len eai, aveti e hitu xil e holesok xil xa ladi e xil lixururi e likesae vari. ¹³E neta sav xa holesok xil mei istal, xir di radatil naha xa Hi tehit xati mi xir. Radatil melele xa ut nesao e ut etan mei lalihe neta hu. E ngan xil kestang xa lamal pe met Hi lik-ila liti en.

Selxatien kor e sisen kor

¹⁴Xamim xa eheien navan di e xamim, vengan xa di mudatil melele nen ak, musak ixeih tangan Hi mei ikameti xa mudi e tomat nan, e di mupol ni kakaoen namim momal e memese tevi pe meten. ¹⁵Mukila xa nenemien na Hi Suv nar teviei e di misa mesal mi moletin xil tangan iteh meulien e xil. E **Pol**, tua nar e neketen xa eheien nar di en, xi mun di tetis sepinien nen tak mi xamim tehusil

kilakilen xa Hi di misa ni mini. ^{c16}Reitin, e uvei nan xil vus, Pol di midis usil nenemien ak. Rut sepinien xil xa ladi e uvei nan xil nggeih tangan moletin xil lanem kila. E ngan xil xa iexil ti tavei tangan lakil ti e lataro kat ti e neketen nae, xil labilhiles sepinien nan xil mei be luvosen tang nggoni hisit sexien xa di labilhiles sepinien sav xil xa di e Vanuvei Eo. E melele xa lapol ni mak, di lalihi pangasien bemei e xil mun tang.

¹⁷E xamim xa mube navan xil li, vengan xa mukil holesok xil xa di nabiteni xiak, mungguxou kuhi tangan moletin tesa xil linatel xamim ti ni pispisien xil xa tamal ti e linasak ni xamim ti munamot e neketen namim ra rute xa bos xa mudi en taxeak. ^{d18}E bos mak mu xa mutit ni ngan taxa kilakilen namim usil Suv Iesu Kristo xa di miteh meulien e xamim e eheien hos nan ti meul mei ihe nesao mu. !Risa memesien mini xa minehinen te xeihen di en xosali e vehakut tang! Reitin.

^f3:12 Vanuvei Eo di biteni xa itiamu ni melele xa Iesu itilomun en, moletin xil vus te ut etan lilong longongen hos usil Iesu Kristo (Mat 24:14). Misak ni, Hi di tamu misa mesal mi moletin xil tangan likila lilonge e lihiles meulien nae tangan mei lihusil Hi (2Pit 3:9). Misak ni, rakila rasak ni mei rilomunen na Iesu mei itemanon mu melele xa di rabithiten longongen hos usili e rute xil vus, e melele xa kakaoen nar di pisen xeihen na Hi.

^c3:15 Rom 2:4; 1Pit 3:9 ^d3:17 Mak 13:5; 1Kor 10:12

Sepinien xa diamu te

1 Sion

?Visi iaxa tetis uvei ak?

Sion Sepeti iaxa tetis uvei ak, ngan xa tehe tei e eloheoh xatel xa Iesu tekes rohon ni xatel. Ngoni tuneli xalu, Temis xal Pita, Sion teso net tetiamu tenggan vasar meseo xil.^e Sion temeul tehe nousav teli eloheoh sav xil. E melele xa Pol e Pita e holu e eloheoh sav xil latemat ngamu, Sion teha tesao ni sias xil xa lateti e rute xil vus tekapis e tan xa mahulong te hal Esia (tan xa lakesi ni Turkey xosali). Teha tepus xil e hurang ni xasangas ni hurang 85 mu 90 AD (huram xil tetutou ni poten na Iesu). Di, xi tetis 'Longeongen hos xa Sion tetisi.' E tetutou sung, xi tetis uvei ak. Di, sangas ni hoxalite te meulien nan, tetis sepinien xil te 'Revelesen' mun.

?Visi iaxa tevuli uvei ak tetiamu?

Sion tetis uvei ak teha mi Kristin xil xa lateti e rute xil vus, e tetisi mi xil texoni ngan xa latehe horamue nan xil.^f Uvei ak teha tekapis e sias xil vus. Titsa te luvosen xil holu latekapis e latepispisi mi Kristin xil ni holesok xil holu xa tenave reitin ti. Misak ni, Sion tetis uvei ak tenggan vatutou ni nenemien na Kristin xil tenggan ti lihusil kes ni naha xa lakila labit nggusil reitinen na Hi.

?Sion tetis uvei ak veneh?

Sion tehit kila xa Iesu temei texoni moletin e temat reitin e eivave - Sion

ien tehei tangan Kristin xil likila xa Iesu be Hi xa be 'Vatit Sepinien te Meulien'^g **Sion tehit kila xa Hi ien bei tangan sexien na moletin nan xil imese tevi** - Titsa te luvosen xil latehiteni xa tenbe moletin e nini moletin lutasil ra xalu. E nenemien nae latehiteni latehit moletin tei mikila vapol ni holesok xil vus xa xi ien bei tangan vapol ni vaxo tenben, e tesaen teni misakras vapangei ninin mu vapol ni mei namese ti. E Sion tehit kila xa ngan xil xa labe moletin xil na Hi reitin di langgusil xat rae nan xil.^h

Sion tehit kila xa Kristin xil di lapisan eheien mi tua nae xil te neketen - Venggan xa titsa te luvosen xil di latesak ni Kristin xil di latengor mi xil mun tang, Sion tesel xat xil tangan lipisen eheien mi Kristin sav xil.ⁱ

Sion tehit kila xa Iesu Kristo kestang iaxa be suse xa moletin xil lakila lavur meulien sal vaxo en - Titsa te luvosen xil latehiteni xa metisouen xa xil kestang langguri mikila vateh meulien na moletin xil.^j

Nenemien tei xa eilep te uvei ak de 1 Sion 5:13

Di nadis bat mi xamim xa muke reitin e Nat Hi tangan mukila xa di munggur meulien sal ngamu.

?Naha iaxa di e uvei ak?

1. Hi be miehen e ien bei tangan sexien na moletin nan xil ipisen ni xa labe te miehen. (1:1-2:29)

2. Hi momal tevi e ien bei tangan sexien na moletin nan xil ipisen ni xa lamal tevi. (3:1-10)

^e1:0 Mak 4:21 ^f1:0 1Sion 2:1,12,28

^g1:0 1Sion 1:1; 1Sion 1:2-3; 1Sion 4:2-3; 5:6-10 ^h1:0 1Sion 2:3-6; 3:1-10

ⁱ1:0 1Sion 2:7-11; 3:11-24 ^j1:0 1Sion 1:8-10; 1Sion 3:1-3

3. Hi be vatit eheien e ien bei tangan moletin nan xil lipisen sexien te eheien mi mosav xil. (3:10–4:21)

4. Hi be vatit meulien e di miteh meulien e ngan xil vus xa di laling neketen nae e Natneli xa be Iesu Kristo. (5:1-21)

Sepkilaen usil xi xa be Vatit Sepinien te Meulien

1 Inou, Sion, nadis uvei ak bat mi xamim usil xi xa be ‘Vatit Sepinien te Meulien,’ ngan xa teta tetiamu ni holesok xil vus. Xi teme tehe moletin xa xamem matepusi. Reitin, tehe xi vari xa mateteong ni texo vurangemem, matepusi ni metemem, e matetuxoli ni hemem. ^{k2}Tetiamu, Vatit Sepinien te Meulien ak temeul vehakut e tete visal Hi Tata. E tetutou ni, xi mei testal mi xamem. Xi vari iaxa xamem matepusi, ma taxeak di mabithiteni mi xamim. ^{l3}Naha xa matepusi e mateteong ni, di mabit mesen ni mi xamim tangan mukila muhisti itel xamem xa di mabisti del Hi Tata e Natneli xa be Iesu Kristo. ⁴E melele xa muke reitin e naha xa di madis usili, xir vus rimaal pupu. ^m

Riti e miehen vengam xa Hi be miehen

⁵Sepinien xa mateteong ni texo Nat Hi, xamem di mabithiteni mun mi xamim. E xi tehiteni mi xir xa Hi memese tevi, tesaen tovuol en. Xi nggoni miehen xa maluxoluken tovuol en. ⁿ⁶Xosxa rabiteni rabbit rabisti dela e radi tamu e maluxoluken te tesaen, ma di raluvos e sepiniem nar e kakaoen te meulien nar tahusil reitinen ti. ^{o7}E xosxa di rakakao e miehen nggoni ngan xa Hi de miehen, e sexien nar memese tevi, ma xir, Kristin

xil, rikila rihisti itel xir mun tang. E melele xa di rakakao e miehen, re Iesu, Nat Hi, di mikas moten xir ra **tesaen** xil vus tangan mei ramese tevi.

⁸E xosxa di rabiteni rabbit tesaen nar tovuol, ma dit raluvos xir mun tang e reitinen tovuol e xir. ⁹E xosxa di rabbit rat tesaen nar xil mi Hi, xi xa, vehakut, di pol sen holesok xil xa biteni e di pol ni holesok xil xa momal, xi naketeh ti mun nasa mi xir ve tesaen nar xil e ikas moten xir rimese ra sexien nar xil xa tamal ti. ¹⁰Hi tehit lelen ni xa xir vus rapol ni **tesaen**. E xosxa rabiteni rabbit ratapol ni ti tesaen, ma di rabiteni xa Hi di miluvos. E xosxa imak, ma sepiniem nan tovuol e xir.

Iesu Kristo di misepin mi Hi ve rin nar

2 Horamue navan xil li, di nadis sepiniem ak bat mi xamim tangan munapol ni ti **tesaen**. E xosxa moletin tei di pol ni tesaen, ma ngan de visal Hi Tamer xa mikila vasepin vatela ve rin nar, xi be Iesu Kristo, ngan xa momal tevi. ^{p2}Xi tesa meulien nan texoni sanien eo tei tangan vateh meulien e xir ra **tesaen** nar. E tenasa meulien nan ti ve xir kestang, e tesa ni tangan vateh meulien e moletin xil vus e ut etan ra tesaen nae xil. ^q

³?Naha vari ipisen ni xa di rakil kuh Hi? Melele xa ralong xat rae nan xil, ma ipisen ni xa rakil xi. ⁴E xosxa moletin tei di biteni bit xi mikil Hi, e talong xat rae nan xil ti, xi be vat luvos e reitinen tovuol en. ^{r5}E xosxa ralong xat sepiniem nan, ma ti ripisen ni xa iexir bei Hi nggo hisit sexien xa xi ien bei. Nggo rin ak, rapus kila xa di rabisti del Hi. ^{s6}Ma xosxa di rabiteni rabbit rabisti del Hi, ma ti ripol

^{k1:1} 1 Sion 1:1,2; 1 Sion 2:13,14; Sion 1:1,4,14 ^{l1:2} 1 Sion 1:14 ^{m1:4} 1 Sion 15:11;

16:24 ^{n1:5} 1 Tim 6:16; Tem 1:17 ^{o1:6} 1 Sion 2:4; Sion 3:21

^{p2:1} Rom 8:34; Hib 7:25; 9:24 ^{q2:2} 1 Sion 1:29; Kol 1:20; 1 Sion 4:10,14

^{r2:4} 1 Sion 1:6 ^{s2:5} 1 Sion 14:21,23; 1 Sion 5:3; 4:12,17; Sion 13:15; 1 Pit 2:21

ni kakaoen nar mei ixoni kakaoen na Iesu Kristo.

Rihusil xat rae na Hi te eheien

⁷Timue navan xil li, di nadis usil rae tei xa momal tangan ti muhusili, e rae ak tave neta hu ti. E-e, be rae matu tei xa biteni bit, “Texir ti ihei xir.” Rae ak, xamim mutehuri ngamu e melele xa muteneket rohon e Iesu. Reitin, rae matu ak be sepinien tei xa mutelonge ngamu. ¹⁸E tave ti neta xa mak, nggoni ngan taxa rae xa di nadisi bat mi xamim xosali be neta hu, vengam xa rapus reitinen teni e meulien na Iesu Kristo, e meulien namim mun. Maluxoluken e sexien tesa nar xil xa rateti en tetiamu di lakesae, e miehen te reitinen xa radi en xosali di mileluv kuhi. ^u

⁹E xosxa moletin tei di biteni bit, “Inou nade miehen na Hi,” e, e melele nen tak, ien nggat tuneli tei, ma xi da tamu e maluxoluken te tesaen. ^{v10}E ngan xa di pisen eheien mi tuneli mu hineli e neketen, xi de miehen na Hi reitin. E hisit moletin xa mak, neta tovuol vata en xa mikila vasak ni vamot e tesaen. ^{w11}E moletin xa di ien nggat tuneli, xi da tamu e maluxoluken te tesaen. Xi di mikakao e maluxoluken ak e tapus kil ti rute xa di ba en, vengam xa maluxoluken te tesaen nan di mikutaxol meten. ^x

Selxatien ba mi Kristin xil tangan lihusil sexien xil xa momal

¹²Di nadis bat mi xamim, horamue navan xil e neketen,

vengam xa Hi di miketeh bos rilomun mi xamim nggo naha xa Iesu tepol ni e rin te tesaen namim xil. ^y

¹³Di nadis bat mi xamim, tata xil, vengam xamim mukil xi xa teta ngamu tetiamu ni holesok xil vus. ^z

Di nadis bat mi xamim, horam maxoe xil,

vengam xa, e vaeen te neketen, xamim mubas tan ni Temat tuei.

¹⁴Reitin, di nadis bat mi xamim, horamue navan xil,

vengam xa xamim mukil Hi Tamer.

Di nadis bat mi xamim, tata xil,

vengam xa mukil xi xa teta ngamu tetiamu ni holesok xil vus.

Di nadis bat mi xamim horam maxoe xil, vengam xa neketen namim nggeih, e sepinien na Hi di meul e xamim.

Reitin, e vaeen te neketen,

xamim mutehas tan ni Temat ngamu.

¹⁵Vengam xa rin ak be reitin, eheien namim nati ti e holesok xil te ut etan. Xosxa moletin tei ien bei tesaen xil te ut etan mu sexien xil teni, ma eheien nan mi Hi Tamer tovuol en, ^{a16}vengam xa sexien tesa xil te ut etan tastal ti vaxo Hi Tamer. Sexien xil te ut etan mak: sexien xa moletin ien bei tangan vapol ni holesok xil xa di milihni nenemien nan; sexien xa ien bei tangan valeh holesok xil xa di milihni meten; e sexien xa be koai ve holesok xil xa milehi. ^{b17}Ut etan del holesok xil vus xa di en xa moletin xil di iexil bei di lakesae. E ngan xil xa langgusil xat nenemien na Hi lasakras lakesae, xil ti limeul vehakut xa vehakut tang. ^c

^t2:7 2Sion 1:5-6; 1Sion 2:24; 3:11 ^u2:8 Sion 13:34; Rom 13:12; Sion 1:9

^v2:9 1Sion 2:11; 3:10,15; 4:20 ^w2:10 Sam 119:165; Rom 14:13

^x2:11 1Sion 2:9; Sion 12:35 ^y2:12 Sam 25:11; 1Kor 6:11

^z2:13 Sion 1:1,2; 1Sion 1:1 ^a2:15 Rom 8:7; Tem 4:4 ^b2:16 Rom 13:14; Efes 2:3; 1Pit 2:11; Pro 27:20; Tem 4:16 ^c2:17 1Kor 7:31; Mat 7:21

Muketeh kuhi ve ngan xil xa labe elu mi Iesu Kristo

¹⁸ !Horamue navan xil, muketeh kuhi vengang xa radi e Melengien Kor xil ngamu! Xamem matehiteni tuei mi xamim xa xi xa be elu mi Kristo imei. E taxeak, di rapusi xa moletin holu xa labe elu mi Kristo lastal ngamu. Ngan ak di pisen ni xa radi e Melengien Kor xil ngamu. ^{d19} Moletin xil ak lastokovein vitueien nar xil vengang xa latavisti ti vatel xir e reitinen xa di ranggur xati. Vengang xa vahit xil lavisti vatel xir reitin, ma latit vituei vatel xir. E melele xa xil lateha, rapus kila sung xa tovuol e xil vahe tova xir. ^e

²⁰ E xamim, Iesu xa be eo mise xat xamim ngamu ni **Ninin Eo**, e xamim vus mukil reitinen na Hi. ^{f21} Misak ni, natatis ti vahat mi xamim vengang xa mutakil ti reitinen. E-e, di nadis bat vengang xa xamim mukila ngamu, e mukila mun xa luвосen misakras vastal vaxo reitinen na Hi.

²² ?Visi iaxa di miluvos? Ngan xil xa labit Iesu tave Mesaea reitin ti na Hi, xil di laluvos. Moletin xil ak labe elu mi Kristo vengang xa latake reitin ti xa Iesu be Nat Hi e Hi be Tamen. ^{g23} Reitin, vengang xa ngan xil xa di lasin Nat Hi, lapisen ni xa latavisti ti vatel Tamen. E ngan xil xa lake reitin e Nat Hi, xil lapisen ni xa di labisti mun del Tamen. ^h

²⁴ Mak, ma sepinien te reitinen xa mutelonge e melele xa mutehur rohon ni neketen, muhur xati iti e meulien namim. Xosxa muhur xat sepinien ak xa bit Iesu be Kristo reitin, isak ni xamim mutit ni ngan taxa ti muhisti itel Iesu, Nat Hi, e itel Tamen. ²⁵ E xosxa rabisti

del xalu, rihur naha xa Iesu Kristo tehit xati tangan isa ni mi xir xa be meulien sal. ⁱ

²⁶ Di nadis bat mi xamim tangan nasel xat xamim usil ngan xil xa di lasak tangan laluvos xamim. ²⁷ E Iesu Kristo mise xat xamim ni Ninin Eo nan tuei. Mak, ma melele xa Ninin Eo nan di e xamim, xi keatang mikila vapispisi mi xamim ni naha xa be reitin e naha xa be luвосen. Ma munasis ti mun moletin tova tangan mei napispisi mi xamim ni holesok sav xil. E mutit ni ngan taxa ti muhisti itel xat Iesu Kristo, ixoni ngan taxa Ninin Eo tepispisi ni mi xamim tuei. ^j

²⁸ Reitin, horamue navan xil li, muhisti itel Iesu tangan, melele xa xi mei istal rilomun e risoh pe meten, rinave unoun ti. ^{k29} Ma, vengang xa mukila xa sexien xil na Iesu Kristo momal tevi, xamim xa di munggul sexien xa momal tevi nggoni xi, di mupisen ni xa Hi tesak ni xamim mei mube neta hu, e mube horamue nan xil reitin. ^l

Sexien xa momal tangan horamue xil na Hi ti lipol ni

3 !Eheien xa Hi Tamer di pisen ni mi xir mahulong pupu! Reitin, rakila xa eheien nan mahulong pupu vengang xa mikes xir ni horamue nan xil. E be reitin mak xa xir rabe horamue nan xil. E moletin xil te ut etan latapus kil ti xa xir rabe horamue xil na Hi vengang xa latakil ti Hi. ^{m2} Timue navan xil li, be reitin xa xir rabe horamue xil na Hi tuei, e ratakil kuh ti mu xa tenbexir itep e melele xa ti imei. E tave ti neta xa mak, rakila xa melele xa Iesu Kristo imei rilomun en, xir rikil kuhi sung xa xi nggoni naha. E

^{d2:18} Mat 24:5,24 ^{e2:19} Pol 20:30; 1Kor 11:9 ^{f2:20} 1Sion 2:27

^{g2:22} 1Sion 4:3; 2Sion 1:7 ^{h2:23} Sion 5:23; 15:23; 1Sion 4:15; 5:1; 2Sion 1:9

^{i2:25} Sion 3:15; 6:40 ^{j2:27} Sion 14:26; Ser 31:34 ^{k2:28} 1Sion 4:17

^{l2:29} 1Sion 3:10 ^{m3:1} Sion 1:12,13; 1Sion 3:10; Sion 16:3

melele nen ak, tenbexir ihiles mei ixoni tenben. ^{u3}E moletin xil vus xa lanesi e reitinen ak, lixuxou kuhi tengen meulien nae imese tevi ixoni ngan xa Iesu Kristo memese tevi.

⁴Moletin xil xa langgulehi di lapol ni **tesaen** di langgur xoteh rae xil na Hi, vengaxa xa sexien xa di langgur xoteh rae nan xil be vatit tesaen. ^{o5}Xamim mukila xa Iesu Kristo mistal tengen valeh rerat tesaen xil, e tesaen tovuol en. ^{p6}Misak ni, moletin xil vus xa meulien nae bisti del Iesu Kristo, xil linaxulehi ti mun linapol ni **tesaen**. E ngan xil xa dit lapol ni tesaen, di lapisen ni xa latavisti ti vatit Iesu e latakil ti vari. ^q

⁷Horamue navan xil li, munamaen moletin sav ti naluvos xamim. Ngan xil xa lapol ni sexien xa momal, lamal tevi nggoni ngan taxa Iesu mun momal tevi. ^{r8}Ngan xil xa langgulehi di lapol ni tesaen, xil labe horamue xil na **Temat**, vengaxa Temat tepol ni tesaen tetiamu nousav mei duxoh xosali ak. E Nat Hi testal ve rin ak, tengen vahaxa tan ni holesok xil xa Temat di pol ni. ^s

⁹Moletin xil xa Hi misak ni xil labe neta hu e mei labe horamue nan xil, xil lasakras laxulehi ti lapol ni tesaen vengaxa meulien na Hi di e xil. E vengaxa Hi xa tesaen tovuol en be Tamexil, xil lasakras laxulehi ti lapol ni tesaen. ^{t10}Xir rakila rapus kil visi xil iaxa labe horamue xil na Hi mu horamue xil na Temat nggorin ak: ngan xil xa di latapol ni ti naha xa momal mu eheien nae tovuol e tua nae

xil, xil iaxa latave horamue xil na Hi ti, xil labe horamue xil na Temat vari. ^u

Iexir ti ihei xir

¹¹Sepinien xa mutelonge e melele xa mutehur rohon ni neketen namim mak: iexir ihei xir. ^{v12}Rinaxoni **Ken** ti xa tepisen ni xa be horamue tei na Temat e melele xa tehas vin tuneli Ebel. ?Ken tehas vini veneh? Vengaxa holesok xil xa xi tasen tepol ni tenamal ti, e holesok xil xa tuneli tepol ni temal. ^w

¹³Ma, tuxoli e hinoxoli xil, melele xa moletin xil te ut etan iexil nggat xamim, munatemanin ti. ^{x14}Rakila xa rameluv ra xeihen te maten, e mei ranggur meulien sal. Rakil rin ak vengaxa eheien nar di e tua nar xil. Ngan xil xa eheien nae tovuol ladi tamu e xeihen te maten. ^{y15}Ngan xil xa iexil nggat tuexil e hinexil, pe met Hi nggoni ngan taxa labas vini. E rakila ngamu xa ngan xil xa labas vin moletin, latahur ti meulien sal. ^{z16}Iesu Kristo tepisen sexien te eheien mi xir temak: xi tetutou ni xir e melele xa temaen meulien nan tekesae ve rin nar. Ixo suse ak, xir mun ti ritutou ni tuexir e hinexir, tave ti neta xos meulien nar ikesae ve rin nae. ^{a17}Melele xa rapus moletin sav tei xa holesok nan tovuol, e xir, xa holesok nar di, ratatutou ni ti, ma rapisen ni xa eheien nar e Hi tovuol. ^{b18}Horamue navan xil, rinapisen eheien nar ti naxo sepinien nar xil kestang. E-e, ti ripisen ni xa eheien nar be reitin ixo kakaoen nar xil e sexien te tutouen nar. ^c

^{m3:2} 2Kor 3:18; Plp 3:21 ^{o3:4} Mat 7:23 ^{p3:5} Sion 1:29; 1Pit 2:24; 1Sion 2:2; 4:10; Aes 53:9; Sion 8:46; 2Kor 5:21; Hib 4:15; 7:26; 9:14; 1Pit 1:19; 2:22; 3:18

^{q3:6} Rom 6:2,14; 1Sion 3:9 ^{r3:7} 1Sion 2:29 ^{s3:8} Sion 8:44

^{t3:9} 1Sion 5:18 ^{u3:10} Sion 1:12,13; 1Sion 3:1

^{v3:11} Sion 13:34; 15:12,17; 2Sion 1:5 ^{w3:12} Sen 4:8

^{x3:13} Sion 15:18,19; 17:14 ^{y3:14} Sion 5:24; 1Sion 2:11

^{z3:15} Mat 5:21,22; Kal 5:20-21; Rev 21:8 ^{a3:16} Sion 13:1; 15:13; Kal 2:20; 1Tim 2:6; Taet 2:14; Plp 2:17; 1Tes 2:8 ^{b3:17} Dut 15:7-8 ^{c3:18} Tem 2:15-16

**?Rikila risoh e ulixir
nakan ti pe met Hi itep?**

¹⁹ Melele xa di rapisen eheien nar nggo sexien nar e kakaoen nar xil, rakila xa radi e reitinen na Hi. Ma melele xa rakila xa radi e reitinen na Hi, tomat iti e nenemien nar e melele xa rihe sangas visal Hi, ²⁰ neta sav lehit ralonge nggoni ngan xa kilakilen usil tesaen nar xil tetiamu di bas purun nenemien nar. Reitin, riti e tomat vengam xa rakila xa eheien hos na Hi mahulong mak mu mili nenemien nar e xi mikil holesok xil vus. ²¹ Mak, ma timue navan xil li, xosxa rinem usil holesok xil ak, ritemanon risoh kat tangan ulixir nakan ti pe met Hi. ²² Imak, ma rakila xa xir ti rihur holesok xil xa di rasisi ven, vengam xa xir raneket e rae nan xil e di rapol ni holesok xil xa xi memaal ven. ^d

²³ E ngan ak be rae na Hi: tangan riling neketen nar e Iesu Kristo xa be Natneli; e tangan iexir ti ihei xir ixoni ngan taxa Iesu Kristo tesemae ni mi xir. ^{e24} Ngan xil xa lalong xat rae xil na Hi, xil labisti del Hi e xi mun bisti del xil. E rakila xa Hi bisti del xir vengam xa di meul e tinexir nggo **Ninin Eo** xa tesa ni mi xir. ^f

**Sexien xa rakila ralepis polien e
sepinien na moletin tei vaxo en**

4 Timue navan xil li, xosali ak, **provot** te luvosan xil holu di lakapis e ut xil vus. Mak, ma munake reitin ti e sepinien na moletin xil vus xa labit polien nae nggo Ninin Eo. E musak pis xil tangan mukameti xos ninin xa de xil nggo visal Hi reitin, mu taxo ti visali. ^{g2} Ixo sexien xil ak, ma mupus kila xosxa be reitin xa

Ninin na Hi de xil: xil lihit rati xa Iesu Kristo temei tehe moletin xa tenben teta. ^{h3} E moletin xa misin reitinen ak usil Iesu, xi taxur ti Ninin Eo xa nggo visal Hi. Ninin xa di en mistal nggo ngan xa be elu mi Iesu Kristo. Tetiamu, mutelonge xa ninin ak imei, e taxeak, da ngamu e ut etan. ⁱ

⁴ Horamue navan xil li, mube na Hi, e muli provet te luvosan xil tuei vengam xa musin pispisien nae xil. Muli xil vengam xa Ninin Eo xa de xamim eilep mak mu mili ninin na Temat xa de ngan xil xa labe te ut etan tang. ^{j5} Provot te luvosan xil ak labe te ut etan tang e dit lassep usil holesok xil te ut etan. Mak, ma ngan xil xa labe te ut etan di lateong ni sepinien nae xil. ^{k6} E xamem, mabe na Hi. Ma, ngan xil xa lakil Hi, xil di lateong ni pispisien namem xil. E ngan xil xa lateong ni xamem ti, latave na Hi ti. Nggo rin ak, xir rakila rapus kil visi vari iaxa Ninin te reitinen da en, e visi iaxa ninin te luvosan da en. ^l

**Sexien te eheien de ngan xil xa di
langgusil xat Hi te eheien**

⁷ Timue navan xil li, iexir ihei tua nar xil, vengam xa eheien nggo visal Hi. Moletin xa eheien da en di pisen ni xa mikil kuh Hi xa tesak ni mei be neta hu e be horamue nan reitin. ⁸ Moletin xa eheien nan tara ti e mosav xil di pisen ni xa takil ti Hi, vengam xa Hi be vatit eheien. ^{m9} E Hi tepisen eheien nan mi xir melele xa tesa Natneli xa be sikes nan temei e ut etan tangan rakila ravur meulien sal vaxo en. ⁿ¹⁰ Sexien te eheien mak: tenave sexien ti xa xir ratepisen ni mi Hi, e be sexien xa Hi tepisen ni mi

^{d3:22} Mat 21:22; Mak 11:24; Sion 14:13; 15:7; 16:23-24

^{e3:23} Sion 6:29; 13:34; 15:12,17 ^{f3:24} Rom 8:9; 1Sion 4:13

^{g4:1} 1Tes 5:21; Mat 7:15; 1Sion 2:18; 2Sion 1:7 ^{h4:2} 1Kor 12:3

^{i4:3} 2Sion 1:7; 1Sion 2:18 ^{j4:4} Mat 12:29 ^{k4:5} Sion 15:19

^{l4:6} Sion 8:47 ^{m4:8} 1Sion 4:16 ^{n4:9} Sion 3:16

xir e melele xa tesa Natneli temei tesa meulien nan texoni sanien eo tei tengang vateh meulien e xir ra **tesaen** nar xil. ^{o11} Timue navan xil li, vengang xa Hi tepisen eheien nan mi xir temak, xir mun ti ripisen eheien nar mi tua nar xil. ^{p12} Moletin tovuol iaxa vapus Hi xati. E melele xa di iexir bei xir, di rapisen ni xa Hi de xir e eheien nan di pol sen naha xa ien bei tengang vapol ni e meulien nar. ^q

¹³ ?Xir rikila xa di rabisti del Hi e xi di bisti del xir midep? Rakila e melele xa rapus kila xa Ninin Eo xa xi tesa ni de xir. ^{r14} Hi Tata tesa Natneli temei tengang vateh meulien e moletin xil te ut etan. E xamem, eloheoh xil, matepus Iesu e di mabithiteni xa naha xa xi tepol ni e rin na moletin xil be reitin. ^{s15} Xosxa xir rabit rati xa Iesu be Nat Hi, ma ngan ak pisen ni xa di rabisti del Hi e xi di bisti del xir. ^{t16} Mak, ma rakila xa eheien nan di e xir e raneket xa Hi ti ipisen eheien nan mi xir vehakut. ^u

Hi be vatit eheien, e ngan xil xa eheien di e xil, lapisen ni xa labisti del Hi e xi di bisti del xil. ¹⁷ E melele xa eheien nan pol sen polien nen e meulien nar, ulixir nakan ti tengang ha risoh pe met Hi e Melengien te Lepisien. Reitin, ulikanen ihe tovuol e xir vengang xa meulien nar di pisen sexien te eheien e ut etan nggoni ngan taxa Iesu tepisen ni. ^{v18} Ulikanen ihe tovuol e ngan xil xa eheien na Hi di e xil. Mak iaxa vengang xa eheien di pol sen polien nan e meulien nar, di nggol rerat ulikanen ra xir. Ma, ngan xil xa di ulixil mikan ni pangasien te lepisien na Hi, eheien na Hi tapol sen polien nen ti e meulien nae.

¹⁹ Eheien nar mikila vati e mosav xil vengang xa, tetiamu, eheien na Hi teti e xir. ²⁰ Xosxa rihiteni rihit iexir bei Hi e di iexir nggat tuexir mu hinexir, ma rabe moletin te luvosen xil tang. Vengang xosxa eheien nar tari ti e tuexir mu hinexir xa rakila rapus xil ni metexir, ma eheien nar misakras vati e Hi xa ratapus ti. ²¹ Ti ripisen eheien mi mosav xil vengang xa Hi tesa rae ak mi xir xa bit: moletin xa eheien nan de Hi, eheien nan iti e tuneli e hineli mun. ^w

Ngan xil xa di laneket e Iesu Kristo likila laleli saksipisien xil te ut etan

5 Moletin xa mike reitin xa Iesu be Mesaea xa Hi tesa ni, xi di pisen ni xa Hi tesak ni mei be neta hu e be horamue nan reitin. Melele xa moletin tei ien bei tata tei, ma di pisen eheien mi horamue nan xil mun. ^{x2} Misak ni, rakila xa eheien nar de horamue xil na Hi reitin e melele xa eheien nar de Hi e di ralong xat rae nan xil. ³ Xir di rapisen eheien nar ba mi Hi e melele xa di ralong xat rae nan xil. E rae nan xil ak taxeih ti mi xir, ^{y4} vengang xa ngan xil vus xa Hi tepol ni xil mei labe neta hu e labe horamue nan xil reitin lakila lasin sexien xil te ut etan. Neketen nar e Iesu Kristo di misak ni xir rikila rihang tan ni sexien tesa xil itel saksipisien xil te ut etan. ⁵ ?Visi iaxa mikila vahang tan ni holesok xil xa lasa xa ladi e ut etan? Ngan xil kestang xa lake reitin xa Iesu be Nat Hi reitin. ^z

Hi pisen ni xa Iesu be Natneli reitin

⁶ Iesu Kristo be ngan xa texo ut nesao temei e ut etan, ngan xa latebaptaes ni ni

^o4:10 Rom 5:8,10; 1Sion 2:2 ^p4:11 Mat 18:33

^q4:12 Sion 1:18; 1Sion 2:5; 4:17 ^r4:13 Rom 8:9; 1Sion 3:24

^s4:14 Sion 3:17 ^t4:15 1Sion 5:5 ^u4:16 1Sion 4:8 ^v4:17 1Sion 2:5; 4:12

^w4:21 Mat 5:44-45; Mak 12:29-31 ^x5:1 1Sion 4:15; 1Pit 1:22-23

^y5:3 Sion 14:15,23,24; 2Sion 1:6; Dut 30:11; Mat 11:30

^z5:5 Rom 8:37; 1Sion 4:4

oei e xa ren teleh e melele xa teha temat. Io, Hi tepisen ni xa Iesu be reitin texo oei tetel ra, tave oei ti kestang. E **Ninin Eo** di pisen ni mi xir xa holesok xil ak usil Iesu be reitin vengan xa Ninin Eo be vatit reitinen. ^{a7}Neta tol (3) ak di latepisen reitinen ak xa Iesu texo visal Hi: ^{b8}Ninin Eo, oei, e ra. Xatel vus ak latepisen kila xa Iesu be Nat Hi reitin. ⁹Melele xa moletin tei bit usil neta ngan mi xir, di rake reitin en. Misak ni, melele xa Hi di bit usil neta ngan, ma rike reitin en ihe holu mak mu. E xi tehit usil Iesu bit be Natneli reitin. ^{c10}Mak, ma moletin xa di miling neketen nan e Iesu Kristo xa be Nat Hi, xi di mike reitin e sepinien na Hi. E moletin xa take reitin ti e naha xa Hi tehiteni usil Natneli, xi di pol ni nggoni ngan taxa Hi be vat luvosen tei tang. ^{d11}Naha xa Hi di biteni mak: Hi misa meulien sal mi xir, e tepol ni Natneli mei be suse teni. ¹²Mak, ma moletin xa bisti del Nat Hi, xi nggur meulien sal. E moletin xa tavisti ti vatel Nat Hi, xi tahur ti meulien sal. ^e

Xosxa raneket e Iesu ma rikil kuhi xa ti rihur meulien sal

¹³Di nadis bat mi xamim xa muke reitin e Nat Hi tangan mukila xa di munggur meulien sal ngamu. ^{f14}Mak, ma ulixir nakan ti e melele xa rihe visal Hi ixo sisen. Io, melele xa rasisi ve neta

xa momal nggusil nenemien nan, rakila xa xi di miteong ni xir. ^{g15}E vengan xa rakila xa xi di miteong ni sisen nar, rakila mun xa di misa huit sisen nar ngamu.

¹⁶Xosxa tei e xamim pus tuneli mu hineli pol ni **tesaen**, bos xa isis mi Hi ven. Imak, ma Hi ilong sisen nan e ihilesi ra suse te maten tangan iling rilomun ni e suse te meulien sal. E rut moletin xil di lapol ni hisit tesaen xil xa di misak ni xil latasil ra Hi vehakut e lihur pangasien ven. Inou nataviteni ti namit xamim ti musis mi Hi ve rin ak. ^{h17}Be reitin xa sexien xil vus xa lakavui labe tesaen, e rut tesaen xil ladi xa latasak ni ti moletin vatasil ra Hi vehakut.

¹⁸Xir rakila xa ngan xil xa Hi tesak ni xil mei labe neta hu e labe horamue nan xil reitin, xil lataxulehi ti lapol ni tesaen. Reitin, Nat Hi di miketeh xol xil tangan Temat xa be vat tesaen misakras vapangei xil. ¹⁹Xir rakila xa rabe na Hi, neta sav xa moletin sav xil vus te ut etan ladi pe he Temat. ⁱ²⁰Rakila xa Nat Hi temei e ut etan e di misa kilakilen mi xir tangan rakil kuh xi xa be reitin. Io, di rabisti del Hi reitin, e del Natneli. Xi be Hi reitin, e xi iaxa di misa meulien sal mi moletin xil. ^j

²¹!Horamue navan xil li, muketeh kuhi xa xamim munahusil ti hi xil xa tave reitin ti! ^k

§5:16 Tesaen xil ak langgoni ngan xa di labit usili e Mat 12:31; Mak 3:29; e Hib 6:4; 10:28-29.

^a5:6 Sion 19:34 ^b5:7 Sion 15:26 ^c5:9 Sion 5:32-34; 5:37; 8:18

^d5:10 Rom 8:16; Kal 4:6 ^e5:12 Sion 3:36 ^f5:13 Sion 20:31

^g5:14 Mat 7:7; Sion 14:13; 15:7,16; 16:23; 1Sion 3:21-22 ^h5:16 Mat 12:31; Hib 6:4-6 ⁱ5:19 1Sion 3:9; Sion 17:15 ^j5:20 Sion 17:3 ^k5:21 1Kor 10:14

Sepinien xa diamu te

2 Sion

?Visi iaxa tetis uvei ak?

Eloheoh Sion Sepeti tetis uvei ak tetutou ni melele xa tetis uvei xa tetiamu xa rakesi ni 1 Sion sangas ni huram 90 AD (huram xil tetutou ni poten na Iesu).

?Visi iaxa tevuli uvei ak tetiamu?

Sion tehiteni tehit tetis uvei ak teha mi sias tei xa tekes xuxus ni ni 'atou xa Hi tehosei tehe nan e mi horamue nan xil.' E melele nen ak, moletin xil holu di latepol ni texeih teha xat Kristin xil ve neketen nae. Ve rin ak, Sion ien ti tenavei vahit rat his moletin xil, ma di tesoson sepinien nan e uvei ak.

?Sion tetis uvei ak veneh?

Sion ien tehei vasel xat Kristin xil tenggan iexil ihei xil mun - Sion tetis holu usil eheien xa momal tenggan Kristin xil ti lipisen ni mi Kristin sav xil.¹

Sion ien tehei tenggan vasel xat Kristin xil tenggan linahusil ti titsa te luvosen xil - Sion tehiteni xa ngan xil xa latake reitin ti xa Iesu Kristo temei tehe moletin reitin xa tenben teta, xil latave Kristin reitin ti. Misak ni, moletin xil na Hi linahur pilei titsa te luvosen xil ti e linake reitin ti e pispisien nae xil.^m

Neņemien tei xa eilep te uvei ak de 2 Sion 1:9

Ngan xil xa di lasorin ni neta ngan mun ba xat pispisien xil na Iesu Kristo, xil latavisti ti vatel Hi. E ngan xil xa di langgusil xat pispisien xil na Iesu, xil di labisti del Hi e del Natneli.

?Naha iaxa di e uvei ak?

1. Selxatien tenggan Kristin xil ti lihusil xat kuh rae te eheien xa Hi tesa ni. (1:1-6)

2. Selxatien tenggan Kristin xil linahusil ti ngan xil xa pispisien nae usil Iesu Kristo tahusil reitinen ti. (1:7-13)

Sepkilaen na Sion usil uvei ak

1 Inou, xa lakes nou ni Elda, iaxa di nadis uvei ak. ⁿ

Nadisi ba mi Atou ^{**} xa Hi tehosei tehe nan e ba mi horamue nan xil: ieok bei xamim reitin, e tave nou ti kestang, ngan xil mun xa lakil reitinen iexil bei xamim. ²Vengan xa reitinen ak di e xir, iti e xir vehakut.

³Nasis tenggan Hi Tata e Natneli, Iesu Kristo, lalisa eheien hos, esaeen e tomat nalu mi xir. Xatel latiti e meulien nar e melele xa di iexir bei xir e di ranggusil xat reitinen.

Selxatien tenggan rihusil sexien te eheien e pispisien te reitinen

⁴Di nabesi nou holu pupu melele xa natehur longeongen xa rut horamue nam xil di langgusil reitinen nggoni ngan xa Tata tesemae ni. ⁵Navan xil li, bos xa taxeak ti iexir ihei xir. Naha xa di nadisi bat mi xamim tave sepinien hu ti. E-e, be sepinien tei xa ratehuri ngamu e melele xa rateneket rohon. ⁶Di rapisen eheien

^{**}1:1 Vengan xa Kristin xil di labisu ni sakpurunien xil holu, Sion di misoson sepinien nan. Ien ti tenavei tenggan vahit rat his moletin tova. Misak ni, xi mikes sias ak ni "Atou" e Kristin xil teni ni horamue nan xil.

¹1:0 2Sion 1:5-6 ^m1:0 2Sion 1:7-11 ⁿ1:1 3Sion 1:1 ^o1:4 3Sion 1:3

^p1:5 1Sion 2:7; 2:24; 3:11; Sion 13:34; 15:12,17; 1Sion 3:11

xa be reitin melele xa kakaoen nar di ngusil xat rae xil na Hi. E rae xa mute-longe tetiamu, e melele xa muteneket rohon temak: kakaoen namim ti ihusil xat sexien te eheien. ^q

⁷ Moletin te luvosen xil holu di lakapis e ut etan, ngan xil ak latake reitin ti xa Iesu Kristo temei tehe moletin xa tenben teta. Hisit moletin xa mak be vat luvosen tei e be elu mi Iesu Kristo. ^{r8} Mak, ma muketeh kuhi tangan huit neketen xa di rapol vituei ven nakesae ti ra xamim. Io, musoh ixeih tangan muhur sen huit neketen namim.

⁹ Ngan xil xa di lasorin ni neta ngan mun ba xat pispisien xil na Iesu Kristo, xil latavisti ti vatel Hi. E ngan xil xa di langgusil xat pispisien xil na Iesu, xil di labisti del Hi e del Natneli. ^{s10} Mak, ma xosxa moletin tova bemei mi xamim

xa pispisien nan tahusil reitinen ti, ma munakesi ti munahit xi be tuemim tei te neketen, e munahur pilei ti namei e tim samim. ^{t11} Mupol ni imak vengang xa ngan xa di nggur pilei hisit moletin xa mak nggoni ngan xa be tuneli, xi pisen ni xa di bisti del moletin ak e sexien tesa xil xa xi di pol ni.

Sepinien kor

¹² Holesok xil holu di xa nakila namiteni mi xamim, e ieok ti tavei tangan matisi vahe uvei tei. Ieok bei mak mu tangan nihat nisao ni xamim tangan ripus xir e ti risepin vituei. Imak, ma xir vus rihesi xir mak mu. ^u

¹³ Inggak, horamue xil na Tumahin, ^{††} ngan xil xa Hi tehosei xil, xil di labit bos makoe nae minuk.

^{††}1:13 Tumahin ak be sias te hal Serusalem, rute xa Sion be elda en.

^q1:6 Sion 14:15,23,24; 1Sion 5:3 ^r1:7 Mat 7:15; 1Sion 2:18; 4:1,3

^s1:9 1Sion 2:23; 4:15 ^t1:10 Rom 16:17; Efes 5:11; 2Tes 3:6

^u1:12 3Sion 1:13; Nam 12:8; 3Sion 1:14

Sepinien xa diamu te

3 Sion

?Visi iaxa tetis uvei ak?

Eloheoh Sion Sepeti tetis uvei ak sangas ni melele xa tetis 2 Sion e hurang 90 AD (hurang xil tetutou ni poten na Iesu).

?Visi iaxa tevuli uvei ak tetiamu?

Sion tetis uvei ak mi Nggeas xa tehe moletin hos tei na Hi e sias tei e tan xa mahulong te hal Esia. E uvei ak, Sion di misepin usil moletin tol: Nggeas, Diotrefes, e Demitrias.

?Sion tetis uvei ak veneh?

Sion ien tehei tangan vapet rat Nggeas xal Demitrias - Sion telonge xa Nggeas tehur pilei Kristin tei, tave ti neta xa tehur longpangasien ven. Tesak ni, Sion temesi ve sexien hos xil xa tepisen ni.^v

Sion ien tehei tangan vassel xat vat tei xa di po xi ni nenemien nan - Sion tesel xat moletin xil tangan linahusil ti mun Diotrefes, vat tei te sias ak, vengang xa di tesin rae na Sion e di teipo xi ni nenemien nan.^w

Nenemien tei xa eilep te uvei ak de 3 Sion 1:11

Tuxoli, onahusil ti neta xa misa. E uhusil kes ni neta xa bos. Ngang xil xa sexien nae bos, xil labe na Hi. E ngang xil xa sexien nae misa, xil di lapisen ni xa latakil ti Hi vari.

?Naha iaxa di e uvei ak?

1. Sion tepet rat moletin tei xa tehur nenemien te tutouen. (1:1-8)

2. Sion tesel xat moletin tei xa di po xi ni nenemien nan. (1:9-15)

Sepkilaen na Sion usil uvei ak

1 Inou, xa lakes nou ni Elda, iaxa di nadis uvei ak. ^x

Di nadisi ba mi Nggeas, tua hos navan e reitinen xa eheien navan di en.

²Tuxoli, natelongeong ni xa neketen nam di meul bos, e di nasis mi Hi tangan tenbom e holesok sav xil mun te meulien nam ihos. ³Namaal pupu melele xa rut Kristin xil latemei visal nou e latesep usil kakaoen nam minou. Latehit rati xa tetep iaxa di onggusil pispisien te reitinen e meulien nam. ^{y4}Neta tovuol vasak ni nou namaal mak mu vali melele xa natelongeong ni xa horamue navan xil e neketen di langgusil suse te reitinen e meulien nae.

Sion memes Nggeas ve tutouen xa tesa ni mi mosav xil

⁵Tuxoli, namesuk ve polien hos xa di opol ni mi tua nar xil xa di langgusil suse nae tangan lava lavithiten longgeongen hos usil Iesu mi moletin xil. Tave ti neta xa otakil ti xil, e di omaen xil tangan lati vuteili visaluk. ⁶Eheien xa di opisen ni mi xil, rute xil latesep usili mi Kristin xil inggak. Ihos pupu xosxa xoux utit ni ngang taxa ti ututou ni xil e uling rilomun ni xil e suse nae ixo sexien xa isak ni Hi ilonge ihos ven. ^{z7}Ihos tangan utit ni ngang taxa ututou ni xil vengang xil di lakakao ve polien na Iesu Kristo e latahur tutouen ti vaxo ngang xil xa latakil reitin ti e Hi. ^{a8}Mak, ma bos pupu xa xir

^v1:0 3Sion 1:1-8; 3Sion 1:12 ^w1:0 3Sion 1:9-11 ^x1:1 2Sion 1:1

^y1:3 2Sion 1:4 ^z1:6 Taet 3:13 ^a1:7 1Kor 9:12,15

Kristin xil ti ritutou ni hisit moletin xil xa lamak. Isak ni, ripol vituei e polien nae ve reitinen.

Selxatien usil Diotrefes e Demitrias

⁹Tetiamu, natetis uvei tei tehat mi moletin xil te sias nam. E Diotrefes, xa ien bei vapo rat xi mei vahe vat te sias, xi tesin rae navan. ¹⁰Misak ni, melele xa nihit, nihit rat holesok xil vus xa xi di pol ni tangan valuvos moletin xil vahit xamem di mapol ni sexien xil xa tamal ti, e ngan ak tave reitin ti. E del xat rin ak, xi tahur pilei Kristin xil ti xa di lapol ni polien na Suv. Di, xi di misikoe xol ngan xil te sias mun xa iexil bei tangan lavur pilei xil. !E di misil rerat xil mun ra sias vari!

¹¹Tuxoli, onahusil ti neta xa misa. E uhusil kes ni neta xa bos. Ngan xil xa sexien nae bos, xil labe na Hi. E ngan xil

xa sexien nae misa, xil di lapien ni xa latakil ti Hi vari. ^b

¹²E rin na Demitrias xa di nasila bat mi xouk, ihos xa uhur pilei. Moletin xil vus lapet rat hisen e meulien nan nggusil reitinen e di pisen ni xa xi be moletin hos tei. E xamem mun mabiteni xa xi be moletin hos tei e xouk okila xa naha xa di mabit rati be reitin. ^c

Sepinien kor

¹³Holesok xil holu di xa nakila namiteni minuk, e ieok ti tavei tangan natisi vahe uvei tei. ^{d14}Ieok bei mak mu tangan nihit nisao ni xouk nave nousav ti tangan ralipus ralu e ti ralisepin vituei. ^e

¹⁵Nasis tangan tomat na Hi iti minuk. Tua nam xil inggak di labit bos makoe nae bat minuk. Uhit bos makoe namem iha mi tua nar xil kekes xa ladi inggaxai.

^b1:11 1Sion 2:29; 3:6,10 ^c1:12 Sion 19:35; 21:24 ^{d1}1:13 2Sion 1:12

^e1:14 Nam 12:8; 2Sion 1:12

Sepinien xa diamu te

Siud

?Visi iaxa tetis uvei ak?

Moletin xa tetis sepinien xil ak, hisen Siud. Xi tehiteni xa tehe moletin te polien na Iesu Kristo e tuneli tehe Temis.^f

?Visi iaxa tevuli uvei ak tetiamu?

Siud tetis sepinien ak teha mi Kristin xil e rute xil vus^g sangas ni haram 65 AD (haram xil xa tetutou ni poten na Iesu).

?Veneh vari Siud tetis uvei ak?

Siud tesel xat Kristin xil tangan linahusil ti mu ngan xil xa meulien nae tesa - Rut titsa xil labiteni labit Kristin xil lakila lapol ni tesaen vengas xa eheien na Hi mahulong,^h

Siud tesel xat Kristin xil tangan lihusil kes ni pispisien xil xa be reitin - Siud misel xat Kristin xil tangan lisoh ixeih e neketen nae xa Iesu e eloheoh nan xil latelingi ngamu tete meulien na moletin xil na Hi.ⁱ

Nenemien tei xa eilep te uvei ak de Siud 1:3

Timue hos navan xil, melele xa di nabue xat nou tangan nitis ihat mi xamim usil meulien hu xa rangguri nggo neketen nar, nanem usil holesok xil xa tellep mak mu mili ngan ak tangan nisep usili mi xamim. Bos mak mu tangan nisel xat xamim tangan mutit ni ngan taxa ti musikoe xol neketen xa mute-

huri, neketen taxa Iesu e eloheoh nan xil latelingi ngamu tete moletin xil na Hi e latenesi xa xil ti lilaxat kuhi.

?Naha iaxa di e sepinien ak?

1. Selxatien ba mi Kristin xil tangan lixouxu kuhi tangan titsa te luvosen xil linaluvos xil ti. (1:1-16)

2. Selxatien ba mi Kristin xil tangan likil kuh pispisien xil te reitinen tangan neketen nae mei imatu kuhi mu. (1:17-23)

3. Sepinien kor. (1:24-25)

Sepkilaen na Siud usil uvei ak

1 Inou, Siud, iaxa di nadis uvei ak. Nabe moletin te polien na Iesu Kristo e Temis be tua navan xati.

Di nadis bat mi xamim xa Hi Tata tekes xamim mube nan, xa eheien nan di e xamim. E xi di misikoe xol xamim tangan mukila muhe na Iesu Kristo kestang.

²Nasis Hi tangan esaeen, tomat, e eheien nan mei ipolu mak mu e meulien namim. ^j

Selxatien usil titsa te luvosen xil

³Timue hos navan xil, melele xa di nabue xat nou tangan nitis ihat mi xamim usil meulien hu xa rangguri nggo neketen nar, nanem usil holesok xil xa tellep mak mu mili ngan ak tangan nisep usili mi xamim. Bos mak mu tangan nisel xat xamim tangan mutit ni ngan taxa ti musikoe xol neketen xa mutehuri, neketen taxa Iesu e eloheoh nan xil latelingi ngamu tete moletin xil na Hi e latenesi xa xil ti lilaxat kuhi. ^{k4}Nabiteni mak vengas xa natehur longongen tei xa rut moletin xil xa latamerere ni Hi ti mei latemos xuxus tetel xamim. Xil late-

^f1:0 Siud 1:1; Mat 13:55; Mak 6:3; Sion 7:3-10; Pol 1:14; 1Kor 9:5; Kal 1:19

^g1:0 Siud 1:1 ^h1:0 Siud 1:4,8; Siud 1:5-13 ⁱ1:0 Siud 1:3; Siud 1:21

^j1:2 2Pit 1:2 ^k1:3 1Tim 1:18

hiles eheien hos na Hi mei tehe suse tei tangan lipol isa ixo en. Xil di lapispisi mi moletin xil xa lakila lapol ni tesaen xil vus vengan xa labit Hi nasa ti vari pangasien mi xil vengan xa eheien nan eilep mak mu mili tesaen nae xil. Mak, ma ngan xil ak di lasin Iesu Kristo xa xi kestang be Vat e Suv nar. Ve naha xa xil di lapol ni, Hi ilepis rin nae e isa pangasien mi xil ixoni ngan xa latetis usili tetiamu nousav e Vanuvei Eo tangan xi ipol ni mi xil.¹

⁵Tave ti neta xa mukil tumulen xil ak ngamu, ieok bei tangan namiteni vatei mun mi xamim tangan munem kila xa Hi di misa pangasien mi ngan xil xa lapol misa. Tetiamu, Hi teteh meulien na mol-Isrel xil tangan lave reling kantri te hal *Isip*. Ma di, melele xa rute ngan xil latepisen ni xa latnake reitin ti en, xi telepisi rin nae e tehu lelen xil.^{m6} Unem xat naha mun xa testal mi *masxaxa* xil xa latnari ti e von relaxatien xa Hi teling xil tangan lati en, e latestokovein vonexil xati. Misak ni, Hi telepisi rin na *masxaxa* xil ak, tevar xat xil ni sen te xeih, e teso xil latehe ut te maluxoluku. Reitin, Hi teling xil liti e rute ak iha vuma ... ituxoh Melengien te Lepisien.^{m7} Unemi mun usil naha xa testal mi moletin xil te hal *Sodom*, *Komorah* e metimal xil xa lateti sangas visal xalu. Vehakut, xil di latepol tesa tetel atou xil e tiramue xil mun. Misak ni Hi telepisi rin nae, e pangasien xa tesa ni mi xil mei tepisen ni mi moletin sav xil xa pangasien te upang xa misakras vavus di datil ngan xil vus xa di langgusil hisit sexien nae xil.^o

⁸E titsa te luvosen xil ak xa mei di lamosos del xamim, xil di langgusil hisit

sexien na moletin tesa xil ak tetiamu. Xil labiteni labit di langgur metuveen xil xa di maen ni xil tangan lapol vasa vatel mosav xil ni tenbexil. Xil di lasin rae eilep nae xil e di lasepin misa usil *masxaxa* xil te ut nesao.^{p9} Reitin, tave ti neta xa Maekel be vatixar na *masxaxa* xil, xi tanem ti vahit xi pipin tangan vasepin vasa vaha xat *masxaxa* sav tei. Vengan melele xa Maekel di tesep tetavoe tetel *Temat* xa visi xalu ihur tiei na *Mosis*,^{**} Maekel tenanem ti tenavit xi pipin tangan vasepin vasa vaha xat *Temat*. Ma tehiteni temak tehit, “!Hi Suv isepin iha xat rin nam!”^{q10} E titsa xil ak di lasepin misa usil holesok xil vus xa latakil kuh ti. E di lapol ni sexien holu xa misa xa tenbexil tang di ien bei tangan lapol ni nggoni ngan xa labe vongoro xil xa nenemien nae tovuol. E nggo hisit sexien ak vari iaxa di lapurun xil mun tang.^{r11} !Aue li! !Hi ilepis rin nae e isa pangasien xa ihe eilep pupu mi xil! Isa ni mi xil vengan xa di langgusil suse xa misa pupu nggoni ngan xa *Ken* tetiamu tehusili xa tehas vin tuneli vengan xa tekete tesa ni.^s E nggoni ngan xa testal mi Korah e moletin nan xil, Hi ihu lelen titsa xil ak.

¹²Melele xa moletin xil te sias lamei vituei tangan lavanien, titsa te luvosen xil ak mun lamei. Lamei e di lasak pisi tangan lalihi nenemien na mosav xil mun lapol vasa vatel xil. Xil langgoni mae te tas xa di minggus de pe tas tangan vasak ni tuturil tei mei vamahoe len. E tave ti neta xa di labit rati xa di labangan moletin xil ni anien te neketen nggoni moletin xil xa di lalaxat sipsip xil, di labangan kuh tase ni xil mun tang ni

^{**}1:9 Ngan ak texo tumulen tetiamu na Siu xil xa lakesi ni ‘Assumption of Mosis.’

¹1:4 Kal 2:4; 2Pit 2:1 ^m1:5 2Pit 1:12; Eks 12:51; Nam 14:29-30,35; 1Kor 10:5

ⁿ1:6 2Pit 2:4,9 ^o1:7 Sen 19:4-25; 2Pit 2:6,10 ^p1:8 2Pit 2:10

^q1:9 Dan 10:13,21; 12:1; Rev 12:7; 2Pit 2:11; Sak 3:2 ^r1:10 2Pit 2:12

^s1:11 Sen 4:3-8; 1Sion 3:12; Nam 22:7; 31:16; Rev 2:14; Nam 16:19-35

anien amim e unounen nae tovuol vari. Xil di labit xati xa pispisien nae xil lisa tuxolxatien mi moletin xil, e tave reitin ti. Xil langgoni momah votei xil xa votiang di bui xil xa di ranemi rabit lisa us, e latasa ti vari. Reitin, langgoni vatiei tei xa ranemi rabit itaxao ni huite, e, e melele xati teni, huite tovuol en vari. E pe met Hi, xil amat ngamu, e ikin maten mi xil ixoni ngan xa di laput rerat vatiei xil xa di lataso ti huite, e mei amat vari. ^{†13}Nenemien nae tara kat ti nggoni tahe xil xa di lamavul xat xil mun tang. E nggoni xoxohin te tas xa di mistal nggo tahe xil ak, moletin xil di lapus kil sexien tesa nae xil. Rasakras raling nenesien nar vate xil tangan latel xir e suse xa momal vengan langgoni hitu xil xa di lastal tavehi ti. Di, lakesae mun labe rute xa Hi tepol ni ve xil xa maluxoluk xa maluxoluk pupu. ^u

¹⁴Inok xa temeul tetiamu nousav tehe muimol lu e he sav (7) xa tetutou ni **Adam** vari. ^v ¹⁵Di bemei tangan valepis rin na moletin xil e vasa pangasien mi xil ve sexien nae xil xa mikavui xa latepol ni teha xat Hi, e ve sepinien tesa nae xil vus xa latehiteni teha xat rin nan. ^{†¶}

¹⁶Titsa te luvosen xil ak, vehakut di laseputut xat rin na mosav xil e di lapisan tesaen nae xil. E be titsa xil ak vari iaxa lapol ni sexien tesa xil xa tenbexil tang di ien bei. E neta sav xa mak, di lasep koai e di lasa sepinien xa mikas tangan lakila laleh holesok xil ra mosav xil vaxo en.

Selxatien tangan Kristin xil lisoh ixeih

¹⁷E mi xamim xa eheien navan di e xamim, bos xa munem xat naha xa **elo-**

heoh xil na Iesu Kristo, Suv nar, latehiteni mi xamim latehit imei istal. ^{w18}Xil latehit, “E Melengien Kor xil, moletin xil mei listal xa ti liseputut iha xat holesok xil xa bos e ti lihusil xat sexien tesa xil tang.” ^{x19}Hisit moletin xil ak di lasak ni xamim di muletasil. Di langgusil sexien xil te ut etan tang, e **Ninin Eo** tovuol e xil. ²⁰E xamim xa eheien navan di e xamim, mupol ni sexien xil xa lisak ni neketen eo namim imeul ihe eilep mak mu. E musis itel tutouen na **Ninin Eo**. ^{y21}E bos xa ti mupisen ni xa meulien namim di polu ni eheien na Hi, e melele xa xamim di mudatil melengien xa Suv Iesu Kristo imei rilomun en e isa meulien sal mi xamim ve esaeen nan.

²²Mi ngan xil xa neketen nae e Hi tara kat ti mu, bos xa mututou ni xil ixo sexien te esaeen. ²³Mi ngan xil xa sangas ti lavut lave Upang, muleh rat xil lihe relingi. E mi ngan xil xa di lamosos del titsa te luvosen xil, iemim isae e xil e muxouxou kuhi xa linalihi nenenien namim ti. Iemim iat sexien nae xil xa pupuru tang, e musin ni vari. ^z

Memesien xa ba mi Hi

²⁴Hi kestang pipin tangan mumesi. Vengan xi kestang mikila vahur xat xamim tangan munamot ti e neketen namim. Xi kestang mikila vasak ni meulien namim vamese tevi e mei musoh pe meten itel sien melele xa mupus minehinen te xeihen nan. ^{a25}O reitin, Hi kestang be Hi reitin xa miteh meulien e xir nggo holesok xil xa Iesu Kristo, Suv nar, tepol ni. Munem kil minehinen te xeihen na Hi, hisen xa eilep xa ngguri, e lelaxatien nan xa mahulong. Tehur

[¶]**1:15** Sepinien ak texo tumulen tei na Siu xil xa latekesi ni Inok 1:9.

[†]**1:12** 2Pit 2:13; Esek 34:8; Efes 4:14 ^u**1:13** Aes 57:20; 2Pit 2:17

^v**1:14** Sen 5:1-21; Dut 33:2; Sak 14:5; Mat 25:31 ^w**1:17** 2Pit 3:2

^x**1:18** 2Pit 3:3 ^y**1:20** Kol 2:7; 1Tes 5:11 ^z**1:23** Amos 4:11; Sak 3:2

^a**1:24** Plp 1:10; 1Tes 5:23

lelaxatien nan tetiamu nousav tamu mei
duxoh xosali, e ihuri e melengien xil xa ti
imei, vehakut xa vehakut tang. Reitin.^b

^b1:25 Rom 16:27

Sepinien xa diamu te

Revelesen

?Visi iaxa tetis uvei ak?

Moletin xa tetis uvei ak, hisen tehe Sion^c xa tehe eloheoh tei na Iesu Kristo. Xi tehe Sion Sepeti xa tetis “Longeongen hos usil Iesu Kristo xa Sion tetisi,” tetel 1, 2, e 3 Sion mun. E melele nen ak, sangas ni haram 95 AD (haram xil xa tetutou ni poten na Iesu), kavmen te hal Rom teling Sion tete aelan tei xa hokorong xa latekesi ni Patmos. E latehiteni mini xa lihas vini xosxa isak pisi tangan ilesae reling aelan ak.

?Visi iaxa tevuli uvei ak tetiamu?

Sion tetis uvei ak teha mi Kristin xil te sias lu e he sav (7) xa mahulong te provins te hal Esia (xa lakesi ni Turkey xosali), e teha mi Kristin sav xil mun te rute xil vus. Texoni Sion, Kristin xil di latehisu ni melele te xeih xil e rute xil vus xa suv toto tol (3) te hal Rom di latte-laxati: Nero (54-68 AD), Vespasian (69-79 AD), e Domisian (81-96 AD). Misak ni, Iesu tesa metuveen xil mi Sion tangan vahit mesen ni mi Kristin xil xa melele te xeih savsav xil ti imei, tangan vapet rat nenemien nae xa Iesu Kristo ileli Temat e holesok xil xa misa te ut etan, ma ti lisoh ixeh e vaeen te neketen xa lateti en.

?Sion tetis uvei ak veneh?

Iesu Kristo tesemae ni Sion tangan vatis uvei ak ha vatutou ni neketen na moletin nan xil - Iesu Kristo testal mi Sion texo metuveen xil e tesemae ni tangan vatis xat holesok xil xa tehit lelen ni mini tangan, ti, isa ni iha mi Kristin xil tangan likila.^d

Sion ien tehei tangan vassel xat Kristin xil te tan xa mahulong te hal Esia xa neketen nae itin tang ita e namerir ti - Vengan haram holu mei tetavi, Kristin xil holu neketen nae temerir.^e

Sion ien tehei tangan Kristin xil lakil kuhi xa Hi be eilep mak mu mili holesok xil - Kristin xil holu di latelong pangas xil ve melele te xeih xil xa di latehisu ni texo he kavmen, texo he moletin sav xil, e texo Siu e rut Kristin xil mun.^f

Sion ien tehei tangan Kristin xil likil kuhi xa Iesu imei rilomun e ihas tan ni Temat e holesok xil vus xa lasa - Kristin xil holu di latepusi texoni ngan xa di latetatil mei rilomunen na Iesu haram xil holu ngamu e Kristin xil holu tetel eloheoh xil mun latelel ngamu ve neketen nae.^g

Sion ien tehei tangan vassel xat Kristin xil xa lisoh ixeh e neketen nae tangan linave unoun ti e melele xa Iesu imei rilomun en - Rut Kristin xil latepusi xa holesok xil xa di latehisu ni texehi tova tang.^h

Sion ien tehei tangan vapet rat nene-mien na Kristin xil usil naha xa istal e melele xa Hi ipol pilei ni ut etan e tilang hat, e isak ni xalu mei lalihe neta hu - Rut Kristin xil di lanem holu usil holesok xil te ut etan. Ma Sion tesel xat xil tangan nenemien nae iti e Hi kestang e melele xa ipol pilei ni ut etan itel tilang hat mei lalihe neta hu.ⁱ

^c1:0 Rev 1:1,4,9; 22:8 ^d1:0 Rev 1:11,19; 22:6 ^e1:0 Rev 2:4,14,20; 3:2,15; Rev 2:1-3:22 ^f1:0 Rev 2:7,9-10,13,19,26; 3:5,21; Rev 1:8,17; 4:1-22:21 ^g1:0 Rev 1:9; Rev 1:10-20; 19:11-21 ^h1:0 Rev 6:9-11; Rev 2:7,11,17,26; 3:5,12,21; 7:14; 12:11; 15:2; Rev 3:18; 12:11; 16:15 ⁱ1:0 Rev 21:1-22:5

Nenemien tei xa eilep te uvei ak de Revelesen 1:10-11, 19

E Sande xa be melengien eo na Suv Iesu, Ninin na Hi mei mise xat nou e nalong rae tei nggo petouk xa misel nggeih nggoni amaru tei. Xi biteni minou bit, “Utis rat naha xa ti upusi ihe vanuvei tei, e usa ni iha mi sias xil xa labe lu e he sav (7) te taon xil ak: Efeses, Samerna, Pegamam, Taeatira, Sadis, Piladelvia, e Laodisia ...

“Utis xat *naha xa otepusi ngamu, naha xa di mistal taxeak*, itel *naha xa istal e melengien xil xa ti imei itutou.*”

?Naha iaxa di e sepinien ak?

1. “*Naha xa otepusi ngamu ...*” - Tetep iaxa Iesu Kristo tesepin mi Sion texo metuveen tei. (1:1-20)

2. “*... naha xa di mistal taxeak ...*” - Selxatien xil teha mi sias lu e he sav (7) xa lateti e tan xa mahulong te hal Esia. (2:1-3:22)

3. “*... naha xa istal e melengien xil xa ti imei itutou.*”

a. Holesok xil te ut etan lames Hi. (4:1-11)

b. Iesu pisen ni xa xi nggoni sulut sip-sip te sanien eo xa pipin tangan vavuli sepinien xa Hi di bit lenen ni. (5:1-14)

c. Iesu bul papas siil be tei e he sav (6) xa misak ni longpangasien xil lastal lapangei moletin xil te ut etan. (6:1-7:17)

d. Vatixar lu e he sav (7) na masxaxa xil labui amaru nae xa misak ni longpangasien xil lastal lapangei moletin xil te ut etan. (8:1-16:21)

e. Hi misa pangasien mi ngan xil te hal Babilon. (17:1-19:5)

f. Iesu bemei rilomun tangan vahas tan ni Temat e holesok xil vus xa di langgusili. (19:6-21)

g. Iesu del ngan xil xa langgusili lalaxat ut etan duxoh huram taosen tei. (20:1-6)

h. Hi miso Temat be Von Upang. (20:7-10)

i. Hi dotan e von koten nan e milep rin na moletin xil vus. (20:11-15)

j. Hi misak ni ut etan e tilang hat mei lube neta hu. (21:1-22:5)

4. Sepinien kor. (22:6-21)

Sepkilaen na Sion usil uvei ak

1 Ngan ak be naha xa Hi tesa ni mi Iesu Kristo tangan ipisen ni mi eloheoh nan xil usil naha xa mei istal nave nousav ti. E Iesu Kristo tesil *masxaxa* nan temei minou, eloheoh nan tei, tangan vahit mesen sepinien ak minou. Hisok Sion. ^{j2}E holesok xil ngasen xa natepusi e nateteong ni usil naha xa Hi tehit kila, xa Iesu tehit mesen ni minou be reitin. Ngan ak vari iaxa di nadis usili xiak. ^{k3}E tuxolxatien na Hi iti mi moletin xa ti ivuli uvei ak, e tuxolxatien iti mi ngan xil mun xa lalong kil sepinien te kilakilen ak e lalong xat naha xa di en. Vengan xa melele tangan holesok xil ak mei istal ihe reitin di bemei sangas. ¹

Selxatien xil xa ba mi sias lu e he sav (7) xa ladi e tan xa mahulong te hal Esia

⁴Inou, Sion di nadis sepinien ak bat mi xamim, sias xil xa mube lu e he sav (7) xa mudi e tan xa mahulong te hal Esia. ^{§§m}

Hi xa da taxeak, teta tetiamu, e ita tang e melengien xil xa ti imei. E nasis mini tangan eheien hos e tomat nan iti

§§1:4 Xosali lakes rute ak ni Turkey.

j1:1 Dan 2:28,29,45; Rev 1:19; 22:6 k1:2 Rev 1:9; 6:9 l1:3 Rev 22:7; 22:10

m1:4 Eks 3:14; Rev 1:8; 4:8; 11:17; 16:5; Aes 41:4; Rev 3:1; 4:5; 5:6

mi xamim. E di misa xalu mi xir nggo Ninin lu e he sav (7) nan xa langgoni laet lu e he sav (7) xa ladi pe meten xa di dotan de von xeihen nan. ⁵Eheien hos e tomat ak lunggo Iesu Kristo mun xa rak-ila raling nenesien nar en. Xi bit kil reitinen usil naha xa Hi tepisen ni mini. Xi be muimol na ngan xil xa ti limea rilomun ra maten e be vat na suv xil vus te ut etan. ¹¹

Iesu ien bei xir, e ren xa mileh e maten nan misak ni xir rameluv ra pangasien te *tesaen* nar xil. ⁶Xi pol ni xir mei rabe vanut moletin tei xa Hi be suv toto te meulien nar. Reitin, xi pol ni xir mei rabe vanut *pris* xil xa di rapol mi Hi Tamen. Ve rin ak, di rabithiteni xa Iesu Kristo be eilep pupu e xeihen te lelatiatien nan iti vehakut xa vehakut tang. Reitin. ¹⁰

⁷Muteong kuhi! Xi imei istal ixo momah xil e moletin xil vus lipusi. Reitin, ngan xil mun xa latesal vini tetiamu ti lipusi. Isak ni moletin xil te ut xil vus te ut etan limeun itel ulikanen. Reitin, xi imei istal imak vari. ¹²

⁸Hi Suv te xeihen xa da taxeak, teta tetiamu, e ita e melengien xil xa ti imei, xi di biteni bit, “E holesok xil vus xa di, inou nateta ngamu tetiamu ni xil, e nita mun itutou ni xil.” ¹³

Iesu Kristo bemei visal Sion e pisen holesok xil holu mini

⁹Inou nabe Sion, tua namim ve nenesien nar e Iesu Kristo tei takes. Ng-

goni xamim, inou mun di nanggur long-pangasien te sakpurunien xil del nene-mien xa teviei e melele xa di nadatil melengien xa lelatiatien na Hi mei istal en. Lateso nou nabe nim te xeih e tutut aelan te hal Patmos vengan xa di nabithiten naha xa Hi di pisen ni minou e reitinen usil Iesu Kristo mi moletin xil. ¹⁰E Sande xa be melengien eo na Suv Iesu, *Ninin* na Hi mei mise xat nou e nalong rae tei nggo petouk xa misel nggeih nggoni amaru tei. ¹¹Xi biteni minou bit, “Utis rat naha xa ti upusi ihe vanuvei tei, e usa ni iha mi sias xil xa labe lu e he sav (7) te taon xil ak: Efeses, Samerna, Pegamam, Taeatira, Sadis, Piladelvia, e Laodisia.”

¹²Melele xa nabiles tangan napus ti visi iaxa di misepin minou, napus laet lu e he sav (7) xa lasomal ladi e lapol ni pos nen ni gol. ¹³E hilaep te xil, napus ngan xa nggoni Nat Moletin xa tenben nggoni moletin tei xa nggo ut nesao. ¹⁴Xi mising nggoni suv toto tei ni eising xa teviei xa ba duxoh len etan. E lasoxolen kaliko tei xa kala nen nggoni gol da xol valhasen. ¹⁵Hilin mieh xa mieh e meten minehin pupu nggoni upang. ¹⁶Kaelen minehin nggoni oei te venu[†] e raen mirum nggeih nggoni melele xa tahe xa mahulong mei mavul xat vatihat xil. ¹⁷E hen matu, xi nggur xat hitu lu e he sav (7), e tiei tei xa mikan e rin xalu vus mistal nggo vulon-

^{*}1:13 Nat Moletin be ngan xa Dan 7:13 del Dan 10:5 di misepin usili xa imei e isak ni lelatiatien na Hi mei istal.

[†]1:15 Sepinien xati teni bit, “*bihili nggoni aean brons xa latelingi e upang.*”

¹¹1:5 Rev 3:14; 19:11; Sam 89:27; Kol 1:18; Sam 89:27; Rev 19:16; Sam 130:8; Aes 40:2

¹²1:6 Eks 19:6; Aes 61:6; 1Pit 2:5,9; Rev 5:10; 20:6 ¹³1:7 Dan 7:13; Mat 24:30; Mak 13:26; Luk 21:27; 1Tes 4:17; Sak 12:10; Sion 19:34,37; Sak 12:10,12,14; Mat 24:30 ¹⁴1:8 Rev 21:6; 22:13; Eks 3:14; Rev 1:4; 4:8; 11:17; 16:5,7,14; Aes 41:4;

Amos 3:13; 4:13; Rev 15:3; 19:6,15; 21:22 ¹⁵1:13 Dan 7:13; 10:5; Esek 9:2,11

¹⁶1:14 Dan 10:6; Rev 2:18; 19:12; Dut 7:9 ¹⁷1:15 Esek 1:24; 43:2; Rev 14:2; 19:6

gen. E valnaon minehin nggoni eai xa di minggan e piniae. ^u

¹⁷ Melele xa napusi, namot nabe tan visal len e nasakras napol ni ti neta nggoni ngan xa namat. Di, xi miling hen matu e nou e biteni bit, “!Ulum nakan ti! Inou nateta tetiamu ni holesok xil vus xa ladi, e inou nihe hoxalite teni mun. ^{v18} Inou nabe ngan xa nameul. Tave ti neta xa natemat, taxeak opusi xa di nameul tang nada, e nitat imak vehakut xa vehakut tang. De heok, naleh xat ki xil te maten e Hedis, rute xa nini moletin xil xa lalel laba ladi en. [‡] ¹⁹ Utis xat naha xa otepusi ngamu, naha xa di mistal taxeak, itel naha xa istal e melengien xil xa ti imei itutou. ^{w20} Koute te nenemien xuxus usil hitu lu e he sav (7) xa di opusi ladi e heok matu be vole usil sias lu e he sav (7) te hal Esia. E laet lu e he sav (7) xil ak xa labe gol, xil labe vole usil masxaxa lu e he sav (7) xa di laketeh xol sias xil ak.”^x

Selxatien ba mi sias te hal Efeses

2 Iesu biteni minou bit, “Utis sepinien ak iha mi *masxaxa* xa di miketeh xol sias te hal Efeses uhit: ^y

“Ngan ak be selxatien xa nggo visal ngan xa nggur xat hitu lu e he sav (7) di e hen matu e di mikakao e hilaep te laet lu e he sav (7) xa be gol. ² Di napus

kil polien te xeih namim e napus kila xa midep iaxa di mubisu ni melele te xeih xil del nenemien xa be teviei. Nakila xa di musin ngan xil xa di langgusil tesaen. E di mulepis rin na ngan xil xa labit labe *eloheoh* navan xil, e mupus kila xa labe moletin te luvosen xil tang. ^{z3} Nakila xa di mubisu ni melele te xeih xil del nenemien xa be teviei, e midep iaxa di munggur longpangasien xil holu ve hisok. E neta sav xa mak, di musokil e neketen namim, e vemim tavuol ti.

⁴ “E ngan ak nangguri ba xat rin namim: taxeak, di mustokovein eheien xa mutepisen ni minou e mi moletin sav xil tetiamu. ⁵ Ma ihos xa munem xat sexien te eheien xa di mutepisen ni tetiamu, e mupus kila xa mudi sotin ranou xosali. Muhiles ra sexien tesa namim e mupol ni sexien hos xil ixoni ngan xa mutepol ni tetiamu. Xosxa munapol ni ti, ma nimei visal xamim e nihur rat laet namim ihe reling voninen. ^{a6} E ngan ak napusi xa mupol ni momal: iemim nggat sexien xil na ngan xil xa langgusil pispisien na Nikolai^f nggoni ngan taxa inou mun ieok di nggati. ^b

⁷ “!Xosxa vurangemim di, ma muteong kuhi ni naha xa *Ninin* di biteni ba mi sias xil! E vaeen te neketen, ngan xil xa la-soh nggeih, nimaen xil lia huit vatiei te meulien sal xa di meul e naho na Hi.” ^c

[‡]**1:18** King xil ak be vole tei xa bit Iesu nggur xeihen tangan vasak ni moletin xil lakila lameluv ra xeihen te maten, e Hedis be von maten.

^f**2:6** Nikolai di tepispisi mi moletin xil xa tenbe moletin e ninin xa da en, lusav. Mak, ma bit tesaen xil vus xa moletin di pol ni del tenben misakras vapurun ninin xa da en.

^u**1:16** Rev 1:20; 2:1; Aes 49:2; Rev 2:12,16; 19:15

^v**1:17** Aes 44:6; 48:12; Rev 2:8; 22:13 ^w**1:19** Aes 48:6; Dan 2:28,29,45; Rev 1:1; 22:6 ^x**1:20** Rev 1:16; 2:1; 3:1 ^y**2:1** Rev 1:16,20; 3:1

^z**2:2** Rev 3:1,8,15; 1Sion 4:1 ^a**2:5** Rev 2:16,22; 3:3,19 ^b**2:6** Sam 139:21

^c**2:7** Sen 2:9; 3:22,24; Rev 22:2,14; Sen 2:8; Esek 28:13; 31:8,9

Selxatien ba mi sias te hal Samerna

⁸Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Samerna uhit: ^d

“Ngan ak be selxatien na ngan xa be vatite te holesok xil vus xa ladi, e be hoxalite teni mun; ngan xa temat e temea rilomun ra maten. ⁹Nakila xa di munggur longpangasien xil holu e holesok namim tovuol e ut etan vengan xa di munggusil xat inou. E, e rin te neketen namim, holesok namim be holu. Nakila xa vanut moletin tei xa labit labe **Siu** reitin di laseputut ni xamim. E inou napus xil nggoni ngan xa latave Siu reitin ti. E-e, xil labe vanut moletin tei na **Temat** tang. ^{e10}Ulimim nakan ni longpangasien xil ti xa sangas ti muhisu ni. !Muteong kuhi! Nave nousav ti, **Temat** isak ni rut xamim muhe nim te xeih tangan muvur sakpisien xil, e mulonge isa melengien ihe he xalu (10). E nene-mien namim namot ti. Musoh ixeh venou, tave ti neta xa ti lisak purun xamim ha vuma ... rut xamim lilel. Imak, ma inou nisa huit neketen mi xamim xa be meulien sal. ^f

¹¹“!Xosxa vurangemim di, ma muteong kuhi ni naha xa Ninin di biteni ba mi sias xil! E vaeen te neketen, ngan xil xa lasoh nggeih, xil linamat ti e maten xa be lu nen xa be te nousav.” ^g

Selxatien ba mi sias te hal Pegamam

¹²Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Pegamam uhit: ^h

“Ngan ak be selxatien na ngan xa tiei xa mikan e rin xalu vus nggo vulongen. ¹³Nakil rute xa xamim mudi en, e taon xa Temat di pol pupu e meulien na moletin xil en. Tave ti neta xa mak, e xamim di tamu mube reitin minou e mutastokovein neketen namim ti. Reitin, di musomal nggeih e rute xa Temat nggur xeihen en, e melengien xil mun xa latehas vin Antipas xa tehusil xat inou e vehakut tehitithen longongen hos usil inou mi mosav xil.

¹⁴“E ngan ak nangguri ba xat rin namim: mumaen rut xamim di langgusil xat hisit pispisien xa nggoni pispisien na provet **Balam** tetiamu. Vengan xa xi tepispisi mi suv toto Balak xa tetep iaxa xi tetel mol-Isrel xil ba latemot e tesaen texo sexien xa latea anien xa latesta ni tuei teha mi nanao xil e latepol tesa mi atou xil. ⁱ¹⁵E rut xamim mun di langgusil hisit sexien tesa xil ak melele xa di langgusil pispisien xil na Nikolai^j e pispisien sav xil mun xa langgoni. ¹⁶!Mak iaxa, taxeak, muhiles ra tesaen namim xil! Xosxa munaviles ti ra pispisien xil ak, ma, nave nousav ti, inou nimeⁱ visal xamim e nivae iha xat xamim itel tiei xa mahulong xa di mistal nggo vulongok. ^k

¹⁷“!Xosxa vurangemim di, ma muteong kuhi ni naha xa Ninin di biteni ba mi sias xil! E vaeen te neketen, ngan xil xa lasoh nggeih, nisa ti manna xa di minggus^l mi xil. E nisa hat tei xa mieh mi xil kekes xa ladis hisexil hu di en, hisexil xa moletin sav xil linakil ti.” ^l

§2:17 Siu xil lanemi labit melele xa Hi isak ni relaxatien nan mei istal e ut etan, isa manna xa Mosis teling xuxus ni teti valite tei tangan moletin nan xil lia ni.

^d2:8 Aes 44:6; 48:12; Rev 1:17; 22:13 ^e2:9 Tem 2:5; 2Kor 11:14,15; Rev 3:9

^f2:10 Dan 1:12,14; Tem 1:12 ^g2:11 Rev 20:14; 21:8 ^h2:12 Aes 49:2; Hib 4:12;

Rev 1:16; 2:16; 19:5 ⁱ2:14 Nam 31:16; 25:1-2; Siud 1:11 ^j2:15 Rev 2:6

^k2:16 Rev 3:11; 22:7,12,20; Aes 49:2; Rev 1:16; 2:12; 19:15

^l2:17 Sam 78:24; Aes 62:2; 65:15; Rev 3:12

Selxatien ba mi sias te hal Taeatira

¹⁸Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Taeatira uhit: ^m

“Ngan ak be selxatien mi xamim xa nggo Nat Hi xa meten minehin pupu nggoni upang e kaelen minehin nggoni oei te venu.ⁿ ¹⁹Nakil naha xa xamim di mupol ni. Napus kil eheien namim, neketen namim, polien namim, e midep iaxa di mubisu ni melele te xeih xil del nenemien xa be teviei. E napus kila mun xa, xosali, di mupol holu mak mu mili holesok xil xa mutepol kokot ni e melele xa mutehur kokot ni neketen namim.

²⁰“E ngan ak nangguri di xat rin namim: di mumaen atou xa sexien nan nggoni Sesebel tetiamu tangan mei vamos e xamim. Xi di mikes tasen ni xi bit be **provet** tei na Hi. E pispisien nan di miluvos moletin te polien navan xil xa bos tang tangan ti lipol ni sexien te hoeasoen e ti lia anien xa latesa ni tuei teha mi nanao xil. ^{o21}Inou natesa mesal mini tuei tangan vahiles ra tesaen nan xil, e xi ien ti tenavei tangan vahiles ra sexien te hoeasoen nan. ²²Muxuxou kuhi, venggan xa inou nisa mesien tei xa mahulong mi atou ak xa isak ni ita kat tang e rong man. E xosxa ngan xil xa lapol misa dela linaviles ti ra sexien nae xil, ma xil mun lilonge isa pupu itela. ²³Reitin, inou nihan vin moletin xil xa di langgusili. Isak ni, moletin xil te sias xil vus likila sung

xa inou iaxa nakil naha xa di e nenemien e tin moletin xil vus, e nisak ni moletin xil kekes ti lia huit polien nae. ^p

²⁴“E xamim tesav xil te hal Taeatira, mutnahusil pispisien xil ak ti. Xamim mutesin pispisien ak xa mosav xil lakesi ni ‘kilakilen xil xa tellep na Temat.’ Ma, mi xamim, ninaling rae ti mun xa meas nata xat xamim. ²⁵Muhur xat rae xil kestang xa mutehuri tuei ituxoh melele xa nimei rilomun en. ^q

²⁶“E vaeen te neketen, ngan xil xa lasoh nggeih e tit lipol ni polien navan xil ituxoh melele xa nimei rilomun en, inou nisa xeihen mi xil tangan ti lilaxat kantri xil. ^r

²⁷“Reitin, nisa xeihen te lelxatien mi xil xa ixoni ngan xa Tata navan tesa ni minou, nggoni sepinien xa biteni bit, ‘Lelaxatien nae ixeh mak mu.

Lihu len ngan xil vus xa ti livae itel xil, ixoni ngan xa langgu papas valoei xil xa be kilas mei be saxute xil.’ (Sam 2:9)

²⁸E nisa Melan mun mi xil xa be hitu te makoe. ^{** s29}!Xosxa vurangemim di, ma muteong kuhi ni naha xa Ninin di biteni ba mi sias xil!”

Selxatien ba mi sias te hal Sadis

3 Iesu bit rilomun ni minou bit: “Utis sepinien ak iha mi **masxaxa** xa di miketeh xol sias te hal Sadis uhit: ^t

“Ngan ak be selxatien na ngan xa Ninin lu e he sav (7) na Hi di en xa langgoni laet lu e he sav (7) e xa ng-

****2:28** Hitu xa lakesi ni Melan di pili nggeih e melele xa sangas ut da miluv. Ngan ak be vole tei mi Kristin xil xa lisoh ixeh e maluxολουken te melele te xeih xil venggan xa laet te mei rilomunen na Iesu Kristo di bemei sangas.

m2:18 Dan 10:6; Rev 1:14-15; 19:12 **n2:18** Rev 1:14-15

o2:20 1King 16:31; 2King 9:22; Nam 25:1-2; Rev 2:14 **p2:23** Sam 7:9; Pro 24:12; Ser 11:20; 17:10; Sam 62:12; Pro 24:12; Ser 17:10; Rom 2:6; 2Tim 4:14; Rev 18:6; 20:12,13 **q2:25** Rev 3:11 **r2:26** Sam 2:8,9; Rev 12:5 **s2:28** Rev 22:16

t3:1 Rev 1:4; 4:5; 5:6; 1:16,20; 2:1; 2:2; 3:8,15

gur xat hitu lu e he sav (7).^{††} Nakil sen holesok xil xa di mupol ni. Tave ti neta xa moletin xil di lanemi labit neketen namim meul nggeih tang da, e inou nakila xa neketen namim mat.² !Mak, ma mutamea musoh! Musak ni neketen xa munggur xati tamu da mei ix-eih pilei mu. Xosxa munapol ni ti namak, ma neketen namim ak imat vuol vari. Di nabiteni mak vengan xa nakameti xa di mupol ni neta tei xa tavos ti pe met Hi. ³ Mak, ma munem xat pispisien xil xa mutelonge e mutehur xati tuei. Muhiles ra tesaen namim xil e mulong xat pispisien xil ak. Xosxa di tamu mupat del neketen namim, ma nimeilomun e melengien tei xa xamim munakil ti ixoni moletin te kanen tei e nilepis rin namim.^u

⁴ “E xamim vahis te hal Sadis di langguxou kuhi tangan meulien nae nave muis ti nggoni ngan xa lasing ni eising xil xa memese tevi. Ngan xil ak kestang lapin pe met Hi tangan lising ni eising xa mieh e likakao itel nou. ^{v5} Ngan xil mun xa lasoh nggeih e vaeen te neketen, xil lising ni eising xa mieh ixoni xil tang. Inou ninasu lenen hisexil ti ra Vanuvei te Meulien. E pe met Tata navan e masxaxa nan xil, inou nihit rati xa xil labe navan.^w

⁶ “!Xosxa vurangemim di, ma muteong kuhi ni naha xa **Ninin** di biteni ba mi sias xil!”

Selxatien ba mi sias te hal Piladelvia

⁷ Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Piladelvia uhit:

“Ngan ak be selxatien na ngan xa be eo e be reitin, ngan xa nggur xat ki te relaxatien na suv toto **Deved** tetiamu. *‘Melele xa xi misah puiteh, moletin tovuol mikila vakoe xole; e melele xa mikoe xole, moletin tovuol mikila vasaha.’* (Aes 22:22)^x

⁸ “Nakil naha xa di mupol ni. Tave ti neta xa mulonge nggoni ngan xa xeihen xa di e xamim hokorong tang, e di munggulil xat kuh pispisien navan xil e mutamuun xole ti xa mube navan. Ma nasah puiteh tei xa mukila mukital muxo en xa moletin tovuol mikila vakoe xole. ^{y9} !Muteong kuhi! Ngan xil xa di langgulil xat sexien matu na **Siu** xil e labit labe Siu reitin, xil dit langgulil xat nenemien na **Temat** e lamei di laluvos moletin xil holu. Inou nisak ni xil mei litingeiril pe metemim tangan lisa merereen nae mi xamim, e likila sung xa eheien navan di e xamim. ^z

¹⁰ “Vengan xa vehakut di mulong xat rae navan xil del nenemien xa teviei e melele xa di mubisu ni melele te xeih xil, inou ti nisikoe xol xamim ra longpangasien xil xa ti imei tangan isak pis moletin xil te ut etan. ^{a11} Nave nousav ti, inou nimeil. Mak iaxa, muhur xat neketen namim ixeh. Imak, ma muna-maen moletin ti namei tangan nakan ni

^{††}**3:1** Rev 1:20 di biteni xa hitu lu e he sav (7) be vole tei usil masxaxa lu e he sav (7).

^u**3:3** Rev 2:5,16,22; 3:19; Mat 24:43-44; Luk 12:39-40; 1Tes 5:2,4; 2Pit 3:10; Rev 16:15 ^v**3:4** Siud 1:23 ^w**3:5** Rev 3:18; 4:4; 6:11; 7:9,13; 19:14; Eks 32:32,33; Sam 69:28; Rev 17:8; 20:15; Eks 32:32,33; Sam 69:28; Dan 12:1; Plp 4:3; Rev 13:8; 17:8; 20:12,15; 21:27; Mat 10:32; Luk 12:8

^x**3:7** Siob 12:14 ^y**3:8** Rev 2:2; 3:1,15; 1Kor 16:9 ^z**3:9** 2Kor 11:14,15; Rev 2:9; Aes 45:14; 49:23; 60:14; 43:4 ^a**3:10** Luk 21:19; 2Tim 2:12; Hib 10:36

huit neketen hos ak ra xamim.^{‡‡ b12} Ngan xil xa lasoh nggeih e neketen nae, nisak ni xil mei lihe seteman te **Nim Eo** na Hi navan, e liti en vehakut. Nitis xat his Hi iti e xil itel his taon nan xa be **Serusalem** Hu xa ixo ut nesao imei e tan. E nitis xat his hu navan mun iti e xil. ^c

¹³“!Xosxa vurangemim di, ma muteong kuhi ni naha xa Ninin di biteni ba mi sias xil!”

Selxatien ba mi sias te hal Laodisia

¹⁴ Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Laodisia uhit: ^d

“Ngan ak be selxatien na ngan xa be Reitinen, e holesok xil xa di biteni be reitin e moletin xil lakila lake reitin en. Xi be vatite te holesok xil vus xa Hi tepeas ni. ¹⁵ Nakil naha xa di mupol ni. Napus kila xa mutamerir ti e mutatin ti e neketen namim. !leok bei mak mu vahit muve tei e xalu! ^{e16} E vengan xa mumak tang, mutamerir ti e mutatin ti, inou nikusah rat xamim ra vulongok.

¹⁷ Xamim mubit, ‘Holesok namem holu e madi e hosien, matave tamure ni ti neta.’ !E mutakil ti xa xamim mupin tang tenggan moletin sav tei vapus male ni xamim e ien vasae e xamim tang! Pe met Hi mube hoeo, muka hon, e metemim bar.

^{f18} Mak, ma nasel xat xamim tangan mei muxal gol, eising xa mieh, e meresin te metemim ra nou. Gol xa muxale ra nou memese, isak ni xamim mupolu ni holesok xil te ut nesao. Eising xa mieh te momalen be tangan musing xol tenbemim

ni tangan munave unoun ti mun venggan di muka hon. E meresin te metemim, mulingi ite metemim te neketen tangan mukila muketeh kuhi. ^g

¹⁹ “Ngan xil xa eheien navan di e xil, di namal ni xil e nameas pangas xil. Misak ni, mupol ni nenemien namim ix-eih tangan muhiles ra tesaen namim xil. ^{h20} !Muteong kuhi! Inou nadatil xamim kekes nggoni ngan xa di nasoh e puiteh e di nakes xamim. Xosxa mulong raek e musah puiteh te meulien namim minou, ma nimei nim e nianien itel xamim, e xamim mun muanien itel inou. ⁱ²¹ E vaeen te neketen, ngan xil xa lasoh nggeih, nimaen xil litotan e von xeihen navan itel inou ixoni ngan taxa inou mun nasoh nggeih e vaeen te neketen, e xosali, di nadotan nade ri matu te von xeihen na Tata navan.

²² “!Xosxa vurangemim di, ma muteong kuhi ni naha xa Ninin di biteni ba mi sias xil!”

Holesok xil te ut nesao lasa memesien ba mi Hi

4 Melele xa nanggur sepinien ak bus, napus kil neta teimun nggo metuveen. Napus puiteh tei e ut nesao xa misaha. E rae xa nateong ni diamu xa misel nggeih nggoni amaru, xi biteni minou bit, “Amei nesao xalei tangan nipisen ni minuk naha xa istal e melengien xil xa ti imei.” ^{j2} Vatakes, **Ninin** na Hi mise xat nou e napus ngan xa di dotan de von xeihen te ut nesao. ^{k3} Tenben minehin holu nggoni hat hos xil xa laminehin melele

^{‡‡}**3:11** Rev 2:10 bit huite neketen nar be meulien sal.

^b**3:11** Rev 2:16; 22:7,12,20

^c**3:12** Rev 14:1; 22:4; Esek 48:35; Rev 21:2; Aes 62:2; 65:15

^d**3:14** Rev 1:5; 19:11; Pro 8:22; Sion 1:3; Kol 1:15 ^e**3:15** Rev 2:2; 3:1,8

^f**3:17** Hos 12:8 ^g**3:18** Rev 3:5; 4:4; 6:11; 7:9,13; 19:14; 16:15 ^h**3:19** Pro 3:12;

1Kor 11:32; Hib 12:6; Rev 2:5,16,22; 3:3 ⁱ**3:20** Sion 14:23 ^j**4:1** Eks 19:20,24;

Dan 2:28,29,45; Rev 1:1,19 ^k**4:2** 1King 22:19; 2Kron 18:18; Sam 47:8; Aes 6:1;

Esek 1:26-27; Rev 4:9; 5:1,7,13; 6:16; 7:10,15; 19:4; 21:5

xa laet pili di en xa kala nen nggoni hat xalu xa lakes xalu ni sasma e kanilian. E mikapis xol von xeihen nan, napus hinehin tei xa minehin nggoni hat hos xa lakesi ni emeral. ¹⁴E mikapis xol von xeihen nen ak, napus von totanen sav xil mun xa labe hanutap tei e hat mun (24). E elda hanutap tei e hat mun (24) di ladotan en xa lasing ni eising xa mieh e vat luvoluv tei relaxatien xa lapol ni ni gol di vatixil. ^{m5}E nggo von xeihen xa eilep, an di milangas e veta di mirum. Pe met ngan xa dotan en, laet lu e he sav (7) na Hi di pili de pos nen xil. Laet xil ak labe Ninin lu e he sav (7) na Hi. ^{n6 o}

Di, napus neta hat (4) xa lameul ladi e rin hat (4) te von xeihen ak, e metexil ladi xorelis rute xil vus te tenbexil. ⁷Ngan xa diamu ni xil, napusi nggoni laeon. Ngan xa be lu e xil, napusi nggoni bul. Ngan xa be tol e xil, napus valnaon nggoni valnao moletin. E ngan xa be hat e xil, napusi nggoni vevaxum xa di mingga. ⁸E xil kekes, aveouxil tei e he sav (6) di en, e metexil ladi xorelis rute xil vus te tenbexil. ^pE vongien e melengien xil vus, latangel ni ti sisen ak xa bit, “Eo, eo, eo, be Hi Suv te Xeihen. ^qTeta tetiamu, da xosali, e ita e melengien xil xa ti imei.”^r

⁹Neta hat (4) xa xiak xa lameul di lapet rat his ngan xa dotan de von xeihen nan e di lasa merereen e memesien nae mini, mi xi xa da xa da, e nakesae ti vatova. E melele xa lapol ni mak, ^{s10}elda xil xa labe hanutap tei e hat mun (24) lamot labe tan mi ngan xa dotan de von xeihen xa eilep, ngan xa da vehakut tang. Pe meten, laleh rerat vat luvoluv tei relaxatien nae xil, e lasa ni mini tengen lapien merereen nae mini. E melele xa di lapol ni, labiteni labit, ¹¹“!O Hi, xouk obe Suv namem!

Opin tengen ti masa merereen minuk, e mapus kil minehinen te xeihen nam xa be mahulong pupu, vengang otepeas vuol ni holesok xil vus. Reitin, nggusil nenemien nam, otesak ni holesok xil vus mei lastal e lameul ladi.”

Lalang ni tova xa pipin tengen ti ivuli sepinien usil holesok xil xa ti imei

5 Melele xa napus holesok xil ak bus, napus ngan xa dotan de von xeihen nen di nggur xat uvei tei de hen metu xa sepinien di rin xalu vus. Labulun xati e labil xati ni siil lu e he sav (7).^{q1 t2}Di, napus vat tei na *maxaxa* xil xa miki tei na nesao del rae tei xa nggeih bit, “?!Visi tova iaxa pipin tengen vavul papas siil xil ak e vavuli sepinien xa de uvei teni!?”

^{q1}**5:1** Tetiamu, melele xa eilep tei tetis uvei tei, xi tevil xat uvei ak ni wax te kandel xa mei be siil nan melele xa xi tetaxat xati ni ring xa hisen da en. Mak, ma moletin xa ihur uvei ak ipus kil his moletin xa tesa ni mini e ipus kila mun xos mosav tei tetal pasi.

^{14:3} Esek 1:26-28

^{m4:4} Aes 24:23; Rev 3:5,18; 6:11; 7:9,13; 19:14 ^{n4:5} Eks 19:16; Esek 1:13; Rev 8:5; 11:19; 16:18; Esek 1:13; Sak 4:2; Rev 1:4; 5:6 ^{o4:6} Esek 1:5-10; 10:14; Esek 1:22 ^{p4:8} Aes 6:2; Esek 1:18; 10:12 ^{q4:8} Aes 6:3; Amos 3:13; 4:13; Rev 1:8; 11:17; 15:3; 16:7,14; 19:6,15; 21:22 ^{r4:8} Aes 41:4; Eks 3:14; Rev 1:4,8; 16:5
^{s4:9} 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2; 5:1,7,13; 6:16; 7:10,15; 19:4; 21:5; Dan 4:34; 6:27; 12:7
^{t5:1} 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:7,13; 6:16; 7:10,15; 19:4; 21:5; Aes 29:11; Esek 2:9-10

³E latakamet ti moletin tova e ut nesao mu e ut etan mu pe huitan xa vavin tenggan vavul papas siil xil e vavuli sepinien xa de uvei ak. ⁴Misak ni, namuis nggeih venggan xa lasakras lakamet moletin tova xa vavin tenggan valang rat uvei e vavuli sepinien xa da en.

⁵Di, tei e elda xil bemei e biteni minou bit, "Onamuis ti. Pusi ti mu. Ngan xa lakesi ni laeon te vatimol na Sudah di bemei. Xi be havneli tei na suv toto **Deved** e momal tenggan vahur lelatatien nan. E, e vaen te neketen, xi tehu len xeihen na Temat tuei. Xi kestang pipin tenggan vavul papas siil xil, valang rat uvei ak, e vavuli sepinien xa di en." ^u

⁶Di, napas ngan xa temaen xoteh meulien nan texoni sulut sipsip te sanien eo tei. Xi misomal dat sangas ni von xeihen, e hilaep te elda xil e neta hat (4) xa lameul ladi. Napusi nggoni mun xa latehu vini ngamu, di, mea rilomun e meul tang da. Hon te xeihen nan be lu e he sav (7) e meten mun be lu e he sav (7). Meten lu e he sav xa xiak labe Ninin lu e he sav (7) na Hi xa misil xil ba lakapis xol rute xil vus te ut etan. ^{v7}Ngan xa nggoni sulut sipsip ba be visal ngan xa dotan de von xeihen e nggur uvei ak ra hen matu. ^{w8}E melele xa ngguri, neta hat (4) xa lameul ladi del elda hanutap tei e hat mun (24) lamot labe tan mini. Xil kekes langgur xat harp tenggan lipilei ni sisien xil mi Hi, e pesin hos tei xa lapol ni ni gol. E pesin xil ak, di ladin vokon hos xil en xa be sisen xil na moletin xil na

Hi. ^{x9}E melele xa lapol ni mak, di lakikei ni sisien hu tei labit, ^y

"Xouk opin tenggan ovur uvei ak, e ovul papas siil xil teni.

Opin venggan xa latehu vinuk, e rem texal rat moletin xil mei labe na Hi.

Reitin, otexal rat moletin xil ra vatimol xil ngasen e ra sepinien xil vus, ra kantri xil ngasen e ra tatit moletin savsav xil mun. ^z

¹⁰Otepol ni xil mei labe vanut moletin xil

xa di lamerere ni Hi nggoni suv toto te meulien nae.

Xouk otesak ni xil mei lapol mini nggoni **pris** nan xil

e mei lilaxat ut ngasen e ut etan."

¹¹Melele xa di naketeh mikapis, nalong rae masxaxa xil xa labe holu xa labe holu pupu, moletin misakras vavuli sen xil. Xil lasoh xorelis von xeihen xa mahulong na Hi del neta hat (4) xa lameul e elda xil mun. ^{a12}E masxaxa xil ak lakikei nggeih be nesao labit,

"Di mapet rat his ngan xa latehu vini, ngan xa temat texoni sulut sipsip te sanien eo tei, e di, mea rilomun ra maten.

Xi pipin tenggan ihur xeihen, metisouen, lelatatien, e ipolu ni holesok xil, e tenggan ihur merereen, hosien, e his xa ihe eilep mak mu." ^b

¹³Di, nalong rae holesok xil vus xa lameul ladi di lakikei: ngan xil xa ladi ut nesao e ngan xil xa ladi e ut etan; ngan xil xa ladi pe huitan e ngan xil mun xa

^u5:5 Sen 49:9-10; Aes 11:1,10; Rev 22:16 ^v5:6 Aes 53:7; Sion 1:29,36; Rev 5:12; 13:8; Sak 4:10; Rev 1:4; 4:5 ^w5:7 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,13; 6:16; 7:10,15; 19:4; 21:5 ^x5:8 Sam 141:2; Rev 8:3,4 ^y5:9 Sam 33:3; 40:3; 96:1; 98:1; 144:9; 149:1; Aes 42:10; Rev 14:3 ^z5:9 Eks 19:6; Aes 61:6; 1Pit 2:5,9; Rev 1:6; 20:6; 22:5 ^a5:11 Dan 7:10; Hib 12:22
^b5:12 1Kron 29:11; Aes 53:7; Sion 1:29,36; Rev 5:6; 13:8

ladi e huinep te tas.^c Reitin, nalong xil vus di lakikei labit,

“!Mapet rat ngan xa dotan de von xeihe
xa mahulong

e ngan mun xa nggoni sulut sipsip te sanien eo!

!Xalu vus lupin tangan mamerere ni xalu e masa memesien mi xalu

e minehinen te xeihe nalu iti vehakut xa vehakut tang!”

¹⁴ Melele xa lasopin mak, neta hat (4) xa lameul ladi labit, “!Reitin li!” E elda xil vus lamot labe tan mi xalu e lapet rat hisealu.

**Ngan xa nggoni sulut sipsip
bul papas siil xil xa misak
ni longpangasien xil lastal**

6 Di, napus ngan xa nggoni sulut sipsip bul pas siil tei ra siil lu e he sav (7). Melele xa bul pasi, nalong tei e neta hat (4) xa lameul mikei del rae tei xa nggeih nggoni veta bit, “!Amei!”

² Melele xa naketeh ba, napus hos tei xa mieh. E ngan xa dotan en di nggur xat his te vaeen nan e vat luvoluv te lelatien de vatin. Kei miloh ba tangan vavae vatel ngan xil xa labe elu nan e vahas tan ni xil. ^d

³ Di, ngan xa nggoni sulut sipsip bul pas siil xa be lu e xil. Melele xa bul pasi, nalong ngan xa be lu nen e neta hat (4) xa lameul mikei bit, “!Amei!” ⁴ E napus hos tei mun xa pipili mei mistal. E ngan xa dotan en, lasa xeihe mini tangan vasak ni vaeen xil mei vastal e rute xil vus te ut etan tangan vasak ni moletin xil ha lihas vin xil mun tang. Misak ni, lasa tiei te vaeen mini xa mahulong pupu. ^e

⁵ Di, ngan xa nggoni sulut sipsip bul pas siil xa be tol e xil. Melele xa bul pasi, nalong ngan xa be tol (3) nen e neta hat (4) xa lameul mikei bit, “!Amei!” Melele xa naketeh ba, napus hos teimun xa maluxoluk mei mistal. E ngan xa dotan en di po xat sikel tei de hen. ⁶ Di, rae tei misel e nalonge nggoni ngan xa rae ak nggo hilaep te neta hat (4) xa lameul ladi. Rae ak biteni mi ngan xa de hos bit, “Uha usak ni anien ihe tamure e ut etan xa moletin ipol melengien tevi tei tangan ixal anien ihe hokorong tang. E onapurun urvatie te *olip* mu grep xil ti xa lapol ni oel e uaeen nggo huit xalu.”

⁷ Di, ngan xa nggoni sulut sipsip bul pas siil xa be hat (4) e xil. Melele xa bul pasi, nalong ngan xa be hat nen te neta hat (4) xa lameul ladi mikei bit, “!Amei!” ^{8 g}

⁹ Di, ngan xa nggoni sulut sipsip bul pas siil xa be lim e xil. Melele xa bul pasi, naketeh ba be pe *hor te sanien eo*, e napus nini moletin xil xa latehas vin xil vengan xa latehithiten sepinien na Hi e ulixil tenakan ti tangan lavit rati xa Iesu be Suv nae. ¹⁰ Xil lakei be nesao ba mi Hi labit “!Hi Suv te xeihe, obe eo e obe reitin! ?Vilieh vari mei ulepis rin na moletin xil te ut etan e usa rilomun ni pangasien mi ngan xil xa latehas vin xamem?” ^h

¹¹ Misak ni, mi xil kekes, Hi misa eis-ing xa mieh e biteni mi xil bit, “Mungel vuteili mu. Vengan xa pupuluen xa nateling xati ve ngan xil xa limat ixoni xamim tavus ti mu. Nave nousav ti, moletin xil mei lihas vin moletin te polien sav xil navan xa labe tuemim e hinemim xil ve neketen nae.” ⁱ

^c5:13 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7; 6:16; 7:10,15; 19:4; 21:5 ^d6:2 Sak 1:8; 6:3,6; Rev 19:11 ^e6:4 Sak 1:8; 6:2

^f6:5 Sak 6:2,6 ^g6:8 Rev 1:18; Ser 14:12; 15:3; Esek 5:12,17; 14:21; 33:27

^h6:10 Dut 32:43; 2King 9:7; Sam 79:10; Rev 19:2

ⁱ6:11 Rev 3:5,18; 4:4; 7:9,13; 19:14

^{12j13} Hitu xil lakiri lamei e ut etan langgoni huit **fik** xil xa latamen ti mu e votiang te xeih tei mei mulul lelen xil lakiri labe tan. ^{k14} Napus tilang hat mesel be rin lu, e lukalu ni xalu ba luduxoh hoxalite te xalu. Vathu xil vus e aelan xil vus mun, lamea reling vonexil. ^{l15} Melele xa holesok xil ak mistal mak, moletin xil vus te ut etan lalesae labe vathu xil e langgus e vangihat xil mu seri hat xil xa mahulong: suv toto xil te ut etan del eilep sav xil, vat xil na moletin xil te vaeen del ngan xil mun xa langgur xeihen, ngan xil xa holesok nae holu del moletin votei xil mun, e ngan xil xa labe slev del ngan xil xa vexil mase. ^{m16} Ve ulikanen nae, xil vus lakei be nesao ba mi vathu xil e mi vatihat xil labit, “!Mukiri mumei musoson xamem tangan ngan xa dotan de von xeihen te ut nesao napus ti mun xamem! !Musoson xamem ra ekaten na ngan xa nggoni sulut sipsip tangan napangei xamem ti! ⁿ¹⁷ ?Vengan xa melele te ekaten xa mahulong nalu di bemei li, visi vari ikila ihisu ni e imeul? Moletin tovuol.”^o

Masxaxa xil laling simeleleen tei de rut mol-Isrel xil

7 Dutou ni holesok xil ak, napus **masx-axa** hat (4) xa di lasoh ladi e rin hat (4) te ut etan. Xatel di latsikoe xol votiang hat (4) tangan linahui lelen ti holesok xil te ut etan, mu te tas, mu vatiei xil. ^{p2} E napus masxaxa sav teimun xa mea nggo rute xa meteneai di mistal en,

e xi nggur xat siil xa his Hi xa meul da en. Xi mikei nggeih ba mi masxaxa hat (4) xa Hi tesa xeihen mi xil tangan lapurun ut etan del tas. ³ Masxaxa ak biteni bit, “Munapurun ti ut etan, tas mu vatiei xil ituxoh melele xa muling simeleleen e valnao moletin xil na Hi tangan ipisen ni xa labe nan.”^q

⁴ E labiteni minou labit pupuluen na ngan xil xa latehur simeleleen na Hi latetuxoh moletin taosen be handred tei hanutap lu e hat mun (144,000). Labosei ngan xil ak langgo vatimol lu e le tei (12) na mol-Isrel xil. ^{r5-8} Labosei moletin taosen lu e le tei (12,000) xa langgo vatimol xil kekes na mol-Isrel xil ak: Sudah, Ruben, Kat, Aser, Navtali, Manase,^{ss} Simeon, **Livae**, Isekar, Sebiulon, Siosep, e **Bensamin**.

Moletin xil te rute xil vus te ut etan mei lamot mi Hi e lapet rat hisen

⁹ Di, naketeh ba, e napus vanut moletin xil xa labe holu xa labe holu pupu, xa moletin tovuol mikila vavuli sen xil vus. Xil lastal langgo hisit moletin savsav xil vus, langgo vatimol xil vus, langgo kantri xil vus, e langgo sepinien xil vus. Xil vus mei lasoh pe met ngan xa de von xeihen e pe met ngan xa nggoni sulut sipsip. Lasing ni eising xa mieh e laleh xat ut emeil xil di e hexil. ^{s10} E lakei be nesao labit, “!Mames Hi namem xa dotan de von xeihen e ngan xa nggoni sulut sipsip, vengang xalu di luteh meulien e xamem!”^t

^{ss}7:5-8 Manase, hisen sav be Dan (Sen 35:26).

j6:12 Aes 13:10; Esek 32:7,8; Soel 2:10; 3:15; Mat 24:29; Mak 13:24-25; Luk 21:25; Rev 8:12; Soel 2:31; Pol 2:20 **k6:13** Aes 34:4 **l6:14** Rev 16:20; 20:11 **m6:15** Aes 2:10,19,21; Ser 4:29 **n6:16** Hos 10:8; Luk 23:30; Rev 9:6; 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 7:10,15; 19:4; 21:5 **o6:17** Soel 2:11; Neh 1:6; Mal 3:2 **p7:1** Ser 49:36; Esek 37:9; Dan 7:2; Sak 6:5; Mat 24:31 **q7:3** Esek 9:4; Rev 9:4 **r7:4** Rev 14:1,3 **s7:9** Rev 3:5,18; 4:4; 6:11; 7:13; 19:14 **t7:10** 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:15; 19:4; 21:5

¹¹ Melele taxa labiteni mak, masxaxa xil vus xa ladi xorelis von xeihen ak, elda xil, e neta hat (4) xa lameul ladi, xil vus lamot labe tan pe met Hi, valnaoxil ba duxoh tan e lamesi. ¹² E melele xa masxaxa xil ak lamesi, xil vus labiteni labit, “!Reitin li!

!Xamem mapet rat hisom,
e di masa memesien e merereen namem
bat minuk!

Xouk obe eilep pupu e metisouen nam
mahulong,
xeihen de hem e di olaxat kuh holesok
xil vus.

Obe Hi namem

xosali e vehakut tang. !Reitin!”

¹³ Di, tei e elda xil ak mei misis nou bit,
“?Moletin xil ak xa lasing ni eising xil xa
mieh xiak, okila obit langgo xave?” ^u

¹⁴ E nabit rilomun ni mini, nabit,
“Eilep navan, inou natakil ti. E xouk ok-
ila.” ^v

Ma xi biteni minou bit, “Moletin xil ak labe ngan xil xa latesoh texeih e neketen nae teha tetuxoh hoxalite te melele te xeih xil xa mahulong xa temei e ut etan. Xil latekas eising nae ni re ngan xa temat texoni sulut sipsip te sanien eo e eising nae mei temieh. ¹⁵ Ve rin ak, Hi maen xil mei lasoh pe meten. E vongien e melengien ladi e **Nim Eo** nan e di lamot mini. Reitin, di lamot mi ngan xa di dotan de von xeihen nan xa di milaxat kuh xil e di misikoe xol xil. ^{w16} Mae e maruru naxat ti mun xil, eai naxa pangas xil ti mun e upang teni napangei pupu ni xil ti, ^{x17} vengan xa ngan xa nggoni sulut sipsip xa di misoh de von xeihen ilaxat kuh xil. Itiamu ni xil ixoni ngan xa mo-

letin tei di diamu kuhi ni sipsip san xil, e ipisen suse xa ba be vatit oei te meulien mi xil. E simetexil te longpangasien nae, Hi isihia ra metexil.”^y

Ngan xa nggoni sulut sipsip bul pas siil xa be lu e he sav (7) e xil

8 Melele xa ngan xa nggoni sulut sipsip bul pas siil xa be lu e he sav (7) e xil, holesok xil vus xa ladi ut nesao ladit votei vuteili. ² Di, napus vatixar lu e he sav (7) na **masxaxa** xil xa, vehakut, di lasomal pe met Hi. E lasa amaru lu e he sav (7) mi xil.

³ Masxaxa teimun bemei e misoh visal **hor** te vokon eo. Xi nggur xat pesin tei xa lapol ni ni gol xa di ladin vokon eo xil en. Lasa vokon holu mini xa be sisen na moletin xil vus na Hi. Ma masxaxa ak milehi ba milingi di e hor te vokon eo xa lapol ni ni gol xa de sangas ni von xeihen na Hi. ^{z4} Xi po xat pesin ak e pisen ni mi Hi, e eas teni be nesao del sisen na moletin xil na Hi. ^{a5} Di, masxaxa nggur pesin ak e mise xati ni hatupang xil xa di tamu pili xa milehi ra hor teni. Di, mirang rati be ut etan. Ngan ak misak ni veta mirum, an bilahlil, e lul milil nggeih. ^b

Vatixar lu e he sav (7) na masxaxa xil labue xat xil tangan lavui amaru nae xil e vasak ni longpangasien xil mei vastal

⁶ Di, vatixar lu e he sav (7) na masxaxa xil labue xat xil tangan lavui amaru nae.

⁷ Melele xa vatixar xa be tei e xil bui amaru nan, saxut aes mikiri nggoni us e bemei e ut etan del upang xa ra di en.

^u7:13 Rev 3:5,18; 4:4; 6:11; 7:9; 19:14

^v7:14 Dan 12:1; Mat 24:21; Mak 13:19

^w7:15 1King 22:19; 2Kron 18:18; Sam

47:8; Aes 6:1; Esek 1:26-27; Rev 4:2,9; 5:1,7,13; 6:16; 7:10; 19:4; 21:5 ^x7:16 Aes 49:10 ^y7:17 Sam 23:1; Esek 34:23; Sion 10:11,14; Sam 23:2; Aes 49:10; Ser 2:13; Aes 25:8; Rev 21:4

^z8:3 Sam 141:2; Rev 5:8; 8:4; Eks 30:1-3; Rev 9:13

^a8:4 Sam 141:2; Rev 5:8; 8:3

^b8:5 Lev 16:12; Eks 19:16-19; Rev 4:5; 11:19; 16:18

Nggo vatiei xil vus te ut etan, upang ak ngga tatit vatiei tei teni, e tatit vatiei lu kestang taxa len xil ti. E upang nen ak ngga len munae xil vus xa lameul ladi e ut etan. ^c

⁸Di, vatixar xa be lu e xil bui amaru nan. Melele xa bui, napus neta tei nggoni vathu tei xa mahulong xa upang di pili en xa laso ni be tas. ^{d9}Nggo holesok xil vus xa lameul ladi tas, tatite tei teni lalel, ma tatite lu teni kestang latalél ti. E nggo tuturil xil xa ladi e tas, tatit tuturil tei teni mei labe saxute xil tang, ma tatit tuturil lu teni kestang mei latave saxute ti.

¹⁰Di, vatixar xa be tol (3) e xil bui amaru nan. Melele xa bui, hitu tei xa mahulong xa upang di pili en mot nggo tilang hat e bemei posou e tatite tei te oaisal e vangoei xil, ma tatite lu teni kestang tapurun xil ti. ¹¹His hitu ak be 'Mikon' e misak ni oei nen xil ak biles mei mikon e misa e moletin holu lalel vengon xa lamu oei xa mikon xiak. ^e

¹²Di, vatixar xa be hat (4) e xil bui amaru nan. Melele xa bui, neta tei mei posou e rin tei te meteneai e aveti, del tatit hitu tei mun. Ma rin lu te meteneai e aveti, del tatite lu te hitu xil kestang tapurun xil ti. Misak ni, xil latapili ti mun vaxoni tetiamu. Ma, e melengien xil vus, miehen teni minggan haoa tol e he sav (8) kestang, e haoa hat (4), miehen teni mei maluxoluk. E vongien xil vus mak tang, aveti mem haoa tol e he sav (8) kestang, e haoa hat (4), tamem ti. ^f

¹³Di, naketeh be nesao e napus vevaxum tei di ngga e mesavuol. Nalong raen xa miki nggeih bit, "¡Aue li! ¡Aue

li! ¡O aue li! ¡Isa xa isa pupu mi ngan xil xa ladi e ut etan e melele xa vatixar xatel xa latdi tamu latihui amaru natel!"

9Di, vatixar xa be lim (5) e xil bui amaru nan. Melele xa bui, napus *maxaxa* tesa tei xa mot bemei e ut etan nggoni hitu tei. Lasa ki te Vangavul xa hoxalite teni tovuol mini.* ^{g2}Xi bemei misah puiteh te Vangavul ak, e eas holu mistal nggo en nggoni eas te upang tei xa mahulong. Eas ak misak ni miehen e tilang hat mei maluxoluk. ^{h3}Di, holesok xil xa langgoni kelmenamen lastal langgo eas ak e lamei e ut etan. Xil langgur poisen de xalexil nggoni skopion xa mikila isa longpangasien xa mahulong mi moletin xil melele xa itil xil ni. ⁱ⁴Lase-mae ni xil tangan linapurun ti husmunae, vatiei mu holesok sav xil mun xa lateh e lameul ladi e ut etan. Hi maen xil tangan lipangei kes ni moletin xil taxa latahur ti simelelen na Hi vati e valnaoxil. ^{j5}Aveti lim (5) iaxa Hi maen kelmenamen xil ak mei lasa longpangasien holu mi moletin xil, e tamaen xil ti tangan lavas vin xil. Longpangasien ak nggoni ngan xa moletin ngguri melele xa skopion dili. ⁶E melele nen ak, moletin xil lalang ni maten ve longpangasien nae, e lasakras lakameti. Reitin, xil iexil bei mak mu tangan amat, e maten mile-sae ra xil. ^k

⁷Kelmenamen xil ak, neta tei misikoe xol tenbexil xa misak ni napus xil nggoni hos xil xa lasak mesen xil ve vaen. E vatixil, napus neta ngan xa nggoni vatlu-voluv na suv toto xil xa lapol ni ni gol, e valnaoxil, napusi nggoni valnao moletin. ¹⁸Hilixil tepiei nggoni hil atou xil,

***9:1** Vangavul ak be nim te xeih na ninin tesa xil ha ituxoh Melengien te Lepisien.

^c**8:7** Eks 9:23-25; Esek 38:22 ^d**8:8** Eks 7:20,21 ^e**8:11** Ser 9:15

^f**8:12** Aes 13:10; Esek 32:7,8; Soel 2:10; 3:15; Mat 24:29; Mak 13:24-25; Luk 21:25; Rev 6:12-13 ^g**9:1** Rev 20:1 ^h**9:2** Sen 19:28; Eks 19:18

ⁱ**9:3** Eks 10:12,15 ^j**9:4** Esek 9:4; Rev 7:3

^k**9:6** Siob 3:21; Ser 8:3; Hos 10:8; Luk 23:30; Rev 6:16 ^l**9:7** Soel 2:4,5

e luhexil mikan nggoni luhe laeon. ^{m9}E valhasexil nggeih nggoni eising te vaeen xa lapol ni ni aean. E melele xa di langga, tangalen te aveouxil nggoni tangalen e melele xa hos xil lalihi kat te vaeen xil holu ba labe von vaeen. ⁿ¹⁰Poisen nae de xalexil nggoni skopion, e melele xa ladil moletin ni, moletin ak milong pangas xi holu xa holu pupu. E xil laba e ladil moletin xil duxoh aveti lim (5). ¹¹Masxaxa tesa xa milaxat Vangavul xa hoxalite teni tovuol iaxa be suv toto nae. E sepinien na mol-Isrel xil, hisen ‘Abadon,’ e, e sepinien na mol-Kris xil, hisen ‘Apotion,’ xa koute te his xalu ak be ‘ngan xa di nggu lenen holesok xil.’

¹²!Aue li! Ngan ak be hoxalite te melele te longpangasien xa be vatei nen. !E aue, o aue li! Vengan, itutou ni ngan ak, melele te longpangasien lu mun mei lalialistal.

¹³Di, vatixar na masxaxa xil xa be tei e he sav (6) e xil bui amaru nan. Melele xa bui, nalong rae tei xa mistal nggo rin hat (4) te *hor te sanien eo* xa lapol ni ni gol xa de pe met Hi. ^{o14}Rae nen ak biteni mi vatixar xa be tei e he sav (6) e xil bit, “Uhe visal masxaxa hat (4) xa latevar xat xatel latteti visal Oeisal Upretis, e umaen xatel ha veatel imase.” ¹⁵Hi teling masxaxa xil ak ladi inggak tangan litatil haoa xati ak te melengien ak te aveti ak te huram ak vari. Reitin, teling xil temak tangan, e melele nen ak vari, xil likila ha vexil imase e ha lihu vin tatite tei te moletin xil vus te ut etan, ma tatite lu (2) teni kestang linahu vin xil ti. ^p

¹⁶⁻¹⁷E metuveen navan, napus kuh moletin te vaeen na masxaxa xil ak. Xil laloh e hos nae xil, e melele xa labuli

xil, nalonge xa labe milian handred lu (200,000,000). Eising te vaeen nae pipili nggoni upang, memas nggoni tas, e meang nggoni sulfa. [†]Vat hos xil langgoni vat laeon, e upang, eas, e sulfa di lastal langgo vulongexil. ¹⁸Nggo longpangasien xatel ak te upang, eas e sulfa xa lastal langgo vulongexil, tatite tei te moletin xil vus te ut etan lamat, ma tatite lu teni kestang lameul tang ladi. ¹⁹Xeihen na hos xil de vulongexil del xalexil. E xalexil mun mikila vapangei moletin vengam xa hoxalit xalexil, vat xil ladi en xa di ladil moletin xil nggoni tetal tesa xil.

²⁰Moletin xil xa latalel ti mu e longpangasien xatel te upang, eas e sulfa, xil lataviles ti ra sexien tesa nae xil. Langgulehi tangan lamot mi ninin tesa xil e nanao xil xa lasakras laketeh, lasakras lataeong ni neta, e lasakras lakakao xa lapol ni xil ni gol, silva, brons, hat e liei xil del hexil tang. ^{q21}Reitin, moletin xil ak lataviles ti ra sexien xa di labas vin moletin sav xil, sexien te eimas, sexien te hoeasoen, e sexien te kakanen nae. ^r

Masxaxa tei misa uvei tei mi Sion

10 Di, napus vatixar teimun na *masxaxa* xil xa nggo ut nesao be mei e ut etan. Momah tei mikutaxole e hinehin tei de nesao ni vatin. Valnaon di minehin nggeih nggoni eai e len xalu lupili lunggoni upang. ²E hen, xi nggur xat tutut uvei tei xa milanga da xa latetis sepinien xil en. Napusi miling len matu de tas, e len meil milingi de tan. ³Di, miki nggeih nggoni laeon tei. E melele xa miki mak, veta lu e he sav (7) mirum nggeih. ⁴Melele xa veta xil

^{†9:16-17} Sulfa be hat tei xa meang e taxeih ti. E melele xa lalingi de upang, pili nggeih e eas teni bo nggoni rahat.

^{m9:8} Soel 1:6 ^{n9:9} Soel 2:5

^{o9:13} Eks 30:1-3; Rev 8:3 ^{p9:15} Rev 8:7-12 ^{q9:20} Dut 32:17; 1Kor 10:19-20; Sam 115:4-7; 135:15-17; Dan 5:23 ^{r9:21} Rev 16:9,11,21

ak larum mak, inou nabue xat inou tenggan nitisi. E nalong rae tei misepin minou nggo ut nesao bit, “Naha xa veta lu e he sav (7) nen ak labiteni be sepinien xuxus tei, onatis xati ti.”^s

⁵Di, napusi xa vatixar na masxaxa xil xa teling len tei tete tas e len teimun tete tan, xi pet rat hen matu e misa ni be nesao^{t6} e pol ni hitxatien te xeih tei e his Hi, ngan xa meul vehakut, xa tepeas ni ut nesao e ut etan, tas e holesok xil ngasen xa ladi e xatel. Masxaxa biteni bit, “!Nabit xati xa Hi misakras vararu mun!^{u7} Reitin, melele xa vatixar na masxaxa xil xa be lu e he sav (7) e xil ihui amaru nan, Hi ipol vuol ni lingxatien xuxus nan. Ipol ni ixoni ngan taxa tehit lelen ni tuei mi **provet** xil xa latehe moletin te polien nan xil.”^v

⁸Di, rae xa nateteong ni tetiamu misepin rilomun minou nggo ut nesao bit, “Uha uhur uvei xa lalanga tuei da xa de he masxaxa xa di misoh de tas e de tan.”

⁹Misak ni, nabe visal masxaxa nen ak e nasisi tenggan vasa tutut uvei ak minou. E xi biteni minou bit, “Uhuri ua ni. E vulongom ikas ni ixoni hani, e vangom ikon ni.”^{w10} Misak ni, nanggur rat tutut uvei ak ra hen e nangga ni. E nakameti xa vulongok mikas ni nggoni hani. E melele xa nangga ni bus, nateong ni biles, e vangok mei mikon ni.

¹¹Di, xi misepin rilomun minou bit, “Xouk uha uhit lelen sepinien na Hi vatei mun usil naha xa ti ipol ni mi hisit moletin xil holu, mi kantri xil holu,

mi sepinien xil holu, e mi suv toto xil holu.”^x

Hi misil moletin nan lu tenggan ha lalhithiten sepinien nan

11 Di, masxaxa tei misa liei tei minou xa nggoni eitingil xa nikila nivuli mita xil ni, e biteni minou bit, “Uha e uvuli mita te **Nim Eo** na Hi e mita te **hor te sanien eo** mun. E uvuli ngan xil xa di lamot mi Hi en.^{y2} E vioh teni, onavuli mita teni ti, vengam Hi tesa ni ngamu mi ngan xil xa latakil ti xi. Xil mei lihes tan ni Taon Eo na Hi aveti ihe hanutap lu e lu mun (42).”^z

³Di, masxaxa ak biteni mun bit, “E inou nisa xeihen mi provet navan lu xa ha lalihit lelen ni usil reitinen navan melengien taosen tei handred lu e hanutap tol mun (1,260).^z Lalising ni eising te tangen e nisil xalu tenggan ha lalihit usil sepinien navan mi moletin xil.”⁴ Moletin xalu ak lube vatit **olip** xalu^f e laet lu xa lusoh pe met Hi Suv xa di milaxat vuol ni holesok xil te ut etan.⁵ E xosxa moletin tova ihit ipurun xalu, upang istal ixo vulongexalu e ia len ngan xil xa di labae del xalu. Ma, ngan xil xa lihit lipurun xalu limat ixo suse ak.^{a6} Hi isa xeihen mi xalu tenggan lalisikoe xol us namus ti ituxoh hoxalite te melengien xil xa ti lalihit lelen sepinien na Hi en. Xalu lalihur xeihen tenggan lalikila lalihiles oei xil vus mei ihe ra. E xeihen iti e xalu tenggan lalikila lalisa longpangasien savsav xil ha ipurun moletin xil te ut etan e melengien xil vus xa xalu iexalu ihei.^b

^z11:3 Aveti 42 e melengien 1,260, xalu vus lube huram 3 1/2.

^f11:4 Sak 4:11-14 bit usil vatit olip xalu ak xa lube eloheoh lu na Hi.

^s10:4 Dan 8:26; 12:4,9 ^t10:5 Dut 32:40; Dan 12:7

^u10:6 Sen 14:19,22; Eks 20:11; Neh 9:6; Sam 146:6 ^v10:7 Dan 9:6,10; Amos 3:7;

Sak 1:6 ^w10:9 Esek 2:8; 3:1-3 ^x10:11 Ser 1:10; 25:30; Dan 3:4; 7:14

^y11:1 Esek 40:3; Sak 2:1-2 ^z11:2 Sam 79:1; Aes 63:18; Sak 12:3; Luk 21:24; Rev 12:6; 13:5 ^a11:5 2Saml 22:9; 2King 1:10; Sam 97:3; Ser 5:14

^b11:6 1King 17:1; Eks 7:17,19-20; 1Saml 4:8

⁷Melele xa lalihit vuol ni sepinién xa Hi tesa ni mi xalu, vongoro tesa tei imea ra Vangavul xa hoxalite teni tovuol. Xi ivae itel xalu e ihu vin xalu. ^{c8}Ti, tiei nalu lalipat lalitit e suse te Serusalem, taon xa eilep xa lateti xat Iesu e eivave en, ngan xa be Suv nalu. E melele xa labit usil taon xa eilep xiak, labit lelen ni xa nggoni **Sodom** mu **Isip** tetiamu. ^{d9}Moletín xil te kantri xil vus, vatimol xil vus, sepinién xil vus, e vatit moletín savsav xil vus mei lile mah xat tiei nalu melengien ihe tol e rute mun. Xil linamaen ni ti tangan lithin xalu. ¹⁰Moletín xil vus te ut etan lisep koai ve maten nalu. Xil lipol ni anien xil xa tellep, e lisa kekes ni sanien mi xil, vengan **provet** xalu ak lusak ni longpangasien holu mei mistal mi moletín xil te ut etan.

¹¹Ti, e piniaé te melengien hat nen, Hi isa sesehen te meulien mi xalu ma lalimea rilomun lalisoh. E ngan xil xa lipusi, lexil imulul holu ven. ^{e12}Ti, provet xalu ak lalilong rae tei ixo ut nesao ihit, “!Lumei nesao inggak!” Ma, pe met elu nalu xil, xalu lalixo momah tei lalihe ut nesao. ^f

¹³E melele nen tak, lul tei xa eilep ilil. Ngan ak isak ni tatite tei te nim xil te taon xa eilep xiak likiri lel, ma tatit nim hat e he sav (9) kestang teni linakiri ti. E moletín taosen lu e he sav (7000) lilel. Melele xa moletín sav xil lipusi, lexil imulul ni e like reitin sung e xeihen na Hi xa de ut nesao. ⁸

¹⁴!Aue li! Ngan ak ihe hoxalite te melele te longpangasien xa be lu (2) nen. !E aue li, o aue li! Vengan, itutou ni ngan ak, melele te longpangasien xa be tol (3) nen mei istal nave nousav ti.

Masxaxa bui amaru kor

¹⁵Di, vatixar na **masxaxa** xil xa be lu e he sav (7) e xil bui amaru nan. Melele xa bui, nalong rae xil xa langgo ut nesao e lakei nggeih labit,

“Xosali, xeihen te laxatien te ut etan mei di e he Hi Suv nar e ngan xa be Mesaea nan.

E laxatien nan iti vehakut tang, navus ti.” ^h

¹⁶Di, elda xil xa labe hanutap tei e hat mun (24) xa di ladotan e von xeihen nae xil pe met Hi, xil lamot mini, valnaoxil ba duxoh tan e di lapet rat hisen ¹⁷del kikeien nae xil labit,

“!Hi Suv te Xeihen,

oda xosali e oteta tetiamu!ⁱ

Mamesuk vengan xa di opisen xeihen nam xa mahulong

e omei sung tangan olaxat rute xil vus te ut etan.

¹⁸Ngan xil xa latakil ti xouk, iexil teat xouk, ^j

e melengien te ekaten nam di bemei mi xil.

Ngan ak be melele xa ulepis

rin na moletín xil xa lalé ngamu.

Ngan ak be melele mun xa usa huit polien

mi provet xil xa labe moletín te polien nam xil,

e mi moletín nam xil xa di lamerere ni xouk,

ngan xil xa latellep ba duxoh ngan xil xa latereli.

E ngan ak be melele mun xa upurun ngan xil xa di lapurun holesok xil te ut etan.”

^c11:7 Dan 7:3; Rev 13:1; 17:8; Dan 7:7,21; Rev 12:17; 13:7

^d11:8 Luk 13:34; Aes 1:10 ^e11:11 Esek 37:5,10 ^f11:12 2King 2:11

⁸11:13 Esek 38:19-20 ^h11:15 Eks 15:18; Sam 10:16; 22:28; Dan 2:44; 7:14; Oba 2:1; Sak 14:9 ⁱ11:17 Rev 1:8; 4:8; 15:3; 16:7,14; 19:6,15; 21:22

^j11:18 Sam 2:1; 46:6; Dan 9:6,10; Amos 3:7; Sak 1:6; Sam 115:13; Rev 19:5

¹⁹Di, puiteh te Nim Eo na Hi e ut nesao misaha, e napusi xa **Bokis te Hitxatien te Xeih** da en. E melele xa puiteh misaha mak, an milangas, veta mirum, lul tei milil nggeih, e saxut aes xil holu lakiri nggo tilang hat nggoni us.^k

Dragon[§] tei misak tangan vaa horamue na atou tei

12 Di, napus neta tei xa eilep mistal nggo tilang hat xa misak ni nou nanem usil koute teni. Napus atou tei xa mising ni meteneai nggoni eising nan, e aveti de pe kaelen xalu xa pisen ni xa xi be eilep pupu. E vatluvoluv te relaxatien de vatin xa hitu lu e le tei (12) di en.^{**} ²Atou ak, sangas valing tuvava, e longpangasien xil tangan valing tuvava nggeih pupu e misak ni muis holu.¹

³Di, napus neta teimun xa eilep mistal nggo tilang hat. Dragon tei xa eilep e pipili mei mistal. Vatin be lu e he sav (7) e hon xil labe he xalu (10), e vatluvoluv te relaxatien de vatin lu e he sav (7) xil vus.^{m4} Del xalen, xi koves rerat tatit hitu tei labe reling tilang hat e miso xil lamei e ut etan, ma tatite lu teni kestang takoves rerat xil ti. Xi bemei sangas visal atou ak tangan ikila ia tuvava nan melele xa ilingi.ⁿ⁵ Di, atou miling tuvava tei xa be malohos, ngan xa ilaxat rute xil vus te ut etan itel xeihen nan. E tuvava ak, melele xa milingi, lapo rati e langguri ba visal Hi e ba lalingi dotan e von xeihen nan xa eilep.^{o6} Atou ak milesae ba be uruvuol,

ba be rute xa Hi misak mesen ni tuei tangan ha ita en. E rute ak, ilaxat kuhi ituxoh melengien taosen tei handred lu e hanutap tol mun (1,260).^{†† p}

⁷Di, e ut nesao, vaeen tei mistal. Vatixar Maekel del **masxaxa** nan xil labae del Dragon ak del masxaxa nan xil.^{q8} Maekel del nan xil, labas tan ni xeihen na Dragon del masxaxa nan xil, e latamaen xil ti mun tangan lati e ut nesao.⁹ Reitin, Dragon ak xa eilep, ngan xa tehe tetal tetiamu^r Ngan xa di miluvos moletin xil vus te ut etan, vatixar Maekel miso ni be ut etan del masxaxa nan xil vus.

¹⁰Di, nalong rae nggo ut nesao xa mikei nggeih bit,

“!Xosali, Hi miteh meulien e moletin nan xil del xeihen nan!

!Xosali, Hi pisen xeihen nan e bemei etan tangan valaxat xil!

Xosali, xi miling xeihen xa eilep de he Mesaea xa xi tehosei.

Vengan ngan xa misoh pe met Hi nar, ngan xa di misep xar ni his moletin nar xil melengien e vongien,^s

xosali, laso rati tuei ra ut nesao.

¹¹ Moletin nar xil labae lali Temat

vengan xa laling neketen nae e ngan xa ren teleh texoni sulut sipsip tei te sanien eo,

e latave unoun ti tangan lavit usil reitinen teni mi moletin sav xil.

Xil lamaen xoteh meulien nae tangan lakila lisoh ixeih e neketen nae,

§12:0 Dragon, lapusi nggoni iae e mahulong nggoni lerumrum tei.

**12:1 Atou ak be vole tei usil kantri te hal Isrel xa be reitin mi Hi, xa mei be vole usil Sias nan mun. E hitu xil ak labe vole usil vatit vatimol lu e le tei (12) na mol-Isrel xil.

††12:6 Melengien 1,260 be haram 3 1/2.

^k11:19 1King 8:1,6; 2Kron 5:7; Eks 19:16; Esek 1:13; Rev 8:5; 16:18; Eks 9:24; Rev 16:21 ^l12:2 Aes 66:7; Maek 4:10 ^m12:3 Dan 7:7 ⁿ12:4 Dan 8:10 ^o12:5 Aes 7:14; 66:7; Sam 2:9; Rev 19:15 ^p12:6 Rev 11:2; 13:5 ^q12:7 Dan 10:13,21; 12:1; Siud 1:9 ^r12:9 Sen 3:1; Sen 3:14-15; Aes 14:12-15; Luk 10:18; Sion 12:31; Rev 20:2 ^s12:10 Siob 1:9-11; Sak 3:1

tave ti neta xa lamat ven.

¹²!Xamim vus xa mudi e ut nesao, muhesi xamim!

E, aue li, isa mi xamim xa mudi e ut etan e tas,

vengan Temat be tan visal xamim e ut etan.

Xi polu ni ekaten,

vengan xa mikila xa melengien nan xil be tamure sutang.”

¹³Melele xa Dragon tepus kila xa lateso rati tehe ut etan, xi minggol atou xa teling tutut tuvava tei. ¹⁴E atou ak, Hi pol ni aveou vevaxum lu xa mahulong lustal lunggo tenben. Del aveoun xalu, xi ba de rute tei e uruvuol xa lalaxat kuhi haram tol (3) e aveti tei e he sav mun (6). E rute ak xi mikila vaxus ra Dragon ak. ¹⁵Di, Dragon mei miluh rat oei holu xa mei be oeisal tei e mileh nggusil atou ak tangan vahuri vaha. ¹⁶E tan dutou ni atou ak nggo sexien xa masel be rin lu e mu sen oei xa mistal nggo vulonge Dragon. ¹⁷Melele xa pusi mak, Dragon ien nggat pupu ni atou ak. Misak ni, ba bit vapol ni vaeen vatel horamue nan xil: ngan xil xa di lalong xat rae na Hi e di labithiten reitinen usil Iesu mi moletin sav xil. ¹⁸E Dragon ba misoh de suhon te tas.

Vongoro tesa lu lustal

13 Di, napas vongoro tesa tei xa mea ra tas. Vatin be lu e he sav (7) e hon xil be he xalu (10) xa vatluvoluv te lelaxatien xil di e hon he xalu (10) xil vus. E vatin xil vus langgur xat his tellep xil xa latekan ni ra Hi tangan mei vahe nae. ^{v2}Vongoro tesa nen ak, napas

‡‡13:5 Aveti 42 be haram 3 1/2.

tenben nggoni tenbe leopard, len xil nggoni le **bear**, e vulongen nggoni vulonge laeon. Mi vongoro tesa ak, **Dragon** misa xeihen, von xeihen nan, e maen ni tangan valaxat holesok holu. ^{w3}Vongoro ak, neta tei nggul vatin tei xa lapusi xos imat ven. E melele xa mei meul bos rilomun, moletin xil te rute xil vus e ut etan late-manin ni e langgusil xati. ^{x4}Ngan xil vus ak, lamot mi Dragon vengon xa xi misa xeihen nan xa nggeih pupu mi vongoro tesa ak. E lamot mi vongoro tesa mun labit, “?Visi iaxa nggur xeihen nggoni? ?Visi iaxa mikila vavae vatela? !Moletin tovuol!”

⁵Hi maen vongoro tesa ak tangan vasesp koai vahiteni xa xeihen nan pipin ni xeihen na Hi. Hi maen ni mun tangan vahur xeihen tangan valaxat rute xil vus e ut etan aveti hanutap lu e lu mun (42).‡‡ ^{y6}Xi misepsisil Hi, misepin misa ba xat hisen e rute xa da en, e misep purun ngan xil mun xa ladi e ut nesao. ⁷E Hi maen ni mun tangan ivae itel moletin nan xil iha vuma ... ihas tan ni xil. Reitin, Hi maen vongoro tesa ak tangan vahur xeihen vali vatimol savsav xil vus, vali hisit moletin savsav xil vus, vali sepinien savsav xil vus, e vali kantri savsav xil vus. ^{z8}Moletin xil vus te ut etan limot mini. E ngan xil kestang xa ladis hisexil de Vanuvei te Meulien na ngan xa temat texoni sulut sipsip tei te sanien eo, xil linamot ti mini. Hisexil, latetisi teti e Vanuvei te Meulien tetiamu nousav, e melele xa Hi tenapeas ni ut etan ti mu. ^a

⁹!Xosxa vurangemim di, muteong kuhi! ¹⁰Xosxa Hi miling xati tangan lital

^{t12:14} Dan 7:25; 12:7 ^{u12:17} Dan 7:7,21; Rev 11:7; 13:7

^{v13:1} Dan 7:3; Rev 17:3,7-12 ^{w13:2} Dan 7:4-6 ^{x13:3} Rev 17:8 ^{y13:5} Dan 7:8,20,25; 11:36; Rev 11:2; 12:6 ^{z13:7} Dan 7:7,21; Rev 11:7; 12:17

^{a13:8} Eks 32:32,33; Sam 69:28; Dan 12:1; Plp 4:3; Rev 3:5; 17:8; 20:12,15; 21:27; Aes 53:7; Sion 1:29,36; Rev 5:6,12

xat moletin tei, litela iha e lital xati vari. E xosxa Hi miling xati tangan litil vin moletin tei ni tiei te vaeen, ma litil vini vari. Misak ni, Hi di misis moletin nan xil tangan lixulehi lisoh ixeih e neketen nae. ^b

¹¹Di, napas vongoro tesa teimun xa mea ra tan. Hon lu nggoni ho sipsip, e sepinien nan nggeih nggoni Dragon. ¹²Vongoro tesa ak milaxat holesok xil e rin na ngan xa diamu. E nggeih xat moletin xil xa ladi e ut etan tangan limot mi vongoro tesa xa diamu, ngan xa neta tei texula e temeul tehos rilo-mun. ¹³Vongoro xa bemei dutou, xi pol ni merekel xil xa latellep nggoni misak ni upang nggo ut nesao bemei etan tangan moletin xil vus lakila lapusi. ^{c14}Hi maen vongoro ak xa bemei dutou tangan ha ti iluvos moletin xil vus te ut etan ni merekel xil xa pol ni e rin na vongoro xa diamu. E vongoro ak miluvos moletin xil e misak ni xil lapol ni nanao xa lapusi nggoni vongoro xa late-sal vini ni tiei te vaeen e temeul rilo-mun. Di, misis xil tangan lamerere ni. ^{d15}Hi maen vongoro tesa xa dutou tangan vasak ni nanao na vongoro xa diamu tangan vasehseh e vameul. Misak ni, nanao ak mikila vasepin e vasa lepi-sien te maten mi ngan xil xa latamot ti mini. ^{e16}Vongoro xa dutou nggeih xat moletin xil vus tangan lihur simeleleen tei iti e hexil metu mu e valnaoxil: ngan xil xa latellep ba duxoh movotei xil tang, ngan xil xa holesok nae holu ba duxoh hoeo xil, ngan xil xa vexil mase ba duxoh slev xil. ¹⁷Moletin xa tahur ti simeleleen ak, xi misakras vaxal mu vapos ni neta. E simeleleen ak be his vongoro tesa xa

diamu e be pupuluén te hisen. ^{f18}Ngan xil xa iexil bei lave metisou linem kil koute te simeleleen ak, vangan ngan xil xa lakilakil kuhi likila lipol rat koute te pupuluén teni xa be vole usil moletin tei. Pupuluén te hisen be tei e he sav, tei e he sav, tei e he sav (666).

Ngan xa nggoni sulut sipsip te sanien eo misoh de Vathu Saeon del moletin nan xil

14 Di, naketeh ba, e napusi xa ngan xa nggoni sulut sipsip di misoh de **Vathu Saeon**. E ngan xil xa di lasoh dela labe taosen handred tei hanutap lu e hat mun (144,000). Ngan xil ak langgur simeleleen de valnaoxil xa latetis his ngan xa nggoni sulut sipsip del his Tamen di en. ^{g2}Di, nalong rae tei nggo ut nesao xa misel nggeih nggoni melele xa tahe xil di lamavul xat hat xil, mu nggoni melele xa veta mirum nggeih. E tangalen teni bos nggoni melele xa moletin xil lapilei ni harp nae xil. ^{h3}Moletin taosen tei hanutap lu e hat mun (144,000) lamea lasoh pe met ngan xil xa ladi e ut nesao: ngan xa di dotan e von xeihen nan, neta hat (4) xa lameul ladi, del elda xil mun. Melele xa lasoh mak, di lakikei ni sisien hu tei xa be na moletin handred tei hanutap lu e hat mun (144,000) kestang xa Hi teteh meulien e xil ra ut etan. Moletin sav xil lasakras lakikei ni. ⁱ⁴Ngan xil ak lamease tevi e latnapat ti vatel atou xil. Reitin, xil lapol ni nenemien nae tangan lihusil xat Hi kestang e linavituei ti natel atou tova. Langgusil xat ngan xa nggoni sulut sipsip te sanien eo e rute xil vus xa xi diamu ni xil en. Hi texal rat xil ra moletin sav xil

^b13:10 Ser 15:2; 43:11 ^c13:13 Mat 24:24; 2Tes 2:9; 1King 18:24-39

^d13:14 Mat 24:24; 2Tes 2:9-10; Rev 19:20; Dut 13:2-4

^e13:15 Dan 3:5-6 ^f13:17 Rev 14:9,11; 16:2; 19:20; 20:4 ^g14:1 Rev 7:4; 14:3; Esek 9:4; Rev 3:12; 7:3 ^h14:2 Esek 1:24; 43:2; Rev 1:15; 19:6

ⁱ14:3 Sam 33:3; 40:3; 96:1; 98:1; 144:9; 149:1; Aes 42:10; Rev 5:9; 7:4; 14:1

te ut etan del re Iesu tangan mei lisoh pe met Hi e pe met ngan xa nggoni sulut sip-sip tangan mei lixoni sanien eo te anien hu te naho xa iha mi xalu. ⁵E meulien nae, latnaluvos ti moletin e sexien nae xil temese tevi. ^j

Masxaxa tol latsa selxatien ba mi moletin xil te ut etan

⁶Di, napus *masxaxa* tei xa di mingga e tilang hat. Xi nggur longongen hos xa da vehakut e di bithiteni mi moletin xil vus te ut etan: ngan xil te vatimol xil vus, ngan xil te sepinien xil vus, ngan xil te kantri xil vus, e mi hisit moletin xil vus mun. ⁷Xi di miki be nesao bit, “!Mumerere ni Hi e mupet rat hisen xa be eilep mak mu! Vengan melengien di bemei tangan xi mei ilepis rin na moletin xil vus. !Ma mumei mumot mi Hi xa tepeas ni ut nesao, ut etan, tas e oeisal xil vus!” ^k

⁸Dutou ni ngan ak, masxaxa xa be lu nen mingga e tilang hat e miki bit, “!Taon xa mahulong xa lakesi ni *Babilon*”^q mikiri lel! Hi misa pangasien te ekaten nan mi moletin xil teni vengan lasak ni moletin te kantri xil vus tangan lastokovein sexien hos xil e langgusil sexien tesa xil nggoni sexien na hoeaso tei xa misa uaen mi moletin ngan tangan vapol vasa vatela.” ^l

⁹Dutou ni ngan ak, masxaxa xa be tol e xatel mingga e tilang hat nggusil ngan xalu xa lutetiamu, e xi miki be nesao

bit, “Xamim xa di mumot mi vongoro tesa xa diamu e mi nanao nan, e munggur simelelen nan di e valnaomim mu e hemim, ^{m10}xamim vari ti muhur pangasien te ekaten na Hi xa ixehi xa ixehi pupu. Hi iso xamim muhe upang te xehi e mulong pangas xamim en pe met masxaxa eo xil e pe met ngan xa nggoni sulut sip-sip. ¹¹Reitin, xamim xa mumot mi vongoro tesa e nanao nan e munggur simelelen te hisen, upang itit ni ngan taxa ti ia xamim iha vuma ... hoxalite teni ihe tovuol e eas teni mun navus ti vatova.” ⁿ

¹²Mak, ma di nasei xat moletin xil na Hi xa lalong xat rae nan xil e di langgusil xat Iesu, bos xa lixulehi lisoh ixehi e neketen nae.

¹³Di, nalong rae tei nggo ut nesao xa bit, “Utis sepinien ak: Xosali iha, tuxolxatien iti mi ngan xil xa limat ve neketen nae e Suv Iesu.” ^o

Ninin bit rilomun ni bit, “Reitin li. Xil lingel kuhi ra polien te xehi nae, e lihur huite xa ihos ve polien hos xil xa latepol ni.”

Iesu di milepis rin na moletin xil

¹⁴Di, naketeh ba, e napus momah tei xa mieh. E moletin tei di dotan en xa napusi nggoni Nat Moletin xa tenben nggoni moletin tei xa nggo ut nesao.^{§§} E vatin, vatluvoluv te relaxatien xa be gol da en, e hen, xi di nggur xat huknaef tei xa mikan. ^{p15}Di, masxaxa teimun mistal

^q14:8 Babilon be sepinien xusus usil taon xa mahulong te hal Rom xa vatit kavmen xil ladi en.

^{§§}14:14 Nat Moletin be ngan xa Dan 7:13 del Dan 10:5 di misep usili xa isak ni relaxatien na Hi mei istal.

^j14:5 Sam 32:2; Aes 53:9; Sef 3:13 ^k14:7 Eks 20:11; Sam 146:6

^l14:8 Aes 21:9; Ser 51:8; Rev 18:2; Ser 51:7; Rev 17:2; 18:3

^m14:9 Rev 13:12-17; 14:11; 16:2; 19:20; 13:17; 20:4; Sam 75:8; Aes 51:17,22; Ser 25:15; Rev 15:7; 16:19; Sen 19:24; Sam 11:6; Esek 38:22; Rev 20:10; 21:18

ⁿ14:11 Aes 34:10; Rev 19:3; 13:12-17; 14:9; 16:2; 19:20; 20:4

^o14:13 Hib 4:10 ^p14:14 Dan 7:13

nggo **Nim Eo** e miki nggeih ba mi ngan xa dotan de momah bit, “Uhur xat huknaef nam e upol itela, vengan xosali be melengien xa holesok xil vus te ut etan men kuhi, e melele ak pipin tangan uleh viton moletin xil teni e ulepis rin nae.”^{q16} Di, ngan xa di dotan de momah mikuvun huknaef nan be ut etan, e mileh viton holesok xil vus xa ladi en.

¹⁷Di, napus masxaxa teimun mistal nggo Nim Eo te ut nesao, e xi mun nggur xat huknaef tei xa mikan. ¹⁸Di, masxaxa teimun nggo visal **hor** te vokon eo, ngan xa di milaxat upang teni. Xi miki nggeih ba mi masxaxa xa nggur xat huknaef xa mikan bit, “Moletin xil te ut etan mei lamen kuhi ve lepiesien. Langgoni huite te urvatiei te **grep** melele xa lamen kuhi tangan lata rat xil. Ma uhur xat huknaef nam e uta rat moletin xil ak imak.”

¹⁹Misak ni, napusi xa masxaxa mikuvun huknaef nan e ut etan, e da rat huit grep xil ra vatite. Di, mileh viton xil e miso xil labe rute xa labekisi tangan sute vahe relingi xa be von pangasien te ekaten na Hi. ^{r20}E huit grep xa be moletin xil ak, labekis xil tangan sute vahe reling xil e hale te taon te hal Serusalem. E ra nae mileh nggoni oaisal xa teviei duxoh kilomita handred tol (300 km) e huinep teni sangas duxoh mita lu (2 m).

Masxaxa lu e he sav (7) lapo xat longpangasien kor xil tangan lisa ni ihe ut etan

15 Di, napus neta teimun xa eilep mistal nggo tilang hat xa misak ni nou di nanem usil koute teni. Napus **masxaxa** lu e he sav (7) xa di lapo xat longpangasien lu e he sav (7). Longpan-

gasien xil ak labe longpangasien kor xil xa ipisen ni xa ekaten na Hi mei duxoh hoxalite teni. ^s

²Di, e ut nesao, napus rute ak nggoni melele xa tas mieh e mexal nggoni kilas, e di minehin nggoni ngan xa upang da en. Napus ngan xil xa latesoh texeih e latevae teli e vaeen te neketen tetel vongoro tesa xa diamu, tetel nanao nan, e tetel pupuluhen te hisen. Xil di lasoh sangas visal rute xa napus tan nen mahulong nggoni tas e mexal nggoni kilas, e lapo xat harp nae xil xa Hi tesa ni mi xil.

³Xil lakikei ni sisien xa nggoni ngan xa **Mosis**, eloheoh na Hi, tekikei ni tetiamu. Lakikei mak tangan lapet rat his ngan xa nggoni sulut sipsip labit,

“Hi Suv te Xeihen, holesok xil xa di opol ni be tellep e bos pupu. ^t

Obe suv toto te kantri xil vus, e sexien nam xil vus momal e be reitin.

⁴Moletin xil vus limerere ni xouk.

Xil lipet rat hisom ihe nesao, vengan xouk kestang obe eo. ^u

Kantri xil vus limei e limot minuk, vengan xa lapus kila xa sexien nam xil momal tevi.”

⁵Dutou ni, naketeh be nesao, e vangit **Nim Eo** na Hi, e napusi xa ladivin rat kaliko xa dakoe xol ut eo te **Nim Tavolin**.

^{v6}Masxaxa lu e he sav (7) lastal langgo en, e xil laleh xat longpangasien lu e he sav (7) tangan lisa ni mi moletin xil te ut etan. Xil lasing ni eising xil xa mieh xa lamese tevi e labos pupu, e lasoxolen kaliko xil da xol valhasexil xa kala nen nggoni gol. ^{w7}Di, tei e neta hat (4) xa meul, misa kekes ni pesin xa bos xa lapol ni ni gol ba mi masxaxa xil vus xa labe

^{q14:15} Soel 3:13; Mat 13:39-40 ^{r14:19} Aes 63:3; Rev 19:15 ^{s15:1} Lev 26:21; Rev 15:6 ^{t15:3} Eks 15:1; 15:11; Sam 92:5; 111:2; 139:14; Amos 3:13; 4:13; Rev 1:8; 4:8; 11:17; 16:7,14; 19:6,15; 21:22; Dut 32:4; Sam 145:17; Ser 10:10

^{u15:4} Ser 10:6-7; Sam 86:9; Mal 1:11 ^{v15:5} Eks 38:21; 40:34

^{w15:6} Lev 26:21; Rev 15:1

lu e he sav (7). Pesin nen xil ak lapolu ni ekaten na Hi xa meul vehakut tang.^{x8} Eas xa nggo minehinen te xeihen na Hi mei mise xat vangit Nim Eo. Misak ni, moletin ti tave vangite ba vuma ... longpangasien lu e he sav (7) xa masxaxa lu e he sav (7) laleh xati mei laduxoh hoxalite teni.^y

Masxaxa xil lateh rat pesin te longpangasien xil te ekaten na Hi ba xat moletin xil te ut etan

16 Di, nalong rae tei xa nggeih di misepin nggo *Nim Eo* ba mi *masxaxa* lu e he sav (7) bit, “Muha muteh rat pesin ihe lu e he sav (7) te longpangasien te ekaten na Hi ihe ut etan.”^z

² Misak ni, masxaxa xa diamu ni xil ba miteh longpangasien xa di e pesin nan be ut etan. Ngan ak misak ni utua tesa xil latal e ngan xil xa langgur simeleleean na vongoro tesa e lamot mi nanao nan. E xil lalong pangas xil holu xa holu pupu ven.^a

³ Di, masxaxa xa be lu (2) e xil miteh longpangasien xa di e pesin nan be tas, ma tas mei nggoni hatura na moletin xa mat. Ngan ak misak ni holesok xil vus xa lameul ladi e tas lalel.^b

⁴ Di, masxaxa xa be tol (3) e xil miteh longpangasien xa di e pesin nan be oeisal xil e vangoei xil. Misak ni oei xil vus ak biles mei be ra.^{c5} E nalong masxaxa xa di milaxat oei xil te ut etan bit, “Hi xa obe eo, oda xosali e oteta tetiamu,

lepisien xil ak xa di opol ni momal tang.^d
⁶ Moletin xil ak latesak ni re moletin nam xil tetel *provet* xil teleh.^e

Ma xoux di osa ra mi xil tangan limu ni. Nggo rin ak, di osa xoles naha xa latepol ni mi xil.”

⁷ Di, nalong rae tei nggo *hor* te vokon eo xa bit,

“!Hi Suv te Xeihen!^f

!Reitin li, lepisien nam xil be reitin e momal tevi!”

⁸ Di, masxaxa xa be hat (4) e xil miteh longpangasien xa di e pesin nan ba xat meteneai. Misak ni, meteneai mei mitin nggeih xa nggeih pupu e ngga purun tenbe moletin xil del upang teni.⁹ Meteneai ngga purun xil del titinen teni xa nggeih pupu. E neta sav xa mak, moletin xil lataviles ti ra tesaen nae xil, e latasa merereen mi Hi ti xa be eilep pupu. E-e, xil lasepsisil ba xat his ngan xa xeihen te longpangasien xil ak de hen.^g

¹⁰ Di, masxaxa xa be lim (5) e xil miteh longpangasien xa di e pesin nan ba xat von xeihen na vongoro tesa xa diamu. Misak ni, maluxolukukeni mei mikutaxol ut xil vus xa xi di milaxati. Moletin xil langas luhexil ve longpangasien xil xa di langguri.^{h11} Ma lasepsisil ba xat Hi te ut nesao ve longpangasien e utua tesa nae xil. E xil lataviles ti vari ra sexien tesa nae xil.ⁱ

¹² Di, masxaxa xa be tei e he sav (6) e xil miteh longpangasien xa di e pesin nan be oeisal Upretis xa eilep. Misak ni oeisal nen ak bemei mes e misa suse mi suv toto xil xa ladi e kantri xa ba ni

^{x15:7} Sam 75:8; Aes 51:17,22; Ser 25:15; Rev 14:10; 16:19

^{y15:8} Eks 40:34; 1King 8:10-11; 2Kron 5:13-14; Aes 6:4; Esek 44:4

^{z16:1} Aes 66:6; Rev 16:7; Sam 69:24; Ser 10:25; Esek 22:31; Sef 3:8 ^{a16:2} Eks 9:10; Dut 28:35; Rev 13:12-17; 14:9,11; 19:20; 20:4 ^{b16:3} Eks 7:17-21

^{c16:4} Eks 7:19-24; Sam 78:44 ^{d16:5} Sam 119:137; 145:17; Dut 32:4; Eks 3:14; Rev 1:4,8; 11:17 ^{e16:6} Sam 79:3; Aes 49:26 ^{f16:7} Amos 3:13; 4:13; Rev 1:8;

4:8; 11:17; 15:3; 16:14; 19:6,15; 21:22; Sam 19:9; 119:137; Rev 19:2 ^{g16:9} Rev 9:20-21; 16:11,21 ^{h16:10} Eks 10:21; Aes 8:22 ^{i16:11} Rev 9:20-21; 16:9,21

ist tangan moletin te vaeen nae xil lak-ila lakakao en lava. ^{j13}Di, napus ninin tesa tol (3) xa lapus xatel latnggoni frog. Xatel kekes, tei mistal nggo vulongge **Dragon**, tei mistal nggo vulongge vongoro tesa, e tei mistal nggo vulongge **provet** te luvosan nan. ¹⁴Frog xatel ak latbe **ninin tesa** xatel xa di latopol ni merekel xil xa tellep. Ninin tesa xatel ak latbe visal suv toto xil vus te ut etan tengangan latileh viton xil lihe rute tei takes. Lamei vituei tangan lisak mesen xil ve vaeen xa eilep xa ite Melengien te Lepisien na Hi te Xeihen. ^{k15-16}Xil limei vituei e rute xa lakesi ni ‘Armagedon’ nggo sepinien Hibru.

Melele xa di napusi, Suv Iesu biteni bit, “!Muteong kuhi! Inou di namei nggoni moletin te kanen tei e melele xa xamim munakil ti. ^{1E}tuxolxatien na Hi iti mi ngan xa tit iketeh e tit isak mesen xi vehakut ve mei rilomunen navan. Xi ixoni moletin xa di miketeh kuhi e mising pipin tangan nave unoun ti xa takavue xol xi ti xosxa itemanin ni neta tei e vongien.”

¹⁷Di, **masxaxa** xa be lu e he sav (7) e xil miteh longpangasien xa di e pesin nan be mesavuol. Melele xa pol ni mak, rae te xeih tei mikei nggo von xeihen xa de Nim Eo bit, “!Bus tuei!” ^{m18}E melele nen ak vari, an milangas, veta mirum e posou, e lul xa eilep milil. Lul ak minggeih mili sen lul sav xil xa lat-

estal e melele xa Hi teling moletin xil e ut etan duxoh xosali. ⁿ¹⁹Misak ni, tan te taon xa eilep te hal **Babilon*** mesel be rin tol (3), e taon xil xa latellep te kantri xil vus lakiri lel. Hi pol ni mak vengan xa minem xat tesaen xil na ngan xil te taon xa eilep te hal Babilon, e misa pangasien te ekaten nan xa eilep ba xat xil. ^{o20}Melele xa lul milil nggeih mak, aelan xil vus lamerir labe huinep te tas e vathu xil vus lakiri lel mei labe tovuol tang. ^{p21}Merut aes xil xa latellep lakiri langgo tilang hat xa kilo te xil kekes duxoh hanutap lu (40). Melele xa aes xil ak lakiri mak, longpangasien teni nggeih xa nggeih pupu, ma moletin xil labiles e di lasepsisil Hi ven. ^q

Hi milepis rin na hoeaso Babilon†

17 Di, tei e **masxaxa** lu e he sav (7) xa latepo pesin lu e he sav (7) be-mei visal nou e bit, “Amei, nipisen ni minuk itep iaxa Hi ilepis rin na hoeaso xa eilep. Xi be taon tei xa eilep xa lakili ni de visal oeisal xil holu. ^{r2}Suv toto xil te ut etan latepol ni sexien tesa tetela, e moletin xil te ut etan mun latehur sexien te hoeasoen nan texoni ngan xa lamu uaen man teha vuma ... mei latetalang ni.” ^s

³Melele xa misepin minou bus. **Ninin Eo** mei mise xat inou, e **masxaxa** ak nggur nou nabe uruvuol tei. E rute ak, napus atou tei xa di dotan e vongoro tesa

* **16:19** Babilon be sepinien xuxus usil taon xa mahulong te hal Rom xa vatit kavmen xil ladi en.

† **17:0** Babilon be sepinien xuxus usil taon xa mahulong te hal Rom.

j16:12 Aes 11:15; 44:27; Ser 50:38; 51:36 **k16:14** Rev 19:19; Amos 3:13; 4:13; Rev 1:8; 4:8; 11:17; 15:3; 16:7; 19:6,15; 21:22

l16:15-16 Mat 24:43-44; Luk 12:39-40; 1Tes 5:2,4; 2Pit 3:10; Rev 3:3

m16:17 Aes 66:6; Rev 16:1

n16:18 Eks 19:16-19; Rev 4:5; 8:5; 11:19; Dan 12:1

o16:19 Sam 75:8; Aes 51:17,22; Ser 25:15; Rev 14:10; 15:7

p16:20 Rev 6:14; 20:11 **q16:21** Eks 9:24; Rev 11:19; 16:9,11

r17:1 Ser 51:13; Rev 17:15 **s17:2** Aes 23:17; Ser 51:7; Rev 14:8; 18:3

xa diamu. Tenben pipili, e vatin be lu e he sav (7) xa hon xil he xalu (10) ladi e xil. E ladis his tellep xil xa lakan ni ra Hi mei labe nan mikapis xol tenben. ^{t4} Atou nen ak mising ni eising na eilep xil xa be pepol e pipili. Misoxolen gol, hat tehos xil xa laminehin kuhi, del valit vatiei xil te tas xa bos. Di hen, xi di nggur xat kap tei xa be gol xa polu ni holesok xil xa mumu e be muis, xa labe huit hoeaso-nan xil. ^{u5} E valnaon, ladis his xuxus tei xa koute teni mak, “Ngan ak **Babilon** xa eilep, nine hoeaso xil vus e vatit sexien tesa xil te ut etan.” ⁶ Atou nen ak di misak ni moletin sav xil di lamu vin moletin xil na Hi e ngan xil xa di labithiten reitinen usil Iesu. E napusi xa atou ak mitalang ni rexil nggoni ngan xa mitalang ni uaen. E melele xa napusi, natemanin pupu ni. ^v

⁷ E masxaxa misis nou bit, “?Otemanin veneh? Inou nihit lelen koute te nenenien xuxus usil atou ak itel vongoro ak xa xi di dotan en xa vatin lu e he sav (7) xa hon he xalu (10) da en. ⁸ Vongoro xa opusi, xi teta tetiamu, tara ti mun xosali ak, e nave nousav ti, ti imea reling Vangavul xa hoxalite teni tovuol. Ti, litela iha e lihu vini. Moletin xil te ut etan xa hisexil latnatisi ti vati e Vanuvei te Meulien tetiamu e melele xa Hi tepeas ni ut etan, xil litemanin ni vongoro ak. Reitin, xil litemanin melele xa lipusi xa vongoro ak teta tetiamu, tara ti mun xosali, e imei istal mun e melele xa ti imei. ^w

⁹ “Koute te metuveen ak mei imese kuhi mi ngan xil xa nenemien te metisouen di e xil. Vatin lu e he sav (7) na vongoro ak be vathu lu e he sav xa atou

ak di dotan en. ^z Vatin lu e he sav (7) ak, koute teimun be suv toto lu e he sav (7). ¹⁰ Suv toto lim (5) e xil lakesae ngamu, tei di milaxat ut xosali, e ngan xa be kor e xil, xi tamei ti mu. Melele xa imei, Hi imaen ni ilaxat ut nave nousav ti. ¹¹ E rin te vongoro tesa, ngan xa teta tetiamu e tara ti mun xosali, xi mun be suv toto xa be tol e he sav (8) e xil. E suv toto ak be tei e suv toto lu e he sav (7) tetiamu, e Hi itela iha e ihu vini.

¹² “Hon he xalu (10) xa opusi, xil labe suv toto xil xa latahur ti mu lelatien nae. Xil lihur xeihen te lelatien nae te haoa tei takes tangan lilaxat ut xil te ut etan itel vongoro tesa. ^{x13} Suv toto he xalu (10) nen ak, nenemien nae ihe tei takes tangan limaen xeihen te lelatien nae mi vongoro tesa. ¹⁴ Xil ha livae itel ngan xa nggoni sulut sipsip te sanien eo itel ngan xil xa mikes xil e bosei xil tenggan lihusili vehakut. Xi ihas tan ni vongoro tesa ak itel ngan xil xa di langgusili. Ihas tan ni xil vengan xa xi be Suv Toto xa mili sen suv toto sav xil, e xi be Vat mili sen vat sav xil.” ^y

¹⁵ Masxaxa biteni mun minou bit, “Oeisal xil xa opus atou xa be hoeaso di dotan en, xil labe vole usil moletin xil xa langgo hisit moletin savsav xil, langgo vatimol savsav xil, langgo kantri savsav xil, e langgo sepinien savsav xil te ut etan. ¹⁶ Hon he xalu (10) del vongoro xa otepusi, xil mei iexil ti iat hoeaso ak. Xil mei lileh rerat holesok nan xil vus e listokovein ni ika hon tang iha. Reitin, xil lileh rerat sen holesok nan xil e lisa upang ia len ni. ^{z17} Suv toto he xalu (10) nen ak, Hi miling nenemien nan di e xil tenggan lisak ni sepinien nan mei istal ihe

^z17:9 Taon te hal Rom, latekili ni tetotan tete vathu lu e he sav (7).

^t17:3 Rev 13:1; 17:7-12 ^u17:4 Esek 28:13; Rev 18:16; Ser 51:7

^v17:6 Rev 18:24; 19:2 ^w17:8 Dan 7:3; Rev 11:7; 13:1; Eks 32:32,33; Sam 69:28;

Dan 12:1; Plp 4:3; Rev 3:5; 13:8; 20:12,15; 21:27 ^x17:12 Dan 7:24

^y17:14 Dut 10:17; Dan 2:47; 1Tim 6:15; Rev 19:16 ^z17:16 Lev 21:9; Rev 18:8

reitin ixo rin xa limaen xeihen te relaxatien nae mi vongoro tesa ituxoh melele xa lipol ni imak mi atou ak. ¹⁸Atou xa otepusi xiak, taxeak xi be taon xa eilep xa nggur xeihen te relaxatien xa eilep mak mu e suv toto xil vus te ut etan ladi pe hen.”

Hi misak ni holesok xa ladi e taon te hal Babilon^f lakiri lel

18 Dutou ni ngan ak, napus *max-axa* teimun xa bemei etan nggo ut nesao. Relaxatien nan mahulong e minehinen te xeihen nan milelul mikapis e ut xil vus te ut etan. ²Xi miki be nesao bit,

“!Hi misak ni taon xa eilep te hal *Babilon* mikiri lel!^a

!Xi mikiri lel vari!

Moletin xil teni lihe tovuol mun.

Vontoen xil teni imei ihe von xusen na temat xil e *ninin tesa* xil tang.

Tuman tesa xil kestang ha ti lixus en.

³Taon xa eilep xiak bisu ni ekaten na Hi mak vengan xa sexien nan nggoni atou xa be hoeaso,

xa milihni nenemien na moletin xil te kantri xil vus tangan mei lipol isa itela.

Reitin, taon ak di ihur pangasien vengan xa pol misa del suv toto xil holu te ut etan,

e vengan xa nggal holesok holu xa eheien nan di en ra moletin te posen xil holu te ut etan, ma misak ni mani nae be holu ven.”^b

⁴Di, nalong rae tesav teimun nggo ut nesao bit,

“!Moletin navan xil mumea! !Mumea rani!

!Munavituei ti natel *tesaen* nan xil!

!Muxuxou kuhi tangan munahur ti longpangasien natela!^c

⁵Vengan tesaen nan xil mitihu ba duxoh ut nesao,

e Hi minem xat sexien nan xil xa mikavui.^d

⁶Mupol ni mini ixoni ngan xa xi tepol ni mi xamim.

Musa xoles longpangasien mini ihe valu ve naha xa xi tepol ni mi xamim.

Kap te longpangasien xa xi tesa ni mi xamim tangan mumu ni, mutah uanen te longpangasien iha en xa xeihen teni ihe valu tangan xi sung imu ni.^e

⁷Musa longpangasien ihe eilep mini e mupol ni ilonge isa ihe holu.

Reitin, mupol ni imak ipin ni his xa eilep xa xi tehuri e holesok xil holu te ut etan xa xi mitihu ni ve xi tasen.

Vengan xi misep koai mi xi tasen bit,

‘Inou nabe Kwin xa eilep xa relaxatien navan mahulong.

Natave tunau tei ti e nasakras nalonge vasa.”^f

⁸Ve sepinien te koaien nan, longpangasien xil mei ipurun ni e ihu vini e melengien tei takes: ⁸ xi ihisu ni mesien, tangen, e mae kekatien.

Upang mei ia len ni,

vengan xa Hi Suv xa di milepis rin nan, xeihen nan mahulong.”

⁹Suv toto xil latepol ni sexien tesa tetela e latepus hosien tetela ve holesok

^f**18:0** Babilon be sepinien xusus usil taon xa mahulong te hal Rom xa vatit kavmen xil ladi en.

^a**18:2** Aes 21:9; Ser 51:8; Rev 14:8; Aes 13:21; 34:11; Ser 50:39

^b**18:3** Aes 23:17; Ser 51:7; Rev 14:8; 17:2

^c**18:4** Aes 48:20; 52:11; Ser 50:8; 51:6,9,45; 2Kor 6:17

^d**18:5** Sen 18:20-21; Ser 51:9 ^e**18:6** Sam 137:8; Ser 50:15,29; 2Tes 1:6

^f**18:7** Aes 47:7-9 ⁸**18:8** Rev 17:16; Ser 50:34

xil te ut etan xa tehuri. E melele xa xil lipus eas te upang xa di ngga len ni, litesi e simetexil ikiri.^{h10} Xil lisoh sotin vengon xa ulixil ikan tangan linahur ti pangasien natela. Xil lihit, “!Aue li, misa xa misa pupu mi taon xa eilep te hal Babilon! Neta sav xa xeihen nan mahulong, e nggur sen longpangasien te lepisien nan e haoa tei takes.”ⁱ

¹¹ Moletin te posen xil holu te ut etan, xil mun litesi e simetexil ikiri, vengon moletin ti mun naxal holesok ra xil.
¹² Reitin, moletin ti mun naxal neta xil xa lapol ni ni gol, silva, hat xa minehin, e valit vatiei xil te tas xa bos xa bos. ?Reitin, visi mun ixal eising hos xil xa mieh, pipili, e pepol del eising xa bos xa lakesi ni silk? Ihe tovuol. E moletin ti mun naxal neta xil xa lapol ni ni liei xil xa bos, ni luh vongoro xil, ni aean xa lakesi ni brons, e ni hat xa lakesi ni marbel.^{j13} Neta xil xa di misak ni anien von mikon bos nggoni sinamon, e vokon xil xa nggoni mir e **forangkansen** liti nga tang. Anien xil xa langgoni uae, oel, pulaoa e **uit**, linapos ni ti mun. Moletin ti mun naxal vongoro sae xil nggoni buluk, sipsip, e hos natel kat teni. Moletin tovuol tangan vaxal rat meulien na moletin xil tangan mei vahe slev nae xil.
¹⁴ Moletin xil xa di lapos ni holesok xil lihiteni iha mini lihit, “Holesok xil xa bos xa iem bei tangan uhuri lakesae relin-guk. E holesok xil xa otepolu ni tetiamu tetel holesok xil xa tesak ni xouk di ote-sep koai ven, xil latetasil ranuk xosali, e onakamet ti mun.”

¹⁵ Ngan xil ak langgur mani holu nggo holesok xil xa xi texale ra xil, melele xa lapus longpangasien na Babilon, lasoh ladi nga sotin vengon ulixil mikan

xa linahur ti longpangasien natela. Xil lamuis e ladang labit,^k

¹⁶ “!Aue li, ngan ak misa xa misa pupu! Tetiamu, taon xa eilep te hal Babilon teting ni eising xil xa tehos xa tehos xa temieh, tepili e tehe pepol.

Tetiamu, xi tesoxolen gol, hat xil xa minehin, e valit vatiei xil xa tehos xa tehos.^l

¹⁷ !E mapusi xa holesok nan xil vus lakesae relingi e haoa tei takes!”^m

Melele xa vatihos xil te tuturil, boskru xil, moletin xil xa ladi en, e moletin sav xil xa lakamet meulien nae e tas lapusi, xil lasoh ladi nga sotin.¹⁸ Melele xa lapus eas te upang xa di ngga len taon ak, lamuis nggeih e labit, “!Aue li, taon sav tovuol mun vaxoni taon xa eilep xiak!”
ⁿ¹⁹ Ma, xil laso vulmeas be vatixil tangan vapisen ni xa lalonge misa holu, sime-texil mikiri e ladesi labit,^o

“!Aue li, ngan ak misa xa misa pupu! Tetiamu taon xa eilep te hal Babilon teleh neta holu texo tuturil xil, e moletin xil te tuturil latehur mani holu texo en.

!E haoa tei takes, langgu len ni vari!”

²⁰ Di, nalong rae tei xa bit,^p

“!Xamim te ut nesao, muhesi xamim vengon xa langgu len taon xa eilep xiak!

Xamim moletin xil na Hi, **eloheoh** xil, e **provet** xil mun, mulonge ihos, vengon xa Hi misa pangasien te lepisien nan mini ve sexien tesa xil xa xi tepol ni mi xamim.”

²¹ Di, napus vatixar tei na masxaxa xil bemei e po rat vatihat tei xa meas pupu e miso ni be tas. Melele xa pol ni biteni bit,

^h18:9 Esek 26:16; 27:30-35 ⁱ18:10 Esek 26:17; Dan 4:30

^j18:12 Esek 27:12,13,22 ^k18:15 Esek 27:36 ^l18:16 Esek 28:13; Rev 17:4

^m18:17 Esek 27:27-29 ⁿ18:18 Esek 27:32 ^o18:19 Esek 27:30-34

^p18:20 Dut 32:43; Sam 96:11; Aes 44:23; 49:13; Ser 51:48

“Usil rin tak, Hi ipo rat taon xa eilep te hal Babilon e iso ni ihe etan,

e linapus ti mun moletin xil en. ^q

²²E taon ak, linalong ti mun rumen te harp, flut, hon mu rae moletin en.

Ngan xil xa di labol, mu laseh liei, mu lapen ni neta,

linapus ti mun xil en.

Tangalen na ngan xil xa di labas utut uit mei be pulaoa, linalong ti mun.^f

²³Laet napili ti mun en.

E taon ak, rumen te sien e melele xa tiramue miteli del atou tei,

linalong ti mun.^s

Tetiamu, moletin xil xa di latepos ni holesok xil en,

xil mei latehe eilep mak mu e ut xil vus te ut etan.

E del sexien te vongou nan,

xi miluvos moletin xil vus te ut etan.”

²⁴Hi misa pangasien te lepisien nan mi taon te hal Babilon ak vengan xa mikamet re provet xil e re moletin nan xil en. Reitin, xi pusi xa Babilon tehas vin moletin xil holu xa latexo ut xil vus te ut etan. ^t

Ngan xil te ut nesao lames Hi ve pangasien xa misa ni mi taon te hal Babilon

19 Dutou ni ngan ak, nalong tangalen tei xa mahulong nggo ut nesao xa nggoni vanut moletin tei xa mahulong xa lakei be nesao labit, “!Memesien ba mi Hi!

!Xi kestang di miteh meulien, e minehinen te xeihen nan mahulong pupu!

²Lepisien nan xil be reitin e momal. ^u

Xi misa pangasien ba mi hoeaso xa tepurun ut etan tetel sexien tesa nan xil.

Reitin, Hi misa xoles longpangasien mini vengan xa xi tehu vin moletin te polien nan xil.”^v

³Xil lakei be nesao vatei mun labit,

“!Memesien ba mi Hi!

Vengan xa xi tesak ni eas te upang xa di ngga len taon xa eilep xiak ve sexien tesa nan xil

tengan ihe nesao vehakut xa vehakut tang.”^w

⁴Elda hanutap tei e hat mun (24) e neta hat (4) xa lameul ladi lamot mi Hi xa dotan de von xeihen nan.^x Xil labiteni labit,

“!Reitin! !Memesien ba mi Hi!”

Moletin xil na Hi labesi xil ve tetelien na ngan xa nggoni sulut sipsip te sanien eo

⁵Di, nalong rae tei xa di misepin nggo visal von xeihen na Hi xa biteni bit,

“!Xamim xa di mupol mi Hi nar, mumesi!

!Xamim xa mumerere ni,

ngan xil xa latellep ba duxol ngan xil xa latereli, mumesi!”^y

⁶Di, nalong tangalen tei xa mahulong nggo ut nesao xa nggoni vanut moletin tei xa mahulong. Xil lakei nggeih nggoni melele xa tahe xa eilep di miti hat xil mu nggoni melele xa veta di posou nggeih.^z Nalong xil di lakei be nesao labit,

^q18:21 Ser 51:63-64; Esek 26:21 ^r18:22 Aes 24:8; Esek 26:13

^s18:23 Ser 7:34; 16:9; 25:10; Aes 23:8; 47:9 ^t18:24 Ser 51:49; Esek 24:7; Rev 6:10; 17:6; 19:2 ^u19:2 Sam 19:9; 119:137; Rev 16:7 ^v19:2 Dut 32:43; 2King 9:7; Sam 79:10; Rev 6:10 ^w19:3 Aes 34:10 ^x19:4 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:10,15; 21:5

^y19:5 Sam 22:23; 134:1; 135:1; 115:13; Rev 11:18

^z19:6 Esek 1:24; 43:2; Rev 1:15; 14:2

“!Memesien ba mi Hi!

Vengan Hi nar xa be Hi Suv te Xeihen, xi be suv toto xa di milaxat holesok xil vus.^a

⁷!Ma rihesi xir e ripet rat hisen!

Rimes ngan xa minehinen te xeihen nan mahulong.

Rimesi vengam xa melengien te tetelien na ngan xa nggoni sulut sipsip di bemei,

e atou nan misak mesen xi ven.

⁸Mi atou nan, lasa eising hos tei xa mieh e minehin vengam memese mak mu.”^b

(Eising ak be sexien hos xil na moletin xil na Hi.)

⁹Di, masxaxa biteni minou bit, “Utis sepinien ak: Tuxolxatien na Hi iti mi ngan xil xa lasilasil ni xil tangan lave anien te tetelien na ngan xa nggoni sulut sipsip.” E masxaxa bit rilomun ni minou bit, “Ngaran ak be sepinien te reitinen na Hi.”^c

¹⁰Melele xa biteni mak inou natingeiril e namot nabe tan visal len. E xi biteni minou bit, “!Onapol ni ti namak! Inou mun nabe ngan xa di napol mi Hi nggoni xouk e nggoni tumali xil xa lake reitin e sepinien usil Iesu. !Umot mi Hi keatang! Vengan reitinen usil Iesu be vatite te sepinien xa provet xil latehit lenen ni texo Ninin na Hi.”^d

Ngan xa miloh e hos xa mieh bemei e bas tan ni moletin tesa xil

¹¹Di, napus puiteh te ut nesao misaha, e natemanin xa napus hos tei xa mieh

di mistal nggo en. E ngan xa di miloh en be xi xa lakesi ni ‘Reitinen e Vatit Nenesien.’ Del sexien xa momal, xi di milepis rin na moletin xil, e di bae del elu nan xil. ^{e12}Meten minehin nggoni upang, e vatluvoluv te relaxatien holu di e vatin. Ladis his tei xa eilep pupu da en xa mosav xil latakil ti, xi keatang mikil koute teni. ^{f13}E hisen teimun be ‘Vatit Sepinien na Hi.’ E ra ba xat rin xil vus te eising te mieh xa mising ni. ^{g14}Moletin xil te vaeen te ut nesao langgusili. Xil mun di laloh e hos xil xa lamieh e lasing ni eising xa mieh xa memese kuhi. ¹⁵Tiei xa mikan mistal nggo vulongen, e di bas tan vuol ni moletin tesa xil e kantri xil dela. Lelaxatien nan ixeh e ileh viton moletin tesa xil tangan ihu lenen xil e ipisen ni xa ekaten na Hi te Xeihen mahulong ba xat xil ve sexien tesa nae xil. Ipol ni mi xil ixoni melele xa labekis huit grep xil tangan sute valeh vaxo en. ^{h16}Latetis his tei tete eising nan xa teviei e tete marlen mun xa tehit, “Ngaran ak Suv Toto na suv toto sav xil, e Vat na vat sav xil.”ⁱ

¹⁷Di, napus *masxaxa* tei xa di misoh de meteneai. Xi miki nggeih ba ni tuman xil vus xa di langga e tilang hat bit, “!Mumei! !Mumei vituei ve anien xa eilep na Hi! ^{j18}Mumei e mua tiei na suv toto xil, na vat xil te vaeen, na moletin te vaeen nae xil, na hos xil e na moletin xil mun xa di laloh en. Mumei e mua tiei na moletin xil vus ak: ngan xil xa vexil memase ba duxoh ngan xil xa labe slev,

^a19:6 Esek 1:24; 43:2; Rev 1:15; 14:2; Eks 15:18; Sam 22:28; 93:1; 97:1; 99:1; Dan 7:14; Sak 14:9; Rev 11:15 ^b19:8 Aes 61:10 ^c19:9 Mat 22:2-3; Luk 14:15

^d19:10 Pol 10:25-26; Rev 22:8-9

^e19:11 Esek 1:1; Rev 4:1; Sak 1:8; 6:3,6; Rev 6:2; 1:5; 3:14; Sam 96:13; 11:4

^f19:12 Dan 10:6; Rev 1:14; 2:17-18 ^g19:13 Aes 63:1-3; Sion 1:1,14

^h19:15 Aes 49:2; Rev 1:16; 2:12,16; Sam 2:9; Rev 12:5; Aes 63:3; Tang 1:15; Soel 3:13; Rev 14:20; Amos 3:13; 4:13; Rev 1:8; 4:8; 11:17; 15:3; 16:7,14; 19:6; 21:22

ⁱ19:16 Dut 10:17; Dan 2:47; 1Tim 6:15; Rev 17:14 ^j19:17 Esek 39:17-20

ngan xil xa latellep ba duxoh ngan xil xa latereli.”

¹⁹Di, napus vongoro tesa xa testal ra tas tetiamu, xi bemei vituei del suv toto xil te ut etan, e del moletin te vaeen nae xil mun. Xil lamei vituei tangan lavae vatel Iesu xa di miloh e hos nan e vatel moletin nan xil mun. ^{k20}Xi dal xat vongoro tesa del **provet** te luvosen nan xa tepol ni merekel xil pe met vongoro ak. Del merekel nae lateluvos ngan xil xa latehur simeleleen na vongoro e ngan xil mun xa latemot mi nanao nan. Iesu miso te meul ni xalu lube upang xa eilep xa di pili vehakut nggoni vulut upang te venu. ^{l21}Di, Iesu, xa miloh e hos nan, bas vin moletin te vaeen xil vus na vongoro ak del tiei xa mistal nggo vulongen. E tuman xil lamei langga vin xil ni tiei na moletin xil ak.^m

Moletin xil na Hi lalaxat ut etan haram taosen tei (1000)

20 Di, napus **masxaxa** tei bemei nggo ut nesao, e xi nggur xat ki te Vangavul xa hoxalite teni tovuol de hen del sen tei xa meas e eilep pupu. ^{2.n3}Reitin, masxaxa miso ni be vangavul ak, mikoe xol puiteh teni, e milok xole nggeih. Pol ni mak tangan Temat misakras mun valuvos moletin xil te kantri xil ituxoh melele xa haram taosen tei (1000) mei itavi. E itutou ni haram xil ak, Hi imaen ni ha ven imase rilomun ihe vuteili tang. ^o

⁴Di, napus moletin xil ladotan ladi e von xeihen nae xil e Hi maen xil lalapis rin na moletin xil. Napus ngan xil mun xa, tetiamu, lateta xoteh vatixil ven-

gan xa latehithiten reitinen usil Iesu e sepinien na Hi. Reitin, ngan xil ak latnamot ti mi vongoro tesa mu nanao nan, e latnahur ti simeleleen nan tenati e valnaoxil mu e hexil. Napus ngan xil ak lamea rilomun ra maten e lameul lalaxat ut etan nggoni suv toto xil del Iesu Kristo haram taosen tei (1000). ^{p5}Ngan ak be mea rilomunen xa diamu. Moletin sav xil xa lalel limea rilomun itutou e melele xa haram taosen tei (1000) mei itavi. ^{6q}

Laso Temat be Von Upang

⁷Melele xa haram taosen tei (1000) mei itavi, Hi imaen Temat ha ven imase ra nim te xeih nan. ⁸E xi iha iluvos moletin xil te kantri xil iha ituxoh rin xil vus te ut etan, e likes xil ixo vole tei lihit langgoni Gog e Magog tetiamu. Temat ileh viton xil limei e rute tei takes tangan livae e rin nan, e xil mei lihe holu xa holu pupu ixoni suvien xil te tas xil vus te ut etan. ^{r9}Xil mei likakao xol ut xil vus e ti likapis xol rute xa moletin xil na Hi di lapol ni horao mae xil en e likapis xol Serusalem, taon xa eheien nan di en. E Hi isak ni upang ixo ut nesao e ia len xil. ^{s10}Ti, Temat xa di muluvos xil, Hi isak ni liso ni ihe Upang xa eilep xa nggoni upang te venu, rute xa lateso vongoro e **provet** te luvosen nan luteha en ngamu. E rute ak, upang ia xil melengien e vongien, e lilong pangas xil vehakut xa vehakut tang. ^t

Melengien te lepisien bemei

^{11u12}E napus moletin xil vus xa lalel ngamu mei lasoh sangas ni von xeihen

^k19:19 Sam 2:2 ^l19:20 Rev 13:7,12-17; 14:9,11; 16:2; 20:4,10,15; Aes 30:33

^m19:21 Esek 39:17,20 ⁿ20:2 Sen 3:1; Rev 12:9 ^o20:3 2Pit 2:4; Siud 1:6

^p20:4 Dan 7:9,22,27; Luk 22:30; 1Kor 6:2; Rev 13:17; 14:9,11; 16:2; 19:20

^q20:6 Rev 20:14; 21:8; Eks 19:6; Aes 61:6; 1Pit 2:5,9; Rev 1:6; 5:10

^r20:8 Esek 7:2; 38:2 ^s20:9 2King 1:10; Esek 38:22; 39:6

^t20:10 Aes 30:33; Rev 19:20; 20:15; Sen 19:24; Sam 11:6; Esek 38:22; Rev 21:8

^u20:11 Dan 7:9-10; Mat 25:31-46; Sam 114:3,7

ak, ngan xil xa latellep ba duxoh ngan xil xa latereli. Di, napusi xa lalang vanuvei xil xa ladis xat sexien xil vus na moletin xil kekes di en.^v Di, Hi milepis rin na ngan xil xa latemat nggusil sexien nae xil xa latetis xati teti en, e misa naha xa momal mi xil kekes.¹³ Tas misa rat ngan xil xa lalel en. E maten e Hedis, xalu mun lusa rat ngan xil xa lalel ladi e xalu. Reitin, ngan xil vus xa lamat, Hi milepis rin nae nggusil naha xa xil latepol ni.^{w14} Di, Maten e Hedis, Hi misak ni laso xalu lube Upang xa be maten xa be lu nen xa be te nousav.^{x15} Melele xa labuli Vanuvei te Meulien xa latetis xat his moletin xil xa lihur meulien sal teti en, ngan xil xa latakamet his nae ti vati en, laso xil labe Upang nen ak.^y

Ut etan e tilang hat mei lube neta hu

21 Di, napusi xa ut etan e tilang hat mei lube neta hu, e ut etan e tilang hat tetiamu lutekesae, e tas tovuol mun.^{z2} E napusi xa taon te hal **Serusalem** mun mei be neta hu. Reitin, taon eo ak mei mistal nggo visal Hi e ut nesao, e bemei etan. Taon ak bos xa bos e napusi nggoni atou xa mising bos pupu ve tetelien nan tangan vaha vapus tiramue nan.^{a3} Di, nalong rae tei xa nggeih misepin nggo von xeiheh na Hi bit, “!Xosali, tim sa Hi de vis moletin xil te ut etan!

Xi ite visal xil, e xil lihe moletin nan xil. Hi vari iaxa iti mi xil, e ihe Hi nae.^b

⁴ Xi isihi simetexil ra metexil.^c Maten e tangan ihe tovuol, isien e longpangasien ivus vari. Vengan sexien xil tetiamu te longpangasien e maten, linapus ti mun.^d

⁵ Di, ngan xa dotan de von xeiheh na eilep biteni bit, “Mupusi. Xosali, di napol ni holesok xil mei be neta hu.” Di, xi biteni mun minou bit, “Utis sepinien ak, vengan xa sepinien xil ak be reitin e moletin xil likila liling nenesien nae iti en.”

^{e6} E xi biteni bit, “!Bus tuei, napol vuol ni naha xa nateling xati! E holesok xil vus xa di, inou nateta tetiamu ni e ha nita itutou ni. Reitin, inou nabe vatite teni, e nihe hoxalite teni mun. Mi ngan xil xa meruru nggat xil, inou nisa oei ixo vangoei te meulien sal mi xil ixoni sanien tang tangan limu ni.^{f7} Ngan xil xa late-soh texeih e vaeen te neketen, xil lihur holesok xil ak ra nou tangan ihe nae ve-hakut. E inou nihe Hi nae e xil lihe horamue navan xil.^{g8} E rin na ngan xil xa labe vat ulikanen, ngan xil xa labiles ra Iesu, ngan xil xa langgusil sexien xil te ut etan, ngan xil xa labas vin moletin, ngan xil xa lapol ni sexien te hoasoen xil, ngan xil xa lapol ni eimas, ngan xil

^v20:12 Sam 28:4; 62:12; Pro 24:12; Aes 59:18; Ser 17:10; Rom 2:6; 1Kor 3:8; 2Kor 11:15; 2Tim 4:14; 1Pit 1:17; Rev 2:23; 18:6; 22:12; Eks 32:32,33; Sam 69:28; Dan 12:1; Plp 4:3; Rev 3:5; 13:8; 17:8; 20:15; 21:27 ^w20:13 Rev 1:18

^x20:14 1Kor 15:26,55 ^y20:15 Aes 30:33; Mat 25:41; Rev 19:20; 20:10; 21:8; Eks 32:32,33; Sam 69:28; Dan 12:1; Plp 4:3; Rev 3:5; 13:8; 17:8; 20:12; 21:27

^z21:1 Aes 65:17; 66:22; 2Pit 3:13

^a21:2 Aes 52:1; Rev 3:12; Aes 61:10; Hib 11:10,16

^b21:3 Lev 26:11-12; 2Kron 6:18; Esek 37:27; Sak 2:10; 2Kor 6:16 ^c21:4 Aes 25:8; Rev 7:17 ^d21:4 Aes 35:10; 65:19 ^e21:5 1King 22:19; 2Kron 18:18; Sam 47:8;

Aes 6:1; Esek 1:26-27; Rev 4:2,9; 5:1,7,13; 6:16; 7:10,15; 19:4; 2Kor 5:17 ^f21:6 Rev 1:8; 22:13; Aes 44:6; 48:12; Rev 1:17; 22:13; Aes 55:1; Sion 7:37; Rev 22:17; Sam 36:9; Ser 2:13 ^g21:7 2Saml 7:14

xa lamot mi nanao xil, e ngan xil xa labe vat luvoson xil; ngan xil vus ak lihe Upang xa di pili vehakut nggoni upang te venu. Ngan ak be maten xa be lu nen xa ita vehakut tang.”^h

Serusalem mei be neta hu e bemei e ut etan

⁹Di, napus tei e *masxaxa* lu e he sav (7) xa latepo xat pesin lu e he sav (7) te longpangasen kor xil. Xi bemei e biteni minou bit, “Amei, e nipisen ni minuk atou xa iteli itel ngan xa nggoni sulut sipsip.”¹⁰Di, *Ninin* na Hi mei mise xat inou e masxaxa nggur nou mabe nesao e hu tei xa mahulong. E rute ak, xi pisen Serusalem hu minou xa be taon eo na Hi. E napusi xa nggo visal Hi e ut nesao e di bemei e ut etan.¹¹ Minehinen te xeihen na Hi di en. Reitin, napus minehinen teni nggoni hat hos tei xa laet di milelue en, nggoni saspa xa mexal nggoni kilas.¹² Vioh te taon eilep pupu e teviei be nesao. Puiteh teni xil labe lu e le tei (12) e masxaxa lu e le tei (12) laketeh xol xil. Nesao e puiteh xil ak ladis his vati-mol lu e le tei (12) na mol-Isrel xil di en.¹³ Puiteh tol ladi e rin xil vus: tol e rin xa be ist, tol e rin xa be saot, tol e rin xa be not, e tol e rin xa be wes.¹⁴ Vioh te taon ak, vatite teni be hat xil xa mahulong lu e le tei (12), e ladis his *eloheoh* lu e le tei (12) na ngan xa nggoni sulut sipsip di e xil.

¹⁵Masxaxa xa misepin minou nggur liei tei xa be gol xa mikila ivuli mita xil ni. Ma napusi xa xi ba e buli mita xil te taon ak, del mita te puiteh e vioh

xil mun teni.¹⁶ Taon ak, rin xil vus teni pipin, e pipin mun ni ngan xa teviei be nesao. Melele xa masxaxa buli, mikameti xa teviei teni be stedia[§] taosen lu e le tei (12,000).¹⁷ Di, masxaxa buli mita te vioh teni e mikameti xa ien duxoh kiubit^{**} handred tei hanutap lu e hat mun (144). Melele xa masxaxa buli mita te holesok nen xil ak, xi di nggusil sexien te pupuluon na moletin xil te ut etan.¹⁸ Vioh te taon ak, lapol ni ni hat hos xa minehin kuhi, ngan xa lakesi ni saspa. E taon xati, lapol ni ni gol xa memese xa minehin kuhi nggoni kilas e melele xa eai di milelue en.¹⁹ Vatit vioh te taon ak, lapol ni ni hisit hat hos xil holu: ngan xa diamu (1) be saspa, ngan xa be lu (2) nen be safaea, e ngan xa be tol (3) e xil be akat. E nesao nen, ngan xa be hat (4) e xil be emeral.²⁰ Ngan xa be lim (5) e xil be onikis, e ngan xa be tei e he sav (6) e xil be kanilian. Di, ngan xa be lu e he sav (7) e xil be krisolaet, ngan xa be tol he sav (8) e xil be beril, e ngan xa be hat he sav (9) e xil be topas. E nesao nen, ngan xa be he xalu (10) e xil be krisopres, ngan xa tei e le tei (11) e xil be takoes, e ngan xa be lu e le tei (12) e xil be ametis.²¹ Puiteh lu e le tei (12) lapol kekes ni xil ni valit vatiei hos te tas tei, ngan xa mahulong e minehin pupu. E suse xil te taon be gol xa memese kuhi e di minehin kuhi nggoni kilas xa mexal.

²²E melele xa naketeh mikapis e taon ak, natapus ti *Nim Eo* tova vata en, venggan xa Hi Suv te Xeihen e ngan xa nggoni sulut sipsip ludi e mesal, e moletin xil lakila lamot mi xalu e rute xil vus teni.

[§]21:16 Stedia tei nggoni teviei te stadium xa eilep te futbol. E 12,000 stedia pipin ni 2,400 kilomita.

^{**}21:17 Kiubit tei nggoni teviei te huhen ba duxoh vakuhen. E 144 kiubit pipin ni 60 mita.

^h21:8 Aes 30:33; Mat 25:41; Rev 19:20; 20:10,15; Sen 19:24; Sam 11:6; Esek 38:22; Rev 19:20 ⁱ21:10 Esek 40:2 ^j21:11 Aes 60:1,2,19 ^k21:12 Eks 28:21; Esek 48:30-35 ^l21:15 Esek 40:3,5 ^m21:16 Esek 48:16,17 ⁿ21:19 Aes 54:11-12

^{o23}Taon ak, minehinen te xeihen na Hi kestang di mileluv en, e ngan xa nggoni sulut sipsip iaxa be miehen teni. Mak, ma moletin xil xa ladi en latanem pupu ni ti meteneai mu aveti. ^p

²⁴Moletin xil te ut etan ti likakao e miehen nalu. E suv toto xil ti lileh holesok hos nae xil liha e taon ak tengan ti lisa ni mi Hi e ngan xa nggoni sulut sipsip. ^{q25}Puiteh xil te taon ak lisaha vehakut. Linakoe xol xil ti vatova, vengang xa vongien ihe tovuol en. ^{r26}Moletin xil te ut etan lileh holesok hos nae xil liha en tengan lisa ni mi Hi e mi ngan xa nggoni sulut sipsip. ^{s27}E ngan xil xa lapol misa, laluvos, mu lapol ni holesok xil xa tamal ti mu tamese ti, xil lasakras lava en vengang xa vonexil ihe tovuol en. Vengang taon ak be na ngan xil kestang xa latetis hisexil teti e Vanuvei te Meulien na ngan xa nggoni sulut sipsip. E xil kestang lak-ila liha en e liti e taon ak. ^t

Oei te meulien

22 Di, masxaxa pisen ni minou oeisal xa oei te meulien di mileh en. Napusi xa mexal e minehin nggoni kilas xa eai di mileluv en, e di mileh nggo pe von xeihen xa be na Hi e na ngan xa nggoni sulut sipsip. ^{u2}Oeisal ak mileh e hilaep te suse xa mahulong te taon ak. E seri oei xalu vus, vatiei xil lameul en xa huite xil teni di lasa meulien sal. Xil di laso huite e aveti lu e le tei (12) xil vus te huram xil vus. E ute xil mikila vatal rat mesien ra ngan xil xa langgo kantri

xil vus. ^{v3}E rute ak, halesil te tesaen nangepai ti mun holesok xil xa ladi en. ^w

Von xeihen xa be na Hi e na ngan xa nggoni sulut sipsip iti e taon ak, e moletin te polien nan xil limot mini. ⁴Xil lipus valnaon e simelelen xa hisen da en ite valnaoxil. ^{x5}Vongien ihe tovuol, e moletin xil linanem ni ti mun usil laet mu eai, vengang xa Hi Suv ihe miehen nae. E ti lilaxat ut xil vus ixoni suv toto xil vehakut xa vehakut tang. ^y

Mei rilomunen na Iesu

⁶Di, *masxaxa* biteni minou bit, “Sepinien xil ak be reitin e moletin xil likila liling nenesien nae iti en. Hi Suv xa misa Ninin nan mi *provet* xil, xi di misil masxaxa nan xil tengan lipisen ni mi moletin te polien nan xil neta xa mei istal navehi ti.” ^z

⁷Di, Iesu bit, “!Muteong kuhi! Nave nousav ti, inou nimeai. E tuxolxatien na Hi iti mi ngan xil xa lalong xat sepinien xa di nabit lelen ni nggo vanuvei ak usil naha xa mei istal.” ^a

⁸Inou, Sion, iaxa nalonge e napus holesok xil vus ak. E melele xa nalonge e napusi bus, natingeiril e namot pe le masxaxa xa pisen holesok xil ak minou. ^{b9}E xi biteni minou bit, “!Onapol ni ti namak! Vengang inou mun nabe ngan te polien na Hi nggoni xouk, nggoni tua namim xil xa labe provet xil, e nggoni ngan xil vus xa di lalong xat sepinien xa di e vanuvei ak. !Momal tengan umot mi Hi kestang!”

^{o21:22} Amos 3:13; 4:13; Rev 1:8; 4:8; 11:17; 15:3; 16:7,14; 19:6,15

^{p21:23} Aes 60:19-20; Rev 22:5 ^{q21:24} Aes 60:3,5

^{r21:25} Aes 60:11; Sak 14:7; Rev 22:5 ^{s21:26} Sam 72:10-11 ^{t21:27} Aes 52:1; 1Kor 6:9-10; 2Pit 3:13; Rev 22:15; Eks 32:32,33; Sam 69:28; Dan 12:1; Plp 4:3; Rev 3:5; 13:8; 17:8; 20:12,15 ^{u22:1} Esek 47:1; Soel 3:18; Sak 14:8

^{v22:2} Sen 2:9; 3:22; Esek 47:12 ^{w22:3} Sak 14:11 ^{x22:4} Sam 17:15; 42:2; Mat 5:8; Rev 3:12 ^{y22:5} Sak 14:7; Rev 21:25; Aes 60:19-20; Rev 21:23; Dan 7:18,27; Rev 5:10; 20:6 ^{z22:6} Dan 2:28,29,45; Rev 1:1,19

^{a22:7} Rev 2:16; 3:11; 22:12,20 ^{b22:8} Pol 10:25-26; Rev 19:10

¹⁰Xi biteni mun minou bit, “Onason sepinien xil ti xa di e vanuvei ak usil naha xa ti imei vengang melengien bemei sangas tangan holesok xil ak mei istal ihe reitin. ^{c11}Mak, ma ngan xil xa di lapol misa e sexien nae xil mikavui, lakila liti ni ngan taxa ti lipol ni holesok xil xa misa e mikavui. E ngan xil xa di lapol momal e meulien nae be eo, lakila litit ni ngan taxa ti lipol ni holesok xil xa momal e be eo.”

¹²Di, Iesu bit, “!Muteong kuhi! Nave nousav ti inou nimei. E mei nisa xolesi mi moletin xil kekes ihusil naha xa xi tepol ni. ^{d13}E holesok xil vus xa di, inou nateta tetiamu ni e ha nita itutou ni. Reitin, inou natehe vatite teni, e nihe hoxalite teni mun.” ^e

¹⁴Tuxolxatien na Hi iti mi ngan xil xa meulien nae memese tevi nggoni ngan taxa lakas moten eising nae. Hi imaen xil tangan mei lia huit vatiei xa di misa meulien sal. E xi imaen xil limei e vangit taon nan lixo puiteh teni tangan mei liti en vehakut. ^{f15}E hale te taon ak, ngan xil xa di langgusil sexien xil te ut etan lati nga: ngan xil xa di lapol ni eimas, ngan xil xa di lapol ni sexien te hoeasoen, ngan xil xa labas vin moletin, ngan xil xa lamot mi hi sav xil, e ngan xil xa labe vat luvosen. ^g

¹⁶“Inou, Iesu xa nasa masxaxa navan tangan vahit mesen holesok xil ak minuk tangan uhit mesen ni iha mi sias xil vus. Inou iaxa nabe ngan xa provet xil latehit

lelen ni latehit nimei nixo vatimol na suv toto **Deved** e nihur xeihen te lelatxatien nan. ^h

¹⁷**Ninin** na Hi e atou na ngan xa nggoni sulut sipsip di lukesi lubit, “!Amei!” ⁱ

E xamim vus xa di mulong sepinien xil ak, ti mukesi muhit, “!Amei!”

E mi xamim xa meruru di nggat xamim, xamim mumei. Io, mumei e mumu oei xa isa meulien sal mi xamim, vengang xa be sanien tei mi ngan xil vus xa iexil bei tangan lavuri.

Sepinien kor

¹⁸Inou, Sion, di nasa selxatien tei xa nggeih mi xamim vus xa di mulong sepinien xil xa di vanuvei ak xa bit lenen ni usil naha xa ti imei. Xosxa moletin tova iling xat sepinien tova mun isorin ngan ak, ma Hi iling xat pangasien xil liti en ixoni ngan xa latesep usili e vanuvei ak. ^{j19}E xosxa moletin tova ihur rat sepinien tova ihe reling vanuvei ak, ma Hi ihur rat voninen e ut nesao tangan naxa ti mun huit vatiei xa di misa meulien sal, e nava ti mun Taon Eo na Hi xa latesep usili e vanuvei ak. ^k

²⁰Ngan xa di bit lenen sepinien ak biteni bit, “!Reitin, nave nousav ti, inou nimei!” ^l

!Io li, amei Suv Iesu!

²¹Nasis tangan eheien hos na Suv Iesu iti mi xamim vus xa mube moletin nan xil. Reitin.

^c22:10 Dan 12:4; Rev 1:3 ^d22:12 Rev 2:16; 3:11; 22:7,20; Aes 40:10; 62:11; Sam 28:4; 62:12; Pro 24:12; Aes 59:18; Ser 17:10; Rom 2:6; 1Kor 3:8; 2Kor 11:15; 2Tim 4:14; 1Pit 1:17; Rev 2:23; 18:6; 20:13,14 ^e22:13 Rev 1:8; 21:6; Aes 44:6; 48:12; Rev 1:17; 2:8; 21:6

^f22:14 Sen 2:9; 3:22; Esek 47:12; Rev 22:2,19

^g22:15 1Kor 6:9-10; Rev 21:8,27

^h22:16 Aes 11:1,10; Rom 1:3; Rev 5:5; Nam 24:17; Rev 2:28

ⁱ22:17 Aes 55:1; Sion 7:37; Rev 21:6 ^j22:18 Dut 4:2; 12:32

^k22:19 Sen 2:9; 3:22; Esek 47:12; Rev 22:2,14 ^l22:20 Rev 2:16; 3:11; 22:7,12